


# Cana Coaunera Ere



New Testament in Urarina (PE:ura:Urarina)

# Cana Coaunera Ere

## New Testament in Urarina (PE:ura:Urarina)

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

### Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

b7ea44d4-3dbd-507b-9a19-256b56fe9b07

## Contents

|  |     |
|--|-----|
| Mateeocha Laenai . . . . .                   | 1   |
| Marocohacha Laenai . . . . .                 | 96  |
| Locasiicha Laenai . . . . .                  | 155 |
| Joaancha Laenai . . . . .                    | 261 |
| Ichanohichuru . . . . .                      | 327 |
| Roma Nenacaauru Rai . . . . .                | 433 |
| Coriintoo Nenacaauru Rai Leinjiin . . . . .  | 474 |
| Coriintoo Nenacaauru Rai Coroataja . . . . . | 512 |
| Galasia Batane Nenacaauru Rai . . . . .      | 537 |
| Efesoo Nenacaauru Rai . . . . .              | 551 |
| Filipoo Nenacaauru Rai . . . . .             | 564 |
| Colosau Nenacaauru Rai . . . . .             | 574 |
| 1Te . . . . .                                | 583 |
| 2Te . . . . .                                | 591 |
| Timoteeo Rai Leinjiin . . . . .              | 595 |
| Timoteeo Rai Coroataja . . . . .             | 606 |
| Tito Rai . . . . .                           | 614 |
| Filemoon Rai . . . . .                       | 619 |
| Ehereeocuru Rai . . . . .                    | 621 |
| Saantiaaocha Letoi . . . . .                 | 653 |
| Fedoroacha Letoi Leinjiin . . . . .          | 665 |
| Fedoroacha Letoi Coroataja . . . . .         | 677 |
| Joaancha Letoi Leinjiin . . . . .            | 684 |
| Joaancha Letoi Coroataja . . . . .           | 695 |
| Joaancha Letoi Nichataja . . . . .           | 697 |
| Jodasiicha Letoi . . . . .                   | 699 |
| Afocarifisi . . . . .                        | 702 |

## **Mateocha laenai Ena Nena Cana Coaunera Ere**

*Cana Coaunera Calaoihi Jesocurisito foerateracuru  
(Lc 3.23-28)*

<sup>1</sup> Caate Cana Coaunera Calaoihi Jesocurisito foerateeurera Rabiri aina Abaraaun foeratenojoinuru foerateeurera curu-aacurune.

<sup>2</sup> Isaca inaca neein nenaalu jetao Abaraaun.

Jana Isaca calaohilu jetao Jacobo.

Jana Jodaa aina rai nocoalacuru inaca neein nenaalu jetao Jacobo.

<sup>3</sup> Faresi aina Sara jetaote, Tamara que nebateein Jodaa bereecuru nelu.

Jana Faresi calaohilu jetao Esroon.

Jana Esroon calaohilu jetao Armi.

<sup>4</sup> Jana Armi calaohilu jetao Aminadaba.

Jana Nasoon jetaote, Aminadaba calaoihi nelu.

Jana Salomoon jetaote, Nasoon calaohinelu.

<sup>5</sup> Jana Raba que nebateein Salomoon calaohilu jetao Bosi.

Jana Roto que nebateein Bosi calaohilu jetao Oberi.

Jana Oberi calaohilu jetao Isaihasi.

<sup>6</sup> Jana Isaihasi jetaote, reyneein nenaalu Rabiri inaca nelu.

Jana Oriasi comasaineein nenaalu que nebateein, Rabiri calaohilu jetao Salomoon.

<sup>7</sup> Jana Salomoon calaohilu jetao Roboam.

Jana Roboam calaohilu jetao Abiasa.

Jana Abiasa calaohilu jetao Asa.

<sup>8</sup> Jana Asa calaohilu jetao Josafa.

Jana Josafa calaohilu jetao Joraam.

Jana Joraam calaohilu jetao Osiasi.

<sup>9</sup> Jana Osiasi calaohilu jetao Jotaam.

Jana Jotaam calaohilu jetao Acasi.

Jana Acasi calaohilu jetao Esequiha.

<sup>10</sup> Jana Esequiha calaohilu jetao Manasee.

Jana Manasee calaohilu jetao Amoon.

Jana Josiasi jetaote, Amoon calaohinelu.

<sup>11</sup> Jana Jeconiasi aina rai nejeraauru inaca neein nenaalu jetao Josiasi.

Nii bana jetaote, Isaraelitaauru mucuhin amanajaau-relu, acaauru atane caje roconajaain, Babilonia batane que ichaauru coina.

<sup>12</sup> Nitohaneein mucuhin amanajaauruhane baiha jetaote, rai calaohi Salatieli sirilu Jeconiasi. Salatieli calaohilu jetao Sorobaberi.

<sup>13</sup> Jana Sorobaberi calaohilu jetao Abiod.

Jana Abiod calaohilu jetao Eliaquiin.

Jana Eliaquiin calaohilu jetao Asoro.

<sup>14</sup> Jana Asoro calaohilu jetao Sadoco.

Jana Sadoco calaohilu jetao AQUIIN.

Jana AQUIIN calaohilu jetao Elioon.

<sup>15</sup> Jana Elioon calaohilu jetao Eleasar.

Jana Eleasar calaohilu jetao Mataan.

Jana Mataan calaohilu jetao Jacobo.

<sup>16</sup> Nii jana Jacobo jetaote, Curisito Mesihasi neba Marihana Jose inacanelu.

<sup>17</sup> Nitohaneein jetaote, niha Abaraaunne caje coauneein lechoonca jena saain nichoalateurelu, Abaraaun nefoerateuru, niha Rabirine que tiaaojoaain.

Nii Rabiri caje coauneein jetaote, lechoonca jena saain nefoerateurelu, Babilonia batane Isaraelitaauru mucuhin amanajaauruhane que tiaaojoaain.

Nii mucunajaain amanajaauruhane baiha jetaote, lechoonca jena saain nefoerateurelu, nejanoaa Curisitone que tiaaojoaain.

### *Nejanoaa Jesocurisitone*

*(Lc 2.1-7)*

<sup>18</sup> Naojoaainte nenea nelu Jesocurisito. Nii bana jetaote Jose aina ita raauruhane rai niha Marihane jana jetaote, jaiti ita aina neeuruhane ajiniha Cana Coaunera Suujue ichanohinee inae ausirinelu Mariha. <sup>19</sup> Nii jana esinae rauhijiriin jeriha Cana Coaunerane rijijieein cacha caohachain suujua coaraniha Josene jaun jetaote, nii chuni cacha rai canaanai siriha Marihane belanaala jianein caje amunaa jerelu.

<sup>20</sup> Nitohaneein inae amuhane coina suujua cuhane coauca Josene jana jetaote, sinihu rai ococohin jetao: "Jiaoriha Mariha raai ii comasainu quene coasiinera Rabiri nefoerateneein nenea Jose. Nii canaanai niicha siriite Cana Coaunera Suujue ichanohinee inanaanera.

<sup>21</sup> Inae leinjiin calaohirichain Marihara. Inae nejanoaa nii rai canaanaine jana Jesusoneein curuaateura. Osa caje rai cachaneein neeninuuru ichoteraanu nihane jaunte, Jesusoneein curuaareecha," nae jetao rai Cana Coaunera letono anjera.

<sup>22</sup> Nitohaneein jetaote, rai nere bera inoainsi *profeta* que:

<sup>23</sup> "Chariji bana

quicha aina ichoaelanaala nenea ranunate,  
inae ausirineein  
leinjiin canaanai siricheein.

Inae nejanoaane janate,

Emanoel neein curuaateeurureein cachaaaurura,”

naain nere bera inoaensi que beratiha Cana Coaunerane nainaelu.

“Emanoel,” naanete: “Cana Coaunerate cana aina ne,” nae.

<sup>24</sup> Inae niritiin sinihocane caje nocohin jetaote, nii rai aitoa Cana Coaunera letono anjerane tonoraain, comasainu que Mariha raelu Jose. <sup>25</sup> Nejetaote, nejanoaa nii Mariha calaohi- Jesoso neein Josecha curuaatine reentiaain, niri-jieein ita que turuelanaala ita aina ichaaorelu.

## 2

*Enoto mitu nichajai jeloon caje turuuruha Jesoso nejanoa coaraa arasijie caje cha coitucuurerane*

<sup>1</sup> Nitohaneein jetaote, Jodea batane que nenea Beleeun nejanoaelu Jesoso, jelai batane curuaanaaneein niha *rey* Erodesine bana. Nii jana jetaote, Jerosaleeun enoto mitu nichajai jeloon caje turuha uure itolere que nerelaain arasijieeuru caje cha coitucuureraauru cachaauru. <sup>2</sup> Inae ecu turuhin jetaote:

“Chu ne, nii Jorioocuru Curuaanaa *rey* nejanoanaa. Ocooca rai arasijiene coaracaanune jaunne turuhin coaraa uhacaanu, coroaecaanune coina,” naaure jetao turuhin, nii itolere coitucuurera cachaauru.

<sup>3</sup> Nii nejanoaane coitucuhin jetaote, jataain nererojoecae *rey* Erodesi, satiin Jerosaleen cocoaichacuru aina jiniiquin.

<sup>4</sup> Nii jaun jetaote, satiin saseredotecuru curuaanaacuru, Moisesa aitonjoan rauhi que cacha relaaurera, naaonjoainuri cotiharate Erodesi: “Chu nejanoareein Mesihasi,” naain acaauru caje bajaane coina. <sup>5</sup> Nii jaun rene turuhin jetaote:

“Jodea batane que nenea Beleeunte nejanoareeincha. Nitohaneein ecu nejanoaane coinete:

<sup>6</sup> ‘Jodaa atane que nenea Beleen nese,

coatiha ansijiin natiin

ii amurijiriin tabaain nenacaauru

neseeuru fautaain neriheeini,

ii que netiin nejanoarihani leinjiin Curuaanaa

canu cachaauru

Israaeli cocoaichacuru

coroatajaneraneein

nenaane jaaura,’

naain laenaelu Cana Coaunera ere bera *profeta* inoaensicha,” naaure jetao Erodesi rai.

<sup>7</sup> Nii jaun jetaote, nii chuni rai belanaala nii arasijie caje itolere coitucuurera cotiharatiha Erodesine jaun jetao, rai turuhin beeuruhane jaun acaauru caje esinae rauhijiriin, “Naaonjoain banate ococoelu,” naain nii ocooca arasijiene coitucue. <sup>8</sup> Inae nitohaneein rai beeuruhane caje coitucuhin jetaote:

“Chajaain Beleeun cuhin nii canaanai coanihuiche. Chucha ne. Cha cajecha nefoeratenaaneein ne. Chaen inae eruhichene carai biha uuchene canuhetonai coaraa uhene coroajera,” naain jetao nii itolere coitucuurera letoae Beleeun Erodesi.

<sup>9</sup> Niritiin acaauru letoaa *reyne* tonoraain Beleeun cuuruha nii itolere coitucuurerane jana jetaote, acaauru ajiniha cuujue nii arasijie- enoto mitu nichajai que ocoocane jana acaauruhacha coarai. Inae nii niha canaanaine jaun turuhin jetaote, ecu nichoae inacue nii arasijie.

<sup>10</sup> Inae ecu inauca nii arasijiene coaraain jetaote, jataain rachoojoeure nii arasijie caje cha coitucuureraauru. <sup>11</sup> Nitohaneein rachoojoeuruhane baiha loreri asae enohin coaracuruhane jana jetaote, neba Mariha aina niha nii canaanaine coaraain jetao, rohan nelauriaain nii canaanai coroaecuruhane baiha rai camela caje oro, enuha sacari jujui, chaen coretiin nena jujui, naaonjoainuri rocohin que nii canaanai belaihure.

<sup>12</sup> Nii baiha jetaote, nii niha acaauru letoaera Erodesine jaan jeloon situhin cauha cuuruhane coataa acaauru sini anuu caje coitucuhin jetao, leecha bero cuhane cuhin jelaia nataneu cauha cuure.

### *Egipto cuhin soroha Josene*

<sup>13</sup> Inae jelai caje amuuruha nii itolere coitucuurera *magocurune* jana jetaote, Jose sinihu rai ococohin jetao:

“Inae jetao nii canaanai ariha Erodesi sohin jaohane coina. Nii ajinihane ichei aitoon, nii canaanai aina rai neba amaa in Egipto batane que cuhin sorohine coina. Chaen ichei bihanune reentiaain ecu neeura,” nae jetao rai Cana Coaunera letono anjera.

<sup>14-15</sup> Nii jaun jetaote, sini caje nocohin nii canaanai aina rai neba amaa in jetao, janotiin soroe Egipto nichae cunaa bero cuhane cuhin Jose, oha Erodesine reentiaain ecu nihane coina.

Nitohaneein jetaote:

“Egipto caje coauneeinne canu Calaohi cotihareeunni,” naain beratihalu nere bera inoansi *profeta* que Cana Coaunerane nainaane coina ailu.

### *Canaanaihuru soaajeratiha Erodesine*

<sup>16</sup> Nitohaneein coritaain comarohin caauruha nii arasi-jie caje itolere coitucuurerane que nainaane jaun jetaote, jataain obajeein, ena nejanoanaa caje coauneein, coroata jaanacai que tiaaojoaain, Beleeun sacuritaain nenacaauru canaanaihuru, nii Jesoso nejanoa beeuruha itolere coitucuurerane bana caje coauneein nejanoanacaauru jitariin soaajerate Erodesi.

<sup>17-18</sup> Nitohaneein jetaote:

“Rama nese quete  
aohanrareein jataain inaderaain  
chananaa tabaihuri.

Raquerite

calaohichuru coisiha aitoreein.

Nete inae esinae rauhijiriin

ooruha calaohichurune jaun,

ajetera jerelanaala aite,”

naain laenaalu *profeta* inoansi Jeremiasine nainaelu.

<sup>19</sup> Nejetaote, inae oha Erodesine baiha jetao, Egipto niha Josene jana sinihu rai ococohin jetao: <sup>20</sup> “Chajaain nii canaanai aina rai neba amaaain jelaiha Israeli batane que caunihura. Inae ooruha nii canaanai sohin jaonaa jereraaurulura,” nae jetao rai Cana Coaunera letono anjera.

<sup>21</sup> Nii jaun jetaote, nii canaanai aina rai neba amaaain jelaiha Israeli batane que cauha cuelu Jose. <sup>22</sup> Nejetaote, nii rai inaca Erodesi coreeraniha niha Arquelaone coitucueratiha sinihu que Cana Coaunerane caje coitucuhin jetao, Jodea cuhane coasiha Calileea batane que cue Jose. <sup>23</sup> Inae nii Calileea batane que turuhin jetaote, rauhijiriin cuhin Nasarete neseu ichaoha cuelu. “Nasarete co-coaicha neeinte curuaareein Jesoso,” naain beeuruhalu *profetacurune* nainaane coina.

### 3

*Cana Coaunera Ere beebejiha Joaan Baotisitane*

(*Mr 1.1-8; Lc 3.1-9, 15-17; Jn 1.19-28*)

<sup>1</sup> Nii bana jetaote, Jodea batane que nenea cacha areroo ecocohin, ecu situnacaauru cachaauru cotijiaain acaauru rai Cana Coaunera Ere beebeje Joaan Baotisita. <sup>2</sup> Nitohaneein acaauru relaain jetaote:

“Inae nichuuntaa Cana Coaunera cojoanonaa. Aihane jaun nacoaauneein Cana Coaunera ere tonoraain, caohachaain inara ichao coreein neeuche,” naain jetao cachaauru rai beebejeein relanajae Joaan Baotisita. <sup>3</sup> Nii Joaan que jetaote: “Nerichaaain cacha areroo eheehejeein cacha cotiharanu.

Nii ajiniha caohachaain inara suujua baaso jianein,



caohachaaain inara suujua coaraain,  
 caohachaaain neeuche,  
 turuha Cana Curuaanaane  
 raotojeein raaichene coina,”  
 naain laenaclu *profeta* inoansi Isaihasi.

<sup>4</sup> Camecho ujui caje ichanohin cajione que cajionequuin jetaote, jacari caje ichanohin siitoroon que ichoraquuin, sisi-incho, irichaje, naaonjoainuri que lenoneein nelu nii Joaan.

<sup>5</sup> Nii cacha areroo neein cachaauru relaa Joanne coitucuhin jetaote, satiin Jodea batane caje, Jerosaleen caje, Jorodaan batane rohan caje, naaonjoainuri cajene maajeein turuhacoaain aonaa cuure arajii cachaauru.  
<sup>6</sup> Nitohaneein rene turuhin esinae rauhijiriin suujuelanaala osaaocuruhane beeuruhane jetaote, cojunacatenaaca nucuhe Jorodaan cuhane teein acaauru baotisarejetelu Joaan.

<sup>7</sup> Nejetaote, jataain arajiin rene turuhacoaauruha acaauru baotisaane coina fariseeocuru aina sadoseeocurune coaraane jaun jetao:

“Cha inara rai aite turu rai nenea caseteco tabai caje nichoteeichene coinata taibinaecuru- acano rijijieein nenacaauru cachaauru. <sup>8</sup> Aihane jaun nii ajiniha caohachaaain inara suujua coaraain caohachaaain ichaaoche. Aihute esinae rauhijiriin nacoaauneein Cana Coaunera coitucuhin, inara ichao coreein caohachaaain nenea jerequichene coaracurumiin leeochoaauru cachaauru. <sup>9</sup> Jiaonrihachu chaen nejesinajeein: ‘Canacaanune Abaraaun nefoeratenichaanu,’ naain irihache. Cana Coaunera naine caa ajeri caje niha natiin Abaraaun nefoerateeuru coaunaa ne. <sup>10</sup> Chaen techu inaaana inaeniha temulene, cojoaisi aina curuataain tero que sauhin usihanau mocohaca. Nii rijijieeinte inae esenetaaichuru letoaa cureein nii turuha uhenenu usi tabai jana.

<sup>11</sup> Canune esinae rauhijiriin nacoaauneein Cana Coaunera ere tonoraain neeichene coarateeichene coujunacane que, acauhanau teein inara coujunacateein inara baotisaan. Jana canu baiha turuha uhenite laen, inara suujue cuhane Cana Coaunera Suujue teein, usi quene maajeein inara coujunacateein inara baotisareein. Acate jataain canu amurijiriin cocoinaain letononeein ne. Canune fautaain cocoinaain letononeein neen. Nii rai safato amaeranu que niha natiin nelatejeehaan. <sup>12</sup> Charijieein teinti aroso taojiaain, jelai teein rai fero taojiae mocohane coina taicha. Nii rijieeinte, jelai teein coitucuurera raain, jana nii nere tonorana jerehanaala nenacaauru jelai teein mocoha cureein, chabana jacanaa charanejeein nenea usi que,” naain jetao cachaauru rai beebeje nii Joaan.

*Jesoso cojunacatiha baotisaa Joanne**(Mr 1.9-11; Lc 3.21-22)*

<sup>13</sup> Nii jana jetaote, baotisaa Joanne coina Calileea caje cuhin, nii niha Joanne jaau nucuhe Jorodaaun turuha cue Jesoso. <sup>14</sup> Nii jana jetaote, jauriaanejeein baotisanaa jerelanaala jetao:

“Chanuna ii canu baotisanaa naineei natiin, ii canu rene uhi,” naa Joanne jana jetaote:

<sup>15</sup> “Jauriaa niriimiin ena. Jauriaanejeein satiin aitoha Cana Coaunerane jaan ichacaanete caohachae,” nae jetao Joan rai Jesoso. Niritoha raine jaun jetaote, jerihane rijijieein baotisae Joaan. <sup>16</sup> Nitohaneein coujunacatiha acauhanau teein baotisaa Joanne jana, acau caje mituha Jesusone rijieoritiin jetaote, neyoracaa dede bacuujuane jana, leinjiin serori rijijieein nichoae fauha uha Cana Coaunera Suujuene jana coarae Jesoso. <sup>17</sup> Nii jana jetaote:

“Caate jataain quiicha belaaain canuhacha cocoinanohin canu Calaohi nera,” naain toniha erenaa dedeune jana aonajeeunre.

**4***Baaso que Jesoso sarunaa jeriha moconajaerane**(Mr 1.12-13; Lc 4.1-13)*

<sup>1</sup> Nii baotisaa Joanne baiha jetaote, Cana Coaunera Suujue amanojoneein cacha areroo cue Jesoso, ecu coujuhin coaraa moconajaerane coina.

<sup>2</sup> Nitohaneein cacha areroo niha jenachoonca jiichooneein, jenachoonca janotiineein lenone lanaalane baiha mijiitoha Jesusone jana jetaote, <sup>3</sup> coujuhin coaraane coina rene turuha cue moconajaera.

Nitohaneein rene turuhin jetaote: “Chajaain aihane esinae rauhijiriin Cana Coaunera Calaohi neeine, caa ajeri jabero-cooru rai aitoote lenoneneein nerotomiincha,” naa Jesoso rai moconajaerane jana jetaote: <sup>4</sup> “Nete Quiricha inoaensi cuhane: ‘Coatiha lenoneecha que ichaonaa nainiheii cacha. Cana Coaunera ere tonoraain, jerihane rijijieein ichaohanete nainere, jerichanejeein ichaoha cachane,’ naain laenanohineein ne Cana Coaunera Quiricha inoaensi cuhanera,” nae jetao moconajaera rai Jesoso.

<sup>5</sup> Niritoha raine baiha jetaote, Cana Coauneraaacha que banjiaain nena Jerosaleeun nese que nena Teenforo ecuunni choae Jesoso inaain jetao:

<sup>6</sup> “Chajaain aihane esinae rauhijiriin Cana Coaunera Calaohi neeine caalai caje nomaroteeute coaracaa. Cana Coaunera Quiricha inoaensi cuhanete:

‘Rai letonocuru anjeraaurute  
 letoareein Cana Coaunera,  
 ii beraaihuruhane coina.

Acaaurute

rai biji que ii michuurureein,

nabana ajeri que necunaitaaine coataa,’

naain laenaerate Cana Coaunera,” naa rai moconajaerane jaun jetaote: <sup>7</sup> “Chaen techu Cana Coaunera Quiricha inoaensi cuhane: ‘Jiaonriha ii Curuaanaa ii Coaunera coujuhin coaraaine,’ naain laenanohineein ne,” nae jetao moconajaera rai Jesoso.

<sup>8</sup> Satononejeein jetaote, jataain ecuuneein nenea ichatane ucuuno que amaain jetao, jitariin caa chauratane que nacaauru neseuru coarateein, que nelatein ichaonacaaurune maajeein coarateein jetao:

<sup>9</sup> “Jitariin caa ena iicha coaraine ichei tereeni, neseonriiaain canu coroaequine,” naa Jesoso rai moconajaerane jana jetaote: <sup>10</sup> “Cana Coaunera Quiricha inoaensi cuhanete: ‘Leinjiin ii Curuaanaa ii Coaunera corojeein raaicha nelatein rai nere tonoraau,’ naain laenanohineein nera. Chajaain ena canu caje amuhachaaura moconajaera,” naain jetao moconajaera sitae Jesoso. <sup>11</sup> Niritiin moconajaera sitaa Jessosone jaaun caje amuhane jana jetaote, rene turuhacoaain coroatajanecure anjeraauru.

*Calileea cachaauru relaane nunuhetiha Jesusone*

*(Mr 1.14-15; Lc 4.14-15)*

<sup>12</sup> Caresero cuhane Joaan enoaauruhane coitucuuriin jetaote, Calileea nichae cuelu Jesoso. <sup>13</sup> Nejetaote, Nasarete ichoaelanaala, Saboloon aina Nefatalii nefoerateeuru atane que nenea nemuri auhaniha Caferenaan ichaoha cuelu.

<sup>14</sup> Nitohaneein jetaote:

<sup>15</sup> “Cucuana auhaniha Jorodaan jerau

Saboloon aina Nefatalii atane-

Calileea ichaonacaauru

Jorioniheichurute

inae jianacoon rai nichao baaso caje mituurureein.

<sup>16</sup> Jana nii ooruhane bana nitajeeneeurite,

inae leeocha ichaonaa que ichaaore,”

naain laenaalu *profeta* inoaensi Isaihasine nainaelu.

<sup>17</sup> Nii caje coauneein jetaote: “Inae nichuuntaa Cana Coaunera cojoananaa. Aihane jaun nacoaauneein Cana Coaunera coitucuhin, caohachaaain inara suujua coaraain, caohachaaain neeuche,” naain jetao cachaauru rai beebejeein acaauru relae Jesoso.

*Jenai ate mucuurera cotihaca Jesusone*

*(Mr 1.16-20; Lc 5.1-11)*

<sup>18</sup> Nii cachaauru relaane caje Calileea conemuri auhaniha cuujihane jaun jetaote, corotajai ita nejeraauru Simoon Fedoro neein acaauruhacha curuaatei, chaen rai nejera Anderesi, naaonjoainuri erue jetao Jesuso, acaauru amiha- neeo niha ate mucuuruhane jaun, ate mucuuruhane coina acauhanau rai rede nalaecuruhane jana. <sup>19</sup> Nii jana acaauru coariin jetaote:

“Chajaauche canu ainate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesuso.

<sup>20</sup> Nii rijieeoritiin jetaote, acaauru rai redeeuru ratiriin Jesuso aina cuure. <sup>21</sup> Nii caje basiinjiin cutiin jetaote, corotajai ita nejeraauru Sebedeoo calaohichuru Saantiaao, Joaan, naaonjoainuri coari Jesuso, leinjiin bote cuhane neein acaauru rai redeeuru rucuheca neeuruha rai inaca aiñane jana. Nitohaneein coarinajaain cotihanaaca Jesusone jaun jetaote, <sup>22</sup> nii rijieeoritiin bote cuhane acaauru inaca ratiriin caaijie cuure.

*Arajii cachaauru relaa Jesusone*

*(Lc 6.17-19)*

<sup>23</sup> Nitohaneein cuhin jetaote, Calileea sacuritaain cuhe- cujueein, sinacocaauru naineen enohenojoeein cachaauru relaain, Cana Coanera cojoanonaa erenaa raotono que ereerejeein, itolere cunai caaun cunaitenacaauru, jaberoco que cunainojoiriin nenacaauru, naaonjoainurine maajeein rautaacoae Jesuso. <sup>24</sup> Nii jana jetaote, satiin Siria batane sacuritaain inae Jesuso benaa coitucuhin jetao, araai laurii cunai caaun cunaitenacaauru, jaberoco que cunanacaauru, coitu- cuchuhi que suujueconacaauru, otonacaauru, bacosacuru, naaonjoainurine maajeein rene amaauruhane jana jetao, acaauru rautaacoae Jesuso.

<sup>25</sup> Nitohaneein jetaote, Calileea nenacaauru neseeuuru, Decapolis, Jerosaleen, Jodea, Jorodaan batene uurihuru, naaonjoainuri cajeeeurune maajeein cuhacoaain jetao, Jesuso sacuhin rene turuhacoaare arajii cachaauru.

## 5

*Ichatane ucuuno que cuhin ecu cachaauru relaa Jesusone*

*(Lc 6.20-23)*

<sup>1</sup> Arajiin rene turuuruha cachaaurune coaraane jaun jetaote, aina nerelanacaauru aina jiniiquiin ichatane ucuuno que iniin jetao, ecu nelauriariin lauheque Jesuso.

<sup>2</sup> Nitohaneein ecu netiin acaauru relaain jetaote:

<sup>3</sup> “Nerausiaaecuruha latiha acaauru suujuane coitucuhin nenacaauru, Cana Coaunera Cojoanonaa que neeuruhane jaun.

<sup>4</sup> Nerausiaaecuruha inaderaaeriin ichaonacaauru. Niichurute cairichaaajoaain coarae Cana Coaunera.

<sup>5</sup> Nerausiaaecuruha leeochoaauru amurijiriin nenea coacuelanaala raotojoein ichaonacaauru.

Niichuru raite, acaauru que banihateein niicha rucujuei atane tereein Cana Coaunera.

<sup>6</sup> Nerausiaaecuruha corajeein esinae rauhijiriin jeriha Cana Coaunerane rijijieein leeochoaneein namute cacha coaraelanaala, niheichu namute cacha cairichanaa coacuhin niha leeochoane jerelanaala, naaonjoaain caohateraneein nenacaauru niicha coaana jerei coaracururichaaaine jaun.

<sup>7</sup> Nerausiaaecuruha cairichaaajoaain leeochoaauru coaraain, chaelai lateein neeuruhane, acaauru coroatajanein naaonjoaain nenacaauru.

Nii rijijieeinte cairichaaajoaain acaauru coaraain, jeelai amuritoheriin acaauru coroatajanereein Cana Coaunera.

<sup>8</sup> Nerausiaaecuruha caohachaaain suujua coaraain caohachaaain ichaonacaauru.

Niichurute esinae rauhijiriin Cana Coaunera aina jini-iqiiin niha cuurureein.

<sup>9</sup> Nerausiaaecuruha raotojoein jiniiquiin ichaauru cachaaurune coina coroatajanein ichaonacaauru.

Niichurute rai calaohineein teein acaauru coareein Cana Coaunera.

<sup>10</sup> Nerausiaaecuruha Cana Coauneraacha jerei ichacuruhane coreniha mucunojoneein, casetecanojoneein, arinojoneein, naaonjoaain nenacaauru, Cana Coaunera cojoanonaa que neeuruhane jaun.

<sup>11</sup> Nerausiajeeinte neeiche canu cachaneein neeichene coreniha inara nocoeje chanuhin, inara sohin, joareein inara que ereein, naaonjoaan cachane.

<sup>12</sup> Nitohaneein techu cairichaerinojoneein rautanohinelanaala ichaaorelu Cana Coaunera ere bera inoansihuru *profetacuru*, inara ajiniha nenacaaurulu.

Aihana jaun raotojoein rachoojoein, chaque tonajelanaala neeuche, dedeeu raoti ichaonaa que inara coreterihani Cana Coaunerane jaun.

*Lenone raotono tera aina cacha conaeraneein nenea (Mr 9.50; Lc 14.34-35)*

<sup>13</sup> Charijieein teeinti setuhane coataa, tebe que iniho colaain rucuhecaa. Nii rijijieeinte nabana nitajeeuruha cachaaurune coataa, acaauru ichao baaso rucuheneein neeiche. Inae lenone cotebetenaa naineniha tebene, inae lenone raotono tenaa nainerihe. Nechu joaenreen atane

ichoae jaonojoneein, shaonohineein nihane coinaachate nelate. Nii rijijieein inara netonai, cacha rai ichaonaa raotono coaratelanaala cacha relaeneeichene, inara netonai nii chaque nelatelanaala neriquicheein.

<sup>14</sup> Ichatane ucuuno que niha leinjiin nesene, nihei chuni coaraelanaala nainejei. Nii rijijieein techu satiin cacha notaracae inara aina cuaain niicha jerei coaratiha Cana Coaunerane jaan- cono rijijieein neeiche.

<sup>15</sup> Nii rijijieein nihei chuni cono mocohin darohe asae tera. Bujuaihu telanaalate ucuun tihaca, satiin conohanau tururuha loreri asae turunacaaurune coina.

<sup>16</sup> Nii rijijieein cacha cononeein satiin cachaauru que caohacha ichaquichene coarateein, acaauru que coitucuerateein neeuche. Aihute esinae rauhijiriin caohacha ichaquichene coaraain Cana Coaunera coroaecuruhine cachaauru.

*Cachaauru relaa Moisesane jaan- rauhi coitucueratiha Jesusone*

<sup>17</sup> Coatiha inara relaain nihalu Moisesane jaan rauhi jianein neeichene coina, cau turuhin nihaaun. Nihieichu inara relaauruha *profetacurune* jaan jianequichene coina turuhaaun. Nenacaaen nejian, nii inara relaauruhane jaan coitucuhiche esinae rauhijiriin jeelai amuritoheriine coina, 'Naaonjoain quete aite,' naain inara rai biha uun.

<sup>18</sup> Esinae rauhijiriine inara rai aitoreeunni, jaiti niha dede, chauratane, naaonjoainurine que tiaaajoaain, coatiha aninoerarinaai le erenaanejeein, satiin nii aitohane rijijieein situhane reentiaain, nii Cana Coaunera tenojoin Rauhi Inoaensi. <sup>19</sup> Nitohanihane jaun nii rauhi inoaensi caje leinjiin leeochoauru fautaain nelatihei rijijieein nenea rauhi tonoraelanaala nenea, niheichu que leeochoauru relaenihane, acate Cana Coaunera Cojoanonaa que jataain nelatenereein. Nete caohachaaain tonoraain, nii aitoha Cana Coaunerane rijijieein ichaohin, esinae rauhijiriin leeochoauru relaerate, jataain nelatineein nereein Cana Coaunera Cojoanonaa que.

<sup>20</sup> Rauhijiriine inara rai aitoreeunni, Moisesa aitoonjoan rauhi que cacha relaaurera aina fariseeocuru amurijiriin, inara rai Cana Coaunera aitoonjoan tonoraain rijijieein niicha icharatei ichaeneeichene, coatiha Cana Coaunera Cojoanonaa que ichaonaa naineriheicheein.

*Namute cacha aina obaecane caseteco coarihanine que cacha relaa Jesusone*  
(Lc 12.57-59)

<sup>21</sup> Inarate coitucuhiche: 'Jiaoriha sonajaain jaohichene. Sonajaain joerate caseteco coaareein,' naauruha inara foerateurera rai ne. <sup>22</sup> Nena laen canu inara rai aitoon. Chunochoa namute cacha aina obajei, nii obaecane jaan jera aina

rucujeein que suujua acatelanaala nenaate, caseteconein niha cureein. Jana rai nejera que ‘Cha coitucuheeli,’ naain ereite, casetecaeratereein nitohanai rucuhecuruhane coina nenacaauru- *Junta Supremacuru*. Jana, ‘Chaque nelatiheeli inacojoeinte neei,’ naain namute cachaauru que ereite, usi tabai jana nijiaoreein.

<sup>23</sup> Aihana jaun ii que suujua acatiha Cana Coaunerane coina chaelai amaai que belaaaine coina Teenforo asae nena rori- *altar* ichoaene jana, ii cotaairiin niha chamute cachane que coaaquine, <sup>24</sup> jauriaanejeein caohachaaain neein ii cotaairicha ainane coina, nii rori acatiha nii iicha amai ratiriin, aina rucuhenuhu. Inae aina caohachaaain rucuhequine baihate laen nainereei jelaiha cuhin nii rori- *altar* ichoae nii Cana Coaunera belaaaine jaan teeine.

<sup>25</sup> Chunocoha inara amute cacha, cocoinanacaaihuru rai inara coulurujeein nihane, raotojoein aina ereein rucuhuche, joesio rai inara colurujihane coataa. Ainee-ichenete folisiaa rai inara tiha joesione, caresero cuhane inara enoaurureein. <sup>26</sup> Nitohanein ichaeneeichenete nii caresero cuhane neriquicheein mituhelanaala, nii baaso ichaquichene coretequichene reentiaain. Esinae rauhijiriine aitoon inara rai.

*Comasainelanaala nena ene dadaeniha cachane coina relaa Jesusone*

<sup>27</sup> Inarate: ‘Jiaonriha inara sinijeranelanaala nena ene dadaaichene,’ naain inoaelu inara relaauruhalune coitucuhiche. <sup>28</sup> Esinae rauhijiriine laen canu inara rai aitoon. Chunocoha suujua cuhane ene jereein coarate, suujua cuhane nejelau ene que naosate.

<sup>29</sup> Inara nota osa que inara sarunaa jerihane nii inara nota que coaraain, inaraacha jerei caje amuuche, nabana inara nota coreniha baaso ichaquichene, inara notaacha usi jana cuelanaala, satiin inara jaberoco usi jana nitajihane coataa. <sup>30</sup> Jana inara biji osa que inara sarunaa jerihane, coa nii inara biji turuaache nii inara sarueratenaa jerihane jaan que. Mucuhichene ajiniha caje amuuche. Nii inara bijiicha mocoelanaala, inara jaberocone maajeein usi tabai jana nitajihane coataa.

*Ene raain joeranihane, osa que nesaruha cachane que, cacha relaa Jesusone*

*(Mt 19.9; Mr 10.11-12; Lc 16.18)*

<sup>31</sup> Chaen techu inoaelu: ‘Chunocoha comasai joeranihane, nii comasai jaohane jaan cocoiricha teeuche raite aina comasai jaohine,’ naain inara relaaurelu. <sup>32</sup> Esinae rauhijiriine laen canu inara rai aitoon. Leeocha cacha aina

ichoaenihane jana comasai joerate, inae osa que nesarue. Jana nii quicha jaonjoin ene raerate, jerichanejeein osa que nesarue.

*Cana Coaunerate coaraje, naain nohaniha cachane que, cacha relaa Jesusone*

<sup>33</sup> Chaen techu inara inoaensihuru rai: 'Jiaonriha Cana Coaunera notaracae netiin, Cana Coaunera bajaain, rai chaelai benatequichene nihanatiin teneeichene,' naauruhane coitucuhiche. <sup>34</sup> Esinae rauhijiriine canu inara rai aitoon. Jiaonriha joareein inacojoein: 'Cana Coaunera coreniha,' naain ereeichene. Niheichu: 'Dede coreniha,' naain erena nainiheeiche, Cana Coaunera nelaurianaja niha dedene jaun. <sup>35</sup> Niheichu atane coreniha nihanatiin nainiheeiche, nichaauraa Cana Coaunerane jaan nihane jaun. Niheichu Jerosaleen coreniha nihanatiin, Cana Coaunera nese nihane jaun. <sup>36</sup> Niheichu inara couturi coreniha chaelai ichaquichene coina erena nainiheeiche, inara jerequichene que jichosiin, nesomaraain, naaonjoaain nenerihani inara coturijine jaun. <sup>37</sup> Chaelai que: 'Icharihanuhin,' naaichene ichacuche. Jana: 'Icharihaauni,' naaichene coa ichacache. Nelatihei cha ichaeraanu rijitiin nohaneein irihacane. Niite baaso ne.

*Soeraane, nerinanaa nainenihha chunine que cacha relaa Jesusone*

*(Lc 6.29-30)*

<sup>38</sup> Inarate inoaenlu: 'Chatohaneein inara soeraniha inara cunaitaaine, inara netonai cunaitaain nii inara soera sooche,' naauruhane coitucuhiche. <sup>39</sup> Esinae rauhijiriine canu inara rai aitoon. Jiaonriha chatohaneein baasoneein teraquichene neurinanaa coaaquichene. Aihane jaun inara meri faohitoroanihane, rai jera netonai icharatecuche. <sup>40</sup> Chunocoha cocoinanacai rai inara colurujueein inara obiri ruluhane, nii jelaronaa bana inaraacha jiai inara obirine maajein teeuche. <sup>41</sup> Inara que anajiin amaeratiha cocoinanacai, inara laurinelanaala nenaane, nii bajaane amuritoheriin amanaa nainequichene coarateein amaauche. <sup>42</sup> Inara caje niicha latei bajaain niha cachane, rai teeuche. Jana inara rai cainaane coina chaelai bajaain niha cachane, chunaelanaa rai niicha latei teeuche.

*Cotaicha belaa niha cachane coina cacha relaa Jesusone*  
*(Lc 6.27-28, 32-36)*

<sup>43</sup> Chaen techu inoaenlu: 'Inara belaichaauru belaa, inara cotaihurera cotaihuhe,' naauruha inara raine coitucuhiche. <sup>44</sup> Nena laen canu inara rai aitoon. Inara que nejeratenacaauru belaihuhe. Inara rohecaera rai Cana Coaunera bajaauhe. <sup>45</sup> Nitohaneein neeichenete,



dedeeu nenea Cana Inaca Cana Coaunera calaohineein neriquicheein. Acate enoto coauna, cojoanoonetojoein nechu aansaineein nenacaauru rai, caohachain nenacaauru rai, naaonjoainuri conaeranu que nihane coina. Chaen techu suujua coaraelanaala nenacaauru rai, suujua coaraain nenacaauru rai, naaonjoainuri rai elo letoae acaauru rai caohachanu que. <sup>46</sup> Jana acaihaniji inara belaichaauruhacha belaaichene, chatohanai que jana inara belaiche Cana Coaunera, inae cuu tihane bana. Coaracuche nachuhinti Roma curuaanaa rai *impoestonu* que coriqui bajaaurera netonai jataain nechu aansaineein neeuruha natiin, nitohaneein ichaaoruhane. <sup>47</sup> Jana inara belaichaauruhacha rai raotojoein ereein, leochaauru aina raotojoein erelanaala, naaonjoaain neeichene, chatohaneeinna jana esinae rauhijiriin inara ichao coreein neeichene coaracurure cachaauru, Cana Coaunera coitucuruhi nihanatiinte, inara rijijieein neeure. <sup>48</sup> Aihana jaun caohachain rauhijiriin neeuche, aihana Cana Coaunerane rijijieein.

## 6

### *Caohacha ichaa cachane coina cache relaa Jesusone*

<sup>1</sup> Jiaonriha nechu raujiaain inara coaracuruha cachaaurune coinaacha cache notaracae Cana Coaunera jerenohin ichaquichene. Nitohaneein neeichene coatiha chaque inara rai cainarinaain Cana Coaunera. <sup>2</sup> Aihana jaun cha lateein nenacaauru coroatajanequichene, jiaonriha itolereenein cachaauru rai been acaauru coroatajanequichene. Cana Coaunera coitucutoha nocoetonacaaurute cache notaracae, nechu jataain acaauru aina caohachain niha cachane coina, Sinacoca asaa, bero cuhane, naaonjoaain cache belaihure. Jiaonriha acaauru rijijieein ichaquichene. Acaaurute nechu jataain aihure, acaauruhacha esenetaain, caohachain acaauru coaraa cachane coina. Nete inae caohachain acaauru coaracuruha cachaaurune que inae cainanohine acaauru rai.

<sup>3</sup> Aihana jaun inara, cairichaihuru coroatajaniha cha teeichene, jiaonriha jataain inaraacha belai rai niha natiin beeichene. <sup>4</sup> Nitohaneein esinae chuni que coaratelanaala teeichene coaraanete, inara rai cainareein cana Inaca Cana Coaunera.

### *Cana Coaunera bajanaa que cache relaa Jesusone (Lc 11.2-4)*

<sup>5</sup> Cana Coaunera bajaichene, coa bajaauruha Cana Coaunera coitucutoha nocoetonacaaurune rijijieein bajaache. Acaaurute sinacoca asaa, joareein bero cuhane,

naaonjoainu neechuru Cana Coaunera bajaare, nechu jataain caohacha ichaa nocoetiin aihuruhane coaracuruha cachaaaurune coina. Nete nii coaracuruha cachaaaurune coina aihuruhaneecha que, inae cainanohine acaauru rai.

<sup>6</sup> Nete laen ii Cana Coaunera bajanaa jereeine, caohacha jelai netiin coaraeniha chunine jana, bujuaihu ucuha cuhane netiin ii Inaca Cana Coaunera bajaaine caohachae. Nito-haneein chuni que necoharaeratelanaala netiin bajaachene coaraanete, inara rai inaraacha bajai tereein ii Inaca Cana Coaunera.

<sup>7</sup> Cana Coaunera bajaachene, coa acaauru rai ecaantocuru bajaare bajaacuruha araai saain Cana Coaunera coitucuhichurune rijijieein joaenreen ereerejeein bajaache.

<sup>8</sup> Aihana jaun jiaonriha acaauru rijijieein neeiche inarane.

Cana Coaunerate, caje bajaachene ajiniha inara suujua cuhane inaraacha latei latequichene coitucue.

<sup>9</sup> Aihane jaun Cana Coaunera bajaachene:  
‘Satiin canacaanu Inacaneein dedeeu nenea Ofa,  
Iineein neeine coitucuurumiin satiin cachaauru.

<sup>10</sup> Turuhine Ii Cojoanonaa.

Caa chauratane que iicha jerei ichacurumiin,  
dedeeu ichacuruhane rijijieein.

<sup>11</sup> Cojoanoonetojoein canacaanu rai lenone ocoteeu.

<sup>12</sup> Baaso ichacaanne,  
canacaanu que ii suujua acateeu,  
canacaanu rai baaso icharaauru que,  
canacaanu suujua acatichaanune rijijieein.

<sup>13</sup> Jiaonriha osa que nesaruhin  
nihacaanune nainatejeein neeine.  
Canacaanu caje moconajaera sitaau.

Inae,  
naain Cana Coaunera bajaache.

<sup>14</sup> Inara rai baaso icharaauru que, inara suujua acateein,  
acaauru aina caohachaaain neeichenete, Cana Coaunera netonai inara que suujua acatena nainereein. <sup>15</sup> Jana inara rai baaso ichaaain neuruha leochaaurune jana, acaauru que inara suujua acateneeichene, Cana Coaunera netonai inara osa que suujua acatenereein.

*Suri noitelanaala netiin Cana Coaunera bajaauruha  
cachaaaurune que, cache relaa Jesusone*

<sup>16</sup> Inara suri couu netiin Cana Coaunera bajaachene, jiaonriha aihuruha Cana Coaunera coitucutoha nocoetonacaaurune rijijieein, nechu inara suri couu neeichene coaracuruha cachaaaurune coina coa cunaitenaa meri tocohaneein inara meri tihache. Inae nitohaneein ichacuruhane coaraain

acaauru belaichuruha cachaurunete, nii acaauru belaichuruhaneecha que inae cainanohi ne acaauru rai. <sup>17</sup> Jana inara, inara suri couu netiin Cana Coaunera bajaachene, inara meri culejeein neruujeein raotojoein bajaauche, <sup>18</sup> inara suri couu netiin Cana Coaunera bajaachene que nainacuruha cachaurune coataa. Nii banate laen leinjiin Cana Coauneraacha inara belaicheein, inara suri couu netiin bajaachene coreniha.

*Dedeeu raoti ichaonaanaja*  
(Lc 12.33-34)

<sup>19</sup> Coa caa chauratane que raotiin nenea coacuhin, coriquihona neein itolere rucuhale sirina coacuhin nihache, inara rai cojoanojoiin nitajeein, basijiaaurureein asijiautooru, naaonjoanrichaaine jaun. <sup>20</sup> Caa chauratane que caohachain nenea coacuhin mainajeein amihaneein coriqui taojiaaichene jianein, nii aaichene rijijieein mainajeein Cana Coaunera rai itolere caohachanu ichana que amihaneechete dedeeu inara rai cainanohinemii. Nii dedeeu laen asijiaatooru nihanatiin turuhin inara basijiauna nainerinaain. Niheichu cojoano, ecu enohin aasaena nainerinaain. <sup>21</sup> Nitohanihane jaun jauriaanejeein caohatiin coaacuche, inara ichao rai inaraacha ichanenu que. Inara ichao rai jataain nelateineein niha coriquine esenetaaichene acaacha ichacuche. Jana inara ichao rai nelateineein niha Cana Coauneraacha icharatenohine esenetaaichene acaacha ichacuche.

*Cacha jaberoco conaeraneein niha cacha suujuane*  
(Lc 11.34-36)

<sup>22</sup> Inara notate inara suujua que itolere inaraacha coarai coitucueratera ne. Aihana jaun inara nota que inaraacha coarai coitucuhin, ichaquichene caohatiha inara suujuane tonoraai ichaeneeichenete jianacoon neriquicheein. <sup>23</sup> Jana inara nota que baasonihane coaraquichene saijieein, inara suujua nii baaso ichaquichene jerihane rijitojoein baaso ichaquichenete, nocohenaanau nijiaonreein inara suujue.

*Coriquiicha que coacuhin Cana Coaunera jerenohi ichana jereniha cachane*  
(Lc 16.13)

<sup>24</sup> Nihei chuni corotajai curuaana letononeein nenea nainei. Leinjiin belain acaacha ere tonoraain, nii leochoa que jaolequiin nere tonoraenerihane jaun. Nii rijijieeinte Cana Coaunera sacunaa nainene cacha, coriquiicha que coacuhin nihane.

*Jerihane rijijiein ichaonacaauru cachaauru ichao beraiha  
Cana Coaunerane  
(Lc 12.22-31)*

<sup>25</sup> Nitohanihane jaunne inara rai aitoon. Coa lenoneein acau cohin ichaohichene jaanu, inara cajione, naaonjoain que nererojoecaaeriin nihache. Tana lenone amurijiriin nelatiha inara ichaone jana, cajione amurijiriin nelatiha inara jaberocone coitucuhin neeichene. <sup>26</sup> Coaracuche nachuhinti temule jaain niicha quiineeuri taojiaain rucuhecuruhane jaanu coloheri siriin naaonjoaain neeururiha tajaacuru. Nete laen cana Inaca Cana Coaunera, lenoneein ichaauruhane coina acaauruhacha quine teein ne. Inarate nii tajaacuru amurijiriin jataain nelateein neeiche. <sup>27</sup> Inaaonjoan saneein niha natiin itolereneein suujua cuhane coaauca cachane niha natiin, nichao cariaain ichaonaa nainihe. <sup>28</sup> Chanuna inara cajione que nererojoecaaeriin neeiche. Coaracuche nachuhinti ajenacuru niicha jiaaenine que nichanaa ichaain, amihaneein, naaonjoaane que airijiin omarohin, jataain caohatonanaain ujuaneein naaonjoaain neeuruhane. <sup>29</sup> Jana *rey* Salomoon, coatiha nii aihuruha ajenacurune rijijiein niheil, caohati cajione que necoreetein nihalune saijiein. <sup>30</sup> Tana mocohin nitajerai niha ajaenane saijiein, caohachaaain omarohin nihane jaanu teein niha Cana Coaunerane coitucuhichene. Chanuna jana chaen, nii amuritoheriin inara cajioneterichaaain Cana Coaunerane esenetaeneeichete, cha esenetana jeriheichuru cachaauru. <sup>31</sup> Nitohanihane jaun nainiheiche: ‘Chaque lenoneeinna acau cohin, necoreetein, naaonjoaain nerichaache,’ naain que nererojoecaaain nena nainiheiche. <sup>32</sup> Cana Coaunera coitucuhichurute, niicha que nererojoecaaain niicha sacunaa jere. Nete laen Cana Coaunera inaraacha latei latequichene coitucue. <sup>33</sup> Aihana jaun Cana Coaunera Cojoanonaacha que coacuhin, jeriha Cana Coaunerane rijijiein ichaohin, niicha jereeicha ichaechajeein neeichenete, satiin caa inara rai aitocaaunne jaan tereein Cana Coaunera. <sup>34</sup> Jiaonriha eresi inaraacha ichaneni que coacuhin nererojoecaaichene. Le janonaa bana naineein, canaacha ichaneni que coaaucaachenete caohachae.

## 7

*Jiaonriha leeochoaauru ichao coulurujueeichene  
(Lc 6.37-38, 41-42)*

<sup>1-2</sup> Coa leeochoaauru ichao coaraain coulurujueein nihache. Nabana nii leeochoaauru colurujueeichene rijijiein, inara coulurujihha Cana Coaunerane coataa. Nii leeochoaauru

coaraain neeichene rijijieeinte inara netonai coaareein Cana Coaunera. <sup>3</sup> Chanuna aansijiin laojoiri ichaain baaso ichacuruha leeochoaurune coaraain, acaauru que ereein neeiche, inara, acaauru amurijiriin jataain baaso ichaain ichaohichene saijieein. <sup>4</sup> Inasiina jataain amurijiriin leinjiin enuha jaberoco que funojoi niha ii notane saijieein, 'Jereeune ii nota que nenea utoone rocoe,' naain erenaa nainereei inejera rai. <sup>5</sup> Cha coitucuha nocoetohine saijieein cha coitucuhi. Jauriaanejeein nii ii nota fuera enuha jaberoco rocohin jaaote, caohatiin coaraain nii inejera nota que nenea utoone coaraain rocohi.

<sup>6</sup> Coa remaaecuru rijijieein nenacaauru rai, inara que banijiaain Cana Coaunera tenojoin tihache. Nabana inara coinetein inara cunaitaauruhane coataa. Niheichu coosi rijijieein nenacaauru rai, inara rai nelatein nenea nii Cana Coauneraacha tei tenaa nainiheiche, que jaolequiin chaque nelatihei rijijieein coaracuruhane jaun.

### *Cha latein bajaera raite terein Cana Coaunera*

<sup>7</sup> Cana Coaunera caje cha latein bajaachenete, inara rai inaraacha latei terein. Cha latein ariin bajaera raite, cha tein ne Cana Coaunera. <sup>8</sup> Nii rijijieein techu latein rene cuha cachane, rae Cana Coaunera. <sup>9</sup> Coaracuche nachuhinti inara caje lenone bajaa inara calaohine, rai ajeri telanaala lenone caohacha teeichene. <sup>10</sup> Ainihane inara caje ate bajaane, rai acano telanaala rai iniho caohacha teeichene. Nii amuritoheriinte, cha latein caje bajaa cachane rai caohacha tein ne Cana Coaunera. <sup>11</sup> Coaracuche nachuhinti inara netonai baasoneein inara suujua coaraain ichaohichene saijieein, cha bajaain niha inara calaohichurune, cha caohacha tein naaonjoaain neeichene. Nii amuritoheriinte cha caohacha tein nereein inara rai Cana Coaunera, caje cha latein bajaachene.

<sup>12</sup> Nitohaniane jaun inara aina caohachaaain neeuruha leeochoaurune jeriquichene rijijieein, leeochoauru aina caohachaaain neeuche. Nitohanein ichoai coinete aite nii rauhi aina *profetacuru* inoensihuru laenanajoi. Aitoha nii rauhine rijijieein ichaoha cachane coina.

### *Ichaonaa coero aina cacha itajera coero* (Lc 13.24)

<sup>13</sup> Nii jaratoelanaala nenea coero aina acujua siricha jelon enoche. Nii cacha ichao itajeranu que nenea bacujua aina rai coerote, jaraaotokane jaun cuhane cuhin arajiin nitajeure cachauru. <sup>14</sup> Jana ichaonaa chabana nitajenaachara nejeein nenea rene cacha turuaera bacujua aina

rai coerote, aansijin jaratohelanaala. Nii jaunte caaintatocha ecu turuha cachane jaun, corootajajeeincha turuujue cache.

*Ninaa caje enuha baaso coitucuhacane*  
(Lc 6.43-44)

<sup>15</sup> Caohachain necohalajiin neeuche, nii Cana Coaunera coitucuha nocoetiinchuru erenacaauru casajeeuru que. Acaaurute turuurureein nii Cana Coaunera coitucuurera tocorijianeichuru inara rene. Nete acaauru suujua cuhane, inara ichao itajeranu baaso uhaain inara rene turuurureein. <sup>16</sup> Inarate nainequiche coitucunajaaiche acaauru ichao cajene. Coatiha inoeri que inaana nainihe ijoa, niheichu meseri que inaana nainihe acusa. Nii rijijieeinte cache baaso caje ocoona nainene ichaonaa caohacha. <sup>17</sup> Nii rijijieein techu satiin temule caohacha, caohacha que inacae. Jana enuha baasote, jerichanejeein baaso que inacae. <sup>18</sup> Satiin temule caohacha baaso que inaana nainihe. Jerichanejeeinchu caohacha que inaana nainihe enuha baaso. <sup>19</sup> Satiin enuha baasooru- baaso que inaanacaaurute, inae sauhin moconojoiniha cureein. <sup>20</sup> Nii rijijieein techu acaauru ichao caje cache caohachanein, cache baasoneein, naaonjoain ichaoruhane coitucuriquicheein.

*Coatiha satiin cachaauru, Cana Coaunera Cojoanonaa que ichaaururinaain.*  
(Lc 13.25-27)

<sup>21</sup> Coatiha satiin canu rai: ‘Canu Curuaanaa,’ naain erenacaauru, Cana Coaunera Cojoanonaa que turuhin ichaonaa nainecururinaain. Canu Inaca Cana Coaunera jerenohin icharate laen, nainereein rai Cojoanonaa que ichaoha ne. <sup>22</sup> Inae nii cojoanonaa que turuhane banate, arajiin cachaauru nesoone caaun: ‘Curuaanaa, Curuaanaa, canacaanune ii coitucuuruha cachaaurune coina, ii que ereeretocoaanu, ii curuaa corenihane moconajaera letonocuru sitaain, arajii cojoelanaacojoai ichacaanulu,’ <sup>23</sup> naauruha canu raine janane: ‘Coatiha inara coitucuhaaun, naain cacaje amuuche baaso ichajeein ichaonacaauru,’ naain acaauru sitareeunni.

*Canu ere aonaain caintoonjoan icharate, chabana nita-jenereein*  
(Mr 1.22; Lc 6.47-49)

<sup>24</sup> Nitohaniane jaun canu ere aonaain caintoonjoan icharate, leinjiin cache jataain nainaan niicha ichai coitucuhi nena, enuha suujui caohacha que banesijiateein, ucaacain temuhin neloheritihane jana, <sup>25</sup> uha elone jaun tabaacaa nucuhecuro aina uha cujuana tabaine jana, nii loreri

inasine, enuha caohacha suujui que banesijiateein ucaacaain temuhin ichaa nii icharane jaun. Nii rijiicha canu ere aonaain caitoonjoa ichara cacha. <sup>26</sup> Jana canu ere aohanra nii caintoonjoa ichaelanaala baaso ichajeein ichaonaate, leinjiin cacha aaso erenaa tonoraai, enuha suujui baaso que banesijiateein, araracaaeriin temuhin nelohheritihane jana, <sup>27</sup> uha elone jaun tabaacoaa nucuhecuro aina uha cujuana tabaine jaun comohin nerataneein nitaje nii loreri. Nii rijiicha canu ere aonaane saijieein caitoonjoan tonoraain ichaelanaala nena cacha,” naain jetao cachaauru rai ereereje Jesoso.

<sup>28</sup> Niritiin acaauru rai beebejiha Jesusone jana jetaote, jataain cojoelatoore satiin cachaauru, <sup>29</sup> Moisesa aitoonjoan rauhi que acaauru relaurera amurijiriin, esinae rauhijiriin suujua caje coitucuhin aitohane jaun.

## 8

### *Cosibi caaun cunaitenaa cacha rautaa Jesusone (Mr 1.40-45; Lc 5.12-16)*

<sup>1</sup> Inae nii cachaauru relaane nainaan, ichatane ucuunno caje fauha uha Jesusone jana jetaote, arajiin sacuure cachaauru. <sup>2</sup> Nii jana jetaote, turuha uhe leinjiin cacha cosibi caaun cunaitenaa. Aca jetaote, Jesoso rene turuhin nacatiha neseonriaain jetao:

“Ii jereeine canu rautau caa canu cosibi cajera Curuaanaa,” naane jana jetao:

<sup>3</sup> “Jerichaaun chujian. Ii caje amuhine caa ii cosibi,” naain biji que dadaa Jesusone rijieeoritiin, nii rai cosibi caje nerautaan somaraain ne nii cacha. Nitohanai cunai siricha cacha rohan nichuuntaain dadanaa naineniha chunine que airijiin, rohan nichuuntaain dadae Jesoso. <sup>4</sup> Nitohaneein rautaan jetaote:

“Aonau. Jiaonriha chuni rai catohaneein ii rautaan nihanune beenera. Raujiaaincha nii Moisesa aitoonjoan rijijieein, Cana Coaunera belaiha saseredote rai iicha teeni amain cunihunte caje inae nerautaine coaracurumiin cachaaurura. Chaen techu inae nii ii cunai caje nerautaan somaraain leeochoauru rohan turunaa naineeine coaracurureein satiin cachaauru,” nae rai Jesoso.

### *Romanocuru rai soondarooru curuaanaa letono rautaa Jesusone (Lc 7.1-10)*

<sup>5</sup> Inae Caferenaan turuha Jesusone jana jetaote, rene turuhin jetao:

<sup>6</sup> “Curuaanaa, canu letononeein nenaate cunaiteein ne canu loreri asae, itolereneein jiurohin cunaacoaa rai jabe-rocone jaun,” naain Jesoso rai biha leinjiin Romanocuru rai soondarooru curuaanaane jaun jetao:

<sup>7</sup> “Inae rautaa urichaaunni,” naa rai Jesusone jaun jetao:

<sup>8</sup> “Curuaanaa, coatiha chaque ichei nelatejeehaaun canu loreri asae turuha uhine coina. Raujiaaincha nii cunai sitaau canu letono caje, aihute nerautamiin. <sup>9</sup> Nitohaneeinne canu letoaaain neuruha canu curuaanaacurune acaauru ere tonoraain neeun. Nii rijijieein techu, neeure canuhacha letoaeni soondarooru. Leinjiin letoaanunete quere tonoraain cue. Jana leeocha cotihacaaunnete uhe. Chaelai ichaa canu letonone coina letoaanune techu ichae quere tonoraain,” naa Jesoso rai Romanocuru rai soondarooru curuaanaane jana, <sup>10</sup> cojoelatiin jetaote: “Esinae rauhijiriin coatiha nihei chuni Israeli cocoaicha, caa cacha rijijieein jataain quesenetaera coarahaan chabana. <sup>11</sup> Esinae rauhijiriinte enoto mitu nichajai, enoto so nichajai, naaonjoainuri cajeeuru arajiin uhin, Abaraaun, Isaca, Jacobo, naaonjoainuri aina raotojoein turuhin lenonecurureein, inae Cana Coaunera cojoanonaa que turuhane bana. <sup>12</sup> Jana Israeli-taauru tabaaurute, rai cachanu que ranajaain nihalu Cana Coaunerane saijieein, inae Cana Coaunera cojoanonaa que turuhane bana, nocohenaanau jaoleneein chanaa curureein nesoone caaun,” nae jetao aina cunacaauru cachaauru rai Jesoso.

<sup>13</sup> Niritohane baiha jetaote:

“Chajaain chenenajaun caunihute, nii esenetaain jereeine rijijieein nerautamiin ii letono,” nae Jesoso. Nii rijieeoritiin jetaote, inae nerautae nii soondarooru curuaanaa letono cunaitenaa.

*Fedoro tano rautaa Jesusone*  
(Mr 1.29-31; Lc 4.38-39)

<sup>14</sup> Nii baiha jetaote, Fedoro loreri asae turuha cuha Jesusone jana jetao, ecu sininaja ichoae ajaa caaun cunaiteein niha Fedoro tanone jana eruuruha cue. <sup>15</sup> Inae ecu turuhin nii cunaitenaa biji mucuha Jesusone rijieeoritiin jetao, inae caje amuha nii ajaane jaun, nerautaaain nimichuhin acaauru rai lenone chalue.

*Arajii cunaitenacaauru rautaa Jesusone*  
(Mr 1.32-34; Lc 4.40-41)



16 Inae nocohejihane jana, arajiin suujua cuhane coitucuhuhichuru siriin caaun cunaitenacaauru uhaain turuu-ruha cachaaaurune jana jetao, nereecha que nii cacha suujua cuhane nenacaauru coitucuhuhichuru sitaain, satiin cunaitenacaaurune maajeein rautaacoae Jesoso.

17 Nitohaneeinte ichae Jesoso,

“Acate turureein

cana caje cana osa aina

cana cunainunru itajihane coina,”

naain besihalu Cana Coaunera ere bera inoansi Isaihasine nainaane coina.

*Jesoso aina cunaa jereraauru*

*(Lc 9.57-62)*

18 Nii jana arajiin curuhacaain neuruha cachaaaurune coaraane jaun jetaote, nemuri jerau amaauruha aina nere-lanacaaurune coina acaauru rai aite Jesoso. 19 Nii jana jetaote, rohan nichuuntaain jetao: “Curuaanaa, ii ainane unaa jereeun, chunijiun cuhine jaun niha natiin,” naa Jesoso rai Moisesa aitoonjoan que cacha relaerane jana jetaote:

20 “Arolarihurute sininajaanu siriin naaonjoaaunre. Jerichanejeein techu sininajaanu siriin naaonjoaaunre tajaecuru. Nena laen canu Cana Coaunera Calaohi cacha caje nejanoanaa nichaaunne, nene canu rai chunijiun nesurucuaaunne jaanura,” nae jetao rai Jesoso. 21 Nii jana jetaote, aina nerelanaa netonai jetao: “Curuaanaa, inae oha canu inacane janane conautichaaune baiha ii aina ureeuni,” naa raine jaun jetao:

22 “Niriimiin. Canu sacuhachaaute ecu nejesinajeein Cana Coaunera coitucuhi nesinanejeein ichaaoruhine ooruhane reentiaain,” nae jetao rai Jesoso.

*Cujuana aina fichafichanaa suruaa Jesusone*

*(Mr 4.35-41; Lc 8.22-25)*

23 Niritiin jetaote, aina nerelanacaauru aina jiniiquiin bote cuhane fauhin jelai caje amue Jesoso. 24 Nii jana inae bote cuhane cuujueeuruhane jana, uha cujuana tabai aina fichafichanaane jaun jetaote, enohe bote cuhane acau. Nii jana jetaote, tonajelanaala bote cuhane sinii siniicha Jesusone jana 25 nocoain jetao:

“Curuaanaa, inae nalunaa jerichaache. Chajaain caa acau caje cana ichoterateeu,” naauruha aina nerelanacaaurune jana jetaote:

26 “Chanuna jataain nesooneeiche. Jataainachura ansi-jieeinijin cha esenetaeneeichete,” naain nimichuhin cujuana aina fichafichanaa suruaa Jesusone jaun jetao, inae neniha

fichafichanaane jaun raotojoein cuujueeure. <sup>27</sup> Nii jana cojoelatiin jetaote:

“Chatohanaineeinna ne caa cacha, cujuana aina cucuana cuhane niha natiin nere tonoraain nesuruhane coina,” naaure jetao ecu nejesinajeein aina nerelanacaauru.

*Cadara batane que coroatajai suujua cuhane coitucuchuhi sirichaauru rautaa Jesusone*

(Mr 5.1-20; Lc 8.26-39)

<sup>28</sup> Inae nemuri jerau aina nerelanacaauru aina jiniiquiin Cadara batane que turuha Jesusone jana jetaote, atanebana jelai caje cuhin jetao, coineteure coroatajai cachaauru, suujua cuhane coitucuchuhi sirichaauru. Acaauru jetaote, enaacha cacha cunaitaane jaun, nene chuni nii neeurunaja bero cuhane amui. <sup>29</sup> Acaauru jetaote:

“Coa canacaanu rene turuhin canacaanu rerohecaa Cana Coaunera Calaohi Jesoso. Nechu jataain canacaanu rerohecaain, canacaanu cairichaaaine coinete, jaiti cojoanonaa que turuenihane jana turuhicha,” naaure jetao ehequuin. <sup>30</sup> Nii jana ecu rohan arajiin lenoniha neeuruha coosichurune jaun jetaote:

<sup>31</sup> “Caa cachaauru suujua caje canacaanu sitanaa jereeine, nii coosichuru suujua cuhane canacaanu letoaaura,” naauruha Jesoso rai, nii cachaauru suujua cuhane nenacaauru coitucuhichurune jaun jetaote:

<sup>32</sup> “Taa coosichuru suujua cuhane cunichuchera,” naain jetao nii coitucuhichuru letoae Jesoso. Nii jaun jetaote, nii cachaauru suujua caje mituhin, coosichuru suujuaniha enooruha nii coitucuhichurune rijieeoritiin jetao, satiin ramarau nemarotihacoaain nereeonohin ohacoaauru nii coosichuru.

<sup>33</sup> Nitohanihane coaraain jetaote, jelai caje sorohin jetao, neseu turuhin nii coosichuru suujua niha enooruha coitucuhichurune jana, ooruha coosichurune beeure nii coosichuru beraihurera cachaauru. <sup>34</sup> Nii jaun jetaote, satiin nii nese caje cuhin, nii niha Jesusone jaun rene turuhin coaraain jetao, rai aitocure chajaain jelai caje amuhane coina.

## 9

*Jiurona cacha rautaa Jesusone*

(Mr 2.1-12; Lc 5.17-26)

<sup>1</sup> Nii baiha jetaote, aina nerelanacaauru aina jiniiquiin bote cuhane fauhin cuhin nemuri jerau ichaohalune jaun Caferenaanon turuha cue Jesoso. <sup>2</sup> Inae ecu turuuruhane jana jetaote, nela cuhane leinjiin jiurona cacha turuaa cuuruha Jesoso rene cachaaurune jana, jataain rautaane esenetaain

aihuruha nii cachaaaurune coaraane jaun, nii cunaitenaa rai jetao:

“Nelararajiaaura cacalabi. Inae ii osa caje ichoteratenohi neeicha,” nae jetao rai Jesoso.

<sup>3</sup> Nii aonaain jetaote:

“Chanuna caritiin Cana Coaunera baijiaraanu rijitiin ere caa cacha,” naain jetao suujua cuhane coarajeeure Moisesa aitoonjoan que cacha relaaureeraauru tabaauru. <sup>4</sup> Nejetaote niritiin baasoneein suujua cuhane coaacuruhane coitucuhane jaun jetao:

“Chanuna baasoneein itolere bana inara suujua coaraquiche. <sup>5</sup> Chaa quena caaintare: ‘Inae ii osa caje ichoteratenohineein,’ naenihacane: ‘Chajaain nimichuhin chela seriin amuun,’ naacane. <sup>6</sup> Coarajeeuche nachuhintine, canu Cana Coaunera Calaohi- cacha caje nejanoanaa nichaaunne cocoainaan letohanojoinichaaun osa caje cacha ichoteratichaaunne coina, caa chauratane quene coarate inara que,” naa acaauru raine baiha jetaote, nii jiurona cacha rai jetao:

“Chajaain nimichuhin chela seriin chenenajaun cauninura,” nae nii jiurona rai Jesoso. <sup>7</sup> Nii rijieoritiiin nimichuhin jetao, rai nenajaun cauha cue nii jiurona cacha. <sup>8</sup> Nii coaraain jetaote, rai suujua rauhi inaaoritelanaala que casiin Cana Coaunera coroaacure. Nitohanai ichana nainiha cachane jaanu teein niha Cana Coaunerane coaraain.

*Mateo cotihaca Jesusone*  
(Mr 2.13-17; Lc 5.27-32)

<sup>9</sup> Nii jiurona cunaitenaa rautaane jaan jelai caje uhin canu-Mateo nichaaunne, Roma curuaanaa rai *impoestonu* que cachaauru cobaraain coriqui bajaanune jaan rori ichoae lauhecohanune jana canu coaraainte:

“Chajaau canu aina,” naain canu cotihaca Jesusone jaun, nii rijieoritiiin nimichuhin Jesoso aina cuun.

<sup>10</sup> Nitohaneein cuhine canu loreri asae turuhin, satiiin aina nerelanacaauru aina curuaecaain Jesoso coroaateen. Nii janate ecu canacaanu rene turuhin nelauriaain lenonecure jataain arajiin Roma curuaanaa rai *impoestonu* que coriqui bajaaureraauru canu leochaauru, chaen leochaauru cachaauru- nechu aansaineein ichaonacaauru, osaaonacaauru, naaonjoainuri. <sup>11</sup> Nii coaraainte Jesoso aina nerelanacaauru rai:

“Chanuna caa *impoestonu* que coriqui bajaaureraauru aina, caa osaaonacaauru aina lenone caa inara relaera,” naauruha fariseeocurune <sup>12</sup> aonaainte:

“Coatiha coichaera latecuruhi raurohin nenacaauru. Leinjiin cunaitenacaauruhachate coichaera latecure. Nii rijijieein canu latecuruhi caohachaaain ichaoha nocoetonacaauru. <sup>13</sup> Chajaain nii Quiricha Inoaensi cuhane: ‘Coatiha chaelai sohin mocohin que canu belaaichene jerinaaun. Raujiaaincha jiniiquiin cairichaaajoaain ita coaraain ita belaaain neeichenena jereeun,’ naain laenanohi nihane jaan que nerelanihuche. Aihane jaun, coatiha nii caohachaaain ichaoha nocoetonacaauru cotihaca uhaaun, osaaocuruhane coitucuhin nichao coreein caohachaaain ichaonaa jereraaurune cotihaca uun,” nae fariseeocuru rai Jesoso.

*Suri couu neein cosinacaain Cana Coaunera bajaauruhane  
(Mr 2.18-22; Lc 5.33-39)*

<sup>14</sup> Nii janate Jesoso rohan nichuuntaain:

“Chanuna fariseeocuru aina canacaanuhacha canacaanu suri couu netiin cosinacaain Cana Coaunera bajaacaanune jana, ii aina nerelanacaauru aihurene,” naauruha Joaan Baotisita aina amuhemuhenacaaurune jana jetaote:

<sup>15</sup> “Chasiina suri couu netiin cosinacaain inaderaaurure ene ranaa jerera beseta que cotihanohichuru, jaiti acauru aina niha nii ene ranaa jerera cache natiin. Nete inae nii jianacoon teein cache ranaa jerera nichaaunne mucuhin amaauruhane banate laen, suri couu cosinacaain niha cuurureein- nii beseta que cotihanohichuru.

<sup>16</sup> Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaaain nedanaa naineriheii nii obiri enachasine, nii cajione siri que couneraane. <sup>17</sup> Nii rijijieein chu nihei chuni inae conaca que tiha coaaeraine jana, cuhane ichonai tera. Nitohaneein cuhane teraa ichonainete naasaaere nii coaaeraai. Nitohanihane jaunte, caohachae coaaeraai nejesinaneein niha coaaeraine. Chaen ichonai, ichonai nejesinajeein nihane caohachae,” nae acauru rai Jesoso.

*Jesoso cajione dadaera ene aina Jairo cacunu  
(Mr 5.21-43; Lc 8.40-56)*

<sup>18</sup> Niritiin acauru rai ereereeca Jesosone janate, rene turuhin nacatiha neseeonriaain:

“Jataain enate nijioaen canu cacunu. Nete canu jiniichaain uhin dadaaine nacoaauneein ichanareein,” naain Jesoso cotihaca leinjiin Jorioocuru curuaanaane jaun, <sup>19</sup> nii rijiee-oritiin nimichuhin aina nerelanacaauru que corihaneraain caaijie cue Jesoso. <sup>20</sup> Nii janate lechoonca coroata jaanacaain, rai jaberoco caje ichana jaohajeein niha leinjiin enene jaun,

Jesoso rohan nichuuntaain caaijie cutiin cajione auha muuuri: <sup>21</sup> “Caa rai cajione auha mucuhanuneecha caaunne nerautareeunni,” naain esenetaane jaun. <sup>22</sup> Nete rai cajione auha mucuhane jana nauriteriin nii ene coariin:

“Nelararajiaaura ene, jataain nerautaaaine esenetaain aaine jaunte inae nerautaaicha,” naa rai Jesusone rijieeoritiin, inae nerautae nii ene ichana jaohane caje.

<sup>23</sup> Nii ene rautaane caje cuhin, nii Jorioocuru curuaanaa loreri asaae turuha Jesusone janate, inae atane rucuhecuruhane rai neein cojioriinchuru coinaderaauruha cachaaaurune jana turuhin:

<sup>24</sup> “Satiin caalai caje mituuche. Coatiha ohane jaun aihei caa ranuna, sinihane jaunte aicha,” naa acaauru rai Jesusone jana coenacure ecu neein coarajeeurera cachaauru. <sup>25</sup> Nete coenacuruhane saijieein, jitariin nii loreri caje mitanajaane baiha, nii ranuna rene enohin biji que mucuhin michuha Jesusone jana nimichue nii ene. <sup>26</sup> Nii coaraante ita rai beeuruha cachaaaurune jaun, satiin jelai batane sacuritaain coitucunojoi ne nii o caje ranuna ichatiha Jesusone.

### *Coroatajai maosa rautaa Jesusone*

<sup>27</sup> Nii ranuna ichatihane baiha caje amuha Jesusone janate caaijie cuhin:

“Jataain cairichaaajoaain canacaanu coaraaura Rabiri nefoerate,” naain eheehequiin sacuure coroatajai maosacuru.

<sup>28</sup> Nii janate inae loreri asaae turuhin, ecu enoha Jesusone jana rohan nichuuntaauruha nii coroatajai maosacurune jaunte:

“Caa maosa neeichene caje inara nota teein nihanune esenetaaichena,” naain acaauru caje bajaa Jesusone janate:

“Aihacaanura Curuaanaa,” naauruhane jaun, <sup>29</sup> biji que acaauru nota dadaain:

“Nii esenetaaichene rijieein conohine inara notara,” naa acaauru rai Jesusone rijieeoritiin, <sup>30</sup> inae conoe acaauru nota. Nii jaunte:

“Coa leeochoauru rai caa inara nota teein nihanune bihache,” naain acaauru suujuatiha Jesusone saijieein, <sup>31</sup> jelai caje amuuru rijieeoritiin beeuruhane jaun, inae satiin jelai batane sacutaain acaauru nota teein niha Jesusone coitucure.

### *Erenaachara cacha rautaa Jesusone*

<sup>32</sup> Inae jelai caje amuuruha nii coroatajai maosacuru nicha rautaurine janate, erenaachara cacha, coitucuhuhi que suujuequiin nena turuaa uure Jesoso rene. <sup>33</sup> Nii janate nii coitucuhuhi sitaa Jesusone rijieeoritiin, inae irihane nunuhete nii erenaachara cacha. Nii coaraante:

“Coatiha chabana catohanai coarahaacache Isaraeli lauri nichaachene janata,” naaure cojoelatiin cachaauru.

<sup>34</sup> Nete:

“Jeelai coitucuhichuru curuaanaate, caa catohaneein coitucuhichuru sitaain niha caa cachane jaanu teein nera,” naaure ecu neein coarajein fariseeocuru.

### *Cairichaaajoaain cachaauru coaraa Jesusone*

<sup>35</sup> Nitohaneinte neseuru cuhecujueein nenaanajaauru nainein amuhemujueein, netaojiaain Cana Coaunera rai rauhi que ereerecuruhane jaan coloheri sinacocacuru nainein cuhecujueein, Cana Coaunera Cojoanonaa erenaa raotono que cachaauru relain, itolere cunai caaun cunaitenacaaurune maajein rautae Jesuso. <sup>36</sup> Nii jana cachaauru coaraa Jesusone janate, nii chaque nelatihei rijijieein beraicha colane nenea carenero rijijieein amuhemuhecuruhane jaun cairichaaajoaain acaauru coarae. <sup>37</sup> Nii jaunte:

“Jataainte esinae arajiin neeure cachaauru, Cana Coaunera coitucunaa jereraauru. Nete nene acaauru relaeranura. <sup>38</sup> Aihane jaun Cana Coaunera bajaachete neeine acaauru raain acaauru relaeranu,” nae aina nerelanacaauru rai Jesuso.

## 10

*Aina nerelanaa nichaanune caje, lechoonca coroatajai nichaanune janijiin cocoinaa Jesuso afosotoneeine*  
(Mr 3.13-19; Lc 6.12-16)

<sup>1</sup> Nii jaunte lechoonca coroatajai aina nerelanaa nichaanune cotijiaain janijiin, canacaanu cocoinaain canacaanu letoae Jesuso, cachaauru suujua cuhane nenacaauru coitucuhichuru sitaain, itolere cunai caaun cunaitenacaaurune maajein rautaacaanune caina. <sup>2</sup> Nii lechoonca coroatajai afosotoorunu que niicha cocoinai nichaanunete, jauriaanejeein Simoon Fedoroneein acaauruhacha curuaatei, rai nejera Aanderesi, Saantiaao aina rai nejera Joaan Sebedeoo calaohineein nenacaauru, <sup>3</sup> Ferifi, Bartolomee, Tomasi, chaen canu Mateeo nichaaunne Roma curuaanaa rai *impoestonu* que cachaauru cobaraain coriqui bajaera nichaaulune, Arafeoo calaohi Saantiaao, Tadeoo, <sup>4</sup> chaen jauriaanejeein Romanocuru que nejeratenacaauru aina nenaalu Simoon Seloteneein niicha curuaateuri, chaen nii baiha Jesuso coulurujueranu Jodasi Isacariote, naaonjoainichaanu.

*Cana Coaunera Cojoanona que cachaauru relaauruhane coina aina nerelanacaauru letoaa Jesusone*  
(Mr 6.7-13; Lc 9.1-6)

<sup>5</sup> Nitohanein nii lechoonca coroatajai aina nerelanaa nichaanune letoaante canacaanu suujuate: “Coa nii Cana Coaunera coitucuelanaala ichaonacaauru atane que cuhache. Niheichu Samaria cocoaichacuru rene niha natiin coa turuhache. <sup>6</sup> Ucuuae cuelanaala, Cana Coaunera cachaneein nitajerai nenacaauru Isaraeli cocoaichacuru rene cunichuche. <sup>7</sup> Chajaain ucuuae cuhin, inae nichuutaa Cana Coaunera Cojoanonaane benichuche acaauru rai. <sup>8</sup> Chaen cunaitenacaauru rautaaain, onacaauru nihanatiin ichatein, cosibi caaun cunaitenacaaurune maajeein rautaaain, cacha suujua cuhane nenacaauru coitucuchuhichurune maajeein sitaauche. Inarate core colane nitohanai ichana nainequichene jaanu raain neeiche. Aihana jaun nitohanai ichaain neeichene, coa core bajaache.

<sup>9-10</sup> Coa inara coriqui, inara atora, inara cajione necoreete-ichene jaanu, inara safato, inara biji achune, naaonjoainuri amaain cuhache. Niha rauhi, amihanenacaauru coroaateeru-ruha cachaaurune coina. <sup>11</sup> Leinjiin neseu, nenaanajaun, naaonjoainu turuhichene, chunocoha caohachaaain inara raera cacha ariin, rai loreri asaae neeuche jelai caje amuhichene reentiaain. <sup>12</sup> Inae nii loreri asaae turuhichene neein, loreri asaae nenacaauru rai ereein turuuche. <sup>13</sup> Nii jana raoti ichaonaa que ichaonaa jerecuruhanete, raotojoein inara raaurureein nii loreri asaae nenacaauru cachaauru. <sup>14</sup> Jana caohachaaain inara raelanaala inara aohana jerecurenihane, nii loreri caje, chaen nii nese caje, naaonjoaain caje inara amuneein inara tija que nena utoone rihariaain ratiriin amuuche. <sup>15</sup> Esinae rauhijiriin acaaurute cana janonaa be-saute que inae tihane bana, Sodoma, Comora, naaonjoain-uri batane que ichaonacaauru amurijiriin caseteco coaracurureein.

*Mucunojoinecuruhane coina arichacuruhane*

<sup>16</sup> Aonacuche, canune inara letoaaun janolari mululune jana situha cuha irine rijijieein cuhichene coina. Aihana jaun cacha cunaitaane coina nainaa acanone rijijieein cunichuche. Chatohanein teraane nihanatiin nerinanaa naineniha serorine rijijieein. <sup>17</sup> Aihane jaun caohachaaain nainaaain necohalajiin cunichuche. Cocoinanacaaihuru rai inara teuruhane janate, sinacoca asaae inara amaain inara bisiin, <sup>18</sup> coberenadorocuru rene inara amaain, reychuru raine maajeein inara amaurureein canu coreniha. Nii janate canuneein nihanune coitucuerateriquicheein acaauru que, chaen nii Cana Coaunera coitucuelanaala

nenacaauru quene maajeein. <sup>19</sup> Inae cocoainanacaihuri bijiu inara teeuruhane, coa acaauru tonoraain ereeichene jaanu que tonajianche. Inae ereeichene coina neeichene janate, Cana Coaunera Suujue, inara rai ereeichene jaanu tereein. <sup>20</sup> Aihane jaun coatiha inara ecu ereriheeicheein. Cana Inaca Cana Coaunera Suujuete inara coreniha ecu erereein.

<sup>21</sup> Nitohanerichaaaine jaunte, rai nejeraauruhacha, nejeraauru tereein ateinanohineeuruhane coina. Nii jana rai inacaauruhachate, rai calaohichuru tereein cocoainanacai rai. Nii jana acaauru calaohichuruhachate, inacaauru que nejerateein inacaauru teeurureein ateinanohineeuruhane coina. <sup>22</sup> Satiin cachaauru caa chauratane sacuritaain canu coitucuelanaala nenacaurute, canu coreniha inara que nererojoecaa cuurureein. Nete nii esenetaane jianelanaala, atiin satono que tiaain jerichanejeein sacuera nichotereein. <sup>23</sup> Leinjiin neseu turuhichene jana, inara rohecaain inara mucunaa jerecuruhane, leeocha neseu cuhin sorooche. Esinaene aitoon. Jaiti Israeli nefoerateeuru sacuritaain turuheneeichene janane, canu inara ichohaichaniha ecu turreeunni canu acaihaniji Cacha Calahineein nejanoanaa nichaaunne.

<sup>24</sup> Niheichu rai relaera amurijiriin nenea nainihe i aina nerelanaa. Niheichu rai fatoroon amurijiriin nenea nainihe i rai cachaneein nenea. <sup>25</sup> Relanojoneein nenacaauru, acaauru relaera rijijieein neeuruhine. Jana letononeein nenacaauru acaauru curuaanaa rijijieein neeuruhine. Canu inara Curuaanaa neein inara relaera nihanune que moconajaera Beelseboo niha canu beuruha natiin, tonacururiha jana inara que.

*Coasinacaineein niha ohacachene baiha cana itajeraneein nenaane*  
(Lc 12.2-7)

<sup>26</sup> Aihane jaun, coa cachaauru coasichache. Coitucueraelanaala, asinojoneein chaachaa in niha chunine niha natiinte, coitucunoiniha cureein. <sup>27</sup> Jana caa coitucueraelanaala nenea nii chuni aonaenihane jana, caa caitoonjoan coitucuerateeuche satiin cachaauru urichoo netiin. <sup>28</sup> Coa inara atinana naineraauru que casihache, inara atinaauruhane baiha chabana satonoelanaala neeni janonaa que neeni, inara suujue itajenaa nainecurenihane jaun. Nete laen nainequiche chabana satonoelanaala nenea usi jana inara jaberoco aina inara suujue itajeranu neein nenea- Cana Coaunera que casiin neeichene.

<sup>29</sup> Tana nii chaque nelatejeeecane que airijiin leinjiin moneda que coriha coroatajai tajaelineane coitucuhichene. Nete



jereniha cana Inaca Cana Coaunerane nii leinjiinjin nitajena nainecurene. <sup>30</sup> Nii amurijiriin inarate, inara couturijine maajeein leinjiana leinjianaain janiinojoneein ne. <sup>31</sup> Aihane jaun coa casiin ichaohache. Inarate jataain tajaelinaacuru amurijiriin nelateein neeiche.

*Cachaauru que Jesocurisito coitucuerateeurera*  
(Lc 12.8-9)

<sup>32</sup> Chunocoha cachaauru que canuneein nihanune coitucueraneein, canu cachaneein nihane coitucueratera ne, acaentonai coitucueratereeeunni dedeeu nena Ofa Cana Coaunera acatiha neein. <sup>33</sup> Nena laen canuneein nihanune coitucueraneein canu cachaneein nihane saijjeein, canu coitucuerate lanaala nena que acaentonai coitucuenereeeunni Ofa Cana Coaunera acatiha neein.

*Ita caje cache lerueraneein niha Jesusone*  
(Lc 12.51-53; 14.26-27)

<sup>34</sup> Coatiha raoti ichaonaanaja turuaa uhaaunlu caa chau-ratane que, ita que nererojoecaain ichaoha cachane jaane turuaa uunlu. <sup>35</sup> Nitohanihane jaunte, rai inaca que nejeratiha rai calaohine jana rai neba que nejeratereein rai cacunu. Jana rai nebaene quete nejeratereein rai nacana. <sup>36</sup> Nitohaneeinte nechu naraaicha que nejeratenaaneein neeurureein cachaauru. <sup>37</sup> Rai inaca, neba, calaohi, cacunu, naaonjoainuri belaihane amurijiriin cacoelainihane, nii chuni canu cachaneein nena nainihe. <sup>38</sup> Itolere necairichanaa abaantaain coroso que nerichaaunnine rijijjeein necairichanaa abaantaenihane, canu cachaneein nena nainihe. <sup>39</sup> Nete laen canu, rai nichao ichoteratena nainichaaunne coitucuhin canuhacha cohajeein nena, nichao ichoteratereein canu coreniha. Jana canu esenetaelanaala, canu colane nichao ichoteratena jererate rai nichao itajereein.

*Cainanohinerichaaain namute cache rai cha tera*  
(Mr 9.41)

<sup>40</sup> Chunocoha inara raerate canu raa aicheein. Jana caohachaaain canu raerate canu letoaera raa aicheein. <sup>41</sup> Cana Coaunera letononiha leinjiin *profetane* coreniha caohachaaain raain nenaate, *profeta* rai cainanohiniha rai namihaneone rijijjeein nii raane coreniha rai cainanohiniha cureein. Chunocoha leinjiin cache caohachaaain nena raain neite, jerichanejeein nii cache caohachaaain nena rai cainanohinihane rijijjeein, nii raane coreniha rai cainanohiniha cureein. <sup>42</sup> Chunocoha caa ena canu sacunaa nunuhetejeeureraauru rai, nechu jataain canu sacueranihane coreniha le eraurujeein conacai tein

nei raite, esinae rauhijiriin cainanohiniha cureein,” nae aina nerelanaanichaanune rai Jesoso.

## 11

*Jesoso rene turuuruha Joaan Baotisita letonocurune  
(Lc 7.18-35)*

<sup>1</sup> Nii lechoonca coroatajai aina nerelanaa nichaanune relaane baihane, jelai batane que nenacaauru neseeuu naineen kuhacaanu, Cana Coaunera beratenojoin erenaa beebejeein cachaauru relaa amuhemuheca Jesusone coina.

<sup>2</sup> Nii janate caresero kuhane netiin benaa caje itolere ichaa Curisitone coitucuhin aina amuhemuhencaauru letoae Joaan: <sup>3</sup> “Iina esinae rauhijiriin, nii turuha uheneni Curisito niha. Aca neneeine beeune turuha leochane cohacaanu,” naain rene turuhin bajaauruhane coina. Nii jaunte letoanajaane rijitoejin aitocuruha rene turuhinne jaun:

<sup>4</sup> “Chajaain caa inaraacha coarai, inaraacha aonai benichuche Joaan raicha. <sup>5</sup> ‘Inae maosa neeuruhane caje conoa maosacuru notara. Bacosacuru niha natiinte, inae nichaaurain amuurera. Cosibi caun cunaitenacaauru niha natiinte, inae somaraain neeure cosibi cajera. Urichosaaecuru niha natiinte, inae enene erenaa aonacurera. Onacaauru niha natiinte, inae o caje ichanacurera. Jana cairichainejeein nenacaauru raite, Cana Coaunera beratenojoin erenaa beebejeein, nosa caje nichoteeururichaaaine beebeje. <sup>6</sup> Nerausiaaejeeinte neeure rai suujua corelanaala acanihane esenetaain acaacha cohajeein nenacaauru,’ naain benichuche Joaan raicha,” naain Joaan letonocuru letoae Jesoso. <sup>7</sup> Inae jelaiha cauha cuuruha Joaan letonocurune janate:

“Chatohanai coaraa kuhichelu cacha areroo cuhin. Leinjiin jiarana nujua cujuana ichanohineein nerurujuanaana coaraa kuhichelu. <sup>8</sup> Ainihane leinjiin cacha, cajione caohacha que necoreeteen neina coaraa kuhichelu. Inarate raotojoein coitucuhiche, cajione caohacha que necoreeteen nenacaauru, *reychuru* loreri asaee neeuruhane. <sup>9</sup> Chatohanai coaraa kuhichelu. Leinjiin Cana Coaunera ere bera *profetana* coaraa kuhichelu. Aiha laesinaae, nii choae tacaain jataain leinjiin *profeta* amurijiriin nenaate esinae rauhijiriin coaraa kuhichelu. Acate Joaan ne. <sup>10</sup> Nii Joaan quete:

‘Canune ii ajiniha  
cachaauru rai ereerecane coina  
canu ere bera letoareeunni  
turuhine jaanu rucuhheranu que,’

naain ne laenanohineein Cana Coaunera Quiricha cuhane. <sup>11</sup> Esinae rauhijiriine aitoon, satiin cachaauru caje nihei chuni cacha Joaan amurijirii jataain nelateein nei, Moisesa que Cana Coauneraacha teratenojoi Cojoanonaa bana. Nete laen, ena turunaa Cana Coaunera Cojoanonaa, Joaan fautaain nelatihei rijijieein nena, jataain nii Joaan amurijiriin nelateineein ne.

<sup>12</sup> Turuhalu Joanne caje coauneinte, enanetjoeein ena turunaa Cana Coaunera Cojoanonaa turuaera nichaaunne que nejeratein itajenaa coaacure Cana Coaunera coitucuhichuru curuaanaacuru. <sup>13</sup> Satiin *profetacuru* aina Cana Coaunera aitoonjoaauru rauhite, nii turuha uheni Cana Coaunera Cojoanonaa coitucueratein neurelu, turuha Joanne que tiaaajoaain. <sup>14</sup> Inarate esinae rauhijiriin nacoaaunein turuha urichaain Irihasine que aitocuruhalune coitucuhiche. Acate nii Joannein turuhelu. <sup>15</sup> Caa aitocooaunne aonacurumiin urichonacaauru. <sup>16-17</sup> Caa cachaauru, enene cojoanonaa que nenacaauru ichao bihanune jaannu coitucuhaaun. Aihuruha canaanaihuru nenaanaja cataaun nocoatijiaan, rai corihacuru rai eheehequin:

‘Raansaichene coina auno totihacaanu. Nete canaçaanu auno rautaelanaala raansanaa jereneeiche. Inara cotijiaain, berane jaain inaderaacaanune jana, canacaanu aina inaderahееiche,’ naauruhane rijichuruha.

<sup>18</sup> Nii rijijieein techu, turuha Joaan joenreen lenone que lenonelanaala, bino conaa inaelanaala, naaonjoaaine jana, moconajaera suujue siriha beeiche. <sup>19</sup> Nii baiha turuhanu canu, cacha calahineein nejanoanaanichaaunne jana, bino cohin, joenreein lenone que lenoneein, naaonjoaineeinne jana, ‘Achoritiin, ajetoriaaneein, baasoneein ichaonacaauru osaaonacaauru belaichaneein, Roma curuaanaa rai *impoestonu* que cachaauru cobaraain coriqui bajaaurera belaicha niha’ canu beeiche. Nete jataain itolere que nainaain, chaachaain niha Cana Coaunerane caje coaraain, coitucunojoi ne niicha ichai,” nae Jesoso cachaauru rai.

*Caseteco coaracururichaaain erenaa tonoraauruhi  
cachaaurune  
(Lc 10.13-15)*

<sup>20</sup> Cojoelanaacojoai ichaalu Jesusone saijieein nichao coreein nacoaaunein Cana Coaunera coitucuurenihai nii nese que ichaonacaauru cachaaurune jaunte: <sup>21</sup> “Jataainte cairichaaajoaiche nohane, Corasiin cocoaichacuru. Cairichaaajoaiche nohane Betesaaida cocoaichacuru. Inara que cojoelanaacojoai ichaain coaratihanulune

tocohanein, Tiro, Sidoon, naaonjoain cocoaichacuru rai cojoelanaacojoai ichaain coaratihanulune jana nihanete, inae inoaelu nejeein inae nichao coreein, nacoaaunein Cana Coaunera coitucueranein neeuruhane coarateeurure niicha jerenohin ichaain. <sup>22</sup> Nete inae coitucuhichuru coulurujueein casetecaeratihane jaan Cojoanonaa que turuhane bana, Tiro, Sidoon, naajoainunri cocoaichacuru amurijiriin caseteco coaraa curiquicheein inara. <sup>23</sup> Jana inara, Caferenaon cocoaicha neeichene, inacojoein caohachaain niha nocoetiin raotiin nenea coaauquiche. Nete ohichene bana nocohena tabai jana nitajiha curiquicheein. Nii inara que cojoelanaacojoai coaratihanulune tocohaneein, Sodoma cocoaichacuru que coaratihanune jana nihanete, enanetojoein neeurure jelai cocoaichacuru. <sup>24</sup> Nete inae coitucuhichuru coulurujueein casetecaane coina turuha Cana Coaunera Cojoanonaa que turuhane bana, Sodoma batane cocoaichacuru amurijiriin caseteco coaraa curiquicheein inara,” nae cachaauru rai Jesoso.

*Canu esenetaerate raotojoein ichaoreein.  
(Lc 10.21-22)*

<sup>25</sup> Niritohane baihate: “Itolere chauratane, dede, naaonjoaain Coauneranein neeine coroaajihanu jataaincha, Ofa, itolere coitucutoha nocoetonacaauru que iicha asii coitucuerateei cairichainejeein nenacaauru quene jaaura. <sup>26</sup> Aihara Ofa, nitohanein jereine jaunte ichaacha,” naane baihate:

<sup>27</sup> “Canu Inaca Ofate satiin rainein nenea tein ne carai. Nihei chuni Cana Coaunera Calaohi cachanein nejanoanaa nichaaunne coitucuera. Leiniin Ofa Cana Coauneraachate cacoitucue. Niheichu chuni, Ofa Cana Coaunera coitucuera. Canu- Calaohineeichane coitucuun. Canu- Calaohi nichaaune coitucueratenaa jerichaaunne jaunru que, coitucueratihanune banaachate, Canu Inaca Ofa Cana Coaunera coitucuurureein cachaauru. <sup>28</sup> Nii inara baasonein ichaonacaauru, inara nererojoecaeriin ichaonacaauru, inara osaonacaauru, naaonjoaineeichene canu esenetaain canu sacuchena raotojoein ichaonaanaja te inara rai. <sup>29</sup> Caa inara rai caitoonjoa esenetaain, Canu que nerelaain aihanune rijijieein ichaaoche. Coatiha chabana inara aina baasonein nerinaaunni. Nii bana coatiha nitajerinaain inara suujue. <sup>30</sup> Coatiha caaintaai, caa inara rai caitoonjoa tonoraa cachane,” nae.

## 12

*Nebetacanaa cojoanonaa bana tirico inaa molooruha Jesoso aina nerelanacaaurune*

(Mr 2.23-28; Lc 6.1-5)

<sup>1</sup> Nii amuhemuhecaaunne jaun, nebetacanaa cojoanonaa bana tirico cocana jana situha cuhacaanu Jesoso aina jiniiquiin aina nerelanaa nichaanune. Nii janane mijiitoha-caanune jaun, situnacanejeein nii tirico moloonejeein rai nucuhe quihacaanu. <sup>2</sup> Nii coaraainte:

“Nii ii aina nerelanacaauru coaraau. Cooaaeraa nebetacanaa cojoanonaa bana nitohanai ichara natiinte, inae tirico taihure,” naauruha Jesoso rai fariseeocurune jaunte:

<sup>3-4</sup> “Tana lesajei que mijiitooruhane jaun, corihacuru aina jiniiquiin Cana Coaunera loreri Teenforo asaae enohin, Cana Coaunera que banijiaain nena faan, saseredotecuruhacha nii faan quinaa nainihane saijieein, corihacuru aina faan quiha curuaanaa Rabirine jaan reretaain coitucuhichene.

<sup>5</sup> Tana Moisesa aitoonjoa cuhane nebetacanaa cojoanonaa bana carenero narejeen sohin Teenforo asaae mocooruha saseredotecurune niha natiin, osa que nesaruhin naaonjoaurenihane jaan reretaain coitucuhichene. <sup>6</sup> Aihane jaun Teenforo amurijiriin jataain nelateein cau nihanune coitucuhin neeuche. <sup>7</sup> Coatiha: ‘Naaonjoain quete aite caa Quiricha cuhane,’ naain coitucuheiche. Nii Cana Coaunera Quiricha cuhane: ‘Nii inihocuru mocohichene jianeein inara amute cacha belaaain, naaonjoaain neichenena jereeeun,’ naain ne, laenanohineein. Nitohanai coitucuhin neeichenenoote, chatohanai baaso ichaaain neniha inara amute cachane jana colurujueein naaonjoaain neriquiche. <sup>8</sup> Nitohanihane jaunna, canu- cacha calaohineein nejanoanaa nichaaunne, nebetacanaa cojoanonaa amurijiriin cocainaain letononeein neun,” naain fariseeocuru tonorae Jesoso.

*Leinjiin jiurona jijii cacha rautaa Jesusone*

(Mr 3.1-6; Lc 6.6-11)

<sup>9</sup> Inae jelai caje amuhinte, ecu nena sinacoca asaae enoha cuha Jesusone jana, <sup>10</sup> ecu najiniha ne leinjiin jiurona jijii cacha. Nii jana Jesoso colurujueeuruhane jaanu lera ariiri-ichuruhane jaunte:

“Nainihanacha cocoaeraane saijieein, cunaitenaa rautaaca nebetacanaa cojoanonaa banane,” naain Jesoso caje bajaauruha fariseeocurune janate:

<sup>11</sup> “Tana chunocoha inara, leinjiin carenero siriquichene jana nebetacanaa cojoanonaa bana acau mitunajaan ucuha jachu cuhane naluha inara raine coaraa curiquiche jelai caje

rocohichene coinane. <sup>12</sup> Tana leinjiin carenero amurijiriin nelatiha leinjiin cachane coitucuhichene. Aihane jaun, cha caaunna cunaitenaa rai caohacha ichaa rautaenerichaaca nebetacanaa janonaa bana,” naain fariseeocuru tonoraane baihate:

<sup>13</sup> “Ii biji raujiaaura,” naa nii jiuona bijii leinjiin cacha rai Jesusone janate, biji sijitaane rijieeoritiin, inae nerautae nii biji jera rijijieein nii cacha biji. <sup>14</sup> Nete jelai caje mituhin nejesinajeein ita suujua tacaare fariseeocuru Jesoso sohin jaaoruhane coina.

*Jaiti neniha Jesusone jana, tururichaaine biha Isaihasine*

<sup>15</sup> Nitohaneein inae sohin jaonaa jerecuruhane coitucuriin jelai caje amuha Jesusone janate, sacuuruha arajiin cachaaurune jaun, jitaain cunaitenacaauru rautain, <sup>16</sup> aonajeeuruha cachaaurune urichoo, nii rautanaacane que ereeuruhane caohate Jesoso. <sup>17</sup> Nitohaneeinte bihalu Cana Coaunera ere bera inoaensi Isaihasine nainaane coina:

<sup>18</sup> “Caate,  
janijiin belaaain cocoainaaain  
Canu Suujue que suujuequiin  
canu letononeein nena ne,  
‘Inae nerinaain baasoneein cachaauru cairichaaaurera,’  
naain,  
satiin chauratane que  
lauri lauri nenacaauru cachaauru rai  
beebejihane coina.

<sup>19</sup> Coatiha  
cachaauru que nejerateein, cachaauru cotaain,  
bero cuhane niha natiin  
tonijiaain ereein cachaauru relaain,  
naaonjoaane aohanrarinaain.

<sup>20</sup> Coatiha  
nelatelanaala nenacaauru,  
cairicheineein nenacaauru,  
naaonjoainuri cairichaeranu que airinaain.  
Niheichu  
aasaeriin esenetaeraauru que jaolecorinaain,  
lauri lauri nenacaauru cachaauru  
ichao rucuhecane jaan que  
turuhane reen tiaaajoaain.

<sup>21</sup> Satiin lauri lauri nenacaauru cachaaurute  
acaacha que jaaecoorureein,”  
naain belu Isaihasi.

*Moconajaera letononeein niicha ichana nainei ichaa Jesoso  
beeuruhane*

*(Mr 3.20-30; Lc 11.14-23; 12.10)*

<sup>22</sup> Nii janate, suujua cuhane coitucuhuhi siricha leinjiin cacha erenaachara maosa amaauruha Jesoso rene jana, irihane jaanu tein, rai nota cono te. <sup>23</sup> Nii coaraain cojoe-latiinte: “Tana caa cacha Rabiri ichoala nihane,” naain ecu nejesinajein satiin ita caje bajaacoaure.

<sup>24</sup> Nii aonajeinte: “Moconajaera curuaanaa Beelseboote, caa cacha rai catohanai ichana nainihane jaan tein ne,” naaure fariseeocuru.

<sup>25</sup> Niritiin coaucuruhane coitucuha Jesoso raotojoeine jaunte: “Satiin caa chauratane que ichaonacaauru cachaauru, ita que nejeratein neeuruhanete jiniiquiin nitajenaa nainecurure. Niheichu leinjiin nese que ichaonacaauru ita que nejeratein neeuruhane, jiniiquiin raotojoein ichaonaa nainecururihei. <sup>26</sup> Nii rijijieein techu, moconajaera netonai rai letonocuru que nejeratein nihane, nii rai letonohacha sitaain nihane, nii chaque nelatein nena nainerihei. <sup>27</sup> Nii aitocohichene tocohaneein moconajaera suujue aina cuaain moconajaera sitaanu nechujianra, jeelai moconajaeraacha itajiha aicheeunna. Nete nii aitocohichene tocohanene, nitohanihane, cha jana inara letonocuru letohare nitohanai ichana naineein neeuruhane jaanu siriin neeuruhane coina. Nitohanihane jaunte, nechujataain inara raajenihane jataain baasoneein aitocohichene coarateeiche. <sup>28</sup> Caa cacha suujua cuhane nenacaauru moconajaeracuru sitaanu Cana Coanera Suujue aina cuaainnete, inae inara aina niha Cana Coanera Cojoanonaane coujunacanein ichaaun.

<sup>29</sup> Leinjiin cacha jataain laraajiin nena loreri asae enohin nihei nii chuni caje niicha sirii ruluhera. Biji ichojoaainchate naine nitohanein caje niicha sirii ruluhane.

<sup>30</sup> Chateeinti canuhacha ichai ichaene. Niite canu que nejeratenaaneein ne. Nii rijijieein techu canuhacha ichai itajeraneein ne canu esenetana jerihei.

<sup>31</sup> Nitohanihane jaunne inara rai aitoon, satiin osaonacaauru cachaauru quete suujua acatereein Cana Coanera. Nete laen tonaain baasoneein Cana Coanera Suujue que erei que suujua acatenereein. <sup>32</sup> Canu- Cacha Calaohineein nejanoanaa nichaaunne que nihanatiin tonaain baasoneein erei quete suujua acatereein. Nete laen rai Suujue que tonaain baasoneein erei nihane, caa ena nena janonaa, caa baiha neeninu janonaa, naaonjoain que nihanatiin neein suujua acatenereein Cana Coanera.

*Ninaa caje temule caohacha coitucuhacane  
(Lc 6.43-45)*

<sup>33</sup> Tana temule jaain neeichene, caohacha que inaacane caje temule caohacha coitucuhin neeichene. <sup>34</sup> Nitohanein

necha ansaineein neeichene jaunte, inara suujua caje mitunaa nainene caohacha. Inara suujua cuhane baasoneein inaraacha coacuite, inara ujuae caje mitue. <sup>35</sup> Jana caohachaaain suujua coara cachate, caohacha nejesina que ereein ne, suujua cuhane niha caohachane jaun. Jana baasoneein suujua coara cachate baaso que ereein ne, suujua cuhane niha baasone jaun. <sup>36</sup> Canune inara rai beeun, inae caseteco coaracururichaaain satiin caa chauratane que nenacaauru cachaaurune bana, tonaain baasoneein ereeichene nihanatiinte coitucunojoinereein. <sup>37</sup> Nitohaneeinte, inara ujuaae caje baaso ichaaain neeichene ujuaihoneein neneeichene, caohacha ichaaain neeichene coitucunojoiniha cureein,” nae acaauru rai Jesoso.

*Cojoelanaacojoai bajaauruha necha aansai cachaaurune*

<sup>38</sup> Nii jaunte:

“Cacha relaera, canacaanu rai cojoelanaacojoai ichaaain coarateeinene jerichaanura,” naauruha Moisesa aitonjoan que cacha relaurera aina fariseeocuru tabaaurune janate:

<sup>39</sup> “Caa necha ansaineein suujua coitucuelanaala ichaonacaauru cachaaurute, acaauru rai cojoelanaacojoai ichacaaunne jerecure. Nena inae acaauru que cojoelanaacojoai coaratihalu *profeta* Jonasine jaun, inae nenacaaeneein acaauru que coaratenaa jereneeun. <sup>40</sup> Nii nichata jiichoo nichata janotiineein, ate tabai suri cuhane nihalu Jonasine rijijieeine, canu- Cacha Calaochinichaaunne nichata jiichoo nichata janotiinejeeincha atane cuhane nereeunni. <sup>41</sup> Aihana jaun, coitucunojoiniha caohacha ichaeraauru aina baaso ichaeraauru ichao que tihane banate, nacoaauneein nimichucurureein Ninibe cocoaichacuru, acaauru coulurujueeuruhane coina, acaauru rai beratenojoin beebejiha Jonasine aonaain nacoaauneein Cana Coaunera que coacuhin neeuruhane jaun. Jana ena cau inara aina neinichaaunnena Jonasi amurijiriin nena nichaaunne saijieeinte caitoonjoa esenetana jereneeiche. <sup>42</sup> Jerichanejeein techu nacoaauneein nimichureein enoto mitu nichajai coarajeein cana raotono nichajai que nenaalu ene curuaanaaneein nena netonai inae caseteco coaracururichaaain caa ena nenacaauru cachaaurune bana acaauru coulurujihane coina, niicha coitucuhi beebejiha cachaauru rai Salomoonne jana, coriaji atane caje uhin aonaa uhalune jaun. Cau caa ena inara aina neinichaaunnena Salomoon amurijiriin nena neeun. Nete nii saijieein canu esenetana jereneeiche.



*Nacooauneein cacha suujueniha jelaiha enoha coitucuchuhine*  
(Lc 11.24-26)

<sup>43</sup> Cacha suujua caje mituha leinjiin coitucuchuhinete, cajihanein amuhemujeen nihane jaanu ariirijie. Nii jana eruhenihanete: <sup>44</sup> ‘Taolu mituhanulune jaaunne jelaiha cauha cureeun,’ naain coacue. Niritiin jelaiha turuhin nii cacha coaraane jana, aiha leinjiin loreri conera colane caohatiin lojinojoneen nenea rijijieen eruhanete, <sup>45</sup> nacooauneein jelaiha cuhin, caainsineein amurijiriin baasoneen nenacaauru aina ita taojiaain, jiniiquiin nii cacha suujua cuhane jeelaiha enooruhane, jataain jeelai amuritoheriin baasoneen ichoae nii cacha. Nitohaneente, ichaoha cuurureen caa necha ansaineein ichaonacaauru cachaauru netonai,” nae acaauru rai Jesuso.

*Jesoso rene turuuruha neba aina nejeraaurune*  
(Mr 3.31-35; Lc 8.19-21)

<sup>46</sup> Niritiin jaiti cachaauru aina ereereeca Jesusone janate, rene turuhin aina erenaa jerecure neba aina nejeraauru. Loreri asae enohelanaala airiniha neeuruhane janate:

<sup>47</sup> “Taute airiniha turuhin neeure ii neba aina ii nejeraauru, ii ainate erenaa jerecure,” naain Jesoso rai beeure.

<sup>48-50</sup> Nete, nii rai biha unaa rai:

“Caaurute canu neba aina canu nejeraaurune. Chunocoha caletoaera Ofa ere tonoraain niicha jerenohin icharate, canu nejera, canu bai, canu neba, naaonjoainuri ne,” nae aina nerelanaa nichaanune cojeluhin Jesuso.

## 13

*Temule jaera que cuaain cachaauru rai iriha Jesusone*  
(Mr 4.1-9; Lc 8.4-8)

<sup>1</sup> Nii bananeeinte, nii loreri nihacaanune jaan caje cuhin, nemuri auhaniha turuhin ecu nelauriaain lauheque Jesuso.

<sup>2</sup> Nii jana, arajiin rene turuhacoaauruha cachaaurune jaunte, leinjiin bote cuhane fauhin lauheque, carene ichoae neeu-ruha cachaaurune tonohana. <sup>3-4</sup> Nii bote cuhane neti-  
inte, araai laurii nereretanaa rijijiee *parabola* que cuaain cachaauru rai ereerejeen:

“Leinjiin temule jaera temule jaa cunajaun ucuhe riiaacane janate tabaauru bero cuhane naluha nii niicha ri-  
jaiine jaun, turuhin coaraain quihure tajaecuru. <sup>5</sup> Jana le turijieen niicha riajaite, neniha mululuhin atanene jaan jeloon ajeri ichoae nalunacaauru carajaelanaala omaroe.

<sup>6</sup> Nete inae omarohane jana mituhin ajajaa enotone jaun ohe, mululuhin neniha atanene jaaun, ucuacaain neniha rai cojoaisine jaun. <sup>7</sup> Le turijieen niicha riajari ucuhete,

ajena jana naluhane jaun, amurijiriin omaroha ajaenane jaun atinae. <sup>8</sup> Jana atane caohacha que le turijieein niicha rijaate, le ucuhecuru caje le temuracuru lefashaananaain inacae. Jana tabaaurute saotachoonca ucuheneein, nichatachoonca ucuheneein, naaonjoaain inaacure. <sup>9</sup> Caa caitoonjoan aonacurumiin irichonacaauru,” naain cachaauru rai ereereje Jesoso.

*Jesoso caje parabola que cachaauru rai ereereecane bajaacaanu aina nerelanaa nichaanune*  
(Mr 4.10-12; Lc 8.9-10)

<sup>10</sup> Nii jaunne, Jesoso rohan nichuuntaain nii araai laurii nereretanaa rijijiei *parabola* que cachaauru rai ereereecane jaan bajaacaanu caje aina nerelanaanichaanune. <sup>11</sup> Nii jaunte: “Cana Coaunera rai cachaneein neeichene jaun, coitucueraelanaala nena Cojoanona coitucuerate inara que. Nete laen rai cachanelanaala nenacaauru que coitucueratenaa jerene. <sup>12</sup> Nitohanihane jaunte, naitoonjoa tonoraain niicha jerei ichajeein nenacaauru rai, jataain jeelai amuritoheriin itolere coitucuhin neeuruhane jaanu tereein Cana Coaunera. Jana naitoonjoa tonoraelanaala niicha jerei ichaelanaala nenacaauru cajete, jitariin acaihaniji acaauruhacha coitucuujei rultureein. <sup>13</sup> Nitohanihane jaunne araai laurii nereretanaa rijijiei que cuaain acaauru rai ereeun. Coaracuruhane niha natiin coitucuuurenihane jaun. Niheichu aonacuruhane niha natiin aonaain coitucuuurenihane jaun.

<sup>14</sup> Nitohaneeuruhane cointate: Aonacuruhane niha natiin: ‘Naaonjoain quete aite,’  
naain coitucuururihaain.  
Niheichu

nii coana jerecuruhane niha natiin coaracururinaain.

<sup>15</sup> Inae jataain nauhacaa  
caa cachaauru suujuane jaunte,  
cha aonacuruhane nihanatiin,  
‘Naaonjoai quete aite,’  
naain coitucunaa nainecurene.  
‘Niheichu

cha coaracuruhane niha natiin  
coitucunaa nainecuruhi.

Nabana

canuhacha ichai coaraain,

aonaain coitucuhin

canu rene uuruhane,  
acaauru rautaanune coataa,’

naain bihalu Cana Coaunera ere bera inoaensi Isaihasine jaa  
nainaelu,”

naain aina nerelanaa nichaanune rai bihane baihate:

16 “Nete laen inara nerausiajeein niha curiquicheein, aonaain, coaraain, coitucuhin, naaonjoainchene jaun. 17 Arajii *profetacuru*, chaen caohachaain suujua coaraauru cachaauru, naaonjoainurine maajeeinte niqii, caa inaraacha coarai coana jerecurelu. Nete coana nainecurenelu. Inaraacha aonaine maajeein aohana jerecuruhane saijieein aonacuruhilu.

*Temule jaera parabola que irihane biha Jesusone*  
(Mr 4.13-20; Lc 8.11-15)

18 Aonacuchene caa temule jaera que cuaain araai laurii *parabola* que irihanune be inara raite coitucuhiche. 19 Cana Coaunera Cojoanona que erenaa aonacuruhane saijieein coitucuhichurute, nii bero cuhane nalunaa temule ucuhe rijijieein neeure, acaauru suujua cuhane Cana Coaunera beratenojoi erenaa jereein aonacuruhane niha natiin, turuha acaauru suujua cuhane baasone jianeraauru ne. 20 Jana nii ajeri ichoae nalunacaauru temule ucuhecurute, Cana Coaunera ere aonaain esenetaain corojeein jereein raauruhane jana, 21 inae cairichaaerinojoneein mucunojoneecuruhane coina arinojoneein neeuruhane, canu esenetaain neeuruhane jianeraauru rijijie. 22 Jana nii ajaena jana temunojoin temule ucuhecurute, Cana Coaunera ere aonacuruhane saijieein, nechujataain caa atane que netiin necoriquijiaain, raotiin nena coacuhin, niicha que suujua cuaain necoritanacaauru rijijie. Niite, inae nii erenaa esenetaauruhane jianein, leeochoauru relaauruhane jianein neeure. 23 Nii atane caohacha que temunojoin temule ucuhecurute, Cana Coaunera ere aonaain leeochoauru relaain, naaonjoaain nenacaauru rijijie. Acaaurute, nii le ucuhecuru caje lefasha ucuheneein, saotachoonca ucuheneein, nichata choonca ucuheneein, naaonjoaain le tijiriichuru caje teeurera rijichure,” naain aina nerelanacaauru rai beebeje Jesuso.

*Tirico temuurerai rai ajaena baaso temuha acaauru que nejeratenaane*

24 Niritiinte, nacoaaunein leeochoa nereretanaa que cuaain acaauru rai ereerejeein:

“Cana Coaunera Cojoanonaate, leinjiin cacha, rai nocoana jana cachaauru que tirico temueratihane jana, 25 temuhin satiin sinihuruhane tonohana, nii tirico niicha temuuri jana turuhin ajaena baaso temuha leinjiin cacha acaauru que nejeratenaane rijijie. 26 Nii jana inae omahonin, inae in-aaca nii tiricone jana inanacae nii ajaena baaso netonai. 27 Nitohanihane jana coaraainte: ‘Curuaanaa, chasiinna temule caohacha ucuhe nejesina temuerateeilune saijieein,

jana mituhe ajaena baaso,' naauruha nii ocoana erora rene turuhin nii amihanenacaaurune janate: <sup>28</sup> 'Chunocoha canu que nejeratenaate, nii ajaena baaso temucaiha,' naa acaauru rai nii ocoana erorane janate: 'Ta, nii ajaena baaso rocohin jaohacaanune jereeine,' naain bajaauruha nii amihanenacaaurune jana: <sup>29</sup> 'Niriimiin, nii ajaena baaso rocohalaaante tiricone maajeein rocoriquiche. <sup>30</sup> Nirijieein ecu neein jiniiquiin omarocurumiin, tainaca que tihane reentiain. Inae tainaca que tihane banane jelai teein nii ajaena baaso raain, jelai teein tirico raain rucuhecaaune jaa cuhane rucujeein, nii ajaena baaso jelai teein mocoheratereeunni,' nae nii ocoana erora," naain cachaauru rai beebeje Jesoso.

*Mosatasa ucuhe rijiicha Cana Coaunera Cojoanonaane que erena parabola*

(Mr 4.30-32; Lc 13.18-19)

<sup>31</sup> Niritiinte nacoaauneein:

"Cana Coaunera Cojoanonaate leinjiin cacha, rai nocoana jana mosatasa ucuhe temuhera rijijie. <sup>32</sup> Esinae rauhijirinte, jataain leeochoauru temule ucuhecuru amurijiriin aansijian rai nucuhene saijieein, inae omarohane leeochoauru ocoana jana nenacaauru temulecuru amurijiriin fohecane, rai nunecuru que tajenajaanu ichacure tajaecuru," naain nereretanaa que cuaain beebeje cachaauru rai Jesoso.

*Faan jorerera rijiicha Cana Coaunera Cojoanonaane que erena parabola*

(Lc 13.20-21)

<sup>33</sup> Niritiinte: "Cana Coaunera Cojoanonaate nichata sajeein coujunaca que arina coujunacateriin rai jorerera que jasiiteein tabaain nii coliha joreerein caje arajiin faan jaa leinjiin enene rijijie. Nii neleeriha tabaain colihane coina nena jorerera rijijieeinte, cacha ichao sacuritaain nefaane coina nena ne Cana Coaunera Cojoanona," naain beebeje Jesoso.

*Nereretanaa rijijiei parabola que ereerejihane biha Jesosone*

(Mr 4.33-34)

<sup>34</sup> Nitohaneeinte, nereretanaa rijijiei *parabola* nejesina que cachaauru relae Jesoso. Chabana nii *parabola* colane irihe cachaauru rai.

<sup>35</sup> Nitohaneeinte:

"Cana rai chauratane coaanaa Cana Coaunerane caje coauneente, satiin asinojoneein nena que erereein, nereretanaa rijijiei *parabola* cuaaincha," naain beeuruhalu Cana Coaunera ere bera inoaensihuru *profetacurune* nainaane coina nitohanein ichae Jesoso.

*Tirico temuurerera rai ajaena baaso temuera que irihane biha  
Jesosone*

<sup>36</sup> Nitohaneein inae cachaauru rai irihane nainaaante, acaauru rai nocoein jelai caje cuhin nii neuruhane jaan loreri asaae enoha Jesosone jana, rohan nichuuntaain nii tirico coocana jana ajaena baaso temuhera que cachaauru rai iriha Jesosone bajaacaanu caje aina nerelanaa nichaanune. <sup>37</sup> Nii jaunte: “Nii temule ucuhe caohacha temuherate canu-Cacha Calaohineein nejanoanaanichaaunne rijijie. <sup>38</sup> Jana nii ocoana que caitoonjoate, cana rai chauratane ne. Jana nii temule ucuhe caohachate, Cana Coaunera esenetaain aina ijiin rai Cojoanonaa que neenihuru ne. Jana nii ajaena baasote, moconajaera letononeein nenacaauru ne. <sup>39</sup> Jana nii ajaena baaso temuherate, acaauru que nejeratenaa moconajaera ne. Jana nii taojiaera que aitocooaunnete, inae ecu tihane bana sarichaaain cana cojoanonaane que aite. Jana nii taain rucuheraaurute anjeraaurune. <sup>40</sup> Charijieein teinti, ajaena baaso taojiaain mocohaca, nii rijijieeinte inae saa cana janonaane bana moconojoiniha cuurureein osa que leeochoauru saruhin nenacaauru moconajaera aina. <sup>41</sup> Nii banane canu-Cacha Calaohineein nejanoanaanichaaunne canu rai anjeraauru letoareeunni, nii cana cojoanonaa que nenacaauru baaso ichaaain, osa que leeochoauru saruhin, naaonjoaain nenacaauru raain <sup>42</sup> usi charijibana jacanaacharanejeein nena jana jaonajaauruhane, ecu neein auhaauhaquiin chanaaurureein. <sup>43</sup> Inae nitohanihane banate, esinae rauhijiriin Cana Coaunera jerenohin ichaaain tonoraain nenacaauru, aiha enotone tocohaneein jiquihaquiin conohin niha cuurureein, canu Inaca Cana Coaunera Cojoanonaa que neein. Caa aitocooaunne aonacurumiin irichonacaauru.

*Oro rijijieein nena coreti tesoro rijicha Cana Coaunera  
Cojoanonaane*

<sup>44</sup> Charijieein teinti, leinjiin oro rijijieein nena coreti tesoro eruha leinjiin cachane, nii eruhane jaaun tein conautein ratiriin, rachoojoein jitariin niicha sirii rucuhele que necorete nii cacha, nii niicha eruhi conautihane jaan atane coretihane caina. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Oro rijijieein nena perla coreti rijicha Cana Coaunera  
Cojoanonaane*

<sup>45-46</sup> Charijieein teinti, leinjiin recatoon, perla coretiin nena ariirijieein amuhin, inae nii perla coretiin nena eruhane, jataain nii corei eruhane coitucuhin rachoojoein cuhin, rai rucuhele que jitariin necoreteen, nii niicha

eruhi perla corete nii recatoon. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Rede que ate mucuhera rijicha Cana Coaunera Cojoanonaaane*

<sup>47-48</sup> Charijieein teeinti, nemuri cuhane rede jaaoruha ate mucuurerane jana, itolere ate mucuha nii niicha jaori redene, inae memoha ate caaunne jana carene ichoae inaan ate caohachaauru janijiin omari cuhane teein, nii baasooru foranacaauru jaaore nii ate mucuurerana, nii rijicha Cana Coaunera Cojoanonaa. <sup>49-50</sup> Nitohaneein techu, inae cana janonaa satono que turuhane bana, caohachaaain ichaonacaauru janijiin raain, baasoneein ichaonacaauru jaaorureein usi chariji bana jacaelanaala nena jana anjeraauru. Nii banate chanaa cuurureein auhaauhaquuin,” nae aina nerelanaa nichaanune rai Jesoso.

*Canacaanu relaane jaan aonaain coitucuhacaanune bajaa Jesosone*

<sup>51</sup> Niritiinte: “Caa inara rai caitoonjoan aonaaina coitucuhiche,” naain canacaanu caje bajaa Jesusone janane: “Enjeen, aihacaanura Curuaanaa,” naacaanu. <sup>52</sup> Nii jaunte: “Coaracuche nachuhinti leinjiin Cana Coaunera rai rauhi que cacha relaera- cacha relaante, ‘Naaonjoaan caa Ena Turunaa Cana Coaunera Cojoanonaa Caohacha’ naain been, ‘Naaonjoaan nii rauhi inoaei’ naain nii ena canuhacha bei Cana Coaunera Cojoanonaa aina rauhi inoaei que aitiin caohatiin cachaauru rai been cachaauru relae,” nae Jesoso.

*Rai nataneu Nasarete turuha Jesusone*

*(Mr 6.1-6; Lc 4.16-30)*

<sup>53-54</sup> Inae nii nereretanaa rijijiei *parabola* biha cachaauru raine nainainte, jelai caje canacaanu aina amuhin rai nataneu turuhin, ecu nena sinacoca asaee enohin, ecu nenacaauru cachaauru relaane nunuhete Jesoso. Nii janate cojoelatiin: “Chuna jataain cojoelanaacojoai ichaane coinane maajeein nerelaete toritiin itolere coitucuhin ere. <sup>55</sup> Tana enuha caje itolere ichana inaera cacha calaohi nihane, jana rai neba niha Marihane. Nii jana rai nejeraauru niha Saantiaao, Jose, Simoon, Jodasi, naaonjoainurine. <sup>56</sup> Jana rai baihuru netonai cau cana aina ichaauruhane. Chaa cajena jataain nainain itolere coitucuhin aite,” naaure ecu neein aonajeeurera cachaauru.

<sup>57</sup> Niritocuruhane jaunte inae Jesoso esenetaain nere tonorana jerecurene cachaauru. Nii jaunte acaauru rai:

“Chunijiun cuhane jaaurute niqui leinjiin *profeta* que suujua acateein coitucure laurinelanaala nenacaauru

cachaauru. Nete laen esenetaaurene laurineein nenacaauru naraaichuru. Niheichu nii loreri ichaohane jaun nenacaauru niha natiin,” nae cachaauru rai Jesoso. <sup>58</sup> Nii jaunte ecu arajiin cojoelanaacojoai ichaenelu, esenetaaureniha ecu nenacaauru cachaaaurune jaun.

## 14

### *Oha Joaan Baotisitane*

<sup>1</sup> Nii banate, Calileea batane curuaanaaneein niha Erodesine jaun, nii amuhemuheca Jesusone coitucuriin: <sup>2</sup> “Acate, Joaan Baotisitane. Inae o caje ichanacaihara. Acanihane jaunte, nii cojoelanaacojoai ichana nainera,” naain jetao ereereje Jesoso que rai letonocuru rai.

<sup>3-4</sup> Rai nocoala Ferifi comasai Erodiasi siraha comasaine que Erodesine jana jetaote: “Jiaonriha chochala comasai sirii ii comasaine quera,” naa Joanne coreniha jetao, caresero cuhane Joaan enoaeratelu *cadena* que ichoarateein Erodesi.

<sup>5</sup> Nitohaneein caresero cuhane enoaain jetaote, Joaan sohin jaonaa jerihane niha natiin, ichana nainenelu Erodesi, satiin cachaauru Cana Coaunera letononiha Joanne esenetaauruhane jaun, cachaauru coasiha. <sup>6</sup> Nejetaote, nejanoaane bajaanaa bitoaane coina beseta ichaa Erodesine jana jetao, nii beseta bitoaa turunacaauru acatiha raansae nii Erodiasi cacunu. Nii acaauru acatiha raansaa nii ranunane coaraain jetaote, jataain rautatiin coaraane jaun, <sup>7</sup> niicha jerei bajaa caje nii ranunane, Cana Coaunera notaracaae rai tihane coina aite Erodesi. <sup>8</sup> Nii jaun jetaote, rai neba suujuatenojineein Erodesi rai: “Canu rai aihane, leinjiin ojoaichu cuhane Joaan Baotisita coturi uhaau caraicha,” naa nii ranunane jaun <sup>9</sup> inaderae *rey* Erodesi. Nejetaote, satiin niicha cotihacuri acatiha teein Cana Coaunera notaracaae, niicha jerei bajaa caje nii ranunane rai tihane coina aitothane jaun, <sup>10</sup> caresero cuhane niha Joanne jana coturi moloheratein raerate. <sup>11</sup> Nii jaun jetaote, leinjiin ojoaichu cuhane Joaan coturi amaain teeuruha nii ranuna raine jaun, neba rai te nii ranuna.

<sup>12</sup> Inae nitohaneein teratiha Erodesine coitucuhinte, Joaan jaberoco raain conauteein ratiriin, biha uure Jesoso rai Joaan sacuureraauru.

### *Saoqui oaraancai cacha coroaatiha Jesusone*

*(Mr 6.30-44; Lc 9.10-17; Jn 6.1-14)*

<sup>13</sup> Nii jaunte, rai beeuruhane caje coitucuhin, nii nihane jaan jelai caje canacaanu aina amuhin, canacaanuhacha aina leinjiin bote cuhane fauhin, neniha cachane jaan cue Jesoso. Nete nii bote cuhane fauhin amuhacaanu Jesoso ainane coitucuriin, neseeuuru cajeeuru uhacoaain sacuure

atanechoae uhi cachaauru. <sup>14</sup> Inae niicha coinetihu turuhin, bote caje fauhin, iniha cuha Jesusone janate, najiniha cunaitenacaauru uhaain arajiin neeuruha cachaaaurune jaun, cairichaaajoaain acaauru coaraane jaun, niicha uhaauri cunaitenacaauru rautae Jesoso. <sup>15</sup> Nii jana, inae noco-hena jerihane jaunte, Jesoso rohan nichuuntaain: “Chajaain caa cachaauru rai necoeute, nenajaun cauha cuuruhinete, ucuhae rai lenone coretecurumiin. Coatiha caa jana ichaohi cache,” naacaanune jana: <sup>16</sup> “Chajaain inara acaauru coroaateuche. Coatiha caohacharihei ena caauruhane,” naa canacaanu rai Jesusone jaun: <sup>17</sup> “Nihei canacaanu rai lenone. Saoquijieein faan, itaque jerajejeein ate, naajeeinchate neeje,” naacaanune janate: <sup>18</sup> “Cajiha carai uhauuche,” naain <sup>19</sup> omane choae nelauriaauruha cachaaaurune coina aitiin, biji cuhane nii ate aina faan mucuhin teberiaain: “Narihara Cana Coaunera,” naain Cana Coaunera bajaain cataun nii faan teruhin aina nerelanaa nichaanune rai te Jesoso, chalhacaanune coina. <sup>20</sup> Nii jana satiin cachaauru nainein chalhacaanune janate, que lenoneein obeecuruhane jana, jaiti cautihane jaun, rai caute que lechoonca coroata omarii, omari memoaaure. <sup>21</sup> Canaanaihunru aina enecuru janijilanaala, quichaauruhacha janijiinte, saoqui oaraancai cachaauru nii lenonecure.

*Acau ichoae amuha Jesusone*  
(Mr 6.45-52; Jn 6.16-21)

<sup>22</sup> Nii baihate, ecu nedaain cachaauru rai necoihane tonohanau, bote cuhane fauhin ichoaichaniha nemuri jera jaohacaanune coina aina nerelanaa nichaanune letoae Jesoso. <sup>23</sup> Inae cachaauru rai necoihane baihate, jelai caje amuhin, acaachanejeein ichatane ucuuno que cue, ecu Cana Coaunera bajaane coina. <sup>24</sup> Inae nocohejihane janate, cuu acaachanejeein niha Jesoso nii ichatane ucuunone jana, inae coriaeneein cue nii bote, atane auha caje. Nii jana, mijiaaeneein uha cujuana aina fichafichanaane jaunte, amusine nii bote. <sup>25</sup> Nii jana inae janonaa jerihane janate, nii ichatane ucuuno nihane caje uhin, canacaanu caaijie uhe Jesoso acau ichoae rurujueein. <sup>26</sup> Nii jana acau ichoae rurujueein uhane coaraainne, coasiha cojioriin: “Nechu aansai coitucuchuhite aicha,” naacaanu aina nerelanaa nichaanune. <sup>27</sup> Nii jaunte: “Coa nesooneetoache. Canune aihunra,” naain canacaanu rai iriha Jesusone jaunte: <sup>28</sup> “Ii aaine, jereeune ii rene tiaain uhe acau ichoera Curuaanaa,” naa Jesoso rai Fedorone jaunte: <sup>29</sup> “Chajaaujian,” naa Jesusone jaun, bote caje fauhin acau ichoae cuhin ruruje Jesoso rene cuhin Fedoro. <sup>30</sup> Nete jataain mijiaaeneein uha cujuana aina fichafichanaane coaraain, nesooneetohane jaun, asaun naluha cue Fedoro. Inae naluhane



jaunte, nesoone caaun auhaquuin: “Curuaanaa, canu comaleeu,” naa Fedorone jaunte, <sup>31</sup> biji que mucuhin: “Chanuna jataain cha esenetaeneei. Chanuna necoatohi,” nae Jesoso, Fedoro rai. <sup>32</sup> Inae bote cuhane faauruhane rijiee-oritiin, nesuruha nii fichafichanaa aina cujuanane janane, <sup>33</sup> Jesoso acatiha neseonraain: “Iite esinae rauhijiriin Cana Coaunera Calahineeincha,” naacaanu satiin nii bote cuhane cuinichaanune.

*Jenesaree batane que turuhin, ecu nenacaauru cunaitenacaauru rautaa Jesosone*

*(Mr 6.53-56)*

<sup>34</sup> Inae nii nemuri jerau turuhinne, Jenesaree batane que turuhacaanu. <sup>35</sup> Nii Jenesaree bataneu turuhacaanune janate, Jesoso coitucuure ecu ichaonacaauru cachaauru. Nii jaunte, jelai batane sacuritiin ecu turuha Jesusone coitucuhin, rene cunaitenacaauru uhaacoain <sup>36</sup> turuhin, caje acaauru rautana nainihane bajaure, jeriha Jesusone rai cajione auha mucuuruhane coina. Nii rai cajione auha muuurera cunaitenacaaurute satiin nerautaaure.

## 15

*Baasoneein cache ichao tera que iriha Jesusone*

*(Mr 7.1-23)*

<sup>1</sup> Nii janate, Jerosaleen caje turuha uure Jesoso coaraa, Moisesa aitoonjoan rauhi que cache relaureraauru aina fariseeocuru tabaauru. Acaaurute, Jesoso rohan nichuuntaain:

<sup>2</sup> “Chanuna aihuruhalu canacaanu inoaesihurune rijijieein neurene caa ii aina nerelanacaauru. Chanuna jeriha canacaanu ichaone rijijieein lenonecuruhane ajiniha, jauriaanejeein biji culeecurene,” naain Jesoso caje bajaauruhane janate:

<sup>3</sup> “Chanunajian inara netonai Cana Coaunera aitoonjoa tonoraelanaala, inara ichaohacha sacuhiche.

<sup>4</sup> Nitohaneeichene jaunte: ‘Ii inaca, ii neba, naaonjoainuri ere tonoraain caohachain ichaaoche. Necha ansai, naain baasoneein rai inaca, rai neba, naaonjoain que ereein neite ateinanohiniha cureein,’ naa Cana Coaunera Quiricha Inoaensi cuhane natiin tonoraelanaala ichaohiche. <sup>5-6</sup> Cana Coaunera Quiricha Inoaensi cuhanete niqúi ne rauhi, satiin cache, rai fojiaraauru rai cha teein nihane coina. Nete inara: ‘Coatiha inara rai cha tenaa nainihaaun, satiin quiicha sirii inae Cana Coaunera que banijjaaineein nihane jaun,’ naain erei cache, inaca, neba, naaonjoain rai chaelai tenaa nainenihane que aitocoiche. Nitohaneeinte, Cana Coaunera aitoonjoan que jaolecohin tonoraeneeiche, nechú jataain

inara ichaohacha sacuhichene coina. <sup>7</sup> Esinae rauhijiriinte, necha ansaineein neeichene que aitiin, inara que laenaelu Cana Coaunera Ere bera *profeta* inoansi Isaihasi:

<sup>8</sup> ‘Caa cachaaurute,  
rai nereecha que  
canu coroajeein neeure.

Jana

acaauru suujua cuhane aihuruhi.

Cacajete

coriaae ne acaauru suujua.

<sup>9</sup> Nii jaun,

nii chaque nelatejeehai,

netaojiaain canu

coroaaecuruhane

nechu jataain acaauru relaauruha cachaaurune

que nejesinajeein ita relajeein

neeuruhane jaun,’

naelu inara que Cana Coaunera Ere bera inoansi Isaihasi,”

nae acaauru rai Jesoso. <sup>10</sup> Niritohane baihate, nii ecu ne-

nacaauru cachaauru cotijiaain: “Caohachaaain caa inara rai

aitocaaunne aonacuchete coitucuhiche. <sup>11</sup> Coatiha baa-

soneein cacha ichao aasaehai joaereen lenone canaacha

quii. Baasoneein suujua cuhane niicha coacui, nujuae caje

mitunaate laen, baasoneein cacha ichao aasaje,” naainte

acaauru rai beebeje Jesoso. <sup>12</sup> Nii janate rohan nichuuntaain:

“Nii aitohine aonajeein jataain ii que nererojoecaauruha

fariseeocurune aonaaina,” naain caje bajaacaanu aina nere-

laa nichaanune janate: <sup>13</sup> “Niicha temunojoinelanaala nenea

ajaenate, cojoaisi aina curuataain rocohin jaoreein Cana

Inaca Cana Coaunera. <sup>14</sup> Aihane jaun, coa acaauru rerohe-

caachete ninaaurumiin. Maosa rijjijeein neeuruhane ri-

jjijeein nenacaauru relaeraneein neeuruhane jaunte aito-

cure. Chaen techu leeocho maosa amanaa jeriha leeocho

maosane, jiniiquiin atane jachu cuhane naluhin nitajeeu-

rurihane rijjichuruhane jaun aitocure,” nae aina nerelanaa

nichaanune rai Jesoso. <sup>15</sup> Nii janate Jesoso rai: “Canacaanu

rai, nii aitohine jaan beeune coitucuhacaanu,” naa Fedorone

janate: <sup>16</sup> “Inara niha natiin inachura coitucuneeichete.

<sup>17</sup> Tana satiin cacha ujuae cuhane enonaa, cacha suri cuhane

cuhin, nii baiha cacha jaberoco caje mituhane coitucuhich-

ene. <sup>18</sup> Jana cacha ujuae caje mitunaate, cacha suujua

caje mituhe. Niite laen baasoneein cacha ichao aasaer-

ane. <sup>19-20</sup> Nitohanihane jaunte, cacha suujua caje mituha

itolere baasone jaun, sonajaain jaohin, sinijeranelanaala ne-

naa ene aina ichaohin, asijiauhin, casejenetiin, ita cotaain,

naonjoaan cachanete laen, baasoneein cache ichao asaaerane. Jana nitohaniha cana ichaone tonoraelanaala cana biji culejelanaala lenonichaane, coatiha baasoneein cana ichao aasaehai,” nae Jesoso.

*Leinjiin ene Jorionelanaala nena Jesoso esenetaane  
(Mr 7.24-30)*

<sup>21</sup> Jelai caje amuhin Tiro, Sidoon, naonjoainuri batane nicheae cuha Jesusone jaun aina cuhin, <sup>22</sup> inae ecu turuha-caanune janate, eheehequuin: “Curuaanaa Rabiri nefoerate, cairichaaajoaain canu coaraau. Moconajaera siriha canu cacunune jaunne aitoonchera,” nae canacaanu caaijie uhin leinjiin Canaan bene, natane caje uhin ecu ichaonaa. <sup>23</sup> Nii jana inauheneecha aonajian Jesusone jaunne: “Chajaain caa ene rai aitoote amuhine. Nete cana caaijie ujuueein eheeheque,” naacaanu rohan nichuuntaain aina nerelanaa nichaanune. <sup>24</sup> Nii jaunte: “Cana Coaunera rai cachaneein nenacaauru Israeli cocoaichacuru nitajeeuruhane rai nenacaauru reneecha caletoaclu,” nae Jesoso. <sup>25</sup> Nete, nacatiha neseonraain: “Canu coroatajaneuchera Curuaanaa,” naa rai nii enene janate: <sup>26</sup> “Coatiha caohacharihei Cana Coanera cachaneein nenacaauru que banijiaain nena ruluhin remaae rijijieein neinequichene rai tihanuchenera,” naa Jesusone janate: <sup>27</sup> “Aihachechuhisi niquicha Curuaanaa. Nete remaae rijijieein canacaanu coaraaichene niha natiin, atiin canu coroatajaneuchera Curuaanaa,” naain Jesoso tonorae nii ene. <sup>28</sup> Nii jaunte: “Qesenetaaine corenihate, inae ii jerenohi rijijieein nerautareein nii ii cacunuchera,” naa Jesusone rijieeoritiin, inae nerautae nii rai cacunu.

*Arajii cunaitenacaauru rautaa Jesusone*

<sup>29</sup> Jelai caje amuhinte, Calileea conemuri auhaniha turuhin, ichatane ucuunno que iniin, ecu nelauriaain lauheque Jesoso. <sup>30</sup> Nii janate, rene netaojiaaure arajii cachaauru, bacosacuru, maosacuru, biji que jiuronacaauru, erenaacharaauru, leeochoauru arajii cunaitenacaaurune maajeein uhaacoain, Jesoso acatiha tenajaauruhane acaauru rautaane coina. <sup>31</sup> Nitohaneein rautanaacane janate, inae nerautaaain, nichaauraaain, amuure bacosacuru, maosaneeuruhane caje conoe maosacuru nota, inae nerautaaure biji que jiuronacaauru, erenaacharaauru niha natiin inae ereeure, naonjoaauruhane coaraainte, jataain cojoelatiin, Cana Coanera Israeli Coanera coroaecure nii ecu neein coarajeeurera cachaauru.

*Jena oaraancai cachaauru rai lenone faa Jesusone  
(Mr 8.1-10)*

<sup>32</sup> Nii janate, aina nerelanaa nichaanune cotijiaain canacaanu rai: “Inae jataain cairichaojoaain caa cachaauru coaracaau. Inae nichata janoha cau canu aina neeuruhane. Nii jana nihei acaauru lenone. Naininaaun coroatenajaelanaala acaauru letoaanu acaauru nenajaunne. Mijiintena caaun aterocuruha bero cuhanene coataa,” naa canacaanu rai Jesusone jaunne: <sup>33</sup> “Chuna caa araaine cacha rai lenone erurichaache, neniha cachane jaaun nihacache natiin,” naacaanu aina nerelanaa nichaanune janate: <sup>34</sup> “Inatajajeein nihun faan siriquiche,” naa canacaanu rai Jesusone jaunne: “Caainsinejeein faan, coroatajajeein ate, naajeeichate neeje,” naacaanune janate, <sup>35</sup> atane ichoae nelauriaauruha cachaaaurune coina aitiin <sup>36</sup> rai biji cuhane faan aina ate mucuhin, Cana Coaunera bajaane baiha, cataaun taturiin aina nerelanaa nichaanune rai te, cachaauru rai chaluhaacaanune coina. <sup>37</sup> Nii jaunne, satiin cachaauru rai chaluhaacaanune jana, inae nainaain lenonecuruhane saijieein cautihane jaun, rai caute que caainsine omari memoaaure. <sup>38</sup> Canaanainuru, enecuru, uha elone jaun tabaacoaa nucuhecuroo aina uha cujuana tabaine janijilanaala quichaaauruhacha janijiinte jena oaraancaure nii lenonenacaauru cachaauru. <sup>39</sup> Nii lenonecuruha cachaaaurune baihate, cachaauru rai necoein, leinjiin bote cuhane fauhin, Maadala batane que cue Jesoso.

## 16

*Cojoelanaacojoai icharatecuruha sadoseeocuru aina fariseeocurune*

*(Mr 8.11-13; Lc 12.54-56)*

<sup>1</sup> Nii janate, Jesoso coaraa uure fariseeocuru aina sadoseeocuru. Nitohaneente inae rene turuhin coulurujuee-uruhane jaanu leranu ariha, acaauru rai cojoelanaacojoai ichaane coina aitocure. Chaen esinae rauhijiriin, Cana Coaunera letono nihane coitucuuruhane coinane maajeein.

<sup>2</sup> Nete acaauru rai: “Charijieein teeinti, sonaina cafarane nocohaca dedene: ‘Caohatorichaaain janonaa,’ naain ereeiche. <sup>3</sup> Jana, janone cafarane nocohaca dede nijichoriaa-joaaine: ‘Urichaain elo,’ naain ereeiche. Nitohanein dede caje itolere coitucuhin naaonjoaainchene natiin, chanuna jana: ‘Naaonjoaane coinata caa aicha,’ naain caa enene co-joanona coitucunaa naineneeiche. <sup>4</sup> Caa cachaauru nechu aansainein suujua coitucuelanaala nenacaaurute, cojoelanaacojoai ichacaanne coina canu rai aitocure. Nene

inae acaauru que coaratesihalu Jonasine jaun inae nacaeneein acaauru que cojoelanaacojoai coaratenaa jere-  
neeun,” naane baiha acaauru ratiriin, jelai caje amuhe Je-  
soso.

*Faan jorerera- lebadora rijiicha fariseeocuru ichaone*  
(Mr 8.14-21)

<sup>5</sup> Inae Calillea conemuri jerau cuhacaanune jaun faan  
baiteein ratirihacaanu aina nerelanaa nichaanune jaunte:  
<sup>6</sup> “Aonacuche. Faan jorera rijiicha fariseeocuru aina, sa-  
doseeocuru ichaone que necohalajihuche,” naa canacaanu  
rai Jesusone jaunne: <sup>7</sup> “Chanuna caa aite. Faan uhaeni-  
hacachene jaunna caa aitohate,” naacaanu ita raine aona-  
jeeinte:

<sup>8</sup> “Chanuna faan uhaeneeinchene que aitocoiche. Jataain  
asaariinchate quesenetaaiche. <sup>9</sup> Tachu jaiti nainaquiche  
taolu saoquijiei faan chaluheratihanu, saoqui oaraancai  
cacha raine jana, inata omariin rai caute taojiaaichelu.  
<sup>10</sup> Niheichu taolu, caainsinejei faan chalueratihanulu jena  
oaraancai cacha raine coaauheeiche, inata omariin jana rai  
caute taojiaaichelu. <sup>11</sup> Chanuna faan que inara rai aiteniha-  
nune que nainaeneeiche. Faan jorerera rijiicha fariseeocuru  
aina sadosseeocuru ichaone que necohalajihuche,” nae aina  
nerelanaa nichaanune rai Jesuso. <sup>12</sup> Nii jaunne, faan jor-  
erera que aitelanaala, cacha relaauruha fariseeocuru aina  
sadosseeocurune que aitoha canacaanu rai Jesusone que  
nainacaanu.

*Mesihasi niha Jesusone biha Fedorone*  
(Mr 8.27-30; Lc 9.18-21)

<sup>13</sup> Inae Filipino Sesareea batane que turuhinte, aina  
nerelanaa nichaanune rai: “Tonacuruha cachaauru, Cana  
Coanera Calaohineein cacha caje nejanoanaa nichaaunne  
que,” naa Jesusone janate: <sup>14</sup> “Tabaaurute, Joaan Baotisita  
niha, ii beure. Jana tabaaurute, Irihasi niha, ii beure. Jana  
leeochaaurute, Jeremihasi niha ii beure. Jana tabaaurute,  
chunocoha Cana Coanera ere bera *profetane* caiha, naaure,”  
naain tonoraacaanune janate: <sup>15</sup> “Tonaquiche jana inara.  
Cha nichaaun jana Canu inara rai,” naain canacaanu caje  
bajaa Jesusone janate: <sup>16</sup> “Iite esinae rauhijiriin ichaahin  
nena Cana Coanera Calaohi Mesihaseinei,” nae rai Simoon  
Fedoro. <sup>17</sup> Nii jaunte: “Raotojoeinte rausiaaenoinenein  
neei, Jonasi calaohi Simoon. Chuni cacha ichei benihane  
janate, Canu Inaca Cana Coanera ii que canu coitucuerate.  
<sup>18</sup> Jana iite Fedoro neei. Canune ichei aitoon. Iite canuhacha  
tei ajeri rijijieein, canu coitucuruha canu cachaneein  
neenihurune coina icharaneein neriquiin. Nii ii que canuhacha  
icharatei

amuritona nainerinaain chuni, onaanaha natiin itajenaa nainerinaain. <sup>19</sup> Ii raine, Cana Coanera Cojoanona que nena naineeine coina, ichei chabi tereunni. Caa chauratane que netiin, iicha ichaite, Cana Coanera Cojoanona que nereein. Jana caa chauratane que netiin, jaolecohine jaante, Cana Coanera Cojoanona que tihane bana jaolenereein,” naa Simoon Fedoro raine baihate: <sup>20</sup> “Jiaonriha chuni rai: ‘Acate Mesihazine,’ naain beeichene,” nae aina nerelanaa nichaanune rai Jesoso.

*Orichaaine biha Jesusone*  
(Mr 8.31–9.1; Lc 9.22–27)

<sup>21</sup> Inae mainajiriin cairichaururichain Jorioocuru bichauhenaauru, saseredotecuru curuaanaacuru, Moisesa rai Cana Coaneraacha tei rauhi que cacha relaureraauru, naaonjoainurine catainaane jaunte, Jerosaleeun curichaainne beebeje aina nerelanaa nichaanune rai Jesoso. Sohin jaaoruhane nichata janone cuhane ichanarihanine que aitohane jaunte, <sup>22</sup> jelai Jesoso teteriin: “Jiaonriha nitohaneein chetecuruhane jeriha Cana Coaneranera Curuaanaa. Nitohaneein chetena nainecuruhi jerihane,” naain caohatiha Fedorone janate, nauriteriin Fedoro coaraain: <sup>23</sup> “Naain cacaje amuura moconajaera. Nechu canu cairichaeranu quete aitohicha. Cana Coanera jerenohin aina, cha coitucunaa nainiheeii. Cachauruhacha jerenohinchate coitucuujueei,” naane baihate: <sup>24</sup> “Chunocoha canu esenetaain, canu aina nerelanaa jerihane, rainuhacha que niicha coacuhi jianeein, itolere necairichanaa abaataain canu sacuhine. <sup>25</sup> Jana canu colane rai nichao ichoteratena jererate, rai nichao itajereein. Jana, canu coreniha necairichanaate, rai nichao ichoteratereein. <sup>26</sup> Coatihacha que nelatihei, itolere niicha jerei, niicha coacui sirihane nihanatiin, nichao itajiha cachane. Inaaonjoaain coretihane niha natiin, nii nichao ichoteratena nainihei cacha. <sup>27</sup> Inae Cojoanona que turuhane banane turuha ureunni esinae rauhijiriin canu- Cana Coanera Calahineein cacha caje nejanoanaa nichaaunne, canu Inaca Cana Coanera necaohacha que necaohachaaain, rai letonocuru anjeraauru aina jiniiquiin. Nitohaniane banane, le cachauruhacha ichai cainareeunni acaauruhacha ichai rijiinanaain. <sup>28</sup> Cau caa ena nenacaauru tabaaurute oorenereein, itolere curuaanaa neein nihanune coina turuhanu cacha caje nejanoanaa nichaaunne Cojoanona coaraane reentiaaajoaain,” nae aina nerelanaa nichaanune rai Jesoso.

# 17

## *Nejelauneein necoriha Jesoso jaberocone (Mr 9.2-13; Lc 9.28-36)*

<sup>1</sup> Nitohaneein atinaaururichaaainne bihane baiha, saota janonejeeinte, Fedoro, Saantiaao, Saantiaao ocoala Joaan, naaonjoainuri amaain jelai acaauruhacha aina jataain ucuuneein nena ichtatane ucuuno que cue Jesoso. <sup>2</sup> Inae ecu turuhin jetaote, acaauru acatiha netiin, necoriha Jesoso jaberocone jana, rai nomeri netonai enoto tocohaneein jiquihacohane jana, rai cajione netonai cono tocohaneein jiquihaque. <sup>3</sup> Nitohaneein necoriha nomeri aina rai cajionene jana jetaote, Jesoso rene ecocohin aina ereeuruha Moisesa aina Irihasine jana coarajeeure. <sup>4</sup> Nii jaun jetaote Jesoso rai:

“Curuaanaa, caohatoha cau nihacachene. Ii jereeinene nichatajaain loanari jareeunni, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao rai Fedoro. <sup>5</sup> Niritiin ereereeca Fedorone jana jetaote, luhecotariin jiquihaquiin acaauru conaacotaa dede sacarine jana jetao: “Caate jataain belaaain janijiin quiiha cocoainai Canu Calaohi ne. Rai nere tonoraain neeuche,” naain jetao toni nii dede sacari jana erena. <sup>6</sup> Niritiin toniha erenaane aonaain jetaote, atane ichoae comoore jataain coasina caaun, nii nichatajaain aina cunacaauru aina nerelanacaauru. <sup>7</sup> Nii jana jetaote, acaauru rene nichuuntaain mucunajaain jetao:

“Nimichucuche. Coa casihache,” naa Jesoso acaauru raine jana, <sup>8</sup> coaracuruhane jana jetao, inae neniha chuni ainane jana, jelai acaachanejeein ecu ne Jesoso. <sup>9</sup> Inae nii ichtatane ucuuno caje jeelaiha fauha cuuruna jaun jetaote: “Jiaonriha chuni rai caa inaraacha coarai beeichene, Cana Coaunera Calaohi cachaneein nejanoanaa nichaaunne ohanune caje ichanacaunne reentiaain,” naa aina nerelanacaauru rai Jesosone jana jetaote:

<sup>10</sup> “Chanuna jana chaen: ‘Irihasite jaurihanejeein turuha ureein,’ naaure Cana Coauneraacha tei rauhi que cacha relaureraauru,” naain jetao Jesoso caje bajaare aina nerelanacaauru.

<sup>11</sup> Nii jaun jetaote: “Esinae rauhijiriin Irihasite ichoaichaniha turuha ureein. Acate itolere rucuhereein. <sup>12</sup> Nena canu inara rai aitoon. Nii Irihasite inae ichoaaichaniha turuhelu. Nete, acanihane coitucuelanaala que nocoatijaaain, mainajeriin cairichaaurelu. Nii rijijieeinne acaauru bijiu necairichaa cureeunni Cana Coaunera Calaohi cachaneein nejanoanaa nichaaunne,” naa acaauru rai Jesosone jana jetaote, <sup>13</sup> Joaan Baotisita que, acaauru rai aitoaha Jesosone que nainacure aina nerelanacaauru.

*Suujua cuhane coitucuhuhi siricha canaanai rautaa Jesusone*

(Mr 9.14-29; Lc 9.37-43)

<sup>14</sup> Inae nii cachaauru aina nihacaanune jaan turuuruhane janate, Jesuso rohan nichuuntaain, nacatiha neseonraain: <sup>15</sup> “Curuaanaa, cairichaaajoaain canu calaohi coaraau. Araain saainte mijiaaaineein mucuha rai cunaine, usihanauniha natiin comohin, acauhanau niha natiin naluhe. <sup>16</sup> Ii aina nerelanacaauru raine niqui teeun, nete rautasihurene,” nae rai leinjiin cacha. <sup>17</sup> Nii janate: “Cha esenetaain, caohachaaain suujua coaranacharaauru cachaauru. Cha carajaneaina inara aina neein inara relaain, inara abaantareeun. Cajiha canu rene nii canaanai uhaauche,” naain <sup>18</sup> nii canaanai caje coitucuhuhi sitaa Jesusone rijieeoritiinte inae nerautae. <sup>19</sup> Nii baihane, jelai Jesuso teteriin: “Chanuna jana canacaanu coitucuhuhi sitanaa nainesinihacaanu,” naain Jesuso caje bajaacaanu aina nerelanaa nichaanune janate:

<sup>20</sup> “Jataain aasaaeriin esenetaaichene jaunte, rautana nainesineeiche. Esinae rauhijiriin mosatasa ucuhe tabaaineeiniin esenetaaichene jana nihanete, caa ichatane ucuunno rai: ‘Caalai caje amuhin, tajiha cunihun,’ naaichene amure jelai caje. Nihei chanerihei inara rai cha, rauhijiriin esenetaaichene. <sup>21</sup> Nete laen, catohanei moconajaera letono, cana suri couu neein Cana Coanera bajaee bajajeein sitanacai ne,” nae aina nerelanaa nichaanune rai Jesuso.

*Caa quete orichaainne be coroata saain Jesuso.*

(Mr 9.30-32; Lc 9.43-45)

<sup>22</sup> Inae nii canaanai caje coitucuhuhi sitaane baiha, jiniquiin Calileea batane que amuhemuhecaanne janate, aina nerelanaa nichaanune rai: “Cana Coanera Calaohi cachaneein nejanoanaa nichaaunnete necha aansaineein nenacaauru cachaauru bijihu canu tiha cuurureein, <sup>23</sup> casohin cajaanuruhane coina. Nena, nichata janone cuhane ichanareeunni,” naain aina nerelanaa nichaanune rai biha Jesusone jaunne, jataain inaderaacaanu.

*“Coriqui tihana Teenforo rai nii inara relaera,” naain caje bajaauruhane*

<sup>24</sup> Niicha relainichaanune aina jiniquiin Caferenaan turuha Jesusone janate, Fedoro coaraa uure, Teenforo asaae cacha caje coriqui bajaaureraauru. Inae Fedoro rene turuhinte: “Coriqui tihana Teenforo rai nii inara relaera,” naain caje bajaauruhane janate: <sup>25</sup> “Ejeen, coriqui tiha,” naain acauru tonorae Fedoro.



Nii janate inae loreri asaae enoha cuhacaanune jana, Fedoro rai: “Tonaai iite Simoon. Charijihuru caje coriqui bajaare caa chauratane que nenacaauru cachaauru curu-aanaacuru. Rai lauri cajena. Ainihane, laurine lanaala nenacaauru cajena,” naain bajaare Fedoro caje Jesusone janate: <sup>26</sup> “Laurine lanaala nenacaauru cajete bajaare,” naa Fedorone jaunte: “Nitohanein, acaauru lauri coretena nainenihane chujian, cana netonai coretena nainerihaaca. <sup>27</sup> Nete nabana chunocoha acaauru caje nena baijiaera tocohanihacane coataa, caohachae coretichaane. Chajaain taa nemuri cuhane ate cojunihu. Chaen jauriaanejeein dadaera ate raain, rai nujuaaen cuhane coaraainete, cuhane nereein coata caje coriqui. Acaachate nanejereein que canu rai aina ii rai *impoesto* coretichaane. Chaen amaain coretenihun,” nae Fedoro rai Jesuso.

## 18

*Charijicha jataain nelateineein ne Cana Coanera Cojoanonaa que.*

*(Mr 9.33-37; Lc 9.46-48)*

<sup>1</sup> Nii rijieeoritiinne, Jesuso rohan nichuuntaacoain: “Charijicha jataain nelateineein ne Cana Coanera Cojoanonaa que,” naain caje bajaacaanu aina nerelanaa nichaanune. <sup>2</sup> Nii jaunte, leinjiin canaanai cotijiaain, canacaanu cataaun tein: <sup>3</sup> “Esinae rauhijiriine aitoon. Inara ichao coreein, aiha caa canaanaine rijijieein nena naineneeichene, coatiha Cana Coanera Cojoanonaa que nena naineriheeeichhein. <sup>4</sup> Cana Coanera Cojoanonaa que nelateineein neite, leeochoaauru amurijiriin nena coacuelanaala, aiha caa canaanaine rijijieein rai nichao coreein ne. <sup>5</sup> Chunocoha, canu coreniha leinjiin canaanai raerate canu raa aicheein,” nae aina nerelanaa nichaanune rai Jesuso.

*Jataainte alalacarae osa que nesarucuaane*

*(Mr 9.42-48; Lc 17.1-2)*

<sup>6</sup> “Chunocoha, caa ena Canu esenetaeraauru canaanai-hunru saruheraniha osa quene, nuluno que ajeri jabero-co tijichaain, cucuana ucuaano jelon joeraanete caohachae. <sup>7</sup> Jataainte cairichaojoaure caa chauratane que nenacaauru cachaauru, enaicha osa que sarunojoneein neeuruhane jaun. Itolere banate nitohaniha cureein. Nete acaauru amuritoheriin jataain cairichaojoareein nii osa que acaauru saruhera cacha. <sup>8</sup> Nii jaunte caohachae, ii biji, ii tijia, naaonjoain osa que ii saruhin nihane, molohin jaohine. Nenacaeneein tejian caohachare, ii biji, ii tijia, naaonjoain

mauhecaain ichaonaa esine que neeine. Nabana, ii biji, ii tija, naaonjoain, ii saruhane coreniha, satiin ijiabereeo chabana jacanaacharanejeein nena usi jana nijiaohine coataa. <sup>9</sup> Jana, ii nota, osa que ii saruhane, rocohin jaao. Nenacae-neein tejian caohachare, leinjiin ii nota aina ichaonaa esine que neeine. Nabana jerane ii nota aina jiniiquiin chabana jacanaachara usi jana nijiaohine coataa.

*Carenero nitaje que cuaain relanajaane*  
(Lc 15.3-7)

<sup>10</sup> Jiaonriha, chunocoha caa canaanaihunru que jaoleco-  
hichene. Dedeu neein itolere bana acaauru beraihuruha  
Ofa Cana Coanera rohan neein rai letonocuru anjeraa-  
urune jaunne inara rai aitoon. <sup>11</sup> Canu- Cana Coanera  
Calaohi cachaneein nejanoanaa nichaaunnena, nitajerai ne-  
nacaauru ichoterateraanu que turuhin neeun.

<sup>12</sup> Aonacuche. Tana leinjiin cacha, lefashaain niha rai  
carenerone jana, nitajiha leinjiinne, ichatane ucuunno que  
nii iscoon choonca iscoonni ratiriin, <sup>13</sup> nii nitajenaa ariin  
eruhane, nii iscoon choonca iscoonneein nitajelanaala ne-  
nacaauru coroaecane amurijiriin, esinae rauhijiriin niicha  
eruhi coroaerihane. <sup>14</sup> Nii rijijieeinte, nii leinjiinejein nita-  
jeeuruha caa canaanaihunrunne jerene dedeeu nena cana  
inaca Cana Coanera.

*Chatohaneein nainecure ita que suujua acatecuruha Je-  
socurisito coitucuurerane.*  
(Lc 17.3)

<sup>15</sup> Chunocoha leinjiin inara caje Jesocurisito coitucuera,  
baaso ichaain niha chunocoha raine, jelai teein cotijiaain  
baaso ichaain niha raine coitucuerateein rai raotojoein  
ereeine, nii rai irihane jana rai nere tonoraain coitucuhin  
nihanete, inae jataain raotojoein neriquicheein jiniiquiin.  
<sup>16</sup> Jana ii ere tonoraenihane, leinjiin coroatajaainniji coti-  
jiaain, acaauru aina jiniiquiin rai ereeuche, ii coroataja-  
nena nainecureuha nii leeochoaauru netonaine coina. <sup>17</sup> Jana,  
acaauru ere nihanatiin tonoraenihane, netaojiaain Cana  
Coanera coroaeraauru rai beein, acaauru rai teute rai  
ereeuruhine. Nii netaojiaain Cana Coanera coroaeraauru  
ere tonoraenihane, Cana Coanera coitucuelanaala ne-  
nacaauruneein teein, Roma curuaanaa rai cacha cobaraain  
coriqui bajaaurera rijijieein coaracuche.

<sup>18</sup> Caa chauratane que netiin, inara ichanohite, jerichane-  
jeein dedeeu icharareein. Jana, caa chauratane que netiin  
jaolecohichene jaante, dede caje jaonjoinereein. <sup>19</sup> Caa  
quene inara rai aitoreeunni. Caa chauratane que netiin,  
ita que jerajejeein neein ita suujua rijijieein coacuhin

Cana Coaunera bajaain, cha bajanaa jeriquichenete, inara rai inaraacha bajai tereein canu inaca Cana Coaunera.<sup>20</sup> Chunijiun neeichene jaauru, Canu coreniha, coroatajaain, nichatajaain, naaonjoaain netaojiaain neeichenena canu netonai, ecu inara aina nereeunni,” naa Jesusone janate:

<sup>21</sup> “Curuaanaa, inata saain canejera que casuujua acatichaaunne caohachae, baaso ichaain niha caraine, caainsi saneeina,” naa Fedorone janate: <sup>22</sup> “‘Coatiha, caainsi saneein,’ nahaaun. ‘Caainsichoonca saneein caainsinei quene aitoon, ii suujua acateeine caina,’ ” nae Fedoro rai Jesuso.

*Rai fatoroon cachaauru rebe aninoana jereniha acaauru beraichaneein nenaane*

<sup>23</sup> “Nitohaniane jaunne, naaonjoaa Cana Coaunera Cojoanonaane que inara rai aitoreeunni. Aonacuche. Rebe rucuhena jeriha leinjiin curuaanaa *reyne* rijijiei nereretanaa quene inara relareeunni. <sup>24</sup> Inae rebe rucuhena nunuhetihane janate, jataain arajiin que rebeeona rai cacha turuaa uure rene. <sup>25</sup> Nete, neniha cha coretihane jaanne jaun, jitariin bereecuru, rai sinijera, rai rucuheleuru, naaonjoainuri aina curuaecaain, letononeein neeuruhane caina acaauru que necoretihane caina aite nii *rey*. Jitaain rai rebe coretihanereein tiaaajoaain satiin jiniiquiin amiha-neeuruhane caina. <sup>26</sup> Nii jaunte, nii *rey* acatiha neseonraain: ‘Curuaanaa, atiin caque ii suujua acateein, canu cohacori hune ii rai jitariin corete,’ naa rai nii cachane jana, <sup>27</sup> cairichaaajoaain coaraane jaun, nii rai rebe aninoain que suujua acateein nirijieein jianerate. <sup>28</sup> Nete inae jianiha nii rebeeonajaane jana, caje cuhin rai corihanera que coroataja-jeein rebeeona aina ita eruhin, nii rebeeoca quene coreniha mucuhin rai raro tororohin: ‘Caque rebeoquine jaan coreteeu,’ naa raine janate, <sup>29</sup> nacatiha neseonraain: ‘Canu que ii suujua acateein, canu cohacune ii rai jitariin corete,’ naa rai nii leeoche saijieein, <sup>30</sup> tonoraelanaala caresero cuhane enoaerate, cuu niha rebe jitaain coretihane reentiaaine caina. <sup>31</sup> Nitohaneein, caresero cuhane nii acaauru leeoche tihane coaraante, jataain rautaaurenihane jaun, nii acaauru curuaanaa *rey* rai biha cuure leeocheauru. <sup>32</sup> Nii jaunte, que suujua acateein jianihane baiha nihane jaun, cotiharatein: ‘Nechu aansaneein ichaonaa cacha. Nii rebe coreniha rebeoquine janane, ii que casuujua acateein, cairichaaojaine jaun ii jianeunlu carai aitohine jaun. <sup>33</sup> Chanuna jana, nii cairichaaajoaain ii coaraain casuujua acatichaaunne rijijieein, nii ii leeoche que, ii suujua acateneei,’ naain, <sup>34</sup> inae

jataain obaecane jaun, caresero cuhane enoerate nii *rey*, jitaain rebe coretihane reentiaain,” naain nii nereretanaa que canacaanu relaane baihate: <sup>35</sup> “Nitohaneeinte inara casetecareein canu inaca Cana Coaunera, inara suujua aina cutaain inara amute cacha que inara suujua acateein belaineiechene,” naainte aina nerelanaa nichaanune rai beebeje Jesoso.

## 19

*Sinijera joaera quete cacha relae Jesoso.*  
(*Mr 10.1-12; Lc 16.18*)

<sup>1</sup> Niritiin acaauru rai irihane baihate, aina nerelanaa nichaanune aina Calileea caje amuhin, Jodea batane que turuhin, nucuhe Jorodaan jera que cue Jesoso. <sup>2</sup> Nii janate, arajiin sacuure cachaauru. Ecute arajiin cunaitenacaauru rautae. <sup>3</sup> Nii janate, nechu cairichaauruhane jaan lera ariha, Jesoso rohan nichuuntaain: “Tonaai. Caohachaana joaereen coreniha rai comasai jaoha cachane,” naauruha Jesoso rai fariseeocuru tabaaurune janate: <sup>4</sup> “Tana Cana Coaunera Quiricha inoansi cuhane laenanohineein nenea ereretaain aonaquichene. Jaurihanejeein itolere coaunaane nunuheneeinte, quicha, ene, naaonjoaain coaunaelu Cana Coaunera. <sup>5</sup> Nitohaneein acaauru coaunaainte: ‘Rai fojjaraauru caje amuhinte comasai raain, leinjiin cachaneein nenea rijijieein ichaaorureein,’ naalune coitucuhichene. <sup>6</sup> Nitohanihane jaunte, lesajeein necoansajiaa cachane, leinjiin ita jaberoco que jaberocooa rijijieein neure, rai comasai aina. Niheichu ita caje, Cana Coaunera tenojoihunru batunaa nainihe i joaereen cacha,” naain acaauru tonoraa Jesusone janate: <sup>7</sup> “Chanuna jana chaen, comasai jaonaa jerera nihane, rai ita jaaoruhane jaan cocoiricha teein, comasai joaera coina aitelu Moisesa tenojoi rauhi,” naauruhane janate: <sup>8</sup> “Niritiinte aitelu Moisesa, nechu aansaneein nere tonorana jereneiechene jaun. Coatihani niqui jauriaanejeein nitohaneein niheilu. <sup>9</sup> Nena laen canu inara rai aitoon. Chunocoha, chuni quicha aina ichoaeniha rai comasaine jana, jaohin leeocha ene raanete, nii ene niicha rai coreniha inae osa que nesarue nii quicha,” naa Jesoso fariseeocuru raine janate: <sup>10</sup> “Nitohanihane jaun chujian, caohacharihei necoasajiaa cachane,” naacaanu aina nerelanaa nichaanune janate: <sup>11</sup> “Coatihani nitohanai coitucunaa nainesihuruhi satiin cachaauru. Acaihanijin coitucuuruhane coina, coitucueratiha Cana Coaunerane jaan curuhachate, nii coitucujueeurureein. <sup>12</sup> Niha araai lauriin nitohaneein necoansajianaa nainelanaala niha cachane jaanu. Tabaaurute, inae nejanoae nitohaneein necoasajiaurenihane coina. Jana

tabaaaurute acaauru cule rocooruha acaauru amute cachaaurune jaun necoansaijianaa nainecurene. Jana leochaaurute raotojoein Cana Coauneraacha tei amihanenaa que amihaneeuruhane coina necoansaijianaa jerene. Nitohaneein ichaonaa jereraauru, nitohaneein ichaauruhine,” naain ereereje canacaanu rai Jesuso.

*Canaanainunru rausiaaeca Jesusone*

*(Mr 10.13-16; Lc 18.15-17)*

<sup>13</sup> Nii janate, canaanainunru uhaaure Jesuso rene cachaauru, acaauru rai Cana Coaunera bajaain, biji que acaauru mucuhin acaauru rausiaaecane coinane janane, acaauru que tacaain caohatihacaanu aina nerelanaa nichaanune. <sup>14</sup> Nii jaunte: “Coa Canu rene tururuha canaanainunrune caohatihache. Cana Coaunera Cojoanonaate aihuruha caa canaanainunrune rijijieein nenacaauru raineen ne,” naainte, <sup>15</sup> bijique nii canaanainunru mucuhin rausiaae najaane baiha, jelai caje amuhe Jesuso.

*Jesoso ainate ere leinjiin enamanaa coriquihona.*

*(Mr 10.17-31; Lc 18.18-30)*

<sup>16</sup> Nii janate, Jesuso rene turuhin: “Cacha relaera, chariji caohacha ichareeun, chariji bana nitajenaachara ichaonaa que ichaohanune coina,” naa leinjiin enamanaa Jesuso raine janate: <sup>17</sup> “Chariji caohachana Canu caje bajaai. Caohachate ne leinjiincha. Nitajenaachara ichaonaa caohacha que ichaonaa jereeine, aitohalu Cana Coaunera rai Rauhine jaan tonoraain ichaao,” naa rai Jesusone janate: <sup>18</sup> “Chariji Rauhina,” naain baajaane janate: “ ‘Coa sonajaain jaoha. Jiaonrihachu, ii comasaine lanaala nena ene dadaain, asijiauhin, leochaauru cairichaa casaje que ereein, naaonjoaain neeine. <sup>19</sup> Chaen ii fojiaraauru ere tonoraain, ijiabereeo belaine rijijieein, chamute cacha belain ichaao,’ ” naa Jesusone janate: <sup>20</sup> “Jitariinne, nii chaitoonjoa tonoraain. Chana nenacaen carai lanare,” naa Jesuso rai nii enamanaane janate: <sup>21</sup> “Esinae rauhijiriin, chaque lanaelanaala Cana Coaunera aitoonjoa tonorana jereeine, chajaain jitariin nii iicha sirii que necoreteein, cairichaaihuru rai tenihun. Nii banaachate, jelai amuritoeriin nereein iicha latei dedeeu. Nii baiha canu sacuu,” <sup>22</sup> naa rai Jesusone aonaainte, jataain inaderaain cauha cue nii enamanaa, jataain coriquihocane jaun. <sup>23</sup> Nii jaunte, aina nerelanaa nichaanune rai: “Esinae rauhijiriinte caaintate, Cana Coaunera Cojoanona que enoha leinjiin coriquihonane. <sup>24</sup> Nacoauneeine aitoreeunni. Charijieein teinti leinjiin toro seeonjoan amuritoojaain nena

camecho, oco jachu cuhane situnaa nainene. Nii amurijiriin enonaa nainiheĩ leinjiin coriquihona Cana Coaunera Cojoanona que,” nae aina nerelanaa nichaanune rai Jesoso. <sup>25</sup> Niritoha Jesusone jaunne, jelai amuritoheriin canacaanu suujua elonaane jaun: “Nitohanihane, chariji jana enohin nichotena nainereein,” naacaanu ita raine janate, <sup>26</sup> canacaanu coariin: “Nihei chuni raajenhane enohin nichotena nainiheĩ. Nete laen Cana Coaunera jerihane joenreein cache enohin nichotena naine,” naa canacaanu rai Jesusone janate: <sup>27</sup> “Canacaanune, ii sacuhacaanune coina jitariin canacaanuhacha sirii ratirihacaanulu. Cha jana rarichaanuhin canacaanu nii coreniha,” naa Fedorone jaunte: <sup>28</sup> “Esinae rauhijiriinte, inae Cana Coaunera cojoanona que turuhane bana canu, Cana Coaunera Calaohi cachaneein nejanoanaa nichaaunne itolere cocoinanacaaihuri amurijiriin cocoinanohi nichaaunne jaan rori- *trono* ichoae nelauriaanune banate, inara netonai lechoonca coroatajai cocoinanacai nequichene rori- *trono* ichoae nelauriariquicheein, nii lechoonca coroata lauriin nenacaauru Israeli cocoaichacuru ichanaa coaraain, ‘Acaauru acaaurute caohacha ichae. Jana acaauru acaaurute baaso ichae,’ naain been coitucuhin rucuhequichene coina. <sup>29</sup> Chaen techu, canuhacha icharateĩ ichacuruhane coina, rai bereecuru, naraaichuru, comasai, fojiaraauru, rai natane, naaonjoain ratirichate, lefasha saneein jelai amurijiriin eruurureein. Chaen techu, chabana nitajenaachara nejeein nena ichaonaa que ichaoreein. <sup>30</sup> Chaen techu, caa ena leeochoauru amurijiriin nelaetoha nocoetonacaauru, caa ena chaque nelatihei rijijieein nenacaauru fautaain chaque nelatelanaala nedaurureein. Jana ena caa leeochoauru fautaain nelatihei rijijieein nenacaaurute, jataain nelateineein neurureein,” naain Fedoro tonorae Jesoso.

## 20

*Leinjiin ocoana erora- cache amiharatera rijiicha Cana Coaunera Cojoanonaane que canacaanu relaa Jesusone*

<sup>1-2</sup> Niritoha canacaanu raine baihate nocoana que cache amiharatiha leinjiin ocoana erorane rijiicha Cana Coaunera Cojoanonaane que canacaanu relae.

Niritiinte: “Leinjiin cache janohetiin nimichuhin, nocoana jana amihaneeuruha cachaurune coina ariin, inae cachauru eruhin, rai nocoana jana le jiichooneineein acaauru amihaneeo coretihane coina rucujueein, nii cachauru letoae nii amihanenaa erora. <sup>3</sup> Inae acaauru letoane baiha, enoto chujutaaelalajeein nacoauneein

mituhin cuhin leeochoaauru cachaauru arihane janate, najiniha neeure nenaanaja cataaun nelanaaejeein cachaauru. <sup>4</sup> Nii jaunte, nii nelanaaejeeunruhane coaraane jaun: ‘chajaain inara netonai amihanenihuche canu ocoana jana. Inara amihaneon rijijieeine inara coretereunni,’ naa nii amihanenaa erorane jaun cuure nii cachaauru. <sup>5</sup> Nii baihate coaiteen, enoto chujutaain mituhin cachaauru ariin, nii baiha sonaiha mituhin cachaauru ari nii amihanenaa erora. <sup>6</sup> Inae nuna macohi ichoae teejiha enotone jana, mituhin nacoauneein cachaauru arihane jana, nenaanaja cataaun neeuruha rai namihaneeo colane nelanaaejeein cachaaurune jaun, erunajaain: ‘Chanuna sonafaajeein amihanelanaala neeiche,’ naain acaauru caje bajaa nii amihanenaa erorane jana: <sup>7</sup> ‘Neniha canacaanu rai amihanenaa terane jaunna, amihanenihacaanu,’ naauruhane jaunte: ‘Chajaain aihane inara netonai canu ocoana jana amihanenihuche,’ naain letoanajae nii amihanenaa erora.

<sup>8</sup> Inae nocohena jerihane janate, rai cachaauru beraicha rai: ‘Chajaain, nii cachaauru cotijiaain, acaauru satononiha turuhin amihanenacaauru que nunuheteen coretenaacu, nii jauriaanejeein nunuheteraauru que satonoteen,’ naa nii amihanenaa erorane janate, <sup>9</sup> inae ichoachaniha cuuruha nii satononiha nuna macohi ichoae teejiha enotone jana nunuheteen amihanenacaaurune jana, le cachaauru corete jerichanejeein le jiichooneein, nii coretera. <sup>10</sup> Nii janate, inae nii ichoachaniha turuhin amihanenacaauru coretihane jaan que turuhane jaun: ‘Nii satononiha turuhin amihanenacaauru amurijiriin jecha, rai namihaneeo core raaurureein,’ naaure. Nete, nii satononiha turunacaauru rijijieein, jerichanejeein le jiichoo coreneein raare acaauru netonai. <sup>11</sup> Nii jaunte, rai namihaneeo core raauruhane ucuaaetoha nejesinajeein nii amihanenaa erora rai: <sup>12</sup> ‘Caa canacaanu satononiha turunacaaurute, basiinjiincha amihaneeruhane saijieein, canacaanu coreteeine jeoneein acaauru coreteei, mainajeein amihaneein, enoto ajaanone maajeein abaantacaanune saijieein,’ naaure. <sup>13</sup> Niritocuruha nii amihanenaa erora raine jaunte, leinjiin rai: ‘Coatihana baasoneein ii coretichaaunte quiicha belai. Tana canu aina, le janohineein ii coretichaaunne coina rucuhequine coitucuhine. <sup>14</sup> Aihana jaun, nocoa ii amihaneeo core. Chajaain amuu. Canune, nii inara satononiha turuhin amihanenacaauru rai, jerichanejeein inara coretichaaunne jeoneein coreteun, <sup>15</sup> carai niha rauhi cacorigui aina quiicha jerei ichacaunne jaanune jaun. Raunajetocaaunne jaunna baasoneein canu coaraaite,’ naain nii cacha tonorae nii amihane-

nenaa erora.

<sup>16</sup> Nii rijijieeinte, caa enene ichoaichaniha nenacaauru satononiha neeurureein. Jana satononiha nenacaaurute, nunuheneein neeurureein,” nae Jesoso.

*Orichaainne biha nacoauneein Jesosone*  
(Mr 10.32-34; Lc 18.31-34)

<sup>17</sup> Inae bero cuhane Jerosaleen nichaae cuujihacaanune janate, nii lechoonca coroatajaain aina nerelanaa nichaanune cotijiaain, jelai canacaanu teteriin: <sup>18-19</sup> “Inae enate laen Jerosaleeun cuhacache. Ecute, Cana Coaunera Calaohi cachaneein nejanoanaa nichaanune mucuhin, saseredote curuaanaacuru, chaen Moisesa rai Cana Coauneraacha tei rauhi que cacha relaaureraauru, naaonjoainuri rai canu tiha cuurureein. Chaen techu nejelau atane caje unacaauru cachaauru rai caetecurureein, caque nocoatijiaain, canu faojaain coroso que canu teein canu ateinaauruhane coina. Nena nichata janojoin cuhane ichanareeunni,” naain aina nerelanaa nichaanune rai beebeje Jesoso.

*Saantiaao aina Joaan nebaacha bajai*  
(Mr 10.35-45)

<sup>20</sup> Nii janate, Jesoso rene turuha uhe Sebedeeo comasai, rai calaohichuru Joaan, Saantiaao, naaonjoainuri aina. Turuhinte, nii calaohichuru rai atiin chelai ichaa Jesusone coina nacatiha neseeonriaane jana: <sup>21</sup> “Chate jerequicheta,” naain caje bajaa Jesusone janate: “Inae ii Cojoanonaa que turuhane bana, atiin ii raotono nichajai que nelauriaa leijiinne jana, ii jaabiji nichajai que nelauriamiinche caa leeochara,” naa Jesoso raine janate: <sup>22</sup> “Cha bajaaichene, coatiha coitucuhin bajaheeiche. Necairichanaa abaantarichaanine rijijieeinna necairichanaa abaantana nainequiche,” naain acaauru caje bajaa Jesusone janate: “Abaantana nainichaanu,” naain tonoraauruhane jaun:

<sup>23</sup> “Nii necairichanaa abaantana nainequiche niqui. Nete laen, canu raotono nichajai que, canu jaabiji nichajai que, naaonjoaain nelauriana naineneeiche, nitohanai rai tihanune coina nenihanune jaun. Banihateein ichaalu Ofane jaancuruhacha raite, tenojoin niha cureein,” nae acaauru rai Jesoso.

<sup>24</sup> Nii Jesoso caje bajaa Sebedeeo calaohichuru nebane aonaainne, nii coroatajai ita nejeraauru que nejeratihacaanu nii lechooncaain aina nerelanaa nichaanune.



Nii jaunte,<sup>25</sup> canacaanu cotijiaain canacaanu rai: “Inarate rai cachaauru cairichaaeriin, acaauru amurijiriin niha no-cohetiin neeuruha Cana Coaunera coitucuhichuru curu-aanaacurune coitucuhiche.<sup>26-27</sup> Nete laen, inara nitohaneein nenea naineneeiche. Aihana jaun, chunocoha inara jana leeochoaauru amurijiriin nenea coaacane, leeochoaauru coroatajanemiin. Jana, chunocoha leeochoaauru amurijiriin nenea coaacane, rai letononeein neeine.

<sup>28</sup> Nitohaneein nihanune coinane cau turuhin neeun canu-Cana Coaunera Calaohi cachaneein nejanoanaa nichaaunne. Coatiha carai quiicha latei teein niha cachane coina cau turuhaaun. Canune, cachaauru rai nelatichaaunne coina letononeein neeun. Canune, osa caje nichotiha arajii cachaaaurune coina ohin cacochana que coretiha curee-  
unni,” nae aina nerelanaa nichaanune rai Jesoso.

*Coroatajai maosa rautaa Jesusone*

*(Mr 10.46-52; Lc 18.35-43)*

<sup>29</sup> Inae Jerico caje amuhacaanune janate, Jesoso caaijie uure arajii cachaauru.<sup>30</sup> Nii janate, bero cuhane babaecooruha coroatajai maosacurune jaun, acaauru rohan situha cuha Jesusone aonaain: “Canacaanu Curuaanaa Rabiri nefoerateneein nenea, tana cairichaaajoaain canacaanu coaraaine,” naauruha ehequiine janate,<sup>31</sup> aitocuruhane caohateeuruha cachaaaurune jana, que rutaain tonijiaain ehehequiin: “Canacaanu Curuaanaa Rabiri nefoerateneein nenea, cairichaaajoaain canacaanu coaraau,” naauru janate ecu inacuhin acaauru cotijiaain:<sup>32</sup> “Chatohanai inara rai ichacaunne jeriquiche,” naain acaauru caje bajaa Jesusone janate:<sup>33</sup> “Conoha canacaanu notanena jerichaanura Curuaanaa,” naauru jana,<sup>34</sup> cairichaaajoaain acaauru coaraane jaun, biji que acaauru nota dadaa Jesusone rijieeoritiin inae conoha acaauru notane jaun, Jesoso caaijie uure, nii coroatajai maosacuru.

## 21

*Jerosaleen turuha Jesusone*

*(Mr 11.1-11; Lc 19.28-40; Jn 12.12-19)*

<sup>1</sup> Inae Jerosaleen catainajeein leinjii nese Betafajee ichtane ucuunno- Oliboneein acaauruhacha curuaatei rohan turuhacaanune janate, aina nerelanaa nichaanune caje coroatajai letoae Jesoso.<sup>2</sup> “Chajaain taa niita canaacha coarajei neseu cunichuche. Ecute, cositenojoneein leinjiin bene, leinjiin curuaanaa narejeen, naaonjoaain borocuru eruriquicheein. Chaen inae erunajaaichene, carai cajiha acaauru cosichuru rututaain uhanajaauche.  
<sup>3</sup> Inae uhanajaaichene jana, chunocoha inara caje bajaane:

‘Latenaaca curuaanaane jaunna amanajaacaanu. Enate jelaiha acaauru cainaratereein,’ naain uhanajaauche,” naain letoanajae Jesoso.

<sup>4-5</sup> Nitohanialu:

“Sioon cocoaichacuru,  
joenreen rijjijeein nenea inara *Rey*  
coaracuche.

Acate, inara rene turuha uhe  
leinjiin boro laaojiri ichoae.

Cabario ichoae amuuruha  
leechoaauru curuaanaacurune saijjееinte,  
leinjiin boro

anajiin tabai ruhacaera

narejeen laojiri ichoae uhe,”

naain been laenaalu *profeta* inoaensine nainaane coina ailu.

<sup>6</sup> Niritiin acaauru letoaa Jesosone jaun cuuruha nii coroatajai aina nerelanaa nichaanune caje cunacaaurune janate, nii been letoanajaane rijjijeein, <sup>7</sup> rai narejeen aina boro eruhin, nichoae cajione maritaain amanajaain, Jesoso rai tenajaaunruha aina nerelanacaaurune jana, nichoae lautoroaain cue Jesoso.

<sup>8</sup> Nii janate, najiniha neure arajiin cachaauru. Acaauru tabaaaurute, bero cuhane acaauru cajione maririjiacooaure. Jana tabaaaurute, ajaena raain, najiniha meriaacooaure.

<sup>9</sup> Jana, ichoachaniha cunacaaurute, acaauru caajie cunacaauru aina corojeein eheehequuin:

“*Rey* Rabiri ichoala coroaecuruhine.

Raotojoein turuhine acaneein nenea rijjijeein Cana Curuaanaa- Cana Coaunera letono.

Dedeeune maajeein Cana Curuaanaa coroaecuruhine,” naaure Jesoso que.

<sup>10</sup> Nii Jerosaleen turuha Jesosone coaraainte, satiin nii nese sacutaain que suujua rerohecaain cajihaneei amuhemujueein: “Cha cajena unaa ne caa cache,” naain ita caje bajaain: <sup>11</sup> “Caate, Cana Coaunera ere bera *profeta* Jesoso ne, taolu Calilea nenea Nasarete cocoaicha,” naaure cachaauru.

*Teenforo asajai caje cachaauru sitaa Jesosone*

(*Mr 11.15-19; Lc 19.45-48; Jn 2.13-22*)

<sup>12</sup> Nii jana inae Teenforo asaae enoha cuhane jana, najiniha neeuruha necoretenacaauru aina acaauru caje coreteraaurune jaunte, jelai caje sitanajae Jesoso. Coriqui coreeuruha cachaauru raina jaan rori lachohitiin, ecu serori que necoretiha nenacaauru rorine maajeein lachohitiin:

<sup>13</sup> “Cana Coaunera Quiricha cuhanete: ‘Canu lorerite, acaihaniji Canu bajaabajaecuruhane jaan coloherineein

nereein,' naain ne laenanohineein. Nete, inara leinjiin asiji-aunanaja coloherineein teeiche," naain acaauru cotai Jesoso.

<sup>14</sup> Nii Teenforo asae, rohan turuhacoaauruha maosacuru, bacosacuru, naonjoainurine janate, acaauru rautae Jesoso.

<sup>15</sup> Nii cojoelanaacojoai ichaain acaauru notaaca Jesusone jana ecu neein coarajeeuruha saseredote curuaanaacuru aina Moisesa rai Cana Coauneraacha tei rauhi que cacha relaaureraauru, naonjoainurine janate: "Coroaenojoine-miin *rey* Rabiri ichoala," naain cojiorichuruha canaanain-unru Teenforo asaaene aonaain obajeeinte:

<sup>16</sup> "Toon ii rai ereeuruhane aonaaina," naain bajaauere.

Nii jaunte: "Aihanu. Aonacaaun. Tana: 'Canaanainunru, sisanacaurune maajeein ii coroaecuruhane coinete, cao-hacha ichaai,' naain laenanohineein nenea reretaaichene," naain acaauru tonorae Jesoso. <sup>17</sup> Niritoha acaauru raine baihate, ecu acaauru ratiriin, nii nese caje amuhin, Betaniau cue Jesoso, ecu sinihane coina.

### *Inacaenihane coina iquera cojiotaa Jesusone*

(Mr 11.12-14, 20-26)

<sup>18</sup> Inae janone jelaiha neseeu cuhane jana mijiitohane jaunte, <sup>19</sup> bero auhaniha niha leinjiin *iquerane* jaun nichu-untaain coarae Jesoso, inaacane lihane coina niqiu. Nete inacaenihane jaun:

"Inae chabana coaiteen inaariheeni," naa Jesusone rijiee-oritiin ohe nii *iquera*.

<sup>20</sup> Nii coaraainte: "Chasiinna luhecotariin ohe," naauruha cojoelatiin aina nerelanaa nichaanune tabaaurune janate:

<sup>21</sup> "Esinae rauhijiriin esenetaain, icharichaain Cana Coaunerane esenetaain neeichene, caa ena *iquera* ichacaaunne amurijiriinte naineriquiche. Caa ichtane rai: 'Caalai caje amuhin, cucuana cuhane cunihun,' naaichene, nii aitocoichene rijieeoritiin cucuana cuhane cure nii ichtane. <sup>22</sup> Nii rijijieein techu, Cana Coaunera caje cha bajaai tereein Cana Coaunera," nae aina nerelanaa nichaanune rai Jesoso.

### *Cocoinaai letono niha Jesusone*

(Mr 11.27-33; Lc 20.1-8)

<sup>23</sup> Nii baiha Teenforo asae enohin cachaauru relaa niha Jesusone janate, rene turuhin: "Chatohanai Cocoinanacai neeinna neei ii, catohanai ichaaine coina. Chana cocoinanacai neein ii cocoinae," naain Jesoso caje bajaauruha saseredote curuaanaacuru aina Joriocuru bichauhenaaurune janate:

24-25 “Canuhetonaina inara caje bajanaa jereeun. Cha Joaan letoaelu cacha cojunacatihane coina. Cana Coaunerana letoaalu, ainihane cachaauru letononeeinna aihalu. Canu rai beechenena, canuhetonai inara rai canu cocoainaera bereeunni,” naain acaauru tonoraa Jesusone janate:

“‘Cana Coaunerate letoaelu,’ naacachenete: ‘Chanuna jana esenetaeneeichelu,’ nareein cana rai. <sup>26</sup> Niheichu ‘Cachaaurute letoaelu,’ nanaa nainihaacache acaauru coasiha. Satiin cachaauru, Cana Coaunera, Joaan letoaalune esenetaauruhallune jaun,” naaure nejesinajeein ita rai. Niritiin ita rerohecaainte:

<sup>27</sup> “Coitucuhaacaanu,” naauruha Jesoso raina jaunte acaantonai:

“Aihana jaun chujian canuhetonai, inara rai canu cooainera benaa nainihaaun,” naain acaauru tonorae Jesoso.

*Coroatajai calaohichuru letoaa leinjiin cachane rijijiei que acaauru relaa Jesusone*

<sup>28</sup> Nii baihate acaauru rai:

“Tonaquiche jana inara caa erenaa que. Leinjiin cachate coroatajaain neeuruha rai calaohichurune jana, leinjiin rai: ‘Canu calaohi, enene canu ocoana jana amihanenihu,’ naa rai inacane jana: <sup>29</sup> ‘Coatiha curinaaunni’ naain cunaa jerenhane baiha cue nii leinjiin rai calaohi. <sup>30</sup> Nii baiha coaiten, nii rai calaohi coroataja letoaane janate: ‘Saan ahi. Inae curichaaunnicha ofa,’ naane saijieein cuene. <sup>31</sup> Chariji inara rai, rai inaca ere tonoraain niicha icharatei ichae,” naain canacaanu caje bajaa Jesusone janate:

“Nii ichoaichaniha rai inaca letoanojointe, inacaacha icharatei ichaain inaca ere tonorae,” naauru janate:

“Nii rijijieein techu, inara aineeichene jana, Cana Coaunera Cojoanonaa que niha cuurureein Roma curuaanaa rai cachaauru cobaraain coriqui bajaaurera aina ene cojoaelorohecuru. <sup>32</sup> Caohachaaain rai nichao coreein neeuruha cachaaurune coina, relanajaa uhalu Joanne jana, inara esenetaeneeichelune jana, Roma curuaanaa rai cachaauru cobaraain coriqui bajaaureraauru aina, nii ene cojoaelorohecuru esenetaauruhallune jaunte, Cana Coaunera Cojoanonaa que neeurureein. Jana inara, coaraquichene saijieein esenetaain inara ichao coreneeichene jaun, coatiha Cana Coaunera Cojoanonaa que nerihееicheein,” nae saseredotecuru aina Jorioocuru bichauhenaauru rai Jesoso.

*Nechu aansainein ichaonacaauru amihanenacaauru que chaaauru relaa Jesusone*

*(Mr 12.1-12; Lc 20.9-19)*

33 “Caa leeocho arenaa aonacuche. Leinjiin cachate oba coocana sirihane jaun, bino ichaane jaanu ichaain corihateein, nii baiha ucuuneein rori jae nichoae netiin amihanenacaauru beraihane coina. Inae satiin besautiaane baihate, rai leruhin teeuruhane coina que amihanenaa inaaaureraauru cachaauru rai teein ratiriin amue. 34 Inae tainacaane janate, leruhin rai niicha teeuruheni teeuruha raine coina letonocuru letoaa nii ocoana erorane jana, cuhin bajaauruha nii letonocurune jana, 35 tabaauru letonocuru faojoaain, tabaauru atinaain, ajeri que tabaauru bodoosiin, naaonjoainchuru sonajaaure. 36 Nii jaunte, nitohaneein rai letonocuru letoaaane jana, sonajaauruhane jaun, coaiten jelai amuritoheriin, enacoauneein letonocuru letoaaane jana, jerichanejeein sonajaaunre nii amihanenacaauru.

37 Nii letonocuru letoaaane naineein sonajatocuruhane jaunte, satononiha rai calaohi letoae: ‘Canu calaohi nihane jaunte laen que suujua acatecurureein,’ naain niqui letoae. 38-39 Nete inae cuha nii rai calaohine jana coaraain ecu ita rai: ‘Caate laen, nerora calaohi nihane jaun, jitariin cana caje caa rai inaca raineein nenea raa cureein satiin aina nedaane coina. Coanete sohin jaohacache. Nii banate, satiin cana raineein nedareein nii raineein neenu,’ naain nii rijia caje mitaain sohin jaaore nii amihanenacaauru.

40 Aihana jaun, inae turuhane bana, cha ichareein acaauru aina, nii amihanenaa erora,” naain bajaa acaauru caje Jesusone janate:

41 “Nii nechu aansaineein ichaonacaauru cachaauru sohinte jaoreein, cairichaaajoaain acaauru coaraelanaala. Sohin jaonajaainte, leeochoauru rai nii amihanenaa tiha cureein, inae ecu tihane bana rai leruhin niicha taojiaauri teeuruhane coina,” naauru janate:

42 “Tana, Cana Coaunera Quiricha cuhane: ‘Nii ajeri, loreri ichacuruhane jaanu que nenea jaolecooruhane jaan que temurateeinte loreri jaaure nii loreri icharaauru. Niine cojoelatohacaanu, nitohaneein ichaa Cana Coaunerane jaun,’ naain laenanohineein nihane reretaain aonaquichene.

43 Nitohanihane jaunna inara rai aitoon, rai Cojoanona que neeichene coina tihalune saijieein nii inara rai niicha teilu ruluhin, janijiin niicha ranjoinunru Cojoanonaanu que terichaain Cana Coaunerane jaun. 44 Jana canu nii ajeri nichaunne ichoae comoite raajenihane chalutoroaain nedareein. Jana, canu nii ajerineein chunocoha ichoae comohanunete ajane neein nedareein,” naain raajenihane neque aite Jesuso.

45-46 Niritiin acaauru que aitoaha Jesusone que nainacuruhane jaunte, Jesuso mucueratena jerecuruhane saijieein, ichana nainecurene, satiin cachaauru coasiha nii sasere-dote curuaanaacuru aina Joriocuru bichauhenaauru, satiin cachaauru Cana Coanera letono *profeta* niha Jesusone esenetaauruhane jaun.

## 22

*Leinjiin rey calaohi nisirihatihane quete cacha relae Jesuso.*  
(Lc 14.15-24)

1-2 Nitohaneeinte coaiten acaauru rai nereretanaa rijijie que cuaain ereerejeein:

“Leinjiin rey, nisirihatihana rai calaohine coina beseta ichaane jaunte niqui, <sup>3</sup> rai letonocuru letoae, nii cotihanohichuru cotihacuruhane coina. Nete tonoraelanaala, nii beseta que turunaa jerecurene. <sup>4</sup> Nii turunaa jerecurenihane jaunte, enacoauneein rai letonocuru leeochoauru letoae: ‘Inae jatoroainjete ne lenone. Coerenetonanaain nenacaauru nirihurujete soerate. Chajaain beseta bitoaa uucheje,’ naain cotihanaacuruhane janate, <sup>5-6</sup> tonorana jere-lanaala nocoana jana cue leinjiin. Jana leeochoate, rai rucuhale que necoretiha cue. Jana leeochoaurute, nii *rey* letonocuru mucuhin atinanajaain sonajaure.

<sup>7</sup> Nii corenihate jataain obajeein, rai soondarooru letoae acaauru *rey*, nii rai letonocuru sohin jaoreraauru sohin jaohin, acaauru nese mocooruhane coina. <sup>8</sup> Inae nitohaneein turunaa jerecureniha niicha cotiharateeurine jaunte, ‘Satiinte niqui inae jatoroain ne, caa nisirihatena beseta. Nete nelatecurenihane jaun turunaa nainecurene nii jauriaanejeein cotihanohichuru. <sup>9</sup> Aihana jaun, chajaain nese cataun situnacaauru berooru cuhane cuhecujeein, inaraacha erui cachaauru cotihacuchete, caa nisirihatena beseta bitoaa uuruhine,’ naain rai letonocuru letoae nii *rey*. <sup>10</sup> Nii jaunte, nese cataun situnacaauru berooru cuhane cuhin, aansaineein ichaonacaauru, cachaauru caohachaain suujua coaraauru, naaonjoainurine majeein cotihacuruhane jaun, cacha que memoe loreri asajai.

<sup>11</sup> Inae satiin nii *rey*cha tei cajione jiaain neeuruha cotihanoichurune jana enohin coaraa *rey* janate, ecu ne leinjiin cacha *rey*cha tei nisirihateeuruhane jaan cocoajione jialanaala nena. <sup>12</sup> Nii cacha raite: ‘Chasiina nisiriatena cocoajione satiin rai canuhacha tei jiaeralanaala cau enohite quicha belai,’ naa rai nii *rey* jana, ecu inauheneeicha neein aonaje nii cacha. <sup>13</sup> Niritiinte lenonecuruha cachaurune jana coaraneein nenacaauru rai: ‘Caa cacha biji aina, rai tijia ichojoaain airiniha nocohenaanau jaochette, ecu neein

chanaaine,' nae nii *rey*. <sup>14</sup> Arajiiite niqúi cotihanohi ne; nete coroatajaaecure janijiin ranojoinunri. Nii rijiicha Cana Coaunera Cojoanonaa," naain que jaolequiin nenacaauru que cuaain ecu nenacaauru cachaauru rai ereereje Jesoso.

*Roma curuaanaa rai coriqui bajaaurera aina iriha Jesusone*  
(Mr 12.13-17; Lc 20.20-26)

<sup>15</sup> Niritiin acaauru que aitha Jesusone que nainacuruhane jaunte, jelai caje amuhin Jesoso coulurujeeuruhane jaanu leranu arihure ita suujua tacaain fariseeocuru. Chaelai que aitocuruhane jana, baasoneein acaauru tonoraa Jesusone colurujeeuruhane coina. <sup>16</sup> Nitohaneein coacuhinte, acaauru ere tonoraeraauru, chaen Erodesi ere tonoraeraauru, naaon-joinuri letoaure Jesoso rene, coulurujeeuruhane jaan lera ariha coritaauruhane coina. Nii jaunte rene turuhin:

"Cacha relaera, iite iique tonaain iriha cachane tonoraelanaala, esinae rauhijiriin aitiin jeriha Cana Coaunerane rijijieein ichaoha cachane coina relai, rai suujua caje rocohin cacha relaauruha leeochoaurune rijijielanaala. Chaen nechú inanacaa cacha ichaone caje coaraain coulurueneeine coitucuhacaanu. <sup>17</sup> Nii jaunna, canacaanu rai beeine jerichaanu. Caohachaana Romanocuru curuaanaacuru curuaanaa- enferadoroacha bajaeratenojoi coriqui *impoesto* tihacachene," naain bajaure Jesoso caje. <sup>18</sup> Nete, nechú cairichanaa coacuhin letononeein aitocuruhane que nainaana jaun:

"Casajenetiin cacha caohacha niha nocoetonacaauru, chanuna baasoneein cacairichaa canu coritana coaauquiche. <sup>19</sup> Canu rai, nii enferadoro rai inaraacha tei coriqui uhaauchena coarae," naa Jesusone jaun, rai coata caje nena coriqui denario teeuruhane jaun coaraante:

<sup>20</sup> "Chariji coujunaca cau caa ne, rai curuaa aina laenanohi-neein," naain acaauru caje baja Jesusone jana:

<sup>21-22</sup> "Caate enferadoro coujunacane," naain tonoraauruhane jaunte:

"Aihana jaun chujian, nii enferadoro rainein nena teeuche enferadoro rai. Jana, nii Cana Coaunera rainein nena teeuche Cana Coaunera rai," naa acaauru rai Jesusone jaunte inauheneeicha cojelatiin ecu Jesoso ratiriin amuure.

*Oha cachane baiha ichanaa cachane bajaauruhane*  
(Mr 12.18-27; Lc 20.27-40)

<sup>23</sup> Nii bananeeinte, Jesoso coaraa uure sadoseeocuru tabaauru, oha cachane baiha nacoauneein ichanaane esenetaaurenihane jaun, bajaauruhane coina. Nitohaneein uhinte:

<sup>24</sup> “Cacha relaera, Moisesate canacaanu rai aitelu, chunocoha leinjiiniji canaanai sirilanaala rai comasai ratiriin ohane, nii onaa ocoala nii rai ninana autana raa rai comasaineein ne, nii onaa bereeneein teein, nii autana bereetihane caina. <sup>25</sup> Nii janate, cau canacaanu aina neeurelu caainsineein ita nejera nejesinaneein cachaauru. Nii acaauru inanate, leinjiiniji rai comasai aina canaanai sirilanaala ohe. Nete leinjiiniji canaanai sirilanaala ohane jaun, rai nocoala rai, nii rai nautana teein ratiri. <sup>26-27</sup> Nete jerichanejeein canaanai sirilanaala oha acaentonaine jaun, que jaurii nocoala rai nii nautana teein ratiri. Nirijieein cuaajeeinte satiin ooruha nii ita nejera nejesinaaurune jana, ohe nii ene netonai. <sup>28</sup> Aihana jaun, inae nacoauneein o caje ichanaa cachane bana, chariji comasaineein nereein nii ene, satiin ita nejeraauru comasaineein nihalune jaun,” naain Jesoso caje bajaauruhane jaunte:

<sup>29</sup> “Cana Coaunera Quiricha inoaensi reretaain niicha ichana nainei coitucueeneichene jaunte, cha coitucueeneichene jaun aitocoiche. <sup>30</sup> Inae ohane caje ichanaa cachane, ene, quicha, naaonjoainuri ita que nesinijerateein neeururi-naain, inae Cana Coaunera letono anjera dedeeu nenacaauru rijijieein neeururichaaaine jaun. <sup>31</sup> Tana o caje ichanacuruha onacaaurune que, raaje nujuae caje: <sup>32</sup> ‘Canune, Abaraaun, Isaca, Jacobo, naaonjoainuri Coauneraneen. Aihana jaun, coatiha onacaauru Coauneranihaaun. Canune ichaohin nenacaauru coauneraneen.’ naain aitohalu Cana Coaunerane reretaain coitucuhichene,” nae acaauru rai Jesoso.

<sup>33</sup> Niritiin sadoseeocuru relaa Jesusone jaunte, cojoelatiin aonajeeure cachaauru.

*Jataain leeochoaauru amuritoeriin nelateein tenojoi Rauhi  
(Mr 12.28-34)*

<sup>34</sup> Nitohaneein acaauru relaa Jesusone jana, inauhenee-icha aonajeeuruha sadoseeocurune coitucuhinte, ita taojiaaure fariseeocuru. <sup>35-36</sup> Nitohaneainte, leinjiin acaauru caje Cana Coaunera rai rauhi que cacha relaeraneein nena fariseo, Jesoso rai:

“Cacha relaera, chariji rauhi cana ichao rai leeochoaauru amuritoeriin jataain nelateineein tenojoin ne,” naain nechu coulurijiane jaan leranu ariha, Jesoso caje bajaane janate:

<sup>37</sup> “Ii Curuaanaa Cana Coaunera belaihu, ii coichana, ii suujua, ii suujue, iicha coacui, naaonjoain aina cuaritaain. <sup>38</sup> Caritiinte jataain jauriaanejeein cana rai nelateineein nena rauhi beratelu cana rai Cana Coaunera. <sup>39</sup> Nii que jaurineein tenojoite, jerichanetojoein: ‘Chamute cacha belaa in coaraa, ichaajenhane ijabereeo belaa ine rijitojoein,’ nae.



40 Caa coroatajai rauhite, jataain nelateein cana ichao rai tenojoi ne. Acatechu nii Moisesa aitoonjoa rauhichuru cana relaauruha *profetacurune* jaan rauhi temuraneein ne,” nae fariseeocuru rai Jesoso.

*Cha caje nefoeratenaa ne Curisito Mesihasi.*

*(Mr 12.35-37; Lc 20.41-44)*

41 Nitohaneein jaiti netaojiaain ita aina neeuruha fariseeocurune janate:

42 “Tonaquiche inara Curisito Mesihasi que. Cha caje nefoeratenaa neeicha ne,” naain acaauru caje bajaa Jesusone janate: “Rabiri caje nefoeratenaneeeinte ne Curisito Mesihasi,” naain tonoraauruha fariseeocurune janate:

43 “Chasiina jana nitohanihane, que aitoroatiha Cana Coaunera Suujuene jaun: ‘Canu Curuaanaa,’ naelu Rabiri, Curisito Mesihasi que. Chaen techu:

44 ‘Canu Curuaanaa raite:

“Cau carohan,

caraotono nichajai que nelauriaau,

ii que nejeratenacaauru amuritiin

ii tijia asaae tenajaanune reentiaaincha,” nae Cana

Coaunera,’

naain belu Rabiri.

45-46 Aihana jaun, chasiina Rabiri caje nefoeratenaa nere Curisito Mesihasi: ‘Canu Curuaanaa,’ naalu rai Rabiri natiin,” naa acaauru rai Jesusone janate, le erenaanejeeiniji tonoraurenihane jaun, inae nii caje coauneein, caje cha banaanu jerecurene fariseeocuru.

## 23

*Fariseeocuru aina, Cana Coaunera rai rauhi que cacha relaurera ichao biha Jesusone*

*(Mr 12.38-40; Lc 11.37-54; 20.45-47)*

1 Nii baihate, ecu nenacaauru cachaauru, chaen aina nerenanaa nichaanune, naaonjoainichaanune rai:

2 “Cana Coaunera rai rauhi que cacha relaurera aina fariseeocurute, aitoha nii rauhine jaan belanaala joaenreen cuain cachaauru relaaure. <sup>3</sup> Atiin acaauru ere tonoraain acaauru aitoonjoa ichacuche. Nete laen caohachaene chaachacuruhane rijijieein cha ichaquichene, tonaain ereeuruhane nihanatiin, enaacha leechaneein chaachacuruhane jaun. <sup>4</sup> Nitohaneeeinte, nii chabana nitohanei ichaonaa que ichaonaa nainenihane cachane saijieein, cachaauru rai caaintati ichaonaa teure, nii acaauru nihanatiin nitohanei ichaonaa que ichaonaa naineralanaala.

<sup>5</sup> Nechu caohacha ichaa nocoetocuruhane coaracuruha cachaaurune coinete, nitohaneein neure. Nii jaunte, rai

naurichuru, rai bijihuru cuhane, naaonjoaain Moisesa rai Cana Coauneraacha tenojoin rauhi laenanohineein nenea amaauruhane rautatoore. Chaen techu jataain nelatiha no-coetocuruhane jaan coujunacanu que, cajione ererianohineein nenea jiaainne maajeen aihure. <sup>6</sup> Nii rijjijeein techu niha lenonena jaauru rori caohachaauru janijiin ichoae nelauriaain lenoneein, sinacoca asaene maajeen enooruhane, rori caohachaauru janijiin nichoae nelauriaaure. <sup>7</sup> Nitohaneeuruhane jaunte, bero cuhane acauru que tacaain, acauru que suujua acateein iriha cachaaurune jereein: ‘Cacha relaera,’ naa acauru rai cachane jereinchuru aihure.

<sup>8</sup> Nete laen inara: ‘Canu relaera,’ naain inara rai iriha cachane jereein nenea naineneeiche, satiin inara ita nejeraneein neeichene jaun, leinjiincha niha inara Relaerane jaun. <sup>9</sup> Niheichu nainiheeiche chuni rai: ‘Canu inaca,’ naain erenaa nainiheeiche, leinjiincha niha inara Inaca dedeeune jaun. <sup>10</sup> Niheichu nainiheeiche: ‘Canu curuaanaa,’ naa inara rai cachane jereein neeichene, leinjiin Curisito nichaaunne inara Curuaanaa neein nihanune jaun. <sup>11</sup> Nitohanihane jaun, leeochoaauru amuritoheriin nenea coaauca chunocoha inara janane, cha lateein neeuruha leeochoaurune, acauru coroatajanemiin. <sup>12</sup> Nitohaneein leeochoaauru amurijiriin nenea jerenacaaurute leeochoaauru fautaain tenojoinereein. Jana leeochoaauru fautaain neite, leeochoaauru amuritoheriin tenojoinereein.

<sup>13</sup> Coaraain nainacuche Cana Coaunera rai rauhi que cache relaaureraauru aina fariseeocuru. Inarate Cana Coaunera Cojoanonaa que nenea jerecuruha leeochoaurune caohateraneein neeiche. Inara netonai que ichaonaa naineneeichene jaunte, que ichaauruha leeochoaurune caohateraneein neeiche. <sup>14</sup> Coaraain nainacuche Cana Coaunera rai rauhi que cache relaaurera aina fariseeocuru, autanaauru loreri nihanatiin ruluhin neeichene jaun. Nitohaneein ichaohichene aninoaeraneeite, Cana Coaunera bajaai chene carajaain bajaai che. Nitohaneein neeichene jaunte, jataain caseteco coaraa curiquicheein inara.

<sup>15</sup> Coaraain nainacuche Cana Coaunera rai rauhi que cache relaaureraauru aina fariseeocuru. Inarate chauratane sacuritaain cucuana cuhaneuru amuhemujeein cachaauru ariiri quiche, nechu jataain Cana Coaunera esenetaera niha nocoetiin relanajaainchene, coroata saain inara amurijiriin moconajaera cachaneein neeuruhane coina.

<sup>16</sup> Coaraain nainacuche inara maosa rijjijeein nenacaauru cachaauru relaeraneein nenacaauru. Inarate chunocoha, Teenforo coreniha cha ichaane coina aitohane sainejeein

nii naitonjoa ichaeniha cachane, cha ujuaihoneein nenihane que aitocoiche. Nete laen Teenforo corujele oro coreniha chaachaaain nihane coina aitohane jana, chatohanai ichaaain nenihane cocoaeraane que aitocoiche. <sup>17</sup> Aaso aina maosa rijijieein nenacaauru cachaauru. Cha jataain inara rai nelateein nenaane orona. Tana nii Teenforo coreniha que banijiaineein niha nii orone jaun, jataain nelateineein nihane coitucuhichene. <sup>18</sup> Chaen techu: Chunocoha, Cana Coaunera que banijiai lenonecuru mocohichene jaan rori-*altar* coreniha cha ichaane coina aitohane sainejeein ichaeni-hane, cha ujuaihoneein nenihane que aitocoiche. Nete laen, nii rori- Cana Coaunera que banijiai iniho mocohichene jaan-*altar* ichoae nena coreniha cha ichaa cachane coina aitocoichene, esinae rauhijiriin nohanelanaala ichaane coina aitocoiche. <sup>19</sup> Maosa rijijieein nenacaauru cachaauru. Cha jataain inara rai nelateineein ne. Nii Cana Coaunera que banihateein tenojoin inihona, ainihane rorina. Tana nii rori coreniha Cana Coaunera que banijiaineein niha nii inihone coitucuhichene. <sup>20</sup> Aihane jaun nii rori coreniha chaachaaain nihane coina aitoha chunine, nii roriicha coreniha coat-*iha* icharinaain, nii nichoae nena corenihane maajeainte ichareein. <sup>21</sup> Jana Teenforo coreniha chaachaaain nihane coina aitohane, coatiha Teenforo corenihacha ichaane coina aitorinaain, Cana Coaunera quene maajeainte aitoreein ecu nihane jaun. <sup>22</sup> Jana dede coreniha chaachaaain nihane coina aitoha chuninete, Cana Coaunera nelaurianajaneein niha dedene jaun, Cana Coaunera quene maajeein aitoreein.

<sup>23</sup> Coaraain nainacuche fariseeocuru aina Cana Coaunera rai rauhi que cacha relaaureraauru, inaraacha ichai coitucuhin ichoaneeneichene jaun. Caohacha ichaa nocoetiinte niqui jataain ansijiin laojoiri niha natiin Cana Coaunera rai teeiche. Nete jataain nelatei Cana Coaunera rai rauhi tonoraain neneeiche. 'Caohacha nejesinaacha ichaain, baaso coacuelanaala neein, cairichaaojoaain leeochoauru coaraain, Cana Coaunera ere tonoraain aca jerihane rijijieein que asiin cha ichaelanaala neeuche,' naa Cana Coaunera rai rauhine sainejeein tonoraeneeiche. Nii leeoča jianelanaala nii rauhi aitoonjoa ichaquichenete caohachae. <sup>24</sup> Inarate, maosa rijijieein nenacaauru cachaauru relaeraneein neeiche. Jataain ansijin laojoiriniha natiinte niqui tonoraain niha cachane jereein neeiche. Nete jataain banejelanaala baaso ichaain neeichene coaraain coitucunaa naineneeiche.

<sup>25</sup> Coaraain nainacuche Cana Coaunera rai rauhi que cacha relaaureraauru aina fariseeocuru. Inara cacha coritaera nequichenete, acau cohichene jaan janoriicha culeequiche. Nete cuhanai culejeneeichene jaun jataain calanine cuhanai.

Nii rijiicha inara suujua cuhanai, inara suujua cuhane coacuhin baasoneein cacha basijiaauhin, inara amute cacha caje cha chunaain, naaonjoaainchene jaun. <sup>26</sup> Cha coitucuelanaala nitajenaa neein nenacaauru fariseeocuru. Jauri-aanejeein nii acau cohichene jaan janori culeequichene riji-jieein, nii inara suujua cuhanai itolere baaso ichaquichene jaan caaun calanineein niha inara suujua cuhanaine jaan jaochette, somaraain neeiche.

<sup>27</sup> Coaraain nainacuche Cana Coaunera rai rauhi que cacha relaeracuru aina fariseeocuru, aiha atanebana airichai nichajaine rijijieein somaraain, jana asaaun itolere onaa bucuuru calani sirihane rijiicha inara suujua cuhanaine jaun. <sup>28</sup> Nii aiha atanebanane rijijieeinte, cachaauru nota rai, inara jaberocohacha cacha caohacha tocohaneein inanacae. Nete, inara suujua cuhane casajenetiin, cacha coritaeraniha caohacha ichaa nocoetiin aachene jaun, leinjiin calani rijijieein neeiche. <sup>29</sup> Coaraain nainacuche Cana Coaunera rai rauhi que cacha relaeracuru aina fariseeocuru, inaraacha ichai coitucuhin ichaeneeichene jaun. Casajenetohichene jaunte, nechu cacha coritaeraniha, nii inara foerateracuru sonojoihunru *profetacuru*, cacha caohachaaain suujua coaraaauru, naaonjoainuri cojunaca ichaquiche ajeri caje, caohatiin itolere que corujueleteein. <sup>30</sup> Nitohaneein ichaainte: ‘Cana foerateracuru jiniichaain ichaohacachelune jana nihane, coatiha acaauru coroatajane rihahacache, *profetacuru* sohin jaaoruhane jana,’ naain ereeiche. <sup>31</sup> Niritiinte, inara raajenhane, nii inoaenlu *profetacuru* sohin jaaoreralu nefoeratenequichene coitucuhiche. <sup>32</sup> Inae nitohaneein nunuheteeuruhalu inara foerateracurune jaan besautiaauche.

<sup>33</sup> Acanocuru, acano caje nefoeratenacaauru. Coatiha usi tabai jana caseteco neriquicheeinne caje nichoteriheicheein. <sup>34</sup> Nii cointate inara rene *profetacuru*, cha cojoeluinanaa in-aaaurera, cacha relaeracuru, naaonjoainuri letoaanune jana, tabaauru sohin jaohin, coroso que tabaauru teein, tabaauru faohariquicheein sinacoca asae teein. Chaen techu, ne-seeuru neseeuru naineein arinajariquicheein. <sup>35</sup> Nii jaunte inara, satiin cacha caohachaauru atinanohichuru coreniha caseteco coariquicheein. Caohachaaain suujua coara Abeli atinaauruhalune que nunuhetein, Cana Coaunera rai jelai teein nena teeuruhane jaan rori rohan nena *santuario* rohan teein inaraacha soilu- Berequihasi calaohi Sacariasi que tiaaajoaain, caseteco coaraa curiquicheein. <sup>36</sup> Esinae rauhi-jiriinte nitohaniane coreniha, caseteco coaracurureein caa enene nenacaauru cachaauru,” nae Cana Coaunera rai rauhi que cacha relaaurera aina fariseeocuru rai Jesoso.

*Jerosaleen cocoaichacuru coreniha chanaa Jesusone*

<sup>37</sup> Niritohane baihate: “Cairichaaajoaache Jerosaleen cocoaichacuru, inara rene Cana Coaunera letonocuru *profetacuru* sohin jaohin, Cana Coaunera ere beracuru bodoosiiche ajeri quene jaun. Araai saaine niqui, ii cocoaichacuru ranaa jereen, nitaro asae calaohichuru taojiaa ataoharine rijijieein. Nete canu esenetaeneeichene jaun canu rene unaa jereneeiche. <sup>38</sup> Aonacuche. Ena caje coauneein, inae inara aina nerihaaunni. Aihana jaun, inae nerinaain inara beraicha. <sup>39</sup> Inae nacoauneein canu coariheeicheein, turuhanune bana: ‘Caa ena turunaa Cana Curuaanaa coroaecuruhine satiin chauratane que nenacaauru cachaauru,’ nariquicheeine que tiaaajoaain,” nae Jesuso.

**24***Nitajerichaaain Teenforone biha Jesusone**(Mr 13.1-2; Lc 21.5-6)*

<sup>1</sup> Inae Teenforo caje mituhin jelai caje amuhane rai niha Jesusone janane, rohan nichuuntaacoain caohatiin ichanohiniha nii Teenforone coaracaanu aina nerelanaa nichaanune.

<sup>2</sup> Nii jaunte: “Caohatiin ichanohiniha caa Teenforonena coarajeiche. Esinae rauhijiriine inara rai aitoon, coatiha nii leinjiinniji ita ichoae nerinaain caa ena inaraacha coarajei ajeri, inae satiin nitajerichaaaine jaun,” nae aina nerelanaa nichaanune rai Jesuso.

*Nacoauneein tururichaaain Curisitone bajaauruha aina nerelanacaaurune**(Mr 13.3-23; Lc 21.7-24; 17.22-24)*

<sup>3</sup> Nii baihane, Oliboneein acaauruhacha curuaatei ichatane ucuunno kuhacaanu, ecu turuhin jelai lauhecoha Jesusone jana, rohan nichuuntaacaanu aina nerelanaa nichaanune. Nitohaneein rohan nichuuntaainne:

“Canacaanu rai nii chaitoonjoan beeinene jerichaanu Curuaanaa. Chabana nacoauneein cau tururiquiin. Chatohanaicha inae turuhe lalajeeine jana, ii turu cojoinaca beraneein coarichaanuhin, inae saaelalajiha cana janonaane bana,” naain caje bajaacaanune janate:

<sup>4</sup> “Caohachaaain necohalajiin neeuche, nabana inara coritaauruha chunocohacurune coataara. <sup>5</sup> Arajii cachaaurute, canu niha nocoetiin inara coritana jerecurureein: ‘Canune Curisito Mesihaseeunra,’ naainte, arajii cachaauru coritaaurureeincha. <sup>6</sup> Niha sonaana cau, tajiha, naaonjoaaine coitucuhichene, jiaonriha nesoonetohichenera, nitohanihate cureein nii ajinihara. Nete, nitohanihane nihanatiin, jaiti cana janonaa satono que turueneereincha.

<sup>7</sup> Nejelau lauri nenacaauru ainate, sonaana que neeurureein leeocho lauri nenacaaurura. Nejelau atane que nenacaaurunihana natiinte, leeocho atane que nenacaauru aina sonaana que neeurureeincha. Chaen techu, itolere sacuritaain niha mijetenane jana, araai laurii atanecuru que niha cureein carorara. <sup>8</sup> Nitohaneeinte nunuheca cureein, inae cana cojoanona satono que turuhelalajihane jana, jataain inaderaaauruha cachaaurune jaan cojoanonaara.

<sup>9</sup> Nii jana inarate tenojoiniha curiquicheein cocoinanacaaihuri rai, inara faojoaain, inara atinaain, naaonjoaain inara teeuruhane coina. Chaen techu, satiin cachaauru, canu coreniha inara que nererojoecaaeriin neeurureeincha. <sup>10</sup> Nii banate, arajii canu esenetaera niquichene, inaraacha esenetai jianein, ita que nererojoecaaain, nejesinajeein ita colurujueein ita teriquicheein cocoinanacaaihuri rai.

<sup>11</sup> Arajiite *profetaniha* nocoetiin turuhin namute cachaauru coritaauruhane, acaauru esenetaaurureein arajii cachaauru. <sup>12</sup> Nitohaneeinte, jataain baaso coacuhin inae ita belaihuruhane jianein niha cuurureein cachaauru. <sup>13</sup> Nete laen, nii niicha esenetai esenetaane nunuhetihane caje coauneein, jerichanejeein satono que tiaain sacuera nichotereeincha. <sup>14</sup> Caa ena nena ichaonaa erenaa raotono quiicha beebejei Cana Coaunera Cojoanonaate, satiin chauratane sacuritaain benojoinereein, satiin cachaauru inae coitucuuruhane jana, besaute que turuha cana cojoanonaane coinara.

<sup>15</sup> *Profeta* Danieriicha laenailu reretaain coarate nii coitucuhin nichotena nainereein. Aihana jaun, inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratena casicheine coaraqichene, <sup>16</sup> Jodeau nenacaauru sorooruhine ichatane ucuunno que cuhincha. <sup>17</sup> Jana, rai loreri janori ichoae nena, jiaonriha fauhin rai rucuhela raane. <sup>18</sup> Jana rai nocoana jana nena, jiaonriha rai nenajau cauhin rai cajione ranaa coaacane. <sup>19</sup> Jataainte cairichaojoaurureein nii cojoanona que turuhane bana ausurineein nenacaauru enecuru, sisihajeein canaanai sirichauru enecuru, naaonjoainuri. <sup>20</sup> Cana Coaunera bajaauche, nabana jelarona bana, niheichu nebetacana cojoanona, naaonjoain bana niha nii sorohichene jaan cojoanonaane coataa. <sup>21</sup> Nitohaneeinte niha cureein jataain necairichanaa tabai, cana necoauna caje coauneein nii chabana niha nitohanaine que airijiin niheichu nerinaain nii baiha. <sup>22</sup> Jana, nii cojoanona sarotiaeniha Cana Coaunerane,

satiin cachaauru nichotena nainecururihei. Nete, atiin sarotiareein, janijiin niicha ranojoihunru belaitohane jaun acaauru coreniha.

<sup>23</sup> Chunocoha inara rai: 'Caute ne Curisito Mesihasischa. Chajaau tejian coanicha,' naa inara raine, jiaonriha esenetaaichene. <sup>24</sup> Turuururichaaain inara rene casajeeuru *profetaniha* nocoetonacaauru aina Curisito mesihasiiniha nocoetonacaauru. Nitohaneein turuhinte, itolere cojoelanaa-cojoai ichacurureein, janijiin Cana Coauneraacha ranojoinunrunne maajeein coritana nainecuruhane coritacuruhane coina. <sup>25</sup> Nitohanihane ajinihane inara rai beeun, caje coitucuhin nainaaain ichaohichene coina. <sup>26</sup> Aihane jaun, inara rai: 'Nota tajiha cacha arerooto ne,' naauruhane nihanatiin jiaonriha cuhichene. Niheichu: 'Nocoo caute ne nasiincha,' naa inara rai chunine, jiaonriha esenetaaichene. <sup>27</sup> Charijieein teeinti, enoto mitu nichajai caje jilenetoha jiacane enoto soo nichaae cuhine, satiin coanojoi ne. Nii rijijieeinte, satiin coanojoiniha cureein, inae nacoauneein cau turuhanu acaihaniji Cacha Calaohineein nejanoanaa nichaaunne bana. <sup>28</sup> Charijieein teeinti, niha caanii setune que fauha ichotarine caje coitucuerae. Nii rijijieeinte coitucunojoinereein turuhanu canu Curisitonichaaunne bana.

*Tururichaaain acaihaniji cacha calaohineein nejanoanaane (Mr 13.24-37; Lc 21.25-33; 17.26-30, 34-36)*

<sup>29</sup> Inae nitohaneein niha nii necairichanaa tabai cojoanonaaane janate, nocohenaneein nerotoreein enoto cono. Atene netonaite, conohane jianereein nii cojoanonaa bana. Jana arasijieeurute, dede caje naluurureein. Dedeu nenacaauru nihanatiinte nerurujuaaurureein.

<sup>30</sup> Nitohanihane janate laen, inanacareein dede caje inae fauha uhanu canu acaihaniji Cacha Calaohineein nenea nichaaunne bera. Nii jana, satiin chauratane sacuritaain nenacaauru cachaaaurute, jataain coasinacaaun chanaain coaracuruhane janane, dede sacari jana uhin fauha ureeunni acaihaniji Cacha Calaohineein nenea nichaaunne, jataain necaohachaaain itolere ichana naineein nelatein.

<sup>31</sup> Nitohaneein turuhinne canu letonocuru anjeraauru letoareeunni, tonijiaain jaaiha toteein, satiin chauratane sacuritaain, itolereneein satono tinonoritiin nenacaauru janijiin canu ranojoinunri cachaauru taojiaauruha canu raine coina.

<sup>32</sup> Aihana jaun, caa uhera que inara relaunne jaan que nerelaauche. Charijieein teeinti, inae rai nunecuru caohatonanaain alohacoaain ujuanihane caje, inae cataainjia ajaanaane coitucuhiche. <sup>33</sup> Nii rijijieein, caa inara rai caitoonjoa tocohanihane coaraqichene, inae turuhelalajihanu acaihaniji Cacha Calaohineein nejanoanaa nichaaunne

que nainacuche. <sup>34</sup> Esinae rauhijiriinte, jaiti ooreniha caa enene nenacaauru cachaaaurune jana aicheein. <sup>35</sup> Dede aina chauratanete nitajeeurureein. Nete laen, nitajenereein, caa caitoonjoa nainaane reetiaain, canu ere. <sup>36</sup> Coatiha laen nihei chuni, rai cojoanonaa aina, 'Naaonjoain rijiu tiaainte aicheeincha,' naain nii coitucuera. Niheichu, Cana Coaunera letonocuru anjeraauru dedeeu nenacaauru nihanatiin coitucuuruhi; niheichu canu- Calaohinichaaune saijieein coitucuhaaun canuhetonai. Acaihaniji canu Inaca Cana Coauneraachate, nii coitucuhin ne.

<sup>37</sup> Nihalu Nohene bana aihalune tocohaneeinte aicheein, inae nacoauneein turuha urichaaunni acaihaniji Cacha Calaohineein nena nichaaunne cojoanonaa que turuhane bana. <sup>38</sup> Coaracuche nachuhinti, jaiti uheniha elo tabaine jana, rai bote cuhane fauhin enoha Nohene que tiaa-joaain, raotojoein lenoneein, acau cohin, necohansajiaain, naaonjoauruhalu cachaaaurune. <sup>39</sup> Nejetaote laen, urichaaain elo tabaine coaaujeeurenihane jana, uha elo tabaine jaun jetao, jitariin acaauru jocalu ne. Nii rijijieein nechu, coohatejeeurenihane cachaaaurune jana, nacoauneein turureeunni acaihaniji Cacha Calaohineein nejanoanaa nichaaunne. <sup>40</sup> Nii turuhanune rijieeoritiinte, ocoana jana neeurureein coroatajai cachaauru. Leinjiinte, amanojoinihane jana, leeocho ratirinojoinereein. <sup>41</sup> Nii jana, coroatajai enecurute, tutune jaa neeuruhane jana, leinjiin amanojoinihane jana, leeocho ratirinojoinereein.

<sup>42</sup> Nitohaneein: 'Cuu tiaainte, turuha ureein canu Curuaanaa,' naain coitucuneeichene jaun, tururichaaunnine que nainaain ichaaoche. <sup>43</sup> Charijieein teeinti, leinjiin cacha: 'Cuu tiha janotiine janate turuha ureein cau asijiauto,' naain coitucuhane que nainaane jaun, nii chuni rai loreri asae enohane jerelanaala caohatiin rai loreri beraihane jaun, nenere basijiaera. Nii rijijieein inara netonai jatoroaain neeuche. <sup>44</sup> Aihane jaun, Cana Coaunera Calaohi cacha caje nejanonaa nichaaunne turu cojoanonaa coitucuneeichene jaun, inara netonai nainaain jatoraaain canu cohacuche.

*Fatoroon ere tonoraain nena cacha aina, fatoroon ere tonoraelanaala nena cacha*  
(Lc 12.41-48)

<sup>45</sup> Cha teeinti letoaain ratiriha rai fatoroonne tonoraain, inae cuu tihane jana rai loreri asaane nenacaauru cachaauru coroaate, <sup>46</sup> nii jataain raotojoein neeine, nii letoaain ratirihane jaan ichajihane jana eruha nii rai fatoronne. <sup>47</sup> Nitohaneein rai fatoroon aitoonjoa tonoraain icharate, esinae rauhijiriin satiin rai niicha sirii beraichaneein tereein



rai fatoroon. <sup>48-49</sup> Nete laen: ‘Jaitijiecha carajareein rai fatoroon,’ naain nii leeochoaauru letonocuru faojoaain son-  
ajaain, ajetoriaacuru aina netaojiaain lenoneein ajeein,  
naaonjoaan, <sup>50</sup> cha cohatejelanaala nihane jana turuhane, nii  
nechu aansai letono casetecareein rai fatoroon, <sup>51</sup> caseteco  
coaracuruha nechu cacha coritaa Cana Coaunera coitucuha  
nocoetonacaaurune rijijieein. Ecute catu rioneein chana-  
reein,” nae jetao aina nerelanacaauru rai Jesoso.

## 25

### *Lechooncai ranunaauru ichanohi que erenaa*

<sup>1</sup> “Cana Coaunera Cojoanonaate, aihuruha lechooncai  
ranunacuru nisirihatena beseta quene rijijie. Nii le-  
chooncai ranunacurute, rai cono erene que mocohin ne-  
naa amaaain, nii nisirihatenedi cohaca cuure turu jana  
raauruhane coina. <sup>2</sup> Nii lechooncai ranunacuru caje, sao-  
quii ranunacurute, niicha ichai que caohachaaain coacue-  
lanaala icharaauru ne. Jana, leeochoaauru saoquii ranunacu-  
rute, jataain nainaaain niicha ichai icharaauru ne. <sup>3</sup> Nii  
saoquii cha coacuelanaala nenacaauru ranunacurute, rai  
cono amaauruhane saijieein, nacoaauneein noitecuruhane  
jaanu erene amaarene. <sup>4</sup> Nete laen, nii saoquii jataain  
nainaaain nenacaauru, rai cono amaauruhane choae tacaain,  
le botichananaain rai noinu erene amaare. <sup>5</sup> Nitohaneein  
cuuru jana, jaiti turueniha nii nisirihatenedi jaunte, inae  
siniitoruhane jaun, satiin sinihure nii ranunacuru. <sup>6</sup> Nii  
janate, inae dede catai rijiu: ‘Inae uha nii cacha nisiri-  
hatenedi. Chajaain que tacaain rauchera’ naain toniha  
eheeonane jaunte, <sup>7-8</sup> nimichucutaain rai cono noitecu-  
ruhane jana, nii saoquii cha coacuhelanaala nenacaauru  
ranunacuru, nii saoquii nainaaain cono noinu que erene  
uhaurera rai: ‘Atiin canacaanu sihuche aansijiin, nii inara  
cono noi erene quera. Inae saa rai noi erenene jaun, ja-  
caa canacaanu conone jaunne aitocoaanura,’ naauruhane  
janate: <sup>9</sup> ‘Nainihaacanuta. Inara sihacaanune, canacaanu  
rai nihanatiin nerihane coalanaalata. Chajaaincha que  
necoreteeuruhane jaun cuhin, coretenichuchera,’ naare nii  
rai cono noinu amaaain cunacaauru ranunacuru. <sup>10</sup> Nete  
nii rai cono noinu erene coretiha cuuruha nii saoquii cha  
coacuelanaala nenacaauru ranunacurune jana, inae turue  
nii nisirihatenedi cacha. Nitohaneein turuha nii cacha nisiri-  
hatenedi janate, aina jiniiquiin loreri asae enooruha be-  
seta que nii saoquii ranunacuru nainaaai nenacaaurune jana  
inae nefue acuujuu. <sup>11</sup> Nii janate, inae nii acuujuaniha tu-  
ruhin: ‘Curuaanaa, atiin canacaanu rai acuujuu joaracaane

canacaanu netonai enohacaanu,' naauruha nii saoquii ranunacuru cha coacuelanaa nenacaauru, rai cono noinu coretecuruhane caje turuhinne janate: <sup>12</sup> 'Esinae rauhijiriin inara coitucuhanune coaalanaala,' nae acaauru rai nii curuaanaa. Nii rijjichate cureein Cana Coaunera Cojoanonaa.

<sup>13</sup> Aihana jaun, itolere bana nii que nainaai jatoroain ichaaoche, 'Naaonjoai janonaa banate aicheein. Cuu tiariinte aicheein,' naain coitucueeneichene jaun.

*Cachaauru rai coriqui teein ratiricha fatoroon rijjicha Cana Coaunera Cojoanonaane*  
(Lc 19.11-27)

<sup>14</sup> Cana Coaunera Cojoanonaate, leinjiin cacha coriajai atane cuhane jaun, rai cachaauru cotijiaain, acaauru que coriqui beraichatera rijjije, <sup>15</sup> leinjiin rai saoqui oaraacai coreneein nenea coata caje coriqui te. Jana leeocha raite, coroata oaraacain te. Jana leeocha raite le oaracaain te, le cachaauru rai coretena nainecuruhane jeeonijihanaain teinte amue. <sup>16</sup> Nii saoqui oaraancaain raera cachate, nii coriqui que rucuhale coreteen, que necoreteen saoqui oaraancaain nii coriqui jojoe. <sup>17</sup> Jerichanejeein techu, coroata oaraacain niicha rai jojoe nii coroata oaraancaain raera cacha. <sup>18</sup> Nete laen, nii le oaraancaain raera, niicha bajei atane jachu cuhane nii rai fatoroon tenojoi coriqui asi. <sup>19</sup> Nii baiha carajaain catiaainte, inae turue nii acaauru curuaanaa coriqui teein ratiricha. Nitohaneein turuhinte, nii acaauru rai niicha tei coriqui coreniha acaauru rebe bajae. <sup>20</sup> Nii saoqui oaraancaain raerate ichoaichaniha turuhin: 'Curuaanaa, noco ha taolu canu rai, saoqui oaraancaain iicha tei coriqui. Noco chaen leeocha saoqui oaraancaain joocaaune jaan,' naain, nii coriqui niicha jojoi tiha nii rai cachane janate: <sup>21</sup> 'Jataain caohachate ichaacha, jelai amuritoriin nenea beraichaneein ii tereunnicha. Aihana jaun, chajaain caloheri asa ae enoote jiniiquiin rachoojihacara,' nae nii curuaanaa. <sup>22</sup> Nii baihate turue, nii cacha coroata oaraacain coriqui raera. Nitohaneein turuhinte: 'Curuaanaa, noco ha taolu canu rai coroata oaraancaain iicha tei coriqui. Noco chaen coroata oaraancaain joocaaunne jaan,' naa nii coroata oaraacain raera cachane jana jetaote: <sup>23</sup> 'Jataain caohachate ichaacha, coroatajajei aina caohachaaain erenaa tonoraain ichaine jaunne, jelai amuritoherii beraichaneein ii tereunni. Aihana jaun, chaajaain caloheri asa ae enoote, jiniiquiin rachoojihaca,' nae nii curuaanaa.

<sup>24</sup> Nete laen, nii le oaraancaain raera cacha turuhin: 'Curuaanaa, nech u aansai cachaneeine jaun, temueneeine jaauru jelai caje temule raain, ii ocoananelanaala

nenacaauru caje nihanatiin temule raain, <sup>25</sup> naajoaaine jaunna ii coasiha, atane jachu cuhane ii coriqui asihun. Nete cau ne nii ii coriqui,' naain nii coriqui cainaa nii cachane jaunte: <sup>26</sup> 'Iite, canu cacha baasoneein bajeriti cacha neei. Inae raotojoein canu temulenelanaala nenea niha natiin raain, canu ocoananelanaala nenea caje temule raain naajoaanune coitucuhine saijieein, <sup>27</sup> chanuna chaen, canu coriqui amaain teneei banco cuhane. Bana nitohanihane jana nihane, canu turuneeine nii banco cuhane neein nejocane jaanne maajein rareeun,' nae nii curuaanaa. <sup>28</sup> Niritiinte, ecu nenacaauru rai: 'Caje nii le oaraancai niicha sirii coriqui ruluhin, nii lechoonca oaraancaneein siricha rai teeuche. <sup>29</sup> Nitohaneente, siricha rai jataain jelai amuritoheriin tenojoinereein, jelai amuritoheriin sirihane coina. Jana, cha sirilanaala nenaate, acaihaniji niicha sirii, jitariin caje ruluerareein. <sup>30</sup> Aihana jaun, caa canu cacha baaso cha coitucuhi mucuhin, naain airiniha nocohenaanau jaochete, ecu neein mainajeein chanaaine,' nae ecu nenacaauru rai.

*Rucuhenoinerichaain baaso icharaauru aina caohacha icharaauru ichaone*

<sup>31</sup> Inae rai cono caohacha que conohin, rai anjeraauru cataaun uhin turuhin rai rori- *trono* ichoae nelauriaanu canu Cana Coaunera Calaohineein cacha caje nejanoanaa nichaaune banate, <sup>32</sup> satiin lauri lauri nenacaauru cachaauru turuurureein canu acatiha. Nitohaneein nacatiha turu- uruhane janate, carenerocuru caje, jelai teein cabraauru leruha carenero beraichane rijjijieein, <sup>33</sup> raotono nichajai que, nii janijiin niicha ranojoihunru- rai cachaauru teein, najaabiji nichajai que nii rai cachanelanaala nechu aansaneein nenacaauru tereein. <sup>34</sup> Nitohaneein jelai tiha- coaain lerunajaainte, nii raotono nichajai que nenacaauru rai: 'Chajaauche cajiha satiin, nii canu Inaca rausiaenojoi- neein neiniquichene. Chajaauchete, cana rai chauratane coaunaane caje coauneein, inara que banihateein canu Inaca Cana Coauneraacha rucujuei Cojoanona que ichao- hiche. <sup>35</sup> Inarate, mijitichaaunne canu coroaatein, co- coirichaaunne acau que cacocaaain, canu nesurunaja colane amuhemuhecaunne, canu nesurunajaanu teein, <sup>36</sup> lanaa canu rai cajionene, carai cajione teein, cunaitichaaunne turuhin cacoharaain, caresero cuhane nihanune jana, tu- ruhin canu coaraain, naaonjoaain canu rai nelateein nere- jetocoiche,' narichaaunni acaauru rai canu Cana Coaunera Calaohi cacha caje nejanoanaa nichaaune. Niritocaaun acaauru raine janate: <sup>37</sup> 'Curuaanaa, esinaaena mijiteeine ii coroaatein, cocoireeine ii cocoaain, <sup>38</sup> ii nesurunaja colane

amuhemuhequine, ichei ii nesurunaja teein, ii cajione colane neeine, ichei cajione teein, <sup>39</sup> cunaiteein, caresero cuhane neein naaonjoaine turuhin ii coaraain, naaonjoa rejeta-coaanulura,' naauruha rai nii couluuonojoi suujuaquuin nenacaaurune janate: <sup>40</sup> 'Satiin canu nejeraauru cairicheinejeein nenacaauruhacha latei terejetocoichenete, canu rai tiha nii terejetocoichelu,' naain acaauru tonorareein nii acaauru Curuaanaa *Rey*," nae acaauru rai Jesoso.

<sup>41</sup> "Niritohane baihate, nii najaa biji nichajai que rai cachanelanaala nenacaauru rai: 'Naain cacaje amuhin, moconajaera aina rai letonocuru que banihateein ichanohin chabana jacanaa charanejeein nenea usi rene cunichuche, nii coina neiniquichene jaun,' naain usi rene letoanajareein. <sup>42</sup> Niritiin usi rene letoanajaainte: 'Inarate, mijitichaaunne niha natiin, canu coroaatelanaala, cocoirichaaunne niha natiin, acau que canu cocoaelanaala, naaonjoa rejetaocoichelu. <sup>43</sup> Niheichu canu nesurunaja colane amuhemuhecaaunne niha natiin, canu nesurunaja tiheeiche. Canu rai lanaa cajionene niha natiin, canu rai tiheeiche. Niheichu cunaiteein, caresero cuhane neein naaonjoaanune niha natiin turuhin cacoharaheeiche,' naanu acaauru raine janate: <sup>44</sup> 'Curuaanaa, esinaaena ii coroaatelanaala, cocoireeine ii cocoaelanaala, ii nenajanu lateeine ii rai telanaala, cajione lateeine ii rai telanaala, cunaiteein, caresero cuhane neein naaonjoaine jana turuhin ii coaraelanaala, naaonjoan rejetacoaanulu,' naain bajaauruhane janate: <sup>45</sup> 'Esinae rauhijiriinte, satiin cairicheinejeein nenacaauru cachaauruacha latei teneeichene canu raite nii teneeiche. <sup>46</sup> Satiin nitohaneein nenacaaurute, chabana sanaachara caseteco que neeurureein. Jana, coluunojoi suujuaquuin nenacaaurute, chabana sanaachara ichaonaa que neeurureein,' naain tonoranaareein nii acaauru Curuaanaa *Rey*," nae canacaanu rai Jesoso.

## 26

*Jesoso mucuuruhane coina que ereereecuruhane*  
(Mr 14.1-2; Jn 11.45-53)

<sup>1</sup> Inae cachaauru rai niritohane nainaaunte, niicha relai nichaanune rai: <sup>2</sup> "Nii coitucuhichene rijijieeinte, coroata janoi cuhane nereein Fasocoa beseta. Inae laen Cana Coaunera Calaohi cacha caje nejanoanaa nichaaunne mucuhin teeururichaaain coroso que catinaauruhane coina," nae Jesoso. <sup>3</sup> Nii bananeeinte, saseredotecuru curuaanaa curuaanaa Caifasi loreri asae ita taojiaaure saseredotecuru

aina Jorionichaanune bichauhenaauru, <sup>4</sup> Jesuso mucuhin, nechu nohaneein colurujeein sohin joerateeuruhane que coaacuruhane coina. <sup>5</sup> Nejetaote: “Nainihaacache beseta cojoanona bana ichacaachene, nabana cachaauru suujua rohecana coataa,” naure jetao ita rai.

*Jesoso ichoae nejuuaauruhane jaan choohite leinjiin ene.*  
(Mr 14.3-9; Jn 12.1-8)

<sup>6</sup> Betaniau, “Nabero caje nerautanaa,” naain niicha curuaateuri- Simoon loreri asae niha Jesusone janate, <sup>7</sup> ajeri coreti caje ichanohin boticha laaojiri cuhane, le curuhin jujuhin- jataain coretiin nena amaain jetao, rori ichoae lauhecoha Jesusone jana, coturi ichoae nii jujuhi choohite nii leinjiin ene. <sup>8</sup> Nii coaraainte obajeein:

“Chanuna jataain coretothane saijieein, catohaneein jujuhi lanaje caa ene. <sup>9</sup> Bana jataain coreein que necoreteein, nii rai core coriqui que, cairicheihuru coroatajanelanaala,” naacaanu aina nerelanaa nichaanune janate: <sup>10-11</sup> “Chanuna niritiin caa ene rohecaache. Jataain canu rai caohachate ichae caa ene. Inae itolere bana inara aina nerihaaunni. Jana, cairicheihurute laen itolere bana neeurureein inara aina. <sup>12</sup> Caa jujuhi choroja cajabereeo ichoae caa enenete, canu conautecuruhane coina cajabereeo rucuhca ichae. <sup>13</sup> Esinae rauhijiriinte, cana rai chauratane sacutaain caa osa caje nichoterichaan cachane jaan que cachaauru relauruhane jaanru, caa cajabereeo ichoae jujuhi tiha caa ene quene maajeein cachaauru rai ereereturureein. Nitohaneinte, coaunojoinereein itolere bana caa ene,” nae Jesuso aina nerelanaa nichaanune rai.

*Jesoso coulurujija Jodasine*  
(Mr 14.10-11; Lc 22.3-6)

<sup>14</sup> Nii jana, nii aina nerelanaa nichaanune lechoonca coroataja neein nena Jodasite, saseredotecuru curuaanaa coaraa cue. <sup>15</sup> Nitohaneein cuhin jetaote:

“Inaajoaain carai coriqui tenaa nainequiche, inara rai Jesuso tihanune coinata,” naain acaauru caje bajaane jana nichata chooncaain coata caje nena coriqui teeuruhane coina rai aitocure. <sup>16</sup> Nii jaun jetaote, jelai neeorihane jana inae acaauru rai Jesuso tenaa nainihane jaan que coacuhin jetao, amuhemujue Jodasi.

*Aina nerelanaa nichaanune aina janotiin lenoniha Jesusone*  
(Mr 14.12-25; Lc 22.7-23; Jn 13.21-30; 1Co 11.23-26)

<sup>17</sup> Inae nunuhca jorerera colane ichanohi faan quihuruhane jaan beseta Fasocoa cojoanonaane janate, Jesuso rohan nichuuntaacaanu:

“Chu Fasocoa cojoanaa nunuhe cojoanotiin que, canaacha quiineni lenone ichacaaunne jereeita,” naain Jesoso caje bajaacaanu aina nerelanaa nichaanune janate:

18 “Chajaain taa neseeu leinjiin cacha loreri asaae cuhin: ‘Cacha relaerate ichei, “Inae canu cojoanonaa que tihane jaunne ii loreri asaae ureeun, cuu canu aina nerelanacaauru aina Fasocoa beseta bitoanune coinara,” naain aitoroate ii rai,’ nanichuchera,” naain canacaanu caje tabaauru letoae Jesoso.

19 Niritiin letoanajaa Jesosone jaun cuhin, nii naitoonjoa rijijieein Fasocoa cojoanotiin que canacaanuhacha quiineni lenone ichacure aina nerelanaa nichaanune tabaauru.

20 Nitohaneente, inae nocohecane jana, lechoonca coroatajaain aina nerelanaa nichaanune aina lenoniha ne Jesoso. 21 Nitohaneein lenoniha nihacaanune janate:

“Esinae rauhijiriin, leinjiin inara cajete, cacoelaichaneei neeichene saijieein, caque nejeratenacaauru rai cacolurujueein, acaauru rai caetereeincha,” naa canacaanu rai Jesosone jaunne, 22 jataain inaderaain le cachanichaanune:

“Curuaanaa, canu quenacha aitohi,” naacaanu satiin aina nerelanaa nichaanune janate: 23 “Caa ojoaichu cuhane faan setejarichate nii cacolurujueein caetereein. 24 Nitohaneeine, canu que aitiin laenanohineein niha Cana Coaunera Quiricha inoansi cuhanena rijijieein, Cana Coaunera Calaohi cacha caje nejanoanaa nichaaunne, nii nainaa cureeunni. Nete laen, jataain cairichaaajoareein nii canu colurujuera. Caohatorihalu niqui nitohanesihane ajiniha nejanoaenihalu nii cachane,” naa Jesosone janate:

25 “Cacha relaera, canu quenacha aitohi,” naa nii colurujueranu Jodasine janate:

“Mmmjjjm, nii bajaaine rijijieeinte aicheein,” nae Jodasi rai Jesoso.

26 Nitohaneein lenonichaanune janate, faan mucuhin: “Narihara Cana Coaunera,” naain, cataaun nii faan tatuhin beeune beeunein aina nerelanaa nichaanune rai teein:

“Caa quihuiche. Caate, cajabereeo nenaaneein ne,” naain canacaanu rai teente, jerichanejeein nii faan ichaane rijijieein 27 acau cooruhane jaan curu cuhane, conacai bino mucuhin: “Narihara Cana Coaunera,” naane baiha canacaanu rai nii conacai teente:

“Satiin jiniiquiin leruune leruunein caa conacai cooche. 28 Caate cacoichananeein arajii cachaauru caohachanu que canuhacha ichaneni cojunacanein chorohi jaonjoinereein. Acate arajii osaonacaauru que suujua acaterichaaine coina orichaanine cojunacane. 29 Nena laen, inae nacoauneein

inara aina jiniinquiin, caa oba caje ichanohin conacai coenereeeunni, Ofa Cana Coaunera Cojoanonaa que inara aina jiniiquiin neein nii bana ocoonaneein nenea bino cohacachene reeintiaaojoaain,” nae aina nerelanaa nichaanune rai Jesoso.

*Coitucuha nocoetoenerichaain Fedorone biha Jesusone*  
(Mr 14.26-31; Lc 22.31-34; Jn 13.36-38)

<sup>30</sup> Nii baihane, Quiricha Inoaensi cuhane laenanoineein nenea salmo tabaauru que nenatichaanune nainain, Oliboneein niicha curuateeuri ichatane ucuunno que cuhacaanune janate:

<sup>31</sup> “Enene cojoanotiin cuhanete, satiin inara, Canu esenetaain canu que jaaequiin neeichene jianein, ita caje riaaneriquichein, Quiricha inoaensi cuhane:

‘Carenero beraicha sohin jaaoruhane janate,  
ita caje riaaneeururein

niicha beraihuri carenerocuru,’

naain canu que aitiin besihalune rijijiein. <sup>32</sup> Nena inae ohanune caje ichanacaanne, inara ajiniha Calileea cureeunni, ecu nacoauneein jiniiquiin nenea coinara,” naa Jesusone janate:

<sup>33</sup> “Ii esenetaain ii que jaaecooruhane jianein, neeuruha leeochoaurune nihanatiin, coatiha laen canu ii esenetaain ii que jaaecohanune jianerihaaunni Curuaanaa,” naa Jesoso rai Fedorone janate:

<sup>34</sup> “Esinae rauhijiriinte, enene cojoanotiin cuhane jaiti ereniha ataohari curuaanane ajiniha, nichata saain canu coitucuha nocoetoeneriquiin,” naa Fedoro rai Jesusone janate:

<sup>35</sup> “Airihaauni bajaata Curuaanaa. Ii aina curuaecaain jereraa casohin cajaanoruhane coinane nihanatiin, naini-haaun ii que jaaecohanune jianein ii coitucuha nocoetoenihanunera Curuaanaa,” naa Jesoso rai Fedorone janane, leeochoauru aina canacaanu netonai, nii aitoha Fedorone rijitoein aitocoaanu.

*Jetesemani netiin Cana Coaunera bajaa Jesusone*  
(Mr 14.32-42; Lc 22.39-46)

<sup>36</sup> Nii baihate, aina nerelanaa nichaanune aina jelai caje amuhin, Jetesemaniineein niicha curuateeuriu cue Jesoso. Inae ecu turuhacaanune janate:

“Cau nelauriaain canu cohacuchena, inara tonohanau tajiha cuhin Cana Coaunera bajani,” naain <sup>37</sup> jiniichaain Fedoro, coroatajai Sebedeo calaohichuru, naaonjoaihunri amaain jataain nererojoecaaajoaain naonaain jetao, jataain inaderae Jesoso. <sup>38</sup> Nitohaneein inaderaain jetaote:

“Jataaine onaanajaanu rijitocojoaain casuujua cuhane inaderaaunra. Cau nedaain, canu jiniichaain ichaaojoein cacohacuchera,” naain ratirinajaanu jetao, <sup>39</sup> acaauru caje, nita cuhin neseonraain atane que coturi temetaain jetao: “Ofa, icheine aitoon. Bana ii jereeine jana nihane, caa necairichanaa tabai caje canu rocohi. Nena canuacha jerei rijijieein ichaaine jereneeun. Ii jereeine rijijieein ichaainene jereeunra Ofa,” naain Cana Coaunera bajaane nainaanu jetaote, <sup>40</sup> jelaiha cuhin nii neeuruha aina nerelanacaaurune jaau turuha Jesusone jana jetao, najiniha sinihuruhane jana erunajaanu jetao Fedoro rai:

“Chanuna canu aina leratojoein, sinilanaala ichaaojoein nena naineneeiche. <sup>41</sup> Sinilanaala ichaaojoein neein Cana Coaunera bajaauche, nabana chatohanai que nesaruhin neeichene coataa. Inara suujuate niqui aitona naine, nete inara jaberoco jataain nii abaantasine,” naain jetao acaauru ratiriin jelaiha nii Cana Coaunera bajaane jaan cue Jesuso.

<sup>42</sup> Nitohaneein inae coroata saain, jelaiha cuhin Cana Coaunera bajaane cuhane jetaote: “Ofa, caa necairichanaa tabai canu cojuhin canu coaranu caje canu roconaa jereeneine, ii jereeine rijijieein ichaau,” naain jetao Cana Coaunera baje Jesuso.

<sup>43</sup> Niritiin Cana Coaunera bajaane caje, nacoaauneein jelaiha cuhin, aina nerelanacaauru coaraa cuha Jesusone jana jetaote, jataain banetoe niha acaauru rai sinirenane jaun nimirichaa acaauru notane jaun, sinihuru jana erunajaanu jaun jetao, <sup>44</sup> ecu ratirinajaanu jelaiha cuhin, Cana Coaunera bajaane nichatasatiha cue, nii jauriaanejeein aitothane rijitoein Jesuso. <sup>45</sup> Nitohaneein jetaote, jelaiha nacoaauneein nii neeuruha aina nerelanacaaurune jaun, acaauru rene turuhin jetao:

“Jaitinachura caohacha nainetojoein siniichete. Inae laen, Cana Coaunera coitucuhichuru bijiu tenojoinichaaun, canu Cana Coaunera Calaohi cache caje nejanoanaa nichaaunne cojoananaa que turuha. <sup>46</sup> Chajaanu nimichucuchete amuhacachera, inae nichuuntajiha nii acaauru rai caeteraanura,” nae jetao Jesuso aina nerelanacaauru rai.

### *Jesoso mucuuruhane*

*(Mr 14.43-50; Lc 22.47-53; Jn 18.2-11)*

<sup>47</sup> Niritiin, jaiti aina nerelanaa nichaanune aina ereereca Jesusone janate, turuha uhe, Jesoso aina nerelanaa nichaanune lechoonca coroatajanein nena Jodasi, letoanajaanuha saseredotecuru curuaanaacuru curuaanaa, chaen Jorionichaachene bichauhenaauru, naaonjoainurine



jaun, enuha, sabere, naaonjoain que biji achunequiin nenacaauru arajii cachaauru uhaain. <sup>48</sup> Jaiti Jesoso rene turuelanaalate, nii aina cunacaauru rai jetao: “Inae cuu turunaane: ‘Sohara cacha relaera,’ naain rai nomeri lohitoareuni, caje coitucuhin, aca mucuhichene coinara,” naain acaauru rai be jetao. <sup>49</sup> Niritiinte Jesoso rohan nichuuntaain: “Sohara cacha relaera,” naain Jesoso meri lohitoa Jodasine janate:

<sup>50</sup> “Cacoelaicha, ii jereeine rijijieein coaraain chatohaneein caetecurumiin,” nae Jodasi rai Jesoso.

Nii janate Jesoso rohan nichuuntaain, Jesoso mucuure nii Jodasi amanojoinuri cachaauru.

<sup>51</sup> Nii janate, rai sabere rocohitiin, que nii saseredotecuru curuaanaacuru curuaanaa letono uricho sauhitiin beuhitoa leinjiin cacha, Jesoso aina cunaane janate:

<sup>52</sup> “Jelaiha rai curu cuhane, nii ii sabere teeu. Satiin sabere que sonajaain jaaoreraaurute, sabere que acaauru netonai sonojoiniha cuurureeinha. <sup>53</sup> Tana ena canu Inaca caje bajaanune, canu rai lechoonca coroata lauriin anjeraauru letoanaa nainiha, acaauru aina canu coreniha ita sooruhane coinane coitucuhine. <sup>54</sup> Nene naineneeun nitohanai ichacaaunne. Inae rai Quiricha inoaensi cuhane, catohaneein caetecururichaaianne que aitiin laenaeratihalu Cana Coaunerane nainaane nihane jaun,” naainte nii mucuha unacaauru rai:

<sup>55</sup> “Chanuna necha aansai cacha mucuha unaa tocohaneein, sabere, enuha, naaonjoainuri que biji achunequiin canu mucuha uhiche. Cojoanoonetojoeine inara notaracae, Teenforo asaae cachaauru relaa nenajacoon. Nii saijieeinte, canu mucunaja queneeiche, <sup>56</sup> inae nitohaneriquicheeine que aitiin, rai *profetacuru* que laenaeratihalu Cana Coaunerane ninaaichene coina,” naa acaauru rai Jesosone janate, ecu jelai ratiriin, satiin sorohacaanu aina nerelanaa nichaanune.

*Niha chatohanaine rucuhereein nenacaauru Jorioocuru bichauhenaauru acatiha niha Jesusone*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Nitohaneein Jesoso mucuhinte, saseredotecuru curuaanaacuru curuaanaa Caifasi loreri asaae amaure nii muuureraauru. Nii janate, nii Caifasi loreri asaae ita taojiain neure Moisesa aitoonjoa rauhi que cacha relaaurera aina fariseeocuru. <sup>58</sup> Nitohaneein, inae Jesoso amaauruhane janate, nita acaauru coarajeein cuujueein sacuhin, Caifasi loreri chaje rohan neeuruha Teenforo beraichacurune jaaun, ecu acaauru aina enohin lauhequiin, jelai caje coaaneein Jesoso coaraje Fedoro: “Chatohanerichaaicha,” naane jaun.

<sup>59</sup> Nii janate, nechu jataain nohaneein, colurujueein Jesoso atinaeratecuruhane jaanu que coaacure saseredotecuru curuaanaacuru, chaen niha chatohanaine rucuhaneein nenacaauru Jorioocuru bichauhenaauru, naaonjoainuri. <sup>60</sup> Nete, nitohaneein arajii cachaauru colurujeeuruha nohaneeine saijieein, nii chatohaneein teeuruhane jaanu lera erusichurene. Nii jaunte inae satononiha coroatajaain nimichuhin:

<sup>61</sup> “Esinaete chuhisi: ‘Nainichaaun caa netaojiaain Cana Coaunera coroaecuruhane jaa coloheri Teenforo chamuhintiin, nichata janojoein cuhane jerichanejeein michuhanunera,’ naain erenajaquera,” naauruha nechu nohaneein colurijihane janate, inauheneeicha acaauru aonaje Jesoso.

<sup>62</sup> Nii jaunte laen nimichuhin:

“Chanuna ereneei iitonai. Esinaena rauhijiriin aitoine jaunna caa ii colurujeeuruha,” naain caje bajaesaseredotecuru curuaanaacuru curuaanaa, nete inauheneeicha aonaje Jesoso <sup>63</sup> Nii jaunte rai nacoauneein:

“Esinae rauhijiriin, Cana Coaunera coreniha beenena jereun. Iina esinae Cana Coaunera Calaohi Mesihaseinei,” naa rai saseredotecuru curuaanaacuru curuaanaane janate:

<sup>64</sup> “Esinae rauhijiriinte, acanichaaunne que aitohicha. Canu Cana Coaunera Calaohi cacha caje nejanoanaa nichaaunnena, coarajeeichene jana canu Inaca itolere ichana nainera Cana Coaunera raotono nichajai que lauhecreeunnicha. Chaen techu, dede sacari jana uhin fauha uhanune coariquicheeincha,” nae nii saseredotecuru curuaanaacuru curuaanaa rai Jesoso. <sup>65</sup> Nii jaunte obaaecane cojunacaniha rai cajione romaromaain:

“Nechu jataain Cana Coaunera baijiaate, caritiin ere caa cacha. Cha nenacaaenneeina coaraain cana rai colurujuera laterihacache. Inae inara netonai, Cana Coaunera baijiaeraanu rijitiin irihane aonaquiche. <sup>66</sup> Tonaquiche jana inara, caa naitoonjoa que,” naa rai leeochoauru rai janate:

“Esinaete chuhisi, aca colurujeeuruhane jaan ujuaihone. Aihane jaun ohanete caohachae,” naaure.

<sup>67</sup> Niritiinte, nomeri colunecuruha tabaaurune jana faohacure leeochoauru. <sup>68</sup> Jana leeochoaurute:

“Chajaain aihane, ii Mesihaseineine, caa ii soera cojoeluinnaaura,” naain rai nomeri faojoaain soore.

*Jesoso coitucuha nocoeteniha Fedorone  
(Mr 14.66-72; Lc 22.56-62; Jn 18.15, 25-27)*

<sup>69</sup> Nii tonohanau, ecu airiniha lauhecoha Fedorone janate, rohan nichuuntaain:

“Iitonaite, Calileea cocoaicha Jesoso aina nerejetohilu,” naa leinjiin ene coseenraneein nenaane janate:

<sup>70</sup> “Nii aitohine jaan cacha coitucuhaaun,” naain satiin aonajeeuruha ecu nenacaaurune urichoo suujue Fedoro.

<sup>71</sup> Nii baihate jelai caje amuhin, rijia acujua rohan cuha Fedorone janate, coaiteen coaraain:

“Caa netonaite, Nasarete cocoaicha Jesoso aina nena ne,” naain leeochoaauru rai biha leinjiine janate:

<sup>72</sup> “Esinae rauhijiriin, Cana Coaunera notaracae nii cacha coitucuaaunta,” naain nacoauneein suujue Fedoro.

<sup>73</sup> Nii catiariinte Fedoro rohan nichuuntaacoaain: “Esinae rauhijiriinte, iitonai aina nenaaneein, ii ereecha cajete necoitucuerateeicha,” naaure nii ecu nenacaauru Fedoro rai.

<sup>74</sup> “Esinae rauhijiriin, Cana Coaunerate coaraje nii cacha coitucuenihanunera,” naain nesuujiha Fedorone janate, nii rijieeoritiin inae ere ataohari curuaana. <sup>75</sup> Nii jaunte: “Jaiti ereniha ataoharine janate, nichata saain cacoitucuhine suujeriquiinha,” naalu rai Jesusone coacuhin, jelai caje mituhin amuhin, jataain inaderaain chanae Fedoro.

## 27

### *Filato rai Jesoso teeuruhane*

(Mr 15.1; Lc 23.1-2; Jn 18.28-32)

<sup>1</sup> Inae janohane jana jetaote, satiin saseredote curuaanaacuru aina Jorioocuru bichauhenaauru, ita suujua rijitojoein ita suujuau tacaure, Jesoso sohin jaaoruhane coina.

<sup>2</sup> Nitohaneein jetaote, Jesoso ichojoaain amaain, Roma co-coaichaneein nena coberenadoro Filato rai teure.

### *Oha Jodasine*

<sup>3</sup> Inae nitohaneein Jesoso cairichaaain atinaaururichaaanne que nainaan jetaote, jataain inaderaain netojoeete nii coulurujuera Jodasi. Nii jaun jetaote, nii saseredotecuru curuaanaacuru curuaanaa, chaen Jorioocuru bichauhenaauru, naaonjoainuri rai jetao:

<sup>4</sup> “Osa quene nesaruun, inara rai atinaaichene coina cha ujuaihonelanaala nena cacha teeiha,” naain nii nichata chooncai coataneein nena coriqui coretecuruhane jaan cainaa Jodasine jana jetao, ranaa jerelanaala:

“Nihei cha coitucunaa nainihaacaanu nii aina canacaanuta. Iichate nii coitucujueeicha,” naaure jetao Jodasi rai. <sup>5</sup> Nii jaun jetaote Teenforo asae nii coriqui rialaaitiin ratiriin jelai caje amuhin raajenihane rai raro ruluhi ohe Jodasi.

<sup>6</sup> Nii jana jetaote, nii coriqui raain jetao:

“Caa coriquite, ichana corenihane jaun, leinjiin calaniheein ne. Aihana jaun, jelai teein Cana Coaunera rai canaacha tei coriqui curu cuhane, caa coriqui tenaa nainihaacache,” naaure jetao ita rai saseredotecuru curuaanaacuru curuaanaacuru.

<sup>7</sup> Niritiin coacuhin ita suujua tacaain jetaote: “Atane ro-cooruha, caje ojoaichucuru jaauruhane coinane jaan,” naain niicha curuaateuri jelai coretecore nii coriqui coreniha, niha nejelau atane caje uhin onaane, cuu teein conautecuruhanane jaanu que. <sup>8</sup> Nii jaun jetaote, Ichana Batane neein jelai curuaateure enanetojoeein cachaauru. <sup>9</sup> Nitohaneente: “Rai core nichata chooncaain coataneein nenea coriqui, Isaraelitacuruhacha cainai raainte, <sup>10</sup> coreniha: ‘Atane ro-cooruha, caje ojoaichu ichacuruhane coinane jaan,’ naain acaauruhacha curuaatei atane coretecore,” naain beratihalu *profeta* Jeremihasi que Cana Coaunerane rijijieein, nii naitoonjoa nainaaure.

*Filato acatiha niha Jesusone*

(*Mr 15.2-5; Lc 23.3-5; Jn 18.33-19.38*)

<sup>11</sup> Inae coberenadoro Filato rene Jesuso amaaain turuaauruhane jana jetaote:

“Iina Jorioocuru curuaanaacuru curuaanaa- *Rey* ineein,” naain caje bajaa Filatone jana jetaote:

“Esinaete, acanichaaunne que aitohicha,” naain Filato tonorae Jesuso.

<sup>12</sup> Nii nainiha jetaote, cuu teein, Filato rai coulurujeeuruha saseredotecuru curuaanaacuru curuaanaacuru aina, Jorioocuru bichauhenaaurune jana jetao, cuu inauheneeicha aonajenajae Jesuso.

<sup>13</sup> Nii jaun jetaote:

“Toon ii que ereein ii coulurujeeuruhane aonaaina,” naa Jesuso rai Filatone jana jetaote, <sup>14</sup> cuu inauheneeicha tonoraelanaala aonajian Jesusone jaun jetao, inae rai tonaain irihane jaanu coitucueene Filato.

*Jesoso ateinaauruhane rai neeuruhane*

(*Mr 15.6-20; Lc 23.13-25; Jn 18.38-19.16*)

<sup>15</sup> Beseta bana naineein jetaote, janijiin: “Acate caohachae mituhanera,” naauruha satiin cachaaurune jaan mitai nejesinane caseteco nihane caje Filato. <sup>16</sup> Nii bana jetaote, caresero cuhane niha itolere sacutaain cachaauruhacha coitucui Jesuso- Barabasineein acaauruhacha curuaatei caseteconeeinne jaun jetao, <sup>17</sup> satiin netaojiaain codohacooruha, nii Jesuso colurujeeurera cachaaurune jana:

“Chariji caa coroatajaaihuri caje, jianichaaunne jeriquiche. Caa Jesuso Barabasina jianerihanu. Ainihanena

caa Jesoso Mesihaseen acaauruhacha curuaatei jianerihanu,” naain jetao acaauru caje bajae Filato,<sup>18</sup> nechu necoelai caaun, nii coulurujeeuruha raine que nainaane jaun.

<sup>19</sup> Niritiin jetaote, nii cha rucuhecane jaan rori ichoae lauhaca Filatone jana: “Jiaonriha chatohaneen nii cha ujuaihonselanaala nenea cacha tenaa coaauquine. Janotiine nii cacha coreniha, jataain baasoneen sinicoonni,” naain jetao berate rai comasai.

<sup>20</sup> Nejetaote, satiin nii cuu nenacaauru cachaauru suujuau tacaure, saseredotecuru curuaanaacuru curuaanaacuru aina Jorioocuru bichauhenaauru: “Nii Barabasi jianeen nii Jesoso atinaeratee,” naauruhane coina. <sup>21</sup> Nii jana jetaote:

“Chariji jianichaaunne jeriquiche, caa coroatajaaihuri caje,” naain acaauru caje nacoauneein bajaa coberenadoro Filatone jana jetaote:

“Nii Barabasi que tacaajeein jianeenena jerichaanu,” naauruhane jana:

<sup>22</sup> “Chajana laen ichareeun, caa Jesoso Mesihaseen acaauruhacha curuaatei aina,” naa Filatone jana jetaote:

“Coroso que laen aca teeu,” naaure jetao satiin.

<sup>23</sup> Niritocuruhane jaun jetaote:

“Chatohanai baasona ichae,” naa Filatone jana jetaote:

“Chajaain coroso que teechnu,” naaure jetao tonijiaain ehequuin.

<sup>24</sup> Nitohaneen Jesoso jianena jeriha Filatone saijieein, jianena jerelanaala rai suujua rerohecaauruha jelai ichoae jauhecotojoeriin cachaaurune jaun jetao, acau raerateen jetao:

“Coatiba canu, orichaan caa cachane ujuaihoneen nerinaaunni. Inarate nii ujuaihoneen neriquicheen,” naain jetao, satiin coarajeeuruha nii cuu nenacaauru cachaaurune jana jetao, rai biji culeje Filato, nii ujuaihoneen nenihane coujunacaneen, nitohaniha acaauru ichaone jaun.

<sup>25</sup> Niritoha acaauru rai Filatone jana jetaote:

“Satiin canacaanune, canacaanu bereecuru aina jiniiquuin, oha caa cachane ujuaihoneen nerichaanuhi,” naaure jetao Filato rai cachaauru.

<sup>26</sup> Nii jaun jetaote, Barabasi jianeen, nii baiha Jesoso bisichateen acaauru bijiu teen, coroso que terate Filato.

<sup>27</sup> Nii jana jetaote, niha chatohanaine rucuhecuruhane jaan colohereen nenea- loreri seeonjoa asae Jesoso amaain jetao, curuhacaain netaojiaain neeure satiin coberenadoro rai soodarooru. <sup>28</sup> Nitohaneen teen jetaote, rai cajione rochin que cajione lanajai curuhacure. <sup>29</sup> Chaen couturi que oja caje ichanohin comai lauriaain jetao,

rai biji raotono nichajai que otiha teeure. Nii baiha jetaote, nacatiha neseeonriaain: “Laraajiin ichaohine Jorioocuru curuaanaacuru Curuaanaa *Reycha*,” naain jetao, <sup>30</sup> couluneeinchuru nii rai niicha teeuri otiha que jetao, rai couturi faoha facoaain que ninichaajeeure. <sup>31</sup> Nitohaneein mainajeein ninichaajeeuruhane baiha jetaote, nii cajione lanajai, que niicha curuhacuri rocohin, nacoauneein nii rai cajione esine curujuaai amaure coroso que teeuruhane coina.

*Coroso que Jesoso teeuruhane*  
(*Mr 15.21-32; Lc 23.26-43; Jn 19.17-27*)

<sup>32</sup> Inae nii neeuruhane jaan jelai caje Jesoso amaauruhane jaun jetaote, Sirene cocoaicha Simoon eruhin, que nii Jesoso teeuruhane jaanu coroso baijiaeratecure.

<sup>33</sup> Inae nitohaneein cuhin: “Couturi Bejero,” naain acaauruhacha curuaateihu turuhin jetaote, <sup>34</sup> elonai que jasisii bino que jetao Jesoso cocoaure. Nejetaote, aansijiin cohin aonaain conaa jerene Jesoso.

<sup>35</sup> Inae coroso que Jesoso teein jetaote: “Chariji raineecha nedareein,” naain jetao Jesoso cajione que nocoatijiaaure soodarooru. <sup>36</sup> Nii baiha jetaote, Jesoso asaa nelauriaa-coaain beraihure.

<sup>37</sup> Nitohaneein teein jetaote, rai couturiniha nii casetecaauruhane jaan leranu rai curuaa laenacure:

Caate Jorioocuru curuaanaacuru Curuaanaa *Rey* ne. naain.

<sup>38</sup> Cuu jetao techu aina teein, coroatajai asijiautooru teeure coroso que, leinjiin najaa biji nichajai que, leeocho rai raotono nichajai que, naaonjoaain. <sup>39</sup> Jeloon situnacaauru cachaauru jetaote, couturi jisijisihanaain jetao:

<sup>40</sup> “Teenforo chamuhitiin, nichata janojoein nacoauneein michuhin jerichanejeein tiha nocoetona jeree inatiin, chajaain ichaajenihane ijiabereeo ichoterateeu. Esinae rauhijiriin Cana Coaunera Calaohineeine, nii coroso caje faau,” naaure. <sup>41-43</sup> Jerichanetojoein jetaotechu:

“Leeochaauru ichoteratihane saijieein, tana laen raajenihane rai jaberoco ichoteratena nainihane. Aca Isaraelitacuru Curuaanaa *Rey* nihane, coroso caje fauhinete cana netonai esenetaacache. Cana Coauneraacha que jaecohane jaun, chajaain ena ichoteratemiin Cana Coaunera, esinae rauhijiriin niicha belaa nihanete, cana netonai esenetaacache. Acate cana rai aitelu, Cana Coaunera Calaohi nihane que,” naain jetao que ninichaajeeure saseredotecuru curuaanaacuru curuaanaacuru, Moisesa rai rauhi que cacha

ralaaureraauru, chaen Jorioocuru bichauhenaauru, naaonjoainuri.

<sup>44</sup> Nii corootajai asijiautooru coroso que nenacaauru nihanatiin jetaotechu, nocoeje chanuure.

*Oha Jesusone*

*(Mr 15.33-41; Lc 23.44-49; Jn 19.28-30)*

<sup>45</sup> Nii jana jetaote, enoto chujutoroa caje coauneein, nuna macohi amuritoheriha enotone reein tiaaajoaain nocojoe cana rai chauratane. <sup>46</sup> Nii rijieeoritiin jetaote, tonijiaain ehequuin: “Cana Coaunera, chanuna jelai canainatejeei,” naane neein jetao: “*Eli Eli lema sabactani,*” nae jetao Jesuso.

<sup>47</sup> Niritohane jana, tabaauru ecu neein aonajeeurera jetaote: “*Profeta* Irihasi cotihacate aite,” naaure.

<sup>48</sup> Nii jana, leinjiin acaauru caje jetaote, soroneein jeluhariin cuhin jetao, sie tocohaneein nena ariin ruhin, elohanti bino sisiaain jetao, jiarana nujua que nujuateein Jesuso ujuae que te, cohane coina. <sup>49</sup> Nii jana leeochoauru jetaote:

“Coa rohecaate, ichoteratiha uha niicha cotijiai Irihasine coarajihacachera,” naaure.

<sup>50</sup> Nejetaote, nacoauneein tonijiaain auhaquuin inae ohe Jesuso. <sup>51</sup> Nii rijieeoritiin jetaote, ecui caje coauneein ocoai cuhin nesoaiheite Teenforo cuhanai bujuaneein nena cajione. Nii jana jetaote, nerurujuaa cana rai chauratanene jana jetao, netatujuacoae ajerichuru. <sup>52</sup> Atane banaaurune maajeein, netatujuacoane jana jetaote, Cana Coaunera coitucueraneein onacaauru cachaaauru nihanatiin jetao, o caje ichanajacoaain ichaaore. <sup>53</sup> Nitohaneein jetaote, inae o caje ichanaa Jesusone baiha jetao, Cana Coaunera nese Jerosaleeun cuuruha nii o caje ichananacaaurune jana jetao, coaranaacure arajii cachaaauru.

<sup>54</sup> Nitohaneein uha carorane jana, nihacoaa cojoelanaacojoaine jana coaraain jetaote, jataain nesooneein jetao:

“Esinaete chuhisi, Cana Coaunera Calaohine caa cacha,” naaure jetao, soondarooru curuaanaa aina ecu Jesuso beraiha nenacaauru.

<sup>55</sup> Nii jana jetaote, caje icharaain netiin Jesuso coarajeeure arajii enecuru Calileea caje coauneein corootajaneraneein sacuureraauru. <sup>56</sup> Acaauru aina jetaote cuurelu Maadala bene Mariha, chaen Saantiaao aina Jose neba Mariha, chaen Sebedeeo calaohichuru neba, naaonjoainuri.

*Jesoso jaberoco rucuhecuruhane*

*(Mr 15.42-47; Lc 23.50-56; Jn 19.28-42)*

<sup>57</sup> Inae nocohecane jana jetaote, turuha uhe leinjiin Jesuso ere tonoraera coriquihonaneein nena Arimatea cocoaicha

Jose. <sup>58</sup> Nii Jose jetaote, Filato coaraa cue, caje Jesoso jaberoco bajaane coina. Nii jana rai Jesoso jaberoco teratiha Filatone jaun jetaote, <sup>59</sup> Jesoso jaberoco raain, lino caje ichanohi shojoera que conajaain, <sup>60</sup> que banijiaain niicha bajaranateilu ajeri jachu cuhane Jesoso jaberoco rucujue Jose. Nii baiha jetaote, ajeri que caohatiin nii ajeri jachu bacuujuua fuhin ratiriin jelai caje amue. <sup>61</sup> Nii jana, Maadala bene Mariha, chaen nii leeocho Mariha, naaonjoainuri jetaote, nii ajeri jachu Jesoso jaberoco teeuruhane jaan acatiha laurijiatin nedaaure.

*Jesoso jaberoco rucuhecuruhane jaan beraihuruha sonda-roorune*

<sup>62</sup> Nii cojoanoo, inae nebetacanaa cojoanonaa nihane jana jetaote, Filato coaraa cuure jiniiquiin saseredotecuru curuaanaacuru curuaanaacuru aina fariseecuru. Nitohaneein cuhin, inae rene turuhin jetaote:

<sup>63</sup> “Curuaanaa, jaiti ichaohane banate: ‘Inae nichata janoha ohane baiha jete, o caje ichanareein,’ naain ereretoha nii casajeneein ichaonaa cachane quene coaaucaun. <sup>64</sup> Aihane jaun, nii rucuhecuruhane jaan ajeri jachu beraichateeu nichata janoi reeintiaain. Ainihanete, janttiin uhin rai jaberoco amaain: ‘O cajete ichanae,’ naain cachaauru coritaaurure aina nerelanacaauru. Niite laen, nii jauriaanejeein amurijiriin, jataain banejelanaala casaje nere,” naauruha Filato raine jana jetaote:

<sup>65</sup> “Caa nitohanei beraichane que nenacaauru soondarooru aina cuhin, caohatiin jerequichene tocohaneein nii ajeri jachu funichuche,” nae acaauru rai Filato. <sup>66</sup> Nii jana cuhin jetaote, nii ajeri jachu niha Jesoso jaberocone jaan rai fuera sechaure leinjiin secho que. Nitohaneein sechaain jetaote, ecu beraichanu que soondarooru ratiriin cauha cuure saseredotecuru curuaanaa curuaanaacuru aina fariseecuru.

## 28

*O caje ichanaa Jesusone*

*(Mr 16.1-8; Lc 24.1-12; Jn 20.1-10)*

<sup>1</sup> Inae situha nebetacanaa cojoanonaane jana, inae ena janohajiha semana nunuhene jana jetaote, Jesoso jaberoco rucuhecuruhane jaan- ajeri jachu coaraa cuure Maadala bene Mariha aina leeocho Mariha. <sup>2</sup> Nii jana dede caje fauha anjerane jana jetaote, luhecotariin uhe jataain mijiaainetiin carora. Nitohaneein fauhin jetaote, nii Jesoso jaberoco rucuhecuruhane jaan ajeri jachu fuuruhane jaan ajeri jaberoco raain nichoae laujuae nii anjera. <sup>3</sup> Nii anjera jetaote, aiha jiacanene tocohaneein jiquihacoha rai jaberocone jana, jataain somajae rai cajione aiha dede sacarine tocohaneein.



<sup>4</sup> Nii coaraain jetaote, coasina caaun rijijijianein onaa rijinanaain nedaaure nii beraihurera soondarooru. <sup>5</sup> Nii jana jetaote, nii coaraa cunacaauru enecuru rai jetao:

“Jiaorihā casiiichene. Inae, nii coroso que tein niicha ateinaauri Jesoso ariha aaichene coitucuhanura. <sup>6</sup> Inae cau nihei. Inae nii aitoroetohane tocohaneein o caje ichanaa. Chajaauchete, nii teuruhalune jaan jelai coarae,” naain acaauru que nii Jesoso jaberoco teuruhane jaan jelai coarate nii anjera. <sup>7</sup> Niritiin jetaote: “Chajaain erojoein cuhin aina nerelanacaauru rai: ‘Inae jetao o caje ichanaa. Calileea cuhin jetaote, inara ajiniha turureein. Ecu jetaote coariquichein,’ nanichuche. Inara rai bihanune coinane cau turuun,” naain jetao, nii enecuru letoae anjera.

<sup>8</sup> Nii jaun jetaote, jataain casihuruhane saijieein rachoojoein nii Jesoso atane bana jelai caje erojoein uhin biha uure nii enecuru, aina nerelanaa nichaanune rai. <sup>9</sup> Nii jana jetaote, uujueeuhaa nii enecurune jana acaauru rohan neoritiiin acaauru rai iriha Jesusone jana rohan nichuuntaain, rai tijia que nebalurucaain cutujuaain jetao coroaacure nii enecuru. <sup>10</sup> Nii jana jetaote:

“Jiaonriha casiiichenera. Chajaain canejeranein ne-nacaauru rai benichuchete, Calileea cuuruhine. Ecune ita coarichaanuhi,” nae jetao, nii enecuru rai Jesoso.

### *Niicha coarai beeuruha soondaroorune*

<sup>11</sup> Nitohanein biha cuuruha enecurune nainiha jetaote, saseredotecuru curuaanaacuru curuaanaa rai jetao, neseeu cuhin jitariin niicha coaracuri biha cuure nii atane banau Jesoso jaberoco beraiha nenacaauru soondarooru tabaauru. <sup>12</sup> Nii jaun jetaote, ita suujuau tacaauruhane coina Jorioocuru bichauhenaauru coaraa cuure saseredotecuru curuaanaacuru curuaanaacuru. Nitohanein inae ita suujuau tacaain jetaote, jataain arajiin soondarooru rai coriqui tein jetao:

<sup>13</sup> “ ‘Janotiin sinihacaanune tonohanaute, turuhin Jesoso jaberoco amaure aina nerelanacaauru,’ naauche. <sup>14</sup> Nii jana coitucuhin, chatohanein inara tenaa coaauca coberenadoro Filatonena, ita suujua tacaain caohaterichaanuhi, nabana baasonein inara tihane coataa,” naain jetao, nii soondarooru suujuateure saseredotecuru curuaanaacuru curuaanaacuru aina Jorioocuru bichauhenaauru.

<sup>15</sup> Nii jaun jetaote, nii coriqui raain jerichanetoein nii suujuatenaajauruhane rijitoein jetao, aitocure nii soondarooru. Nii jaun jetaote, niritiin acaauru coritaauruhane jaun, enenetoein nii esenetaaure Jorioocuru.

*Niicha icharatei ichacuruhane coina aina nerelanacaauru rai aitoha Jesusone*

*(Mr 16.14-18; Lc 24.36-49; Jn 20.19-23)*

<sup>16</sup> Nitohaneein canacaanu rai beratihä Jesusone jaunne, Calileea nii naitoonjoa ichatane ucuunno cuhacaanu le-choonca leinjiin Jesuso aina nerelanaa nichaanune. <sup>17</sup> Ecu turuhacaanune janate, ecu canacaanu ajiniha niha Jesusone jaun, rohan turuhin jaiti acanihane esenetaaurenihä tabaaurune saijieein coroaecaanu.

<sup>18</sup> Nii janate canacaanu rohan nichuuntaain:

“Canu Inaca Cana Coaunerate, chauratane, dede, naaonjoainuri rai cocoainacaineen nihanune coina caeteen ne. <sup>19</sup> Aihane jaun, chajaain satiin caa chauratane sacutaain lauri lauri nenacaauru cachaauru relanichuche inara relaanune rijijieeinte, canu ere tonoraera neeuruhine. Chaen, Canu Inaca, canu- rai calaohinichaaunne, Cana Coaunera Suujue, naaonjoain nichaanune rai canacaanu cachaneein nenaä jereraauru cojunacateen baotisanajaauche. <sup>20</sup> Chaen inara rai aitonajaaocaaunne rijijieein, nii caitoonjoa tonoraain ichaaoruhane coina relanajaauche. Jerichanejeeinne besautihä cana cojoanonaane reeintiaaoljaain itolere bana inara aina nereeunni,” naain necoe Jesuso.

## **Marocohacha laenai Ena Nena Cana Coaunera Ere**

*Cana Coaunera ere beebejiha Joaan Baotisitane  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Caate nunuhe caje coauneein Cana Coaunera Calaohi Jesocurisito que erenaa raotono ne. <sup>2-3</sup> Niite inoaenlu nere bera inoaensi Isaihasi que berateein laenaratiha Cana Coaunerae jaun, nii aitohane rijitjoeein:

“Nii Canuhacha letoai

Canu ere berate,

ii ajiniha cuhin turuhine jaan

bero rucuhereein.

Nitohanihane jaunte:

‘Cana Curuaanaa turunajaanu

bero raujiaauche,’ naain cacha

areroo rohan situnacaauru

cotijiaain suujuatereein,”

naain nere bera inoaensi Isaihasi que berateein laenaratiha Cana Coaunera

<sup>4</sup> Nii rijijieein jetaote chuhisi, inae cacha areroo cachaauru baotisaain:

“Inara osa jianeein, esinae rauhijiriin Cana Coaunera coitucuhin nacoauneein inara ichao coreein neeichene cojunacanein acauhanau teein baotisanajoineein neeichene inara osa caje inara ichoteratemiin Cana Coaunera,” naain belu jetao acaauru rai Joaan. <sup>5</sup> Nii jana jetaote, satiin Jodea batane que nenacaauru aina Jerosaleeun nenacaauru naaonjoainuri nii Joaan ere aonaa curejeteecurelu.

Nitohaneein cuhin ecu turuhin esinae rauhijiriin suujuelanaala osaaocuruhane beeuruhane jaun jetao, nucuhe Jordaandahan cuhane teein acaauru cojunacatiha acaauru baotisarejete nii Joaan.

<sup>6</sup> Camecho ujui caje ichanohin cajione que cajionequin jetaote, jacari caje ichanohi que ichoraquiin, sisiincho, irichaje, naaonjoainuri que jetao lenoneein nerejetelu nii Joaan.

<sup>7</sup> Nitohaneein jetaote, Cana Coaunera <sup>7</sup> ere beebejeein jetao:

“Canu baihate ureein leinjiin jataain canu amurijiriin nelateein nena. Niheichu rai safato ichora rutuhanune caina nihanatiin nelatejeerinaauni. <sup>8</sup> Canune acau que inara camujuaain inara baotisaain. Jana acate laen inara baotisaain ureein Cana Coaunera Suujue que,” nae jetao cachaauru rai Joaan.

*Jesoso baotissaa Joanne**(Mt 3.13-17; Lc 3.21-22)*

<sup>9</sup> Nii cojoanonaa bana jetaote, Calileea batane que nenea Nasarete caje amuhin, nucuhe Jorodaan auhaniha turuha Jesusone jana jetao, ecu Jorodaan cuhane tein acaentonai camujuaain baotissae Joaan. <sup>10</sup> Nii baotissaa Joane jana acau caje mituhane rijieeoritiin dede coaraa Jesusone jana jetaote, neyoracaa dede bacuujuane jana caje uhin serori rijijieein nichoae fauha uhe Cana Coaunera Suujue. <sup>11</sup> Nii jana dedeeu tonii jetaote:

“Ii te jataain canuhacha jereein canuhacha cocoinanohin cacalabineein neeicha,” naain toniha erenaane jana jetao aonajeeure.

*Baaso que Jesoso saruha Moconajaerane**(Mt 4.1-11; Lc 4.1-13)*

<sup>12</sup> Nii baiha jetaote, cacha nenaja nihei que Jesoso amae Cana Coaunera Suujue. <sup>13</sup> Nii jaun ucuae ataibinaecuru jana niha jena chonca janohin Cana Coaunera Calaohi Jesusone jana jetaote, baaso que saruhane coina cojuhin coaraa moconajaerane jana jetao, Jesoso coroatajanecure Cana Coaunera letonocuru anjeraauru.

*Calileea batane cuhin, rai namihaneeo nunuhetiha Jesusone**(Mt 4.12-17; Lc 4.14-15)*

<sup>14</sup> Inae caresero cuhane Joaan enoauruhane baiha jetaote, Calileea batane que cue Jesoso, Cana Coaunera ere Erenaa Raotono que ereerejeein cachaauru rai bihane coina.

Nitohaneein inae ecu turuhin jetaote: <sup>15</sup> “Inae ichuunijiha Cana Coaunera Cojoanonaa. Aihane jaun Cana Coauneraacha beratenojoin Erenaa Raotono esenetaain tonoraauche,” naain beebeje cachaauru rai Jesoso.

*Jenai cachaauru ate mucuurera cotihaca Jesusone**(Mt 4.18-22; Lc 5.1-11)*

<sup>16</sup> Nii jana jetaote, Calileea conemuri auhaniha cuujihane jaun jetao, coroatajai ate mucueracuru Simoon, chaen nejera Aanderesi, naaonjoainuri coarae Jesoso, acauhanau rai rede nalaacuruhane jana. Nitohaneein acaauru coaraain jetaote: <sup>17</sup> “Chajaauche canu aina. Aihate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

<sup>18</sup> Nii rijieeoritiin jetaote, rai rede ratiriin Jesoso aina cure.

<sup>19</sup> Nii caje basiinjiin cutiin jetaote, coroatajai ate mucuurera- Sebedeeo calaohichuru Saantiaao aina rai nejera Joaan eruha cue Jesoso, bote cuhane neein redeeuru rucuheca neeuruhane jana. <sup>20</sup> Nii coaranaacane

rijijieoritiin cotihanaacane jaun jetaote, bote cuhane acaauru corootajaneraauru aina nii acaauru inaca Sebedeeo ratiriin Jesoso aina cuure.

*Leinjiin cacha suujua cuhane niha Moconajaera letonone  
(Lc 4.31-37)*

<sup>21</sup> Inae Caferenaanon turuhin jetaote, nebetacanaa cojoanona bana ita taojiaain, Cana Coaunera rai rauhi que ereereecuruha Joriocurune jaan coloheri sinacoca asaae cuhin cachaauru relaane nunuhetiha cue Jesoso. <sup>22</sup> Nii jana jetaote, cojoaelatiin aonajeeure cachaauru, Moisesa aitonjoan rauhi que cacha relaaunera amurijiriin esinae rauhijiriin suujua caje coitucuhin aitohane jaun.

<sup>23</sup> Nii jana jetaote, nii netaojiaauruha cachaaurune jaan coloheri sinacoca asaae ne leinjiin cacha- suujua cuhane Moconajaera letono siricha. <sup>24</sup> Aca jetaote ehequiin:

“Chanute canacaanu rene turuha uhita Nasarete cocoaicha Jesoso. Jerihane nechu jataain canacaanu itajeranu quete turuha uhicha. Raotojoeinne canu, ii Cana Coaunera Calaohi neeine coitucuunra,” nae Jesoso rai. <sup>25</sup> Nii jana jetaote:

“Coa iriha. Caa cacha jianeein amuura,” nae jetao Jesoso, nii cacha suujua cuhane nena Moconajaera letono rai. <sup>26</sup> Nii jana jetaote, rijijijianeein nii cacha teein, tonijiaain ehequiin mitue nii Moconajaera letono, nii cacha suujua caje. <sup>27</sup> Nii jana satiin nesoonetiin jetaote:

“Chatohanai cacha relaera cachana caa ai. Coatihana cacha relaaunera cacha relaaunera rijijieein cacha relaa. Caate laen nohanelanaala esinae rauhijiriin cacha relae. Chaen techu moconajaera letonocuru nihanatiin nere tonoraain cacha suujua caje mituhin amuure,” naain jetao ita caje bajaaree nii cachaauru.

<sup>28</sup> Nii jana jetaote, coa carajaaeriin Jesoso benaa coitucuure satiin Calileea batane que nenacaauru cachaauru.

*Simoon Fedoro tano rautaa Jesusone  
(Mt 8.14-15; Lc 4.38-39)*

<sup>29</sup> Inae netaojiaain Cana Coaunera rai rauhi que ereereecuruha Jorioocurune jaan coloheri sinacoca caje mituhin jetaote, Saantiaao, Joaan, naonjoanuri aina jiniiquiin, Aanderesi aina Simoon loreri asaae cue Jesoso. <sup>30</sup> Nii jana jetaote, inae nii loreri asaae turuuruhane jana, ajaa caaun cunaiteein ecu tocoeeque Simoon tano. Nii jaun jetaote, Jesoso rai beeuruhane jaun, <sup>31</sup> rohan nichuuntaain rai biji que michuhane jana jetao, inae caje amue ajaa. Nii rijieoritiin inae caje amuha ajaane jaun jetaote, nimichuhin acaauru coroaate nii cunaitena Simoon tano.

*Arajiin cunaitenacaauru rautaa Jesusone*  
(Mt 8.16-17; Lc 4.40-41)

<sup>32</sup> Inae sohane jaun nocohecane jana jetaote, Jesuso rene satiin cunaitenacaauru, chaen suujua cuhane Moconajaaera letono sirichaaauru, naaonjoainuri cachaaurune maajeen amaare, acaauru rautaa Jesusone coina. <sup>33</sup> Nii jaun jetaote, satiin nenaanajaauru caje cuhin, ecu acuujua niha netaojiaaure cachaauru. <sup>34</sup> Nitohaneein jetaote, araai laurii cunai caaun cunaitenacaauru cachaauru rautaa, Moconajaaera letono sirichaaaurune maajein rautae Jesuso. Nejetaote laen ereeuruha nii cacha suujua cuhane nenacaauru Moconajaaera letonocurune caohate Jesuso, raotojoein acanihanane coitucuuruhane jaun.

*Calileea batane cuhin, Cana Coaunera ere beebejiha Jesusone*  
(Lc 4.42-44)

<sup>35</sup> Inae janonaa jerihane jaun jetaote, nimichuhin nii nese caje cuhin, jelai Cana Coaunera bajaa cue Jesuso. <sup>36</sup> Nii jaun jetaote, leeochoauru aina jiniiquiin cuhin Jesuso ariha cue Simoon. <sup>37</sup> Eruhin jetaote:

“Satiin cachaaurute ii ariirijia amuhemuhecure,” naauruha Jesuso raine jaun jetaote:

<sup>38</sup> “Chajaaun chacuchete ichuun nenacaauru leeochoa nanaajaauru cuhin Cana Coauneraacha beratenojoin erenaa benichaache. Nii coinane jelai caje mituhin cajiha uun,” naain acaauru tonora Jesuso.

<sup>39</sup> Nitohaneein jetaote, cajihaneein nenaanajaauru amuhemujeein, satiin Calileea batane sacuritaain Joriocuru rai netaojiaauruhane jaan coloherihuru asaae Cana Coaunera ere beebejeein, moconajaaera letonocuru sirichaaauru cachaaurune maajein rautaa amuhemujue Jesuso.

*Leinjiin cosibi siricha rautaa Jesusone*  
(Mt 8.1-4; Lc 5.12-16)

<sup>40</sup> Nii jana jetaote, Jesuso rene turuhin jetao: “Jereeine jana nihane canu rautaa caa canu cosibi caje,” naa leinjiin cacha cosibi caaun cunaitenaa, nacatiha neseonrihaanne jaun jetaote,

<sup>41</sup> cairichaaajoaain coaraane jaun jetao, biji que mucuhin: “Jerichaaun chujian. Ii caje amuhine caa ii cosibi,” naa nii cacha rai Jesusone <sup>42</sup> rijieeoritiin caje amuha nii cosibine jaun jetaote, inae somaraain ne nii cacha. <sup>43-44</sup> Nii nerautaane rijieeoritiin rai necoein jetaote:

“Aonaan. Coa caa ii rautaanune biha chuni rai. Raujaain Cana Coaunera ere que cacha relaera neein nena saseredote coanahun ii coaraane coina. Chaen inae nerautaai nii ii

cosibi cajene coaracuruhane coina, aitoha Moisesa aitonjoan rauhine rijjijeein, Cana Coaunera belaaaine jaanu amaain cunihute inae ii cosibi caje nerautaaaine coitucuurumiin satiin cachaauru,” naain jetao jataain suujuateein nii cacha letoae Jesoso. <sup>45</sup> Nii jana jetaote, satiin cachaauru rai nii nitohaneein jaberoco rautaa Jesusone que nereretaa cue nii cacha. Nii jaun jetaote, inae neseuru raotojoein turunaa nainenihane jaun jetao, neniha cachane jaaun cuhin amuhemujue Jesoso. Nejetaote, lauri laurichuru caje cuhin coaraa cuure cachaauru.

## 2

### *Leinjiin jiurona cacha rautaa Jesusone*

*(Mt 9.1-8; Lc 5.17-26)*

<sup>1-2</sup> Nii baiha janojanoheriin catiaain jetaote, coaiten Caferenaan cue Jesoso. Inae ecu turuhin, loreri asaae nihane coitucuhin jetaote, rene turuha cuuruha arajii cachaaaurune jana jetao, acaauru rai Cana Coaunera ere beebeje Jesoso. Nitohaneein arajiin turuuruha cachaaaurune jaun jetaote, jataain nemoha loreri asajine jaun, nii acuujuu rohan nihanatiin nene turuha cachane jaannu. <sup>3</sup> Nii jana jetaote, Jesoso rene leinjiin cacha jiurona amaaure jenai cachaauru. <sup>4</sup> Nejetaote, jataain arajiin turuha cachane jaun, Jesoso rene nii jiurona cacha turuanaa nainecurenihana jaun jetao, loreri coarana joaracaain rai nela cuhane tijichaaain, nii niha Jesusone jaan jelson nii jiurona cacha faaure. <sup>5</sup> Nii cunaitena rautarichaaanne esenetaain amaauruha nii amaaureane coaraane jaun jetaote:

“Inae ii osa caje ii ichoteratein, ii que casuujuu acatichaaunra cacalabi,” nae jetao nii cunaitena rai Jesoso.

<sup>6-7</sup> Nii jana ecu neein aonajeein jetaote: “Chanuna caritiin ere caa cacha. Nechu jataain Cana Coaunera niha nocoetohane jaunte aite. Leinjiin Cana Coauneraachate nainere osa sitaa cacha cajene,” naain jetao suujua cuhane ereerejeein laurujualaurujuaain aonajeeure Moisesa aitoonjoan que cacha relaaureraauru tabaauru. <sup>8</sup> Niritiin suujua cuhane coaacuruhane que nainaain jetaote:

“Chanuna niritiin inara suujua cuhane coaaquiche. <sup>9</sup> Cha caaintanerihana nii jiurona rai: ‘Inae ii osa caje ichoteratenojeein,’ naain irihaca ne. Ainihane: ‘Nimichuhin chela seriin amuu,’ naacane. <sup>10</sup> Coarajeeuchenejian, Cana Coaunera Calaohi cachanein nejanoanaa nichaaunne, itolere curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiurona rai:

11 “Ii raine aitoon. Nimichuhin chela seriin chenenajau caunihu,” naa Jesusone rijieeoritiin jetaote, <sup>12</sup> satiin nii ecu neein coarajeerera notaracae jetao, nimichuhin rai nela seriin jelai caje amue nii jiuro caaun cunaitenaa. Nii jaun jetaote, satiin cojoelatiin jetao: “Chabana catohani coarahaacacheta,” naain jetao Cana Coaunera coroaecure cachaauru.

*Leinjiin cacha Lebi cotihaca Jesusone*

*(Mt 9.9-13; Lc 5.27-32)*

<sup>13</sup> Nii baiha jetaote, coaiten nemuri auhaniha cuha Jesusone jana, rene tururuha arajiin cachaaaurune jaun jetao, acaauru rai Cana Coaunera ere beebejeein acaauru relae Jesuso. <sup>14</sup> Nii caje cuujueein jetaote, Romanocuru rai *impoestonu* que cacha cobaraain coriqui raeraneein nihane jaun rai rori ichoae lauhecoha Arafeeo calaohi Lebine jana coariin jetao:

“Chajaau caniha,” naa Jesusone jaun jetao, nii rijieeoritiin nimichuhin Jesuso aina cue Lebi. <sup>15</sup> Nii baiha jetaote, nii Lebi loreri asae lenoniha niha aina nerelanacaauru aina Jesusone jana jetao, cuu nii Lebi aina lenoniha neeure arajiin leeochoauru Romanocuru rai *impoestonu* que cacha cobaraain coriqui raaurera, leeochoauru cachaauru- baasoneein ichaoha benojoihunri, naaonjoainuri. <sup>16</sup> Nitohaneein Jesuso aina lenoniha neeuruha nii nitohaneein ichaonacaauru cachaaaurune coaracuruhane jaun jetaote, nii Jesuso aina nerelanacaauru rai jetao:

“Chasiina taa Romanocuru rai *impoestonu* que cacha cobaraain coriqui raaurera, baasoneein ichaoha benojoihunri, naaonjoaihunri aina lenone inara relaera,” naaure jetao fariseeocuru aina Moisesa aitoonjoan que cacha relaurera, Jesuso aina nerelanacaauru rai.

<sup>17</sup> Nii jana jetaote, acaauru aonajeein jetao:

“Coatiha coichaera latecuruhi rauronacaauru. Leinjiin cunaitenacaauruhachate coichaera latecure. Coatiha osa colane nenacaauru cotihaca uhaaun. Osa aina nenacaaurune cotihaca uun,” naain jetao acaauru tonorae Jesuso.

*Suri couu netiin Cana Coaunera bajaauruhane*

*(Mt 9.14-17; Lc 5.33-39)*

<sup>18</sup> Joaan Baotisita sacuurera aina fariseeocuru sacuurera jetaote niqiu, suri couu netiin Cana Coaunera bajaebajae- cure. Nii jana jetaote, Jesuso rene turuhin jetao:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaebajae- cure suri couu netiin. Nete laen itolere bana ii aina nerelanacaauru,



coaaerai cohin, lenoneein, naaonjoaunreta,” naauruha Jesoso raine jana jetaote:

19 “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu nena nainecurene caa cotihanohinchuru, jaiti acaauru aina niha nii ene raeranu cachane jaun. 20 Nete laen inae nii ene ranaa jerera cacha amaauruhane, suri couu neein inaderaa cuurureincha,” naain jetao: 21 “Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaaain nedanaa naineriheii nii obiri enachasine, nii cajione siri que couneraane. 22 Nii rijijieein chu, nihei chuni inae conaca que tiha coaeraine jana, cuhane ichonai tera. Nitohaneein cuhane teraa ichonainete naasaaere nii coaerati. Nitohanihane jaunte, caohachae coaerai nejesinaneein niha coaeraine. Chaen ichonai, ichonai nejesinajeein nihane caohachae,” naain jetao cachaauru tonorae Jesoso.

*Nebetacanaa cojoanonaa bana aroso rijijieein nena tirico moloonejeein quihuruha Jesoso aina nerelanacaaurune (Mt 12.1-8; Lc 6.1-5)*

23 Nebetacanaa cojoanonaa bana aina nerelanacaauru aina jiniiquiin temule jana situhin, amuhemuheca Jesusone jana jetaote, quihuruhane coina aroso rijijieein nena tirico inaa moloonejeeure aina nerelanacaauru. 24 Nii coarajeein jetaote:

“Chanuna nebetacanaa cojoanonaa nihane jaun cocoaeraa nitohanai ichara natiin, nitohanai ichacure nii ii aina nerelanacaauru,” naauruha Jesoso rai fariseeocurune jana jetaote:

25 Tana nitohanihalu Rabirine coitucuhichene: 26 “Nii Rabiri jetaote, saseredotecuru curuaanaa neein niha Abiatane bana Teenforo asaae enohin Cana Coaunera que banijiaain nena faan qui, nii rai corihacuru aina jiniiquiin mijiitooruhane jaun, saseredotecuruhacha nii faan quinaa nainihane saijieein,” tana naain laenanohiniha Cana Coaunera Quiricha cuhanene ereretaain aonaquichene.

27-28 “Nebetacanaa cojoanonaate coaunaelu Cana Coaunera, bana nebetacanaa nainiha cachane coina. Coatiha cacha cairichaeranu que nebetacanaa cojoanona coaunaailu Cana Coaunera. Nii jaunne laen canu naineeun nebetacanaa cojoanona bana nihanatiin quiicha ichana jerei ichaain nihanune. Nitohaneeinte inara rijijieein cachaneein rai Calaohi nichaaunne cocoaainnaain letoae Ofa Cana Coaunera,” naain jetao fariseeocuru tonorae Jesoso.

## 3

*Jiurona bijii cache rautaa Jesusone*  
(Mt 12.9-14; Lc 6.6-11)

<sup>1</sup> Nii baiha jetaote, coaiten netaojiaain Cana Coaunera rai rauhi que ereerecuruha Joriocurune jaan coloheri sinacoca asae enoha cuha Jesusone jana jetao, cuu ne leinjiin cache jiurona bijii. <sup>2</sup> Nii jaun jetaote, nebetacanaa cojoanonaa bana nihane jaun nii Jesuso coarajeure fariseecuru, nii jiurona bijii cache rautaane niha nechu jataain colurujeeuruhane jaan leranune coina. <sup>3</sup> Nii jaun jetaote, nii jiurona bijii cache rai jetao:

“Nimichuhin nii cache cataaun chujutoroaau,” naain jetao: <sup>4</sup> “Chatohanai ichacaane caohachae nebetacanaa cojoanonaa bana, baaso ichaain cache ichao itajihacanena. Ainihane cache ichao rai caohacha ichacaanena,” naain fariseecuru caje bajaa Jesusone jana jetaote, inauhenecha curuaaequiin aonajeeure. <sup>5</sup> Nii jaun jetaote, nii nere aohana jerecurenihane jaun, nererojoecaaajoaain inaderaain, nii curuacaain nenacaauru coaraain jetao:

“Ii bijii raujiaau,” naa nii cache rai Jesusone jana, bijii siji-taain raujiaa nii cachane jana jetaote, inae nerautaain neraujiaae rai bijii. <sup>6</sup> Nii coaraain jetaote, airiniha mituhin ita suujuatiha cuure Erodesi ere tonoraeraauru aina fariseecuru, Jesuso sohin jaoruhane coina.

*Nemuri auhaniha netaojiaauruha arajiin cachaurune*

<sup>7</sup> Nii baihate, rene turuuruha arajiin Calileea cocoaichacurune jana, nii Calileea conemuri auhaniha cue aina nere-lanaauru aina Jesuso. <sup>8</sup> Jataain itolere ichaain, cunaite-nacaauru cachauru rautaain, naaonjoaane coitucuuruhane jaun jetaote, coaraa cuure Jodea batane, Jerosaleen, Idomea batane, nucuhe Jorodaan auhaniha neein enoto mitu nichajai cajeeurune maajeeinchuru cuhin jetao, Tiro, Sidoon, naaonjoainuri batane cajene maajeein turuha cuure arajiin cachauru. <sup>9</sup> Nii jaun jetaote, chajaain letona jatoraain bote coaracuruha aina nerelanacaaurune coina, acaauru rai aite Jesuso, nabana sururucuruha nii arajiin turunacaauru cachaurune coataa. <sup>10</sup> Jataain araai laurii cunai caaun cunaitenacaauru rautaane jaun jetaote, satiin cunaitenacaauru Jesuso jaberoco dadanaa jerecure nerataauruhane coina.

<sup>11</sup> Nii jana suujua cuhane moconajaenra letono sirichauru jetaote, Jesuso coaracuruhane jetao, nacatiha neseonriaain: “Iite Cana Coaunera Calaohi neeicha,” naain jetao cojiorichure.

<sup>12</sup> Nejetaote aonajeeuruha cachaurune jana, que ereeuruha nii moconajaera letonocurune caohate jataain Jesuso.

*Afosotoorunu que, lechoonca coroatajai niicha cocoainanenu janiicha Jesusone*

*(Mt 10.1-4; Lc 6.12-16)*

13-14 Nii baiha jetaote, ichatane ucuuno que iniin caohachaaain niicha coaracuri cotijiae Jesuso. Inae satiin netaojiaauruhane jana jetaote, janiinajaain acaauru caje lechoonca coroatajaain nenacaauru cocoainae, corihaneein jiniichaain amuhemujeein, chaen nere beraanu que naaonjoaauruhane coina. Nii lechoonca coroatajai niicha cocoainauri jetaote, afosotooruneein curuaatenajaain letoanajaen, <sup>15</sup> cacha suujua cuhane nenacaauru moconajaera letonocuru sitaain, cunaitenacaaurune maajein rautaaauruhane coina. <sup>16</sup> Nii lechoonca coroatajaain niicha janiichuri jetaote, nii jauriaanejeein Simoonneein niicha curuaatei Fedoro, chaen <sup>17</sup> nejera Joaan aina Sebedeo calaohichuru Saantiaao naaonjoainurine. Acaauru jetaote, Boanerges neein curuaatenajae: “Arara calaohichuru,” naaneneein. <sup>18</sup> Chaen Aanderesi, Ferifi, Bartolomee, Mateeo, Tomasi, Arafeeo calaohi Saantiaao, Tadeo, Celoteneein niicha curuaatei- Simoon, <sup>19</sup> chaen nii acaauru lechoonca coroataja, Jesuso colurujueranu Jodasi Isacariote naaonjoainurine.

*Moconajaera letononiha Jesuso beeuruha Moisesa aitoonjoan que cacha relaaurerane*

*(Mt 12.22-32; Lc 11.14-23; 12.10)*

<sup>20</sup> Nii baiha jetaote, leinjiin loreri asaae enoha cuha Jesusone jana jetao, ecu rene arajiin netaojiaauruha cachaaaurune jaun jetao, nii aina nerelanacaauru aina jiniiquiin lenonena nainecurene. <sup>21</sup> Inae nitohaneein ecu niicha ichanenu coitucuelanaala niha Jesusone beeuruhane coitucuuruhane jaun jetaote, raa cuure naraaichuru.

<sup>22</sup> Chaen Jerosaleen caje turunacaauru Moisesa aitoonjoan que cacha relaaurera netonai jetaote,

“Moconajaeracuru curuaanaa Beelseboote, caa cacha rai catohanei ichaane jaan teein ne, nii aina cacha suujua cuhane nena moconajaeracuru letono sitaane coina,” naaure jetao ita rai.

<sup>23</sup> Niritocuruhane aonaain jetaote, acaauru cotijiaain:

“Chasiina nejesinanejeein, chatohaneein ita teein, ita sitanaa nainere moconajaera. <sup>24</sup> Niheichu leinjiin atane que ichaonacaauru, nejesinajeein itaque nejerateein nihane raotiin ita aina ichaonaa nainecururihei. <sup>25</sup> Niheichu leinjiin loreri asaei ita que nejesinajeein nejerateein nena nainecurui coroatajai cacha, lesajeein ita que nejerateein nihane

raotiin ita aina ichaonaa nainecurenihane jaun. <sup>26</sup> Nii riji-jieeinchu ita que nejesinajejin nejerateein nenea nainecuruhi moconajaera aina rai letonocuru, enaacha jiniiquiin ita itajenaa nainecururihane jaun.

<sup>27</sup> Nihei chunei jataain laraajiin nenea cacha loreri asaae enohin niicha sirii rulunaa nainera. Jauriaanejejin biji ichohacane banaachate nainere caje niicha sirii ruluhane.

<sup>28</sup> Cana Coaunerate, itolere baaso ichaain neosateein, itolere baaso que ereein naaonjoaauruha cachaurune niha natiin acaauru que suujua acatein ne. <sup>29</sup> Nete laen rai Suujue que baasoneein iriha cachane, chabana que Suujua acatenereein Cana Coaunera. Nii cacha baasoneein que ereite chabana satonoelanaala caseteconihane cureein,” nae jetao Moisesa aitoonjoan que cacha relaurera rai Jesoso. <sup>30</sup> Moconajaera letono sirihane beeuruhane jaun jetaote, acaauru rai aite Jesoso.

*Neba aina turuuruha Jesoso nejeraaurune  
(Mt 12.46-50; Lc 8.19-21)*

<sup>31</sup> Nii jana jetaote, turuha ure neba aina Jesoso nejeraauru. Nejetaote loreri asae enoelanaala, airiniha neein cotiharateure. <sup>32</sup> Nii jana jetaote, nii Jesoso curuhacaain nenacaauru cachauru jetao: “Taute airiniha turuhin ii ariirichure ii neba aina ii nejeraauru aina ii baihuru,” naauruha raine jana jetaote:

<sup>33</sup> “Charijina canu neba, canu nejeraauru, naaonjoainere,” naane baiha jetao, <sup>34</sup> nii curuhacaain nenacaauru cachauru coaraain jetao: “Caaurute canu neba, canu nejeraauru, canu baihuru, naaonjoainuri ne. <sup>35</sup> Chunocoha jeriha Cana Coaunere rijijieein ichahin, Cana Coaunera jerenohin icharate, canu neba, canu nejera, canu bai, naaonjoainurine,” nae jetao acaauru rai Jesoso.

## 4

*Ucuhe riaara que cuaain cacha relaa Jesusone  
(Mt 13.1-9; Lc 8.4-8)*

<sup>1</sup> Nii baiha nacoaaneein nemuri auha niha teein cachauru relaa Jesusone jana jetaote, ecu arajiin netaojiaauruha cachaurune jana, nii nemuri cuhane niha leinjiin botene jaun jetao, cuhane fauhin nelauriariin lauheque Jesoso, nemuri auhaniha neein coarajeuruha cachaurune jana. <sup>2</sup> Nitohaneein bote cuhane fauhin jetaote, ecu neein aonajeuruhanane jana araai laurii itolereuru que cuaain acaauru relae. <sup>3</sup> Nitohaneein acaauru relaan jetaote:

“Caohachaain caa quere aonacuche. <sup>4</sup> Leinjiin cache, ucuhe riaacane jana tabaauru bero cuhane nalunacaaurute turuhin quihure tajaecuru. <sup>5</sup> Jana tabaauru jataain neniha atane jioonone jaun samaata choae nalunacaaurute erojoein omaroe, ucuacaain neniha atane jioonone jaun. <sup>6</sup> Nete enoto ajaano caun, neniha cojoaisine jaun ohe nii omarona. <sup>7</sup> Jana tabaauru ucuhecuru, ojoa jana nalunacaaurute omarohane saijieein amurijiriin omarohin soha ojoane jaun, inacae lanaala ohacoe. <sup>8</sup> Jana tabaauru ucuhecuru atane caohacha choae nalunacaaurute omarohin caohachaain inaacane jaun, le ucuhecuru caje tabaauru nichata choonca ucujeein, saota choonca ucuheneein, le fasha ucuhe-neeichuru inacae,” naain acaauru relaain jetaote:

<sup>9</sup> “Caohachaain aonacurumiin urichonacaauru,” nae jetao acaauru rai Jesoso.

*Acaauru relaa Jesusone jaan bajaauruha caje aina nerelanacaaurune*  
(Mt 13.10-17; Lc 8.9-10)

<sup>10</sup> Inae caje amuuruha nii cachaaaurune jana, jelai nedaa Jesusone jana jetaote, nii cachaaauru relaane jaan bajaauru caje, nii lechoonca coroatajaain aina nerelanacaauru aina ecu rohan nenacaauru leeochoauru cachaaauru, coitucuuruhane coina. <sup>11</sup> Nii jana jetaote, acaauru rai: “Inara quete asino-joineein nena rai Cojoanona coitucuerate Cana Coaunera. Nete laen rai cachane lanaala nenacaauru que, nereretanaa que cuaain acaauru rai be, <sup>12</sup> coaracuruha neniha natiin coitucuuruhane coina. Niheichu aonacuruhane niha natiin, coitucuuruhane coataa. Nabana aonaain aina cuaain esenetaauruhane, acaauru osa acaauru ichoterateein acaauru que suujua acatiha Cana Coaunerane coataa,” nae jetao acaauru rai Jesoso.

*Ucuhe riaara que acaauru relaane jaan coitucueratiha Jesusone*  
(Mt 13.18-23; Lc 8.11-15)

<sup>13</sup> Niritiin jetaote, aina nerelanacaauru rai jetao: “Ta caa inara relaanune jaan aonaain coitucuhichene. Chatohaneeina jana leeochoauru que cuaain inara relaanune coitucuriquiche. <sup>14</sup> Nii ucuhe riarate Cana Coaunera ere bera rijijieein ainaa ne.

<sup>15</sup> Niha nii coina tabaauru tabaauru nii bero cuhane naluhin nitajenaa ucuhe rijijieein nenacaauru cachaaauru. Nii coinata Cana Coauneraacha beratenojoin aonacuruhane niha natiin, inae acaauru coritaa uha moconajaerane acaacha esenetaain, inae suujua cuhane Cana Coaunera coaacuruhane jianecure.

<sup>16</sup> Nii leeochoa cachaaurute, nii samaata choae nalunaa ucuhe rijjichure. Nii jaunte Cana Coaunera beratenojoin jereein rautain aonacuruhane baiha, <sup>17</sup> caohachaaain acaauru suujua cuhane coaacurenihane jaun, Cana Coaunera esenetaauruhane jianecure. Nii jaunte Cana Coauneraacha beratenojoin esenetaain neeuruhane jana, cairichanojoneein, cojunojoneein, naaonjoaauruhane, Cana Coaunera esenetaauruhane jianecure.

<sup>18</sup> Jana leeochoa cachaaurute, nii oja jana nalunaa ucuhe rijjieein neure. Cana Coaunera beratenojoin aonacuruhane baiha niha natiin, <sup>19</sup> jataain acaauru ichaohacha que suujua teeuruhane jaunte, nechujataain raaje necoritaain coriquihonaneein nena jereein, itolere sirina jerecuruhane jaun, caohachaaain Cana Coaunera esenetaain tonoraurenihane jaun nitajeeure.

<sup>20</sup> Jana leeochoaaurute atane caohacha choaee nalunaa ucuhe rijjieein neure. Acaaurute Cana Coaunera ere aonaaain, caohachaaain Cana Coaunera esenetaaure, nii chabana jianelanaala.

Nii esenetaeraauru tabaaurute, le ucuhe caje nichata choonca ucuhennein le tijirii caje tera, saota choonca ucuhennein, le fasha ucuhennein tera, naajoaain le tijirii caje teurera rijjieein neure,” nae jetao acaauru rai Jesoso.

*Cono que cuaain cachaauru relaa Jesosone*

*(Lc 8.16-18)*

<sup>21</sup> Niritiin jetaote: “Nihei chuni cono mocohin bujuaihu tera. Nitohaneein bujuaihu telanaalate, jianacoon conohanau neeuruha turunacaaurune coina ecuun teure.

<sup>22</sup> Nii cono aina cuaainte jianacoon coitucunojoiniha cureein coitucuerae lanaala itolere asinojoneein inaraacha ichai.

<sup>23</sup> Aonacurumiin urichonacaauru,” naain jetaote:

<sup>24</sup> “Caohachaaain nainaain inaraacha aonai aonacuche. Charijieein teeinti leeochoaauru coaraquiche, nii rijjieeinte inara netonai coareein Cana Coaunera. <sup>25</sup> Caohachaaain niicha jerei rijjieein ichaohin nere tonoraerate, jeelai amuritoheriin coroatajanereein Cana Coaunera. Nii rijjieein techu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” nae jetao acaauru rai Jesoso.

*Omaroha ucuhene que cuaain acaauru relaa Jesosone*

<sup>26</sup> Niritiin jetaote: “Temule jaera cacha rijjicha Cana Coaunera cojoanonaa. <sup>27</sup> Charijieein teeinti temule

jaain, janotiin berailanaala sinii, jerichanejeein jiichoo berailanaala nihane tonohanau coitucuenihane jana

omaroe nii niicha temui, nii rijiicha Cana Coaunera Cojoanonaa. <sup>28-29</sup> Charijieein teeinti, raajenihane omarohin, nalojoaacoain, inacaain, inae tainaca que teein cataa nii temulene taihure cachaauru, nii rijiicha Cana Coaunera cojoanonaa,” nae jetao acaauru rai Jesuso.

*Mosatasa ucuhe que cuaain acaauru relaa Jesusone  
(Mt 13.31-32; Lc 13.18-19)*

<sup>30</sup> Niritiin jetaote: “Chaaquenejianra inara rai Cana Coaunera cojoanonaa que cuaain aitete coitucuhicheta. <sup>31</sup> Leinjiin mosatasa ucuhe temunacai rijiicha. Acate itolere temulecuru ucuhe fautaain jataain aansijien. <sup>32</sup> Nete inae temunojoneein nihane, itolere temulecuru ocoana jana nenacaauru amurijiriin neleereein fojoein nuna seeonjoan nihane jana, nichoae tajein loroore tajaecuru, nii rijiicha Cana Coaunera cojoanonaa,” nae jetao acaauru rai Jesuso.

*Coitucunaa nainecuruha nereentiaain araai laurii que cachaauru relaa Jesusone  
(Mt 13.34-35)*

<sup>33</sup> Nitohanein jetaote, araai laurii que cuaain itolere acaauruhacha coitucui- acaauru ichao que cuaain cachaauru relaain Cana Coaunera ere beebejeein acaauru relae, aonaain coitucunaa nainecuruha nereentiaain Jesuso. <sup>34</sup> Nitohanein jetaote, rai cacha nelanaala nenacaauru relaa Cana Coaunera Cojoanonaa quene, acaauruhacha coitucui- acaauru ichao que cuaain relanajae. Jana aina nerelanacaauru relaane jetaote, rauhijiriin, “Naaonjoainte ne Cana Coaunera Cojoanonaa,” naain Cana Coaunera Cojoanonaa beein que relanajae.

*Fichafichanaa aina cujuana suruaa Jesusone  
(Mt 8.23-27; Lc 8.22-25)*

<sup>35</sup> Nii cojoanotiin bananein aina nerelanacaauru rai jetaote:

“Jamaauchete nemuri jerau cunichaache,” nae jetao acaauru rai Jesuso.

<sup>36</sup> Nii jaun jetaote, ecu cachaauru ratiriin, nii fauhin lauhequin cachaauru relaa Jesusone jaan bote cuhane fauhin amaauruha aina nerelanacaaurune jana jetao, acaauru jiniichain cuure leocha boteeuru. <sup>37</sup> Nitohanein cuuruhane jana jetaote, jataain mijiaaieein uha cujuana tabai aina fichafichanaane jana jetao, acaauru bote cuhane acau enoaa fichafichanaane jaun, inae nalunaa jere nii cuurunaja bote. <sup>38</sup> Nii jana bote roe cuhane binaao choae tocoeequin siniiniicha Jesusone jana jetaote:

“Cacha relaera chajaain nocoo. Inae nalurichaacheje. Tana inae nalunaa jerichaachene que tonajeeine,” naauruha nocoain aina nerelanacaaurune jana jetaote, nimichuhin:

<sup>39</sup> “Cooa inooniha. Chajaain nesuruu,” naa nii nemuri fichafichanaa rai Jesusone rijieeoritiin jetao, nesuruha cujuana aina nii fichafichanaane jaun raotojoein cuujeeure.

<sup>40</sup> Inae nesuruha nii fichafichanaane baiha jetaote:

“Chanuna jataain nesooneeiche. Chanuna cha esene-taeneeiche,” nae jetao nii aina nerelanacaauru rai Jesuso.

<sup>41</sup> Nejetaote jataain nesoonetooruhane jaun jetao:

“Chatohanaineeinna ne caa cachate, nere tonoraain nesurue cujuana tabai aina nemuri fichafichanaa,” naaure jetao ecu ita rai nii aina nerelanacaauru.

## 5

*Cadara bataneu niha suujua cuhane moconajaera letono siricha cachane*

(Mt 8.28-34; Lc 8.26-39)

<sup>1-2</sup> Nitohaneein cuhin inae nemuri jerau turuuruha Cadara batane que jana, iniha cuha Jesusone jana jetaote, que tacaain coinetiha cue leinjiin cacha- suujua cuhane moconajaera letono siricha. Nii cacha jetaote atane bana caje uhin ai, <sup>3</sup> ecu ichaohane jaun. Nitohaneein rai suujua cuhane moconajaera letono sirihane jaun jetaote, *cadena* que niha natiin ichohana nainene chuni. <sup>4</sup> Araai saain tijia aina biji ichohacuruha *cadena* quene niha natiin jetaote, molomolonijihanaane jaun, chatohaneein tenaa nainene nii chuni. <sup>5</sup> Nii jaun jetaote, janotiin, jiichoo netojoeinchuru ichatane janaauru amuhemujeein, atane banaauru ichoae amuhemujeein, eheehejeein, ajeri jaberoco ichoae comhin, naaonjoain amuhemujue nii cacha. <sup>6</sup> Nii jaun jetaote, coriaae uujiha Jesusone coariin, jeluhariin coinetein nacatiha neseeonriaain ehequiin jetao:

<sup>7</sup> “Jiaonriha caniha nenoaain carerojoecaaine, acaihanijin nena Cana Coaunera Calaohi Jesuso. Jiaonriha atiin nohane Cana Coaunera coreniha chatohaneein caeteeine,” nae jetao <sup>8</sup> nii cacha suujua cuhane nena moconajaera letono. Nii cacha suujua jianeein amuhane caina: “Nii cacha suujua cuhane neein, cacha suujua aasaequine caje mituhin amuura moconajaera letono,” naa Jesusone jaun. <sup>9</sup> Niritiin jetaote:

“Tonaa ii curuaa,” naain caje bajaa Jesusone jana jetao,

“Jataain araichaanune jaunte Lejion ne canu curuaara,” nae jetao Jesuso rai.

<sup>10</sup> Nejetaote, jelai batane caje jaoha Jesusone caohate jataain nii moconajaera letono nii cacha suujueniha nena.



11 Nii jana ichtane ucuuno rohan lenoniha neeuruha arajiin coosichurune jaun jetaote:

12 “Atiin taa coosichuru suujua cuhane canacaanu letoaa,” naaure jetao Jesoso rai, nii moconajaera letonocuru cacha suujua cuhane nenacaauru.

13 Nii jaun caje bajaauruhane rijitjoein jeriha Jesusone jaun jetaote, nii coosichuru suujanaha enooruhane jaun, ucu caje nomaroteein acauhanau naluhin, acau que nereeonohin oore nii coroata oaraancai coosichuru.

14 Nii jaun jetaote, nii coaraain jelai caje sorohin, neseeu cuhin, nenaanajaaunru, naaonjoainu cuhecujueein biha curuha nii coosichuru beraihurerane jaun jetao, turuhin coaraa cuure cachaauru. 15 Nii jana jetaote, nii niha Jesusone jaun turuuruhane jana jetao, cojurihu cacha caohachanein nena tocuhanein necoreteein lajuae, nii suujua cuhane arajiin moconajaera letono coitucuchuhi siricha cacha. Nii jana coaraain nesoonetooruha nii coaraa cunacaauru cachaaurune jana jetaote, 16 nii coosichuru suujua cuhane enooruha nii moconajaera letonocurune jana, ooruha nii coosichurune jana, nerautaa nii moconajaera letono siricha cachane beure nii coaraa cunacaauru rai, nii ecu neein coarajeeurera cachaauru. 17 Nii jaun jetaote, chajaain erojoein jelai caje amuha Jesusone luhecaure cachaauru.

18 Nii jana, inae jelaiha bote cuhane fauha cuha Jesusone jana jetaote, aina cuhane coina rai aite nii moconajaera letono sirihane caje nerautanaa cacha. 19 Nejetaote, aina cuhane jerelanaala:

“Chajaaincha chenenajaun cauhin, charaaichuru rene turuhin, cairichaaajoaain ii coaraain itolere ichaa iniha Cana Coaunerane benihun acaauru rai,” nae jetao rai Jesoso.

20 Nii jaun jetaote, Decapolis batane que nenacaauru nenaanajaauru cuhecujueein, itolere ichaa coreniha Jesusone biha nii cachane jaun jetao, satiin cojoelatoore aonajeeurera cachaauru.

*Jairo cacunu aina leinjiin ene rautaa Jesusone  
(Mt 9.18-26; Lc 8.40-56)*

21 Nii baiha jelaiha nemuri jerau cauha cuha Jesoso, bote cuhane jana jetaote, najiniha arajiin netaojiaain cohacuruha nemuri auhaniha cachaaurune jaun jetao, ecu turuhin ne nii cachaauru aina Jesoso. 22 Nii jana jetaote, turuha cue leinjiin sinacoca curuaanaa neein nena Jairo. 23 Turuhin jetaote:

“Onaa jeriha canu cacunune jaunne ii coaraa uun. Chajaute atiin nohane turuhin nichoae ii biji meracaete nerautaa ichaohine,” nae jetao Jesoso acatiha neseonriaain nii Jairo.

<sup>24</sup> Nii jaun jetaote, aina cuha Jesusone jana, jiniichaain cuuruha arajiin cachaaurune jaun jetao, jataain arajii cachaauru cataaun cuujue. <sup>25</sup> Nii arajiin cunacaauru cachaauru jana jetaote cue, leinjiin ene lechoonca coroata jaanacaain jabero-co caje ichana jaohajeein nena. <sup>26</sup> Aca jetaote, nii rai chaque nelatejee-cane que airijiin jitariin niicha sirii jao-hin arajii cacha coicharaauru que nocoicharatihane niha natiin nerautasilanaala jataain taaeneein cuujue nii rai cunai. <sup>27</sup> Nii ene jetaote, Jesoso benaa inaaoriin cuhin coaraain, leeochoauru cachaauru jana cutiin, Jesoso janori nichae marotiin cajione auha mucuuri, <sup>28</sup> “Caa cajione auha mucu-urihanune niha natiine nerautareeunni,” naain esenetaane jaun. <sup>29</sup> Nii Jesoso cajione mucuhane rijieeoritiin nesuruha ichanane jana jetaote, inae nerautanaanein naonae rai jabe-roco. <sup>30</sup> Nii jana caje mituha niicha ichana nainei cacha rautaane jaaque nainain jetaote, nii cachaauru coaraain:

“Chana toon cacajione mucue,” naa Jesusone jana jetaote,

<sup>31</sup> “Tana jeranu ii sururucuruha cachaaurune coaraainete. ‘Chana toon cacajione mucue,’ naain bajaai,” naaure jetao Jesoso rai nii aina nerelanacaauru.

<sup>32</sup> Nejetaote, rai cajione mucuera coaraane coina, nii rohan nenacaauru cachaauru cajanaain coarae Jesoso. <sup>33</sup> Nii jaun jetaote, nesoone caaun rijijijianein nacatiha neseon-riaain, nii suujue lanaala esinae rauhijiriin, “Naaonjoaain ii cajione mucuhanune rijijieeoritiinne caa canu cunai caje nerautaaun” naain be nii ene. <sup>34</sup> Nii jaun jetaote:

“Ii rautana nainichaaunne esenetaaine jaunte, inae ner-ataai. Raotojoein raurohin caunihun,” nae jetao nii ene rai Jesoso. <sup>35</sup> Niritiin ereereca nii ene rai Jesusone jana jetaote, nii ranuna inaca sinacoca curuaanaa Jairo loreri caje turuha uure cachaauru. Rene turuhin jetaote:

“Inae oha ii cacunu. Coa inacojoein nii cacha relaera roheca,” naaure jetao nii cachaauru. <sup>36</sup> Nejetaote, nii acaauru aohana jerelanaala nii sinacoca curuaanaa rai jetao:

“Jiaonriha acaauru esenetaain nesooneeine. Raujiaaincha rautaanune esenetaa,” nae jetao Jesoso.

<sup>37-38</sup> Nitohanein inae nii sinacoca curuaanaa loreri asae turuuruhane jana tonijiaain cojioriin chanaauruha cachaau-rune jana jetaote, aina cuuruha leeochoaurune jerelanaala, Fedoro, Saantiaao, chaen nii Saantiaao nejera Joaan, naaon-joainuri aina jiniiquiin enohin jetao:

<sup>39</sup> “Chanuna niritiin cojioriin chanaaiche. Coatihane ohane jaun aihei caa ranuna. Sinihane jaunte ai,” naa Jesusone jana jetaote, <sup>40</sup> Jesoso coenacure cuu nenacaauru cachaauru. Nii jana jetaote, satiin nii cuu nenacaauru cachaauru mitaain,

nii ranuna inaca aina neba, chaen corihaniha cunacaauru, naaonjoainuri aina jiniiquiin nii ranuna rene enohin jetao, <sup>41</sup> *biji que mucuuriin:*

“Talita coom,” nae jetao nii ranuna rai Jesoso. “Icheine aitoon ranuna. Nimichuu,” naa jetaote aite Joriocuru ere cuhane.

<sup>42</sup> Nii rijieeoritiin nimichuhin ruharuhaca nii lechoonca coroata jaanacai ranunane jana jetaote, cojoelatiin coarajeeure nii cuu neein coarajeeurera cachaauru. <sup>43</sup> Nii jana jetaote, jataain chuni rai beeuruhane caohatihane baiha jetao, nii ranuna coroaateeuruhane coina aite Jesoso.

## 6

### *Nasarete cuha Jesusone* (Mt 13.53-58; Lc 4.16-30)

<sup>1</sup> Nii baiha jetaote, aina nerelanacaauru aina jiniiquiin, jelai caje cuhin rai nataneu cauha cue Jesoso. <sup>2</sup> Inae nataneu turuhin, nebetacanaa cojoanonaa bana sinacoca asae enohin cachaauru relaane nunuhetiha Jesusone jana jetaote, nii relanajaa Jesusone aonajeein jetao:

“Chuna nerelaete toritiin itolere coitucuhin que cache relae. Chaa cajena itolere coitucutiin, chabana coaraai cojoelanaacojoai ichaane coinane maajeein nerelae. <sup>3</sup> Tana caa, Mariha calaohichuru Saantiaao, Jose, Jodasi, Simoon, naaonjoainuri nejera, tabara caje itolere rucuhele icharaneen nenea carfinteroneein nerejetohane. Tana chaen rai baihuru cau cana aina ichaaoruhane,” naain jetao ita caje bajaare cojoelatiin, nii ecu arajiin nenacaauru cachaauru.

<sup>4</sup> Niritiin rai nere tonorana jerecurenihane jaun jetaote:

“Itolere banate niqui cuhane jaaunru, Cana Coaunera ere bera *profeta* que suujua acateein esenetaain neeure cachaauru. Nete laen rai nataneu nenacaauru naraaichuru que suujua acateein esenetana jerecurene. Niheichu nii nihane jaan loreri asae nenacaauru niha natiin esenetaauruhi,” nae jetao acaauru rai Jesoso.

<sup>5</sup> Niritiin jetaote, ecu cojoelanaacojoai ichaelanaala, coroatajajeein ecu nenacaauru cunaitenacaauruhacha mucuhin rautanajae. <sup>6</sup> Nitohaneein esenetana jerecurenihane cachaaurune jaun jetaote, acaauru cojoelate Jesoso.

### *Cana Coaunera cojoanonaa beebejeeuruhane coina aina nerelanacaauru letoaa Jesusone* (Mt 10.5-15; Lc 9.1-6)

Nii baiha jetaote, Nasarete rohan nenacaauru neseeu cuhecujueein, cachaauru relaa cue Jesoso. <sup>7</sup> Nitohaneein jetaote, leecha neseeu cuhecujueein

cacha suujua cuhane nenacaauru moconajaera letonocuru coitucuhichuru sitaain cachaauru rautaauruhane coina nii lechoonca coroatajaain aina nerelanacaauru cotijiaain cocoainanjaain letoanajae coroatajaanana coroatajaananaain Jesoso. <sup>8</sup> Nitohaneein letoanajaain jetaote, acaauru atora, acaauru achano, coriqui, naaonjoain amaelanaala, <sup>9</sup> acaauru safatocuruhacha curujuaain, nii necoreeteuruhane coina acaauru cajione amaelanaala, acaauru biji achuneecha baaeejein bero cuhane cuuruhane coina acaauru rai aite. <sup>10</sup> Niritiin letoanajaain jetaote:

“Leinjiin loreri asae turuhichene, ecu sinihucho inaraacha ichai nainaaain jelai caje amuhichene reentiaain. <sup>11</sup> Chunijihun turuhichene jaaunru, caohachaain inara coana jerelanaala inara aohana jerecurenihane, jelai caje amuuche, inara safato que nenea utoone riariaain ratiriin, inae nitajeeuruhane rai neeuruhane que nainacuruhane coina,” naain jetao nii aina nerelanacaauru letoae Jesoso.

<sup>12</sup> Nitohaneein cuhin jetaote, nacoaauneein Cana Coaunera coitucuhin aca jerihane rijijieein neeuruha cachaaurune coina acaauru rai aitiin, <sup>13</sup> arajii moconajaera letono sirichaauru cachaaurune maajeein raautaaain, arajii cunaitenacaauru rautaaure erene que rujuanajaain nii aina nerelanacaauru.

### *Oha Joaan Baotisitane* (Mt 14.1-12; Lc 9.7-9)

<sup>14</sup> Nitohaneein itolere ichaa Jesusone beeuruha itolere sacuritaaine jaun jetaote, Erodesi netonai coitucue.

Chaen jetaotechu: “Joaan Baotisitate ichanacaihara. Nii jaunte, nii itolere cojoelanaacojoai ichana naineraneein necaihara,” naa Erodesine jana jetaote; <sup>15</sup> “Jerihanete *Profeta* Eliasinecaihara,” naaure leeochoaauru. Nii jana leeochoaauru jetaote: “Inoaenlu *profetacuru* rijijieein nenea *profetate* aicaihara,” naaure. <sup>16</sup> Nejetaote, niritocuruhane aonajihane jaun: “Acate Joaan ne. Rai nuluno moloeratihanulu natiinte, inae nacoaauneein o caje ichanacaiha,” nae jetao Erodesi.

<sup>17</sup> Erodiasi coreniha jetaote, Joaan mucuerateein *cadena* que ichojoaain caresero cuhane terate Erodesi. Nii Erodiasi jetaote, Erodesi nejera Ferifi comasaineein nelu. Nejetaote, comasaineein sirilu Erodesi nii rai nejera comasainihane saijieein. <sup>18</sup> Nii jaun jetaote:

“Jiaonriha ii comasaineein taa inejera comasai siriinera,” nae jetao Erodesi rai Joaan.

<sup>19</sup> Niritoha Erodesi rai nii Joaane caje coauneen jetaote, nii Joaan cotaairiin sohin jaohene rijitoein nerejete Erodiasi. <sup>20</sup> Nejetaote sohin jaonaa nainene, esinae rauhiiriin leinjiin cacha- saantoneen Cana Coaunera letononeen nihane coitucuhane jaun, coasiha cocoaerateraneein niha Erodesine jaun. Nitohanihane jaun jetaote, iriha Joaane rautatiin aonaane jaun nii aina chatohanai niicha ichanenu coitucuelanaala ne Erodesi. <sup>21</sup> Nejetaote, nejanoa bajaanaa bitoaane coina lenone jaain, que jauriineein nenacaauru curuaanaacuru, chaen rai soondarooru curuaanaacuru, chaen Calileea cocoaichacuru jataain nelatecuri cotijiaain beseta ichaa Erodesine jana jetao, Joaan sohin jaohene rijitojoenajaaocane jana, suujua rijijieein erue Erodiasi. <sup>22</sup> Nii jana jetaote, nii beseta ichaane jaa coloheri asaae enohin raansaa cuha nii Erodiasi cacunune jana jetao, nii raansaane jana rautatiin coaraje Erodesi, nii ecu aina lenoniha nenacaauru aina jiniiquiin. Nii jana jetaote:

“Joaareen iicha jerei bajaau cacajene ichei tera. <sup>23</sup> Cana Coaunera notaracaene chaelai, iicha jerei bajaai cacajene tereeunicha. Nainichaun cataaun leruhin caa quiicha be-raai atane tihanunera,” nae jetao araai saain nii ranuna rai Erodesi. <sup>24</sup> Nii jaun jetaote, jelai caje mituhin:

“Cha bajareun cajete oma,” naa cuha neba raine jana jetaote:

“Chajaain ena caje Joaan Baotisita couturi bajaau,” nae jetao nii ranuna neba.

<sup>25</sup> Nii jaun jetaote, jelaiha soroneen enohin jetao,

“Ena carai leinjiin plato cuhane Joaan Baotisita couturi teinene jereeun,” naa jetao cue nii ranuna Erodesi rai.

<sup>26</sup> Nii jaun jetaote, jataain inaderae Erodesi. Nejetaote, satiin niicha cotihacuri urichoo Cana Coaunera notaracae aitohane jaun, nii caje niicha bajai tenaa nainenihane que aitona nainene. <sup>27</sup> Nitohanihane jaun jetaote, nii rijieeoritiin leinjiin soondaro letoae Erodesi, Joaan couturi molohin raa cuhane coina. <sup>28</sup> Nii jaun jetaote, caresero cuhane cuhin Joaan couturi molohin leinjiin plato cuhane uhaain, nii ranuna rai tiha soondarone jaun jetao, neba rai te nii ranuna.

<sup>29</sup> Nii jana jetaote, inae nitohaneein Joaan teeuruhane coitucuhin jetao, nii Joaan jaberoco raain conautiha cuure sacuureraauru.

*Saoqui oaraancai cachaauru rai lenone faa Jesusone  
(Mt 14.13-21; Lc 9.10-17; Jn 6.1-14)*

<sup>30</sup> Nitohaneein letoanajaa Jesusone caje turuhin jetaote, aina netaojiaain itolere ichaain Cana Coaunera ere que cachaauru relaain, naaonjoaunruhane beure Jesoso rai,

nii lechoonca coroatajaain niicha cocoinaauri afosotoorune jana jetaote:

<sup>31</sup> “Chajaauchete neniha cachane jaun cuhin, jelai rao-tojoein nebetacanichaachera,” nae jetao acaauru rai Jesuso, cauhajeeuruhane niha natiin arajiin turuhajeeuruha cachaaurune jaun, lenonecuruhane teurenihane acaauru raine jaun. <sup>32</sup> Nii jaun jetaote, leinjiin bote cuhane fauhin neniha cachane jaun, jelai Jesuso aina cuure nii niicha cocoinaauri afosotooru. <sup>33</sup> Nejetaote, arajii cacha cuuruhane coarajihane jaun, nii cuuruhane jaan jelai coitucuhin, satiin neseuru caje arajiin cuhin jetao, acaauru ajiniha soroneein jeluhariin cuhin turuure. <sup>34</sup> Nitohaneein cuhin acaauru ajiniha turuuruhane jaun jetaote, ecu turuhin bote caje iniha cunajaun jetao, arajiin ecu cachaauru coaraa Jesusone jana, beraicha colane nena carenerocuru rijijieein aihuruhane jaun jetao, cairichaojoaain acaauru coaraane jaun, ecu araai laurii niicha coitucui que relanajae Jesuso. <sup>35</sup> Nii jana inae sohane jaun jetaote, rohan nichuuntaain:

“Inae soha. Coatihane nihei caa jana cacha. <sup>36</sup> Chajaain cachaauru rai nocoeete ichuun nenacaauru nenaana-jauru, neseuru, naaonjoainuri cuhin, chaelai lenone ariin coretiha cuuruhane,” naauruha aina nerelanacaaurune jana jetaote:

<sup>37</sup> “Niriimiin. Chajaain acaauru coroaateeuhe inara,” naa Jesusone jana jetaote,

“Aihana jaunna, coroata fashai denario coreneein faan coretiha cuhacaanune jeree, acaauru coroaatichaachene coina,” naaure Jesuso rai aina nerelanacaauru. Nii le denariote le jiichoo amihanenaa core ne. Niritocuruha aina nerelanacaaurune jaun jetaote:

<sup>38</sup> “Inatajaain faan siriquiche. Chajaain coanihuhe,” naa Jesusone jaun, coaraain jetaote, “Saoquijieein faan, ita que jerajeein ate, naajeeichate neeje,” naaure jetao aina nerelanacaauru.

<sup>39</sup> Nii jaun jetaote, joaenreen omane ichoae nelauriaauruha cachaaurune coina aitha Jesusone jaun jetao, <sup>40</sup> tabaauru le fashaain, tabaauru saoqui chooncaain, naaonjoaain neleruhin nelauriaaure cachaauru. <sup>41</sup> Nitohaneein laurianaacane baiha jetaote, nii saoquii faan aina coroatajai ate raoriin jabaaequiin dede coarajeein jetao, Cana Coaunera bajaain cataaun faan taturiin aina nerelanacaauru rai te jetao Jesuso, cachaauru rai chaluuruhane coina. <sup>42</sup> Nitohaneein jetaote, jerecuruhane jaan tiajoaain nainaan lenonecuruhane baiha, <sup>43</sup> lechoonca coroata omariin, nii faan aina ate caute que omari memoaure.

<sup>44</sup> Saoqui oaraancai cachaauru jetaote, nii saoquii faan que lenonecure, acaauru rai faa Jesusone jaun.

*Acau choaae amuha Jesusone*  
(Mt 14.22-27; Jn 6.16-21)

<sup>45</sup> Nii baiha jetaote, aina nerelanacaauru letoae, bote cuhane fauhin nemuri jerau Betesaaidau ichoaichaniha tuuruhane caina. Nii tonohanau jetaote, ecu nedaain cachaauru rai necoe Jesuso. <sup>46</sup> Inae cachaauru rai nocoihane baiha jetaote, ichatane ucuuno que cuhin Cana Coanera bajaa cue. <sup>47</sup> Nii jana jetaote, inae nocohejihane jana, nemuri cataaun cuujueure nii aina nerelanacaauru bote cuhane. Nii jana jetaote, ecu jelai atane choae jaiti nihane jana, <sup>48</sup> acaauru que tacaain uha cujuanane jaun, necairichajein taraacajein cujueuruhane coaraje Jesuso. Nii jana inae janohe lalajihane jana jetaote, acaauru caaijie acau choae cuhin acaauru rohan situha cunaa rijijiein acaauru nichae cuujue. <sup>49-50</sup> Nitohanein acau choae cuujihane jana, satiin coaracuruhane jaun jetaote, nesoonetiin anucainiha bein auhaacure. Nii rijieoritiin jetaote, acaauru rai:

“Jiaonriha inacojoein nesoonetiin casiichene. Canune aihunra,” naain, <sup>51</sup> acaauru aina bote cuhane fauha Jesusone jana jetaote, inae nesuruha cujuanane jaun, jataain cojoe-latoore, <sup>52</sup> nii cojoelanaacojoaain faan faain acaauru notaa-cane sainejein itolere ichana nainihane que nainaelanaala, “Naaonjoanne jaunte catohanai ichae,” naain coitucunaa nainecurenihane jaun.

*Genesareta bataneu turuhin cunaitenacaauru rautaa Jesusone*  
(Mt 14.34-36)

<sup>53</sup> Nitohanein cuhin nemuri jera jaaoruhane jaun jetaote, Genesareta bataneu turuhin, ecu acaauru bote jauriaain cositeeure. <sup>54</sup> Inae bote cositeein caje inihuruhane rijie-oritiin jetaote, Jesuso nihane coitucure nii cocoaichacuru cachaauru. <sup>55</sup> Nii jaun jetaote, satiin nii jelai batane sacuritaain nii niha Jesusone jaan jelai coitucuhin jetao, rene cunaitenacaauru amaure ela cuhane tijichanajaain. <sup>56</sup> Chunijihun nenaanajaaunru, neseeuuru, berooru cuhane, naaonjoainu cuha Jesusone jaanru jetaote, najiniha situ-najaaunru jelon ela choae cunaitenacaauru tein, Jesuso rai aitocure, cajione auha mucuuruhane caina. Nitohanein satiin Jesuso cajione mucuurera cunaitenacaauru jetaote, nerautaacoaure.

## 7

*Baasoneein cacha ichao tera*  
(Mt 15.1-20)

<sup>1</sup> Nitohaneein jetaote, Jesoso coaraa cuure Jerosaleeun caje turunacaauru Moisesa aitoonjoan que cacha relaaureerauru aina fariseeocuru. <sup>2</sup> Acaauru jetaote, aihuruhalu acaauru inoaensihurune rijijieein acaauru rai rauhi tonoraelanaala lenonecuruhane ajiniha biji culejelanaala lenonecuruha Jesoso aina nerelanacaauru tabaaaurune coaraain jetao, acaauru que ereeure. <sup>3</sup> Nitohaneein aihuruhalu acaauru inoaensihurune rijijieein ichaaoruha fariseeocuru aina satiin Jorioocurune jaun jetaote, lenonecuruhane ajiniha biji culejeein lenonecure itolere bana. <sup>4</sup> Jerichanejeein jetaote, lenone arihuruhane caje turuuruhane nii aitoha acaauru rai rauhine rijijieein biji culejeein lenonecure. Nitohaneein jetaote, araai lauriin ne acaauru ichao, lenonecuruhane ajiniha acau cooruhane jaan curu niha natiin culejeein, acau curu culejeein, coadarojoe culejeein, acaauru sininaja jelai niha natiin culejeein, naaonjoaauruhane jaun.

<sup>5</sup> Nitohaneeuruhane jaun jetaote:

“Chanuna nii aitoha rauhine rijijieein aihuruhalu cana inoaensihurune rijijieein, lenonecuruhane ajiniha biji culejeein lenonecurene ii aina nerelanacaauru,” naaure jetao Jesoso rai Moisesa aitoonjoan que cacha relaaureera aina fariseeocuru.

<sup>6</sup> Nii jaun jetaote acaauru rai:

“Esinae rauhijiriinte, inara que aitiin laenaelu Cana Coaunera ere bera inoaensi *profeta* Isaihasi, nechu jataain nohaniha Cana Coaunera coitucutoha nocoenacaauru.

Nii que aitiin:

‘Caa cachaaaurute,  
nechu jataain nujuaaecha que  
canu coroajeein neeure.  
Nete acaauru suujua,  
cacaje coriaae ne.

<sup>7</sup> Nii jaun

nii chaque nelatejeehai  
netaojiaain  
canu coroaecuruhane,  
nechu jataain  
caitoonjoanelanaala nena que  
nejesinajeein ita relajeein  
aihuruhane jaun,  
naa Cana Coaunera acaauru quene laenaelu *profeta* Isaihasi.



<sup>8</sup> Chanuna nitohaneein Cana Coaunera aitoonjoan que jaolecohin inara inoaensihuru rijijieein ichaonaa jeriquiche inara,” naa acaauru raine baiha jetaote:

<sup>9</sup> “Itolere bana inara inoaensihuru ichao rijijieein ichaonaa jeriquichene jaunte, Cana Coaunera aitoonjoan que jaolecohin aohana jereneeiche.

<sup>10</sup> ‘Inara inaca, inara neba, naaonjoainuri que inara suujua acateein neeuche.

Chateeinti  
baasoneein neba, inaca,  
naaonjoain que ereein ne.

Niite ateinanohiniha cureein,’  
naelu jetao Moisesa. <sup>11</sup> Nete inara aitocoiche, leinjiin cache, rai inaca, neba, naaonjoain rai. ‘Coatiha inara rai cha tenaa nainihaaun, satiin quiicha sirii corban neein nihane jaun,’ naane caohachae inara rai. (‘Corban,’ naane jetaote, acaauru ere cuhane, ‘Cana Coaunera que banijiaain nenea,’ naa aite.)

<sup>12</sup> Chaen techu, inara rai caohachae, inae niritiin erei cache, rai inaca, neba, naaonjoain rai chaelai tenaa nainenihane que aitocoichene.

<sup>13</sup> Nitohaneein inara inoaensihuru ichao sacuhin neeichene jaunte, Cana Coaunera aitoonjoan tonorana jerelanaala itajeein neeiche, nejesinajeein jelaacha que ita relaain neeichene jaun,” nae jetao Moisesa aitoonjoan que cache relaaurera aina fariseeocuru rai Jesoso.

<sup>14</sup> Niritiin jetaote, nacoaauneein nii ecu nenacaauru cachaauru cotijiaain jetao:

“Satiin caa ena inara rai aitocooaunne jaan aonaain coitucuche. <sup>15</sup> Coatiha joaereen lenone quiha cachane coreniha que jaolequiin nihei Cana Coaunera. Leeochaauru cairichanaa jerenacaun, suujua cuhane baasoneein coacuhin baaso ichaeraauru quete laen jaolequiin ne Cana Coaunera. <sup>16</sup> Esinae rauhijiriin urichocoichene aonacuche,” nae jetao acaauru rai Jesoso.

<sup>17</sup> Niritohane baiha ecu cachaauru ratiriin loreri asae enoha cuha Jesusone jana jetaote, nii cachaauru relaane jaan bajaure caje aina nerelanacaauru. <sup>18</sup> Nii jana jetaote:

“Tana inara netonai aonaain coitucuhichene. Tana joaereen lenone quiha cachane coreniha que jaolequiin neniha Cana Coaunerane coitucuhichene. <sup>19</sup> Nii cachaacha qui lenonete, nii cache suriicha cuhane enohin, nii baiha mitue, suujua cuhane enoelanaala,” nae jetao.

Niritiinte, joenreein lenone quiha cachane niha natiin, que jaoleconaa nainenihane Cana Coaunerane coitucuerate

cana que Jesoso. <sup>20</sup> “Cacha suujua caje mitunaa baaso ni-icha coacui, niicha ichai, naaonjoain corenihate laen, cacha que jaolequiin ne Cana Coaunera. <sup>21</sup> Nitohaneein suujua cuhane baasoneein coacuin baaso ichaeraaurute, namute quicha aina niha natiin ichao jeracohin, asijiauharitiin, son-ajaain jaohin, <sup>22</sup> sinijeranelanaala nena e ne aina ichaohin, laurijira rucuhele jereein, namute cacha cairichanaa jerenacaun que ereein, namute cacha coritaain, itolere ni-icha jerei nejesina ichaain, necoelajauharitiin, namute cacha cairichaa casajenetiin, namute cacha que necohasitaain, suujua coaraain chaachaelanaala, naaonjoaunre. <sup>23</sup> Niichurute satiin cacha suujua caje mituhin cacha que jaolequii niha Cana Coaunerane jaan teraneein ne,” nae jetao acauru rai Jesoso.

*Leinjiin Jorio nihei cacunu rautaa Jesusone  
(Mt 15.21-28)*

<sup>24</sup> Inae cachaauru relaane nainain jetaote, jelai caje coaaneein Tiro bataneu turuha cue Jesoso. Nejetaote, ecu turuhin leinjiin loreri asae enoe, coitucuruha jelai cocoaichacurune jerelanaala. Nii sainejeein jetaote, ecu turuhin nihane coitucurihure. <sup>25</sup> Nii jaun jetaote, inae ecu nihane coitucuhane jaun, rene turuhin Jesoso acatiha neseeonriaa cue leinjiin ene, suujua cuhane moconajaera letono coitucuchuhi siriha rai cacunune jaun. <sup>26</sup> Nii ene jetaote, Jorio niheichuru Sirofenicia batane cocoaichacuru bene ne. Aca jetaote, Jesoso rene turuhin conujue cacunu suujua cuhane nena moconajaera letono coitucuchuhi sitaane coina. <sup>27</sup> Nii jaun jetaote:

“Coa canu rohecaa. Naininaaun Cana Coaunera cachaneein nenacaauru que banijiaain nena ruluhin tihanu remaae raine,” naa rai Jesusone jana jetao:

<sup>28</sup> “Aihachuhisi niquicha Curuaanaa. Atiin ii araachuru Joriocuru rautaa ine rijijieein canu cacunu rautaa ine jereein unra. Remaae rijijieein canacaanu coaraaine niha natiincha,” naa Jesoso rai nii enene jana jetaote:

<sup>29</sup> “Aihachuisi. Esinae rauhijiriinte aitoi. Inae ii cacunu caje mituhin amuha moconajaera letono coitucuchuhi. Inae nainein jelaiha chenenajaun cauha cuhinera,” naa Jesusone jaun, <sup>30</sup> nenajaun cauha cuhane jana jetaote, loreri asaae sininajaun niha nii cacunu ranunane jana eruha cue nii ene. Nejetaote, inae nii ranuna suujua caje mituhin amue moconajaera letono coitucuchuhi.

*Urichoelanaala, raotiin eresilanaala naajoaain nena cacha rautaa Jesusone*

<sup>31</sup> Nii baiha jetaote, nacoaauneein Tiro batane jelai caje amuhin, Sidoon batane, Decapolis batane, naaonjoainuri nenacaauru neseeuuru ichoae rauhijiriin situhin nitihonohin cuhin jetao, Calillea conemuri turue Jesuso. <sup>32</sup> Nitohaneein inae ecu turuhane jana jetaote, rene leinjiin urichoelanaala, raotiin eresilanaala, naaonjoaain nena turuaain jetao, biji que dadaain nii cacha rautaane coina rai aitocure. <sup>33</sup> Nii jaun jetaote, jelai cachaauru udaa nii cacha amaain jetao, nuricho jachuuru cuhane biji couturichuru enoaain, lune soriin lele ichoae teein, <sup>34</sup> ecuun jabatoroaain dede coaraain neraain jetao: “Efata,” naane jetao: “Najachuu,” naa aite Joriocuru ere cuhane.

<sup>35</sup> Niritohane rijieeoritiin, inae najachuha nurichone jana jetaote, inae raotojoein erenaa naine rai lele netonai. <sup>36</sup> Nitohaneein rautaain jetaote niqwi, nii chuni rai beeuruhane caohate Jesuso. Nejetaote, jataain beeuruhane caohatiha sainejeein jataain que naurutaain beure. <sup>37</sup> Nii caje coitucuhin jetaote: “Itolere banate caohacha ichae, uricho saecuru niha natiin urichohin, raotiin eresilanaala niha natiin erenaa naineein, naaonjoanne jaun,” naaure jetao cojoelatiin cachaauru.

## 8

### *Jena oaraancai cachaauru rai lenone faa Jesusone (Mt 15.32-39)*

<sup>1</sup> Nii baiha nacoaauneein netaojiaauruha arajiin cachaaurune jaun jetaote, jataain neniha acaauru lenonena jaun aina nerelanacaauru cotijiaain jetao:

<sup>2</sup> “Inae nichata janohinte canu aina neeure caa cachaauru. Jana nihei caohachanainejeein lenonecuruhane jaanu. Nii jaanne jataain cairichaaajoaain acaauru coaraaun.

<sup>3</sup> Coroaatenajaelanaala acaauru nenajaun letoanajaanunete mijitenacaun aterona nainecure, tabaauru coriae caje uuruhane jaun,” naa Jesusone jana jetaote:

<sup>4</sup> “Chaa caje eruhin najian caa jeoni cacha coroaaterichaache, caa jana ichaoha chuni cacha, caje coretichaachene jaanune coaalanaala,” naauruha aina nerelanacaaurune jana jetaote: <sup>5</sup> “Inatajaain najian faan siriquiche,” naain acaauru caje bajaa Jesusone jana jetaote:

“Caaunsinejeinchate neeje faan,” naaure jetao aina nerelanacaauru.

<sup>6</sup> Nii jaun jetaote, atane choae nelauriaauruha cachaaurune coina aitiin jetao, jerane biji que nii caaunsini faan mucuhin Cana Coaunera bajaain, cataaun nii faancuru tathin aina nerelanacaauru rai tiha Jesusone jaun jetaote, jitariin nii cachaauru rai chaluure. <sup>7</sup> Nii jana niha coroatajajeein ate

netonaine jaun jetaote, acaentonai mucuhin Cana Coaunera bajaain nii ate nemaajeein chaluherate Jesoso. <sup>8</sup> Nitohaneein nainaan lenonecuruhane baiha jetaote, caute que caaun-sineein omari memooaunre. <sup>9</sup> Itolereneein jena oaraancai cachaauru jetaote, lenonecure. Nii baiha jetaote, acaauru rai necoein, <sup>10</sup> aina nerelanacaauru aina bote cuhane fauhin jetao, Dalmanotau bataneu cue Jesoso.

*Cojoelanaacojoai ichaa Jesusone coina aitocuruha fariseeocurune*

*(Mt 16.1-4; Lc 12.54-56)*

<sup>11</sup> Nitohaneein jetaote, Jesoso rene turuhin aina ereeu-ruhane baiha jetao, nechu jataain coujuha, Cana Coaunera letononeein unaa nihane coaratihia acaauru quene coina cojoelanaacojoai ichaane coina rai aitocure fariseeocuru.

<sup>12</sup> Nii jaun jetaote, jataain mijiaaineein nerai raain jetao:

“Chanuna acaauru rai cojoelanaacojoai ichacaaunne coina aitocure caa cachaauru. Coatihia nii acaauru que chatohanai cojoelanaacojoai coaratenaa nainihaaun,” naane jaun jetao, <sup>13</sup> ecu acaauru ratiriin jeelaiha bote cuhane fauhin nemuri jerau cue Jesoso.

*Faan jorerera lebadora rijiicha fariseeocuru ichaone*  
*(Mt 16.5-12)*

<sup>14</sup> Nitohaneein jelai caje bote cuhane fauhin amuuruhane jaun jetaote, rai nachano baiteein leinjiin faancha amaa in cuure. <sup>15</sup> Nii jana jetaote, acaauru nainalaaca jetao:

“Aonacuche. Faan jorerera lebadora rijiicha fariseeocuru aina Erodesi ichaone que caohachaa in nainacuche,” nae jetao aina nerelanacaauru rai Jesoso.

<sup>16</sup> Niritoha acaauru rai Jesusone jana jetaote, neniha acaauru rai faanne que nejesinajeein ita rai ereeuruha aina nerelanacaaurune aonajeein jetao:

<sup>17</sup> “Chanuna faan sirineeichene que ereereequiche. Jataain nachura nainanachara nejeein coitucuneeichete. Jataainte asoneeojoaain nainanachara nejeeiche. <sup>18</sup> Niha niqui inacoojoein inara nota, inara uricho, naaonjoaain. Nete nii cha coaraain, cha aonaain coitucunaa naineneeiche. <sup>19</sup> Saoqui oaraancai cachaauru rai saoquii faan chaluhanune bana, inata omariin caute raachelu,” naa Jesusone jana jetaote:

“Lechoonca coroata omariin,” naauruha aina nerelanacaaurune jana jetao:

<sup>20</sup> “Chajana jena oaraancai cachaauru rai caaunsini faan chaluhanune bana, inata omariin caute raachelu,” naa Jesusone jana jetaote:

“Caaunsi omariinee in,” naauruha aina nerelanacaaurune jaun jetao:

21 “Nii saiijeein nachura jaiti nainaeneeichete,” nae jetao acaauru rai Jesoso.

*Betsaaidau leinjiin maosa rautaa Jesusone*

22 Nitohaneein cuhin Betsaaida turuuruhane jana jetaote, Jesoso rene leinjiin maosa amaa in rautaane coina conujee-unre cachaauru. 23 Nii jaun jetaote, biji que nii maosa mucu-uriiin jelai cachaauru udaa amaa in jetao, lune que jerane nii maosa nota rujuarujuariin nichoae biji teein: “Inae chaelai coana naineei,” naa Jesusone jana 24 nenotaain jetaote:

“Nuna tocohaneente murimurihonanae carai cachaauru,” naa nii maosane jaun jetaote, 25 nacoauneein jerane nota ichoae biji tiha Jesusone jana, nacoauneein nota jirichaane jana jetao, inae conoha notane jaun, caohachaa in cha coarae nii maosa. 26 Nitohaneein rautaa in jetaote, rai nenajaun letoaa in jetao:

“Coa taa neseu cauha,” nae rai Jesoso.

*Mesihasi niha Jesusone que aitoha Fedorone*

*(Mt 16.13-20; Lc 9.18-21)*

27 Nii baiha jetaote, Filipino batane que nena Sesareea nenacaauru neseuru cue jetao, aina nerelanacaauru aina jini-iquiin Jesoso. Nitohaneein bero cuhane aina nerelanacaauru aina cuujeeurunajau jetaote:

“Tonacuruha canu que cachaauru. Cha nichaaunje,” naa Jesusone jaun jetaote:

28 “Tabaauru cachaaurute Joaan Baotisita niha ii beure. Jana leeochoaurute, inoaenlu nena Cana Coanera ere bera *profeta* inoaensi Eliasi niha ii beure. Leeochoaurute, inoaenlu nenacaauru *profetacuru* tabaauru niha ii beure,” naauruha raine jaun jetaote:

29 “Cha nichaaun jana inara rai,” naa acaauru rai Jesusone jaun jetaote:

“Iite nii canacaanuhacha cohajei Mesihaseein,” nae jetao rai Fedoro.

30 Nejetaote, chuni rai acaneein nihane beeuruhane caohate jetao Jesoso.

*Orichaa ine biha Jesusone*

*(Mt 16.21-28; Lc 9.22-27)*

31 Nii caje nunuhetein jetaote: “Canu Cana Coanera Calao hi cachaneein nejanoanaa nichaaunne cairichaaeriinte caque jaolecohin niha cuurureein Jorioocuru bichauhenaauru aina saseredotecuru curuaanaacuru, chaen Cana Coanera aitoonjoan que cacha relaa ureraauru, naaonjoainuri. Acaaurute catinaa cuurureein, nena nichata janone cuhane ichanareeunni,”

naain jetao, <sup>32</sup> esinae rauhijiriin cachaauru rai bee Jesoso. Niritiin esinae rauhijiriin suujelanaala aitohane jaun jetaote jelai amaain niritiin irihane caohate Fedoro. <sup>33</sup> Nejetaote niritoha Fedorone jaun, jaotoroain nii aina nerelanacaauru coaraain jetao cotaicha rijitiin: “Coa carerojoecaa moconajaera. Cacaje amuun. Coatiha Cana Coauneraacha coacui coitucuheeii. Joaareein cachaauruhacha coacuhite coaauqui,” <sup>34</sup> naane baiha jetaote, nii aina nerelanacaauru aina ecu nenacaauru cachaauru cotijiaain jetao:

“Aonacuche. Chunocoha canu cachaneein nenea jerihane suujua letono ichana jerihane jianein, coroso que canu tein canu cairichaaaururichaaaine rijijieein necairichanaa abaantaain caitoonjoa tonoraain, jerichaaunne rijijieein neeine. <sup>35</sup> Chunocoha canuhacha icharatei ichaelanaala neein nichao ichoteratena jerera, coatiha nichoterinaain. Nete laen canu coreniha, canuhacha beratei bihane coreniha, naajoain coreniha nichao itajera, ichoteratenojoiniha cureein. <sup>36</sup> Chaquena rai nelatere, itolere caa chauratane que nenaacha que coacuhin rai nichao itajiha cachane. <sup>37</sup> Nitohanihane jaun inaaonjoaain coretihane niha natiin nii nichao ichoteratena nainiheii. <sup>38</sup> Nitohanihane jaun, chunocoha canu nichaaunne been quiicha beratenojoin biha caa necha aansaneein osaaonacaauru cachaauru raine que nocoejihanena, canucacha calaohi nichaaunne inae que tihane bana canu Inaca necaohacha que necohachaaain rai letonocuru anjeraauru aina nacoaauneein turuha uhanune banane canuhetonai que necoejereeunni,” nae jetao acaauru rai Jesoso.

## 9

<sup>1</sup> Niritiin jetaote:

“Esinae rauhijiriin coatiha oorurinaain cau ena canu aina nenacaauru tabaauru, niicha ichaneni ichaaain turuha Cana Coaunera Cojoanonaane coaracuruhane que tiaain,” nae jetao acaauru rai Jesoso.

*Nejelauneein ocooca Jesoso jaberocone*  
(Mt 17.1-13; Lc 9.28-36)

<sup>2</sup> Saota janone baiha jetaote, ichatane ucuuno cue Jesoso, Fedoro, Saantiaao, Joaan, naaonjoainuriicha amaain. Inae ecu turuuruhane jana jetaote, acaauru notaracaae nejelauneein ocooca Jesoso jaberocone jana jetao, <sup>3</sup> jataain caohatiin bichoronohin cajione amurijiriin somajaain jiquihaquiin nedae rai cajione. <sup>4</sup> Nii jana jetaote, ecu Jesoso aina ecocohin ereeuruha inoanlu nenacaauru Cana Coaunera

ere bera inoensihuru, Irihasi, Moisesa, naaonjoainurine jana coarajeeure.

<sup>5</sup> Nii jaun jetaote,

“Cacha relaera, jataainte caohate cau nihacachene. Coanete nichatajaain loanari jaacache, leinjiin ii rai, leinjiin Moisesa rai, leinjiin Irihasi rai, naaonjoain,” nae jetao Jesoso rai Fedoro.

<sup>6</sup> Jataain nesooneetooruha nii Jesoso aina cunacaauru, aina nerelanacaaurune jaun jetaote, nii tonaain irihane jaa coitucuenihane jaaun aite Fedoro. <sup>7</sup> Niritohane jana acaauru conaacotaa dede sacarine jaun jetaote, nii dede sacari jana tonii: “Caate jataain quiicha belaa canuhacha letoai canu Calaohinera, nere tonoraain neeuchera,” naa erenaane jana jetao aonajeeure. <sup>8</sup> Nii rijieeoritiin roaichu coaracuruhane jana jetaote, inae acaauru rohan neniha chunine jana jetao, ecu jelai acaauru aina niha Jesusone jana coaracure.

<sup>9</sup> Nitohanein jetaote, nii ichatane ucuuno caje jelaiha faaujeein, nii niicha coaracuri beeruha chuni rai nii aina nerelanacaaurune caohate Cana Coaunera Calaohi Jesoso, inae o caje ichanaane baiha beeuruhane coina. <sup>10</sup> Nii jaun jetaote, suujuaacha cuhane nii niicha coaracuri ruheecure, oo caje ichanarihanine que aitothane coitucuenihane jaun ita caje bajaabajajeein. <sup>11</sup> Nii jaun jetaote:

“Chanuna jauriaanejeein Irihasi tururichaaine que aitocure- Moisesa aitoonjoan que cacha relaaaureraauru,” naain Jesoso caje bajaauruhane jana jetaote:

<sup>12</sup> “Esinae rauhijiriinte niqiu, itolere rucueraanu que jauriaanejeein tururichaain Irihasine que aitocurelu. Chanuna jana Cana Coaunera Quiricha inoensii cuhane cacha Calaohineein nena cairichanojoneein, jaoleneein niha curichaaine que aite. <sup>13</sup> Aonacuche. Inae turuha uhalu Irihasine janate, que niicha jerei ichaain cairichaaurelu, nitohanihane coina Cana Coaunera Quiricha cuhane aitiin laenanohinihane rijijeein,” naain jetao tonoraie Jesoso.

*Moconajaera letono coitucuchuhi siricha leinjiin enamanaa rautaa Jesusone*

*(Mt 17.14-21; Lc 9.37-43)*

<sup>14</sup> Inae jelaiha nii neeuruha aina nerelanacaauru leeochoaurune jaaun turuuruhane jana jetaote, ecu acaauru aina neeure arajiin cachaauru. Chaen Moisesa aitoonjoan que cacha relaaurera tabaauru netonai ecu neein jetao acaauru aina ereereecure. <sup>15</sup> Nii jana uujiha Jesusone coariin jetaote, que tacaain satiin jeluhariin cuhin jetao, jataain cojoelatiin rai iriha cuure. <sup>16</sup> Nii jana jetaote, acaauru rai:

“Tonaai acaauru aina ereereequiche,” naain acaauru caje bajaa Jesusone jana jetaote:

17 “Cacha relaera, coaraaine coinane, cau ii rene canu calaohi uhaaun, moconajaera letono coitucuchuhi siriha suujua cuhanena jaun, erenaachara neein nihane jaun. 18 Nitohanihane jaunte, chunjihun cuhane jaaunru baasoneein mucuhane nainein atane choaae tocojoaain tacaain, nujuae caje lajaaqui mitaain, catu rihoneein, sefetaain te nii suujua cuhane nena coitucuchuhi. Nii jaunne niqui ii aina nerelanacaauru rai aitoon nii suujua cuhane nena coitucuchuhi sitaauruhane coina. Nete sitanaa nainesihurene,” naa nii acaauru jana nena leinjiine jaun jetaote:

19 “Jataain cha esenetaaichuru cachaaauru. Cha carajaneinna inara aina nereeeun. Cha carajaneina inara abaantareeun. Chajaain cajiha nii enamanaa uhaauche,” naa acaauru rai Jesusone jaun jetaote, 20 Jesoso rene nii enamanaa amaare. Nii jana Jesoso coariin jetaote, atane choae nii enamanaa siheite nii suujua cuhane nena moconajaera letono coitucuchuhi. Nii jana jetaote, najaabu jabubuhin nujuae caje lajaaqui mitujuae nii enamanaa. 21 Nii jana jetaote, nii enamanaa inaca rai jetao:

“Chabana caje coauneein caa catohane,” naa Jesusone jana jetaote:

“Causine caje coauneente aicha. 22 Nii jaunte araai saain usihanaauru comaaichuru, acauhanaauru comaain ateinana jere nii suujua cuhane nena coitucuchuhi. Nitohanihane jaun, atiin cairichaojoaain canacaanu coaraain, canacaanu coroatajaneun, rautana naineine,” naa nii enamanaa inacane jaun jetaote:

23 “Tana rautana nainichaaunne esenetaainete cacaje bajaai. Satiin quesenetaera raine niicha bajai ichaain neeun,” naa Jesusone jaun jetaote:

24 “Jataainnachujian chesenetaaun. Cacorataaneune jataain jelai amuritoheriin chesenetaera,” nae jetao ehequiin nii enamanaa inaca.

25 Nii jana arajiin netaojiaauruha cachaaaurune coaraane jaun jetaote, nii enamanaa suujua cuhane nena moconajaera letono coitucuchuhi rai jetao:

“Erenaachara neein urichoelanaala caa enamanaa tera coitucuchuhi, canune ichei aitoon caa enamanaa jianein caje mituhin amuhine coina. Jiaonriha nacoaunein caa enamanaa suujua cuhane enohine,” naain suruaa Jesusone jana jetaote,



<sup>26</sup> nacoaauneein baasoneein nii enamanaa jaberoco tein cojioriae nii suujua cuhane nenea coitucuchuhi. Nitohaneein tihane baiha onaa rijijieein tein, caje mituhin amuhane jaun jetaote, “Inae baasoneein jaberoco tihane caaunte jerihane inae ohe,” naure nii ecu arajiin neein coarajeeurera cachaauru. <sup>27</sup> Nejetaote, biji que mucuhin michuha Jesusone jana jetao, nimichuhin nichaaurae nii enamanaa.

<sup>28</sup> Nitohanihane baiha aina nerelanacaauru aina jiniiquiin leinjiin loreri asaae enoha Jesusone jaun jetaote, jelaí ecu teteriin:

“Chanuna canacaanu nii coitucuchuhi sitanaa nainesinihacaanu,” naain caje bajaauruhane jana jetaote:

<sup>29</sup> “Catohanai moconajaera letonote nainichaa Cana Coaunera bajaacane ainaacha sitaacane,” nae jetao acaauru rai Jesuso.

*Caa quete coroata sae ohane biha Jesuso.*

*(Mt 17.22-23; Lc 9.43-45)*

<sup>30</sup> Nitohaneein nii canaanai rautaane jaan jelaí caje amuhin jetaote, Calileea turuhin rauhijiriin situujueein cuujeure. Nejetaote, nii acanihane coitucuha chunine jerene Jesuso, <sup>31</sup> aina nerelanacaauru relanaa nainihane caina. Nii acaauru relaane jaun jetaote:

“Cacha Calaohineein nenaate cachaauru bijiu tenojoinihane jana ateinaa cuurureein. Nete nichata janohane baiha ichanareein,” naain aina nerelanacaauru relaane jana jetaote, <sup>32</sup> nii acaauru rai aitohane inaaureniha natiin jetao caje bajaurene necoatocuruhane jaun.

*Charijina jataain nelateinnein nere*

*(Mt 18.1-5; Lc 9.46-48)*

<sup>33</sup> Nitohaneein cuhin, inae Caferenaanon turuhin loreri asaae enooruhane jana jetaote, aina nerelanacaauru rai jetao:

“Chaaque ita rai ereerejeein uhicheein bero cuhane,” nae jetao acaauru rai Jesuso.

<sup>34</sup> Nejetaote inauheneecha curuaaequuin aonajeure, bero cuhane uujueein, “Charijina caa cana jana jataain nelatein nenaane,” naauruha ita raine jaun. <sup>35</sup> Nitohaneein inauheneecha aonajeuruhane jaun jetaote, nelauriariin nii aina nerelanacaauru lechoonca coroatajai cotijiaain jetao: “Leeochaaauru amurijiriin nenea jeriha chunine, acaauru rai nelatein itolereneein acaauruhacha jerei icharaneein neeine,” <sup>36</sup> naane baiha jetaote, biji que leinjiin canaanai mucuuriin acaauru cataaun tein jetao:

37 “Canu coreniha caa canaanai raerate, jerichanejeein canu raane rijijieein aicheein. Nii jaun canu raera coatiha canuhacha raa airinaain, caletoaera Ofa netonai raate aicheein,” nae jetao aina nerelanacaauru rai Jesoso.

*Canaacha ichai ichara, coatiha cana que nejeratenaa nihei.*  
(Lc 9.49-50; Mt 10.42)

38 Nii jana jetaote:

“Cacha relaera, ii curuaa aina cuaain moconajaera letono coitucuchuhi sitaain que suujuequiin nenacaauru rautaa leinjiinne janane eruhin caohatihacaanu, cana jana nenaaneein ainihane jaun,” naa Joanne jana jetaote: 39 “Jiaonriha caohateein neeichene. Chunocoha canu curuaaneein netiin cojoelanaacojoai ichaera, nii baiha baasoneein erenaa nainihei canu que. 40 Canaacha ichai ichara, coatiha cana que nejeratenaa nainihei. 41 Chunocoha canu Curisito cachanequichene coreniha inara rai esinaeca niha natiin terate, esinae rauhijiriin rai cainanohiniha cureein,” nae jetao rai Jesoso.

*Jataain alalacaraa osa que nesarucuaane*  
(Mt 18.6-9; Lc 17.1-2)

42 Niritiin jetaote: “Chunocoha ena canu esenetajeeureraauru saruha osa quenete, nii ajiniha caohachare nuluno que leinjiin ajeri jaberoco tijichaaain ichojoaain cucuana cuhane joaeraane. 43 Jana osa que ii saruha ichohiine moloo. Nii amuritoheriintejian caohachare le jerajei ichohii aina Cana Coaunera cojoanonaa que neeine. 44 Nabana le jerajei ichohii coreniha, nii chariji bana nii riano niha natiin ohin, nii usi tabai jacanaachara jana cuhine coataa. 45 Jerichanejeein osa que ii saruha ii tijiane moloo. Nii amuritoheriintejian caohachare le jerajei ii tijia aina Cana Coaunera cojoanonaa que neeine. 46 Nabana osa que ii saruha ii tijiane coreniha nii riano niha natiin ohin, nii usi tabai jacanaachara jana cuhine coataa. 47 Jerichanejeein osa que isharuha inotane, le jerajei inota rocoo. Nenacaeneetejian nii amuritoheriin caohachare le jerajei inota aina Cana Coaunera Cojoanonaa que neeine. Nabana usi que isharuha inotane, 48 nii riano niha natiin ohin, nii usi jacanaachara, naonjoain jana cuhine coataa.

49 Usi jana situnaa rijijieeinte nichoterichaacheein satiin. 50 Nelatiha niqui tebe. Nete inae lenone cotebetenaa nainenihane, inae nii chaque nelatene. Nii rijijieeinte chaque nelateneeiche inara que icharatenohi ichaain, raotojoein ichaauruha leeochoaurune jaan ichaeneeichene,” nae jetao acaauru rai Jesoso

## 10

*Comasai jianiha cachane que cache relaa Jesusone*  
(Mt 19.1-2; Lc 16.18)

<sup>1</sup> Inae Caferenaanon caje amuhin jetaote, aina nerelanacaauru aina jiniiquiin nucuhe Jorodaan auhaniha cuhin, enoto mitu nichajai jelson nena Jodea batane que cue Jesoso. Ecu jetaote, rai netaojiaauruha cachaaaurune jana jetao, nacoaauneein relanajae Jesoso, cachaauru relanaa rautatohane jaun. <sup>2</sup> Nii jana jetaote, rohan nichuuntaain jetao, nechujataain cairichaaauruhane jaanu lera ariha jetao, comasai jianena nainiha cachane bajaure jetao Jesoso caje fariseeocuru tabaauru. <sup>3</sup> Nii jaun jetaote:

“Tonaa inara rai Moisesa, comasai jianiha cachane que,” naain acaauru caje baja Joesone jana jetaote:

<sup>4</sup> “Comasai jianiha cachane coina, jauriaanejeein comasai jianihane jaaque aitiin nena quiricha teeuchete, aina comasai jianemiin cache,” naauruha fariseeocurune jana jetaote:

<sup>5</sup> “Aiha niqui. Nete, nere tonorana jerelanaala neeichelune jaun, nitohaneein ichaquichene rautaenihane saijeein ichaquichene coina aitelu Moisesa. <sup>6</sup> Nete jauriaanejeein itolere coaunaane nunuheneein, quicha, ene, naaonjoain coaunaelu Cana Coaunera. <sup>7</sup> Nii jaaunte, inaca, neba, naaonjoain ratiriin amuhin necoaansaijiae cache. <sup>8</sup> Chaen leinjiin cachaneein nena rijijeein coacuhin, jiniiquiin ita aina neure. <sup>9</sup> Nitohaneein niha cachane coina ichaa Cana Coaunerane jaun, nii comasai jianena nainihe cache,” nae jetao fariseeocuru rai Jesoso.

<sup>10</sup> Inae loreri asaae enooruhane jana jetaote, nii cachaauru relaane jaan bajaure nacoaauneein caje aina nerelanacaauru. <sup>11</sup> Nii jaun jetaote, acaauru rai:

“Comasai jianein leecha ene raerate, osa que nesaruha aicheein. <sup>12</sup> Jerichanejeein techu, osa que nesarureein lana jianein leecha cache que nelanajaane ene,” nae jetao aina nerelanacaauru rai Jesoso.

*Canaanainuru rausiaaeca Jesusone*  
(Mt 19.13-15; Lc 18.15-17)

<sup>13</sup> Nii jana jetaote, acaauru mucuhin rausiaaeca cojiotanaaca Joesone coina jetao, rai canaanainuru amaure acaauru fojiaraauru. Nejetaote, nii canaanainuru amaauruha nii amaaurerane caohateeure nii Jesoso aina nerelanacaauru. <sup>14</sup> Nii rene amanajaaauruhane caohateeuruhane coarajeein jetaote, obajeein jetao:

“Coa carene turuuruha canaanainurune caohatihachete, canu rene turuuruhe. Aihuruha caa canaanainurune riji-jieein nenacaauru raineente ne Cana Coaunera Cojoanona. <sup>15</sup> Esinae rauhijiriin aiha leinjiin canaanaine rijijieein neniha cachane coatiha Cana Coaunera Cojoanona que nena nainerinaain,” <sup>16</sup> naane baiha jetao, jerane biji cuhane nii canaanaihuru raane baiha jetao acaauru mucuhin, acaauru rausiaaeca cojotanajae Jesoso.

*Jesoso aina iriha leinjiin cache coriquihonane*  
(Mt 19.16-30; Lc 18.18-30)

<sup>17</sup> Nitohaneein inae jelai caje amunaa jeriha Jesusone jana jetaote, rene jeluhariin cuhin turuhin jetao, nacatiha neseeriaain:

“Caohachanejei cache relaera. Cha ichareeun charijibana nitajenaachara ichaonaa raotono que nena nainichaaune coina,” naain Jesoso caje bajaa leinjiin cachane jaun jetaote: <sup>18</sup> “Chanuna caohachanejei cache neein canu curuaateei, leinjiin Cana Coauneraachate caohachanejeineein ne. <sup>19</sup> Inae raotojoein Cana Coaunera aitoonjoan coitucuhi: ‘Jiaonriha sonajaain jaohine. Coa ii sinijerane lanaala nena ene aina ichaohin niha. Coa asijiauha. Coa chamute cache cairichanaa jerenacaau chuni cache coacuhin casaje que ereein niha. Chae efojiaraauru ere tonoraain caohachaaain acaauru aina neein,’ naane coitucuhi,” naa rai Jesusone jaun jetaote:

<sup>20</sup> “Aihanu chujian. Canu enamanaca caje coauneeinne jitariin nii naitoonjoan tonoraain ichaaon,” naa nii cachane jana jetaote, <sup>21</sup> jataain cairichaaajoaain coaraain jetao:

“Esinae rauhijiriin, chaque lanaelanaala Cana Coaunera aitoonjoa tonorana jereine, chajaain jitariin nii iicha sirii que necoreteein cairichaaihuru rai tenihun. Nii banaachate, jelai amuritoeriin nereein iicha latei dedeeu. Nii baiha laen canu aina uu,” naa rai Jesusone jaun jetaote, <sup>22</sup> jataain nererojoeaain jelai caje amue inaderaain nii enamanaa, jataain coriquihocane jaun.

<sup>23</sup> Nii jaun jetaote, nii rohan curuacaain nenacaauru cachaauru coaraain, aina nerelanacaauru rai jetao:

“Jataainte caaintate Cana Coaunera Cojoanona que nena jeriha coriquihonane,” naa acaauru rai Jesusone jaun jetaote, <sup>24</sup> jataain cojoelatiin ecu aonajeeure aina nerelanacaauru. Nejetaote nacoaauneein acaauru rai jetao:

“Cacoelaichaauru, jataainte caaintate Cana Coaunera Cojoanona que nena jerichaane. <sup>25</sup> Leinjiin oco jachu cuhane situnaa naineniha leinjiin camechone amurijiriinte,

jataain caaintate Cana Coaunera Cojoanonaa que nena jeriha coriquihonane,” naa aina nerelanacaauru rai Jesusone jaun jetaote, <sup>26</sup> jataain jeelai amuritoheriin naurutaain cojoelatiin jetao, ecu nejesinajeein ita rai jetao:

“Nitohanihane nichotenaa naineriaain chuni,” naauruha nii aitohane aonajeeinne jaun jetaote, <sup>27</sup> ecu coaranaacane baiha jetao:

“Caaintatiin cachaauruhacha coaraite, Cana Coaunera rai caaintajene,” naa Jesusone jaun jetaote: <sup>28</sup> “Canacaanune jitariin canacaanuhacha sirii ratiriin ii sacuhacaanulu,” naa rai Fedorone jaun jetaote:

<sup>29</sup> “Chunocoha esinae rauhijiriin canu coreniha, chaen, cacha ichoteratera caitoonjoan- canu ere beebejeein, naaonjoanne caina, rai loreri, rai nejeraauru, rai fojiaraauru, rai calaohichuru, rai natane, naaonjoain ratirichate, <sup>30</sup> caa chauratane que neein jataain jeelai amuritoheriin lefasha saneein rai loreri, rai nejeraauru, rai fojiaraauru, rai calaohichuru, rai natane, naaonjoainuri siricheein. Cairichaerinojooinein neeuruhane niha natiinte, turuha uheni Cana Coaunera Cojoanonaa charijibana nitajenaachara ichaonaa que niha cuurureein. <sup>31</sup> Ena jataain arajii itolere que nelaetoha nocoetonacaaurute, nii chaque nelatelanaala niha cuurureein. Jana ena chaque nelatelanaala arajiin nenacaaurute, nelateein niha cuurureein,” naain jetao Fedoro tonorae Jesoso.

*Caa quete inae nichata sae orichaainne biha Jesusone  
(Mt 20.17-19; Lc 18.31-34)*

<sup>32</sup> Jerosaleen nichaae cuuruhane jaun jetaote, aina nere- lanacaauru ichoaaichaniha cuujiha Jesusone jana jetao, cojoelatiin cuujeeuruhane jana jetao, nii niritohane que casiin jetao, cuujeeure acaauru caaijie cunacaauru. Nii jaun jetaote, jelai nii aina nerelanacaauru lechoonca coroatajai cotijiaain jetao:

<sup>33</sup> “Inae caa ena coitucuhichene rijijieeinte, Jerosaleen cuujihacache. Inae ecu turunaate, canu inaraacha coha- jei cachaneein nejanoanaa nichaaune mucuhin saseredote- curu curuaanaacuru rai, Moisesa aitoonjoan que cacha re- laaureraauru rai, naaonjoainuri rai caetecuruhane jana, catinanacanejeein nejelau cachaauru Jorionelanaala ne- nacaauru bijihu caetecurureein. <sup>34</sup> Nii janate, chaque necoati- jiaain canu couluneein, canu bisiin catinaa cuurureein. Nena nichata janohane baiha, nacoaaunein ichanareeunni,” nae jetao nitohaneein teeururichaainne que Jesoso.

*Acaauru coroatajaniha Jesusone caina caje bajaauruha  
Saantiaao, Joaan, naaonjoainurine  
(Mt 20.20-28)*

<sup>35</sup> Niritohane jana jetaote, rohan nichuuntaain jetao:

“Cacha relaera, caa ena ichei canacaanuhacha bajaani ichaainene jerichaanu,” naauruha Sebedeeo calaohichuru, Joaan, Saantiaao, naaonjoainurine jana jetaote: <sup>36</sup> “Chatohanai inara rai ichacaaunne jerequiche,” naa Jesusone jana jetaote:

<sup>37</sup> “Canacaanu rai, inae ii Cojoanona necaohacha que neeine bana, ii ajaabiji nichajai que, ii raotono nichajai que, naaonjoaain nihacaanune jaanu ichaainene jerichaanu,” naauruhane jana jetaote:

<sup>38</sup> “Coatiha nohane inaraacha bajai coitucuhin aitohee-iche. Caa necairichanaa abaantarichaaunnine rijijieeinote, necairichanaa abaantanaa nainequiche inara. Chaen noote, nitohanihanune coina cojunacatenohi nichaaunne rijijieein cojunacatenohineein neeiche,” naa acaauru rai Jesusone jaun jetaote:

<sup>39</sup> “Abaantanaa nainichaanu,” naauruhane jana jetao:

“Inarate niqiu, caa necairicharichaaunnine rijijieein necairichanaa abaantaain cojunacatenohineein niha curiquicheein, cojunacatenohineein nihanune rijijieein. <sup>40</sup> Nena laen, canu raotono nichajai que, canu ajaabiji nichajai que, naaonjoaain nelauriaaichene coina inaraacha bajai tenaa naineneun, nii coina inae acaauru que banihateein rucuhenojoneein nenacaauru raineen nihane jaun,” nae jetao acaauru rai Jesuso.

<sup>41</sup> Niritoha acaauru rai Jesusone aonajeein jetaote, Saantiaao, Joaan, naaonjoainuri aina obaaecure nii lechooncaihuri aina nerelanacaauru. Nejetaote, acaauru cotijiaain jetao:

<sup>42</sup> “Inarate raotojoein, Cana Coaunera coitucuhichuru, leeochoaauru amurijiriin nena jereein acaauru cocoinanacai neeuruhane que suujua acateein neeuruha leeochoaurune jereein neeuruhane coitucuhiche. <sup>43</sup> Nete laen nejesinajeein nitohanein nena naineneeiche inara. Nitohanein nena coacuelanaala, nejesinajeein ita coroatajanein neeuche. <sup>44</sup> Jana leeochoaauru amurijiriin nena jerera, leeochoaauru letononeein neeine. <sup>45</sup> Coaracuche nachuhinti canu Cana Coaunera Calaohi cacha caje nejanoanaa nichaaunne canu coroatajaneichene coina tururichaaun. Arajii cachaauru osa caje nichoteein jianacoon neeuruhane coinane, nii coreniha cajabereeo cairichaeratiha uunlu acaauru coroatajaniha,” nae jetao acaauru rai Jesuso.

*Maosanihane caje Bartimeeo rautaa Jesusone  
(Mt 20.29-34; Lc 18.35-43)*

<sup>46</sup> Inae Jericoo turuhin jetaote, ecu basiinjiin neoriin jela caje amuha aina nerelanacaauru aina Jesusone jana jetao, acaauru aina cuure arajiin cachaauru. Nii jana bero auhaniha lauhequiin coriqui bajaa leinjiin Timeeo calaohi cairichei maosa Bartimeeone jaun jetaote, <sup>47</sup> Nasarete coaicha Jesoso nihane aohanriin jetao:

“Rabiriicha foeratei Jesoso, cairichaaajoaain atiin cacoharaau,” naain eheeca nii maosane jana jetaote, <sup>48</sup> arajiin cachaauru, ehequiin aithane caohateeure inauheneecha nihane coina. Nejetaote, que rutaain ehequiin:

“Rabiriicha foeratei, atiin cairichaaajoaain cacoharaau,” naa nii maosane jaun jetaote, <sup>49</sup> ecu inacuhin jetao:

“Chajaain cajiha cotihanihuche,” naa Jesusone jaun jetao:

“Chajaaue nimichuhinte, toon ii cotihara coarae,” naauruha nii maosa raine jaun jetaote, <sup>50</sup> cajione buri rocohitiiin siheetiin ratiriin jetao, Jesoso rene jeluhariin turuha cue nii maosa. <sup>51</sup> Nii jana jetaote:

“Chatohaneein chetichaaunne jereeita,” naa Jesusone jaun jetao:

“Conoha canotanena jereunra cacha relaera,” naa nii maosane jana jetaote: <sup>52</sup> “Inae jataain quesenetaaine jaun inae conoha inota. Inae naineein amuhinera,” naa rai Jesusone rijieoritiin jetaote, inae conoha nii maosa notane jaun jetao Jesoso jiniichaaain bero cuhane cue nii maosa.

## 11

### *Jerosaleeun turuha Jesusone*

*(Mt 21.1-11; Lc 19.28-40; Jn 12.12-19)*

<sup>1</sup> Nitohaneein cuhin, inae Jerosaleen catainaauruhane jaun jetaote, Betafajee, Betania, naaonjoainuri rohan Olibo bichatane turuuruhane jaun jetao, caje coauneein corotajai aina nerelanacaauru letoae Jesoso. <sup>2</sup> “Chajaain taa nita canaacha coarajei neseu cunichuche. Inae ecu turuhicheneete, ecu cositenojoneein teecoha jaiti chuni cacha amunajanelanaala nena asno narejeene jana eruha curiquicheein. Cosi rutuhin uhaaichene jana: <sup>3</sup> ‘Chanuna cosi rutuhin amaaiche,’ naa chunocoha inara raine: ‘Latihana Curuanaane jaaunne raa uhacaanu. Inae enate ichei jelaiha cainaratereein,’ naauche,” naain jetao letoanajae Jesoso.

<sup>4</sup> Nii jaun jetaote cuhin, nii acaauru rai aithane rijijieein bero auhaniha teecoha cositenojoneein acuujua rohan asno narejeene jana, eruhin jetao cosi rutuhin amaaauruhane jana jetao: <sup>5</sup> “Cha ichaquiche inooneein. Chanuna nii asno narejeen cosi rutuhin amaaiche,” naain jetao, acaauru caje baajure nii cuu nenacaauru cachaauru tabaauru.

<sup>6</sup> Nii jaun jetaote, nii acaauru suujuateein letoanajaa Jesusone rijitjoeein nii cachaauru tonoraauruhane jaun jetao, inauheneecha nii asno narejeen amaaauruhane coarajeure. <sup>7</sup> Nitohaneein jetaote, nii asno narejeen ichoae cajione teein jetao, Jesuso rai nii asno amaaauruhane jana jetao, inae rene turuhaauruhane jana nichoae nelauriaain cue Jesuso. <sup>8</sup> Nitohaneein asno ichoae nelauriaain cuhane jana jetaote, najiniha bero cuhane rai cajione buri maririjiacooauruhane jana jetao, leechoaauru elele alo rijijieein nenea ajaena alo raain najiniha bero cuhane maririchure. <sup>9</sup> Nii jana najiniha cunacaauru, caaijie cunacaauru, naaonjoainuri jetaote:

“Raotojoein turuhine Cana Coaunera rijijieein nenea cana Curuaanaa. <sup>10</sup> Raotojoein turuhine Cana Coaunera Cojoanona, cana inoaensihuru foerateraneein nenea Rabiri nefoerate cojoanona. Aihute coreniha raotojoein neeurumiin dedeeu nenacaaurune maajeein,” naaure jetao cojioriin cachaauru.

<sup>11</sup> Nitohaneein Jerosaleen turuhin jetaote, Teenforo asaae enohin, ecu basiijiin neoriin jitariin nasajai coaraane baiha jetao Betaniau cue lechoonca coroatajai aina nerelanacaauru aina Jesuso, inae sohane jaun.

*Inacaelanaala oha uherane coina cojiotaa Jesusone  
(Mt 12.18-19)*

<sup>12-13</sup> Nii cojoanoo Betania caje amuuruhane jana jetaote, niita bero auhaniha niha uhera alone jana coaraain jetao, coaraa cue Jesuso mijiintohane jaun. Nejetaote, inaacane bana rijiu nenihane jaun, ninaa colane nalohacha baejeein ne. <sup>14</sup> Nitohaneein inacaenihane jaun jetaote:

“Inae nacoaauneein inacaeneriquinne jaun, neriaain chuni ii inaa lerata,” naain uhera cojiotaa Jesusone jana jetao, ecu aina neein aonajeure aina nerelanacaauru.

*Teenforo asaae necoretenacaauru sitaa Jesusone  
(Mt 21.12-17; Lc 19.45-48; Jn 2.13-22)*

<sup>15</sup> Inae nacoaauneein Jerosaleen turuhin jetaote Teenforo asaae enohin, nii Teenforo asaae chaelai que necoreteein, chaelai coretiha, naaonjoaain nenacaauru sitaain, atani choae coriqui coreeuruha cachaauru raine jaa rorihurune maajeein lacojoaain jetao, serori que necoretenacaauru rorihurune maajeein lacojoaain, <sup>16</sup> nii Teenforo asaae nenacaen rucuhale enoauruhane caohate Jesuso. <sup>17</sup> Nitohaneein jetaote:

“Cana Coaunera Quiricha inoaensi cuhanete: ‘Cana Coaunera bajaauruha satiin chauratane sacuritaain que nenacaauru cachaaurune jaan colohereineite ne canu loreri,’ naain laenanohineein ne. Nete asijiaauruhane jaan



coloheri rijijieein teeiche inara,” naain jetao ecu acaauru relae Jesoso.

<sup>18</sup> Niritiin cachaauru relaane aonajeein jetaote, Jesoso sohin jaonaa coaucuruhane jaun, sohin jaaoruhane jaanu lera arihure saseredotecuru curuaanaacuru, Moisesa aitoonjoanque cacha relaaureraauru, naaonjoainuri. Ne jetaote, sohin jaaoruhane coasichure, nii acaauru relaa Jesusone jaan rautatiin aonajeeuruha satiin cachaaurune jaun. <sup>19</sup> Inae nocohecane jana jetaote, aina nerelanacaauru aina jiniiquiin nii nese caje amue Jesoso.

*Inacaelanaala oha uherane*  
(Mt 21.20-22)

<sup>20</sup> Nii cojoanoo janone nii uhera rohan situha cuuruhane jana jetaote, inae cojoaisi aina curuaaequiin oha nii uherane jana coaracure. <sup>21</sup> Nii jaun jetaote, cojiotaa Jesusone coacuhin que nainain jetao:

“Cacha relaera, inae raca cojiotaaine jaunte, inae ohe taa uhera. Coaraau nachuhinti,” naa Fedorone jaun jetaote:

<sup>22</sup> “Jataain Cana Coaunera esenetaauche. <sup>23</sup> Chunocoha esinae rauhijiriin airichaainne esenetaain nii batoelanaala: ‘Niilai caje nefaruhin cucuana cuhane cunihun,’ naa caa ichatane ucuuno rainete, esinae nii aitohane rijijieein aihane ne. <sup>24</sup> Nitohanihane jaanne inara rai aitoon, inaraacha latei eruhichene coina Cana Coaunera bajaaiiche, inara rai terichaaaine esenetaainete eruriquicheein. <sup>25</sup> Inara rai chatohanai cotainacai ichaain neeuruha inara amute cachaaurune niha natiin, acaauru que inara suujua acateein Cana Coaunera bajaaiichene bajaaiuche. <sup>26</sup> Aihute baaso ichaain osa que nesaruquichene niha natiin inara osa que suujua acatemiin cana Inaca dedeeu nena Cana Coaunera,” nae jetao Fedoro rai Jesoso.

*“Cha ii cocoainae,” naauruha Jesoso raine*  
(Mt 21.23-27; Lc 20.1-8)

<sup>27</sup> Nii baiha jetaote, nacoaauneein Jerosaleen cauha cue aina nerelanacaauru aina Jesoso. Inae ecu turuhin Teenforo asaee enohin amuhemuheca Jesusone jana jetaote, rohan nichuuntaain jetao:

<sup>28</sup> “Cha ii cocoainae catohanai ichaain neeine coina. Chatohanai cocoainanacai neeinna neei,” naaure jetao Jesoso rai saseredotecuru curuaanaacuru, Moisesa aitoonjoan que cacha relaaureraauru, Jorioocuru bichauhenaaauru, naaonjoainuri.

<sup>29-30</sup> Nii jaun jetaote, acaauru rai: “Canuhetonaine inara caje bajareeunni. Cha Joaan letoaelu, cachaauru cojunacatiha uhane coina. Cana Coaunera letoenihanena

cachaauruhacha letoanojoneein uhalu. Catoonraain carai beeichenena, canuhetonai canu cocoainain canu letoaera bereeunni inara rai,” naain jetao acaauru tonorae Jesoso.

<sup>31</sup> Nii jaun jetaote, ecu nejesinajeein ita rai jetao: “Cana Coaunera letoanojoneeinte uhelu,’ naacachenete: ‘Chanuna jana nere tonoraain esenetaeneeichelu,’ nareein. <sup>32</sup> Coatihachu: ‘Cachaauru letoanojoneeinte uhelu,’ nanaa nainihaacache,” naaure jetao ita rai. Satiin cachaauru Cana Coaunera letoanojoneein uhalu Joane esenetaauruhalune jaun, cachaauru coasiha. <sup>33</sup> Niritiin jetaote:

“Chachaainti Joaan letoaain nelu. Coatih coitucuhacaanu,” naauruha Jesoso raine jaun jetaote:

“Aihane jaaunchujian canuhetonai, caa catohanai ichacaaunne coina canu cocoainain canu letoaera berinaaunni inara rai,” nae jetao acaauru rai Jesoso.

## 12

*Ocoana jaaurera necha ansaineein ichaonacaauru que cuaain cachaauru relaa Jesosone*  
(Mt 21.33-46; Lc 20.9-19)

<sup>1</sup> Niritohane baiha jetaote, ocoana jaaurera que cuaain cachaauru relaaain jetao: “Leinjiin cache jetaote, ocoana jaain jitariin corihateein bino jaauruhane jaanu coloherinu que loreri jaain, leinjiin jataain ucuuneein teein rori jae ecu neein amihanenacaauru beraihane coina. Nitohaneein caohachaaain rucuhecane baiha jetaote, nii ocoana que amihanenacaauru rai atane teein ratiriin amuhe nii atane erora. Inae tainaca que turuhane bana ita rai lerruuruhane coina.

<sup>2</sup> Nitohaneein teein ratiriin jetaote, inae tainaca que tihane jaun, leinjiin rai cache letoae, nii amihanenacaauru caje que banihateein niicha taihuri bajaa cuhane coina. <sup>3</sup> Nejetaote, nii cache mucuhin faojoaain sooruhane baiha, nii cache letoaaure cha colane nii temule erora rene. <sup>4</sup> Nii jaun jetaote, nacoaauneein leecha cache letoaa nii temule erorane jana, nocoejechanuhin, couturi cunaitaain cha colane acaentonai letoaaure jelaiha. <sup>5</sup> Nii jana nacoaauneein leecha cache letoaaane jana jetaote, acaentonai sohin jaaore nii temule beraichacuru. Nii baiha nacoaauneein arajiin rai cachaauru letoajeein sacuha nii temule erorane jana jetaote, tabaauru sohin jaonajaain, tabaauru faojoaain cunaitanajaaure.

<sup>6</sup> Satononejeein jetaote leinjiin jataain niicha belaa rai calaohi neeorihane jana, aca letoae: ‘Jerihane canu calaohi quete laen suujua acatecurureein,’ naain coaaucane jaun, sohin jaaoruhane esenetaelanaala. <sup>7</sup> Nejetaote, ita rai jetao: ‘Inae uha caa atane erora calaohi. Coanete sohin jaohacachete, cana rainein nedaaine caa atane,’ naaure jetao

nii ocoana que amihanenacaauru cachaauru, uha nii atane erora calaohine jana coarajeein. <sup>8</sup> Niritocuruhane jaun jetaote, inae acaauru rene turuhane jana mucuhin ateinaain nii ocoana udaa amaain jaberoco jaaore,” naain jetaote:

<sup>9</sup> “Tonaquiche jana inara, nii calaohi sohin jaaoruhane que, tohanrihacha jana nii ocoana erora. Raajenihane cuhinacha nii ocoana que amihanenacaauru sohin jaohin, leeochoauru cachaauru bijiu nii ocoana teriha beraihuruhane coina. <sup>10</sup> Tana Cana Coaunera Quiricha inoaensi cuhane:

‘Ajeri jaolecoorua  
loreri icharaaurune jaante,  
jauriaanejeein  
loreri nunuheneein ne.

<sup>11</sup> Acate

jataain cana rai  
cojoelanaacojoaain ichae  
Cana Coaunera,’  
naain laenanohinihane jaan reretaain aonaquiche chariji banane,” naain jetao ocoana icharaauru que cuaain cachaauru rai ereerejeein acaauru relae Jesuso.

<sup>12</sup> Niritiin acaauru que cuaain relanajaa Jesusone que nainacuruhane jaun jetaote, Jesuso mucunaa jerecure Moisesa aitoonjoan que cacha relaaureraauru, saseredotecuru curuaanaacuru, naaonjoainuri. Nejetaote, Jesuso aina neeuruha arajiin cachaaurune jaun cachaauru coasiha ecu ratiriin jelai caje amuure.

*Impoestonu que coriqui teeuruhane que iriha Jesusone  
(Mt 22.15-22; Lc 20.20-26)*

<sup>13</sup> Nitohaneein ecu ratiriin jelai caje amuuruhane baiha jetaote, Erodesi ere tonoraeraauru, fariseeocuru, naaonjoainuri letoaaure, rai ereeuruhane jana tonaain acaauru tonoraa Jesusone nechu jataain coulurujueeuruhane jaanu lera ariha cuuruhane coina. <sup>14</sup> Acaauru jetaote rene turuhin jetao: “Ti que tonaain iriha cachane niha natiin, tonoraelanaala esinae rauhijiriin ereein neeine coitucuhacaanu. Chaen techu nohanelanaala esinae rauhijiriin jeriha Cana Coaunerane rijijeein ichaoha cachane coina cacha relai. Aihane jaun, caohachaana Romanocuru curuaanaa rai *impoestonu* que coriqui tihacaanune. Ainihane chatohaneriha. Coretena nainichaanuna. Ainihanena niriirihane,” naaure jetao Jesuso rai fariseeocuru aina Erodesi ere tonoraeraauru.

<sup>15</sup> Nejetaote, nechu jataain cairichaa aitocuruhane que nainaane jaun jetao:

“Chanuna cacairichanaa coacuhin niritiin carai ereeiche. Carai cajiha nii coriqui uhaauchene coarae,” naa acaauru rai Jesusone jaun, <sup>16</sup> rai coriqui teeuruhane jana jetaote:

“Chaa curuaa caa laenanohineein ne rai cojunaca aina,” naa acaauru rai Jesusone jaun jetao: “Romanocuru curuaanaa enferadoro curuaa,” naaure jetao rai.

<sup>17</sup> Nii jaun jetaote acaauru rai: “Aihana jaun chujian enferadoro que banijiaain nenea teeuche enferadoro rai. Chaen Cana Coaunera que banijiaain nenea teeuche Cana Coaunera rai,” naain acaauru tonoraa Jesusone jaun jetaote, ecu jataain cojoelatiin aonajeeure.

*Ohane baiha oo caje ichanaa cachane bajaauruha sadoseeocurune*

*(Mt 22.23-33; Lc 20.27-40)*

<sup>18</sup> Nii jana jetaote, Jesoso coaraa uure sadoseeocuru, oo caje ichanaa cacha suujuene esenetaaurenihane jaun caje bajaauruhane coina. Acaauru jetaote rene turuhin jetao:

<sup>19</sup> “Cacha relaera, Moisesate canacaanu rai laenaain ratirilu, oha leinjiin cacha nesirihateein nii comasai aina canaanai sirilanaalane, nii onaa comasai autana raa nii onaa nejerane, nii onaa aina siricha rijijieein canaanai sirihane coina. <sup>20</sup> Nitohanihane janate, ita nejera nejesinaneein neeuruha caaunsineein cachaaurune jana, jauriaanejeein acaauru nejera nesirihateein, nii nesirihatenajan aina calajoilanaala ohe. <sup>21</sup> Nii jaunte, nii autana rae nii onaa nejera. Nete acaentonai ohe aina calajoilanaala. Jerichanejeein techu ohe nii acaauru nichataja. <sup>22</sup> Nii jaaunte, nii chunocohacuru nii caaunsini ita nejeraauru calajoilanaala oore. Nii janate tabiicha nii ene netonai ohe. <sup>23</sup> Aihane jaun ooruhane baiha nacoaauneein ichanaa acaauru suujuene bana, chariji comasaineein jana nereein nii ene, caaunsini ita nejeraauru aina nesirihateein nihalune jaun,” naain jetao Jesoso caje bajaure sadoseeocuru.

<sup>24</sup> Nii jaun jetaote:

“Nechu jataain joaenreeinte ereereequiche inara, Cana Coaunera Quiricha ereretaain aonaain niicha ichanenu coitucueneeichene jaun. <sup>25</sup> Ohane baiha jerichanejeein jaberoconeein nenea rijijieein ichanaain niha quichaauru, enecuru, naaonjoainuri suujuene, inae nesirihatenaa nainecuruhi, dedeeu nenea anjeraauru rijijieein inae neeuruhane jaun. <sup>26</sup> Tana ohane baiha jerichanejeein jaberoconeein nenea rijijieein ichanaa cacha suujuene que aitoha nuna laajojiri moconaau neein Moisesane jaa quiricha reretaain aonaquiche inarane. Ecu jetaote Moisesa rai: ‘Canune Abaraau, Isaca, Jacobo, naaonjoainuri Coaunera neeun,’ nae jetao Cana Coaunera. <sup>27</sup> Coatiha ohin nitajenacaauru coaunera nihei Cana Coaunera- ohin nii baiha jerichanejeein jaberoconeein

nena rijijieein nenacaauru cachaauru coaunera Cana Coaunera. Nitohanihane jaunte, jataain joaereein nii cha coitucuelanaala ereereequiche inara,” naain jetao sadoseeocuru tonorae Jesoso.

*Cana Coaunera aitoonjoan- jataain cacha ichao rai nelateein nena*

*(Mt 22.34-40)*

<sup>28</sup> Niritiin esinae rauhijiriin sadoseeocuru tonoraa Jesusone jana aonajihane jaun jetaote, Jesoso rohan nichuuntaain jetao:

“Chariji jataain jauriaanejeein Cana Coaunera aitoonjoaneein cacha ichao rai nelateineein ne,” nae jetao, rai Moisesa aitoonjoan que cacha relaera.

<sup>29</sup> Nii jaun jetaote:

“Jauriaanejeein cana ichao rai nelateein nena Cana Coaunera aitoonjoante: ‘Aonacuche Israeli cocoaichacuru. Cana curuaanaa Cana Coaunerate, leinjiin acaacha itolere curuaanaa neen ne. <sup>30</sup> Aihane jaun, ii suujua, ii suujue, ii coichana, naaonjoainuri aina curataain cana curuaanaa Cana Coaunera belaihu. <sup>31</sup> Chaen ichaajenhane ijiabereeo belain coaraane rijijieein chamute cacha belain coaraau,’ nae. Nihei caa baiha jataain cacha ichao rai nelateein nei Cana Coaunera aitoonjoan,” nae jetao Moisesa aitoonjoan que cacha relaera rai Jesoso. <sup>32</sup> Nii jaun jetaote:

“Esinae rauhijiriinte chuhisi aitohicha cacha relaera. Leinjiinte chuhisi ne Cana Coaunera. Nihei nii baiha acaneein nei. <sup>33</sup> Cana suujua, cana suujue, cana coichana, naaonjoain aina curitaain Cana Coaunera belain, cana jaberoco belaihaane rijijieein cana amute cacha belain, naaonjoan-canete chuhisi, itolere inihocuru, itolere juuaihuru, naaonjoainuri mocohaca rori ichoae teenne amurijiriin jataain nelateine,” nae jetao Jesoso rai Moisesa aitoonjoan que cacha relaera. <sup>34</sup> Niritiin esinae rauhijiriin tonoraa nii Moisesa aitoonjoan que cacha relaerane coitucuhane jaun jetaote:

“Coatiha icharaain niheeli Cana Coaunera Cojoanona que neeine coina,” naa Jesusone jaun jetaote, inae nii tonaai caje chatohanai bajanaa coitucue.

*“Chatohanai caje nefoeratenaa ne Mesihasi” naain bajaa Jesusone*

*(Mt 22.41-46; Lc 20.41-44)*

<sup>35</sup> Nii baiha Teenforo asaa neen cachaauru relaane jaun jetaote:

“Chanuna Rabiri caje nefoeratenaa niha Mesihazine que aitocure Moisesa aitoonjoan que cacha relaaaurerauru. <sup>36</sup> Cana Coaunera Suujue aitoroatenojinein:

‘ “Cau carautono nichajai que nelauriaau carohan, ichei nejeratenacaauru amuritoherateein, itiha asaae tenajaanune reen tiaajeein,” naa Cana Coaunera cana curuaanaa rai,’ naa Rabiri inatiin.

<sup>37</sup> Aihane jaun, inasiina Rabiri nefoerate caje nenaanere Mesihasi, Cana Curuaanaa neein curuaatiha Rabiri netonai inatiin,” naa cachaauru rai Jesoso jana jetaote, rautatiin Jesoso aonajeeure nii ecu arajiin nenacaauru cachaauru.

*Moisesa aitoonjoan que cacha relaaureraauru ichao biha Jesosone*

*(Mt 23.1-36; Lc 11.37-54; 20.45-47)*

<sup>38</sup> Nitohaneein cachaauru relaane aina cuain jetaote:

“Caohachaaain nocohalajiin ichaaoche, Moisesa aitoonjoan que cacha relaaureraauru que. Cacha relaauruhane jaa co-cajione jiaainte, bero cuhaneuru acaauru que suujua acatecuruhane coarateein neuruha cachaaurune jereinchuru amuure. <sup>39</sup> Chaente netaojiaain Cana Coaunera rai rauhi que ereereecuruhane jaan coloheri sinacoca asaae enooruhane jataain nelateein nena rijijieein rori caohacha ichoae nelauriana rautatiin, beseta ichaain lenonecuruhane jaun niha natiin rori caohachaauru ichoae nelauriana rautatiin aihure. <sup>40</sup> Chaentechu, autanaauru caje acaauru loreri niha natiin ruluure. Nitohaneeinte necha aansaineein ichaaoruhane que nainacuruha cachaaurune coataa sonafaajianaaichuru Cana Coaunera bajaee bajajeein ichaaore. Acaaurute leeochoauru amuritoheriin caseteco coaraa cuurureein,” naain jetao cachaauru relae Jesoso.

*Nichaonajaanu que niicha sirii coriqui tiha Cana Coaunera belaiha leinjiin autana cairicheine*

*(Lc 21.1-4)*

<sup>41</sup> Nii jana jetaote, coriqui teeuruhane jaan curu cuhane coriqui teeuruha cachaaurune jana coarajiha lauhequiin Jesosone jana jetao, jataain araainanaain coriqui teure coriquihonacaauru. <sup>42</sup> Nii jana jetaote, turuhin jataain coroatajajeei coreein nena coriqui tiha cue, nii teeuruhane jaa curu cuhane ita que jerajejeein, leinjiin autana jataain cairichei. <sup>43</sup> Nii coarajeein jetaote, aina nerelanacaauru cotijiaain jetao:

“Esinae rauhijiriin satiin caa curu cuhane coriqui teeurera amurijiriinte coriqui te caa leinjiin autana cairichei. <sup>44</sup> Jana satiin caa coriquihonacaaurute, acaauru rai cautena coriqui caa teure. Nete laen caa ene jataain cairicheinijian natiin, acaihanijin nichaonajaanu que niicha sirii te jitariin,” nae jetao acaauru rai Jesoso.

## 13

### *Itajenojoinerichaaïn Teenforone biha Jesosone (Mt 24.1-2; Lc 21.5-6)*

<sup>1</sup> Inae nii Teenforo caje mituha cuha Jesosone jana jetaote rai jetao:

“Cacha relaera, jataain caohatiin ajeri caje ichanohiniha caa Teenforone coaraaina,” naa rai aina nerelanacaauru caje leinjiine jaun jetaote:

<sup>2</sup> “Jataainte niqúi caohatiin tasiojoaain ichanohineein coaraai. Nete inae turuha cojoanonaane bana, nii leinjiinijin nenereein caa ajeri ita ichoae teein ichanohineein inaraacha coarajei, satiin itajenojoiniha curichaaïne jaun,” naain jetao aina nerelanaa tonorae Jesoso.

### *Nacooauneein tururichaaïn Cana Coaunera Cojoanonaane (Mt 24.3-28; Lc 21.7-24; 17.22-24)*

<sup>3</sup> Nii baiha jetaote, nii Teenforo coarajeein rohan nenea Olibo bichataneu cue jetao aina nerelanacaauru aina Jesoso. Inae ecu turuuruhane jaun nelauriariin lauhecoha Jesosone jana jetaote:

<sup>4</sup> “Chatohanai janonaa banana nunuhereein nitohanai. Chatohanaina jana, inae jataain cataainjian nitohanaine jana coarareein,” naain caje bajaauruha jelai teteriin, Fedoro, Saantiaao, Joaan, Aanderesi, naaonjoainurine jaun jetaote: <sup>5</sup> “Inara coritaain niha chunine coataa caohachaaïn nainaaïn neeuche. <sup>6</sup> Arajiiichurute canuniha nocoetiinchuru turuhin: ‘Canune Curisito neeunra,’ naa uuruhane, arajii cachaauru nii acaauru coritaauruhane esenetaa cuurureein. <sup>7</sup> Jiaonriha: ‘Ecuuru ecuurute ne sonaana,’ naain coitucuhichene nesooonein casiiichene. Nitohaneinte nunuheca cureein. Nete caa caitoonjoan cojoanonaa satono que turuhane jaun ainenereein. <sup>8</sup> Laurihu laurihu nacaauru cachaaurute, leeochoauru aina nejerateein, ita que nererojoecaain niha cuurureein. Jana leeocho atane que ichaonacaaurute, leeocho atane que ichaonacaauru aina sonaana que niha cuurureein. Chaentechu araai lauriin aihane jaanru, jataain mijiaaïnein niha cureein carora tabai. Nii janate, niha cureein mijitena. Niite aasaariin necairichanaa nunuheniha cureein.

<sup>9</sup> Aihane jaun caohachaaïn nainaaïn neeuche. Canu corenihate, cocoinanacaihuru, reychuru, naaonjoainuri bijiu inara teeuruhane janate, sinacocacuru asaecuru teein inara bisiha cuurureein. Nitohanein inara teeuruhane banate, esinae rauhijiriin canunein nihanune biha curiquicheein acaauru rai. <sup>10</sup> Jaiti nitohanein satono que turuenihane ajinihate, satiin cachaauru chauratane

sacutaain lauri lauri nenacaauru rai caa caitonjoan nosa caje nichoteeururichaaine beebjiha curiquicheein. <sup>11</sup> Aihane jaun, cocoinanacaihuru rene inara amaauruhane, jiaonriha acaauru rai ereichene jaaque tonajeein cuichene. Inae ecu ereichene coina turuhichene coatiha inara aitorihcheein. Cana Coaunera aitoroatenojoin Cana Coaunera Suujue letononeeinte aitoriquicheein. <sup>12</sup> Rai nejeraauruhachate nejeraauru colurujihha cuurureein ateanohineeuruhane coina. Jana rai calaohichuruhachate colurijihha cuurureein acaauru inacaauru. Nii janate rai inaca colurujueeuuha acaauru calaohichurune jana, acaauru ateeinaa cuurureein. <sup>13</sup> Canu cachaneein neeichene corenihate inara cotaairiin inara coaraa cuurureein satiin caa chauratane sacuritaain nenacaauru cachaauru. Nete nitohaniha sainejeein satono que tiaain caitoonjoan tonoraain neite ichoteratenojoiniha cureein.

<sup>14</sup> Aihane jaun caa reretaain aonaain tonoraache. Inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratenaa casicheine coaraquichene, ichatane jana cuhin sorooruhine Jodea ichaonacaauru. <sup>15</sup> Ecuun rai loreri satono coarana ichoae niha chunine jana niha nitohanaine, jiaonriha ru-cuhele niha natiin roconaa coaucane. Rauhijiriincha fauhi amuhine. <sup>16</sup> Jana ocoana jana nihane jana aihane, jiaonriha jelaiha nejenohin cajione ranaa coaucane. <sup>17</sup> Jataainte cairichaaajoaurureein nii cojoanonaa que inae turuhane bana ausirineein nenacaauru enecuru, sisihajeein canaanai sirichaauru, naaonjoainuri. <sup>18</sup> Nabana elohena bana niha nitohanaine coataa Cana Coaunera bajaauche inara. <sup>19</sup> Cana rai chauratane coaunaain nihalu Cana Coaunerane baiha, nitohanai necairichanaa coaraa chariji banane que airijiinte, jataain niha cureein necairichanaa cojoanonaa. <sup>20</sup> Nii necairichanaa cojoanonaa sarotiaeniha Cana Coaunerane, nerihei chuni nichotei nii caje. Nete rai cachaneein janijiin niicha ranojoinunri jataain belaihane jaun, nabana nitajeeuruhane coataa nii cojoanonaa sarotiareein.

<sup>21</sup> Aihane jaun chunocoha inara rai: ‘Caute ne Mesihasi. Ecute ne,’ naa inara rene turuhinne, jiaonriha esenetaaichene. <sup>22</sup> Mesihasi niha nocoetiinchurute *profetane* lanaala nenacaaaurune maajeeichuru, inara coritaa cojoelanaacojoai ichaa cuurureein. Janijiin Cana Coaunera ranojoinuru niha natiinte coritaurureein. <sup>23</sup> Aihane jaun, caohachaaain neco-halajiin itolereneein neeichene coinane caraajenihaane inara rai aitoon, que nainaain neeichene coina,” nae jetao aina nerelanacaauru rai Jesoso.



*Nacooauneein tururichaa'in cacha caje nejanoanaa Curisitone*

(Mt 24.29-35, 42-44; Lc 21.25-36)

<sup>24</sup> Niritiin jetaote: "Nitohane'in inae niha necairichanaa cojoanonaane baihate, nocoena niha enotone jana, atene netonai conoenere'in. <sup>25</sup> Nii janate, dede cajene maajeeichuru naluhacoaa arasijiee'urune jana, nesoone caaun rijijijianiha cuurure'in dedeeu nenacaauru netonai. <sup>26</sup> Nitohanihane janate, itolere ichana nainihane coarate'e'in nelate que nelate'e'in dede sacari jana fauha uhanu canu Cana Coaunera Calaohi cacha caje nejanoanaa nichaaunne jana coariquiche'e'in. <sup>27</sup> Acate rai anjeraauru letoare'e'in, nii janijiin niicha raauri, rai cachaauru taojiaa'in raauruha satiin caa chauratane tinonoritiin nuurihuru cajee'urune maajee'in, dede uurihuru cajee'urune maajee'ichurune coina.

<sup>28</sup> Caohachaa'in nainacuche, caa uhera que cuaain inara relaanune que. Inae satiin naluha nune alone baiha nacooaunee'in nalojoaa uherane coaraqichene'te, caje inae nichuuntaa ajaanaane coitucuhiche. <sup>29</sup> Nii rijijie'e'in nainacuche caa caitoonjoan rijijie'e'in aihane coaraqichene, canu Cana Coaunera Calaohi cacha caje nejanoanaa nichaaune inae nichuuntaa turuhanune que. <sup>30</sup> Esinae rauhijiriine aitoon, jaiti ooreniha ena caa satiin canu aina nenacaaurune janate, <sup>31</sup> nitajere'e'in caa chauratane aina dede. Nete lae caa aitocooaunne jaa quere, caa aitocooaunne rijijie'e'in que tihane reeintiaa'in nere'e'in.

<sup>32</sup> Nete laen: 'Naaonjoain cojoanonaa banate ecu tiaain aiche'e'in,' nene naain nii chuni coitucuera. Niheichu dedeeu nenacaauru anjeraauru niha natiin coitucuuruhi. Niheichu canu niha natiin coitucuhaaun, leinjiin Ofaachate coitucuuje. <sup>33</sup> Nii'que tihaneree tiaain caohachaa'in nainaa'in Cana Coaunera bajajee'in neeuche. Coatiha coitucueraai nii airichaa'ine jaa cojoanonaa. <sup>34</sup> Acate coriaji ataneu cunaa jeriha leinjiin cachane, rai cachaauru que loreri beraichte'e'in, le cacha cachaauru rai amihanenaa tee'in, nii loreri beraicha que beraichatenajaain ratirinajaain amuhane rijijie. <sup>35-36</sup> Aihane jaun, caohachaa'in nainaa'in turuhane cohajee'in neeuche inara. Coatiha coitucueraai turuha nii loreri erorane, sona naluque, dede cataaun, ataohari irihanau, janone, naaonjoaainijin, turuhane jana letona jatoroaain nee'e'ichene coataa. <sup>37</sup> Caa inara rai aitocooaunne rijitoojoe'ine leeo'chaa'uru rai netonai aitoon, caohachaa'in nainaa'in cohaquichene coina," nae jetao, Fedoro, Saantiaao, Joaan, Aanderesi, naaonjoainuri rai Jesoso.

*Jesoso mucuuruhane coina ita taojiaauruhane*

(Mt 26.1-5; Lc 22.1-2; Jn 11.45-53)

<sup>1</sup> Coroata janohin lanajeeca jorerera colane ichanohin faan quihuruhane jaan beseta fasocoane jana jetaote, chunocoha que coritaerateein, Jesoso mucuhin ateinaauruhane jaan lera arihure saseredotecuru curuaanaacuru aina Moisesa aitoonjoan que cacha relaaaureraauru. <sup>2</sup> Nii jana tabaauru jetaote:

“Nainihei nitohanai ichacaache beseta nunuhe banane. Nabana cana que nejerateeuruha ecu aina nenacaauru cachaaurune coataa,” naaure jetao ecu ita rai.

*Alabastro caje ichanohi que curuhin nenea jujuai choro ha leinjiin ene Jesoso ichoaene*

(Mt 26.6-13; Jn 12.1-8)

<sup>3</sup> Betaniau cosibi ruhecaeraneein niicha curuaatehuri Simoon loreri asaae turuhin, ecu nelauriana najaan rori choae lauhecoha Jesusone jana jetaote, *alabastro* caje ichanohi que curuhin- ujuane nejesina caje ichanohi jataain coretiin nenea jujuai nardo amaain turuha cue leinjiin ene. Nitohaneein turuhin jetaote nii jujuai curu raiheitiin Jesoso couturi choae chorohe. <sup>4</sup> Nii jana ecu neein coarajeeurera tabaauru jetaote obajeein jetao:

<sup>5</sup> “Chanuna que cairichaa ihuru coroatajanena richaae, nichata fashai denario core jeoni amurijiriin nii jataain coretiin nenea jujuai nardo que necoretelanaala joaereen nii jujuaain ichanohi jaohiche,” naain jetao nii ene que ereein nocoeje chanuure. Nii le denario jetaote le jiichoo amihaneanaa core ne.

<sup>6</sup> Nii jana jetaote acaauru rai:

“Coa nocoeje chanuhin, coa rohecaache. Jataain caohachate ichae catohaneein canu teein. <sup>7</sup> Itolere banate inara aina neeurureein cairicheihuru. Nii jaunte, acaauru coroatajanena jeriquichene jaan que, acaauru coroatajanena naineriquicheein. Jana canu, itolere cojoanonaa bana inara aina neriaauni. <sup>8</sup> Caa enete niicha ichana nainei ichae, cajabereeo jujuaauruhane jaanu que niicha rucujui nihane jaun. <sup>9</sup> Esinae rauhijiriine aitoon. Chunijihuunru chauratane sacuritaain nosa caje nichoteeuru richaaine coina caitoonjoan canu ere beebejeeuruhane jaaunrute, caa catohaneein canu jaberoco jujuaa caa enene jaan coaauca cuurureein. Nitohaneainte coaunojoi niha cureein,” nae jetao acaauru rai Jesoso.

*Jesoso coulurujih Jodasine*

(Mt 26.14-16; Lc 22.3-6)

<sup>10</sup> Nii Jesoso aina nerelanacaauru lechoonca coroataja Jodasi Isacariote jetaote, saseredotecuru curuaanaacuru

coaraa cue, acaauru aina ereein, Jesuso rene amanajaane coina. <sup>11</sup> Nitohaneein acaauru rene turuhin amanajaane coina acaauru rai aitoha Jodasine jaun jetaote, jataain coroa-jeein rai coriqui tenaa jerecuruhane jaun, jelai nedaaoriha Jesusone que coacue, rene amanajaane coina Jodasi.

*Aina nerelanacaauru aina janotiin lenoniha Jesusone  
(Mt 26.17-29; Lc 22.7-23; Jn 13.21-30; 1Co 11.23-26)*

<sup>12</sup> Jorerera colane ichanohin faan quiin, Cana Coaunera rai carenero narejeen sooruhane jaan fasocoa beseta cojoanonaa nunuhe bana jetaote:

“Chu fasocoa cojoanotiin que lenonichaachene jaanu que lenone jaa cuhacaanune jeree,” naain jetao Jesuso caje bajaure aina nerelanacaauru.

<sup>13</sup> Niritocuruha raine jaun jetaote, coroatajai aina nerelanacaauru letoain jetao:

“Chajaain taa neseu cunichuche. Inae ecu turuhichene jana, baichaje cuhane acau baaibaaichaain cuujuiha leinjiin cachane jana eruhichene sacuuche. <sup>14</sup> Chaen inae loreri asaae enohane, nii loreri erora rai: ‘Cacha relaerate ii caje bajaerate, Chariji ucuha cuhane canu aina nerelanacaauru aina lenonerichaanuhin fasocoa cojoanotiin que, naain bajaerate,’ naaiche rainete, <sup>15</sup> aca inara que ecuunetiin coaranai loreri asaae, caohatiin rucuhenojoneein nena ucuha seejoan coaratereein. Chaen inae inara que coaratiha nii loreri erorane, ecu teein janotiin cana lenonenu enoalaauche,” naain jetao, nii aina nerelanacaauru suujuateein letoanajae Jesuso.

<sup>16</sup> Nii jaun jetaote, nii neseu cuhin acaauru rai aitoha Jesusone rijijieein leinjiin cacha eruha cuure nii coroatajai aina nerelanacaauru. Nii jana jetao acaauru que leinjiin ucuha coaratiha nii cachane jaun, ecu teein fasocoa cojoanotiin que lenonecuruhane coina lenone bajaure.

<sup>17</sup> Inae nocohejihane jana jetaote ecu leeochoauru aina nerelanacaauru aina turuha cue Jesuso. <sup>18</sup> Nitohaneein lenonecuruhane jaan neein jetaote:

“Esinae rauhijiriin ena cau caniha inara jiniichaain lenoniha nenaate, canu que nesuujuueein cacoluruheca cureein,” naa acaauru rai Jesusone jaun jetaote, <sup>19</sup> jataain inaderaain:

“Canuna ii coulurujuerichaaunte,” naain caje bajaure le cacha cachaauru. <sup>20</sup> Nii jaun jetaote:

“Ena, cau canu aina lechoonca coroatajai nequichene caje nena, canu jiniichaain canu ojoaichu cuhane faan setejiaain quichate acane. <sup>21</sup> Cana Coaunera Quiricha inoaensi cuhane aitohane rijijieein itolereneein aihanete ne. Nete jataain cairichaaajoareein nii caque nesuujuueein

cacoluruhera. Jataainte caohacharelu, nejanoaenihalu nii cachane,” nae jetao acaauru rai Jesuso.

<sup>22</sup> Nitohaneein lenonecuruhane ucuaetoha jetaote, faan mucuuriin Cana Coanera bajaain, cataaun tacaain taturiin acaauru rai teein jetao:

“Nocoa caa quihuche. Caate cajabereeoneein nenea ne,” naain jetao acaauru rai te Jesuso.

<sup>23</sup> Nii baiha, acaauru coconeein nenea bino curu mucuuriin, Cana Coanera bajaain acaauru rai tihane jana jetaote, satiin ita rai leruune leruuneein cooruhane baiha jetao: <sup>24</sup> “Caa canaacha coite canu coichana ne. Acate arajii cachaauru osa coreniha nijiaonrichaainne coina Cana Coaneraacha icharatei ichacaaunne jerichaaunne jaan cojunacaneein nenea ne. <sup>25</sup> Esinaae rauhijiriin nacoaauneein caa baiha bino corihaaunni, Cana Coanera Cojoanona necaohacha que neein ecu nenea bino cohanune reentiaain,” nae jetao aina nerelanacaauru rai Jesuso.

*Coitucuha nocoetelanaala nesuujerichaain Fedorone biha Jesusone*

(Mt 26.30-35; Lc 22.31-34; Jn 13.36-38)

<sup>26</sup> Nitohaneein jetaote, salmo que nenateein Cana Coanera coroaecuruhane baiha jetao aina nerelanacaauru aina jiniiquiin Olibo bichataneu cue Jesuso. <sup>27</sup> Inae ecu turuhin jetaote:

“Enene cojoanotiin cuhanete, satiin canu esenetaaichene jianeein ita caje riaaneriquicheein. Nitohaneeichene coinete: ‘Carenerocuru beraicha sooruhane janate, cajihaaneein riaaniha cuurureein carenerocuru,’ naain laenanohineein ne Cana Coanera Quiricha inoaensi cuhane. <sup>28</sup> Nena inae ichanacaaunne, jaiti Calileea turusiquichene ajiniha, canu inara ichoaachaniha ecu niha cureeunni,” naa acaauru rai Jesusone jana jetaote: <sup>29</sup> “Satiin ii esenetaauruhane jianecuruhane nihanatiin coatihalaen airinaaunni canu,” naa Fedorone jana jetaote:

<sup>30</sup> “Esinae rauhijiriin enene cojoanotiin cuhanete, jaiti coroata saain ereniha ataoharine jana, canu coitucuha nocoetelanaala nichata saain nesuujia curiquiin,” naa Fedoro rai Jesusone jana jetaote: <sup>31</sup> “Ii aina jiniiquiin ateanohi nihanune coina aitocuruhane nihanatiin, coatihalaen nii choitucuha nocoetelanaala nesuujerihaaunni,” naa Jesuso rai Fedorone jana jetaote leeochoaauru netonai jerichanetojoein aitocure.

*Jetesemanii Cana Coanera bajaa Jesusone*

(Mt 26.36-46; Lc 22.39-46)

<sup>32</sup> Nii baiha jetaote, Jetesemaniineein niicha curuaateeuri cuhin, inae ecu turuuruhane jana jetao:

“Cau nelauriaain canu cohacuchene, inara tonohanau Cana Coaunera bajani,” nae jetao aina nerelanacaauru rai Jesoso.

<sup>33</sup> Niritiin jetaote, Fedoro, Saantiaao, Joaan, naaonjoainuri amaain cuhin jetao, jataain inaderaain nererojoecae Jesoso.

<sup>34</sup> Nitohaneein nererojoecaain jetaote: “Jataain onaana-jaanu rijitocojoaainte inaderae casuujua. Cau nedaauche inara. Jiaonriha siniichene. Nirijieein ichaaojoein canu cohacuche,” nae jetao acaauru rai Jesoso.

<sup>35-36</sup> Niritiin ratirinajaain acaauru caje nita cutiin jetaote, notoroaain atane que nauri temetaain jetao: “Ofa, coat-iha ii rai caaintajerihei caa necairichanaa tabai caje canu ichoteratena jereeine. Nena canu jerichaaunne rijijieein ichaaine jereneun, ii jereeine rijijieein ichaau,” naain jetao Cana Coaunera bajae Jesoso. <sup>37</sup> Inae Cana Coaunera bajaane baiha, jelaiha acaauru coaraa cuhane jana jetaote, sinihuruhane jana erunajaa cue. Nii jaun jetaote: “Inae-nachura siniite Simoon. Jataainachura aasaeriinijin sinirena abaantaain ichaaojoenaa naineneeite. <sup>38</sup> Nabana osa que nesaruquichene coataa sinirena abaantaain ichaaojoein Cana Coaunera bajaauche. Jataainte niqui inara suujua cuhane ainaa jeriquiche. Nete jataain abaantasine inara jaberoco,” nae jetao Fedoro rai Jesoso.

<sup>39</sup> Niritiin jetaote, nacoaauneein jelaiha cuhin jerichanetoein Cana Coaunera bajaa cue. <sup>40</sup> Inae Cana Coaunera bajaane baiha, acaauru coaraa cuhane jana jetaote jataain sini-itooruhane jaun, sinihuruha aina nerelanacaaurune jana erunajaa cue Jesoso. Nii jaun jetaote, nii tonaain tonoraauruhane jaanu coitucuurene. <sup>41</sup> Inae nichata saain jelaiha cuhane baiha nacoaauneein turuhin jetaote:

“Jaitinachura neloraain siniichete. Inae laen necha aansainein osaaonacaauru bijiu Cacha Calaohi nichaaune mucuhin teeuruhane rai nihane cojoinaca que tiha. <sup>42</sup> Chajaain nimichucuchete amuhacache. Inae tajiha nichuutaa canu belaihane saijieein canu colurujuera,” nae jetao aina nerelanacaauru rai Jesoso.

### *Jesoso mucuhin amaauruhane*

*(Mt 26.47-56; Lc 22.47-53; Jn 18.2-11)*

<sup>43</sup> Niritiin jaiti ereerejiha aina nerelanacaauru aina Jesosone jana jetaote, sabere, enuha, naaonjoainuri que biji achunequiin arajii cachaauru que corianeraain turuha cue nii Jesoso aina nerelanacaauru lechoonca coroatajanein

nenaa Jodasi. Acaauru letoaaauruha saseredotecuru curuaanaacuru aina Moisesa aitoonjoan que cacha relaaaureraauru, Joriocuru bichauhenaauru, naaonjoainurine jaun. <sup>44</sup> Nitohaneein que nesuujueein colurujueein jetaote: “Nii quiicha meri lioracaite acanereein. Chaen mucuhin caohatiin biji ichojoaain amaauche,” naain jetao amanajae Jodasi.

<sup>45</sup> Niritiin acaauru amaaain jetaote, inae rene turuhin rohan nichuutaain jetao:

“Cacha relaera,” naain jetao Jesoso meri lohite Jodasi. <sup>46</sup> Nitohaneein jetaote, Jesoso mucuhin amaaure.

<sup>47</sup> Nii jana jetaote, sabere mucuhaneecha neoriin leinjiin saseredotecuru curuaanaa cacha uricho beuhite, ecu acaauru aina nenea cacha. <sup>48</sup> Nii jana jetaote, nii mucuha cunacaauru cachaauru rai jetao: “Chanuna necha aansai asijiauto mucuera tocohaneein enuha, sabere, naaonjoain uhaain canu mucuha uhiche. <sup>49</sup> Itolere cojoanonaa banane inara jana Teenforo asaae neein cachaauru relanajacoon. Nii jana chabana canu mucunajaaohieeiche. Nete Quiricha inoaensi cuhane aitoha Cana Coaunerane nainaaichene coinata caa aaiche,” nae jetao nii mucuha cunacaauru cachaauru rai Jesoso.

<sup>50</sup> Nii jana jetaote, ecu jelai Jesoso ratiriin, satiin soroore aina nerelanacaauru. <sup>51</sup> Nii jana leinjiin enamanaa jetaote, shojoera que shoheshohequiin caaijie cuujihane jana jetao, acaentonai mucuuruhane jaun, <sup>52</sup> nii shojoera ratiriin machohequiin cha colane soroe.

*Jorioocuru bichauhenaauru- niha chatohanaine rucuhera-  
neen nenacaauru- Junta Suprema acatiha niha Jesosone  
(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Nitohaneein saseredotecuru curuaanaacuru curuaana rene Jesoso amaauruhane jana jetaote, satiin ecu netaojiaaure saseredotecuru curuaanaacuru, Joriocuru bichauhenaauru, Moisesa aitoonjoan que cacha relaaaureraauru, naaonjoainuri. <sup>54</sup> Nii jana jetaote, nita coarajeein caaijie cuuje Fedoro, saseredotecuru curuaanaacuru curuaanaa loreri chajeniha tiaajeein. Inae ecu turuhin jetaote, Teenforo beraaihurera aina nelauriaain usi que nichaatiha nedae.

<sup>55</sup> Nii jana jetaote, Jesoso sohin jaaoruhane jaanu lera airihure saseredotecuru curuaanaacuru, chaen satiin Joriocuru bichauhenaauru- *Junta Supremacuru*, naaonjoainuri. Nejetaote, nii chatohaneein teeuruhane jaanu lera eruurene,

<sup>56</sup> nitohaneein nohaneein colurujueeuruha arajiin cachaaurune saijieein ita rijitoein aitocurenihane jaun. <sup>57</sup> Nii jana tabaauru jetaote, nimichuhin nechu jataain nohanein:

<sup>58</sup> “Canacaanu uricho quene aonacaun: ‘Caa cachaauruhacha ichai Teenforo itajeeinne, nichata janojoein cuhane leecha ichana naineun cachaauruhacha ichanohinelanaala,’ naane jana,” naain jetao colurujueeure.

<sup>59</sup> Nejetaote, ita rijitoein cuaain colurujeeurenihane jaun esenetana nainecurene.

<sup>60</sup> Nii jana jetaote, satiin nii ecu nenacaauru cataaun nichaaurain jetao: “Chatohanaina ichaate, toon toritiin icholuruhecuruhane jana tonoranaanein,” naain jetao Jesoso caje bajaee saseredotecuru curuaanaacuru curaanaa. <sup>61</sup> Nejetaote, tonoraelanaala inauheneecha aonaje Jesoso. Nii jaun jetaote, nacoaanein rai jetao:

“Iina itolere icharaanu que turuha uheni Cana Coanera Calaohi Mesihasi neei,” naain caje bajaa saseredotecuru curuaanaacuru curuaanaane jana jetaote: <sup>62</sup> “Ejeen, acaneeunchujanrana. Inarate itolere ichana nainera neein nena Ofa raotono nichajai que lauhecohanune jana caoariquicheein. Chaen techu, inae ecu tihane bana dede caje, dede sacari jana uhin fauha uhanune jana canu coariquicheein,” nae jetao rai Jesoso.

<sup>63</sup> Nii jaun jetaote, obaecane cojunacanein cajione soaisoain jetao: <sup>64</sup> “Cha nenacaaneina coara lateriquiche. Inara uricho quete, inae Cana Coanera Calahiniha nocoetiin irihane aonaquiche. Tonaquiche jana nii que,” naa acaauru rai saseredotecuru curuaanaacuru curuaanaane jana jetaote, satiin ita suujua rijitoein nii coulurujeeuruhane ujuaaihonein aca ohane coina aitocure.

<sup>65</sup> Nii jana tabaauru jetaote, coluneeinchuru nota conajaain bisiin jetao: “Aihane caa ii bisicha coitucuhin beeu,” naauruhane jana jetao, Teenforo beraichacurune maajeein nomeri faohacure.

### *Jesoso coitucuha nocoeteniha Fedorone*

*(Mt 26.69-75; Lc 22.56-62; Jn 18.15-18, 25-29)*

<sup>66-67</sup> Nii jana jetaote, loreri chajeniha usi que nichaatiha lauhecoha Fedorone coariin: “Ii netonaite Nasarete coaicha Jesoso aina amuhemuhena neei,” nae jetao Fedoro rene turuhin saseredotecuru curuaanaacuru curaanaa coseenra.

<sup>68</sup> Nii jana jetaote: “Coatiha nii carai aito hine jaan cacha coitucuhaaun. Chaa que chaainti nii aitohi,” naain jetao neesuujue Fedoro. Niritiin jetaote, jelai caje amuhin acuujuaniha neeorihane jana, inae ere ataohari curuaanaa. <sup>69</sup> Nii

jana jetaote, nacoaauneein Fedoro coaraain leeochoauru rai jetao:

“Caa netonaite, nere tonoraeraneein nenea ne,” nae jetao nii coseenra, leeochoauru rai.

<sup>70</sup> Nejetaote nacoaauneein nesuuje. Nii baiha neeoriiin jetaote, nacoaauneein Fedoro rai jetao:

“Rauhijiriinte bajiaa acaauru caje nenea neei. Nii choae tacaain Calileea cocoaicha neei inatiin,” naaure jetao nii cuu nenacaauru.

<sup>71</sup> Nii jana jetaote: “Esinae rauhijiriin Cana Coaunerate coaraje, nii aitocoichene jaa cacha coitucuenihanune,” <sup>72</sup> naa Fedorone rijieeoritiin irihane coroata satiha ataoharine jana jetaote: “Jaiti coroata saain ereniha ataoharine ajinihate, cacoitucuha nocoetelanaala nichata saain nesuujueriquiin,” naalu rai Jesusone coacuhin jetao chanae Fedoro.

## 15

*Coberenadoro Filato acatiha niha Jesusone*  
(Mt 27.1-2, 11-14; Lc 23.1-5; Jn 18.28-38)

<sup>1</sup> Nii jana jetaote, jataain janohetiin netaojiaaure saseredotecuru curuaanaacuru aina Jorioocuru bichauhenaauru, Moisesa aitoonjoan que cacha relaaureaauru, chaen niha chatohanaine rucuherraneein nenacaauru- *Junta Supremacuru*, naaonjoainuri. Nitohaneein jetaote, Jesoso biji ichojoaain amaain Roma curuaanaacha letoai Jorionelanaala nenea- coberenadoro Filato rai tiha cuure.

<sup>2</sup> Inae nii Filato rene turuaauruhane jana jetaote:

“Iina Jorioocuru Curuaanaa *Rey* niha,” naa rai Filatone jana jetaote:

“Ejeen. Esinae rauhijiriin acanichaaunne quete aitohi,” nae jetao rai Jesoso.

<sup>3</sup> Nii jana saseredotecuru curuaanaacuru jetaote, jataain araai laurii itolere ichaain nihane que aitiin colurujeere.

<sup>4</sup> Nii jaun jetaote, nacoaauneein rai jetao:

“Aonaun, jataain araai laurii itolere ichaain neeine que aitiinte icholuruheecure. Chanuna jana tonaain acaauru tonoraeneei,” nae jetao rai Filato.

<sup>5</sup> Nejetaote, tonoraeniha Jesusone jaun: “Chatohanihane jaunna caa catoonraene,” nae suujua cuhane Filato.

*Ateinanohi niha Jesusone coina rucuhecuruhane*  
(Mt 27.15-31; Lc 23.13-25; Jn 18.38-19.16)

<sup>6</sup> Nitohaneein beseta bana naineein niha chuni colurujuenojoine jetaote, jerecuruha nii cachaaurune rijijieein jianenajaque Filato. <sup>7</sup> Nii jana jetaote, caresero cuhane ne leinjiin cacha Barabasineein niicha curuaateuri. Nii Barabaside



leochaauru aina acauru curuaanaacuru que nejerateein sonajaain jaaorera ne. <sup>8</sup> Nii jana jetaote Filato rene turuhin, nii beseta bana naineein ichanajaaocane rijijieein ichaa Filatone coina caje bajaure cachaauru. <sup>9</sup> Nii jaun jetaote, acauru rai jetao:

“Aihane jaunna, inara Jorionequichene Curuaanaa *Rey* jianichaaunne jeriquiche,” nae jetao acauru rai Filato, <sup>10</sup> saseredotecuru curuaanaa amurijiriin coitucuhin cachaauru relaa Jesusone jaun, arajii cachaauru esenetaain sacuuruhane jaun que necoelai caaun mucuhin rai teeuruhane que nainaane jaun. <sup>11</sup> Nejetaote, cachaauru suujuau tacaure saseredotecuru curuaanaacuru, Barabasi jianeratecuruhane coina. <sup>12</sup> Nii jana jetaote, acauru rai jetao:

“Chatohanai jana ichacaaunne jeriquiche caa Jorioocuru curuaanaa *Rey*neein inaraacha curuaatei aina,” naain acauru caje bajaa Filatone jana jetaote:

<sup>13</sup> “Coroso que teeinene jerichaanura,” naauruha ehequinne jaun jetaote:

<sup>14</sup> “Chatohanai baasonajian ichae,” naa acauru rai Filatone jana jetaote, nacoaauneein ehequiin jetao:

“Coroso que teechaaura,” naaure cachaauru.

<sup>15</sup> Nii jaun jetaote cachaauru aina caohachaaain nenaajerihane jaun Barabasi jianeein, Jesoso bisichatihane baiha acauru rai te Filato, coroso que teeuruhane coina.

<sup>16</sup> Nii jana jetaote, nii cocoainanacai loreri chajeniha Jesoso amaain, sondaro nejesinanejeein ecu satiin netaojiaaure. <sup>17</sup> Nitohaneein netaojiaain jetaote, que cajione jichohajiojoai lanajai curujuaain, oja caje ichanohin comai lauriaaure coturi que. <sup>18</sup> Nii baiha jetaote:

“Acaneein neeine Jorioocuru Curuaanaa *Rey*,” naaure jetao ehequiin nechu jataain cairichaa que nocoatijiaa.

<sup>19</sup> Niritiin jetaote, enuha que rai couturi faojoaain coulunecuruhane baiha, nechu jataain que ninichaaajia nacatiha neseonriaaure soondarooru. <sup>20</sup> Nitohaneein jataain que ninichaajeeuruhane baiha jetaote, nii cajione lanajai jichohajiojoai que niicha curuhacuri rocohin jetao, rai cajione esine curujuaain, jelai caje amaain coroso que tiha cuure.

*Coroso que Jesoso teeuruhane*

*(Mt 27.32-44; Lc 23.26-43; Jn 19.17-27)*

<sup>21</sup> Nii jana jetaote, ocoana caje caaujiha Alejaandoro, Rufo, naaonjoainuri inaca leinjiin cacha Sirene cocoaicha Simoonne jana coaraain jetao cotihacure, nii Jesoso teeuruhane jaanu coroso amaane coina.

<sup>22</sup> Nitohaneein jetaote, Golgotau Jesoso amaaure. Golgota naane jetaote, “Niha couturi bejerona jaan,” naane aite. <sup>23</sup> Inae ecu turuhin sacari mirra jujuaain nenea que jasiiteein bino que cocoanaa jerecuruhane jana jetaote conaa jerene Jesoso. <sup>24</sup> Nitohaneein cairichaaain jetaote coroso que teein, “Chariji raineeincha nedareein,” naain que nocoatijiaain ecu nejesinajeein ita rai Jesoso cajione chaluure soondarooru. <sup>25-26</sup> Janone nichae nuna macohi ichoae teejia enotone jana coroso que teein jetaote: Jorioocuru curuanaa niha nocoetohane jaunte, “Jorioocuru curuaanaa *Rey ne*,” naain que aitiin, laenanohineein nena tabara teure coturiniha. <sup>27</sup> Chaen jetaote ecu aina corotajai asijiautooru teure coroso que, leinjiin raotono nichajaique, leecha rai najaabiji nichajaique, naonjoaain. <sup>28</sup> Nitohaneein jetaote: “Necha ansai asijiautoorunein nena rijijieeinte nereein,” naain laenanohineein niha Cana Coanera Quiricha inoansi cuhanene nainae.

<sup>29</sup> Nii jana jetaote, coturi rurujaain:

“Ichalaraa. Chajaain aihane Teenforo itajeein nichata janojoin cuhane nacoaaunein michunaa jereeine rijijieein <sup>30</sup> ichaajenhane ijiabereeo ichoterateein coroso caje faau,” naain jetao Jesoso nocoeje chanuure satiin ecu situnacaauru.

<sup>31</sup> Saseredotecuru curuaanaacuru, Moisesa aitoonjoan que cacha relaaureraauru, naonjoainuri netonai jetaote:

“Leeochaauru ichoteratiha niqui, nete raajenhane jaberoco ichoteratena nainene. <sup>32</sup> Chajaain aihane caa coroso caje fauhine Mesihasi- Israelitaauru curuaanaa *Reyte coaraain esenetaacache*,” naain jetao que ninichaajeeure nii Moisesa aitoonjoan que cacha relaaureraauru. Nii ecu jiniichaaain coroso que nenacaauru netonai jetaotechu Jesoso nocoejechanuure.

### *Oha Jesusone*

*(Mt 27.45-56; Lc 23.44-49; Jn 19.28-30)*

<sup>33</sup> Nii jana jetaote, enoto chujutora caje coaaunein nunuhetein nocohena ne satiin caa chauratane nuna macohi ichoae teejiha sonanereentiaain. <sup>34</sup> Nii rijieeoritiin jetaote, jataain tonijiaain jetao:

“Eloi, eloi, lema sabactani,” naane jetao: “Cana Coanera cacorataaneun, chanuna catohaneein canu nainatejeei,” naa jetao aite Jesoso.

<sup>35</sup> Nii jana nii ecunein aonajeeurera tabaauru jetaote:

“Aonacuche *profeta* inoansi Eliasi cotihacate aite,” naaure jetao ita rai.

<sup>36</sup> Nii jaun jetaote, leinjiin acaauru caje nena cacha jetao, jeluhariin cuhin cajione que bino baaso elohanti sisiaain

amaain jetao, Jesoso rai sijirichae jiarana nujuan macohi que teein cohane coina. “Coa roerohecaachete aihane coroso caje fauha uha Eliasine coaracaache,” naain.

<sup>37</sup> Nii jana jetaote, jataain tonijiaain auhaquiin inae ohe Jesoso. <sup>38</sup> Nii jaun jetaote, ecui nichajai caje nunuhetein ecoai nichaae cuhin nesoaiheite nii Teenforo bujuatecuruhane jaan cajione. <sup>39</sup> Nii jana, ecu neein coarajiha Roma rai soondarooru curuaanaane jana niritiin oha Jesusone jaun jetaote:

“Esinae rauhijiriinte, Cana Coaunera Calaohinecaiha caa cachara,” naain jetao ecu coaraje.

<sup>40</sup> Chaen enecuru tabaauru jetaote, caje icharajeriin neein coarajeeuruhane jana, ecu acaauru aina ne Maadala bene Mariha, chaen Jose ocoala Saantiaao neba Mariha, chaen Salomee, naaonjoainuri. <sup>41</sup> Nii ecu neein coarajeeurera enecuru jetaote, aina cuhin Calileea niha Jesusone bana coroatajaneranein nenacaauru ne. Chaen jetaotechu, ecu neeure arajiin leeochoauru cachaauru, Jerosaleeun cuha Jesusone jana aina cunacaauru.

*Jesoso jaberoco rucuhecuruhane*

*(Mt 27.57-61; Lc 23.50-56; Jn 19.38-42)*

<sup>42</sup> Inae nocoheca nebetacanaa cojoanonaa que janohane coinane jana, neruujeeuruha Jorioocurune jaa cojoanonaa jana jetaote, <sup>43</sup> Filato coaraa cue Arimatea cocoaicha Jose, Jesoso jaberoco bajaane coina. Nii Josete Jorioocuru rai nelateein nenacaauru Jorioocuru bichauhenaauru- *Junta Supremacuru* caje jataain nelateein nena ne. Acaenton-aite tururichaaain Cana Coaunera Cojoanonaane cohajein nelu. <sup>44</sup> Nii jaun jetaote, rene turuhin inae oha Jesusone que aithane jaun cojoelatothane jaun jetao soondarooru curuaanaa cotiharate Filato, esinae rauhijiriin ohane biha raine coitcuhane coina.

<sup>45</sup> Nii jana rene turuhin inae ohane bihane jaun jetaote Jose rai nii Jesoso jaberoco terate Filato. <sup>46</sup> Nii jaun jetaote, Jesoso jaberoco fauhin jataain cajione caohacha lino coretein nii cajione que conajae Jose. Nitohanein conaacane baiha jetaote, ajeri jachu cuhane tein, rai bacuujuua fuhin ratiri ajeri jaberoco que. <sup>47</sup> Nii jana jetaote, ecu aina neein nii Jesoso jaberoco teeuruhane jaa jelai coarajeeure Maadala bene Mariha, chaen Jose neba Mariha, naaonjoainuri.

## 16

*O caje ichanaa Jesusone*

*(Mt 28.1-10; Lc 24.1-12; Jn 20.1-10)*

1-2 Inae situha nebetacanaa cojoanonaane jana jetaote, semana nunuhe cojoanonaa tomihō bana jataain janohetiin enanejeein mituhajiha enotone jana jujuaihuru coreteein amaain, que Jesoso jaberoco jujuaa cuure Saantiaao neba Mariha, Maadala bene Mariha, Salomee, naaonjoainuri.  
 3 Nitohaneein cuhin jetaote ita rai:

“Chana jana cana rai nii fueraneein nenea ajeri elonare,” naain jetao niq̄i cuure.

4 Nejetaote coaracuruhane jana, elonanohineein ne nii ajeri seeonjoan fueraneein nenea. 5 Nii jana nii ajeri jachu cuhane enooruhane jana jetaote, acauru raotono nichajai que lauhaca leinjiin enamanaa somajaain tarararoti que cajionecohine jana coaraain nesooneetoore nii enecuru.

6 Nejetaote, acauru rai: “Coa nesooneetohache. Coroso que niicha teeuri Nasarete cocoaicha Jesosona ariiche. Inae ichanaane jaun coatihā inae cau nihei. Nii teuruhane jaan jelai coaracuche. 7 Chajaain jelaiha cauhin, Fedoro, chaen aina nerelanacaauru, naaonjoainuri rai: ‘Inae inara ajinihate Calileea cue Jesoso. Ucuuaete coariquicheein, inara rai aitoroetohane rijijieeincha, nanichuche acauru raicha,’ ” nae jetao nii enecuru rai anjera.

8 Nii jana jetaote, jataain nesooneetooruhane jaun chatatajanein jelai caje sorohin, nii chuni rai belanaala inauhe-neechea neeure.

*Maadala bene Mariha rai ecooca Jesusone  
(Jn 20.11-18)*

9 Inae semana cojoanonaa nunuhe bana ichanaane baiha jetaote, nii suujua cuhane caunsini moconajaera letono siricha- niicha rautailu Maadala bene Mariha rene ococoe jauriaanejeein Jesoso. 10 Aca jetaote, chanaain inaderaauruha nii Jesoso aina nerelanacaaurune jana jetao, acauru rene turuhin biha cue.

11 Nitohaneein acauru rene turuhin, jericanejeein jabe-roconein ichaoha Jesusone coaraain biha cuha acauru raine jana jetaote esenetaaurene.

*Coroatajai aina nerelanacaauru rai ocooca Jesusone  
(Lc 24.13-35)*

12 Nii baiha jetaote, bero cuhane cuujeeuruha coroatajai aina nerelanacaaurune jana nejelauneein acauru rai ococoe Jesoso. 13 Nitohaneein acauru rai ocococane coaraain, leeochoauru rai biha cuuruhane jana jetaote, nii acauru niha natiin esenetaaurene.

*Niicha cocoaainauri afosotooru rai, acaauruhacha icha-neni tiha Jesusone*

*(Mt 28.16-20; Lc 24.36-49; Jn 20.19-23)*

<sup>14</sup> Nii baiha neeoriin jetaote, lenoniha neeuruha nii le-choonca leinjiin aina nerelanacaaurune jana jetao, ecu acaauru rai ococohin, nii o caje ichanaane coaraain beeurera esenetana jerelanaala baasoneein rai suujua coaracuruhane caohate.

<sup>15</sup> Nii baiha jetaote: “Chajaain caa chauratane sacuritaain nenacaauru satiin cachaaauru rai, nosa caje nichoteeururichaaaine coina jitariin caa caitoonjoan beebejenichuche.

<sup>16</sup> Caa caitoonjoan beeichene jana esenetaain acauhanau teein nebaotisaerateite nichotiha cureein. Jana caa caitoonjoan beeichene jana esenetana jeriheichurute caseteco coaraa cuurureein.

<sup>17</sup> Canu esenetaain canu ere tonoraain neeichenete canu neein nena rijijieein moconajaera letonocuru sitaain, nejelauneeichuru nereeuru cuhane ereein, <sup>18</sup> acano niha natiin mucunaa nainein, naaonjoaain, corianiha natiin coichene nii chatohanein baasoneein inara tenereein. Nii choae tacaain techu, cunaitenacaauru mucuhichene nerautaa cuurureein,” nae jetao niicha cocoinaauri rai Jesoso.

*Dedeeu cuha Jesusone*

*(Lc 24.50-53)*

<sup>19</sup> Niritiin niicha cocoinaauri afosotooru rai irihane baiha jetaote, dedeeu iniin rai Inaca Cana Coaunera raotono nichajai que nelauriaa cuelu Cana Curuaanaa Jesoso. <sup>20</sup> Nii jaun jetaote, satiin chauratane sacuritaain amuhemujeein nosa caje nichoteeururichaaaine beebejiha cuuruhane jana jetao, nii acaauruhacha beebejei esenetana nainecuruha cachaaaurune coina acaauru aina cuaain cojoelanaacojoai ichae Cana Coaunera.

## **Locasiicha laenai Ena Nena Cana Coanera Ere**

### *Teofilo rai Locasiicha laenai quiricha*

<sup>1</sup> Arajii cachaaurute caa canacaanu jana Jesoso ichanohichuru laenacurelu. <sup>2</sup> Nii laenaeraaurute nunuhe caje coauneein aina amuhemujueein niicha coarai que canacaanu relaeraneein neeuruhane coina tenojoineein neurelu. <sup>3</sup> Nii jaunna, canuhetonai satiin coitucuurera caje bajaau, rai nunuhe caje coauneein colalajiin, caohachaaain coitucuhanune coina. Nii jana, carai netonai jataain caohachaaane jaunna carai nelatein neeine rai laenaauura Teofilo, <sup>4</sup> esinae rauhijiriin erenaa niha nii ii relaauruhalune jaa esenetaain caohachaaain coitucuhin neeine coina.

### *Nejanoarichaaain cacha baotisaera Joanne biha anjerane*

<sup>5</sup> Jodea batane curuaanaa- *rey* neein niha leinjiin Jorioneein nena Erosesine bana jetaote, ichoaelu leinjiin Cana Coanera aina caohachaaain niha cachane coina rucuherraneein nena saseredote Sacariasi. Aca jetaote, acauru inoansi saseredotecuru Abiasa lauri caje nenaanelu. Nii jana rai sinijera Isabeli jetaote, jauriaanejeein saseredotenein nena Aaron nefoerateeuru caje nenaanelu. <sup>6</sup> Acauru jetaote, esinae rauhijiriin jiniiquiin Cana Coanera esenetaain naitoonjoan tonoraain neurelu. Nitohaneunruhane jaun jetaote nii chuni- acauru que chatohanai ujuaitema nainecurenelu.

<sup>7</sup> Nejetaote, canaanai sirina inaeniha nii Isabeline jaun, leinjiinejei canaanai sirilanaala jiniiquiin biinaaneurelu.

<sup>8-9</sup> Nitohanein jetaote, inae Cana Coanera notaracaae saseredote neeuruhane ichanohin jujui mocooruhane coina neeuruha Sacariasi laurichurune jaa cojoinacaque tihane jaun jetaote, nitohaniha saseredote neeuruhane ichaone jaun, Sacariasi que tacaajeein dadae, rori ichoaae tein jujui mocoha Teenforo asaaene coina.

<sup>10</sup> Nitohanein jujui mocoha enohane tonohanau jetaote, aerene neein Cana Coanera bajaee bajaecure leeochoauru saseredotecuru aina cachaauru.

<sup>11</sup> Nii jana jetaote, Sacariasi rai ecocohin, nii jujui mocohane jaa rori raotono nichajai que jetao chujujuae Cana Coanera letono anjera. <sup>12</sup> Nii jaun jetaote, nii anjera coariin, nesooneetiin cojoaelatoha Sacariasine jana jetao:

<sup>13</sup> "Coa nesooneetohara Sacariasi. Bajaebajaequiine aonjian Cana Coanerara. Nii ii sinijera Isabelite leinjiin

canaanai siricheeincha. Acate Joaan neein curuaateriquincha. <sup>14</sup> Chaentechu aina jataain raotojoein neriquincha. Leeochaauru cachaauru netonaite nejanoa coroaecurureein, <sup>15</sup> jataain Cana Coaunera rai nelateinneein nerichainne jaunra. Coatiha bino, abariinti, naonjoainuri corinaainta. Acate esinae rauhijiriin Cana Coaunera suujue que suujuecoha cureein nejanoaane ajiniha caje coauneeincha. <sup>16</sup> Acate, Cana Coaunera Ere tonoraache Israeli coaichaneeichene coina ichareeincha. <sup>17</sup> Nii Joaante turuha uheneni Cana Curuaanaa ajiniha cureein, Cana Coaunera ere bera inoansi Irihasi rai niicha tei suujueque suujuequiin-Cana Coauneraacha ichana nainei ichaain naonjoaaincha. Acate aicheein calaohichuru aina jiniiquiin ita que suujua acateein neuruha acaauru fojiaraaurune coinara. Chaen erenaa tonorana jeriheichuru netonai erenaa tonoraain naonjoaauruhane, raotojoein Cana Curuaanaa ranaa nainecuruhane coinara,” naa rai nii anjerane jaun jetaote:

<sup>18</sup> “Inasiine bajiaa nitohanein nerichaaunnine eseneta-reun, inae casinejera aina jiniiquiin jataain biinaaniha-caanu natiinta,” naa Sacariasine jana jetaote:

<sup>19</sup> “Canune, Cana Coaunera letono Cabirieli neeun. Acate caletoe, ichei caa erenaa raotono bihanune coina. <sup>20</sup> Nete caa ichei aitocaaunne esenetaeneeine jaun, ena caje coauneei caa ichei caitoonjoan cojoinaca que tihanereein tiaain erenaachara neein neriquincha,” nae jetao Sacariasi rai nii anjera.

<sup>21</sup> Nii tonohanau jetaote, aerene neein Sacariasi cohacuruha cachaaurune jana, jataain carajaane jaun jetao, “Chana jataain ichae carajaain Teenforo asaae caje mituenihane coina,” naain jetao ita caje bajaaure nii aerene neein co-haraauru.

<sup>22</sup> Nii jana jetaote, tabiicha acaauru rene eresilanaala Teenforo caje mituha uhe nii Sacariasi, acaauru rai biji nejesinaacha que bihajein. Nii jaun jetaote: “Jerihanete chaelai coaratiha Cana Coaunerane jaa coaracaiha Teenforo asaaera,” naaunre jetao ita rai.

Nii caje nunuhetein jetaote, erenaa nainelanaala nelu Sacariasi.

<sup>23</sup> Inae nitohanein teenmforo asaae niicha ichanenu nainaan jetaote, jelaiha nenajaun cauha cue Sacariasi. <sup>24</sup> Nii baiha neeonriin, inae ausirineein jetaote, rai loreri caje amuelanaala ecuhacha ne saoquei ateein rai sinijera Isabeli:

<sup>25</sup> “Cana Coaunera, caa catohanein caete, nabana caque nererojoecaain jaolecoorua cachaaurune coataa,” naain suujua ereein.

*Nejanoarichain Jesusone biha leinjiin anjerane*

<sup>26</sup> Inae saota ateniha canaanai siriha Isabeline jana jetaote, Calileea batane que nena Nasareteu jetao, leinjiin letono anjera Cabirieli letoae Cana Coaunera. <sup>27</sup> Chariji bana quicha aina ichoaelanaala nena leinjiin ranuna Mariha rene turuha cuhane coina. Nii ranuna jetaote, cana inoensihuru curuaanaa Rabiri nefoerateneein nena Jose que nelana-jaane rai ne.

<sup>28</sup> Nitohaneein cuhin jetaote, nii niha Marihane jaaun rene turuhin enohin jetao:

“Ii renena bedaeniha uunra, Cana Coauneraacha rausiajei. Jataainte ii rausiaje Cana Coaunerara” naa rai nii anjerane jaun jetaote, <sup>29</sup> coariin nesoonetiin: “Chanuna caritiin ere canu rai,” naa suujua cuhane Marihane jana jetao,

<sup>30</sup> “Coa nesoonetohara Mariha. Cana Coaunerate ii janiji, ii rai caohacha ichaane coina. <sup>31</sup> Inae leinjiin canaanai siririquiincha. Inae nejanoaane jana Jesoso neein curuaateunicha. <sup>32</sup> Acate itolere cacha amurijiriin itolere que nelateinnein, acaihaniji Cana Coaunera Calaohineein neaneein coitucuha cuurureein cachaaurura. Nii jana Cana Curuaanaa Cana Coaunerate, nii rai foeratera inoensihuru curuaanaa neein nena Rabiri rijijieein *reyneein* tereein, inara Curuaanaanein nihane, <sup>33</sup> rai nere tonoraache inara Israeli cocoaichaneeichene, chabana satonoelanaala inara Curuaanaanein nihane coinara,” naa nii anjerane jana jetao:

<sup>34</sup> “Inasiine bajiaa nitohanein leinjiin canaanai siricheeun nii chuni cacha aina ichaohanune coalanaalata,” naa Marihane jana jetao:

<sup>35</sup> “Cana Coaunera Suujuete aiha suruaane rijijieein ichoae fauha ureein, leinjiin canaanai siriine coinara. Nii jaunte nii canaanai iicha sirii, Cana Coaunera Calaohinereeincha.

<sup>36</sup> Ii araai Isabeli netonai techu, inae leinjiin canaanai siricheeincha. Inae biinaa nihane sainejeeinte inae canaanai siricha. ‘Canaanai sirina inaenihane jaun jete canaanai sirine,’ naauruhane jaate, inae saota atene rai canaanaicha. <sup>37</sup> Coatiha Cana Coaunera rai caaintaai chata,” naa Mariha raine jana jetaote:

<sup>38</sup> “Aihachuhisicha. Niicha belai nichaaunne rai aitohine rijijieein, niicha ichana jerei ichamiin Cana Coaunerara,” naa Marihane jana jetao, inae jelai caje amue nii anjera.

### *Isabeli rene turuha cuha Marihane*

<sup>39</sup> Nii bana jetaote, erojoein cuhin Jodea bichatane que nena neseu cuhin Isabeli rene turuha cue jetao Mariha.

<sup>40-41</sup> Nitohaneein cuhin jetaote, inae ecu turuhin Sacariasi loreri asae enohin, Isabeli rai iriha Marihane aonaain jetao, Isabeli suri cuhane neein nerurujuae nii rai canaanai.



Nii jaun jetaote, Cana Coaunera Suujue que suujuequiin jetao,<sup>42</sup> jataain tonijiaain:

“Cana Coaunerate, itolere enecuru rai caohacha ichaane amurijiriin ichei caohacha ichae. Nii rijijieeintechu nii ii calaohi rai netonai caohacha ichae.<sup>43</sup> Nii jaun chaneeinna jana nereeeun canu, Cana Curuaanaa nebaneetine saijieein carene turuha uhine coina.<sup>44</sup> Nii carene turuhin ereeine aonaainte, rachoojoenaa caaun canu suri cuhane neein nerurujuae carai canaanai.<sup>45</sup> Nii jaunte raotojoeein neei, ii rausiaaeca nii ichei aitoa Cana Curuaanaane esenetaain tonoraaine jaun,” naa Mariha rai Isabeline jana jetaote:

<sup>46</sup> “Aihanuchujian.

<sup>47</sup> Canu suujuate,

itolere niicha ichana naineei ichaain,

canu ichoterateein niha

Cana Curuaanaa

Cana Coaunerane jaun

coroaje,

<sup>48</sup> rai chaneein nenihanune saijieein

canu janijiin canu rausiaaeca

Cana Coaunerane jaun.

Nii jaunte

ena caje coauneein

Cana Coauneraacha rausiajeineein

cacurujuatiha cuurureein

itolere janonaa bana cachaauru,

<sup>49</sup> nitohaneein

jataain canu belaiha

itolere que nelateein

itolere ichana nainera

Cana Coaunerane jaun.

Leinjiin acaachate

Acaneein ne.

<sup>50</sup> Nii Cana Coaunerate,

cairichaaajoaai itolere bana

que suujua acateein

ichaonacaauru coarae.

<sup>51</sup> Nitohaneein itolere niicha

ichana naineei ichaainte,

nii chaque nelatelanaala neeuruha

nii itolere que nelaetoha

nocoetonacaaurune coina

icharaneein ne.

<sup>52</sup> Chaentechu, curuanaacuru

reychuru nihanatiin,

<sup>53</sup> inae cha nelanaala

neeuruhane coina ichae.

Chaentechu,

nii leeochoauru rai  
 chaque nelatelanaala  
 cairicheinejeein nenacaauru  
 rausiaeraneein ne, itolere que.  
 Jana nii coriqui nebaneein nenacaaurute,  
 nii cha colane bijiicha baaeejin  
 niha cuurureein.  
<sup>54</sup> Aihane jaunte  
 rai cacha Isaraelitanichaachene  
 cairichaaajoaain cana  
 coaraane jaun,  
 cana corotajanereein,  
<sup>55</sup> inae nitohaneein ichaane coina,  
 cana inoaensi Abaraaun,  
 nii rai inamacooru,  
 naaonjoainuri rai aitohalu  
 Cana Coaunerane jaun,”

naain jetao Cana Coaunera coroaaje Mariha.

<sup>56</sup> Nitohaneein turuha cunajau nichata ateein Isabeli aina  
 nihane baiha jetaote, jelaiha nenajaun cauha cuelu Mariha.

*Inae nejanoaa cacha coujunacateein baotisaera Joanne*

<sup>57</sup> Inae nejanoaane que tiha nii Isabeli rai canaanaine jaun  
 jetaote, quicha cojoajineein janoae rai neba Isabeli.

<sup>58</sup> Nii jana jetaote, rene turuhacoaain jetao coroaeca cuure  
 rai naraaichuru aina rai laurijiracuru, rai caohacha ichaa  
 Cana Coaunerane coitucuuruha raotojoeine jaun.

<sup>59</sup> Inae fosa janoniha nii canaanai nejanoane jana jetaote,  
 amain rai jaberoco cari saerateein jetao, rai inaca Sacariasi  
 curuaa que jetao curuaatenaa jerecure. <sup>60</sup> Ne jetaote jere-  
 lanaala:

“Aihei, jiaohine. Joaan neein curuaacanete caohachae,”  
 naa rai nebane jaun jetao:

<sup>61</sup> “Chanuna. Inasiina niha niritocojoaain curuajaain  
 charaaine coalanaala niritocohare rai curuaa,” naain jetao  
 jerecurene.

<sup>62</sup> Niritiin jetaote, nii canaanai inaca coujueluhin: “Tohan-  
 riani rai curuaata,” naain jetao bajaasure coitucuuruhane  
 coina.

<sup>63</sup> Nii jaun jetaote, acaauru caje que tein laenaane jaanu  
 bajae jetao biji nejesinaacha que. Nitohaneein bajaain je-  
 taote, “Joaan neein curuaacanete ne,” naain jetao laenae rai  
 inaca, jaiti mituheniha rai nerene jaun. Nii jaun jetaote,  
 satiin cojoelatoore cachaauru.

<sup>64</sup> Nii rijieeoritiin inae nacoauneein mituha nerene jaun  
 jetaote, rachoojoeiin Cana Coaunera coroaaje Sacariasi. <sup>65</sup> Nii

jana jetaote, nitohanihane jaun cojoelatoore rai laurijiracuru coarajeuurera. Nii jaun jetaote, itolereneein Jodea bichatane batane sacuritaain coitucuhin ita rai beeberejetocurelu.

<sup>66</sup> Nii aonaain cojoelatiin jetaote: “Chatohanai neeinna nereein nii canaanai,” naaure jetao, esinae rauhijiriin niicha jerenohineein nenea nihane coaratiha acaauru que Cana Coaunerane coaracuruhane jaun.

*Rachoojoiha Sacariasine*

<sup>67</sup> Nii jana, nii canaanai inaca Sacariasi suujueniha neein que beratihä Cana Coaunera Suujuene jaun jetaote:

<sup>68</sup> “Jataainte caohacha ichae  
Cana Curuaanaa Israeli Coaunerara,  
raotojoein neeuruha  
rai cachaaurune coina,  
ichoteratiha uhana jaunra.

<sup>69</sup> Nii jaunte,  
cana inoaensihuru curuaanaa  
Rabiri nefoerateneein,  
jataain itolere amurijiriin  
nelateein laraajiin nenea letoae,  
jianacoon cana mitaeraanu quera.

<sup>70</sup> Inae catohaneein  
ichaane coinate,  
rai nere bera inoaensihuru  
que beratelura.

<sup>71</sup> Itolere  
cana que nererojoecaain,  
cana aina nejerateein nenacaaru,  
naaonjoaihunri caje  
cana mitaane coina  
aitohalune jaunte,

<sup>72</sup> nii baitena nainene,  
cairichaaajoaain  
cana inoaensihuru coaraain  
aitohalune jaun,  
Cana Coaunerara.

<sup>73</sup> Nitohaneein  
esinae rauhijiriin ichaane coina,  
cana foeratera inoaensi Abaraaun rai:

<sup>74</sup> Jianacoon,  
cana aina nejeratenacaauru caje  
jete cana mitaane,  
cha que casilanaala nere tonoraain  
leinjiin raacha nelateein,

<sup>75</sup> esinae rauhijiriin  
caohacha nejesina ichaain,

baaso coacuelanaala  
 inoalenlu netojoein,  
 itolere janonaa bana  
 nerichaacheeinje,<sup>76</sup>  
 naain belu Cana Coaunera,  
 cana foeratera inoaensi Abaraaun rai.  
<sup>76</sup> Jana ii, cacalabineeinete,  
 acaihanijin Cana Coaunera  
 neein nena ere beraneein,  
 Cana Curuaanaa ajiinchatera  
 neein niha curiquiin,  
 jeriha Cana Coaunerane rijijieein,  
 turunaa nainihane jaanu  
 beebejeeine coina,  
<sup>77</sup> acaauru osa caje  
 acaauru ichoteraterichaain  
 Cana Coaunerane  
 coitucuuruha cachaaurune coinara.  
<sup>78</sup> Jataain cairichaaajoaain  
 cana coaraane jaunte,  
 dede caje cana rai  
 ena nena Cojoanonaa teein  
 ne Cana Coaunera,  
<sup>79</sup> nocohena tabai caje nichoteein,  
 nii rai Cojoanonaa que  
 neconaa in cuhin,  
 cana rai niicha tenojoin  
 raotojoein rachoojoein  
 ichaonaanaja que  
 turuhacachene coinara,”

naain jetao nii canaanai inaca Sacariasi suujueniha neein que beratiha Cana Coaunera Suujue.

<sup>80</sup> Nii jana jetaote, esinae rauhijiriin Cana Coaunera Suujue que suujuequiin jetao, fohejeein cuujue nii canaanai. Nitohaneein fohejeein ichauhenaneein jetaote, cacha areroo amuhemujueein nelu, rai lauri Isaraelitacuru que necoitucueratihane reein tiaaajoaain.

## 2

### *Nejanao Jesusone* (Mt 1.18-25)

<sup>1</sup> Nii nejanoa rai niha Jesusone bana jetaote, itolere-neein cana rai chauratane sacuritaain cachaauru letoaelu reychuru curuaanaacuru curuaanaa enferadoro Aogosto,

satiin cachaauru janijiin acaauru curuaacuru cocoirichaaurohane coina. <sup>2</sup> Nii jauriaanejeein cachaauru curuaa cocoirichaaurohane bana jetaote, Siria batane coberenadoro neein nelu Sirenio. <sup>3</sup> Nii jaun jetaote, satiin acaauru foerateracuru atane cuhacoaain, quiricha cuhane curuaa teratiha cuhacoaurelu lauri lauri caje uhin ecu turunacaauru cachaauru.

<sup>4</sup> Nii jaun jetaote, Calileea batane que nenea Nasarete caje cuhin jetao, Jodea batane que nenea Beleeun cuelu jetao Jose, jelai caje nejanoanaanein nihalu rai foeratera *rey*neein nenaalu Rabirine jaun. <sup>5</sup> Nii jaun jetaote, canaanai cousingu niha Marihane jana, aina jiniiquiin quiricha cuhane curuaa laenaratiha Beleeun cue jetao Jose, ita raauruhane rai netiin. <sup>6</sup> Nii jana inae nejanoaane que tiha nii Maraha rai canaanaine jaun jetaote, nii Beleeun neeurunajau nejanoaelu rai canaanai. <sup>7</sup> Nitohanein, inae nejanoaa nii jauriaanejeein nenea rai calaohine jana jetaote, rai belaae que conaconariin jetao, baca lenone omane ichoae tocoeecae rai neba, neniha loreri turuunajaanune jaun baca coloheri asaae neuru jana nejanoaane jaun.

*Carenero beraihurera renete turuure anjeraauru.*

<sup>8</sup> Nii jana jetaote, Beleen rohan neure fasoto jana janoaajihanaain, letononeein carenerocuru beraihurera cachaauru. <sup>9</sup> Nii jana jetaote, acaauru rai ecooca Cana Coaunera letono anjerane jana jetao, acaauru curuhacaain jilinetoha Cana Coaunera conone jaun, luaa nesooneetooore eluhatohane jaun. <sup>10</sup> Nejetaote acaauru rai: “Coo nesooneetohachera. Raotojoein satiin rachoojoein neriquicheeine jaanune inara rai jataain erenaa caohachanein biha uunra. <sup>11</sup> Enete inara inoensihuru curuaanaa Rabiri neseu nejanoae inara Curuaanaa- inaraacha cohajei Mesihasi jianacoon inara ichoterateraana. <sup>12</sup> Caa inara rai aitocooaunne jaate, coaraa cuhichene, baca coloheri asaae omane ichoaae rai belaae que conaanojonein tocoeechoa jana eruha curiquicheeincha,” <sup>13</sup> naa acaauru rai nii anjerane rijieoriitiin jetaote:

<sup>14</sup> “Jataain rachoojoein  
Cana Coaunera coroaecuruhine dedeeu.  
Raotojoein rachoojoein  
neeuruhine cau chauratane quene maajeein  
niicha rausiajeinein  
nenacaauru-  
rai cachaaurura,”

naain jetao Cana Coaunera coroaecure dede caje arajiin ecoo-joacoain anjeraauru, nii leecha anjera rohan ecocohin.

<sup>15</sup> Inae niritiin jelaiha dedeeu cuuruha nii anjeraaurune jana jetaote:

“Chajamaaunchete aihane, caa cana rai Cana Coauneraacha beratenojohin coanichaache Beleeun cuhinja. Chatohanaiquecha aiteta,” naure jetao ita rai, nii letononeein carenerocuru beraaihurera- cachaauru.

<sup>16</sup> Niritiin erojoein cuhin coaracuruhane jana jetaote, Mariha aina Jose eruuruhane jana jetao, baca lenone omane ichoae rai belaaegue conaanojoneein tocoeque nii canaanai. <sup>17</sup> Nitohaneein eruhin, nii acaauru rai nii canaanai que aitoha anjerane beeuruha nii letononeein carenerocuru beraihurerane jaun jetaote, <sup>18</sup> cojoelatoore jetao satiin ecu neein aonajeeurera cachaauru. <sup>19</sup> Nii jana, rai neba Mariha jetaote, rai suujua cuhane nitohanihane coacuhin jetao, suujuaacha cuhane coaraje. <sup>20</sup> Nitohaneein esinae rauhijiriin nii acaauru rai biha anjerane rijijiein, jitariin coaracuruhane jaun jetaote: “Caohachate ichae cana rai Cana Coaunerara,” naain Cana Coaunera corojeein jelaiha cauha cuure nii letononeein carenerocuru beraihureraauru cachaauru.

*Cacha que suujua acatiha Cana Coaunerane jaa coloheri Teenforo asaae Jesoso causine amauruhane*

<sup>21</sup> Inae fosa janoniha nejanoane jana jetaote, nii canaanai jaberoco macohi cari saerateein, Jesoso neein curuaateure, jaiti ausirineniha Marihane jana aitohalu anjerane rijijiein.

<sup>22</sup> Inae nii aitohalu Moisesane jaan cojoanonaa rijiu que tihane jaun jetaote, jiniiquiin nocoulucoherateeuruhane baiha jetao, Jerosaleeun nii canaanai amaain Cana Coaunera que coitucueratiha cuure. <sup>23</sup> Nitohanihane coina: “Satiin jau-riaanejeein quicha cojoajineein bereeconaa Cana Coauneraacha que nii rai beree banihatemiin. <sup>24</sup> Chaen corotajai tajaee laojoiri serori rijijiein nenea torotola neni-hane, corotajai serori aao uhaaine,” naain aitohalu Cana Coaunerane rijijiein nii niicha bajai tajaee amaain cuure, rai naitoonjoan rijijiein nii tajaee niicha amaauri mocohin que Cana Coaunera belaaain, que nii beree banihateeuruhane coina.

<sup>25</sup> Nii bana jetaote, Jerosaleen ichoaelu leinjiin cacha Simeon. Aca jetaote, esinae rauhijiriin Cana Coauneraacha jerei ichajeein, tururichaaain jianacoon Israeli co-coaichacuru mitaeranune cohajeein nelu. Aca jetaote, que coitucueratiha Cana Coaunera Suujuene jaun, <sup>26</sup> nii ni-icha letoaeni Mesihasi coaraelanaala ohenihane coitucuelu. <sup>27</sup> Nitohanihane jaun jetaote, nii cachaauru que suujua

acatiha Cana Coaunerane jaa coloheri Teenforo asaae Jesoso causine amaauruha rai fojiaraaurune jana que coitucueratiha Cana Coaunera Suujuene jaun coitucuhin, Teenforo asaae cuha Simeonne jana jetaote, que jiniichaain nii Jesoso causine turuaaure rai fojiaraauru Teenforo asaae, Cana Coaunera aitoonjoan nainaaruhane coina. <sup>28</sup> Nii jana jetaote, nii canaanai coariin, raain baiichaain jetao:

<sup>29</sup> “Inae laen  
nii iicha ichanenu  
carai chaitoonjoan  
coaracaaunne jaun,  
inae laen nainichaaun ohanu  
iicha jerei icharanichaaunnera,  
<sup>30</sup> itolere notaracae  
<sup>31</sup> iicha tei jianacoon  
canacaanu mitaeranu  
coaracaaunne jaunra.  
<sup>32</sup> Acate Cana Coaunera  
coitucuelanaala  
Israelitaniheichuru  
lauri lauri nenacaauru que  
acaauru aina  
Cana Coauneraacha  
ichanenu coitucueratereein.  
Chaentechu  
raotojoein rachoojoein  
neeurureein Israelitaauru,  
acaauru lauri caje nena  
neein niha caa iicha letoaine jaun,”

naain jetao Cana Coaunera coroaaje Simeon.

<sup>33</sup> Niritoha nii canaanai que Simeonne aonajeein jetaote, ecu cojoelatoore nii canaanai fojiaraauru. <sup>34</sup> Nii jana jetaote: “Inara coroatajanemiin Cana Coaunera,” naa acaauru raine baiha jetao, Mariha coarajeein:

“Aonaun. Caa canaanaite, arajii Israeli cocoaichacuru itolere que nelaetoha nocoetonacaauru nelatelanaala nedaauruhane jana, leeochoauru tabaauru itolere que nelateein nedaauruhane coina nenaane. Nitohanein nihane corenihate, que jaolecoorureein arajii Israelitaauru,  
<sup>35</sup> satiin que acaauru ichao coitucueraterichaaine jaun. Nete jataain cunaain cacha jaberoco sauha saberene rijijieein, jataain cunaain ii suujuaque tacareein, que nejerateeriin neeururichaaine jaun,” nae jetao Mariha rai Simeon.  
<sup>36</sup> Nii jana jetaote, ecu nelu leinjiin ene netonoai- Cana Coaunera ere beraneein nena. Acate Asere laurineein nena- Fanoeri cacunu camotojoe Ana ne. Aca jetaote,

jataain ranuna neein nelanajaaain, caaunsi jaanacanejeein lana aina ichoaelu. <sup>37</sup> Nii baiha jetaote, fosachoonca jena jaanacaaneein nirijieein autananeein ichaohin jetao, suri couu netiinchuru janotiin inetojoeinchuru, sonafaajihanaainchuru Cana Coaunera bajaee bajajeein nerejetelu nii Teenforo caje mituhelanaala. <sup>38</sup> Nii Ana jetaote, nii Jesoso causine turuaauruhane jana ereereeca Simeonne coaraain jetao, acaentonoai nii Jesoso causine que ereereje, satiin nii nichoteeururichaain Jerosaleen cocoaichacurune cohajeraauru cachaauru rai.

### *Jelaiha Nasarete caauruhane*

<sup>39</sup> Inae nitohaneein jeriha Cana Coaunerane rijijieein rai naitoonjoa ichacuruhane baiha jetaote, jelaiha rai natane-Calileea batane que nenea Nasarete jetao cauha cue Jose, Mariha aina. <sup>40</sup> Nii jana jetaote, fohejeein itolere que nainaan ichauchenanihajein sacue nii canaanai, coroata-janiha Cana Coaunerane jaun.

### *Teenforo asaae niha canaanai Jesusone*

<sup>41</sup> Ajaanaa naineein jetaote, Jerosaleeun cuhin Fasocoa beseta bitoaa cunajaaoncure nii Jesoso fojiaraauru. <sup>42</sup> Nitohaneeuruhane jaun jetaote, inae lechoonca coroata jaanacaa Jesusone jana jetao, nitohaniha acaauru ichaone jaun satiin cuhin nii beseta bitoaa cuure Jerosaleen. <sup>43</sup> Inae beseta bitoaaauruhane baiha, jelaiha nenajaun cauha cuuruha rai fojiaraaurune jana jetaote, Jerosaleeun nedae coitucuenihane jana nii canaanai Jesoso. <sup>44</sup> Nii jaun jetaote, “Inae jecha ichoaichaniha cunacaauru aina cauha cuha nii Jesoso,” naa fojiaraauru suujuane jaun jetao, le janohin cuuru baiha, niicha coitucuuri, naraaichuru, naaonjoaihunri jana arihure niqui rai fojiaraauru, nejetaote eruurene. <sup>45</sup> Nitohaneein eruurenihane jaun jetaote, jelaiha nejenohin ariha cuure Jerosaleeun.

<sup>46</sup> Nitohaneein cuhin jetaote, nichata janohane cuhane jetao Teenforo asae, Moisesa aitoonjoan que cacha relaaureraauru aina, ita rai ereeuruhane aonajeein, acaauru caje nii ereeuruhane jaan bajaee lauhequinne jana eruha cuure. <sup>47</sup> Nii jana, jataain nainaan, nii ereeuruhane aonajeein, acaauru caje bajaain, acaauru tonoraane jaun jetaote, cojoelatoore satiin ecu neein aonajeeurera cachaauru. <sup>48</sup> Nitohanihane jana eruhin jetaote:

“Chanuna canacaanu rai belanaala nitohaneente canaanai. Ii inaca ainane ii ariirijiacaanu, neeine jaa coitucuenihacaanune jaun ii coinaderaain,” naa rai nebane jana jetaote:



49-50 “Chanuna canu ariirijieeiche. Tana canu inaca loreri asaae nihanu niicha jerenohineeine coitucuhicheneta,” naain acaauru tonoraa Jesusone jana jetaote: “Naaonjoaiquete aitera,” naain coitucusichurene rai fojiaraauru.

<sup>51</sup> Nitohaneein fojiaraauru jiniichaain Nasarete cauhin jetaote, rai fojiaraauru ere tonoraain nerejetelu.

Satiin niriinanai jetaote, rai suujuaacha cuhane coarajerejetelu rai neba. <sup>52</sup> Nitohaneein fohejeein ichauhenaniha-jeein, itolere que jataain nainaan jetaote, satiin cachaauru aina caohachaaain ne nii Jesoso, coroatajanein aina caohachaaain niha Cana Coaunerane jaun.

### 3

*Cacha areroo niha cacha cojunacatera Joaan ne*  
(Mt 3.1-12; Mr 1.1-8; Jn 1.19-28)

<sup>1</sup> Inae lechoonca saouqui jaanacaain satiin cocoinanacaai-huri curuaanaa enferadoro neein niha Tiberione bana jetaote, Jodea batane rai coberenadoro neein nelu Ponsio Filato. Nii jana Erodesi jetaote, Calileea batane rai coberenadoro neein nelu. Nii jana rai nejera Ferifi jetaote, Taraconite, Itorea, naaonjoahuinri batane rai coberenadoro neein nihane jana, Abilinia batane rai coberenadoro neein nelu Lisania. <sup>2</sup> Nii jana Caifasi, Anasi, naaonjoaihunri jetaote, saseredotecuru curuaanaacuru- curuaanaaneein neurelu. Nii bana jetaote, Sacariasi calaohi Joaan rai jetao erelu Cana Coaunera, cacha areroo rai ecocohin.

<sup>3</sup> Nii jaun jetaote, Jorodaan auhaniha nenacaauru ne-naanajaauru cuujecujeein jetao, “Jeriha Cana Coaunerane rijijieein inara suujua coreeuchete acauhanau teein cojunacatenohineein baotisanajoineein neeichete, inara osa caje inara ichoteratemiin Cana Coaunerara,” naain jetao, cachaauru rai beebeje Joaan. <sup>4-5</sup> Nitohaneein jetaote, icharejete Joaan. Niritiin laenaalu Cana Coaunera ere bera inoaensi Isaihasine rijijieein:

“Nerichaaain cacha areroo eheehejeein:  
‘Cana Curuaanaa turunajaanu coeroteeuche,  
raujuiin cuaain.

Satiin turiararoorute  
nemoanojoinereein.  
Atane ucuunooru nihanatiinte  
ranaasiin macaracanojoi  
nijihacoaa cureein.

<sup>6</sup> Nii banate,  
satiin caa chauratane que

nenacaauru cachaauru  
 jianacoon cacha mitaeraanu  
 letoaa Cana Coaunerane  
 coaracurureein,' ”

naain nii Joaan que aitiin laenaalu *profeta* inoaensi Isaiha-sine rijijieein jetaote ichae Joaan.

<sup>7</sup> Inae nitohaneein cachaauru cojunacatiha acauhanau teein baotisaa Joanne coitucuhin, rene cuuruha cachaauru, acauru baotisaane coinane jana jetaote: “Chaa inara osa coreniha caseteco tabai turu rai nenea caje nichoteein, jianacoo mituriquicheeine que inara rai aite, taibinae-curu. <sup>8</sup> Nitohanihane jaun, nii ajiniha caohachaa inara ichao coreein, Cana Curuaanaa Cana Coaunera coitucuhin esenetaain neeuchete, Cana Curuaanaa coitucueraneein inanacaaichene coaracurumiin cachaauru. Chaenchu jiaonriha: ‘Abaraaun nefoerate nichaanune jaun cha latihacaaanu canacaanu,’ naain inara raajeniha necoritanaa nainiheeiche. Cana Coauneraachate nainere, caa ajeri jaberoco caje Abaraaun nefoerate coaunaane. <sup>9</sup> Chaentechu, inae ajianojoneein ne tero, inaana inaeniha temulene rai cojoaisi aina curuataain sauhin usihanau mocohacane rijijieein, inae jaoleneein neeuruha Cana Coaunera coitucutoha nocoetonacaurune coina,” nae jetao acauru rai Joaan.

Niritoha acauru rai Joanne jaun jetaote: <sup>10</sup> “Chatohanai jana icharihacaanu canacaanuta,” naain caje bajaauruhane jaun jetaote:

<sup>11</sup> “Coroatajaain obiri siricha, nii obiri colane nenea rai leinjiin teeine. Chaen lenone siricha, nii lenone colane nenea rai teenera,” nae jetao acauru rai Joaan.

<sup>12</sup> Nii jana jetaote, Roma curuaanaa rai *impoesto* nuque cachaauru cobaraain coriqui bajaaurera tabaauru netonai, acauru baotisaa Joaan necoina turuhin jetao:

“Chatohanai jana ichariacaanu canacaanuta cacha re-laera,” naauruhane jana jetao:

<sup>13</sup> “Jiaonriha aitocuruha inara curuaanaacurune amuritoojaain cachaauru cobaraain leruhin basijiauhichenera,” naa acauru rai Joanne jana jetaote:

<sup>14</sup> “Chatohanai jana icharihacaanu canacaanuta,” naain caje bajaauruha soondarooru tabaaurune jana jetaote:

“Jiaonriha chatohanai ichaeniha chunine jana couluru-jeein sonaa coacuhin cotaain niicha sirii rulunaa coauquichene. Inara amihaneeo corenihacha ichaaochera,” naa Joanne jana jetaote, <sup>15</sup> jataain turuha Mesihazine cohajeeruhane jaun jetao:

“Caa canaacha cohajei Mesihasi chara inae caa turuera,” naain jetao ita caje Joaan bajaasure nii ecu neein coarajeerera cachaauru.

<sup>16</sup> Niritiin ita caje bajaauruhane jaun jetaote, acaauru rai: “Canune esinae rauhijiriin, raujiaain acauhanau inara teein inara baotisaaun. Jana nii cacaaijie uhenite, Cana Coaunera Suujue, usi, naaonjoain que inara baotisaa ureein. Acate jataain camurijiriin nelateein cocoinaain letononeein ne. Nii rai safato ichora rutueranuque nihanatiin nelatejeehaaun. <sup>17</sup> Chaentechu leinjiin inaro uhareein que aroso jiatuhin rai caohacha raain, rai bano mocoha charijibana jacanaacharanejeein nenea usihanaau teeine caina. Nii rijijieeinte, nii jeriha Cana Coaunerane rijijieein nenea jeriheichuru mocoha cureein, jerihane rijijieein nenacaauru janijiin raaincha,” nae jetao satiin ecu rene turunacaauru cachaauru rai Joaan.

<sup>18</sup> Niritiin acaauru suujuatein jetaote, acaauru rai Cana Coaunera beratenojoi Jesuso que Erenaa Raotono beebeje Joaan. <sup>19</sup> Chaen jetaotechu, coberenadoro Erodesi netonoai suujuate, rai nocoala Ferifi comasai Erodiasi siria comasaineine jaun, chaen itolere baasooru ichaain nihane jianihane caina. <sup>20</sup> Nejetaote, nitohanein nii baaso ichaane ichoae tacaain, caresero cuhane Joaan enoae, rai niritohane coreniha.

*Jesoso baotisaa Joanne*  
(Mt 3.13-17; Mr 1.9-11)

<sup>21</sup> Nitohanein jetaote, jaiti caresero cuhane enoaniha Erodesine jana, acauhanau satiin cachaauru teein cojunacatenaaca acaauru baotisarejete Joaan. Nitohanein cachaauru baotisaa Joanne jana jetaote, Jesuso netonai nebaotisaeratein Cana Coaunera bajaane jana, neyoracaa dede bacuujuane jana jetao, <sup>22</sup> nichoae fauhin nelauriaa uhe inanacaain Cana Coaunera Suujue leinjiin serori rijijieein. Nii jana jetaote: “Iite acaihaniji quiicha jeree, quiicha janijiin cacalabinein neeicha,” naain toniha erenaa dedeune jana jetao aonajeeure.

*Jesocurisito foerateureraauru*  
(Mt 1.1-17)

<sup>23</sup> Inae nii Cana Coauneraacha icharatenohin namihaneon nunuhetihane bana jetaote, nichata choonca jaanaca nelu- nii Jose calaohi niha acaauruacha bei Jesuso.

Nii jana nii Jose jetaote Eli calaohi nelu.

<sup>24</sup> Jana Mataa calaohilu jetao Eli.

Jana Lebi calaohilu jetao Mataa.

Jana Meriqui calaohilu jetao Lebi.

Jana Janaa calaohilu jetao Meriqui.  
 Jana Jose calaohilu jetao Janaa.  
 Jana Matatiasi calaohilu jetao Jose.  
<sup>25</sup> Jana Amoso calaohilu jetao Matatiasi.  
 Jana Naaoso calaohilu jetao Amoso.  
 Jana Esili calaohilu jetao Naaoso.  
 Jana Nacaai calaohilu jetao Esili.  
<sup>26</sup> Jana Maati calaohilu jetao Nacaai.  
 Jana Matatiasi calaohilu jetao Maati.  
 Jana Semei calaohilu jetao Matatiasi.  
 Jana Jose calaohilu jetao Semei.  
 Jana Jodaa calaohilu jetao Jose.  
<sup>27</sup> Jana Joanaan calaohilu jetao Jodaa.  
 Jana Resaa calaohilu jetao Joanaan.  
 Jana Sorobaberi calaohilu jetao Resaa.  
 Jana Salatieli calaohilu jetao Sorobaberi.  
 Jana Neeri calaohilu jetao Salatieli.  
<sup>28</sup> Jana Meriqui calaohilu jetao Neeri.  
 Jana Adiin calaohilu jetao Meriqui.  
 Jana Cosamii calaohilu jetao Adiin.  
 Jana Eremadaan calaohilu jetao Cosamii.  
 Jana Eri calaohilu jetao Eremadaan.  
<sup>29</sup> Jana Jesoso calaohilu jetao Eri.  
 Jana Eliseri calaohilu jetao Jesoso.  
 Jana Jorimi calaohilu jetao Eliseri.  
 Jana Mataa calaohilu jetao Jorimi.  
<sup>30</sup> Jana Lebi calaohilu jetao Mataa.  
 Jana Simeon calaohilu jetao Lebi.  
 Jana Jodaa calaohilu jetao Simeon.  
 Jana Jose calaohilu jetao Jodaa.  
 Jana Jonaaun calaohilu jetao Jose.  
 Jana Eliaquiin calaohilu jetao Jonaaun.  
<sup>31</sup> Jana Meleea calaohilu jetao Eleaquiin.  
 Jana Mena calaohilu jetao Meleea.  
 Jana Matata calaohilu jetao Mena.  
 Jana Nataan calaohilu jetao Matata.  
<sup>32</sup> Jana Rabiri calaohilu jetao Nataan.  
 Jana Isaihasi calaohilu jetao Rabiri.  
 Jana Oberi calaohilu jetao Isaihasi.  
 Jana Bosi calaohilu jetao Oberi.  
 Jana Sala calaohilu jetao Bosi.  
 Jana Nasoon calaohilu jetao Sala.  
<sup>33</sup> Jana Aminadaba calaohilu jetao Nasoon.  
 Jana Admin calaohilu jetao Aminadaba.  
 Jana Esroon calaohilu jetao Armi.

Jana Faresi calaohilu jetao Esroon.  
 Jana Jodaa calaohilu jetao Faresi.  
<sup>34</sup>Jana Jacobo calaohilu jetao Jodaa.  
 Jana Isaca calaohilu jetao Jacobo.  
 Jana Abaraaun calaohilu jetao Isaca.  
 Jana Tare calaohilu jetao Abaraaun.  
 Jana Nacoro calaohilu jetao Tare.

<sup>35</sup>Jana Seroo calaohilu jetao Nacoro.  
 Jana Raco calaohilu jetao Seroo.  
 Jana Fele calaohilu jetao Raco.  
 Jana Eberi calaohilu jetao Fele.  
 Jana Sala calaohilu jetao Eberi.

<sup>36</sup>Jana Cainaa calaohilu jetao Sala.  
 Jana Arafasa calaohilu jetao Cainaa.  
 Jana Sem calaohilu jetao Arafasa.  
 Jana Nohe calaohilu jetao Sem.  
 Jana Lamee calaohilu jetao Nohe.

<sup>37</sup>Jana Matosalee calaohilu jetao Lamee.  
 Jana Enoco calaohilu jetao Matosalee.  
 Jana Jaredi calaohilu jetao Enoco.  
 Jana Malareri calaohilu jetao Jaredi.  
 Jana Cainaa calaohilu jetao Malareri.

<sup>38</sup>Jana Enoso calaohilu jetao Cainaa.  
 Jana Seti calaohilu jetao Enoso.  
 Jana Adaan calaohilu jetao Seti.

Nii jana Adaan jetaote, jauriaanejeein Cana Coauneraacha coaunaineen nelu.

## 4

*Jesoso coujuhin coaraa moconajaerane*  
 (Mt 4.1-11; Mr 1.12-13)

<sup>1</sup> Nii baotisaa Joanne baiha Cana Coaunera Suujue que suujuequiin nucuhe Jorodaaun caje cauha cuha Jesusone jana jetaote, cacha areroo amaa Cana Coaunera Suujuene jaun jetao, <sup>2</sup> ucuaae niha jena choonca janoneeinne jana, nechu cojuha sarue moconajaera.

Nitohaneen jenachoonca janoneein lenone lanaala ni-hane jaun mijiintohane jana jetaote:

<sup>3</sup> “Chajaain aihane esinae rauhijiriin Cana Coaunera Calaohi neeine, caa ajeri jaberoco rai aitoote lenoneneen nerotomiincha,” naa nechu saruha rai moconajaerane jana jetao:

4 “Coatiha lenoneecha que ichaonaa nainihe cache,’ aite Cana Coanera, rai Quiricha cuhane,” naain tonoraa Jesusone jaun jetaote, <sup>5</sup> luhecotariin ecuun amaain, satiin caa chauratane coarateein jetao:

6 “Canune jitariin canuhacha ichana nainei aina satiin caa chauratane que nenacaauru curuaanaacuru curuaanaanein neeine coina, ichei tenaa naineen. Satiin acaauru canu raineen neeuruhane jaunne chunicoha jerera rai tenaa naineen.

7 Aihane jaun neseeriaain canu corojeein, canu bajae bajaequinete satiin ichei niha cureein,” naa moconajaerane jana jetao,

8 “Nete, ‘Acaihanijin ii Coaneraacha corojeein, rai nela-  
teein niicha jerei ichaau,’ naain laenaerate Cana Coanera,  
rai Quiricha cuhane,” naain jetao tonorae Jesuso.

9 Nii baiha jetaote, Jerosaleeun amaain ecuun Teenforo ichoae inaain jetao:

“Chajaain aihane esinae rauhijiriin Cana Coanera Calaohi neeine caalai caje nemaroteeute coaracaa. <sup>10</sup> Cana Coanera Quiricha inoansi cuhane te:

‘Rai letonocuru anjeraauru  
letoarichaa in Cana Coanera  
ii beraaihuruhane coina.

<sup>11</sup> Acaaurute rai biji que

ii michuurureein, nabana ajeri que  
necunaitaaine coataa,’

naain laenaerate Cana Coanera, rai Quiricha cuhane,” naa moconajaerane jana jetao,

<sup>12</sup> “Chaentechu: ‘Coa ii Coanera coujuhin coaraara,’ naain laenaerate Cana Coanera, rai Quiricha cuhane,” naain tonoraa Jesusone jana jetaote, <sup>13</sup> ecu ratiriin carajaaajoaain caje amuhe nii Moconajaera, neniha tonaain Jesuso coujuhin coaraane jaane coitucuenihane jaun.

*Calileea bataneu namihaneeo nunuhetiha Jesusone  
(Mt 4.12-17; Mr 1.14-15)*

<sup>14</sup> Nitohaneen, Cana Coanera Suujue que suujuequiin niicha ichana nainei coitucuhin, Calileea cauha cuha Jesusone jana jetaote, satiin atane sacuritaain jetao que ereeure coitucuhacoaain cachaauru. <sup>15</sup> Nitohaneen cuhin jetaote, netao-  
ji-  
aain Cana Coanera rai Rauhi que ereereecuruhane jaa col-  
heri sinacocaaauru naineen cuhecujeein cachaauru relaane  
jaun jetao, satiin coroaecure cachaauru.

*Nasareteu niha Jesusone  
(Mt 13.53-58; Mr 6.1-6)*

16 Nitohaneein cuujue cuujueein jetaote, nii neein fohecalune jaan Nasareteu jetao cauha cue Jesoso. Nii jana jetaote, nitohaniha rai nichaone jaun jetao, nebetacaanaa cojoanonaa bana sinacoca asae enoha cue, Cana Coaunera Quiricha ereretaane coina. Nitohaneein ecu enohin chujuhecohane jana jetaote,<sup>17</sup> rai *profeta* inoaensi Isaihasicha laenai quiricha teeure, ereretaane coina. Nii Quiricha ereretaane coina jasasaane jana jetaote:

18 “Cana Coaunera Suujuete caniha ne,  
niicha jerenohineein,  
‘Inae raotojoein neriquicheein,’  
naain cairichaihuru rai bihanune coina.  
Chaentechu,  
‘Inae jianacoo neriquicheein,’  
naain casetecocuru rai bihanune coina caletoe.  
Nii choae tacaain techu,  
maosacuru coichaaain acaauru nota rautaaain,  
cairichaihuru ichoteratichaaunne coina caletoe,  
<sup>19</sup> nitohanerichaaain  
inaraacha cohajei Cana Coaunera Cojoanonaa  
coitucueratihanu inara quene coina,”

<sup>20</sup> naain ereretaane baiha jelaiha nii quiricha seriin, sinacoca curuaanaa rai teein nelauriariin lauhecoha Jesusone jana jetaote, chaque tonaelanaala coarajeeure satiin ecu nenacaauru cachaauru. <sup>21</sup> Nii jana jetaote: “Enete esinae rauhijiriin caa Cana Coaunera Quiricha cuhane aithane rijijieein, satiin inara acatiha turuhe caa naitoonjoa coarajeeichene notaracae,” naa acaauru rai Jesusone jana jetaote,  
<sup>22</sup> ita rai ereerecure caohacha ichaa Jesusone que, satiin cojoelatiin coarajeein, acaauru rai raotojoein ereerecane jaun. Nejetaote tabaauru:

“Tajian caa Jose calaohinihaneta,” naain jetao ita caje bajaure.

<sup>23</sup> Nii jaun jetaote:

“Jerihanete esinae rauhijiriin caque, ‘Aihane, cacha coichana inaeraneeine, ichaajenihane nocohichaaain canacaanu notaacune coaracaanura,’ naain caque ereeiche. Chaentechu jerihane, ‘Aihane itolere ichaa Cafereanaonne rijijieein, cau chatane que jerichanejeein itolere ichaaain canacaanu notaacune coaracaanura,’ naain ereeiche canu esenetaeneeinchene jaun,” naain jetaote:

<sup>24</sup> “Esinae rauhijiriine inara rai aitoreeunni. Coatiha esinae rauhijiriin, caohachaaain ranojoneein niheilun chuni Cana Coaunera ere beraneein nenacaauru *profetacuru* rai

nataneque. <sup>25</sup> Coaracuche nachuhinti jataain arajiin neeu-ruhalu Isaraelitanichaachene benecuru autanaaunru, ni-halu Cana coaunera ere bera *profeta* Irihasine banane. Nii banate nichata jaanaca amurijiriin uheniha elone jaun, banejelanaala cana atane Isaraeli batane sacuritaain nelu mijitena omaroeniha temulene jaun. Nete nii cana benecuru autanaauru rene letono nenelu nii bana nenea *profeta* Ir-ihasi. <sup>26</sup> Nete laen coriaae atane que leinjiin Sidoon nese roha nenea Sarepta neein curuajai neseu cana lauri Isaraeli-tanelanaala nenea autana reneecha letononeein kuhelu nii Irihasi, nii autana rai lenone faane coina. <sup>27</sup> Jerichanejeein techu, arajii cana laurichuru Isaraelitacuru somane cauun cunaitecuruhane jana, acaauru rautaaenelu Cana Coaunera ere bera *profeta* inoaensi Iriseeo, cana lauri caje nenea nihane saijieein. Nete laen, leinjiin Siria cocoaicha cana lauri Isaraelitanelanaala nenea Naamaancha jetaote rautaelu,” nae jetao acaauru rai Jesuso.

<sup>28</sup> Niritoha acaauru rai Jesusone jaun jetaote, satiin aina jataain obaaecure nii sinacoca asaae nenacaauru cachaauru. <sup>29</sup> Nitohaneein aina obajeein nimichucutaain jetaote, nii sinacoca caje sitaain, ichatane ecuunoo ichoae ichanohi niha nii nesene jaun jetao, ecu amaaunre jelai caje coauneein nii Jesuso saruhitocuruhane coina niqui, <sup>30</sup> nejetaote, cha que tonajelanaala acaauru cataaun situhin amuhe Jesuso.

*Suujua cuhane coitucuchuhi siricha cache*  
(Mr 1.21-28)

<sup>31</sup> Nitohaneein sitaauruhane jaun amuhin jetaote, Calileea batane que nenea Caferenaaon cue Jesuso. Nitohaneein cuhin, ecu turuhin jetaote, ecu neein nebetacanaa cojoanonaa bana, <sup>32</sup> ecu nenea sinacoca asaae neein cachaauru relaane jana jetao, rautatiin aonajeeure cachaauru, leeochoaauru cache relaaurera rijijielanaala, esinae rauhijiriin rai suujua caje rocohin acaauru relaane jaun.

<sup>33</sup> Nii jana jetaote, nii sinacoca asaae ne leinjiin rai suujua cuhane coitucuchuhi siricha cache. Aca jetaote, tonijiaain ehequuin:

<sup>34</sup> “Coa canacaanu rohehacaara Nasarete cocoaicha Jesuso. Nechu canacaanu cairichaain canacaanu itajihate uhicha. Canune raotojoeein ichoitucuunra. Iite acaihaniji Cana Coaunera letononeein nenaaneeicha. Canacaanu jianeura,” naane jana jetao,



35 “Coaa maitaa. Nii cacha suujua jianeein caje amuura,” naa Jesusone jana jetaote, satiin cachaauru acatiha chatohaneein cunaitaelanaala atane ichoae nii cacha siheitiin rai suujua caje amue nii coitucuchuhi.

36 Nii jana jetaote, satiin nesoonetiin coarajeein jetao:

“Chatohanai cocoainanacainein nenaana caa cacha, jataain chaque tonajelanaala nere nejesinaacha que caritohane jana caa cacha suujua caje mituha coitucuchuhi, rai nere tonoraainne coina,” naain jetao ita caje bajaarecu neein nii coarajeeurera cachaauru.

37 Nitohanihane jaun jetaote, satiin nii atane sacuritaain jetao, Jesuso que ita rai ereerecure cachaauru.

*Simoon Fedoro tano rautaa Jesusone*

*(Mt 8.14-15; Mr 1.29-31)*

38 Inae nii sinacoca caje mituhin, Simoon loreri asae turuha cuha Jesusone jana jetaote, najiniha ajaa caaun cunaiteein niha Simoon tanone jaun jetao, Jesuso rai aitocure rautaane coina. 39 Nii jaun jetaote, nichoae nenoracaain nii ajaa sitaa Jesusone jana jetao, inae caje amuhe nii ajaa. Nii jaun jetaote, inae nerautaane jaun nimichuin acaauru rai lenone chalue.

*Arajii cunaitenaacuru rautaa Jesusone*

*(Mt 8.16-17; Mr 1.32-34)*

40 Nii jana jetaote, inae nuna macohi ichoae teejia enotone jana, araai laurii cunai caaun cunaitenacaauru turuaa cure Jesuso rene, acaauru rautaane coina. Nii jana jetaote, cajanae cajanajeein acaauru ichoae biji meracaane jaun jetao nerautaacoaure. 41 Chaen jetaotechu, suujua cuhane moconajaera letono sirichaauru netonoai rautaane nii nerautanacaauru cachaauru caje mituhin:

“Iite Cana Coaunera Calaohi neeicha,” naauruha cojiorinne jetao, ereeuruha nii coitucuhichurune caohate Jesuso, Aca Mesihaseinein nihane coitucuuruha nii coitucuhichurune jaun.

*Sinacoca asae Cana Coaunera cojoanona beebejia Jesusone*

42 Nitohaneein jetaote, inae nemataracaa janonaane jana, nii nese caje amuhin neniha cachane jaa cue Jesuso. Nii jaun jetaote ariin, nii nihane jaa turuhin, jelai caje amuhane caohateeuruha cachaurune jana jetao,

43 “Nena leochaauru nenaanajaaunru cuhecujeein Cana Coaunera Cojoanona beebejia cureeun, nii coina letononeein nihanune jaun,” nae jetao acaauru rai Jesuso.

44 Nitohaneein jetaote, Jodea batane sacuritaain nenacaauru Israelitacuru rai sinacocacuru nainein cuhecuje niicha beeni beebejeein.

## 5

*Cojoelanaacojoaain ate mucuuruhane*  
(Mt 4.18; Mr 1.16-20)

<sup>1</sup> Calileea conemuri auhaniha turuhin, ecu Cana Coaunera naitoonjoan que cachaauru relaa Jesusone jaun, aonaa turuuruha arajiinne jaun jetaote, sururucure cachaauru.

<sup>2</sup> Nitohaneein sururucuruhane jana jetaote, caje fauhin redeeuru culeecuruha ate mucuurerane jana, carene que conera colane coroatajaain boteeuru coaari Jesuso. <sup>3</sup> Nii jana, Simoon rai niha nii ecu nena leinjiin botene jaun jetaote, cuhane fauhin, nemuri auha caje acau cataaunjeri nii bote amaa Simoonne coina aite Jesuso. Inae nemuri auha caje acau cataaunjeri amauruhane jana jetaote, nii bote cuhane netiin, ecu nelauriariin caje coauneein cachaauru rai ereerejeein acaauru relaje.

<sup>4</sup> Inae acaauru relaane nainain jetaote:

“Taa nemuri ucuaano que caa bote amaain, ecu caa inara rai redeeuru jaochette ate mucuhichera,” naa Simoon raine jana jetaote:

<sup>5</sup> “Nena inae janoaajeein rede jaohacaanu natiin, leinjiinni-jin ate mucuelanaala janohacaanura cacha relaera. Nenachu ii aitohine jaun, nacoauneein caa redeeuru jaohin coaraa curichaanura,” naain jetao tonorae Simoon.

<sup>6</sup> Niritoha acaauru rai Jesusone jaun redeeuru jaoruhane jana jetaote, jataain arajiin ate mucuuruhane jaun jetao, ate caaun nesoaiji nii acaauru rai redeeuru. <sup>7</sup> Nii jaun jetaote, leeocho bote cuhane nenacaauru acaauru leeochoaauru cotihacure biji que, acaauru coroatajaniha cuuruhane coina. Nii jaun jetaote cuhin, nii coroatajai bote nemoaauruha ate quene jaun jetao, jataain naluhene rijjijeein nelemue nii coroatajai bote. <sup>8-9</sup> Nitohaneein jataain arajiin ate mucuuruhane jaun jetaote, jataain cojoelatiin satiin nesoone-tooruhane jaun, Jesuso tijia asae neseeonriaain jetao:

“Jataain osaaotohanune jaun ii rohan nena nainihaaunta Curuaanaa,” nae jetao Simoon Fedoro nesoone caaun.

<sup>10</sup> Nii jana jetaote, nii Simoon aina neurelu Sebedeo calaohichuru, Joaan, Saantiaao, naaonjoaihunri, nii Simoon aina ate mucueraneein neeuruhane jaun.

Niritoha Jesuso rai Simoonne jana jetaote:

“Coa nesooneetohara, Simoon. Inae ate mucueraneein nerihheini. Ena caje coauneente, cachaauru mucuhin raeranein neriquincha,” nae jetao rai Jesuso.

<sup>11</sup> Niritoha raine jaun jetaote, atane ichoae acaauru rai boteeuru inaain, jitariin niicha sirii ratiriin jetao Jesuso aina cuure Simoon Fedoro, Joaan, Saantiaao, naaonjoaihunri.

*Leinjiin cosibi ruhecaera cacha rautaa Jesosone*

<sup>12</sup> Nii baiha leinjiin neseu neeuruhane jana jetaote, Jesoso rene turuha cue leinjiin cacha cosibi ruhecaain caaun cunaiteein, nitohanai cunai siricha cacha leeochoauru rohan turunaa nainenihane saijieein. Aca jetaote, Jesoso coariin atane que nauri turuanacanejeein notoroaain jetao:

“Ii jereeine canu rautaa caa canu cosibi cajera Curuaanaa,” naane jana jetao:

<sup>13</sup> “Jerichaaun chujian. Ii caje amuhine caa ii cosibi,” naain biji que dadae Jesoso, nihei chuni cacha, nitohaneein cosibi ruhacaera dadanaa nainenihane saijieein. Nitohaneein dadaa Jesosone rijieeoritiin jetaote, inae caje amue nii rai cosibichuru.

<sup>14</sup> Nitohaneein rautaaain jetaote:

“Inae nerautaaicha. Coa chaen chuni rai: ‘Acate canu rautaera,’ naain caque iriha. Raujiaaincha Cana Coaunera aina caohachaaain niha cachane coina rucuhaneein nenea saseredote rene turunihute, inae coulunohineein ii cosibi caje nerautaaaine coaramiincha. Chaen nerautaaaine coujunacane que nii aitolalu Moisesane rijijieein belaaaine jaanu amaain teeu saseredote raicha. Aihute inae nerautaaain somaraain neei nii ii cosibi cajene coaraain, inae acaauru rohan turunaa naineine coitucuurumiin satiin cachaaurura,” naain jetao letoae Jesoso.

<sup>15</sup> Ne jetaote, niritiin bihane caohatiha Jesosone saijieein, acaauru rautaane coinane maajeein jataain jelai amuritoheriin turuhacoaain coaraain aonaa uure cachaauru. <sup>16</sup> Ne jetaote, tabaauru que acaauru caje amuhin, nii neniha cachane jaau cuhin jetao Cana Coaunera bajarejetelu Jesoso.

*Leinjiin jiuirona rautaa Jesosone*

*(Mt 9.1-8; Mr 2.1-12)*

<sup>17</sup> Nii baiha, cachaauru relaa Jesosone jana jetaote, ecu nelauriaacoaain aonajeeure fariseeocuru tabaauru, Cana Coaunera naitoonjoa que cacha relaaunera, naaonjoainuri, Calileea batane, Jodea batane, Jerosaleen, naaonjoaihunri sacutaainchuru caje uhacoaain. Nii jana jetaote, aina cuaain niicha ichana nainei ichaa Cana Coaunerane jaun, cunaitenacaauru rautaacoaa Jesosone jana jetao, <sup>18</sup> leinjiin cacha jiuirona turuaa uure cachaauru, rai nela cuhane tijichaaain amaain. Inae turuaain jetaote, loreri asae enoanaa jerecure, nacatiha coaraa Jesosone coina niqui. <sup>19</sup> Ne jetaote, nene enooruhane jaanu, jataain araaicha cachana jaun. Nii jaun jetaote, loreri coarana joaracaain jetao rai nela cuhane tijichaaain, satiin cachaauru cataaun jetao Jesoso

acatiha nii jiurona cacha faaure. <sup>20</sup> Nii jana, esinaen rauhi-jiriin rautarichaaanne esenetaain aihuruha nii cachaaaurune coaraane jaun jetaote:

“Inae ii que suujua acateein ii osa caje ichoteratenohinee-icha cacalabi,” naa Jesusone jana jetao, inae nerautae nii cunaitenaa cacha.

<sup>21</sup> Niritiin nii jiurona rautaa Jesusone aonaain jetaote:

“Chaneeinna ne caa cacha, caritiin ereein Cana Coaunera baijiaraanu rijitiin irihane coina. Leinjiin Cana Coaunera-aachate nainere nosa caje cacha ichoterateein cacha que suujua acateein nihanera,” naain jetao ereeure Cana Coaunera naitoonjoan que cacha relaaurera aina fariseeocuru.

<sup>22</sup> Niritiin que ereeuruhane que nainaan jetaote: “Chanuna niritiin ereeiche. <sup>23</sup> Chaquena caaintare: ‘Inae ii que suujua acateein ii osa caje ichoteratenohineeicha,’ naenihacane: ‘Nimichuhin amuun,’ naacane. <sup>24</sup> Coarajeeuchenejian, Cana Coaunera Calaohi cachaneein nejanoanaa nichaaunne, itolere Curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiurona cacha rai jetao:

“Icheine aitoon. Nimichuhin chela seriin chenenajaun caunihu,” naane <sup>25</sup> rijieeoritiin jetao, satiin coarajeeuruhane notaracae nimichuhin, nii tocohadane jaa nela seriin jetao, Cana Coaunera corojeein rai nenajaun cauha cue nii jiurohane caje nerautanaa cacha.

<sup>26</sup> Nitohanihane coaraain jetaote, satiin cojoelatiin Cana Coaunera coroaacuruhane saijieein jetao coasiin:

“Charijibana coaraa catohanaine que airijiinte, enene catohanai cojoelanaacojoai coaracaachera,” naaure jetao ita rai.

*Lebi cotijiaa Jesusone*  
(Mt 9.9-13; Mr 2.13-17)

<sup>27</sup> Nitohaneein nii jiurona cacha rautaane baiha, jelai caje mituha cuuruhane jaun jetaote, leinjiin cacha, Roma curuaanaa rai *impoestonu* que coriqui que cachaauru cobaraera Lebi coari Jesuso, nii coriqui teuruhana jaa rori ichoae lauheco jana. Nitohaneein coariin jetaote:

“Chajaau canihara,” naain cotihaca Jesusone <sup>28</sup> rijieeoritiin nimichuhin jetao, satiin niicha ichanenu ratiriin Jesuso jiniichain aina cue Lebi, caaijie cunacaauru aina.

<sup>29</sup> Nitohaneein Jesuso jiniichain cuhin jetaote, nii baiha neenejeein coroaena caaun rai loreri asae beseta ichaa Lebine jana jetao, ecu neeure arajiin leeochoauru Roma

curuaanaa rai *impoestonu* que coriqui que cachaauru cobaraaurera, chaen leeochoaauru cachaauru, naaonjoaihunri.

<sup>30</sup> Nii jaun jetaote, Jesoso aina nerelanacaauru rai:

“Chanuna cocoaeraa Roma curuaanaa rai *impoestonu* que coriqui que cachaauru cobaraaurera aina leeochoaauru osaaonacaauru aina lenoneein, acau cohin, naaonjoainchene saijieein, nii acaauru aina netaojiaain lenonequiche,” naaure jetao acaauru rai, nechu jataain acaauru que iriha Cana Coaunera naitoonjoa que cacha relaaureraauru fariseeocuru aina leeochoaauru fariseeocuru.

<sup>31</sup> Niritocuruha nii aina nerelanacaauru raine aonaain jetaote:

“Coatiba coichara latecuruhi raotojoein raurohin nacaauru. Leinjiin cunaitenacaauruhachate coichara latecure. <sup>32</sup> Coatihachu baaso ichacuruhane nihanatiin coitucunaa jeriheichuru cotihaca uhahaun. Leinjiin osaaocuruhane coitucuureraaurune cotijiaaun, rai suujua coreein jeriha Cana Coaunerane rijijieein neeunruhane coinara,” naain jetao tonoranajae Jesoso.

### *Ena Niicha Tei Ichaonaa que cacha relaa Jesusone*

<sup>33</sup> Nii jana jetaote:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaacure suri couu netiin cosinacaain. Nete laen itolere bana ii aina nerelanacaauru, acau cohin, lenoneein, naaonjoaunreta,” naauruha Jesoso raine jana jetaote:

<sup>34</sup> “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu neein cosinacanaa nainecurene caa cotihanohinchuru, jaiti acaauru aina niha nii ene raeranu cachane jaun. <sup>35</sup> Nete laen, inae nii jianacoon tein cacha ranaa jerera nichaanne amaauruhane suri couu neein cosinacaain inaderaa cuurureeinha,” naain jetao: <sup>36</sup> “Coaraanachuhinti, nihei chuni, obiri enachasine soaain que cajione siri counera. Nitohaneein nii obiri enachasine soaihanete nii obiri enachasine asaaere, nii cajione siri. Chaen caohachaain nedanaa nainihei nii obiri enachasine, nii cajione siri que couneraane. <sup>37</sup> Nii rijijieeinchu, nihei chuni inae conaca que tiha coaeraine jana cuhane ichonai tera. <sup>38</sup> Nitohaneein cuhane teraa ichonainete naasaaere nii coaerai. <sup>39</sup> Niheichu coaerati cohane baiha ichohanti coera, ichonai amuritoheriin raotoha coaeratine jaun,” nae jetao, cacha relaauruha fariseeocurune rijijielanaala, leeochangeein cacha relaane jaun.

## 6

*Nebetacanaa janonaa bana tirico moloonejeeuruha Jesoso aina nerelanacaaurune*  
(Mt 12.1-8; Mr 2.23-28)

<sup>1</sup> Nebetacanaa janonaa bana tirico coocana jana situu-jueeuruha aina nerelanacaauru aina Jesusone jana jetaote, nii tirico moloonejeein biji cuhane situsitunijihanaain nu-cuhe quihure nii aina nerelanacaauru.

<sup>2</sup> Nii coaraain jetaote:

“Chanuna nebetacanaa janonaa bana cocoaeraa nitohanai ichara natiin, nitohanai ichacure nii ii aina nerelanacaauru,” naain bajaauruha fariseeocuru tabaaaurune jana jetaote:

<sup>3-4</sup> “Aiha niqui. Nete laenanohineein ne Cana Coaunera Quiricha cuhane. Tana lesajei que Cana Coaunera loreri taberenacolo asae enohin Cana Coaunera que banijiainein niha nii faan natiin, mijitenacaaun rai corihacuru aina jini-iquiin nii faan quiha Rabirine ereretaain coaraquicheneta. Acaihaniji saseredotecuruhacha nii faan quihane rai niha-natiinte quihurelu,” naain jetao:

<sup>5</sup> “Canu- cachaneein nejanoanaa nichaaunnena, nebetacanaa cojoanonaa amurijiriin cocoinanohineein neeun.” naain jetao acaauru tonorae Jesoso.

*Jiurona bijihona cache*  
(Mt 12.9-14; Mr 3.1-6)

<sup>6</sup> Nii baiha jetaote, coaiten nebetacanaa cojoanonaa bana, sinacoca asae enohin cachaauru relaa Jesusone jana jetao, ecu acaauru jana niha leinjiin cache, rai biji raotono nichajai que jiuronane jaun jetaote: <sup>7</sup> “Necha caa nebetacanaa janonaa bana nihane saijieein, caa jiurona bijii cache rautarichaaainta,” naain jetao, Jesoso cojoelaaure colurujueeuruhane jaan lera ariha aihuruhane jaun, Cana Coaunera naitoonjoa que cache relaurera aina fariseeocuru. <sup>8</sup> Ne jetaote, nii cojoelaauruhane que nainain jetao, nii jiurona bijii cache rai jetao:

“Nimichuhin nii ena cataaun nichaauraaura,” naa nii Jesusone jana jetaote, nimichuhin nichaauraa nii cachane jaun jetao, nii fariseeocuru rai:

<sup>9</sup> “Inara raine leinjiin erenaa bajanaa jereun. Chatohanai ichacaane caohachae. Nebetacanaa janonaa bana, cache ichao rai caohacha ichacaanena caohachaa. Ainihane cache ichao itajihacanena caohachaa,”

<sup>10</sup> Nii baiha jetaote, nii ecu satiin curuhacaain nenacaauru coaraain jetao, nii cache rai aitoha jetao:

“Ichoii raujiaaute coaracaara,” naa rai Jesusone jana jetao, rai biji raujiaa nii cachane jana jetao, jiurohane caje inae nerautae nii cacha biji.

<sup>11</sup> Nitohaneein nii jiurona rautaane coaraain jetaote: “Chana icharihacache caa aansai aina,” naain jetao, jataain Jesoso aina obaaecure nii ecu neein coarajeeurera fariseeocuru aina Cana Coanera aitoonjoan que cacha relaaureraauru.

*Lechoonca coroatajai rai afosotooru janiicha Jesusone  
(Mt 10.1-4; Mr 3.13-19)*

<sup>12</sup> Nii bana jetaote, ichatane ecuunno que cuhin, janoaa-jeein Cana Coanera bajaebajajeein janoe jetao Jesoso.

<sup>13</sup> Inae janohane jana jetaote, nii aina nerelaa amuhemuhenacaauru jitariin cotihanajaain acaauru caje jani-jiin lechoonca coroatajaihuri cocoainain, afosotooru neein acaauru curuaate. “Afosoto” naanete, “Letononeein nena” naane aite.

<sup>14</sup> Nii niicha janijiichuru jetaote, Simoon- nii Fedoro neein niicha curuhateeni, chaen nii Simoon nejera Aanderesi, chaen Saantiaao, Joaan, Ferifi, Bartolomee, <sup>15</sup> Mateo, Tomasi, chaen Arafeeo calaohi- Saantiaao, chaen Selote neein niicha curuaateuri- Simoon, <sup>16</sup> chaen Saantiaao calaohi- Jodasi, chaen nii Jesoso coulurujueranu Jodasi Isacariote, naonjoaihurine.

*Arajii cacha relaa Jesusone  
(Mt 4.23-25)*

<sup>17</sup> Inae nitohaneein ichatane ecuunno cuhin, nii rai afosotooru janijiin cocoainaane nainain jetaote, acaauru aina jiniiquiin atane macararo que fauha cue Jesoso. Nii jana jetaote, ecu turuhin nii aina amuhemuhenacaauru aina netaojiaaure arajii cachaaauru. Jodea batane, Jerosaleeun, cucuhana auhaniha nenacaauru neseeu- Tiro aina Sidoon, naonjoaihunri cajeeurune maajeein turuhacoaure. Acaauru relaa Jesusone aonanacanejeein, acaauru rautaa acaauru cunain cajene coinane maajeeinchuru turu- uure jataain arajiin cachaaauru.

<sup>18</sup> Nii coitucuchuhi ichanohineein cunaitenacaauru rautaane jana jetaote, nerautaacoaure. <sup>19</sup> Nii coaraain jetaote, satiin cachaaauru, Jesoso dadanaa jerecure biji que, aca jerihane rijijieein nerautaacoaauruha nii cunaitenacaaurune coaracuruhane jaun.

*Raotojoein neeuruha tabaaurune jana tabaaurute raote-  
lanaala neeurueein.  
(Mt 5.1-12)*

<sup>20</sup> Nii jana jetaote, nii aina nerelanacaauru coaraain jetao:

“Ena cairicheineein neeichene natiinte, nerausiajeein neeiche, Cana Coanera cojoanonaa inara rai nihane jaun.

<sup>21</sup> Ena mijitenaanaun neeichene natiinte, nerausiajeein neeiche, nii chaque lanaelanaala neriquicheeine jaun.

Ena chanaaiche natiinte, nerausiajeein neeiche, rachoojoein enoanaain neriquicheeine jaun.

<sup>22</sup> Canu cachaneein neeichene coreniha, inara cotaain, inara sitaain, inara nocoeje chanuhin, inara que jaolequiin naonjoaauruha canu corenihane nihanatiinte nerausiajeein neriquicheein.

<sup>23</sup> Nitohaneein inara teuruhane nihanatiin jataain raotojoein rachoojoein neeuche, canu coreniha dedeeu raotojoein neriquicheeine jaun. Coaracuchenachuhinti, inara cairichaauruha inara araachurune rijijieein, Cana Coanera ere beracuru *profetacuru* cairichaeriin nerejetucuruhalu acauru inoensihuru.

<sup>24</sup> Coaraain nainacuche coriquihonacaauru. Inae ena aachene rijijieein rachoojoein niha curieeicheein.

<sup>25</sup> Coaraain nainacuche ena raotojoein lenoneein nenacaauru. Inae nerinaain inara rai lenone.

Coaraain nainacuche ena enoanaain nenacaauru. Inae inaderanaa caun chanaa curiquicheein.

<sup>26</sup> Coaraain nainacuche itolere neein atane sacuritaain coroaenohineein nenacaauru. Nitohaneeinte *profetaniha* nocoetonacaauru corojeein nerejetocurelu inara inoensihuru.

### *Ichei nejeratenacaauru belaihu.*

<sup>27</sup> Nena laen inara canu ere tonoraera nequichene rai aitoreeunni. Inara que nererojoecaain jaolequiin nenacaauru belaaain caohachaaain acauru aina neeuche.

<sup>28</sup> Nechu jataain inara cotaiha: ‘Coaraain nainacuche necha aansaihuru,’ naain inara que ereein nei belaaain, rai Cana Coanera bajaauche. <sup>29</sup> Chunucoha lejerajei chomeri faohitohane, rai jera netonai icharateeu. Jana chunucoha ii cajione buri ruluhane, rai ii obiri netonoai teeute amaaine.

<sup>30</sup> Jerichanejeeinchu, ii caje chaelai bajaeranihane teeu.

Coa ii caje iicha sirii rulueranihane, coa tonaain iriha.

<sup>31</sup> Charijieeinchaainti, inara belaiha cachane jeriquiche, nii rijijieein acauru belaihu inara netonai.

<sup>32</sup> Inara belaichauruhacha belaaain neeichenete, aihuruha nii Cana Coanera coitucuelanaala nenacaaurune rijijieein neriquicheein.

<sup>33</sup> Nii rijijieeintechu, inara corootajaneraauruhacha belaaain neeichene, aihuruha nii Cana Coanera coitucuelanaala nenacaaurune rijijieein neriquicheein. <sup>34</sup> Chaentechu, chaelai lateein niha cachane jana, inara rai cainaane coina teeichene, aihuruha nii



Cana Coaunera coitucuelanaala nenacaurune rijjIEEEIN neriquicheein. <sup>35</sup> Jana laen, nii inara que jaolequiin, inara que nererojoecaaeriin, naaonjoaain nenacaaru aina caohachaaain neein, chaelai latecuruhane acaauru rai teeiche, inara rai cainacuruhane latelanaalane, caohachae. Nii rijjIEEEIN neeichenete, esinaen rauhijiriin jerihane rijjIEEEIN ichaquichene jaun, inara rai nii cainareein Cana Coaunera, nitohaneein acaauru belaiha natiin coitucunaa jerelanaala nenacaauru, neechu aansainein ichaonacaauru, naaonjoaihunri belaaain ichaa Cana Coaunerane jaun. <sup>36</sup> Nii cairichaaajoaain cachaauru coaraa Cana Inaca Cana Coaunerane rijjIEEEIN, inara netonoai cairichaaajoaain inara amute cachaauru coaracuche.

*Jiaonriha leeochoaauru que baasoneein ereein neeichene*  
(Mt 7.1-5)

<sup>37</sup> Jiaonriha leeochoaauru amurijiriin nenea coacuhin, leeochoaauru que baasoneein ereein neeichene, nabana, nii leeochoaauru ichaquichene rijjIEEEIN inara tiha Cana Coaunerane coataa. Chatohanai ichaa inara leeochoaurune, acaauru que inara suujua acatecuchete, inara que netonoai suujua acatemiin Cana Coaunera. <sup>38</sup> Chaelai lateein neeuruha inara amute cachaaurune jana rai teeichenete, inara rai inaraacha latei tereein Cana Coaunera. Jitariin inaraacha sirii teeichene nihanatiinte, jelai amuritoheriin inara rai cainareein Cana Coaunera. Chaentechu leeochoaauru coaraquichene rijjIEEEIN, inara netonain coareein Cana Coaunera,” naain jetaote:

<sup>39</sup> “Coatiha nelaterihe, leinjiin maosa amaeraanu que niha leeochoa namute maosane. Enaachate nitohanihane, leinjiin ecuha jachu cuhane naluhin jiniiquiin nitajenaa nainecurure.

<sup>40</sup> Niheichu nii chuni, rai relaera amurijiriin nenea nainera. Nii inara relaera rijjIEEEIN nerelaachene banaachate nainereiche, raujiaain rijjIEEEIN neeichene.

<sup>41</sup> Chanuna inejeraacha baaso ichajeein ichaohane coaraai. Tana iitonai jataain amurijiriin baaso ichajeein ichaohine coaraaine. <sup>42</sup> Chasiina iitonai baaso ichajeein ichaohine coitucuneeine, baaso ichajeein ichaoha inejerane coitucureei. Jauriaanejeein ii baaso ichajeein ichaohine coitucuhin jianein ichaao. Nii baihate laen nainereei inejera rai: ‘Baaso ichajeeinte ichaohi. Chajaain baaso ichajeein ichaohine jianein caohachaaain ichaao,’ naain erenaa nainereei.

*Rai ninaa cajete, coitucunacaine temule caohacha*  
(Mt 7.17-20; 12.34-35)

<sup>43</sup> Nihei chuni temule caohacha, baaso que inaana nainei. Niheichu temule baasoniha natiin caohacha que inaana nainei. <sup>44</sup> Nitohaneeinte, rai ninaa caje temule caohacha coitucuhaca. Nitohanihane jaunte, chabana tijiemule que inaana nainene ojoa. Jerichanejeeinchu chabana cajiauhi que, inaana nainiheijiaaen soririji. <sup>45</sup> Nii rijijieein techu, caohachaaain suujua coaara cacha, caohacha nejesina que ere, satiin caohacha- rai suujua cuhane nihane jaun. Jana cacha, baasoneein suujua coarate baasoneein ere, satiin baaso- rai suujua cuhane nihane jaun. Nitohaneeinte cacha ujuae caje mitue satiin rai suujua cuhane nena.

*Coroata laurii loreri icharaauru rijiicha nere aonaera biha Jesusone*

<sup>46</sup> Chanuna itolere bana, ‘Canu Curuaanaa,’ naainchene sainejeein quere tonoraain quiicha jerei ichaeneeiche.

<sup>47</sup> Aonacuchena inara rai canu ere tonoraain caitoonjoan icharaauru que erete coitucuhiche. <sup>48</sup> Charijiein chaainti, loreri jaane coina jauriaanejeein ucuaatiin bajeein, enuha suuji caohachaaauru temuhin ichaa leinjiin cachane jana, uha tabanaane jana que tacaa uujinaa mijiaaaineein nihanatiin nii loreri comaene, caohatiin ichanohin nihane jaun. Nii rijiicha cacha, canu ere tonoraain caitoonjoan ichaa chabana jianelanaala ne. <sup>49</sup> Jana quere tonoraenihacachanete, araracaeriin atane bajeein, baasooru que banesijiateein loreri ichara cacha rijijieein ne. Nii jana uha tabanaane, que mijiaaaineein tacaa ujuinaane jana, beraujuaain nitaje nii loreri, nii rijiicha nii canu aonaane sainejeein, quere tonoraanelanaala nenacaaauru cachaaauru,” nae acaauru rai Jesuso.

## 7

*Romanocuru rai soondarooru curuaanaa cafitaan letono rautaa Jesusone (Mt 8.5-13)*

<sup>1</sup> Inae nii cachaaauru rai irihane nainaan jetaote, Cafere-naaon cue aina nerelanacaaauru aina Jesuso. <sup>2</sup> Nii jana jetaote, nii Cafere-naaon ichoae leinjiin Romanocuru rai soondarooru curuaanaa cafitaan. Nii jana nii cafitaan letono- jataain belaaain niicha sirii jetaote, cunaiteein ohane rai ne.

<sup>3</sup> Nii jaun jetaote, nii Cafere-naaon turuhin niha Jesusone inaoriin jetao, Jorioocuru bichauhenaauru letoae nii cafitaan, conujueein Jesuso cotihaca cuuruhane, nii rai letono cunaitenaa rautaa uhanee coina. <sup>4</sup> Nii jaun jetaote, rene turuhin:

“Iine cotihaca uhacaanu canacaanu letoaa cafitaane jaunra. <sup>5</sup> Jataain canacaanu araachuru belaichaneein, aca

canacaanu rai sinacoca ichaerateein, naaonjoaain nihane jaunne, caa cafitaan coroatajaneein rai letono rautaaaine jerichaanura,” naaure jetao Jesoso rai.

<sup>6</sup> Nii jaun jetaote, acaauru aina cuhin, inae turuhe lalajeein cujueeruha Jesoso ainane jana jetao, rai belaichaauru letoae nii cafitaan: “Curuaanaa, coatiha nii chaque ichei nelateein nihaaun canu loreri asae turuhine caina. <sup>7</sup> Nii jaunne caraajenihane ii cotihaca uheneeun. Acaihaniji aitoote nerautamiin canu letono. Ii aitohine rijijieein nerautarichaaain canu letonone coitucuhanune jaunne ichei raujiaain berateeun.

<sup>8</sup> Nii rijijieeinne canu letoaauruha canu curuaanaacurune tonoraain neeun. Nii rijijieeintechu, canu bijiu nenacaauru soondarooru caje chunucoha letoaanune, canu ere tonoraain cue. Jana chunucoha cotihacaaun uhane coinanete canu ere tonoraain uhe. Jana canu letono letoaanu chaelai ichaane coinanete canu ere tonoraain ichae, nanichuchera,” naain letoaa cafitaane jaun inae aitoha cuuruhane jana jetaote, <sup>9</sup> cojoelatiin, nii aina amuhemuhenacaauru cachaauru coarajeein jetao:

“Coatiha Isaraelita nichaachene lauri jana, caa cacha tocohaneein jataain quesenetaera coarahaauta,” nae jetao acaauru rai Jesoso.

<sup>10</sup> Nii jana inae jelaiha cauha cuuruha nii cafitaan loreri asae nii niicha letoaaaurine jana jetaote, inae acaauru ajiniha nerautaaain niha nii rai letono cunaitenaane jana turuure.

### *Leinjiin autana calaohi ichatiha ohane caje Jesusone*

<sup>11</sup> Nitohanihane baiha jetaote, aina nerelanacaauru, chaen arajiin sacuurera cachaauru, naaonjoaihunri aina leinjiin nese Naain ineein curuajai nichae cue jetao Jesoso. <sup>12</sup> Nii jana jetaote, inae turuhelalajeein cujueeruha nii nese quene jana jetao, leinjiin ene autana calaohi-leinjiin acaacha calaohineein nena onaa conautiha jetao cuure. Nii jana jetaote, nii nese caje cuhacoaain arajiin corihaniha cuure cachaauru. <sup>13</sup> Nii jana nii autana coaraa Jesusone jana, cairichaaajoaain coaraane jaun jetaote: “Coa chanaara,” naain jetao, <sup>14</sup> nii rijieeoritiin, nii onaa roha nichuuntaain, nii amaaunruhane jaa rori dadaane jaun jetao, ecu inacuhin coarajeeuruha nii baijiaain amaaurerane jana jetao:

“Enamanaa, nimichuhin nelauriaaura,” naa Jesusone jana jetao, <sup>15</sup> inae nimichuhin nelauriaain ere nii onaa. Nitohanein nii neba rai nii onaa ichateein tiha Jesusone <sup>16</sup> coaraain jetaote, satiin acaneein nihane que suujua acateein cojoelatiin jetao:

“Jataain itolere amurijiriin nelateein, itolere ichana nain-era *profetate* cana rene turuera,” naain jetao:

“Cana Coaunerate rai cacha nichaachene coroatajaniha uhera,” naaure jetao Cana Coaunera coroaajeein, neebana nitohanai coaracuruhane jaun.

<sup>17</sup> Nitohaneein coaraain jetaote, satiin Jodea batane sacuritaain jetao beeuruhane jaun, nii onaa ichtaitha Jesusone coitucuure.

*Joan Baotisita letonocuru*  
(Mt 11.2-19)

<sup>18</sup> Nitohaneein onacaauru ichateein, naanjoan Jesusone coaraain jetaote, Joan rai biha cuure sacuureraauru. Nii caje coitucuhin jetaote, coroatajai sacuurera cotijiaain jetao: <sup>19</sup> “ ‘Iina esinae rauhijiriin canacaanuhacha cohajei turuha uheneninee. Aca neneeine canacaanu rai beeu, leocha cohacaanune coina,’ naain bajanichuche rene turuhincha,” naain jetao letoanajae Joan Baotisita. <sup>20</sup> Nii jaun cuhin, Jesoso rene turuhin:

“Joan Baotisitate canacaanu letoae, ii esinae rauhijiriin nii canacaanuhacha cohajei turuha uhenenineeine bajaacanune coina. Aca neneeine leocha cohacaanune coina,” naauruha Jesoso rene turuhin Joan letonocurune <sup>21</sup> rijieeoritiin jetaote, araai laurii cunai caun cunaitenacaauru cachaauru rautaaain, arajii maosacuru nota tein, coitucuhuhi caun cunaitenacaaurune maajeein rautaacoaane baiha jetao, nii coroatajai Joan letonocuru rai jetao:

<sup>22</sup> “Chajaain Joan rai caa ena inaraacha coarai aina inaraacha aonai benichuche. Chaen, inae maosa neeuruhane caje notaauruha maosacuru. Bacosacuru netonaite inae nichaauraaain amuure. Cosibinacaauru netonoaite inae cosibi caje nerautaacoaure. Iricho saecuru netonaite, inae irichohin neeure. Nii jana onacaaurute jerichanejeein cacha neein jaberoconein nichaauraaain neeure. Jana cairicheinejeein nenacaauru raite, jataain acaauru rausiaaerichaaain Cana Coaunerane beebeje. <sup>23</sup> Nitohanihane jaunte, nerausiajeein neeurureein canu que jaaecohane jianelanaala nenacaauru,” naain jetao, “Chajaain caritiin benichuche Joan raicha,” naain jetao acaauru letoae Jesoso.

<sup>24</sup> Niritoha acaauru raine jaun, jelaiha cauha cuuruha nii Joan letonocurune jana jetaote, nii Joan que cachaauru rai ereereje jetao Jesoso. “Chatohanai coaraa curejetocoichelu nii cacha areroo cuhin. Leinjiin jiarana nujan cujuanaacha rurujuaina coaraquichelu. <sup>25</sup> Chatohanai coaraquichelu. Leinjiin cacha cajione caohacha que necoreetein neina

coaraqichelu. Nete nii cajione caohacha que necoreeteen nenacaauru, cocoinanacaihuru loreri asae neeuruhane coitucuhiche raotojoein. <sup>26</sup> Chatohanai jian coaraqichelu. Leinjiin *profetana* coaraqichelu. Aiha jerihane, jataain *profetacuru* amurijiriin nenea leinjiin *profetate* coaraqichelu.

<sup>27</sup> Nii Joaan que tejian, rai Calaohi nichaunne rai aitelu jetao:

‘Chajinihane quere beranu que leinjiin letoareeuni, turuhine jaanu rucuheraanu quera,’

naain belu Cana Coaunera, niicha laenaeratenojoi rai Quiricha inoaensi cuhane. <sup>28</sup> Coatiha inoaenlu caje coaaneen, enanetojoein nihei chuni nii Joaan amurijiriin nei cacha. Nete laen ena turunaa Cana Coaunera Cojoanona, canuhacha tei que nenea cacha, leeochoaauru fautaain nihane niha natiin jataain Joaan amurijiriin ne.

<sup>29</sup> Nete cachaauru relaa Joanne jana, satiin aonaraauru cachaauru, nii Joaan que acauhanau tein nebaotisaerateeurelu. Nii choae tacaaintechu, Roma curuaanaa rai *impoestonu* que cachaauru cobaraain coriqui bajaaurera netonai necha ansaeneen neeuruhane saijieein nebaotisaerateeurelu, esinae rauhijiriin Cana Coauneraacha icharatenohi ichaa Joanne esenetaauruhane jaun. <sup>30</sup> Jana fariseeocuru aina Cana Coaunera naitoonjoa que cacha relaaaureraauru, itolere amurijiriin Cana Coaunera coitucutoha nocoetocuruhane saijieein nebaotisaeratenaa jerecuruhilu, Cana Coaunera icharatenohi icharaneen aiha Joanne esenetana jerelanaala que jaolecooruhane jaun.

<sup>31</sup> Nitohaneeinte itolere acaauru rai baaso ne. Nihei acaauru rai chabana caohacha.

<sup>32</sup> Acaaurute nenaanaja cataaun nocoatijiana jaun auno toteeuruha acaauru amute canaanaihurune jana, raasanaa jerelanaala neein, niheichu berane ichacuruhane jana chanaaurene acaauru amute canaanaihuru. Nii rijiichuruha caa enene nenacaauru cachaauru. <sup>33</sup> Nii rijiichuruhane jaunte, turuha Joaan Baotisita coaerai conaa inaelanaala, faan niha natiin quinaa inaelanaala, naonjoaaine jana, ‘Nechu aansainihane jaunte ai, nechu jataain coitucuhuhi siriha rai suujua cuhanene jaun,’ naain que ereeichelu.

<sup>34</sup> Nii baiha canu- Cachaneen nejanohanaa nichaaunne turuhin, coaerai cohin, lenoneein, naonjoaanune jaunte, ‘Ahotiritiinjiene tabaain lenoneein ajetoriaaneen. Chaen jene nechu aansaeneen ichaonacaauru cachaauru belaa, Roma curuaanaa rai *impoestonu* que cachaauru cobaraain coriqui bajaaurerane maajeein belaitoon,’ naain ereeiche caque. <sup>35</sup> Nete inae ecu tihane bana esinae rauhijiriin

Cana Coauneraacha icharatenohi ichacaaunne coitucuha cu-  
urureein satiin cachaauru,” nae jetao acaauru rai Jesoso.

*Leinjiin fariseeoneein nenea Simoon rene turuha Jesusone*

<sup>36</sup> Leinjiin fariseeo jetaote, Jesoso cotijiae rai loreri asae turuhin lenoniha cuhane coina. Nitohaneein cotihacane jaun cuhin, inae loreri asae turuhin, lenonecuruhane coina rori ichoae nelauriaa Jesusone jana jetaote, <sup>37</sup> turuha cue leinjiin ene cojoaeloroheri nii neseu ichaonaa. Nii ene jetaote, nii fariseeo loreri asae turuhin lenoniha cuha Jesusone inaoriin jetao, lecuruhin jataain coretiin nenea erene jujui amaain turuhin jetao, <sup>38</sup> chanaain Jesoso tijia rohan nelauriaain, rai nota baca que jetao rai tijia rujuae. Nitohaneein rujuaane baiha jetaote, rai couturiji que caruruhin jetao liosiin, erene jujui que rujuae.

<sup>39</sup> Nitohaneein ichaane coaraain jetaote: “Esinae rauhi-  
jiriin leinjiin *profetanihane* jana nihanete, caaoneein tiha  
caa ene cojoaeloroerine jana, baaso nihane coitucure caa  
cachara,” naain jetao suujua ereein coaraje nii Jesoso coti-  
hara fariseeo.

<sup>40</sup> Nii jaun jetaote, nii fariseeo rai:

“Simoon, icheina erenea jereein aonaaine coina,” naa  
Jesusone jana jetao:

“Saan. Aitoo caraine aonaera, cacha relaera,” naa nii  
fariseeone jaun jetao:

<sup>41</sup> “Leinjiin cacha jetaote, coroatajai cacha rai coriqui te,  
jelai amuritoheriin rai cainacuruhane coina niqui. Nitoha-  
neein jetaote, leinjiin rai te saoqui fashaain. Jana leecha  
rai jetaote, te saoqui chooncaain. <sup>42</sup> Ne jetaote, coretena  
nainecurenihane jaun, nii coroatajai que rebeeonacaauru  
cachaauru cobaraelanaala acaauru que suujua acate nii  
coriqui erora. Tonaai jana nii que. Chariji jana nii coroata-  
jaaihuri caje, jataain nii coriqui erora belaaain coare,” naa  
Jesusone jana jetao:

<sup>43</sup> “Jerihane nii leecha amurijiriin rebeeona cachate  
jataain nii coriqui erora belaaain coaraera,” naa nii Simoonne  
jaun jetao:

“Esinae rauhijiriinte aitohicha,” nae jetao Jesoso.

<sup>44</sup> Niritiin jetaote, nii ene coarajein, nii Simoon rai jetao:

“Caa ene coaraaunachuhinti. Coatiha jauriaanejein ii  
loreri asae turuhanune jana, catiha culeecaaunne coina carai  
acau tihee. Nete laen caa ene, rai nota baca que catiha  
culejein rai couturiji que caruruhin jacorae. <sup>45</sup> Coatihachu  
turuhanune jana canu meri lioracahee. Caa enete laen tu-  
ruhin enohane caje coauneein canu tijia lioracaane jianene.

<sup>46</sup> Niheichu nii jujui niha natiin cacouturi ichoae tiheei. Jana caa enete laen catiha ichoae erene jujui chorohin que catiha rujuae. <sup>47</sup> Nitohanihane jaunne ichei aitoon. Arajii rai nosate inae que suujua acate, jataain canu esenetaain canu belaihane coaratihane caa ene ne jaun. Nete laen, nii leeochoaauru amurijiriin caohachaain ichaoha no-coetonacaauru, rai nosa caje chabana nichoteeurenereein, chabana osaaocuruhane coitucuhin canu belaina jerecurenihane jaun,” naa nii fariseeo raine baiha jetao, <sup>48</sup> nii ene rai:

“Inae itolere baaso ichajeein ichaohine caje ichoterateno-joineeichera,” naa Jesusone jana aonajeein jetao:

<sup>49</sup> “Chaneeinna ne caa cacha, itolere baaso ichajeein niha caa enene jaan caje niha natiin ichoterateein nihane coina,” naauruha nii aina ecu cotihanohineei neein aonajeurerane coitucuhin jetao:

<sup>50</sup> “Quesenetaaine jaunte, ichoteratenojoineein neeiche, baaso ichajeein neeine jaan caje. Raotojoein chenenajaun caunihuchera,” nae jetao Jesuso, nii ene rai.

## 8

### *Jesoso coroatajaneraauru enecuru*

<sup>1</sup> Nitohaneein jetaote, itolereneein neseeuuri nainein, nenanajaaunru nainein amuhemujueein Cana Coanera cojoanonaa que ereerejeein amuhemuherejete Jesoso, lechoonca coroatajai rai afosotooru, <sup>2</sup> chaen coitucuchuhi caje, joenreein cunai caje, naaonjoaihunri caje niicha rautaaui enecuru tabaauru que corihaneraain. Niichuru aina jetaote cuelu, nii caaunsinein suujua cuhane coitucuchuhi sirihane jana nii Jesusohacha rautai “Maadala bene” naain niicha curuaateeuuri Mariha, <sup>3</sup> chaen Erodesi amihaneeo beraichaneein nena Cosa comasai Joana, chaen Sosana, naaonjoaihunri aina leeochoaauru arajii enecuru jetao, acaauruhacha sirii que acaauru coroatajaneraneein cuure.

### *Temule jaera parabola que erena*

(Mt 13.1-9; Mr 4.1-9)

<sup>4</sup> Nii jana jetaote, neseeuuri caje cuhacoaain Jesoso coaraa cuuruha arajii cachaaurune jaun, arajiin netaojiaauruhane jaun jetao acaauru rai: “Aonacuchene ena inara rai temule jaera *parabola* que erete coitucuhiche.

<sup>5</sup> Leinjiin cacha, ucuhe riaaca cuhane jaun jetaote, bero cuhane naluha nii niicha riaajai nucuhenne jaun shaacure cachaauru. Chaen tabaauru quihure tajaaelinaacuru. <sup>6</sup> Nii jana tabaauru ajeri choae nalunacaauru jetaote, omrohane sainejeein ohijiacoe. <sup>7</sup> Tabaauru ojoa neeonjoai jana nalunacaauru jetaote, omrohane jana amurijiriin omaroha

ajaenane jaun ohacoae. <sup>8</sup> Jana tabaauru atane caohacha choae nalunacaauru jetaote, caohachaaain omarohane jaun, ele ucuhecuro caje ele fashai ucuheneeinchuru nefae,” naain jetaote, acaauru rai tonijiaain: “Caa caitoonjoan coitucunaa jeriquichene aonacuche,” nae jetao Jesoso.

*Temule jaera parabola que acaauru relaa Jesusone bajaauruhane*

*(Mt 13.10-17; Mr 4.10-12)*

<sup>9</sup> Niritiin temule jaera que cachaauru relaa Jesusone jaun jetaote:

“Chatohanai quena nii temule jaera que cuaain cachaauru rai aitohi,” naain Jesoso caje bajaauruha aina nerelanacaaurune jaun jetaote:

<sup>10</sup> “Inaraacha quete rai Cojoanona coitucuerate Cana Coaunera. Nena laen, nii canu esenetana jeriheichuru cachaauru rai carijieein erenaa *parabola* que cuaain acaauru rai beeun, nabana coaracuruhane nihanatiin coitucuurenihane coina, niheichu aonacuruhane nihanatiin coitucuuruhane coataa.

*Temule jaera parabola que cachaauru relaane biha Jesusone*

*(Mt 13.18-23; Mr 4.13-20)*

<sup>11</sup> Nii temule ucuhe riaara que aitocooaunne jaan erenaa *parabolate*, Cana Coaunera beratenojoi rijijieein ne.

<sup>12</sup> Jana nii bero cuhane nalunaa nucuhe que caitoonjoante, Cana Coaunera beratenojoin aonaain inae esenetaain neeuruhane jana, nabana nichoteeuruhane coataa acaauru coritaa uha moconajaerane jaun suujua elonaain nenacaauru cachaauru rijijie.

<sup>13</sup> Jana nii ajeri choae nalunaa nucuhe que caitoonjoante, Cana Coaunera beratenojoin aonaain, corojeein esenetaain neeuruhane nihanatiin, carajaelanaala basiinjiincha esenetaoriin, inae necairichanaa coaracuruhane que nererojoe caain jianeraauru rijijie.

<sup>14</sup> Jana nii ajaena jana nalunaa nucuhe que caitoonjoante, tonoraain aonacuruhane nihanatiin, jeraaen jianejeein cuaajeein, jataain niicha lateeicha que coacuhin, coriquiquiin raotojoein neeururichaanne coacuhin, itolere bana niicha jereeicha ichajeein, jeriha Cana Coaunerane rijijieein cha chana jerelanaala nitajerai nenacaauru rijijie.

<sup>15</sup> Jana nii atane caohacha choae nalunacaauru nucuhe que caitoonjoante, nii jataain jereein aonaain, nii beratiha Cana Coaunerane rijijieein naitoonjoan ichajeein, itolere bana tonoraain laraajiin jianelanaala nenacaauru cachaauru rijijie,”



*Cono que cacha relaa Jesusone*  
(Mr 4.21-25)

<sup>16</sup> “Nihei chuni cono mocohin bujuaihu tera. Niheichu arana asae tenaa nainihei, nabana nocohenaanau turuuruha loreri asaae turunacaaurune coataa. Nitohaneein bujuaihu telanaalate ecuun te, conohanau loreri asaae enooruha turunacaaurune coina. <sup>17</sup> Nii rijijieeintechu, ena caa inara relaanune jaan coitucuelanaala nenacaauru, rijieeori bana coitucuurureein.

<sup>18</sup> Aihane jaun, caohachaaain aonacuche. Nii rijijieeintechu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” naain acaauru rai be Jesuso.

*Rai neba aina Jesuso nejeraauru*  
(Mt 12.46-50; Mr 3.31-35)

<sup>19</sup> Niritiin cachaauru rai ereerejiha Jesusone jana jetaote, rene turuha uure neba aina rai nejeraauru. Ne jetaote, rohan turunaa nainecurene, jataain arajiin ecu turuuruha cachaaurune jaun. <sup>20</sup> Nii jana ecu nenacaauru tabaauru jetaote,

“Taute aerene neeure ii nejeraauru, ii neba aina. Jataainte ii coaana jerecure,” naain Jesuso rai beeuruhane jana jetaote,

<sup>21</sup> “Aiha niqui. Nete Cana Coaunera beratenojoi esenetaain, rijijieein ichaohin, naintonjoa rijijieein ichara cachate, canu fojiara aina canu nejeraaurunera,” naain jetao tonoranajaen Jesuso.

*Fichafichanaa aina cujuana suruaa Jesusone*  
(Mt 8.23-27; Mr 4.35-41)

<sup>22</sup> Nii baiha jetaote: “Amauchete caa nemuri jerau cunichaachera,” naain jetao, aina nerelanacaauru aina leinjiin bote cuhane fauhin cuhin jetao, <sup>23</sup> nemuri jera jaohajeeuruhane jana jetao, uhe cujuana tabai aina fichafichanaa. Nii jana, sinitoha Jesusone jana jetao, inae nemoha acaune jaun, caaun nalunaa jere nii cuurunaja bote. <sup>24</sup> Nii jaun jetaote nesoone caun

“Cacha relaera, cacha relaera, inae nalurichaacheje,” naain Jesuso nocoauruhane jaun jetao, nimichuin cujuana aina fichafichanaa suruha Jesusone jaun jetao, tonajelanaala cuujeure.

<sup>25</sup> Nitohaneein cujuana aina fichafichanaa suruaain jetaote, nii aina nerelanacaauru rai jetao,

“Chanuna cha esenetaeneeiche,” naa acaauru rai Jesusone jana jetao, nesooneitiin cojoelatiin jetao, “Chaneeina ne caa cacha, nere tonoraain nesuruha cujuana aina

fichafichanaane coina,” naain jetao nejesinajeein ita caje bajaare.

*Jerasa batane que nenea coitucuchuhi siricha*  
(Mt 8.28-34; Mr 5.1-20)

<sup>26</sup> Nirijieein cuujeein jetaote, tabiicha nemuri jera jaohin, najauriaa cuure Calileea jeraniha nenea Jerasau batane que.

<sup>27</sup> Inaen ecu turuhin najauriaain, atane choae iniha cuha Jesusone jana jetaote, nii nese caje cuhin que taca cue suujue cuhane coitucuchuhi siricha cache. Nii cache jetaote, nii chaabana cajione jiaain, niheichu loreri asae nihanatiin ichoaelanaala atane bana ichoaecha ichoae.

<sup>28</sup> Aca jetaote, Jesuso coariin nacatiha auhaquiin semojoain tacaain jetao;

“Coa caniha nenoain carerojoecaara, acaihaniji nenea Cana Coaunera Calaohi Jesuso,” nae jetao Jesuso rai, <sup>29</sup> caje mituha, nii suujua cuhane neein aasaera coitucuchuhi coina aitoa Jesusone jaun.

Nitohanihane jaun jetaote, araai saain *cadena* que caohatiin biji aina tijia ichohacuruhane nihanatiin, rai molohin cache nenajanihu amaauruha nii coitucuhuhicurune, ecu nii cache areroo ne. <sup>30</sup> Nitohaneein rai irihane jana jetaote:

“Tonaa ichurujuata,” naain caje curuaa bajaa Jesusone jana jetao,

“Lejioon niha canu curuaara,” nae jetao nii cache, jataain arajiin suujua cuhane neeuruha coitucuhuhicurune jaun.

<sup>31</sup> Nii arajiin suujua cuhane nenacaauru jetaote, usi jana acaauru letoaa Jesusone coataa jetao, <sup>32-33</sup> ichatane ucuunno que arajiin lenoniha neeuruha coosichurune jaun jetao, nii coosichuru suujueniha enooruhane coina Jesuso caje bajaare. Nii jaun jetaote, nii jereein caje bajaauruhane rijijieein jeriha Jesusone jaun jetao, nii cache caje mituha-coaain nii coosichuru suujueniha enooruhane jaun jetao, nemuri cuhane nichorohin acauhanau naluhin ohacoaare nii coosichuru.

<sup>34</sup> Nii coaraain jetaote, satiin jelai caje sorohin, nenaana-jaunru, neseeuuru, naaonjoaihunri naineein biha cuure nii coosi beraihurera cacheaauru. <sup>35</sup> Nitohaneein beeuruhane jaun, cuhin coaraa cuuruha cacheaurune jana jetaote, Jesuso tijia asae lauhaca coujurihu cache neein necoreteein nii suujua caje coitucuhuhichuru mitunaja cachane jaun jetao, coaraain coosichure nii cacheaauru.

<sup>36</sup> Nii jana, nii cache caje mituuruha coitucuhuhichurune jana coaraauru jetaote, esinae rauhijiriin nii nerautaane rijijieein beeuru leeochoaauru cacheaauru rai.

<sup>37</sup> Nitohaneein coaraain jetaote, satiin nii Jerasa batane que nenacaauru cachaauru jetao, jelai caje amuha Jesusone jerecure, jataain coasichuruhane jaun.

Nii jaun jetaote, bote cuhane fauhin, jelai caje amuha Jesusone jana jetao, <sup>38</sup> aina cunaa jere nii coitucuhichuru mitunaja cache. Ne jetaote, aina cuhane jerelanaala:

<sup>39</sup> “Jiaohine. Chajaaincha jelaiha chenenajaun cauhin, ii rautaaain niha Cana Coaunerane beebejenihun,” nae jetao rai Jesoso.

Nii jaun jetaote, ecu nedaain, satiin nenaanajaaunru naineein cuhecujueein jetao, rautaaain niha Jesusone beebejeein amuhemujuen nii cache.

*Jairo cacunu. Chaen leinjiin ene Jesoso cajione dadaera*  
(Mt 9.18-26; Mr 5.21-43)

<sup>40</sup> Nitohanihane baiha, jelaiha nemuri jerau cauha cuuruhane jana jetaote, jataain corojeein Jesoso raare, turuhane cohajeeuruhane jaun, satiin cachaauru. <sup>41</sup> Nii jana jetaote, turuha uhe leinjiin cache- sinacoca curuaanaa neein nena Jaironeein niicha curuaateuri. Nii cache jetaote, Jesoso tijia asae neseoriaain jetao conujueein cotijiae, rai loreri asae turuha cuhane coina, <sup>42</sup> jataain ohane rai niha leinjiin rai cacunu- lechoonca coroata jaanacajine jaun.

Nii jaun cuha Jesusone jana jetaote, jataain arajiin sacuuruha cachaaunne jaun, sururucure cachaauru.

<sup>43</sup> Nii arajiin cunacaauru jana jetaote cue leinjiin ene-lechoonca coroata jaanacain nirijieein ichana jaohajeein cunaiteein nena. Nii jetaote, jitariin niicha sirii coriqui jaoihin nocoicharate niqui. Nejetaote, rautasihurene nii chuni coichaerauru.

<sup>44</sup> Nii ene jetaote, Jesoso caaijie cuhin, rohan nichuuntaain rai cajione auha dadae. Nii Jesoso cajione auha dadaane rijieeoritiin jetaote, inae nesurue rai ichana.

<sup>45</sup> Nitohaneein dadaane jana jetaote:

“Chatoon canu dadae,” naain bajaa Jesusone jana, satiin dadaauruhane suujueeuruhane jaun jetaote,

“Cache relaera jataain araacha cachane jaunte, ii sururucure jerane,” naa rai Fedorone jana jetaote:

<sup>46</sup> “Aihei bajiaa. Chunucohate jerihane canu dadae. Cacaje mituha cache rautacaanne jaan cajene coitucuunra,” naain jetao bajae Jesoso.

<sup>47</sup> Niritoha Jesusone jaun, nesuujuenaa nainenihane jaun jetaote, rijijijianeein Jesoso acatiha neseoriaain: “Naaonjoain cunaitichaaunne jaunne, nii caje nerautasinihanune

jaun, ii dadaaunra. Nii ii dadaanune rijieeoritiine inae nerautaaun canu cunai cajera,” naain satiin aonajera urichoo jitariin biha nii enene jana jetaote;

<sup>48</sup> “Aihachuhisi. Jataain ii rautaanune esenetaaine jaunte, ii cunai caje nerautaaicha ene. Chajaain chaque tonajelanaala chenenajaun caunihunra,” nae jetao rai Jesuso.

<sup>49</sup> Nitohaneein jaiti ereerejiha Jesusone jana jetaote, turuhin jetao:

“Coa nenacaaeneein nii cacha relaera reroecaa. Inae oha ii cacunura,” naain jetao biha uhe letoaaauruhane jaun leinjiin cacha, nii sinacoca curuaanaa Jairo rai.

<sup>50</sup> Niritoha nii cachane aonajeein jetaote,

“Coa tonajian. Raujiaaincha quesenetaaute nacoaauneein ichanamiin oo caje ii cacunura,” nae jetao Jairo rai Jesuso.

<sup>51</sup> Niritiin cuhin jetaote, nii Jairo loreri asaae turuhin, Fedoro, Saantiaao, Joaan, chaen, nii ene fojiaraauru, naaonjoaihunriicha enoae jiniichaaain nii loreri asae. <sup>52</sup> Nitohaneein inae loreri asae enooruhane jana jetaote, jataain satiin coinaderaain nii ene coisichuruha nii loreri asaae nenacaaunune jaun:

“Coa chanaache. Coatiha ohane jaun aihei caa ranuna. Sinihane jaunte aicha,” naa acaauru rai Jesusone jana jetaote, <sup>53</sup> satiin esenetaelanaala coenacure- nii ecu neein coarajeurerera cachaauru, esinaen rauhijiriin oha nii ranunane coaracuruhane jaun.

<sup>54</sup> Nii jana jetaote, biji que nii ranuna onaa mucuhin tonijiaain jetao: “Ranuna, chajaain nimichuura,” naa Jesusone rijieeoritiin nimichuhin jetao, <sup>55</sup> nacoaauneein raurononeein oo caje ichanae nii ranuna. Nitohaneein ichateein jetaote, corohateeuruhane coina aite Jesuso. <sup>56</sup> Nii jaun jetaote, jataain cojoelatooruha rai fojiaraaurune jana jetao: “Jiaonriha caa catoaneein ichateein nihanune beeiche chuni rainera,” naain jetao suujuatenajaen Jesuso.

## 9

*Cana Coaunera Cojoanonaa biha cuuruhane coina aina nerelanacaauru letoaa Jesusone*

*(Mt 10.5-15; Mr 6.7-13)*

<sup>1</sup> Jelai lechoonca coroatajai aina nerelanacaauru taojiaain, acaauru aina neein cocoainanajaain jetaote, letoanajae Jesuso, cacha suujua cuhane nenacaauru itolere coitucuchuhichuru sitaain, cunaitenacaaaurune maajeein rautaaauruhane coina. <sup>2</sup> Nitohaneein jetaote, Cana Coaunera Cojoanonaa beein, cunaitenacaaaurune maajeein rautaaauruhane coina acaauru letoae.

<sup>3</sup> Nitohaneein letohanajaain jetaote:

“Coa inara biji achune, inara atora, inara achano, inara coriqui, necoreeteichene jaanu que inara cajione, naaonjoainuri amaain cuhache. <sup>4</sup>Chunijihun loreri asae turuhichene ecu neeuche jelai caje amuhichene reentiaain. <sup>5</sup>Jana chunijihun nese que turuhichene jana, inara ranaa jere-laanaala inara aohana jerecurenihane, jelai caje amuuche. Inara tija batane faofaohin riariaain ratiriinte, ‘Coaraain cau neein nainacuche,’ naain ichaquichene coitucuurumiin caje,” naain jetao letoanajae Jesoso.

<sup>6</sup>Nii jaun jetaote, nii letoanajaane rijijieein cuhin, ne-seeuru naineein cuhecujeein jetao, ichoteratenajaane jaa erenaa rauhi raotono beebejeein jetao, cunaitenacaaurune maajeein rautaacoaure.

*Suujua auhacaa Erodesine*  
(Mt 14.1-12; Mr 6.14-29)

<sup>7</sup>Nitohaneein itolere ichaechajeein niha Jesusone coitucuhin jetaote, que suujua auhacaain nererojoecae Jorioocuru curuaanaa Erodesi. Tabaauru, “Joan jete oo caje ichanaain ai,” naauruhane jana, <sup>8</sup>leochaauru, “*Profeta* Irihasi jiete, oo caje ichanae,” naaure. Jana tabaauru jetaote, “Cana Coaunera Ere bera inoaensi tabaauru jete, oo caje ichanaain ai,” naaure.

<sup>9</sup>Ne jetaote, niritocuruhane coitucuhin jetao: “Caraajenihanena nii Joan uluno moloheratihanune jana moloorelura. Chaaquena jana, nii itolere ichaa been ereeure,” nae jetao Erodesi.

Nii jaun jetaote, jataain Jesoso coaana jere Erodesi.

*Saoqui oharaancai cacha rai lenone tiha Jesusone*  
(Mt 14.13-21; Mr 6.30-44; Jn 6.1-14)

<sup>10</sup>Inae nii letoanajaa Jesusone caje turuhin, jitariin acaauruhacha ichai beeuruha nii cocoaainain niicha letoauri afosotoorune jana jetaote, jelai cachaauru caje acaauru amaain, leinjiin nese Betesaaidau amanajae niqiu Jesoso. <sup>11</sup>Nejetaote, inae cuhane coitucuriin, sacuhin, rene turuha cuuruha cachaaurune jana jetao, raotojoein acaauru raain, Cana Coaunera Cojoanonaa que acaauru rai ereerejeein, cunaitenacaaurune maajeein rautae.

<sup>12</sup>Nii jana inae sohane jaun jetaote, Jesoso rohan nichuuntaain:

“Chajaain caa cachaauru rai aitoote, taa ichuunucohacuru nenacaauru neseeuru cuhin, nesurunajaanu aina lenone ariha cuurumiincha. Coatiha nihei cau cacha caje lenone coreteein acaauru coroaatenaa jaanuta,” naauruha nii lechoonca coroatajai aina nerelanacaaurune jana jetaote:

13 “Niriimiin. Atiin inara, acaauru coroaateeuiche,” naa acaauru rai Jesusone jana jetaote:

“Saoquijieeinchate neeje faan, chaen coroatajaain ate naajeeinchara. Coretiha cuhacaanune banaachate nenaanainere lenone, satiin caa cachaauru raicha,” naaure jetao Jesoso rai, <sup>14</sup> itolereenein saogui oharaancaain acaauru aina neeuruha cachaaurune jaun.

Ne jetaote aina nerelanacaauru rai jetao:

“Saoquichooncaa nanaain ita rohan teein acaauru lauriaaachera,” naa acaauru rai Jesusone jaun jetao, <sup>15</sup> nii aito-hane rijijieein, ita rohan teein acaauru lauriaacoaure nii aina nerelanacaauru.

<sup>16</sup> Inae satiin nelauriaacoaauruhane jana jetaote, nii saogui faan aina coroatajai ate mucuhin, coreniha dede coarajeein Cana Coaunera coroaecane baiha jetao, nii faan aina ate beeunebeeunein aina nerelanacaauru rai jetao te Jesoso, jitariin cachaauru rai chaluuruhane coina.

<sup>17</sup> Nitohanein jetaote, inaeneeuruhane jaan tiaaajoaain lenonecuruha satiin cachaaurune natiin jetao, lechoonca coroata omariin, omari nemoaure caute que.

*Esinae rauhijiriin Mesihasi niha Jesusone biha Fedorone*  
(Mt 16.13-19; Mr 8.27-29)

<sup>18</sup> Nii baiha jetaote, jelai aina nerelanacaauru aina cuhin Cana Coaunera bajaane jaun jetao:

“Tonacuruha canu que cachaauru. Chanichaaunchata,” naain acaauru caje bajaane Jesusone jana jetaote:

<sup>19</sup> “Tabaaurute, ‘Joan Baotisita jete, oo caje ichanaain ai,’ naaurera. Jana tabaaurute, ‘Cana Coaunera Ere bera inoansi Irihasite ai,’ naaure. Jana tabaaurute, ‘Cana Coaunera Ere bera inoansi caje leinjiin jete, oo caje ichanaain ai,’ naaure,” naain beeuruhane jaun jetaote:

<sup>20</sup> “Tonaquiche jana inara canu que. Cha nichaaun,” naain acaauru caje bajaane jana jetaote:

“Iite, Cana Coauneraacha letoai Mesihaseeicha,” naain jetao tonora Fedoro.

*Orichaaine biha Jesusone*  
(Mt 16.20-28; Mr 8.30-9.1)

<sup>21</sup> Ne jetaote, niritocuruha raine jana, nii acaneein nihane beeuruha chuni raine coataa, caohate Jesoso.

<sup>22</sup> Niritiin jetaote: “Nii inaraacha cohajei Cachanein nejanohanune cairichaeriinte, caque jaolecoha cuurureein Jorioocuru bichauhenaauru aina saseredotecuru curuaanaacuru, chaen Cana Coaunera naitoonjoan que cacha relaaureraauru, naaonjoainuri. Acaaurute catinaa

cuurureein niqúi, nena nichata janohane cuhane ichanaa cureeunnicha,” nae jetao acaauru rai Jesoso.

<sup>23</sup> Nii baiha jetaote, nii satiin ecu aina nenacaauru rai jetao:

“Chunucoha canuhacha relaineein canu ere tonoraeranein nenea jerihane, itolere suujua letono ichana jerihane jianeein, coroso que canu teein canu cairichaaaururichaaaine rijijieein necairichanaa abaataain caitoonjoan tonoraain, jerichaaunne rijijieein neeine. <sup>24</sup> Nitohanihane jaunte, cacoreniha nichao itajera, nichotiha cureein. Jana suujua letonohacha ichajeein, itolere bana rai caohachanuhacha coacuhin neite nitajereein. <sup>25</sup> Chaaquena nelatere caa chauratane que neein, itolere rai nelateeicha que coacuhin rai nichao itajiha cachane. <sup>26</sup> Chunucoha, canu que coejeein caitoonjoa quene maajeein coejera quene necoejereeeni canuhetonai, canu- inaraacha cohajei Cachaneein nejanohanune, itolere ichana nainichaaunne coarateein, Canu Inaca necaohacha que necaohachaaain rai letonocuru anjeraauru aina turuha uhanune bana. <sup>27</sup> Esinae rauhijiriin satiin cau nenacaauru tabaauru cachaauru oorurinaain, Cana Coaunera Cojoanonaa coaracuruhane reeintiaain,” nae jetao acaauru rai Jesoso.

### *Nejelauneein nerotoha Jesosone*

*(Mt 17.1-8; Mr 9.2-8)*

<sup>28</sup> Nii cachaauru rai irihane baiha, fosa janoneein catiaain, ichatane ucuuno que cuhin Cana Coaunera bajaa cuha Jesosone jana jetaote, corihaniha cuure Fedoro, Saantiaao, Joaan, naaonjoaihuri. <sup>29</sup> Inae ecu turuhin Cana Coaunera bajaane jana, ecu neein coarajeeuruhane jana jetaote, itolere- neein nejelauneein nerotoha nomerine jana jetao, rai cajiione netonai jataain somajaain jiquihaquiiin nerotohane jana, <sup>30</sup> ecu aina ococohin aina ereeure coroatajai cachaauru Moisesa, Irihasi, naaonjoainuri. <sup>31</sup> Nitohaneein jetaote, jataain cono caohacha que conaeraain neein jetao, Jerosaleeun cairichanojineein oha curichaaain Jesosone que jetao ereeure.

<sup>32</sup> Nii jana jataain siniitooruhane sainejeein jetaote, nirijieein ichaojoein jetao, cono caohacha cataaun neein coroatajai cacha aina iriha Jesosone jana, coaraje rai corihacuru aina Fedoro.

<sup>33</sup> Inae Jesoso rohan neeuru caje amuuruha nii coroatajai cachaaurune jana jetaote:

“Cacha relaera, jataainte caohate cau nihacachene. Coanete nichatajaain lohanari jaacache, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao Fedoro. “Naaonjoaane cointate catohaneein coarate Cana Coaunera,” naain coitucuenihane jaun nirate Fedoro.

<sup>34</sup> Niritiin ereerejihane jana, acaauru conaacotaa dede sacarine jana jetaote, jataain nesooneetooruhane jana jetao, <sup>35</sup> nii dede sacari jana toniin jetao: “Caate jataain jereein canuhacha cocoinaain quiicha letoai Canu Calaohinera. Nere tonoraain neeuchera,” naain jetao toni erenaa.

<sup>36</sup> Niritiin toniha erenaane aonajeeuruhane baiha, Jesoso coaracuruhane jana jetaote, inae jelai ecu ne. Ne jetaote, nii bana nii chuni rai nitohaniha Jesusone belanaala inauhe-neechea suujua cuhane coarajeein nii chuni rai beeurene.

*Coitucuchuhi siricha leinjiin canaanai rautaa Jesusone  
(Mt 17.14-21; Mr 9.14-29)*

<sup>37</sup> Nii cojoanoo nii ichatane ucuuno neeuru caje jelaiha fauha cuuruhane jana jetaote, Jesoso que taca cuure arajiin cachaauru. <sup>38</sup> Nii arajiin que taca cunacaauru cachaauru jana toniin jetaote:

“Cacha relaera, atin nohane caa acaihanijin quiicha sirii canu calaohi coaraau. <sup>39</sup> Suujua cuhane coitucuchuhi sirihane jaunte, baasoneein tihane, auhaquiin tochoaain tacaane, nujuaae caje lajane mitae. Jataainte, baasoneein jaberoco teein jianena jerene. <sup>40</sup> Nii jaaunne niqui ii aina nerelanacaauru rai aitoon, caje nii coitucuchuhi sitaauruhane coina. Nete ichana nainesihurene,” naa tonijiaain ehequiin, nii leinjiin cachane jaun jetaote:

<sup>41</sup> “Jataainachura cha esenetaeneeichete nitaje rai nacaauru cachaauru. Inaonjoan saneina inara aina neein inara abaantareeun. Chajaain cajiha nii ii calaohi uhaaura,” naa Jesusone jaun, <sup>42</sup> rohan nichuuntaa nii cunaitenaa canaanaine jana jetaote, atane ichoae tacaain siheite nii suujua cuhane nena coitucuchuhi.

Nii jaun jetaote, nii suujua cuhane nena coitucuchuhi suruaain jetao, nii canaanai rautain, rai inaca rai te Jesoso. <sup>43</sup> Satiin nii coaraain jetaote, itolere que nelateein, itolere ichana nainiha Cana Coaunerane coaraain cojoelatoore.

*Orichaainne biha coroata saain Jesusone  
(Mt 17.22-23; Mr 9.30-32)*

Nitohaneein cojoaelanaacojoai ichaain, acaauru notaaca Jesusone cojoelatooruha satiin cachaaurune tonohanau jetaote:

<sup>44</sup> “Caohachaaain caa inara rai aitocoaaunne aonacuche. Coa baitichache. Canu acaihaniji inaraacha cohajei Cachaneein nejanohanaa nichaaunne, cocoinanacaihuru bijihu tenojoiniha cureeunicha,” nae jetao aina nerelanacaauru rai Jesoso.

<sup>45</sup> Ne jetaote, acaauru que coitucuerateniha Cana Coaunerane jaun, nii acaauru rai aitohane coitucuerenihane



sainejeein, acaauru rai biha Jesusone coina caje bajanaa nainecurene, bajaauruhane que nocoatocuruhane jaun.

*Chariji jataain nelateineein ne*

*(Mt 18.1-5; Mr 9.33-37)*

<sup>46</sup> Nii jana jetaote: “Charijina, caa cana jana, jataain leeochoauru amurijiriin nelatineein nere,” naauruha nejesinajeein ita rai aina nerelanacaaurune <sup>47</sup> aonajeein jetao, leinjiin canaanai mucuhin rohan teein jetao:

<sup>48</sup> “Canu coreniha, caa canaanai raerate, canu raane rijijeein aicheein. Jerichanejeein canu raain neitechu, caletoera Ofa raa aicheein. Nitohanihane jaun, cau inara jana nelatihei rijijeein inaraacha coaraite, jataain nelatineein ne,” nae jetao acaauru rai Jesuso.

*Canaacha ichai icharate, cana lauri rijijeein nenacaauru ne.*

*(Mr 9.38-40)*

<sup>49</sup> Nii jana jetaote: “Cacha relaera, ii letononeein nena rijijeein coitucuchuhi que suujuequiin nenacaauru rautaa inaha leinjiinne janane eruhin nii caohatihacaanu, cana aina nenaaneein ainihane jaun,” naa Joanne jaun jetaote:

<sup>50</sup> “Jiaonriha nitohanai ichara caohateein neeichene. Canaacha ichai ichaain nenaate cana lauri rijijeein nenacaauru ne,” nae jetao rai Jesuso.

*Joan aina Saantiaaocha ichana jerei caohatiha Jesusone*

<sup>51</sup> Inae jelaiha dedeu cuhane catainajeein jetaote, Jerosaleeun necairichanaa coaraane rai nihane saijieein, atiin nellararajiaain, nii Jerosaleeun turuhane coina ucuae cue Jesuso. <sup>52</sup> Nitohaneein cuhin jetaote, najiniha nere beraanuuru letoaelu, turuhane jaanu ariha cuuruha leinjiin nese Samariaune coina. <sup>53</sup> Ne jetaote, ecu ranaa jerecurenelu Samaria cocoaichacuru, rauhijiriin Jerosaleeun cuhane coitucuuruha raotojoeeinne jaun.

<sup>54</sup> Nitohaneein, acaauru ranaa jerecurenihane jaun jetaote:

“Curuaanaa, jereeeune acaauru ichoae usi letoaacaanute, satiin mocohin nitajeeuruhine,” naaure jetao Joan aina Saantiaao. <sup>55</sup> Ne jetaote, acaauru rene nauriteriin jetao:

“Caohachaai nitohanai ichaain nihacachene,” naain jetao, acaauru cotaicha rijitiin caohate Jesuso.

<sup>56</sup> Niritohane baiha jetaote, leeocho neseu jetao cuure.

*Jesoso aina cunaa jerecuruha cachaaurune*

*(Mt 8.19-22)*

<sup>57</sup> Inae bero cuhane cuujeeuruhane jana jetaote:

“Curuaanaa, cuhine jaaun niha natiine, itolere bana ii aina nenea jereeurra,” naa Jesoso rai leinjiin cachane jana jetaote:

<sup>58</sup> “Aonaan, arolarihuru niha natiinte, sininajaanu siriin naaonjoaurera. Jerichanejeeintechu, sininajaanu siriin ne tajaecurura. Nii jana canu inaraacha cohajei- Cachanein nejanohanune, coatiha nihei chunijihun neloraain nesuru-cuaaunne jaanuta,” nae jetao rai Jesoso.

<sup>59</sup> Niritiin jetaote, leeocho rai:

“Chajaau canihara,” naa Jesusone jana jetao:

“Curuaanaa, jauriaanejeen canu cohacune, oha canu inacane reentihain aina nenicha,” naane jana jetaote:

<sup>60</sup> “Niriimiin, caa chabana nitajenaachara quicha tei ichaonaa ranaa jeriheichuru, ecu nejesinajeen ita coaracurumiincha. Ii caniha uute, Cana Coaunera Cojoanonaa be-bejeeicha,” naa Jesusone jana jetaote, <sup>61</sup> leeocho netonai:

“Curuaanaa, ii ainane unaa jereun canuhetonai. Jauriaanejeen canu cohacune, canu nenajaan nenacaauru rai necoenicha,” naane jana jetao:

<sup>62</sup> “Nete, Cana Coaunera Cojoanonaa que nenea jeriha cachane, itolere bana niicha ichana jerei jianihane caohachae,” nae jetao Jesoso.

## 10

### *Caainsi choonca coroatajai Jesoso letonocuru*

<sup>1</sup> Nitohanihane baiha jetaote, caaunsi choonca coroatajaain jetao aina nerelacaauru janijiin jetao, coroatajaanana coroatajaananaain najiniha letoanajae Cana Curuaanaa Jesocurisito, nii turuha curichaainne jaaun neseeuuru naineen cuuruhane coina.

<sup>2</sup> Nitohaneen letoanajaain jetaote: “Esinae rauhijiriin arajiinte neeure Cana Coaunera coitucunaa jereraauru cachaaurura. Nete jataain coroatajaecure acaauru relaeranuurrura. Aihane jaun Cana Coaunera bajauchete neeine acaauru relaeranuurrura.

<sup>3</sup> Nii nitohanihane jaunne ena inara letoaanra. Nete jataain alalacaraan nii curiquicheen, taebiaen mululune jana situha cuha irine rijijieen curiquicheenne jaunra. <sup>4</sup> Jiaonriha inara coriqui, inara atora, inara safato, naaonjoaihunri amaan cuhichenera. Coa chunijiun inacuhin, chuni rai caeneenejeen ereein cuhache.

<sup>5</sup> Chaen chunijiun loreri asae turuhichene, ‘Raotojoeen neeuche saain caa loreri asae neinequichenera,’ naauche inara turuneeicha.

<sup>6</sup> Nii jana nii loreri asae niha caohachaaain nenea jereraaurunete nerausiajeen neeurureeinha. Jana

caohachaaain raotojoeein nenea jerecurenihane, coatiha nerausiaecururiaainta. <sup>7</sup> Chaen chunijiun nese que turuhichene, leinjiin loreri asaecha neein, lenonecuruhane jaan que lenoneein, acau cohin, naaonjoaanchera. Niha rauhi, coreteraauruha amihanenacaurune jaanura. Jiaonriha lorerichuru naineein cajihaneein amuhemuhequichenera. <sup>8</sup> Chaen chunijiun nese que turuhichene jaan, caohachaaain inara raain inara coroatecuruhane jaan que lenonecuchera. <sup>9</sup> Chaen ecu neeuruha cunaitenacaurune, acaauru rautaain, ‘Inaen ichuunnijih, inara caje Cana Coanera Cojoanonaara,’ naain acaauru rai beeuchera. <sup>10</sup> Leinjiin neseu turuhichene jana, ecu inara coana jerecurenihane: <sup>11</sup> ‘Cau inara neseu turuhacaanune jana canacaanu tijia que nitiririchana utoonena riariaain ratirihacaanu, “Coaraain cau neein nainaacuche,” naain ichacaaunne que nainaquichene coina. Nete laen, inae ichuunnejeeoriha inara caje Cana Coanera Cojoanonaane saijieein que jaolecohichene coitucuhichene caohachaera,’ naain acaauru rai beein, jelai caje amuuchera. <sup>12</sup> Nii inara coiinteraauru cachaaurute, neecha aansaineein ichaonacaauru Sodoma cocoaichacuru amurijiriin jataain caseteco tabai coaraa cuurureeincha,” naain nii rai niicha letoanojoinunri rai be Jesoso.

*Erenaa tonoraichuru cachaauru*  
(Mt 11.20-24)

<sup>13</sup> Niritiin jetaote: “Cairichaaajoaaiche, Corasiin, Betesaaida, naaonjoaain nese cocoaichacuru, jataain necairichanaa coariquicheeinne jaun. Bana inara rai cojoelanaacojoai ichacaaunne rijijieein, Tiro, Sidoon, naaonjoaihun cana lauri Isaraelitanelanaala ichaonacaauru rai cojoelanaacojoai ichacaaunne jana niha nete, acaauru ichoaichaniha inae Cana Coanera que suujua acatecuruhane coarateein, baaso ichajeein ichaauruhane jianeein neeuruhane coujunacane que inaderaain costaro siri caje nenea cajione jiaain, ajane que nerujuaain neeurure.

<sup>14</sup> Nitohaneeichene jaunte, inae nii cojoanonaa que turuhane bana, Tiro, Sidoon, naaonjoaihun cana lauri Isaraelitanelanaala ichaonacaauru amurijiriin, caseteco tabai coaraa curiquicheein. <sup>15</sup> Jana inara Caferenaanon cocoaichaneeinchene, inacojoeein dedeeu cuha nocoetona jereein coauquiche. Inarate, usi tabai cataaun jaonojoneein nitajih curiquicheein,” naain bihane baiha jetaote:

<sup>16</sup> “Nitohanihane jaun, caohachaaain inara raerate, jerichanejeein caohachaaain canu netonoai raa aicheein. Jana, inara que jaolequiin, inara ranaa jeriheichurute, jerichanejeein canu que jaolequiin canu ranaa jerenihane

jaun aihurureein. Nii rijijieein techu, canu que jaolequiin, canu ranaa jeriheichuru, jerichanejeein caletoaera Cana Coanera que jaolecoha aihurureein,” nae rai nii letonocuru rai Jesoso.

*Jelaiha cauha cuuruha caaunsi choonca coroatajai nii nicha letoanojoinunrine*

<sup>17</sup> Nitohaneein letoanajaane jaaun cuhin jetaote, caje jelaiha rachoojoein turuhin jetao:

“Curuaanaa, ii letononeein nihacaanune jaunte irihacaanune, coitucuhichuru nihanatiin canacaanu ere tonoraain neeure,” naauruha nii caaunsi choonca coroatajai letonocurune jana jetaote:

<sup>18</sup> “Aihachuhisi. Jiacane amuneein dede caje naluha uha Moconajaerane janane coarajeeun. <sup>19</sup> Canune, nitohaneein itolere que nelateein laraajiin cuhin, acanocuru, canaanru, naaonjoaihunri ichoae situhin, itolere coitucuhichuru amuritohiche, nii necairichanaa coaraelaanaalane caina inara letoaaun. <sup>20</sup> Nete, nii nitohaneein inara ere tonoraain neeuruha coitucuhichurune nihanatiin que rachoojoein nenea naineneeiche. Inae laenanohineein niha Cana Coanera Quiricha cuhane dedeeu inara curuaacuruneecha quete laen nainequiche rachoojoeichenera,” nae jetao acaauru rai Jesoso.

*Rachoojiha Jesusone*

*(Mt 11.25-27; 13.16-17)*

<sup>21</sup> Nitohaneein turuhin itolere ichacuruhane beeuruha nii rai letonocurune jaun jetaote, rachoojoein Cana Coanera Suujue que suujuequiin jetao:

“Ii, dede, chauratane, naaonjoaain Coanera neein, itolere Curuaanaa neein neeine coroaecaaunra Ofa. Iite, nii itolere coitucutoha nocoetonacaauru que coitucueratelanaala, nii cha que nelatihei rijijieein nenacaauru que nii coitucuerelanaala nenea coitucuerateeicha. Aihara Ofa. Nitohaneein jereeine jaunte ichaaicha,” naa Cana Coanera raine baiha jetao:

<sup>22</sup> “Ofate caque itolere coitucuerateein ne, coitucuhin nihanune caina. Nihei chuni canu coitucunaa nainera, ca-coitucuerateniha Ofane. Nii rijijieein chu canu, rai Calao-hineein, que coitucueratenihanune, nihei chuni Ofa coitucuera. Canu, rai Calao-hineein coitucueratenaa jerichaunne jaanruhachate Ofa coitucuurureein,” nae jetao rachoojoein Jesoso.

<sup>23</sup> Nii baiha jetaote, jelai tein aina nerelanacaauru rai jetao: “Nerausiajeinte neeiche, caa ena inaraacha coarai coaraain neeichene jaun. <sup>24</sup> Arajii *profetacuru*, chaen reycuru, naaonjoaihunru inoesihurute niqii, caa ena

inaraacha coarai coaana jereein, caa inaraacha aonai aohana jerecurelu. Nete, nii coaraain, aonaain, naaonjaaunrenelu,” nae jetao acaauru rai Jesoso.

*Samaria cocoaicha que parabola que cuaain, leinjiin cacha relaera relaa Jesusone*

<sup>25</sup> Niritoha Jesusone jana jetaote, rene turuhin jetao, “Tohanrihanicha,” naain nechua jataain coujuha jetao:

“Cacha relaera, cha ichareeun chariji bana nitajenaachara ichaonaa que ichaonaa nainichaaunne coina,” naa rai leinjiin Moisesa naitoonjoan rauhi que cacha relaerane jaun jetao:

<sup>26</sup> “Tonaainjia laenanohineein ne Moisesa aitoonjoan rauhi kuhane ereretaain coaraaine jana,” naa rai Jesusone jaun jetaote:

<sup>27</sup> “ ‘Jataain ishujua, ii suujue, ii coichana, naaonjoain aina cutaain, ii Curuaanaa ii Coaunera que ii suujua acatein, aca jerihane rijijieein coitucuhin naitoonjoan ichaain neeu. Chaen ijiabereeo belaaain coaraain neeine rijijieein, chamute cacha belaaain neeu,’ naainte ne nii rauhi kuhane,” naain jetao tonorae nii Moisesa naitoonjoan rauhi que cacha relaera.

<sup>28</sup> Nii jaun jetaote:

“Jataain caohatiinte aitohi. Nitohaneein neeinete, ichaonaa chariji bana nitajenaachara que niha curiquiicha,” nae jetao rai Jesoso.

<sup>29</sup> Nii jaun jetaote, jaiti jitaain nii niicha coitucunaa jerei beniha raine que nainaa Jesusone coina jetao:

“Charijina camute cacha neein belaaain ichaoreeun,” naa Jesoso raine jana jetao:

<sup>30</sup> “Aonaun. Coaraaunachuhinti, leinjiin cacha jetao, Jerosaleen caje Jericoo kuhane jana, bero kuhane eruhin, enuha que faofoaain sohin-rai cajione ruluhin-jitariin niicha siriine maajeein ruluhin-ateinane lalajeein ratiriin amuuruha necha aansaineein ichaonacaauru cachaaaurune.

<sup>31</sup> Nii jana jetao, nii jeelai bero kuhane cuujiha leinjiin Israelitanichaachene lauri caje nena saseredotene jana, najiniha niha nii cachane coariin, comarohin rauhi-jiriicha situhin amue. <sup>32</sup> Nii jana jetao coaiten caaijie cuujiha, leecha Israelitanichaachene lauri caje nena

Lebitane jaun, acaentonai coariin, inauheneeicha coaraajeein comarohin rauhi-jiriicha situhin amue. <sup>33</sup> Nii jana jetao, acaauru caaijie cuujiha leinjiin cana lauri Israelitanelanaala nena inara jaole Samaria cocoaichane jaun jetao, coariin, cairichaaajoaain coaraane jaun jetao, <sup>34</sup> rene nichuuntaain erene aina bino caje ichanohineein nena coi que culejeein jetao, nii nocoasaja coichain, cajione que

conajaain jetao rai cabario ichoae lauriaain, coreteein turunaanaja leinjiin loreri asaae amaain ecu teein jetao berai.

<sup>35</sup> Nii cojoanoon jetaote, rai coriqui rocohin jetao nii nenaanaja erora corete jetao nii Samaria cocoaicha. Nitohaneein coreteein jetaote, ‘Atiin canu rai caa cacha beraain coichaau. Caa cacha coreniha ii coriqui jaohinene ii rai cainareeunni caaujiataain,’ nae jetao nii cacha, nii nenaanaja erora rai.

<sup>36</sup> Nitohanihane jaun, chariji jana nii nichatajaihuri caje nii necha aansaineein ichaonacaauru cachaauru sonojoi cacha belaaain coarae, rai jaberoco belaihane rijijieein,” naa Jesusone jana jetaote:

<sup>37</sup> “Nii cairichaaajoaain coaraain belaaain coichaera,” naa nii Moisesa aitoonjoan que cacha relaerane jaun jetaote:

“Inae laen coitucuhi. Nitohaneein iitonai ichaau,” nae jetao, rai Jesuso.

### *Mariha aina Marata loreri asaae turuha Jesusone*

<sup>38</sup> Nii baiha jetaote, jelai caje amuhin leinjiin neseu turuhane jana jetao, rai loreri asaae rae leinjiin ene Marata.

<sup>39</sup> Nii Marata nejera Mariha jetaote, ecu turuhin ereerejiha Jesusone jaun jetao aonaane coina rai tijia asaae nelauriariin lauheque. <sup>40</sup> Nii jana jetaote jelai niicha ichanenu aina ratiriin aihane jaun jetao, Jesuso rohan nichuuntaain jetao:

“Curuaanaa, tana itolereneein camijianeon aina jelai caratiriin aiha caa canejerane coaraainete rai aiteneei canu coroatajaniha uhane coina.” naa Maratane jaun jetaote:

<sup>41</sup> “Marata, aonaan. Jataain niha iicha ichanenune jaunna jataaain nererojoecaai. <sup>42</sup> Nete jataain leinjiincha ne cacha rai jataain nelatei. Caa Marihate nii jataain cacha rai nelateein nei janijiin rae. Nii jaun nerinaain chuni caje ruluera,” naain jetao tonorae Jesuso.

## 11

### *Cana Coaunera bajanaa que aina nerelanacaauru relaa Jesusone*

*(Mt 6.9-15; 7.7-11)*

<sup>1</sup> Jelai cuhin Cana Coaunera bajaa cuha Jesusone jana jetaote, inae nainaane jana jetao:

“Curuaanaa, aina nerelanacaauru relaalu Joanne rijijieein canacaanu relaau Cana Coaunera bajanaa quera,” naauruha aina nerelanacaaurune jana jetaote: <sup>2</sup> “Saan ai. Cana Coaunera bajaaichene:

‘Cana Coaunera,  
ii acaihaniji Cana Coauneraneein  
neene coitucuhin neeurumiin satiin cachaauru.

Nihei chuni ii baiha ii rijijieein nei.  
 Dedeeu iicha jerei ichacuruhane rijijieein,  
 cau chauratane que netonai  
 ichacurumiin satiin chauratane que nenacaauru.

<sup>3</sup> Canacaanu rai lenone teeute  
 canacaanu rai lanaeneeine lenone.

<sup>4</sup> Baaso ichaechajeein  
 nihacaanune nihanatiin  
 canacaanu que ii suujua acateeu,  
 canacaanu rai baaso ichaain  
 nenacaauru que  
 canacaanu suujua acateein nihacaanune rijijieein.

Jiaonriha osa que nesaruhin nihacaanune  
 nainatejeein neeine,  
 naain Cana Coaunera bajaauche bajaachenera,” naain jetao  
 acaauru relae Jesoso.

<sup>5</sup> Niritiin jetaote:

“Coaracuchenachuhinti inara tabaauru niha rai  
 belaichane jana, janotiin dede cataaun rai loreri asae  
 turuhin: ‘Quiicha belai, taa niha ii lenone cautene. <sup>6</sup> Ena  
 canu loreri asae turuha jataain quiicha belaine jaunne,  
 que coroaatihanune coina aitoon, neniha rai canuhacha  
 teeninune jaun. Ii raine jeelai que corereeeunni,’ naane  
 janate nainere: <sup>7</sup> ‘Coa carerojoecaa. Inae canu bereecuru  
 aina nesurucuaaunne jaun nimichuhin tenaa nainihaaun,’  
 naainte nesurunajaun neein tonorana nainere nii belaicha.  
<sup>8</sup> Netechu nimichuhin tenaa jerenihane saijieein conujiha  
 nii belaichane, atiin nimichuhin jitariin niicha latei tenaa  
 nainere. <sup>9</sup> Nii rijijieeinte Cana Coaunera caje cha lateein  
 bajaachene, inara rai inaraacha latei tereein. Cha lateein  
 ariin bajaera raite, cha teein ne Cana Coaunera. <sup>10</sup> Satiin cha  
 lateein ariin bajaerate, niicha latei eruhin ne. Nitohaneinte  
 rohan nichuutaain cha bajaacachane, rai cha teein  
 naaonjoareein Cana Coaunera,” naain jetaote,

<sup>11</sup> “Coaracuchenachuhinti inara, inara caje ate bajaain  
 niha inara calaohine jana, inara, inacaneein rai acano  
 teriquiche. <sup>12</sup> Ainhane inara caje taje bajaane jana rai canau  
 teriquiche.

<sup>13</sup> Coaracuchenachuhinti inara baasoneein ichaohichene  
 natiin, caohacha nejesina teein neeiche inara bereecuru  
 raine. Nii amurijiriin techu lateein caje bajaain neeichene,  
 rai Suujue que suujuequiin neeichene coina, nii bajaera  
 rai Suujue teein nereein dedeeu nena Cana Inaca Cana  
 Coaunera,” nae jetao acaauru rai Jesoso.

*Moconajaera ichanohineein niicha ichai ichaa Jesoso beeuruhane*

(Mt 12.22-30; Mr 3.20-27)

<sup>14</sup> Nii baiha jetaote, suujua cuhane coitucuchuhi sirihane jaun, caaun eresilanaala niha leinjiin cachane jana jetao, caje sitaain rautae Jesoso. Inae caje mituhin amuha nii moconajaera letono coitucuchuhine jana, inae iriha nii eresilanaala nena cachane coaraain jetaote, jataain cojoaelatoore nii ecu neein coarajeeurera cachaauru. <sup>15</sup> Ne jetaote tabaauru: “Coitucuhichuru curuaanaa Beelseboote caa cacha rai catohanai ichaane jaan tihane jaun, caa catohanai ichaera,” naaure jetao Jesoso coarajeein.

<sup>16</sup> Jana tabaauru jetaote, esinae rauhijiriin aina niha Cana Coaunerane coaracuruhane coina nechu cojuha jetao, cojoe-lanaacojoai ichaane coina caje bajaare. <sup>17</sup> Ne jetaote, nechu cojuha aitocuruhane coitucuha raotojoeine jaun jetao:

“Inarate caa coitucuchuhi ichanohineein cunaitenaa cacha rautaanune jaun, Moconajaera letononiha canu beeiche. Nete inara coitucuhichene rijijieein, satiin caa atane que nenacaauru ita que nejerateein neein ita sooruhanete, jini-iquiin ita ichao itajeeurureein. <sup>18</sup> Nii rijijieein techu, nii coaaquichene rijijieein, nejesinajeein ita que nejerateein neeuruha rai letonocuru ainane, ita ichao itajeeurureein Moconajaera aina rai letonocuru. Nitohanihane jiniiquiin nii cha que nelateein neeururihei. ‘Nii coitucuhichuru curuaanaa Beelseboo caletoaane aina, coitucuchuhi ichanohineein cunaitenaa caa cacha rautaa,’ canu beeichene jaunne caa inara rai aitoon.

<sup>19-20</sup> Inara tabaauru, chunocoha cacha suujua caje coitucuchuhi sitanaa jerecuruhanete, ‘Cana Coauneraacha icha-neni ichaeraniha’ beriquiche. Jana laen canu, cacha suujua caje coitucuchuhi rocohanune jaunte, ‘Moconajaeraacha ichai ichaeraniha’ canu beeiche. ‘Nete laen, Moconajaera letono coitucuchuhi rocohanu cajene jaun, canu, Cana Coauneraacha ichai ichaeraneein, Moconajaeraacha ichai itajeraneein nihanune coaraquichene saijieein aitocoiche.

<sup>21</sup> Nii rijijieein techu, jataain laraajiin nena cacha, rai biji achune aina rai loreri beraihane, satiin rai loreri asaae nenacaauru rai rucuhele rulunaa nainene caje chuni. <sup>22</sup> Nete laen, jataain amurijiriin jataain laraajiin nena, turuhin caje nii rai rucuhele niicha berai ruluha uhane, enaacha caje nii biji achune ruluhin jitariin raine que nii rai rucuheleuru rulureein,’ naain jetao Moconajaera amurijiriin laraajiin itolere ichana nainihane,” be Jesoso.

<sup>23</sup> Niritiin jetaote: “Nitohanihane jaun canuhacha ichai rautaelanaala coarate, canu que nejeratenaa neein nihane



jaun ai. Jana canu aina Cana Coaunera rai cachaauru ranaa jeriheite, moconajaera aina nitajeeuruha cachaaaurune jerihane jaun ai,” nae jetao Jesoso

*Jelaiha mitunaja rene cauha moconajaera letono coitucuhine*

(Mt 12.43-45)

<sup>24</sup> Niritiin jetaote: “Nitohaneein leinjiin cacha caje mituhin amuha coitucuhuhinete, enohane jaanu ariirijie cajianeein joaereein amuhemujueein. Nii jana erusinihanete, ‘Jelaiha taolu mituhanune jaa rene cauha cuhanunete caohachae,’ nae. <sup>25</sup> Niritiin nii mituhalune jaa cacha suujua cuhane turuhane, aiha leinjiin loreri coneraelanaala caohatiin lojinojoneein rucuhenojoneeine rijijieein nii cacha suujua eruhane, <sup>26</sup> nacoaauneein jelaiha cauhin, caaunsineein amurijiriin jataain baasoneein nenacaauru coitucuhucuru cotijiaain amaaain, nii cacha suujua cuhane enohin ichaaoruha nii coitucuhuhichurune, jauriaanejeein aihalune amuritoheriin jataain baasoneein ichoae nii cacha,” nae jetao acaauru rai Jesoso.

*Esinae rauhijiriin rausiaenojoneein niha cachane jaan esine*

<sup>27</sup> Niritiin jaiti acaauru rai ereerejiha Jesusone jana jetaote, nii cachaauru jana toniin jetao:

“Nerausiaaeca ene ii janoaain efojialalura,” naa rai leinjiin ene ehequine jaun jetaote:

<sup>28</sup> “Aiha chuhisi niqii. Nete Cana Coaunera aitoonjoan aonaain tonoraain nenacaauru nii amuritoheriin nerausiaaecure,” naain jetao tonorae Jesoso.

*Cojoelanaacojoai bajaauruha necha aansai cachaaaurune*  
(Mt 12.38-42; Mr 8.12)

<sup>29</sup> Nitohaneein netaojiajeein, jataain arajiin turuuruha curuhacaain cachaaaurune jaun jetaote, acaauru rai: “Caa Moconajaera cojoanona que nenacaauru cachaaaurute, jataain necha aansaineein ichaoruhane jaun, acaauru rai cojoelanaacojoai ichacaaunne jerecure.

Nete Isaraelita neurenihane saijieein, dede caje cojoelanaacojoai coaracuruhane latelanaala, acaauru rai Cana Coauneraacha beratei biha Jonasine jana esenetaaurelu Ninibe cocoaichacuru. <sup>30</sup> Nii rijijieeinne canuhetonai inaraacha cohajei Cachaneein nejanohanaa nichaaunne, caa enene cojoanona que ichaonacaauru cachaauru rai Cana Coauneracha ichaneni beraneein neeun.

<sup>31</sup> Nitohanihane jaunte, inae satiin cachaauru ichao coitucuhin rucuheca Cana Coaunerane Cojoanona que turuhane bana, nimichureein Egipto bujuau nena atane

curuaanaa eneneein nenea reina, caa enene neiniquichene coulurujiane coina. Acate coriaji atane caje uhin turuelu, niicha coitucui biha Salomoonne jana aonaane coina. Nitohanihalu natiinte, Salomoon amurijiriin neinichaaunne saijieein, canu ere aohana jereneeiche. <sup>32</sup> Nii rijijieein techu, inae enene cojoanonaa que ichaonacaauru cachaauru ichao coitucuhin rucuheca Cana Coaunerane jaan Cojoanonaa que turuhane bana, inara colurujueeuruhane coina nimichua cuurureein Ninibe cocoaichacuru. Aiha nii Ninibe cocoaichacuru, inae caseteco coaracuruhane rai neuru jana acaauru rai Jonasi que beratihana Cana Coaunerane jana, cojoaelanaacojoai coaracuruhane latelanaala esenetaain nichao coreeuruhane jaun. Nete laen, Jonasi amurijiriin nei nichaaunne sainejeein canu esenetaeneeiche,” nae jetao acaauru rai Jesoso.

*Cacha cono niha cache notane*  
(Mt 5.15; 6.22-23)

<sup>33</sup> Niritoha acaauru raine baiha jetaote: “Charijieein teeinti, nene chuni cono mocohin bujuaihu tera. Niheichu rori asae nii cono telanaala ecuun nii cono mocohin te, satiin nii loreri asaee turunacaauru conohanau neeuruhane coina. <sup>34</sup> Nii rijijieein techu inara jaberoco cononeein ne inara nota. Aihane jaun, esinae rauhijiriin jataain caohachaain cha coaraain coitucuhin neeichenete, satiin jianacoon niha cureein inara suujua. Nete laen caohachaain cha coaraquichene nihanatiin que jaolequiin joaenreein chachaquichene, jataain nocohena tabai jana niha cureein inara suujua. <sup>35</sup> Aihane jaun, cha coaraain coitucuhin caohachaain nocohalajiin neeuche, nabana cha coaraquichene nihanatiin que jaolequiin neeichene, nocohenaneein nerotoha nii inara conaerane coataa. <sup>36</sup> Aihute itolere inaraacha coarai coitucuhin ichaquichene, nocohena coaraelanaala satiin jianacoon neeine inara suujua, raafariin conohanau cha coana rijijieein, esinae rauhijiriin satiin itolere coaraain neeichene,” nae jetao acaauru rai Jesoso.

*Cacha relaurera aina fariseeocuru colurujihana Jesosone*  
(Mt 23.1-36; Mr 12.38-40; Lc 20.45-47)

<sup>37</sup> Inae niritiin cachaauru rai ereerejihane nainaa Jesosone jana jetaote, rai loreri asae lenoniha cuhane coina jetao cotijiae leinjiin fariseeo. <sup>38</sup> Nii jaun cuhin, rai loreri asae turuhin nitohanihana acaauru ichaone saijieein biji culeje lanaanla rori ichoae nelauriaa Jesosone jaun jetaote, cojoaelate jetao nii cotihara fariseeo.

<sup>39</sup> Nii jaun jetaote:

“Inara fariseeo neeichenete jataain inara jaberoco culeena inaaiche niqui. Nete nii saijieein jataain banejelanaala

calanaineein ne asijiauhin, naosateein, naonjoaainchene coreniha inara suujua cuhanai. <sup>40</sup> Asoneeojoaachenaate. Tana nii jianacoon nenea inara jaberoco coaunera inara jaberoco cuhane nenea, inara suujua netonai coaunaane coitucuhichene. <sup>41</sup> Aihana jaun inara suujua coaraain inaraacha ichaneni ichaain neeuchete nukulocohin neeine inara suujua aina inara jaberoco,” naain jetaote acaauru rai,

<sup>42</sup> “Cairichaaojoaache fariseeocuru, cache caohachaniha nocoetocoichene coaracuruha cachaaurune coina, biha inara rai rauhine rijjijeein nii lechoonca turineein inaraacha taojiai inara temule caje le turii teeichene saijjееin jeriha Cana Coaunerane rijjijeein inara amute cachaauru belaaain, nii chuni que jaolequelanaala satiin ita rijjijeein cachaauru coaraain neneeichene jaun. Aihane jaun, nii cache caohachaniha nocoetocoichene jianein inara amute cache belaaain, nii choae tacaain aitoa inara rai rauhine rijjijeein ichaaоче.

<sup>43</sup> Cairichaaojoaache fariseeocuru, esinae rauhijiriin jataain nelateein nenea rijjijeein sinacoca asaae rori caohacha janijiin nichoae nelauriaain, inara que suujua acatein, chunijiun inara eruuruhane inara rai ereein, naonjoaauruha cachaaurune jeriquichene jaun.

<sup>44</sup> Cairichaaojoaache. Charijjееin teinti atane bana shaquuin nichoae situhin amue cache, asaaun niha calanaine coitucuelanaala. Nii rijjijeeinte ne, inara suujue cuhane calani neosateeichene coreniha,” naa acaauru rai Jesusone jaun jetaote:

<sup>45</sup> “Cache relaera, fariseeocuru que niritiin canacaanu quene maajeein ereeine jaunne, saneein rautaenihacaanu,” naa acaauru caje leinjiin Cana Coaunera aitoonjoan que cache relaerane jaun jetaote,

<sup>46</sup> “Cairichaaojoaache inara netonai. Nitohanein ichao-hiche inarane que ainaan tocohaneein, ichaonaa anajiin tein, inara amute cachaauru cairichaaeriin neeichene jaun.

<sup>47-48</sup> Cairichaaojoaache, Cana Coaunera ere bera *profetacuru* sohin jaoruha inara foerateracurune coitucuhin, baaso ichacuruhane coitucuhichene saijjееin inara netonai acaauru rijjijeein neeichene jaun.

<sup>49</sup> Nitohaneriquicheeine coitucuhinte: ‘Acaauru raine, *profetacuru*, afosotooru, naonjoainuri letoareeunni. Nii janate, tabaauru sohin jaohin, tabaauru que nejeratein, acaauru que nererojoecaa curiquicheeincha,’ naain besilu Cana Coaunera, nitohaneichene coitucuhane jaun.

<sup>50</sup> Nii jaunte, cana rai chauratane coaunaalu Cana Coaunerane caje coauneein, nii inara foerateracuru aina nii inaraacha sohi inaraacha jaorilu *profetacuru*

coichana core coaratiha cureein inara que Cana Coaunera.  
<sup>51</sup> Nitohaneeinte nii Abeli sohin coichana jaohalune jaan caje coaaneein, Cana Coaunera rai lenonecuru mocooruha saseredotecuruhachane jaan rori aina *santuario* cataaun teein inara foerateracuruhacha atinailu Sacariasi que tiaaajoaain caa enene neiniquichene que nii core coaratiha cureein Cana Coaunera.

<sup>52</sup> Cairichaaajoaiche, Cana Coaunera ere bera Moisesa naitoonjoan que cacha relaurera; Cana Coaunera naitoonjoan coitucuhin neeichene saijieein tonorana jerelanaala neein, coitucuhin tonorauruha cachaaurune jerelanaalane maajeeine jaun,” nae caauru rai Jesoso.

<sup>53-54</sup> Niritoha acaauru raine jaun jetaote, aina obajeein, nechu jataain tonaane coulurujeeuruhane jaan lera ariha jetao, Jesoso rohecaure Cana Coaunera naitoonjoan que cacha relaurera aina fariseecuru.

## 12

*Baaso ichacuruhane nihanatiin caohacha ichaa nocoetocuruhane coataa cachaauru relaa Jesosone*

<sup>1</sup> Nitohaneein araai oharaancaain netaojiaauruha cachaaurune jaun jetaote, nejesinajeein ita sururucuruhane jana jetao, aina nerelanacaauru rai jetao: “Jiaonriha aihuruha fariseecurune rijjijeein asinojoneein baaso ichaain caohacha ichaa nocoetiin nihache. <sup>2</sup> Nii asinojoneein coitucueraelanaala baaso ichaain caohacha ichaa nocoetocoichene nihanatiinte inae ecu tihane bana coitucunojoinereein. <sup>3</sup> Nitohanihane jaunte, inae nii cojoanonaa que inae turuhane bana, nii coitucueraane coataa asiin ereeichene jaan coitucunojoinereein. Jana nii coaraa chunine coataa asiin inaraacha beite satiin aonajera urichoo coitucunojoinereein.

*Esinae rauhijiriin coasinacai*

<sup>4</sup> Nitohanihane jaunne, jataain canuhacha belaaineeichene rai aitoreeunni. Jiaonriha inara sohin inara jaonaa jerera que casiin neeichene, nii inara atinaaruhane baiha nii chatohaneein inara teein inara itajenaa nainecurenihane jaun. <sup>5</sup> Nena laen esinae rauhijiriin coasinacai que inara rai aitoreeunni. Nii ohin niha inara jaberocone baiha usi jana inara suujue itajeranu quete laen nainequiche casiin neeichene. Aiha laen, nitohaneein cana tenaa nainerate laen naine coasiin ichaohacane.

<sup>6</sup> Tana nii coitucuhichene rijjijeein jataain corelanaala nena corootajajei moneda coriqui coreniha saoquii tajae laaoinaa que necoreteeichene. Nete nitohaneein cachaauru rai jataain cha que nelatenihane saijieein, nii leinjiinniji

acaauru baitene Cana Coaunera. <sup>7</sup> Nii rijjijeein techu, leinjiana leinjianaain janiinojoneein ne inara couturijihuru. Aihana jaun, itolere tajaee laaoinaacuru amurijiriin nelateein neeiche Cana Coaunera raine jaun, jiaonriha casiin neeichene.

*Cachaauru que acaneein nihane coitucuerateeuruhane jeriha Jesocurisitone*

(Mt 10.32-33; 12.32; 10.19-20)

<sup>8</sup> Chunocoha cacoitucuhin canu coreniha laraajin cachaauru acatiha netiin ereein neine, inae Cana Coaunera Cojoanona que turuhane bana, Cana Coaunera aina letonocuru anjeraauru notaracae netiin canu, acaihaniji inaraacha cohajei cachaneein nejanohanaa nichaaunne aca coreniha erereeeni. <sup>9</sup> Jana chunocoha, cachaauru que canu neein nihanune coitucueratelanaala nenaane, acaentonoai coitucuha cuhenereeeni canuhetonai, Cana Coaunera aina rai anjeraauru acatiha netiin.

<sup>10</sup> Canu acaihaniji inaraacha cohajei Cachaneein nejanohanune que baasoneein ereein nei que nihanatiinte suujua acatena nainereein ofa Cana Coaunera. Nete laen baasoneein Cana Coaunera Suujue que ereein nei que suujua acatenereein.

<sup>11</sup> Nitohanihane jaun inara colurujueein inara amauruha sinacoca asae Joriocuru cocoainanacaihuri, joesiocuru, naaonjoainuri renene, jiaonriha chaque tonajeein cuhichene. Coa: ‘Tonaainnera erereeeni,’ naain nocoatiin ereeichene jaanu cocuhin cuhache. <sup>12</sup> Inae ereeichene coina neeichene janate, caohachaaain ereeichene coina inara relaa cureein Cana Coaunera Suujue. Coatiha inara suujua caje rocohin ecu ereriheicheein,” nae jetao aina nerelanacaauru rai Jesoso.

*Jataain alalacaraa coriquihonacaauru ichaone*

<sup>13</sup> Nitohanein cachaauru relaa Jesusone jana jetaote, nii arajii cachaauru caje leinjiin cache jetao Jesoso rai:

“Cache relaera, canu nejera rai aitoote, canu rai canacaanu inaca amureecha ratirii rucuhele canacaanu rainein nena leruhin teeine canu raicha,” naa Jesoso raine jaun jetaote;

<sup>14</sup> “Chana jana chaen, cocoainanacainein canu tein, nitohanai rucuhanein inara rene caletoe inara inaca amureecha sirii rucuhele leruhin tihanu inara raine coina,” naain jetao,

<sup>15</sup> saain nii ecu neein aonajeurera cachaauru rai jetao: “Jiaonriha itolere siriin necoriquijiaain nena coaquiiche inara netonaine. Coatiha coriqui siriin nihacanecha que nelateein nihei cana ichaota,” naain jetaote;

16 “Coaracuchenachuhinti niqui niha leinjiin cacha, jataain itolere siriin coriquihonane. Nii jaun jetao, jelai teein atane siriin, arajiin ocoana sirihane jaun jataain arajiin rai temulecuru taojiaie.

17 Nii jaun jetaote: ‘Cha laen ichareeun canu temulecuru canuhacha taojiaie ainata. Inae nihei rucuhecaaanne jaanuta,’ naain jetao coacuhin; 18 ‘Saan. Inae canuhacha ichaneni coitucuhanu. Jitariin canu temulecuru coloheriuru comaain jahinne, nacoauneein leeochoaauru lorerichuru tabaihuri jareeun, jitariin catemuleeuru canuhacha taojiaie rucujueein, jitariin carujueleeurune maajeein rucuhecaaan nasae teenne coina. 19 Nii baihanee laen caraajenihane: Inae niha araai jaanacaneein ichaohin, tonajelanaala acau cohin, lenoneein, rachoojoein naaonjoaanune jaanu,’ naain suujua cuhane iriha nii coriqui coriquihonane jana jetaote; 20 ‘Asoneeojoaanaate, ena cojoanotiin cuhanete oriquiinchaa. Nii ii rucuhele inacojoein arajiin rucujueein chunaain iicha sirii, chaa raineen chaainti niha cureeinta,’ nae jetao rai Cana Coaunera.

21 Nitohaneehanee jaunte, nechuu jataain raineen chaque namute cacha corootajanelanaala rucuhele siriin nenaacacha, Cana Coaunera rai cairichanejeein ne, nitajihane rai nihane jaun,” naain jetao nii coriquihonacacha que erenaa *parabola* que acaauru relae Jesoso.

*Nere tonoraain jerihane rijijieein ichaohin nenacaauru be-  
raiha Cana Coaunerane*  
(Mt 6.25-34)

22 Niritohane baiha jetaote, aina nerelanacaauru rai jetao: “Caa quene inara rai erenaa jereeun. Jiaonriha lenoneein ichaohiche jaanu aina inara cajioneecha que nererojoe-  
caaichene. 23 Jataain nelateein niha lenonene amurijiriinte, jataain nelateein ne inara ichao. Jerichanejeein techu nelateein niha cajionene amurijiriin jataain nelateein ne inara jaberoco.

24 Coaracuche nachuhinti temule jaain, niicha quiineeuri rucuhecuruhane jaanu coloheri siriin, naaonjoaain nee-  
ruriha rohirihuru. Nete laen Cana Coaunera, lenoneein ichaaoruhane coina acaauruhacha quiine teein ne. Inarate rohirihuru amurijiriin jataain nelateein neeiche.

25 Inaonjoa saain nihanatiin itolereenein suujua cuhane coaauca cachane nihanatiin, nichao cariaain ichaonaa naini-  
hei. 26 Chanuna aansijiin laajojiri que coacuhin neeichene nihanatiin, ichana nainequichene coalanaala itolere que nererojoeaeriin neeiche.

<sup>27</sup> Coaracuche nachuhinti caohachaenanaain omarohin neeuruha caa ajaena ujuanecuru amihanejeein neeuruhane que airijiinne. Nete aihuruha caa ajaena ujuanecurune tocohaneein jataain caohachaaain inanacaenelu *rey* Salomoon, cajione caohacha que necoreteein nihalune saiijeein.

<sup>28</sup> Nitohaneein mocohenineein niha caa ajaena ujuanecuru natiinte, caohachaaain omarohin neeuruhane jaanu teein ne Cana Coaunera. Tana nii amurijiriin inara- cachaneein neeichene cajione terichaaain Cana Coaunerane esenetaaich-eneta.

<sup>29</sup> Nitohanihane jaun, coa lenoneein, acau cohin, naaon-jooaichene jaanuhacha que nererojoecaaeriin nihache.

<sup>30</sup> Satiin caa chauratane que Cana Coaunera coitucue-lanaala nenacaauru cachaaaurute, nechuh jataain nitoha-neein nererojoecaaeriin neeure. Nete laen, satiin inaraacha latei coitucuhin teraneein ne Cana Inaca Cana Coaunera.

<sup>31</sup> Nitohanihane jaun jeriha Cana Coaunerane rijijieein ichaaoruhachaaaurune jaan Cojoanona que coacuhin nee-ichenete lanaenereein inaraacha latei,” nae jetao aina nere-lanacaauru rai Jesoso.

*Dedeeu charijibana satonohelanaala ichaonaana jaan (Mt 6.19-21)*

<sup>32</sup> Niritiin jetaote: “Jiaonriha casiin neeichene, charijieein teeinti carenero beraain neeure irilaain sirichaauru, nii rijijieein inara beraain nerichaaunnine jaun. Inara Cana Coaunera coitucuheneeichenete, jataain coroatajajeein neeiche niqui. Nete jataain inara belaihan jaun rai Cojoanona que inara rareein Ofa Cana Coaunera. <sup>33</sup> Aihane jaun, jitariin nii inaraacha sirii rucuhele que necoreteein, cairichainejeein chaelai que latejiojoiiriin nenacaauru coroatajanecuche. Nitohaneein neeichenete, dedeeu charijibana satonoelanaala nena Cana Coauneraacha teeninu rariquicheein. Nerinaain inara caje nii dedeeu inara rainein nena ruluera. Nii bana asijiautooru nihanatiin ecu turuhin inara basijiahuna nainihe. Niheichu cojoano nihanatiin ecu enohin asaaena nainihe.

<sup>34</sup> Nitohanihane jaun jauriaanejeein caohatiin, nii chabana satonoelanaala nena, nii ena nitaje rai nena inara ichao, naaonjoai que coaacuche.

*Letonoa jatoraaain neeuche*

<sup>35</sup> Letona jatoraaain inara cajione jiaain neeuche, inara siri-cho mocohin conohanau. <sup>36</sup> Charijieein teeinti, nesirihate-naa beseta caje cauhin, acuujuu dadaa fatoroone jana, acuujuu joaracaain raaure nii letonocuru. Nii rijijieein jatoraaain neeuche. <sup>37</sup> Raotojoeinte neeurureein nii rai letonocuru, sinilanaala neeuruhane jana acaauru eruha nii acaauru

fatoroone. Esinae rauhijiriinte raajenihane rori ichoae acaauru lauriaain lenone que acaauru coroaatiha cureein nii acaauru fatoroon. <sup>38</sup> Dede cataaun, janonaa nichae, naaonjoaain turuhane jana, sinilanaala cohacuruhanete, raotojoein neeureein.

<sup>39</sup> Caohachaain inara rai caitoonjoa aonacuchete coitucuhiche. Chunocoha loreri erora turuhin basijiauha uha asijiatone coitucuhane, coatiha nii acuujua joracarihei, nabana enohin basijiauha nii asijiautone coataa. <sup>40</sup> Nii rijijieein inara netonai nainaain jatoroaain neeuche, turuha urichaaain na-coauneein nii jauriaa acaihaniji inaraacha cohajei Cachaneein nejanohanaa que,” nae jetao acaauru rai Jesoso.

*Letoera tonoraera aina letoera tonoraai*  
(Mt 24.45-51)

<sup>41</sup> Niritoha Jesusone jaun jetaote: “Leinjiin canacaanuhacha ii aina nerelanaanichaanune relanaa aitohi Curuaanaa, ainihane satiin raine maajeeinna aitohi,” naain caje bajaa Fedorone jaun jetaote,

<sup>42</sup> “Tana coitucuhichene. Chariji jian, nii jataain nela-teein nere tonoraeraneein loreri beraichanu que ratiri rai fatoroon, turuhanereen tiaain nii rai cachaaauru coroaateein acaauru sirihane coina. Tana satiin canuhacha cocoinai neeichene, canu cachaaauru beraichaneein neeichene coitucuhichene. <sup>43</sup> Jataain raotojoeinte nereein nii nere tonoraera, nii letoain ratirihane jaa ichaa jerihane rijijieeine jana, eruha nii fatoroone. <sup>44</sup> Nii banate, esinae rauhijiriin jerihane rijijieein ichaohin nere tonoraain nihane, aca cocoinaain itolere niicha sirii coaranu que tereein rai fatoroon.

<sup>45</sup> Jana, ‘Jaitijiecha carajaain lanae turuha rai fatoroone’ naain coacuhin baasoneein niicha beraihuri quichaaauru, enecuru, naaonjoainuri que jaolequin acau cohin, lenoneein, ajeein, naaonjoaane jana <sup>46</sup> eruhanete, rai cachaaaurunelanaala rai nere tonoraachuru cairichaa curichaaain Cana Coaunerane rijijieein acaentonai cairichaa cureein nii rai fatoroon.

<sup>47</sup> Jana inae nitohaneein coitucuhane saijieein, jatoroaain nelanaala nii letoaa rai fatoroonne tonoraelanaala, nenaate casetecareein jataain banejelanaala bisiin rai fatoroon. <sup>48</sup> Nete laen coitucuelanaala nena rai cacha, baaso ichaane nihanatiin coitucuuruhane saijieein baaso ichaeraauru fautaeriin cairichanojoiniha cureein. Nitohanihane jaun, quicha coitucui coitucuhetheratihanune jaancuru cajene, jataain jelai amuritoheriin bajareeunni, canuhacha jerei ichacuruhanete coina.

*Jesoso coreniha ita que nejerateeuruha cachaaaurune*  
(Mt 10.34-36)



<sup>49</sup> Canune caa chauratane que usi mocoha uun. Bajiaa nachuhinti chajaain mocohane jana turueneenlu. <sup>50</sup> Jataain necairichanaa tabai abaantanunete ne. Nii jaunne, nii que turuhanereen tiaain, que nererojocaeriin neeun. <sup>51</sup> Inacojoeein chachu, ‘Caa cana rai chauratane que jecha raoti ichaonaanaja turuaa uun,’ naaiche niqui. Aihei bajiaa. Raujiaain ita caje neleruhin niha cachane coinane turuunlu. <sup>52</sup> Nitohanihane jaunte, saoquiin le lorerijieeincha ita aina ichaonacaauru, ena caje coauneein ita caje neleruhin, nii nichatajaihuri que nejeratiha cuurureein nii coroatajaihuri. Jana coroatajaihurite, nejeratiha cuurureein nichatajaihuri que. <sup>53</sup> Jana calaohi aina te nejeratereein rai inaca. Nii jana calaohite inaca que nejeratereein. Jana acaauru nebate, rai cacunu que nejeratihane jana, rai cacunu netonai que nejeratereein. Rai nacano que nejeratiha nebaenene janate, nebaene que nejeratereein rai nacano,” naain jetao Fedoro tonorae Jesoso.

*Janonaa cojoinacaauru coitucuha cachane*  
(Mt 16.1-4; Mr 8.11-13)

<sup>54</sup> Nii baiha jetaote, leeochoaauru cachaauru rai jetao:

“Enoto soo nichajai que nijichorianaa coaraaichenete, ‘Urichaain elo,’ naain ereeichene, nii aitocoichene rijijieein esinae rauhijiriin uhe elo. <sup>55</sup> Jerichanejeein techu, enoto mitu coarajeein cana raotono nichajai caje uaain jiatuha cujuanane, ‘Ajaarotorichaain,’ naaichene esinae rauhijiriin ajaarote. <sup>56</sup> Cha coitucunaa jeriheichuru casajeeuru. Nitohaneein dede, cana rai chauratane, naaonjoain caje coaraain cha coitucuhiche natiinte, canu coaraaiche natiin, ‘Naaonjoa ichaonaane coinatae aicha,’ naain canu coitucunaa jereeneiche.

*Aina nejeratena aina raotojoeein niha cachane*  
(Mt 5.25-26)

<sup>57</sup> Chanuna baaso ichaain neeichene niha natiin, baaso ichaquichene coitucuhi nena jereneeiche. <sup>58</sup> Nitohanihane jaunte, inae ena caje coauneein colurujuenjoji ineriquicheein. Aihane jaun, joesio rene inara amaa inara colurujueranu ajiniha aina rucuecuche. Ainihanete, inae coulurujuenjoji nequichene jaan cojoanonaa que turuhane bana, inara netonai colurujuiha nii nejerateeeichene jaan jera joesio raine, inara tiha coaridiaauru bijihune, caresero cuhane inara enohaurureein. <sup>59</sup> Nii bana jelai caje mituriheeeichene nii baaso ichaquichene jaan core nainaaiche jitaain inara coriqui jaohinne reein tiaan,” nae jetao cachaauru rai Jesoso.

## 13

<sup>1</sup> Nii bana jetaote, turuha cuure cachaauru Jesoso rene. Nitohaneein rene turuhin jetaote, “Jerosaleen nenea Teenforo asaa lenonecuru sohin mocohin, Cana Coaunera coroaeca neeuruha Calileea cocoaichacuru tabaaurune janate, acaauru sohin jaonajaain, nii lenone acaauruhacha sohi coichana que acaauru coichana jasiite Filatora,” naain jetao Jesoso rai beeure nii cachaauru.

<sup>2</sup> Niritocuruhane jana jetaote: “ ‘Jataain naraaichuru amurijiriin osaaocuruhane jaun jecha aihure nii Calileea cocoaichacuru’ naaiche niqui. <sup>3</sup> Nete aine. Inara neton- aite ohin nitajeriquicheein, inara ichao coreein jeriha Cana Coaunerane rijijieein neneeichene.

<sup>4</sup> Jerichanejeein techu jerihane, ‘Nii leeochoauru Jeros- aleeun ichaonacaaurulu amurijiriin jecha osaaotooruhane jaun, nii le choonca fosaneeuri ichoae comoe nii ucu- uneein ininaanaja nenea Silohe,’ naaiche niqui. <sup>5</sup> Nete aine. Nii aihuruhane rijijieein techu inara netonai ohin nitajeriquicheein, jeriha Cana Coaunerane rijijieein inara ichao coreein ichaonaa jereneeichene,” nae jetao acaauru rai Jesoso.

*Inacaeniha temulene que parabola que cache relaa Je- sosone*

<sup>6</sup> Niritiin jetaote: “Leinjiin cache nocoana jana leinjiin temule sirihane jaun jetaote, inaacane coaraa cue. Nii jana leinjiinniji inacaenihane jaun jetaote, <sup>7</sup> nii ocoana beraicha cache rai jetao, ‘Aonaaun. Nichata jaanaca naineeinne niqui le jaanacaauru naineein turuhin caa temule coaraa una- jacon. Nena chabana inaacane jana coaraeneeun. Ai- hane jaun chajaain ena sauhin jaao. Cha inacojoeinte atane lanaaeca nere,’ naane jana jetaote: <sup>8</sup> ‘Aihachuhisi niquicha curuaanaa. Jauriaa nirijieein coarajeune, ena ajaanaa cuhane rai nasaji retuhin ajaena setuuru te temu- rau. <sup>9</sup> Nitohaneein tihanune saijieein inacaenihanete laen nainere sauhin jaohine,’ naain jetao tonorae nii ocoana be- raicha,” naain jetao cachaauru relae Jesoso.

*Nebetacanaa cojoanonaa bana leinjiin ene janori raro- ha- caera rautaa Jesusone*

<sup>10</sup> Nii baiha jetaote, nebetacanaa cojoanonaa bana sina- coca asae enohin jetao, cachaauru relaa cue Jesoso. <sup>11</sup> Nii jana jetaote, ecu ne leinjiin ene- lechoonca fosa jaanacani- hane caje coauneein baasoniha jaberococone jaun caaun cu- naiteein. Nitohaneein jetaote, suujua cuhane neein jaberoco

asaeca coitucuchuhine jaun, nii chariji bana neraujiasilanaala janori rarohacaain ne. <sup>12-13</sup> Nii ene coaraain jetaote, cotijiaain nichoae biji meracaain:

“Inaen ii cunai caje nerautaaicha ene,” naa Jesusone rijieeoritiin, cunai caje nerautaaain nichaauraaain jetao, Cana Coanera coraajeein rachoojoe nii cunaitenaa ene. <sup>14</sup> Nitohaneein nebetacanaa cojoanonaa bana cunaitenaa rautaa Jesusone coaraain jetaote, obaje nii sinacoca curuaanaa. Nitohaneein obajeein jetaote:

“Niha saota janoneein amihanenaana jaan cojoanonaa. Nii amihanenaana jaan cojoanonaa bana nerautaeratiha uuchera. Coa nebetacanaa cojoanonaa bana nerautaeratiha uhachera,” naa cachaauru raine jana jetaote:

<sup>15</sup> “Chanuna nebetacanaa janonaa bana cha ichaain neeiche inara netonaine saijieein, cha ichaain neeuuha leeochoaurune jereneeiche. Tana inara netonai nebetacanaa cojoanonaa bana, inara baca, inara boro, naaonjoinuri cosi batuhin amaaiche jesinaaeca cohane coinane. <sup>16</sup> Nii rijijieeiina caa ene Abaraaun nefoerateneein nena, lechoonca fosa jaanacaneein Moconajaera ichanohineein caaun cunaiteein nihane caje, nebetacanaa cojoanonaa bana rautaaun,” naa Jesusone jaun jetaote, <sup>17</sup> jataain nocoejeure jetao, nii aina nejeratenacaauru. Ne jetaote jataain itolere que nelateein, itolere ichaa Jesusone coaraain jetao coroaecure satiin cachaauru.

*Mosatasa ucuhe que parabola que cuuaain cache relaa Jesusone*

*(Mt 13.31-32; Mr 4.30-32)*

<sup>18-19</sup> Niritiin jetaote: “Coaracuchenachuhinti aansijihan mosatasa ucuhe natiin, nocoana jana temuha cachane jana omarohin fohecane, rai nunecuru que nucuhateeuruha tajaecurune. Nii rijiicha cache inae Cana Coanera Cojoanonaa canuhacha tei que ichaoha cachane,” nae jetao Jesoso.

*Faan jorerera que cuaain parabola que cache relaa Jesusone*

*(Mt 13.33)*

<sup>20-21</sup> Niritiin jetaote: “Coaracuchenachuhinti faan ichacuruhane coina neleeriha tabaaain nii colihane jaanu que jorerera teein, nichata sajeein coujunaca que arina coujunacate leinjiin ene, inae neleeriha tabaaain nii colihane jana caje arajiin faan jaane coina. Nii rijijieeinte neleeriha tabaaain colihane coina nena jorerera rijijieein, neruujiha cache ichaone coina nena ne Cana Coanera Cojoanonaa,” naain jetao acaauru relae Jesoso.

*Acuujua jaratoelanaala nenea**(Mt 7.13-14, 21-23)*

<sup>22</sup> Nii baiha jetaote, Jerosaleeun cuuruna jaaun jetao, situuruna jaaunru nenacaauru nenaanajaaunru, neseeuuru, naaonjoainuri naineein cachaauru relajeein cuujue Jesoso.

<sup>23</sup> Nii jana jetaote:

“Curuaanaa, jataainna coroatajaaecuruha caa nosa caje nichotenacaauru,” naain caje bajaa leinjiinne jaun jetaote:

<sup>24</sup> “Eenjeen. Nitohanihane jaun, nii acuujua jaratoelanaala nenea cuhane enooche. Arajiite niqui enonaa jerereein nete nainecurenereein.

<sup>25</sup> Inae ecu tihane bana nimichuhin acuujua fuha nii loreri erora nete, inara airiniha nedainequichene, ‘Curuaanaa, acuujua joaracaane enohacaanura,’ naaichene janate, ‘Inara coitucuhanune coalanaala, cha nequiche chaainti,’ naa inara rai nii loreri eroranete, <sup>26</sup> ‘Ii ainane lenoneein, acau cohin, naaonjoarejetocooanulu. Iite canacaanu relarejetohi canacaanu berooru cuhanera,’ naaichene janate, <sup>27</sup> ‘Inae inara rai aitocooaun, cha nequiche chaainti. Inara coitucuhaaun. Naain cacaje amuuche, baaso ichaechajeein ichaonacaauru,’ nareein. <sup>28</sup> Nii banate, inara airiniha nedainiquichene inara catu rihoneein chanaa curiquicheein, Cana Coaunera Cojoanonaa que neuruha satiin *profetacuru*, Abaraaun, Isaca, Jacobo, naaonjoainurine coarajeeincha.

<sup>29</sup> Nitohaneente enoto mitu nichajai coarajeein cana jaabiji nichajai caje, enoto mitu nichajai coarajeein cana raotono nichajai caje, enoto mitu nichajai caje, enoto soo nichajai caje, naaonjoainuri nichajai cajeeurute turuha uureein cachaauru, Cana Coaunera aina rai Cojoanonaa que neein nelauriaain lenonecuruhane coina.

<sup>30</sup> Nitohanerichaaainne jaunte, nii ena jaolecooruhane jaaunru nelatelanaala nenacaauru tabaaurute, ichoaichaniha ranojoneein niha cuurureein. Jana leeochoaauru amurijiriin nelaetoha nocoetonacaauru tabaaurute, satononejeein ranojoiniha cuurureein,” nae jetao acaauru rai Jesoso.

*Jerosaleen cocoaichacuru coreniha chanaa Jesusone**(Mt 23.37-39)*

<sup>31</sup> Niritohane jana jetaote:

“Chajaain ena caalai caje amuu. Ii sohinte ii jaonaa jere Erodesicha,” naauruha Jesoso rene turuhin fariseeocuru tabaaurune jaun jetaote:

<sup>32</sup> “Aiha niqui. Chajaain nii ataibinae rai: ‘Enene, eresi, eresi cojoanon, naaonjoaichurune coitucuhichuru sitaain, cunaitenacaauru rautaaain, naaonjoareeunni,’ naain benichuche. <sup>33</sup> Nena laen enene, eresi, eresi cojoanoo,

naaonjoaainchuru canuhacha ichaneni ichaaechajeein cuujuereeeunni, nii Jerosaleeun edaa onaa naineniha leinjiin *profetane* jaun, ecu turuhanune reentiaaincha,” naain Erodesi rai beratihane baiha jetaote:

<sup>34</sup> “Cairichaaajoaache nohane satiin Jerosaleen cocoaichacuru, inara rene Cana Coanera letonocuru, chaen *profetacuru*, naaonjoainuri bodoosiin ajeri que sohin jaonajaaonquichene jaun. Araai saaine niqui nitaro asae calaohichuru sararaain siniha ataoharine rijijieein, inara ranaa jereeun, nete cacoitucunaa jereneeiche. <sup>35</sup> Aihane jaunte inaen jelai neriquicheein. Inae cacoharariheeicheein nacoaauneein inara rene turuhanune reentiaaincha. Nii nacoauneein tururichaaunine cojoanonaa banate: ‘Raotojoein turuhine Cana Coauneraneein nena cana Curuaanaara,’ nariquicheein canu raicha,” nae jetao cachaauru rai Jesoso.

## 14

### *Laracaain cunaitenaa rautaa Jesusone*

<sup>1</sup> Nii baiha jetaote, nebetacanaa janonaa bana leinjiin curuaanaa fariseeo loreri asae lenoniha cuha Jesusone jana jetao colurujueeuruhane jaanu leratihane coaracuruhane caina, “Chatohanaicha ichareein,” naauruhane jaun jetao ecu coarajeeure leeochoauru fariseeocuru.

<sup>2</sup> Nii jana, niritiin coaucuruhane que nainaane jaun jetaote, ecu rohan niha leinjiin cacha laracaain cunaitenaane jaun jetao:

<sup>3</sup> “Nainihana nebetacanaa janonaa bana rautaeraa leinjiin cunaitenaane. Tonaquiche inara,” naain jetao Cana Coanera aitoonjoa que cacha relaaurera, chaen fariseeocuru, naaonjoainuri caje jetao bajae Jesoso.

<sup>4</sup> Nii jana inauheneecha curuaaequuin aonajeeeuruhane jaun jetaote, biji que nii cunaitenaa mucuhin rautaaain jetao letoae amuhane caina.

<sup>5</sup> Nitohaneein cunaitenaa rautaaain jetaote:

“Chariji inara caje nebetacanaa janonaa bana naluha rai toro acau netaojianaja atane jachu ucuacaain nena cuhanene jana, inauheneecha rocoelanaala coarajere. Ainhane rai calaohi naluha acau netaojiana jaan atane jachu cuhanene, nirijieein rocoelanaala coarajere,” naain fariseeocuru caje bajaa Jesusone jana jetaote, <sup>6</sup> tonoraelanaala inauheneecha aonajeeure.

### *Nesirihatena beseta que cotihanojoihuri*

<sup>7</sup> Niritoha Jesusone jana, nelaurianaanaja rori caohacha janijiin nichoae nelauriaauruha nii cotihanojoihurine coaraain jetaote, acaauru suujuatiha:

<sup>8</sup> “Chunocoha inara cotihaca nesiriatenaa beseta quene, jiaonriha rori caohacha janijiin nichoae nelauriaaichene. Nabana turuha uha inara amuritoheriin nelateein nenea cotihanohinete, <sup>9</sup> ‘Nii ii rori jianeute ecu nelauriamiin caa leeochoa,’ naa uha nii inara cotiharane, coejetiin rori baaso ichoae nelauriaa cunaa nainequiche. <sup>10</sup> Aihane jaun nii ajiniha inara cotihara nihane, rori baasonejeein nenea ichoae nelauriaauche. Nii banate turuhin, satiin nii ii rohan rori ichoae nelaurianacaauru notaracae, ‘Caa rori caohacha ichoae nelauriaa uura quicha belaa,’ naa nii inara cotiharane, ichei caohachanere. <sup>11</sup> Nitohaneein leeochoauru amurijiriin nelateein nenea jerenacaaurute, necoeje channojoiniha cuurureein. Jana nii nelatecuruhane coarate-lanaala nenacaaurute, raotojoein ranojoi niha cuurureein,” naain jetao suujuatenajae Jesuso.

<sup>12</sup> Niritiin jetaote acaauru cotihara cacha rai jetao:

“Cachauru cotijiaain corootenaa jereeine, jiaonriha ii nejeraauru, charaaichuru, iicha belaihuri, ii laurijiracuru coriquihonacaauru, naaonjoainuri cotihaquine. Acaauru cotijiaain acaauru coroaateine jana, ii cotijiaain ii coroaateeruhanete, inae ii rai nii cainaenereein Cana Coaunera.

<sup>13</sup> Nitohanihane jaun beseta ichana jereeine, cairichaihuri, nelatelanaala nenacaauru, bacosacuru, maosacuru, naaonjoainuri cachauru cotihacu. <sup>14</sup> Acaaurute laen ichei cainana nainecurenihane nihanatiin, Cana Coaunera ichei cainaa cureein, inae rai cachaneein nenacaauru ichatiha oo caje Cana Coaunerane bana,” nae jetao nii cotihara fariseeo rai Jesuso.

*Cana Coaunera Cojoanona que cacha relaa Jesusone  
(Mt 22.1-10)*

<sup>15</sup> Niritoha Jesusone jana aonaain jetaote:

“Bajiaanachuhinti Cana Coaunera Cojoanona que neein lenonenihacache,” naa Jesuso rai leinjiin acaauru aina rori ichoae nenaane jaun jetaote:

<sup>16</sup> “Coaracuchena chuhinti leinjiin cacha jetao, lenone jaain arajiin cachauru cotiharate. <sup>17</sup> Nitohaneein jetaote, inaan jatoroaa nii lenonene jana jetao rai letono letoae cotihana-jaane coina.

Nii jaun jetaote, cuhin acaauru rene turuhin: ‘Chajaauchejete lenone, inae jatoroaa lenonera,’ naain cotihanajaane jana jetaote: <sup>18</sup> ‘Saan, naininaaun. Ena atane coretichaaunne jaun coaraa cuhanunete ne. Canu que ii suujua acateeu,’ naain jetao berate leinjiin. <sup>19</sup> Nii

jana leeocho jetaote: ‘Lechooncaain toro amihanenaa que nelatei coretichaaun enane jaunne, acaauru coujuhin coaraa cureeun, amihanenaa que nelatecuruhane coitucuhanune coina. Nii jaunne ichei aitoon caque ii suujua acateeine coina,’ naain beratihane jana jetaote, <sup>20</sup> leeocho netonai: ‘Ena nesirihatihanune jaun nainihaaun uhanune,’ naain jetao satiin ita rijitiin beratihacoaaure, acaauru que suujua acatiha acaauru cotiharane coina.

<sup>21</sup> Nii jaun jetaote, jelaiha cauhin nii rai aitocuruhane rijitoejeiin biha cue rai fatoroon rai nii letono. Nii jaun jetaote obajeiin, ‘Chajaain soroneein nese sacutaain cuhin, cairichaihuri, cacha nelatelanaala nenacaauru, maosacuru, bacosacuru, naaonjoainuri cotijiaain cajiha uhanajaau,’ nae jetao rai fatoroon nii letono rai.

<sup>22</sup> Nii jaun jetaote, nii rai aitothane rijijieein satiin cachaauru chaque nelatelanaala nenacaauru cotijiaain jetao: ‘Curuaanaa, inae nii carai aitothane jaa ichacaaun. Nete jaiti caute nelaurihananaajaauru,’ naa nii letonone jaun jetaote: <sup>23</sup> ‘Chajaain nenaanajaauru naineein cuhin, unaa jereraauru leeochoaauru cachaauru cotihanihute nemomiin canu lorericha. <sup>24</sup> Coatiha inae canu loreri asaae lenonecururihaain nii jauriaanejeiin cotihanojoinunrita,’ nae jetao nii letono rai fatoroon,” naain jetao nii cacha tonorae Jesoso.

*Jesoso cacha nena jerichaane, necairichanaa abaantaacante ne.*

*(Mt 10.37-38)*

<sup>25</sup> Jelai caje amuha Jesusone jana, arajiin sacuuruha cachaaurune jaun jetaote, acaauru rai: <sup>26</sup> “Chunocoha canu esenetaain canu cachaneein nena jerihane, rai inaca, rai neba, rai comasai, rai bereecuru, rai nejeraauru, rai baihuru, rai jaberoco, naaonjoainuri belaihanane amurijiriin cacoelaain quere tonoraain nihanete ne.

<sup>27</sup> Canuneein nihanune coitucuhin canu cachaneein nena jerera, coroso que airichaaunnine rijijieein itolere necairichanaa abaantaain letohaanune jaan ichaain neeine. Jana ainihanane, coatiha canu cachaneein nena nainihe chuni.

<sup>28</sup> Tana inara tabaauru, leinjiin loreri janaa jerihane jauriaanejeiin nelauriaain: ‘Necha besautiana nainerichaaunni,’ naain coaacane coitucuhichene. <sup>29</sup> Nitohaneein coacuelanaala ichaain, nunuheniha nena tihane baiha janihanete, satiin ecu situhin coaraauru nainere: <sup>30</sup> ‘Caa leinjiin cachate niqui caa loreri ichana jere. Nete jauriaanejeiin besautiaane jaanu que coacuhin ichaenihane jaun ninaelanaala

ecu jiane,' naain erenaa nainecurure que cachaauru. Aihane jaun jauriaa nejeein besautiana nainihane coitucuhane coina coaauca nii loreri ichara cachane rijijieein coaumiin canu cachaneein nena jerera.

<sup>31</sup> Nii rijijieein techu jauriaanejeein nelauriaain coauna nainere leinjiin *rey*, leecha *rey* aina sonaana que nena jerihane: 'Necha lechoonca oharaancani soondarooru aina caa coroata choonca oharaancani soodaroo aina nena *rey* amuritona nainichaaun,' naain coaucane jana, <sup>32</sup> nainenihane coitucuhanete, jaiti coriaae niha nii nejeratihane jaa *reyne* jana, raotojoein jiniiquiin ita aina rucujueein ichaaoruhane coina jitariin nii leecha *rey* nejeratenajaacha bajai tihane coina aitiin nere beranu letoare.

<sup>33</sup> Nii rijijieein coacuelanaala, niicha sirii jianena jerehanaala nena, coatiha canu cachaneein nena nainihe.

*Cotebihane jianihane, nii chaque nelateniha tebene*  
(Mt 5.13; Mr 9.50)

<sup>34</sup> Coaracuchena chuhinti jataain nelatiha niqui tebene. Nete nii cotebihane jianihane, inae chaque nelateein nenere.

<sup>35</sup> Niheichu temule jaacane coina, atane jasiitihacane jaanu que nihanatiin nelaterihe. Nechu jataain joaereeinte jaoleenein nere.

Nii rijijieein nii chaque nelaterihe, relaanune rijijieein ichaohane baiha, jianein niha canu cachane. Caa caitoonjoan aonacurumiin uricho nacaauru," nae jetao nii arajiin sacuurera cachaauru rai Jesoso.

## 15

*Rai nitajenaa carenero eruha carenero beraichane que cuaain nena parabola que catcha relaa Jesusone*  
(Mt 18.10-14)

<sup>1</sup> Satiin naraaichuru Jorioocuru cairichaeriin Roma curuaanaa rai *impoestonu* que coriqui que cachaauru cobaraaurera, chaen leechaauru cachaauru baasoneein ichaonacaauru, naaonjoainuri jetaote, Jesoso rene turuure irihane aonacuruhane coina.

<sup>2</sup> Nii coaraain jetaote, "Caa cachate osaaonacaauru cachaauru raain nihanatiin acaauru aina lenonenajaque," naain jetao Jesoso necoeje chanuure Moisesa aitoonjoan que catcha relaaaurera aina fariseeocuru.

<sup>3-4</sup> Niritocuruhane jaun jetaote, acaauru rai: "Tana chunocoha inara caje lefashaain carenero siriquichene jana, nitajiha leinjiine nii iscoonchoonca iscooni ratiriin nii nitajenaa carenero ariha curiquiche eruhichenereein tiaaine.

<sup>5</sup> Nitohanein inae eruhichenete raotojoein baijiaain turu-aain, <sup>6</sup> loreri asaee inaraacha belaihuri, inara laurijiracuru,



naaonjoainuri cotijiaain, ‘Canu coroaecuche. Inae carai nitajenaa carenero eruhanu,’ nanaa naineriquiche.

<sup>7</sup> Nii rijijieein techu osaaocuruhane coitucunaa jerelanaala neeuruha nii iscoonchoonca iscooneeurine jana, leinjiin cacha osaaocane coitucuhin, Cana Coaunera lateein rene turuhane, nii iscoonchoonca iscoonni corojelanaala, nii leinjiin turunaacha coroaecure dedeeu nenacaauru,” naain jetao fariseeocuru tonorae Jesoso.

*Coretiin nenea moneda nitajenaa eruha enene que parabola*

<sup>8</sup> Niritiin jetaote: “Nii rijijieeintechu, leinjiin ene, lechooncaain moneda jataain rai nelateineein nenea caje nitajiha leinjiinne, tana raafariin mocohin, eruhanereen tihaain loreri asaji lojoiin caohatiin aririhane. <sup>9</sup> Nitohaneein ariin eruhane, tana niicha belaihuri, chaen rai laurijiracuru, naaonjoainuri cotijiaain, ‘Canu coroaecuche. Inaen canu rai nitajenaa jataain canu rai nelateineein nenea moneda eruhamura,’ nariha nii ene ne. <sup>10</sup> Nii rijijieein techu, ita corojeein neeure Cana Coaunera rai anjeraauru, nosa caje nichoteein niha leinjiin cachanera,” naain jetao acaauru relae Jesoso.

*Rai calaohi ocoala que suujua acatiha rai inacane que parabola*

<sup>11</sup> Niritiin jetaote: “Niha jetao leinjiin cacha corojataain calaojoiin. <sup>12</sup> Nii jana, nii rai calaohi ocoala jetaote: ‘Ofa, canu rai, ohine bana carainein neeninu iicha sirii irihuru, ii atane, ii rucuhale naaonjoaihunri leruu,’ naane jaun jetao, nii rai ninana aina acaauru nainein jetao lerue nii acaauru inaca.

<sup>13</sup> Nii jana rai nocoala jetaote, nii baiha neeoriin jetao nii que banijiaai que jitariin necoreteen jetao nii coriqui aina coriajai atane cuhin, nechuhataain joaerein jitariin rai coriqui jaohin nichao que ichoae.

<sup>14</sup> Inaen jitariin rai coriqui jaohane jana, nii nihane jaan neniha quinacaine jaun jetaote, ecu mijitena que necairichae.

<sup>15</sup> Nii jaun jetaote, nii nihane jaan nenea leinjiin cacha caje amihanenaa ariha cuhane jaun, rai cosichuru beraihane coina jetao letoae nii cacha.

<sup>16</sup> Nii jaun jetaote, nii cosichuru lenone raain que lenone-nee rijitocojoae. Nejetaote nene rai cha tera.

<sup>17</sup> Nii jaun jetaote: ‘Arajiin neeuruha ofa rai amihanenacaauru natiinte, itolere bana ne banejelanaala acaauru lenonenu, cau mijitenacaun ohajihanu canune jana. <sup>18</sup> Jelaiha cauha cuhanunete ne ofa loreri asae. Chaenne inae ofa rene turuhanune: “Jataainine banejelanaala baaso

ichaaun Cana Coaunera aina, ii aina, naaonjoaaincha.  
 19 Aihane jaun jiaonriha inae ii calaohineein caeteenera. Raujiaain ichei amihanenacaauru rijijieein caeteera ofa," nareunni ofa raicha,' naain jetao suujua ere nii cacha calaohi ocoala.

20 Niritiin suujua irihane baiha bero cuhane cuhin jelaaha cauha cuha rai inaca loreri asaene jana jetaote, jaiti nita nihane jana coariin cairichaaajoaain coaraane jaun, soroneein coinetein jetao que baluunetiin, jataain belaaain rae nii rai inaca.

21 Nii jana jetaote: 'Jataain banejelanaalane baaso ichaaun Cana Coaunera aina, ii aina, naaonjoaaincha ofa. Aihane jaun jiaonriha ii calaohineein caeteenera ofa,' nae jetao nii calaohi, rai inaca rai. 22 Nejetaote niritohane jana: 'Chajaain erojoein cajione enachasine uhaain, caa rai cajione coreeuche. Chaen rai biji couturi que leinjiin anicho tein, rai tijia quene maajeein safato curuhacuche. 23 Chaen leinjiin baca narejeen coereneti soochete, lenoneein beseta ichaacaache, 24 ohin nitajihane rai ne caje turuha uha caa canu calaohine jaun,' naain jetao rai cachaauru letoae nii inaca.

25 Nii tonohanau jetaote, neeuruha irihurune jaun nihane caje cauha uhe nii calaohi inana. Nii jana jetaote, inaan naanaja catainaane jana jetao, auno totein raansaaauruhane jana erunajae. 26 Nii jaun jetaote, nii leinjiin acaauru cacha cotijiaain jetao: 'Chatohanai besetate ichaquicheta,' naain caje bajaane jana jetao, 27 'Ti nejerate jerichanejein raurohin turuhane jaun, baca narejeen coereneti soeratein beseta ichae ii inacara,' naain rai biha nii acaauru cacha, nii calaohi inana raine jaun jetaote, 28 jataain obajeein loreri asaee turunaa jerene. Nii jana jetaote, raajenihane coinetein raa cue nii rai inaca, acaauru aina nihane coina.

29 Nii jana jetaote, jataain rautaelanaala jetao: 'Iite raotojoein araai jaanacaain ichei nelatein nihanune coitucuhi. Chaen nechu canu letoaaine chabana coiintelanaala ichaain neeun. Nii sainejeen chariji bana leinjiin niji carenero tihee carai, canuhacha belaihuri aina sohin beseta ichaacaune coinata. 30 Nii saijieeinte turuha caa ii calaohi, ene cojoaeloroerihuru aina nechu joaereein ii coriqui jaoinne janate, rai baca coereneti sohin teeicha,' naa coetaain rai inaca raine jaun jetaote,

31 'Aiha chuhisicha cacalabi. Iite chuhisi itolere bana canu aina neeicha. Nitohanihane jaunte satiin quicha sirii icheineein nera. 32 Nete laen ena esinae rauhijiriin caohachae beseta ichaain rachoojoihacachene, ohin nitajihane rai ne caje nacoaunein turuha ii ocoalane jaunra,' nae jetao rai inaca," naain jetao acaauru relae Jesoso.

## 16

*“Caohachaaain jecha ichareein,” naain loreri beraichaanu que cache ratiriha rai fatoroonne que parabola*

<sup>1</sup> Niritiin jetaote, aina nerelanacaauru rai jetao: “Niha jetao leinjiin cache jataain coriquihonaneein. Nii jetaote, rai loreri beraichaanu que leinjiin cache ratiri jitariin rai rucuheleeeuru, rai cachaauru, rai coriqui, naaonjoaihunri beraichanu que. Nii jana nii rai rucuheleeeuru itajihacoaane jaun jetaote: ‘Inae ichujeleeeuru itajeein, ii coriqui que niicha jerei ichaa taa ii cachara,’ naain jetao biha cuure nii fatoroon rai. <sup>2</sup> Nii jaun jetaote cotiharateein: ‘Chatohanai ichaaine jaunna, ii biha uure canu rai. Chajaain jitariin chamijianeecuru cocoirichaaain uhane coitucue. Inaen nenacaen nainiheeii canu loreri aina canu rucuheleeeuru beraichanu que neeineta,’ nae jetao nii rai fatoroon.

<sup>3</sup> Nii jaun jetaote: ‘Chana nohane jana ichareein, camijianeon caje canu sitaa canu fatoroone jana. Coatiha atane que chatohanai amihanenaa ichana que nelatejeecaaunne coaalanaalata. Chaen nechu jataain nocoejeeun cache caje chaaelai bajaanune quera,’ naain coaucane baiha jetao <sup>4</sup> ‘Saan. Inae canuhacha ichaneni coitucuhanu, canu amihaneon colane nedaanune bana canu raa chunocoha loreri asaane coina,’ naain jetao suujua ere nii loreri beraichanu que niicha ratirii.

<sup>5</sup> Niritiin jetaote, leinjiana leinjianaain jetao, nii rai fatoroon que rebeonacaauru cotijiaain: ‘Inaonjoaain rebeoqui canu fatoroon queta,’ naain bajaane jana jetaote; <sup>6</sup> ‘Lefasha bareranei erene que ne rebeconra,’ naain jetao tonorae nii jauriaanejeein niicha cotijiai. Nii jaun jetaote: ‘Saan, aihachuhisi. Nocoa nii rebeoquine jaan, ninu nelauriaain saquichoonca bareranejeeicha laenaaura,’ naane baiha jetao, <sup>7</sup> Leeocha cache rai jetao: ‘Inaonjoaain jana rebeoqui ii, canu fatoroon queta,’ naain bajaane jana jetaote: ‘Lefashai costaronei tirico quene rebeconra,’ naain tonoraane jaun jetaote: ‘Saan, aihachuhisi. Nocoa nii ii rebe. Fosachoonca costaronejeeicha cau teein laenaaura,’ nae jetao rai.

<sup>8</sup> Nitohaneein jetaote, jataain nainaan rai caohachanuhacha que coacuhin ichaa nii rai loreri beraichane que ninae nii rai fatoroon.

Nitohaneente Cana Coanera Cojoanonaa que neenihuru amurijiriin, jataain nainaan rai caohachanuhacha que coacuhin neure Cana Coanera coitucuhichuru,” naane baiha jetaote:

<sup>9</sup> “Inara netonoaite nii rijijieein Cana Coanera tenojoi beraichanein neeiche. Aihane jaun nii itolere inara rai Cana

Coauneraacha teei que, aca jerihane rijijieein niicha jerei ichaain neeuche, inae ohichene bana niha raotojoein inara raeranune coina.

<sup>10</sup> Nitohanihane jaun, aansijiin laojoiri raa cachane niha natiin caohachaaain nii rai teraacha jerei icharate, arajiin cha raane jerichanejeein caohachaaain ichareein.

<sup>11</sup> Nitohanihane jaun, caa nitajerai nenea chauratane que cha siriin neeichene nihanatiin caohachaaain ichaeneeichene coatiha nerinaai inara rai esinaen rauhijiriin chabana nitajenaacharanejeein nenea tera. <sup>12</sup> Aihane jaun, inara rai eroraqui tenojoi que caohachaaain cha ichaain neneeichene, coatiha nerihaaain inara raineen neeninu tera.

<sup>13</sup> Nihei chuni coroatajai fatoroon rai niicha latei icharaneen nenea nainei, nabana leecha que jaolecchin, leechaacha ere tonorana nainihane jaun. Nitohanihane jaun Cana Coauneraacha ere tonoraain nenea jerichaane, nii canaacha jerei que coauna nainihaaca,” nae jetao aina nerelanacaauru rai Jesuso.

<sup>14</sup> Niritoha Jesusone jana aonajeein jetaote, Jesuso necoeje chanuure fariseeocuru, acaauru jataain coriquiicha que coacuhin neeuruhane jaun. <sup>15</sup> Nii jaun jetaote, “Inarate caohacha ichaa nocoetiin neeiche itolere bana cachaauru notaracaae. Nete inara suujua cuhane inaraacha coacui coitucue Cana Coaunera. Nitohaneen jataain nelateineen cachaauruhacha coarai que te jaoleque Cana Coaunera.

*Cana Coaunera rai rauhi inoaensi aina Jesusohacha tei rai cojoanona*

<sup>16</sup> Moisesa, chaen *profetacuru*, naaonjoainuri cojoanonaate turuha Joaan Baotisitane que tiaaajoaain nelu. Nii caje coauneeinte beebejenojoneen nelu Cana Coaunera cojoanona canuhacha turuai. Nii quete necounujeeure nii canuhacha teei Cojoanona sirichuruhane coina.

<sup>17</sup> Canu Cojoanona que neeichene nihanatiin satiin Cana Coaunera rai rauhi inoaensi tonoraain neeichenete caohachae.

*Comasai joaera que cache relaa Jesusone*

*(Mt 19.1-12; Mr 10.1-12)*

<sup>18</sup> Leinjiin cache rai comasai jaohin leecha ene raanete jataain osa que nesaruha aicheein. Jerichanejeein techu, lana joaera ene raain niha cachane osa que nesaruha aicheein.

*Jataain coriquihona aina oha cairichaineen nenea Lasarone*

<sup>19</sup> Niha jetao leinjiin cache jataain coriquihonaneen. Nitohaneen coriquihocane jaun jetaote, itolere bana jataain

cajione caohacha que necoreeteen, lenone caohacha nejesina que beseta ichanajaque. <sup>20</sup> Nii jana jetaote, ecu ne jaberoco nainecojoaain abero siriin leinjiin cairicheinejeein nena Lasaro. Aca jetaote, nii coriquihona loreri chajeniha lauheque nejesinane atanichoae. <sup>21</sup> Nitohaneein cairicheinejeein nihane jaun jetaote, nii coriquihona rori caje nalunaa rai lenone coni raain que lenonena jere nii cairichei. Nii jana remaaecuru jetaote, rohan turuhacoaain nii rai nabero lojoihure.

<sup>22</sup> Nitohaneeinne baiha inaen oha nii cairicheinejeein nena- nii Lasarone jana jetaote, amaaure anjeraauru Abaraaun aina dedeeu nihane coina. Nii jana jetaote, nii coriquihona netonai inae ohane jaun conautecure.

<sup>23</sup> Nitohaneein ohin necairichaauruha onacaaurune jaan netiin necairichajeein, nita icharajeriin neein Abaraaun coaraa nii coriquihonane jana jetaote, Abaraaun rohan ne nii jaiti jiniiquiin ichaoruhane bana niicha cairichaerii Lasaro. <sup>24</sup> Nii jaun jetaote: auhaquii: ‘Cairichaaajoaain cacoharaaura ofa Abaraaun. Atiin nii Lasaro rai aitoote, esinaeca que biji coturi macohin setejaain calele jelarooa uhinera. Caune jataain necairichajeeun usi tabai janara,’ naane jana jetaote: <sup>25</sup> ‘Aiha chuhisi niqui. Nete jiniiquiin inara jaberoconeein ichaohichene bana, jataain raotojoei ichaonaa que ichaorejetohilura cacalabi. Nii jana caa Lasarote, jataain ichaonaa baaso que ichaohin cairicheinejeein nerejetelu. Nii jaunte nii coacuhin, necairichaaequi iine jana, aca caohachaaain ranojoneein nera. <sup>26</sup> Nii choae tacaain techu, cana cataaun ne jataain ucuacaain ucuha jachu sato-noelanaalara. Nii jaun nii inara nichae situnaa nainecuruhi cajicheique nenacaauru. Niheichu inara niha natiin nii cajicheique turunaa nainiheecheta,’ nae jetao Abaraaun, nii coriquihona onaa rai.

<sup>27</sup> Niritoha raine jaun jetaote: ‘Nii jaunne ichei aitoon, canu inaca loreri asaae <sup>28</sup> nii neeuruha saoquii canu nejeraaurune jaun Lasaro letohaine, acaauru rai iriha cuhane coina. Nabana caa necairichaecaaunne jaun acaauru netonai uuruhane coataara, ofa Abaraaun,’ naa nii coriquihonane jana jetaote; <sup>29</sup> ‘Nete Moisesa aina *profetacuruhacha* laenanohin siriin neeure, nii tonoraain neeuruhinera,’ naa Abaraaunne jana jetaote; <sup>30</sup> ‘Aiha chuhisicha ofa Abaraaun. Nete acaauru rene ichanaain turuhin biha leinjiin onaane, acaauru netonai nii esenetana nainecururera,’ naa nii coriquihonane jana jetaote; <sup>31</sup> ‘Aiha chuhisi niqui. Nete Moisesa, chaen *profetacuru*, naaonjoainuri esenetaaurenihalune rijijeein, acaauru

rene ichanaain turuuruha onacaaurune nihanatiin, esenetana nainecurunerera,' naain tonorae Abaraaun," naain jetao fariseeocuru suujuate Jesoso.

## 17

*Jataain necohalajiine osa que namute cache saruera*  
(Mt 18.6-7, 21-22; Mr 9.42)

<sup>1</sup> Niritiin jetaote:

"Itolere banate nereein osa que inara sarueranu. Nete laen jataain necairichanaa coareein nii osa que leeochoauru saruera cache. <sup>2</sup> Nitohaneein caa ena Cana Coaunera coitucuhajeraauru sarueratiha osa quene ajinihate caohachare nulunoque ajeri tijichain cucuana cuhane joeratenojoi nihane. Aihane jaun nii que necohalajiin neeuche.

<sup>3</sup> Chatohaneein baaso ichaain niha ii nejerane suujua teeu. Suujua teeine jana ii ere tonoraain caohachaaain nichao coreein nihane que ii suujua acateeu. <sup>4</sup> Lejiichoo cuhane caaunsi saneein ichei baaso ichaain nihane nihanatiin, caaunsi saneein turuhin, 'Inae laen coaiterihaaun-nita,' naa uhane, que ii suujua acateeura," nae jetao Jesoso.

*Esinae rauhijiriin esenetaacane itolere ichana nainichaane*

<sup>5</sup> Nii jana jetaote: "Jataain itolere ichana nainiha Cana Coaunerane esenetaain nihacaanune jaanu teeu canacaanu raicha," naauruha Jesoso rai niicha cocoinaauri afosotoorune jaun jetaote:

<sup>6</sup> "Mosatasa ucuhe laojoiri jataain aansijieein nenea rijjieein aasaeriin esinae rauhijiriin esenetaaichenete caa shabeento rai: 'Niilai caje nerocohin caa cucuana cuhane omaronihunra,' naaiche caa shabeento raine inara ere tonoraain aiche caa shabeentora," naain jetao acaauru tonorae Jesoso.

*Letononeein nenaacha ichaneni*

<sup>7</sup> Niritiin jetaote: "Inara leinjiin cachaaquichene jana, inara ocoana jana temule jaane jaanu que atane retuhin, baca beraain, naaonjoanne caje cauhane janate rai: 'Nelauriaaute lenoneei,' nanaa coacuhelanaala: <sup>8</sup> 'Chajaain ena canu lenonenu jaain, ena uhaaune lenoneein acau coe. Nii baihate ii netonai lenoneein acau coriquiincha,' nariquiche. <sup>9</sup> Nii choae tacaain techu, 'Narihara,' nanaa coitucueeneiche nii inara cache rai, letoaain neeichene jaan ichaain nihane coreniha. <sup>10</sup> Nii rijjieein inara letoaain niha Cana Coaunerane jaan nainaaain neeichene bana, nainiheeiche: 'Jataain cache caohacha neeine nihacaanura' naain erenaa nainiheeiche. Raujiaain: 'Canacaanu letoaain nihalune jaanchane inae nainacaanura,' naauche," nae jetao acaauru rai Jesoso.

*Lechoocaain cosibi aonaain caaun cunaitenacaauru rautaa Jesusone*

<sup>11</sup> Jerosaleeun cuhane jaun jetaote, Calileea, Samaria, naaonjoainuri batane cataaun situhin cue Jesuso. <sup>12</sup> Nii jana jetaote, leinjiin neseu turuhane jana jetao, nii nese caje que tacaa cuure lechooncaain cosibi caaun cunaitenacaauru cachaauru. Nitohaneein cuhin jetaote, cocoaeraa cacha rohan turuha nitohanai cunai aonaera cachane jaun jetao, Jesuso caje coriaae netiin:

<sup>13</sup> “Cairichaojoaain nohane canacaanu coaraaura cacha relaera Jesuso,” naaunre jetao Jesuso rai ehequiin. <sup>14</sup> Niritocuruha raine jana jetaote:

“Chajaaincha saseredotecuru rene turunichuchete inara coaracurumiincha,” naa acaauru rai Jesusone jaun, cuu-jueeuruhane jana jetaote, inaen cosibi caje nerautaaain somaraain neeure, acaauru dadaelanaala aitoaha Jesusone saijieein. <sup>15</sup> Inae nitohaneein nerautaaauruha acaauru cosibi cajene coaraain jetaote, jelaiha nejenohin cuhin, tonijiaain ereein Cana Coaunera coroaajeein jetao, <sup>16</sup> Jesuso acatiha rai tijia asae atanichoae neseeriaain jetao, rachoojoe leinjiin cacha Samaria cocoaicha Jorionelanaana nena. <sup>17</sup> Nii jaun jetaote:

“Tajian lechooncaauruhani caa cosibi caje nerautanacaaurune. Aancaauru chaen leochaauru iscoon neeurita. <sup>18</sup> Leinjiin caa Jorionelanaala nena cacha estaraajero-hachate jelaiha nejenohin Cana Coaunera coroaeca uhe rautaanune corenihara,” naain

<sup>19</sup> “Esinae rauhijiriin esenetaaine jaunte, ii cunai caje nerautaa, chajaain nimichuhin caunihura,” nae jetao rai Jesuso.

*Naaonjoaain tururichaaain quiicha tei Cana Coaunera Cojoanonaane*

*(Mt 24.23-28, 36-41)*

<sup>20</sup> Nii baiha jetaote, “Chabana turoreein Cana Coaunera cojononaa,” naain jetao Jesuso caje bajaare fariseecuru.

<sup>21</sup> Nii jaun jetaote: “Coatiha inanacaain tururinaain Cana Coaunera cojoanonaa. Niheichu, ‘Caute ne. Tajihate ne,’ naain coitucurieeicheein. Inaen inara jana niha quiicha tei Cana Coaunera Cojoanonaa,” nae jetao acaauru rai Jesuso.

<sup>22</sup> Niritohane baiha jetaote, aina nerelanacaauru rai jetao: “Inae amuhanune baihate jaiti nacoauneein turuenihanune ajiniha le janojoeinniji ena caa canuhacha tei janonaa coarana jereriquicheein niqui, nete coaraeneriquicheein. <sup>23</sup> Nii jana tabaaurute inara rai, ‘Caute ne. Tajihate ne,’ naaurueein. Nete nelatene, niritocuruhane jana acaauru esenetaain acaauru sacuhichene. <sup>24</sup> Nacoauneein

turuha urichaaunni acaihaniji cachaneein nejanohanaane Cojoanonaa que turuhane banate, charijijieein teeinti jera-neejoaain dede conaa jiacanone, saain coanojoiniein ne. Nii rijijieeinte saain coanojoiniein coitunoiniha cureein inae nacoauneein turuhanune bana. <sup>25</sup> Nete amuhanune ajiniha jauriaanejeein jataain canu que nererojoecaain canu que jaolecoorureein, caa ena cojoanonaa que nenacaauru cachaauru.

<sup>26</sup> Charijieein teeinte nihalu Nohene bana ailu, nii rijijieeinte jerichanejeein aihane cureein nacoauneein turuha uhanu canu acaihaniji Cachaneein nejanohanune Cojoanonaa que tihane bana.

<sup>27</sup> Coaracuche nachuhinti nii chaque nererojoecaeriin nelanaala, nisirihateein, lenoneein, acau cohin, naaonjoaunruhalu cachaauru bote cuhane enohin nichotiha Nohene cojoanonaa que turuhanereein tiaaine. Nii jana uha elo tabaine jaunte satiin ohacoaurelu.

<sup>28</sup> Nii rijijieein techu cha coacuelanaala raotojoeein neein, acau cohin, lenoneein, netemulijiaain, namihaaneeo que necoreteein, niicha latei coreteein, neloherriteein, naaonjoaaurelu cachaauru nihalu Lotone bana. <sup>29</sup> Nii jana, Sodoma neseu ichaohane caje amuha Lotone janate, usi aina naluha asofere dede cajene jaun caaun satiin oorelu cachaauru. <sup>30</sup> Nii rijijieeinte jerichanejeein aihane cureein nacoauneein turuha uhanu acaihaniji cachaneein nejanohanaa nichaaunne Cojoanonaa que turuhane bana,” naain jetaote,

<sup>31</sup> “Nii cojoanonaa bana inara loreri janori ichoae neeichene, jiaonriha jelaiha fauhin inara loreri caje inara rucuhale ranaa coaauquichene. Niheichu inara ocoana jana neeichene jana aihane, inara loreri asaane caunaa coacuelanaala rauhijiriincha sorooche. <sup>32</sup> Nitohanihane jaun, niicha ratirii coaacane jaun aihalu Loto comasaine coacuhin nainaan ichaaoche. <sup>33</sup> Aihane jaun rai rucuhaleuru queecha coacuhin neite rai nichao itajereein. Jana nii rucuhale que coacuelanaala nichao rainuhachaque coacuhin neite nichotereein,” naain jetaote,

<sup>34</sup> “Nii airichaanne cojoanotiin banate, leinjiin eruhari cuhane niha cuurureein coroatajai cachaauru. Nii jana leinjiin amanojoinihane janate, ecu nedaa cureein leeoche. <sup>35</sup> Jana coroatajai enecurute, ederi que chaelai tutuurureein. Nii jana leinjiin amanojoinihane janate ecu nedareein leeoche. <sup>36</sup> Nii jana coroatajai quichaurute nocohana jana neeurureein. Leinjiinte amanojoinereein, leeoche ratirinojoinereein,” naane jana jetaote:



37 “Chatoanai bana, chucha nitohanereeeinte Curuaanaa,” naain caje bajaauruhane jaun jetaote:

“Inae ecu tihane banate coitucunojoinereein, canii setu que fauha uha ichotarine jana caje coaraain coitucunojoinihane rijijieein,” nae jetao aina nerelanacaauru rai Jesuso.

## 18

*Joesio necha aansaineein nenea rai cacha coulurujiha autanane que parabola*

<sup>1</sup> Coianteerilanaala Cana Coanera bajaauruhane, Cana Coanera bajaauruhane caina *parabola* que cuaain acaauru relaa Jesusone.

<sup>2</sup> Niritiin jetaote: “Coaracuchenachuhinti leinjiin neseu ni-halu jetao leinjiin joesio cachaauru que suujua acatelanaala, niheichu Cana Coanera batohane que casilanaala nenea ne.

<sup>3</sup> Nii jana jetao, nii neseu ichoae leinjiin autana. Nii autana jetaote, nii joesio rai leinjiin cacha nejeratenaja colurujiha cue.

<sup>4</sup> Nii jana jetaote, carajaain nirijieein nere tonorana jerelanaala ne nii joesio. Nejetaote nii baiha: ‘Cachaauru que nihanatiin casuujua acateein, niheichu Cana Coanera batocooaunne que casiin nihaaun niqui.

<sup>5</sup> Nena raotojoeein nihanune rohecaain, casuujua rohecaain sacuha caa autanane coataa naitoonjoa tonoraain ichareeun caihanihane caina,’ nae nii joesio.

<sup>6</sup> Coaracuchenachuhinti, jataain necha aansaineein nihane saijieein suujua coaraa nii joesione.

<sup>7</sup> Nii jaunte nii amurijiriin, nii janijiin nii raauri, janotiine-tojoein, jiichoonetojoein, naaonjoaain bajaebajeraauru cocooaeratenaa nainereein Cana Coanera.

<sup>8</sup> Nitohaneeinte carajaain cohacuruhane latelanaala enaacha acaauru cocooaeraterere. Nena laen inara caje bajaauru, canu inaraacha cohajei cachaneein nejanohanaa nichaauunne, nacoauneein turuhanune reeintiaainacha canuneein nihanune esenetaain caitoonjoa ichaaechajein neeururichaaain cachaauru,”

naain jetao acaauru relae Jesuso.

*Roma rai coriqui bajaaurera aina fariseeocuru que parabola que cuaain cacha relaa Jesusone*

<sup>9</sup> Nii baiha jetaote, nii acaauruhacha caohachaaain niha no-coetiin leeochoauru que jaoleconacaauru rai jetao, acaauru ichaohacha que *parabola* que cuaain jetao: <sup>10</sup> “Coroatajai cacha jetaote, Teenforo asae cuhin Cana Coanera baja cuure. Leinjiin jetaote, nechu jataain naraaichuru cairichaa Roma rai *impoestonu* que coriqui bajaerane. Jana leeocho jetaote fariseeone.

<sup>11</sup> Nii fariseeo jetaote, ‘Narihara Cana Coanera ichoreniha ainacaauru tocohaneein asijiau-tonein, necha aansaineein ichaohin, joaereein ene canu

sinijeranelanaala nenea aina ichaohin, naaonjoaain neni-hanu canune coreniha. Chaen nechu, naraaichuru cairichaa Roma rai *impoestonu* que coriqui bajaaurera rijijieein neeun. <sup>12</sup> Chaen nechu, jataain ii coitucuhanune esene-taine coina, le semanacuru cuhane coroata saain casuri couu lenone lanaala neein ii bajaee bajajeein, lechooncaain chaaelai raanu camijianeeo corenihane, rai lechoocani teein neeun ii raicha,' naain jetao Cana Coaunera bajae chujuhe-quin. <sup>13</sup> Nii jana nii naraaichuru cairichaeriin coriqui bajaera jetaote, caje icharaain neein necoeje caaun najabara-caain dede coaraelanaala jetao: 'Cairichaojoaain cacoaraau osaaotohanune jaaura Cana Coaunera,' nae nalarijia faone faoneein.

<sup>14</sup> Niritiin bajaane jaunte, inae que suujua acatiha Cana Coaunerane jana jelaiha nenajaun cauha cue nii naraaichuru cairichaa coriqui bajaera. Nete laen nii fariseeo que suujua acatene Cana Coaunera.

Nitohaneeinte nii leeochoaauru amurijiriin Cana Coaunera coitucutiin, itolere que nelaaetoha nocoetiin nenacaaurute chaque nelatelanaala jaoleneein neeurureein. Jana rai nichao coitucuhin leeochoaauru amurijiriin nenea coacue-lanaala nenacaaurute nelateein ranojoinecurureein," nae.

*Canaanaihuru belaiha Jesusone*  
(Mt 19.13-15; Mr 10.13-16)

<sup>15</sup> Jesoso rene canaanaihuru turuaa uuruha acaauru mu-cuhane coinane jana jetaote, Jesoso rene turuanajaaauruhane caohateure aina nerelanacaauru. <sup>16</sup> Nii jaun jetaote, nii aina nerelanacaauru cotijiaain jetao:

"Coa rorohecanajaachete canu rene turuuruhiine nii canaanainuru. Jiaonriha canu rene turuuruha canaanaihurune caohateehenera. Cana Coaunera Cojoanonaate, aihuruha caa canaanaihurune rijijieein nenacaauru rainein nenea nera. <sup>17</sup> Esinaen rauhijiriine inara rai aitoreeunni. Aihuruha caa canaanaihurune rijijieein canu raain neniha chunine, coatiha Cana Coaunera Cojoanona que nerihaain," nae jetao aina nerelanacaauru rai Jesoso.

*Jesoso aina iriha leinjiin cache coriquihonane*  
(Mt 19.16-30; Mr 10.17-31)

<sup>18</sup> Leinjiin cocoinanacai jetaote, Jesoso aina iriha uhe. Nitohaneein rene turuhin jetaote:

"Caohachanejei cache relaera, cha ichareeun chariji bana nitajenaachara ichaonaa caohacha que ichaonaa nainichaaunne coina," naain Jesoso caje bajaane jana jetaote;

19 “Chanuna ‘caohachanejei cacha relaera,’ naain cacu-rujuateei. Leinjiin Cana Coauneraachate caohachanejeein ne,” naain jetaote: <sup>20</sup> “Inae raotojoein Moisesa aitoonjoan coitucuhi: ‘Jiaonriha nejelau ene ii sinijeranelanaala nenea aina ichaohin neeine. Coa sonajaain jaoha. Coa asijiauha. Coa chamute cacha cairichanaa jerenacaaun chuni cacha coacuhin, casaje que ereein niha. Chaen efojiaraauru que ii suujua acateein acauru coitucuhin neeun,’ naane coitucuhi,” naa rai Jesusone jaun jetaote:

<sup>21</sup> “Aihanu chujian. Canu enamanaca caje coauneeinne jitariin nii naitoonjoan tonoraain neeun,” naain tonoraa nii cocoainanacaine jaun jetaote:

<sup>22</sup> “Aihachuhisi niqui. Nete jaiti lanajejen leinjiin tonoraain ichaaine coina. Jitariin nii iicha sirii rucuhele que necoreteein, cairicheihuru rai jitariin nii coriqui chaluu. Nii banate dedeeu ichaonaa caohacha que ichaonaa naineriquiin. Nitohanein ichaaine baiha canu aina uu,” nae jetao rai Jesuso.

<sup>23</sup> Nejetaote niritoha rai Jesusone jaun, jataain inaderae nii cacha jataain coriquihocane jaun.

<sup>24</sup> Nii jaun jetaote:

“Jataainte caaintate Cana Coaunera Cojoanonaa que ichaoa leinjiin coriquihonane. <sup>25</sup> Nii Cana Coaunera Cojoanonaa que ichaaoruha coriquihonacaurune coina caaintaane fautaain caaintarihei leinjiin camecho rai oco jachu cuhane situhane coina,” nae jetao inaderaa nii coriquihonane coaraain Jesuso.

<sup>26</sup> Nii jaun jetaote:

“Nitohanihane nichotenaa nainerinaain chuni,” naain caje bajaauruha ecu neein aonajeeunrerane jaun jetaote,

<sup>27</sup> “Nii caaintatiin cachaauruhacha coarai, coatiha Cana Coaunera rai caaintajiehita,” naa Jesusone jaun jetaote,

<sup>28</sup> “Canacaanune jitariin canacaanuhacha sirii ratiriin ii sacuhacaanulu,” naa Fedorone jaun jetaote:

<sup>29</sup> “Esinae rauhijiriin chunocoha, Cana Coaunera Cojoanonaa que ichaohane coina, rai loreri, rai sinijera, rai bereecuru, rai nejeraauru, rai fojiaraauru, naaonjoin ratirichate, <sup>30</sup> jataain nii amuritoheriin caa chauratane que siriin, nii choae tacaain nii turuha uheni Cana Coaunera Cojoanonaa que chariji bana nitajenaachara ichaonaa siricheeincha,” naain jetao Fedoro tonorae Jesuso.

*Orichainne bihane nichatasatiha Jesusone*

*(Mt 20.17-19; Mr 10.32-34)*

<sup>31</sup> Nii baiha jetaote, jelai nii lechoonca coroatajaain niicha cocoainauri cotijiaain jetao: “Enate laen Jerosaleeun cuhacache, cuu nii acaihaniji Cachaneein nejanohanaa

nichaaunne que aitiin laenacuruhalu satiin *profetacurune* nainaanune coina.

<sup>32</sup> Nitohaneeinte nejelau ataneu nenacaauru estaraan-jerooru bijihu canu teeurureein nechu jataain cacotaiha baasoneein caeteein, canu nocoeje chanuhin, canu coluneein, naaonjoaaunruhane coina. <sup>33</sup> Nitohaneein canu teente, enuha que canu faohacuruhane baiha canu ateeinaa curureein. Nena nichata janohane cuhane nacoauneein ichanaareeunni,” nae jetao niicha cocoinaauri rai Jesuso.

<sup>34</sup> Nii niritoha acaauru raine jana jetaote, nii naitoonjoan aonacuruhane saijieein esenetana nainecurene.

### *Jericoo leinjiin maosa rautaa Jesusone*

*(Mt 20.29-34; Mr 10.46-52)*

<sup>35</sup> Niritohane baiha jelai caje amuhin Jericoo turue lalajeein cuujiha Jesusone jana jetaote, bero cuhane lauhequiin coriqui bajaa niha leinjiin maosane jaun jetao, <sup>36</sup> arajiin situha cachane aonaain jetao: “Chauruna toon situha cue,” naain bajaane jana jetaote: <sup>37</sup> “Nasarete cocoaicha Jesusote sacuureraaura cachaauru aina situha cuera,” naain beeuruhane jaun jetao: <sup>38</sup> “Atiin nohane cairichaaajoaain cacoharaaura Rabiri nefoerate Jesuso,” naa ehequiin nii maosane jaun jetao, <sup>39</sup> niritohane caohateure sitonaane coina nii ichohaichaniha cunacaauru. Nejetaote, acaauru ere tonoraelanaala jeelai amuritoheriin ehequiin jetao:

“Atiin nohane cairichaaajoaain cacoharaaura Rabiri nefoerate Jesuso,” nae jetao nii maosa.

<sup>40</sup> Nii jaun jetaote, ecu inacuhin raerateein jetao inaen rohan nichuutaane jana jetao:

<sup>41</sup> “Chate jereeita,” naain caje bajaa Jesusone jana jetao:

“Canota rautaaainene jereeunra Curuaanaa,” naain tonoraa nii maosane jaun jetaote,

<sup>42</sup> “Saan ai. Esinae rauhijiriin quesetaaine jaunte inae maosaneine caje nerautaaicha,” nae jetao rai Jesuso.

<sup>43</sup> Niritoha rai Jesusone rijieeoritiin maosanihane caje inae conoha rai notane jaun jetaote, Cana Coaunera corojeein Jesuso sacue nii maosa.

Nitohaneein nii maosa rautaane jana, ecu neein coarajeeurera cachaauru netonai jetaote, satiin Cana Coaunera corojeein rachoojoeure.

## 19

### *Saqueo loreri asae cuha Jesusone*

<sup>1</sup> Jericoo turuhin jetaote, nii Jerico nese cataaun situha cue jetao Jesuso. <sup>2</sup> Nii jana jetaote, ecu ichoae leinjiin cacha,

naraaichuru Jorioocuru cairichaeriin nenea, Roma curuaanaa rai *impoestonu* que coriqui bajaaurera curuaanaaneein nenea coriquihona Saqueeo. <sup>3</sup> Aca jetaote, jataain Jesoso coitucunaa jerihane jaun coana jere niqui. Nejetaote, jataain araaicha cachane jaun coana nainesine Saqueeo, leeochoaauru fautaain ecoainijihane jaun. <sup>4</sup> Nii jaun jetaote, coana nainihane coina soroneein najiniha cuhin jetao situha curichaain nii Jesusone jaaun nenea leinjiin enuha que iniin jetao cohaca cue. <sup>5</sup> Nii jana jetaote, nii iniin cohacane jaan nenea enuha asaae situha cuhane jaun, jabatoroain coaraain jetao:

“Saqueeo, chajaain soroneein niilai caje fauha uu. Enenene ii loreri asae nesurureeunni,” naa rai Jesusone jaun jetaote, <sup>6</sup> soroneein nii enuha caje fauhin jetao, coroajeein rai loreri asae Jesoso amae jetao nii Saqueeo. <sup>7</sup> Nii coaraain jetaote: “Chanuna jataain osaaona niha taa cachane coitucuhane saijieein rai loreri asae aina nesuruha cue,” naain jetao Jesoso que ereeure ecu satiin neein coarajeeurera cachaauru. <sup>8</sup> Niritiin Jesoso que ereeuruhane jana jetaote, nichaauraain jetao:

“Aonaan Curuaanaa. Jitariin quiiha sirii rucuhelene leruhin tereeunni cairichaaihuru rai. Chaen nechua chaaelai que chuni basijiauhin nihanune, jena saain jelai amuritoheriin cainareeunnicha,” nae jetao Jesoso rai nii Saqueeo.

<sup>9</sup> Nii jaun jetaote:

“Caa cacha netonai inara rijijieein, Abaraan nefoerateenein nihane jaunte, enene caa rai loreri asae turue jianacoon osa caje mitaeranura. <sup>10</sup> Nii acaihaniji cachaneein nejanohanaa nichaaunnena, caa chauratane que turuun, nii jaolecohichene jaan cachaauru nitajenaa neein nenacaauru ariin, acaauru ichoterateein raanune coina,” nae jetao rai Jesoso.

*Coriqui raaurera cachaauru que parabola que cuaain cachaauru relaa Jesusone*

*(Mt 25.14-30)*

<sup>11</sup> Niritoha Jesusone jana, ecu neein aonajeeuruha cachaaurune jaun jetaote, acaauru relae *parabola* que. Inae Jerosaleen rohan nichuuntaauruhane jaun, “Inae jerihane turuhelalajiha Cana Coanera Cojoanonaara,” naain coaucuruhane jaun jetao acaauru rai:

<sup>12</sup> “Coaracuche jetao nihalu leinjiin cacha *rey* araaineein nenaane. Nii cacha jetaote, *rey* inein cocoainaaauruhane coina jetao coriaji atane cue, inae *rey* inein cocoainaaauruhane jana jelaiha natane que cauha uhanne coina.

<sup>13</sup> Inae amuhane rai jetaote, lechooncaain rai letonocuru cotijiae, acaauru naineein jequuin coriqui chaluhane coina. Nitohaneein acaauru cotijiaain coriqui chaluhin jetaote: ‘Caa coriqui aina amihaneeuche turuhanune reeintiaaincha,’ naain ratirinajae.

<sup>14</sup> Nejetaote, jataain que nererojoeccaure nii natane que nenacauru cachauru. Nii jaun jetaote, caaijie acaauru ere beranu que leinjiin letoaaure ‘Coatiha canacaanu curuaanaa rey ineein niha caa cachane jerihacaanuta,’ naa cuhane coina.

<sup>15</sup> Nejetaote nitohaneein nere bera letoaauruha caaijiene sajieein, *rey* ineein cocoinaauruhane jaun, *rey* ineein jelaiha natane que turuha uhe.

Inae nenajaun turuhin jetaote, nii letonocuru coriqui teein ratirihane jaunru cotiharate, ‘Inaonjoaaincha canu coriqui joo cure le cache cachauruta,’ naain coitucuhane coina.

<sup>16</sup> Nii jana nii niicha cotiharatei ichoaichaniha rene turunaa jetaote: ‘Curuaanaa lechoonca saneeinte nefae ii coriqui,’ naa turuhinne jaun jetaote; <sup>17</sup> ‘Saan. Aihane jaun iite jataain caohati canu cachaneein neei. Inae acaihaniji que caohacha ichaai caa coroatajaji coriqui ainane jaunne, lechooncai nese coaranu que coberenadoroneein chetereunnicha,’ nae rai nii *rey*. <sup>18</sup> Nii jana leecha jetaote: ‘Curuaanaa, saoqui saainte nefae ii coriqui,’ naa turuhinne jana jetaote, <sup>19</sup> jerichanetoejin: ‘Saan. Aihane jaun saoquii nese coaranu que coberenadoroneeinte neriquiincha,’ nae jetao rai.

<sup>20-21</sup> Nii jana leecha jetaote: ‘Curuaanaa, nocoa ii coriqui. Jataain necha aansai cache neeine jaunne ii coasiha, cajione que conajaain cau rucujueun. Chaen chaelai teneeine nihanatiin, enaacha temunojoi taain raain, naaonjoain neeine coitucuhanune jaun,’ naane jaun jetaote; <sup>22</sup> ‘Ichaajenihanete ii ereecha que necouluruhequi canu cache baaso. Chanuna chaen, nii chaelai tihanune que airijiin, enaacha temunojoi taain, raain, naaonjoaanune coitucuhi raotojoejin inatiin, <sup>23</sup> baanco cuhane nii canu coriqui tiha cueneei, canu loreri asae turuhanune, jelai amuritoheriin carai cainaainerichae,’ naain jetao, <sup>24</sup> nii ecu nenacauru rai: ‘Caje nii coriqui ruluhin, nii lechoonca saneein faera rai teeuchera,’ naane jana jetaote: <sup>25</sup> ‘Curuaanaa, chanuna inae lechoonca saneein jelai amurijiriin siriha natiin nacoaauneein tenacare raita,’ naaunruha raine jaun jetaote: <sup>26</sup> ‘Inae inara rai aito-coaun, jataain siricha raite jeelai amuritoeriin terareein. Jana sirihei cajete, coroatajajejin siriha nihanatiin jitariin caje ruluhereein,’ naain jetaote: <sup>27</sup> ‘Chajaain chaen nii *rey*

ineein nihanune jerelanaala caque nejeratenacaauru uhaain cau canotaracaae teein sohin jaonajaauche,' nae jetao nii rey," naain jetao cachaauru relae Jesuso.

*Jerosaleen cuha Jesusone*

(Mt 21.1-11; Mr 11.1-11; Jn 12.12-19)

<sup>28</sup> Niritohane baiha jetaote, Jerosaleen cunajaun, <sup>29</sup> nii Jerosaleen rohan ichuunejeein nenea ichatane ucuuno Olibo neeonjoain neein niicha curuateeuri rohan nenea Betafajee, Betania, naaonjoainu turuhin jetaote, coroatajaain aina nerelanacaauru rai:

<sup>30</sup> "Chajaain taa cana ajiniha nenea neseu cunichuche. Ecute cositenojooinein teequi leinjiin boro chabana cache amunajaniheine eruriquicheein. Chaen cajiha carai cosi rutuhin uhaauche. <sup>31</sup> Inae uhaaichene jana, 'Chanuna nii boro cosi rutuhin amaaiche,' naa chunine, 'Cana Curuaanaate latihane jaun raeratera,' naauche," naain jetao letoanajae Jesuso.

<sup>32</sup> Niritiin acaauru letoaa Jesusone jana, nii neseu cuuruhane jaun jetaote, nii acaauru rai aitothane rijijieein nii boro eruha cuure nii aina nerelanacaauru. <sup>33</sup> Nitohaneein ecu turuhin, nii boro cosi rutuhajeeuruhane jana jetaote:

"Chanute nii boro cosi rutuhicheta," naa acaauru rai nerorane jaun jetao:

<sup>34</sup> "Cana Curuaanaate latihane jaun raeratera," naaure jetao rai.

<sup>35</sup> Nitohaneein cosi rutuhin jetaote, nii boro ichoae rai cajione teein jetao, Jesuso rene amaaure nichoae nelauriaain cuhane coina. <sup>36</sup> Nitohaneein nii boro amaaain Jesuso rene turuaauruhane jana jetaote, nichoae nelauriaain raotojooein cuujiha Jesusone jana jetao, najiniha bero cuhane rai cajione maririjiacooaure cachaauru.

<sup>37</sup> Inae Olibo neeonjoain bichatane ucuuno fauque cuujiha Jesusone jana jetaote, itolere cojoaelanaacojoai ichana-jaoncane coaranajaaoncuruhane jaun jetao, cojioriin Cana Coaunera coroaecure satiin nii sacuurera cachaauru.

<sup>38</sup> "Raotojooein turuhine aca neein nenea rijijieein co-coinaain Cana Coaunera letono Reycha. Dedeu raotojooein nihacachene coina icharaneein nihane coitucuhin Cana Coaunera coroaecuruhine cachaauru," naauruha cachaaurune jana jetaote:

<sup>39</sup> "Cacha relaera, toon ii sacuurera cachaauru rai aitoote, toritocuruhane jianecurumiincha," naauruha nii cachaauru jana cunacaauru fariseeocuru tabaaurune jaun jetaote:

<sup>40</sup> "Esinae rauhijiriine aitoonra. Toritocuruhane caje in-aheneecha neeuruhanete, cojiorichurureein caa ajerichurura," naain jetao tonoranajae Jesuso.

<sup>41</sup> Inae Jerosaleen rohan nichuutane jaun, inae inanacaa nii Jerosaleenne coaraane jaun jetaote, ecu nenacaauru cachaauru coreniha chanaain jetao: <sup>42</sup> “Bajiaana chuhinti caa janonaa cuhane jianacoon inara mitaeraanu que cau turuhanune coitucuhin neneeiche. Nete quesenetain canuneein nihanune coitucuhin coarana naineneeiche. <sup>43</sup> Nitohaneeichene jaunte, inaen nereein itolere neein inara curuhacaain inara corihateein, inara mucuhin niha nii nejerateein neeiche jaa cojoanonaara. <sup>44</sup> Caa inara nese fejeeinte itajeein, inara cocoaichucuru soajeein jaoha cuurureeincha. Coatiha nerinaain leinjiiniji ajeri ita choae teein ichanohita. Inara ichoterateein, jianacoon inara mitaeraanu que turuha uhanu inara Coauneraneeinne jana canu esenetaain cacoitucunaa jereneeichene corenihara,” nae jetao inaderaain Jesoso.

*Teenforo couluuoca Jesusone*  
(Mt 21.12-17; Mr 11.15-19; Jn 2.13-22)

<sup>45</sup> Inae Jerosaleen turuhin jetaote, Teenforo asae enohin, ecu necoretiha nenacaauru sitaain jetao:

<sup>46</sup> “Cana Coaunera Quiricha inoaensi cuhanete aite: ‘Canu lorerite nasae neein canu bajae bajaecuruhane jaan colohetine,’ naain. Nete necha aansai asijiautooru ucuhaneein teeiche inarara,” nae jetao nii cachaauru rai Jesoso.

<sup>47</sup> Nitohaneein cojoanoonetojoein Teenforo asae cuhin cachaauru relaa Jesusone jana jetaote, nechu jataain sohin jaaoruhane jaa lera ariha jetao, cuhin coaracure saseredote curuanaacuru, Cana Coaunera naitoonjoa que cacha relaaureraauru, nii nese curuaanaacuru, naaonjoainuri. <sup>48</sup> Nejetaote, nii chatohaneein teeuruhane jaan lera erusichurene, satiin cachaauru jataain nii acaauru relaane jaa rautatiin aonajeeunruhane jaun.

## 20

*Nitohanai ichaane coina cocoaain letononiha Jesusone*  
(Mt 21.23-27; Mr 11.27-33)

<sup>1</sup> Teenforo asaee nosa caje nichoteeururichaain cachaaurune beebejeein, acaauru relaa Jesusone jana jetaote, turuha cuure saseredotecuru curuaanaacuru, Cana Coaunera naitoonjoa que cacha relaaureraauru, Joriocuru rai nelateein nenacaauru ichauhenaauru, naaonjoainuri. <sup>2</sup> Nitohaneein turuhin jetaote:

“Chatohanai cocoainanacaineeina neei catohanai ichaaine coina. Chate catohanai ichaaine coina ii cocoaain ii letoain neta,” naauruhane jaun jetaote:



3 “Saan. Canuhetonaina inara caje leinjiin erenaa baja-reeun catoonraaichene coina. 4 Cha Joaan letoaain nelu cachaauru baotisaain cachaauru coujunacatiha uhane coina. Cana Coaunera letoaenihanena, cachaauruhachana letoaain nihalu,” naain acauru caje bajaa Jesusone jana jetaote, 5 ecu inauheneeicha aonajeein jetao: “ ‘Cana Coaunera letononeeinte ailu,’ naacachenete: ‘Chanuna jana esenetaain tonoraain neneeichelu,’ nareein. 6 Niheichu, ‘Cachaauru letononeeinte ailu,’ nanaa nainihaacache. Niritocooachenete ajeri que cana bodoosiin cana sohin cana atinaaurureein cachaauru, satiin Cana Coaunera letononeein aihalu Joanne esenetaauruhalue jaun,” naain jetao, ecu nejesinajeein ita rai ereerejeeuruhane baiha jetao: 7 “Coatiha coitucuhaacaanu. Chachainti cacha baotisaain coujunacatiha Joanne coina letoaain neluta,” naaure jetao.

8 Nii jaun jetaote:

“Niheichu canuhetonai nihanatiin ‘Naaonjoainte canu cooainaan nihane ainane, caa catohanai ichaaunra,’ naain benaa nainihaaun inara raita,” naain jetao acauru tonorae Jesoso.

*Necha aansaineein ichaonacaauru ocoana beraichacuru que parabola que cuaain cachaauru relaa Jesusone*  
(Mt 21.33-44; Mr 12.1-11)

9 Niritohane baiha jetaote, necha aansaineein ichaonacaauru ocoana beraihurera que *parabola* que cuaain jetao: “Leinjiin cacha jetaote, leinjiin ocoana sirihane jaun jetao, que amihanenacaauru rai teein ratiriin jetao, coriajai ataneu cue, latihane naineein raineein nena letoaauruha raine coina.

10 Nitohaneein teein ratiriin jetaote, inaen tainaca que tihane jana jetao, leinjiin letono letoae, nii amihanenacaauru caje raineein niha nii ocoanane coreniha que banihateein ni-icha taihuri bajaa cuhane coina. Ne jetaote, nii cha telanaala fajoaain sohin jelaiha letoaure. 11 Nii jaun jetaote, nacoauneein leeocho letono letoaa nii ocoana erorane jana jetao, nocoeje chanuhin fajoaain sohin, cha colane acaentonai letoaure. 12 Nii jana coaiten leeocho letono letoaane jana jetaote, jataain cunaitaain jelai caje acaentonai sitaure nii ocoana que amihanenacaauru.

13 Nii jaun jetaote: ‘Cha laen ichareeun. Satononejeein caa jataain jereein canuhacha belaa canu calaohi letoaanunete ne. Quete laen acaneein nihane coitucuhin raotojoein raain nere tonoraaurureein,’ nae nii atane erora.

14 Nejetaote niritiin nii rai calaohi letoaane jana jetao, cuujihane jana coariin: ‘Taate caa atane erora calaohi ne. Acate inae oha rai inacane bana, caa itolere que banijiaain

nenaa rareeincha. Coanete mucuhin sohin jaohacachete cana rainein nedaaine caa iolere que banijiaain nenaara,' naain ita caje bajaacoaain jetao, <sup>15</sup> nii ocoana caje amaain sohin jaaore nii ocoana que amihanenacaauru.

Nitohanihane jaun, tonaquiche jana nii que inara. Chato-haneeicha acaauru tereein nii ocoana erora, nii rai calaohi mucuhin sohin jaaoruhane jaun. <sup>16</sup> Raajenhane uhin inacha nii ocoana que amihanenacaauru sohin jaohin, leeochoauru rai nii ocoana teriha nii ocoana erora," naain jetao *parabola* que cuaain cachaauru rai ereerejeein relanajaen Jesoso.

Nii jana jetaote:

"Jiaonriha icharaa nitohaninera," naaure jetao nii cachaauru.

<sup>17</sup> Nii jana jetaote, acaauru coarajejin jetao:

"Chaquena jana chaen, Cana Coaunera Quiricha inoaensi cuhane: 'Nii jaolecooruha loreri icharaaurune jaan ajerite jauriaanejejin loreri nunuheneein ichanohineein niha cureeincha,' nae.

<sup>18</sup> Aihana jaun chunocoha nii ajeri ichoae comoite, nichaluchaluriha cureein. Jana chunucoha ichoae comoha nii ajerinete jitohitoreein," naain jetao be cachaauru rai Jesoso.

<sup>19</sup> Niritiin acaauru que cuaain, cachaauru relaa Jesusone que nainacuruhane jaun jetaote, nii rijieeoritiin mucuer-atenaa jerecure saseredotecuru curuaanaacuru aina Cana Coaunera aitoonjoan que cacha relaaaureraauru. Neje-taote chatohaneein tenaa nainecurene cachaauru coasichu-ruhane jaun.

*Jesoso mucuuruhane jaan lera ariha Roma curuaanaa rai coriqui teeuruhane bajaauruhane*

*(Mt 22.15-22; Mr 12.13-17)*

<sup>20</sup> Nitohanejin sohin jaonaa jerecuruhane jaun jetaote, acaauru letono letoaaure, belaicha cacha rijijiejin turuhin Jesoso caje chaelai erenaa bajaauruhane jana, tonaain acaauru tonoraane nohanejin colurujueeuruha coberenadoro raine coina. <sup>21</sup> Nii jaun jetaote, rene turuhin:

"Cacha relaera, nii aitiin cachaauru relaaaine jaane esinae rauhijiriin chuni que suujuelanaala, satiin cachaauru rai jerichanetoejin aitohine coitucuhacaanu. Iite esinae rauhijiriin jeriha Cana Coaunerane rijijiejin ichaoha cachane coina aitiin cachaauru relai. <sup>22</sup> Nitohanihane jaunne ii caje bajaa uhacaanu. Caohachaana Romanocuru curuaanaa enferadoro rai *impoestonu* que coriqui tihacaanune," naain jetao Jesoso caje bajaauru.

<sup>23</sup> Nii jaun jetaote, nechu jataain baasonejin coacuhin que iriha aitocuruhane que nainaane jaun jetao:

24 “Saan. Canu que leinjiin nii coretequichene jaan coriqui coarateeuiche,” naane jana, que nii coriqui coarateeuruhane jana coaraain jetaote: “Cha cojunaca caa, ecu laenanohineein curuaa siriin,” naa Jesusone jaun jetaote: “Enferadoro rai,” naauruhane jaun jetao: 25 “Aihane jaun chujian- caa enferadoro raineein nenea teeuche enferadoro raicha. Jana Cana Coanera raineein nenea teeuche Cana Coanera raicha,” nae jetao nii cachaauru rai Jesuso.

26 Niritoha satiin cachaauru notaracaae Jesusone jaun jetaote, nii chatohaneein mucuhin teeuruhane jaa lera eru-urenihane jaun jetao, ecuhacha cojoelatiin inauheneecha neeure nii saseredotecuru letonocuru, niritiin acaauru tonoraane jaun.

*Chatohaniha cache inae oo caje ichanaane*

*(Mt 22.23-33; Mr 12.18-27)*

27 Nii baiha jetaote, Jesuso coaraa cuure nii ohane baiha jerichanejeein jaberoco rijijieein niha cache suujuene esenetaauruhi sadoseeocuru. Nitohaneein cuhin rene turuhin jetaote:

28 “Cache relaera, Moisesate canacaanu rai laenaain ratirilu, oha leinjiin cache nesiriateein nii comasai aina canaanai sirilanaalane, nii autana raain aina canaanai siriha rai ocoalane coina. Nitohaneein nii autana aina canaanai siriha nii ocoalane, aca siricha rijijieein nii onaa calaohineein niha nii canaanaine coina. 29 Nii janate ita nejera nejesinaneein caaunsineein neeure cachaauru. Jauriaanejeein acaauru inanate, leinjiin ene aina nesirihateein, nii leinjiin niji canaanai sirilanaala ohe. 30-31 Nii janate neeuruha coroatajaain rai nejeraaurune jaun, oha coaiten nii nihanane jaun nii ene rae nii rai nejera. Nii rijijieein techu satiin nii ene raare acaauru ocoalacuru itolere bana ooruha acaauru inanacurune jaun. Nete leinjiin niji canaanai sirilanaala oore nii caaunsineeuri ita nejeraauru. 32 Nii janate inae oohe nii ene netonai.

33 Aihane jaun chariji comasainein jana nereein nii ene, inae Cana Coanera Cojoanonaa que ichaaoruhane bana, caaunsineeuri ita nejeraauru aina nisiriathalune jaun,” naain jetao Jesuso caje bajaare nii sadoseeocuru.

34 Niritiin caje bajaauruhane jaun jetaote:

“Caa chauratane que nenacaauru quichaauru, enecuru, naaonjoainurite nisiriateein naaonjoaauru. 35 Nete laen inae ooruhane baiha oo caje ichanaain Cana Coanera rene turuhenhuru quichaauru, enecuru, naaonjoainuri inae oo caje ichanacuruhane nisirihateeurenereein, 36 onaa inaaureniha anjeraaurune rijijieein neeururichaanne jaun. Chaen techu Cana Coanera Calahineein neeurureein

acaauru ichateein nerichaain Cana Coaunerane jaun.  
<sup>37</sup> Jerichanejeein techu ohane baiha ichanaain neeuruha onacaaaurune que laenaain coitucuerateein nelu cana que Moisesa, nii nuna laajoiri iihani netiin Cana Coaunera aina irihane bana, ‘Canune, Abaraaun, Isaca, Jacobo, naaonjoainuri Coaunera, inara Coaunera neein neun,’ naalu Cana Coaunera Moisesa raine jaun. <sup>38</sup> Aihane jaun coatiha ichaonacaaauruhacha Coaunera neein nihei Cana Coaunera, onacaauru nihanatiin rai ichaohin neeuruhane jaun,” naain jetao sadoseeocuru tonorae Jesuso.

<sup>39</sup> Niritoha sadoseeocuru rai Jesusone jana jetaote:

“Jataain caohatiinte acaauru rai aitohicha cacha relaera,” naaure jetao Cana Coaunera aitoonjoa que cacha relaaureaauru tabaauru, acaauru laen oo caje ichanaa cachane esenetaauruhane jaun.

<sup>40</sup> Niritoha acaauru rai Jesusone jaun jetaote, inae nacaanen caje chatohanai bajaanaa nainecurene.

*“Cha caje nefoeratenaane Mesihasi,” naain bajaa Jesusone (Mt 22.41-46; Mr 12.35-37)*

<sup>41</sup> Nii jana jetaote:

“Chanuna Rabiri caje nefoeratenaaniha canaacha cohajei Mesihazine jaun, Rabiri amurijiriin nenea naineniha beeiche. <sup>42</sup> Inasiina raajenhane, quiricha Salmo cuhane:

‘Cana Coaunerate,  
 Canu Curuaana Mesihasi rai:

“Cau carohan  
 canu raotono nichajai que  
 nelauriaain coarajeuna,

<sup>43</sup> nii iniha nejeratenacaauru amuritiin,  
 ii bijihu tenajaanune reeintiaaicha,”

naa Cana Coaunera, Canu Curuaanaa Mesihasi raicha,’ naain raajenhane Salmo cuhane bihalu Rabiri inatiin. Chanuna Rabiri amurijiriin nenea nainenere Mesihasi. <sup>44</sup> Inasiinna jana chaen amurijiriin nenea naineniha Mesihazine saijeein nii Rabiri netonai, ‘Canu Curuaanaa,’ naain Mesihasi nichaaunne curuaatihalu natiin,” naain jetao bajae Jesuso.

*Cana Coaunera aitoonjoa que cacha relaaurera biha Jesusone (Mt 23.1-36; Mr 12.38-40; Lc 11.37-54)*

<sup>45</sup> Niritohane jana satiin ecu neein aonajeeuruha cachaaurune jana jetaote, aina nerelanacaauru rai jetao:  
<sup>46</sup> “Caohachaain necohalajiin neeuche, caa Cana Coaunera aitoonjoa que cacha relaaureraauru que. Acaaurute acaauru que suujua acatena nainiha cachane jaan cocoajione jiaain, itolere coitucueraneein, caohachaain niha nocoetocuruhane jaun, chunijihu nenaanaja cataaun nihanatiin, acaauru

que suujua acateein niha satiin cachaaaurune jereein neeure. Chaen techu, sinacoca asae nelauriaaauruha jataain nelatenacaaurune jaan rori caohacha janijiin, nichoae ichoaichaniha nelauriaaure. Chaen techu ichoaichaniha nelaurianana jaan janijiin, lenone rohan nelaurihaain lenonecure. <sup>47</sup> Chaen techu cairichei autanaaauru caje acaauru lorerichuru nihanatiin ruluhin naaonjoaaunre. Nii choae tacaain techu nitohaneeuruhane jaun, jataain nohaniha Cana Coaunera coitucueraniha nocoetocuruha itolere amurijiriine jaun, satiin notaracaae Cana Coaunera bajaauruhane carajaain bajaare. Nitohaneeuruhane jaunte leeochoaauru osaaonacaauru cachaaauru amurijiriin, jataain caseteco tabai coaraa cuurureein,” nae jetao aina nerelanacaauru rai Jesuso.

## 21

*Acaihaniji ichaaojihane jaanu coriqui tiha cairichei autanane*

*(Mr 12.41-44)*

<sup>1</sup> Niritiin Teenforo asae coriqui coreniha Cana Coauneraacha icharatenohi amihanenaa ichacuruhane coina curu cuhane coriqui teeuruha cachaaaurune jana, ecu coarajenajaa Jesusone jana jetaote, <sup>2</sup>leinjiin autana jataain cairicheinejeein nena netonai coroatajajeein jataain coretelanaala nena coriqui te, <sup>3</sup>jataain teeuruha leeochoaaurune fautaaine jaun jetaote:

“Esinae rauhijiriine aitoon inara rai. Caa cairichei autanate, leeochoaauru amuritoheriin coriqui te. <sup>4</sup>Satiin caa leeochoaaurute nechu jataain inae acaauru rai cauteecha teure. Jana caa autanate, jataain cairicheinejiha natiin jitariin acaihaniji ichaaojihane jaanu te,” nae jetao Jesuso.

*Nitajerichaaain Teenforone biha Jesusone*

*(Mt 24.1-2; Mr 13.1-2)*

<sup>5</sup> Nii jana jetaote, caohatiin ajeri caje ichanohiniha Teenforone coaraain, jataain caohatiin inanacaane coina, nasaae itolere niicha teuri coaraain jetao que ereerejeeure cachaaauru. Nii jana jetaote acaauru rai:

<sup>6</sup> “Caa ena ajeri caje caohatiin ichanohineein inaraacha coarajeite, inae ecu tihane bana fejeein itajenojoinereein,” nae jetao acaauru rai Jesuso.

*Nerichaaain cojoelanaacojoaine biha Jesusone*

*(Mt 24.3-28; Mr 13.3-23)*

<sup>7</sup> Niritohane jaun jetaote:

“Cacha relaera, chabanacha aicheein nii chaitoonjoan. Chatohanai cojoelanaacojoaicha inae que turuhelalajihane jana coararichaanuhin,” naain jetao caje bajaare.

<sup>8</sup> Nii jaun jetaote: “Caohachaain nainaan necohalajii neeuche, inara coritaa chunine coataara. Inae nerichaa in arajii canu niha nocoetiin inara coritaeraanuurura. Tabaaurute: ‘Canune acaneeunra,’ naaurureein. Jana tabaaurute: ‘Inae taolu caitoonjoa cojoanonaa que nihacachera,’ naauruha inara raine, jiaonriha esenetaain sacunajaichenenera. <sup>9</sup> Jiaonrihachu nejesinaneein ita sohin neeuruha satiin chauratane que nenacaauru cachaaurune coitucuhin neeichene nihanatiin nesoonetohichenera. Nitohaneente jaiti nii cojoanonaa que turuenihane ajiniha aichee incha. Nete nitohanihane nihanatiin jaiti cana janonaa satono que turuhenee incha,” nae jetao Jesoso.

<sup>10</sup> Niritiin jetaote: “Leeocha atane que ichaonacaauru cachaaurute, lauriu ichaonacaauru cachaauru aina ita co-taiha cuurureein. Jana leinjiin atane que ichaonacaauru cachaaurute, leeocha atane que ichaonacaauru aina ita soorureein. <sup>11</sup> Nii janate itolere cana rai chauratane sacuritaain niha cureein jataain mijiaaineein carora, mijitena, cunai, naajoainuri. Nii jana dede quete jataain coasinaacojoai coaraain, cojoelanaacojoai coaraa cuurureein cachaaurura.

<sup>12</sup> Nete nii cojoanonaa que turuenihane ajiniha, inara rohecaain inara mucuhin sinacoca asae inara amain, curuaanaacuru, chaen coberenadorocuru, naaonjoainuri acatiha inara teein inara cairichaa in caresero cuhane inara enohaa cuurureein canu ere tonoraera neeichene corenihara. <sup>13</sup> Nitohaneein inara teeuruhane banate, canu nichaaunne coitucuerateriquicheein cachaauru quera. <sup>14</sup> Jiaonriha, ‘Tonaainera erereunta,’ naain inara jabereco coreniha ereeichene jaanu que coacuhin cuhiche inara amaauruhanene. <sup>15</sup> Canune jataain nainaan ecu ereeichene jaanu tereeeunni inara raicha. Nii bana nii tonaain inara tonoracuruhane jaanu coitucuhin neeururihaain nii inara aina nejeratenacaauruta. <sup>16-17</sup> Nete laen inara cairichaeriin inara cotaairiin nenacaauru coroatajaniha cuurureein nechu jataain inara cairichaa, inara inacaauru, inara nejeraauru, inara araaichuru, inaraacha belaihuri, naaonjoainuricha. Nitohaneente inara tabaauru sohin jaaoha cuurureein. Satiin caa chauratane que nenacaauru cachaaurute Canu ere tonoraera neeichene coreniha inara que nererojoecaaeriin, inara cairichaeriin, inara cotaairiin, naaonjoaain neeururee incha. <sup>18</sup> Nete nii leinjiiniji inara couturiji nihanatiin nitajenereein. <sup>19</sup> Nii jaun caohachaain laraajiin nii inara suujua corelanaala, raotojoeein neeuchete nii caje nichotenaa nainequiche.

<sup>20</sup> Inae Jerosaleen curuhacaain neeuruha soondaroorune coaraqichene, inae nitajerichaa inne cojoanonaa que

turuhane que nainacuche. <sup>21</sup> Inae nitohaneeuruhane coaraqichene, Jodea nenacaauru naain ichatane ucuuno cuhin sorooruhine. Jana Jerosaleen nenacaauru, nii nese caje coriaae amuurumiincha. Jana chunocoha rai nocoana jana nihane jana nitohanihane, jiaonriha jelaiha nii neseu turuha cunaa coaucanera.

<sup>22</sup> Inaen nitohanihane coina, niritiin inoaelu quiricha inoansi cuhane satiin laenacuruhane jaa cojoanonaa nainaane coina jataain caseteco tabai niha curichaaaine jaunra. <sup>23</sup> Jataainte cairichaaajoaa cuurureein nii cojoanonaa bana ausirineein nenacaauru enecurura, chaen sisiajeein canaanai siriin nenacaauru, naaonjoainuricha. Nitohaneente caseteco tabai coaraa cuurureein nii Jodea batane que nenea aina Jerosaleen ichaonacaauru cachaaurura. <sup>24</sup> Tabaaurute sabere que sohin jaonjoiniha cuureeincha. Jana tabaaurute mucunojoinieein corihaji ataneuru amanojoiniha cuurureein. Nitohaneente Cana Coaunera coitucuhichuru, nii Jerosaleen nenacaauru itajiha cuurureein caohatenojoiniha nitohanei ichacuruhane jaan que turuhanereein tihaaincha,” nae jetao aina nerelanacaauru rai Jesoso.

*Nacooauneein turuha urichaaunni Canu cachaneein nejanohanaa nichaaunne*

*(Mt 24.29-35, 42-44; Mr 13.24-37)*

<sup>25</sup> Niritiin jetaote “Enoto, atene, arasijie, naaonjoainuri quete cojunacateein coaratenojoinereeincha. Nii jana satiin caa chauratane que nenacaauru cachaaurute, nesooniha cuurureein, ‘Naaonjoanne jaunte caa aicha’ naain coitucuurenihane jana jataain tonihaca coasinacaain fichafichanaa cucuanane coaraaincha. <sup>26</sup> Nitohanihane janate inae nitajerichaaain cana rai chauratanene coaracuruhane jaun, coasinacaun acunoha cuurureein cachaauru. Dedeeu nenacaauru netonaite jataain nerurujuaa cuurureein. <sup>27</sup> Nii janate jataain nelateein itolere ichana nainichaaunne coarateein turuha uuhanu Canu Cachaneein nejanohanaaneein dede sacari jana uuhinne coaraa cuurureein cachaauru. <sup>28</sup> Inae nitohanihane nunuhetihane jana, nii chaque tonajelanaala neeuche, inae inara que nejeratenacaauru caje nichoteriquicheeinine coitucuhichene jaun,” nae jetao acaauru rai Jesoso.

<sup>29</sup> Acaauru rai niritiin jetaote, nechu jataain nainacuruhane jaanu que jetao: “Coaracuchena chuhinti *iquera* aina joanreein enuhacuru, satiin neroeeca nalone baiha <sup>30</sup> nacooauneein omaroha nalone, inae elohena que turunaa jerihane que nainaquichene. <sup>31</sup> Nii rijjijieein techu inae caa caitoonjoan cojoanonaa que tihane bana, inae

coaraqichene, nichuuntaa Cana Coaunera Cojoanonaane que nainariquicheeincha.

<sup>32</sup> Esinae rauhijiriinte jaiti ooreniha caa ena nenacaauru cachaaurune jana, satiin situha cureein caa caitoonjoan.

<sup>33</sup> Dede, chauratane, naaonjoainurite nitajiha cuurureein. Nete laen caa caitoonjoan leinjiiniji nitajelanaala satiin aito-coaanne rijijieein aihane rai ne.

<sup>34</sup> Aihane jaun caohachaaain necohalajiin, nii cajihaneein inara suujua coacuelanaala, nii ajelanaala, nii inara ichaohacha que nererojoecaaeriin neeichene jianein neeuche, inae nii cojoanonaa que tihane bana, ujua cuhane foroaa chaelaine rijijieein inara foratiaa nii cojoanonaane coataa. <sup>35</sup> Itolere sacuritaain caa chauratane que nenacaauru cachaauru ichoaate naluha cureein nitohanai.

<sup>36</sup> Aihane jaun letona jatoroain itolere cojoanonaa bana Cana Coaunera bajaaebajajeein neeuche. Aihate caa caitoonjoan tocoaneein situhane bana, caje nichoteein, nii acaihaniji Cachanein nejanohanaa nichaaunne acatiha raotojoein turunaa nainequiche inara,” nae jetao caje bajaauruhane jaun aina nerelanacaauru rai Jesoso.

<sup>37</sup> Nitohanein jetaote, jiichoonihane Teenforo asae cachaauru relaain, inae nocohecane jana Oliboneein niicha curuaateuri ichatane ucuuno cuhin nihane nesururejetelu Jesoso. <sup>38</sup> Nitohanein jetaote, janohetiin Teenforo asae cuhin, acaauru relaa Jesusone aonaa curejetucurelu satiin cachaauru.

## 22

*Jesoso mucuuruhane coina ita suujua tacaauruhane  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Inae jorerera colane faan quihuruhane jaa cojoanonaa Fasocoa beseta catainaane jana jetaote, <sup>2</sup> Jesoso sohin joerateeuruhane coina jetao, “Chatohanein ichanaareta,” naain coaacure saseredotecuru curuaanaacuru aina Cana Coaunera aitoonjoa que cacha relaaaureraauru. Nabana raajenhane mucuhin sohin jaaoruhane, chatohanein acaauru teeuruha cachaaurune que necasacuruhane jaun.

<sup>3</sup> Nitohanein inaen sohin jaaoruhane coina que nocousu-ujuaaruhane jana jetaote, nii aina nerelanacaauru lechoonca coroataja Jodasi Isacariote neein niicha curuaateuri suujua saruha Moconajaerane jaun jetao, <sup>4</sup> batirichuru curuaanaacuru, Teenforo curuaanaacuru, naaonjoainuri coaraa cue: “Canune naaonjoain inara rai naineen, nii Jesoso mucuhinchene coina ecu inara turuaanunera,” naa acaauru raine coina.



<sup>5</sup> Inae niritoha acaauru raine jaun jetaote, jataain coroa-  
jeein coretena jerecure. <sup>6</sup> Nii jaun jetaote, acaauru suujua  
rijitjoeein cachaauru colane niha Jesusone cojoae, ecu Jori-  
oocuru bijihu Jesoso tihane coina Jodasi.

*Cana Curuaanaa aina lenonecuruha afosotoorune  
(Mt 26.17-29; Mr 14.12-25; Jn 13.21-30; 1Co 11.23-26)*

<sup>7</sup> Nii jana inae jorerera colane ichanohin faan quiin caren-  
ero narejeen sooruhane jaan beseta cojoanonaa Fasocoa que  
turuhane jaun jetaote, <sup>8</sup> Fedoro aina Joaan rai jetao:

“Chajaain Fasocoa beseta cosonaina que canaacha quiine  
ichanihuchete que lenonichaachera,” naain jetao acaauru  
letoae Jesoso.

<sup>9</sup> Nii jaun jetaote:

“Chujian ichacaaunne jereeita,” naain jetao caje bajaare.

<sup>10</sup> Nii jaun jetaote:

“Inaen cuhin nii neseu turuhichene janate, baichaje  
cuhane acau baaibaaichaaain cuujiha leinjiin cachane jana  
eruriquicheein. Chaen loreri asae enohane reentiaain  
sacuuchera. <sup>11</sup> Chaen inae nii loreri asae turuhichene, nii  
loreri erora rai: ‘Taa cana relaerate, Chariji loreri asae nena  
ecuha cuhane, Fasocoa beseta cosonaina que lenonereeunni  
canu aina nerelanacaauru ainata, naain ii caje bajaeratera,’  
naauche. <sup>12</sup> Niritocoichene janate, nii loreri coroata coarana  
ecuha seeonjoa siricha coaratereein inara que. Chaen inae  
nitohaneein inara que coaratihane baiha, ecu sonaina  
lenonichaachene jaanu jelai rucuhecuchera,” naain jetao  
letoanajaen Jesoso.

<sup>13</sup> Nii jaun jetaote cuhin, nii acaauru rai aitoha Jesusone  
rijijieein eruuruhane jaun jetao, ecu tein Fasocoa beseta  
bitoaain, cosonaina que lenonecuruhane jaanu jelai rucuhe-  
cure.

<sup>14</sup> Inae nitohaneein enoalauruhane jana jetaote turuhin,  
inae que lenonecuruhane jaan rijiu tihane jana, rai afoso-  
tooru aina rori ichoae nelauriae lenonecuruhane coina Je-  
soso.

<sup>15</sup> Nitohaneein rori ichoae nelauriaain jetaote: “Jataaine  
inara aina carijieein caa Fasocoa beseta bitoaain, cosonaina  
que lenonena jerenajacoon osichaaunne ajiniha. <sup>16</sup> Coatiha  
laen caa baiha, inaen caa Fasocoa beseta bitoaain inara  
aina lenonerihaaunni Cana Coaunera Cojoanonaa que tu-  
ruhanune reentiaain,” naain jetao, <sup>17</sup> curu cuhane, oba caje  
ichanohin bino teberiaain Cana Coaunera bajaane baiha  
jetao, acaauru rai tein:

“Nocoo, inara nejesinajeein caa leruune leruunein  
cooche. <sup>18</sup> Inae caa baiha nacoaaunein caa oba caje  
ichanohin bino corihaaunni Cana Coaunera Cojoanonaa

que turuhanunereen tiaain,”<sup>19</sup> naane baiha jetaote, faan mucuhin Cana Coaunera bajaain, cataaun nii faan tatuhin beeune beeunein acaauru rai teein jetao:

“Caa inara rai canuhacha teite cajabereoneein ne. Acate jianacoon neeichene coina, inara coreniha cairichanojoneein atinanohinereein. Aihane jaun, itolere bana canuneein nihanune coacuhin que lenonecuche,” nae jetao acaauru rai faan teruhin teein Jesoso.

<sup>20</sup> Niritoha acaauru rai Jesusone jana lenonecuruhane baiha jetaote, nii faan que aitohane rijitjoeein, acaauruhacha coheni teein jetao;

“Caa oba caje ichanohin binote, inara caohachanu que cacoichana jaohin canuhacha ichaneni icharihanuhinne cojunaca nera. <sup>21</sup> Nitohaneein caque nejeratenacaauru rai caeteraanute ena cau cana aina lenoniha ne. <sup>22</sup> Nitohaneein acaihaniji Cachanein nejanohanaa nichaaunne cairichaeriin neeuruhane coina, aitiin neeuruhane rijijieein aihanete ne. Nete jataain cairichaaajoaa cureein, nii caque nerotohin cacairichaerateranu,” naain jetao bino teberiaain Cana Coaunera bajaane baiha afosotooru rai te Jesoso.

<sup>23</sup> Nii jaun jetaote, “Charijinachara toon totohaneein que nerotohin aina nejeratenacaauru rai coulurujueein cairichaeratiha cureein,” naain jetao ita caje bajaacoaure aina nerelanacaauru.

### *Charijina jataain nelateineein ne*

<sup>24</sup> Niritiin jetaote nejesinajeein: “Charijina caa cana caje jataain nelateineein coaanojoneein ne,” naain jetao ita caje bajaacoaure aina nerelanacaauru. <sup>25</sup> Nii jaun jetaote acaauru rai: “Cana Coaunera coitucuelanaala nenacaauru curuaanaacurute, itolere amurijiriin nena jereein cachaauru cairichaeriin neeure. Niite acaauru cairichaauruhane coitucuuruhane nihanatin coroaecure caohacha ichaa benajaain. <sup>26</sup> Nete laen inara naineneeiche nitohaneein neeichene. Nitohaneein nena coacuelanaala, leochaauru amurijiriin nelateein nena jeriha chuni inara cajene, leochaauru ere tonoraain, letoaauruhane jaan ichaain neeine. Jana chunocoha leochaauru letoaeraneein nena jerihane satiin rai, chachaeraneein neeine.

<sup>27</sup> Nitohanihane jaun chariji jataain nelateineein nere, nii lenonihane coina rori ichoae nelaurianaana. Ainihane nii lenone chaluharana nelateein neriha. Aihei jerihane. Nii rori ichoae lenonihane coina nelaurianaate nii lenone chaluera amurijiriin nelateein niha nocoete.

Nena laen canu nitohanelanaala, inara letono rijijieein ena cau inara aina inaraacha latei icharaneein neun.

28 Inarate cajiniichaain necairichanaa coaraain nena-  
jaoonquiche. 29 Nii jaunne itolere Curuaanaa neein nelateein  
nihanune coina canu cocoainaaain caetein niha Ofane riji-  
jjein, inara netonai cocoainaaain nereeunni. 30 Nii banate  
inae nii cojoanonaa que turuhane bana, cajiniichaain rori-  
huru ichoae nelauriaain acau cohin, lenoneein, naaonjoan-  
riquicheein. Chaen techu baaso ichacurenihane, caohacha  
ichacuruha lechoonca coroata laurii Israeli cocoaichacu-  
rune coaraain coitucuhichene coina cajiniinchaain nii coina  
banijjaain nenea rori ichoae nelauriariquicheein, inae nii  
cojoanonaa que tihane bana,” nae jetao aina nerelanacaauru  
rai Jesoso.

*Coitucuha nocoetenerichaain Fedorone biha Jesusone*  
(Mt 26.31-35; Mr 14.27-31; Jn 13.36-38)

31 Niritiin jetaote: “Simoon, inae Canu sacueraneein nee-  
ichene bajaa moconajaera inara raane coina. 32 Nena ii  
coreniha Cana Coanera bajaaun, canu esetaaine jianeine  
nihanatiin nacoaunein nelalararajiaain Canu esenetaain  
neeine coina. Aihana jaun, inae nacoaaunein canu es-  
enetaaine bana, inejeraauru coroatajanecuhin caohachaain  
laraajiin, canu esenetaauruhane janelanaala raotojoein  
rachoojoein neuruhane coina,” nae jetao Simoon rai Je-  
soso.

33 Niritoha raine jaun jetaote:

“Curuaanaa, canune ijiniichaain caresero cuhane enohin  
nihanatiin ii coreniha onaa naineeun,” nae jetao rai Simoon.

34 Nii jaun jetaote:

“Fedoro, enene janotiin cuhanete, iriha janonaa rai atao-  
hari curuaanaane ajiniha, nichata saain canu coitucuha no-  
coetoeneriquiin,” nae jetao Fedoro rai Jesoso.

*Inae nichuutaa coujunojoiniha Jesusone*

35 Niritiin jetaote:

“Inara letoaain nihanulu coriqui curu, inara safato, inara  
atora, naaonjoain colane janana lanaain nihalu inara rai  
cha,” naain acaauru caje bajaa Jesusone jaun jetaote,

“Aihei. Coatiha nii lanaailu canacaanu rai chata,” naain  
jetao tonoraature.

36 Niritocuruhane jaun jetaote:

“Nete laen ena chateinti coriqui curu siriin, natora siri,  
nii amaain cuhane caohachae. Chateinti sabere sirine nii je-  
laronaa bana niicha jiai cajione burique necoreteein leinjiin  
sabere coretemiin.

37 Inara raine aitoon, inae caque aitiin Quiricha  
inoaesii cuhane: ‘Naaonjoaain cairichaaeriinte necha  
aansai caseteco coaraane rai nenea ichara rijijjeinte

teeurureeincha,' naain itolereneein niritiin caque aitiin laenacuruhalune rijijieein situhane rai te ne," naa acaauru raine jaun jetaote:

<sup>38</sup> "Curuaanaa, caute ne corotajaain sabere," naauruhane jaun jetaote:

"Inae nainejerichaain niriimiin," nae jetao acaauru rai Jesoso.

*Olibo neeonjoaihu Cana Coaunera bajaaj Jesosone*  
(Mt 26.36-56; Mr 14.32-42)

<sup>39</sup> Niritoha acaauru raine baiha jetaote, ecu nesurunajaoncane jaun, Oliboneein niicha curuaateuri ichatane ucuuno cuha Jesosone jana jetao, caaijie cuure aina nere-lanacaauru. <sup>40</sup> Nitohaneein cuhin, inae nii Olibo neeonjoaihu turuhin jetaote:

"Cana Coaunera bajaauche nabana osa que nesaruquichene coataara," nae jetao acaauru rai.

<sup>41</sup> Acaauru rai niritiin jetaote, nita acaauru aonajeein cuhin neseonrariin jetao; <sup>42</sup> "Ofa, ii jereeine caa jataain necairichanaa tabai caje canu mitaaura. Nena canu jerichaaunne rijijieein ichaaine jereneenra. Ii jereeine rijijieein ichaaura," naain jetao Cana Coaunera bajaaj Jesoso.

<sup>43</sup> Niritohane jana jetaote, dede caje ecocohin lararajiaa leinjiin anjerane jaun jetaote, aina suujua nunaaajoae. <sup>44</sup> Nii aina jataain nesoonenaa cataau neein jelai rutaain, Cana Coaunera bajaabajaeca Jesosone jana jetaote, atanichoae tabaanaain nalue rai doroana ichananeein.

<sup>45</sup> Nitohaneein inae Cana Coaunera bajaane nainaan, aina nerelanacaauru coaraa cuhane jana jetaote, jataain cotaena aina inaderanaa caaun sinihure. <sup>46</sup> Nii jaun jetaote acaauru rai:

"Chanuna siniiche. Chajaain nimichuhin Cana Coaunera bajaauche nabana osa que nesaruquichene coataara," nae jetao acaauru rai Jesoso.

*Jesoso mucuuruhane*  
(Mt 26.47-56; Mr 14.43-50; Jn 18.2-11)

<sup>47</sup> Niritiin jaiti acaauru rai ereerejiha Jesosone jana jetaote, turuha cuure arajii cachaaauru. Nii aina nerelanacaauru lechoonca coroataja neein nena Jodasi jetaote, acaauru ichoaichaniha acaauru amaeraneein cue. Aca jetaote, Jesoso rohan nichuuntaain nechu jataain belaicha rijijieein jetao rai nomeri lioracae. <sup>48</sup> Nii jaun jetaote:

"Jodasi, belaicha rijijieeina nomeri lioracaain nii acaihaniji cache Calahineein nena teei aina nejerateeriin nacaauru bijihute," nae jetao Jesoso.

<sup>49</sup> Inae inooneeuruhane coaraain jetaote:

“Curuaanaa, coanene ii cocoaeratihacaanu sabere quera,” naaure jetao nii Jesoso aina nerelanacaauru.

<sup>50</sup> Niritiin jetaote, leinjiin saseredotecucu curuaanaa letono uricho beuhite, rai raotono nichajai que tacaain sabere que, leinjiin nii Jesoso aina nerelanaa. <sup>51</sup> Nii jaun jetaote:

“Inae nirimiin, coa cunaitaa,” naain jetao jelaiha nii saseredotecuru curuaanaa letono uricho tirichain jetao rautae Jesoso. <sup>52</sup> Nitohaneein rautaane baiha jetaote, sasere-dotecuru curuaanaacuru, Teenforo beraihurera, chaen Joriocuru bichauhenaauru, Joriocuru rai nelateein nenacaauru, naaonjoainuri rai jetao:

“Chanuna leinjiin necha ansai ausijiautoneein sonajaain joeraneein nihanune que airijiin sabereeuu aina enuhacuru uhaain canu mucuha uhiche. <sup>53</sup> Itolere cojoanonaa banara, inara aina Teenforo asae nenajacoonna. Nii jana nii chatohaneein coatihana canu dadanajaaohiiche. Nete inae nitohaneein nocohena tabai osa que nesaruhin namuritocohichene cojoanonaa que tihane jaun aiiche inarara,” nae jetao acaauru rai Jesoso.

*Jesoso coitucuha nocoeniha Fedorone*

*(Mt 26.57-58, 69-74; Mr 14.53-54, 66-72; Jn 18.12-18, 25-27)*

<sup>54</sup> Nitohaneein jetaote, Jesoso mucuhin saseredotecuru curuaanaa loreri asae amaauruhane jana jetao, nita caaijie coarajeein jetao cuujue Fedoro. <sup>55</sup> Cuu turuhin jetaote, jelarotokane jaun, nenaanaja cataaun teein usi mocohin, curuhacaain nichaatiha neeuruhane jana jetao, Fedoro netonai cuu turuhin acaauru aina nichaatiha usi rohan lauheque. <sup>56</sup> Nii jana saseredotecuru curuaanaa coseenraneein nena leinjiin ene jetaote, cuu usi rohan lauhequiin nichaatiha Fedorone jana, cuu coarajihane baiha jetao coujueluhin:

“Caa netonaite aina nenaane,” naane jaun jetao:

<sup>57</sup> “Ainaaunchenaate. Coatihana Jesoso coitucuhaaunche canute,” naain jetao suujue Fedoro.

<sup>58</sup> Nii baiha neeoriin jetaote, leeochoa netonai:

“Caa netonaite acaauru aina nenaanera,” naane jaun jetaote;

“Ainaaunnaate, coatihana aca nihaaunte,” naain jetao nii cacha tonorae Fedoro.

<sup>59</sup> Nii baiha carajaojoaain jetaote, coaiten leeochoa netonai;

“Esinae rauhijiriin caa cacha netonaite, aina nenaane. Nii choae tacaain techu Calileea cocoaichanera,” naane jana jetao:

<sup>60</sup> “Coatihana nii carai chaitoonjoan cacha coitucuhaaunte,” nae jetao nii cacha rai Fedoro. Niritiin jaiti

ereerejiha Fedorone jana, nii rijieeoritiin iriha ataohari curuaanaane jana, <sup>61</sup> jaotoroaaain Fedoro coaraa Jesusone aina jetaote: “Enene cojoanotiin cuhanete, nichata saain cacoitucuha nocoetelanaala nesuujueeine jana erereein ataoharicha,” naa Jesoso raine coacuhin nainaaain jetao, <sup>62</sup> nii neeurunaja loreri caje mituhin jetao jataain obajein chanae Fedoro.

*Jesoso que ninichaajeeuruhane*

(Mt 26.67-68; Mr 14.65)

<sup>63</sup> Nitohaneein nii Jesoso mucuuruhane jana beraiha nenacaauru cachaauru jetaote, que ninichaajeein faohacure. <sup>64</sup> Nitohaneein faojaaain jetaote, nota conajaain:

“Aihane esinae rauhijiriin *profetaneeeine* caa ii soera coitucuura,” naainchuru jetao sohin, <sup>65</sup> jataain que ereeinchuru nocoeje chanuure.

*Jataain Jorioocuru rai nelateein nenacaauru Junta Suprema acatiha niha Jesusone*

(Mt 26.59-66; Mr 14.55-64; Jn 18.19-24)

<sup>66</sup> Nitohaneein teein jetaote, inae janohane jana, ita taojiaaure Jorioocuru coaraneein nenacaauru bichauhenaauru, chaen saseredotecuru curuaanaacuru, Cana Coaunera aitoonjoa que cacha relaaureraauru, naaonjoainuri, jataain Jorioocuru rai nelateein nenacaauru *Junta Suprema* acatiha amaauruhane coina. Nitohaneein amaain inae cuu turuhaain jetaote:

<sup>67</sup> “Esinae rauhijiriin Mesihasi neeine canacaanu rai beeine coitucuhacaanura,” naaunruhane jaun jetaote:

“ ‘Aca nichaaunchujian,’ naanune nihanatiin, nii que-senetareeichene coaalanaalata. <sup>68</sup> Nii inara caje erena ba-jaanune nihanatiinchu catoonrariquichene coaalanaalata. <sup>69</sup> Nena laen inae, enene caje coauneein, itolere Coaunera-anein nelateein nena Cana Coaunera raotono nichajai que nelauriaa cureeinni, canu acaihaniji cachanein nejanohanaa nichaaunnera,” nae jetao acaauru rai Jesoso.

<sup>70</sup> Niritoha acaauru raine jaun jetaote, satiin:

“Aihane jaunna, ii Cana Coaunera Calaohineei,” naauruhane jaun jetao:

“Esinae rauhijiriinte acanichaaunne que aitocoichera,” nae jetao acaauru rai Jesoso.

<sup>71</sup> Niritoha acaauru raine jaun jetaote:

“Cha nenacaeneein cana rai berana laterihacache, inae raajenhane nujuuae caje acaniane que aitohane aonacaache natiin,” naaure jetao.

## 23

### *Jesoso coulurejeeuruha Filato raine* (Mt 27.1-2, 11-14; Mr 15.1-5; Jn 18.28-38)

<sup>1</sup> Niritiin jetaote, satiin nimichucutaain coinetein mu-  
cuhin jetao, Filato rene Jesoso amaaure. <sup>2</sup> Ecu turuaain  
jetaote, Filato acatiha tein Jesoso coulurujeure:

“Caa cachane eruhacaanu, caa cana atane que  
nenacaauru cachaauru suujua rohecaain, cana curuaanaa  
Romanocuru curuaanaa enferadoro rai coriqui tihacachene  
caohatein, ‘Aca jete nii canaacha cohajei *Rey* Mesihasi  
ne,’ naain cachaauru suujua auhacaane jana,” naain jetao  
coulurujeure.

<sup>3</sup> Niritiin coulurujeeuruhane jaun jetaote,

“Iina chuhisi Jorioocuru Curuaanaa *Rey* ineei,” naain caje  
bajaa Filatone jaun jetaote:

“Esinae rauhijiriin acanichaaunne quete aitohicha,” nae  
jetao rai Jesoso.

<sup>4</sup> Niritohane jaun jetaote, saseredotecuru curuaanaacuru,  
chaen ecu neein aonajeerera cachaauru, naaonjoainuri rai  
jetao:

“Coatiha chatohaneein baaso ichaa caa cachane coara-  
haaun canuta,” naa acaauru rai Filatone jaun jetaote:

<sup>5</sup> “Nete cachaauru relaane aina cuaain satiin cachaauru  
suujua auhacae. Nitohaneeinte Calileea batane caje  
nunuhetein, caa Jodea batane netonai que jerichanejeein  
ichana jerera,” naain jetao jataain acaauru esenetaa Filatone  
jereein counujeure.

### *Erodesi rene Jesoso letoaa Filatone*

<sup>6</sup> Niritocuruhane aonaain jetaote: “Calileea cajena ne-  
naana caa cachate,” naain jetao acaauru caje bajaee Filato.

<sup>7</sup> Niritiin acaauru caje bajaane jana, “Aca chujianrana,”  
naauruhane jaun jetaote, Calileea coberenadoroneein bana  
niha Erodesine jaun rene letoae Filato, nii bana nii Jeros-  
aleeun turuhin niha nii Erodesine jaun. <sup>8</sup> Nitohaneein Je-  
soso letoaa Filatone jana coaraain jetaote, jataain rachoojoe  
Erodesi, cojoelanaacojoai ichaane coitucuhin, acaaeentonai  
Jesoso coarana jeretohane jana rene letoauruhane jaun.

<sup>9</sup> Nii jaun jetaote, araai saain niqai, “Chatohaneein nena-  
neein,” naain caje bajaee Erodesi. Nejetaote, nere tonorana  
jerene Jesoso. <sup>10</sup> Nii nainiha jetaote, ecu neeure saseredote-  
curu curuaanaacuru, chaen Cana Coaunera aitoonjoa que

catcha relaaureraauru, naaonjoainuri, jataain acaauru esenetaain, Jesoso cairichaa Erodisine coina counujeein coulurujiha neeure. <sup>11</sup> Nitohaneein nere tonorana jereniha Jesosone jaun jetaote, coaetaain rai soodarooru aina jiniinquin nocoeje chanuhin jetao cairichaaain, nocoreeteuruha reychurune jaan tocohanai cajione que jetao Jesoso cajione corerate Erodesi. Nitohaneein teein jetaote, nacoaauneein Filato rene letoae Erodesi. <sup>12</sup> Nitohaneein Jesoso cairichaaauruhane bana caje coaauneein jetaote, ita que nejerateeriin neeuruhane baiha jetao, ita belaichaneein neeure Filato aina Erodesihuru.

*Jesoso atinaauruhane coina rucuhecuruhane*  
(Mt 27.15-26; Mr 15.6-15; Jn 18.39-19.16)

<sup>13</sup> Nitohaneein Filato rene letoaa Erodesine jana jetaote, saseredotecuru curuaanaacuru, chaen cocoinacaihuru, satiin ecu nenacaauru catchaauru, naaonjoainuri taojiaain jetao:

<sup>14</sup> “Inarate canu rene caa catcha turuaa uhiche, ‘Catchaauru suujua reroecaain jete, catchaauru suujua auhacae,’ naain coulurujeein. Nena caraajenhane inara acatiha teein caje bajaanune janate, nii chatohaneein cotainacai ichaain, nii coulurujeichene jaa lera coitucuneeun. <sup>15</sup> Niheichu caa cana rene jelaiha letoaera Erodesi nihanatiin, nii chatoanai ichaane jaa lera coitucuhi. Aihane jaun inae coaraquiche inara, nihei nii chatoaneein cairichaaain ateinaacachene jaan lera. <sup>16</sup> Raujiaainchane casetecaain nii baiha jianereeunni, <sup>17</sup> Fasocaa beseta naineein niha coulurujuenojoine, nirijieein jianenajaaoncaanne rijijieein,” naa acaauru rai Filatone jana jetaote,

<sup>18</sup> satiin ita rijitiin jachaatorohaain jetao:

“Jiaohine. Jiaonriha nii Jesoso jianeeinera. Nii Barabasi jianeeujian laenra,” naaure jetao Filato rai Jorioocuru.

<sup>19</sup> Nii Barabasi jetaote, caresero cuhane enohaare, nii ne-seu Romanocuru que nejerateein, acaauru aina sonaana que neein leinjiin catcha sohin jaohane coreniha. <sup>20</sup> Nitohaneein nii chatohaneein Jesoso cairichanaa jerenihane jaun jetaote, nirijieein jianihane coina jetao niqui, nacoaauneein acaauru rai ere Filato. <sup>21</sup> Nejetaote, jataain tonijiaain jeelai rutaain jachaatoroaain jetao:

“Letonanocoriin coroso que teute ecu neein ohinera,” naaure jetao ita rijitiin.

<sup>22</sup> Niritocuruhane jaun jetaote:



“Chatohanai baasonajian ichae. Coatiha cairichaain atinaanune coina chatohanein baaso ichaain nihane coara-haaun canuta. Raujiaainchane casetecaain, nii baiha niri-jiein jianereeunnicha,” nae jetao acaauru rai Filato nichata saain.

<sup>23</sup> Niritoha acaauru raine jana jetaote, jachaatoraain ehe-quin jetao, “Coroso que tihachaaura,” naauruha araai saaine cotabeniha jetaote, <sup>24</sup> nii aitocuruhane rijijiein jetao ichae Filato. <sup>25</sup> Nitohanein jetaote, nii Romanocuru que nejera-teen sonaana que neein sonajaain joera caresero cuhane nena, acaauruhacha jianeratei cacha mitaain jetao acaau-ruhacha jerei rijijiein jetao, acaauru bijihu Jesoso te Filato.

*Coroso que Jesoso teuruhane*  
(Mt 27.32-44; Mr 15.21-32; Jn 19.17-27)

<sup>26</sup> Nii jaun jetaote, coroso que Jesoso teuruhane coina, amauruhane jana, situujiha cuha leinjiin cacha Sirene caje unaa Simoonne jaun jetaote, cotijiaain que nii Je-soso teuruhane jaanu coroso baijiaeratecure. Nii jaun jetaote Jesoso caaijie, nii coroso teuruhane jaanu amae. <sup>27</sup> Nitohanein amauruhane jana jetaote, arajii enecuru, quichaauru, naaonjoainuri jetao, caaijie cuure. Nii caai-jie cunacaauru jana cunacaauru enecuru jetaote, cojioriin chanaaure Jesoso coinaderaa. <sup>28</sup> Nii chanaauruhane jana acaauru coaraain jetaote:

“Jiaonriha cacoreniha chanaaichenera Jerosaleen benecuru. Inara bereecuru, inara jaberoco, naaonjoain coreniha chanaauchera. <sup>29</sup> Inae nerichaain inara cairichaauruhane jaan cojoanonaa. Nii banate: ‘Caohatoriha canaanai sirilanaala nihacachene niqui,’ nariquicheein. <sup>30</sup> Nii banate ichatane ecuunooru rai, ‘Canacaanu ichoae neranuu,’ naa cuurureein cachaauru. Jana atane rarororooru raite, ‘Canacaanu asihu,’ naaurureein. <sup>31</sup> Coaracuche nachuhinti chatohanai baaso ichaain nenihanune sainejeein catohanein caetecuruhane. Nii jaun chatohanein teeinti inara teurureein inae amuhanune baiha,” nae jetao acaauru rai Jesoso.

<sup>32</sup> Nii Jesoso jiniichaain jetaote, coroatajaain necha aansai baaso icharaauru cachaauru amaure, sohin ateinanajaa-uruhane coina. <sup>33</sup> Inae nii “Couturi Bejero” neein acaau-ruhacha curuaateihu turuhin jetaote, coroso que Jesoso aina jiniiquiin nii coroatajai necha aansai baaso icharaauru teure. Leinjiin jetaote, Jesoso najaabiji nichajai que teure. Jana leecha jetaote, raotono nichajai que teure. <sup>34</sup> Nitohanein coroso que teuruhane jana jetaote:

“Caa catohaneein caetecuruhane coreniha, acaauru que ii suujua acateera Ofa, cha coitucuurenihane jaunte aihurera,” nae jetao Jesoso. Nii jana jetaote, ecu nejesinajejin ita rai Jesoso cajione chaluure soodarooru. <sup>35</sup> Nitohaneein teuruhane jana jetaote, ecu neein coarajeere cachaauru. Nii nainiha jetaote, cocoinanacaaihuri netonai:

“Chajaain aihane ena esinae rauhijiriin Cana Coaunera tenojoi Mesihaseenein niicha janijiineein nihane, raajenhane rai jaberoco ichoteratemiin leeochoaauru ichoteratihane rijijieeinte coaracaachera,” naaure jetao nechu jataain cairichaa in que ninichaaaja.

<sup>36</sup> Nii jana soodarooru netonai jetaote, Jesoso que ninichaa-jeein nechu jataain cairichaa rohan nichuutaacoaain jetao, bino elorajiojoaain nenea que jetao cocoaain:

<sup>37</sup> “Aihane esinae rauhijiriin Jorioocuru rai *Rey* neeine, ichaajenhane ijiabereeo ichoterateeune coaracaanura,” naaure jetao rai.

<sup>38</sup> Nitohaneein coroso que teein jetaote, rai bichoeniha teein jetao: “Caate Jorioocuru rai *Rey*neein ne,” naain laenacure.

<sup>39</sup> Nii jana nii necha aansaneein coroso que nenea cacha coroataja jetaote, nechu jataain cairichaa cotaiha jetao:

“Aihane esinae rauhijiriin Mesihaseeine, ichaajenhane ijiabereeo ichoterateeute coaracurumiin, chaen canacaanune maajeein ichoterateeune coaracaanura,” naane jana jetaote: <sup>40</sup> “Coo niritoha. Tana ichasetecarichaa in Cana Coaunerane coasiine. Itonai rijijieein caseteconein neeinatiinachura aitohte. <sup>41</sup> Canatejian esinae rauhijiriin itolereneein baaso ichacaane coreniha necairichaecaa cau. Jana caa cacha, nii chatohanai baaso ichaa in nihane coreniha caa aihei,” <sup>42</sup> naane baiha jetao:

“Canu coaucuhin ii Cojoanonaa que neeine banara Jesoso,” naa nii baaso icharaauru coroso que nenea leeochoane jana jetaote:

<sup>43</sup> “Eneete esinae rauhijiriin raotojoein ichaonaana jaun caniha neriquincha,” nae jetao rai Jesoso.

### *Oha Jesusone*

*(Mt 27.45-56; Mr 15.33-41; Jn 19.28-30)*

<sup>44</sup> Nitohaneein inae ohane rai niha Jesusone jana jetaote, enoto chujutora caje coaaneein jetao, caohachanainejeein nocoenanein nedae satiin chauratane, nuna macohi ichoae teejija enotonereetiaain.

<sup>45</sup> Nitohanihane jana jetaote, neleruhin nesoaihacoae nii Teenforo leruera cajione, ecu bujuaneein nenea.

<sup>46</sup> Nii jana jetaote, jataain tonijiaain auhaquuin jetao:

“Ti bijihune canu suujue teeunra Ofa,” naain jetao inae ohe Jesoso.

<sup>47</sup> Nii jana ecu beraiha nenacaauru Roma rai sondarooru cafitaun jetaote, Cana Coaunera corojeein jetao:

“Esinae rauhijiriinte, nii chatoanai baaso ichaain nenecaiha caa cachara,” nae jetao.

<sup>48</sup> Nitohanihane jana ecu satiin neein coarajeeurera cachaauru jetaote, nesoone caaun rai nalarijia faojaain jelai caje cauhacoaaure. <sup>49</sup> Nejetaote, satiin nii Jesoso coitucuureraauru, chaen Calileea caje coauneein sacuurera enecuru, naaonjoainuri jetao ecu neein coarajeeure jelai caje amuelanaala nita netiin.

*Ajeri jachu cuhane Jesoso jaberoco rucuhecuruhane*  
(Mt 27.57-61; Mr 15.42-47; Jn 19.38-42)

<sup>50-51</sup> Nii jana jetaote, ecu ne leinjiin cacha Jodea batane que nenea Arimatea cocoaichaneein nenea Jose. Aca jetaote, caohacha cachaneein, satiin Jorioocuru rai nelateein Jorioocuru coaraneen nenacaauru- *Junta Suprema* tabaneein nihane sainejeein, turuha uha Cana Coaunerane Cojoanonaane cohajihane jaun jetao, nitohaneein nii Jesoso teuruha nii rai leechoaauru *Junta Supremacurune* rautaaain coaraene. <sup>52</sup> Nii Jose jetaote, Filato caje Jesoso jaberoco bajaa cue, rucuhecane caina. <sup>53</sup> Nitohaneein bajaain jetaote, coroso caje fauhin jetao, shojoera que conajaain jetao, jaiti chuni onaa teurenihane jaan ichatane ramara que nenea ajeri jachu cuhane jetao rucuheca cuure. <sup>54</sup> Nitohaneein jetaote, inae nunuheneelalajiha nebetacanaa cojoanonaane jaun, inae niicha ichanenu ichana nainecuruhane nainejeein jetao, luhecaain nii Jesoso rucuhecure.

<sup>55</sup> Nitohaneein Jesoso jaberoco rucuheca cuuruhane jana jetaote, acaauru aina cuure Calileea caje coauneein jiniichaaun unacaauru enecuru. Nitohaneein cuhin jetaote, caohachaaun rai jaberoco rucuhecuruha ajeri jachu cuhanene coaracure. <sup>56</sup> Nitohaneein ajeri jachu cuhane rai jaberoco rucuhecuruhane jana caohachaaun coaracuruhane baiha jetaote, nenajaun cauhin jetao, meetoon rijijieein jujuaain nenea ichacuruhane nainaaun jetao, Quiricha inoensi cuhane aitoa Cana Coaunerane rijijieein, nebetacanaa cojoanonaa bana nebetacaure nii enecuru.

## 24

*Oo caje ichanaa Jesusone*  
(Mt 28.1-10; Mr 16.1-8; Jn 20.1-10)

<sup>1</sup> Nitohaneein nebetacaauruhane cojoanoo janohetiin jetaote, nii teeuruhane jaan ajeri jachu coaraa cuure nii acaauruhacha ichai jujui amaa'in nii enecuru. <sup>2</sup> Ecu turuhin coaracuruhane jana jetaote, elonano hi ne nii ajeri jachu fuuruhane jaa ajeri jaberoco. <sup>3</sup> Nii jana enohin coaracuruhane jana jetaote, inae ecu Cana Curuaanaa Jesoso jaberoco eruurene.

<sup>4</sup> Nii jaun jetaote, niicha ichanenu coitucuelanaala ne soonetooruhane jana jetao, somaratohanai que cajionequuin, ecu luhecotariin acaauru aina ecocohin temeenete coroatajai cacha. <sup>5</sup> Nii coaraain jetaote, nesoone caaun, suujua acatecuruhane coaratiha nenoracaauruhane jana jetao:

“Chanuna onacaauru jana, ichaohin nena ariiche inara. <sup>6</sup> Inae ichanaane jaun, coatiha cau nihei. Tana Calileea inara aina nihane bana inara rai: <sup>7</sup> ‘Acaihaniji cachaneein nejanohanaaneein nenaate, necha aansaneein ichaonacaauru rai tenojoinnein niha cureein. Nii janate coroso que teein ateinaa cuurureein. Nete nichata janohane cuhane ichanareein,’ narejetoha inara raine que nainaquicheneta,” naaure jetao ecu ecoonacaauru cachaauru.

<sup>8</sup> Niritocuruha acaauru raine que nainaan jetaote, acaauru rai aitoroatoha Jesusone coaacure. <sup>9</sup> Nitohaneein inae nainaan, nii atane bana caje jelaiha cauhin jetaote, jitariin nii acaauruhacha coarai biha jetao cuure lechoonca leinjiin afosotooru rai, chaen satiin acaauru aina nenacaauru cachaauru, naaonjoainuri rai. <sup>10</sup> Nitohaneein coaraain afosotooru rai biha cunacaauru jetaote, Maadala bene Mariha, chaen Joana, chaen Saantiaao neba Mariha, chaen leechoauru enecuru acaauru aina cunacaauru, naaonjoainurine. <sup>11</sup> Nitohaneein turuhin beeuruhane jana jetaote, acaauru esenetana jerecurene afosotooru. <sup>12</sup> Nejetaote, nii acaauru esenetaaurenihane sainejeein soroneein jeluhariin cuhin turuhin, nii atane bana cuhanai coaraa Fedorone jana jetao, nii conaacuruhane jaa shojoeraacha ecu codoheque. Nitohaneein shojoeraacha eruhane jaun jetaote, jataain cojoelatiin jelaiha nenaanjaun cauha cue Fedoro.

*Emaoso nese coero cuhane cuuruhane*  
(Mr 16.12-13)

<sup>13</sup> Nii bananeein jetaote, enoto chujutora rijuu fautaain amunaanaja itaanejeein nii Jerosaleen caje nena Emaoso neseu jetao, cuure coroatajai Jesoso aina nerelanacaauru. <sup>14</sup> Nitohaneein Jesoso ateinaauruhane que ereerejeein bero cuhane cuujeeuruhane jana jetaote, <sup>15</sup> jaiti que ereerejeeuruhane jana, acaauru rohan nichuutaain jetao, acaauru aina

bero cuhane cuujue Jesoso. <sup>16</sup> Nejetaote, acanihane coitucuurene, acanihane coitucuuruhane jereniha Jesosone jaun. <sup>17</sup> Nitohaneein jetaote, acaauru rai:

“Chaaquena bero cuhane ereerejeein cuujueeiche,” naa acaauru rai Jesosone jaun jetaote, ecu inaderatonanaain inacuhin jetao:

<sup>18</sup> “Ii netonai Jerosaleeun neeinatiinna: ‘Naaonjoain ichacuruha caa janonaacha cuhanera,’ naain coitucue-neeite,” naain tonoraa nii bero cuhane cujuenaa coroataja Cureeofasine jaun jetaote:

<sup>19</sup> “Chatohaneeuruhanaate aitohi,” naane jaun jetao:

“Nasarete cocoaicha Jesoso, satiin cachaauru notaracae nere que irihane naitoonjoan ichaain, itolere que laraajiin Cana Coauneraacha letoai *profetaneein* nihanatiinte <sup>20</sup> Romanocuru rai coulurujueeure saseredotecuru curu-anaacuru, chaen cana rai cocoinanacaihuri, naaonjoai-hunri, coroso que teein ateinaauruhane coina.

<sup>21</sup> Canacaanune niqui, cairichaerinojooineein neeuruha Israaeli cocoaicha nichaachene ichoteratihane cohajihacaanu. Nete inae nichata janoha nitohaneein ateinaauruhane saijieein, <sup>22</sup> canacaanu aina nenacaauru enecuru tabaauru, janonaa aonaain cuhin natane bana coaraa cuuruhane jana, <sup>23</sup> ecu Jesoso jaberoco eruurenihane jaun, jelaiha nenaana-jaun cauhin canacaanu rai been canacaanu socoinaare. Acaauru rai ecocohin jete: ‘ “Coatiha cau nihei Jesoso jaberoco, inae oo caje ichanaane jaunta,” naaunre anjeraauru,’ naain beure. <sup>24</sup> Niritocuruha turuhinne jaunte, canacaanu caje nenacaauru tabaauru netonai cuhin, nii atane bana coaraa cuure. Nii janate chuhisi, nii aitocuruha enecurune rijijieein, inae ecu nene Jesoso jaberoco. Niheichu nii Jesoso nihanatiin coaracuruhi,” nae jetao rai Cureeofasi.

<sup>25</sup> Niritohane jaun jetaote acaauru rai:

“Chanuna cha esenetana jerelanaala, nii aitocuruhalu *profetacurune* coacuhin esenetana jereneeiche. <sup>26</sup> Tana jauriaanejeein dedeeu cusihane ajiniha, catohaneein necairicharichaaain Mesihazine coitucuhicheneta,” naane baiha jetao, <sup>27</sup> Moisesa quiricha caje coauneein nunuhetein jetao, que aitiin laenacuruhalu *profetacurune* beebejeein jetao, acaauru rai ereereje Jesoso.

<sup>28</sup> Nitohaneein nii cuuruhane jaan, Emaoso neseu turuuru jana jetaote, rauhijiriin situujiha cunaa rijijieein cuujue Jesoso. <sup>29</sup> Nejetaote:

“Cauna canacaanu aina nesuruure. Inae jataain sohane jaun nocohejia natiin,” naain jetao chunaare. Nitohaneein

chunaaauruhane jaun jetaote, ecu acaauru aina nesurue Jesoso.

<sup>30</sup> Nitohaneein acaauru aina nesuruhin jetaote, lenonecuruhane coina nelauriaauruhane jana jetao, faa teberiaain Cana Coaunera bajaane baiha jetao, acaauru rai beeunebee-uneen te. <sup>31</sup> Nitohaneein faan tihane que nainain jetaote, Jesoso nihane coaraain acanihanee coitucuuruhane jana jetao, inae acaauru caje jianatoroain amue.

<sup>32</sup> Nitohaneein jianatoroain amuha acaauru cajene jana jetaote: ecu jelai nedaain ita rai nejesinajeein,

“Esinae rauhijiriin acanihanee jaun jiara bero cuhane uu-juuein, ereerejiha Cana Coaunera Quiricha inoansi quene jana, aca netoojoain naonae cana suujua cuhanaina,” naaure jetao ita rai.

<sup>33</sup> Niritocuruhane baiha jetaote, caeneenejelanaala jelaiha bero cuhane soroneein cuhin Jerosaleen, ita taojiaain neeu-ruha lechoonca leinjiin nenacaauru afosotooru aina acaauru leeochoaurune jaan cauha cuure. Inae nii Jerosaleen nenacaauru rene turuuruhane jana jetaote:

<sup>34</sup> “Esinae rauhijiriinte inae ichanae Cana Curuaanaara, Simoon raite inae ecocoera,” naain jetao acaauru rai beeure.

<sup>35</sup> Niritocuruha acaauru raine jana jetaote, bero cuhane acaauru rai netonai ecocohin acaauru aina cuujihane been, acaauru aina lenoneein faan teberiaain, Cana Coaunera bajaain acaauru rai tihane que nainacuruhane beeure jetao nii acaauru ajiniha netaojiaain nenacaauru rai, nii coroatajai-huri Emaoso coero cuhane cunacaauru.

*Aina nerelanacaauru rai ecooca Jesusone*

*(Mt 28.16-20; Mr 16.14-18; Jn 20.19-23)*

<sup>36</sup> Niritiin acaauru rai bero cuhane ecoocane que jaiti ereereecuruhane jana jetaote, luhecotariin acaauru cataaun neeoritiin:

“Raotojoein neeuche,” naa acaauru rai Jesusone jaun jetao: <sup>37</sup> “Rai corii jecha coaracure,” naauruhane jaun jetao jataain nesooneetooore. <sup>38</sup> Nitohaneein nesooneetooruhane jana jetaote:

“Chanuna jataain nesooneetohiche. Chanuna nainanacharanejeein, baasoneein inara suujua cuhane coaauquiche. <sup>39</sup> Cacoiiichuru, catihacuru, naaonjoaihunri coaracuchenachuhiti, jeelai cajabereeeoneeinte neeure caa cajabereeeocuru. Cajabereeo mucuhin cacoharaauche. Leinjiin onaa corii, caa cacoaraaichene tocoaneein bucuhin, jaberoconeein nichaauraain nena naineriheita,” nae jetao acaauru rai Jesoso.

<sup>40</sup> Niritiin jetaote, coroso que teein, rai tijia, biji, naaonjoain curuabaauruhane jaacuru coarate acaauru

que. <sup>41</sup> Nejetaote, jataain esenetana jerecurene, jataain cojoelatiin rachoojoeurhane jaun. Nitohaneeurhane jaun jetaote:

“Tana cau enohalanohineein niha cau chaelai lenone ni-jine,” naain acaauru caje bajaane jaun jetao,

<sup>42</sup> niha ate basichone jaun, rai teeurhane jaun jetao, <sup>43</sup> ecu acaauru notaracae netiin que lenone. <sup>44</sup> Nitohaneein lenoni-hane baiha jetaote acaauru rai:

“Caa catohaneein caetecuruhanene quene inara rai bere-jetoonlu, jaiti canu atinaaurenihane jana inara aina ni-hanune bana. Inae catoaneein caetecuruhanane coina, rai quiricha cuhane itolereenein caque aitiin laenaalu Moisesane nainaan, chaen aitiin quiricha cuhane laenacuruha *profetacuru*, Salmo naaonjoain cuhanene rijijieeine inae nainaan,” naa acaauru raine baiha, <sup>45</sup> Cana Coanera Quiricha inoansi cuhane aitoane rijijieein acaauru que coitucuherateein jetaote:

<sup>46</sup> “Laenanohineeinte ne, canu Mesihasi nichaaunne ohanune baiha, nichata janohane cuhane ichanacaaunne que. <sup>47</sup> Aihana jaun, canuhacha cocoinanohineein Jerosaleen caje nunuhetein, satiin atanecuru sacuritaain cachaauru rai, ‘Esinae rauhijiriinte, coreniha ichoteratenohineein nerichaacheein,’ naain beeuchete, nacoaauneein Cana Coanera coacuhin suujua coreein neeuruhine acaauru osa caje acaauru ichoteratiha Cana Coaneranane coina. <sup>48</sup> Inarate caa ohanune caje ichanacaaunne coaraneein neeiche. <sup>49</sup> Canune inara rai Ofa aitoonjoalu tereunni. Aihane jaun, jiaonriha caa Jerosaleen caje amuhiche, laraajiin neeichene jaanu dede caje unaa raaichene reitihaineta” nae jetao acaauru rai Jesoso.

*Dedeeu cauha cuha Jesusone*  
(Mr 16.19-20)

<sup>50</sup> Niritoha acaauru raine baiha jetaote, Jerosaleen caje amanajaain jetao, Betaniau turuanajaain, ecuun biji si-jirichaaain jetao acaauru cojiotae. <sup>51</sup> Nitohaneein acaauru cojiotaain coroaenaacane baiha jetao, inae dedeeu cauha cue, ecu acaauru ratiriin. <sup>52</sup> Nii jana jetaote, ecu Jesoso coroaecuruhanane baiha, jataain rachoojoein jelaiha Jerosaleun cauha cuure. <sup>53</sup> Nitohaneein cauhin jetaote, itolere bana Teenforo asae Cana Coanera coroaerejetecurelu.

## **Joaancha laenai** **Ena Nena Cana Coaunera Ere**

### *Cana Coaunera Ere*

<sup>1-2</sup> Jaurianejeeinte nena ne caa Erenaa.

Itolere, dede, cana rai chauratane, naajoain coaunaa Cana Coaunerane ajiinhate nelu caa Cana Coaunera Ere, jelai Cana Coauneranein.

<sup>3</sup> Nii jelai Erenaa quete itolere coauneratelu Cana Coaunera. Nihei nii colane necoanaain nei.

<sup>4</sup> Nii Erenaate ichaonaa teraneein ne.

Nii ichaonaa teerate, cacha cononeein ne. <sup>5</sup> Nii Erenaate, cononeein nocohena conaeranein ne. Jacatiasihei nocohena tabai.

Charijieein teinti cana rai chauratane conae caa enoto. Nii rijijieinte cacha suujua conae nii Erenaa. Amuritonaa nainesihei nocohena tabai.

<sup>6-9</sup> Inae chauratane que turuelalajia nii cono esine, satiin cachaauru conoaeranune janate, Joaan letoae Cana Coaunera, nii cono que ereerejeein cachaauru relaane, aonaain esenetaain coitucuuruhane caina.

<sup>10</sup> Nii Erenaa quete, chauratane coaunerate Cana Coaunera niqui. Nete caji chauratane que turuhane jana coitucuurene caa chauratane que nenacaauru, niicha counanohineein neeuruhane saijieein.

<sup>11</sup> Caa niicha counai chauratane que turuhane janate, que jaolequiin raurene cachaauru. <sup>12</sup> Nii janate, atiin raain esenetaaure coroatajajei cachaauru. Nii corenihate, calaohi raane rijijieein acaauru rae Cana Coaunera. <sup>13</sup> Joaereein cacha calaohi rijijieein nihei inae Cana Coaunera ere esenetaane cacha. Rauhijiriinte Cana Coaunera calaohi rijijieein nereein nii Erenaa esenetaane.

<sup>14</sup> Nii Erenaate, cachaneein nejanoain canacaanu aina ichoae. Nii jaunna aina amuemujueein coaracaanune jaun, leinjiin acaihanejeein Cana Coaunera Calahineein nihane coaracaanu canacaanu nota que, jerichanejeein Cana Coaunera rijijieein chabana nohanelanaala rauhijiriin canacaanu belaihana jaun. <sup>15</sup> Nii janate, turuha uhane jana: "Taa quenara aitonajacoonra, 'Canu caaijiete turuha ureein canu ajiniha nenaara,' naain aitonajacoon," nae Joaan, nii Erenaa cojoeluhin.

<sup>16</sup> Inetono janonaa banate, satiin cacha belain cana coroatajane nii Erenaa.



17 Moisesa quete rai naitoonjoan berateein laenaerateluniqui Cana Coaunera. Nete tonoraaurene cachaauru. Nii natiinte, atiin cachaauru belaiha ichaonaa rauhi que cachaauru relaane coina turue Cana Coaunera Calaohi Jesocurisito, nii cache relaana jaan ichaonaa rauhi raauruha cachaaurune coina. 18 Chabana Cana Coaunera coaracuruhi cachaauru niqui, nete inaca Cana Coaunera coitucuhane jaun, nii inaca que cana relae, acaihanejei Calahineein nihana jaun.

*Turuha urichain Jesocurisitone beebijiha Joaan- cacha coujunacaterane*

19 Joaan renete batirichuru letoaaure nii Jerosaleen nenaacauru bichauhenaauru: “Chaneeita,” naain Joaan caje bajaauruhane coina.

20 Inae Joaan rene turuhin bajaauruhane janate: “Curisito nihaunta,” naain rauhijiriin tonoranaaca Joanne jana:

21 “Chaneei najian. Cana Coaunera ere bera Eliasineeina,” naain coaiten bajaauruhane jana:

“Aca nihaunta,” naain coaitiin tonoranaaca Joanne jana:

“Aca neneeina jaun, chaneei najian. Nii turuha niicha jerecuri canacaanuhacha cohajei Cana Coaunera ere beranecaai,” naauruhane janate:

“Ahan- aihei, aca nihaunta,” naain tonoranaaca coaitenne jana:

22 “Chaneei najian. Beeinete ne, bihacaanu canacaanu letoaurera raine coina. Chatoanai icharaneei najian,” naain bajaauruhane jana:

23 “Canu quetjiaan, nerichaaian leinjiin cacha, cacha areeroo kuhin eeheehejeein cacha cotiaranura: ‘Turuha cana curaanaane jaan coero raujiauchera, naain beranura,’ naa Isaihasi najaan nichaaunra,” naain biha Joanne jana:

24-25 “Chanuna jana chaen, acau que cachaauru coujunacateei, nii canaacha cohajei Mesihasi neein, niheichu Eliasi neein, niheichu leecha Cana Coaunera ere bera- *profeta* neein, naaonjoainuri neein nenaalanaala,” naain bajaauruha nii fariseeocuru letonocurune janate:

26 “Acauhanau teenne canu, cachaauru coujunacatiha baotisanajaaun. Inae turuha urichaaian canu caaijie inaraacha coitucuhi cacha. 27 Canu caaijiete turuha ureein, nii inoaelu nena cacha- jataen canu amuritoeriin cocoinanacai,” naain acaauru rai be Joaan.

28 Nitohaneente, Jorodaan jeraniha nena Betabarau niha Joanne jana, Jerosaleen caje uhin Joaan rene turuhin bajaauruhane janate: “Canuna laen cacha areeroo eeheehejeein

cacha cotiaraneein neeunra,” naain acaauru rai be Joancha coujunacatera.

*Cana Coaunera carenero narejeen*

<sup>29</sup> Nii cojoanoote, tajia uujiha Cana Coaunera Calaohi Jesusone jana coariin: “Notara Cana Coaunera carenero narejeenta. Taate itolere caa chauratane que nenacaauru cachaauru caje osa itajeranu que oha cureeincha. <sup>30</sup> Taa quenara aitonajacoonra, ‘Canu caijiete turuha ureein nii canu ajiiniha nenea cacha,’ naain aitonajacoon. <sup>31</sup> Inae niqui inoaelu caje coauneein nesianiha niqui, nete caa caaijie turuha uhe. Canu netonaichu coitucuhaunlu jauriaa nejeein. Jianacoo cana mitaeraunu que Cana Coaunera letononeein nihane coitucuhaunlu. Nena laen inae ena coitucuun, carai biha caletoaerana jaun. Israaeli cocoaichacuru que coitucueratihanune coinata, carai beein caletoae caletoera. <sup>32-33</sup> Osa caje cana mitaeranu que letononeein nihane coitucuhaunlu niqui. Nena, ‘Leinjiin cacha choaae fauha uha serori rijijiein Cana Coaunera Suujuenete, Cana Coaunera Suujue que coujunacatihate aicheeincha,’ naain carai biha caletoaerana jaun, choaae fauha uha dede caje serori rijijieeine coaracaunna jaunna coitucuun. <sup>34</sup> Nii jaunna, ‘Acate Cana Coaunera Calaohi inecaihara,’ naaun, nitoanihane coaracaunna jaun,” naain be Joaan.

*Ichoaechania Jesoso Ere tonoraerauru*

<sup>35</sup> Nii cojoanoote jelaiha Betabarau coroatajai nere tonoraerauru Simoon Fedoro ocoala Aanderesi, chaen canu, naojoaain nihacaanu Joaan ainane jana, <sup>36</sup> situha uhe Cana Coaunera Calaohi Jesoso. Nii janate: “Taa Cana Coaunera carenero narejeen coaracuchera,” naain biha Joaan canacaanu raine jaun, <sup>37</sup> Cana Coaunera Calaohi Jesoso coariin caijie cuhacaanu. <sup>38</sup> Nitohaneein caaijie cuhacaanune janate, jaotoraain canacaanu coariin:

“Chate ichaquiche niriirijieeinta cachaauru,” naa Cana Coaunera Calaohi Jesoso canacaanu raine jana:

“Chute neei aita cacha relaera,” naacaanune jana:

<sup>39</sup> “Chajauchetejian coanicha,” naain canacaanu amaane jana, inae enuna macoijiu teejia enotone jaun, cuu aina sonafaacaanu.

<sup>40-41</sup> Nii baihate, nihana Simoon Fedoro ariha cue nii Aanderesi. Ariin, ruhin: “Inae canaacha cohajei jianacoon cana mitaeranu que- Cana Coaunera letono Curisito eruhacaanura,” naain nihana Simoon Fedoro rai biha cue Aanderesi.

<sup>42</sup> Nii baihate, Cana Coaunera Calaohi Jesoso rene, Simoon Fedoro turuaa uha Aanderesine jana, Simoon coariin:

“Jonasi calaohi Simoonnee niqiu, nete Fedoro nereein ichurujuara,” naain Fedoroneein curaate Cana Coaunera Calaohi Jesoso, aca laraajiin nere beraneein nerichaine coitucuhana jaun.

*Ferifi aina Natanaaeli cotihaca Cana Coaunera Calaohi Jesosone*

<sup>43-46</sup> Nii cojoanoote Calileea batane que cuna jaaun, Ferifi aina itaque tacauruhana jaun: “Caniha neeorihura,” nae Cana Coaunera Calaohi Jesoso, Ferifi rai.

Fedorooru nese Betesaaida caje unaa nii Ferifi netonai.

Niritiin cotihacane jaunte, Natanaaeli ariha cue Ferifi. Ariin, eruin: “Inae turuha nii Cana Coaunera Quiricha Inoaesi kuhane turuha uha niicha jerecuri eruhacaanura. Nii cacha- canacaanuhacha eruhite, Jose calaohi- Nasarete cocoaichanera,” naain biha Ferifi, Natanaaeli raine jana jetaote:

“Chaquete nelatere Nasarete cocoaichata,” naane jana jetaote:

“Chajaachaautejian coanicha,” naa Ferifine jaun, Ferifi jiniichaain uhin turuha uhe.

<sup>47</sup> Nii janate, inae rohan nichuuntaa Natanaaeline jana: “Nocoo inae uha Israeli cocoaicha esine- coritanacae lanaala nenaara,” naa Cana Coaunera Calaohi Jesosone janate:

<sup>48</sup> “Inasiinte cacoitucuhita. Cacoitucuhi inachute,” naane janate:

“Eejeen- aihanura. Ii cotihaca uha Ferifine ajinihanna inae ii coitucuun. Nii uheraneein curajaain enuha asaa neeine janana, ichoharajeeunra,” naane janate:

<sup>49</sup> “Iite Cana Coaunera Calahineein canacaanuacha cohajei Israeli curaanaa *Rey* neeicha cacha relaera,” naa Jesoso rai Natanaaeline jana:

<sup>50</sup> “Nii uhera asaa neeine coaracaunne que aitocoauenne najaanchana canu esenetaai. Inae jataain nii amuriteriin coariquincha. <sup>51</sup> Rauhijiriina aitoonra. Inae ne- joracaa dede bacuujuane janate inaraacha cohajei Cacha Calaohi nichaunne choae fauhin, jelaiha iniha cuuruha Cana Coaunera letonocuru aanjeraurune coariquincha,” nae Cana Coaunera Calaohi Jesoso.

## 2

*Nisirihatiha cachane beseta*

<sup>1</sup> Nii baihate nichata janohi catiariin Calileea batane que nena- Canaau neein curajain nena neseu ne nisirihatiha cachana jaan beseta.

Nii jaunte, cuu nii beseta bitoaa cue Cana Coaunera Calaohi Jesoso neba.

<sup>2</sup> Nii janate Cana Coaunera Calaohi Jesoso netonai cotihacure nii beseta que, aina nerelanacaauru aina cuhane coina.

<sup>3</sup> Nitohaneein inae nii beseta que neeuru jana jetaote, inae saa binone jana: “Inae nihei binota,” naain Jesoso rai biha nebana jaun:

<sup>4</sup> “Saan. Chanuna niriitohi caraite oma. Inasiina jaiti turuha canu amihaneeon nunuhetihanune jaan cojoinaca que ne coalanaala,” naa neba raine janate:

<sup>5</sup> “Chajaaincha naitoojoaancha ichacuchera,” nae nii cuu bino chaluurera rai Jesoso neba.

<sup>6-7</sup> Nii janate cuu ne Jorioocuru rai saotaneein baichaje tabaanaain- atane caje ichanohineein, Cana Coaunera notaracae biji culejeein itolere acaauru lenonecuru culejeein ratirihuruhana jaanu que jesinaaeca teeuruhana jaan.

Nii jaunte: “Caa cuhane acau raain teeuche nainecolijiaanaaincha,” nae Jesoso nii bino chaluurera rai.

Nii le baichajete baichaje seejoan cuhane coroata baichajihanaai curujuae.

Inae nii baichaje nainecolijiaanaain acau raain, teein beeuruhane janate: <sup>8</sup> “Soriin amaaain, taa beseta erora cocoanihura,” naa Jesusone jaun, soriin amaaain nii beseta erora cocoaee nii acau chaluurera.

<sup>9</sup> Nii janate Cana Coaunera Calaohi Jesusohacha rotoi nihane coitucuelanaala coe nii beseta erora. Acaihanejein nii acau raureraachate coitucuure.

Nii jaunte nii bino cohin aonaain: <sup>10</sup> “Raotoha caa bino,” naain, “Chajataauraa,” naain, nii ene ranaa jerera cotijiaain: “Raaotoha caa ii bino. Aihuruha leeochoaurune rijijieein, bino caohacha que nunueteen cana cocoaerate lanaalate aaita. Taoniin nunueniha canaacha coi amuritoeriinte raaotera,” nae nii beseta erora, nii ene ranaa jerera rai.

<sup>11</sup> Nitohaneeinte Calileea batane que nenea nese Canaau, binoneein jesinaaeca rotoe Jesoso, esinae Cana Coaunera letononeein nihane coitucuuruha cachaaurune coina.

Nii coaraaina, esentaacaanu aina nerelanaa nichaanune. Nitohaneein nunuheteinte, itolere cunaitenacaauru rautaaain, itolere ichae Cana Coaunera Calaohi Jesoso.

<sup>12</sup> Nii baihane Caferenaanon cuha Jesusone jana, corianiha cuhacaanu, nejeraauru, neba, aina nerelanaa nichaanune naaonjoaain, cuu neeorihacaanu inata janojoeine coina.

*Jerosaleen nenea Teenforo caje necoretenacaauru sitaa Cana Coaunera Calaohi Jesusone*

*(Mt 21.12-13; Mr 11.15-18; Lc 19.45-46)*

<sup>13</sup> Nii janate Jorioocuru beseta Fasocoa que turuelalajihana jaun, turuha cue Cana Coaunera Calaohi Jesoso.

(Fasocoa besetate bitohaure Jorioocuru ajelanaala, nii Teenforo asaae. Cairichaaerinajaain niha Egipto curaanaane caje jianacoo mitanajaa Cana Coaunera najaan- cojoanon-aaniha nii Fasocoa besetana jaunte, nitohaneein Fasocoa beseta cojoanonaa bana Teenforo asaae itataojiain Cana Coaunera corojeein bajaure Jorioocuru.)

<sup>14</sup> Nii janate Jerosaleeun nenea Cana Coaunera rai ita tao- jiauruhana jaan loreri inoaei- Teenforo asaae necoretiha neeure Jorioocuru, itolere baca, carenero, serori naaon- joain que. Nii janate ecu jelai teein ne cachaauru rai coriqui coreeurera. Niite acaauru coriqui choae laurujua laurujauruhane jana, <sup>15</sup> sicho coinori que rajirajinajaain, nii acaauru rai bacaauru, carenerocuru, naaonjoain aina curuataain, acaauru sitaain, nii coriqui coreeurera rai coriqui riariae atane choae. Acaauru coriqui rori raatiin sieitiin, <sup>16</sup> chujuhecoha nii serori que necoretenaane jana: “Naain caa serorichuru amaauchera. Coa caa Ofa Cana Coaunera loreri asaae necoretihachera,” naain sitanajae Cana Coaunera Calaohi Jesoso.

<sup>17</sup> Nii jaunte, “Jataain ii loreri beraihanunete ne,” naain aitosihalu Cana Coaunera Quiricha Inoaei cuhane nii canacaanuhacha cohajeine jaun, “Aca caara,” naain canacaanu suujua cuhane Jesoso coarajiacaanu aina nerelanaa nichaanune.

<sup>18</sup> Nii jaunte sitanajaa Jesusone jaun: “Chatohanai jana ichaain canacaanu notaareei jana, esinae Cana Coaunera letononeeine coitucuhacaanune coinata,” naain Jesoso caje bajaauruha Jorioocurune janate:

<sup>19</sup> “Caa Cana Coaunera loreri chamuhitiin jaohichenena, nichata janojoeincha cuhane michureeunni nacoaaunein- cha,” naane janate:

<sup>20</sup> “Inasiinte jenachoonca saota jaanacaain ichacuruhalu jetao natiin, iicha nichata janojoeincha cuhane michureeita,” naaure Joriocuru Jesoso rai.

<sup>21</sup> Rai jaberocohacha quete aite, nii Cana Coaunera loreri que ujuaitteen. Nii jaunte nichata janojoein ichanae Jesuso- oo caje. <sup>22</sup> Nii jaunte nichata janojoein ichanaane coaracaan- une jaun, inae jauriaa aitosihana jaun, canacaanu suujua neeoritohana jaun, nii aitoha Jesusone esenetacaanu, Cana Coaunera Quiricha Inoaei cuhane aitohana jaun.

### *Satiin cacha suujua coitucuha Jesusone*

<sup>23</sup> Fasocoa bana cuu Jerosaleeun neein, bacosacuru, maosacuru, urichosae, naajoaunri rautaane coaraante,

Cana Coaunera Calaohi Jesoso esenetaacooaure arajii cachaauru. <sup>24</sup> Nete, “Naaajoaainte chuhisi, esinae rauhijiriin quesenetaurureeinja,” naene Jesoso, acaauru suujua coitucuhana jaun. <sup>25</sup> “Naaajoaunruha caa cachaaurura,” naain biha chuneine que airijiinte, cacha suujua coitucuhana jaun, sanein esenetanjaene Cana Coaunera Calaohi Jesoso.

### 3

#### *Jesoso rene turuha Necodemone*

(Niha lelauriin Jorioocuru fariseeo neein curuajaain. Ni-ichurute, “Acaauruhachajete jataain leeochoaauru amuritoheriin Cana Coaunera ere tonoraare,” naaure.)

<sup>1</sup> Leinjiin fariseeo Necodemo neein curajaain nenaate nii lelauriin Jorioocuru bichauhenaneein ne, acaauru rai jataain nelateineein. <sup>2</sup> Niite janotiin Cana Coaunera Calaohi Jesoso rene turuha uhe. Turuhinte:

“Eletoaa Cana Coaunerane coitucuhacaanura. Iite itolere bacosacuru aina cunaitenacaauru rautaeraneein neeicha. Nitohanai ichana nainiheijelai cacha Cana Coaunera colaneta, cacha relaera,” naa Necodemone janate:

<sup>3</sup> “Esinaena rauhijiriin aitoreeunni. Enacooauneein nejanoaeniha cachane, Cana Coaunera aina jiniiquiin nenaanainiheijelai” naa Jesusone jaunte:

<sup>4</sup> “Inasiina enacooauneein nejanoare ichauhena. Inasiinte coaiten neba suuri cuhane neloroaain nejanoare ichauhena,” naa Necodemone janate:

<sup>5</sup> “Esinaena rauhijiriin aitoon. Nihei acau nejei, Cana Coaunera Suujue naojoain que coujunacatenoineniha cachane, Cana Coaunera Ere tonoraeraneein nenaanainiheijelai cacha. <sup>6</sup> Jana, cacha caje nejanoanaate-jelai cachaneeinne. Jana, suujua culejeein caruruhin coriha Cana Coauneranete, Cana Coaunera cachaneein ne. Colane aihei. <sup>7</sup> Cana Coaunera Calaohi coitucuhin esenetaain nere tonorana jereraaurute nejanoaain Cana Coaunera cachaneein nereein. Coaa caa ichei caritocooaunne cojoaelatiincha caenein aonajiha,” naa Jesoso, Necodemo rai. <sup>8</sup> Niritiinte, “Charijieein teeinti tiririjiin uha cujuanane, ‘Naaajoain cajete uhera,’ naain coitucuneei. Niheichu ‘Cuute cuera,’ naain coitucuheneei. Nii rijijieein techu, ‘Naojoainte cacha rai ichaonaa te Cana Coaunera Suujue,’ naain coitucuneeicha,” naa Jesusone janate:

<sup>9</sup> “Chatohanihana,” naa Necodemone janate:

<sup>10</sup> “Jataain Israeli cocoaicha relaeraneei inatiin, ta carihanai coitucuhine. <sup>11</sup> Esinaena rauhijiriin aitocooanu, canacaanu nota que coaracaanune jaun. Nete, aitocooanune

esenetaeneeichera. <sup>12</sup> Caa cana rai chauratane que aito-coaunne esentaeneeine, chatohaneein jana dedeeu ichaonaa bihanune esenetareei.

<sup>13</sup> Nihei chunei dedeeu iniin coaara. Canuna laaen dedeeu nihanune caje uhin cau turuun cachaneein, itolere caa chauratane que nena cache rijijieein nihanune coina. Canuna Cache Calaoheinein inaraacha cohajeineein neeun. <sup>14</sup> Charijieein teinti, coata caje acano ichaain, enuha que nujuateein chujuraa Moisesane coitucuhi chachu natiin. Nii rijijieein techu, enuha que nujuateein Cache Calaohi nichaunne chujuraa cuurureein, <sup>15</sup> nitajenaachara nejeein nena ichaonaa raa quesenetaerane coina,” naain,

*Chauratane que nenacaauru belaitoha Cana Coaunerane*

<sup>16</sup> “Jataain caa chauratane que nenacaauru cachaauru belaitoha Cana Coaunerana jaunte, acaihanejein calaohi nichaaunne letoae caa chauratane que Cana Coaunera, nitajenaachara nejeein niha quesenetaain cacoitucuurera cachaaurune coina. <sup>17</sup> Coatih cache casetecaanune coina calaohi nichaaunne letoaai Cana Coaunera. Jianacoo osa caje cache mitaanune cointate, cau calaohi nichaaunne letoae Cana Coaunera.

<sup>18</sup> Nii Cana Coaunera Calaohi nichaaunne esenetaa cachane, caseteco coarinaain. Jana Cana Coaunera Calaohi nichaaunne esenetaate, caseteconein niha cureein, acaihanejein Cana Coaunera Calaohi nichaaunne esenetaenihana jaun.

<sup>19</sup> Cono rijijieeinne turuun caa chauratane que Cana Coaunera Calaohi nichaaunne, cache conaeranu que niqui. Nete nii cono jerecurene nii Cana Coaunera Calaohi nichaaunne esenetaauruhi cachaauru. Acaihanejein nocohena janaachate nena jerecure, nocohenaanau neein suujua coaraelanaala baaso ichacuruhane coina. Nii corenihate caseteconein neeurureein. <sup>20</sup> Baaso ichacuruhane coaracuruhane coataate, cono rohan nichuuntanaa jerecurene saain nii baasoneein nenacaauru cachaauru. <sup>21</sup> Jana caohachaain ichaauruhanete, cono rohan nichuuntaaure, Cana Coaunera jerenohin ichacuruhane coaracuruhane coina,” naainte Necodemo rai aite Cana Coaunera Calaohi Jesoso raaje neque.

*Enacoauneeinte Jesoso que ereereje Joaan- Cache Coujunacatera*

<sup>22</sup> Nii baihate Jodea batane que cue Cana Coaunera Calaohi Jesoso, aina nerelanaa nichaanune aina, cuu inata janojoei nejeein neoriin, acauhanau cachaauru tein coujunacatenajaain baotisanajaane coina. <sup>23</sup> Nii janate, Salim rohan nena Enoon, cachaauru coujunacatiha ne Joaan, cuu niha

tabaain acauna jaun. Nii janate cuu turuhajeeure cachaauru, acauhanau teein coujunacatenajaa baotisanajaa Joanne coina.

<sup>24-26</sup> Inae Joaan enoaene lalajeeuruha caresero cuhane janate, acauhanau teein cachaauru coujunacateein baotisa Jesosone jaun, ita cotaicha rijitocure Joaan ere tonoraa- era, leinjiin Joroo aina. Nii baihate Joaan rene turuhin: “ ‘Cha,’ naau. Taolu ii aina Jorodaan jeraniha nenaalu leinjiin cacha canacaanu rai iicha beebjeilute, enene acauhanau teein cachaauru coujunacateein baotisanajaa ne. Saainte inae aca ere tonoraaure,” naauruha Joaan rai nere tonoraa- rerane janate:

<sup>27-28</sup> “Saan. Jeriha Cana Coaunerane jaunte aihure. Inae inara rai rauhijiriin aitonajaaocaaun, ‘Coatiha Curisito ni- haun,’ nanajaaocaaun. Canute letoae Cana Coaunera nii beraanu que. <sup>29</sup> Charijieein teeinti, inae comasai raa cachane coroaje rai belaicha. Nii rijijieein inachu canu netonai coroajeun, Cana Coaunera Calaohi Jesoso ere tonoraa- ruha cachaaurune. <sup>30</sup> Aca ere tejian tonoraa cuurureein cachaauru, jelaichoae jauhecotojoeriin. Jana canu erete tonoraa cuurureein fautojoeriin. <sup>31</sup> Nii dede caje unaate, itol- ere cacha curuaanaa neein ne. Jana chauratane que nena cachate, niicha coaraaicha coitucujue. Jana aihei dede caje unaa. Itolere dedeeu nena, itolere caa chauratane que ne- nacaauru, naojoainte coaraain coitucue. <sup>32</sup> Acate itolere ni- icha coarai coaraain be niqui, nete esenetaaurene caa chau- ratane que nenacaauru. <sup>33-34</sup> Jana esenetaa cachanete, esinae rauhijiriin aitoaha Cana Coaunerane coitucuha cureein, je- lai Cana Coaunera Suujue que suujuecoha Cana Coaunera Calaohi Jesosone jaun.

<sup>35</sup> Cana Coaunerate, nii letono calaohi belaitohana jaun, itolere cacha curuaanaa nihane coina cocoainae. <sup>36</sup> Nii jaunte Cana Coaunera Calaohi esenetaera, nirijijieein nitaje- naachara nejeein nena ichaonaa raa cureein. Jana, nii Cana Coaunera Calaohi esenetaite nitajiha cureein Cana Coaunera casetecanohi neein,” nae Joaan- Cacha Coujunacatera, nere tonoraaurera rai. Nitohanihalu inae Joaan enoaene lalajeeu- ruha caresero cuhane rai.

## 4

### *Samaria bene rai iriha Jesosone*

<sup>1</sup> Joaan cacha coujunacatera ere tonoraauruhane amurito- heriinte, Jesoso ere tonoraaure arajii cachaauru. Chaen “Aca jete, Joaan amuritoheriin acauhanau teein cachaauru cou- junacateein baotisanajae.” naain coitucure fariseeocuru. <sup>2</sup> (Coatiha aca, acauhanau teein cachaauru coujunacateein



baotisanajaai. Acaihanejein canacaanu aina nerelanaa nichaanunechana acauhanauteein cachaauru coujunacateein baotisanajaacaanu.) <sup>3</sup> Nii jaunte nii coitucuhin, Jodea batane caje mituhin, Calileea cauha cue Cana Coaunera Calaohi Jesoso.

<sup>4-5</sup> Nii Calileea batane que turuhane coina, nii Samaria batane choae situhin, Sicaraneein curuajaain nenea neseu turue Jesoso, calaohi Jose rai Jacoboacha tei atane rohan.

<sup>6</sup> Nii jaunte cuu niha atane jachu ucuaatiin acau mitunajaan Jacobo curuaa siriina jaun, enoto chujutaae lalajeiin rijiuc eu lauturoaain lauhecoha Jesusone tonohanaune, <sup>7-8</sup> nii nese Sicarau, lenone coretiha cuhacaanu saain.

Nii jana jetaote canacaanu caaijie tocoriin tajiha acau raa uhe leinjiin Samaria bene.

Nii jaun jetaote: “Caisichuche nii ii acau quera,” naain acau bajaa Jesusone jana jetaote:

<sup>9</sup> “Chanuna Joriooneeinche natiin, cacaje acau bajaaiiche, Samaria beneneein nihanuche natiin,” nae jetao nii Samaria bene Jesoso rai, Samaria cocoaiachacuru aina ita belai-hurenihia Jorioocuruna jaun.

<sup>10</sup> Nii jaun jetaote: “Ichei Cana Coauneraacha tenaa jerei coitucuhin, canu nichaanne coitucuhin cacaje laaen bajaaiichene jana nihanena laaen, canu cocoirenachara nejeiin niha cacha najaan acau ichaonaa tera tereenche icheicha,” naa Cana Coaunera Calaohi Jesusone jana jetaote:

<sup>11</sup> “Chaquena acau soriin rariquiche, raina jaannu siriijeequichene coalanaalata. Ucuhatohache caa atane jachu natiinta. Cha cajete ichaonaa tera acau tereiche caraita.

<sup>12</sup> Canacaanu foeratera inoasi Jacobohacha ratirineein nihache caa atane jachu natiinta. Caje raain niha nete acau corejetecurehelu Jacobo calaohichuru, rai nirihuru, naajoaihunrichera. Iina amurijiriin nenea jereeichete,” naa Samaria benene jana jetaote:

<sup>13</sup> “Satiin caa caje acau raain cooerate, jerichanejeiin enacoaaneein cocoiriha cureeinchera. <sup>14</sup> Jana, canuhacha tei acau coha cachanete, coaiten enacoaaneein cocoirenereinchera. Quiicha tei acaute, cacha suujua cuhane marohemarohereein, cacha rai nitajenaachara nejeiin nenea ichaonaa teranu quera,” naa Jesusone jana jetaote:

<sup>15</sup> “Saan. Carai aihane nii acau uhauche coaiten cooirichaaunchene coataara, enacoaaneein coaiten acau raanuchene coataara,” naane jana jetaote:

<sup>16</sup> “Ii sinijiera cotihachanihuchera,” naa Jesusone jana jetaote:

<sup>17</sup> “Niheiche casinejerata,” naane jana jetao:

“Esinaete chuhisi, rauhijiriin niicha que aitocoichera. <sup>18</sup> Jauriaate niqiu saouquin sinijieraouquichelura. Chaeen nii ena ii aina nenaate rauhijiriin isinejera neein nenecheta,” naa Jesusone jaun jetaote:

<sup>19</sup> “Cana Coanera Ere beraneeina ichoaraaunchera. <sup>20</sup> Caa atane ucuuno quete Cana Coanera bajaebajaerae-toorechelu canacaanu foeratera inoasihuruchera. Jana inara Joriooneeichenete, naain Jerosaleeun cuhin Cana Coanera bajaebajaecaanune jerequichelura,” naa nii Samaria benene jana jetao:

<sup>21</sup> “Quesenetaauchera. Inae ichuunnejeeonria caa atane ucuuno que uhichene laatelanaala, nii Jerosaleeun cuhichene laatelanaala, chunijiu niha natiin Cana Coanera bajaebajaequichenera. <sup>22</sup> Samaria cocoaicha neeichene, coatiha nii inaraacha bajaebajajei coitucuujuueein aitoheeiche. Jana canacaanu Jorioo nichaanunena nii canacaanuhacha bajaebajajei coitucuhin laaen aitocooanuche, Jorioocuru caje ecoona nihache nii jianacoon cacha mitaerane jaun. <sup>23</sup> Enene caje coauneein, caa atane ucuuno que unaa laatelanaala, nii Jerosaleeun cunaa laatelanaala, rauhijiriin suujua cuhane Cana Coanera bajaauruhineche nere tonoraerauru esineeuuru. Nitohaneeinte jereche Cana Coanera, <sup>24</sup> suujue nejeesiha nijihachena jaun,” naa Jesusone jana jetaote:

<sup>25</sup> “Raotojoeina turuha urichain Cana Coanera letono Curisitone coitucunche. Acate laen cana relaa ureeinche itolere que,” naa nii enene jana jetaote:

<sup>26</sup> “Saan. Canuna acaneein caa ichei aitoonchera,” nae jetao Cana Coanera Calaohi Jesuso.

<sup>27</sup> Nii janana eruhacaanu aina nerelanaa nichaanune, nii ene aina ereeree jana. Nii natiine, “Chaquena ereereequiche,” naain bajanaa nainenihacaanu, jataain cana curuaanaa nihane jaun.

<sup>28</sup> Nii jaunte cuu baichaje ratiriin, canacaanu que janoriin naain neseu biha cue nii Samaria bene. <sup>29</sup> Inae neseu turuhin jetaote: “Chajaauchete, taa leinjiin cacha coaraera. Acate naajoaain itolere ichacaunne que aite caraicha. Jerihane acate Cana Coanera Letono Curisito necaihara,” naa nii neseu nenacaauru rai turuhinna jaun <sup>30</sup> tajiha jiniichaain uhin, nii ratiriha najaun turuhin coaraa uure.

<sup>31</sup> Nii tonohanauna jaiti uujeeuuru jana: “Chaelainejein quiorihura,” naain lenonihane coina counujichaanune janate:

<sup>32</sup> “Niha caleeonne inaraacha coitucuhine lanaalara,” naa Jesusone jaun:

33 “Jerihane chunicohanejeinte coroaatecaihara,” naacaanu itaraine janate:

34 “Lenoneein inara suujua nunaachene rijjijeeina, casuujua nunaau caletoaera amihaneon ichaain jitaanune. Acate caleonne nera. <sup>35-38</sup>Inoaelu nere bera que catohaneein turuhanune beratihana Cana Coaunera jaun, turuhanune cohajeein neuruha cau nenacaauru cachaaaurune jaunna inara letoareeunni, inae turuhanune beebejeeichene esenetauruhane, nitajenaachara nejeein nenea ichaonaa raauruhane coina,” naa Cana Coaunera Calaohi Jesoso, aina nere-lanaa nimaanune rai.

39 Nii neseu turuhin niriitiin cachaauru rai beein, “Naajoain itolere ichacaunne quete aitera,” naa nii enene jaun jetaote esenetaaure arajiin nii Samaria cocoaichacuru. <sup>40</sup>Nitohaneein Cana Coaunera Calaohi Jesoso rene turuhin: “Canacaanu aina neorihura,” naauruhana jaun, acauru aina coroata janojoein neorihacaanuna jaun, <sup>41</sup>jataain jelai amuritoheriin esenetaacoaure, nujuaae caje raaje aitohane jaun.

<sup>42</sup>Nitohaneente nii jauriaanejeein Jesoso aina erenaa Samaria bene rai: “Ii cajena aasaariin coitucuhin esenetaaanuchelu. Inae laaen enene esenetacaanuche jataain nujuaae caje raaje aitohane aonacaanuchene jaun. Acate Curisitonechera. Acate caa chauratane que nenacaauru itolere cachaauru jianacoon mitaera nechera,” naaure nii ene rai.

*Jorioocuru curuaanaacuru curuaanaa rey rai cocoainanacainein nenea calaohi rautaa Jesusone*

<sup>43</sup>Coroata janohin Samaria batane que nihane baihate, caje amuhin naain Calileea batane que cue Cana Coaunera Calaohi Jesoso. <sup>44</sup>“Naajoainte Cana Coaunera Letononeein nera,” naain caohachaain coitucuhin, belaaain, raauener-ichaain naraaichurune coitucuha raotojoein inatiinte, atiin Calileea cauha cue Jesoso.

<sup>45</sup>Inae Calileea turuhacaanune janate, caohatiin Jesoso raauere jelai batane que ichaonacaauru. Jaurianejeein Jerosaleeun Fasocaa bitoauruhane jana cuu itolere ichaa Jesusone coaracuruhane jaunte caohatiin raauere.

<sup>46-47</sup>Nii jaunte Calileea nenea nese- Canaau turuha cue Cana Coaunera Calaohi Jesoso, nii jauriaanejeein bino neein jeesinaaeca rotoha najaun.

Nii janate coitucuriin coaraa uhe Jorioocuru curuaanaacuru curuaanaa *rey* rai cocoainanacainein nenea, cunaitiha calaohina jaun que rauteratihane coina.

Tajiha turuhinte: “Atiin canenajau Caferenaanon turuha uute carai canaanai rautaaicha,” naa nii cocoinanacaine jana:

<sup>48</sup> “Saan. Chatohanai coaraeneeiche inara nota quene, cha esenetaheeiche,” naane janate:

<sup>49</sup> “Chajaaajoaau atiin osiha carai canaanaine ajiinihara curuaanaa,” naane janate:

<sup>50</sup> “Chajaaincha chaque tonajelanaala caunihu. Inae nerautaa ii rai canaanaicha,” naa Jesusone jaun, esenetaain cauha cue.

<sup>51</sup> Nii jana jetaote, inae turuhelalajeein cuujihane jana jetao, tajiha que tacaain: “Inae nerautaa ii calaohicha,” naauruha que tacaain cachaaurune jaun jetao:

<sup>52</sup> “Chu teejia enotone jana nejelajaain nerautaeta,” naain bajaane jana jetaote:

“Raca enoto cafetaainte nejelajaain nerautaera,” naaurua najaun jetaote:

<sup>53</sup> “Nii rijiute chujian aite carai Jesusora,” naain jetao, nii caje coauneen jetao Cana Coanera Calaohi Jesuso esenetaaure saain, sinijiera, bereecuru, naajoain aina jiniiquiin.

<sup>54</sup> Nii quete coroata saain coitucuuruha cachaaurune coina niicha ichai ichae Cana Coanera Calaohi Jesuso, Jodea caje Calilea nenea neseu turuna jaun.

## 5

### *Jiurona rautaa Cana Coanera Calaohi Jesusone*

<sup>1</sup> Nii baihate Jerosaleeun cauha cue Jesuso, Jorioocuru beseta bitoane coina.

<sup>2</sup> Nii Jerosaleeunte, carenero bacuujuaneein curuajaain nenea acuujuua rohan ne Beteseta neen curuajaain acau netaojia najaan. <sup>3</sup> Ecute saouquin niha lohanarine jana nasaae daraacoore arajiin cunaitenacaauru, maosacuru, bacosacuru, neluhinaauru, jiuronacaauru, niichuru daraaque nerurujuaa nii acau netaojiane cohaca. <sup>4</sup> Nii acau netaojia jetaote, tabaque nichoae fauha Cana Coanera Letonone, nerurujuae nii acau. Nitohaneein nerurujuaane jana, ichoaaichaniha cuhane fai cunaitenaa jetaote nerautae.

<sup>5</sup> Cuute ne leinjiin cacha, nichatachoonca fosa jaanacain cunaaicha aina nei. <sup>6</sup> Niite tocoecohane jana coarae Cana Coanera Calaohi Jesuso. Coaraane jana, inae nitohaneein carajaain cunai aina nihana jaunte, rai: “Nerautanaa jereeina,” naain caje bajaa Jesusone janate:

<sup>7</sup> “Eejeen, aihanu niquicha. Nete nene caa acau netaojianaja cuhane canu faeraanura. Faunaa jerichaaunne naineeinte, canu ichoaechaniha faaure leeochoaurura,” naa nii cunaitenaane janate:

<sup>8</sup> “Saan. Chajaain nimichuhin chela seriin amuute coara-caara,” naa Jesusone janate, <sup>9</sup> nii rijieeoritiin caoachanaine-jeein nerautaain, nela seriin nichaaurain jelai caje amue nii cunaitenaa.

Nii janate nebetacanaa janonaa bana nitohanai ichaane jaun, coaraain: <sup>10</sup> “Ta cocoaeraa chelai baijiera enenene coitucuhinete, nebetacanaa cojoanonaa nihane saijieein anajiin baijiaai,” naauruha rai Jorioocurune janate:

<sup>11</sup> “Aihanu niqiu, nete caletoe canu cunai caje carautaera,” naane jana:

<sup>12</sup> “Chate nii nitohanai ichaaine coina eletoaeta,” naain niqiu bajaauruhane jana <sup>13</sup> coitucue, arajii cache jana nitajeoriha Jesusone jaun.

<sup>14</sup> Nii baihate nii Jerosaleeun nenea ita taojiaain Cana Coaunera bajaauruha Joriocuru najaan Teenforo asaae eruhin:

“Aonaau, inae laen nerautaicha. Nijiaonria coaiten naosatenaa coaquine. Coaiteeinete jelai amuritoeriin coaraa curiquincha,” naa Jesuso raine jaunte, <sup>15</sup> Jorioocuru rai biha cue:

“Acate carautaera,” naain. <sup>16</sup> Nii jaunte Jesuso aina nejera-teen, jataain sohin jaonaa jerecure Jorioocuru, nitohanein nebetacanaa janonaa bana cache rautaana jaun.

<sup>17</sup> Nii jaunte: “Joanreein bana amianiha Ofana jaunna, jerichanejeein ichaauru,” nae Cana Coaunera Calaohi Jesuso.

<sup>18</sup> Niritoha Jesusone jaunte, jataain jelaichoaae jauhecotojoeriin aina obajeein sohin jaonaa jerecure. Chaen nebetacanaa janonaa que aitocuruhane tonoraelanaala, “Cana Coaunera Calaohi nihane jaun jete, ichaa Cana Coaunerane rijijieein ichae,” naane corenihane maajeein jataain rautaaurene Jorioocuru.

*Rai inaca Cana Coaunera cocoaianohinein niha Cana Coaunera Calaohine*

<sup>19</sup> Nii jaunte: “Esinaena rauhijiriin aitoreunni inara rai, Coatiha casuujua caje coaunein quiicha jerei ichana nainihaun, Cana Coaunera Calaohi nichaun natiin. Acaihanejein Ofaacha jerenohichana ichaauru. Itolere Ofaacha ichaichana ichaauru canu netonai. <sup>20</sup> Cacoelaiha Ofa Cana Coaunerana jaunte, itolere niicha ichai que canotajae. Chaaen techu jeelai choae jauhecotojoeriin cague itolere ichaain inara notaarati-hane, nii cojoaelatiin coaraa curiquicheein. <sup>21</sup> Onacaauru ichateein acaauru rai ichaonaa tiha Ofa Cana Coaunerana jaunna, canu netonai quiicha belaihuri ichateein acaauru rai ichaonaa teeun. <sup>22</sup> Chabana cache coujuhin coaraai Ofa Cana Coaunera. Coatiha ichana nainenihane caun aihei. Nii

jaunte canu cocoainaan caletoea cacha coujuhin coaraaun-  
nuque, <sup>23</sup> chaen rijijieein jataain curuaanaa neein nihanune  
coitucuhin, rai nere tonoraauruhane rijijieein quere netonai  
tonoraauruhane coina. Cha teeinti quere tonoraene, niite  
caletoaera Ofa ere tonoraenereein.

<sup>24</sup> Caletoaera ere esenetaain, quere tonoraain naajoain  
neeichenena inara coujuhin inara coaraelanaala rauhijiriin  
nitajenaachara nejeein nena ichaonaa tereenni inara rai,  
jaoleneein neeichene coataa. Esinaena rauhijiriin aitoon.

<sup>25</sup> Enene caje coauneeinte Cana Coaunera Calaohineein ni-  
hanune ere aonacuruha Cana Coaunera coitucuhi cachaau-  
rune jana, quere tonoraauruhane, acauru suujua coriha  
cureein Cana Coaunera. <sup>26</sup> Raajenihane ichaonaa nita-  
jenaachara nejeein nena ichaonaa teraneein niha Ofa  
Cana Coaunerana jaunna, jerichanejeein rijijieein nena rai  
calaohi nichaunna jaun canu netonai nitajenaachara ne-  
jeein nena ichaonaa teeun. <sup>27</sup> Inaraacha cohajei- cacha  
calaohi nichaanne cocoainainte caletoea, caohachaain  
ichaaoruhane coaraain baasoneein ichaonacaauru ichao ru-  
cueranu que. <sup>28</sup> Coaa caa aitocoanne cojoelatohache.  
Inae cojoinaca que turuhane banate, rai nere aonacu-  
rureein. <sup>29</sup> Nii banate natane bana caje mituurureein satiin  
onacaauru, caoacha icharaauru nitajenaachara nejeein ne-  
naa ichaonaa raauruhane jana, baaso icharaaurute caseteco  
coaraa cuurureein.

<sup>30</sup> Coatiha casuujua caje coauneein cacha coujuhin coara-  
haaun. Aitiin caletoa Ofae rijijieeina rauhijiriin cacha  
coujuhin coaraaun.

<sup>31</sup> 'Cana Coaunera Calaohi nichaunra,' naain irihanu caraa-  
jenianene caohacharihei. <sup>32-33</sup> Inae Joaan caje bajaerateich-  
ene jana, rauhijiriin inara rai bihalu Joaan. Aihana jaun,  
esenetaaichenete caohachae, Cana Coaunera ere beraneein  
niha Joanne coitucuichene jaun.

<sup>34</sup> Esinaete rauhijiriinte caque aite Joaan- acauhanau teein  
cachaauru coujunacateein baotisaera, caje bajaachene jana  
niqui, nena cacha aitothane lateneen. Jianacoon mituhin  
neeiche osa cajene jerena caaunna, caa niritiin aitoon.

<sup>35</sup> Aca aiha leinjiin conone rijijieein niha Joanne jaunte  
niqui, corojeein neeichelu basiijiin reentiarin. <sup>36</sup> Chaen  
techu, 'Acate canaacha cohajeinera,' naain inara rai biha  
rauhijiriin Joanne choae tacaain techu niqui, inara nota  
que itolere ichacaanne coaraquiche. Nii quicha ichaina  
ichaaun, esinae rauhijiriin caletoa Ofa Cana Coaunerane  
coitucuhichene coina.

<sup>37-40</sup> Chariji bana Cana Inaca Cana Coaunera coaraain nere aonaheeiche niqui. Nete, nere bera inoaesihuru que catohaneein turuhanune berateein laenaeratihalu Cana Inaca na-jaan que nerelaache niqui, caje ichaonaa nitajenaachara nejeein nena raaichene coina. Nete nii aitohane rijijieein caletoaa Cana Inacane esenetaeneeichene jaun raenereicheein.

<sup>41</sup> Nii jaunna caque tacaain canu corojeein caraaichene jereneeun. <sup>42</sup> Chaaen nachu raotojoein Cana Coaunera jereein, nere tonoraain neneeichene coitucuun.

<sup>43</sup> Cana Inaca Cana Coaunerate niqui caletoae. Nete, caohachaaain caranaa jereneeiche. Jana inara rene turuhin, 'Canuna Cana Coaunera letono neeunra,' naa inara rene turuhin Cana Coaunera letono niheinete laen caohachaaain rariquiche.

<sup>44</sup> Cana Coaunera coacuelanaala itaacha corojeein, 'Iite caohati cachaneein neeicha,' naain neeichene jaunte, quesenetana naineneeiche.

<sup>45</sup> Coatiha Ofa rai inara coulurujuenaa coauhaaun canu. Nii Moisesa inaraacha esenetaite laen Cana Coaunera rai inara colurujuereein. <sup>46</sup> Moisesa aitojoan esenetaaichene jana nihanete, quesenetareeiche, catohaneein turuhanune que aitiin laenaalu Moisesane jaun. <sup>47</sup> Nii aitiin niicha laenai esenetaeneeichene, chatohaneein jana aitocoanne eseneta-reeiche," nae Jesoso.

## 6

### *Saoqui oharaancai cache rai lenone tiha Jesusone*

<sup>1</sup> Nii baihate Calileea conemuri jeraque cuha Jesusone jana, <sup>2</sup> sacuha cuure arajiin cachaauru, cunaitenacaauru rautaane coaracuruhana jaun.

<sup>3</sup> Nii janate cuu atane ucuuno choae iniin nelauriariin lauheque Jesoso, aina nerelanaa nichaunune aina, <sup>4</sup> Jorioocuru beseta Fasocoa catainajeein.

<sup>5</sup> Nii jaunte arajiin turuuruha cachaaurune jaun: "Chu lenone coreterihacache, caa arajii cachaauru rai," naain baja Ferifi rai Cana Coaunera Calaohi Jesoso. <sup>6</sup> Niicha ichaneni coitucuha natiinte baja Jesoso Ferifi caje, "Toohanrichaaincha," naain.

<sup>7</sup> Niritiin bajaane jana: "Coroata fashai janonei amihanaana core jeoneein faan coretichaachene niha natiin coatia caa arajii cache naineriheta," naa Ferifine baihate:

<sup>8-9</sup> "Caute ne caa canaanai rai saoquijieein faan, nii baiha coroatajaain ate, naaonjoaain niqui, nete caa araainein cache nainenere carijiei," naa nii Simoon Fedoro ocoala Aanderesine jaunte:

10 “Saan. Acaauru rai aitocuchete nelauriaauruhine satiin,” naa Jesusone jaunte:

“Nii omane choae nelauriaauchera,” naauruhane jana, nelauriaaure nii saoqui oaraancai quichaauru nejeesina, enecuru, canaanaihunru, naajoain janijilanaala.

11 Nii janate nii faan teberiaain: “Nariha,” naain Cana Coaunera bajaane baiha, nii aina nerelanaa nichaanune rai nii faan te Cana Coaunera Calaohi Jesoso, chaluhaaanune caina. Chaluhaaanune janate, nii saoqui oharaancai cacha naine nii faan. Jerichanejeein techu nainecohanajae nii ate.

12 Nii janate, inaeneeuruhana jana cautihana jaun: “Caa caute curujuaain raauche nijiaohanne coataa,” naa Jesoso, aina nerelanaa nichaanune raine jaun, <sup>13</sup> curuhacaanune janate ne, elechoonca coroata omariin faan caute. Nitohaneente caute, nii saoquijiei faan nefaain.

14 Nii coaraainte: “Caate caa chauratane que turuha uha niicha jerecuri Cana Coaunera letono canaacha cohajeinecai-hara,” naaure cachaauru.

15 Nii jaunte jataain acaauru curuaanaa *rey* neein Jesoso tenaa jereein, counujueein amanaa jerecuruhane coarajihana jaun, acaauru que janoriin amue rautaenihana jaun. Nitohaneente acaauru que janoriin amuhin, atane ucuuno que iniha cue Jesoso, cuu jelai basijijin neeorihane caina.

### *Acau choae amuha Jesusone*

16-17 Nii janane, inae nocohecane jaun, jaiti turueniha Jesoso atane ucuuno cajena jaun, fauha cuhacaanu. Fauhina, leinjiin bote cuhane naain jera jaoha cuhacaanu, Cafere-naaon turuhacaanune caina. Nii janate inae nalaakuin cuhin nocojoe. <sup>18-19</sup> Nii janate, inae bote cuhane fauhin cuujihacaanune jana, canacaanu sacuha uhe Jesoso, acau choaae rurujueein uhin. Nitohaneente acau choae uhin canacaanu rohan nichuuntaain, nii acau jiheetohane jana, fichafichanaa tabai nihane jana, nii bote nalaaene amuniha canacaanu rai janate coaracaanune jana, tajiha acau choaae uhin rurujue, nii bote nichaae uhin. Nii jaunne coasiha nesoonetohacaanune janate:

20-21 “Cooa nesoonetohachera. Canuna aihunra,” naane jaun, que tacaain corojeein, nii bote cuhane fauhin amaacaanu. Nii janana cohaneoriin turutoha cuhacaanu canacaanuhacha coinetihu.

22 Nii cojoanoote, acaihanejein satononiha jera jaoha cu-naa bote cuhane fauhin jera jaoha cuhacaanune jana, canacaanu aina uheniha Jesusone jaun, nii que ereerecure. <sup>23</sup> Nii jana jetaote, Tiberia nese caje uhin turuha uhe leinjiin bote. Turuhin jetaote, najauriaa uhe nii Cana Coaunera bajaain



niicha tei faan quihuruha najaan rohan. <sup>24</sup> Nii jana cuu nenihacaanune jana, Jesoso netonai niha natiin nenihana jaun, nii bote cuhane nefaujuuain cuhin, nii nihacaanune jaaun Caferenaan turuhin ariha uure.

*“Ichaonaa esine tera lenoneneeinne neeun,” naa Jesusone*

<sup>25</sup> Nii janate jera jaohin coaraa uuruhane jana, cuu nii Caferenaan ne Jesoso. Nii jaunte rai: “Chabana cau turuhite cacha relaera” naauruhane janate:

<sup>26</sup> “Nii quiiicha ichai coaraquiche natiin, ‘Naaajoain caara,’ naain inara suujuau erenaa coacuelanaala, nainain obejeein lenonequichene jaunte caririijieeiche,” naainte, <sup>27</sup> “Coo sanaa inaera lenone corenihacha amihanihache. Acaihanejein ichaonaa tera- chabana sanaachara nejeein lenone coreniha amihaneeuhe. Nii nitajenachara nejeein niha cacha najaan lenone tihanune cointate caletoe Ofa Cana Coaunera. Canuna inaraacha cohajei Cacha Calaohi ineeunra,” naa Jesoso acaauru rai janate:

<sup>28</sup> “Chatohaneein nerichaanu Cana Coaunera jerenohi ichacaaunne coina,” naain bajaauruhane janate:

<sup>29</sup> “Caa niicha letoai nichaunne esenetaichenete jere Cana Coaunera,” naa Jesusone janate:

<sup>30</sup> “Chatohanaina ichaain canacaanu notaareei, coaraain esinaaen rauhijiriin Cana Coaunera letononeeine esenetaacaanune coina. <sup>31</sup> Carene tabai que amuhemuhecuruha najaaun jetaote, neniha lenonene jaun jetao, dede caje faan rijijieei nena manaa neein curuajaain nena que jetao ichaohin amuhemuhecurrejetelu canacaanu inoaesihuru. Nitohaneein jetaote, neniha lenonene jaun, ‘Dede caje nena faan rijijieein nena manaa te Cana Coaunera,’ naa Cana Coaunera Quiricha inoaesi cuhane” naauruhane jaunte:

<sup>32</sup> “Coatiha Moisesa nii dede caje nena faan manaa tihei. Acaihanejein Ofa Cana Coauneraachate nii dedeeu nena faan esine teraneein ne. <sup>33</sup> Nii Ofa Cana Coauneraacha tei faante turue caa chauratane que, cachaauru rai ichaonaa chabana nitajenaachara nejeein nena teranu que,” naa Jesusone jaunte:

<sup>34</sup> “Atiin canacaanu rai inetono janonaa bana, nii faan que canacaanu sihura curuaanaa,” naauruhane janate:

<sup>35</sup> “Canuna cacha rai ichaonaa tera faan neein neeun. Cha teinte carene uhe aca mijiteriaain. Cha teinti quesenetae, aca cocoireriaain. <sup>36</sup> Nete inara rai aitocooaunne esenetaeneeiche, inara nota que quiiicha ichai coaraquiche natiin.

<sup>37</sup> Satiin Ofa Cana Coauneraacha letoaitae carene uhe. Nii jaunna carene uhi nihane sitaenereeeunni.

<sup>38</sup> Coatiha quiiicha ichana jerei ichacaaunne coina, dede caje uhin turuha uhaaun caa chauratane que. Acaihanejein

caletoaera Ofa Cana Coauneraacha jerei ichacaunne coinana cau turuun. <sup>39</sup> Nabana nitajeuruha cachaaaurune coataate caletoae Ofa Cana Coaunera. Nii jaunna satiin nii carai niicha teeuri cachaauru ichateein michunajaa cureeunni inae saa cana janonaane bana.

<sup>40</sup> Nii Cana Coaunera Calaohi coaracuruhane esenetaauruha satiin cachaaaurunete jere caletoaera Ofa Cana Coaunera, chabana nitajenaachara nejeein nenea ichaonaa raa esenetaeraaurune coina.

Nii jaunna inae saa cana janonaane bana ichateein michuunajaa cureeunni,” naain acauru tonorae Jesoso. <sup>41</sup> Niritiinte, “Canuna dede caje faunaa faan neeunra,” naa Jesusone jaun nocoeje chanuure Jorioocuru.

<sup>42</sup> Nitohaneeinte ita rai: “Ta Jose calaohi Jesoso niha caane. Raotojoein inaca, neba, naajoain coitucuhacache natiin, dede caje faunaa nereta,” naauruha ita rai Jorioocurune janate:

<sup>43</sup> “Inae canu necoeje chanuhichene jianecuchera. <sup>44</sup> Chunei carene unaa nainihei, nii jereein neniha caletoaera Ofa Cana Coaunerane. Inae saa janonaane banana nii carene uhine ichtiha cureeunni. <sup>45</sup> ‘Satiinte relareein Cana Coaunera,’ naa Cana Coaunera ere beracuru ioaensuruhacha laenai quiricha cuhane jaunte, satiin Ofa ere aonain tonoraain que nerelanacaaurute, carene ureeincha.

<sup>46</sup> Chabana Ofa coaraai chunei. Acaihanejein canuhachana coaraaun caje unaa nichaunna jaun.

<sup>47</sup> Esinaena rauhijiriin aitoreeunni. Quesenetaerate ichaonaa chabana nitajenaachara nejeein nenea raa cureein.

<sup>48</sup> Canuna ichaonaa chabana nitajenaachara nejeein nenea tera lenoneneein neeunra.

<sup>49</sup> Neniha leinjiinejein cacha najaaun carene tabai choae amuhemuhecuruha inara inoasihurune janate, que ichaaoruhane coina cojoanoo netojoein manaa neein curuajaain nenea quinacai nalae Ofa Cana Coaunera, que ichaaoruhane coina. Nete, satiin oore nii quihurera- inara inoasihuru inae binaanein. <sup>50</sup> Canuna dede caje faunaa lenone neeun. Nii faan nichaanne quicha, chabana orihain. <sup>51</sup> Canuna nii lenone neein dede caje faunaa neein neeun. Nii lenone que ichaohin neite nirijijieein nitajenaachara nejeein niha cureein.

Nii lenone quicha tenaa jereite, cajabereonneein ne. Acane tiha cureeunni, que ichaohin neeuruha caa chau-ratane que nenacaaurune coina,” naa Jesusone janate,

<sup>52</sup> “Chatohaneeina rai jaberoco que cana coroaatere,” naain nejesinajein ita cotaicha rijitocure Jorioocuru.

<sup>53</sup> Nii jaunte: “Esinaena rauhijiriin aitoreeunni inara rai. Canuna Cana Coaunera Calaoheinein, jelai Cacha Calaoheinein inaraacha cohajei ineein neeun. Cajabereon quuin cacoichana coheneeichene, nihei ichaonaa esine ranaa nainiheeiche. <sup>54</sup> Cajabereon quuin cacoichana coerate, chabana nitajenaachara nejeein nenea ichaonaa raa cureein. Acane, saa cana janonaane bana ichatein michuha cureeunni. <sup>55</sup> Ichaonaa tera lenone esine neein niha cajabereonne janate, ichaonaa tera conacai ineein ne cacoichana. <sup>56</sup> Nitohaneein cajabereon quuin, cacoichana coerate, caniha jiniiquuin nereein. <sup>57</sup> Nii caletoaera Ofa Cana Coaunerate ichaonaa siri. Nii jaunna que ichaohin neeun. Nii rijijieein techu, cacoreniha ichaoha cureein caque lenonein nei.

<sup>58</sup> Nii dede caje faunaa lenone quena aitoon. Coat-  
iha nii inara inoasihuruhacha quui manaa rijijieein ni-  
hei. Nii manaa quihuruha niqui inara inoasihuru, nete  
satiin oore nii quihurera. Jana nii caitoojoan dede caje  
faunaa lenone quiha cachanete, chabana nitajenaachara ne-  
jeein niha cureein,” <sup>59</sup> naain relanajae Jesoso, Caferenaaon,  
acaauru rai sinacoca asaae netaojiauruha Jorioocurune jana.

*Nitajenaachara nejeein nenea ichaonaa tera erenaa*

<sup>60</sup> Caritiin relanajaa Jesusone jaunte: “Caaintatoha jataain  
caa naitoojoan. Chate nere tonorare,” naauruha nii caaijie  
arajiin cunacaauru cachaaurune janate, <sup>61</sup> aohanriin:

“Ta aihane carautaaichene. <sup>62</sup> Toohanreichecha, jauriaa  
nihanulune jaaun jelaiha iniha cuhanune coaraqichene.  
<sup>63</sup> Caa quere aonaain esenetaeraaurute, chaelai janonaa  
bana nitajenereein. Jana, caa aitocoaunne esenetaelanaala  
erenaa tonoraaauruhite, ichaoha jaberoco niha natiin, ni-  
tajiha cureein suujue. Cha que nelatihei cana jaberoco,  
cana suujue colane. <sup>64</sup> Nete jaiti caa aitocoaunne jaan  
esenetaaurene inara tabaauru,” nae acaauru rai Jesoso,  
inae inoaelu caje coauneein, “Acaauru acaaurute quesene-  
taenereein. Jana, acate naaonjoain cacoulrueein naaon-  
joain caeteratiha cureein,” naain coitucuhana jaun.

<sup>65</sup> Nii jaunte: “Nii jereniha Ofane, carene unaa nainihei  
chunei,” naa Jesusone caijiete, <sup>66</sup> jianijihacoaure nii arajiin  
aina nerelananichaanune aina amuhemuhenaacaauru niri-  
toha Jesusone jaun.

<sup>67</sup> Nii jaunte: “Inara netonaiha cajaohin caratiriin  
amuriquiche,” naain bajaa elechoonca coroatajai  
nichaanune cajene jana:

<sup>68</sup> “Ahan aihei. Chuna nenacae curichaacaanu. Nii  
canacaanu relaina jaan tejian nenacae ichaonaa chabana

nitajenaachara nejeein nenea teraneein ne. <sup>69</sup> Canacaanuna laaen ii esenetaacaanu. Nii jaunna acaihanejein Cana Coaunera Calaohi Curisitoneein neeine coitucuhacaanura,” naa Fedorone janate:

<sup>70</sup> “Canuna lechoonca coroatajai niquichene cotijiaain raain neeun niqui. Nete, nii inara lechoonca coroataja nechu aansain moconajaeraneein ne,” nae Jesoso canacaanu rai. <sup>71</sup> Nii Simoon calaohi Jodasi Isacariote quete aite Jesoso, aina nerelanaa nichaanune lechoonca coroataja niha natiin coulurujuerichaaine coitucuhana jaun.

## 7

<sup>1</sup> Nii baihate, Calileea batane que nenacaauru neseeuuru neseeuuru cachaauru relaa amuhemujue Cana Coaunera Calaohi Jesoso. Jodea batane que cunaa jerihe, cuu sohin jaonaa jerecuruha cuu nenacaauru Jorioocuruna jaun. <sup>2</sup> Nii janate, inae ichuunejeonriha lohanari beseta bitoaaauruha Jorioocurune jaun:

<sup>3</sup> “Coa cau niha. Jodea cunihunte cuu chaaelai ichaaine coaracurumii cuu nenacaauru ii coitucuurera. <sup>4</sup> Coitucuha cachane jeriha chuneine, asiin cha ichana nainihe. Aihana jaun, letonoaneein satiin coarajeeurera notaracae ichaaute coaracurumii,” nae nocoalacuru. <sup>5</sup> Nihei nocoalacuru niha-natiin esenetaaurenihana jaunte aitocure.

<sup>6</sup> Nii jaunte: “Inasiina jaiti turuha cuhanune jaan cojoinacane coaalanaala cureeun. Inara raite laaen caoachae joenreein bana cuhichene, <sup>7</sup> neniha chatohaneein inara aina nejerateein, inara cotaain, chatohaneein inara tenaa nainenihaa caa chauratane que nenacaaurune jaun. Canihate laaen nejerateeure, itolere baaso ichacuruhane que rauhi-jiriin aitocoanne coreniha. <sup>8</sup> Inara cunichuchete beseta bitoaaiche. Jaiti curihaunni canu, turuenihaa cuhanune jaan cojoinaca quene jaun,” naain <sup>9</sup> nii Calileea nedae Jesoso.

*Lohanari beseta bitoaaaurera jana turuha Cana Coaunera Calaohi Jesosone*

<sup>10</sup> Nii baihate inae cuuruha nocoalacurune jana, acaentonai cue acaauru caaijie nasina rijijieein, acaauru aina beseta bitoaa.

<sup>11</sup> Nii janate inae nunuheca besetane jana ariirijieeure Jorioocuru: “Aancacha nii cacha,” naain <sup>12</sup> cuu nejesinajein coaucuhin ita rai ereerejeein:

“Acate caohachanejein cachaneein ne,” naauruha tabaaurune janate, tabaauru:

“Caohachanejein cacha nihei jana canacaanu rai, cacha coritaain naojoanna jaun,” naaure tabaauru. <sup>13</sup> Nete, rauhijiriin “Aca,” naain chaque erenaa nainene chunei Jorioocuru coasiha.

<sup>14</sup> Nii janate, netaojiauruhana jaan loreri Teenforo asaae enoha Jesusone jana, inae sanaa jere nii beseta.

<sup>15</sup> Nii janate cuu relanajaa Jesusone jana cojoaelatoore Jorioocuru. Cojoelatiinte:

“Chatohaneeina nirijieein nerelaelanaala itolere coitucue,” naauruhane janate:

<sup>16</sup> “Coatiha casuujua caje quiiha rocohi nihei- caa inara relaanune jaan. Caa inara relaanune jaante, nii caletoaera caje unaa ne. <sup>17</sup> Nii jaunte inae jatoroaain Cana Coanera jerenohi ichana jererate aitocoanne aonaain coitucuha cureein. Nitohaneeinte esinaae rauhijiriin casuujua caje rocohin aitenihanune coitucuurureein.

<sup>18</sup> Charijieein teeinti: ‘Canuna caoacha cachaneein neeun,’ naain suujua caje rocohin raotono que ereereecane, ereereje cacha raotojoein: ‘Caate jataain caohachanejein cachaneein ne,’ naain caohachaaain belaaain coaracuruha cachaaurune coina. Nete rai letoaera curuaanaa coitucuhin coroaecuruhane coina, esinae rauhijiriin aite. Aihana jaun, Nihei nii que: ‘Casaje,’ naain ereereecuruhane jaanu.

<sup>19</sup> ‘Cana Coanera ere bera Moisesa ere tonoraacaanu,’ naainte ereeiche niqui. Nete: ‘Coa sonajaain jaohache,’ naain aitoha Moisesa natiin tonoraeneeichene jaun, casohin cajaanaa jerequiche,” naa Jesusone janate:

<sup>20</sup> “Chana ishohin ijiaonaa jerete aansai,” naauruhane janate:

<sup>21</sup> “Chanuna jana chaaen, nebetacanaa janonaa bana cunaitenaa rautaanune jana, cojoelatiin obaaequichelu caniha. <sup>22</sup> ‘Quichaneein nejanoaa inara bereene, inae fosa janoniha nejanoaane jana, rai nacatichei cari jiununuhin saauche,’ naa Moisesane jaunte niqui, nii tonoraain nebetacanaa janonaa bana niha natiin, canaanai nacatichei cari jiununuhin sauhin naaonjoaain neeichelu. <sup>23</sup> Chanuna chaaen nebetacanaa janonaa bana lesajeein cunaitenaa rautaanune coreniha, caniha obajeein caque nererojoeccaichelu. <sup>24</sup> ‘Cana Coanera aitojoaan tonoraacaanu,’ naaiche inara suujua cuhane natiin, esinae rauhijiriin Cana Coanera aitoonjoan coitucuhin tonoraain niheeiche. Esinae rauhijiriin Cana Coanera aitoonjoa coitucuhin neeinchene jananihane, caniha obajeein caque nererojoeccaain neriheeiche,” nae acauru rai Cana Coanera Calaohi Jesuso.

*“Naaajoain cajena unaa neeun,” naa Cana Coanera Calaohi Jesusone*

25 Nii janate: “Tana caa cacha ariirijieuruha sohin jaaruhane coinane,” naauruha nii Jerosaleen nenacaurune jana, 26 “Nocoo chuianra jianacoo neein satiin coarajera notaracae ereerejena. Chanuna colaraain inauhene coarajeure. Jerihanete acauru esenetaain, ‘Acate Cana Coaunera letono Curisitone,’ naaurucailha cocoinanacaihuru. 27 Canacaanuna laaen, nii uhana jaan coitucuhacaanu. Jana turuha Curisitone, ‘Naojoain cajete uhera,’ naain coitucuerariaain,” naauruhane janate, 28 cuu nii ita taojiaauruhana jaan loreri Teenforo asaae aonajenajaain,

“Esinaena aihana jaun, canu unajaan coitucuhiche. Coat-ihha casuujua caje coauneein uhaaun. Inaraacha coitucuhi Cana Coaunerate caletoae. 29 Dede caje, aca caletoana jaunna coitucuun caje uhanune jaun,” nae Cana Coaunera Calaohi Jesoso tonijiaain.

30 Niritohane corenihate mucuhin amaain caresero cuhane Jesoso enoanaa jerecure niqiu, nete jaiti cuu tenihana jaun, chatoaneei que biji teeurene. 31 Nete, atiin esenetaain:

“Turuha Curisitone, coatihha aihha caa cachane amuritoheriin araai saain niicha ichai ichaain cacha notaariaain,” naaure arajii cachaauru.

*Teenforo beraihurera folisiaacuru que Cana Coaunera Calaohi Jesoso mucuhin raerateeuruha fariseeocurune*

32 Jesoso queecha ereeuruha cachaaurune que urichocuruhanana jaunte, rautaaurenihana jaun nere tonoraeraauru Teenforo beraihurera folisiacuru letoaaure nii fariseeocuru, nii cuu nena batirichuru curuaanaacuru, naojoaihuri, Jesoso mucuhin raacuuruhane coina. 33 Nii jaunte:

“Basijiin reeintiariina cau neeorihun. Nii baihana nii caletoaera rene cauha cureeunni. 34 Canu aririquicheein niqiu. Nete caurueneriquicheein, nii cuhanune jaun turunaa naineneriquicheei najau,” naa Cana Coaunera Calaohi Jesosone jaunte, 35 nejeesinajeein itarai:

“Chuna curute, ariirijiacachene niha natiin eruhenerihacache. Jerihanete Curiecocuru que najasiiteein nenacauru Jorioocuru ataneu cunaa jere, Curiecocuru relaane coina. 36 Chatohanerichaaain naate aite: ‘Canu ariichene niha natiin, caururiheicheein cuhanune jaun turunaa naineneriquicheeine jaun,’ nae,” naainte itacaje bajaebajaecure Jorioocuru.

*“Cocoierei carene uhinena cocooe,” naa Jesusone*

37 Nii beseta satono janonaa banate, beseta nunuhe bana, bajaauruhane amuritoheriin Cana Coaunera bajaure jiniiquiin nii beseta bitoaa turunacauru.

Nii jaunte beseta satono que nimichuhin tonijjain, nii cuu nenacaauru rai:

“Cocoirei carene uhinena cocoa. <sup>38</sup> Aitoha Cana Coaunera Quiricha Inoaesi cuhanene tocohaneein, quesenetaera cacha suujua cajete mitureein acau rijijieein sorohin, jelaiha suujua cuhane maroemaroereein, suujua rucujueein rai ichaonaa nitajenaachara nejeein nenea teraaunu que, chaen leochaauru rai niha natiin tihane coina,” nae Cana Coaunera Calaohi Jesoso, nii beseta bitoaaaurera rai.

<sup>39</sup> Nitohaneein Cana Coaunera Suujue raaururichaaain esenetaeraauru cachaaurune quete aite Cana Coaunera Calaohi Jesoso, coitucuuruane coina. Jaiti dede curuaanaaneein Jesoso enoaenihana jaunte, esenetaeraauru rai suujue letoaene Cana Coaunera. Nii quete aite Cana Coaunera Calaohi Jesoso.

*Jesoso coreniha ita caje nelerucuruha cachaaurune*

<sup>40</sup> Nii jaunte niritoha Jesusone jaun tabaauru:

“Acate nii turuha uha niicha jerecuri Cana Coaunera ere berane,” naauruhane jana,

<sup>41</sup> “Acate Curisitонера,” naacoauruha leeochoaurune janate, tabaauru jana:

“Inasiin jetao Calileea caje uriha Curisitone coaalanaala.

<sup>42</sup> ‘Jerichanejeeinte curuaanaa inoaesi Rabiri rijijieein Beleen cocoaichaneein nereein Curisito, curuaanaa inoaesi Rabiri ichoalaneein nenea,’ naa Cana Coaunera Quiricha Inoaesi cuhane natiin, Curisito nere Calileea cocoaicha,” naaure. <sup>43</sup> Niritiinte Jesoso coreniha cuu ita rerohecaain ita caje nelerucure.

<sup>44</sup> Tabaaurute mucuhin amain caresero cuhane tenaa jerecure niqii, nete ichana nainene chunei.

*Jesoso esenetaaurenihana cocoinanacaihurine*

<sup>45</sup> Nii jaunte, Jesoso colane turuha uuruha nii Teenforo beraihurera folisiaacurune jana:

“Chanuna mucuhin uhaeneeiche,” naain bajaauruha cuu nenea fariseeocuru, batirichuru curuaanaacuru, naonjoaihurine jana:

<sup>46</sup> “Cha corenihana mucuhin uharichaanu joareein coreniha. Nihei chunei cacha irihane rijijieein erei,” naauruhane janate:

<sup>47</sup> “Inae nachu inara netonai coritaate. <sup>48</sup> Esenetaauruha cana curuaanaacuru, fariseeocuru, naonjoainurine coaalanaala esenetaaiche. <sup>49</sup> Acaihanejein Cana Coaunera Ere coitucuuruhi, Cana Coaunera jaolecuru cachaaurute esenetae,” naauruhane jana:

50-51 “Nainihe i joaereein nere aonaelanaala, joaereein: ‘Naajoainte ichae,’ naain, caohachaaain coitucuhelanaa, cacha casetecaacachene, niritiin aitoaha cana quiricha inoasi cuhanene jaunne,” naa nii janotiin Jesoso rene turuha cunaa fariseeo Necodemone janate:

52 “Ti tonaina Calileea cocoaicha neei. Nihei chunei Calileea caje ecocohin Cana Coaunera ere bera. Cana Coaunera Quiricha cuhane arihute coitucuhi,” naauruha leeochoauru fariseeocuru Necodemo rai janate, 53 nenajau cauha cuure nii cuu nenacaauru.

## 8

### *Ene cojoaelorohe*

<sup>1</sup> Nii janate acaauru que janoriin, naain Oliboneein curua-jaain nena atane ucuuno cue Cana Coaunera Calaohi Jesoso.

<sup>2</sup> Inae janohane janate naain Jerosaleeun cauha cue, coaiten enacoaauneein cuu nena Teenforo asaae enohane coina.

Nii janate rene turuhajeeuruha arajii cachaaaurune jaun, nelauriaain relanajae Jesoso. <sup>3</sup> Nii janate nejelau quicha que nicharatihane jana ene cojoaeloroe eruhin, mucuhin, tajiha turuaa uure, Cana Coaunera aitoonjoa que cacha relaaurera fariseeocuru. <sup>4</sup> Nitohaneein turuaainte, nii cuu nenacaauru cataaun teein:

“Naajoaain nejelau quicha ainane janana, caa ene eruhin mucuhin uhaacaanura cacha relaera. <sup>5</sup> Cana Quiricha Inoasi cuhanete laenaain cana rai rauhin teein letoaelu Moisesa, nitohaniha ene cojoaelorohe ne, sohin jaohacache ajeri que botosiine coina. ‘Tonaai jana ii,’ ” <sup>6</sup> naain bajaare, nii ene sohin joaeratenaa jerenihane coulurujueeuruhane coina.

Nii janate acaauru tonoraelanaala notoroaain, biji couturi que atane laenaje. <sup>7</sup> Nii janate cuu tonoranajae lanaala atane laenajiha biji couturi quene jana, cuu jeelai coaineinejeein bajaebajaecuruhana jaun, couturi michuriin:

“Niha cau leinjiin inara jana osa que lanaala, chabana baaso ichae lanaala nena ne, nii ichoaechaniha focoine ajeri que,” <sup>8</sup> naain coaiten notoroaain atane laenaje biji couturi que Jesoso.

<sup>9</sup> Niritoha Jesosone jaunte, aihuru bana acaauru netonai baaso ichacuruhana jaun, acaauru suujua que tacaana jaun, coejeein, biinaa que ichoachaain leinjihana leinjihanaain mituhin cauha cuure. Inae satiin mituhin amuuruha nii ene coulurujueurerana jaun, nii eneecha que jerajejeiin neeori-hana jaun, <sup>10</sup> nimichuhin nichauraaain:

“Aancaauruche icholurueraauruta. Ta ishohin ijiaohache chuneine,” naain nii ene caje bajaa Jesosone janate:



11 “Aiheicheta curuaanaa. Nihei casohin cajaohiche chuneita,” naa nii enene jana:

“Niheichu, canu niha natiin chatohanein chetein, ishohin ijiaonaa nainihaaunche. Inae caunichuche. Jiaonriha caa baiha coaiten nosateichenera,” naain nii ene jiane Jesuso.

*Cana rai chauratane cononeein niha Jesusone*

12 Nii baihate coaiten cachaauru rai beebje Jesuso:

“Canuna caa chauratane que nenacaauru cononeein neenra. Quere esenetaerate ichaonaa tera cono siricheein. Chabana nocohenaanau amuhemuheriaain,” naa Cana Coaunera Calaohi Jesusone janate:

13 “Nohaneeicha. Ichaajenihane aitiinte aitohicha. Nii jaun chaque nelatihei nii aitohine jaanta,” naauruha fariseeocurune jana:

14 “Caraajenihane aitiin aitocoaaunne niha natiinte, nelate quere. Canuna nii uhanuluna jaan jelai coitucuun. Jana inara coitucuheeiche. Niheichu canu cunajaanu coitucuheeiche. 15 Nechu jataain Cana Coaunera coitucuneeichene jaunte, joenreein inara suujua cuaaichene jaun, joenreein ereereequiche. Aanca chunei coulurujerichaaun canu. 16 Canu, cacha coulurujianunete, esinae rauhijiriin coulurujuenojoinnei ne, canuhacha jelai caitono neni-hana jaun, caletoaera Cana Inaca aina aitocoaunna jaun. 17 Charijieein teeinti ‘Ita rijiiitojoein ereeuruha coroatajai coaraaurune, esenetaacache nete ne,’ naain aite inara quiricha inoasesi cuhane, nitohanein ichaquichene coina. 18 Nirijieeinna coaraneein aitoon, nii caletoaera Ofate cajiiniichaaain coaraneein ne. Nii jaun quesenetaaichenetene,” naa Jesusone jaunte:

19 “Aanca aihane nii chaca,” naain bajaauruhane jana:

“Cacoitucuneeichene jaun, Ofa coitucuheeiche. Cacoitucuhichene jana nihanete, Ofa netonai coitucuriquiche,” 20 naain relanajae Jesuso, nii ita taojiaauruhana jaan loreri Teenforo asaae, nii coriqui teeuruha cachaaaurune jaun neein. Niritoha Jesusone jaunte mucuhin enoanaa jerecure. Nete enoaaurene, jaiti nitohanein teeuruhane jaan cojohinaca que turuenihana jaun.

*“Nii cuhanune jaun cunaa nainiheeiche,” naa Jesusone*

21 Nii baihate coaiten aitiin:

“Inae amuhanune baihate cariirijeriquicheein inacojoein. Nete inara osa caaun cauhacha neein oriquicheein, nii cuhanune jaun cunaa naineneeichene jaun,” naa Jesusone jaun:

<sup>22</sup> “Jerihanete raajenihane nesohin nijiaonreein. Nii jaunte nii cunajaun cuenerihacacheeine que aite,” naain ita rai ereereecuruha Jorioocuruna jaun:

<sup>23</sup> “Inarate, caa chauratane que neeiniquiche. Canuna jana, cana choae caje nenea neeinneeun. <sup>24</sup> Nii jaunte oha curiquicheein osa caaun, canuneein nihanune esenetaenee-ichene jaun,” naa Cana Coaunera Calaohi Jesusone jana:

<sup>25</sup> “Chaneeina jian,” naain bajaauruha Jorioocurune jana:

“Inae inara rai aitocooacaun turuhanune caje coauneein. <sup>26</sup> Niha arajiin erenaa inara rai quiicha beenei. Nii caletoerate rauhijiriin esinae aite. Cauricho que aonacaaunna jaunna jerichanetojoein beebejeeun, caa chauratane que neniquichene rai,” naa Cana Coaunera Calaohi Jesusone <sup>27</sup> janate coitucusichurene, “Naaonjoain Cana Coaunera quete aitera,” naain coitucuurenihane jaun.

<sup>28</sup> Nitohaneein coitucuurenihana jaunte:

“Inara araaineein nihanu natiinte, enuha que ecuu canu njuateein canu chujuuraa curiquicheein. Nii banate Curisitoneein nihanune coitucuhin, casuujua caje rocohin aitenihanune coitucuha curiquicheein. Acaihanejein carelaa Ofa Cana Coaunerana jaan que aitocooaunne coitucuha curiquicheein. <sup>29</sup> Chabana jelai caratirihei caletoera Ofa, niicha jerenohin ichacaaunna jaun,” <sup>30</sup> naa Cana Coaunera Calaohi Jesusone jaunte esenetaaure arajiin cachaauru.

*Jelai teein Cana Coaunera cacha, jelai teein Moconajaera cacha*

<sup>31</sup> Nii baihate esenetaaurera Jeroocuru rai:

“Rauhijiriin quere tonoraachenete, canu ere tonoraera esineneein neriquicheein. <sup>32</sup> Nii banate esinae rauhijiriin, Cana Coaunera jerenohi coitucuhin raotojoein jianacoo ichaonaa naineriquicheein,” naa esenetaerauru rai Cana Coaunera Calaohi Jesusone janate:

<sup>33</sup> “Canacaanu foeratera Abaraaun caje coauneein nihein chunei fatoroon canacaanu cailichaera. Inasiinte nii aito-hine tocohaneei enene cuhaneeeicha ichoreniha jianacoo mituhin nerichaanu. Nechu jataaina inoaelu caje coauneein raotojoein rohecaeraelanaala ichohacaanu,” naauruha nii esenetaaichuru Jorioocurune janate:

<sup>34</sup> “Satiin quere tonoraauruhite jataain mululuhin osa tabai aiha ne. Nii chunijiu cuhin nichotenaa nainerihaain. <sup>35</sup> Cana Coaunera Calahineein nihanune jaunte ne carai rauhi jianacoo nii osa caje inara mitaanune coina. <sup>36</sup> Canu nii caje jianacoo inara mitaanunete esinae rauhijiriin jianacoo mituhin neriquicheein. <sup>37</sup> Abaraaunte chuhisi inara foeratera ne niqui, nete casohin cajaanaa jerequiche, quere

esentaeneeichene jaun. <sup>38</sup> Carelaa Ofa najaan quena inara rai aitoon. Charijieein teeinti, inara relaa inara inacana jaan ichaquiche, nii rijijieeina canu netonai caletoaa Ofane jaa ichaun,” naa Jesusone janate:

<sup>39</sup> “Abaraaunte canacaanu inacane,” naauruha Jorioocurune janate:

“Esinae rauhijiriin Abaraaun calaohi neeichene jana nihanetera, aichejetohalune rijijieein neriquiche inara netonai. <sup>40</sup> Nete esinaae caletoaa Cana Coaunerane que aito-coaanne coreniha casohin cajaan jerequiche. Chabana nitohanai que nerurujuanaa jeriheilu Abaraaun. <sup>41</sup> Inarate aiha inara inacane rijijieein neeinche,” naa Cana Coaunera Calaohi Jesusone janate:

“Coatiha unosinein nihaacaanu, Cana Coauneraachate canacaanu inacane,” naauruha Jorioocurune janate:

<sup>42</sup> “Cana Coaunera inara inaca niha netera, canu belacheeiche, Cana Coaunera caje uhin cau turuhin nihanune jaun. Coatiha casuujua caje coauneein cau uhin turuhaun. Cana Coaunera te caletoae. <sup>43</sup> Quere esenetana jereneeichene jaunte, caa inara rai aitocoanne aonasineeinche. <sup>44</sup> Moconajaerate inara inaca ne. Nii jaunte, caje nenea neeichene jaun niicha jereeicha ichaquiche. Nii Moconajaerate inoaelu caje coauneein soserejeein ne. Chabana rauhijiriin chaque irihe. Chaque irihanete nohane, nichaon nihana jaun, casaje nujuaneein nihana jaun. <sup>45</sup> Esinae rauhijiriin aitocoanna jaunte quesenetaeneeiche. <sup>46</sup> Chariji inara caje osaqiun nihanune coitucue. Chanuna esinae rauhijiriin aitocoan natiin quesenetaeneeiche. <sup>47</sup> Cana Coaunera cacha nequichenetera, Cana Coaunera ere rautain aonain tonoreeiche. Cana Coaunera cacha neneeichena jaunte, Cana Coaunera ere aohana jereneeiche.

### *Abaraaun ajinihat neehane Curisito*

<sup>48</sup> Esinaete rauhijiriin osaoquicha- Samaria cocoaicha,” naain Cana Coaunera Calaohi Jesuso cotaihuruha Jorioocurune jana:

<sup>49</sup> “Nihei aansijieein nejein osaaohaun. Nechu acaihanejein Ofaacha jerenohin ichaain nihanune corenihate caansaine que ereeiche. <sup>50</sup> Coatiha, ‘Canuna caohacha cahaneeun,’ naain irihaun. Curuaanaaneeinte caeteen ne Ofa. <sup>51</sup> Esinaena rauhijiriin aitoon, quere tonoraerate chabana nitajenaachara nejeein nereein,” naa Jesusone janate:

<sup>52</sup> “Esinaete osaoquicha. Inasiinte Abaraaun, satiin Cana Coaunera ere bera inoesihuru, naajoaihunru inae oosichuruhalu inoaelu natiin, chere tonoraeraacha nitajenaachara nejeein neeureta. <sup>53</sup> Abaraaun amurijiriinna nereei ite.

Inae ohane jana ohacoaauruhalu Cana Coaunera ere bera inoaesihuru netonai natiin. Chaneeina jana ii nereei,” naauruha Jorioocurune janate:

<sup>54</sup> “‘Canuna inara curuaanaa caohati neeun,’ naain irihanune caohacharihei. Nete caque: ‘Caate acaihanejein canu calaohine. Nere tonoraache,’ nae Ofa Cana Coaunera. ‘Cacoaunera,’ naaiche niqui. Nete <sup>55</sup> coitucujueneeiche. Canune laaen coitucuun. Inara rijijieein casaje nichaaunnena, ‘Coitucuhaun,’ nareeun. Esinaena rauhijiriin caraajenhane coaracaunna jaun, nere tonoraain caletoaana jaan ichaaun. <sup>56</sup> Inara foeratera Abaraaunte, cau chauratane que catohaneein tururichaaunine coitucue. Nii jaunte inae ena cau turuhanune jaun corojeein rachoojoe,” naa Cana Coaunera Calaohi Jesusone jaunte:

<sup>57</sup> “Inasina saoquichoonca jaanacaaine coalanaala, canacaanu foeratera Abaraaun coareei,” naauruha Cana Coaunera Calaohi Jesuso rai Jorioocurune jana:

<sup>58</sup> “Aihanu. Esinaena rauhijiriin aitoon. Inae inoaeluna Abaraaun ajiniha nesiha neeun canu,” naa Cana Coaunera Calaohi Jesusone jaun, <sup>59</sup> ajeri mucuutaare, que botosihuruhane caina. Ajeri mucuutaauruhane janate, jianatoroaain acaauru cataan cuhin, Teenforo caje mituhin amue.

## 9

### *Maosa rautaa Jesusone*

<sup>1</sup> Amuhemujuena jaunte leinjiin cacha maosaneein nejanoanaa coarae Cana Coaunera Calaohi Jesuso. <sup>2</sup> Coaraane janate:

“Chanuna maosaneein nejanoae caa cacha. Rai fojiaraauru osa caaun nenihane, rai nosa caaunna,” naain Jesuso caje bajaacaunune janate:

<sup>3</sup> “Aihei, coatiha nosa caun nihei. Niheichu fojiaraauru osa caaun nihei. Cana Coaunera ichanohi coaraa cachane coinete catohaneein nejanoae. <sup>4</sup> Inae caletoaeraacha icharatei ichacaaunnete ne, nainichaaunne cojoataa. Inae caa baiha nainerihaaunni. <sup>5</sup> Cau chauratane que nihanune quena, chauratane cononeein neeun,” <sup>6</sup> naainte, atane choaae lune churutaaain, biji couturi que laculacunejein, itacariin nii maosa nota rujuaain:

<sup>7</sup> “Inae laaenra, taa necajoanaa najaan Silohe inota culeenihura,” naa Jesusone jaun, cuhin culeecane caje turuhane janate, inae conoe nii maosa nota. (Silohe nanaate, Letono nanaa ne.)

<sup>8</sup> Inae nerautaa jana coaraante: “Caana lauhajelauha-jein coriqui bajanajaaoca,” naain ita caje bajaare nii laurijiracuru- nii jauriaa nitohaneein coaraauru.

<sup>9</sup> Niritiin ita caje bajaainte:

“Aca chujianrana,” naauruha tabaaaurune janate:

“Aca nihane coalanaala. Tocohaniha chuhisi niqui, nete aca nene,” naaure leeochoaauru.

Nii janate raajenhane:

“Acaneeun chujianrana,” naa raajene jaun:

<sup>10</sup> “Inasina jana enene conoe inota,” naain bajaauruhane janate:

<sup>11</sup> “Nii leinjiin cacha- Jesoso neein curuajaain nenaate, atane choae lune churutaain, biji couturi que laculacunejeein, tucuacaain canota rujuaain: ‘Inae laaenra, necaonjoanaana jaun Silohe culeenihura,’ naain caletohana jaun: ‘Ai,’ naain culeecaunne janate, inae conoe caa canotara,” naain bihane janate:

<sup>12</sup> “Aanca chaen nii cacha,” naain bajaauruhane janate:

“Jm, jm, jm. Aancachaaanti. Coitucuhaun,” nae nii maosa nerautanaa.

*Nii nerautanaa maosa caje bajaauruha fariseeocurune*

<sup>13</sup> Nii janate nii maosa nerautanaa amaauruha fariseeocuru renene janate:

<sup>14-15</sup> “Inasiinte enene conoe inotata,” naain cotaain bajaure fariseeocuru nii cacha caje, nebetacanaa janonaa bana atane choae lune churutaain biji couturi que laculacunejeein tucuacaain nii maosa nota rujuaain, rautaa Jesosone jaun. Bajaauruhane janate:

“Itanicha que canota rujuarujuariin culeeratihane jana, culeecaunne janate inae conoe canotara,” naane janate:

<sup>16</sup> “Cana Coaunera caje nenea nihei nitohanai cacha, amihaniha nebetacanaa janonaa banana jaun,” naauruha tabaaaurune janate:

“Inasiinte Cana Coaunera tocohaneein ichaa natiin, osaona nihane nitohanai ichanaa nainerihejii bajiaa,” naauruha nii leeochoaauruna jaunte, <sup>17</sup> coaiten enacoauneein:

“Tonaai jana ii, nii ichautaera cacha que,” naain bajaauruhane jana:

“‘Jerihane acate Cana Coaunera Ere berane,’ naanu canu,” naa nii nerautanaa maosane janate, <sup>18</sup> esentaurene. Esentaurenihana jaunte, fojiaraauru caje bajaure:

<sup>19</sup> “Caana inara calaohineein maosaneein nejanoaa. Inasina jana enene conoe rai nota,” naain bajaauruhane janate:

<sup>20</sup> “Aca chujian, acate canacaanu calaohi maosaneein nejanoanaa ne. <sup>21</sup> Inasiin chaaiti conoe enene rai nota. Niheichu nii rautaera coitucuhaacaanu. Cajejian bajaauche. Inae canaanai nihane coalanaala. Acate naine raaje bihane,” <sup>22</sup> naaure nii fojiaraauru, Jorioocuru curuaanaa

coasiha. “Acate Curisitone,” naain iriha chuneine, “Cau sinacoca asaae enohane jererihacacheein,” naauruha nii Jorioocuru curuaanaacurune raotojoein coitucuuruhana jaunte: <sup>23</sup> “Cajejian bajaauche. Inae canaanai nihane coalanaala. Acate naine raaje bihane,” naaure nii fojiaraauru.

<sup>24</sup> Nii janate coaiten nii maosa niicha rautain cotijiain:

“Esinaen rauhijiriin beeu, Cana Coaunera notaracaae. Osaaotoha nii cachane coitucuhacaanu,” naauruha Jorioocuru curuaanaane janate:

<sup>25</sup> “Osaaotoha nii cachane coitucuhacaanu canu. Acaihanejein maosa nihanune caje, inae enene conoha canota neinchana coitucuujeun,” naane janate:

<sup>26</sup> “Chatohaneente chete nitohaneein conoha inotane coinata,” naain bajaauruha coaitenne janate:

<sup>27</sup> “Inaera inara rai aitoonna. Chatonaaina nenacaaen bereeun. Chanuna coaiten enacooauneein inara rai bihanune jerequiche. Jerihane inara netonaite nere tonorana jerequiche,” naane janate:

<sup>28</sup> “Iite laaen nii cache ere tonoraai. Canacaanuna jana, jelai tein Moisesa ere tonoraacaanu. <sup>29</sup> Moisesa aina iriha Cana Coaunera neechana coitucuhacaanu. Jana nii cache coitucueraai caoachanainejein. Chacaje chaainti ecoonane,” naain nii maosa nerautanaa cotaicha rijitucuruhane janate:

<sup>30</sup> “Tara canota tihane caje coitucuhichene. Niheichu: ‘Naaajoain cajete uhe,’ naain coitucuheiche. <sup>31</sup> Cana Coaunera bajaa osaaonaaurune tonoraeniha Cana Coauneraane coitucuhacaanu raotojoein. Acaihanejein nere tonoraain niicha jerei ichaain nena cache bajaanete coroatajane Cana Coaunera. <sup>32</sup> Nihei chunei, inoaelu caje coauneein nitohaneein maosaneein nejanoaa leinjiin cachane jana nota cono tera. <sup>33</sup> Cana Coaunera caje unaa nenihane noote cathanai ichare,” naane janate:

<sup>34</sup> “Osaaotiin nejanoaaina jaun noote canacaanu relanaa jereeita,” naain nii maosa sitaure ita taojiaauruhana jaan loreri caje.

<sup>35</sup> Inae nii maosa sitaauruhane coitucuriin, coaraa cuha Jesusone janate que taca uhe. Nii jaunte caje bajae:

“Cana Coaunera Calaohi esenetaaina,” naain bajaane janate:

<sup>36</sup> “Eenje. Carai beeuna, rauhijiriin Cana Coaunera Calaohi nihane coitucuhin esenetaera Curuaanaa,” naane jana:

<sup>37</sup> “Canuna acaneeun,” naa Cana Coaunera Calaohi Jesusone janate, <sup>38</sup> nacatiha neseonraain:

“Esenetaanura Curuaanaa,” naane janate:

39 “Canuna caa chauratane que turuun, maosacuru niha natiin, conoha rai notane coina. Jana, notaa nocoet-onacaauru maosaneein nihane coina,” naa Jesusone janate, 40 cuu aonajeeuruhana jaun:

“Canacaanu netonainoona maosaneein nihacaanu,” naa tabaauru fariseeocurune janate:

41 “Maosa neeichene, caseteco coariheeicheein osa coreniha niqui. Nete, ‘Itolere canacaanuhacha ichai coaraain coitucuhin ichacaaunne jaun maosa nihaacaanu,’ naaichene jaun, caseteco coaraa curiquichein nii coreniha,” nae fariseeocuru rai Cana Coaunera Calaohi Jesoso.

## 10

*“Chariji teeinti, acuujuu edaa enoe. Niite asijiauto ne,” naa Jesusone*

1 Niritohane baihate: “Esinaena rauhijiriin aitoreeunni. Carenero ucuha acuujuu edaa enoite asijiauto ne. 2 Jana, rauhijiriin nacuujuu cuhane enoite beraicha esine ne. 3 Acuujuu beraichate, janone acuujuu joracaain, enohin curuaacuru curuaacuru que curuaatein, nii carenerocuru cotihacane tajiha uure, acauru beraicha nihane ere coitucuuruhana jaun. 4 Nitohaneein cotihanajaain, inae saain mituuru jana, acauru ajiniha cuujihane jana, caaijie cuure nii carenerocuru, acauru beraicha nihane coitucuuruhana jaun. 5 Jana nejelau cotihanaacanete, que janoriin soroore, nejelau ere nihane coitucuuruhana jaun,” 6 naain niqui relanajae Cana Coaunera Calaohi Jesoso, coitucuuruhane coina niqui. Nete, “Naaonjoain quete aite,” naain aonaain coitucurene.

*Cachaauru corenihate oha cureein Jesoso*

7 Nii jaunte, rauhijiriin aonacuruhane coina:

“Leinjiin canuhachana jianacoo cacha mitaeranu que nenea neun. Cacolane cana Inaca Cana Coaunera rene turunaa nainihe chunei. 8 Nii jauriaa cajiniha unacaaurute, nechuu jataain cacha coritaeraaunu que unacaaurulu ne niqui. Nete, nere tonoraarene cacoitucueranuuru cachaauru. 9 Leinjiin cacorenihachate naine, cana Inaca Cana Coaunera bijiu tacaain aina neeichene. 10 Arajiite inara curuaanaaneein nenea jere, nechuu jataain nohaneein inara coritaain. Acauru esenetaain, acauru ere tonoraeraaurute caoachanainejeein nitajiha cuurureein. Canuna turuun, raotojoein rachoojoein cha latelanaala Cana Coaunera aina neeichene coina. 11 Canuna esinae rauhijiriin inara curuaanaanu que letononeein neun. Nii jaunna oha cureeunni satiin canu

cachaauru coreniha, nabana necairichaauruhane coataa, satiin quere tonoraain esenetaeraauru, necairichanaa coaraelanaala rauhijiriin Cana Coaunera aina nihane coina. <sup>12</sup> Nii curuaanaa neein nena jereraaurute, nechu jataain core coinaacha aihuruhana jaun, niha acaauru aina nejerateein acaauru coineterane, cachaauru jaohin ratiriin sorooruhane acaauruhacha mucuhin sooruhane, cajihaneein ita caje riaaneeure. <sup>13</sup> Nitohaneinte rai cachaauru ratiriin soroore, nechu jataain curuaanaa neein nena jerecuruha core coinana jaun, coaraain cuu ninaauruhane coina. <sup>14-15</sup> Canunajian nenacaen caohacha nejeein curuaanaaneein neeun. Charijieein teeinti cacoitucuhiche nii rijijieeina Ofa coitucuun. Nii rijijieein inachu, canu cachaauru coitucuun. Jerichanejeein techu coitucunajaanune rijijieein cacoitucuure. Canuna canu cachaauru coreniha caraajenihane neteein oha cureeunni. <sup>16</sup> Nihachu naain nejelau canu cachaauru, cotihanaacaun nete ne, ita aina inara tihanune coina. Cotianaacaun nete, quere tonoraain uurureein. Inae nitohanihanena leinjiin canuhacha inara curuaanaa neein niha cureeunni, nitohaneein ita aina inara tihanu ne.

<sup>17</sup> Nere tonoraain caletoaana jaan ichacaanuna jaunte, jataain cacoelai cana Inaca Cana Coaunera. Nii corenihana caraajenihane netiha cureeunni, casohin cajaanoruhane coina, nena ichanaa cureeunni. <sup>18</sup> Canu jerenihanune, nihei chunei casohin cajaanaa nainerihe. Nena caraajenihane netiha cureeunni, nitohanihanune coina caletoaa Ofa Cana Coaunerana jaun,” nae Cana Coaunera Calaohi Jesoso. <sup>19</sup> Niritoha Jesosone esenetaeraauru Jorioocurute, nii esenetaauruhichuru caje nejelau neleruhin neeure. <sup>20</sup> Niichurute: “Chanuna caa osaaonaa nechu aansai jaeloroheneein nena cache ere tonoraare,” naaure tabaauru itarai. <sup>21</sup> Nii jana nii esenetaaurerate laaen:

“Osaaocane noote caritiin erere. Chasiina jana osaaocane maosacuru nota cono tere,” naaure ita rai nejesinajeein.

*Cana Coaunera Calaohi Jesoso raarenihana Jorioocurune*

<sup>22</sup> Inae elohena nihane janate, Jerosaleeun ita taojiaain nii loreri inoasi Teenforo besaute beseta bitoaaure Jorioocuru. <sup>23</sup> Nii jana nii Teenforo coonri seonjoan- Salomoon curuaa siriin nena asaae amuhemuheca Cana Coaunera Calaohi Jesosone jana <sup>24</sup> curuaacotaain, acaauru cataaun teteriin:

“Cha carajana erereeii coitucuhacaanune coina. Rauhijiriincha letonoaneein ereeu, esinaae Curisitoneeine,” naauruha Jorioocurune jana:

<sup>25</sup> “Inae bihanulu. Nii jana quesenetaheeichelu. Inae caletoaa Ofana jaan ichacaun inara notaracaa. <sup>26</sup> Nii



coaraqliche niqui. Nete jauriaa aitocooaunne tocohanaein canu cacha neneeichene jaunte, caje nainaain quesenetaneeiche. <sup>27</sup> Coitucunajaain nihanune rijijieein techu, cacoitucuhin quere tonoraain neure canu cachaauru. <sup>28</sup> Canuna acaauru rai nitajenaachara nejeein nena ichaonaa teeun. Chaelai janonaa bananeriaain nitajeeuruhane. Niheichu chaaen cacaje rulunajaera. <sup>29</sup> Satiin curuaanaacuru curuaanaa Ofa Cana Coaunera carai tenajaana jaun, nihei chunei cacaje rulunajaera. <sup>30</sup> Canuna, Ofa aina leinjiin Cana Coauneraneein nihacaanu,” naa Jesusona jaunte, <sup>31</sup> ajeri mucuutaure Jorioocuru, que bodoosihuruhane coina.

<sup>32</sup> Nii jaunte: “Itolere caohachana ichaaun satiin coara-jeeichene notaracaae, Ofa letononeein. Chatohanei corenihanana nitoaneein ajeri que canu bodoosicheeiche,” naa Cana Coaunera Calaohi Jesusone janate:

<sup>33</sup> “Caohacha ichaaine coreniha ajeri que ii bodoosiriahacaanu. Cana Coaunera niha nocoetiin, Cana Coaunera rohecaaina jaunna ichana jerichaanu. Cana Coaunera niheei. Raujiaain cachaneein natiinte Cana Coaunera niha nocoetohi,” naauruhane jana:

<sup>34-36</sup> “Inarate casohin cajaanaa jerequiche, ‘Ofa cana Inaca calaohi nichaaun,’ naanune coreniha. Chaaen techu nii coreniha, ‘Ofa cana Inaca Cana Coaunera rohecaaa,’ cacoeiche, Cana Coaunera chujian raajenhane, ‘Canu calaohichuru’ naa inoaelu ichauhenaauru rai, rai quiricha inoaei cuhanena jana, esenetaaichelu satiinina jaun chujian, caa chauratane que caletoaa Ofa cana Inaca, niicha jerenohi ichacaunne coina natiin. Inasiina Cana Coaunera rohecaareun, ‘Ofa Cana Inaca calaohi nichaaun,’ naanune coreniha. <sup>37</sup> Ichaa Ofane tocohanaein cha ichaenihanune coa canu esenetaache. <sup>38</sup> Aihane jaun, canu esenetaeneeichene niha-natiin, nii canuhacha ichai coaraain esenetaaichenete caohachae. Nii ainate canu aina niha Ofa Cana Coaunerane jana, canu rai Calaohineein aina nihanune esenetaaichene caohachae,” naa Jesusone jana,

<sup>39</sup> coaiten mucuhin amanaa jerecuruhane jana, acaauru que janoriin amue Jesoso.

<sup>40</sup> Acaauru que janoriin amuhinte Jorodaan jerau cauha cue. Nii jauriaa cachaauru coujunacatihalu Joanna jaun turuhin cuu ne. <sup>41</sup> Nii janate rene turuha uure arajiin cachaauru. Cuu turuhin coaraain:

“Esinaete chuhisi rauhijiriin aite Joaan, caa cacha que. Niicha ichai ichaain cana notaaca Jesusone rijijieein cana notaacane que airijiinte, esinae rauhijiriin aitohane tocohane,” naainte <sup>42</sup> Jesoso esenetaaure cuu nenacaauru cachaauru.

# 11

## *Oha Lasarone*

<sup>1</sup> Naain Betaniau coroatajai baihuru aina nenea Lasaroneein curuajai jetaote, banejelanaala cunaite.

<sup>2</sup> Marata, Mariha, naa nii baihuru curuaa. Nii Marihate, Cana Coaunera Calaohi Jesoso tija choaae erene jujui jataain coreti chorohin, couturiji que jacoraera ne.

<sup>3</sup> Nii jaunte cunaitiha nii acauru cona Lasarona jaun, “Cunaitiha iicha belaaicha curuaanaa,” naain Jesoso rai be-rateeure.

<sup>4</sup> Nii jaunte Jesoso rene turuhin beeuruhane jana: “Coatiha nii cuaaetoha nii cunai caaun orihaain. Cana Coaunera coitucuhin, ‘Caohatoha Cana Coaunera Calaohi,’ naain Cana Coaunera Calaohi coitucuuruha satiin cachaaurune cointate cunaite nii cacha,” naainte cuelanaala cuu coroata janohin ne Cana Coaunera Calaohi Jesoso. <sup>5</sup> Nii baihuru aina curataain belainaaca natiinte <sup>6</sup> “Cunaitiha Lasaro,” naain berateeuruhane jana. <sup>7</sup> coroata janohi cuu nihane baiha:

“Chajaauchete coaiten Jodea cunichaache,” naa Jesoso, aina nerelanaa nichaanune raine janate:

<sup>8</sup> “Jaitinootera carajaje, ishohin iijaonaa jerecuruha Joriocuru, ajeri que ii bodoosiine. Nii atiin inachura coaiten ucuaae cunaa jereeite cacha relaera,” naacaanune janate:

<sup>9-10</sup> “Tana, cojoanonaateein caletooa Ofa Cana Coaunerana jaan ichacaaunne nihane coitucuhichene. Ichaenihanune, canuhachana baasoneein nedareeunni,” nae Jesoso.

<sup>11</sup> Nii baihate: “Siniha cana belaaicha Lasaro, nocoaa inae nocoaa curichaaun,” naa Jesusone jana:

<sup>12</sup> “Aihana jaunte chujian, sinihana jaun nerautareein,” naacaanu. <sup>13</sup> Esinae sininaa que jecha aite naacaanuna jaunte,

<sup>14</sup> rauhijiriin: “Inae oha Lasaro. <sup>15</sup> Caoacha quete cuu nenihanune jana ai. Inae laaen jataain quesenetaa curiquicheein,” naa Jesusone jana:

<sup>16</sup> “Chajaauchete cana netonai aina cunichaache, aina jiniquiiin ohacachene cointa,” nae nii Tomasi canacaanu rai. (Nii Tomasite curuaateeure Fafione neei, fafione nihana jaun.)

*Onaa ichateein, rai ichaonaa tera niha Cana Coaunera Calaohi Jesusone*

<sup>17</sup> Nii janate Betaniau turuha Jesusone jana, inae jena janoha atane neruujuene beure. <sup>18</sup> Saaneein itaraeniha Jerosaleen caje nii Betaniane jaunte, <sup>19</sup> tajiha caje turuha-coaure Jorioocuru, nii onaa cacha baihuru Marata, Mariha, naaonjoain suujua nunaauruhane cointa.

<sup>20</sup> Nii janate turuelalajeein tajiha uujiha Jesusone coitucuriin que taca uhe Marata. Jana, Marihate, loreri asaae nedae.

<sup>21</sup> Nitohanein cuhin Jesoso que tacaain: “Cau neeichene jana nihane, oriheiche canejerata curaanaa. <sup>22</sup> Nete, chaelai bajaichene ichei tiha cureeinche Cana Coaunera,” naa Maratane jana:

<sup>23</sup> “Ichanaainte coaiten nichaurareeinche,” naa Marata rai Jesusone jana:

<sup>24</sup> “Eenjeen airichaaichene chuhisi. Inae besautiha cana janonaane banate, coaiten ichanaain ichaoha cuurureeinche oonacaauru niquicha,” naa Maratane jana:

<sup>25</sup> “Canuna onaa ichatein, rai ichaonaa nitajenaa charanejeein nenaana jaan teraneeunche. Quesenetaerate, ohane niha natiin ichaoha cureeinche. <sup>26</sup> Satiin jaiti ichaohin nenacaauru quesenetaanete, ohane niha natiin, chabana nitajenereeinche. Caa caitoonjoan esenetaaichena,” naa Jesusone jana:

<sup>27</sup> “Eenjeen, iite Curisito neein- Cana Coaunera Calahineeinchene esenetaanuchera. Iite caa chauratane que turuha uha niicha jerecuri canacaanuhacha cohajei inechera,” nae Marata.

*Lasaro atanebana choae chanaa Jesusone*

<sup>28</sup> Niritohane baihate, nocoasai Mariha cotihaca cue Marata. Rene turuhinte: “Taute turue cacha relaera. Ichotijiaeratiha jaunna ii cotihaca uun,” naa Maratane jana, <sup>29</sup> luhecotariin nimihuritiin Jesoso coaraa uhe Mariha. <sup>30</sup> Nii janate nii ratiriha Maratana jaaun jelaiha ne Jesoso, jaiti nii neseu turuelanaala. <sup>31</sup> Luhecotariin nimihuritiin uha Marihana jaunte caaijie uure nii loreri asaae aina neein suujua nunaa nenacaauru Jorioocuru, “Naain atanebana choaae jecha inaderaa cue,” naain niqui caaijie cuure nii Jorioocuru.

<sup>32</sup> Nii janate Jesoso rene turuhin nacatiha neseonraain:

“Cau neeichene jana nihane, oriheiche canejerata Curuaanaa,” naain <sup>33</sup> chanaa Marihane jana, aina chanaauruha Jorioocuruna jaun, jataain inaderaain:

<sup>34</sup> “Chu atane rucuhecure,” naain bajaa Jesusone jana:

“Nota taute atane rucuhecurera Curuaanaa. Chajaautejian coaanicha,” naauruhane jana <sup>35</sup> chanae Jesoso.

<sup>36</sup> Nii jaunte: “Jataainte coinaderae,” naaure Jorioocuru tabaauru.

<sup>37</sup> Nii jana leochaaurute jana: “Tajian caa cacha, maosa nota cono tihalune. Tajian jana naineriha chaelai ichaa oheniha Lasarone coinane,” naaure nii leochaauru Jorioocuru.

*Oo caje ichanaa Lasarone*

<sup>38</sup> Nii jaunte atane bana rohan turuhin, coaiten inaderae Jesoso. Ajeri jachu cuhane ita rucuhecuruha Jorioocuru, jelai ajeri que fuhina jaun:

<sup>39</sup> “Joracaauche,” naa Jesusone janate:

“Inae jerihane niriniche cache natiinta. Inae jena janohache aiha cachane natiinta Curaanaa,” naa nii nijiaonaa cache bai Maratane jana:

<sup>40</sup> “Inaera ichei, ‘Esenetaaichenete Cana Coaunera ichanohin caohati coariquicheeincha,’ naain ichei aitoonchena,” naa Cana Coaunera Calaohi Jesusone jana <sup>41-42</sup> joracaauruhane jana, dede coarajeein:

“Nariha Ofa, ii bajaanune satiin quiicha bajanojoin tenajaoqui bajaanune naineeine coreniha. Nii jaunna ichei aitoon, aonacuruha nuricho que cau nenacaauru cachaaurune coina, aonain esinae rauhijiriin ii caletohaine esenetaauruhane coinara Ofa,” naane <sup>43</sup> baihate:

“Lasaro, mituu nii lai caje,” naa Cana Coaunera Calaohi Jesoso tonijiaine jana, <sup>44</sup> tajiha conaara tijianeein mituha uhane jana: “Batuhichuchete jianacoon mituhine,” nae Cana Coaunera Calaohi Jesoso.

<sup>45</sup> Nii ainate Cana Coaunera Calaohi Jesoso esenetaaure le lauriin Jorioocuru, nii Mariha corianiha cunacaauru.

*Jesoso mucuuruhane rai neeuruha fariseeocurune*

(Mt 26.1-5; Mr 14.1-2; Lc 22.1-2)

<sup>46</sup> Nii jana, acaauru tabaauru jetaote turuhin biha cuure fariseeocuru rai. <sup>47</sup> Nii jaun jetaote itataojiaaure fariseeocuru, batirichuru curuaanaacuru, saain cocoinanacaihuri nii que ita rai ereereecuruhane coina. Nii jaun jetaote ita rai:

“Inae itolere ichaa nii cache. Inasirihacacheta. Maosacuru rautaan, onaa ichateein, lenone faain, itolere ichaa inae. <sup>48</sup> Naajeein inauheneeicha coarajihacachenete, esenetaa-coaauruha satiin cachaaurune, cana cairichaaureein Romanocuru rai cocoinanacaihuri. Cana raite caa ita taojianaana jaan loreri Teenforo chamuhitiin cana cairichaaure,” naaure jetao Jorioocuru curuaanaacuru.

<sup>49</sup> Nii jana jetaote, cuune leinjiin Caifasinein curuajaain batirichuru curuaanaa. Nii jetaote:

“Joareeinte ereereequiche. <sup>50</sup> Nita coitucuhichene, cana caohachanu que tejian oha cureein nii leinjiin cache, nabana necairichanaa coaracaache satiin Israaeli cocoaicha nichaachene coataa,” nae jetao acaauru rai nii Caifasi.

<sup>51</sup> (Coatiha suujua caje coauneein rochoin aitohi nii Caifasi. Nii ajaana cuhane batirichuru curuaanaa neein nihana jaunte coroatajane Cana Coaunera, nabana necairichaa

Jorioocurune coataa oha curichaain Cana Coaunera Calaohi Jesosone que aitohane caina. <sup>52</sup> Coatiha Jorioocuruhacha coreniha oha curihaain niqiu. Satiin chauratane sacutaain riaaneein nenacaauru Cana Coaunera calaohichuru jitariin taojiaane cointate aicheein.) <sup>53</sup> Nitohaneein oo caje Lasaro ichtatihane caje coauneeinte, Cana Coaunera Calaohi Jesoso que necosuujuaaure Jorioocuru rai cocoinanacaihuri, sohin jaaoruhane caina.

<sup>54</sup> Nii jaunte Jorioocuru rai cocoinanacaihuri rai eco-coelanaala nii Jodea batane caje mituhin naain Efaraaiun cue Jesoso. Cacha areroo rohan nenea neseu Efaraaiun cuhin cuu ne, canacaanu aina.

<sup>55</sup> Fasocoa cataihajeein, neseeuu neseeuu caje naain Jerosaleeun cuhajeeu, acaauru necoaauna rijijieein nautatajaain, necaonjoaain jatoroaain Fasocoa beseta bitohauruhane caina. <sup>56</sup> Nii Jerosaleeun turuhinte cuu cajianeein Jesoso ariirijieeu. Cuu nenea ita taojiahuruna jaan Teenforo asaae ita taojiaain:

“Beseta bitohanacha urichaii,” naain itacaje bajaure, <sup>57</sup> “Chunocoha, ‘Cuute ne,’ naain coitucuhane, beeinete mucuhin raeratihacaanu,” naauruha fariseeocuru, batirichuru curuanaacuru, naaonjoainurine jaun.

## 12

### *Jataain Jesoso belaiha Marihane*

<sup>1</sup> Saota janonejeein lanajeeca Fasocoa janonaane janate, nii oo caje niicha ichtatei Lasaro coaraa cue Jesoso naain Betaniau. <sup>2</sup> Nii janate cuu beseta bana rijijieein Jesoso coroaateu, raaoti lenone que. Lasaro bai Maratate, acaauru rai lenone lauriae.

<sup>3</sup> Nii jana litoro cataaun uujoaain erene jujui coreti uhaain, que Cana Coaunera Calaohi Jesoso tijia rujuaain, couturiji que jacoraa Marihane jana, juujijiaain bijiihaque nii loreri asajai.

<sup>4-5</sup> Nii jaunte: “Chanuna nichata fashai janonei amihanenaa core tochaneein necoretelanaala aihure, cairichaihuri coroatajanenarichaae,” nae nii canacaanu lechoonca coroataja Simoon calaohi Jodasi Isacariote, nii Jesoso coulurujueranu. <sup>6</sup> Coatiha esinaae rauhijiriin cairichaihuri coroatajanena jerihane caaun aitoi. Asijiautonihana jaunte aite, nechuhataain aca nii coriqui raane jerena caaun. Aca canacaanu coriqui beraichaneein nihana jaun raotojoein basijiauhane cointate aite.

<sup>7</sup> Niritoha Jodasine janate: “Coa roheca. Cajabereero rucuhacuruha najaannu que niicha rucujuei nihana jaunte ichae. <sup>8</sup> Cairichaihuri coroatajanena jereinete, nereein

inoanlu netojoein arajiin cairichaihuri. Coatiha inoaelu netojoein cau nerinaaunni inara aina,” nae Jesoso.

*Lasaro sohin jaonaa jerecuruha Jorioocurune*

<sup>9</sup> Nii baihate, Betaniau niha Jesusone coitucuuriin coaraa cuure Jorioocuru. Coatiha acaacha coaraa aihuruhi. Lasaronii oo caje niicha ichatei coaracuruhane coinane maajeente aihure.

<sup>10</sup> Nii jaunte ita suujua rijitoein, ita suujuau tacaain, “Chatohaneeinte acaentonai sohin jaonaaneeineta,” naain <sup>11</sup> nii Lasaro netonai que necosuujuaaure batirichuru curuaanaacuru. Ohane jana ichatiha Jesusone coaraain esenetaauruha le lauriin Jorioocuru, acaauru jianeeinna jaun.

*Jerosaleeun turuha Jesusone*

*(Mt 21.1-11; Mr 11.1-11; Lc 19.28-40)*

<sup>12</sup> Nii janate Jerosaleeun cuhacoaaure arajiin cachaauru, Fasocoa beseta bitoaa.

Nii cojoanoote turuha urichaain Jesusone coitucuure. <sup>13</sup> Nitohaneein coitucuhinte, elele alo saaujiin amaain que taca cuure. Que tacaain: “Caohacha quete uhichacanacaanu coroatajaneraunu que Cana Coaunera letono. Cachuura,” naain, “Caa Cana Coaunera letono belaihuruhine itolere cachaauru. Caa Isaraeli Curuaanaa *Rey* belaihuruhinera,” naain, ehequiin corojeein Jesoso raare. <sup>14</sup> Nii janate cabario tocohaneein nena boro ichoaae iniin laulauquiin turuha uhe Jesoso, aitoa Cana Coaunera Quiricha Inoaesi cuhanene tocohaneein:

<sup>15</sup> “Coo coasichachera Jerosaleen cocoaichacuru.

Coaracuche, boro choaate

laulauquiin turuha ureein

inara Curuaanaa *Reycha*,”

naa Cana Coaunera Quiricha Inoaesi cuhanene tocohaneeinte turuha uhe Jesoso.

<sup>16</sup> Nii janana caoachanae netojoein aonajihacaanu aina nerelanaa nichaanune. Nii baiha inae dedeeu cuha Jesusone janate, canacaanu suujuau neeorite, niriitiin aitoa Cana Coaunera Quiricha Inoaesi cuhanene tocohaneein aihane coaracaanune jaun.

<sup>17</sup> Oo jana nii Lasaro ichatiha Jesusone coaraauru cachaaurute nii leochaauru rai beeuruhana jaun, <sup>18</sup> nitohaneein onaa ichatihane coitucuuruhana jaun, Jerosaleeun turuha Jesusone jana, que taca cuure. <sup>19</sup> Nii janana coarajena-jain: “Inae coaraquiche. Inae cha chana nainihaacacheta. Coaracuchera. Saainte aina cuurera,” naain ita rai ereerejeeure fariseeocuru nejesinajeein.

*Jesoso arihuruha Curiecocurune*

<sup>20</sup> Naain Jerosaleeun cuhin Fasocoa beseta bitoha cunacaauru aina cunacaauru <sup>21</sup> Curiecocuru tabaaurute Jesoso aina nerelanaa Ferifi rene turuhin: “Jesoso coaana jerichaanura curaanaa,” naaure. (Nii Ferifite Calileea batane que nena Betesaaida cocoaichane.) <sup>22</sup> Nii janate Aanderesi rai bihana jaun, jiniiquin cuhin Jesoso rai biha cuure. Jesoso rai beeuruhane janate:

<sup>23</sup> “Inae laen ecu tiha ohanune cojoinaca. Canuna inaraacha cohajei cachaneein neeun. Ohanune baihate satiin curuaanaacuru curuaanaa niha caenoaa cureein Ofa Cana Coaunera,” nae Jesoso. <sup>24</sup> Niritiinte, “Esinaena rauhijiriin aitoon. Charijieein teeinti lecuhejeein temueraeniha arosone, omaroelanaala jerichanejeein ne. Jana atane choaee naluhane, omarohin arajiin inacaain nefae. <sup>25</sup> Nii rijijieein techu ne cacha netonai. Niicha jereeicha ichaa cachanete, temueraeniha ne, aiha arosone rijijieein jerichanejeein ne. Nirijieeinte, nechu jataain joaereein niha cureein. Jana cha que casilanaala Cana Coaunera jerenohi ichaa cachanete, Cana Coaunera bijjiu tacaa cureein. Jana, ainihanete nitajiha cureeincha. <sup>26</sup> Quere tonorana jerera, quere tonoraaine. Nii quere tonoraerate, nii cuhanune jaun niha cureein caniha. Chaen techu, quere tonoraera, Ofa rai coroaenacai ichareein,” nae Jesoso.

*Orichaaine biha Cana Coaunera Calaohi Jesusone*

<sup>27</sup> Nii baihate: “Nererojoecaa jataain casuujua. Chatohanerihanu coaetaata. Nihei, ‘Cacorataaneeu Ofa, casohin canu ateinaauruhane coataa,’ naain erenaa nainihaun, nii coina cau turuhanune jaun,” naane baihate, <sup>28</sup> “Ofa, coaiteen iicha ichana jerei ichaain caa cachaauru notaacu, aihute coaraain, ‘Caohatoha Cana Coaunerara,’ naaurumiin satiin cachaauru coaraaincha,” naain Cana Inaca Cana Coaunera bajaa Jesusone janate dedeeu tonii:

“Inae ichacaaun cacoitucuuruhane coina. Inae coaiteen icharichaaunni coaraain canu nichaaunne coitucuuruhane coina,” naain toni dedeeu. <sup>29</sup> Naa dedeeu toniine jana:

“Arara jecha,” naaure nii cuu neein aonajeeurera cachaauru. Nii jana tabaauru: “Cana Coaunera letonote aite,” naauruhane jana:

<sup>30</sup> “Coatiha canu rai aitohi. Aonaquichene cointate inara rai aite. <sup>31</sup> Inae chauratane curuaanaa Moconajaera aina jaoleneein neeururichain inae Cana Coaunera coitucuruhi. <sup>32</sup> Inae ecuun coroso que nihanunena, satiin quesentaaurera raa cureeunnicha,” nae Cana Coaunera Calaohi Jesoso. <sup>33</sup> Niritohane ainate, “Naaonjoaainte oha cureeincha,” naain coitucure satiin cachaauru.

Niritoha Jesusone jaunte: <sup>34</sup> “‘Onaachara nejeeinte nir-ijieein niha cureein Curisitora,’ naa canacaanu quiricha inoasesi cuhane natiin, chatohaneeina coroso que ecuun nere nii cachaneein nejanohanaa. Charijina nii cachaneein nejanohanaa ne,” naauruha Cana Coaunera Calaohi Jesuso rai jana:

<sup>35</sup> “Canuna cacha cononeein neeun. Basijiin reintiarinne inara aina neeorihun. Quesenetaauche, inae inara ratirihanune, nocohenaanau nitajeeichene coataa. <sup>36</sup> Cau jaiti nihanune cojoataa quesenetaauche, canu cachaneein neeichene coina,” naane baiha jianatoroaain acaauru caje naasi Cana Coaunera Calaohi Jesuso.

*Jesoso esenetaaureniha Jorioocurune*

<sup>37</sup> Itolere maosa rautaaain, onaa ichateein, lenone faain, naojoaan acaauru notaracaae Jesuso natiinte, esenetaaurene Jorioocuru.

<sup>38</sup> Inae niritiin laenaain bihalu inoaelu Cana Coaunera Ere bera inoasesi Isaihasi najaunte, nii laconaa nainene:

“Cha canacaanuhacha  
beebejei esenetaete  
curuaanaa,”  
naainte:

“Chariji jana iicha ichai  
coaraain esenetaete  
curuaanaa”

naain laenaclu Isaihasi. <sup>39</sup> Nii jaunte esenetana jerecurenihaluna jaun coaiteen laenaain:

<sup>40</sup> “Jauriaa esenetana  
jerecurenihana jaun,  
inae acaauru suujua anioaan  
Cana Coaunerana jaunte,  
turuha Cana Coaunera Calaochine jana  
coitucuurene,  
nota que coaraain  
nesoone caaun  
enaraa coitucuuruhane coataa.  
Nitohaneeinte  
tenajae Cana Coaunera,”

naainte <sup>41</sup> laenaclu Isaihasi inoaelu, cajiha cana rai chau-ratane que turuha uha Jesusone ajiniha. Ichoaichanihate nii coaraain caritiin laenaclu Isaihasi inoaelu.

<sup>42</sup> Nii natiinte saain esenetaaurenihane caniha, esenetaaure araijiriin. Cocoinanacaihuru tabaauru niha natiinte esenetaaure niqui. Nete chunei rai beeurene, nii ita taojiauruha najaan loreri sinacoca caje sitanajaa fariseeocurune coataa.



43 Acaauru belaiha Cana Coaunerane rautaauruhane amuritoheriin acaauru belaiuruha acaauru araichurune jerecuruhana jaun.

*Nereecha que cachaauru coulurujiha Jesusone*

44 Nii jaunte tonijiaain: “Quesenetaera, coatiha canuhacha esenatarinaain. Nii caletoaera Ofa niha natiinte eseneta-rein quesenetaera. 45 Cacoharaerate nii caletoaera netonai coarae.

46 Canuna caa chauratane cono neeun. Canuna caa chauratane que turuun, nabana nocohenaana niha quesentaerane coataa. 47 Quere tonoraeniha chuneine coatiha canu coulurujuerinaauni. Coatiha caa chauratane que nenacaauru coulurujueranu que uhaun. Jianacoon niha caa chauratane que nenacaauru cachaaurune coinana turuun. 48 Chariji teeinti, ‘Caohachaita,’ naain quere tonoraene. Nite coulurujiha cureein caa quicha beebejei Erenaa, inae saa cana janonaane bana, 49 casuujua caje rocohin aitenihanune jaun. Caletoaera Ofa aitoonjoaacha quena caa aitiin inara relaaun. 50 Ofate caletoaere nitajenaachara nejeein niha canu ere esenetaain tonoraerane coina. Nii jaunna caletohane rijijieein, caa aitoon,” nae Jesuso.

## 13

*Aina nerelanacaauru tijia culeeca Jesusone*

1 Le janojoeein lanajeeeca Fasocaa besetane janate, inae Cana Inaca rene cauha cuhane catainaaecane coitucue Cana Coaunera Calaohi Jesuso. Itolere janonaa bana chauratane que nenacaauru cachaauru belaiha coichana aina cutaainna jaunte, esinae rauhijiriin belainaacane coitucuruhane coina raajenihane netiha cureein. 2-4 Nii jaunte aina nerelanaa nichaanune aina lenone Jesuso. Nii janate cuune canacaanu aina Simoon calaohi Jodasi Isacariote, suujua saruha Moconajaerana jaun Cana Coaunera Calaohi Jesuso coulurujueranu. Nii jana satiin curuaanaa neein tiha Cana Inaca Cana Coaunerane baiha, Cana Coaunera caje uhanne coitucuhin, inae jelaiha cauha cuhane coitucue Cana Coaunera Calaohi Jesuso. Nii janane jaiti nitohaneein nerichaaaine coitucuelanaala lenonejihacaanune jana, lenoneo jiaaeriin, nobiri rocoriin, jaleri que faino balutaain, 5 baandeja cuhane acau chotaain, canacaanu tijia culejeein, nii rai faino que canacaanu tijia jacorae Cana Coaunera Calaohi Jesuso.

6 Nii baihate Simoon Fedoro tijia culeena jeriha Jesusone jana:

“Iina catiha culeena jereeite curaanaa,” naa Fedorone jana:

<sup>7</sup> “‘Naaonjoain coinata caa ichae,’ naain coitucuheei. Nii baihate coitucuriqiin,” naa Jesusone janate:

<sup>8</sup> “Chaaelai janonaa bana nihei catiha culeequine jerichaaunne,” naa Fedorone jana:

“Ti tijia culejenihanune, canu aina nenea naineriheini,” naa Jesusone jana:

<sup>9</sup> “Aihana jaun, coa catihacha culeeca, cacoi, cacoturi naaonjoaine maajeein culeecura Curuaanaa,” naa Simoon Fedorone jana:

<sup>10</sup> “Enanejeein necaojoanaa, jitariin jaberocone maajeein culeera latihee. Leinjiin rai tijia culeeraachate late, enanejeein necaojoane baiha niha natiin necalanoaaeca rai tijia najaun. Saainte niqui culeenohineein neeiche. Nete ne inara jana leinjiin jaiti <sup>11</sup> culeenjoinelanaala,” nae Jesoso, Jodasi Isacariote que, coulurujuerichaaain Jodasi Isacariotene coitucuha najaun.

<sup>12</sup> Acaauru tijia culeecane baihate, nobiri curujuaain, coaiten mesa choae nelauriaain: “‘Naaonjoaane jaunte caa cana tijia culeje,’ naain coitucuche. <sup>13</sup> Rauhijiriinte caque, ‘cacha relaera,’ naaiche. Chaen techu, ‘Curuaanaa,’ naaiche, rauhijiriin aca nichaaunna jaun. <sup>14</sup> Canu, inara relaeraneein, inara curuaanaa neein nihanu natiina, inara tijia culejeeun. Nirijieein inara suujua coaraain ita tijia culeequichenete caohachae. <sup>15</sup> Charijieein teeinti aihun, nirijiein chabana necoasitaelanaala, raotojoein ita belaaain neeuche.

<sup>16</sup> Inara curuaanaa neein, inara relaera neein nihanu natiin, inara tijia culejeein nihanune jaun, jerichanejeein carijijieein satiin cachaauru belaaain, inara suujua caje coauneein niha natiin, chaelai ichacuche, ‘Naaonjoaain nihanune jaun, naaonjoain ichana nainihaaun,’ nanaa coacuelanaala ichacuche. <sup>17</sup> Inara suujua coaraain, ita coroataja neein, ita belaaain, caa caitono aonaain tonoraachenete, raotojoein neriquicheein. <sup>18</sup> Nete, caohachanainejeein satiin ena neeichene rijijieein nenereicheein. Janijiina satiin inara raain neeunlu niqui. Nete, ‘Caniha nejeratereein leinjiin caniha lenonei,’ naalu Cana Quiricha Inoaesi cuhanene rijijieeinte, caniha nejeratereein leinjiin. <sup>19</sup> Jaiti aihei niqui, nena letonoha inara rai beeun, inae caque nejeratihane, Cana Coaunera Calaohi Curisito nichaaunne coitucuhichene coina.

<sup>20</sup> Esinaena rauhijiriin aitoreeunni. Chunocoha quiicha letoai raanete, jerichanejeein canu raane rijijieein rareein. Nii canu raane rijijieein techu, caletoaera Ofa Cana Coaunera rareein,” nae Cana Coaunera Calaohi Jesoso.

*Coulurujiha Jodasine biha Jesusone*  
(Mt 26.20-25; Mr 14.17-21; Lc 22.21-23)

<sup>21</sup> Nii janate: “Esinaena rauhijiriin aitoreeunni. Leinjiin inara caje cachate cacoluruheca cureein,” naain be Cana Coanera Calaohi Jesuso. Niritiinte jataain inaderae Jesuso, coulurujuerichaain niicha belaauna jaun.

<sup>22</sup> Nii janana, itaacha cajanacajanaain itaacha coaracaanu aina nerelanaa nichaanune, “Caa quete aite,” naain nii naitoonjoa coitucueniha caanune jaun.

<sup>23</sup> Nii jana Jesuso roan neein lenonejianune jana, <sup>24</sup> canu cojoeluhin: “Chana icholuruherete, curuaanaa” naain caque bajaeratiha Simoon Fedorona jaun, <sup>25</sup> Jesuso roan naurutaain nuricho nainejeein metoroaain:

“Charijina icholuruherete, curuaanaa,” naain bajaanune janate:

<sup>26</sup> “Saan. Coarajeeujia. Obene que faan setejiariin tihanune jana raerate, aca nereein,” naain obene que faan setejiariin, Simoon calaohi Jodasi Isacariote rai te Jesuso. <sup>27</sup> Obene que setejianohin faan raain quiha Jodasine rijieonritiinte, Jodasi suujua sarue Moconajaera, Cana Coanera Calaohi Jesuso coulurujiiane coina.

Nii jaunte: “Letonoaneein, ena nii iicha ichana jerei ichaau,” nae Jesuso, Jodasi rai. <sup>28</sup> Nii janana, “Naaonjoain ichaane coinata aite,” naain coitucuenihacaanu. <sup>29</sup> Nii jaunna, “Aca canacaanu coriqui beraicha nihana jaun jecha beseta rai chaelai inejei coretihane coina aite,” naacaanu. “Ainihane, cairichaihuru rai chaelai inejei coreteein tihane coina jecha aite,” naacaanu coitucuenihacaanune jaun. Nii janate aine. <sup>30</sup> Nii setejiariin Jesusohacha tei faan quihane baihate mituha cue, inae nocohecane jana Jodasi.

*Namu biha Jesusone*

<sup>31</sup> Inae mituha cuha Jodasine janate:

“Inae laaen caohatiin, rauhijiriin inaraacha cohajei Cacha Calaohi nichaaunne coitucuriquicheein, chaen techu canu aina cuaain, ‘Naaonjoaan Cana Coanera’ naain Ofa coitucuriquicheein. <sup>32</sup> Charijieein teeinti, aca neein niha Ofane coitucuerateen inara que. Nii rijijieein techu, inara que canu neein nihanune coitucueratereein inae ena sorotiin Ofa Cana Coanera. <sup>33</sup> Inae carajaain inara aina nerihaaunni canaanaihuru. Canu aririquicheein niqiu. Nete, aitocooaun Jorioocuru raine rijijieein, canu cunajaan cunaa naineneriquicheein. <sup>34</sup> Inae ena nena caa erena bihanu inara rai, cacoichana aina cutaain inara belaihanune rijijieein jiniiquiin ita belaaun neechene coina. <sup>35</sup> Satiin chauratane

que nenacaaurute, quiicha relaaaurineeeichene coitucuha curureein, jiniiquiin ita belaaichene coaracuruhane,” nae Cana Coaunera Calaohi Jesuso.

*Jesoso coitucuha nocoeniha Fedorone*  
(Mt 26.31-35; Mr 14.27-31; Lc 22.31-34)

<sup>36</sup> Niritoha Cana Coaunera Calaohi Jesusone jaun:

“Chuna cureeite Curuaanaa,” naa Simoon Fedorone janate:

“Cuhanune jaun jaiti casaana nainihe. Nii baihate casaareeini,” naa Jesusone jana:

<sup>37</sup> “Chanuna ii sacunaa nainenereunte curuaanaa. Nainichaaun ichoreniha ohanune,” naa Fedorone jana:

<sup>38</sup> “Esinae chachu naineei cacoreniha ohine. Esinaena rauhijiriin ichei aitoreeunni. Iriha ataoharine ajinihate, nichata saain, ‘Jesoso cacha nihaunta,’ naa curiquiin,” nae Jesuso, Fedoro rai.

## 14

*Cana Inaca rene turunaa najaan neein niha Jesusone*

<sup>1</sup> “Coa nererojoecaache. Cana Coaunera esenetaaichene rijijieein quesenetaauche. <sup>2</sup> Lanaai Ofa loreri asaae turunaa najaan cuu turuhin raotojoein neeichene jaanu. Nenihaane jananihane coatiha berihaun. Aihana jaunna, inara turunajaanu rucuheca cureeunni letonoa inara ajiniha. <sup>3</sup> Inara nenajaanu rucuheca cuhanune baihana coaiteen ureeunni, inara raa tajiha caniha neeichene coina. <sup>4</sup> Inarate nii curichaunnine jaan coitucuhiche. Nii jaunte nii cuhanune jaun turuha cunaa nainiquiche tonajelanaala,” naa Cana Coaunera Calaohi Jesusone jaunte:

<sup>5</sup> “Nii cuhina jaan coitucuhaacaanuta Curuaanaa. Inasiina coitucuhin urichaanuta,” naa Tomasine jana:

<sup>6</sup> “Quere esenetaain tonoraachenete, Cana Inaca rene turuhin aina ichaoriquicheein. Nete laaen cacolane turueneerein chunei, rauhijiriin ichaonaa rauhi tera nihanuna jaun. <sup>7</sup> Rauhijiriin cacoitucuhichenete, Ofa Cana Coaunera coitucuhiche. Inae laaen enene caje coauneein Ofa coitucuhiche, inae cacoharaichene jaun,” naa Cana Coaunera Calaohi Jesusone jana:

<sup>8</sup> “Cana Inaca Cana Coaunera coarateeujian canacaanu quena, nii aina raotojoein nihacaanune coinara Curuaanaa,” naa Ferifine janate:

<sup>9</sup> “Inae carajaain inara aina nihanu. Ta jaiti cacoitucuhichenete, Ferifi. Cacoharaerate Cana Inaca coarae. Aihana jaun, chanuna Cana Inaca Cana Coaunera coaratihanu inara quene jerequiche. Tajian, ‘Cacoharaerate Cana Inaca Cana Coaunera coarae,’ naanune aonaquichene. <sup>10</sup> Ta Ofa suujua

que suujuaquiin nihanune coitucuhichene. Coatiha casuujua caje rocohin quiicha jerei que irihaaun. Acaihanejeein Ofaacha jerenohichana ichaaun, Ofa suujue que suujuequiin nihanune jaun. <sup>11</sup> Aihana jaaun Ofa suujue que suujuequiin nihanune esenetaeneeichene nihanatiin, itolere ichacaunne coaraquiche inara nota que najaun esenetaaichenete ne.

<sup>12</sup> Esinae rauhijiriine aitoreeunni. Quesenetaerate quiicha ichai ichareein camuritoheriin niha natiin, Ofa rene tacaain aina nerichaunina jaun. <sup>13</sup> Cuu nihanune jana, cacurajateein chaelai inaraacha latei bajaachenena, tiha cureeunni. Nitohaneeina Cana Inaca Cana Coaunera ichanohin coaratiha cureeunni, Cana Inaca Cana Coaunera coitucuhin coroaquichene coina. <sup>14</sup> Nii jaunna, chaelai bajaachene tereeunni.

<sup>15</sup> Rauhijiriin esinae cacoelaichene, quere tonoraauche. <sup>16</sup> Nitohaneein neeichenena, Cana Inaca bajareeunni, inara Coroatajanera letoaane coina. Inoaelu netiin chabana satonoe lanaalate inara aina niha cureein inara Coroatajanera. <sup>17</sup> Acate, esinae Cana Coaunera Suujue nereein. Nii Cana Coaunera Suujue coitucunaa nainecuruhi cacoitucuruhi. Inarate laaen, raotojoein coitucuhiche inara aina nihana jaun. Inoaelu netiinte, chabana satonoe lanaala inara aina niha cureein. <sup>18</sup> Coatiha inara jaohin, inara ratiriha cainerinaain. Turuhana ureeunni, coaiten inara aina nihanune coina. <sup>19</sup> Inae cacoharaaururinaain quesenetaaichuru. Inaraachate laaen cacoharaa curiquicheein, inae coaiten turuhanune. Ohanune caje ichanarihanuhina jaunte, jerichanejeein nitajenaachara nejeein niha curiquicheein, ichaohin nihanune rijijieein. <sup>20</sup> Inae inara suujua cuhane enoha Cana Coaunera Suujuenete, Cana Inaca aina nihanune coitucuhin, canu aina neeichene coitucuhin, coitucuha curiquicheein. <sup>21</sup> Quere tonoraain neite, esinae rauhijiriin cacoelaicha nereein. Niite belaiha cureein Cana Inaca Cana Coaunera. Canu netonainiha natiinna inara belaaun, inara que necoharaeratereunni, raotojoein rauhijiriin cacoitucuhichene coina,” naa Cana Coaunera Calaohi Jesoso canacaanu raina jaun:

<sup>22</sup> “Chanuna canacaanuhacha rai ecocohin, leeochoauro que necoharaerateneereite Curuaanaa,” naa nii leeochoa Jodasine jana:

<sup>23</sup> “Cacoelaichate quere tonorae. Niite belaiha cureein Ofa Cana Coaunera. Chaenna aina jiniiquiin Ofa aina niha cureeunni. <sup>24</sup> Cacoelaiheite, caa quiicha beebejei esenetaene. Caa inara rai quiicha beebejei inaraacha aonajeite caletoaera-Ofa Cana Coaunera ere ne. <sup>25</sup> Cau inara aina nihanune cojoataana, caritiin inara rai beebejeeun. <sup>26</sup> Chaaen, Cana Inaca rene cuhanunete, cacoreniha Suujue letoareein Ofa Cana

Inaca, inara suujua laraajiaain, inara suujuateein, inara coroatajanihane coina. Acate itolere que inara relareein, itolere caitoojoan que coauquichene coina. <sup>27</sup> Raotojoeinna inara rai necoeun. Canuhachana, Cana Coaunera tenojoin-raotojoein neeichene jaannu teeun. Nerinaain cabaiha nii rijijieein raotojoein neeichene jaannu teraanu. Aihana jaun, chaque casilanaala, raotojoein neeuche.

<sup>28</sup> Esinae rauhijiriin besichaaunlune rijijieeina, cau niha ureeunni coaiten. Esinae cacoelaaichenete rachoojoein neriquicheein. Nii caletoaera Ofa renene cureeunni, jelai choaae jauhecotojoeriin inara coroatajanihane coina. <sup>29</sup> Amuhanune ajinihana aitoon, inae ichacaaunne, 'Esinaete aitelu,' naain esenetaaichene coina.

<sup>30</sup> Inae nenacaaeneein inara rai ereerejerinaaunni, inae urichaaain canu coitucuuruhi cachaauru letoaeranu Moconajaerane jaun. Canu jerenihanune, caniha cha chana nainerihe. <sup>31</sup> Nena, inauhene coarajereunni, caletoaera Ofa belaaain nere tonoraanune coaracuruha satiine coina. Chajaauchete amuhacache. Inae jitariin bihanu inara rai, coitucuhichene coina," naainte canacaanu amaain amue Jesoso.

## 15

*"Canuna esinae rauhijiriin lenacai oba esine rijijieein neeun," naa Jesusone*

<sup>1-2</sup> Nii baihate aina nerelanaa nichaanune rai:

"Canuna lenacai oba esine rijijieein neeun. Charijieein teinti, lenacai oba une beraihaca, ajaanaa nainein. Caohatiin anasitiin inaana nuune cataaun uhajeein sauhin jaohaca, caohatiin nujua cutujuaain inaacane coina. Jana inacaeniha le unene, temura nainejееin tacaain sauhin jaohaca.

Nii rijijieein techu, cacoitucue lanaala, suujua coaraelanaala, rai suujua letonohacha ichara, naaonjoain jaoha cureein moconajaera rene Ofa Cana Coaunera. Jana quere tonoraain canuhacha icharatei icharate, jeelai amuritoheriin suujua laraajiaain coroatajanereein Ofa Cana Coaunera. <sup>3</sup> Inara relaanune jaan Ofa Cana Coaunera aitojoan esenetaain, tonoraain neeichene jaunte, inae inara suujua culeje Cana Coaunera, jianacoo neeichene coina.

<sup>4-5</sup> Coanete jiniiquiin Ofa Cana Coaunera jerenohin ichacaache. Ainihane, jelai chujutoroain cacolane ichana naineriheiche. Charijieein teinti, nujua caje nebeuha lenacai oba unene, ojoin inae inaana nainene. Nii rijijieein techu cacolane, jelai caohachaain Ofa Cana Coaunera jerenohi ichana naineneriquiche. Jana, jiniiquin canu aina

ichaquichenete laaen esinae Ofa Cana Coaunera jerenohi ichariquicheein.

<sup>6</sup> Chunocoha inara tabanejei, quere tonoraane jianihanete, nitajiha cureein cahoachanainejeein, Moconajaera rene jaorichaaain Ofa Cana Coaunerana jaun. <sup>7</sup> Esinae rauhijiriin quere tonoraain neeichene, jiaonriha inara relaanune jaan baitiquichene. Chaelai inaraacha latei bajaachenete, tereein Ofa Cana Coaunera.

<sup>8</sup> Nere tonoraain, naitoojoan beebejeeiche cachaauru rainete, inara coaraain, Ofa Cana Coaunera coroaeca curureein inara coaraauru. Nii banate esinae rauhijiriin quere tonoraera neein neriquicheein.

<sup>9</sup> Cacoelaiha Ofa Cana Coaunerane rijjijeeina inara belaihun. Caa inara belaihanune rijjijeein, inara suujua coaraain cacha belaaain neeuche. <sup>10</sup> Caa caitoonjoan tonoraain ichaaain neeichenena, itolere bana inara belaicheeunni. Charijjееin teeinti caletooa Ofa Cana Coaunerana jaan tonoraain ichaaain nihanune jaun, canu belaaain ne, nii rijjijeein.

<sup>11</sup> Itolereneein raotojoein rachoojoein canu aina jiniiquiin neeichene coinana aitoon. <sup>12</sup> Caa inara belaaain nihanune rijjijeein, ita belaaain neeuche. Nitohaneein neeuche, caa inara rai aitocoaunne rijjijeein.

<sup>13</sup> Nainihehi chatohanai, onaa niha natiin coasiin nihaacane. Cana belaichaauru coreniha cana raaje netiha cuhacanetejian, nenacaaen caohachae, ichaohin neeuruha canaacha belaihurine jerena caaun. <sup>14</sup> Inarate quiicha belaiineein neriquicheein, caa inara letoaanune jaan ichaaain neeichene. <sup>15</sup> ‘Canu cachaauru,’ narihaunni. Rauhijiriichana, ‘Canu belaichaauru,’ nareeunni. Chabana, ‘Naaonjoainte ichae,’ naain curuaanaacha ichai coitucuhin neniha cachana jaun. Nii jaunna, ‘Canu belaichaauru,’ naaun inara que. Carai aitiin caletooa Ofa najaan coitucueratihanu inara quena jaun, nainihaun canu, ‘Canu cachaauru,’ naain irihanu inara quene. <sup>16</sup> Coatiha inara, cariin carene uhin niheeichelu. Canuna inara ariin inara raain neeunlu. Nii jaunna Ofa Cana Coaunera rai arajiin cacha ariin raeraanu que inara letoaaun, inoaelu netiin neeneinu que. Nitohaneein neeichenete, chaelai latequichene, bajaaiiche cacorenihane, tiha cureein Ofa Cana Coaunera,” nae Cana Coaunera Calaohi Jesoso.

<sup>17</sup> Nii baihate: “Aonacuchena caa que aite, raotojoein jiniiquiin ita belaaain neeuche.

*Rai cachaauru aina curuataain Jesoso cairichaaeriin neeruha caa chauratane que nenacaaaurane*

<sup>18</sup> Inara coana jerelanaala, inara belaihureniha caa chauratane que nenacaurune, nii caje nainaauche, nenacaaen canu nichaun natiinte, cacoharanaa jerelanaala cacoelaihurene. Nii jaunte jelai amuritoheriin inara belaihurenereein. <sup>19</sup> Chauratane que nenea cacha neneeichena jaunte, inara belain, inara coana nainecurenereein caa chauratane que nenacauru cachaauru. Canuna caa chauratane que nenacauru caje inara raaunlu. Nii jaunte inara belain inara coana nainecurene caa chauratane que nenacauru cachaauru, inae caa chauratane que nenea cacha neneeichene jaun. <sup>20</sup> Aitocooaunlune tocohaneein, nihei chunei rai curuaanaa amurijiriin nei. Nenacaaen canu rohecauruhluna jaunte, jerichanejeein inara rohecaacuurureein. Quere esenetaain tonoraeraurute, jerichanejeein inara ere tonoraain esenetaaurureein. <sup>21</sup> Nitohanihate, cuurureein nii caletoaera coitucuuruhi nechuaansaineein nenacauru cachaauru. Nitohanihate cuurureein, canu ere beebejeichene coreniha.

<sup>22</sup> Acaauru rene turuhin, acaauru relaenihanune jana nihane, chelai ujuaihoneein neeururihei niqui. Nete inae enene acaauru osa coreniha chunijiun nichoteurenereein. <sup>23</sup> Nii cacoharanaa jerelanaala quere tonoraichurute, jerichanejeein nii caletoaera Ofa Cana Coanera ere tonoraarene. <sup>24</sup> Itolere, lenone faain, itolere cunaitenacauru rautaaain, itolere ichaain acaauru notajaain, naaonjoaain inatiinte, coaracuruha nota que natiin, canu batohin, Ofa Cana Coaneranemaajeein batohin neeuruhane corenihate caseteco coaraa cuurureein. Nii coaracuruha natiin esenetaaurenihane colane aihururihei. <sup>25</sup> Aitoha acaauru quiricha inoasi cuhanene rijijieeinte, aihure. 'Nechu jataain, joareein corenihate aina nejerateein jerecurenereein,' naain aitoha acaauru quiricha inoasi cuhanene rijijieeinte aihure, inae nitohanihane coina laenanohineein nihana jaun.

<sup>26</sup> Inae turuha urichaaain inara coroatajaneraanu. Canuna Ofa caje letoareeunni. Nii inara coroatajaneraanu-Cana Coanera Suujuete esinae rauhijiriin caitoojoan que inara relaa ureein. <sup>27</sup> Nii ainate chaque casilanaala laraajiin canu aitoonjoan Cana Coanera ere beebejeriquicheein cachaauru rai.

## 16

<sup>1</sup> Nii jaunna inara rai aitoon, inara rohecaauruhane, nererojoecaain inara letoaanune jaan jianeeichene coataana, caa caritiin aitoon inara rai, laraajiin abaantaain neeichene coina. <sup>2</sup> Acaauru ita taojiaauruhana jaan loreri asaee enohichene janate, caje inara sitaa cuurureein.



Chaaente, chunicoaha inara tabanejei sohin jaoruhane, 'Jeriha Cana Coaunerana jaunne, caa ichaaun,' naa cuurureein. <sup>3</sup> Nii chabana Ofa coitucuelanaala, canu nihanatiin coitucuurenihana jaunte, nitohanain ichaa cuurureein. <sup>4</sup> Inae cuutihane bana, 'Esinaete aitelu,' naaichene coinana caa aitoon.

*Chaaelai ichana nainiha Cana Coaunera Suujuene*

Jaiti jelai inara ratirihanune rai nenihanune jaunna, jau-riaa caa que inara rai erenajaqueneun. <sup>5</sup> Inae laen curichaaunni nii caletoaera aina nihanune coina. Nihei chunicothanejein nii cunaa jerichaaunna jaan bajaane que airijiin, <sup>6</sup> satiin inaderaachaquiche caa que aitocoouna jaun. <sup>7</sup> Inara rai tejian caohachare cuhanune. Jana cuenihanune, urihei inara corianeein inara suujua lararajiaain, inara coroatajaneraaunu. Acate inara suujua lararajiaain, inara corihaneein inara coroatajanereein. Inae cuhanunena, canu letoareeunni. <sup>8</sup> Aca inae turuhanete, cacha relaa cureein, osaaocuruhane coitucuuruha cachaaaurune coina. Chaaen techu, caohati ichaonaa que cacha relaa aicheein. Jana ichaonaa caoacha sacunaa jeriheichurute, casetecaa cureein Cana Coaunera, <sup>9</sup> osaaocuruhane saijieein quesentaurenihane coreniha. <sup>10</sup> Nii banate, esinaae rauhijiriin ichaonaa esine teraneein nihanune coitucuha cuurureein, Ofa nenajaun tacaa curichaaunnine jaun.

Inae canu coariheicheein cuutihane reeintiaain. <sup>11</sup> Nii banate, Moconajaera aina jiniiquiin nosa coreniha caseteco coaraa cuururichaaine coitucuha cuurureein cachaauru.

<sup>12</sup> Niha arajiin inara rai quiicha beeni niqui, nete 'Quete toon aite,' naain coitucunaa naineneriquiche. <sup>13</sup> Inae turuha Cana Coaunera Suujuenete, rauhijiriin inara relaa cureein. Coatih suujua caje rocohin aitoriaain. Aitoha Cana Coaunera najaan quete aitoha cureein, nitohaneein situsi-hane ajiniha coitucuhin neeichene coina. <sup>14</sup> Acate coroa-jeein canu nichaaunne biha cureein, cacoitucuhin neeichene coina. <sup>15</sup> Charijieein teinti, itolere coauneraneein ne Cana Inaca. Niirijijieein inachu canu netonai neeun, Cana Inaca calaohi nichaaunne. Aihana jaun, coaa cojoaelatohache canu coitucueratiha Ofa Suujuene.

*Inaderaichene baihate necoriha cureein inara suujua rachoojoenaa neein*

<sup>16</sup> Satonooto, caa basijiin cacoharaa curiquicheein. Nii baihajirite canu coaraa curiquicheein coaiten," nae Cana Coaunera Calaoihi Jesoso.

<sup>17</sup> Nii jaunte ita caje: "Tonaa nena, 'Satonooto caco-haraririquicheein, Cana Inaca rene curichaaunnine jaun. Nii

baihajirite cacoharaa curiquicheein,' nae. <sup>18</sup> Chatonaa nena aite," naacaanu ita rai.

<sup>19</sup> Nii jaunte, caje bajanaa jerichaanune coarajihane jaun: " 'Satonote basijiin cacoharariquicheein. Nii baihajirite cacoharareeicheein,' naanune jaunna ita caje bajaache.

<sup>20</sup> Esinaena rauhijiriin aitoreeunni. Inaderanaa caaunte chanaa curiquicheein. Nii janate inara coroaeca cuurureein caa chauratane que nenacaauru cachaauru. Nete rachoojoenaaneein necoriha cureein inara suujua.

<sup>21</sup> Charijieein teeinti, nejanoana jeriha rai canaanaine nererojoeaure enecuru cunaa caun. Jana inae lesajeein nejanoaane, inae nii cuna coacuelanaala raotojoein rachoojoein ne, nii canaanai coroaeca.

<sup>22</sup> Nii rijijieeinte nererojoeaiche niqwi ena. Nete, turuhin inara coaraa uhanune, aitohi rijitoein rachoojoenaa neein niha cureein inara suujua cuhanai. Nihei chunei inara caje nii rulunaa nainera.

<sup>23</sup> Nii bana inae cacaje, 'Chatohanein icharihacaanu,' naain cacaje cha bajariheicheein, inara netonai coitucuriquicheeina jaun. Chaelai inaraacha latei bajaache cacorenihanete, tiha cureein Cana Inaca. <sup>24</sup> Nihei caniha neeichene caje coauneein, cacoreniha chaelai bajaheeiche. Bajaache cacorenihanete, tiha cureein Cana Inaca, raotojoein rachoojoein neeichene coina.

<sup>25</sup> Inae cuutihane bana caritiin, 'Charijieein teeinti naojoen,' naain cuaain, inara rai berihaaunni. Inae cuu tihane banane, nechujataain rauhijiriincha cuaain Cana Inaca aitojoan que inara relareeunni, rauhijiriin aonaain coitucuhene coina. <sup>26</sup> Nii banate, inara raaje inaraacha latei bajaa curiquicheein. Nitohaniane bana, coatiha canu Cana Inaca rai aitorihaaunni, <sup>27</sup> inae raujaain caje uhanune esenetaaichene coreniha inara belaiha Cana Coaunerana jaun. <sup>28</sup> Canuna, Cana Inaca nenaja caje mituhin, caa chauratane que turuha uun. Inae caa chauratane ratiriin, Ofa Cana Inaca Cana Coaunera rene curichaaunni," naa Cana Coaunera Calaohi Jesusone janate:

<sup>29</sup> "Inae laaen aonacaun rauhijiriin aitohina jaun. <sup>30</sup> Nii jaunna esinae itolere coitucuhin, esinae rauhijiriin Cana Coaunera caje uhine esenetacaanu. Aihana jaun, nihei nenacaaen canacaanuhacha bajaenenu, inae coitucuhacaanuna jaun," naacaanune jana:

<sup>31</sup> "Nii jaunchana esenetaaiche. <sup>32</sup> Inae cojoinaca que tiha. Enete satiin ita caje riatoroaain, jelai cajoahin caratiriin amuriquicheein, nena jelai caa neneen, caniha niha Ofa Cana Coaunerana jaun. <sup>33</sup> Coitucuhichene jerena caunna caa aitoon, quesenetaain raotojoein rachoojoein

neeichene coina. Chaaen inara netonai, caa chauratane que necairichanaa coaraa curiquicheeina jaunna, raotojoein rachoojoein necairichanaa abaantaichene coinana aitoon. Caa chauratane curuaanaa Moconajaera amuritohanune jaun, inara netonai laraajiin caa chauratane curuaanaa Moconajaera amuritohichene coinana, coitucuhichene jerena caaun aitoon,” nae Cana Coaunera Calaohi Jesoso, aina nerelanaa nichaanune rai.

## 17

*Cana Inaca bajaa aina nerelanaa nichaanune coreniha Jesosone*

<sup>1</sup> Niritohane baihate, jabatoroain dede coarajeein:

“Inae caletoaina jaan ichacaunne jaan cojoanona que turuha. Chajaain laaen cacorataaneu, ii jerenohi ichacaunne coina. <sup>2</sup> Iite ii calaohineein nihanune cocoinaain, caa chauratane que caletoaai, satiin carai iicha teuri cachaauru rai nitajenaachara nejeein nena ichaonaa teraauu que. <sup>3</sup> Leinjiin iichate nitajenaachara nejeein nena ichaonaa teraneei. Nii jana canuna, leinjiin ii letono Jesocurisitoneein neeun. Nii jaunte nitajenaachara nejeein neeurureein cana coitucuhin nenacaauru. Coatiha chabana nitajeeururinaain. <sup>4</sup> Inae caa chauratane que nenacaauru que ii coitucueratihu. Chaaen nachu inae caletoaina jaan nainaaun. <sup>5</sup> Inoaenlu, jaiti necoanaeniha caa chauratanene ajiniha, cocoinanacainein nihanulune rijijieein, ii rene turuhanune, coaiten cocoinanacainein caeteeu, coaracuruha satiine coinara Ofa.

<sup>6</sup> Inae caa chauratane caje raain carai iicha tenojoihuru cachaauru que ii neeine coitucueratihu. Icheineeinte neeure, caa carai iicha teuri cachaauru. Niichurute, chere aonaaun tonoraain neeure. <sup>7</sup> Inae laaen cacorataaneei jaan aina caletoi jaan ichacaunne jaunte coaraain inae esenetaaure. <sup>8</sup> Caletoaina jaan que acaauru rai aitocooaunna jaunte tonoraare, carai iicha tenojoihuru cachaauru.

<sup>9</sup> Coatiha caa chauratane que nenacaauru cachaauru, ii coitucuruhi coroatajaneeine coina ii bajahaun. Caa carai iicha teuri cachaauru icheineein nenacaauru coroatajaneeine coinana, canu Inaca neeine bajaau. <sup>10</sup> Satiin canu cachaneein nenacaaurute, jerichanejeein ii cachaneein neeure. Jerichanejeein techu, canu cachaneein neeure ii cachaauru. Nii jaunte jerichanejeein aihanune rijijieein ichaore.

<sup>11</sup> Inae taenetojoein caa chauratane que nerihaunni. Acaaurute jana jaiti caa chauratane que nedaa cuurureein. Canuna laaen inae ureeunni, ii aina nihanune coina. Ofa,

carai caa iicha tenojoihuru cachaauru coroatajaneeu iicha jerei chana que. Charijieein teeinti canu coroatajaneein canu rai iicha tei ichana que, nii rijijieein acaauru coroatajaneeu. <sup>12</sup> Enanetojoein cacorataaneeine que, caa carai iicha tenojoihuru cachaauru nihei leinjiinejei nitajihei. Leinjiin caa, ii quiricha inoasi cuhane been laenaerateeilune rijijieein cacoluruheraachate, inae nitaje.

<sup>13</sup> Inae laaen enene, nii neeina jaun urichaaunni in-  
iha nihanune coina. Jaiti caa chauratane que nihanune  
cojoataana aitoon, raotojoein rachoojoein nihanune riji-  
jieein, acaauru netonai canu rijijieein raotojoein rachoo-  
joein neeuruhane coina. <sup>14</sup> Ii ere bihanu acaauru raine jana,  
esenetaain tonorauruhana jaunte, acaauru belaaen, acaauru  
rautaain, acaauru coana nainecurene ii coitucuuruhi, aihan-  
nune rijijieei, inae caa chauratane que nena cachaneein  
neurenihana jaun.

<sup>15</sup> Ofa Cana Coaunera, coatiha ena, caa chauratane caje  
ranajaain dedeeu amanajaaine coina caitono nihei. Acaauru  
que Moconajaera janoriteein, acaauru coroatajaneeine jer-  
ena caunna aitoon. <sup>16</sup> Moconajaera cachaneein neniha-  
nune rijijieein, carijijieein acaauru netonai inae Mocona-  
jaera cachaneein neeuruhi. <sup>17</sup> Ii raihurunein neeuruhana  
jaunna aitoon, acaauru suujua rucujueein, acaauru coroata-  
janeete, nejelau suujua cuaelanaala leinjiin ii jerenohicha  
ichacurumii. Ii erete esinaae rauhijiriin ichaonaa caohacha  
teranein ne. Chaelai janonaa bana nihei nitajiha ii ere es-  
enetaain tonoraain nenacaaurune. <sup>18</sup> Charijieein teeinti, ca-  
suujua lararajaain canu cocoinaain caletoai, nii rijijieeina  
acaauru cocoinaain acaauru letoaaun, ii ere beebejiha cuu-  
ruha caa chauratane que nenacaauru raine coina. <sup>19</sup> Acaauru  
corenihana nejelau casuujua cuaelanaala caletoaina jaancha  
ichaaun caraajenhane, acaauru netonai aihanune rijijieein  
nejelau suujua cuaelanaala relanajaanune rijijieein letoana-  
jaanune jaancha ichacuruhane coina.

<sup>20</sup> Coatiha acaauruhacha coroatajaneeine coina caitono ni-  
hei. Canu ere beebejeeuruhane, canu esenetaaichuru suujua  
rucujueein coroatajaneete, <sup>21</sup> jiniiquiin aihacane rijijieein,  
ita aina jiniiquiin raotojoein neein, nejelau suujua cuae-  
lanaala ita coroatajaneein, neeuruhinete, esinaae ii cale-  
toaine esenetaauruhine caa chauratane que nenacaauru.  
<sup>22</sup> Jeelai, nii canu cocoinaain neeina jaana teeun acaauru  
rai, ita neein nihacane rijijieein, acaauru netonai ita neein  
neeuruhane coina. <sup>23</sup> Chaaen nachu, casuujua cuhane neeine  
rijijieein, acaauru suujua cuhane neun, jeelai ita neein  
neeuruhane coina, nii caje nainaan esinaae ii caletoaine

coitucuuruha caa chauratane que nenacaurune coina. Aihute, cacoelaaine rijijieein, belainaaquine coitucuuruhine.

<sup>24</sup> Carai tenajaaina jaunna, caniha nii nerichaunnine jaun caniha neeuruhane jereun, nii ii necaohacha aina canu necaohacha coarajeein neeuruhane coina. Chaaen necoau-naa caa chauratanene ajiniha caje coauneein cacoelaaine coaracuruhane coinara Ofa,” naain te, <sup>25</sup> “Rauhijiriin itolere coanera Ofa neeine coitucuuruhi caa chauratane que nenacauru niqiu. Nena laaen canu ichoitucuun. Caa carai iicha teeurite laaen, esinaae ii caletoaaine coitucure, <sup>26</sup> esinaae ii neeine coitucueratihanune jaun. Jelai choaae jauhecotojoeriine, ii coitucueratihajeein sacuree-unni, esinaae cacoelaaine rijijieein acaauru belaaaine coitucuuruhane coina, canu netonai nihanatiin acaauru aina nihanune coitucuuruhane coina,” naainte Cana Inaca Cana Coanera bajaaebajaje Cana Coanera Calaohi Jesuso.

## 18

*Caseteconeein Cana Coanera Calaohi Jesuso amauruha Romanocurune*

(Mt 26.47-56; Mr 14.43-50; Lc 22.47-53)

<sup>1</sup> Cana Inaca aina irihane baihate, aina nerelanaa nichaanune amaain, Sedroon neein curuajaain nena nucesorero jera que cue Cana Coanera Calaohi Jesuso, cuu nii enuha inaa necojoai turuha canacaanu ainane coina.

<sup>2</sup> Nii jaunte raotojoein Jesuso cunajaa coitucuhana jaun, canacaanu caaijie turuha uhe Jodasi. Belaichaneein niha Jesuso natiin, Jesuso coulurujeein soondarooru uhaain turuha uhe. <sup>3</sup> Nii soondarooru, chaaen batirichuru curuaanaacuru, fariseoocuru, naaonjoainuri letono folisiaacuru uhaain turuha uhe nii Jodasi. Rejoon, sabere rijijieein nenaese-fara, naaonjoain que biji achunequuin, raafariin, cohinee, naaonjoain que conoquuin turuha uure. <sup>4</sup> Nii jaunte inae raotojoein nitohanai que siturichaainne coitucuhana jaun, acaauru que tacaain: “Chate ariicheta,” naain bajaa Cana Coanera Calaohi Jesusone jana:

<sup>5-6</sup> “Nasarete cocoaicha Jesusona arihacaanura,” naauruhane jana:

“Saan. Canune aca neeunra,” naa acaauru rai Jesusone janate, nii niicha uhauri soondarooru aina jiniiquiin janori nichaae richootoroalaain tocojoaai tae nii Jesuso coulurujuera Jodasi. <sup>7</sup> Nii jaunte:

“Chate esinaae ariicheta,” naain coaiten enacoauneein bajaa acaauru caje Jesusone jana:

“Nasarete cocoaicha Jesusona arihacaanura,” naauruhane jana:

8 “Inae rauhijiriin bihanu inara rai. Canuna aca neeun. Cariha aaichene, caa caniha nenacaauru jianecuchete amuuruhine,” nae acaauru rai Jesoso. 9 “Coatiha leinjiinejein nitajerinaain carai Ofa tenojoinunri cachaauru,” naain inae aitosiha Cana Coaunera Calaohi Jesusone jaunte nitohane.

10 Nii janate sabere sirihana jaun rocohitiin, que leinjiin uricho raotono nichajai beuhite Fedoro. Nii niicha uricho beuhitite batirichuru curuaanaa cachaneein nenea- Malco ne.

11 Nii jaunte: “Jelaiha curu cuhane nii ishabere teura. Ta caletooa Ofana jaan icharichaunnine coitucuhin quesene-taineta,” nae Fedoro rai Jesoso.

*Batirichuru curuaanaa Anasi rene, caseteconein Jesoso amaauruha soondadoorune*

*(Mt 26.57-58; Mr 14.53-54; Lc 22.54)*

12 Nii jaunte Cana Coaunera Calaohi Jesoso mucuure caseteconein soondadooru acaauru curuaanaa aina uhin, chaaen Jorioocuru rai folisiaacuru, naaonjoahunri.

13 Nitohaneein mucuhinte Cana Coaunera Calaohi Jesoso amaure soondarooru, Anasi loreri asaae. (Nii Anasite, Caifasi tanaa ne.) Nii janate, nii ajaanaa cuhane batirichuru curuaanaaneein ne nii Caifasi. 14 Nii Caifasite, jauriaa Jorioocuru rai “Cana caohachanu quetejian, cana atane coreniha ohane ore leinjiin cachara,” naain Jorioocuru rai erenaane.

*Fedoro caje bajaa nii acuujuu beraichane*

*(Mt 26.69-70; Mr 14.66-68; Lc 22.55-57)*

15 Canacaanuna, Simoon Fedoro aina Jesoso sacuha cuha-caanu. Nii jana, canu coitucuha batirichuru curuaanaa jaunna, Jesoso jiniichaain enoon batirichuru curuaanaa loreri asaae. 16 Jana Fedorote nedae airiniha acuujuu rohan. Nii jaunna, acuujuu beraicha ranuna rai ereeun, Fedoro enoaane coina.

17 Nii jaunte Fedoro enoaain: “Tana taa cacha aina nere-lanaaneeine,” naain bajaa Fedoro caje nii acuujuu beraichane jana:

“Acanihahaunta,” naain benaa jerene Fedoro. 18 Nii jaunte, jelarotohana jaun usi mocohin que nichaateeuruha Anasi cachaauru, Jorioocuru rai folisiaacuru, naaonjoainurine jaun acaauru aina nichaatiha ne Fedoro.

*“Chaquete cachaauru relaaita,” naain, Jesoso caje bajaa batirichuru curuaanaane*

*(Mt 26.59-66; Mr 14.55-64; Lc 22.66-71)*

19 Nii jana, cuu nii loreri asaae ucuha cuhane niha Cana Coaunera Calaohi Jesusone janate:

“Chaauru caa iicha relaaurineein ne. Chaquete acaauru relaaita,” naain bajaa Jesoso caje batirichuru curuaanaane janate:

<sup>20</sup>“Satiin aonajeeuruha cachaaurune acatiha teinna canu, rauhijiriin aitonajacoon. Coatiha asinojoneein cachaauru relahaun. Sinacoca asaae, satiin itataojaiauruha Jorioocuruna jaan Teenforo asaaene acaauru relanajacoon. <sup>21</sup> Chanuna nii bajaai cacaje. Nii relanajaanune jana aonaraauru caje bajaate, raajenhane acaauru relaunune jaan beeuruhine,” nae Jesoso.

<sup>22</sup>Niritoha Jesusone janate, ecu niha Teenforo rai folisiaana jaun: “Niritiina ereree batirichuru curuaanaa rai te,” naain Cana Coaunera Calaohi Jesoso meri faohitohane jana:

<sup>23</sup>“Baaso neeinoona aitoon. Chanuna caque ichohi tein aitoi,” nae Cana Coaunera Calaohi Jesoso nii Teenforo rai folisiaa rai.

*“Acanihahaunta,” naain nesuijiha Fedorone  
(Mt 26.71-75; Mr 14.69-72; Lc 22.58-62)*

<sup>24-25</sup>Nii batirichuru curuaanaa Caifasi loreri asaae niha Jesusone tonohanate, jelai cuu inae neeriha Fedorone jana: “Ta ii taa cacha aina nerelanaa neeine,” naain bajauruhane jana:

“Acanihahaunta,” naain benaa jereniha Fedorone jana:

<sup>26</sup>“Tana, ii coaracaunlu aina, enuha inaa neeonjoai jana neeine jananeta,” naain bajaa leinjiin batirichuru curuaanaa cacha- nii niicha uricho beuhiti cacha araineein nenaane janate:

<sup>27</sup>“Acanihahaunta,” naain nesuijiha coaiten Fedorone jana, inae ere ataohari.

*Jesoso coulurujeeuruha Filato raine  
(Mt 27.1-2, 11-14; Mr 15.1-5; Lc 23.1-5)*

<sup>28</sup>Nii janate Caifasi loreri caje coberenadoro Filato loreri asaae Cana Coaunera Calaohi Jesoso amaauruhane jana, inae nemataracajiha janonaana jaun, enonaa nainecurene Jorioocuru, coberenadoro loreri asaae. Jorioo neniha nii coberenadorona jaunte, coberenadoro loreri asaae enonaa nainecurene Jorioocuru, enooruhane Fasocoa beseta bitoanaa nainecurenihane coataa. <sup>29</sup>Nii jaunte airiniha mituhin:

“Chatohanai ichaane corenihana caa cacha colurujee-iche,” naain bajaa coberenadoro Filato, Jorioocuru cajene jana:

<sup>30</sup>“Nechu aansai taebinaen neein nenihanenoona, ichei colurujerichaanu,” naauruha Jorioocurune jaunte:

31 “Saan. Aihachuhisi niqui. Inara, amaaïn jeriquichene tocohaneein teeuche,” naa Filato, Jorioocuru raina jaunte:

“Nihei canacaanu rai rauhi, chunei sohin jaohacaanune coinata,” naaure Jorioocuru Filato rai.

32 Rauhijiriin coitucuhin, “Naaonjoaante catinaa cuurureeïncha,” naa Cana Coaunera Calaohi Jesusone rijijeeinte, rauhijiriin ichacure.

33 Nii jaunte coaiteen enacoauneein loreri asaae Jesoso cotijiain, caje bajaë Filato: “Ii ina Jorioocuru curuaanaa *rey* neei,” naain bajaë caje Filatone jana:

34 “Tshuujua cuhane aitiina bajaai. Ainihane leochaauruna ichei Jorioocuru curuaanaa nihanune que aitoha,” naa Filato rai Jesusone janate:

35 “Chasiinna Jorionichaaunne coalanaala caraajenihane aitiin aitoreeun. Charaachuru, batirichuru curuaanaacurute carai icholurujue. Chatohanai najian ichaate icholuruhecure,” naa Filatone jana:

36 “Coatiha cajiha caa chauratane que nenacaauru curuaanaa nihaaunta. Caa chauratane que nenacaauru curuaanaa nihanunetera, sonaacurure quere tonoraeraauru, catohanein caetecuruha Jorioocurune coataa,” naa Jesusone jana:

37 “Aihana jaun, iina curuaanaa *rey* neeite,” naa Filatone janate:

“Ejeen, aca nichaaun. Nii aitohine rijijeeine acaneeun. Canuna caa chauratane que uhin nejanoaaunlu-cachaneein, esinae Cana Coauneraacha jerei rauhi coitucuruha cachaaurune coina. Satiin Cana Coauneraacha jerei rauhi tonoraaurerate quere tonorae,” naa Jesusone jaunte:

38 “Chatohanai Cana Coauneraacha jerei rauhi esinena,” naain bajaë Filato, Jesoso cajene baihate, enacoauneein coaiteen mituhin Jorioocuru aina iriha cue.

“Coatiha chatohanai ichaai carai caa cachata. 39 Inarate, Fasocoa beseta naineei, Fasocoa beseta catainajeein, naaonjoaïn niha catohanai casetecone, nii beseta situ reeintiaain jianerate najaaquiche. Tonaquiche, jerecuchene caa Jorioocuru curuaanaa *rey* jiane beseta situ reeintiaain,” naa Filato, Jorioocuru raine janate:

40 “Aihei. Coa nii janiha. Nii Barabasi jianeeujian laen,” naainte nujuaë soaisoaihure Jorioocuru, Filato rai, nii Barabasi asijiautoneein nena que.

## 19

1 Nii jaunte Cana Coaunera Calaohi Jesoso bisichate rai soondarooru que Filato.



<sup>2</sup> Nitohaneein bisihuruhane baihate, oja caje janojoin comai curuhacure Jesoso couturi que. Nii baihate coaiten que cajione lanaajiojoai curuhacure.

<sup>3</sup> Nitohaneein teuruhane baihate, Jesoso rohan turuhin: “Caa Jorioocuru curuaanaa *rey* coaracuchera,” naain Jesoso meri faohafacooaure biji que Romanocuru rai soondarooru.

<sup>4</sup> Nii janate jelai caje mituhin Jorioocuru rai: “Coaraquichene coinana caa cacha mitaa uun, neniha que chatoanai baaso ichaenhane coaracaunna jaun,” nae Filato.

<sup>5</sup> Nii jaunte, inae oja que jerichanejeein comaiquuin, lanaajiojoai que cajionequuin mituha uhe Jesoso. Mituha uha Jesosone janate: “Caa cacha coaracuchera,” nae Filato.

<sup>6</sup> Niritoha Filatone jaunte, Jesoso coaraain: “Coroso que teeuche. Coroso que teeuchera,” naain njuuae soaisoaiuruha batirichuru curaanaacuru, folisiacuru naaonjoainurina jaun:

“Inara amaain coroso que teeuche. Neniha carai que chana jaunna, nitohaneein tenaa naineneun canu,” naa Filatone jana:

<sup>7</sup> “Canacaanu quiricha inoasi cuhanete aite, nitohaneein nei nihane sohin jaohacaanune coina. Cana Coaunera Calaohi niha nocoetohane corenihate caohachae, sohin jao-hacane,” naauruha Jorioocurune <sup>8</sup> aonajihane jaunte, jataain casi Filato.

<sup>9</sup> Nii jaunte nacoauneein loreri asaee enohin:

“Chaa cajena unaaneei,” naain bajaa Filatone jana, inauhene chujuhequuin aonaje Cana Coaunera Calaohi Jesoso. <sup>10</sup> Nitohaneein tonoraeniha Jesusone jaunte: “Chanuna catoonraeneei. Tana cocoainanacaineein nihanune coitucuhine. Canune nainereun coroso que ii teratihanune. Chaaen nachu naineeun caa ii colurujueeuruhane jaan caje jianacoo chetichaaunne,” naa Filatone jana:

<sup>11</sup> “Cocoinanacaine lanaala cheteen nii jereniha Cana Coaunerane, canasia nainihe. Nii jaunte, chamurijiriin osaque caa catohaneein ichei caetera,” naa Cana Coaunera Calaohi Jesusone jaunte, <sup>12</sup> Jesoso jianena jere Filato niqui. Nete:

“Jiaohine jianeene. Aca, curuaanaa *rey* neein nenea jerihane jaun, caohacharihei jianeene. Jianeete, satiin inara curuaanaacuru curuaanaa enferadoro aina nejeratena nerihiin,” naauruha njuuae soaisoain Jorioocurune jaun, <sup>13</sup> Jesoso raerate, nii Cabata naauruha Ebereero ere cuhanene jaan- ajeri caje ichanohineein nenea arani-choae uhauruhane coina. Nitohaneein raerateeuruhane jaun, raain turaauruhane jana, nii casetecocuru neruujuna jaun nelauriariin lauheque nelaurianaana jaan rori choaae,

<sup>14</sup> enoto chujutaain Fasocoa catainajeein. Nii jaunte nitohaneein raerateein:

“Nocoo inara curuaanaa *rey*,” naa Filato Jorioocuru raine jana: <sup>15</sup> “Coroso que teeuchete coaraain cuu ohine,” naain nujuae soaisoiuruhane jana:

“Chasiinna inara curuaanaa *rey* tereun coroso que,” naa Filatone jana:

“Romanocuru curuaanaa enferadorohachate canacaanu curuaanaa *rey* neein nera. Nihei nii baiha curuaanaa *reyta*,” naauruha batirichuru curuaanaacuru Filato raine jaun, <sup>16</sup> acauru que Jesoso amaerate Filato.

<sup>17</sup> Nii jaunte nii Jesoso amaain, que corosonu baijieratecuruhane jana, Couturi Bejeronnein curuajaain nena atane ucuuno que baibaichaaain amaain, nii coroso tiha cue Jesoso. (Nii Ebereeo ere cuhane Colocota naauru najaan- Couturi Bejeroo.)

<sup>18</sup> Nii janate cuu coroatajai coroso que, cuu neeuruha coroatajaain soserenaacaurune jaun, acaaru cataaun Jesoso teure coroso que, leinjiin jera que, leocha jera que, naaonjoain.

<sup>19</sup> Nii janate, cuu Jesoso curuaa laenaerate Filato. “Nasarete cocoaicha Jesoso, Jorioocuru curuaanaa *rey*” nasiin laenerate coroso que, tabara que teein Filato. <sup>20</sup> Nii jana arajiin Jorioocurute nii Jesoso curuaa Filatohacha laenaeratei ereretaaure, nii Jesoso teeuruha coroso quene jaan caje icharaeniha Jerosaleenne jaun. Ebereeo ere, Curieco ere, Romano ere, naaonjoain que nichata lauriin erenaa cuhane teeinte laenaare, nii que erenaa inaurera ereretaauruhane coina.

<sup>21</sup> Nii jaunte: “Coo, Jorioocuru Curuaanaa *rey*neein teein laenaratihara,” naaure Joriocuruneein batirichuru curaanaacuru Filato rai. “Nii Jorioocuru curuaanaa *rey* niha nocoeti, nasiin laenaerateeura,” nauruhane jana:

<sup>22</sup> “Nii rijieeincha nedaainera,” nae acauru rai Filato.

<sup>23</sup> Nitohaneein coroso que Cana Coaunera Calaohi Jesoso curaboaain teeuruhane baihate, Cana Coaunera Calaohi Jesoso cajione raaure jenai soondarooru. Rai nobirine maa-jeein raaure. Rai nobiri, coaracuruhane jana nirijieein iji-abereeonu farueraelanaala toconojoi inelanaala niha nii rai nobirine jaun: <sup>24</sup> “Coo soaihachete naajeein amaacache, nenacaantejian caohachare naajeen amaacachene. Aihute que necoatijianaa neeine, chariji rai neeincha nedaarein,” naaure soondarooru. “Ita raite cacaijione leruhin raaurureein que necoatijiain,” naa Cana Coaunera Quiricha Inoaesi cuhanene jaunte, nii Cana Coaunera Quiricha cuhane aitohane nainaane coina nitohaneein teure soondarooru.

<sup>25</sup> Nii jaunte, inae Jesoso mucuuruhane coitucuuriin, coroso asaae cuhin coaraje rai neba, nichatajai enecuru aina. Nocoasai, Cureeofasi comasaineein nena- Mariha, Mariha- Maadala bene, naaonjoain. <sup>26</sup> Nii janana cuu nihacaanu, jataain niicha belaii nichaanune temeecoahacaanu neba ainane jana, neba coariin:

“Nii ii calaoita oma,” naa neba raine baiha:

<sup>27</sup> “Nii chobata,” naa caraina jaunna jerichanejeein cafojiara raanune rijijieein raain amaaun caloheri asaae.

### *Oha Jesusone niha*

*(Mt 27.45-56; Mr 15.33-41; Lc 23.44-49)*

<sup>28</sup> Inae nitohaneein nihane coina letoaa Cana Inaca Cana Coaunerane nainaane coitucuha raotojoeinne jaunte, inae Cana Coaunera Quiricha Inoaesi cuhane aitosiha inaena jaun: “Cocoiintohanura,” nae Cana Coaunera Calaohi Jesoso.

<sup>29</sup> Nii janate baichaje laajoiri nainecojoain ecu niha bino baasone jaun, enuha que sie rijijieein nena nujuateein, nii bino sisiaain Jesoso ujuaae que suesuecaauruhane jana, <sup>30</sup> nii bino baaso cohane baiha: “Inae laaenra,” naain ocoai couturi tijitiaain ohe Cana Coaunera Calaohi Jesoso.

### *Jesoso jaleri rucuaitha leinjiin soondaro rejoon quene*

<sup>31</sup> Le janojoein lanaa Fasocaa besetane janate, Filato rai aitha cuure Jorioocuru, coroso que nenacaauru anaee bacoerateein, naain nii coroso caje rocoeratenajaain, naain rucuhenaaratiha Filatone coina, nabana nebetacanaa janonaa bana cuu neeuruhane, coaranaaca cachaaurune coataa, acaauru rai jataain beseta tabaineein niha Fasocaa besetana jaun. <sup>32</sup> Nii jaun soondarooru letoaa Filatone jaun, cuhin nii Jesoso ajiniha coroso que nenacaauru anaee bucu bateeichure soondarooru.

<sup>33</sup> Nii baiha Jesoso rohan turuhin coaracuruhane jana, inae oha Jesusone jaun, rai nanaae bacoorene. <sup>34</sup> Nete laaen rai nanaae bacoorenihane caniha laaen, rai jaleri rucuaaite leinjiin soondaro rejoon que.

Nii janate rai jaleri rucuaithane jana chujuhare ichana, acau que jasisiin.

<sup>35</sup> Canuna coaraneein aitoon inara rai, inara netonai rauhijiriin aonaain esenetaaichene coina.

<sup>36</sup> “Nihei chatohaneei bacoorurihaainta,” naa Cana Coaunera Quiricha Inoaesi cuhanena jaunte, Jesoso bucu bacoorene.

<sup>37</sup> Cana Coaunera Quiricha Inoaensi leeocho cuhanete “Focooruhane janate, inauhene coarajiha cuurureeinha,” naain aithane rijijieein coarajeure.

*Oo jana ajeri jachu cuhane Jesoso jaberoco teeuruhane  
(Mt 27.57-61; Mr 15.42-47; Lc 23.50-56)*

<sup>38</sup> Nii janate Cana Coaunera Calaohi Jesoso jaberoco bajae Filato caje Arimatea cocoaicha Jose, rucuhecuruhane coina. (Nii Josete asinojoneein Cana Coaunera Calaohi Jesoso ere tonoraera ne, leeochoaauru Jorioocuru coasiha.)

Nii jaunte, Jesoso jaberoco jianiha Filatone jaun, Jesoso jaberoco raain amae.

<sup>39</sup> Nii janate turuha uhe nii jauriaanejeein janotiin Jesoso rene turuhin erenaa Necedemo netonai, nichatachoonca quironeein meentoon tocohaneein nenea ujjuuai uhain.

<sup>40</sup> Nitohaneein Jesoso jaberoco amaaain, nii juujijiai que rujuaain, cajione que baluluhin conajaain, Jesoso jaberoco rucuheca cuhe Jose, Necedemo aina.

Nitohaneainte onaa rucuhecure Jorioocuru, nitohaniha acaauru ichaona jaun.

<sup>41</sup> Nii Cana Coaunera Calaohi Jesoso teeuruha Jorioocuruna jaaunte ne enuha inaa neeonjoai. Nii enuha inaa neeojoain janate ne atanebana. Ecute ne achasineneein ajeri jachu-jaiti lesajeeinejein onaa teurenihana jaun. <sup>42</sup> Cuhanete Jesoso jaberoco teure, ichuunejeein niha cajene jaun, chaaen inae beseta bitoauruhane coina neruujihajeeuruha Jorioocurune jaun.

## 20

*Ohane baiha ichanaa Cana Coaunera Calaohi Jesusone  
(Mt 28.1-10; Mr 16.1-8; Lc 24.1-12)*

<sup>1</sup> Semana nunuhe tomihō cojoanonaa bana nocohejiriin cuhin, jaiti nocohetoojoaane jana turuhin coaraa Mariha Maadala benene jana, inae fueraene nii ajeri jachu. <sup>2</sup> Nii jaunte soroneein jelaiha uhin, Fedoro, canu, naaonjoainihacaanune rai biha uhe. “Aanca chaainti cana curuaanaa. Chu chaainti amaureta,” <sup>3</sup> naain biha canacaanu raina jaun coaraa cuhacaanu.

<sup>4</sup> Nii jaun, ita jiniichaain soroneein cuhin coaraa cuhacaanune jana, Fedoro reroriin cuhin, turuhin <sup>5</sup> metoraain coaraanne janate, cuu ne cona. Nena laen enohin coaraeneeun.

<sup>6</sup> Nii janate canu caaijie turuhin, enohin, coaraa Fedorone jana, cuu ne jaberoco conaauru. <sup>7</sup> Nii janate nejelau ne nii Cana Coaunera Calaohi Jesocurisito couturi cona, nejelau maromarorinhineein seeque.

<sup>8</sup> Nii janane canu netonai enohin coaracaunna jaun, ichanaa Cana Coaunera Calaohi Jesocurisitone esenetaaun.

<sup>9</sup> Cana Coaunera Quiricha Inoasi cuhaneasihane jana

niq̄ui, “Naaonjoarichaaaine quete aite,” naain coitucusi-naaunlu. Nena canacaanu nota que coaracaanune jaun, caohachaaain coitucuhin esenetaacaanu.

<sup>10</sup> Nitohaneein coaracaanune bihane nenaanjaun cauha cuhacaanu.

*Oo caje ichanaain ecooca Jesusone*  
(Mr 16.9-11)

<sup>11</sup> Nii janate cuu nii ajeri jachu rohan nedaain chanaechanaje Mariha- Maadala bene. Chanaaechanajein metoroaain nii ajeri jachu coaraane jana, <sup>12</sup> cuu lauruja laurujaure Cana Coaunera letonocuru anjeraauru somanerei que cajionequiin Cana Coaunera Calaohi Jesocurisito jaberoco teuruhana jaaun, leinjiin couturi nichajai que, leeocho tijia nichajai que naajoain.

<sup>13</sup> Niichurute: “Chate coisiita,” naauruhane jana:

“Carai curuaanaa jaberoco amaauruhana jaunna coisunra. Chu chaainti amaaain teureta,” naane baiha, <sup>14</sup> jaotoroain janori nichajai coaraa Marihane jana, rai chujhaca Cana Coaunera Calaohi Jesocurisitone jana, acanihane coitucue.

<sup>15</sup> Nii jana: “Chana coisiite ene. Chana arii,” naa Jesocurisitone jana:

“Nii enuha inaa beraicha niha,” beein: “Ii amaaine, carai nii amaaain teine jaa jelai beeune coanicha,” naa Marihane janate:

<sup>16</sup> “Mariha,” naa Jesocurisitone jana, nejaorocooain rautaain Jesoso coaraain:

“Raboni,” nae Mariha.

“Cacha relaera,” naanete aite Ebereeo ere cuhane.

<sup>17</sup> Niritiin coinetein mucunaa jeriha Marihane jana: “Caiha neeu. Jauriaa coaa cadadaara, jaiti iniin Ofa coaraenihanune jaunra. Chajaaincha cacoelaichaauru rai canu benihura. Jaitina iniin, Ofa Cana Inaca Cana Coaunera rene iniha cureeunnicha,” naa Cana Coaunera Calaohi Jesocurisitone jaun, <sup>18</sup> nii Cana Coaunera Calaohi aina nerelanaa nichaanune rai biha uhe Mariha Maadala bene.

*Aina nerelanacaauru rai ecooca Jesusone*  
(Mt 28.16-20; Mr 16.14-18; Lc 24.36-49)

<sup>19</sup> Tomiho cojoanona bana nihana jaunna, nii cojoantiin cuhane ita taojiaacaanu nii Cana Coaunera Calaohi Jesocurisito aina nerelanaa nichaanune, caohatiin acuuja fuhin Jorioocuru coasiha.

Nii janate enohin, canacaanu cataaun neeoritiin: “Raotojoein rachoojoein neeuchera,” nae canacaanu rai Jesocurisito.

<sup>20</sup> Niritohane baihate, biji que curabo cure, jaleri que re-joon cure, naaonjoain coarate canacaanu que.

Nii jaunna rachoojihacaanu aina nerelanaa nichaanune, coaiten canacaanu aina nihana jaun.

<sup>21</sup> Nii baihate enacoauneein: “Raotojoein rachoojoein neeuchera. Charijieein teeinti, caletoe Ofa, nirijieeinna caa inara letoaunra,” nae canacaanu rai Cana Coaunera Calaohi Jesocurisito.

<sup>22</sup> Niritiinte canacaanu couturi jiririin: “Cana Coaunera suujue raachera. <sup>23</sup> Chunei osaaona que inara suujua acatequichenena, canu netonai nii osaaona que casuujua acatereunnicha. Jana aineeinchene, canu netonai airi-haunnita,” nae canacaanu rai Jesocurisito.

*“Tomasi, caa canu biji alarjia cuhane ii biji couturi enoain coaraau,” naa Jesusone*

<sup>24</sup> Nii janate, inae amuha Cana Coaunera Calaohi Jesocurisitone jana, turuha uhe Tomasi, nii fafone neein, nicha curuaatehuri. Nii Tomasite Jesocurisito aina nerelanaa nichaanune lechoonca coroataja ne.

<sup>25</sup> Turuha Tomasine janate: “Cana Curuaanaa coaracaanura,” naain bihacaanu Tomasi raine janate:

“Biji larijia que curabo cure coaracaanne banaachane, esenetareeunni. Chaaen cuhane canu biji couturi enoain, chaaen jaleri que rejoon cure cuhane canu biji couturi enoain, naaonjoain coaracaanne banaachane nainereunni esenetaanunera,” nae Tomasi, rai bihacaanune jana.

<sup>26</sup> Nii baihate foosa janonei cuhane, coaiten jelaiha enacoauneein ita taojiacaanune janate laaen, canacaanu aina ne Tomasi. Nii jana caohatiin fueraa acuujuane saijieein enohin canacaanu cataaun neoritiin: “Raotojoein, rachoojoein neeuchera,” nae canacaanu rai Jesocurisito.

<sup>27</sup> Nii baihate: “Tomasi, caa canu biji larijia cuhane, ii biji couturi enoain coaraau. Chaaen chu caa canu jaleri que rejoon cure cuhane, ii biji couturi enoain coaraain esenetaachaau, baaso coacuelanaala,” naa Jesocurisitone jana:

<sup>28</sup> “Cana Curuaanaa Cana Coaunera” naa Tomasine jana:

<sup>29</sup> “Inae laaen Canu esenetaai ichaajenhane coaraina jaun. Raotojoeinte niha cuurureein, catohaneein nihanune coaraelanaala quesenetaeraauru,” nae rai Jesocurisito.

*Esenetaaichene coinata, laenanohineein ne caa erenaa*

<sup>30</sup> Itolere ichaainte coarate Cana Coaunera Calaohi Jesocurisito. Nete satiin laenanohineein nene caa quiricha cuhane. <sup>31</sup> Cana Coaunera Calaohineein niha Jesusone esenetaaichene coinata, laenanohineein ne, esenetaaichene,

ichaonaa caohacha, chabana nitajeniha cachane jaan raachene coina.

## 21

*Rede jaohajihacaanune jana, canacaanu rene ecooca Jesosone*

<sup>1</sup> Nii baihate Calileea conemuri auhaniha, aina nerelanaa nichaanune rai ecocoe coaiten Cana Coaunera Calaohi Jesoso, rede jaoha nihacaanune jana. <sup>2</sup> Nii janana laen Fedoro aina nihacaanu, Tomasi nii fafone naauru najaan, chaaen nii baiha Natanaaeli, Calileea caje unaa Canaau cocoaicha, chaaen Sebedeeo calaohi nichaaunne, chaaen eleeocha coroatajaain, naaonjoaain nihacaanu Fedoro aina. <sup>3</sup> Nitohanihane coinanu quete: “Redena jaoha cureeun,” naa Fedorona jaun:

“Tana iniha uhacaanu,” naacaanune jana:

“Chajaauchetejian aihane cunichaache,” naa Fedorona jaun, cuhin bote cuhane fauhin, cuhin janoaajeein rede jaohacaanu niqii. Nii janane leinjiinejein ate mucujenihacaanu. <sup>4</sup> Nii jana, inae mataaquiin uha janonaane jana, nemuri auhaniha ecocoe Cana Coaunera Calaohi Jesoso. Nii janana, aca nihane coitucuenihacaanu.

<sup>5</sup> Nii janate: “Enamanaacuru, ta ate mucuhichene,” naane jana:

“Aihahacaanuta,” naacaanune janate:

<sup>6</sup> “Cana raotono nichajai bote jera que, rede jaohichenete ate mucuriquicheein,” naane jana, nii bote jera que jaohacaanune jana, esinae ate mucuhacaanu.

Nii jaunna ate anaai caaun nii rede tijichasinihacaanu.

<sup>7</sup> Nii janate: “Cana Curuaanaate aitera,” naanu Simoon Fedoro raine jana, aohanrihane rijieeoritiin torosaacha baejeein nihana jaun, luhecotariin cajione curujuain acauhanau fautiin Jesoso rene turuha cue Simoon- Fedoro.

<sup>8</sup> Nii janane bote cuhane caaijie cuujueein turuha cuhacaanu rede tararajeein, ate caaun lemuequiin, lefasha metoroneein lanaa nemuri auha cajena jaun. <sup>9</sup> Najauriaain inihacaanune jana, cuu ne canacaanu ajiniha usi lanarotiin. Nii jana nii usihanau niha leinjiin atene jana, cuu ne faan.

<sup>10</sup> Nii janate: “Nii ena inaraacha mucuhi ate uhauche,” naa Jesocurisitone jaun, <sup>11</sup> bote cuhane fautiin nii rede tararae Simoon Fedoro, carene choaae. Lefasha saoquichoonca nichatajaa ate tabai inatiinte, nii rede soaine.

<sup>12</sup> Nii janate: “Chajaauchete inara suuri noite,” naane jana, “Chaneeina” naain bajanaa nainenihacaanu, raotojoein Cana Curuaanaa Jesoso nihane coitucuhacaanune jaun.

13 Nii janate, tajiha uhin nii faan raaoriin, canacaanu nainetiin chalue. Jerichanejeein techu, nii ate basicho chalue canacaanu nainetiin. 14 Nitohaniha Cana Coaunera Calaohi Jesoso, oo caje ichanaain, canacaanu rai ecoocane nichata sai cuhane.

*“Cacoelaina” naain bajaa Jesoso, Fedoro caje ne*

15 Inae nainaan canacaanu suri noitichaanune janate: “Jonasi calaohi Simoon, cau nenacaauru leeochoaauru amuritoheriina ii coichana aina cutaain cacoelai” naain bajaa Cana Coaunera Calaohi Jesoso, Simoon Fedoro cajene jana:

“Ejeen. Iite ichoelaihanune coitucuhicha curuaanaa,” naane jana:

“Aihane quere esenetaurera beraihura,” naane baihate coaiteen:

16 “Jonasi calaohi Simoon ii coichana aina cutaain ca-coelaina,” naain bajaa Jesocurisitone jana:

“Iite ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu,” naane jana coaiteen:

17 “Jonasi calaohi Simoon, ii coichana aina cutaain ca-coelaina,” naain nichata saain bajaane jaunte, inaderaain:

“Ejeen. Iite itolere coitucuhin, esinae ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu.

18 Esinaena aitoonra. Enamanaaneeinne banate, necoreeteen, chunijiu cunaa jereinajaaun curejetohi. Jana, inae biinaa neeinete, ichoii caeceaecaaine jana, ichajione curujuaain, cunaa jereeneina jaaun niha natiin chamaaurureeinha,” nae Simoon Fedoro rai Jesoso.

19 Niritoha Jesoso, “Naaonjoainna Cana Coaunera ere tonoraanune coreniha oha cureeunni,” naain coitucuha Fedorone coina.

Nii baihate: “Quere tonoraeraneen neeu, inoaelu netiin,” naane jana, 20 jaotoroalaain canu coari Fedoro, acauru caaijie cuhanune jaun.

21 Nii jaunte: “Chataaenriha jana caa,” naa Fedorone janate:

22 “Chaquena aasare ichei. Canu jerichaaunete nacoauneein turuhanune que tiaaajoaain ichaonaa naine, Ii laaen quereecha tonoraau,” nae.

23 Niritohana jaunte, orihaunnijiecha naaure ita rai nii canu aina Cana Coaunera Calaohi coitucuurera. Coatiha oenerihanuhinne que aitohi. Netechu jataain, “Chaquena aasare ichei. Canu jerichaaunete, coaiteen turuhanune que



tiaaoljaain ichaore,” nae Fedoro rai caque Cana Coaunera Calaohi Jesoso.

<sup>24</sup> Caraajenhane coaraain, laenaanune jaunte, esinae rauhijiriin erenaa ne.

<sup>25</sup> Itolerete niqwi ichae Cana Coaunera Calaohi Jesoso nete saain laenanohineein neene. Satiin laenanohineein nihane, nerihe i caa chauratane que tenaana jaan.

## **Cana Coaunera Calaohi Jesoso Cocoinanohichuru Afosotooru Ichanohichuru**

*Afosotooru rai, tururai niha Cana Coauneraacha letoanaa jerei- Cana Coaunera Suujuene*

<sup>1-2</sup> Nii nunuhe caje coauneein, niicha ichanohin ichaain, cachaauru relaalu Cana Coaunera Calaohi Jesoso dedeeu cauha cuhane que tiaaajoaaine quene, caa ichei beein, jauriaanejeein laenaunlu, jataain ii belaichaaunna jaunra Teofilo.

Chaen techu dedeeu cauha cuhane ajiniha, rai afosotooru-niicha cocoinaenenuuru cotijiaain raain suujua tenajaerate Cana Coaunera Suujue que acaauruhacha ichanenenu coitucuhin ichacuruhane coina. <sup>3</sup> Ohane baiha jetaote, jena-choonca janoneein cachaneein ecocohin, acaauru rai Cana Coaunera Cojoanonaa que ereereje esinae rauhijiriin oo caje ichanaain enacoauneein ichaohane esenetaauruhane coina.

<sup>4</sup> Jaiti Jerosaleen niicha cocoinaauri afosotooru aina nihane bana jetaote:

“Jiaaonriha caa Jerosaleen caje chunijiun cuhichenera. Aitocooaunne rijjijeein inara rai Ofaacha tenaa jerei cohacuche jauriaara,” naain chunijiun cuuru caohatein jetao,

<sup>5</sup> “Esinaete rauhijiriin acau que cacha baotisaain cojounacateraate Joaan. Nete inara chaabana nejein Cana Coaunera Suujue que, baotisaain cojounacatenohineein niha curiquicheeincha,” naain jauriaanejeein acaauru rai beelu jetao Cana Coaunera Calaohi Jesocurisito nitohaniane coina.

*Dedeeu iniha Cana Coaunera Calaohi Jesosone*

<sup>6</sup> Jesoso aina ita taojiaain neuru najaaun jetaote:

“Enekena coaiten jianacoo Israeli cocoaicha nichaachene mitareeita Curuaanaa, raotojoein cana ichao que ichao-hacachene coina,” naain bajaauruha niicha cocoinanenuurune jana jetaote:

<sup>7</sup> “Nainiheeiche inara nii coitucuhichenera. Chatohanai bana chaainti, nii ichaa cureein Ofata. Leinjiin acaachate nii coitucue niqicha. <sup>8</sup> Nete inara ichoae fauha Ofa Cana Coaunera Suujuene, nii aina itolere ichana naineriquicheein inara netonaicha. Chaente chatohanai que casilanaala, laraajiin itolere Jerosaleen sacutaain, itolere Jodea batane,

Samaria batane, naaonjoainuri sacutaainchuru amuhemu-  
jueein canu ere beebijha curiquicheein, itolereneein chau-  
ratane sacutaain canu coitucuuruhane coinara,” nae jetao  
acaauru rai Jesoso.

<sup>9</sup> Niritoha acaauru raine jaun jetaote, coarajeeurhane  
jana jetao, dede sacari jana nitajeooriin dedeeu cauha cue  
Jesoso.

<sup>10</sup> Nii jaun jetaote, coarihurenihane jaun, cuu caaijie co-  
joelaauruhane jana jetao, somaratohanai que cajionequiin  
acaauru rene ecoocure coroatajai anjeraauru

<sup>11</sup> Nitohaneein ecocohin jetaote:

“Chanuna dede cojoaelaichete Calileea cocoaichacuru.  
Nii coarajeeichene jana dedeeu cauha cuhane rijijieeinte,  
coaiteen turuha ureein Jesosora,” naaure jetao acaauru rai.

### *Jodasi coreenraniha Matiasi raauruhane*

<sup>12</sup> Nii jaun jetaote, nii Oliboneein curuajaain nenea  
ichatane ucuunno neeuru caje cauha cuure Jerosaleeun,  
Jesohacha cocoinaauri afosotooru, ichuunnejeein  
le oaraanca metoro fautaeriin nebetacanaa janonaa  
bana amuuruha cachaaurune jerecuruha Jorioocurune  
itaanejeein. <sup>13</sup> Inae nii neseeu turuhin jetaote, ecuunetiin  
coroatajaain coaranai loreri asaae sini aihuruhane jaun  
jetao, iniha cuure ita caaijie, Fedoro, Saantiaao, Joaan,  
Aanderesi, Ferifi, Tomasi, Bartolomee, Mateeo, Arafeeo  
calaohi Saantiaao, chaen, Selote naaurunaja- Simoon, chaen,  
Saantiaao calaohi- Jodasi, naaonjoaainunri. <sup>14</sup> Satiin nii  
afosotooru jetaote, inetono janonaa bana ita taojiaain, Cana  
Coanera bajae bajaecururejetelu, Jesoso nejeraauru, chaen  
neba Mariha, chaen leeochoauru enecuru, naaonjoaainunri  
aina.

<sup>15</sup> Nii cojoanonaa bananeein jetaote, ita taojiaaure lefasha  
coroata chooncaain nenacaauru- Cana Coanera Calaohi  
Jesoso esenetaeraauru. Nii jana jetaote, acaauru cataaun  
nichaauraain jetao, acaauru rai:

<sup>16</sup> “Jesocurisito coreniha canejeraauru, inae Quiricha  
Inoansi cuhane laenaerateein Rabiri que beratihalu Cana  
Coanera Suujuene rijijieein situhanetene. Nii jaunte  
Jesoso mucuha cunacaauru aina cue Jodasi, acaauru  
rai beranu que. <sup>17</sup> Canacaanu aina nere beranu quete  
niqui ranojineein nelu. Nete nitohaneein ichae. <sup>18</sup> Nii  
Jodasi jetaote, coretecuruhane jaan coriqui coreniha atane  
coretihane jaun jetao, nii baiha nemarote. Nemarotihane  
jaun jetao, couturi que chujujuaain tacaane jaun jetao,  
nefohitoha rai surine jaun, jianacoon chatolene cacha  
suri. <sup>19</sup> Nii coitucuhinte, nii atane curuaateure Jerosaleen

cocoaichacuru Areseramanein. Acaauru ere cuhane, 'Areserama' naanete, 'Ichana core-corigui coreniha ranojoin atane.' naane aite. <sup>20</sup> Cana Coaunera Quiricha Inoaensi-Salmo cuhanete:

'Rai loreri quete jaole que.

Nihei nasaae ichoai.'

naain laenanohineein ne. Chaen techu:

'Niicha ichaneni neein nenea

icharaaunu quete enoe

coreenranu que leechoa cacha.'

naain, Cana Coaunera Quiricha Inoaensi cuhane laenanohineein ne.

<sup>21-22</sup> Nete, cau canacaanu aina neeure- Cana Curuanaa Jesoso baotisiaa Joanne caje coaunein- dedeeu cauha cuhanereein tiaaojoaain- canacaanu corihaniha amuhemuhenaacauru cachaauru. Aihana jaun, canacaanu lechoonca coroatajanu que, chunocoha acaauru caje enohanete caohachare, canacaanu aina, esinae rauhijiriin ichanaa Jesusone coaracuruhane jaun, canacaanu aina beraanu que," nae jetao Fedoro.

<sup>23</sup> Nii jaun jetaote, "Barasaba Josto" naain acaauruhacha curuaatei Jose, Matiasi, naaonjoainuri, jelai ita rohan tenajaain jetao, niicha jerei biha acaauru rai Cana Coaunerane coina jetao:

<sup>24-25</sup> "Cana Coaunera, iite saatiin cacha suujua coitucuera neein neeicha. Iite, canacaanu que nii coitucueratenaa naineeicha. Chariji, caa coroatajaihuri caje nainere, niicha jereeineein nosa coreniha cunaa jerena jaun cunaa corenaniha, iicha teei amihanenaa ichana nainereta," naain jetao, Cana Coaunera bajaauere acaauru rai.

<sup>26</sup> Niritiin Cana Coaunera bajaauruhane baiha jetaote, niha ajeri catu, cojunaca siriina jaun, "Cojunaca siricha mucuerate aca nereeincha," naauru jana jetaote, rauhijiriin nii cojunaca aina nenea mucue Matiasi. Nii rijieeoritiin jetaote, lechoonca coroatajaaure Jesocurisito letonocuru, lechoonca leinjiin neeuruhane baiha.

## 2

### *Fauha uha Cana Coaunera Suujuene*

<sup>1</sup> Jorioocuru beseta Feentecosetesi janonaa bana nihane jaun jetaote, satiin le laurijieein ita taojiaain neeure, Cana Coaunera bajaauruhane coina Jesocurisito esenetaeraauru.

<sup>2</sup> Nii jana jetaote, cuu le lorerijieein satiin codoha-cooruhana jana, luhecotariin tonijiaain cujuana rijitiin fauha uhe Cana Coaunera Suujue dede caje. <sup>3</sup> Nitohanein tonijiaain fauhin jetaote, nii satiin- ecu nenacaauru

suujueniha neeoritiin, acaauru bichohe naainetiin, usi lanaro tocohanein lanalanaaonanae. <sup>4</sup> Nii aina jetaote, nejelau nejelaauru, lauri laurichuru caje uhin cuu turunacaauru cachaauru rai, acaauru ere cuhane ereeure satiin Jesocurisito esenetaeraauru, erelanaaca Cana Coaunera Suujuene rijijieein.

<sup>5</sup> Nii bana jetaote, cuu nii Jerosaleeun turuhin neeure lauri lauri atane sacutaainchuru caje unacaauru- Cana Coaunera aitoonjoa rijijieein ichaonacaauru Jorioocuru, ecu Feentecosetesi beseta bitoaaauruhane coina. <sup>6</sup> Nitohanein inae acaauru ichoaae fauha Cana Coaunera Suujuene jana jetaote, tonijiaain ereeuruha Jesoso esenetaeraaurune jana jetaote, satiin codoonetoore nii lauri lauri caje unacaauru cachaauru, acaauru ereeuru cuhane aitocuruhane aonaain. Nitohanein jetaote, suujuanu inaaoritelanaala <sup>7</sup> cojoaelatonajaain:

“Calilea cocoaichacuru nihanatiin, <sup>8</sup> inasiina cana ere cuhane aitocure aonacaachene coina. <sup>9</sup> Cautē nihacache itolere sacutaain caje uhinichaachene, Partia batane caje unacaauru, Media batane caje unacaauru, Elam batane caje unacaauru, Jodea batane caje unacaauru, Capadosia batane caje unacaauru, Poonto batane caje unacaauru, chaen Asia batane caje- unacaauru, <sup>10</sup> Firijia batane caje unacaauru, Paanfilia batane caje unacaauru, chaen Egipto batane caje unacaauru, tajiha Sirene bujua nena Libia batane caje unacaauru. Chaen techu, cau neeure cana aina Romanocuru netonai. <sup>11</sup> Acaauru tabaaaurute Jorionecure. Jana leeochoaaurute, Jorionecurenihane saijieein Jorioonein nerotocure. Chaen techu cau neeure cana aina Cureta batane caje unacaauru, chaen Arabia batane caje unacaauru, naaonjoaain-unri. Nitohanein araai laurii caje uhacachene saijieeinte, satiin lauri lauri caje uhin nichaachene ereeuru cuhane Cana Coaunera coroaecuruhane jana aonajihancache,” naain jetao satiin cojoelatoore.

<sup>12</sup> Nitohanein cojoelatiin jetaote: “Chatohanihana,” naain ita caje bajaee bajaecure satiin.

<sup>13</sup> Jana acaauru tabaaauru jetaote: “Chaquena ereeure caa ajenacaauru,” naain acaauru batocure.

### *Cachaauru raite ere Fedoro.*

<sup>14</sup> Nii jaun jetaote, lechoonca leinjiin aina ecu nenacaauru afosotooru aina nichaauraain jetao tonijiaain:

“Aonacuche satiin Jorioocuru. Satiin cau Jerosaleeun neiniquichene raina aitoreeunni coitucuhichene coina. <sup>15</sup> Coatiha aitocohichene jana, aansijiinijin ajeeuruhi caa cachaauruta. Inasiina jaiti janoneniha natiin ajeeurureta. Ena nuna macojiu teejiha enoto natiin, cha caaunna

ajeeurure. <sup>16</sup> Nete catohanihane coina, inoanlu inae aitiin  
besihalu Cana Coaunera Ere bera inoansi Joherine rijijiein:

<sup>17</sup> 'Inara rai quiicha tei janonaa  
besautelalaje raina,  
satiin chauratane que nenacaauru choae  
canu suujue letoareeunnicha.

Nii banate,  
quiicha chana jerei coaraain  
beebejiha cuurureein canu coreniha,  
inara nefoerateeurura.  
Enamanaacuru niha natiinte,  
acaauru que quiicha coaratei  
coaracurureeincha.  
Binaacuru nihanatiinte,  
quiicha coaratei

coaraa cuurureein acaauru sinihura.  
<sup>18</sup> Nitohanein inae cutihane banane,  
saain canu cachaauru,  
enecuru, quichaauru,  
naaonjoainuri choae  
canu suujue letoareeunni  
canu ere beebejeeuruhane coinara.

<sup>19</sup> Chaenna, naain dedeeu  
jataain cojoaelanaacojoai  
coaratiha cureeunnicha.  
Jerichanejeeinachu,  
chauratane que coaratiha cureeunnicha.  
Nii banate ecooca cureein  
ichana, usi tabai,  
suruaa neeonjoaain,  
naaonjoainuri chauratane sacutaaincha.

<sup>20</sup> Nii banate conoenereein enotora.  
Jana atenete,  
ichana tochanai jana niha cureeincha.  
Nitohanihate cureein  
inae ichuun nejeeonriha  
turu rai niha inara Curuaanaane janara.  
Nii cojoanonaa banate,  
coasinacaain elunareeincha.  
Nerinaain nii caje nichotei cachata.

<sup>21</sup> Nete, cairichaaajoaain coaraa  
Cana Curuaanaane coina  
bajae bajajeein ichaonacaauru,  
satiin nii caje nichotiha cuurureeincha.'  
naain nere bera inoansi Joheri que beratihalu Cana  
Coaunerane rijijieinte, inae caa aihane jana coaraquichera.

<sup>22</sup> Aihana jaun, caohachaain rautaaain aitocooaunne  
aonacuchena, caa que erete aonaquichera Israeli

cocoaichacuru. Satiin coarajeeichene notaracaete, itolere ichaain inara notaarate Nasarete cocoaicha- Jesoso que Cana Coaunera rai letononeein nihane coitucuhichene coina niquicha. <sup>23</sup> Nete, inae inoaenlu nitohaneein teeichene coina, niicha jerei rijijieein ichaa Cana Coaunerane jaun, inara rai tiha nii terane jana, amaain teeiche nechu aansai cachaauru raine jaun, coroso que teein sohin jaaorelu. <sup>24</sup> Nete onaa caje ichatelu Cana Coaunera, onaa caje colucohin, amuritonaa nainesiniha onaane jaun. <sup>25</sup> Inoaenlu jaiti caa chauratane que turueniha Jesocurisitone janate, aitorichaain Jesusone rijitoein:

‘Itolere janonaa banate,

cacorataanereein Cana Curuaanaara.

Aihana jaun,

nerinaain chatohaneein canu terata.

<sup>26</sup> Nii jaaunte,

raotojoein rachoojoein ne canu suujuara.

Chaen nechu,

chaque casilanaala raotojoein ichaaon,

<sup>27</sup> curu cuhane nitajiha canu jaberecone nainatejelanaala, niheichu

setuha canu jaberecone nainatejenereeinine jaunra.

<sup>28</sup> Iite canu que,

onaa caje ichananaja coarateeicha.

Nii jaunna,

raotojoein rachoojoein nereeunni,’

narichaain Jesoso, Cana Coaunera raine rijitoeinte belu curuaanaa inoaensi Rabiri que beratiha Cana Coaunerana jaun.

<sup>29</sup> Jesocurisito coreniha canejeraauru, jerecuchene esinae rauhijiriin inara rai aitete aonaquiche. Nii coitucuhichene rijijieinte, ohalu cana foeratera Rabirine jana, conautecuruhane jaun cau ne rai natanebana. <sup>30</sup> Nete, esinae rauhijiriin rai nere bera inoaensi niha Rabirina jaun, rai nichoalacana curuaanaa- *Rey* neein tihane coina, rai besihalu Cana Coaunerane jaun, coara rijijieein coitucuelu- curuaanaa inoaensi Rabiri:

‘Ii ichoala ichoalacuru calaohite, Jorioocuru curuaanaa *Rey* niha cureeinha.’ naain que coitucueratiha Cana Coaunerane jaun.

<sup>31</sup> Nii jaunte, inoaenlu jaiti turueniha Cana Coaunera letono- Mesihazine jana, nota que coara rijitoein:

'Naaonjoaante, turuha ureeinha. Nihei nitajerinaain rai jaberecota. Niheichu ecu seturinaainta. Oo cajete ichana-reein Mesihasischa,' naain caohacha nainejeein jitariin coitucuhana jaun, Jesoso coara rijitjoein belu curuaanaa inoansi Rabiri.

<sup>32</sup> Nii jaunna esinae rauhijiriin bihalune rijijiein, canaacaanu netonai, canaacaanu nota que ichanaa Jesusone coaraacaanu, ichatiha Cana Coaunerana jaun. <sup>33</sup> Nitohanein ichateeinte, enacoaunein dedeeu rae Cana Coaunera, rai raotono nichajai que, aina jiniiquiin nihane coina. Chaaen techu, nitohanein dedeeu raain, nii rai niicha tenaa jerei rai Suujue te. Niite, caa inara notaracae canaacaanu nainetiin chaluhanee jaun, satiin coaraain aonaquiche. Aihana jaun, inae laen coitucuhiche raaotjoein. <sup>34-35</sup> Coatiha Cana Coaunera ere bera- curuaanaa inoansi Rabiri, dedeeu iniha cuhulu. Cana Coaunera Calaochi Jesusote iniha cuelu. Nii jaunte,

' "Iite satiin Curuaanaa neeicha.

Cau caraaotono nichajai que carohan nelaurihaau,

ii que nejeratenacaauru amuritohine coina

ichacaanne reentiaaincha,"

naa Cana Curuaanaa rai Cana Coaunerara,'

naain Jesoso belu Rabiri, beratihia que Cana Coaunerane jaun.

<sup>36</sup> Aihana jaun, satiin Jorioneeichene raina caa beun raotjoein coitucuhichene coina. Nii coroso que tein inaraacha focoi- inaraacha atinai Jesusote, satiin Curuaanaa Mesihasee in te Cana Coaunera," naa Fedorona jaun jetaote, <sup>37</sup> que suujua rohecaain, jataaen inaderaain:

"Jesocurisito coreniha canejeraauru, cha charihacaanuta," naain bajaauruhane jana jetaote:

<sup>38</sup> "Cana Coaunera notaracae baaso ichaain, osa que nesaruhin naosatein, naaonjoaain neeichene jiaanein, Cana Curuaanaa Jesocurisito coreniha nebaotisaerateeuche satinte, inara osa caje inara mitaain, inara rai- rai Suujue teine Cana Coaunerara. <sup>39</sup> Catohanein tihane coinata, inoanlu beratelu Cana Coaunera. Niite nenacae inara caohachanu neen ne, satiin inara calaohichuru aina, satiin coriaae nenacaauru raine maajeein. Satiin niicha cotihacuri raite, rai Suujue tiha cureein Cana Curuaanaa- Cana Coaunera," <sup>40</sup> naain acaauru suujuatiha, nii cachaauru- baasonein ichaonacaauru caje mituuruhane coina, Fedorone jaun jetaote, <sup>41</sup> nii niicha beebejei esenetaain tonoraeraauru jetaote, baotisaain cojounacatenojeein, Jesoso esenetaeranein neeure, nii bananein nichata oaraancai cachaauru.



<sup>42</sup> Nii jaun jetaote, satiin rauhijiriin ichaaore, relanajaauruha nii afosotoorune rijijieein, ita suujua rijitoejeiin jiniquiiin ita coroatajaneein, ita taojiaain ita aina Cana Coaunera bajaain, ita aina jiniiquiin lenoneein naaonjoaaurre.

*Raotojoeinte ichaaore Jesocurisito esenetaeraauru.*

<sup>43</sup> Nii jaun jetaote, satiin cojoaelatoore, itolere ichaain-cachaauru notaaratiha afosotooru que Cana Coaunerana jaun. <sup>44</sup> Satiin nii esenetaeraauru jetaote, ita suujua rijitoejeiin neein, ita rai chaelai sirichuruhane ita si-hure ita acatiha tacaain. <sup>45</sup> Chaelai acaauruhacha sirii que necoreteeuruhane nenainetiinete, ita aina nii corecoriqui teein ita rai leruhin raaure, raotojoeiin latecuruhane rijiinanaain. <sup>46</sup> Cojoanoonetoejeiin jetaote ita taojiaaure, ita taojiaauruhana jaan coloheri-Teenforo asae. Rai lorerichuru asaae nihanatiin jetaote, ita taojiaain, ita rai lenone chaluhiin lenonecure jiniiquiin, raotojoeiin rachoojoeiin <sup>47</sup> Cana Coaunera corojeein. Chaen jetao techu, caohachaaain neeuruhane coaracure satiin ecu nenacaauru cachaauru.

Cojoanoonetoejeinte, niicha ichoteratecuri tiha acaauru aina, Cana Coaunerane jaun nejeeotejeein sacuure.

### 3

*Nerautaa leinjiin bacosane*

<sup>1</sup> Nuna macohi choae teejiha enotone jana jetaote, nii ita taojiaauruha Jorioocuruna jaan loreri Teenforo asae cuure Fedoro, Joaan, naaonjoainuri cuu Cana Coaunera bajaauruhane coina. Jelai rijiu enoto tiaajianaain jetaote, ita taojiaaure satiin Cana Coaunera bajaauruhane coina. <sup>2</sup> Nii jana jetaote, nii Teenforo acuujuaniha ne leinjiin bacosanein nejanoa caje coauneein nena cache. Cojoanoonetoejeiin jetaote, nii Teenforo acuujuu- Caohachajeinein-acaauruhacha curuhateihu amaain teure, coriqui bajaa ecu enonacaauru cajene coina. <sup>3-4</sup> Nii jana jetaote, enooru coina iniiijina cuuruha Fedoro aina Joanne jana jetaote, acaauru caje coriqui bajae nii bacosa. Nitohaneein coriqui bajaa acaauru caje, nii bacosane jaun jetaote, coarajeein jetao:

<sup>5-6</sup> "Aonaaura," naa nii bacosa rai Fedorone jana,

"Chaelai teeuruhane coina jecha aite," naain acaauru coarajihane jana jetaote,

"Nihei nohane canacaanu rai coriqui. Nena quiicha sirii tereeni icheicha. Nasarete cocoaicha Jesocurisito coreniha, nimichuhin nichaaurain amuunte coaracaara," <sup>7</sup> naain

nii bacosa biji- raotono nichajai que mucuhin michuha Fedorone jana jetaote, nii rijieeoritiin caohachanainejeein nerautae nii bacosa tija aina- rai tajichocuru. <sup>8</sup> Nii jaun jetaote, nimichuhin nichaauraaain, nii ita taojiaauruha Jorioocuruna jaan loreri Teenforo asae enoha cue jeluhate jeluhatiin Cana Coanera coroaeejin. <sup>9-10</sup> Nitohaneein nimichuhin nichaauraaain amuhin, Cana Coanera coroaecane coaraain jetaote, satiin cojoaelatiin coasichure situuruhane nainein Teenforo bacuujuu- Caohachajeineein- acaauruhacha curuaateihu lauhequuin coriqui bajaera nihane coitucuhin.

*Teenforo chajeneein nenea loreri Salomoonneein- acaauruhacha curuaateihu neein ereerejiha Fedorone*

<sup>11</sup> Nitohaneein jetaote, Fedoro aina Joaan caje coriaae nalunaa jerene nii bacosa nihane caje nerautaanaa cacha. Nii jana jetaote, Teenforo chajeneein nenea loreri Salomoonneein curuajaain nenea asaa neeuruhane jaun, soroneein ruhanihajaaintiin cuhin cojoaelatiin coarajeeure satiin nii cuu nenacaauru cachaauru. <sup>12</sup> Nii jaun jetaote, acaauru rai:

“Chanuna canacaanu cojoelatohichete Israeli cocoaichacuru. Coatiha canacaanuhacha nejeein nihane nerautarihei caa cachata. Niheichu jataain leeochoauru amurijiriin, Cana Coanera ere tonoraeranein nihacaanune jaun niheinta,” nae Fedoro. <sup>13</sup> Niritiin jetaote:

“Nii cana inoaensihuru- Abaraaun, Isaca, Jacobo, naaonjoainuri coanera- Cana Coaunerate, jataain nelateein nihane coina, cocoaainaan rai letono Jesoso letoaelu. Acate, nii cocoainanacaihuri rai teeichene jana, jiaanena jeriha coberanadoro Filatone saijieein, caohateein jianena jere-neeichelu. <sup>14</sup> Nitohaneein caohachanejesina ichara nihanatiinte, jianena jeriha Filatone jana, caohateein neeichelu. Coinanaa, nechu aansai sonajaaineein nenea jianeratequichelu. <sup>15</sup> Nitohaneeinte, nii ichaonaa tera sohin joerateeichene jana, ichatelu Cana Coanera. Canacaanuna, nii ichtiha Cana Coaunerane coaraneein nihacaanu. <sup>16</sup> Nii Jesoso corenihate nerautae caa cacha- inaraacha coitucuicha. Jesosohacha corenihate, caochanainejeein nerautae caa cacha inara notaracaera,” naain jetao:

<sup>17</sup> “Acanihane coitucueeneichene jaun, sohin joerateeichelu inara curuanaacuru aina jiniiquine coitucuhanu raotojoeeincha canejeraauru. <sup>18</sup> Nitohaneein situhin nihanetene. Inae nere bera inoaensihuru que, ‘Naaonjoaate cairichaaeriin inae nirijieein cuaajeein sohin jaoha cuurureeincha,’ naain nere bera inoaensihuru que beratihalu inoaenlu Cana Coaunerane jaunte, Cana Coanera ere

nainaane coina, nitohaneein nii inoaenlu- inara coroatajan-  
 eraaunu que- niicha letoanaa jereilu Mesihasi teeichelura.  
<sup>19</sup> Aihane jaun, chatohaneein baaso ichaain neeichene, suu-  
 juelanaala jitariin been, jiaaneein Cana Coaunera ere tono-  
 raain neeuchete caseteco coaraquichene rai neeichene caje  
 inara ichotemiin- Cana Coaunera. <sup>20</sup> Chaen techu nito-  
 haneein neeichene, nii inoaenlu- inara coroatajaneraaunu  
 que- niicha letoanaa jereilu- Mesihasi- Jesoso letoareein na-  
 coauneeincha. <sup>21</sup> Nete jaiti itolere rucuheca Cana Coauner-  
 ane reentiaan, dedeeu niha cureein nere bera inoaensihuru  
 que, inoaenlu beratiha Cana Coaunerane tocohaneeincha.  
<sup>22</sup> Nii quete, cana inoaensihuru rai:

‘Caa nere beraneein caletohane rijjijeeinte, inara caje na-  
 coauneein rai nere bera letoareein Cana Coaunerara. Itolere  
 que tonaane, nere tonoraain neeuchera. <sup>23</sup> Nere tonorana  
 jeriheichurute, caohachanainejeein nitajiha cuurureeincha.’  
 naain belu cana inoaensihuru rai Moisesa.

<sup>24</sup> Caritiinte aitoroaeetoorelu Cana Coaunera ere bera  
 inoaensi- Samoeri caje coauneein satiin nere bera inoaen-  
 sihuru, catohaneein turuhane quera. <sup>25</sup> Nii jaun inarate, nii  
 nere bera inoaensihuru que beratihalu Cana Coaunerane ri-  
 jijieein, nii naitoonjoa sirichaneein neeichera. Chaen techu,  
 inoaenlu cana foeratera inoaensi- Abaraaun rai:

‘Satiin caa chauratane que nenacaurune, caohachaain  
 teratiha cureeunni ii nefoerateeuru coreniha.’ naelu  
 Cana Coaunera, cana foeratera inoaensi- Abaraaun rai.  
<sup>26</sup> Niritohane jaunte, oo caje nii Calaohi ichateein, jauriaane-  
 jeein inara rene letoaelu Cana Coaunera, nii coaraain nee-  
 ichene, baaso ichaaechajeein neeichene jianeein neeichene,  
 inara coroatajanein nihane coinara,” nae jetao Fedoro, nii  
 cuu nenacauru cachaauru rai.

## 4

### *Cocoinanacaihuri acatiha neeuruha Fedoro aina Joanne*

<sup>1</sup> Niritiin jaiti cachaauru rai ereereeca Fedoro aina Joanne  
 jana jetaote, tajiha turuha uure saseredotecuru, Teenforo  
 beraihurera- folisihacuru- curuaanaa, sadoseeocuru,  
 naaonjoainuri. <sup>2</sup> Turuuruhane jana: “Coaraanachuinti  
 oo caje ichana nainiha cachana jaun, oo caje ichanaalu  
 Jesosone. Nii jaunne esinae rauhijiriin oo caje ichana nainiha  
 cachane coitucuhacaanu,” naain cacha relaaauruha Fedoro  
 aina Joanne aonajeeuruhana jaun jetaote, obaaecure  
 sadoseeocuru: “Nihei chunei onaa ichatera. Nihei Cana  
 Coaunera niha natiin onaa ichatena nainiheita,” naain  
 cachaauru relaauruhana jaun.

<sup>3</sup> Nitohaneein obajeein jetaote, Joaan aina curuataain Fedoro mucuhin amaain, inae sonaina nihana jaun, caresero cuhane tenajaain cuu janoaeratenajaare.

<sup>4</sup> Nii inatiin jetaote, atiin esenetaaure nii cuu aonajeeurera- arajii cachaauru. Nii jaun jetaote, ita que joraain quichaauru nejesina janijiin, saoqui oharaancaelalajeein Jesocurisito esenetaeraneein neure, enecuru, canaanaihuru, naaonjoainuri janijilanaala.

<sup>5</sup> Nii cojoanoo jetaote, nii que ita rai ereeuru coina, Jerosaleeun ita taojiaaure Jorioocuru curuaanaacuru, satiin acaauru bichauhenaauru, chaen Cana Coaunera Quiricha Inoaensi que cache relaaurera, naaonjoainuri. <sup>6</sup> Chaen jetao techu, cuu neure saseredotecuru curuaanaacuru Anasi, chaen Caifasi, Joaan, Alejaandoro, satiin nii saseredotecuru curuaanaacuru araaichuru, naaonjoainuri. <sup>7</sup> Acaauru jetaote, caresero caje rocoeratenajaain, Fedoro aina Joaan raerateein, acaauru cataaun tenajaain acaauru rai:

“Cha cocoainanacainein inara tihane aina caa aaicheta. Cha corenihata,” naain Fedoro aina Joaan caje bajaauruhane jana jetaote, <sup>8</sup> coroatajaniha Cana Coaunera Suujuene jaun, cha que casilanaala jetao:

“Aonacuche satiin caraaichuru curuaanaacuru, satiin Israeli cocoaichacuru bichauhenaauru. <sup>9</sup> Nii cunaitenaa rai caohacha ichara coitucunaa jereein bajaachene jaunna, inara rai berichaanuhincha, coitucuhin neeiche satiine coinara. ‘Nitohaneeinna nerautaa caa cachate.’ naain coitucuhichene jerena caaunra. <sup>10</sup> Satiin aonajeeichene uri-choone berichaanuhin, satiin Israeli cocoaicha neeichene coitucuhin neeichene coinara. Nii coroso que teratein-inaraacha sohin- inaraacha joerateilu Nasarete cocoaicha Jesocurisito- oo caje Cana Coauneracha ichatei corenihate, caohachanainejeein cunai caje nerautaan, caa canaacaanu aina inara acatiha ne caa cunai caje nerautanaa cachara. Inae satiin, inara nota que, caohachanainejeein nerautaane coaraquchera. <sup>11</sup> Caa cache rautaera- Jesusote, letoae Cana Coaunera, satiin cache coroatajaneraaunu que niqui. Nete, nere aonana jerelanaala, que jaolequuin neeichera. <sup>12</sup> Acate letoae Cana Coaunera, nabana nitajeein nihacachene coataara. Nihei chunei, leeocho cache tihei Cana Coaunera, caa chauratane queta. Leinjiin acaachate, chabana nitajenaa charanejeein nihacache jaanu teraanu que- letononeein nena ne, itolere baaso caje- jianacoo cana mitaeraanu quera,” naa acaauru rai Fedorona jaun jetaote:

<sup>13</sup> “Caaurute, Jesoso aina amuhemujeein nerelanacaauru nera. Coatiha jataain cana tocohaneein, caohatiin- quiricha

inaaurera niheita. Nete jataain coitucuera rijitjoeein, er- enaa inaure caa cachaaaurura,” naaure cojoaelatiin nii co- coainanacaihuru, cha que casilanaala ereeuruha Fedoro aina Joanne jaun. <sup>14</sup> Chaen, cuu acaauru aina, chujuhecoha nii cunai caje nerautanaa cachana jaun jetaote, nii chaque tonaain erenaa nainecurene. <sup>15</sup> Nii jaun jetaote, nii ita tao- jiaauruhana jaan caje, mitaeratenajaure. Nitohaneein, mi- taeratenajaain jetaote, cuu nejesinajeein, ita cotaicha rijitiin:

<sup>16</sup> “Cha charihahacache, caa cachaaauru ainata. Itolere caa Jerosaleeun nenacaaauru cachaaaurute, cojoelanaacojoai ichaain, caa leinjiin cache rautaaauruhane coitucuurera. Nii que, nainihe, ‘Casaje.’ naain, irihacacheneta. <sup>17</sup> Coanete, taeneein cuajeein, Jesoso que- cache relaauruhane coataa, nii caohatichaachete jianecurumiin, nabana chunei cache rai, Jesoso que ereein neeuruhane coataara,” naain jetaote, <sup>18</sup> Fedoro aina Joan cotijiaain:

“Jiaonriha Jesoso coacuhin que ereerejeein chunei cache relaain neeichenera. Nii jianeechacuchera,” naauruha acaauru raine jana jetaote:

<sup>19</sup> “Inara suujua coaracuche jauriaanejeeincha. Inasiina Cana Coaunera ere tonoraacaanune jianeein inara ere tonorarihacaanu, Cana Coaunera ere tonoraacaanune colaihaje tacaainta. <sup>20</sup> Nainihaacaanu nii que ereerejihacaanune jianichaanuneta. Inasiina, canacaanu uricho que- canacaanuhacha aonai, canacaanuhacha coarai, canacaanuhacha coitucui, naojoaihunri que cachaauru relanaa jianerihacaanuta,” naain tonoranaacuruha Fedoororune jaun jetaote, <sup>21</sup> cache relaauruhane caohatein:

“Nenacaen nitohanai ichaain, sacuhichenena, jelai choae jauhecotojoeriin inara casetecarichaanuhincha,” naaure jetao, acaauru rai cocoainanacaihuru.

Nitohaneein jetaote, casetecanajaelanaala, nirijieein jiane- naacure. Jianenaana jerecuruhi jetao niqiu. Ne jetaote, nii cache rautaaauruha Fedoororune coaraain, Cana Coaunera coroaecuruha satiin ecu nenacaaauru cachaaaurune jaun jetao acaauru jianecure.

<sup>22</sup> Nii cojoelanaacojoaain nerautanaa cache jetaote, jena- choonca jaanaca amurijiri.

*Cana Coaunera bajaauruha Jesoso esenetaureraauru, acaauru lararajihane coina.*

<sup>23</sup> Nitohaneein jianenaacuruhanana jaun jetaote, nii neeu- ruha acaauru leeochoaurune jaun, turuha cuure Fedoro aina Joan. Cuu acaauru rene turuhin jetaote, “Naaonjoaainte, canacaanu teeure canacaanu casataain, cana araaichuru bichauhenaauru, saseredotecuru curuaanaacuru ainara,”

naain jitariin, nii acaauru leeochoauru rai beeuruhane jaun jetaote, <sup>24</sup> cuu jiniiquiin, aonajeeuruhane baiha:

“Cana Coaunera, iite cana janonaa coauneraneein nee-icha. Iite cana rai dede, chauratane, cucuana, naaonjoaain coauneraneein neeicha. Iite itolere cautenurijihuru coauneraneein neeicha Cana Coaunera. <sup>25</sup> Iite, ii Suujue que beratein, ii ere bera inoasi Rabiri que beratein:

‘Chanuna joaereein  
rai suujua auhacaain  
nererojoecaure  
laurilauri nenacaauru cachaauru.  
Chanuna nitohaneein  
baasoneein suujua coaracure  
inacojoein cachaauru.

<sup>26</sup> Chaen techu

Cana Coaunera amurijiriin nenea coacuhin,  
nii niicha letoai Mesihasi que nejerateeure  
cana rai chauratane coaaranein  
que nenacaauru aina *reycuru*.’

naain aitiin berateeilune jaun, niritiin bihalu ii ere bera inoasi Rabirine rijijieeinte, <sup>27</sup> Romanocuru curuaanaacha tei Jorioocuru curuaanaa Foonsio Filato, Jorioocuru *rey* Erodesi, chaen nejelau atane nenacaauru, chaen Isaraelitaauru, naaonjoainuri, caa neseeu netaojiaain nejerateeure, nii ii jerenohin icharaanu que- ii letono Jesoso- iicha janijii iicha rai Mesihasi ainara. <sup>28</sup> Nitohanihane coina, inae inoaelu coacuhin ichaailune rijijieeinte, aihurera. Nitohaneeinte, aitohine nainaaurera Cana Coaunera.

<sup>29</sup> Aihana jaun, enene caje coaunein, canacaanu casataauruhane coaraaine, jelai amuritoheriin canacaanu coroatajaneuna, cha que casilanaala, cachaauru rai, ii ere beebjihacaanura, Cana Coaunera. <sup>30</sup> Chaen, laraajiin itolere ichana nainichaanune jaannu teeu, canacaanu rai, cunaitenacaauru rautaaain, cojoelanaacojoai ichaain naaonjoacaanune coina, esinaae rauhijiriin nii ii letono Jesoso letononein nihacaanune coaracuruha satiin cachaaurune coinara,” naain jetao jiniiquiin Cana Coaunera bajaure.

<sup>31</sup> Inae Cana Coaunera bajaauruhane nainaauruhane rijieoritiin jetaote, nerurujuaa nii netaojiaauruhana jaan jelaiine jana, acaauru suujua neeoritiin, acaauru suujua lararajiae Cana Coaunera Suujue. Nii aina jetaote, chaque casilanaala, chaque tonajelanaala, satiin cachaauru notara-cae laraajiin, Cana Coaunera Ere beebjeeure.

*Satiin rucuhelete, satiin acaauru rainein ne.*

<sup>32</sup> Satiin Jesoso esenetaeraauru jetaote, jataain arajiin ita aina neeuruhane saijieein, ita suujua rijitojoein coacuhin

jetao, “Coatiha leeinjiin cana rainuhachanu que, nihei caa canaacha sirii rucuheleta. Satiin cana raineente nera.” naaure jetao, satiin, ita rai. Nitohaneein jetaote, satiin rainein ne nii itolere acaauruhacha sirii.

<sup>33</sup> Nitohaneein jetaote, jelai choae jauhecotojoeriin, laraajiin, oo caje ichanaa Cana Curuaanaa Jesusone beebjeeure jetao nii afosotooru, itolere ichaain, acaauru coroatajaniha Cana Coaunerane que cachaauru notajaain. Nitohaneein jetaote, jelai choae jauhecotojoeriin, satiin, acaauru coroatajane Cana Coaunera. <sup>34</sup> Nii jaun jetaote, nii chunei leeinjiinejeein, chaque lanaain neeurene. Tabaauru atane sirichaauru, tabaauru loreri sirichaauru, naaonjoainuri jetao, que necoreteein, <sup>35</sup> nii afosotooru rai uhaain niicha raauri coriqui teure, latecuruhane rijiinanaain acaauru rai luruuruhane caina. <sup>36</sup> Coaraaunachuinti jetao, nii acaauru jana nena Lebita- Josenein curuajaain nena- Chifere cobena que nejanohanaa- Berenabeeneein afosotooruhacha curuaatei. “Berenabeen” naanete, “suujua nunaera” nae. <sup>37</sup> Nii cache jetaote, atane sirihana jaun jetao, que necoreteein, coreniha coriqui raain jetao, jitaain nii coriqui tee, afosotooru rai.

## 5

*Osa que nesaruhin, nohaneuruha Ananihasi, Safira, naaonjoaihunrine*

<sup>1</sup> Nejetaote acaauru aina ne leecha cache- Ananihasineein curuajai, rai comasai Safira aina. Aca jetaote, nii comasai aina leeinjiin atane que necoreteein, <sup>2</sup> ita suujua rijitjoein leruhin rai core raain, esi rijijieein jitariin amaera rijitiin: “Nocoa coriqui,” naain afosotooru rai teure. <sup>3</sup> Nii jana jetaote,

“Ananihasi, chanuna ishujua cuhane enoha Moconajaerane rijitjoein, Cana Coaunera Suujue rai nohanena jereein leruhin coriqui raain. <sup>4</sup> Nihei chunei ichei, ‘Caa atane que necoreteeura,’ naain ereein neita. Nitohaneein, eletoaera que necoretenaa lanaalate, icheineein niha satiin coriquine maajeein inatiin, leruhin raain nohaneicha. Nii atane necoreteeina jaan, coatiaa nejelau rainein nihein. Nii jaunte niqui, satiin, coriquine maajeein icheineein nera. Chanuna nitohanai ichana coacuhin ichaai. ‘Canacaanuacha jecha coritaai,’ naai jerihane niqui. Nete, Cana Coaunera notara cae canacaanu coritaai,” naa Ananihasi rai Fedorone jaun jetaote, <sup>5</sup> cuu aonajeeorihane baiha, tocojoaain tacaain, inae cuu ohe Ananihasi. Nii coaraain jetaote, satiin nii coasichure banetojoelanaala nii ecu neein coarajeurerera cachaauru.

<sup>6</sup> Nii jana jetaote, tajiha nichuuntaain coaraain, rai jabereco conajaain amaaain conautiha cuure cachaauru.

<sup>7</sup> Nii baiha jetaote, nichata oraai cuhane, tajiha turuhin enoha uhe nii onaa Ananihasi autana Safira: “Naaonjoaara,” naain coitucuelanaala, caohachanaenetojoein. <sup>8</sup> Nii jana jetaote:

“Esinaena rauhijiriin, nii beeichene jeoneei coreneein, inara rai atane que necoreteeiche,” naain bajaa Fedorone jana jetaote:

“Ejeen. Nii bihacaanune jeonejeeine, necoretiha-caanuchera,” naane jana jetaote:

<sup>9</sup> “Chanuna ita suujua rijitoein, Cana Coaunera notara-cae canacaanu coritaquiche. Nota tajiha uujueeuruhache ii sinijera amaaain, conauteraauru cachaaauruchera. Inae itonaa iamaaururichaaainchera,” naa Fedorone rijieeoritiin jetaote, <sup>10</sup> Fedoro tija asaae tocojoaain tacaain, cuu ohe nii ene. Nii jana jetaote, rai lana conautecuruhane caje turuhin, enoha cuuruha nii cachaaaurune jana, inae oha nii enene jaun, rai jabereco amaaain, rai lana rohan teein conautecure. <sup>11</sup> Nii jaun jetaote, banetojoelanaala coasichure nii satiin Jesso esenetaeraauru, satiin nii nitohaniane coitucuurerane maajeein.

*Afosotooru aina cuaain, itolere cojoaelanaacojoai ichaain cachaauru notaaratiha Cana Coaunerane*

<sup>12</sup> Nii afosotooru aina cuaain jetaote, itolere cunai caun cunaitenacaauru, bacosacuru, maosacuru, naaonjoaihunri rauterateein, itolere icharateein cacha notaarate Cana Coaunera. Nii bana jetaote, nii Teenforo chajeneein nana Salomoonnein curuajai asaae ita taojianajaaocure afosotooru, satiin Jesocurisito esenetaeraauru, naojoainunri. <sup>13</sup> Nejetaote, nii chunei acaauru aina netaojiana jerecurene casi caun, jataain belainaacuruha natiin. <sup>14</sup> Nejetaote, arajiin cachaauru enecuru netonaine maajeein Cana Curuaanaa esenetajeein nejeeotejeeure. <sup>15</sup> Nii jana jetaote, itolere cunai caun cunaitenacaauru mitaacoaain, cacha situnajaun bero auhaniha teeure, nela choae, rai rori choae, naajoaain, tabaauru que neconaa Fedoro beraerane, nerautaaauruhane coina. <sup>16</sup> Chaen nii Jerosaleeun rohan nenacaauru- neseeuu nenacaauru cachaauru netonai nihanatiin jetaote, tajiha turuha uure itolere cunai caun cunaitenacaauru, itolere coitucuhu cairichanojoein ichaonacaauru, naaonjoainuri uhaain. Niichuru jetaote, rai cunai caje rautanaacuruhane, jataain raotojoein satiin nerautaaure.

*Afosotooru que nejerateeuuha cocainanacaihunrine*



17-18 Nii jaun jetaote, itolere cache, acaauru belaihana jaun, nechujataain necolai caun, nii afosotooru mucuhin amain, caresero cuhane tenajaure nii saseredotecuru curuaanaa aina, nii oo caje cache ichatena nainiha Cana Coaunerane esenetaaichuru- sadoseeocuru. <sup>19</sup> Nii jana jetaote, janotiin caresero bacujua joracain, acaauru mitae Cana Coaunera letono- anjera. <sup>20</sup> Nitohaneein mitanajaain jetaote:

“Naain Teenforo cuhane enohin, cache cataaun nichaaurain, cachaaru rai beebejeein, caa Ena- Cana Coauneraacha Tei Ichaonaa beebejeeuchera,” naain jetao, letoanajae Cana Coaunera letono anjera. Nii jaun jetaote, mituhin cuhin, <sup>21</sup> janohetiin nii Teenforo asaae enohin, beebejeein cachaauru relaure.

Nii nainiha jetaote, saseredotecuru curuaanaa, chaen acaauru aina nenacaauru, naaonjoaihunri, satiin- acaauru bichauhenaauru cotihacure, netaojiaauruhane coina. Nitohaneein, ita taojiaain jetaote, nii afosotooru raerateure, caresero caje. <sup>22</sup> Nii jana jetaote, turuhin nii caresero joracain coaracuruha nii acaauru letonocuru- folisihacurune jana, nii leeinjiinejeein, cuu neeurene. Nii jaun jetaote, letoanajaaurera rai, biha cuure. <sup>23</sup> Turuhin jetao te:

“Caohatiin funojineein, acujua naineeinchuru soondarooru que caohatiin beraichain nihanatiinte, joracain coaracaanune jana, neeurene leeinjiinejeeincha,” naain beeuruhane jaun jetaote:

<sup>24</sup> “Nitohaneeuruhane, chachainti ichaa cuurureein nirijieein taeneein cuaajeeinta,” naaure, satiin saseredotecuru curuaanaa, saain Teenforo beraichacuru- folisihacuru curuaanaa, jataain nelateein nenacaauru saseredotecuru, naaonjoaihunrine jana jetaote, <sup>25</sup> tajiha turuhin:

“Nota Teenforo cuhanete, cachaauru relaa neeure caresero cuhane inaraacha enoanojoihurura,” naain, acaauru rai beenajae leeinjiin cache.

<sup>26</sup> Nii jaun jetaote, nii rijieeoritiin cuhin, rai folisihacuru amain, ranajaa cue folisihacuru curuaanaa. Nitohaneein cuhin jetaote, inae erunajaain, acaauru uhae, chatohaneein cunaain dadanajaelanaala cunaain, chatohaneein tenajaauruhane, ajeri que bodoosinajaauruha cachaaurune coataa. <sup>27</sup> Nitohaneein, turuanajaain jetaote, Jorioocuru curuaanaacuru, saseredotecuru curuaanaa, naaonjoaihunri acatiha tenajaain jetao:

<sup>28</sup> “Inae inara rai, nii cache que, cachaauru relaachene coataa aitiin, caohatihacaanulura. Nii saijieeinte, enanetojoein, nii jianena jereneeichera. Cha ichaquiche, nii que cache relaaainta. Inae itolereneein Jerosaleeun sacutaain, nii que cachaauru relaachera. Chaentechu, canacaanu que,

ohalu nii cachane ujuaitena jerequichera,” naa acaauru rai, saseredotecuru curuaanaane jana jetaote:

<sup>29</sup> “Cacha ere tonoracaanune choae jauhecotojoeriin jataain Cana Coaunera ere tonoraacaanune jaunna aihacaanura. <sup>30</sup> Nii cana inoaesihuru Coaunera- Cana Coaunerate, nii coroso que tein, inaraacha sohi inaraacha joailu- Jesoso ichatelura. <sup>31</sup> Nitohaneein jaurihaanejeein, oo caje ichateeinte, raotono nichajai que lauriaain, nii Jesoso cocoainae, itolere curuaanaa nihane coina, Cana Coaunerara. Chaen, itolere baaso caje- cacha mitaeraaunu quene maajeeinte, te Cana Coaunera, Isaraeli cocoaichacuru coroatajaneraaunu que, itolere baaso ichaechajeein neeuruhane jianein neeuruhane, acaauru que suujua acatena nainiha Cana Coaunerane coinara. <sup>32</sup> Canacaanuna, nii coitucuhin, coaraneein, que ereerejihacaanu. Chaen, nii nere tonoraain naitoonjoan icharaauru rai, Cana Coauneraacha tei Cana Coaunera Suujue netonoaite, canacaanu que nii coaratera,” naain tonoranaacure, Fedoro aina, leeochoauru afosotooru.

<sup>33</sup> Niritiin, tonoranaacuruhane jaun jetaote, obajeein, acaauru sohin, acaauru jaonaa jerecure. <sup>34</sup> Nii jana jetaote, nii cocoaainacaihunri aina cuu ne leeinjiin fariseeo Camalieli. Aca jetaote, Cana Coaunera Quiricha Inoaesi coitucueraneein, acaentonai cocoaainacaineein, jataain suujua acatecuruha itolere cachaaurune jaan ne. Nii jetaote, nimichuhin nichaaurain, basiinjiin afosotooru mitaerate, aerene. <sup>35</sup> Nitohaneein, inae mituuruhane jana jetaote:

“Aonacuche, satiin- Isaraeli cocoaichacuru. Caohachaain necohalajiin aihuchera. Nijiaonriha, joenreein coitucuera lanaala, chatohaneein caa cachaauru teratein neeichene. <sup>36</sup> Aihalu Teeodane coaucuchenaainti. Coaracuchenachuhinti, leesajei que niqui, ‘Aca jete, jataain itolere amurijiriin nelateineeinera.’ naane jaun niqui, esenetaain sacuuruha jena fashai cachaaurune. Nii jana, sohin jaoruhane jaun, ita caje riaaneein, jianecuruhalu- sacuureraauruneta. <sup>37</sup> Coaraaunachuinti, itolere sacutaain nenacaauru cachaauru janiichatiha Romanocuru curuaanaane bana, coaiteen Romanocuru aina nejeratiha leeinjiin- Calileea cocoaicha- Jodasine jana, jerichanejeein, acaentonoai sohin jaoruhane jaun, rai sacuurera netonoain, ita caje rihaaneein, jianecuruhaluneta. <sup>38</sup> Nii rijijieeintechu, Cana Coaunera letononeein aihureniha caa cachaaurune, raajenihane janiha cuurureeinte, rohecanacaaurureta. <sup>39</sup> Aihana jaun, Cana Coaunera letononeein aihuruhane jana, acaauru aina nejeratein, acaauru rohecaachenete, Cana Coaunera aina netonai

nejerateriquicheeincha. Aihana jaun, coaa Cana Coaunera aina nejeratena a munena coaucachera,” naa Camalieline jaun jetaote, nere tonoraare.

<sup>40</sup> Nitohaneein nere tonoraain jetaote, raujiaain nii afosotooru cotijiaain bisichatenajaain, “Nijiaonriha nenacae Jesoso que cache relain neechenera,” naain jetao, cache relauruhane caohateein, jianenaacure. <sup>41</sup> Nitohaneein jiane-naacuruhane jaun jetaote, nii cocoainanacaihunru notaracae raotojoein rachoojoein, jelai caje cauha cuure, bisiinajaain mainajeein, acaauru necoejechanuuruha, Jesoso coreniha, Cana Coaunera notaracaaene jaun. <sup>42</sup> Nii atiin jetaote, jianelanaala cojoanoonetojoein, nii acaauruhacha cohajei Mesihasi niha Jesusone beebejeein, cache relaaure, Teenforo asaae, loreri naineeine maajeein.

## 6

### *Caainsineein acaauru coroatajaneraaunu teeuruhane*

<sup>1</sup> Nitohaneein jetaote, nii bana nenacaen nejeeontejeein cuujueein, arajiin nefaaure Jesocurisito esenetaeraauru cachaauru. Nii jaun jetaote, nererojoecaaure nii Curieco ere cuhane erenacaauru- Jorioocuru, nii Ebereeo ere cuhane erenacaauru que. Nitohaneein, nererojoecaaain jetaote:

“Chanuna lenone chaluuruhane, inara aina nenacaauru autanaauru rai teeuruhane fautaerihanaain, canacaanu aina nenacaauru autanaauru rai quinacai teeure chaluurerata,” naaure Ebereeo ere cuhane- erenacaauru rai. <sup>2</sup> Nii jaun jetaote, jitariin, nii Jesocurisito esenetaeraauru taojiaaure nii lechoonca coroatajai Cana Coaunera letonocuru-afosotooru. Nitohaneein, taojianajaain jetaote, acaauru rai:

“Coatia caohacharihei, Cana Coaunera ere beebejihacaanune jiaanein, cache rai lenone teeurera beraichanein nihacaanuneta. <sup>3</sup> Aihana jaun, canejeraauru, caaunsine cache- itolere coitucuurera- Cana Coaunera Suujue que suujuequiin nenacaauru, inara caje, chariji chaainti esinaae rauhijiriin nitohanai ichana nainaeraaurune, niichuru janijiin beeuchene, canacaanu, acaauru rai amihanena tiha- caanu, jelai teein, nii coaraneein neeuruhane coinara. <sup>4</sup> Canacaanuna laen, satiin rai, Cana Coaunera bajaebajajeein, Cana Coaunera ere beebejeein sacurichaanuhicha,” naauruhane jana jetaote, <sup>5</sup> satiin, ita suujua rijitoein jerecure.

Nitohaneein, jereein jetaote, Jesocurisito ere esentaain- Cana Coaunera Suujue que suujuequiin nena Eseteba, chaen Ferifi, Poroocoro, Nicanori, Timoon, Paramenasi, chaen leinjiin cache- Antioquiha caje nena- Jorioonein nerotona- Nicolasi, naaonjoainuri janijiin raare.

<sup>6</sup> Nitohaneein janijiin ranajaain jetaote, tajiha turuanajaa uure nii neeuruha afosotoorune jaaun. Nii jana jetaote, acaauru couturi choae biji merercaain, Cana Coaunera bajaanure, acaauru cocoaanaa Cana Coaunerane caina.

<sup>7</sup> Nii aina, itolere sacutaain riaaneein, Cana Coaunera ere beebejeeuruhana jaun jetaote, nenacaen jelai choae jauheco-tojoeriin, Jerosaleeun, jataain nejeeonteeure Jesocurisito esenetaeraauru cachaauru. Arajii saseredotecuru- Joriooneein nenacaauru niha natiinte, Jesocurisito esenetaaure.

### *Eseteba mucuuruhane*

<sup>8</sup> Nii Eseteba jetaote, coroatajaniha Cana Coaunerane jaun, itolere que laraajiin, itolere cunaitenacaauru rautaaain, itolere ichaain cachaauru notajae. <sup>9</sup> Nii jaun jetaote, Cairichaerinojoneein Neeuruhane Cajé Mitanojoihuru neein curuajai sinacoca nenacaauru- Sirene caje, Alejaandiria caje, Silisia caje, Asia caje, naajoainuri caje unacaauru tabaauru jetao, Eseteba aina, ita cotaicha rijitocure. <sup>10</sup> Ne jetaote amuritonaanainesihurene, Eseteba suujuatiha Cana Coaunera Suujuene que laraajiin irihana jaun. <sup>11</sup> Nii coreniha obajeein jetaote, tabaauru coretecore, nechu joaereein caje rocohin, irijiaain:

“Baasoneein Moisesa que ereein, Cana Coaunera netonai quete erera,” naain acaauru aina coulurujueeuruha, nechu joaenreeine caina. <sup>12</sup> Nii jaun jetaote, niritii beeuruhana jaun, Eseteba que nejerateein, codoonetiin Eseteba mucuure- satiin cuu nenacaauru, satiin- nii Cana Coaunera Quiricha inoaesicoitucuurera, satiin- acaauru bichauhenaauru, naaonjoainuri. Nitohaneein mucuhin jetaote, tararaain amaain, acaauru curuaanaacuru rai teure, nii rucuhecuruhane caina. <sup>13</sup> Nii choae tacaain jetaotechu, nohaneein acaauru aina colurujueraanu quecasaje cachaauru arihuruhana jaun:

“Canacaanu netonaina chuhisi, aonajenajaocaanura. Inetono janona bana te, ‘Chaque jete nelatere cana rai Teenforo. Chaque jete nelatere cana rai- Moisesa aitoonjoa- Moisesa ere. <sup>14</sup> Nii Nasarete cocoaicha Jesoso jete, cana rai Teenforo chamuhitiinjien jaohaje cureeinjien. Nii ichoae tacaain jete, cana rai Moisesa aitoonjoa, cana ichao corereeinjien.’ nanajaaonca chuhisicha,” naauruha nii cocoainanacaihuri rai, nii casajeeurune jaun, <sup>15</sup> nii Eseteba coarajeeuruhasaain- nii cuu nenacaauru- cocoainanacaihuri, satiin- nii cuu nenacaauru- cachaaurune maajeeine jana jetaote, Cana Coaunera letono anjera nomeri tocohaneein necore satiin rai nomeri.

## 7

*Jabereco coreniha iriha Esetebane*

<sup>1</sup> Nii jaun jetaote: “Esinaaena rauhijiriin, ii que ere-naaniha,” naain Eseteba caje bajaa- saseredotecuru curu-aanaane jana jetao:

<sup>2</sup> “Aonacuche canejeraauru, satiin ichauhenaauruna, nii que rauhijiriin aitete, aonaquichera.

Jaiti Araaun ichaoha cueniha cana foeratera inoaesii Abaraaunne ajiniha jetaote, Mesopotamia batane nihane jana, rene ecocohin: <sup>3</sup> ‘Caa ii atane jiaaneein, satiin ii araichuru ratiriin, ichei quiicha coarateeni atane que ichaonihura.’ naa Cana Coaunera, Abaraaun raine jaun jetaote, <sup>4</sup> Caldea atane caje mituhin, naain nejelau ataneu-Araaun neein curuajaihu ichaoha cuelu Abaraaun. Nii baiha jetaote, inae oha rai inacane jana, caa ena nihacachene jaan atane que Abaraaun letoae jetao- Cana Coaunera niqui.

<sup>5</sup> Ne jetaote, nihei aansijineeiniji, rai atane tenelu Cana Coaunera. Ne jetaote, nii caaniha jetao: ‘Ohine baihate, ii calaohichuru rai, chichoalacuru rai, naaonjoainuri rai niha cureein atanera. Chaen coroatajajeein nefaaururihaain ii nefoerateeuruta.’ nae Cana Coaunera, Abaraaun rai. Nii bana, jaiti neniha leeinjiinejeein Abaraaun rai- canaanai inatiin jetaote, Abaraaun rai nirate Cana Coaunera.

<sup>6</sup> Niritiin jetaote, Abaraaun rai: ‘Jauriaanejeeinte, jena fasha jaanacaneein, eroraqui nejelau atane que ichaoha curureein, belainohine lanaala, nechucaseteco rijijieein ii nefoerateeurura. <sup>7</sup> Nena, nii acaauru cairichaerichaauru cachaauru casetecaain, jelai caje Isaraelitacuru rocoarateein, nii caitoonjoa- acaauru que banihateein- quiicha rucujuei atane que teratenajareeunni, acaauru que banijiaain atane que ichaohin, quere tonoraain ichaooruhane coinara.’ nae Cana Coaunera, caa nihacachene jaan atane que. <sup>8</sup> Chaen techu esinaae rauhijiriin, Abaraaun rai aitohane coujounacanu que: ‘Quichaneein nejanoha ichei canaanaine, jaberoco cari jiununuerateein saerateeura.’ naa Cana Coaunerana jaun, nejanoaa rai calaohi Isacane jana jetao, fosa janoneein nejanoha baiha catiaain jetao, coriha cari jiununuerateein saerate Abaraaun. Nii jaun jetaote, jerichanejeein rai calaohi Jacobo icharate Isaca. Jerichanejeein jetaotechu, nii lechoonca coroatajai rai calaohichuru Isaraelitaauru foerateranuuru icharate Jacobo.

<sup>9</sup> Nii Jacobo calaohichuru jetaote, cana inoaesihurune. Acaauru jetaote, nii acaauru ocoala Jose que nererojoe-caain, que necoreteeure Egiptoo cunacaauru- cachaauru rai, Egiptoo amaain, que necoreteeuruha Egipto cocoaicha

raine coina, nechu jataain nocoelai caun cotaiha. Neje-  
taote, atiin nii jana, Jose coroatajane Cana Coaunera, itol-  
ere necairichanaa caje mitaain. <sup>10</sup> Nitohanein jetaote,  
itolere necairichanaa caje mitaain, coroatajaniha Cana  
Coaunerana jaun, itolere coitucuha Josene coaraa Egipto  
curuaanaa Faraaonna jaun: ‘Acate, caque jauriineein- itol-  
ere coaranein- itolere curuaanaa neein- nerora rijijiein  
nihane caohachaera.’ naain, coberenadoro neein nii Jose  
cocoainae jetao Faraaon. Nii jaun jetaote, itolere- Faraaoncha  
sirii erora rijijiein, itolere atane curuaanaa neein cobere-  
nadoro neein nelu jetao Jose.

<sup>11</sup> Nii baiha jetaote, carajaaajoaain catiaain, necairichaa-  
relu satiin cana inoesihuru, caohachanainejeein neniha  
quinacai, Canaun, nii Egiptoo nihanatiina jaun. Itolere caa  
cana atane sacutaain, niheilu chunijihun quinacai arihuruha  
cana inoesihuru- cana fojiaraaurune jaanu. <sup>12</sup> Nejetaote,  
nii bana Egipto curuaanaa rai niha tiricone coitucuuriin,  
rai calaohichuru- cana inoesihuru letoae Jacobo, Egiptoo  
tirico coretiha cuuruhane coina. Nii tirico coretiha cuuru  
que jetaote, jauriaanejeein, Egiptoo cunaa nunueteurelu-  
cana inoesihuru. <sup>13</sup> Nii baiha, coroata saain cuuruhane  
cuhane jetao te: ‘Inara caje- nena neeine neeunra.’ naain  
nihanacuru que, necoitucuerate Jose. Niritohane jaun je-  
taote: ‘Acauru caje nena neeina nihate,’ naain Jose coitu-  
cue Egipto curuaanaa- Faraaon. <sup>14</sup> Nitohanein jetaote, nii  
baiha neeoriin, acauru inaca- Jacobo raerate, jitariin cala-  
ohichuru aina curuataain, satiin Egiptoo, cuuruhane coina,  
raeratenajae, rai nejeraauru que Jose. Itolere neein, caun-  
sichoonca saoquii- nenacaauru naraaichuru raerate jetao.  
<sup>15</sup> Nitohanein jetaote, Egiptoo ichaoha cuelu jetao Jacobo.  
Cuu neein jetaote, ohelu. Chaen jetaotechu, cuu oorelu  
nii calaohichuru, cana inoesihuru netonai. <sup>16</sup> Nii baiha  
carajaaain neein jetaote, nii Egipto caje mituurelu cana inoesi-  
huru ichohalacuru- Israelitaauru. Nitohanein mituhin  
jetaote, nii acauru rinaja- Jacobo bucuuru rocohin amaain,  
Siqueeun, Amoro calaohichuru caje- Abaraauncha coretei-  
atane que rai bucuuru amaain rucuhecurelu.

<sup>17</sup> Nii baiha carajaaajoaain catiaain jetaote, inae Abaraaun  
rai jinateein, Israelitaauru rai- atane tenaa jeriha Cana  
Coaunerane cataiinaaecane jana, inae arajiin nefaacure-  
Israelitaauru Egiptoo. <sup>18</sup> Nii bana jetaote enoelu, Jose coitu-  
cuelanaala nena- Rey, Egipto curuaanaa- nihane coina.  
<sup>19</sup> Nii Rey jetaote, cana inoesihuru- Israelitaauru cori-  
taain cairichaaain, acauru bereecuru- ena nejanoanacaauru-  
quicha cojoaajihuru joerate, nabana arajiin nefaauruhane,

Egipto cocoaichacuru que nejerateeuruhane coataa, necoha-  
laai caun.

<sup>20</sup> Nii bana jetaote, nejanoaelu Moisesa. Nii nejanohaa Moisesane jana jetaote, jataain belaaain coaraelu Cana Coaunera. Nii jana jetaote, nichata atejeeincha sirichurelu asinojoneein rai fojiaraauru. <sup>21</sup> Nii baiha jetaote, acaauru bereecuru- quicha cojoaajihuru jaohacoaauruhane caina, aitoa- nii Egiptoo curuaanaana jaun jetao, nemuri auhania, caohachajeein curuteein, nii Moisesa jiaanecure- rai fojiaraauru. Nitohaneein, curuteriin nemuri auhaniha teeuruhane jana jetaote, coaraain raain, rai beree rijijieein- nii Moisesa fojiae- nii curuaanaa- Faraon cacunu. <sup>22</sup> Nitohanihana jaunte, Egipto cocoaichacuru rijijieein, acaauruhacha coitucui coitucuhin, acaauru relanojoneein, leeinjiin cache mijiaaenein, nere que, nichanaa, naonjoainunru que laraajiin nelu Moisesa.

<sup>23</sup> Ninitohaneein jetaote, inae jena choonca jaanacaani- hane jana, naraaichuru Isaraelitaauru rene, turuha cue Moisesa. <sup>24</sup> Nii jana jetaote, cuu leeinjiin- Isaraelita sohajiha- Egipto cocoaichane coaraain niqui, nii naraai Isaraelita co- coaeratiha, nii Egipto cocoaicha sohin joae- Moisesa, <sup>25</sup> nii caje nainaain: 'Caate, letoae Cana Coaunera, cana coroata- janeraanu quera, naaururichaaain jecha, nii naraaichuru Is- araelitaaauru.' naain. Nete caohacha naenetohecure.

<sup>26</sup> Nii cojoanoo jetaote, ita sohajeeuruha coroatajai Is- araelitaaaurune jana, runajaain: 'Chanute nejesinajeein ita sohicheta,' nae niqui Moisesa, nere tonoraa jerena- jaain. <sup>27-28</sup> Nejetaote: 'Chate, nii coaranu que chenoaain, canacaanu curuaanaanu que eletoaeta. Raca, Egipto co- coaicha ichaaine tocohaneein inoonte, casohin cajaanu jereeita.' naain cotaain, Moisesa saruhite nii eleecha soha- jera Isaraelita.

<sup>29</sup> Niritiin saruhitohane jaun jetaote, jelai caje sorohin, Madiaaun batane cuhin ichaoha cuelu Moisesa. Nitoha- neein jetaote, ucuae sorohin, coroatajaain quicha cojoaaji- neein canaanai siriin, nejelau ataneu nenacaauru aina, ecu ichoaelu Moisesa.

<sup>30</sup> Nii baiha, jena choonca jaanacai baiha jetaote, cache areroo- desiereto cataaun- ichtane ucuuno- Sinaaenein cu- ruajai rohan, chujuhecoha Moisesane jana jetao, iihane- ecu chujuhequi- enuha laajoiri cacaaerii. Nii jana jetaote, nii enuha laajoiri iihaneei cataaun ecooca leeinjiin aanjerana jaun jetao, <sup>31</sup> cojoaelatiin coarajeein, caohachaain rautaaain coaraane caina, rohan nichuuntaaoriin coaraa Moisesane jana jetaote:

<sup>32</sup> ‘Canuna, ii inoasihuru Coaunera- Inara Coaunera neein neeunra. Canuna, ii inoasihuru- Abaraaun, Isaca, Jacobo, naaonjoainuri- Coaunera neein neeunra.’ naane jana jetao, coaaneenetojoelanaala coasiha nesoonetiin rijijijianiha Moisesane jana jetaote:

<sup>33</sup> ‘Nii ii safato rocoora. Canu turuna jaan nihana jaun, nainiheei nii ii safato ruhacaain caelai shaaquineta.

<sup>34</sup> Naain, Egiptoote, inaderaain necairichanaa caun chanaaure canu cachaaurura. Nii jaunna, coaracauna jaun, cau faaun, nii caje jianacoo tenajaanune coinara. Nii jaunna, eletoareeuni Egiptoo, jelai caje canu cachaauru rocoeraanuquera.’ nae Cana Coaunera, Moisesa rai.

<sup>35</sup> Jauriha nejeein Moisesa batohin: ‘Chaate, canacaanu curuaanaa nuque, ii cocoainain, nii coaranuque eletoaeta.’ naauruhalu natiin jetaote, esinaae raujiriin letono aanjera que Moisesa letoerate Cana Coaunera, nii enuha laojoiiri-iihanei cataaun ecocohin cocoainain, nii cairichaeriinajaauruha Egipto cocoaichacurune caje Isaraelitaauru rocoer-anu que.

<sup>36</sup> Nii jaun jetaote, nii Moisesa, Egipto caje cana inoasihuru rocoera nelu jetao, nii atane que, itolere ichaain cachaauru notajaan. Nii Egipto rohan nena Cucuana Lanajaijihu jetaote, nii rai biji achune tochataain jetao, aiha berone rijijieein, nii cucuana tabai jacoraain, acaterate, jera jaoruha Isaraelitaaurune coina. Chaen cacha areroo- desieretoo jenachoonca jaanacaneein, itolere acaune maajeein ecotein, itolere ichaaechajeein, cachaauru notaarejetelu jetao Moisesa.

<sup>37</sup> Nii Moisesa jetaote: ‘Leeinjiin inara cajete, ecooca cureein caa caletohane rijijieein Cana Coaunera letononeein rai nere beraneein neenicha.’ naain belu cana inoasihuru Isaraelitaauru rai. <sup>38</sup> Nii Moisesatechu, cacha areroo desieretoo nasaae nedaauruha cana inoasihuru Isaraelitaaurune jana, jelai nii ichatane ucuuno- Sinaain ichoae ucuun iniin, Cana Coaunera letono aanjera aina erelu. Nitohaneeinte, aanjera caje, nii cana rai Ichaonaa Tera Erenaa raain telu, cana inoasihuru rai, cana rai beeuruhane coina.

<sup>39</sup> Nitohaneein, nii raane coina, nii ichatane ucuuno que, siichoha Moisesane tonohana jetaote, renaatonorae lanaala, Egiptoo cauha cunaa jecurelu jetao cana inoasihuru Isaraelitaauru. <sup>40</sup> Nitohaneein jetaote, acaauru rai saseredote inoasi- Aaroon rai: ‘Cha que chaainti nerurujuae, Egipto batane caje canacaanu rocohin, canacaanu uhaeralu- Moisesata. Nii jaunna, canacaanu rai, ecaantooru rijijieein chosichuru ichaaine jerichaanu, cana coroatajanecuruhane coinara.’ naauruhana jaun jetaote, <sup>41</sup> jeriha Aaroone jaun,



baca calaohi rijijieein ecaanto ichacure. Nii rai nihane jetaote, lenone sohin teeure, Cana Coaunera rai ichacuruhane rijijieein. Nitohaneein jetaote, acaauru biji que ichanohinecaanto- chosi rai, lenone nihane sohin teein, beseta bitoaera tocohaneein ichaain, ecaanto- chosi coroaecure. <sup>42</sup> Nii coaraane jaun jetaote, acaauru aina obajeein, coroatajane-naacane jiaane Cana Coaunera, acaauru chosichuru niha acaauruhacha bei- dedeu nenacaauru, enoto, atene, arasijie, naaonjoainunruhacha coroaecuruhane coina. Nitohanihane jaun jetaote, nere bera inoaesihuru que aitiin laenaer-ateein:

'Isaraelitaauru:  
coatia carai, nii jenachoonca  
jaanacaneein, cache areroo- desieretoo neeichene bana,  
carai lenone sohin nihane  
terejetoheeicheluta.

<sup>43</sup> Nete, acaihanejeein biji que  
cachaauru ichanohin inara chosi  
niha- inaraacha bei- Moloco raiichate,  
lenone nihane sohesojoein, terejetocoichelura.

Chaen, Refaan neein curujai  
inara raajenihane inara chanaa-  
inara chosi neein inaraacha bei- arasijie,  
naaonjoai raaichate terejetocoichelura.  
Nii jaunna, inara atane caje inara rocohin,  
naain Babiloniaun bujuauu inara sitareeunnicha.'  
naain, nii ajiniha bihalu Cana Coaunerana jaun, nii rijito-  
joein laenacurelu nere bera inoaesihuru.

<sup>44</sup> Nitohaneein nere tonoraelanaala, que jaolecooruhane  
saijieein jetaote, Moisesa que coarateein jetao, canii cari  
caje nena loreri Taberenacolo icharate Cana Coaunera,  
nii cache arero- desieretoo amuhemuhecuruhane jaaunru,  
acaauru jiniichaain, nii Taberenacolo amaauruhane coina.  
Nii taberenacolo jetaote, acaauru rai telu Cana Coaunera,  
'Naaajoaainte cana aina ne- Cana Coaunerara.' naain itolere  
bana coacuruhane coina. Nii asaaete, nii ajeri que tein-  
laenanohineein nena Cana Coaunera Ere rucuhacure jetao.

<sup>45</sup> Nii Taberenacolo jetaote, inae oha Moisesane baiha cara-  
jaain neein, uhaaurelu nii Moisesa coreenraniha nena Joseo  
aina cunacaauru- cana inoaesihuru. Nitohaneein jetaote,  
nii acaauru rai Cana Coauneraacha tenaa jerei- atane que  
nenacaauru aina, sonohanaque nichaauraaain, acaauru amu-  
ritoorelu, acaauru caje nii atane rauruhane coina coroataja-  
nenaaca Cana Coaunerana jaun. Nitohanihalu jetao, enoha  
curuaanaa inoaesi Rabirinereein tiaaajoaain.

<sup>46</sup> Nii Rabiri coroatajaniha, itolere que Cana Coaunerane  
jaun jetaote, turuha cana foeratera Jacobo Curuaanaa- Cana

Coaunerane jaannu que Teenforo ichana jerelu niqui. <sup>47</sup> Ne jetaote, icharatiha Rabirine caohatiha Cana Coaunerana jaun ichaenelu. Nii janate, inae oha Rabirine baiha jetao, nii Teenforo icharatelu nii calaohi Salomoon, Cana Coaunera turunajaanu que. <sup>48</sup> Coatiha niqui, cacha ichanohineein nenea loreri Teenforo asaae ichaohi niqui Cana Coaunera. Nitohanihane jaunte, rai nere bera inoaesihuru que berati-halu Cana Coaunerane jaun, nii aitoroatihane rijitoejin:

<sup>49</sup> ‘Caa dedete, canu nelaurihana jaan ne. Jana chauratanete, catiha rorine.

Chaen techu, chatohanai lorerina ichacurure, cuu nebeta-caanune coina.

<sup>50</sup> Tana, canu, caa itolere coaunaain nihanulune coitucuu-ruhaneta,’ naa Cana Coaunerara.”

naain beurelu rai nere bera inoaesihuru.

<sup>51</sup> “Nete, leecha Cana Coaunera coitucuuruhi rijijieein, nere tonorana jereneeichene jaun, urichosae rijijieein nee-iche, aohana jereneeichene jaun. Aiha, inara inoaesihurune rijijieeinte, inara suujuatenaa jeriha, Cana Coaunera Suu-juene jana, aina nejerateein, aohana jereneeichera. <sup>52</sup> Satiin inara inoaesihurute, Cana Coaunera Ere bera inoaesihuru cairichaaeriin, sohin jaoorurejetelu. Jerichanejeein techu, nii turunaalu- cana coroatajaneraanu que Cana Coaunera letono turu beebejeeurerane maajeein, sohin jaorelu nii inara inoaesihuru. Nii esinaae rauhijiriin, beeuruhane rijijieein turuhane janate, que nererojoecaain, nere aohana jerelanaala, colurujueein, sohin joerateein neinchelu-inara netonai. <sup>53</sup> Inara inoaesihurutejian niqui, laenanohi-neein Cana Coaunera Ere raarelu, laenarateein letono aan-jera que, teratiha acaauru rai, Cana Coaunerane jaun. Nete tonorana jerecurenelu inara inoaesihuru. Nii inara netonai nihanatiin, tonorana jereneeichera,” nae jetao acaauru rai Eseteba.

### *Eseteba sohin jaooruhane*

<sup>54</sup> Niritoha acaauru rai Esetebane jaun jetaote, obajeein, corajeein nujuae cari calaare. <sup>55</sup> Nejetaote, Cana Coaunera Suujue suujuatenojieein, najabaracaain dede coaraa Esetebane jana jetao, neyoracaa dedene jaun jetao, Cana Coaunera coarae. Nitohaneein coaraane jana jetaote, Cana Coaunera raotono nichajai que chujuheque Cana Coaunera Calaohi Jesoso. <sup>56</sup> Nii jaun jetaote:

“Coaracuhejian inara netonai. Nota, neyoracaa dedene jana, Cana Coaunera raotono nichajai que chujuheque nii canaacha cohajeilu- Cacha Calaoheineein nenea Jesosora,” naa acaauru rai Esetebane jana jetaote, <sup>57</sup> nuricho mucuu-taain aohana jerelanaala, nujuae soaisohaain, codoonetiin

mucuure. <sup>58</sup> Nitohaneein mucuhin jetaote, nii nese caje naain amaain, acaauru cajione buuri rocohin jetao, leeinjiin cacha-Saoroneein curujai que nii acaauru cajione buuri beraichateein jetao, ajeri que Eseteba bodoosiin sohin atinaaure- nii coulurujeracuru. <sup>59</sup> Nitohaneein, ajeri que bodoosijiee-urhane jana jetaote:

“Canu Curuaanaa Jesoso, cacorataaneeun. Casuujue raaura,” naain Jesoso bajae Eseteba, rai suujue raane coina.

<sup>60</sup> Niritohane baiha, semotorohaain auhaquuin:

“Canu Curuaanaa, jiaonriha catohaneein caetein, naosateeuruhane ujuaiteei acaauru quenera,” naain inae ohe Eseteba.

## 8

<sup>1</sup> Nitohaneein, Eseteba sohin jaooruhane jana jetaote, rautatelu nii Saoro.

### *Jesocurisito ranojoihunru roheca Saorone*

Nii bana caje coauneein nunuhetein jetaote, satiin, Jesocurisito Ere esenetaain tonoraeraauru aina nejeratein, cairichaaerihure Jerosaleeun. Nii jaun jetaote, ita caje ri-aaneein, Jerosaleen caje soroore satiin Jesoso esenetaeraauru, Jodea batane sacutaain, satiin, Samaria batane sacutaainchuru cuhin soroore. Jana, nii afosotooruhacha jetaote, nii Jerosaleeun nedaaure.

<sup>2</sup> Nitohaneein Eseteba atinaauruhane jana jetaote, mainajeein coisiin conautecure caohachaaain rai suujua coaraain ichaonacaauru cachaauru tabaauru.

<sup>3</sup> Nii nainiha jetaote, Jesoso esenetaain- tonoraeraauru rohecaain, lorerichuru naineein enohin, enecuru aina curuataain- quichaauru tararaain amaain, caresero cuhane teratenajaain, cairichanajae Saoro.

### *Jesoso beebejeeuruha Samariaune*

<sup>4</sup> Nitohaneein, rohecanajaaauruhana jaun, nii Jerosaleen caje soronacaauru jetaote, turuuruna jaunru naineein, jianacoo osa caje- cana mitaeranein niha- Cana Coaunera Calaohi- Jesusone beebejeeure. <sup>5</sup> Nii jana, leinjiin acaauru caje nenea- Ferifi jetaote, nii Samaria batane que leeochoauru nese amurijiriin nenea nese tabaihu cuhin jetao, inae cuu turuhin, cuu nenacaauru rai, Cana Coaunera Calaohi- Jesocurisito beebeje.

<sup>6</sup> Nitohaneein cuu turuhin Jesocurisito beebejiha Ferifine jana jetaote, satiin netaojiaain, niicha beebejei rautatiin aonajeeure-cachaauru, chaen itolere cunaitenacaauru rautaane coaracuruhana jaun. <sup>7</sup> Nitohaneein jetaote, rai suujue cuhane coitucuchuichuru sirichuruha tabaaurune, acaauru caje sitaane, auhaauhaquuin, acaauru caje amuure nii

coitucuchuhichuru. Chaen jihuronacaauru nihanatiin jetaotechu, rautaaain, bacosacuru nihanatiin- rautaa Ferifine jaun jetao, <sup>8</sup> neebana nitohanai coaracuruha, nii neseeuna jaun, cojoelatiin coarajeein, rachoojoeure- satiin nii nere aonaa turunacaauru cachaauru.

<sup>9</sup> Nii jana jetaote, cuu ne- leeinjiin cacha- Simoon neein ni- icha curuaateuri- benane. Aca jetaote, batohi aina, Samaria cocoaichacuru coritae jetao, “Aca jete, itolere cacha amuri- jiriin, itolere que, jataain nelateeineein ne,” naain esenetaa- ruha cachaaurune coina. <sup>10</sup> Nitohanihane jaun jetaote, co- coainanacaihuri nihanatiin, coritaa, rai batohi ainana jaun, rautatiin esenetaain, aonacuruhane jaun: “Caa cachate, Cana Coaunera letono nera,” naaure jetao, nii Simoon que, satiin cachaauru, cocoainanacaihuri, naaonjoaihunri.

<sup>11</sup> Nitohaneein jetaote, enanecoriin que airijiin esenetaain tonoraare, rai batohi aina, acaauru coritaana jaun. <sup>12</sup> Nete, nii saijieein Ferificha beebejei- Cana Coaunera Cojoanona, Cana Curuaanaa Jesocurisito, naaonjoaain esenetaauruhana jaun, quichaauru, enecuru, naaonjoaihunru- nebaotisaer- ateure. <sup>13</sup> Nii jaun jetaote, nii- benane- Simoon netonai, esenetaain nebaotisaerateein, Ferifi corihaniha amuhemu- jue, itolere ichaain cojoelanaacojoai ichaa Ferifine coaraana jaun, cojoelatiin.

<sup>14</sup> Nitohaneein, inae Cana Coaunera beratenojoin esenetaain, tonoraauruha- Samaria cocoaichacurune coitucuhin jetaote, acaauru rene, Fedoro, Joaan, naaonjoaihunri letoaaure- afosotooru- Jerosaleeun nenacaauru, nii Samaria nenacaauru coaraa cuuruhane coina. <sup>15</sup> Nitohaneein, letoanajaaauruhana jaun cuhin jetaote, acaauru rene turuhin, nii Jesocurisito esenetaain- tonoraeraauru rai, Cana Coaunera bajaare, acaauru coroatajanein, rai Suujue letoaa Cana Coaunerane coina, <sup>16</sup> jaiti leeinjiinejeein- acaauru caje nena ichoae fauheniha- Cana Coaunera Suujuene jaun, raujiaaincha- Jesocurisito corenihacha- baotisaain cojounacatenohineeincha, neeuruhana jaun. <sup>17</sup> Nii jaun jetaote, acaauru couturi ichoae, biji meracaain Cana Coaunera bajaauruha- Fedoro aina Joanne jana jetao, tajiha, acaauru ichoae fauha uhe, Cana Coaunera Suujue. Nitohaneein jetaote, Cana Coaunera Suujue rauure- Samaria nenacaauru- Jesocurisito esenetaeraauru- cachaauru.

<sup>18</sup> Nitohaneein, acaauru ichoae, biji meracaain, Cana Coaunera bajaauruha afosotoorune jana, fauha uha, acaauru ichoae, Cana Coaunera Suujuene coarajihana jaun jetaote:

19 “Carai netonai, nitohanai teeuchena, inara corete coriqui quete, chunicoa- cacha ichoae nihanatiin, cacoi meracaain, Cana Coaunera bajaanune, rai Suujue tiha Cana Coaunerane coinara,” naa acaauru rai Simoonne jana jetaote:

20 “Coaraain, nii ichoriqui aina jiniiquiin nitajeeura. Inacojoein chachu, ‘Coriqui que jecha, coretenacaine Cana Coauneraacha tenojoin,’ naai chachu inacojoeincha. 21 Esinaae rauhijiriin, esenetaain nere tonoraeneeine jaunte, ichei nii tenaa nainene Cana Coaunerara. 22 Nii ishujua baaso jiaaneein, Cana Coaunera bajaate, ichei suujua acatena nainihane, suujua acatemiin Cana Coaunerara. 23 Jataainte, banejelanaala necoelaain, osa tabai que nesaruhi rauhineerilanaalara,” naa Fedorona jaun jetaote:

24 “Atiin carai, Cana Coaunera bajaauche, nii aitohine tocohaneein, chatohaneein caetein niha Cana Coaunerane coataara,” nae jetaote, nii benane- Simoon, Fedoro rai.

25 Nitohaneein, nii Samaria neseeu, Cana Coaunera Ere beebejeeuruhane baiha jetaote, nii Samaria batane sacutaain nenacaauru- neseeu cuhe cujeein, Cana Coaunera Calaohi Jesocurisito que Erenaa Caohati beebejeeuruane baiha jetaote, Jerosaleeun cauha cuure Fedoro, Joaan, Ferifi, naaonjoaihunri.

### *Ferifi aina, ita que tacaauruha Etiopiha cocoaichane*

26 Nii baiha jetaote, rai letono aanjera que Ferifi letoaera- teein:

“Chajaain nimichuhin enoto mitu uuri- cana raotono nichajai jelson cuhin, naain Jerosaleeun caje- Casau cunaa bero cuhane cunihura,” nae jetaote, Cana Curuaanaa letono aanjera. Nii bero naitoonjoate, cacha areroo jelson situ- naane. 27 Niritoha rai aanjerana jaun jetaote, nimihoritiin cuha Ferifine jana, bero cuhane leeinjiin cacha- Etiopiha cocoaicha aina, ita que tacaauere. Nii Etiopiha cocoaicha jetaote, Etiopiha batane curuaanaa eneneein nena rai- coriqui beraichaneein nena ne. Aca jetaote, Jerosaleeun cuhin, Cana Coaunera coroejeein bajaate bajaecane caje, 28 tajiha cabario que tararaeraain nena namunaja cuhane lauhequiin, Cana Coaunera ere bera inoasi Isaihasicha lae- nai quiricha ereretajeein cauha cue, jelaiha rai nataneu.

29 Nii jana jetaote, Ferifi rai: “Nii cacha rohan nichuu- taain ereeura,” naa rai, Cana Coaunera Suujuena jaun je- tao, 30 rohan nichuuntaa Ferifine jana jetaote, Cana Coaunera Ere bera inoasi- Isaihasicha laenai quiricha ereretate- nii Etiopiha cocoaichane jana jetaote:

“Nii iicha ereretai aonaaina, coitucuhi,” naain caje bajaa-Ferifine jana jetaote:

<sup>31</sup> “Aihaaunta. Cha cajena coitucuhin aohanreeunta. Niha chunei carai berane coaalanaalata. Chajaute iniin cau carohan nelauriaera,” naa Etiopiha cocoaichane jaun jetaote, <sup>32</sup> iniin nelauriaain, nii niicha ereretai jelai coaraa Ferifine jana jetao:

“Carenero chacuruhane rijjijeeinte, amaa cuurureein, sooruhane coina. Nii rijjijeein techu, nujuin saaujiha saaujichane jana inauhene aonajiha carenerone rijjijeein, inauhene aonajenajaain, caohachanaainejeein erenereein.

<sup>33</sup> Nitohaneeinte batohin joaereein coulurujueein, cojoaisi aina ajaena rocohin jaonaa rijjijeein, sohin jaoorureein.

Nitohaneein sohin jaooruhane jaun, nerihain rai neferate,” naain *profeta* Isaihasiacha laenailu ereretaain coaraane baiha jetaote, Ferifi caje:

<sup>34</sup> “Atiin carai beeuna coitucuera. Cha quena aite, raaje ne quena aitoha caa Quiricha laenaera *profetate*, ainihane leecha quena aitohate,” naain bajaa, nii Etiopiha cocoaichane jana jetaote:

<sup>35</sup> “Jesoso sohin jaoorurichaaine quete aitera,” naain jetao, nii Cana Coaunera Quiricha Inoaesi- Etiopiha cocoaichacha ereretai nunuhe caje coauneein nunuhetein jetao, Jesoso que Erenaa Caohati beebjiha Ferifine jana, <sup>36</sup> niha acauna jaan rohan nichuuntaauruhana jaun jetaote, Ferifi rai:

“Caute ne acaura. Taacha nainreei, cau canu baotisaain, canu coujounacateeineta,” naa nii curuaanaane jana jetaote:

<sup>37</sup> “Ichoichana aina cutaain, esenetainete, naainera,” naa Ferifine jana jetao te:

“Cana Coaunera Calaohi niha Jesocurisito ne eseneta-nura,” naane jana jetao, <sup>38</sup> nii acauru amaera- cabario que taraeranein nena suraeratein, jiniiquiin fauhin, acauhana fauha cuure. Nitohaneein fauhin jetaote, baotisa Ferifine jana jetao, <sup>39</sup> inae acau caje inihuruhane jana jetao, Ferifi amaa- Cana Coaunera Suujuene jaun jetao, inae coaraene- nii curuaanaa. Nejetaote, raotojoein, rachoojoein bero cuhane cuujue.

<sup>40</sup> Nitohaneein amaa Cana Coaunera Suujuene jaun, cuhin jetaote, Asotoo turuhe Ferifi. Nitohaneein Asotoo turuhin jetao, caje coauneein, nunuhetein, nirijjeein cuujue cuujeein,

Sesareea turuhanereein tiaain, neseeuu neseeuu turuna-  
jaauru, Jesocurisito que Erenaa Caohati beebejeein, cuujue  
jetao Ferifi.

## 9

### *Jesocurisito esenetaeraneein nerotoha Saorone* (Ich 22.6-16; 26.12-18)

<sup>1</sup> Nii tonohana jetaote, Cana Curuaanaa ere esenetaain,  
tonoraeraauru que, nejeratihajeein, atinanaana jereein  
sacuhane jaun jetao, saseredotecuru curuanaa coaraa cue  
Saoro, <sup>2</sup> caje nitohanai ichana nainihane jaan- cocoiricha  
bajaane coina. Nii rai cocoiricha teuruhane, aina naain  
Damasoco cuhin, ucuaae nena ita taojiaain Cana Coaunera  
bajaauruhane jaan sinacoca asaae enohin, nii Ena Nena  
Ichaonaa esenetaain tonoraeraauru ariin, quichaauru aina  
curuataain, enecuru tararaain uhanajaa caseteconein  
Jerosaleeunne coina. <sup>3</sup> Nejetaote, inae nitohanein ichaain  
cuujiha, Damasoco nese catainajeein, turuhelalajiha,  
Saorone jana jetao, luhecotariin conotiin, dede caje jilenete  
Cana Coaunera Cono. <sup>4</sup> Nii jaun jetaote, coasiha atane ichoae  
nalatoha Saorone jana jetao:

“Saoro, Saoro, chanuna jataain caque nejerateein, ca-  
cairichaeriin ichaohi,” naain toniha erenaane jana jetao:

<sup>5</sup> “Chaneei inaate Curuaanaa,” naain bajaa Saorone jana  
jetaote:

“Canuna, nii nejerateeine jaan neein iicha cairichaerii  
Jesoso neeunra. Canu esenetaeraauru cairichaa aaine ni-  
hanatiinte ichaajenhane ijiabereeo- cairichaa nii aaicha,”  
naa jana jetaote, coasiha rijijijihanein: <sup>6</sup> “Chatohanai icha-  
caaunne jereite, Curuaanaa,” naain bajaa Saorone jana  
jetaote:

“Nimichuhin nichaauraain, nii neseeu turunihunte, cuu  
ichei, iicha- ichanenenu beeuruhinera,” naain tonorae, nii  
erenaa.

<sup>7</sup> Niritohane jaun jetaote, nuricho que aonacuruha  
acaauru netonoaine jaun, nesooneetoore, nii Saoro-  
corihaniha cunacaauru cachaauru, nii erena aonacuruha  
natiin, nii chuni cacha coaracurenihana jaun. <sup>8</sup> Nii jana,  
atane ichoae tocoha baiha nimichuhin, nenotaain coaraa  
Saorone jana jetaote, caohachanainejeein conohene rai  
nota. Nii jaun jetaote, inae caohachanainejeein conoheniha  
rai notana jaun, rai biji que mucuhin, amaauruha  
Damasocone jana jetao, <sup>9</sup> cuune nichata janohin, maosanein  
notaelanaala, nii lenonelanaala, nii acau nihanatiin  
coelanaala.

<sup>10</sup> Nitohanihane jana jetaote, nii Damasoco ichoae leeinjiin cacha- Ananihasineein curuajaain. Acate, Jesocurisito Ere esenetaain, tonoraera ne. Nii jetaote, notajae Cana Curuaanaa Jesocurisito, rai irihane coina. Nitohaneein, notajaain jetaote:

“Ananihasi,” naain bajaane jana jetao:

“Cauna neeura Curuaanaa,” naane jana jetaote:

<sup>11</sup> “Chajaain nimichuhin, nii bero- Rauhijirineein curuajai cuhane cuhin, Jodasi loreri asaae enohin, Taroso caje unaa leeinjiin cacha- Saoroneein curuajai bajaaura. Acate, Ofa- Cana Coanera bajaebajaecane jana, notaacane jaun, <sup>12</sup> coaraane jana, leeinjiin cacha- Ananihasineein curuajaituruhin, nichoae rai biji merecae, nacoauneein conoha rai notane coinara,” naa cana Curuaanaa Jesocurisito, Ananihasi raine jana jetaote:

<sup>13</sup> “Netejian, ‘Nechu aansai- ataibiaen rijijieein niha,’ beeurera. Nitohanihane jaun jete, Jerosaleeun, ii ere esenetaain- tonoraeraauru cairichaaeriin ne, naauruha, coitucueracuru natiinta. <sup>14</sup> Coaraaunachuhinti, saseredote curuaanaa caje, niicha rocohi erenaa uhaa aina, satiin- ii ere tonoraeraauru mucuhin, caseteconein, amaain tiha, saseredotecuru curuaanaa raine coinaneta, Curuaanaa,” naa Ananihasine jana jetaote:

<sup>15</sup> “Chajaaincha cunihura. Nii cachana raain neeun, nelau ataneu- nenacaauru rai nihanatiin, canu ere beebjeein nihane coinara, itolere, acaauru curuaanaacuru rai nihanatiin, canu ere beebjeein, chaen, Israelitaauru raine maajeein beebjihane coinara. <sup>16</sup> Acaentonaite, canu ere beebjihane coreniha, necairichanaa coaraa cureein, baneje lanaalara,” naain letoaa Cana Curuaanaane jaun jetaote, <sup>17</sup> nii niha Saorone jaan- loreri asaae turuha cue Ananihasi. Cuu, loreri asaae turuhin jetao te, nichoae biji merecaain:

“Ichaso Saoro, nii uhina jaan bero cuhane, ichei ecoona Cana Curuaanaa Jesusote caletoae, ichoae cacohi merecaain bajaanune, enacoaunein conoha inotane, ii suujueniha enoha Cana Coanera Suujuene coinara,” naa Ananihasine <sup>18</sup> rijieeoritiin, jeranu nota caje naluha- ate reje rijiinanaine jana jetaote, inae conoha rai notana jaun, nimichuhin nebaotisaerateein, inae cojounacatenohineein ne- Saoro. <sup>19</sup> Nii baiha jetaote, inae lenoneein suujua nunaain, nii Damasoco nenacaauru- Jesocurisito ere esenetaain- tonoraeraauru aina ne, janojanoheriin.

*Damasocoo Cana Curuaanaa Jesoso Ere beebjihaha Saorone*

<sup>20</sup> Nii baiha jetaote, ita taojiaain- Cana Coanera bajaauruhane jaan- sinacoca asaae enohin, cachaauru rai, esinaae



rauhijiriin, Cana Coaunera Calahineein niha Jesusone beebejiha Saorone jaun jetao, <sup>21</sup> cojoelatiin coarajeein:

“Taajian, caa cacha, Jerosaleeun, Jesoso aina cuaain Cana Coaunera bajaebajaeracuru que nejerateein, cairichaaerina-jaain nenea nihaneta. Tana, caa jeelai cacha coaiten cau turuhalu, Jesoso esenetaeraauru jitariin tararaain amanajaain, saseredotecuru curuaanaacuru rai tenajaane coina neta,” naaure jetao, cojoelatiin cuu nenacaauru cachaauru.

<sup>22</sup> Ne jetaote, niritiin cojoaelatooruhane jana, nii que rutaain nelararajiaain laraajiin, canaacha cohajei- Curisitoneein niha Jesusone beebejiha Saorone jaun jetao, rai suujua auhacaure Damasocoo nenacaauru- Jorioocuru.

### *Jorioocuru caje, nichotiha Saorone*

<sup>23</sup> Nii nitohaneein araai janohin Damasocoo niha Saorone jana jetaote, ita suujuau tacaain, Saoro sohin jaonaa jerecure Jorioocuru. <sup>24</sup> Ne jetaote, nii sohin jaonaa jerecuruhane coitucue Saoro. Nitoaneein, que necousuujuaain jetaote, ajeri caje ichanohineein nenea, nii nese tionoritiin nenea rijia ucuuneti bacuujuaniha, janotiinetojoein beraain cohacure, mituha cuhane mucuhin amaain, sohin, jaooruhane coina niqui. <sup>25</sup> Ne jetaote, omari seeonjoa cuhane teein jetao, janotiin tijichaain, loreri chaje nichajai que nii nese tionoritiin nenea rijia bujuaniha faaure Jesocurisito ere esenetaain tonoraeraauru, nii nese caje mituhin nichotihane coina. Nitohaneein jetaote, onaa caje nichote Saoro.

### *Jerosaleeun turuha Saorone*

<sup>26</sup> Nii nitohaneein nichoteein jetaote, inae Jerosaleeun turuhin, cuu nenacaauru- Jesocurisito Ere esenetaain tonoraeraauru aina netaojiana jeriha Saorone jana jetao, coasiha netaojiana jerecurene, inae acaentonoain, Jesocurisito Ere esenetaain- tonoraeraneein nihane coitucuhin esenetaaurenihana jaun.

<sup>27</sup> Ne jetaote, afosotooru rene Saoro amaain: “Naaonjoaain jetaote, bero cuhane cuujihane jana jetao, notajaain, rai erelu Cana Curuaanaa Jesocurisitora. Nitohanihane baiha jetaote, chaque tonajelanaala, nii chaque casilanaala, nii Damasoco nenacaauru rai, Jesocurisito Ere beebejera,” naain acaauru rai, be Berenabeen.

<sup>28</sup> Nitohaneein acaauru rene turuaain, acaauru que coitucueratiha Berenabeenne jaun jetaote, inae raauruha raotojoein, nii Jerosaleeun nenacaauru afosotooruna jaun, cuu acaauru aina neein amuhemujueein, chaque tonajelanaala, cuu cachaauru rai, <sup>29</sup> Cana Curuaanaa Jesocurisito Ere que ereerejeein, Curieco ere inaanrera Jorioocuru aina, ita cotaicha rijitiinchuru, ereereca Saorone jana jetao, sohin

jaonaa jerecure, nii ita cotaicha rijitohane jaancuru- Jori-  
oocuru.

<sup>30</sup> Ne jetaote, nii sohin jaonaa jerecuruhane coitucuuriin, Sesareeau, Saoro amaain jetao, caje coauneein Tarosoo letoaaure, Jesoso Ere esenetaeraauru.

<sup>31</sup> Nii inatiin jetaote, Jodea, Calileea, Samaria, naaon-  
joaihunri batanecuru nenacauru que, Jesocurisito Ere  
esenetaain- tonoraeraauru, jeelai choae jauhecotojoeriin,  
raotojoein, nii baaso coacuelanaala, Cana Curuaanaa Jesoso  
Ere tonoraare, acauru coroatajaniha, Cana Coaunera Suu-  
juene aina nejeeotejeein.

### *Nerautaa Eneasine*

<sup>32</sup> Cajianeein amuhemujeein, Jesocurisito Ere  
esenetaeraauru rene bedaenihane ucuatoha jetaote, Lidau  
nenacauru- Jesocurisito Ere esenetaeraauru rene netonoai,  
turuha cue Fedoro. <sup>33</sup> Nii jana jetaote, cuu ne, leeinjiin  
cacha- Eneasineein curuajai. Aca jetaote, fosa ajaanacaain,  
niirijeein amuelanaala, nenajauhacha tocoecooha, mucuha  
jiuronane jaun jetao:

<sup>34</sup> “Eneasi, Jesocurisitote ii rautareeincha. Chajaain  
nimichuhin, chela seriin amuunra,” naa Fedorone jana  
jetao, nii rijieeoritiin, nimichuhin nela seriin amue- Eneasi.  
<sup>35</sup> Nii aichejetenihane baiha nimichuhin, amuha Eneasine  
coaracuruha- satiin- Lidau nenacauru, Saroon nenacauru,  
naaonjoaihunrine janate, Cana Curuaanaa Jesocurisito  
ranojoihunru neein nerotojoacoaaure.

### *Oo caje ichanaa Dorocane*

<sup>36</sup> Nii bana jetaote, nii Jofe neseeu nelu, leeinjiin Je-  
socurisito Ere esenetaain- tonoraera- Tabita neein curuajai.  
“Tabita” naane jetaote, Curieco ere cuhane, Doroca ne. Nii  
ene jetaote, caohachanejeein- caohacha ene neein ichoae. Nii  
jetaote, chaelai latecuruha cairichaurine, coroatajanein,  
naaonjoae. <sup>37</sup> Nirijeein, ne lacuritiin jetaote, cunaitein.  
Inae caun ohane jaun jetao, rai jabereco culejeein, naain  
ucuum nena loreri coroata coarana ichoae- ucuha cuhane,  
rai jabereco rucujeein teeure. <sup>38</sup> Nii jana, Jofeu caje, coriaae  
neniha, nii niha Fedorone jaan- Lidane jaun jetaote, cuu niha  
Fedorone coitucuruha Jesocurisito Ere esenetaeraaurune  
jaun jetao, coroatajai cacha letoaaure:

“Chajaau jera, Jofeu luhecotariincha,” naauruha rene tu-  
ruhine jaun jetaote, <sup>39</sup> acauru aina cue Fedoro. Inae nii  
niha ene jaberecone jaan turuhin niha Fedorone jana je-  
taote, curuaacaain codohaquiin chanaain, Fedoro que, jaiti  
ichaohane bana- acauru cajione niicha tococoi- acauru rai  
niicha tei obirichurune maajeein coarateure- autanaauru.

<sup>40</sup> Nii jana jetaote, jelai caje jitariin mitanajaain, nii ene jabereco rohan, neseonraain jetao, Cana Coaunera bajaain, nii ene jabereco coarajein jetao:

“Chajaain, nimichuura, Tabita,” naa Fedorone jana jetaote, nota toretaain Fedoro coaraain, nelauhitohane jetao, <sup>41</sup> rai biji que mucuhin, michuhitoha Fedorone jana, nichaauraane jana jetao, satiin Cana Curuaanaa Jesocurisito Ere esenetaerauru, satiin, nii autanaauru aina curuataain, cotihanajaain jetao, jabereconein chujuriaain acauru que coarate- Fedoro. <sup>42</sup> Nii nitohanihane coitucuhin jetaote, Cana Curuaanaa Jesocurisito Ere esenetaain tonoraare- nii Jofe neseu nenacaauru- arajiin cachaauru. <sup>43</sup> Nitohaneeinte, araa janohin, nii neseu ne Fedoro, canii cari rucuhera- Simoonneein curuajai cacha loreri asaae.

## 10

### *Corenerio aina, Fedorone*

<sup>1</sup> Nii jana jetaote ne, leeinjiin cacha, soondarooru curuaanaa- Corenerioneein curuajaain, Sesareea neseu. Nii jetaote, saota fashanei Romanocuru soondarooru, Italia cocoaicha neein acaauruhacha curuaatei, lefashai- curuaanaa cafitaan neein ne. <sup>2</sup> Aca jetaote, niqui Romanoneein ne. Nejetaote, atiin rai sinijiera, rai bereecuru naaonjoaihunri aina jiniiquiin, jataain Cana Coaunera ere tonoraerauru ne. Aca jetaote, cairichaineein nenacaauru- Jorioocuru rai nihane, coriqui nihane tee tejein, coroatajanenajae. Chaen jetaotechu, inetono janonaa bana, Cana Coaunera bajaebajajeein ne. <sup>3</sup> Nii jaun jetaote, letono anjera que, coarate Cana Coaunera, sona nichae.

Nii jana jetaote, coarajihane jana, nii nihane jaun turuhin enohin: “Corenerio,” naa nacatiha turuhine jana jetao, <sup>4</sup> cuu anjera coaraain, nesooneitiin:

“Cha ichei ichareeunte, Curuaanaa,” naain tonoraa Corenerione jana jetaote:

“Bajaebajajeein neeine aonaa Cana Coaunerara. Chaen techu, cairichaihuru coroatajaneeine coaraain, satiin cao- hacha ichaaine rautate- Cana Coaunerara. <sup>5</sup> Aihana jaun, Jofeu cacha letoaaute, leeinjiin cacha- Simoonneein curu- ajaain nena- Fedoro cotihaca cuhinera. <sup>6</sup> Nii cuu nena cucuana auhaniha loreriquiin nena- jacari nojoenlaain ru- cuhera rijitocojoai curuajai- leeocha Simoon loreri asaaete nera,” nae jetao, rai Cana Coaunera letono anjera.

<sup>7</sup> Niritohane baiha, inae amuha nii aina erenaa- Cana Coaunera letono anjerane jana jetaote, coroatajai nere tonoraerauru, chaen leeinjiin soondaro- Cana Coaunera ere

tonoraain- jataain Cana Coaunera coitucuera rai suujua ri-jitoein nenea niichuru cotijiaain jetao, <sup>8</sup> rai aitoa Cana Coaunera letono- anjerane bee jetao, Corenerio. Nitohanein, acaauru rai bihane baiha jetaote, letoanajae Jofeu.

<sup>9</sup> Nii cojoano jetaote, enoto chujutaelalajeein, turuelalajeein cuujueeuruha, Jofeune jana jetao, loreri janori macararo ichoae, ucuun iniha cue jetao, Fedoro, cuu Cana Coaunera bajaane coina.

<sup>10</sup> Nii jana jetaote, rai banetoe niha mijiitenane jaun jetao, lenonene rijitocojoaain jetao, Cana Coaunera bajae, lenone enohalauruha icharaaurune cohaca. Nii jana jetaote, notaaca Cana Coaunerane coina, <sup>11</sup> nejraca dede bacuujuane jana jetao, caje mituha uhe, shojoera tocohaneein- jaraantiin. Nitohanein ecocohin jetaote, tajiha fauha uhe, jena turiin rulunohineei. <sup>12</sup> Nii jana, coaraane jana jetaote, nii shojoera tocohanai nainecojoaain jetao, uhe itolere cautenu rijihuru, atane ichoae terei lenone, itolere tajaecuru, itolere ataibinaae acanocuru, itolere Jorionecuruhane lenone niheichuru, naonjoaihunri jetao, uhe nainecojoaain. <sup>13</sup> Nii jana jetaote, coarajihane jana jetao dedeu toniin:

“Nimichuhin nichaaurain, niichuru soote que lenonee-icha Fedoro,” naain toniha dedeeune jana jetaote:

<sup>14</sup> “Chabana, Jorionichaanune lenonenihei quinaa naini-haaunta, lanichana naini-haaunta. Nihei ataibinaae quinaa naini-haaunta, Curuaanaa,” naain tonora Fedorone jana jetaote:

<sup>15</sup> “Coa Cana Coauneraacha, couluunojoi que, ‘Calanichareta. Ataibinaae quinaa naini-haaunta.’ naain irihara. Jauriaate chuhisi niqui, nainenelu que lenonequichenera, nete inae enene, que lenonena nainequichene coina couluunoinera. Aihana jaun, Cana Coauneraacha coulucohi que, nainihein niritiin ereeineta,” naain jetao, dedeu toni. <sup>16</sup> Nitohanein nichata saain ecoocane baiha jetaote, inae jelaiha dedeu iniha cue, nii shojoera tocohanai.

<sup>17</sup> Nii jaun jetaote, nii que suujua rohecaain, cuu suujuaau ereerejeein, “Chatohanai ichacaanne coinacha, catohanein canotajae Cana Curuaanaata.” naain suujuaau ereereeca Fedorone jana jetaote, turuure acuujuaniha nichatajai cachaauru Corenerio letonocuru, Simoon loreri bajaebajajeein. <sup>18</sup> Turuhin jetaote, acuujuaniha netiin jetao, tonijiaain:

“Cauna niha caa loreri asaae, leeinjiin cacha- Simoon-Fedoronein acaauruhacha curuaatei,” naain jetao bajaare.

<sup>19</sup> Nii jana jetaote, cuu jaiti, nii rene ecoona que suujuaau ereereeca Fedorone jana jetao:

“Aonaun, nichatajai cachaaurute ii ariirijiera. <sup>20</sup> Chajaain nimichuhin, acaauru aina cunihu necoatelanaalara. Canuna acaauru letoaaun ii renera,” nae jetao, nuricho rai Cana Coaunera Suujue.

<sup>21</sup> Nii jaun jetaote, fauhin nii Corenerio letonocuru-cachaauru coaraain jetao:

“Canuna- nii inaraacha ariirijiei neeunra. Chate raaicheta,” naa Fedorone jana jetaote:

<sup>22</sup> “Canacaanu letoaa, canacaanu curuaanaa cafitaan Corenerione jaunne, uhacaanura. Acate, caohacha cachaneein, jataain Cana Coaunera ere tonoraeranera. Nii jaunte, jataain que suujua acatein, belaihure satiin Jorioocurura. Acate, ii cotiharate, rai beein, que ii cotiharatiha Cana Coaunera letono- anjerana jaunra. Nii jaunne, ii cotihaca uhacaanu, nenajaun cuhin, iicha coitucui que rai ereeine, aonaane coinara,” naaure jetao, Fedoro rai.

<sup>23</sup> Niritocuruhane jaun jetaote, nii notaaca Cana Coaunera que nainaan jetao, nii nihanejaan loreri asaae ranajae Fedoro, Jorionecureniha nii cachaaurune saijieein. Nii jaun jetaote, cuu aina sinihuruhane cojoanoon, cauha cuuruhane jana jetao, acaauru aina cue Fedoro, corianiha cunacaauru-Jofeu neseeu nenacaauru tabaauru- Jesocurisito esenetaeraaauru aina. <sup>24</sup> Nitohaneein cuhin jetaote, cojoanoo Sesareea turuha cuure.

Nii jana jetaote, le laurii naraaichuru, jataain belaichauru, naaonjoaihunri cotijiaain, acaauru cojoae-Corenerio. <sup>25</sup> Inae turuha Fedorone jana jetaote, mituhin raain jetao, nacatiha neseonraain coroaeca Corenerione jana jetaote:

<sup>26</sup> “Nichaaauraura. Canu netonaina, ichejijieein cachaneein neeunra,” naain michuha Fedorone jaun jetaote, <sup>27</sup> ereerejeein, enoha cuuruhane jana, cuu najiniha netaojiaain cohacure arajii cachaauru. <sup>28</sup> Nii jaun jetaote, acaauru rai:

“Inarate raotojoeein coitucuhiche, canacaanu Jorionichaanune, nejelau cachaauru Jorioniheichuru aina, netaojiaain nena nainenihacaanunera. Niheichu. Nejelau cacha loreri asaae enonaa nainihaacaanuta, nitohane niha canacaanu ichaona jaunta. Nete, nii que, canu notajaain carelae Cana Coaunera, nabana chunein cacha que jaolequiin, ‘Nechu aansai ataibinaae,’ naain irihanu chunein nejelau cachaauru quene coataara. <sup>29</sup> Nii jaunna, cacotijiaaichene rijijieein inauheneecha, cha que erelanaala uunra. Nii jaunna, ‘Chanunacha cacotijiaaureta.’ naain, coitucunaa jerichaaunne

jaun, carai beeichene jereeurra,” naain jetao, acaauru caje baja Fedoro.

<sup>30</sup> Nii jaun jetaote:

“Inae, jena janoha, enarijiu, cau canu loreri asaae, cosinacaa casuri couu, canu ichaoneein Cana Coaunera bajaeba-jaecaaun sonainane jana, jataain somajai que, cajonequuin, cau, caatiha neeorite-leeinjiin cachara. <sup>31</sup> Nii cachate, carai: ‘Corenerio, bajaebajaequine aonaa- Cana Coaunera. Chaen techu, cairichaihuri coroatajaneeine coarajein, nii coacuhin corojae Cana Coaunera. <sup>32</sup> Nitohanihane jaun, cachaauru letoaaute, Jofeu, Simoonneein curuajaain nena Fedoro cotihaca cuuruhinera. Nii cucuana auhaniha, loreriquiin, cuu nena jacari nojoelaain rucuhera rijitocojoai curuajai-leeocha Simoon loreri asaaete nera.’ naa carai nii cachara. <sup>33</sup> Nii jaunne, nii rijieeoritiin ii cotiharateeurra. Caohachate jataain ichaai uhincha. Aihana jaun, caute jiniquiin, Cana Coaunera notaracae nihacachera. Nii jaunna, canacaanu rai Cana Coauneraacha beratei que, ereeine aohana jerichaanura,” naain jetao, Fedoro tonorae Corenerio.

*Nereretaa, Corenerio loreri asaae, Fedorone*

<sup>34</sup> Nii jaun jetaote, acaauru rai:

“Inae laen coitucuhanu, coatia nejelauneein, chunein cachaauru coaraain nihein, Cana Coaunera. <sup>35</sup> Jerichanejeeinte, satiin coaraain, naain coriajai ataneeu nenacaauru nihanatiin, nere tonoraane, rae Cana Coaunera, caohacha ichaain neeuruhanera. <sup>36</sup> Nitohanihane coina, Israeli inamacooru rai, baaso ichaain, Cana Coaunera que nejeratenaa neein, niha cachane niha natiin, niha leeinjiin, nii rucuhera, raotojoein neeuruha Cana Coaunera aina cachaurune que beratelu Cana Coaunera. Acate, Jesocurisitoneein-satiin Curuaanaanein nena nera. <sup>37-38</sup> Inarate, cachaauru rai, baaso ichaain neeuruhane jianein, nebaotisaerateeuruhane, raotojoein acaauru raa Cana Coaunera coina, biha Joanne coitucuhiche raotojoeincha. Nii baihate, Nasarete cocoaicha-Jesoso baotisaa Joanne jana, nii Jesoso ichoae, rai Suujue letoaa Cana Coaunera, itolere ichaain nena nainihane coinane coitucuhiche. Nitohanein baotisaa Joanne caje coauneente, Jodea batane sacutaain, amuhemujelu Jesoso, Calileea nunuheteente, itolere caohacha ichaain, moconajaera ichanohineein cunaiteein necairichanacaaurune maajein rautaelura.

<sup>39</sup> Nii jana, canacaanune, itolere ichaain niha Jesusone coaranein nihacaanu, aina amuhemucaanulu, itolere

Jodea batane sacutaain, Jerosaleeun nese sacutaain, naaonjoaina jaunra. Nitohanihane baihate, inae coroso que teein atinaaurelura. <sup>40</sup> Nete, atinaauruhane jana, nichata jano cuhane, ichatelu Cana Coaunerara. Nitohaneein ichateeinte, canacaanu rai, ecoocane coina, letoae Cana Coaunerara. <sup>41</sup> Coatia, satiin cacha rai, ecoohai. Leeinjiin canacaanu-Cana Coauneraacha janijii nii beraanu que- niicha ranojoi nichaanune raiichate ecocoera. Nitohaneein oo caje ichanaa Jesusone baihana, aina lenoneein, aina acau cohacaanura. Inae inoaelu, nitohanihane coina, Cana Coauneraacha ranojohineein nihacaanulune jaunte, <sup>42</sup> canacaanu letoae, itolere ichaonacaauru, onacaauru, naaonjoaihunri coaraanu que- nii Jesoso teein nihalu Cana Coaunerane beebejiha-caanu, cachaauru raine coinara. <sup>43</sup> Chaen techu, inoaelu najiincha caje coauneein, nii Jesoso beebejeretocure, nere bera inoaesihuru: ‘Nere tonoraain esenetaeraaurute, baaso ichacuruhane niha natiin, coreniha caseteco caje nichotiha cureeincha.’ naain beratihalu, nere bere inoaesihuru *profetacuru* que, aitiin Cana Coaunerane jaunra,” naain jetaote, acaauru rai beebeje- Fedoro.

*Cana Coaunera Suujue raauruha Jorioonihichuru netonaine*

<sup>44</sup> Nii jana jaiti niritiin beebejiha Fedorone jana jetaote, nii satiin nere aonajeeurera choae, fauha uhe Cana Coaunera Suujue. <sup>45</sup> Nii jaun jetaote, coarajeein cojoaelatoore, nii Fedoro aina unacaauru- Jesocurisito esenetaeraauru- Jorioocuru, Jorioniheinichuru rai netonai, tenojoi niha Cana Coaunera Suujuene jaun, <sup>46</sup> chaen, Cana Coaunera coroaecuruha, nejelau ere cuhane cuaain- nejelau ere que erenacaaurune jaun. Nii jaun jetaote:

<sup>47</sup> “‘Nainihaacache cana, caa cachaauru baotisaain coujunacatechaachene, Joriooneeurenihane jaunmeta.’ naain erena nainihaacache cana, inae cana rijijieein, Cana Coaunera Suujue que, coujunacatenohineein neeuruhane jaunta,” naa Fedoro nii corihaniha cunacaauru Jorioocuru raine baiha jetaote:

<sup>48</sup> “Jesocurisito coreniha, baotisaain coujunacatenohineein neeuruhinera,” nae jetao, acaauru rai Fedoro. Nii jaun jetaote, nii baiha, Fedoro chunaaure, acaauru aina, inata janojoein neeorihane coina.

## 11

*“Chanuna Jorioniheichuru aina lenoneei,” naain Jerosaleeun nenacaauru Jesocurisito ranojoinunru Jorioocuru tabaaurune*

<sup>1</sup> Jodea bataneu netiin jetaote, inae Cana Coaunera ere esenetaain tonoraauruha Jorioniheichuru netonaine coitucuure Jesocurisito letonocuru afosotooru aina- cana nejer- aauru Jesocurisito ranojoihunru. <sup>2</sup> Nitohaneein coitucuruhanane jaun jetaote, inae Jerosaleeun turuha Fedorone jana jetao, necoejechanuure- Jorioneein Jesocurisito ranojoi- hunru tabaauru. Niritiin necoejechanuhin jetaote:

<sup>3</sup> “Chanute cocoaeraa- cana Jorionichaachene ichao rai, Jorioniheichuru rene turuhin, acaauru aina, naaonjoaacachene natiin- acaauru aina lenoneita,” naain bajaare jetao, Fedoro caje.

<sup>4</sup> Nii jaun jetaote, satiin niicha coaraai bee jitariin nunue caje coauneein:

<sup>5</sup> “Naain nii Jofe neseeu nihanune jaaunna niqui, Cana Coaunera bajaauru. Nii jana, canu notaaca Cana Coaunera- ane jana coaracaunne janate, shojoera tocohaneei jaraantiin, jenaain rulunojohineein dede caje faauha uhe caatiha, nii nihanune jaunra. <sup>6</sup> Nii jana, rautain cuhanai coaracaunne janate, cuu ne, itolere ataibinaecuru, atane ichoae terei lenone, tajaecuru, acanocuru naaonjoaauricha. <sup>7</sup> Nii janate, carai dedeeu tonii: ‘Chajaaajoaain nimioritiin, soote que lenoneeicha.’ naane janana: <sup>8</sup> ‘Jiaohinera, Curuaana. Chabana cujuuae cuhane aansai calaani enohaaunta.’ naanune janate, <sup>9</sup> dedeeu toniin: ‘Coaa, “Aansai calaani,” naain iriha, ii coauneraacha coulucohi quera.’ naain <sup>10</sup> toniha nichata saain dedeeune janate, jelaaaha dedeeu iniha cue- nii shojoera tocohanaicha. <sup>11</sup> Nii rijieoritiinte turuure, Sesareea caje uhin, nichatajai canu ariha unacaauru cachaauru, nii nihacaanunejaan loreri asaaera. <sup>12</sup> Nii janate, caletoe Cana Coaunera Suujue, necoatoelanaala acaauru aina cuhanune coinara. Nii janate, canu aina cuure caa saotaneein Jesocurisito coreniha- cana nejeraauru. Nitohaneein kuhina, Sesareea turuhin, nii canu coitihaca unacaauru letoaeracacha loreri asaae enohacaanu saaincha. <sup>13</sup> Nii janate, canacaanu rai: ‘Naaajoaainte, cau ecocoe Cana Coaunera letono aanjerara. Cautu chujuhequuin, “Cachaauru letoaa Jofe neseeu, Simoonneein curuajai- Fedoroneein acaauruhacha curuaatei cotihaca cuuruhinera. <sup>14</sup> Acate, ‘Naaonjoaain neeute, satiin, isinejiera, charaichuru, ichoerejeeuru, naaonjoaihunri aina, raotojoein jianaacoo neeuncha.’ naain ichei bereeuncha,” ’ naa canacaanu raine naainaa- nii loreri erorane jana, <sup>15</sup> acaauru rai irihanune nunuetihanune janate, acaauru chochae fauha uhe Cana Coaunera Suujue, cana chochae fauha uhalune rijijieeuncha. <sup>16</sup> Nii janate casuujuaniha neeorite, ‘Acau quete niqui



cache camujuaain, cache coujounacate Joanra. Nete inara laen Cana Coaunera Suujue que, coujunacatenohi niha curiquicheeincha.’ naain aitovalu Cana Curuaanaa Jesocurisito nera. <sup>17</sup> Aihana jaun, Jesocurisito esenetaacachene jana, cana rai rai Suujue tihane rijjijiein, leeochoaauru rai netonai, rai Suujue tiha Cana Coaunerane, nainihaaun nii caohatera rijitiin, irihanu canu neta. Chaneaina nereun canu, Cana Coaunera colaihaje cuaain, nii caohatera rijitiin irihanuneta,” naa Fedorone janate, <sup>18</sup> inauhene cuuraatoraain, cuu aonajeeure nii Jerosaleeun nenacaauru- Jesocurisito coreniha cana nejeraauru.

Nitohaneein aonajeeuruhane baihate, Cana Coaunera coroaecure, “Caohacha quete, Jorioniheichuru netonai coroatajane Cana Coaunera, acaauru netonai suujua coreein ichaonaa- chabana nitajenaa charanejeein nena raauruhane coinara.” naain.

*Antioquiha neseeu Jesocurisito ranojoineein nenacaauru*

<sup>19</sup> Eseteba sohin jaoruhane baiha neeoriinte, leeochoaauru Jesocurisito esenetaeraauru netonai ariin, rohecaare. Nii jaun jetaote tabaauru Jodea batane caje sorohin, Fenisiau, chaen Chifereu, Antioquihau, naaonjoaihun- cuhinchuru sorohacoaare. Nii cuhin sorooruhane jauncuru turuhin jetaote, leinjiin Jorioocuru raiicha Jesocurisito beebejeein, que relanajaaure. Coatia jetao laen, leeochoa acaauru- Jorioniheichuru relaauruhi. <sup>20</sup> Ne jetaote, nii baiha, Chifereu, Sireneu naaonjoaihun nenacaauru- Jesocurisito esenetaeraauru tabaauru, nii Antioquiha neseeu turuure. Cuu turuhin jetaote, nii cuu nenacaauru Jorioniheinchuru rai, Cana Curuaanaa Jesoso que Erenaa Caohati beebejeein, que acaauru relaaure. <sup>21</sup> Nii aina, acaauru coroatajaniha Cana Coaunera Suujuene jaun jetaote, jauriaa acaauruhacha esenetai jianein, Jesocurisito esenetaare arajii cacheaauru.

<sup>22</sup> Nii coitucuuriin jetaote, “Chatohaneeuruhachata,” naain Antioquihau Berenabeen letoaaure, Jerosaleeun nenacaauru- Jesocurisito ranojoihunru. <sup>23</sup> Inae Antioquihau turuhin, acaauru coaracuruhane jana jetaote, caohatiin acaauru coroatajaniha Cana Coaunerane coaraana jaun jetao, jataain coroeje Berenabeen. Nitohaneein corojeeinte, esinaae rauhijiriin Jesocurisito esenetaain, baaso coacuelanaala esinaae rauhijiriin nere tonoraauruhane coina, suujuatenajae Berenabeen. <sup>24</sup> Caohacha cachaneein, Cana Coaunera Suujue que suujuequiin, jataain Jesocurisito esenetaera nihana jaunte, nitohane Berenabeen. Nitohaneein jetaote suujua coreein Jesocurisito ranojoinunru aina neeure arajii cacheaauru.

<sup>25</sup> Nii baiha jetaote, Tarosoo cue Berenabeen, Saoro arihane coina. <sup>26</sup> Nitohaneein cuhin jetaote, cuu eruhin, amae Antioquihau. Cuu jetaote neurelu, itolereneein lejaanacaain, cuu nenacaauru Jesocurisito ranojoihunru aina cuu nenacaauru cachaauru relaa. Nii Antioquihau jetaote, jauriaanejeein, “Curisitianoneein” Jesocurisito ranojoihunru curuaateeuruhane nunuheteurelu.

<sup>27</sup> Nii bana jetaote, Jerosaleeun caje cuhin, Antioquihau turuha cuure- *profetacuru* tabaauru. <sup>28</sup> Niichuru taba-Acaboneein curajai jetaote, ita taojiaauruha Jesocurisito esenetaeraaurune jana, acaauru cataaun nichaauraain:

“Aonacuchena, inara rai caa bete, coitucuhichera. Nerinaain jetao carajaaajoaain quinacai, Jodea batane sacutaainta,” naain be nii Acabo, que beratihia Cana Coaunera Suujuene jaun.

Nii mijitena jetaote nelu, Romanocuru curuaanaacuru-curuaanaa niha enferadoro- Culaodione bana. <sup>29</sup> Nii niritoha Acabone jaun jetaote, naain Jodea nenacaauru Jesocurisito coreniha cana nejeraauru- coroatajanena jerecure, nii Antioquihau nenacaauru Jesocurisito esenetaeraauru. Nitohaneeinte, ita jeeonijianaain coriqui tein, taojiaaure, le cachaauru cachaauru caje, tenaa nainecuruhane rijiinanaain. <sup>30</sup> Nitohaneein taojiaain jetaote, nii Jodea nenacaauru Jesocurisito esenetaeraauru- bichauhenauru rai letoaaure, Berenabeen, Saoro, naaonjoaihunri aina.

## 12

*Saantiaao sohin jaohinte, caresero cuhane Fedoro eno-haature.*

<sup>1</sup> Nii bana jetaote, Jesocurisito ranojoinunru aina nejertihane nunuheteein, tabaauru mucuerate jetao, Isaraelitaauru curuaanaa *rey* Erodesi. <sup>2</sup> Nitohaneein jetaote, sabere que, Joaan nejera Saantiaao sohin joerate. <sup>3</sup> Nii rautatiin, coaracuruha Jorioocurune jaun jetaote, Fedoro netonai mucuerate Erodesi. Jorerera colane ichanohin- faan quihuruhanne jaun- beseta cojoanonaacuru bana jetaote, nitohaneein Fedoro mucuure. <sup>4</sup> Nii mucuherateein raeratihane baiha jetaote, Fedoro enoerate caresero cuhane- Erodesi. Nitohaneein caresero cuhane enoerateein jetaote, caohatiin beraichate. Jena lauriin, janaanain, nenacaauru soondarooru que, ita reroherojoein caohatiin beraihuruha le laurichuru cajene coina, letoanajae, nii Fasocoa beseta bitohariin, satiin coarajeeurera notaracae, caresero caje rocohin, coaraain chatohaneein teuruhane coina. <sup>5</sup> Nitohaneein

caresero cuhane caohatiin beraichaain niha Fedorone tonohanau jetaote, ita taojiaain, rai Cana Coaunera bajaure mainajein Jesocurisito ranojoihunru.

### *Caresero Cajé Fedoro mitaa Cana Coaunerane*

<sup>6</sup> Nii jaun jetaote, eresinejeeonriin lanajeeca, sатиin coarajih cachane notaracae, chatohaneein Fedoro tihanerai niha-Erodesine jana jetao, coroatajai soondarooru cataaun, jeranu *cadena* que cosiin sinitoha Fedorone jana, acuujuu nihacuru neein- beraihuruha soondaroorune jana jetaote, <sup>7-8</sup> rai letono- anjera letoae jetao, Cana Coaunera. Nii jaun jetaote, luhecotariin, Fedoro rohan neeoritoha Cana Coaunera letono anjerane jana jetao, jiiichoo rijijieein conoe, caresero cuhane. Nii jana jetaote, sinitoha Fedorone jana, jaleri dada dadariin nocoain jetao:

“Chajaain nimiichuura,” naa Cana Coaunera letono anjera, Fedoro raine rijieeoritiin jetao, rai biji caje nejasajasariha- nii biji ichora *cadenane* jana jetao: “Chajaaoojooain nimioritiin ichajione jiaain, ii safato jiaain, canu jiniichotaaura,” naa, nii Cana Coaunera letono- anjerane jana jetaote, nii aithane rijijieein jiniichotae jetao, Fedoro.

<sup>9</sup> Nitohaneein jetaote, mituha cue, Cana Coaunera letono- anjera caajie cuhin, coetacaineein cuhin, mituha cuhane esenetaelanaala, “Nechu jataaen sini anuu jecha aite.” naain. <sup>10</sup> Nitohaneein cuhin jetaote, jaurihaanejeein acuujuu beraicha caje situure. Nii leecha caje situhin jetaote, nii coata que bacuujuana jaun, turuuruhane jana jetao, raajenihane neyoracae, nii coata que bacuujuanaa, naain aere ne nana enonaanaja rijia bacuujuu. Nitohaneein mituhin, le coaantaain bero cuhane cujueeru baiha jetaote, jelai Fedoro ratiriin amuhe- Cana Coaunera letono anjera.

<sup>11</sup> Nii jaun jetaote, nainacori Fedoro. Nainacoriin jetaote: “Esinaaete, rauhijiriin letono anjera letoae- Cana Coaunera. Jataain caque necosuujuaain, canasineene rijitoha Erodesi aina Jorioocurune janate, nabana chatohaneein caetecuruhane coataa, letono anjera letoae Cana Coaunera, canu ichoteratihane coinara,” nae jetao Fedoro.

<sup>12</sup> Nitohaneein, inae nainain jetaote, Joaan Maroconein curuajai- neba- Mariha rene turuha cue. Nii jana jetaote, cuu najiniha, nii Mariha loreri asaae, ita taojiaain, Cana Coaunera bajaa neeure arajii cachauru. <sup>13</sup> Nii jana jetaote turuhin, nii aere ne nana enonaanaja rijia acuujuu faofaorihane jana jetao: “Cha cha aite,” naain, coaraa cue leeinjiin rana Rodee. <sup>14</sup> Nii jetaote, Fedoro ere nihane aonaain jetao, coroaena caun jetao, nii acuujuu joracae lanaala soroneein

biha cue: “Fedoro te aitera,” naain. <sup>15</sup> Nii jana jetaote: “Esinaaenna aitohite,” naauruhane jana jetao:

“Esinaae rauhijiriin acate aicha,” naane jana jetao:

“Rai suujuete jerihane ai caihara,” naaure.

<sup>16</sup> Nii tonohanau jetaote, nii acuujaaniha neein, nii acuujuua faofaonijiana, acaauru bajaebajajeein Fedoro. Nii jaun jetaote, nii acuujuua joracaain coaracuruhane jana, esinaae aca nihana jaun, cuu nesoonetiin coarajeeure. <sup>17</sup> Nii jana jetaote, acaauru rai, biji sarasarari, nabana tonaain ereeuruhane coataa. Nitohaneein jetaote:

“Naaonjoaainte, caresero caje, canu mitaeratein, canu ichoterate, Cana Coaunerara. Caritiin, Saantiaao rai benichuchera. Satiin, cana nejeraauru- Jesocurisito coitucuurera rai netonai beeuchete, coitucuuruhinera,” naain beratihane baiha jetaote, jelai caje mituhin jetao, amuhe Fedoro.

<sup>18</sup> Nii jana jetaote, jano jana, cuu neniha Fedorona jaun, nesoonetiin: “Cha quena nerurujuae, caa aansai,” naain jetao, acaauru suujua auhacaain nererojoecaaure- nii beraihurera-soondarooru. <sup>19</sup> Nitohaneein, neniha jaun jetaote, arihuruhane coina, acaauru letoaa- nii curuaanaa Erodesine jana, nitohaneein Fedoro arihuruhane jana, ruurenihana jaun, nii beraihurera choae nalutiaain jetao, acaauru sohin joerate jetao Erodesi. Nii baiha jetaote, nii Jodea batane caje mituhin Sesareeau ichaoha cue jetao Erodesi.

### *Oha Erodesine*

<sup>20</sup> Tiro, Sidoon, naaonjoaain cocoaichacuru aina jetaote, niqui obaje Israelitaauru curuaanaa rey Erodesi. Nii jana jetaote, ita suujuau tacaain:

“Coanete, atiin rene turuhin raotojoein erenaa neeinerana,” naain jetao, jaurihaanejeein, nii que jaurii- nere tonoraera Balasito rene turuhin jetao, ereeure nii curuaanaa Erodesi rai, nii Erodesiicha beraai atane cajeecha quinacai raajein ichaauruha, nii Tiro, Sidoon naaonjoaain cocoaichacurune jaun. Nii jaun jetaote, nii curuaanaa Erodesi rai:

“Coanete, nii cachaauru coroatajanena neeinerana,” naa nii Erodesi que jaurii- Balasito najaun jetao, <sup>21</sup> “Banajian uunite coana neeinerana,” nae jetao, nii curuaanaa Erodesi. Nii jaun jetaote, nii aitohane bana, rene netaojiaauruhane jana jetaote, curuaanaa nihane cajione jiaain jetao, nii curuaanaa nihane nelauriana jaan- rori choae nelauriaain jetao, ereereje Erodesi. <sup>22</sup> Nii jana jetaote:

“Coatia caritiin erenaa nainihe, cana rijijieein cachata. Caate cana chosinera,” naaure jetao, eehequiin satiin nii cuu nere aonajeeurera cachaauru, nechua jataain acaauru

belaiha Erodesine coina. <sup>23</sup>Nii jana, coroaeca Erodesine jaun jetaote, nii rijieeoritiin, letono anjera letoae- Cana Coaunera, nichoae cunai nalutiaane coina. Nii jaun jetaote, cunaiteein corianohin rihano jitanoinnein ohe, Cana Coaunera nujua-  
neein coroaeca ne jaun.

<sup>24</sup>Nii jana jetaote, inae jelai amuritoheriin, Cana Coaunera ere coitucuhajeein cuujueeure cachaauru, itolere sacutaain, amuhemujueein beebejueuruhana jaun.

<sup>25</sup>Nii jana jetaote, inae Jerosaleeun, niicha ichanenu nainaauruha najaun jetao, Antioquiha cauha cuure, Berenabeen aina- Saorocuru, acauru jiniichaain “Maroco” naain acaauruhacha curuaatei- Joaan amaain.

## 13

*Letononeein amuhemujueein, Jesocurisito beebejueuruhane nunueteuruha- Berenabeen aina Saorone*

<sup>1</sup> Nihalu jetao, Antioquihau Jesocurisito ranoinunru coaraauru jelai teein, Cana Coaunera caje- erenaa raain acauru rai beeureraauru *profetacuru*, chaen Cana Coaunera aitoonjoa que cacha relaureraauru, naaonjoainuri. Niichuru aina jetaote neurelu, Berenabeen, chaen Simoon- jichojoainein acaauruhacha curuaatei, chaen Losio- Sirene cocoaicha, chaen nii Calileea coberenadoroneein nenaalu- Erodesi aina fohena- Manaen, chaen Saoro, naaonjoainuri. <sup>2</sup> Niichuru jetaote, coroatajanenaaca Cana Coaunerane coina, cosinacaa suri couu ita taojiaain, Cana Coaunera bajaee bajaacuruhane jana jetaote:

“Carai nii Berenabeen aina Saoro letoaauchete, jelai teein acauru rai quicha teei amihanenaa ichaa cuuruhinera. Nii ichacuruhane coinane cotihanajaain ranajaain neunlura,” nae jetao, acauru rai Cana Coaunera Suujue.

<sup>3</sup> Nii jaun jetaote, coaiten cosinacaa suri couu neein, Cana Coaunera bajaee bajaacuruhane nainaan jetao, acauru choaae biji merecaain, Cana Coaunera bajaare. Nitohanein acauru rai, Cana Coaunera bajaauruhane baiha jetaote, acauru rai necoeeure.

*Chifereu turuuruha, nii Cana Coaunera Suujue letoaeratenojihunru- afosotoorune*

<sup>4</sup> Berenabeen aina Saoro jetaote, Cana Coaunera Suujue letononeein Seleosiau cuure. Jelai caje coaunein jetaote, Chifere cunaa bote cuhane fauhin, cucuana cuhane coriaae cuuhin turuure, nii Chifere coobenau nena nese- Salaminau. <sup>5</sup> Nii nese Salaminau turuhin jetaote, nii cuu nena

ita taojiaauruhana jaan loreri- sinacoca asaae netaojiaauruha Jorioocurune jana jetao, cuu enohin, acaauru rai, Cana Coaunera ere beebejeeure. Joaan Maroco netonai jetaote, acaauru aina cue, acaauru coroatajanera rijijieein.

<sup>6</sup> Salaminau neeuruhane baiha jetaote, caje cuhin, jitariin nii obena tinonohin cuhin jetao, nii cu nena leecha nese-Pafosoo turuure. Nii Pafosoo turuuhane jana jetaote, cuu nee- leeinjiin benane- Jorioneein casajenetiin- Cana Coaunera letononiha nocoetiin- cachaauru coritaera- Barajesoso. <sup>7</sup> Nii benane jetaote, cuu jataain nainain nena-Coberenadoro Serijio Faoro aina nei nejesina ne. Nii coberenadoro jetaote, nii Pafosoo turuhin neeuruha- Berenabeen aina- Saorone coitucuhane jaun jetao, cotiharatenajae, nena-jaun cuhin, rai Cana Coaunera que ereereecuruhane aohana jerihane jaun. <sup>8</sup> Ne jetaote, Berenabeen aina Saoro que nejerate nii benane- Barajesoso- “Elima” neein Curiecocuruhacha curuaatei, nabana acaauru esenetaa nii coberenadorone coataa. <sup>9-10</sup> Ne jetaote, Cana Coaunera Suujue que suujuequin jetao, nunajeein coarajeein:

“Nechu aansai. Casaje. Moconajaera nebaneein nena. Ii te itolere caohacha aina nejeratenaanein neeinha. Chanute Cana Coaunera tenojohin ichaonaa caohacha auhacaaita,” nae jetao Saoro- “Faboro” neein curuaaneni. <sup>11</sup> Niritiin cotaicha rijitiin jetaote: “Nitohaneein neeine corenihate, ichasetecareein Cana Coaunerara. Maosaneeinte nedariquiin carajaojoaaincha. Nihei jiichoo coaririheeinita,” naa Faborone rijieeoritiin jetaote, maosaneein nedae nii benane.

Nitohaneein nocohenanein nedaa rai notana jaun jetaote, rai biji que mucuhin- amaeranu ari, amaa ne coina- nii Elima, inae conoeniha notana jaun. <sup>12</sup> Nii jaun jetaote, cojoelatiin, jataain caohatoha nii Cana Curuaanaa- Jesocurisito que aitiin, acaauruhacha beebejei- Cana Coaunera ere esenetae- nii coberenadoro.

*Pisidia batane que nena- nese leecha- Antioquihau turuha Faboro aina Berenabeenne*

<sup>13</sup> Nii Pafosoo neeuruhane baiha jetaote, leeinjiin bote cuhane fauhin, Paanfiliu cue nii corihaneraauru aina- Faboro. Jelai caje coauneein jetaote, atane ichoaae cuhin, turuha cuure, nii cuu nena nese- Perejeu. Nii jana, Joaan Maroco jetaote, cuu ratirinajaain, Jerosaleeun cauha cue. <sup>14</sup> Nii Perejeu caje cuhin jetaote, nii Pisidia batane roohan nena- nese Antioquihau turuure nii Berenabeen aina Faboro. Cuu jetaote, nebetacanaa janonaa bana- ita taojiaauruna jaan- sinacoca asaae, ita taojiaauruha Jorioocurune jana, cuu enohin nelauriaain, aonajenajaunre. <sup>15</sup> Nii

jana jetaote, cuu aonajenajaauruhane jana, Cana Coaunera Quiricha Inoaesi ereretaaure. Inae nii nainaaauruhane baiha jetaote, acaauru rai:

“Chasocuru, niha chaaelai que ereeichene jaanne, ereeuche te, aonaain suujua lararajiaauruhine- caa cachaauru,” nae nii netaojiaauruna jaan- sinacoca curuaanaacuru.

<sup>16</sup> Nii jaun jetaote, nimichuhin nichaaaurariin, acaauru rai, biji sarasarari Faboro, inauheneeicha curuaequiin aonajeeuruhane coina. Nitohaneein acaauru rai, biji sarasarariin jetaote:

“Aonacuche satiin- Isaraelitaauru, satiin Jorioniheichuru netonai- Cana Coaunera ere esenetaain tonorana jerenacaauru. <sup>17</sup> Egiptoo cuhin ichaooruhane ajiniha jetaote, cana foerateurera Israeli cocoaichacuru janiijin ranajaelu Cana Coaunera. Nii baiha, rai natane nihei que cuhin, nejelau ataneu- Egiptoo ichaooruha cana inoaesihuru Isaraelitacurune jana jetaote, arajiin fanajaelu Cana Coaunera. Nitohaneein nii nejelau ataneu netiin, inae arajiin nefaauruhane jana jetaote, jelai caje, niicha ichana nainei coarateein roconajaelu Cana Coaunera. <sup>18</sup> Nii Egipto caje roconajaane baiha jetaote, nere tonoraarenihane saijieein, atiin acaauru abaantaelu, jenachoonca janacaneein desieretoo Cana Coaunera. <sup>19</sup> Nitohaneein nere tonoraarenihane saijieein jetaote, acaauru rai neein niha nii atanene coina, Canaun batane que, caaunsineein nenea nese que ichaonacaauru cachaauru itaje jetao Cana Coaunera. <sup>20</sup> Itolereenein, Egiptoo cuuruhane que jojohin jetaote, jena fasha saogui choonca ajaanacaneein jetao, acaauru que banihateein inoaelu- niicha tenaa jerei- atane que tenajae jetao Cana Coaunera.

Nii baiha jetaote, acaauru curuaanaacuru tihacoe, Cana Coaunera, enoha nere bera inoaesi- Samoerinereein tihajoaain. <sup>21</sup> Nii jana jetaote, itolere curuaanaaneein- itolere sirichaaunu que jetao leeinjiin *rey* bajaure jetao. Nii jaun jetaote, Beenjamiin lauri caje neferatenaaneein nenea Sisi calaohi- Saoro tee jetao, Cana Coaunera, jena choonca ajaanacaneein, acaauru rai- *reyn*eein nihane coina.

<sup>22</sup> Nii jana jetaote, renaatonorae lanaala, jeriha Cana Coaunerane rijijieein, ichana jereniha Saorone jaun jetao, Rabiri que core jetao Cana Coaunera, satiin Isaraelitaauru curuaanaaneein- itolere sirichaneein- *reyn*eein nihane coina. Nitohaneein tein jetaote: ‘Inae laen, casuujua rijitajoeein nenea- cacha ruhanura. Acate, Isaihasi calaohi- Rabiri inera. Acate laen, jatoroaain ne, itolere quicha jerenohi ichaane coinara.’ naain jetao Saoro mitaain,

Rabiri tee jetao, coreeraniha, Cana Coaunera. <sup>23</sup> Nii Rabiri caje neferatenacaauru inamacooru caje nenaaneein jetaote, nenaanelu Jesoso. Aca jetaote, letoaelu Cana Coaunera, nere bera inoasihuru que beratihalune tocohaneein Isaraeli cocoaichacuru ichoteratihane coina. <sup>24</sup> Inae turu catainajiha Jesusone jana jetaote, Joaan letoae jetao Cana Coaunera, satiin itolere Isaraeli cocoaichacuru sacutaain, beebejiha Joanne coina. Nii jaun jetaote: 'Caohachaaain inara suujua rucujueein, coaiteen Cana Coaunera aitoonjoa esenetaain tonoraain neeuche te, baotisaain cojounacatenohineeichera.' naain, Isaraeli cocoaichacuru rai aite jetao, Joaan. <sup>25</sup> Inae ohane catainaane jana jetaote: 'Coatia nii inaraacha cohajei- cacaaijie- nii turuha uhenenu nihaaun. Canute, letoae Cana Coaunera, nii beraaunu que. Acate laen, caichoaae jauhecotojoeriin, jataaen cocoainaain letoanojoneein ne. Nii jaun, rai safato ichora rucuheraane que nihanatiin, nelatihahaun.' naain jetaote, rauhijiriin be jetao, acaauru rai- Joaan.

<sup>26</sup> Chasocuru, Abaraan caje neferatenaaneein nenacaauru, satiin- Jorioniheichuru netonai- Cana Coaunera ere tonorana jerenacaauru, satiin, caa inara rai quiicha beebejeite- jianacoo cacha culucohin mitaeranute, satiin- inara rai beratenojoneein ne. <sup>27</sup> Satiin- nii Jerosaleeun nenacaaurulu, acaauru curuaanaacuru, naaonjoaihunrite, cajiha turuha Jesusone jana, coitucuurenenu. Nere bera inoasihuru quete niqui, laenaerateein beratelu Cana Coaunera. Nii jaunte niqui, nii Cana Coaunera ere bera inoasihuruhacha- laenanohilu ereretai nejesinanecure, nebetacanaa janonaa bana naineein. Nitohaneein, ita taojiaauruhana jaan- sinacoca asaae ereretai nejesinanecuruhane sajainejeeinte, cajiha turuha Jesusone jana, 'Aca caara.' naain coitucuurenenu. Nii jaunte, sohin joerateuruhana jaun, aitiin: 'Naaonjoaante, cuureeinha.' naain nere bera inoasihuru que laenaeratihalu beein- Cana Coaunerane nainauruhane coina, <sup>28</sup> Filato rai colurujueein, sohin joerateeurelu, Filato que, lera colane. <sup>29</sup> Nitohaneein teeinte, inae satiin aitoha Cana Coaunera Quiricha Inoasine nainaane jana, nii coroso caje fauhin, rai jabereco rucuhecure- ajeri jachu cuhane. <sup>30</sup> Nete, nii jana, oo caje ichate Cana Coaunera. <sup>31</sup> Nii jaunte, nii Calileea caje coauneein, Jerosaleeun tiaetiajeein namu corihaniha amuhemuhenacaauru rai ecocohin, cuu araai janohi acaauru aina nerejetelu. Acaaurute, enene itolere sacutaain amuhemuhejueein, nii Jesoso que ereereecure, itolere cachaauru rai.

<sup>32-33</sup> Inara caohachanu quena, inara rai, caa caohati er-



ena a bihacaanu, coitucuhichene coina. Caa quete, cana inoaesihuru rai aitelu Cana Coaunera, catohanihane coina. Nii jaunte, acaauru inamaconeein nihacachena jaun, cana rai, cana inoaesihuru rai naitoonjoa nainaane coina, catohaneein ichae Cana Coaunera. Acate, oo caje Jesoso ichate, rai Quiricha Inoaes- Salmo- coroatajai cuhane aitohane tocohaneein. Raite, 'Iite, canu calaohineein neeicha. Canuna, chacaneein neeunra.' naain laenaeratelu Cana Coaunera, rai Quiricha Inoaes cuhane. <sup>34</sup> Nitohanihane coinata, nii ajiniha: 'Oo caje jene, ichatereuni, nabana setuha rai jaberecone coataara.' naain nii ajiniha- rai Quiricha Inoesi cuhane belu- Cana Coaunera. Chaentechu: 'Satiin Rabiri rai caitoonjoane, ichaa cureunnicha.' naain belu Cana Coaunera. <sup>35</sup> Nitohanihana jaunte, coaiten leecha cuhane, 'Coatia laen, setuha nii ii letono jaberecone naihatejeriheeinita.' naain laenaelu Rabiri. <sup>36</sup> Aihana jaun, esinaaente niqui, Rabiri letoaa Cana Coaunerane rijijieein, nii nihane bana nenacaauru cachaauru coroatajanelu. Nete, nii baiha ohin, rai foerateeurera ainane jana, rai jabereco inae setuelu. <sup>37</sup> Nete, nii Cana Coauneraacha ichatei- Jesoso jabereco laen cuu neein setuenelu. <sup>38-39</sup> Aihana jaun, chasocuru, caa inara rai canacaanuhacha beebejei- Jesosohacha corenihate, atiin, osaaocane nihanatiin, rauhijiriin esenetaane, nosa caje nichotena nainereein- saain cachaauru, Jorioniheichuru nihanatiin. Aihana jaun, nii nosa coreniha caseteco coaracuruhane rai niha- Moisesaacha benojoinurute, Jesoso coreniha laen nainecurureein nii caseteco caje nichoteeuruhane. Aihana jaun, satiin- nii Jesoso esenetaeraaurute, atiin coreniha- osa caje rocohin- culuhoca cureein Cana Coaunera. <sup>40</sup> Caohachaa in coaracuche, batohin esenetana jereneehenete, inara choaae nalureein inoaelu laenarati- halu Cana Coaunerane jaun, laenacuruhalu *profetacurune* rijijieein:

<sup>41</sup> 'Aonacuche.

Satiin caohacha ichaonaa- caitoonjoa que jaolequiin nenacaauru cojoaelatoche.

Nitajihate curiquicheein, inae ecu tihane bana.

Nii cojoanona banane,

itolere ichaain inara notaaca cureunnicha.

Chunicoha inara rai, nii que ereein bihane, esenetariheecheta.'

naain laenacuruhalu *profetacurune* rijijieein," naain jetao, nii Antioquihau nena sinacoca asaae- netaojianacaauru rai ereerejeein jetao beebeje Faboro.

<sup>42</sup> Inae, nii que irihane nainain jetaote, nii ita taojiaauruha Joriocurune jaan- sinacoca caje corihaneraauru aina

mituha cue Faboro. Nii jana jetaote, jiniichaain cuhin mituha cunacaauru- Jorioneein nerotonacaauru jetaote:

“Coaiteen leeocha- nebetacanaa janonaa bana uhin, coaiteen nii que ererejiha uuni, canaacaanu rai,” naain jetao, Faboro cotihacure. <sup>43</sup> Inae sinacoca asaae netaojiaauruhane nainaain jetaote, Faboro aina Berenabeen caaijie cuure-arajii Jorioocuru aina- Jorioneein nerotonacaauru- Cana Coaunera ere tonorana jerenacaauru, naaonjoaihunri. Nii jaun jetaote, acaauru rai: “Nijiaonriha, inara belaiha nere aina cuaain, inara cotihaca Cana Coaunerane jaan jianequichenera. Nirijieeincha, jianelanaala, nii jelai sacuuchete, inara coroatajanein, inara belaine Cana Coaunerara,” naain jetao, acaauru suujuatein, acaauru ratirihure.

<sup>44</sup> Nii baiha jetaote, leeocha nebetacanaa janonaa bana coaiteen, netaojiaaure- nii nese sacutaain caje uhin- coroatajaje lanaanla cachaaauru, acaauruhacha beebejei- Cana Curuaanaa Jesocurisito beratenojoi aonacuruhane coina. <sup>45</sup> Nii jaun jetaote, nitohaneein coroatajaje lanaala, turuuruha cachaaauru, Faboro aina Berenabeen aonaana jaun, nechu jataaen, acaauru que necoelai caun, nabana esenetaauruhane coataa, “Nechu aansai casaje cachaaauru,” naain, Faboro necoeje chanuure Jorioocuru. <sup>46</sup> Nii jana jetaote, nii que nelararajiaain, chaque casilanaala:

“Inara Jorioneeichene raite niqui, jaurihaanejeein nere beebejihacaanune coina canaacaanu letoaaain ne Cana Coaunera niquicha. Nete, naitoonjoa batocoichene jaun, rautaaain aohana jerelanaala que jaolecohichera. Nitohaneein, inara rai, ichaonaa sanaacharanejeein nena bihacaanune coinata niqui, canacaanu letoaaain ne- Cana Coaunerara. Nena aohana jereneeiche coarajihacaanune jaun, Jorioniheichuru rene curichaanuhin. <sup>47</sup> Nitohaneein canaacaanu letoaaante:

‘Canuna, inara letoareeuni,

satiin- caa chauratane que nenacaauru- Jorioniheichuru rai nihanatiin,

amuhemujeein been, canu neein nihanune coitucueratein,

acaauru ichoterateein neeichene coinara.’

naain Isaihasi que beratihalune rijijieeinte, ena canaacaanu letoae Cana Curuaanaa- Cana Coaunerara,” naauruha Faboro aina Berenabeen, Jorioocuru raina jaun jetaote, <sup>48</sup> coroaacure- nii Jorioniheichuru.

Nitohaneein coroajeein jetaote, esenetaain, “Caohatoha jataaen cana rai, Cana Coauneraacha beratenojoincha,”

naain esenetaaure, satiin- nii ichaonaa sanaa charanejeein nena raureraanu que nenacaauru- Jorioniheichuru. <sup>49</sup> Nitohaneein jetaote, nii jelai batane sacutaain nenacaauru- jelai cocoaichacuru rai, Cana Curuaanaa- Jesocurisito beebjeeure. <sup>50</sup> Nii jaun jetaote, nii rautaaain coaracurenihana jaun, nii caohachaaain suujua coaraain Cana Coanera bjaaurera- enecuru suujua tacaare- Jorioocuru. Nii cuu nenacaauru- acaauru rai jataaen nelatenacaauru cachaauru- suujuaune maajeein tacaare, satiin ita suujua rijitocoriin, acaauru que nejerateein, jelai caje Berenabeen aina curuataain, Faboro sitaauruhane caina. <sup>51</sup> Nitohaneein, jelai caje sitanajaauruhana jaun jetaote, mituuru neein, nii acaauru safato que nena- utuune faofaohin, riariaain, ratiriin amuure. Nii jetaote ichacure: "Aihana jaun, inae canacaanu, nii ujuaihoneein nihaacaanu. Coaraain aihane nitajeeuche." naauruhane caina. Nitohaneein rai safato que nena- utuune faofaohin riariaain ratiriin jetaote, jelai caje amuhin, Iconio cuure Berenabeen aina Faboro. <sup>52</sup> Ne jetaote, rachoojoenaa cataaun nedaare, nii Antioquiha nenacaauru Jesocurisito ranojoihunru, acaauru suujueniha, niha Cana Coanera Suujuena jaun.

## 14

### *Iconio turuuruha Faboro aina Berenabeenne*

<sup>1</sup> Antioquihau neeuru baiha, jelai caje amuhin jetaote, Iconioo turuure jetao- Faboro aina Berenabeen. Nii Iconioo turuuruhane jana jetaote, nii cuu nena ita taojiaauruna jaan- sinacoca asaae netaojiaaure Jorioocuru. Nii jana jetaote, cuu turuhin, enohin, Jesocurisito beratenojoi beebjeeuruha rauhijiriin, rauhi cuhane cuaaine jaun jetao, esenetaacooaure arajii- Jorioocuru, Jorioniheichuru naaonjoainuri netonaine maajeein, esenetaacooaure arajiiin. <sup>2</sup> Nii jana, esenetaaichuru Jorioocuru jetaote, nii Jorioniheichuru suujuateure jetao, esenetaauruhane coataa, baasoneein Faboro aina Berenabeen que ereein, nechu jataain acaauru cotaiha. <sup>3</sup> Nejetaote, cuu carajaain acaauru aina neeurette- jetocurelu jetao, nii Jesocurisito letonocuru afosotooru. Nitohaneein jetaote, acaauru coroatajanerichaaain Cana Curuaanaane coitucuuruhane jaun jetao, cuu neein Cana Curuaanaa ere beebjerejetocurelu jetao, nii afosotooru. Nii jaun jetaote, acaauru coroatajaniha- Cana Curuaanaa jaun jetao, jataain cacha belaiha Cana Coaneranee beebjeein jetao, cunaitenacaauru rautaaain cacha notaacure, esenetaauruhane caina, Faboro aina- Berenabeen. <sup>4</sup> Ne jetaote, nelerujuacooaure, nii jelai nese cocoaichacuru cachaauru.

Tabaauru jetaote, Jorioocuru cocoaeratiha jetao, jelai teein nelerucure nejesihajeein. Nii jana, afosotooru cocoaera-teurera netonai jetao, jelai teein nelerucure. <sup>5</sup> Nitohanihana jaun jetaote, cocoinanacaainuru aina ita suujuau tacaure jetao Jorioocuru Jorioniheichuru aina, Faboro aina- Berenabeen que nejerateein, ajeri que bodoosinajaain sonajaa-ruhanene coina niqui. <sup>6</sup> Nii jana jetaote, nii coitucuuriin jetao, Iconio caje, Licaoniha batane cuhin, Listrau, Dere-beeu, naajoainunri rohan nenacaauru neseeuu cuhin jetao sorohin, <sup>7</sup> amuemujeein, Jesocurisito beratenojoi- erenaa caohati beebejeeure jetao.

*Listrau, Faboro bodoosihuruha ajeri quene*

<sup>8</sup> Nitohaneein, nii Listrau turuuruhane jana jetaote, ecu ne- leeinjiin bacosaneein nejanohanaa cache. Nii jetaote, chabana nichaauraaain amuhene, nejanoha caje coauneein. <sup>9</sup> Aca jetaote, Cana Coaunera ere beebejiha Faborone jana, rautatiin, cuu lauhequiin aonaje. Nii jana, rautaaain coaraa Faborone jana jetaote, esinaae rauhijiiriin, nerautaane esenetana nainihane coarajiha, suujua cuhanena jaun jetaote, <sup>10</sup> rai tonijiaain:

“Nimichuhin nichaauraute coaracaara,” naa rai Faborone rijieeoritiin jetaote, chujuleneein, jeluhatiin inae ruharujuae nii cache. <sup>11</sup> Nii coaraain jetaote, ita rijitiin jachaleneein jetao, nere cuhane cuaain jetao:

“Chosichurute cache neein cana rai faaurera,” naaure jetao, Licaoniha ere cuhane cuaain.

<sup>12</sup> Niritiin jetaote, nii acaauru ichanohineein nena, acaauru chosineein acaauruhacha tei Seoso jecha naaure jetao, Berenabeen que. Jana Faboro que jetaote, leocha chosi Eremesi jecha, naaure jetao, aca irihane jaun. <sup>13</sup> Nii jana jetaote, turuha uhe jetao, nii nese coenorau nena- acaauru chosi Seoso rai Teenforo rai saseredote. Nii saseredote jetaote, Seoso rai, lenone nihane sohin, mocohin tenajaaocane tochaneein tajiha itolere torocuru, chaen, caohatiin curuteein rucuhenehineein nena- enuha juane, naaonjoaain uhaain turuha uhe jetao, que Faboro aina Berenabeen belaaain coroaecuruhane coina. <sup>14</sup> Nii jana jetaote, nii coaraain, acaauru chosiniha benajaauruhane que, inae nainacorichure jetao, Faboro aina- Berenabeen. Nitohaneein, nainacoriin jetaote, nobiri soaisoaain jetao, acaauru jana cuhin, acaauru rai nujuaaen soaisoaain:

<sup>15</sup> “Chanuna nitohanain ichana jeriquiche, inara rijijieein, cache neein nihacaanu natiin. Nitohaneein neeichene jianequichene coinana turuha uhacaanu, inara rai bihacaanune, nii jiaaneein neeichene coinara. Nii jiaanecuchera.

Coatia chaelai que nelatejeehai niita. Inae nii jiaaneein, Cana Coaunera eesine- itolere dede, cana rai chauratane, cucuana, nii cuhane coneracuru, naaonjoaain coaunera- Cana Coaunera corojeein, nere tonoraain neeuchera. <sup>16</sup>Inoaelute niqiu, niicha jerei ichaa cachane nihanatiin, inauheneecha coarajerejetelu Cana Coaunerara. <sup>17</sup>Coatia, chaelai janonaa bana, caohacha ichaain nihane jianihei- Cana Coaunera- ata. Nete, 'Naaonjoaaine neeunra,' naain chabana neco- haraeratene cacha notajaaincha. Acate, inara corootajane, temulejaain naaonjoaaineeichenera. Inara temule setejiaer- aanuque, elo letoaain naaonjoaera. Setejiaane, caoachaain marohin, caohatiin tihane, jeeojoiriin nihane, raotojoein quihajeein- aina raotojoein neeichene jaan- teraneein ne- naanera," <sup>18</sup> naain acaauru rai beeuruha Faboro aina Berenabeenne sainejeein jetaote, erenaa tonorae lanaala jetao, acaauru chosi rai ichara tocohanein jetao, nii irihuru sohin, mocohin, acaauru corojeein, acaauru belaaain, acaauru ranaa jerecure.

<sup>19</sup> Nii jana jetaote, Antioquiha caje, Iconio caje, naaon- joaain caje uhin, tajiia turuha uure- Jorioocuru. Nitohanein, turuhacoaain jetaote, nii ecu nenacaauru suujua elonaau- ruhana jaun jetaote, ajeri que Faboro bodoosiin jetao soore. Nitohanein sohin jetaote, "Inae jecha atinaauruha," naain jetao, tararaain amaaain, nii nese caje, naain jaoha cuure. <sup>20</sup> Nii jana jetaote, sacuhin, curuhacaain netaojiaain coara- jeeuruha Jesocurisito ranojoihunrunne jana jetao, nimichu- juaaite Faboro. Nitohanein nimichuhin jetaote, coaiten nii neseu cue. Nii cojoanoo jetaote, Berenabeen aina, naain Derebeeu cuure.

<sup>21</sup> Nii Derebeeu turuhin, cuu raotojoein, Cana Coaunera Ere Caohati beebejeeuruhane jaun jetaote, Jesocurisito esenetaeranein nedaaure arajii cachaauru. Nitohanihana jaun jetaote, cuu neeure arajiin Jesocurisito ranojoinunru. Nii Derebeeu, cacha relaauruhane baiha jetaote, Listrau, Iconioo, Antioquihau, naaonjoaainunri coaiten cuure.

<sup>22</sup> Cuuru turuhin jetaote, Jesocurisito esenetaeraauru suujuateure jetao, caohatiin, nirijieein jianelanaala, esenetaain tonoraauruha, caoachaain rauhijiriine coina. Nitohanein jetaote: "Cana Coaunera Cojoanonaa que ichaonaa jerichaane, itolere necairichanaa coaraain, necairichanaa abaantaacanete nera," naain jetao, suujuatenajaunre. <sup>23</sup> Niritiin, suujuatenajaain jetaote, le laurichuru Jesocurisito ranojoinunru nainetiin, acaauru coaraanuurune que, acaauru bichauhenaauru tihacoaure. Nitohanein, tihacoaain jetaote, acaauru corootajaniha Cana Coaunerane coina, suri couu neein cosinacaain,

Cana Coaunera bajaain, nii acaauruhacha esenetai- Cana Curuaanaa bijiu tenajaain ratirinajaure.

*Siria batane que nenea Antioquihau jelaiha cuuruha Faboro aina Berenabeenne*

<sup>24</sup> Pisidia batane choaae situhin cuhin jetaote, Paanfiliau turuure. <sup>25</sup> Inae Paanfiliau batane turuhin jetaote, nii neseeu- Perejeu, Jesocurisito beratenojoi beebejeeure, nii cuu nenacaauru rai. Nii baiha jetaote, Ataliau cuure jetao, Faboro aina Berenabeen. <sup>26</sup> Cajé coauneein jetaote, bote cuhane fauhin cuhin, Antioquihau turuure. Nii neeuruhane jana, acaauru teuruhalu acaauru leeochoaauru, Cana Coaunera icharatenojoi ichacuruhane coinana jaun jetao, turuure, inae nii niicha icharatenojoi jitaauruhana jaun. <sup>27</sup> Nitohaneein cuhin jetaote, inae Antioquihau turuhin jetao, jitariin cuu nenacaauru- Jesocurisito ranojoihunru taojiaain jetao, acaauru rai, acaauru coroatajaniha Cana Curuaanaa- Cana Coaunerana jaun, Jorioniheichuru netonoai- rai suujua coreein, inae esenetaauruhane beebejeeure Faboro aina, Berenabeen. <sup>28</sup> Nitohaneein jetaote, cuu acaauru aina, cara- jaain neeururejeteurelu Faboro aina Berenabeen.

## 15

*Netaojiaauruha Jerosaleeunne*

<sup>1</sup> Nii Antioquihau neeuruha Faboro aina Berenabeenne bana jetaote, Antioquihau cuure nii Jodea nenacaauru tabaauru. Nii Antioquihau turuhin jetaote, nii cuu nenacaauru- Jesocurisito coreniha cana nejeraauru relaaure jetao, aitoaha Moisesane jaan que. Inoaelu aitoaha Moisesane rijitoein:

“Inara jabereco cari jiununuhin saaerateneeichene, inara osa caje inara culucohin, inara ranaa naineriheí Cana Coaunerata,” naaure jetao. <sup>2</sup> Nii jaun jetaote, coreniha acaauru aina, ita cotaicha rijitocure jetao Faboro aina Berenabeen. Nii jaun jetaote, inae Faboro aina Berenabeen que tacaajeein jetao, acaauru aina, nii cuu nenacaauru tabaauru naaonjoaainunri letoaaure jetao- nii cuu nenacaauru- Jesocurisito ranojoihunru- bichauhenaauru, nii que iriha cuuruha nii Jerosaleen nenacaauru- Jesocurisito ranojoinunru bichauhenaauru, afosotooru, naaonjoainuri ainane coina.

<sup>3</sup> Nitohaneein jetaote, letoanajaauruhane jaun, nii Antioquihau- nese caje, Jerosaleeun cuure- Faboro aina Berenabeen, cuu nenacaauru- tabaauru aina. Nitohaneein cuhin jetaote, Fenisia batane, Samaria batane, naaonjoainuri choaae situuruneein jetao, nii cuu nenacaauru- Jesocurisito ranojoihunru rai beeure:

“Naaajoaainte, Jorioniheichuru netonai coroatajane Cana Coaunera, jauriaa acaauruhacha sacui jianeein, nere tonoraauruhane coinara,” naain beeuruhana jaun jetaote, coroaacure jetao- nii cana nejeraauru- Jesocurisito ranojoinunru, acaauru rai nii beeuruhana jaun coitucuhin.

<sup>4</sup> Inae nii Jerosaleeun tururuha- Faboro aina Berenabeen jana jetaote, raotojoein acaauru raare satiin- nii Jesocurisito ranojoinunru, saain nii acaauru bichauhenaauru, saain nii afosotooru, naaonjoaainunri. Nii jana jetaote, satiin itolere ichaain, acaauru coroatajaniha Cana Coaunerane beebejeure, acaauru rai. <sup>5</sup> Nii jaun jetaote, nimichuhin, nichaaurain jetao:

“Nii Jorioniheichuru Jesocurisito esenetaeraauru raite caohachae aitocoaachene, aitohalu Moisesane rijijieein rai jabereco cari saerateeuruhane coinara. Nii choaae tacaainte caohachae, satiin Moisesa aitoonjoalu rijijieein ichaohin, esenetaain tonoraauruha nii Jorioniheichurunera,” naaure, tabaauru fariseeocuru- Jesocurisito ranojoinunru.

<sup>6</sup> Nii niritocuruhana jaun jetaote, satiin netaojiaaure- afosotooru, nii cuu nenacaauru ichauhenaauru, naaonjoainuri, nii que ita rai ereein, coitucuruha jiniiquiine coina. <sup>7</sup> Cuu nii que ereereecuruhane jana jetaote, Fedoro netonoai nimichuhin:

“Curisito coreniha- chasocuru, inarate raotojoein, inae carajaa catohanein canu cotijiaain canu raa Cana Coaunerane coitucuhiche, jianacoo nosa caje mitunaa nainecuruha Jorioniheichuru netonaine coina, Jorioniheichuru rai nere beebejihanune, esenetana nainecuruhane coinara.

<sup>8</sup> Leeinjiin- Cana Coauneraachate, satiin- cacha suujua coitucujuera. Nii Cana Coauneraate, cana que coarateein, Jorioniheichuru rai, rai Suujue tera. Nii jaunte raotojoein acaauru raane coitucuhacache, cana rai, rai Suujue tihalune rijijieein, acaauru rai netonai, rai Suujue tihane jaunra. <sup>9</sup> Coatia neje-launeein, Jorioniheichuru coaraain nihei- Cana Coaunerata. Satiin cana coaraane rijijieeinte, joareein cacha coaraain ne Cana Coaunera. Nii jaunte, esenetaauruha acaauru netonaine jaun, acaauru suujue coulucoe Cana Coaunera, cana rai ichaane rijijieein. Satiinte, itaneein ne cacha.

<sup>10</sup> Aihana jaun, chanute inara raajenihane, Cana Coaunera leratenaa jerequiche, caa nere esenetaeraauru rai caaintati ichaonaa- anajiin tenaa jereeinta. Nihei, canacaanu nihanatiin, nitohanai- ichaonaa abaantana nainera lanaalata. Niheichu cana inoesihuru nihanatiin, nitohanai ichaonaa sacunaa nainesihuruhalune coalanaalata. <sup>11</sup> Nete, rai Calaohi Jesoso coreniha atiin nechuhunirijieein core colane, cana suujue ichoteratein, couluuoca Cana Coaunerane coitucuha-

cachera, jerichanejeein acaauru suujue couluuocane riji-jieeincha,” naa acaauru rai Fedorone jana jetaote, ereeuruhane jianein jetao, <sup>12</sup> curuatoroaain, satiin- curuaequiin aonajeeure. Nitohaneein:

“Naaonjoaainte, canacaanu aina cuaain cojoelanaacojoa ichaain, canacaanu coroatajane Cana Coaunera, Jorioniheichuru aina nihacaanune janara,” naain acaauru rai jetao beebejeeure, Faboro aina Berenabeen. <sup>13</sup> Inae ereeuruhane nainaaauruhane jana jetaote, acaauru rerohariha jetao ere Saantiaao:

“Aonacuche satiin Jesocurisito coreniha canejeraneein nenacaauruna, caa que erete aonaquichera. <sup>14</sup> ‘Naaonjoaainte, jauriaa Jorioniheichuru raenihane baiha, inae enene janijiin niicha ranojoinunru- Jorioniheichuru coroatajane Cana Coaunera, acaauru netonoai nichao que ichaooruha jerihane rijijieeine coinara.’ naainte canacaanu rai be Simoon- Fedoro. <sup>15</sup> Niritiin inoaelu bein, nere bera inoesihuru que laenaeratihalu- Cana Coaunerane tocohaneein:

<sup>16</sup> ‘Rabiri inamacooru caje neferatenaaneein nenacaauruna, coroatajaniha cuureeunni.

Leeinjiin canuhacha jerenohicha ichana jerenacaauruna, coroatajaniha cureeunnicha,

<sup>17</sup> itolere chaauruatane sacutaain canu ere beebejeeuruhane,

cacoitucuhin carohan nichuuntanaa nainecuruha Jorioniheichuru netonaine coinara.

<sup>18</sup> Caritiinte,

inoaelu caje coauneen berateein

Nere laenaeratelu Cana Coaunera, coitucuhacachene coinara.’

naain Quiricha cuhane laenacuruhalu Cana Coaunera ere bera- *profetacurune* rijijieeinte, nii nainaaauruhane coina ahurera.

<sup>19</sup> Aihana jaun, coa Jorioniheichuru rai, caaintati ichaonaa tenaa coacache, inae jauriaa acaauruhacha esenetai jianein, Cana Coaunera ere tonoraauruha natiinta. <sup>20</sup> Raujiaainchate naine, quiricha cuhane laenaain: ‘Jiaonriha, cacha ichanohineein nena chosi rai niicha teuri lenone quichenera. Jiaonriha, sinijieraaquichene nihanatiin, nejelau ene aina naosateechenera. Niheichu, sinijieraquelanaala neeichene nihanatiin, jiaonriha jelai tein raelanaala, ene aina ichaohichenera. Jiaoarihachu, enecuru nihanatiin, sinijieraacane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, jelai tein raelanaala



quicha aina ichaohanera. Niheichu, jiaonriha raro ruluhin sonojoin lenone quiin naaonjoaichenera. Niheichu chaen, ichana niha natiin, jiaonriha quiichenera. <sup>21</sup> Nii coataate neeure, inoaelu caje coauneein, neseuru nainetiin, nebetacanaa janonaa bana nainetiin, nii netaojiaauruna jaan- sinacoca asaae netaojiauuruhane, nii Moisesa aitojoan ereretaain que cana relaeranuurrura.' naain laenaain letoaacachenete caohachare," naain jetao acaauru rai ereereje Saantiaao.

*Jorioniheichuru rai Jerosaleen caje letoanojineein nenaquiricha*

<sup>22</sup> Nii jaun jetaote, saain Jesocurisito ranojoinunru, acaauru bichauhenaauru, afosotooru, naaonjoaain jetao Jesocurisito ranojoinunru nejesinanejeein netiin, coacuhin jetao, acaauru tabaauru janiichure, Antioquihau, Faboro, Berenabeen, naaonjoainunru aina, letoanajaauruhane coina. Nitohaneein tabaauru janiijin jetaote, Jodasi-Barasabaneein acaauruhacha curuaatei, chaen Silasi, naaonjoainunru letoaaure. Acaauru jetaote, nii Jesocurisito ranojoinunru- cana nejeraauru rai, jataain nelatineein neeure. <sup>23</sup> Nitohaneein letoanajaain jetaote, acaauru aina quiricha laenaain jetao letoaaure, naain Antioquihau nenacaauru- Jesocurisito ranojoinunru rai, nii Jerosaleen nenacaauru- afosotooru, acaauru bichauhenaauru, naaonjoainuri.

Nii quiricha- acaauruhacha laenai cuhane jetaote:

“Saainna- afosotonichaanu nena, inara coaucaanura. Saain, Jesocurisito ranojineein nenacaauru- cana nejeraauru bichauhenaauru ainane, inara coacuhin, caa laenaain letoacaanura. Saain Jesocurisito coreniha- canacaanu nejeraneein, Antioquihau, Siriau, Silisiau naaonjoainun- Jorionelanaala- neniquichene raina, caa laenaain letoacaanu, <sup>24</sup> canacaanu letononelanaala, caa Jerosaleen caje cuhin, inara suujua rorohecaa cuuruha, inara jabereco cari molohiche, aitoaha Moisesane rijijieeine que aitiin, leeinjin chacoitucuhi rijijieein, inara tenaa jerecuruhane coitucuhacaanune jaunra. <sup>25</sup> Nii jaunna, satiin coacuhin, coroatajaain canacaanu caje nenacaauru- cachaauru letoacaanu, jataaen canaacha belaihuri- Jesocurisito coreniha- cana nejeraneein nenacaauru- Faboro, Berenabeen naaonjoainunru aina, canacaanu aina nenacaauru coroatajai cachaauru letoacaanu, inara coaraa uuruhane coinara. <sup>26</sup> Nii Berenabeen aina Faboro ichaote, jataaen lunajeriin

ne, Cana Curuaanaa Jesocurisito ere tonoraain, nere beebejeeuruhane corenihara. <sup>27</sup> Nitohaneeina, nii Jodasi, Silasi naaonjoain letoacaanu acaauru ainara. Acaaurute, inara rai ereein, jitariin inara rai niriinanai biha cuurureein, nujuaaen cajera. <sup>28-29</sup> Cana Coaunera-Suujue- suujuatenojoinneeinte, canacaanu rai caohachae, inara rai ichaonaa caaintati tenaa nainenihacaanura. Raujiaainchane inara rai aitiin laenacaanu: ‘Jiaonriha, cacha ichanohineein nena- chosi rai niicha teeuri- lenone quiichenera. Jiaonriha, raro ruluhin sonojoin lenone quiin naaonjoaaichenera. Niheichu chaen, ichana nihanatiin, jiaonriha quiichenera. Jiaonriha, sinijieraaquichene nihanatiin, nejelau ene aina naosateichenera. Niheichu, sinijieraquelanaala neeichene nihanatiin, jiaonriha jelai tein- raelanaala ene aina ichaohichenera. Jiaonrihachu, enecuru nihanatiin, sinijieraaocane nihanatiin, nejelau quicha aina ichaohanera. Niheichu, jiaonriha lanaguelanaala nihane nihanatiin, quicha raelanaala jelai tein aina ichaohanera,’ Nihei nenacaaen nii baihata. Caa aitocooaanune rijijieein, tonoraain ichaohichenete, caohachaaain ichaain, caohachaaain ichaonaa naineriquicheeincha. Raotojoeein neeuchera,”

naain jetaote, nii Antioquihau- acaauruhacha letoaaene-quiricha laenaure, letoaauruhane coina.

<sup>30</sup> Nitohaneein jetaote, inae nainaauruhane jaun jetao, ita rai necoein, Antioquihau cuure nii Faboro, Berenabeen, Jodasi, Silasi naaonjoainuri. Nii Antioquihau turuhin jetaote, nii cuu nenacaauru- Jesocurisito ranojoinunru jitariin taojiaain jetao, nii acaauru rai- afosotooruhacha letoai- quiricha teure jetao, acaauru rai. <sup>31</sup> Nii jaun jetaote, joracaaain eretaain coaraain jetao, coroaecure jetao, nii cana nejeraauru- Jesocurisito ranojoinunru, caohatiin acaauru suujuaatein, acaauru suujua laraajiaain, ichacuruhana jaun. <sup>32</sup> Nii Jodasi aina Silasi netonai jetaote, Cana Coaunera caje erenaa raauruhane, cacha rai beebejeraneein neeure. Nii jaun jetaote, niha acaauru rai rauhina jaun jetao, nii Jesocurisito ranojoinunru rai ereein jetao, acaauru suujua laraajiaain jetao, acaauru suujua nunaaure, acaauru rai ereein acaauru suujuatein. <sup>33</sup> Nitohaneein jetaote, cuu carajaaajoaain neeuruhane baiha jetao, inae acaauru rai necoeure nii Antioquihau nenacaauru- Jesocurisito ranojoinunru. “Raotojoein caunichuchera.” naain jetao, acaauru rai necoeure, <sup>34</sup> jelaiha Jerosaleun cauhacuuruha, nii letoanajaaurera rene, Jodasi aina Silasichurune coina. <sup>35</sup> Nii jana, Berenabeen aina Faboro jetaote, cuu nii Antioquihau nedaure. Nii cuu

arajiin nenacaauru aina jiniinquiin, cuu jetaote, cojoanoone-tojoein Cana Curuaanaa ere beebjeein, cachaauru re-laure.

*Misionero neein amuhane coroata satiha Faborone*

<sup>36</sup> Nii baiha carajaaajoaain neein jetaote:

“Coanete, turunichaaca, satiin nii jauriaa Cana Curuaanaa beratenojoi beebjihacaluna jaaunru- neseeuu sacutaaincha. Chatohaneeincha neeure, nii cuuru nenacaauru- cana nejeraauru- Jesocurisito ranojoihunruta,” naa Faboro, Berenabeen raina jaun jetaote niqui, <sup>37</sup> acaauru aina Joaan naain curuajai- Maroco amanaa jeriha aina- Berenabeenne jana jetaote, <sup>38</sup> rautaaajoaenihana jaun, jerecojoaene jetao Faboro, jauriaanejeein cuuru bana, Paanfiliau ratirinajaain, cauha cuhalune jaun jetao, acaauru jiniichaain- acaauru amihaneon ichajeein sacuenihalune jaun. <sup>39</sup> Nitohaneein jataaen amaane jerelanaala, jataaen coiintiha Faborona jaun jetaote, jelai tein jetao, nii Maroco cotijiae jetao Berenabeen, corianeraaunu que. Nitohaneein cotijiaain jetaote, aina Chifereu cuure jetao, ucuae cunaa bote cuhane fauhin.

<sup>40</sup> Nii jana, Faboro jetaote, jelai tein, corianeraaunu que Silasi cotijiae. Nii jana jetaote, acaauru coroatajaniha Cana Coaunerane coina jetao, acaauru rai Cana Coaunera bajaain letoanajaaunre nii Antioquihau nenacaauru- Jesocurisito ranojoinunru. Nitohaneein jetaote, jelai caje nerocohin cuure jetao, <sup>41</sup> Siriau, Silisiau naaonjoainun. Cuuru turuuru- runa jaaun jetaote, nii cuuru nenacaauru- Cana Curuaanaa Jesocurisito ranojoinuru rai ereein jetao, acaauru suujua- teure, caohachaaain rauhijiriin, jianelanaala Cana Coaunera ere tonoraain, niicha jerenohicha ichacuruhane coina.

## 16

*Faboro aina Silasi corihaniha cuha Timoteeone*

<sup>1</sup> Nitohaneein cuhin jetaote, Derebeeu, chaen Listrau, naaonjoaihun, turuha cue Faboro. Nii jana jetaote, cuu leein- jiin cacha- Jesocurisito esenetaera- Timoteeoneein curuajai- Jorio bene que nebaain- Curieco que inacanaa ruha cue Faboro. Nii neba jetaote, Jesocurisito esenetaera ne. <sup>2</sup> Satiin- Listrau, Iconioo, naaonjoaihun nenacaauru- Jesocurisito coreniha cana nejeraauru jetaote, “Aca jete, jataain, cao- hacha cachaneein ne,” naaure jetao que, coitucuureraauru. <sup>3</sup> Niritiin, rai beeuruhane jaun jetaote, acaauru corihaniha cuha Timoteeone jere Faboro. Nitohaneein acaauru corihan- eraanu que amaauruhane coina jetaote, Timoteo jabereco

cari jihununurateein, saerate Faboro. Nabana rautae-lanaala, que nererojoecaauruha cuu nenacaauru- Jorioocurune coataa jetaote, nitohaneein terate Faboro, inae, satiin cuu nenacaauru- Jorioocuru, Curieconeein niha Timoteeo inacane coitucuuruhane jaun. <sup>4</sup> Nitohaneein, acaauru aina Timoteeo amaain cuhin jetaote, situuruna jaun nenacaauru neseeru naineein, Jorioniheichuru- Jesocurisito esenetaeraauru rai jetao, aitiin berateeuruha afosotooru aina- Jerosaleeun nenacaauru- Jesocurisito ranojoihunru- coaraaurune rijitjoeein beebejeein jetao cujueeure. <sup>5</sup> Nitohanihana jaun jetaote, jelai choae jauhecotojoeiin, esenetajeein cuujueein nejeeonteejeein, sacuure Jesocurisito ranojoihunru.

*Leeinjiin Masedonia cocoaicha que, Faboro notaaca Cana Coaunerane*

<sup>6</sup> Asia batane que nenacaauru rene cuhin beebejeeruhane jereniha Cana Coaunera Suujuene jaun jetaote, rauhijiriin cuure, Forijia batane, Galasia batane, naaonjoaihunri jeloon situhin. <sup>7</sup> Nitohaneein jetaote, rauhijiriin cuhin, Misia batane- nunuhe que turuha cuure. Jelai caje coauneein jetaote, Bitiniau bataneun que turuha cunaa coaacure niqui. Ne jetaote, cuuruhane caohate jetao, Jesoso Suujue. <sup>8</sup> Nii jaun jetaote, nirijieein, rauhijiriin Misia turue lanaala, rauhijiriin situhin, Toroasi cofauhanaun, turuure. <sup>9</sup> Ecu netiin jetaote, janotiin sinihu coetacai rijitjoeein leeinjiin cacha- Masedonia cocoaicha que notaaca Cana Coaunerane jaun jetao, nii Masedonia cocoaicha aina, itaque taca cue Faboro. Que tacaain jetaote, nacatiha nichaauraaain: “Atiin, Masedoniau, turuha uute, cuu canacaanu relaaicha,” nae jetao, Faboro sinihu. <sup>10</sup> Nitohaneein notaaca Cana Coaunerane biha Faborone jaunne, nii rijijieein neruujueein, Masedoniau cuhacaanu. “Jerihane, cuu Jesocurisito que erejeein beebejena coinata, cuu cana cotiharate, Cana Coaunerara,” naaina, cuhacaanu.

*Filipoo turuuruha Faboro aina Silasine*

<sup>11</sup> Nitohaneeina, Toroasi cofauhanaun caje, nesarunaleeinjiin bote cuhane fauhin, cucuana cuhane cuujueein, rauhijiriin Samotoroasi cobenaun, tacanacanejeein cuhacaanu. Nii chojanoo cuhine, turuha cuhacaanu Neapolisihu. <sup>12</sup> Jelai, cajena, atane choaen cuhin, Filipoo turuha cuhacaanu. Nii Filipino te, Masedonia batane que nena- nese tabaaineein- Romanocuru nejesina que cocoaichaquiin nenaane. Cuuna inata janojoein, neeorihacaanu. <sup>13</sup> Nitohaneeinna, cuu, nebetacanaa janonaa bana, naain nese edaa cuhacaanu, nucuhe auhaniha cuhin. Cuu niha netaojiaain- Cana Coaunera bajaauruha-

Jorioocuruna jaan coitucuhacaanuna jaun. Cuuna turuhin, nelauriaain, cuu netaojianacaauru- enecuru rai, Jesocurisito que ereerejeein beebejihacaanu. <sup>14</sup> Nii cuu netaojianacaauru jana nena- leeinjiin- ene curuaate, Lidia ne. Acate Tiatira nese caje unaaneein, cajione caohacha- lanaajihjoaain que- necoretiha nena ne. Nii enete, aihuruha Jorioocurune rijijieein, Cana Coanera coroaera nihana jaun, corootajane Cana Coanera, rautaaain, Faborohacha beebejei aonaane coina. <sup>15</sup> Nii jaunte, saain loreri asae nenacaauru naraaichuru aina jiniiquiin, baotisoanojoneein neeuruhane baiha:

“Esinaaen rauhijiiiriin Cana Curuaanaa esenetaeraneein nihanune esenetaaichene, caloheri asaae, siniha uuchera,” naain canacaanu chunaa Lidiana jaun, cuu nihacaanulu.

<sup>16</sup> Inae, ita taojiaain- Cana Coanera bajaauruhane jaan cuhacaanune janate, leeinjiin ranuna- coseenraneein nena aina ita eruhacaanu. Nii ranunate, saruha Moconajaerane que, enaacha, chaaelai nihane, cojoeluhinae. Nitohaneein, enaacha chaaelai nihane, cojoeluhinaane jaunte, que nihane, chaaelai cojoeluhinaerateein, coreniha arajiin coriqui nihane, raerajeeure, nii sirichaauru. <sup>17</sup> Nii ranunate Faboro aina, cuujihacaanune jana, canacaanu caaijie uhin, ehequiiin:

“Caa cachaaurute, acaihanejei Cana Coauneraneein nena- aitoonjoa beebejeeureranera. Acaaurute, raotojoeein caseteco caje nichoteein jianacoo nena nainiha cachanejaan beeureranera,” nae, ehequiiin- nii ranuna.

<sup>18</sup> Nii jaun jetaote, cojoanoonetojoeiin, niriti nejesina nihane jaun, inauhene aonajenajaaocane baiha, inae tabi-icha, coetae Faboro, araai janohin, niritonajaaocane jaun, coetaain jetaote, nii chaaelai cojoeluhinaa- enaacha- nii ranunane jaan rai:

“Cana Coanera Calaohi- Jesocurisito coreniha, nii ranuna caje mituhin amuura,” naa Faborone rijijieein jetaote, caje mituhin amue, nii ranuna saruhera.

<sup>19</sup> Nii jaun jetaote, inae neniha saruherane jaun, chaaelai cojoeluhinasinihane coaracuruha nii ranuna sirichaaurune jaun inae coreniha coriqui erunaa nainecurenihane jaun jetaote, Faboro aina curuataain Silasi mucuure nii ranuna sirichaauru. Nitohaneein, mucunajaain jetaote, amanajaaunre, cocoinanacaihuri acatiha, naain nese cataaun nena- ita colurujueeuruhana jaun amanajaaunre. <sup>20</sup> Nitohaneein, amanajaain turuhanajaain jetaote, joesiocuru rai, nechu jataain, acaauru cotaiha nohaneein jetao:

“Caa Jorioocurute, satiin canacaanu nese sacutaain, satiin-cachaauru rerohecaaurera. <sup>21</sup> Chaentechu, cana Romanonihacachene ichao corenaa jereein, nejelau ichaonaa que ichaohacachene coina, que cana relaaaurera. Aihana jaun nainihe, nii que ereein, que cacha relaaauruhane jerichaachenera. Nitohanei ichaonaa que ichaonaa nainihacache, cana Romanonihacachene jaunta,” naaure jetao.

<sup>22</sup> Nii jaun jetaote, satiin acaauru aina obajeein jetao, mucunajaauruhane jana, acaauru cajione rocoerateein jetao, enuha que bisichatenajaaure joesiocuru. <sup>23</sup> Nitohaneein, mainajeriin bisichatenajaaauruhane baiha jetaote, caresero cuhane enohanajaaure, caohatiin berainajaan caresero beraichane coina, aitiin. <sup>24</sup> Niritiin suujuateein letoaauruha joesiocuruna jaun jetaote, caresero fuuniha, tenajae, sefo que acaauru tija mucuerateein, nii caresero beraicha.

<sup>25</sup> Nii jana jetaote, cuu dede cataaun, Cana Coaunera bajae-bajajeein, nenatecuruha- Faboro aina Silasine jana jetaote, cuu aonajeeunre, nii cuu nenacaauru leeochoaauru- casetecocuru. <sup>26</sup> Nii jana jetaote, luhecotariin uhe cana lialiaera, mijieeinetiin. Nii jaun jetaote, mijieeineein nerurujuaa nii caresero cuhanaine jana jetao, neyoracaacoaa caresero bacuujuaarune jana, satiin- nii cuu nenacaauru- casetecocuru caje nerojoirojoiri nii acaauru biji ichoracuru- *cadenacuru*. <sup>27</sup> Nii jana jetaote, jitoroa nii caresero beraicha notane jana, nii caresero coaraane jana, satiin jetao, neyoracaacoae nii caresero bacuujuaauru. Nii jaun jetaote, “Inae jecha sorooruha, nii casetecocuru,” naain jetao, rai esefara rocohite, raajenihane nesohin nijiaohanne coina. <sup>28</sup> Nii jana jetaote, rai ehequiin:

“Coaa ichaajenihane, chatoaneein necunaitaara. Satiina cau nihacaanura,” nae jetao, rai Faboro.

<sup>29</sup> Nii jaun jetaote, cono bajaain, soroneein cuhin, enohin jetao, Faboro aina- Silasi acatiha, rijijijianeein coasina caaun jetao, acaauru acatiha neseonrae nii caresero beraicha. <sup>30</sup> Nii baiha jetaote, caresero caje mitanajaain jetao:

“Cachaauru, cha ichareeun, nitajihanune coataa, nichotihanune coinata,” naain bajaane jana jetaote:

<sup>31</sup> “Cana Curuaanaa- Jesocurisito esenetaaute, nichoteei, ii sinijiera, ii calaoichuru, satiin ii loreri asae nenacaauru, naaonjoaihunri ainara,” naain jetao, tonoraare, Faboro aina Silasi. <sup>32</sup> Niritiin tonoraain jetaote, rai Cana Curuaanaa Jesocurisito beratenojoi beebejeure, satiin- nii loreri asae nenacaauru raine maajeein. <sup>33</sup> Nitohaneein, dede catairijihu nihanatiin jetaote, temuha acaauru que- acaauru bisihuruhane jaanne jaun jetao, acaauru rai culeje nii caresero

beraicha. Nii baiha jetaote, inae rai sinijiera aina, saain rai loreri asaae nenacaauru aina jiniiquiin, baotisanojineein neure. <sup>34</sup> Nitohaneein jetaote, rai loreri asaae jetao, Faboro aina curuataain Silasi amaain jetao, coroaatenajae nii caresero beraicha. Nitoaneein jetaote, rai loreri asaae nenacaacuru aina jiniiquiin satiin- sinijiera aina jetao coroa- jeein, raotojoein neure, inae Cana Coaunera esenetaauruhane jaun.

<sup>35</sup> Inae jano jana jetaote, folisihacuru letoaaure jetao, joesiocuru, Faboro aina Silasi joracaeratiha cuuruha, caresero beraicha quene coina. <sup>36</sup> Nii jaun jetao te:

“Caraita, nere letoaaure joesiocuru, inara joracaain, inara jianichaaune coinara. Aihana jaun, inae nainiquiche, raotojoein mituhin, amuhichenera,” naa nii caresero beraicha, Faboro raina jaun jetaote, <sup>37</sup> nii folisihacuru rai jetao:

“Canacaanu Romanonihacaanu natiinte, caohachaaain rautaaain, canacaanu rai bajaaurihei amuneein, satiin coarajihane cachane notaracae canacaanu bisiin, canacaanu enoaerateure caresero cuhanera. Nii natiinte, nechu jataaen asinojoneein, inae canacaanu mitaeratenaa jerecureera. Aihana jaun coatia miturihaacaanuhi, raajenhane uhin, canacaanu mitaa uuruhinera,” nae jetao, Faboro, nii folisihacuru rai.

<sup>38</sup> Nii jaun jetaote, turuhin beeuruha nii folisihacuru, joesiocuru raine jaun jetao, nesooneetooe jetao, Romano neeuruhane beeuruha acaauru raine beeuruha, nii acaauru letonocuru- folisihacuruna jaun. <sup>39</sup> Nii jaun jetaote, raaje cuhin jetao, turuhin, Faboro aina Silasi joracaerateein jetao:

“Atiin, inara rai, baasoneein ichacaanuneque, canacaanu que inara suujua acatein, atiin, caelai caje amuuchera,” naaure jetao, nii joesiocuru, acaauru mitaain. <sup>40</sup> Nitohaneein, caresero caje inae mitanajaaauruhane jaun jetaote, mituhin jetao, Lidia rene, turuha cuure jetao, Faboro aina Silasi, cuu nenacaauru- Jesocurisito coreniha- cana nejeraauru coaraain, acaauru suujuateein, acaauru suujua lararajiaauruhane baiha jetaote, jelai caje amuure.

## 17

*Tesalonecau turuuruha Faboro aina Silasine jana, acaauru que nererojoeccain, acaauru aina baaecuruhane*

<sup>1</sup> Tesalonecau turuuruhanane coina jetaote, Anfipolisi, chaen Apolonia, naaonjoaain neseuru choae situhin, cuhin jetao, turuha cuure Tesalonecau Faboro aina Silasi. Cuu jetaote, ita taojiaauruhana jaan coloheri- sinacoca sirichure cuu nenacaauru Jorioocuru. <sup>2</sup> Nii asaae jetaote, turuha cue Faboro,

nitohaniha rai nichaona jaun. Nitohaneein jetaote, nebetacanaa janonaa bana naineein jetao, nii sinacoca asaae cunajaque Faboro. Cuu jetaote, Jorioocuru aina nihane, ita cotaicha rijitonajaaocure jetao, cuu acaauru rai, Cana Coaunera Quiricha Inoasi ereretaain, nichata semanaai reeintiaain. <sup>3</sup> Cuu nihane jetaote:

“Inae nitohanihane coina, letononeei nihana jaunte, ohin caje ichanaelu Mesihasi, Cana Coaunera Quiricha cuhane aitohane nainaane coinara,” naain jetao, rauhijiriin beebeje Faboro. Niritiin beein jetaote: “Caa inara rai- quicha beebejeite, jeelai Jesosoneein, canaacha cohajei- Mesihazine,” naain jetao, beebeje Faboro.

<sup>4</sup> Nii jaun jetaote, tabaauru Jorioocuru, arajii Curiecocuru- Jorioocuru aina ita taojiaain- Cana Coaunera bajaaurera naaonjoainuri jetaote, esenetaacoaaure, arajii enecuru- caohachanejeein nenacaurune maajeein jetao, esenetaain jetao, Faboro, Silasi, naaonjoainuri aina neeure. <sup>5</sup> Nii jaun jetaote, acaauru que necoelai caaun jetao, acaauru aina obajeein, chachaelanaala, nelanaae caaun bero cuhane amuhemuhenacauru- neechu aansaineein ichaonacauru ariin jetao taojiaaure, nii esenetaichuru Jorioocuru nii nese sacutaain acaauru aina cachaauru rohecaain, cachaauru suujua auhacaeraanu que. Nitohaneein jetaote, arajiin cacha taojiaain jetao, Jason loreri asaae jetao, codoonetoha cuure jetao, Faboro, Silasi, naaonjoaain ariha, runajaauruhane, acaauru mucuhin, tararanajaain, cachaauru rai tenajaauruhane coina jetao, niqii. <sup>6</sup> Ne jetaote, cuu Faboro aina Silasi ruurenihana jaun jetao, Jasoncha aina curuataain- cuu nenacauru- Jesocurisito coreniha cana nejeraacuru- tabaauru amaure, tararanajaain, cocoinanacaihuru rene. Nitohaneein, amanajaain jetaote, cocoinanacaihuru acatiha turuanajaain jetao, ehehequiiin:

“Satiin cana rai chauratane sacutaain, cachaauru rohecaain, cachaauru suujua auhacaaurerate, inae cau netonai turuurera. <sup>7</sup> Nii inatiinte, turuuruhane jana raotjoein ranajae, caa Jasonra. Acaaurute, Romanocuru curuaanaacuru curuaanaa eenferadoro- aitoonjoa ichoae iniin: ‘Nihaje leecha curuaanaacuru- curuaanaa- Jesosoneein curujaiha.’ naaure,” naain jetao, coulurujuenajaure Jorioocuru letonocuru- nechu aansaineein ichaonacauru.

<sup>8</sup> Nii jaun jetaote, niritocuruhane jaun jetao, aonacuruhane que nererojoecaure saain- nii cuu nenacauru cachaauru, nii cocoinanacaihuru, naaonjoaihunri. <sup>9</sup> Ne jetaote, nii cocoinanacaihuru rai coriqui tee jetao, Jason, nii aina nenacauru aina, inae nii nese caje mituhin amuuruha



Faboroorune jana, acaauru rai cainacuruhane coina. Nii aina jetaote, jianenaacure.

*Bereau turuuruha Faboro aina Silasine*

<sup>10</sup> Inae nocohecane jana jetaote, luhecotariin, naain Berea nichae, Faboro aina Silasi letoaaure jetao, Jesocurisito coreniha- cana nejeraauru, ucuuae cuuruha soronacanejeeine coina. Cuu turuhin jetaote, cuu nena- sinacoca asaae turuha cue jetao, Faboro aina Silasi. <sup>11</sup> Nii cuu nenacaauru- Jorioocuru jetaote, naain Tesalonecau nenacaauru- Jorioocuru amuritoheriin jetao, caohachaaain suujua coaraain neeure. Nii jaun jetaote, nii Faborohacha beebejei- Jesocurisito beratenojoi aonajeeure, coroajeein. Nii jaun jetaote, cojoanoonetojoein, Cana Coaunera Quiricha Inoaesi ereretaaure jetao, jiniiquiin, esinaae rauhijiriin aitocuruha Faboro aina Silasine rijiichane coaracuruhane coina. <sup>12</sup> Nii jaun jetaote, esenetaaure arajiin cachaauru- Jorioocuru, arajiin Curiecocuru aina acaauru benecuru- caohacha nejeein nenacaauru, naaonjoainuri. <sup>13</sup> Nejetaote, nitohaneein, Bereau neein, Cana Coaunera aitoonjoa beebejiha Faborone coitucuuriin jetao cuuhin, cachaauru suujua rerohecaa cure jetao coaiteen, nii Tesalonecau nenacaauru- Jorioocuru, acaauru que nejerateeuruha nii Bereau nenacaaurune coina. <sup>14</sup> Nii jaun jetaote, chajaain caeneenejelanaala, nii Bereau, Timoteeo aina Silasi, naaonjoaain ratiriin, luhecotariin jela- laj caje mituhane coina jetao, Faboro letoaaure jetao, cana temura nichae- cuu nenacaauru- Jesocurisito coreniha cana nejeraauru. <sup>15</sup> Nii jaun jetaote, Faboro corianiha cuure jetao, nii aina amuhemuhenacaauru, Atena neseeu tiaain. Nii baiha jetaote, cuu Faboro ratiriin cauha cuure, chajaaajoaain coaraa cuuruha Silasi aina- Timoteeocurune coina aitiin, acaauru letoaa Faborona jaun.

*Atenau niha Faborone*

<sup>16</sup> Nii Atenau neseeu neein, Silasi, Timoteeo, naaonjoaain cohaca nihana jaun jetaote, cuu itolere- araai laurii- cuu nenacaauru ichanohi- ecaanto coaraain jetao, jataain nererojoeae jetao, Faboro. <sup>17</sup> Nii jana jetaote, sinacoca asaae, Jorioocuru aina ita cotaicha rijite jetao, leeochoaauru- ita taojiaain- Cana Coaunera coroaeraauru ainane maa- jeein. Nitohaneein jetaote, cojoanoonetojoein jerichane- tojoein, jeelai que aitiin, ita cotaicha rijitonajaque, nese cataaun netaojianacaauru aina. <sup>18</sup> Chaen, cuu coroata lauriin nenacaauru- itolere coitucueracuru *filosofooru*, le laurii “epi- coreeocuru,” le laurii “estooicocuru,” naaonjoaihunri aina jetaote, Faboro aina, ita cotaain jetao:

“Cha quena ereereje caa nereretanaa inatoroa,” naauruha tabaaurune jana jetao:

“Nejelau ataneu nenacaauru rai chosichuru- bera necaihara,” naaure jetao leeochoaauru, raotojoein, oo caje ichanaa Jesusone beebejiha Faborona jaun. <sup>19</sup> Nitohanein jetaote, niha jataain chatohanein, mijieinein rucuhencaine, ita taojiaain rucuhecuruhana jaun jetao, ichatane ucuuno- ajerineeojoaain- Areopago neein, acaauruhacha curuaateihu jetao, Faboro cotijiaain amaain, cuu turuaain jetao:

“Nii canaacaanu rai- iicha beebejei- ena ecoona- erenaa benaa naineeina, canaacaanu rai, <sup>20</sup> Jataain canacaanuhacha coitucuhi que ereeina jaunna, ‘Naaonjoaain quene aitoonra.’ naain, canaacaanu rai beeine jerichaanu, jataain coitucunaa jerichaanune jaunra,” naaure jetao, <sup>21</sup> satiin Atena co-coaichaneeurhane, chaen nejelau atane caje uhin- cuu nenacaauru naaonjoaihunri, niha chatohanaine, aonaain, que ita rai ereereena rautatooruhana jaun.

<sup>22</sup> Niritiin Faboro caje bajaauruha, nii niha chatohanaine rucuhecuruhane jaan- ichatane ucuuno- Areopago netiine jana jetaote, acaauru cataaun nichaauraaain jetao:

“Satiin inara Atena cocoaichaneeichenete, esinaae rauhi-jiriin, inara chosichuru corojeein ichaohin neeiche. <sup>23</sup> Nii jaunte, ita taojiaaichene jaancuru naineein, coaracaaunne jana, cuuru ne- inara chosichuru rai lenone mocohichene jaancuru rorihuru. Nii rorihuru naineein coaracaaunne janate, ‘Chabana coitucueraai Cana Chosi rai’ naain laenanohine- nii leeinjiin rori. Nii coitucuelanaala, inaraacha corojete, Acaihanejei Nena- Cana Coaunerane. Quena, caa inara rai ereere jeein beebejeeun.

<sup>24</sup> Acate, Cana Coauneranein, itolere, cana rai chaauru- atane Coauneranein, itolere, que nenacaauru Curuaanaanein, itolere, satiin cana janonaa sirichanein ne. Coatia, raajenihane- cacha ichanohinein nena loreri- Teenforo asaecha ichaohi. <sup>25</sup> Nieichu chaen, rai chaelai icharaaunu latihei. Acate, itolere cana rai ichaonaa tein, neraain ichaonaana jaanu tein, itolerene maajeein coaunaelu cana rai.

<sup>26</sup> Chaen jetaotechu, jauriaanejeein leeinjiin cacha coaunaelu, caje arajiin nefoeratein, laurilauri catohanein- cana rai chauratane sacutaain- neenenu que. Nitohanein, cacha coaunaaain jetaote, nenajaauru nenajaauru neeuruha le laurichurune coina, acaauru ichaona jaannu jelai been jetao, cuu ichaooruhane jinatelu Cana Coaunera. <sup>27</sup> Chaen, esenetaain coitucunaa nainihane, coitucuha cachane coinete, nitohanein ichaelu Cana Coaunera. Coatia niqui, cana caje

corihae nihei Cana Coaunera. <sup>28</sup> Cana Coaunera corenihate, ichaohin, nerurujuaain, naaonjoaain ichaohacache. Inara araachuru tabaauru- raotojoein erenaa que ereereena in- aaureraauru jetaote: ‘Cana Coaunera cajete, nefoeratena- neein nihacache,’ naain ererejetocure. <sup>29</sup> Nitohanein, Cana Coaunera caje, nefoeratenaaneein nihacachena jaun, naini- hei nejelauneein, cana suujua cuaain, ‘Aiha coata, ajeri, naaonjoaain caje- cacha ichanohineein nena- chosichuru- ecaantoorune tocohaniha jecha, Cana Coaunera,’ naain cana suujua cuaain nihacachene. <sup>30</sup> Inoaelu jetaote laaen, coitu- cuurenihaluna jaun, niicha rautaa ichaa cachane jana, in- auheneeicha coarajerejetelu jetao, Cana Coaunera. Jana, enenete laaen, inae jinatihana jaan que tihana jaun, coitu- cuhin nere tonoraa, itolere sacutaain cachane coina be- rate. <sup>31</sup> Nitohanein beratihana jaunte, inae Cojoanona- que banihateein- niicha rucujuei que tihane bana, caa chaauru- atane que, satiin- neinichaachene coareein Cana Coaunera, esinaae rauhijiriin rai cachanein neein- caohachaain suu- jua coaraauru coitucuha- nii leeinjiin cacha janijiin niicha ranojoi aina cuaaine coina. Niite raotojoein coitucuha- cache, aca rai, nii ichaeraanu que, oo caje ichatein nihalune jaun,” nae jetao Faboro.

<sup>32</sup> Niritiin, oo caje ichanarichaaain cachane biha Faborone jaun jetaote, oo baiha ichanaain nena nainiha cachane esenetaaurenihana jaun jetao, batocure tabaauru. Jana leeochoaauru jetaote:

“Leeocha banana, ii ere aoharihacaanuhincha,” naaure jetao Faboro rai. <sup>33</sup> Niritocuruha raine jaun jetaote, cuu ratirinajaain amuhe jetao, jelai caje Faboro. <sup>34</sup> Nii jana, tabaauru jetaote, esenetaauruhana jaun, caaijie cuure. Nii jana jetaote, cuu acaauru aina cue leeinjiin cacha- Dionisio. Nii jetaote, nii ita taojiaauruna jaan- Areopago- netao- jianacaauru bichauhenaneein, niha chatohanaine rucuh- eraneein nenaane. Chaen leeinjiin ene- Damarisinein curu- ajai, chaen leeochoaauru naaonjoainuri jetao, Faboro caaijie cuure.

## 18

### *Coriintoo turuha Faborone*

<sup>1</sup> Nii baiha jetaote, nii Atena caje amuhin, Coriintoo cue- Faboro. <sup>2</sup> Cuu jetaote, Ponto batane caje unaa- leeinjiin Jorio- Aquila neein curuajai aina, ita ruure. Aca jetaote, rai comasai- Firisila aina, enanejeein Italia caje turuhin neeure Coriintoo. Nii bana, Romanocuru curuaanaacuru curuaanaa- eenferadoro neein nena- Culaodio, nii Roma

caje, satiin mituuruha Jorioocurune coina, mijieinetai aito- hane jaun jetao, jelai caje mituure. Nii jana jetaote, acaauru rene turuha cue jetao, Faboro. <sup>3</sup> Jerichanejeein, acaauru rijijieein, jacari caje lohanarinu que, acaauru ichanaa que amihaniha acaentonaina jaun- coaranaaca cue Faboro, cuu acaauru aina neein, jiniiquiin acaauru aina amihanihane coina. <sup>4</sup> Cuu jetaote, nebetacanaa cojoanona bana naineein, ita taojiaain- Cana Coaunera bajaauruha Jorioocuruna jaan loreri- sinacoca asae turuha cuhin nejesina ne Faboro. Cuu Jesocurisito beratenojoi beebejeein, Jorioocuru relaain, Jori- oniheichurune maajeein relaane, esenetana nainecuruhane coina.

<sup>5</sup> Inae Masedonia batane caje, rene turuuruha Silasi aina Timoteeocurune jana jetaote, jacari caje lohanarinu nami- haneeo jianeein, Cana Curuaanaacha beratenojoi benaacha que ne Faboro, rauhijiriin, aitoha Cana Coaunera Quiricha Inoaesi cuhanene rijitoojeein: “Jesosote esinaae rauhijiriin canaacha cohajei Mesihasi ne,” naain coitucuruha Joriocu- rune coina. <sup>6</sup> Ne jetaote, rautaaurenihana jaun, aina obajeein cotaain, Faboro necoeje chanuure Jorioocuru. Nii jaun je- taote, rautaaureniha Jorioocuruna jaun, jelai caje mituhane, cojounacanu que jetao, cuu cajione romaromaain jetao,

“Inaraacha jerei ineeinte, caseteconein nitajeriquicheein- cha. Inae canu enene caje coauneein, cha ujuaihoneein nihaaunra. Inarate, nii ujuaihoneein neeiche. Inae aihane amuhanu. Ena caje coauneeine Jorioniheichuru rene aihane cureunnicha,” nae jetao Faboro, Jorioocuru rai.

<sup>7</sup> Nitohaneein, nii ita taojiaauruhana jaan sinacoca caje mituhin jetaote, rohan nena- leejiin cacha- Tisio Josto loreri asae turuha cue Faboro. Nii cacha jetao, Jorionihei. Ne jetaote, esiaaen rauhijiriin laaen Cana Coaunera ere esene- taain corojeein, tonoraera ne. <sup>8</sup> Nitohaneein jetaote, sina- coca curuaanaa- Curisifo, saain rai bereecuru, rai comasai, saain rai loreri asae nenacaauru aina jiniiquiin, Cana Curu- aanaa ere esenetaaure. Nitohaneein jetaote, arajii- Coriinto cocoaichanecuruhane jetao, beebejiha Faborone aonaain es- enetaauruhana jaun, baotisanajoineein neeure.

<sup>9</sup> Le janotiin cuhane jetaote, coetacai rijitoojeein jetao, Faboro siniha cue Cana Curuaanaa. Sinihu, rai ecocohin je- taote: “Coa canu ere beebejeeine jianihara. Jiaohine casiin jianeeinera. <sup>10</sup> Canuna, ii aina nereunicha. Nerihaain, cao- hachananejeein chatohaneein cheterata, cau, caa nese que neeuruha arajiin canu cachaaurune jaunne ichei aitoonra,” nae jetao, Cana Curuaanaa, Faboro sinihu. <sup>11</sup> Nii jaun jetaote, coroata jaanacai cataaun tiaain jetao, nii Coriintoo neein,

jelai cocoaichacuru rai, Cana Coaunera ere beebeje jetao Faboro.

<sup>12</sup> Ne jetaote, Acaiha batane coberenadoro neein niha Calioonne jana jetao, Faboro aina nejerateein jetao, ita taojiaure Jorioocuru. Nitohaneein, ita taojiaain jetaote, Faboro mucuhin amaaure, ita colurujueeuruhana jaan coloheri- *tribonal* asae. <sup>13</sup> Nitohaneein, mucuhin amaain, coberenadoro acatiha turuaain jetaote:

“Caa cachate, cachaauru suujua tacaain, nejelauneei Cana Coaunera corojeein tonoraauruha cachaaurune jereein ne, cana rai cocoaeraa nitohanai ichaonaane saijieein, rautanaa cojoaelanaalara,” naauruhane jana, <sup>14</sup> cuu irihane coina, aonajiha Faborone jana jetaote, cuu Jorioocuru cotaicha ri-jitiin jetao:

“Jataain baaso ichaain, sonajaain jaohin, naaonjoaain que inara ere nihane jana nihanena, nainereein canu rohecaachene latelanaala, jeriquichene rijijieein, inara- Jori-onequichene aonacaun tonajelanaalanera. <sup>15</sup> Nena, inara aohana naineneein, joereein, nitohaniha inara ichaona jaun aitiin, inara raajenihane inaraacha coacui que aitocohichene jaunra. Inara nii rucuhecuche. Coatia canu, nii que enonaa nainihaaun, nitohanai rucuhheranu que nenihanune jaun,” naain jetao, <sup>16</sup> nii ita colurujueeuruhana jaan coloheri- *tribonal* caje, nii Jorioocuru sitae, coberenadoro Calioon.

<sup>17</sup> Nii jaun jetaote, sinacoca curuaanaa- Sosetenesi mucuhin jetao, faohacure, nii ita colurujueeuruhana jaan coloheri- *tribonal* acatiha teein. Ne jetaote: “Coaraain nainauruinaera,” naain jetao cuu coarajenajae coberenadoro-Calioon.

*Antioquihau cauhin, jelai caje nacoauneein misioneroneein cuhane nichata satiha Faborone*

<sup>18</sup> Araai janohin, Coriintoo nihane baiha jetaote, Jesocurisito coreniha- cana nejeraauru rai necoeure jetao, Aquila- chaen rai sinijiera Firisila, naaonjoaain aina jiniiquiin- Faboro, Siria bataneu cuuruhane coina. Nitohaneein cuhin jetaote, cucuana cuhane cuujueein, Sencurea turuhin jetao, caje amuhane coina bote cuhane fau rai, rai couturi loroaecaain joerate jetao Faboro, Cana Coaunera rai naitoonjoanlu nainane cojounacaneein. <sup>19</sup> Nitohaneein cuhin, inae Efesoo turuhin jetaote, cuu Aquila ratiri, rai sinijiera Firisila aina. Nitohaneein cuu ratiriinajaain jetaote, naain nena sinacoca asae turuha cue jetao- Faboro. Cuu turuhin jetaote, enohin cuu nenacaauru- ita taojiaeraauru- Jorioocuru rai ereerejeein jetao, relanajae Faboro. <sup>20</sup> Nii jaun jetaote, cuu carajaain acaauru aina nihane

coina, Faboro chunaaure. Ne jetaote, ainaa jerelanaala, acaauru rai:

<sup>21</sup> “Jeriha, Cana Coaunera nena, caa baiha inara rene turuha ureeunicha,” naain jetao necoe acaauru rai Faboro.

Nitohaneein, necoein jetaote, leinjiin bote cuhane fauhin, Efeso caje amuhe Faboro. <sup>22</sup> Nitohaneein amuhin jetaote, Sesareea turuhin, jelai caje coauneein, atane choae cuhin, Jerosaleeun turuha cue Faboro, cuu nenacaauru Jesocurisito ranojoinunru coaraane coina. Nii baiha jetaote, caje Antioquihau cue jetao- Faboro. <sup>23</sup> Nii baiha carajaaajoaain neein jetaote, coaiteen amuhemuhena nunuhetein, itolere Galasia batane, Firijia batane, naaonjoainuri sacutaain amuhemujuein, Jesocurisito esenetaeraauru suujuatein, acaauru suujua lararajiae jetao Faboro.

### *Efeso Jesocurisito que ereerejiha Aforone*

<sup>24</sup> Nii jana jetaote, amuhemuheca Faborone naniha, Efeso turuhe jetao, leinjiin cacha- Alejaandiria cocoaicha- Aforonein curuajai. Nii jetaote, caohatiin Cana Coaunera Quiricha Inoaesi coitucuhin, raotojoein ereerejeein, cacha relanaa coitucue jetao. <sup>25</sup> Aca jetaote, esinae rauhijiriin, Cana Curuaanaa aitoonjoa coitucuhin, esenetaain, tonoraain nenaane. Nii jaun jetaote, raotojoein ereerejeein coroajeein, rauhi cuhane cuaain, Jesoso aitoonjoa beebejeein, que cacha relae. Ne jetaote, Jesocurisito esenetaeraauru rai, rai Suujue tiha Cana Coaunerane coitucuhelanaala, acaihanejeein Cana Coaunera ere tonoraera neein niha cachane coujounacanu que, cacha baotisaa Joaan neecha coitucuujihia natiin jetao, nitohaneein cacha relae jetao, Aforo. <sup>26</sup> Nitohaneein jetaote, chaque tonaje lanaala, ita taojiaauruha Jorioocuruna jaan loreri- sinacoca asae cacha relae, satiin aonajera urichoo. Nii jana cuu neein aonajihia Aquila, rai sini- jiera Firisila ainane jaun jetao, cotijiaain bujuaihu amaain jetao, rauhijiriin jeriha Cana Coaunerane rijijiein jetao, beeure Aforo rai, jelai amuritoheriin coitucuhane coina. <sup>27</sup> Nii baiha jetaote, Acaiha batane cunaa jeriha- Aforone jaun jetao, quiricha laenaain, aina letoaaure, nii Acaiha nenacaauru- Jesocurisito esenetaeraauru rai, caohachaain belain rauruhane coina. Inae Acaiha turuhin jetaote, Cana Coauneraacha belainojinein- Jesocurisito- esenetaeraauru coroatajane jetao, jataain Aforo. <sup>28</sup> Nitohaneein jetaote, rauhi coaraain, rauhi cuhane cuaain, Jorioocuru rai ere, satiin aonajera urichoo. Nitohaneein, acaauru rai ereerejeein jetaote, acaauru rai Cana Coaunera Quiricha Inoaesi ereretae jetao, Cana Coaunera jerenohineein, letononeein Mesihasi niha Jesoso ne que, aitoha Cana Coaunerane beein. Nii jaun

jetaote, chunijiu cuaain tonaain Aforo batiin tonaain erena nainecurene jetao, Jorioocuru, acaauru que coarateein aito-hana jaun.

## 19

### *Efesoo turuha Faborone*

<sup>1</sup> Coriintoo niha Aforone nainiha jetaote, Efesoo cue Faboro. Efesoo turuhane coina jetaote, ichtatane tabai ucu-uno que iniin, ichtatane tabai choae situhin, turuha cue jetao, Efesoo Faboro. Cuu jetaote, le laurijieein Jesocurisito esentaeraauru aina ita eruure jetao. <sup>2</sup> Nitohaneein, runajaain jetaote, acaauru rai:

“Tana, Jesocurisito esenetaichene nunuheteichene bana, inae Cana Coanera Suujue raain neeicheluneta,” naain acaauru caje bajaa Faborone jana jetaote:

“Aihahacaanuta. Coatia chaabana niritiin, esenetaeraauru rai, rai Suujue tiha Cana Coanerane coitucuhaacaanuta,” naain tonoraauruhane jaun jetaote:

<sup>3</sup> “Chatohanai quetejian, baotisanajoineein neeicheta,” naain bajaa Faborone jana jetaote:

“Cacha baotisaain coujunacatihalu Joanne rijijieinchate, canacaanu cojounacatein neeurelura,” naain tonoraauruhane jaun jetaote:

<sup>4</sup> “Aiha chuhisicha. Nii Joante chuisi rauhijiriin Cana Coanera esenetaeraauru cojounacaatelu baotisaain. Chaentechu nii caajie turuhenei- Jesoso esenetaauruha saain cachaaurune coina beebejelu,” naain beebejiha acaauru rai Faborone jaun jetaote, <sup>5</sup> Cana Curuaanaa Jesocurisito coreniha, inae baotisaain cojounacatenohineein neeure. <sup>6</sup> Chaen, acaauru choae biji merecaain, Cana Coanera bajaa Faborone jana jetaote, acaauru choae fauha uha Cana Coanera Suujuena jaun, itolere nejelau ere que ereein, aitoroatiha Cana Coanerane beebejeure. Nitohaneein jetaote, rai nere cuhanene maajeein Cana Coanera beratenojoi ita rai beebejeure. <sup>7</sup> Itolereneein jetaote, lechoonca coroatajaure, nii cachaauru- Cana Coanera Suujue raeracuru.

<sup>8</sup> Nichata ateein, cuu neein jetaote, netaojiaauruha- Jorioocuruna jaan loreri- sinacoca asaa cuhin, Cana Coanera ere beebeje jetao, Faboro, chaque casilanaala. Cuu jetaote, “Naojoarichaaain nii Cana Coanera Cojoananaa- Ena Turunaa,” naain beebeje, esenetaauruha cachaaurune coina. <sup>9</sup> Ne jetaote, tabaauru, nechu jataain, cotaiha esenetana jerecurenihana jaun, esenetana jerelanaala jetao, satiin aonajeurera urichoo baasoneein, nii Ena Turunaa Ichaonaa

que ereeuruhane jaun jetao, cuu ratirinajaain, cachaauru relaa-leeinjiin cacha-Tiranoneein curuajaine jaan-coloheri asaae, nii Jesocurisito esenetaeraauru-jitariin amaaain jetao, nelonae Faboro. Cuu jetaote, cojoanoonetojoein, Cana Coaunera ere beebeje jetao, Faboro. <sup>10</sup> Nitohaneein jetaote, cuu coroata jaanacaain, cacha relaane jaun jetao, Asia batane sacutaain nenacaauru, Jorioocuru, Jorioniheichurune majeeinchuru, Cana Curuaanaa aitoojoan beebejiha Faborona jaun, aonacure.

<sup>11</sup> Nitohanihana jaun jetaote, Faboro aina cuaain jetao, itolere cojoaelanaacojoai ichaaain jetao, cachaauru notajae-Cana Coaunera. <sup>12</sup> Nitohaneein coroatajaniha Cana Coaunera jaun jetaote, Faboro que, cajione turuaain, amaaain jetao, cunaitenacaauru dadaauruhane jetao, nerautaaure-itolere cunai caaun cunaitenacaauru, itolere coitucuhichuru ichanaaneeinchuru-cunaitenacaauru caje jetaote, nii coitucuhichuru sitae.

<sup>13</sup> Nii jana jetaote, neeurelu-benaneneein nenacaauru-Jorioocuru-amuhemujueein-moconajaera ichanaaneein cunaitenacaauru rauteraniha nenacaauru. Niichuru jetaote, “Jesoso coreniha mituuche,” naain, nii suujua cuhane moconajaera letono sirichaauru caje sitaauruhane coina jetao, coacuhin, ichaa Faborone rijijieein jetao, nii moconajaera ichanohineein coitucuhuhi que, cojoeonacaauru rai jetao: “Faborohacha beebejei- Jesoso coreniha, nii cacha caje mituhin amuura,” naaure jetao.

<sup>14</sup> Leeinjiin Jorio-Esesebaneein curuajai calaohichurucaaunsineein nenacaauru jetaote, nitohanecure. Nii Esesebate, saseredotecuru curuaanaaneein ne. <sup>15</sup> Ne jetaote, coitucuhichuru sitanaa jerecuruha, que cojoeonaa cajene jana jetao:

“Canuna, Jesoso coitucuhin, Faborone maajeein coitucunra. Jana laaen, inara coitucuhaaun. Cha nequiche chaainti inarata,” <sup>16</sup> naa nii cacha suujueniha netiin-nii coitucuhine rijieeoritiin jetaote, acaauru choae tacaatiin jetao, sonajae jetao, acaauru amuritiin nunujuetohana jaun jetao, banejelanaala jataain cunaitanajaain, jitariin acaauru cajionene majeein, caohachanainejeein, soaisoairiin sonajae jetao, nii coitucuhuhi que-cojoeona cacha. Nii jaun jetaote, machorojoa machorojoaain jetao, nii neeurunajaa loreri caje jetao, soroore. <sup>17</sup> Nii nitohanihana jaun jetaote, satiin-nii Efesoo nenacaauru Jorioocuru, Jorioniheichuru, naaonjoaihunri-satiin, nii coitucuhin casihure. Nii jaun jetaote, itolereenein, Cana Coaunera Calaohi niha Cana Curuaanaa-Jesocurisitone coitucuuere jetao, beebejeeuruhane jaun.



18 Nitohaneein jetaote, arajiin cachaauru nii coaraain esenetaeraauru, satiin, aonajeeuruha cachaaurune jana jetao, jauriaa jaiti coitucuelanaala itolere baaso- acaauruhacha ichai beure jetao, jitariin caohachanaineein. 19 Chaen, arajiin benanecuru jetaote, nii nerelaauruhana jaan- acaauru quiricha jitariin uhaain jetao, satiin coarajeeurera notaracae tein, jitariin mocoore. Nii acaauruhacha mocoli- acaauru quiricha core rocooruhane jana jetaote, saquichoonca oaraacani, acaauru coriquineein jataain coreteinein jetao mitue rai core. 20 Nii jaun jetaote, itolere sacutaain, jelai amuritoheriin Cana Curuaanaa Jesocurisito esenetaain jetao neure cachaauru. Nii jaun jetaote, esinaae rauhijiriin nelatein- itolere ichaa- Cana Coaunerane coaracuuruhaneein jaun jetao, leeochoauru cachaauru netonoai esenetaaure.

21 Nii nitohaniane baiha jetaote, coaiten Masedonia, Acaiha, naonjoaihunri, cunaa jere jetao, Faboro, nii caje cuaain, Jerosaleeun cuhin, caje coaunein Romau cunaa jerihane jaun. 22 Nitohaneein cocuhin jetaote, ichoaichania coroatajai- coroatajaneraauru- Timoteeo, Erasto, naonjoaihunri letoae jetao, Masedoniau, Faboro, turuha curichaaaine beeuruha- ichoaichaniha, amaaine caina. Nitohaneein, ichoaichania letoanajaain jetaote, nii Asia batane que nedae jetao, Faboro.

*Faboro aina, rai corihacuru que nejerateein, ita rohecaauruha Efesoo nenacaaurune*

23 Nii bana jetaote, satiin- nii Efesoo nenacaauru jetao, ita que nejerateein, ita rohecaaaure nejesinajeein, nii Ena Turunaa Ichaonaa que, acaauru relaauruhane jana, esenetaauruhane coreniha. 24 Leeinjiin cacha- Demetirioneein curuajai- coata que amihanenaa jetaote, nii leratera ne. Nii Demetirio jetaote, itolere ecaantoneenanain ichae jetao, coata caje, nii acaauru chosineein- acaauruhacha teieneenein nena- Aretemiasa rai Teenforo cojounaca sirijia- coaain. Nii que coretiin que cachaauru rai necoreteein jetaote, nii aina amihanenacaauru coretenajaque jetao, jataain coretiin. 25 Nii Demetirio jetaote, jitariin coroatajaneraauru cotijiae jetao, leeocho cachaauru- acaauru rijijieein- jelai- ecaanto icharaneein- amihanenacaauru cotijiaain jetao, acaauru rai jetao:

“Niha naonjoaain- raotojoein amihanein- raotojoein ichaohacachenajaan- cana amihaneeo core aasaerane jaunna, inara cotijiaaun, nii que erenaa coinara,” nae jetao, nii coata caje- ecaanto ichaera- Demetirio. 26 Niritiin jetaote: “Inara netonaite, raotojoein coitucuhin, inara uricho que, nii aonaain neeichera. Nii Faboro naain acaauruhacha

curuaatei cachate, cajiineein amuhemujueein, cachaauru rai: ‘Nelatihejie caa canaacha ichai- cacha ichanohineein nenea- cana chosicha.’ naain, arajii cachaauru rai bihana jaun jetaote, inae esenetaaure arajiin cachaauru. Coatia leeinjiin cau Efesohacha nitohanai ichaaita. Itolereneein, Asia batane sacutaae lalajeeinte, amuhemujueein, nii chosi esetaauruhane jiaanecuruha cachaaurune coina relanajaane jaun, esenetaacoaaure. <sup>27</sup> Niite laaen, jataain cana rai ulunaain nedaera. Nabana chunei, cana amihaneeon coretena nainenihane, cana amihaneeon niha natiinte, nitajenaa naine. Chaentechu, Asia batane sacutaain, satiin chauratane sacutaain coroaenojineein niha, jataain nelateein nihane corenihane saijieein, caa cana rai chosi- Aretemiasa que jaolecoorureein cachaaurura. Chaen inae turuururahaain rai Teenforo asaae, coroaeca,” nae jetao Demetirio.

<sup>28</sup> Nii jaun jetaote, nii aonaain obajeein nujuae soaisoain jetao:

“Caohachaain laraajiin neeine- Efeso cocoachanichaachene- chosi- Aretemiasara,” naaure jetao, nii coata que- amihanenacaauru.

<sup>29</sup> Nitohaneein jetaote, cajiianein, ita cotaicha rijitiin jetao, nii coroatajai cachaauru- Faboro corianiha cunacaauru- Masedonia caje unacaauru- Caiho, chaen, nii leecha- Arisitaroconein curuajai naajoaihunri curuataain jetao, codoonetiin mucuunajaain jetao, acaauru tararaain, ita taojiaain- chaelai coaracuruhana jaun- *teatro* neein acaauruhacha curuaateihu amanajaain jetao, ita taojiaeraauru acatiha jetao, tenajaa cuure. <sup>30</sup> Nii jaun jetaote, acaauru coreniha enohin, cachaauru rai, iriha cunaa jeriha Faborone jana jetao, caohateeure, ecu nenacaauru- Jesocurisito- esenetaeraauru, nabana, chatohaneein teuruhane coataa. <sup>31</sup> Nii cuu- Asia batane nenacaauru- cocoainacaihuru tabaauru jetaote, Faboro belaichaauru nihana jaun jetaote, “Jiaonriha jera, nenoainera,” naerateeure jetao. <sup>32</sup> Nii nainiha jetaote, nii ita taojiaauruhana jaun jetao, ita rai cajiineein nujuae sooaichure jetao, ita rohecaain. Jana, tabaauru jetaote, “Naaonjoaain coinata ne caa netaojianaara,” naain jetao, coitucuurene. <sup>33</sup> Nii jaun jetaote, acaauru tabaauru jetao, “Naaonjoaana jaunte, nii rucuhecuruhane coina, netaojiaaure,” naain jetao, leeinjiin cacha- Alejaandoro neein curuajai rai, beeure. Nitohaneein rai berateein jetaote, acaauru ajiniha teein jetao, Alejaandoro sarasaracaain amaure Jorioocuru, nii netaojianacaauru acatiha, cuu nichaauraaain, nii ita rohecaeraauru rai, iriha

Jorioonecuruhane corenihane coina. Nii jaun jetaote, turuhin, nii netaojianacaauru rai jetao, biji sarasarari, curuatoroaaain aonajeeuruhane, acaauru rai, satiin urichoo, Jorioocuru coreniha, irihane coina. <sup>34</sup> Nitohaneein, irihane jana jetaote, nere cajeecha nainacorichure, acaentonai, Jorionihane que. Nitohaneein, nainacoriin jetaote:

“Caohachaaain, laraajiin neeine, Efeso cocoaichanihacachene- chosi- Aretemiasara,” naaure jetao, ita rai nujuaen soaajiin, carajaaain, coroata oraain, acaauru chosi niha- Aretemiasa beuruhane jana, esenetaaureniha Jorioocurune coitucuuruhane jaun.

<sup>35</sup> Nii jana, nii neseeu- acaauru rai- chaaelai que- ereeuruhane- laenaain rucuhera- “secretario” jetaote, inae aitoa acaauru raine jaun, sitonaaonjoauruhane jana jetao, acaauru rai:

“Aonacuche, Efeso nese cocoaichacuru. Satiin- itolere cachate, nii jataain- cana rai nelateein nena- cana chosi loreri- Teenforo, chaen, nii dede caje- ajerineein Aretemiasa tochaneein nalunaane maajeein beraihane coina nena- neein niha- caa nese cocoaichanihacachane coitucuurera. <sup>36</sup> Nihei chunei, nii que, ‘Nohanenaa,’ naain iriha chuneine jaanu. Nii jaun, inae nii jiaanecuchera. Coa obaaecache. Coa caohachaaain inara suujua coarihei amuneein, chatohaneein, baaso chana coaucachera. <sup>37</sup> Coatia, chatonaain cana chosi que ereein, niheichu Teenforo asaae asijiauhin naaonjoaauruha caa inaraacha mucuhin inaraacha uhaauri- cachaaurune coaalanaalata. <sup>38</sup> Chatonaain, acaauru colurujueein niha, nii coata que amihanenaa- Demetirio, nii aina amihanenacaauru ainane, taute neeure- nii rucuheraaunu que nenacaauru- joesiocuru, chaen, acaauru curuaanaacuru, naaonjoaihunri. Niha chunicoha, acaauru coulurujuerane, taa, nii rucueraaunu que nenacaauru rene amana- jaauchete, neruujueeuruhine, ecu le cachaauru jabereco coreniha irihane coinara. <sup>39</sup> Niha esinaae rauhijiriin chatohanaine, rucuhena jerequichene, satiin cocoinanacaihuru aina, ita taojiaain, nii rucujueein neuchera. Nii bante, esinaae rauhijiriin, caohachaaain ita taojiana esine- neein rucuhericuicheeincha. <sup>40</sup> Jana, jerichanejeein, sacunaa coauquichenete, cana colurujuenaa nainecurureein, ‘Cana jecha cachaauru suujua rohecache,’ naain. Nii quete, jataain lunaain nihacachera. Charijieein nejeein, coitucuhin, cana caje, ‘Chatoaneein, lerateein, ita rohecaaurereta,’ naain bajaauruha cocoinanacaihurune, tonaainte berichaacheta,” naain jetao:

<sup>41</sup> “Chajaaincha cauhachanichuchera,” nae acaauru rai, nii chaelai que ereeuruha nii neseeu nenacaurune- laenaain-

rucuhera.

## 20

*Masedonia, Curesia, naaonjoaihunri turuha cuha Faborone*

<sup>1</sup> Inae nitohaneein, cajianeein, ita rerohecaauruhane jianecuruhane baiha jetaote, jitariin, nii Jesocurisito coitucurera cotijiaain jetao, suujuatenajae- Faboro. Nitohaneein, suujuatenajaane baiha jetaote, acaauru rai necoein, Masedonia batane cue jetao. <sup>2</sup> Cuu jetaote, neseuru neseuru naineein, cuu nenacaauru- Jesocurisito coreniha cana nejeraauru rene bedaeneein, cuu acaauru suujuateein, jelai amuritoheriin Jesocurisito esenetaauruhane coina, acaauru rai ereereje Faboro. Nitohaneein, acaauru rai ererejein, acaauru suujua lararajihane baiha jetaote, Curesia batane cue jetao Faboro. <sup>3</sup> Nitohaneein, Curesia batane turuhin jetaote, cuu ne nichata ateein. Cuu nichata ateein nihane baiha jetaote, inae Siriau cuhane coina, bote cuhane fau rai, nihane jana jetaote, que necosuujuaauruha Jorioocurune coitucuriin jetao, jelaiha atane ichoae cauha cunaa jere jetao, nacoauneein Masedonia choae situhin cuhin, Faboro. <sup>4</sup> Nii janate, canacaanu corihaniha uure, Berea cocoaicha-Firo calaohi Sofate, chaen Tesaloneca cocoaichacuru- Arisitaroco aina Secoondo, chaen Derebe caje unaa Caiho, chaen Timoteo, chaen Asia batane caje unacaauru- Tiquico aina-Torofimo, naaonjoaihunri. <sup>5</sup> Satiin niichurute, ichoaichania amaain, Toroasihu, canacaanu cohaca cuure, Masedoniau canacaanu ratiriin. <sup>6</sup> Nii janana, canacaanu, Filipino caje nesaruhacaanu, leeinjiin bote cuhane, jorerera colane ichanohi faan quihuruhana jaan cojoanonaa- Fasocoa beseta bitoacaanune baiha. Nitohaneein nesaruhin cuhina, saoqui janone cuhane, turuha cuhacaanu Toroasihu. Cuuna canacaanu cohacuruha, nii ichoaichania cunacaauru- Jesocurisito coreniha- cana nejeraauruna jaun, cuu eruna-jaacaanu. Nii Toroasihuna, caaunsi janoneein nihacaanu.

*Toroasihu nenacaauru rene bedainiha Faborone*

<sup>7</sup> Cuuna, semana nunuhe cojoanonaa bana ita taojiacaanu, cana coreniha ohalune coaacuruha, satiin esenetaeraaurune coina, faan chaluhin quihalu- Jesocurisitone rijijieein, ita aina jiniiquiin faan chaluhin quihacaanune coina. Nitohaneein netaojiacaanune janate, Jesocurisito coreniha cana nejeraauru rai, carajaain itolere que, dede cataaun tiaain, ereereje Faboro, nii cojoanoo, jelai caje amuhane nihane jaun. <sup>8</sup> Nitohaneeina, leeinjiin loreri ucuunetiin nena nichata coarana saatono que, netaojiacaanu. Cuurute, nihacoae arajiin conooru, moconojoineein. <sup>9</sup> Nii janate, jelai caje nemarote, leeinjiin enamanaa- Eoticoneein curuajai.

Acuujua laaojiri bacuujuaniha lauhequiin, cuu carajaain ereereeca Faborone aonajihana jaunte, amuritooriha sinire-nana jaun, nemarote, nii loreri ucuunetiin nena nichata coarana caje. Nii janate, soroneein fauhin, michuuruhane jana, inae ohe nii enamanaa. <sup>10</sup> Nii jaunte, fauhin nii enamanaa que baluunetiin, cuu nenacaauru cana nejeraauru rai:

“Coaa nesoonetohachera. Esinaaete niqui inae ohera. Nete, inae ichanaera,” nae Faboro.

<sup>11</sup> Nii baihate, jelaiha iniin, faan beeunebeeunein chaluhin quihane baiha, coaiten janohajeein ereereecane baihate, inae jelai amue. <sup>12</sup> Nitohaneein, nemaroteein oha nii enamanaane jana, oo caje ichtiha Faboro aina cuaain Cana Coaunerane jaunte, jataain que nelararajiaaure.

*Toroasi cajene Miletoo cuhacaanu.*

<sup>13</sup> Nii janana, ichoaichania bote cuhane cuhin, Asoo, Faboro cohaca cuhacaanu, aca nitohaneein jereein, atane ichoae cuhana jaun. <sup>14</sup> Inae nii Asoo, ita ruhacaanune janate, canacaanu aina, bote cuhane faain cue Faboro, Mitileneu. <sup>15</sup> Jelai caje nesaruhinna, cojoanoo Quihoo situha cuhacaanu. Nii cajena, le janohin turuha cuhacaanu, Saamo cofauhanau. Cajena cojoanoo cuhin, turuhacaanu Miletoo. <sup>16</sup> Asiau jeloon cuhin, carajanaa jerenihana jaunte, Efesoo cunaa jerene Faboro, Jorioonecuruhane beseta-Feentecosetesi bana Jerosaleeun nena jerihana jaun, chajaaajoaain Jerosaleeun turuhane coina.

*Efesoo nenacaauru- Jesocurisito ranojoihunrubichauhenaauru rai ereerejiha Faborone*

<sup>17</sup> Inae Miletoo turuhinte, jelai caje coauneein, Efesoo nenacaauru- Jesocurisito ranojoihunrubichauhenaauru cotiharate Faboro. <sup>18</sup> Inae tururuha nii niicha cotihara-teurine janate, acaauru rai:

“Cau caa- Asia batane que turuhanune caje coauneein, inara ainaacha ichaohanulune jaunte, inara raotojoein canu ichao coitucuhichera. <sup>19</sup> Itolere janonaa banana, joaereein cacha rijijieein inara aina amuhemujueein, Cana Curuaanaacha jerenohi ichajeein nerejetoonlu, casuujua fononoichuru, itolere necairichanaa abaantaain, canasinee rijitocuruha Jorioocurune abaantaain. <sup>20</sup> Nena, atiin jianelanaala, inara caohachanu que, tabaauru que inara loreri asae, tabaauru que nenaanaja cataaun, naaonjoaihun teinchuru, satii aonajeurera urichoo inara rai, Cana Coaunera ere beebejeein, inara relarejetoonlu. <sup>21</sup> Chaen nechu, Jorioocuru rai, Joriooniheichuru, naaonjoaihunri raine maajeein: ‘Coaiten enacoaunein Cana Coaunera ere tonoraain, rai Calaohi- Jesocurisito netonoai esenetaain

tonoraauchera,' narejetoonlura. <sup>22</sup> Enana laen, inae Jerosaleeun cureeuni, ucaae caletoha Cana Coaunera Suujuene jaun. 'Naaonjoarichaauni cuura,' naain coitucuelanaalana, caa cureeunicha. <sup>23</sup> Leeinjiin, neseeru naineein, cuhanunejaauru naineeinchurute, cuu turuhanune, caresero cuhane caenoaain, cacairichaururichaaaine benajaque canu rai, Cana Coaunera Suujue, acaihanejei niichane coitucujueeun. <sup>24</sup> Nena, chaque tonajeneeun. Coatia chaque nelatihei canu rai, canu ichao. Nenacaenajian, cacairichauruhane que nelararajiaain, rachoojoein caletooa Cana Coaunera Calaohi- Jesocurisitona jaan nainana jereeun. Niicha beratei- erenaa caohati beebejeein, jataain cacha belaiha Cana Coaunerane maajeinna beebejereunni.

<sup>25</sup> Esinae rauhijiriine, satiin, cau neniqichene raina, beericheeuni, Cana Coaunera Janonaa beebejihanune aonajera neeichene, coatia inae chunei enacoauneein cacohararahaain. <sup>26</sup> Nii jaunna, enene inara rai aitona jereeun, rauhijiriin, nihei chunei coreniha, cha ujuaihoneein nenerihanuhine jaun, <sup>27</sup> nii chunei que suujuelanaala, satiin cacha urichoo, Cana Coauneraacha jerei beebejihanune jaunna, cha ujuaihoneein nenereunni. <sup>28</sup> Aihana jaun, itolere que nainaan, necohalajiin, caohachaaain necoeraain neein, Cana Coaunera rai ita taojiaeraauru beraihuche, acaauru coreniha, coroso que ohalu rai Calaohine jaun. Niicha ranojoihunru beraichanu quete, inara cotijiaain, nii beraichaanu que inara te Cana Coaunera Suujue. <sup>29</sup> Inae amuhanune baihate, turuha uurureein nechu aansai ataibinaaeneein cacha quicha rijijieein nenacaaurucachaauru, nechu jataaen Jesocurisito ranojoihunru itajeene rijitiin. <sup>30</sup> Chaente, inara tabaauru nihanatiin, nechu jataaen joaereein caje rocohin, relaa cuurureein, nii casaje esenetaain, acaauru aina cuuruha Jesocurisito ranojoihunrune coina. Nitohaneeinte, nechu jataaen casaje que, cacha relaa cuurureein, suujua caje rocohin. <sup>31</sup> Nii jaun, inara aina, nichata ajaanacaain nihanune bana, cojoanoo netojoein, janotiin inetojoeinchuru, inara suujuaterejetocooaunlu, casuujua fononohine coacuhin, que nainaan necohalajiin ichaoche.

<sup>32</sup> Nii jaun, Jesocurisito coreniha- canejeraneein nenacaauru, caa inara rai- quiicha beebejei- naitoonjoa nerete, inara coroatajanereein, jelai amuritoheriin caohachaaain coitucuhin, esenetaichene coina. Cana Coaunerate naine satiin rai cachaneein neeninuru rai aitohane tocohanein, inara coroatajanihane, nitohaneein coitucuhin esenetaeraauru coroatajanihane coina aitohaluna jaun. <sup>33</sup> Coatia, canu caohachanu que, inara

relarejeto haaunlu, nirijieein core colane. Nieichu, chunei cacha cajione bajarejeto haaunlu. <sup>34</sup> Nii jaunte, inara raotojoein, cacoii que amihaneein quicha latei raain, canu aina nenacaauru rai netonaine, acaauruhacha lateine majeein ranune coaraain coitucuhichelu. <sup>35</sup> Nitohaneein, inara netonai, itolere janonaa bana ichaohichene coinana, inara que coarateein, inara rai aitoraaetoonlu, chaelai que jataaen carichainejeein nenacaauru coroatajanequichene coina: ‘Nenacaetejian, tihacane, raacane amuritoheriin raotojoein nenea nainichaa, chaelai que, cairichainejeein nenea rai, cha teein coroatajanichaane.’ naain cana relaalu Cana Coanera Calaohi Jesusone coacuhin ichaquichene coina,” naain jetao, acaauru suujuate Faboro.

<sup>36</sup> Niritoha, acaauru raine baihate, neseeonraain, acaauru aina jiniiquiin Cana Coanera bajae Faboro. <sup>37</sup> Nitohanihane janate, satiin Faboro que baalu baluuneeinchuru, loalocoainchuru coisichure. <sup>38</sup> “Inae caachanijia cacoharari-ichenera,” naain rauhijiriin biha Faborone jaunte, jataain coinadera aure. Nii baihate, corianiha cuure, nii cunaa jerihana jaan- bote nenajaan tiaain.

## 21

### *Jerosaleeun cuha Faborone*

<sup>1</sup> Nitohaneein, cuu Jesocurisito coreniha cana nejeraauru ratiriin, leinjiin bote cuhane fauhin, cucuana cuhane, rauhijiriin cuhinna, Cos cobenau turuha cuhacaanu. Nii cojoanoona, Rodasi cobenau turuhacaanu. Jelai caje coauneeina, turuha cuhacaanu, Patara neseeu. <sup>2</sup> Nii Patarauna, leecha bote Fenisiau cunaa eruhin, cuhane fauhin cuhacaanu. <sup>3</sup> Nitohaneein cuhinna, Chifere cobena coarajeein situujihacaanu. Caje situhinna, cana ajaabiji nichajai que tacaain, nii Chifere ratiriin cuhacaanu, rauhijiriin Siria batane tiaain. Nii Siria auhaniha nenea Tiro cofauhanau, niicha amai rucuhele ratirihane niha nii botena jauna, cuu najauriha cuhacaanu. <sup>4</sup> Cuuna, nii Tiro neseu, Jesocurisito esenetaeraauru eruhin, acaauru aina caaunsi janoneein nihacaanu. Nii janate, acaauru que coitucueratiha Cana Coanera Suujuene jaun, coitucuhin, Jerosaleeun cuha Faborone caohateeure. <sup>5</sup> Nena, caaunsi janoneein, cuu, acaauru aina nihacaanune baiha, inae jelai caje amuhacaanu. Nii janate, satiin, canacaanu corianiha uure, acaauru sinijeraauru, acaauru bereecuru, naaonjoaihunri aina jiniiquiin, naain nii nese bujuau tiaain. Cuuna, carene ichoae, acaauru aina neseeonraain, Cana Coanera bajaacaanu. <sup>6</sup> Nii baihana, acaauru rai necoein,

bote cuhane fauha cuhacaanu. Nii janate, inae acaauru netonai, nenajaun cauha cuure, canacaanu que janoriin.

<sup>7</sup>Tiro caje cuhinna, cucuana cuhaneeincha cuujueein Tolemaidau turuhacaanu. Nii Tolemaidauna turuhin, cuu Jesocurisito coreniha- cana nejeraauru eruhin, acaauru neeuruhane coitucuhin, cuu acaauru aina nihacaanu, le janohin.

<sup>8</sup>Nii cojoanonna, jelai caje nesaruhin cuhin, Sesareea turuha cuhacaanu. Cuu turuhinna, Ferifi rene turuha cuhacaanu. Acate, Jesocurisito coitucuuruha cachaaurune coina amuhemujueein- Jesocurisito bera- “evangelista” neein afosooru coroatajaneraauru caaunsine ne. <sup>9</sup>Nii Ferifite, jenaain cacunuque, ichauhenanihacoaain lanaquelanaala. Nii Ferifi cacunucurute, Cana Coaunera caje erenaa raain- cacha rai beeurera- *profetacuru* ne. <sup>10</sup>Inae janojanoheriin, cuu nihacaanune janate, tajiha turuha uhe Jodea caje, Cana Coaunera caje erenaa raain- cachaauru rai bera- *profeta* Acabo. <sup>11</sup>Acate, canacaanu rene turuhin, Faboro ichora raoriin, canacaanu acatiha, raajenhane biji aina tijia tao- taain nichojoaainte:

“Cana Coaunera Suujuete, carai be. Catohaneein jetaote, Jerosaleeun, caa ichora erora teein, nejelau ataneu nenacaauru bijihu tiha cuurureein Jorioocurura,” <sup>12</sup>naain, bihana jaunna, Jerosaleeun cuha Faborone caohatihacaanu, nii Sesareea nenacaauru aina, niqui. <sup>13</sup>Nete:

“Chanuna chanaain, canu inaderaaquiche. Canuna, itolere que jatoroaain neeun. Coatia, leinjiin canu ichojoaain, camaauruhaneicha coina jatoroaain nihaaun. Canuna naineeun, Cana Curuaanaa Jesoso coreniha ohanu Jerosaleeunne,” naainte, canacaanu tonorae Faboro. <sup>14</sup>Nii jaunne, inae tonaain chunijihu cuaain caohatenaa nainenihacaanune jaun jihaneein:

“Coanete aihane, aina niicha jerei ichamiin- Cana Coaunera,” naain jianichaanu. <sup>15</sup>Nii baihana, inae neruujueein Jerosaleeun cuhacaanu. <sup>16</sup>Nii janate, canacaanu corianiha uure nii Sesareea nenacaauru- Jesocurisito esenetaeraauru tabaauru. Acaaurute, canacaanu amaaure Chifere cocoaicha- Manasoon rene, cuu sinihacaanu ainane coina. Inae carajaa Jesocurisito esenetaera neein niha nii Manasoonne.

### *Saantiaao rene turuha cuha Faborone*

<sup>17</sup>Inae Jerosaleeun turuhacaanune janate, canacaanu coroajeein, canacaanu raature, cuu nenacaauru- Jesocurisito coreniha cana nejeraauru. <sup>18</sup>Nii cojoanoote, canacaanu aina cuhin, Saantiaao rene turuha cuhe Faboro. Nii janate, cuu neeure satiin Jesocurisito esenetaeraauru coaraneein nenacaauru- bichauhenaauru. <sup>19</sup>Nitohaneainte, nii jitariin



acaauru neeuruhane coitucuhane baiha, acaauru rai jitariin nunuhe caje coauneein, itolere que aina cuaain, Jorioniheichuru netonoai coroatajaniha Cana Coaunerane beebeje Faboro. <sup>20</sup> Nii jaunte: “Caohatoha Cana Coaunerara,” naain, Cana Coaunera coroajeein:

“Inae coaraai- ichaso. Arajii oharaancanei cana araachuru Jorioocuru netonoaite, esenetaaure. Satiin acaaurute, jataain cana rai nelatiha Moisesa aitoonjoane que aitiin tonoraacachene jerecure. <sup>21</sup> Nete satiin, nejelau ataneu nenacaauru- Jorioocuru rai jete, Moisesa aitoonjoa tonoraauruhane caohateein, quichaneein nejanoha canaanaine, jabereco macohi cari saera teeuruhane caohateei, chaen cana ichaonijihanai que ichaooruhane janeein ichaooruhane coina jete aitohi, naain ii beeure. <sup>22</sup> Tonareei jana, canacaanu rai, nii queta. Cha icharichaacheta. Satiin cachate, cau turuhine coitucuha cureeincha. Nihei chunei coitucuelanaala nainejerinaainta. <sup>23</sup> Aihana jaun, cana Jorionichaachene ichao rijijieein, ichaohine coitucuuruhane coina, cau caa jenaain canacaanu aina nenacaauru- cana araachuru, Cana Coaunera rai naitoonjoa nainacuruhane coina- nenacaauru <sup>24</sup> amaaui jiniichaaaincha. Chaen iitonoai, Jorioniheichuru jana neein iicha ichai caje nuculucohine coina, ii coturiji loraecaain joerateein, nii ii aina unacaauruhacha teeninuuru- itolere coreteeute, rai coturiji loraecaain joeratenaa nainecurumiincha. Nii banate: ‘Acaentonaite, Moisesa aitoonjoa tonorae. Aihana jaun chujian nohanihate, joenreein nere rocohin coulurujueeure.’ naaurureein- satiin cachaaurura. <sup>25</sup> Nena laen, Jorionihichuru netonai esenetaaurera rai, quiricha cuhane: ‘Coa acaauru chosineein acaauruhacha tei- ecaanto rai- inara araachuru tenojilenone quihachera. Nijiaonrihachu, ichana jabereco quiichenera. Nijiaonrihachu chaen, raro ruluhin sonojoin lenone niha natiin quiichenera. Nijiaonrihachu, nejelau ene- inara sinijierane lanaala nena aina ichaohichera.’ naain laenecaanulura,” naaure nii Saantiaao rene turuhin nenacaauru- Jesocurisito esenetaeraauru coaraauru Jorioocuru- bichauhenaauru, Faboro rai.

*Ita taojiaauruna jaan loreri- Teenforo asae Faboro mucuuruhane*

<sup>26</sup> Nii jaunte, niritiin Faboro letoauruhana jaun, nii jenaain cuu nenacaauru- Jorioocuru amaain, nii cojoanoo Teenforo acatiha jetao, acaauru aina jiniiquiin neculucoore. Nii baiha jetaote, Teenforo asae enohin jetao, “Naaonjoai banana, caa

Cana Coaunera rai canacaanu aitoonjoa nainarichaanuhincha. Jana naaonjoaain banana, Cana Coaunera belaihacaanune jaan-itolere terichaanuhicha,” naain jetao bee Faboro.

<sup>27</sup> Inae caaunsi janone naiinane lalajeeuruhane jana jetaote, Teenforo asae Faboro eruhin, cachaauru suujua rohecaare-Asia batane caje unacaauru-Jorioocuru. Nitohaneein Teenforo asae Faboro eruhin jetaote, <sup>28</sup> rene cuhin ruhanihajaaintiin leeochoauru Israelitaneeuruhane cotijiaain, nujuae soaijiin:

“Canejeraauru, canacaanu coroatajanecuche. Caa cachate, itolere atane sacutaain, cacha relaa amuhemujuera. Itolere Jorionichaache neecha rautai que, nechua jataaen cana cairichaa, itolere Moisesa aitoonjoan tonoraacachene caohateein, chaen, caa ita taojiaain- Cana Coaunera bajanaanaja- Teenforo quene maajeein ereeinchurura. Chaentechu, nejelau cachaauru- Curiecocuru cau enohain, caa ita taojiananaja- Teenforo aansaerate, jataaen colalajinacai niha, Cana Coaunera loreri nihana jaun natiincha,” naaure jetao.

<sup>29</sup> Jauriaa Efeso caje unaa Torofimo aina, nii neseu coaracuruhane jaun jetaotera, “Teenforo asae jecha nii Torofimo enoaelu Faboro,” naain aitocure.

<sup>30</sup> Nii jaun jetaote, cajihaneein suujua cuaaain, satiin obajeein, soroneein ruhaneeure, satiin- nii neseu nenacaauru cachaauru, codoonetiin Faboro mucuuruhane coina. Nitohaneein inae mucuhin jetaote, tarataracaain mitaaure, nii ita taojiaauruhane jaan Teenforo caje. Nitohaneein tarataracaain mitaain jetaote, enonaanaja- acujua fuhitocure jetao, <sup>31</sup> cuu atinanacaneein Faboro sooruhane coina, niqui.

Nii jana jetaote, le lauriin Romanocuru soondaro curuaanaa- comaandaanti rai beeorihure:

“Leinjiin ainate, satiin nejerateure Jerosaleeun nenacaaurura,” naain jetao beeure. <sup>32</sup> Nii jaun jetaote, coitucuuriin luhecotariin nii rijieeoritiin, acaauru curuaanaacuru, acaauru rai soondarooru, naaonjoaain jitariin taojiaain jetao, soroneein cuhin, nii neeuruha cachaaurune jaun turuha cue comaandaanti. Nii acaauru curuaanaacuru, acaauru soondarooru, naaonjoaain aina cuha nii acaauru comaandaantine coariin jetaote, Faboro faohacuruhane jianecure. <sup>33</sup> Nitohaneein cuhin jetaote, Faboro roha turuhin, Faboro mucuhin, coroatajai *cadena* que ichoharate. Nii baiha jetaote, acaauru caje bajae:

“Chatohanaina caa cacha. Chatohanaina ichae,” naain bajae.

<sup>34</sup> Nii jana jetaote, cajihaneein joaereein nujuaen soaichure. Nii jaun jetaote, cajihaneein, ohaohacooruhana

jaun, caohachaaain rautaain aonaain, rucuhenea nainene nii soondarooru curuaanaa- comaandaanti. Nii jaun jetaote, soondarooru que amaerate, acaauru loreri asae Faboro amauruhane coina, acaauru comaandaanti. <sup>35</sup> Inae acaauru lorerihu turuaain jetaote, ininaana jaaun turuaain jetao, baijiaain Faboro inaaure soondarooru, nabana chatohaneain Faboro teuruhane coataa, <sup>36</sup> satiin caijie cuhin nujuae soajiin:

“Coaraain atinaauchera,” naain nujuae soaichuruhana jaun.

### *Satiin cacha notaracae ereerejiha Faborone*

<sup>37</sup> Inae nii soondarooru loreri asae enoanaa jerecuruhane jana jetaote, enoauruhane ajiniha, nii le laurii soondaro curuaanaa- comadanti rai jetao:

“Erenaa nainichauinna, ii aina basiinjiin,” naain bajaa Faborone jana jetaote:

“Curieco ere inaaainajan, <sup>38</sup> Taa ii, jauriaa Egipto cocoaichaneain- cacha areroo jena oharaancai sonajaain jaaoreraauru aina cuhin Romanonichaanune aina nejeratenea neineta,” naain bajae. <sup>39</sup> Nii niritiin bajaane jana jetaote:

“Canuna Jorioonein, jataaen nelateein nenea- Romano nese tabai- Silisia batane que nenea- Taroso cocoaicha neein neeunra. Atiin jereeunna, cachaauru rai erete, aonacurumiincha,” naa Faborone jana, <sup>40</sup> jeriha nii comaandaantine jaun jetaote, nii ininaanajaaun nichaauraaain, cachaauru rai biji sarasarari Faboro, inauhene curuatoroaaain, curuaequiin aonajeeuruhane coina. Nii jaun cuu inauheneeicha, curuatoroaaain aonajeeuruhane jana jetaote, Ebereeo ere cuhane cuaaain:

## 22

1 “Canu ere aonacuche, canejeraauru, ichauhenaauru, naaonjoaihunrina, canu jabereco coreniha caa que ere inara raite, aonaquichera,” <sup>2</sup> naain jetaote, acaauru ere- Ebereeo cuhane cuaaain, acaauru rai aitohane aonaain jetao, curuatoroaaain, inauhene curuaaequiin aonajeeure. Nii jana jetaote, inauhene curuaaequiin, aonajeeuruhane jana jetao:

<sup>3</sup> “Canuhetonoaina- Joriooneun. Silisia batane que nenea Tarosone, nejanohanaanein neeun. Nena laen cau, Jerosaleeun fojianohineein nenaaneun. Jataain itolere coitucuhin nenea- Camalieli relanojoneeina, rauhijiriin cana inoaesihuru jerenohi rijijieein nerelaain neeunlu. Nii jaunna, itolere bana, cacoichana aina cutaain, Cana Coaunera jerenohin ichana jereeun, nii ena

netojoein ichaquichene rijijiein. <sup>4</sup> Canuhetonainachu, caa Ena Nena Ichaonaa Caohacha esenetaain tonoraain-sacuurera rohecaain, atinanacaneeinchuru, tabaauru mucuhin caresero cuhaneuru, teratenajarejetoonu, satiin quichaauru, enecuru, naaonjoaihunru aina curuaaecaain. <sup>5</sup> Satiin batirichuru curuaanaa, satiin Jorionichaachene coaraneein nenacaauru ichauhenaauru, naaonjoaihunrite, rai nota que nii coaraneein neeure. Acaaurute, nii Damasoco nenacaauru cana araaichuru-Jorioocuru rai, quiricha letoaaure, jerecuruha acaauru netonoaine, Jesocurisito esenetaeraauru ariin mucunajaain, cau Jerosaleeun uhanajaanune, caseteco coaracuruhane coina,” naain jetaote:

*Jesocurisito coitucuhin, esenetaane nunuhetihane beebijiha Faborone*

*(Ich 9.1-19; 26.12-18)*

<sup>6</sup> “Nete mucunajaanune coina, Jorionichaachene coaraneei nenacaauru ichauhenaauru caje erenaa rocohin, aina Damasoco cuhanune jana, enoto chujutaaain turuhelalajeein, bero cuhane cuujihanune jana, luhantiin, dede caje conotiin, luhecotariin canu que jilenete. <sup>7</sup> Nii jaunne, coasiha nuluna caaun, nii canu cunaja caje nalatoon atane ichoae. Nii janate, canu curuaa que, cacurujuatein: ‘Saoro, Saoro, channuna, jataain, caniha nejerateein cacairichaaeriin, carerojoeaaita.’ <sup>8</sup> naain tonihana janane:

‘Chaneein inaate Curuaanaa.’ naain, bajaanune janate:

‘Canuna, nii iicha cairichaaerii Nasarete cocoaicha- Jesosoneeunra.’ naain catoonrae nii erenaa. <sup>9</sup> Nii canu corihaniha cunacaauru netonoaite, nii cono coaraain, acaauru netonai nesoonetoore. Nete laaen, nii carai irihane aonacurene. <sup>10</sup> Nii jaunna:

‘Chatohanaina ichareeunte, Curuaanaa,’ naain bajaanune janate:

‘Chajaain nimichuhin, nii cuujueeine jaaun Damasoco neseu cunihute, cuu, ichei, iicha chanenenu beeuruhinera.’ naain, catoonrae Cana Curuaanaa.

<sup>11</sup> Nii jana, maosaneein caratiriha nii conone jaunte, canu biji que canu mucuhin, canu taraetaraecaain, camaaure nii canu corihaneraauru, Damasoco neseu tiaaincha.

<sup>12</sup> Nii janate, cuu nelu, leinjiin cacha-Ananihasineein curujajaan, nii Damasoco neseu. Nii jetaote, jeriha Cana Coaunerane rijijiein, rauhijiriin caohacha ichaain, Moisesaacha laenailu tonoraeraneein ne. ‘Acate, caohacha cachanein nera.’ naauruha que, satiin Damasocoo nenacaauru- Jorioocuru. <sup>13</sup> Nii Ananihasite, turuhin cacoharaain: ‘Ichaso Saoro, coaiten, enacoauneein conohine inotara.’ naane

rijieeoritiinte, inae enacoauneein conoha canotane jaun, nii Ananihasi coaraaun.

<sup>14</sup> Nii baihate, carai:

‘Cana inoaesihuru Coaunera- Cana Coaunerate, ii coaraain, ichtotijiae, niicha jerenohi coitucuhin, esinae rauhijiriin caoacha nejesina icharaneein nenea coitucuhin, chaen raaje nujuae caje ichei irihane aonaaine coinara. <sup>15</sup> Iite, ichaajenihane, nii iicha coarai coaraneein, aohanraneein, beebjiha curiquiin, itolereneein chauratane que- nenacaauru sacutaaincha. <sup>16</sup> Chajaain, caeneeneje lanaala cuhin, Cana Curuaanaa Jesocurisito bajaain nebaotisaerateute, ii colucomiincha.’ naain caletoae nii Ananihasicha,” naain jetaote:

*“Naaonjoaainte, Joriooniheichuru rene caletoae Cana Curuaanaara,” naain beebjiha Faborone*

<sup>17</sup> “Inae Damasoco caje cauhin, Jerosaleeun turuhin, cuu nenea Teenforo asae enohin, Cana Coaunera bajaanune janate, carai ecocoe Cana Curuaanaara. <sup>18</sup> Carai ecocohinte: ‘Chajaain luhecotariin caa Jerosaleen caje amuura. Cauhacha neein canu ere beebjeeine, coatia chesenetaaururihaainta.’ naane janane:

<sup>19</sup> ‘Canu Curuaanaa, acaaurute, raotojoein, satiin sinacocacuru naineein ii ere tonoraeraauru mucuhinchuru raanu, caseteconeuuruhane coinane coitucuurera. Chaentechu, tabaauru faoharatihanune coitucuuere raotojoeincha. <sup>20</sup> Chaen, ii ere beebjera Eseteba sohin jaoruhane coina, mucuhin, ajeri que bodoosihuruhane janane, cuu neeunlu canuhetonoai, sohin jaoruhane coarajihanune coinara. Chaennachu, canu, nii soeraauru cachaauru- cajione beraichaneein neeunlura.’ naanune saijieeinte:

<sup>21</sup> ‘Chajaain cuhachanihura. Canune eletohaaun, coriajai ataneeuru nenacaauru rai, canu ere beebjiha kuhine coinara.’ naain caletoae, Cana Curuaanaara,” naain jetaote, acaauru rai, beebje Faboro.

*Comaandaanti bijihu niha Faborone*

<sup>22</sup> Nii jaun jetaote, inauhene aonajeeonrihuruhane baiha jetao, nujuae soaijiin jetao:

“Ichaonaa nainiheine caa cachata. Letonoaneein, caa cana rai chauratane caje betacainera,” naauruha <sup>23</sup> nujuae soaijiin, cajionene maajeein romasiinchuru, cajihanein ucuun cuaainchuru, butuuneneenanain riajaainna jaun jetaote, <sup>24</sup> soondarooru loreri asae, Faboro joerateein jetao, bisichate niqui soondarooru curuaanaa- comaandaanti, “Naaonjoain ichacaanne corenihate, caniha obajeein caque nejerateeurera,” naain biha Faborone coina niqui.

<sup>25</sup> Nejetaote, inae bisihuruhane coina, ichohacuruhane jana jetao:

“Roma rai sioraranooru nihanatiin, bisichene coina nootejian- cocoainanojoneein neeicheta,” naain bajaain jetaote: “Nii ichoae tacaain, niheichu, ‘Naaonjoaain corenihate, ai caa cachara.’ naain coitucueralanaala, Roma rai siorarano casetecana nainiheicheta,” naa nii comaandaanti que jaurii- cafitaan rai Faborone jaun jetaote, <sup>26</sup> nii comaandaanti coinetein jetao:

“Coaraain aihu, taa cache ainara, Roma rai siorarano jetaora,” naain jetao be nii cafitaan.

<sup>27</sup> Nii jaun jetaote, Faboro rohan nichuuntaain jetao:

“Esinae chachu rauhijiriin, Roma rai siorarano neeinta,” naain bajaa nii comaandaantine jana jetaote:

“Esinae rauhijiriine aca neeunra,” naa Faborone jaun jetaote:

<sup>28</sup> “Caraita, banejelanaala core coriqui que, Roma rai siorarano nihanune coinara,” naa nii comaandaantine jana jetaote:

“Canu nejanoha caje coauneeina aca neein neeunra,” naain jetao, tonorae Faboro.

<sup>29</sup> Niritoha Faborone aonain jetaote, caje amuhacoaaure nii bisinaa jereraauru. Nii comaandaanti netonoain jetaote, coasiha nesoonete, Roma rai siorarano nihane saijieein, *cadena* que Faboro ichoaratihana jaun.

### *Jorioocuru curuaanaacuru, acatiha niha Faborone*

<sup>30</sup> Nii cojoanoon jetaote, caohachaain rauhijiriin, Faboro colurujueeruhane jaan leranu coitucuha rauhijiriine coina jetao, jauriaanejeein Faboro caje *cadena* batuhichatein, jitariin Jorioocuru curuaanaacuru, batirichuru curuaanaacuru, naaonjoaihunri taojiaerate comaandaanti. Nitohanein, taojianaaratein jetaote, nii baiha Faboro raeratein, acaauru acatiha te jetao, cuu irihane aonajeeuruhane coina.

## 23

<sup>1</sup> Nii jaun jetaote, nii Jorioocuru curuaanaacuru netaojiaain nenacaauru coarajeein jetao:

“Chasocuru, enanetojoeine ichaaojoein raotojoein casuujua coaraain neeun, Cana Coaunera notaracaa,” nae jetao Faboro.

<sup>2</sup> Nii jaun jetaote, cuu niha batirichuru curuaanaacuru curuaanaa- Ananihasineein curuajaine jaun jetao, nii Faboro roha nenacaauru letoae jetao, nii Faboro ujuae faohitocuruhane coina. <sup>3</sup> Nii jaun jetaote, nii batirichuru curuaanaacuru curuaanaa rai:

“Cana Coaunera netonaite, ishoeratereein, coitucuha nocoetohi inatiin, caohachaaain ishujua coariheei rijitohina jaunra. Esinae rauhijiriin baaso ichacaaune coaraaine, aitoa Cana Quiricha cuhanene tocohaneein ichaaine coinatē, nii ii nelauriana jaun, nelauriaai. Coatia aitoa Cana Quiricha cuhanene reroitiin, casoerateine coina niheita,” naain jetao tonorae Faboro.

<sup>4</sup> Nii jaun jetaote,

“Niritiina, Cana Coaunera rai batirichuru curuaanaacuru curuaanaa nocoeje chanureeite,” naaure jetao, nii cuu- nacaauru.

<sup>5</sup> Nii jaun jetaote,

“Batirichuru curuaanaa nihane coitucuhaaunnaate, chasocuru,” naain tonoranajaain jetao, “Cana Coaunera Quiricha inoasesi cuhane: ‘Coaa inara curuaanaa que, tonaain baasoneein iriachera.’ naa natiinna, coitucuenihanune jaun aitoonra,” nae jetao Faboro.

<sup>6</sup> Nii baiha jetaote, “Caa batirichuru curuaanaacuru tabaaurute, sadosseone. Jana tabaaurute, fariseeocurune,” naain, nainaaain coaranajaain jetaote:

“Chasocuru, canuhetonaina fariseeo neeun, fariseeo caje nefoeratenaaneein nena nichaaunna jaun. Canuhetonai, ichanana nainiha onacaaurune esenetaanune corenihate, cacoluruhecure,” nae jetao tonijiaain Faboro.

<sup>7</sup> Niritoha Faborona jaun jetaote, nejesinajeein, ita cotaicha rijitocure nii fariseeocuru aina sadosseeocuru. Niritiin jetaote, ita cotaicha rijitiin jetao, ita caje nelerucure, <sup>8</sup> “Ohane baiha jera, caje ichanaai nihei cacha. Chaen jera nihei Cana Coaunera letono- anjeraauru. Chaen jera nihei cacha suujue, cacha corii,” naauruha sadosseeocurune jaun. Jana, fariseeocurute laaen, niha nitohanaine esenetaaure, itolere- neein. <sup>9</sup> Nitohaneein, cuu ita rai nujuae soaichuruha, satiin cuu nenacaauruna jaun jetaote, fariseeocuru laurineeuruha nii cuu nenacaauru cacha relaaurerana jaun jetao, Faboro cocoaeratiha nimichuhin jetao:

“Coatia chatohaneei baaso ichaain nihei caa cachata. Jerihanete, leeinjiin suujue, rai erecaihara. Ainihane, Cana Coaunera letono leeinjiin anjerate rai erecaihara,” naaure jetao, nii Cana Coaunera Quiricha Inoasesi que cacha relaaurerana- fariseeocuru.

<sup>10</sup> Nii jaun jetaote, jelai choae jauhecotojoeriin, nejesinajeein ita suujua rohecaain, ita que nejerateuruhana jaun jetao, nabana cunaitaain, Faboro teeuruhane coataa jetao nii coasiha rai soondarooru tabaauru cotijiaain jetao, nacoauneein jelaiha soondarooru loreri asaae jetao Faboro joerate, nii soondarooru curuaanaa- comaandaanti.

<sup>11</sup> Nii cojoanotiin, Faboro rai ecocohin jetaote:

“Chaque casilanaala, laraajiin, chaque tonajelanaala, rao-tojoein neura. Cau Jerosaleeun, quere beebejeeine rijito-joein, jerichanetojoein, Romau cuhin, Romau nenacaauru rai netonai, quere beebejeeinete nera,” nae jetao Faboro rai, Cana Curuaanaa.

*Ita suujuau tacaain, Faboro sohin jaonaa jerecuruhane*

<sup>12</sup> Nii cojoanoon jetaote, janone ita suujuau tacaure Jorioocuru tabaauru, Faboro sohin jaoruhane coina. Nitohaneein, ita suujuau tacaain jetaote: “Faboro sohin jaonaa-reein tiaain, coatia lenoneein, acau coriahacacheein. Jana, nii saijieein, Faboro sohin joelanaala lenoneein, acau cohin, naaonjoaacachene, cana carichaaine Cana Coaunerara,” naaure jetao, <sup>13</sup> jenachoonca amuritiin Jorioocuru, Faboro sohin jaoruhane coina, ita suujuau tacaain. <sup>14</sup> Nitohaneein, coaacuruhana jaun jetaote, batirichuru curuaanaacuru, Jorioocuru coaraauru bichauhenaauru, naaonjoaihunri rene turuha cuure jetao. Turuhin jetaote:

“Faboro sohin jaohacaanune reein tiaain, coatia lenoneein, acau coriaacaanuhinta. Jana, nii saijieein, Faboro sohin joelanaala, lenoneein acau cohin, naaonjoacaanune, canacaanu carichaaine Cana Coaunerara,” naaure jetao, acaauru rai. <sup>15</sup> Niritiin jetaote: “Aihana jaun, inara le lauriin neiniquichene, inara leochaauru aina, nii coaraneein neiniquichene, esine rijitojoein eresi: ‘Caohachaain rai rucuhenacai bajaacaanu cajene coina.’ naain esine rijitojoein, comaandaanti caje bajaain, cotihacuchete, inara rene jaoha uuruhane jana cojoaain, turuasichuruhane ajiniha, sohin jaohacaanura,” naaure jetao.

<sup>16</sup> Nii jana jetaote, beorihuruhana jaun jetao, coitucuriin, nii Faboro rai biha cue jetao, soondarooru loreri asae turuhin, rai calaohi riji- rai bai calaohi. <sup>17</sup> Niritiin bihane jaun jetaote, leinjiin cafitaan cotijiaain jetao,

“Carai caa enamanaa amaaui comaandaanti renete, leinjiin erenaa beeinera,” nae jetao Faboro.

<sup>18</sup> Nii jaun jetaote, nii enamanaa amaain jetao, comaandaanti acatiha turuhaain jetao,

“Nii caseteconein nenea Faborote, carai ereein caletoe, ii rene caa enamanaa turuanune, ichei leinjiin erenaa bihane coinara,” naain jetao, biha nii cafitaan, nii comaandaanti raine jana jetao, <sup>19</sup> biji que, nii enamanaa mucuuriin taratarajiaain, jelai amaain jetao:

“Tonai erenaate carai benaa jereeita,” naain bajaane jana jetaote:



<sup>20</sup> “Jorioocurute, ita suujuau tacaare, ii caje bajaauruha eresine, nii coaraneein nenacaauru rene Faboro letoaaine coina jetao. Esine rijitjoein: ‘Caje rai rucuhencai bajaacaanu raotjoeine coinara.’ naaurureein jetao. <sup>21</sup> Nijiaonriha, nii esenetaain neeina. Jena choonca amuritiin acaauru cachaaurute, cohacure, bujuaihu netiin, letonoa jatoroain, Faboro sohin jaoruhane coinara. ‘Faboro sohin jaonaa reein tiaain, coatia lenoneein, acau coriaacacheein. Jana, nii saijieein, Faboro sohin joaelanaala, lenoneein acau cohin, naaonjoaacachene, cana carichaine Cana Coaunerara.’ naauruha jetao. Leinjiin, ii letoaineeicha jetaote, cohajeeure,” naain biha nii enamanaane jana jetaote:

<sup>22</sup> “Nijiaonriha, caa carai beeine rijitiin, chunei cacha rai beeina,” naain jetao, nii enamanaa suujuatein letoae nii comaandaanti, cauha cuhane coina.

*Coberenadoro Ferisi acatiha neruujue coina, Faboro letoaauruhane*

<sup>23</sup> Nii jaun jetaote, coroatajai rai caftaanuru cotijiaain, letoanajae jetao, coroata fashai soondarooru taojiaauruhane, tijaacha que cuuruhane coina. Jana, caaunsi chooncanein cabario choae cuhenenuuru, naaonjoaain neruujueuru coina. Jana coroata fashai rejoin aina cuhenenuuru, naaonjoaain jetao neruujueure, Sesareea curu coina. Nitohanein jetaote, netoona rijihu amuritoheriin, Sesareea cuuruhane coina jetao, niritiin erenaa te nii comaandaanti. <sup>24</sup> Chaen jetaotechu, nichoae cuha Faborone coina, leijiin cabario teratein jetao: “Nijiaonriha chatoaneein cunaitaauruhane nainatejeein amaaichenera. Niri-jieein raotjoein raurono turuanichuchera,” naain jetao, caohatiin beraichatein, Coberenadoro Ferisi rene, Faboro turuaerate jetao nii comaandaanti. <sup>25</sup> Chaen jetaotechu, acaauru aina quiricha laenaain letoae, Coberenadoro rai, nii comaandaanti. Cuu jetaote, nii niicha letoai quiricha cuhane jetao:

<sup>26</sup> “Jataaen caohati Coberenadoro Ferisi neeine raina, ii coacuhin caa laenaain, ichei letoaan. Canuna Caladio Lisihasi neeun. <sup>27</sup> Jorioocurute, caa leinjiin cacha mucuhin, sohin jaonaa coaacure. Nena, Roma rai siorarano nihane coitucuuriin, canu rai soondarooru taojiaain, acaauru aina cuhin ichoterateeun.

<sup>28</sup> Nitohaneinna, ‘Cha jaun cha. Cha corenihacha caa colurujueureta.’ naain caraajenhane coitucuhane coina, acaauru coaraauru bichauhenaauru- rene amaanlu.

<sup>29</sup> Nitohaneein, amaain bajaanune janate, acauru quiricha cuhane aitothane rijijieein que aitiin, joareein colurujueure. Niha chatohaneein, sohin jaoruhana jaan lera colane techu, sohin jaonaa jerecure niqui. Nieichu, nii caresero cuhane nihane jaanu lera nihanatiin, nete, nii choae tacaain, sohin jaonaa jerecure.

<sup>30</sup> Nitohaneein, sohin jaonaa coacuruha Jorioocurune coitucuurina, caa ii rene letohaun. Chaennachu, raotojoein, ii acatiha, caohachajeein colurujueeruhana jaan lera been, rucuhecuruha caa colurujueererane caina aitoonra,”

naain jetaote, quiricha laenaain letoae Coberenadoro Ferisi rai, nii comaandaanti.

<sup>31</sup> Nitohaneein, erenaa teein letohanajaa comaandaantine jaun jetaote, Faboro amaaure jetao, janotiin nii soondarooru, Antipatriau tiaain, nii letoanajaane rijijieein. <sup>32</sup> Nii cojoano jetaote, jelaiha soondarooru loreri asae cauha cuure nii tija que cunacaauru soondarooru. Jana cabario choae cunacaauru jetaote, Sesareea tiaain cuure jetao, Faboro jini-ichaaain. <sup>33</sup> Nitohaneein, cuhin jetaote, Sesareea turuhin jetao, nii Coberenadoro rai, nii comaandaanti letonquiricha teein jetao, Faboro netonai teure jetao. <sup>34</sup> Nii jaun jetaote, quiricha jasaracaain ereretaain coaraane baiha jetao:

“Chaa cajete, unaa neeita,” naain Faboro caje bajaa nii coberenadorone jana jetaote:

“Silisia batane cajena unaa neeunra,” naain jetao rai be Faboro. Niritiin rai biha Faborona jaun jetaote:

<sup>35</sup> “Inae turuuruha nii icholurueraaurunena, ii ere aohareeunicha,” nae jetao Faboro rai, nii coberenadoro.

Nii baiha jetaote, nii caohatiin ajeri caje- Erodesi charatenohinloreri asae Faboro fuerate, caohatiin beraichateein.

## 24

### *Coberenadoro Ferisi acatiha ereejija Faborone*

<sup>1</sup> Saoqui janohi baiha neoriin jetaote, turuha uhe nii batirichuru curuaanaacuru curuaanaa- Ananihasi, acauru bichauhenaauru tabaauru, ita coulurujueerera coroatajanera Teorotorosi neei curuajai *abogado*, naaonjoainuri uhaain turuha uhe. Acaauru jetaote, nii coberenadoro acatiha nichaauraaure, Faboro coulurujueeruhane caina. <sup>2</sup> Inae nitohaneein, Faboro mitaain, turuaauruhana jaun jetaote, nii coberenadoro rai ere jetao nii *abogado* Teorotorosi:

“Jataaen narihara, curuaanaa Coberenadoro. Ii coreni-hate, raotojoein nihacache. Narihara, itolere coitucuhin, caohachaaain cana atane rucuheca, nitohaneein ichaaaine coreniha. <sup>3</sup> Itolere sacutaain, nitohaneein ichaaaine coitucuhacaanu, inetono janonaa bana. Jataaente, caohati coberenadoro neein neeicha, Ferisi. Jataaena, ii coroaajihacaanu banejelanaalara,” naain irihane baiha jetaote, inae Faboro coulurujuenaa nunuhetein jetao:

<sup>4</sup> “Nabana, ii rai caeneenejihacaanune coataa, atiin canacaanu aonaauna irihacaanu. <sup>5</sup> Caa cachate, itolere baaso uhai nejesina ne. Acate itolere, cana rai chauratane sacutaain amuhemujeein, Jorioocuru lerurucoai nejesina ne. Acate le laurii cacha-nasarenoneein curuajaihuri curuaanaa neein nena nera. <sup>6-7</sup> Chaentechu, rautaenihacaanune asajainejeein, nejelau cachaauru enoae Jorionichaanune rai Teenforo asae. Nii corenihana, mucuhacaanulu. <sup>8</sup> Cajé nachuinti bajaaute, esinae rauhijiriin, itolere ichaane coreniha caa coulurujihacaane coitucuhi,” naain jetao, nii Faboro coulurujue nii ita coulurujueuruha joricocurune, acaauru coroatajanera-*abogado* Teeorotorosi, coberenadoro Ferisi rai.

<sup>9</sup> Nii jana jetaote, jerichanetojoein cuain coulurujeure nii cuu nenacaauru leeochoauru Jorioocuru netonai. <sup>10</sup> Nii ainate, Faboro rai, biji lalari jetao nii coberenadoro, iriha Faborone coina. Nii jaun jetaote:

“Nihei chaque tonajelanaalana, ichei erereuni cajabereeo coreniha, ii cana atane rai- itolere rucuheraanu que nenaaneei, bajaanacaain, inoaelu caje coauneeine coitucuhanune jaunra. <sup>11</sup> Lechoonca coroata janoheca, Jerosaleeun turuhin, Cana Coaunera bajaebajaecaunera. Ichaajenihanete bajanaa naineeicha. <sup>12</sup> Coatia chunei cacha aina, ita cotaihajihaanune jana caurucuruhi, chaelai janonaa banata. Niheichu chaen, ita taojiananaja- Teenforo asae nihanatiin, chunei cachaauru rerohecahanta. Niheichu, ita taojiaauruhane jaancuru sinacocacuru asae nihanatiin. Niheichu, cuu netiin chunijiun cachaauru rerohecahaun. <sup>13</sup> Nii jaun, nihei, chunijiun cuain tonaain cacoluruecuruha caa cachaaurune jaanuta. <sup>14</sup> Nena caraajenihane, canu ichao bereenicha, rauhijiriin. Canuna cana inoasihuru coauneraneein nena Cana Coaunera rai niicha jerei icharaneein neunra. Nii Ena Ecoona Ichaonaa Caohacha- Jesocurisito tenojoine, canu, esenetaain tonoraan, Cana Coaunera ere bera inoasiuruhacha laenanohineein nena nihana jaun. Nete, nii canacaanuhacha esenetai que, ‘Chaqueje nelatihei,’ naaure, caa canu coulurujueracuru. <sup>15</sup> Aihuruhane rijijieina,

canu netonai inae cuu tihane bana, satiin onacaauru ichaterichaain Cana Coaunerana jaun, ichanacururichaain nechu aansainein onacaauru, caohacha cachanein naaonjoainurine esenetaaun. <sup>16</sup> Nii jaauna, caohachaain rauhijiriin, jeriha Cana Coaunerane rijijiein, casuujua coaraain neeun, Cana Coaunera notaracae, satiin cachaauru notaracaene maajeein. <sup>17</sup> Itolere sacutaain, cajihanein amuhemuhecaaun bajaanacaaine baihana, coriqui uhaain, jelaiha canu ataneu caaun, itolere que necairichajein ichaonacaauru rai teein acaauru corootajanichaaunne coina, chaen, Cana Coaunera bajanaanaja coloheri Teenforo asae, Cana Coaunera rai, itolere lenonecuru sohin tihanune coinara. <sup>18-19</sup> Nii ina ichaaun, nukulocohin, canu couturi loroaloroariin joeratihanune baiha, aitoa cana Quiricha Inoasi cuhanene rijijiein. Coatia arajii cacha codoriaain, ichahaaunluta. Niheichu chunei cacha rohecaenihanune janate, nii ita taojiananaja Teenforo asae canu coaracurelu-Asia batane caje unacaauru tabaauru Jorioocurura. Acaaurutejian uhin, cacoluruhecuruhane laen caohachae, esinae rauhijiriin chatohanai baaso ichacaaunne coaracuruhane. <sup>20</sup> Nete uurene. Caa cau turunacaauru Jerosaleen caje unacaaurute, Jorioocuru curuaanaacuru, batirichuru curuaanaacuru, naaonjoaain acatiha teein, acaauru rai, cacoluruhecuruhana jana, ecu neeurelura. Acaaurute aihane jaun naine, chatohanein baaso ichacaaunne coitucuhin cacoluruhecuruhane caohachae, nete nainecurenera. <sup>21</sup> Acaihanejei, nii cacoluruhecuruhane banaachana, satiin codoaquiin aonajeeuruhane jana, tonijiaain: 'Ichanana nainiha onaane esenetaanune corenihacha nachura, cacoulurujuein, canasina coaquichete.' naaunlura," naain jetao be Faboro.

<sup>22</sup> Nii jaun jetaote, inae raotojoein, Nii Ena Ecoona Ichaonaa coitucuha, nii coberenadoro Ferisine jaun jetao, nirijiein nii ratiriin:

"Inae turuha comaandaanti Lisihazine banana, inara cotiaratereeuni enacoauneein, nii neruujue coina," nae jetao, Ferisi.

<sup>23</sup> Niritiin jetaote, nirijiein mucuhinein Faboro sirichuruhane coina, cafitaan rai aite Ferisi. Chaen raotojoein Faboro rene turuhin, rai niicha latei teein naaonjoaain, aina erenaa nainecuruha belaichaurune coina jetao aite. <sup>24</sup> Nii cojoanoo cojoanoo jetaote, nacoauneein turuha uhe Ferisi, rai comasai Dorosila aina. Nii comasai jetaote, Jorioocuru bene ne. Nitohanein turuhin Faboro cotiharatiha Ferisine jaun jetaote, turuhin acaauru rai Jesocurisito esenetaain, tonoraane que, acaauru rai ereerejiha Faborona jaun jetao,

cuu rautatiin aonajeeure, itolere que, acaauru rai ereereji-hana jaun. <sup>25</sup> Ne jetaote, “Caohacha nejesina ichaechajeein ichaoinete caohachae. Jana baasohacha ichajeein ichaohine caoachaa, inae cuu tihane bana, satiin colurujaha curichaa in Cana Coaunerana jaunra,” naain rai biha Faborona jaun jetaote laen nesoone, nii Ferisi. Nesooneitiin jetaote:

“Inae, chajaain caunihu. Inae nainichaaune banana, coaiteen ii cotiharatereneunicha,” nae jetao, Faboro rai, Ferisi.

<sup>26</sup> Niritiin jetaote, coriqui que, coretiha Faborone jeriha, jianihane coinana jaun jetao, araai saain nihane cotijiae, rai irihane coina Ferisi. <sup>27</sup> Nirijieein, coroata jaanacaain ichaane baiha jetaote, coberenadoro nihane caje jetao mitue Ferisi. Inae mituha Ferisine jana jetaote, coreenraniha enoe- Forisio Fesetoneein curuajai. Ne jetaote, jerecuruha Jorioocurune rijijieein ichaane coina jetao, caseteconein Faboro ratiriin jetao, mitue Ferisi, nabana baasoneein cotaairiin coaracuruha Jorioocurune coataa.

## 25

### *Feseto acatiha niha Faborone*

<sup>1</sup> Inae coberenadoro nihane coina, Sesareea turuhin, coberenadoro neein enohane baiha jetaote, nichata janohane cuhane jetao, Sesareea caje, Jerosaleeun cue jetao Feseto. <sup>2</sup> Nii jana jetaote, cuu rai Faboro coulurujeeure jetao, nii Jerosaleeun nenacaauru, batirichuru curuaanaacuru, Jorioocuru rai jataaen nelateein nenacaauru naaonjoainuri jetao, Faboro coulurujeeure. <sup>3</sup> Nitohaneein, coulurujeein jetaote:

“Atiin canacaanu rai, cau Jerosaleeun nii Faboro joerateura,” naain bajaare jetao, bero cataaun coharatein, Faboro sohin joerateeuruhane coina coacuhin niqiu. <sup>4-5</sup> Ne jetaote:

“Cuute, Sesareea caseteconein nedaelura. Nena, ena chajaaajoaain jelaiha cureunnicha. Inae jelaiha cuhanune janate, nainecure cajiniichaa in uhin, cuu tein, chaelai que situha, nii cachane, coulurujueana nainecure inara rai jataain nelateineein nenacaauru- cocoainanacaihurura,” naachae jetao, acaauru rai Feseto.

<sup>6</sup> Nii Jerosaleeun, fosa janone nihane, lechoonca janoneein nihane baiha jetaote, jelaiha Sesareea cauha cue jetao Feseto. Nii cojoanoo jetaote, ita coulurujeeurera rucuhecuruhana jaan coloheri- *tribonal* asae rori ichoae nelauriaain jetao, Faboro raerate. <sup>7</sup> Inae Faboro turuaauruhane jana, enoha Faborone jana jetaote, rohan nichuuntaacoaain jetao, coulurujeeure Jerosaleen caje uhin turunacaauru- Jorioocuru.

Itolere baaso cuhane cuaaichuru, joaereein caje erenaa rocohichuru, coulurujeeure jetao, baaso ichaenihane sainejeein. Nii jaun jetaote, esinae rauhijiriin erenaa nihane coitucuurene. <sup>8</sup> Nii jaun jetaote, acaentonai, rai jabereco coreniha jetao:

“Coatia chatonai baaso que irihaun, Jorioocuru aitoonjoa, Jorioocuru ichao coacuhinta. Niheichu, ita taojiananaja Teenforo coacuhin irihaunta. Niheichu Romanocuru curuaanaa coacuhin irihaun baasoneeinta,” naain jetao, ere Faboro.

<sup>9</sup> Nii jaun jetaote, caohachaain Jorioocuru aina nedanaa jerihane jaun jetao:

“Cureeina Jerosaleeun, cuu teein nii ichei rucuhenacai rucuhecaanne coinaneta,” naain jetao, Faboro caje bajae Feseto.

<sup>10</sup> Nii jana jetaote:

“Nena jerichanejeein, Romanocuru curuaanaa- cana netonai curuaanaa- eenferadoro icharatenohi neruujuenaanaja coloherihu *tribonal* asae caa neeun, cau teein neruujuenaa nainichaaune coinara,” naain jetao, tonorae Faboro. Niritiin tonoraain jetao te: “Ii te, raotojoein Jorioocuru rai baaso ichaenihanune coitucuhin neeicha. <sup>11</sup> Esinae rauhijiriin, jataain baaso ichaain, baaso que situhin nihanune coaraain, nii coreniha casohin cajaaonaa jerera nihane, coatia nii caohaterihaaun, coatia onaa coasihaaun. Jana, esinae rauhijiriin, erenaa nenihane, nihei chunei acaauru rai canu tenaa nainihe, casohin cajaooruhane coina. Nii jaunna, ii caje bajareeunni, raajenihane canu rai- rucuhenacai rucuheca Romanocuru curuaanaa- eenferadorone coinara,” nae jetao Faboro.

<sup>12</sup> Nii jaun jetaote, nii cuu nenacaauru rai coroatajaneraauru caohachaain suujua rauhi coaraauru caje jetao bajae Feseto. Nitohaneein, bajaane baiha jetaote:

“Inae Romanocuru curuaanaa, ii rucuhecane coina bajaaina jaunte, Romanocuru curuaanaa rene curiquincha,” nae jetao Feseto, Faboro rai.

### *Curuaanaa Aquirifa acatiha niha Faborone*

<sup>13</sup> Nii baiha neenejeein jetaote, namujera Berenisi aina jiniquiiin cuhin, Sesareea turuha cue, curuaanaa *rey-* Aquirifa, Feseto coaraane coina. <sup>14</sup> Cuu araai janohin aina niha- nii curuaanaana jaun jetaote:

“Cautene leinjiin cacha caseteconein Ferisiicha ratirilura,” naain jetao, bee Feseto. <sup>15</sup> Niritiin been jetaote: “Jerosaleeun turuhanune janate, carai coulurujeeurelu batirichuru curuaanaacuru, saain Jorioocuru bichauhenaauru, naaonjoainuri, casetecaanune

coinara. <sup>16</sup> Nena, acaauru rai: ‘Coatiha nainihe i aonaeniha cachane jana, nedaa coulurujueein niha namute cachane, nii coulurujuenoi cacha casetecaain, chatoaneein tein, sohin joera jereein, naaonjoaain niha Romanocuru rai rauhineti. Niha ita coulurujueranete, ita acatiha netiin, nii colurujera aina iriha nii coulurujuenoi jere Romanocuru rai rauhicha.’ naaina acaauru rai beeunra,” naain jetao beebeje Feseto. <sup>17</sup> Niritiin beebejeein jetaote: “Nii jaunna, cau tururuha nii satiin coulurujueeurane jana, nii cojoanonecoriin, cacha rucuhecaanna jaan coloheri *tribonal* asae rori ichoae nelauriaain, nii cacha raerateeun, nii rucuhecaanne coina, <sup>18</sup> inacojeein niqui, ‘Chatohaneein jecha sosereein, chatohaneein Romanocuru curuaanaa aitoonjoa tonoraa cachane caohatihane coreniha jecha carene letoaaure.’ naain niqui. <sup>19</sup> Nete, leinjiin acaihanejeein, nii acaauruhacha esenetai que aitiin, chaen nii onaalu Jesusoneein curuajai queecha maroaain coulurujeeure, ‘Enanetoojeein jete, ichoae,’ naa que Faborona jaun. <sup>20</sup> Nii jaunna, nii aina, chaa coitucuenihanune jaun, Faboro rai: ‘Cureeina Jerosaleeun, cuu nii ichei rucuhencaci rucuhequine coina’ naain bajaan. <sup>21</sup> Nii janate, ‘Cana curuaanaa, Romanocuru curuaanaa eenferadoro jete, rucuhere raajenihane,’ naain bajae, cana curuaanaacha rucuhene coina. Nii jaunna, rucuhene eenferadorone coina letoaanunereein tiaain, caseteconeein nihane coina aitoon,” naane jana jetaote:

<sup>22</sup> “Canuhetonaina, iriha nii cachane aohana jereunra,” nae jetao, curuaana *rey* Aquirifa, Feseto rai. Nii jaun jetaote: “Eresite aohanriquiincha,” naain jetao tonorae Feseto.

<sup>23</sup> Nitohaneein jetaote, nii cojoanoo, ita taojiaauruha cachaauruna jaan coloheri asae, netaojiaauruhane jana, enoha cuure jetao, jataain nelateineein neeuruhane coara-teein Berenisi aina, *rey* Aquirifa, chaen soondarooru curuaanaacuru aina nii cuu nenacaauru nese cocoaichacuru, jataain nelateein nenacaauru naaonjoainuri aina jiniiquiin. Nii jana jetaote, Faboro joracaerateein jetao, raerate caresero caje, Feseto. <sup>24</sup> Nii jana jetaote, inae turuaauruhane jana:

“*Rey* Aquirifa, satiin cau canacaanu aina netaojiaain nenacaauru, nocoacaa cacha coulurujuenoi. Satiin Jorioocurute, carai coulurujeeure. Saain Jerosaleeun nenacaauru, cau Sesareea nenacaauru, naaonjoaihunrite nujuana soaisoaihanaain, ‘Sohin joerateeura.’ naain jataain ohane jerecure. <sup>25</sup> Nete, chatoaneein baaso ichaene, caa cacha. Nihein sohin jaoha- cachana jaan leranu carai. Nete raajenihane rucuhene- cana curuaanaa- Romanocuru curuaanaa- eenferadorone coina, bajaana jaun, inae nii

jerichaauna jaun, ucuae letoareeunicha,” nae jetao Feseto.  
<sup>26</sup> Niritiin jetaote:

“Nete nene, ‘Naaonjoaain que situhin, naaonjoaain ichaana jaunte, caa cacha coulurujueeurera.’ naain beein, laenaain, canu curuaanaa Romanocuru curuaanaa- eenferadoro rai, beein quicha letoaaene. Nii jaunna, satiin cau neeichene jaun, caa raerateeun, caohachaaain, ii cau neeina jaunra curuaanaa Aquirifa. Inara acatiha tein, bajaanune, raotojoein tonaain ereeuruhane, laenaain letoanaa nainichaaun, cana curuaanaa eenferadoro raine coinara. <sup>27</sup> Jana, ‘Naaonjoaain corenihana, caa ii rene, caa cacha letoaaunra.’ naain chaelai que tonaain benihanunete, ‘Chanuna joareein, caa cacha letoae, lera colane.’ naain nii que, nererojocare cana curuaanaa- Romanocuru curuaanaara,” nae jetao Feseto.

## 26

*Coulurujueeuruha Jorioocuru najaa lera biha curuaanaa Aquirifa rai Faborone*

<sup>1</sup> Nii jaun jetaote, Faboro rai:

“Inae laen naineein, ii jabereco coreniha ereeinerana,” naa rey Aquirifane jaun jetaote, acaauru rai ucuun biji sijitaain jetao:

<sup>2</sup> “Jataaenna coroaeejeun, rey neeine acatiha, cau ererichaaunine jaunra, rey Aquirifa. Aihana jaun, atiin canu ere aonaanuna, itolere que cacoluruhecuruha Jorioocuru najaa que, erete aonaain coitucuhicha. <sup>3</sup> Iite laen, jitariin itolere Jorionichaanune ichao coitucuhin, ita rerohecaain ita rai ereerecaanune jaanne maajeein coitucuhin neeichacuraanaa. Nii jaunna, atiin quere aonaaine jereenracuraanaa,” naain jetaote:

*Jaiti Cana Coaunera coitucuhin, esenetaenihane bana, rai nichao biha Faborone*

<sup>4</sup> “Satiin Jorioocurute, canu ichao coitucure, acaauru aina ichaorejetocaaaunlu, canu ataneu, chaen Jerosaleeun, naaonjoaihun, canu enamanacane caje coauneeina jaun. <sup>5</sup> Chaen techu, raotojoein fariseeoneein nihanune coitucuhin, rauhijiriin benaa nainecure ii rai, jerecuruhane. Nii coitucuhichene rijijieeina, leochaauru amuritoheriin jataain rauhijiriin, canaacha esenetai tonoraera neein nihaacaanu. <sup>6</sup> Cana inoaensihuru rai Cana Coaunera aitoonjoa nii niicha letoanaa jerei canaacha cohajei esenetaain tonoraanune corenihate, caa cacoulurujueein, caa chaatiha canu turuaerateeurera. <sup>7</sup> Canacaanu lechoonca coroata laurii Israaeli cocoaichacuru- foeratenojoein nihacaanunena,



nii cana foerateeurera rai Cana Coaunera aitoonjoa cohajihacaanu enanetojoein. Nii jaunte, Cana Coaunera coroa-jeein bajajeein, naitoonjoan niicha jerenohin ichacaaun, jicho, janotiin, naaonjoaainchuru. Nii cana inoaensihuru rai Cana Coaunera aitoonjoa- canaacha cohajei ere tonoraanune corenihate, caa cacouluruhecure Jorioocurura, *rey* Aquirifa. <sup>8</sup> Chanuna onacaauru ichatiha Cana Coaunerane esenetae-neeiche inara.”

*Jesocurisito ranojoihunru rohecaain cairichaerichaaetohalune biha Faborone*

<sup>9</sup> “Canuhetonainechu, jauriaa, ‘Caohacha jecha ichaaun,’ naain, Nasarete cocoaicha Jesoso ere esenetaain tonoraeraauru rohecaain, acaauru cairichaaain, <sup>10</sup> Jerosaleun batirichuru curuaanaa letononeein caresero cuhanena maajeein arajii Jesocurisito esenetaeraauru teraterejetoonu. Chaennachu, tabaauru sohin jaoruhane rautatiin coroaerejetoonu. <sup>11</sup> Inaajoan saneein chaainti, acaauru casetecaraetoonlu, ‘Inae jian laaen, tonorarihaacaanuhinta.’ naain, nii acaauruhacha esenetai acaauruhacha ere tonorai- Jesoso ere tonoraauruhane jianecuruhane coina. Jataaenna, nechuhane an-saineein mijiaaineein, acaauru rohecaeraaetoonlu, naain coriaae nejelau ataneu- nenacaauru neseeurune maajeein cuhinchurura.

*Coaiteen, ‘Naaonjoaaina, nunuheteen, Jesocurisito coitucuhin esenetaain tonorana nunuheteenlura.’ naain biha Faborone*

*(Ich 9.1-19; 22.6-16)*

<sup>12</sup> Nitohaneein, Damasoco neseeu nenacaauru mucuhin raanune coina coacuhin cuhanu, batirichuru curuaanaa letononeeine janate, <sup>13</sup> bero cuhane cuujihanu, turuelalajeeine jana, enoto chujutaain, luhecotariin, canu, nii canu aina unacaauru, naaonjoainihacaanune rohan enoto cono amurijiriin conotiin, luhantiin lanaanete dede cajera, *rey* Aquirifa. Nii jaunne, saain jiniiquiin, <sup>14</sup> atane ichoae nemarkotihacaanune janate, carai Ebereeo ere cuhane cuaain: ‘Saoro, Saoro, chanuna jataen caniha nejerateen carerojoecai. Nechu jataaen ichaajenihanete, baaso ichaaain, ijabereeon cairichaaain, cunaitaa nii aaicha.’ naain canu caje bajaane jana ne: <sup>15</sup> ‘Chaneeinaate curuaanaa.’ naanune janate: ‘Canuna- nii iichaa cairichaaerii- Jesoso neeunra.’ naainte: <sup>16</sup> ‘Chajaain nimichuuna, ichei erete aonaaicha. Cauna ecocoon, ichei irihanune, canu letononeein neeine coinara, chaen ena, caa iicha coarai beein, ii que caa baiha- quiiha coaratenenine maajeein beein, canuneein nihanune coitucuerateeine coinara. <sup>17</sup> Canuna, Jorioniheichuru, Jorioocuru, naaonjoaihunri caje, ii ichoteratiha

cureeunicha. Acaauru renena caa ena elotoareeunnicha. <sup>18</sup> Coanaanihute, acaauru nota jirichaeranuque, acaauru rai canu ere beebejeeite, Acaauru Coaunera nichaanune coitucuhin, quere tonoraain, canune maajeein coitucuuruhine, nabana taeneein cuajeein, moconajaera ere tonoraain sacuelanaala, canu, nosa caje cacha mitaeranichaaunne coitucuuruhane, nosa coreniha caseteconein neeuruhane raineuru caje nichoteein, Acaauru Coaunera nichaanune rene tacanaa nainecuruhane coina, leeochoaauru Jesocurisito ranojoihunru aina jiniiquiin neeuruhane coinara.’ naainte caletoe Cana Coaunera Calaohi Jesusora,” naain jetao:

*Rai ereein letoaa Jesocurisitone tonoraa Faborone*

<sup>19</sup> “Nii jaunna, dede caje ecocohin- caletoaera lacoelanaala, <sup>20</sup> jauriaanejeein Damasoco neseeu nenacaauru rene turuhin, acaauru rai Jesocurisito ere beebejeeunra, *Rey Aquirifa*. Nii caje cuaaina, Jerosaleeun nenacaauru rai beebejiha cuun, itolereenein Jodea batane sacutaain nenacaauru raine maajeeinchuru, chaen Jorioniheichuru raine maajeeina beebejeeunra, baaso ichajeein, neosatihajeein ichaooruhane jianein, Cana Coaunera esenetaain, niicha jerenohi rijijieein ichaohin, inae esinae rauhijiriin Cana Coaunera esenetaeranein ichaooruhane coarateeuruhane coinara. <sup>21</sup> Nii corenihate, ita taojiananaja Teenforo asaae canu eruuruhane jaun, canu mucuhin, casohin, cajaanaa jerecure Jorioocurura. <sup>22</sup> Nete atiin, cacorataaniha Cana Coaunerane jaun, enanetojoein jaiti ichaojoein, Cana Coaunera ere beebejeein sacuunra, satiin- cairicheihuru rai, saain cocoinanacaihuru raine maajeeincha. Coatia chaaelai janonaa bana, Cana Coaunera ere bera inoensihuru- Moisesa, naaonjoaihunri aitoonjoa johohin, rerohin irihaaunta. Jerichanetojoeina, rauhijiriin, ‘Naaonjoarichaa in jetao,’ narejetocuruhalune rijitoein: <sup>23</sup> ‘Ohanete ne nii Cana Coaunera letononein unaa-Mesihasicha. Nete, nitohanein ohane baiha, aca niicha ranojoihunru ajiinchateraniha, oo caje ichanananein niha cureeincha. Nii baihate, itolere sacutaain, beebejenojoein niha cureein, satiin cacha nota jirichaeraaunu quera, nii aina, Cana Coaunera coitucuuruha, satiin cana araaichuru necoina, chaen nejelau ataneu nenacaauru niha natiine coinara.’ naain aitoroetooruhane rijitoeina aitoonra,” naain Aquirifa rai beebeje Faboro.

*Jesocurisito esenetaain, tonoraa curuaanaa Aquirifane jereein, rai ereerejiha Faborone*

<sup>24</sup> Niritiin, ereerejiha jabereco coreniha Faborone jana jetaote, rai nujuae soaisoain:

“Mainajiriin nerelaacha neeine jaunna, nesooneeojoaain joareein ereeite, Faboro,” naa rai Fesetone jana jetaote:

<sup>25</sup> “Coatiana nesooneeojoaain joareein irihaunte, caohati coberenadoro Feseto. Caa aitocoanne jaante, esinae rauhijiriin erenaane. <sup>26</sup> Caute ne, caa curuaanaa *rey* Aquirifa- itolere niriinanai coitucuera. Nii jaunna, chaque tonajelanaala, nacatiha caa ereerejeeun, acaentonai niriinanai coitucuhin nihane jaun. Coatia chaaelai asinojoneein nena que caitono nihei. <sup>27</sup> Cana Coaunera ere beracuru- *profetacuru* inoaesihuru aitoonjoa esenetaaina, *Rey- Aquirifa*. Rauhijiriina, itonai esenetaaine coitucunra,” naa Faborone jana jetaote:

<sup>28</sup> “Basijiin lanajeje, caque jererateeine jaun, canuhetonai Jesocurisito rainein nihanunera,” naa curuaanaa *rey Aquirifane* jana jetaote:

<sup>29</sup> “Coatia jerihane, iicha aiheeta, curuaanaa. Satiin cau neein aonajeeurera raina, Cana Coaunera bajaun, eseneta nainecuruhane, caa aihanune tocohanein *cadena* que cositenojoneein nelanaala esenetaauruhane coinara,” nae jetao Faboro.

<sup>30</sup> Nii jaun jetaote, nimichuhin, naain jelai cuure coberenadoro aina curuaanaa *Rey Aquirifa*, chaen, Berenisi, chaen, nii leochaauru cuu acaauru aina nelauriaain nenacaauru, naaonjoaihunri aina, cuu jelai teein, <sup>31</sup> nii que ereeuruha nejesinajeein, ita raine coina. Cuu jetaote, ita rai nejesinajeein:

“Coatia chatoanei baaso ichaai caa cachata. Cha corenitate, sohin joaerareta. Nainiheinchu, caresero cuhane nihanatiin caseteconein nihaneta,” naaure jetao ita rai nejesinajeein. <sup>32</sup> Niritiin, ita rai ereeuru baiha jetaote, Feseto rai:

“Raajenhane rucuheca satiin curuaanaaneein nena- eeneradorone coina, aitoa caa cachane colanete, jianena naaineeicha,” nae jetao *Rey Aquirifa*, coberenadoro- Feseto rai.

## 27

### *Romau, Faboro letoaauruhane*

<sup>1</sup> Inae Italiau canacaanu letoanaa jerecuruhana jaunte, casetecocuru coaraain raeraanu que le laurii soondarooru- Eeneradoro rainein- curuajaihuru rai cafitaan- Jorio neein curuajai rai, leochaauru caseteconein nenacaauru teeuruhane jiniichaain, rai Faboro netonai teeure. <sup>2</sup> Nii jaunna, Andaramitio cofauhana caje cucuana cuhane cuhin coriae nena- Asia batane que nenacaauru neseeuru- cofauhanau tiaain cunaa bote cuhane fauhin, nesaru rai nihana jaun, cuhane fauhin cuhacaanu. Nii janate, ecu neein, canacaanu corihaniha uhe- Masedonia batane que nena Tesaloneca

cocoaicha Arisitaroco. <sup>3</sup> Nii cojoanoo, Sidoon cofauhanau turuhin, cuu najaurihacaanune janate, jataain Faboro belai, nii soondarooru curuaanaa Jorio. Caseteconein cuha Faboro natiinte, bote caje iniin, belaichaauru rene bedaeniha Faborone coarajeein, cuu rai niicha latei teeuruhane coaraje, belaiha cafitaan Jorio. <sup>4</sup> Nii Sidoon caje nesaruhina, canacaanu que tacaain uha cujuanane jaun, nii cujuana que acateraain, Chifere cobene jelson cuujihacaanu. <sup>5</sup> Nitohaneein kuhina, cucuana jera jaoha kuhacaanu, Silisia batane auha jelson. Inae cucuana jera jahina, Silisia, Paanfilia, naaonjoainuri batane auhaniha situhin kuhin, Lisia batane que nenea neseu- Mira turuhacaanu.

<sup>6</sup> Cuute, Alejaandiria caje unaa leinjiin bote Italiau cuujenaa rue, nii soondarooru curuaanaa- cafitaan. Nii cuhanete, canacaanu fauherate, kuhane kuhacaanune coina. <sup>7</sup> Nitohaneeine, araai janohin, jataain jeraen cuujihacaanu. Nii jaunna, necairichajeein turuhacaanu Nidoneein- niicha curuaateuri jeraniha. Nii jana, jaiti canacaanu que tacaain uha cujuanane jaunna, Cureta cobena nichaae nitinonohin, Salomoonneein acaauruhacha curuaatei cobene jeraniha situha kuhacaanu. <sup>8</sup> Nitohaneaina, necairichajeein kuhin, Cureta auhanihacha rauhijiriin cuujueein, Laseaneein curuajai nese rohan nenea- Caohatiin Cofauhananeein curuajaihu turuhacaanu.

<sup>9</sup> Inae carajaa kuhacaanune jaunte, nii tonohana inae cujuana aina jelarona que turuhelalajihana jaun, luhantecucuana kuhane amunaa, banejeniha cujuanane jaun. Nii jaunte, acaauru rai:

<sup>10</sup> “Aonacuchena caa que erete, aonaquiche. Jataaina banelanaala, cana rai lunaa curichaaain, caa amunaane coitu- cuun. Baana cauhacha nelanaalate, aihacachera. Saainte, nii iicha amai rucuhale aina jiniquiin nitajiha cureein, caa botera. Cana niha natiinte, onaa nainichaachera,” naain niqui suujuatenajae Faboro.

<sup>11</sup> Nete, nii bote erora, nii bote curuanaa cafitaan, naaonjoainunru, erecha tonorae, nii soondarooru curuaanaa- cafitaan, Faboro ere tonoraelanaala. <sup>12</sup> Nii jaunte, caohachaojoaeniha sanein, nii neeuruhane jaan cofauhanane jaun, cuu neein cujuana aina jelarona bitoanaa jerecurene. Nii jaunte, satiin lalajeein, leeocho fauhana- nii jeelai Cureta cobena que nenea- Fenisiau cunaa jerecure, cuu cujuana aina jelarona bitoaaauruhane coina. Jelaite, enoto soo jelson neein, cana raoto nichajai que, cana ajaabiji nichajai que naaonjoaain inanacae.

*Cucuana kuhane niha cujuana tabaine*

13 Nitohaneeinte, “Tonaje lanaala jecha cuu-juerichaanuhin,” naain nesaruhin cuhacaanu, enoto soo jeloon neein ajaabiji nichajai caje uha raujiaain aasaaeriin jouhaquuin- cujuanane jaun. Nitohaneein cuhina, Cureta auhaniha cuujihacaanu niqui. 14 Nete, nii baiha neeoriin, enoto soo nichaae cujueein cana raotono nichajai que, enoto mitu dararo caje uhe jataain mijieeinetiin cujuana. Niite, bote que tacaain, richorocoe. 15 Nitohaneeinte, richorocoeain, cuanaa jerichaanune jaan edacai que, bote cuae nii cujuana, que tacaain macohi auriteein, acatena nainenihacaanune jaun. Nii jaunna, cuu canacaanu amanaa jerihane jaan jeloon, canacaanu amaane coarajihacaanu. 16 Nitohaneein cuhina, leinjiin obena laajoiri Caaodaneein curuajai rohan situha cuhacaanu. Ucuajai que sanein mijieeinetiin tacaeniha cujuanane jaunna, jataain necairichaaoriin, tijichaaain canacaanuhacha amai- naluha botene nichoteuruhana jaan- bote laajoiri inacaanu. 17 Nitohaneein mucuhin tararaain inaacaanune baihate, cuu, inori que, nii cuhacaanune jaan bote ichohacure, nunaane coina. Nitohaneeinte, carene araraca-Siretenein curuajai que tacanaa coasichuruhane jaun, cujuana aina amuuruhane jaan bela serichure, ocoai nichaae cuaain, cujuana ainaacha cujueeuruhane coina. 18 Nii cojoanoo, jaiti mijieeinetiin uha cujuanane jaunte, cucuana cuhane, nii bote coneracuru jaonaa nunuheteure. 19 Nitohaneeinte, nesarucuaanune nichata jano cuhane, bela nujuaauru tabaauru, chaen itolere nii nichotihacaanune que nelatelanaala nenacaaurune majeein jaore. 20 Nitoaneeine, araai janohin enoto coarilanaala, nii arasijie nihanatiin coarinihacaanu. Nechu jataain nirijieein nesurocoriheijijieein, bote nalaaene amuneein sacuha fichafichanaane jaunne, “Inae jecha ecu ohacaanune nitajerichaanuhin,” naacaanu niqui.

21 Nitohaneein, araai janohin lenonelanaala nihacaanune jaunte, satiin canacaanu cataaun nichaauraaain:

“Coaracuche cachaurute, quere tonoraelanaala, cuhacha nena richae, Cureta caje cana uhaichelu. Colane chachu, cuu raotojoein nihacache. Colane, catohanai baaso que siturihaacache. Nii colane, chaelai que siturihaacache. 22 Nijiaonriha joaereein, inara suujua cuaaichene. Coatia leinjiinejeein orihaain chunei cache. Caa botete laaen, nitajiha cureein. 23 Enene cojoanotiinte, canu rene, rai cache neein- letononeein nihanune rai, letono anjera letoae-Cana Coaunera. 24 Canu acatiha ecocohinte: ‘Cooa casi-hara, Faboro. Atiinte, Romanocuru curuaanaa- eenferadoro acatiha tururiquincha. Ii corenihate, atiin onaa caje

nichotiha cuurureein saain nii ii aina bote cuhane nenacaaurura.' nae carai Cana Coaunera letono- anjera. <sup>25</sup> Aihane jaun, cha que tonajelanaala, joenreein inara suujua cuaelanaala, caa caitoonjoan esenetaachacuche. Nii aitoha Cana Coaunera letono anjerane tocohanihate cureein. Esinaete rauhijiriin aite. Canuna, esinae rauhijirin aitohane coitucuhin esenetaun. <sup>26</sup> Nete laen, leinjiin obena que tacaain baulenetoha caa botene jana, cuu nerarichaacheeincha," naain bee Faboro.

<sup>27</sup> Inae coroata semanaa nesarucuaanunena janate, Ariticoneein curuajai cucuana cuhane cuujihacaanu, janotiin. Nii janate, dede catai rijju, cuu cajianeein bote amaa cujuanane jana, inae cucuana auhaniha nichuuntaacaanune que nainacure bote beraihurera- marinerooru. <sup>28</sup> Nitohaneeinte, inae coitucuuruhane jaun, nucuhaano cojounacateein coaracuruhane jana, nichatachoonca saota metorone rai nucuaano. Nii caje cuujueein, coaiten nucuaano cojounacateein coaracuruhane janate, coroatachoonca caaunsi metorone rai nucuaano. <sup>29</sup> Nii jaunte, ajeri que tacanaa coasia, bote roeniha jenaain anajiin nena coata- aancla nalaure, cuu bote acateein, cuu mucuhane coina. Nii nalaecuruhane nainihate, Cana Coaunera bajaebajaecure, chajaain janohane coina. <sup>30</sup> Nii janate, bote machiniha anajiin nena coata- aanclauru nalaera rijjijieein, nii- naluha botene nichoteeuruhana jaan- bote laajoiri faunaa nunuheteure nii bote beraihurera- marinerooru, nii bote caje sorooruhane coina. <sup>31</sup> Nii janate, coaranajaain, nii soondarooru curuaanaa cafitaun rai beein, nii soondarooru raine maajein beein:

"Berainajaeneeichenete, caa bote ratiriin sorooruhacaaauruhachane, nenereein nichoteeichene jaanura," nae Faboro.

<sup>32</sup> Nii jaunte, acaauruhacha amaemajei bote laajoiri ichora saaujihure, nii soondarooru, acauhanau naluhane coina.

<sup>33</sup> Inae janonaa raite, satiin acaauru rai, lenonecuruhane coina:

"Inae coroata semanaa, nirijjieein caohachaain lenonelanaala neein, situha cujuana aina fichafichanaane cohaquichenera. <sup>34</sup> Aihana jaun, chajaain chaelainiji que lenonecuchete, nii aina abaantaain nichotenaa nainequichene, nichoteeiche. Coatia nitajerihaain leinjiinejeein nihanatiin chunei couturiujicha," nae Faboro.

<sup>35</sup> Niritohane baihate, satiin acatiha tein, faan teberiaain, nichoae Cana Coaunera bajaane baiha, nii faan tatuhin, beunebeeuneein que lenone Faboro. <sup>36</sup> Nii jaunte,

lenonena coaujueeurenihane baiha, inae satiin lenonecure.  
<sup>37</sup> Itolereneeina, coroata fasha caaunsi choonca saotaneein,  
 nii bote cuhane nihacaanu. <sup>38</sup> Nitohaneeine jerenihacaa-  
 nune jaun tiaaajoaain, nainaa in lenonichaanune baiha, nii  
 canacaaunu lenone tirico caute jaohacaanu cucuana cuhane,  
 nesaracaa nii botene coina.

*Cucuana cuhane naluha botene*

<sup>39</sup> Nii janate, inae janoe. Nete, “Caelai caara,” naain, nii  
 atane coitucuurene nii bote beraihurera marinerooru. Nete  
 atiin, cuu- cucuana auha leororo- carene siricha coaraain,  
 cuu nii bote jauriaanaa coacure niqui. <sup>40</sup> Nitohaneein,  
 cuu jauriaanaa coacuhinte, nii bote laracaauruha acau  
 cataaunna jaan anajiin nenea coata- aanclaauru ichora sau-  
 jiin ratirihure. Nitohaneein teeinte, bote cocoihacuru, roen-  
 eraaunu que nelateein nenea cosi lecoaracaaure. Nii bai-  
 hate, bote macohiniha nenea bela tocoore. Nii jaunte,  
 nii aina inae eriojeein cucuana auhania nichuuntae nii  
 bote. <sup>41</sup> Nitohaneein cuhinte, nichuuntaain carene araraca  
 raroaqui choae, baulenetoha cue nii bote. Nii jaunte,  
 caohatiin baulenetoha nii bote macohi nichajaine jaun,  
 carene raroaqui choae liquinetiin, rurujuanacaje lanaala  
 nedae nii bote macohi. Nii jaunte, jataaen mijieineein  
 tacia- fichafichanaana jaun, fichafichanaa caaun, nefejeein,  
 nichalunihaje bote roe nichajai. <sup>42</sup> Nii jaunte, nii casete-  
 conein cunacaauru sohajeein jaonaa jerecure nii casete-  
 cocuru beraihureraauru soondarooru, nabana joichohin  
 sorooruhane coataa. <sup>43</sup> Nete, caohate nii soondarooru cu-  
 raanaa cafitaan, Faboro coreniha, nabana Faboro netonai so-  
 hin jaoruhane coataa. Nitohaneein caohateinte, joichona  
 inaurera letoae ichoaichania, acauhana naluhin cuhin, atane  
 que cohanaacuruhane coina. <sup>44</sup> Jana, leeochoaauru, acauru  
 caaijie cuuruha tabara choaene jana, tabaauru leeochoaauru  
 netonoai cuuruha nii- bote nichalunena jerooru choaene  
 coina, letoanajae- nii cafitaan. Nitohaneeine, satiin, leeinjiin  
 obene que neraain, onaa caje nichotihacaanu.

## 28

*Malata cobena neraa Faborone*

<sup>1</sup> Satiin, obene que neraaina, Malatanein curuaaca nii  
 obenene coitucuhacaanu. <sup>2</sup> Jelai cocoaichacuru cachaa-  
 rute, jataain caohacha nejeeuruhana jaun, saain canacaanu  
 belaihure. Nii janate, uheuheca elone jaun, jelarotuhane  
 jaun, enuha codoriaain mocohin, iihane jana, canacaanu  
 cotihacure, nichaatihacaanune coina. <sup>3</sup> Nii janate, enuha  
 cohi taojiaain raane jaun, usi jana tihajiha Faborone jana,  
 iihaniha usine jaun, ajaano caaun sorohalaain, Faboro biji

que tijileneein calae acano. <sup>4</sup> Nii Faboro biji que tijileneein calaa acanone coaraainte: “Jerihanete, soserena necaiha caa cachara. Cucuana cuhane naluhin, onaa caje nichotihane jaunte, ichaohane jerene, dedeeu nenea- nii rucuharara,” naaure Faboro coarajeein, nii cuu nenacaauru cachacuru.

<sup>5</sup> Nii janate, nii usi iihanei cataaun, nii acano chatachataain siheitiin, cuu tonajelanaala nee Faboro. <sup>6</sup> Nii jaunte, satiin, “Laraarichaain jecha,” naain cuu, laraacane coarajeeure. Nii janate, laracaene. “Luhecotariin jecha cora aonaain, tocojoaain tacaain oreein,” naainte niqui, cuu, carajaain coarajeeuruhane jana, tonajeerinihane jaun, suujua elonaain:

“Leeinjiin chosi necaihara,” naaure Faboro que.

<sup>7</sup> Nii nihacaanune jaan rohante ne nii obene que nenacaauru coara Fobirio neein curuajai cacha rai atane. Nii Fobirio, canacaanu belaaain, canacaanu rae, rai loreri asaae. Nii jaunne, cuu aina nihacaanu nichata janohin. <sup>8</sup> Nii janate, ajaa que jeraain ujuee caaun cunaiteein ecu niha nii Fobirio inacana jaun, rene turuha cue Faboro. Rene turuhinte, coaraain nichoae Cana Coanera bajaane baiha, nichoae biji merecaain, dadaain aonaane rijieeoritiin inae nerautae. <sup>9</sup> Nii coitucuhinte, satiin uure nii obene que nenacaauru leeochoauru cunaitenacaauru. Nii jaunte, rautanaaca Faborone jaun, nerautaacoaain caaure. <sup>10</sup> Nii jaunte, satiin canacaanu belaihuruhane jaun, jelai caje amuhacaanune coina, bote cuhane fauhacaanune rai, cuujueein canacaanuhacha quiinenu que- canacaanu achanojoaure, itolere amunaa rai nelatecuri teein.

### *Romau turuha Faborone*

<sup>11</sup> Nitohaneein, cuu nichata ateein nii obeneu nihacaanune baihana, leinjiin bote- Alejaandiria caje unaa- cuu cujuana aina jelarona bitoha nenea bote cuhane fauhin, cuhacaanu. Nii botete, coujunacanu que nihane coina, fafone neein, acaauru chosichurune que Curiecocuruhacha tei- Castaro, Polosi, naain curuajaihuru ecaantooru- coujunaca amaerane, bote macohiniha teein. <sup>12</sup> Nitohaneein cuhina, turuha cuhacaanu, Siracosa cofauhanau. Cuuna nihacaanu nichata janohin. <sup>13</sup> Nii cajena, nesaruhin cuujihacaanu, cucuana auhaniha, rauhijiriin Rejioo turuhacaanune coina. Nii cojoanoonte, cuujihacaanune jana, canacaanu cunaja bote roe caje uhe, raujiaan jouhaquiin cujuana. Nii cojoanoon cojoanoonna, turuhacaanu Poteeolihi. <sup>14</sup> Cuuna, Jesocurisito coreniha cana nejeraauru tabaauru ruhacuhacaanu. Acaaurute, canacaanu cotijiaain, cuu canacaanu chunaure, le semanaain acaauru aina nihacaanune coina. Niriijieein inacuhe inacujueein cuujueeina, tabiicha turujihacaanu Romau. <sup>15</sup> Nitohaneein cuhin, atane ichoae



inacuhe inacujeein cuujihacaanune coitucuuruha nii Romau nenacaauru Jesocurisito coreniha cana nejeraaurune jaunte, canacaanu que taca a uure, Apio rai Foro neseu tiaain. Nii jana, leeochoaurute, Nichatajai Taberenaneein-acaauruhacha curuaatei neseu canacaanu cohacure. Nii cuu neeuruhane coaraante, corojeein, Cana Coanera bajae Faboro. Nii ainate, raotojoein suujua aonae Faboro. <sup>16</sup> Nii jana, Romau turuhacaanune janate, jelai loreri asae tein, nirijiein caseteconeein, jianacoo tein, leinjiin soondaro que beraichaain, Faboro sirichuruhane coina jerecure.

### *Romau niha Faborone*

<sup>17</sup> Nitohaneein, nichata janojoein turu baiha neeoriinte, nii Romau nenacaauru- naraaichuru Jorioocuru rai nela-teein nenacaauru- jitariin cotiharate Faboro, acaauru rai irihane coina. Inae satiin turuhacoaain, netaojiaauruhane janate, acaauru rai:

“Caraichuru, chaelai janonaa bana cana Jorionichaachene que baasoneein irihaaunta. Niheichu, chaelai janonaa bana, cana inoaesihuru ichao coacuhin baaso neein irihaaunta. Nii atiinte, Jerosaleeun cacoulurujeein, baaso ichara nihane rucuheraaunu que Romanocuruhacha cocoainanohi rai canu teeure Jorioocurura. <sup>18</sup> Nii janate, jitariin cao-hachanajeein, cacaje bajaauruhane baiha, caihanenaa jerecure, neniha casohin cajaooruhane jaan-leranune jaun niquicha. <sup>19</sup> Nena, onaa caje nichotihanune jerecureniha nii cacouluruheraauru Jorioocurune jaun, canu rucuhaca satiin-curuaanaa neein nena eenferadorone coina bajaaun, nii neniha caraaichuru coulurujihanune jaan lerane saijieincha. <sup>20</sup> Nitohanihana jaunna, inara jitariin cotihara-teeun, inara coaraain, inara rai irihanune coitucuhichene coinara. Cana Isaraelita nichaachene, canaacha cohajei esenetaanune corenihane, cau caa *cadena* que cositenojoneein neeunra,” naa acaauru rai Faborone janate:

<sup>21</sup> “Coatiha chaelai quirichanejeein letoaaauruhi Jodea caje canacaanu rai, ii que, ‘Acate, naaonjoaain que situhin nera.’ Nii jaunna, ii berenaa coitucuhenihaacaanura. Niheichu, ucujai caje turunacaauru- cana araaichuru- Jorioocuru nihanatiin, ‘Acate, baaso ichaechajeein ne jetaora.’ naain, ii que ereeuruhita. <sup>22</sup> Nena laen, nii le laurijiein- enanana Jorioocuru ichao beeine jerichaanura. Tonaai ii, nii queta. Itolere sacutaain, baasoneein nii que ereeuruhane coitucuhacaanune jaunna, ii, coitucuhina jaun, nii beeine aohana jerichaacaanura,” naaure Romau nenacaauru Jorioocuru, Faboro rai.

<sup>23</sup> Niritiinte, “Naaonjoaain cojoanonaa banana, turuha urichaanuhin, nii que ereei canacaanu raine, coitucuhacaanune coinara,” naaure. Nii jaunte, nii aitocuruhane cojoanonaa bana, netaojiaaure arajii cachaauru, nii niha Faborone jaan loreri asae. Nii jaunte, janone caje coauneein, acaauru rai ereereje Faboro, Cana Coaunera Cojoanonaa que, sonafaajeein. Nitohaneeinte, Moisesa aitoonjoa quene maajeein, chaen Cana Coaunera ere bera inoaesihuru *profetacuruhacha* laenai, naajoainunru aina cuaain, acaauruhacha cohajei Mesihaseenein niha Jesusone esenetaauruhane coina, acaauru que jererateein, acaauru rai beebeje. <sup>24</sup> Nii ainate, tabaauru, nii aitoha Faborone esenetaain tonoraare. Jana, leeochoaurute, esenetana jerecurene. <sup>25</sup> Nitohaneeinte, ita suujua rijitojoenaa jerelanaala, mituhajeein caunaa nunuheteuruhane jaunte, acaauru rai:

“Esinaete, rauhijiriin nitohaneeichene coitucuhin, inara foerateeurera rai biha nere bera inoaesi Isaihasine coina, berateein:

<sup>26</sup> ‘Caritiin benihu,  
taa cachaauru rai:  
Aonaquichene nihanatiin,  
caohachaain aonaain,  
coitucunaa naineriheeicheeinta.

<sup>27</sup> Chaen,  
nii coaraquichene nihanatiin,  
coaranaa jeriheeicheeinta.’  
naain berateein:  
‘Banejelanaala nauhacaa  
acaauru suujuane jaunte,  
raajenhane aonana jerecurene,  
acaauru rai beraane nihanatiincha.

Niheichu,  
acaauru notaracaae nihanatiin,  
coana jerecuruhita.

Nii jaunte,  
coitucunaa nainecurenera,  
nabana nesoone caaun,  
canu rene necohaleeuruhane,  
acaauru rautaain nihanune coataara.’  
naain rai nere bera inoaesi- Isaihasi que beratelu jetao, Cana Coaunera Suujuera.

<sup>28</sup> Aonacuche. Caa acaihanejeein Cana Coaunera tenojoin jianacoon cana mitaeranu esenetana jerelanaala, aohana jereneeichene jaun, ena caje coauneein, Jorioniheichuru rai beebejiha cureeunicha. Acaaurute laen, aonaain esenetaain, tonoraa cuurureeinha,” naa Faborone jaunte,

<sup>29</sup> nejesinajeein, mainajeein ita cotaain cauha cuure Jori-  
oocuru.

<sup>30</sup> Nitohaneeinte, cuu itolereneein, coroata ajaanacaain  
neelu Faboro, nasae nihane coreniha coretejeein, niicha  
sirii loreri asae. Nii jaunte, rene turuha cunacaauruni-  
hane, cuu ranajaque. <sup>31</sup> Nitohaneeinte, cuu tonajelanaala,  
Cana Coaunera Cojoanona beebejeein, Cana Curuaanaa  
Jesocurisito quene maajeein ereerejenajaque, nii chunei  
rerohecaera colane.

## Roma nenacaauru rai Faborohacha letoai

*Inara coaaucaun.*

<sup>1</sup> Canune Jesocurisito letono Faboroneein inara rai caa quiricha laenaan. Cana Coaunerate canu janijiin canu raain nelu, jelai teein rai letono afosotoloneein cacha ichoteraneein enachasine ichaonaa beebjihanu cachaauru raine coina.

<sup>2</sup> Niite rai nere bera inoensihuru *profetacuru* que be-  
rateein laenaeratelu rai Quiricha Inoensi cuhane Cana  
Coaunera. <sup>3-4</sup> Nii niicha berateite, Rabiri inamoconein  
cachaneein niha Cana Curuanaa Jesocurisitone beraneein  
nena ne. Nete rai Suujue aina cuaain onaa caje ichatein,  
rai itolere que laraajiin nihane jaanu teein rai Calaohinein  
nihane coitucueratelu Cana Coaunera.

<sup>5</sup> Nii rai Calaohi Jesocurisito aina cuaainte, rai letono afoso-  
tolo nihanune jaanu teein nelu Cana Coaunera. Acane beeb-  
jeeun, chauratane sacuritaain satiin laurilauri nenacaauru  
cachaauru netonai Cana Coauneraaneein nihane coitucuhin,  
nere tonoraain neeuruhane coina. <sup>6-7</sup> Inara netonai nii Ro-  
mau ichoainiquichenete laurilauri nenacaauru cachaauru  
aina jiniiquiin niicha ranojoneein neeiche. Inara belaito-  
hane jaunte, Jesocurisito ranojoneein neein rai cachaneein  
neeichene coina inara raelu Cana Coaunera.

Satiin inacaneein nena Cana Coaunera, rai Calaohi Je-  
socurisito naaonjoainuri inara rai raotojoein neeichene  
jaanu teeurumiin.

*Romau bedainiha cunaa jeriha Faborone*

<sup>8</sup> Jesocurisito aina cuaaine satiin le cachanequichene  
coreniha, jataain Cana Coaunera corojeeun, esinae rauhi-  
jiriin esenetaaichene coitucuuruha itolere sacutaaine coitu-  
cuhane jaun. <sup>9</sup> Rai letononeein casuujua aina cuari-  
tain rai Calaohi que ereerecaanne jaan- Cana Coaunera-  
ate, itolere bana bajaanune naineein inara coaaucaanne  
coarajera ne. <sup>10</sup> Chaen nechua aca jerihane, tabiicha inara  
coaraa uhanune coina itolere bana caje bajaabajajeeun.  
<sup>11</sup> Jataaine inara coana jereeun, jeriha Cana Coaunera  
rijijeein inara rai beein, inara corootaja nichaanne, inara  
suujua corelanaala ijiin neeichene coina. <sup>12</sup> Jiniiquiin esene-  
taacachene rijijeein, ita suujua que corajeratein nihacach-  
ene coinane caa aitoon. <sup>13</sup> Cana Coaunera coreniha cajer-  
aauru, coitucuhichene jerichaanne jaunne inara rai beree-  
uni. Araain saaine niqui inara coaraa unaa jereeun. Nene

enanetojoein nainesineeun. Charijieeinteeinti leeochoaauru lauri lauri nenacaauru aina acaauru rai caohacha ichaa ahun; nii rijijieein inara rai netonai caohacha ichacaaunne jerenacaaunne inara rene turunaa jereeun. <sup>14</sup> Chaque nelatenihanune saijieein canu rai Cana Coaunera tenojoi raeranichaaunne jaunne, satiin cha coitucuelanaala, aansijiin relanojoein nenacaauru, itolere coitucueracuru, cha coitucunaa jeriheichuru, naaonjoaihunru rai, nii quiicha ranojoi tenaa jereeun. <sup>15</sup> Nii jaunne, nii Romau neiniquichene rai, jataain enachasine ichaonaa que inara rai erenaa jereeun.

*Itolere ichana nainiha enachasine ichaonaane*

<sup>16</sup> Coatiha nii cana rai beratenojoi enachasine ichaonaa bihanune coejihaaun, aca niicha ichana nainei ichaa Cana Coaunerane jaan nihane jaun, satiin esenetaeraauru Jorioocuru osa caje jauriaanejeein ichoteratenojoiniha cuurichaaaine jaun. Jorioniheichuru esenetaeraauru netonaita nichoteeurureein. <sup>17</sup> Nii cana rai beratenojoite, cana que esenetaacachene coreniha, cha ujuaihonelanaala nihacachene coina jianacoon cana tiha Cana Coaunerane coitucuerate. Nitohaneeinte ichae Cana Coaunera, nechu esenetaacachene jauncha. Nitohanihane coinat: "Leinjiin acaacha esenetaerate, niicha ichai ujuaihonelanaala nena rijijieein ichaoreein," naain laenanohineein ne, Cana Coaunera quiricha cuhane.

*Niicha ichai ujuaihoneein niha satiin cachaaurune*

<sup>18</sup> Cana Coaunerate, caohacha que ichaaoruhane coina cachaaauru rai niicha tei caohateraauru nechu aansaineein ichaonacaauru casetecarichaaain dede caje coauneeinne coarate cana que. <sup>19</sup> Acaaurute niqui, nii acaauru que Cana Coauneraacha coitucueratei coitucuure raotojoein, raajenhane coaratihane jaun. <sup>20</sup> Cana Coauneraacha ichai asinojoein nenaate coitucunaa nainichaache, caohachaaain cana suujua coaraain niicha ichai que coaacaachene. Necoaaunaain nihalu cana rai chauratanene caje coauneeinte, esinae rauhijiriin Aca Cana Coauneraneein nihane jaun chabana satonoenerihani nii niicha ichana naineine coitucuhacache. Nii jaun, nechu aansaineein coitucunaa jeriheichuru nii ujuaihoneein neeuruhane caje nichoteeururinaain. <sup>21</sup> Nitohanein raotojoein, Aca Cana Coauneranihane coitucuuruhane saijieeinte, chabana nere tonoraain esenetaain, niheichu chabana acanihane coroaecurene. Nitohanein nena coacuelanaalate, baasohacha que coaacuruhane jaun, inae nauhacaa acaauru suujuane jaun, nocoheanaanau nena rijijieein neeure. <sup>22</sup> Itolere

coitucueranihate niqui nocoetocure. Nete cha coitucuhin aitocurene. <sup>23</sup> Nitohaneein cha coitucuurenihane jaunte, Cana Coauneraacha coaunanohineein- onaa inaeraneein nena cacha tocohanein nena ecaanto jaaure. Nii choae tacaain techu, tajaacuru, atane choae terecuri, atane choae tijiariin amunacaauru, naaonjoainuri tocohanein ecaanto jaainchuru que chabana ohelanaala nena Cana Coaunera necaohacha coreeure.

<sup>24</sup> Nitohaneeuruhane jaunte, nii acaauru suujua baaso letono ichacuruhane coina, inae acaauru jianiha Cana Coaunerane jaun, nejesinajeein ita rai coejenacai ichacure. <sup>25</sup> Esinae rauhijiriin Cana Coaunera niha Cana Coaunerane saijieeinte, aca coroaena coacuelanaala niicha coaunanojoihunri coroaacure. Nii Cana Coaunerane, acaauru netonai coaunaain nihalune jaun, itolere bana leinjiin acaacha coroaenjoinihane caohachae. Nitohanemiin.

<sup>26</sup> Nii jaunte, inae acaauru que jaolecoha Cana Coaunerane jaun, itolere coejenacai ichajeein necairichaaure. Acaauru benecuru nihanatiinte, inae aina niicha jerei ichaa acaauru lanaaurune jerelanaala, inae nichao coreein namute ene aina niicha jerei ichacure. <sup>27</sup> Nii rijijieein techu, acaauru cocoichacuru netonai, inae acaauru comasaihuru aina niicha jerei ichana jerelanaala namute quicha aina niicha jerei ichacure, baasoneein acaauru letoaa acaauru suujuane rijijieein necoelanaala. Nitohaneeinte, necha aansaneein, erena tonoraureenihane jaun, caseteconein raajenihane jaberoco cairichaaure.

<sup>28</sup> Acanihane coitucunaa jerecureenihane coreniha, acaauru suujua baaso letononeein niicha ichai coitucuelanaala ichacuruhane coina, acaauru que jaolecoha Cana Coaunerane jaunte nitohaneein neeure.

<sup>29</sup> Nitohaneeinte caohacha ichana coacuelanaala baaso nejesinaacha ichaain, itolere bana niicha lateeicha que cocuhin baaso ichaain, namute cacha que necoelajaauharitiin, sonajaain jaohin, suujua acatelanaala, enaacha nohanein, acaauru ichaonihei que ichaohin, namute cacha cairichaa casajenetiin, naaonjoaain neeure.

<sup>30</sup> Chaen techu, leochaauru cocuhin acaauru que baasoneein ereein, Cana Coaunera que nejerateein, cha coitucueralanaala enaacha cacha tonoraain, itolere baasohacha cocuhin necohasitaain, baaso ichaain, inaca ere tonoraelanaala, <sup>31</sup> cha coitucunaa jerelanaala, tonaain ereeuruhane nihanatiin chabana ichaelanaala, nihei chuni belaihurui, cacha que suujua acatena inaelanaala, chabana cairichaaajoaain namute cacha coaracuruhi, naaonjoaunre. <sup>32</sup> Raotojoeinte niqui, satiin nitohaneein

ichaonacaauru atinanohineein neeuruhane coina, nitohanei rai rauhi tihalu Cana Coaunerane coitucuure. Nete, enanetojoein nitohaneein neeuruhane jianecurenihane jaun, leochaauru netonai nitohaneein neeuruhane rautatiin coaracure.

## 2

*Cana Coaunerate, esinae rauhijiriin niicha ichai ujuai-honeein nenacaauru casetecareein.*

<sup>1</sup> Nitohanihane jaun coatiha ii que suujua acatena nainerinaain Cana Coaunera, ii netonai acaauru rijijieein neeine saijieein acaauru que ereeine jaun. Chatohaneineein neeine nihanatiin coatiha nii caje nichoteriheeini. Acaauru rijijieein ichaohine saijieein acaauru que ereeine jaunte, ii raajeni-hane necoluruhequi.

<sup>2</sup> Nete nitohaneein ichaonacaauru casetecaane bana, esinae rauhijiriin acaauruhacha casetecarihanine coitucuhacache raotojoein. <sup>3</sup> Aihane jaun acaauru rijijieein ichaohine saijieein, acaauru que ereeine jaun jiaonriha ii casetecarihani Cana Coaunerane caje nichotena coaauquine. <sup>4</sup> Nitohaneeinte iicha jerenohicha ichaain neeine que nainaaain, aca Cana Coauneraneein nihane coitucuhin neeine coina, ii cojoaain ne Cana Coaunera, chabana cacha belaitohane jianenihane jaun niqui.

<sup>5</sup> Nete ii suujua coitucueeneine jaun, Cana Coaunera coitucunaa jerelanaala baasohacha ichaaine jaun, inae ecu tihane bana baaso icharaauru casetecaain, <sup>6</sup> lecachaauru naineein acaauruhacha ichai nainijianaain acaauru coretiha Cana Coaunerane bana caseteco coariquuin.

<sup>7</sup> Nitohaneeinte jataain nelateineein chabana satonoelanaala necaohachanaa coaracuruhane coina itolere bana caohacha nejesina ichajeein ichaonacaauru rai, chabana sanaachara ichaonaa tereein Cana Coaunera. <sup>8</sup> Nete laen, cha coitucunaa jerelanaala caohacha icharaauru que nejerateein baaso ichara neein nenacaauru coroatajaneraauru casetecareein obajeein.

<sup>9</sup> Satiin baaso icharaaurute inaderanaa aina necairichanaa coaracurureein. Jorioocurute ichoaichaniha casetecanohiniha cuurureein. Jorionihechuru netonai nihanatiinte jerichanejeein caseteco coaracurureein. <sup>10</sup> Nete laen satiin caohacha ichajeein ichaonacaauru rai, rai necaohacha aina jataain nelateineein nihane jaan tereein Cana Coaunera. Jorioocurute ichoaichaniha nitohanai raeraneein neeurureein. Jorionineichuru nihanatiinte nitohanai raeraneein neeurureein.

<sup>11</sup> Nitohanihate cureein leochaneein itolere cacha coaraeniha Cana Coaunerane jaun. <sup>12</sup> Satiin Jorioniheichuru-

nii Moisesa rai Cana Coaunera tenojoin rauhi coitucuhelanaala onacaaurute, nii rauhi colane oorureein. Nii rijijieein techu Jorioocuru, nii Moisesa rai Cana Coaunera tenojoin rauhi sirichuruhane jaun, inae raotojoein coitucuuruhane saijieein osaque nesarucuruhane jaun, nii acaauruhacha sirii rauhi aina cuaain colurujuenojoneein caseteco coaracurureein. <sup>13</sup> Coatiha nichoterinaain nii chuni nii rauhi aonaane saijieein tonoraelanaala nenea. Nii rauhi aonaain, aitothane rijijieein tonoraain ichoate laen, nii caje nichotereein. <sup>14</sup> Nete Jorioniheichuru, nii Moisesa rai Cana Coaunera tenojoin rauhi coitucuurenihane saijieein, nechu acaauru ichaoneein nii rauhi aitoonjoa ichacuruha suujua caje rocohinne, jelai teein nitohaniha acaauru rai rauhine jaun aihurureein. <sup>15-16</sup> Nii jaunte, acaauru nerurujua caje inanacareein nii rauhi acaauru suujua cuhane acaauruhacha sirii. Acaaurute baaso ichaain, caohacha ichaain, naaonjoaunruhane coitucueratereein acaauru suujua inae saa cana janonaane bana, Calaohi Jesocurisito aina cuaain satiin suujua cuhane asinojoneein cachaauruhacha ichai coitucuerateein rucuhereein Cana Coaunera, caa inara rai aitiin inara relaanune rijijieein.

*Moisesa rai rauhi rijijieein niha nocoetocuruha Jorioocurune*

<sup>17</sup> Iite niqui Jorioneeine jaun, Moisesa rai rauhi coitucuhin, aina inae necoasitaain Cana Coaunera aina niha nocoetohi. <sup>18</sup> Inarate niqui Cana Coauneraacha jerei coitucuhin, itolere caohacha nejesina janijiin coitucueratiha ii que nii rauhine jaun, itolere caohacha coitucuhi. <sup>19</sup> Nii ainate maosaneein nenea rijijieein cha coaraelanaala nenacaauru, <sup>20</sup> cha coitucuelanaala nenacaauru, naaonjoainuri relaain neeine coina jatoroain niha nocoetohi, ii Cana Coaunera rai rauhi coitucucuhine jaun. <sup>21</sup> Nitohaneein leeochoauru relaeraneein neeine saijieein, chanuna jana chaen ii raajeni-hane ii suujua coaraain relaanaa naineneei. “Coa asijiauha,” naain ereeine saijieein chanuna asijiauhi. <sup>22</sup> Chaen techu, “Nainihei nejelau ene aina ichaoha cachaneta,” naainte ereei niqui. Chanuna jana chaen, ii nejelau ene aina ichaohi. Chosichuru ecaantooru quete niqui jaolecoha nocoetohi. Chanuna jana chaen nii saijieein, acaauru rai Teenforo asaae coretiin nenacaauru ecaantooru basijiauhi. <sup>23</sup> Cana Coaunera tenojoi rauhi tonoraain cha chaain ichaonaa rijijieeinte niqui ereereequi. Nete rai rauhi tonoraain cha chae-neeine jaun, baasoneein Cana Coaunera coaratiha aitohi. <sup>24</sup> Nii quete esinae rauhijiriin nitohaneeichene que: “Inara



Jorionequichenete Cana Coaunera que jaoleconaanein Jorioniheichuru terateeiche,” naain laenanohineein ne, Cana Coaunera Quiricha cuhane.

<sup>25</sup> Esinae rauhijiriinte niqui nelate Moisesa rai rauhi tonoraain nihane, rai jaberoco macohi cari saerateein niha cachane. Nete nitohaneein nihane saijieein, nii rauhi tonoraain ichoanehane, nirijieein jaberoco macohi saeratelanaala nena cache rijijieein ne. <sup>26</sup> Nete laen Jorionihechuru, rai jaberoco macohi saeratelanaala neeuruhane saijieein, nii aitoha rauhine rijijieein tonoraain ichaaoruhane, jaberoco macohi saerateein nena cache rijijieein coanojoineturureein. <sup>27</sup> Nii jaberoco macohi saeratelanaala nena, nii aitoha rauhine rijijieein tonoraain ichoate, nii rauhi siriin rai jaberoco macohi cari saerateein neeuruhane saijieein nii rauhi siriin tonraelanaala nenacaaru colurujeeurureein. <sup>28</sup> Nitohanihane jaun, coatiha esinae rauhijiriin Jorio esine nihei nii jaberocohacha que Jorio nihane coarateein nena. Niheichu coatiha Jorio nihei nii jaberocohacha macohi cari saeratera. <sup>29</sup> Esinaen rauhijiriin Jorio esinete, satiin rai suujua cuhanene maajeein aca ne. Nii jaunte, rai suujua caje coaunein coacuhin, rai jaberoco macohi saeratihane latelanaala Jorio esine neein ne. Coatiha laenanohineein niha rauhine lateein aihei. Nite Cana Coaunera Suujue ichanohineein ai. Nitohanein ichoai cache, coatiha rijijiei cache caohacha ichaane coitucuhane coina coujuhin coarana nainerinaain. Leinjiin Cana Coauneraachate rai nichao coujuhin coaraain coitucureein.

### 3

<sup>1</sup> Nitohanihane jaun, chaque nelate Jorio neein, cana jaberoco macohi cari saerateein, naaonjoaain nihaane. <sup>2</sup> Araai laurii cointate niqui nelate Jorio nihaane. Jauriaanejeeinte, Jorioocuru rai nere beratelu Cana Coaunera, esenetaauruhane coina. <sup>3</sup> Aihane jaun chachareein nii naitoonjoa rijijieein neurenihane coreniha. Nii naitoonjoa rijijieein neurenihane corenihanacha, aitohane jaan ichaenerichain Cana Coaunera. <sup>4</sup> Aihei jerihane. Cana Coaunerate, casajenetooruha satiin chachaaurune nihanatiin, itolere bana naitoonjoa rijijieein cha chaain nereein. Nitohanerichaine quete:

“Inae cuu tihane banate,  
 esinae rauhijiriin aitohine rijijieein  
 chachaaine coitucuurureein.  
 Nii banate,  
 ii esenetaauruhi casetecai nohanelanaalane  
 coitucuurureein.  
 Nitohaneinte

joenreein ii colurujuera amuritoriquiin,”  
naain ne laenanohineein Cana Coaunera Quiricha inoaensi  
cuhane.

<sup>5</sup> Nete nitohaneein aitocuruha tabaaaurune rijjijeein  
canaacha ichai baaso, jataain necaohachaa Cana  
Coaunerane coaratihane, chanuna jana chaen nii baaso  
ichacaachene coreniha cana casetecae Cana Coaunera.  
Nete nii baaso ichacaachene coreniha cana casetecaa  
Cana Coaunerane nihanatiin baaso icharaniha benaa  
nainenihacache. <sup>6</sup> Coatiha nitohanihei. Nitohaneein baaso  
icharanihane, coatiha satiin chauratane que nenacaauru  
cachaauru ichao cojuhin coaraain rucuhena nainerihei.

<sup>7</sup> Nitohaneein nohaniha cachane aina jataain necaohachaa  
Cana Coaunera beeichene saiijeein, chanuna jana chaen  
osaaotoha canu beeiche. <sup>8</sup> Nitohanihanete satiin baaso  
icharichaache, niha caohachane coina. Niritiinte, cacha re-  
laa canacaanu beure, nechu acaauru esenetaain, canu que  
jaolecooruhane coina. Nete niritiin erenacaauru cachaauru  
inae caseteco coaracureein.

*Satiinte cana osa ujuaihoneein nihacache.*

<sup>9</sup> Chatonaain chaainti coaaquiche. Cana Jorio nichaach-  
enena, Jorio niheichuru amurijiriin cacha caohachaneein  
nihacache. Aihei jerihane. Inae inaraque, Jorioocuru, Jori-  
oniheichuru, naonjoainunru aina satiin osaaonaneein ni-  
hacachene coitucueratihacaanu. <sup>10</sup> Nii quete:

“Nihei chuni cacha,  
canu rai caohacha ichaain nei.  
Nihei caohachanainejeein leinjiiniji.

<sup>11</sup> Nihei leinjiiniji  
Cana Coaunera coacuhin  
caohacha coitucuhin ichara.  
<sup>12</sup> Satiinte  
baaso jelson suujua cuaain  
caohacha ichana coacuelanaala  
baaso ichacure.

Nii jaunte  
nene leinjiiniji caohacha ichara.  
Nihei caohacha nainejeein leinjiiniji.

<sup>13</sup> Acaauru rarote  
leenjiin calani ne,  
neforacaa atanebanane rijjijie.  
Jana acaauru lelete,  
enaacha cacha coritaauruhane jaaneein ne.

Acaauru ujuaaete,  
aiha acano catu corane rijjijeein  
cacha cunaitaeraniha ne.

<sup>14</sup> Jana acaauru ujuaae cajete  
enaacha mituhe cacha cotaain,

nechu aansainiha beeuruha ne.

<sup>15</sup> Enaachate  
sonajaain jaaonaa  
jerecuruhane jaun  
cuhin sonajaain jaaore.

<sup>16</sup> Amuuruhane jaaunrute  
aansijiiniji cautijiaelanaala  
niicha eruuri itajeeure.

<sup>17</sup> Nii jaunte,  
chabana caohacha ichaain,  
raotojoein ichaonaa nainecurene.

<sup>18</sup> Nii chabana  
acaauru casetecarichaain  
Cana Coaunerane que  
coacuhin casihuruhi,”

naain ne laenanohineein Cana Coaunera Quiricha cuhane.

<sup>19</sup> Nete satiin nii rauhi aitoonjoan tonoraain nenacaauru netonai, osaaonanein neeuruhane coitucuhin neeuruhane coina aitoha nii rauhine coitucuhacache. Aihane jaun cacha coujuhin coaraa Cana Coaunerane bana, nerinaain nii que tonaain erenaa nainei. <sup>20</sup> Nii jaun coatiha rauhi tonoraain necaauru nihanatiin, nii rauhi tonoraauruhane coreniha acaauru osa caje ichoteratenajarinaain Cana Coaunera, nii rauhi, esinae rauhijiriin osaaocaachene coitucunaa coinaacha nelatihane jaun.

*Esenetaacachene aina cuaainchate nichoterichaacheein*

<sup>21-22</sup> Nete laen, inae ena nii rauhi colane cana ichoteraterichaaaine coitucuerate Cana Coaunera. Niite coitucunaa nainichaache, nii rauhi aina nere beracuru *profetacuru* laenanohi ereretaain coaraain. Leinjiin Jesocurisito esenetaacachene aina cuaainchate naine, cana osa caje cana ichoteratiha Cana Coaunerane. Nii rijijieein techu, satiin esenetaain nenacaauru netonai ichoteratereein. <sup>23</sup> Satiin osa que nesarucuruhane jaunte, Cana ichoteraneein niha Cana Coaunerane saiijieein que jaolequiin neure. <sup>24</sup> Nete jataain cana belaitohane jaun, Jesocurisito aina cuaain inara ichoterate core colane Cana Coaunera. Coatiha rai caohacha ichaain neechene jaun, inara ichoteratihei Cana Coaunera. <sup>25</sup> Nitohaneein jeriha Cana Coaunerane jaunte ohelu Jesocurisito, rai coichana aina cuaain cana osa aninoain, cana que suujua acatena nainihane coina. Nechu queecha jaequiin nihacachene corenihachate, cha ujuaihonelanaala nena rijijieein cana tein cana coaraane coitucuerate Cana Coaunera, <sup>26</sup> esinae rauhijiriin luhecotariin cha coetana inaenihane jaun. Enate esinae rauhijiriin caohacha ichaain, canaacha ichai ujuaihoneein nena caje satiin Jesocurisito esenetaeranichaachene ichoteratihane coarate.

<sup>27</sup> Nitohanihane jaun, coatiha chaelai que nelatihei Cana Coaunera coitucuhin rai caohacha ichaa nocoetiin necoa-sitaa cachane. Nii necohasitanajate, caohacha nainejeein nitaje. Aihane jaun coatiha nii rauhi tonoraane coreniha, osa caje nichoteein nihei chuni cache. Nechu Cana Coaunera esenetaane corenihate nichoteein ne cache. <sup>28</sup> Nitohaneeinte, nii rauhi tonoraain nihacachene, cana ichoteraterichaaaine coina aitelanaala esenetaacachene coreniha osaaocaachene caje cana ichoteratihane coina aitoa Cana Coaunerane coitucuhacache inae.

<sup>29</sup> Leinjiin Jorioocuruhacha Coauneraneeinna niha Cana Coaunera. Tana satiin lauri lauri nenacaauru cachaauru netonai Coauneraneein nihane. Aihanete ne. Satiin lauri lauri nenacaauru netonai Coauneraneeinte ne Cana Coaunera. <sup>30</sup> Coatiha nihei nii baiha chuni Coaunera. Acate rai jaberoco macohi cari saeratelanaala neein esenetaeraaurune maajein ichoterateraneein ne. <sup>31</sup> Nitohanihane jaunna, nii canaacha esenetai esenetaacachene jaun, inae chaque nelateniha nii rauhi. Coatiha aihei. Nii ainate esinae rauhijiriin nelatiha nii rauhine que aitocoaache.

## 4

### *Cana Coaunera esenetaa Abaraaunne que erenaa*

<sup>1</sup> Nitohanihane jaun, tonarihacache cana foeratera inoausi Abaraaun que. <sup>2</sup> Esinae rauhijiriin caohacha ichaane coreniha, osa caje colunohineein nenea raane rijijieein tein raa Cana Coauneranete laen caohachare caohacha icharanihane que aitoa Abaraaunne. Nete neniha leinjiinniji caohacha icharane jaun, caohacha icharanihane que aitoa cachane rautaene Cana Coaunera. <sup>3</sup> Nitohanihane quete: “Esenetaa Abaraaunne jaunte, osa caje colunohineein nenea raane rijijieein tein rae Cana Coaunera” naain laenanohineein ne Cana Coaunera Quiricha cuhane. <sup>4</sup> Chunocoha amihaneein nihane jana, rai coreteraa nii rai namihaneeonne, coatiha que nirijieein joareein coreniha belaiha rai tihei nii coretera. Nii rai namihaneon coretihane jaante, nii namihaneon cainaeraniha rai tenojoi ne. <sup>5</sup> Nete laen Cana Coauneraacha que jaaequiin neein esenetaera, nii esenetaaneecha coreniha osa caje colunohineein nenea raane rijijieein tein rae Cana Coaunera, niicha ichai coreniha rai cha chaain neeuruhane que airijiin. <sup>6</sup> Nitohaneein osaaocane nihanatiin, esenetaain niha cachane, osa caje coulunohineein nenea neein tein raa Cana Coaunerane quete:

<sup>7</sup> “Rachoojoeinte neeure,

baaso ichajejin osa que nesarucuruhane nihanatiin, osa caje coulunohineein

nenaaneein teein  
Cana Coauneraacha ranojoinunri.

<sup>8</sup> Rachoojoeinte ne,  
nii nichotenaacha,  
rai nosa coreniha  
casetecaenerichaaain Cana Coaunerane jaun,”  
naain niha erenaane rijitoein aitelu cana inoaensi Rabiri  
amure.

<sup>9</sup> Rai jaberoco macohi cari saerateeurera *circuncidocuru*  
raaicha aitenihanena, nirijieein rai jaberoco cari  
saeratelanaala nenacaauru raine maajeein niritiin  
niha nii erenaacha. Inae acaihaniji que esenetaaneecha  
coreniha osa caje coulunohineein nenaacha raane rijijieein  
teeni Abaraaun raa Cana Coaunerane coitucuhacache  
raotjoein. <sup>10</sup> Chatohaneein niha Abaraaunne jana osa  
caje coulunohineein nenaacha raane rijijieein raelu Cana  
Coaunera. Inae rai jaberoco macohi cari saerateein nihane  
janana osa caje colunohineein nenaaneein teein raelu  
Cana Coaunera. Coatihai ahi. Jaiti rai jaberoco macohi  
cari saeratenihane janate raelu Cana Coaunera. <sup>11</sup> Inae  
nitohaneein osa caje colunohineein nenaacha raane rijijieein  
teeni raa Cana Coaunerane baihaate laen, nii cojunacanu que  
rai jaberoco macohi cari saeratelu Abaraaun. Nitohaniane  
jaunte, satiin rai jaberoco macohi cari saeratelanaala neein,  
osa caje colunohineein nenaacha rijijieein neeururichaaaine  
esenetaeraauru netonai inacaneein ne nii Abaraaun.  
Nii rijijieein techu, nii esenetaauruhane coreniha osa  
caje coulunohineein nenaacha raane rijijieein ranajae Cana  
Coaunera. <sup>12</sup> Jerichanejeein techu, jaiti rai jaberoco  
macohi cari saerateein nelanaala, esenetaalu Abaraaunne  
rijijieein neein esenetaeraauru cachaauru inacaneein ne  
nii Abaraaun. Nii rijijieein techu, jaberoco macohi cari  
saerateein neein, nii aihalune rijijieein esenetaeraauru  
netonai inacaneein ne nii Abaraaun.

*Esenetaacachene aina cuaainte, cana rai naitoonjoa tereein  
Cana Coaunera.*

<sup>13</sup> Cana Coaunerate Abaraaun rai aitelu, rai nefoerateeuru  
aina nirijieein core colane acaauru rai chauratane tihane,  
neroraneein neeruhane coina. Coatihai, Moisesa rai rauhi  
tonoraain niha Abaraaunne jaun, nii rai chauratane tihane  
coina aitohilu Cana Coaunera. Nechu esenetaane jaunte, nii  
rai chauratane tihane coina aitiin, osa caje coulunohineein  
nenaacha raane rijijieein teein raelu. <sup>14</sup> Nii rauhi tonoraeraauru,  
nii Cana Coauneracha tenaa jerei raeranunein neeuruhane  
jana nihane, coatihai chaque nelateein nerihei nii canaacha  
esenetai. Inacoojoeinte esenetaarichache, nii tihane coina  
aitohalu Cana Coaunerane jaan nihanatiin cana rainein

nerihe. <sup>15</sup> Nii rauhite cha ujuaihonnein caseteco coaracaachene coina nenaaneein ne. Nii niha rauhine colane nerihei cha ujuaihonnein caseteco coaraane rai nei.

<sup>16</sup> Nii jaunte satiin nii rai nefoerateeuru aina Abaraaun rai niicha teeni tiha core colane esenetaauruhane aina cuaaine coina aitelu Cana Coaunera. Aihane jaun, coatiha nii rauhi tonoraeraauru raaicha nii tihane coina aitohilu Cana Coaunera. Acate esenetaalu Abaraaunne rijijieein, satiin esenetaeraauru rainnein nena ne. Nitohanein esenetaane jaunte, satiin cana inacanein ne Abaraaun. <sup>17</sup> Rai Quiricha Inoainsi cuhane: “Canune, arajii lauri lauri nenacaauru cachaauru inacanein ii tereenni” naain rai aitohalu Cana Coaunerane rijijieeinte, nii Abaraauncha esenetai Cana Coaunera, onacaauru rai ichaonaa tein, jaiti coaunanojoinelanaala nena, naonjoainuri Coauneranein nena ne.

<sup>18</sup> Inae calaohirichaaanne esenetaeniha Abaraaunne janate: “Arajii lauri lauri nenacaauru cachaauru inacaneinte neriquincha” naa rai Cana Coaunerane esenetaain acaacha cohajihane jaunte, acaauru inacanein ne Abaraaun, “Caa jeeonihate cuurureein ii nefoerateeurura” naain que arasijie coarateein rai aitohalu Cana Coaunerane rijijieein. <sup>19</sup> Inae lefasha jaanacaneelalajeein ichaohane jaun, inae rai comasai Sara aina jiniiquiin biinaaneein, leinjiiniji canaanai sirilanaala ooruhane rai neuru saijieeinte, nii rai aitoha Cana Coaunerane esenetaane jianenelu Abaraaun. <sup>20-21</sup> Nitohaneinte, esenetaane jianena coacuelanaala, jelai amuritoheriin esinae rauhijiriin nii rai naitoonjoan icharihani Cana Coaunerane esenetaane jaun, Cana Coaunera corojeein, acaacha cohajeein nelu Abaraaun. <sup>22</sup> Nitohanein esenetaane jaunte, osa caje coulucohin raelu Cana Coaunera.

<sup>23</sup> Coatiha nii esenetaa Abaraaunne jaun, leinjiin acaacha raane coina aitiin laenaeratiheilulu Cana Coaunera, <sup>24-25</sup> cana netonai quete aitiin laenaeratelu. Nii jaunte, cana netonai esenetaacachene jaun, cana colucohin cana netonai rae Cana Coaunera. Satiin cana osa coreniha cana coreenraniha ohalu. Cana osa ujuihonein nena caje cana mitaeranu que Cana Curuanaa Jesocurisitone esenetaacachene jaunte, cana netonai rae Cana Coaunera.

## 5

### *Inae cha ujuaihonnein nihaacache.*

<sup>1</sup> Aihane jaunte, esenetaacachene coreniha Jesocurisito aina cuaain inae cha ujuaihonelanaala Cana Coaunera aina raotojoein nihaacache. <sup>2</sup> Nii Jesocurisito esenetaacachene

aina cuaainte, cana coroatajane Cana Coaunera. Nii ainate cana suujua letono ichana coacuelanaala rachoojihacache, rai Cojoanona que nerichaacheeinne cohajein. <sup>3</sup> Coatiha acaacha nihei. Nii rijijieein techu, necairichanaa coaracaachene nihanatiin rachoojoein nihacache, nii necairichanaa aina cuaain jelai amuritoheriin laraajiin itolere abaantaain nihacachene coitucuhacachene jaun. <sup>4</sup> Nii necairichanaa abaantaain laraajiin nenaate, inae esinae rauhijiriin ijiin neein canaacha cohajei cohana nainerichaacheein. <sup>5</sup> Nii canaacha cojoai coatiha inacojoein cohahaacache, rai Suujue cana rai niicha tei aina cuaain jataain cana belaiha Cana Coaunerane jaan nihane jaun.

<sup>6</sup> Nitohaneeinte, cana osa caje nichotena nainelanaala nihacachene jana, inae cojoinaca que turuhane jana, cana baaso icharanichaachene coreenraniha ohelu Jesocurisito. <sup>7</sup> Coatiha nerihei chuni, leecha cacha baaso ichara coreenraniha nesohin nijioaenrateein nei. Niheichu caohacha ichara cacha coreenraniha nihanatiin nesohin nijioaeratenaa nainihe chuni. Coaraain aihane nihane chachu jerihane, leinjiin caohacha ichara cacha coreenraniha nesohin nijioaenratere chuni. <sup>8</sup> Nete jataain cana belaitohane coaratiha, cana osa coreniha oha rai Calaohi Jesocurisitone coina letoaelu Cana Coaunera. <sup>9</sup> Inae nitohanein cana osa coreniha ohalu Jesocurisitone jaun, inae cha ujuaihonelanaala nihacachene jaunte, nii amuritoheriin aina cuaain caseteco caje nichoterichaacheein. <sup>10</sup> Nitohanein jaiti que nejeratenaaneein nihacachene jana ohalu rai Calao-hine aina cuaain, aina raotojoein jiniiquiin nihacachene coina ichaalune jaun techu, nii amuritoheriin cana ichoteratereein Cana Coaunera, inae cana que suujua acatihane jaun. <sup>11</sup> Coatiha niicha nijihe. Rai Calaohi Jesocurisito aina cuaainte, Cana Coaunera coroaecaache. Nii Curisito, Cana Coaunera que nejeratenaaneein nihacachene caje, aina jiniiquiin raotojoein cana teraneein nena nihane jaun.

### *Adaan aina Jesocurisito*

<sup>12</sup> Nii rijijieein techu, leinjiin cacha caje nunuhetein caa chauratane que turuhin nelu osa, cacha itajeranu que. Nii cacha itajeranu onaate satiin cachaauru lomohelu, osa que nesarucuruha satiine jaun. <sup>13</sup> Nitohaneeinte jaiti neniha Moisesa rai rauhine jana, inae nii ajiniha nesilu chauratane que osa. Coatiha niqui coitucueraailu nii osa, jaiti neniha nii rauhine jaun. <sup>14</sup> Nii jaunte nihalu Adaane caje coaanein nihalu Moisesane que tiaaajoaain osa que nesarucuruhane jaun, ohin nitaje rai neurelu satiin cachaauru. Coatiha niqui, leinjiin rauhi tonoraain neurenihane coreniha osa

que nesaruhin neeuruhilu aiha Adaane rijijieein. Charijieein teeinti, nii jaurianejeein nenea Adaan- jauriaanejeein osa raain nelu, nii rijijieein techu, nii Adaan amurijiriin nenea canaacha cohajei- leinjiin cacha ichaonaa turuaain nelu.

<sup>15</sup> Nete nii Adaancha ichai nii chaque nelateein nedae ne, amurijiriin jataain nelatiha nii cana belaiha cana rai Cana Coauneraacha teine jaun. Nitohaneeinte baaso ichaa leinjiin cachane coreniha, satiin osa que nesaruhin nitajenaaneein neeurelu satiin cachaauru niqiu. Nete core colane cana belaiha cana rai leinjiin Jesocurisito aina cuaain Cana Coaunera tenojoi, nii amurijiriin nelateein, satiin cachaauru rai caohacha ichaeraneein ne. <sup>16</sup> Nii naosatiha leinjiin Adaane jaan, coatiha chaque nelateein nedaai, nii cana belaiha Cana Coaunerane jaan aina cuaain. Nii jaunte niqiu, leinjiin cacha osa coreniha, satiin caseteco coaracuruhane rai neeurelu cachaauru. Nete nii cana rai niicha tei aina cuaain, nosa que namuritiin niha cachane nihanatiin, inae nii ujuaihoneein neureniha cachaaurune coina aitelu Cana Coaunera. <sup>17</sup> Nitohaneein leinjiin cacha coreniha, cachaauru que niicha ichana nainei ichaain satiin cachaauru itajiha nii onaane jaunte, nii amurijiriin niicha ichana nainei ichacurureein, jataain acauru belaitohane jaun, Jesocurisito aina cuaain enachasine ichaonaa que ichaohin neeuruha nii core colane osa caje Cana Coaunera roconojoinunru cachaaurune coina.

<sup>18</sup> Charijieein teeinti, osa que nesaruha Adaane coreniha satiin cachaauru caseteco coaracuruhane rai neeurelu. Nii rijijieein techu, caseteco coaracuruhane rai neeuruha cachaaurune jana, niicha ichai aina cuaain, jianacoon osa caje cacha rocoheranu ichaonaa uhaain turuhelu Jesocurisito. <sup>19</sup> Nitohaneeinte erenaa tonorae niha Adaaneecha coreniha arajii cachaauru osa que nesarucurelu. Nii rijijieein techu, erenaa tonoraaain niha leinjiin cachane coreniha, jianacoon neeureein cha ujuaihonelanaala arajii cachaauru.

<sup>20</sup> Moisesa rai rauhite niqiu, osa que nesaruhane coitucuhin jianiha cachane coina nenaanelu. Nete nii saijieein aina jelai amuritoheriin osa que namuritocurelu cachaauru. Nete nitohaneein jataain osa que namuritocuruha cachaaurune jana, jeelai amuritoheriin jataain cachaauru belaitohane coarate cana que Cana Coaunera. <sup>21</sup> Charijieein teeinti cachaauru lomohin ne osa, cachaauru atinaain itajihane coina. Nii rijijieein techu itolereenein cachaauru lomoritin ne, nii osa caje cacha mitaeranu que cacha belaitohane jaan Jesocurisito aina cuaain ichaonaa satonohelanaala nenea Cana Coaunera tenojoin.



## 6

*Osa coreniha onaanein nihacachene nihanatiinte, Jesocurisito coreniha ichaorichaacheein.*

<sup>1</sup> Aihane jaun chajana icharihacache. Osa que nesaru-jueeinna ichaorichaache, jelai amuritoheriin cana belaiha Cana Coaunerane coina. <sup>2</sup> Aihei jerihane. Inasiina inae osa jianein ichaonaa saijieein, nacoaunein osa que nesaru-jueein ichaorichaache. <sup>3</sup> Tana inae cana baotisaauruhane aina cuaain, aina jiniiquiin o caje ichanaalu Jesocurisitone rijijieein inae nihacachene coitucuhichene. <sup>4</sup> Nitohaneinte Jesocurisito aina jiniiquiin cana jaberoco conauteranein ne cana baotisaauruhane jaan. Aina ohin, nii o caje ichatihalu, jataain itolere niicha ichana nainei ichaain Cana Coaunerane rijijieein, cana netonai nii onaa rijijieein nena caje enachasine ichaonaa que ichaohacachene coina.

<sup>5</sup> Aihane jaun inae aina jiniiquiin onaa rijijieein nihacachene jaunte, o caje ichanaain nihalune rijijieein cana netonai aina jiniiquiin cana o caje ichanaain nerichaacheein. <sup>6</sup> Nii jauriaanejeein cana ichao que ichaohacachelune jaante, inae Jesocurisito aina jiniiquiin coroso que tenojoineein itajenojoi nelu. Nii cana ichao rijijieein ichaohin naosatenaanaja itajenojoineein nihane jaun, inae nainiheii cana saruha osane rijitajoeein nacoaunein neosatihajeein nihacachene. <sup>7</sup> Leinjiin cacha inae ohane, inae nacoaunein naosatenaa nainiheii. <sup>8</sup> Nii rijijieein techu inae Jesocurisito aina onaanein cana jaberoco tihacachelune jaun, aina jiniiquiin ichaorichaacheeine cohajihacache. <sup>9</sup> Chaen techu, inae onaa caje ichanaalune jaun inae nacoaunein ohenerihani Jesocurisitone coitucuhacache, inae aina chachana naineniha onaane jaun. <sup>10</sup> Nii ohalu Jesocurisitonete, osa itajeranu que lesajeeincha ailu, inae chabana nacoaunein ohenihane coina. Nete laen inae enene, Cana Coaunera rai ichaonaa que ichoae. <sup>11</sup> Nii rijijieein techu, inara netonai osa coreniha onaanein inara jaberoco teein, Cana Coaunera rai ichaonaa que Jesocurisito aina jiniiquiin ichaohichene caohachae.

<sup>12</sup> Aihane jaun jiaonriha nenacaenein inara jaberoco ohane rai nena amuritonaa jeriha osane rijitajoeein, inara jaberocohacha jerei ichaain neeichene. <sup>13</sup> Jiaonriha inara jaberoco aina cuaain niicha jerei baaso ichaa osane coina, rai inara jaberoco teein neeichene. Nitohanein nena coacuelanaala, ohin caje ichanaain ainaa rijijieein, Cana Coaunera rai inara jaberoco teeuchete, coujuriu Cana Coaunera rai caohacha ichaeranein neeiche. <sup>14</sup> Nitohanein neeichene,

coatiha inae inara amuritonaa nainerinaain osa, inae Moisesa rai rauhi aina nelanaala, inara belaiha Cana Coaunerane jaancha aina neeichene jaun.

*Jaiti osa aina ichaonaa bana*

<sup>15</sup> Nitohanihane jaun chatohanerihacache. Inae Moisesa rai rauhi aina nelanaala, cana belaiha Cana Coaunerane jaan aina nenea jaunna, osa que naosatihajeein ichaorichaache. Coatiha aihei. Nainiheini nitohanein ichaohacachene. <sup>16</sup> Inarate raotojoein leinjiin fatoroon letononein rai niicha jerei ichaquichene coina aina cuhin neeichene, leinjiin acaacha letononein rai nere tonoraain neeichene coitucuhiche. Nii rijijeein osa letononein nenea jeriquichenete, ohin nitajeeichene rai neriquicheein. Jana Cana Coaunera esenetaain, Aca jerihane rijijeein neeichene coina ichohichenete, rauhijiriin ichaonaa esine que ichaoriquicheein. <sup>17</sup> Nete jataain caohacha ichae Cana Coaunera, inae inara jauriaa osaacha sacurejetocoichene jianein, inae inara suujua aina cuaritaain inara relaacaanune jaan tonoraain acaacha esenetaain neeichene jaun. <sup>18</sup> Nitohaneinte osa letononein neeichene caje, inae jianacoon neein rauhijiriin ichaonaa esine que ichaonaa tera letononein ichaohichene coina neeiche.

<sup>19</sup> Aitoha joaereein cachane rijitojoeine caa inara rai beejeeun, jaiti joaereein cacha rijijeein neeichene jaun coitucunaa nainesineeichene coataa. Charijeein teeinti inara jaberoco teeichelu nii baaso icharanein nenea rai, aina cuaain baaso ichaane coina, nii rijijeeinchu nii inara jaberoco teeuche nii caohacha ichaera rai, aina cuaain caohacha ichaane coina.

<sup>20</sup> Jaiti osa letononein neeichene bana, coatiha nii rauhijiriin ichaonaa esine rai cha chaeranein ichaoheechelu.

<sup>21</sup> Nete inara ichao rai caohachanu erunaa naineneechulune jaun, ohin nitajeeichene coinaacha inara sarueranihalu nii baasone jaun, inae enene taolu inara ichao cojeein ichaohiche. <sup>22</sup> Nete laen inae enene, inae nii inara osa letononein neeichene caje jianacoon neein, jeriha Cana Coaunerane rijijeein inaraacha ichai ichaain neeichene coina jatoroain neeiche. Niite laen jataain inara caohachanu que ichaquiche, Cana Coaunera que banijiaain nenea ichaonaa que ichaoha aaichene jaun, chabana satonoelanaala nenea ichaonaa rariquicheein. <sup>23</sup> Nii inara osa inaraacha sacuhite, nechu inara rai onaa tein, inara itajeranu que nelu. Nete laen, nii ena inara belaiha Cana Coaunera tenojohin, ichaonaa sanaacharanejeein cana Curuanaa Jesocurisiko aina jiniiquiin ichaohichene teranein nereein.

## 7

*Inae nisirihateein nihane aiha cachane rijijiei que erenaa*

<sup>1</sup> Canejeraauru, inarate raotojoein Moisesa rai rauhi coitucuhin neeiche. Nii jaunte nii rauhi, jaiti ichaoha cachane tonohanau rai nelatejeecane coitucuhiche raotojoein. <sup>2</sup> Coaracuche nachuhinti, nii rauhi, leinjiin ene nisirihateein nihane, oha nii lanane reeintiaajeein ainaacha ichaohane coina aitohane. Nete inae oha nii lanane, inae nii rauhi lanaacha aina ichaohane coina aitohane caje jianacoo ne nii ene. <sup>3</sup> Nitohanihane jaunte niqui, jaiti ichaoha rai lanane tonohanau, leeocha quicha aina niicha jerei ichaane, osa que nesarurichaaanne que aite nii rauhi. Nete inae oha nii lanane, inae leeocha quicha raane nihanatiin osa que nesaruha aihane que aitene nii rauhi.

<sup>4</sup> Nii rijijieein techu inara netonai inae Jesocurisito o aina cuaain rauhi caje nichoteeichene jaun, inae inara aina cha chana nainene nii rauhi. Nitohaneeinte inae nii o caje ichanaai nena Jesocurisito raineein neeiche. Inae nitohanihane jaunte, jataain Cana Coaunera notaracae rai jataain nelateinnein ne cana ichao. <sup>5</sup> Jaiti joareein cacha rijijieein naosatihajeein ichaohacachene banate, cana jaberoco aina cuaain baaso coacuhi baasohacha ichajeein nihacachene jaun, inae ohin nitajihacachene rai nihacachene coaratiha cana quene coinaacha nelateein nelu Moisesa rai rauhi. <sup>6</sup> Nete laen inae ena aitoha rauhine tonoraain naitoonjoaacha ichajeein nihacachene itajeein jianichaache. Inae colane jianacoon neein, Cana Coauneraacha jerei ichajeein, rai Suujue tenojoi ichaonaa que ichaohacache, rauji-aain inoaelu rauhi laenanohineein nena tonoraain ichaohacachene jianein.

*Moisesa rai rauhi colane osa coitucuhaacache.*

<sup>7</sup> Nitohanihane jaunna osa que cana saruhane coina ni-halu rauhine que aitorichaache. Aihei, coatiha osa que cana saruhi Moisesa rai rauhi. Nihalu nii rauhine colane, coatiha “Naaonjoaite osa ne” naain coitucurihaanulu. Ni-heichu: “Jionriha chamute cachacha sirii jereein coaraain que necoelaaine,” naain biha nii rauhine colane, coatiha chabana nii coitucurihaaun. <sup>8</sup> Nete nii rauhi aina cuaain nelararajaaan, nechu itolere baaso coacuhin aca jerihane rijijieein ichacaaunne coina canu sarue nii osa. Nii rauhi colane nerihei naosateein nihane coitucuhin nei. <sup>9</sup> Nii jaunna jaiti neniha rauhine jana, “Caohachaaanne ichaon,” nare-jetoonlu. Nete, inae niha nii rauhine aina cuaain canu ichao coaracaaunne jana, ohin nitajenaaneein niha canu ichaone coitucuunlu. <sup>10-11</sup> Nitohaneeinte, canu rai ichaonaa telanaala, ohin nitajihanune coina, cacha itajera rai canu te

osa, nii rauhi aina cuaain nelararajiaain canu coritaaain canu itajihane coina.

<sup>12</sup> Nii inara rai aitocooaunne rijijieeinte, nii rauhi leinjiin acaneein ne. Chaen nii rauhi naitoonjoante casajenelanaala jataain caohachaneein nenea ne. <sup>13</sup> Nitohanihane jaunna, nii caohacha ichara canu ichao itajeriha. Coatiha aihei. Nii osa te, esinae rauhijiriin osa nihane coaratihana canu quene coina caohachaneein nenea rauhi aina cuaain canu atinaain canu itajelu. Nitohaneeinte jataain banejelanaala baasoniha naosatenaane coitucuerate canu que nii rauhi.

<sup>14</sup> Raotojoeeinte Cana Coaunera tenojoineein niha niicha tei rauhine coitucuhacache niqui, nete canu jaberoco, osa letononeein nihanune jaun, itolere bana baaso ichaaun. <sup>15</sup> Chanuchaainti nitohaneein neeun. Coatihana canuhacha ichai coitucuhin ichahaaun. Nena laen, enaacha canuhacha ichana nainihei ichaaun. <sup>16</sup> Nii canuhacha ichana jerihe i chacaunna laen, aina cuaain jataain caohacha icha-raniha nii rauhine coitucureeun. <sup>17</sup> Nitohanihane coatihana canu raajeni hane ichahaaun, canu jaberoco cuhane nenea osate nii ichae. <sup>18</sup> Nii joaenreein cacha rijijieein osaaotohanune jaunte, canu jaberoco cuhane neniha caohachane jaun, caohacha ichana jerichaaunne nihanatiin ichana nainesineeun. <sup>19</sup> Nii jaunne caohacha canuhacha ichana jerei ichaelanaala, baaso canuhacha ichana jerihe ichaaun. <sup>20</sup> Nitohaneein canuhacha ichana jerihe i chacaunne, coatihana canu inae nii ichahaaun. Nii osa canu suujueniha nenaate ichae. <sup>21</sup> Nii ainane caohacha ichana jerichaaunne nihanatiin, itolere bana baaso nejesinaacha ichacaunne que inae naihaaun.

<sup>22</sup> Canu suujua cuhanena niqui Cana Coaunera rai nii rauhi rautatoon. <sup>23</sup> Nete canu suujua cuhane ne canu rai caohacha coaaucaunne caohatera. Acate nii osa rai rauhinee in canu suujua cuhane neein baaso ichacaunne coina canu suujua sarueraneein ne.

<sup>24</sup> Cairichaaajoaanu nohane. Chajana nohane, nii canu suujua sirihana onaane caje, jela caje canu suujua rocore. <sup>25</sup> Cana Coaunera canuhacha coraajeite, rai Calaohi Jesocurisito aina cuaain nainere, nii caje canu rochin nihane. Nete jaiti joaereein cacha rijijieein nihanune jaun, jaiti canu rerohecae osa. Inae satononejeeine Cana Coaunera rai rauhi tonoraain nihanune coina aitoon.

## 8

*Jeriha Cana Coaunera Suujuene rijijieein ichaohacachene*

<sup>1</sup> Nitohanihane jaun coatiha inae caseteconein neeururi-naain leinjiinni Jesocurisito cachaneein Aca jerihane rijijeein aina ichaonacaauru. <sup>2</sup> Nitohaneeinte Cana Coaunera Suujue rai rauhi, Jesocurisito aina cuain cana rai ichaonaa tera, cana atinaain cana itajihane rai niha osa rai rauhine caje cana rocoeranein ne. <sup>3</sup> Rai nichaohacha sacuhin satiin osaaotoorua cachaurune jaun acauru aina cha ichana naineniha Moisesa rai Cana Coaunera tenojoin rauhine janate, Cana Coaunera laen nii Moisesa rai rauhicha ichana nainesiheilu ichaelu. Nii icharaanu quete leinjiin cacha rijijeein nena rai Calaohi letoaain nelu Cana Coaunera. Nitohaneeinte turuhin joenreein cacha osaaona rijijeein, satiin cana osa amuritiin coreniha ohelu cana amute cacha rijijeein Jesocurisito. <sup>4</sup> Nitohaneeinte ichaelu Cana Coaunera, satiin cana nii aitoha rauhine rijijeein tonoraain nihacachene, joareein cacha rijijeein naosatihajeein ichaohacachene jianein, jeriha rai Suujuene rijijeein ichaonaa coina.

<sup>5</sup> Joareein cacha osaaona rijijeein ichaonacaauru cachaurute, joareein suujua letonohacha ichajeein queecha coacuhin ichaaore. Nete laen jeriha Cana Coaunera Suujuene rijijeein ichaonacaauru, Cana Coaunera Suujue jerenohicha que coacuhin ichaaore. <sup>6</sup> Nechu jeriha cana suujuane rijijeein coaaucaanete, ohin nitajihacane coina aihaca. Nete jeriha Cana Coaunera Suujuene rijijeein coaaucaane laen, jataain raotojoein ichaonaanaja que ichaohacane coina aihacache. <sup>7</sup> Nii jeriha suujuane rijijeein coacuhin ichaonacaauru cachaurute, Cana Coaunera que nejeratenaaneein ichaaore, jeriha rai Suujuene rijijeein nena jarelanaala, niheichu tonorana jerecurenihane jaun. <sup>8</sup> Nii jaun jeriha osane rijijeein coacuhin ichaonacaauru cachaurute, Cana Coauneraacha jerei ichana nainecurene.

<sup>9</sup> Nete laen inara, nitohanein coacuhin ichoaelanaala, inae jeriha Cana Coaunera Suujuene rijijeein coacuhin ichaohiche. Aihachu esinae rauhijiriin inara suujueniha niha Cana Coaunera Suujuene. Suujueniha Jesocurisito Suujue sirilanaala nena cacha, coatiha Jesocurisito cachanihei. <sup>10</sup> Nete inara suujueniha niha Jesocurisito Suujuene, inara rai ichaonaa tiha aichein Cana Coaunera, inara osa coreniha inae ohin nitajeeichene rai neeichene jana, nii caje inara ichoteratein nihalune jaun. <sup>11</sup> Nitohanein inara suujueniha ichaoha nii o caje Jesocurisito ichateralu Cana Coaunera Suujuenete, nii jeelai Jesocurisito ichateralu ohin nitajeeichene rai neeichene caje inara ichateein inara rai ena nena ichaonaa terein nii Cana Coaunera Suujue inara suujueniha nena.

<sup>12</sup> Aihane jaun coatiha cana letoaa cana suujuane rijijieein, leeochoaauru osaaonaneein nenacaauru cachaauru ichao rijijieein ichaohacachene coina letononeein nihaacacheta canejeraauru. <sup>13</sup> Nitohaneein osaaona cacha rijijieein coacuhin ichaohichenete, ohichene bana nitajeriquicheein. Nete laen Cana Coanera Suujue aina cuaain, nii baaso inaraacha coacuhi baaso itajeeichene, nitajenaacharanejeein nenea ichaonaa que ichaoriquicheein.

<sup>14</sup> Jeriha Cana Coanera Suujuene rijijieein naitoonjoa ichajeein ichaonacaaurute, satiin Cana Coanera calaohineein neure. <sup>15</sup> Nii Cana Coanera Suujue inaraacha ranojoin coatiha coasinacai nihei, osa rene coaiteen cacha amaer- anenihane jaun. Acate esinae rauhijiriin Cana Coanera Suujueneein rai calaohineein inara terane. Nii rai Suujue canaacha rai aina cuaainte, Cana Coanera coaaucaachene nainein, “Ofa” naain coaaucaache. <sup>16</sup> Nii jeelai Cana Coanera Suujuete, cana suujue aina jiniiquiin ne, inae Cana Coanera calaohineein nihacachene bihacachene coina. <sup>17</sup> Nitohaneein rai calaohineein nihacachene jaunte, nii cana que niicha banihatei naitoonjoalu raeranein nerichaachein. Niite Jesocurisito aina jiniiquiin rarichaachein, esinae rauhijiriin rai Cojoanonaa que niha- cachene coreniha necairichaacachene.

### *Rai Cojoanonaa que turuhenenu*

<sup>18</sup> Coatiha cha nihei, cau caa ena necairichaaceachene jaan, cana rai caa baiha rai necaohacha niicha teeni aina tein coaracaane. <sup>19</sup> Itolere Cana Coanera coaunanojoinurute, coitucueratenojoinecuruha Cana Coanera calaohineein nenacaarune que turuhane luhecaain cohaje. <sup>20-21</sup> Nitohanihalu cana necoaana, coaunanojoneein nihalune baiha cojiotanohineein nihalune jaun. Coatiha sujuua caje coaunein aca jerihane jaun nitohanein niheilu. Cana Coanera nitohanein ichaane jaunte ailu. Nete osa que nesaruhin necairichanaa tabai que ichaohane caje mitanojoinerichaaine cohaje itolere bana, jataain necaohachaain jianacoon tenojoinecuruha Cana Coanera calaohineein nenacaaurune que nenea nainiha acaentonaine coina. <sup>22</sup> Nitohaneinte necairichaa canaanai cuna aina nebane rijijieein, enanetojoein necairichaaeca nii Cana Coanera coaunanojohine coitucuhacache. <sup>23</sup> Coatiha acaacha necairichaa. Cana rai niicha teeni ajiinchateranu que, rai Suujue tiha cana rai Cana Coaneranane saijieeinte, cananetonai necairichaacache. Nitohaneinte, Cana jaberoco netonai jataain mainajeein necairichae, inae rai calaohinein cana raain, ena nenea cana jaberoco tiha Cana

Coaunerane que turuhane cohajeein. <sup>24</sup> Nii canaacha cohajei corenihate, ichoteratenojohineein nihacache. Inae nii canaacha cohajei coaracaachene jananihane, coatiha inae coharihaacache. <sup>25</sup> Nete nii Canaacha cohajei coaraeniha-cache jaitine jaun, itolere bana cana suujua corelanaala neein cohacaachene caohachae.

<sup>26</sup> Nii rijijieein techu, necairichaacachene nihanatiin, nii cana necairichanaja que cana coroatajane Cana Coaunera Suujue. Cana Coaunera bajaacachene nihanatiin, coatiha inaain bajahaacache. Nete nii rai Suujue cana rai niicha tei, cana rai Cana Coaunera baja, canaacha coitucuhi erenaa cuhane cuaain. <sup>27</sup> Nete itolere cachaauru suujua coitucueraneein nihane jaun, caje nii rai Suujue bajanojoi coitucue Cana Coaunera, nii Cana Coaunera jerihane rijijieein niicha ichaneni bajanaa jerecuruha cachaaurune rijijieein bajaane jaun.

*Itolere laraajiha nocoetonacaauru amuritoeraneeinte nihacache.*

<sup>28</sup> Chaentechu rai cachaneein belaichaneein nenacaauru rai, inae nitohaneein ichaane coina coausihalune rijijieein, itolere caohacha icharanein niha Cana Coaunerane coitucuhacache. <sup>29</sup> Inae nii ajiniha caje coauneein niicha coitucuurite, rai nejeraneein teein raelu rai calaohi Jesocurisito, tabaauru rai nocoalanein, tabaauru bainein, naaonjoaain neeuruhane jana, Aca acaauru inananein nihane coina. <sup>30</sup> Nii nunuhe caje coauneein niicha ranojoneein neenihurune maajeeinte cotijiaain, niicha ichai ujuaihoneein neeuruhane caje jianacoon mitanajaain rai Cojoanonaa que neeuruhane coina tenajaen.

<sup>31</sup> Tonarihacache jana nii que. Nitohaneein cana cocoaeratera neein niha Cana Coaunerane jaun, nerinaain chuni cana inasina nainera. <sup>32</sup> Cana coreniha oha rai Calahine coina Cana caje chunaelanaala teein nihalune jaunte, nii amurijiriin rai Calahoi rai niicha teeni tereein, Calahoi aina jiniiquii raacachene coina. <sup>33</sup> Nii jaun nerinaain chuni Cana Coauneraacha janijiin niicha ranojoinunru colurujuenaa nainera, Cana Coaunera inae cha ujuaihoneein neurenihane que aitiin jianacoon tenajaane jaun. <sup>34</sup> Chajana acaauru casetecareein. Jesocurisitote cana coreniha ohin, nii caje ichanaain ena Cana Coaunera raotono nichajai que neein, cana coreniha bajaabajaje. <sup>35</sup> Cha cana belaitoha Jesocurisitone jaan caje cana rocohin nere. Necairichanaa, caaintati ichaonaa que ichaohin, arinojoneein, mijitena, cajione que latejiojiriin, onaa coasina, naaonjoaihunrina cana belaitoa Jesocurisitone jaan caje cana rocohin neriha. <sup>36</sup> Nii quete:

“Ti corenihane saatiin ohacaanune coina jatoroaain niha-  
caanu.

Carenero sooruhane coina soera rene amaauruhane rijijieinte canacaanu teure,”

naain ne laenanohineein Cana Coaunera Quiricha cuhane.

<sup>37</sup> Nete nitohanihane saijieein, nii cana belaitora aina cuaain, itolereneein nii cana amuritora amuritiin niha-cache. <sup>38-39</sup> Nii jaunna nenerihani nii cana belaitoha Cana Coaunerane jaan caje, cana rocoerane esenetaaun. Onaa, ichaonaa, aanjeraauru, moconajaera letonocuru, ena nena, cabaiha neenihu, dede, chauratane, leechoaauru Cana Coaunera coaunanojoneein nenacaauru, naaonjoaihunri nainecururinaain, cana belaitoha Cana Coaunerane caje cana rocooruhane. Niite cana que coarateein coitucuerate Cana Coaunera, rai Calaohi cana Curuaanaa Jesocurisito aina cuaain.

## 9

### *Isaraelitacuru janijiinte raelu Cana Coaunera.*

<sup>1</sup> Jesocurisito esenetaeraneein nihanune jaunne, inara que asilanaala esinae rauhijiriin caa aitoon. Coatiha nohaniha aitohaaun. Nii ichoae tacaainte, Cana Coaunera Suujue coitucueratenojoneein, esinae rauhijiriin nohanelanaala aitocooaunne coitucue canu suujua. <sup>2</sup> Jataaine itolere bana inaderaaun. Itolere banate jataain cunae casuujua. <sup>3</sup> Canu araineein nenacaauru corenihane caseteconein nena jereeun, jelai teein Jesocurisito colane, nii coreniha nichotenaa nainecuruhane coina niqui. <sup>4</sup> Acaaurute niqui Israeli nefoerateneein neeuruhane jaun, rai calaohineein nena rijijieein neeuruhane coina ranajae Cana Coaunera. Aca techu rai necaohacha jana acaauru aina neein, acaauru rai tonoraain neeuruhane coina Moisesa rai rauhi teein, ita taojiaain corojeein neeuruhane coina aitiin, cana rai ni-icha teenine maajeein belu. <sup>5</sup> Acaaurute cana foerateeurera inamaconeein neurelu. Acaauru caje nenaaneeinte cacha neein turuelu Mesihasi jeelai itolere Coauneranein nena. Itolere bana acanihane coroaecuruhine satiin cachaauru. Nitohanemiin.

<sup>6</sup> Coatiha Israeli rai ichaane coina naitoonjoan aninoaa Cana Coaunerane jaun, nitohanein caseteco coaracuruhane rai neuruhi nii Israeli inamaconeein nenacaauru. Esinae rauhijiriin Israeli inamaconeein neureniha tabaaurune jaunte aihure. <sup>7</sup> Niheichu, Abaraaun inamaconeein nenaaru nihanatiin, coatiha Abaraaun inamaco esineneei neuruhi tabaauru. Nii quete: “Ti inamaco esineneei neenihurute, Isacaacha caje nefoeratenaa neein neurureein,” naain Abaraaun rai belu Cana Coaunera. <sup>8</sup> Niite chuni



Cana Coaunera calaohineein nenea naineniha nechu rai lauri coreniha cachane coitucuerate cana que. Nii cana rai niicha teeni bihane esenetaain coreniha rai calaohineein nenacaarute laen esinae rauhijiriin rai calaohi esine neein coitucunojoneein neeure. <sup>9</sup> Nii cointate: “Enene rijju na-coauneein turuhanune janate, inae canaanai siricheein ii comasai Sara,” naain Abaraaun rai niicha ichaneni belu Cana Coaunera.

<sup>10</sup> Nete acaachanejene. Coaracuche nachuhinti coroatajaain, Rebeca aina cana foeratera Isacaacha sirii rai calaohichuru, nii Isacaacha que inacaain neuruhalu niquine. <sup>11-13</sup> Nete jaiti nejanoa que telanaala, niheichu jaiti baaso aina caohacha ichaain neurenihane jana: “Rai inanate rai nocoala cachaneein nereein,” naain acaauru neba Rebeca rai bihalu Cana Coaunerane rijjijeein neurelu. Nitohanerichaaanne que techu: “Jacoboacha belaaanne Esao coiintereeni,” naain ne laenanohineein Cana Coaunera Quiricha cuhane. Nitohaneente inae nunuhe caje coauneein coacuhin, chatohanei ichaa cachane nihanatiin, niicha ichai coitucuhi rijjijeein, niicha janijiin raain nihane coina aitohalune nainaelu Cana Coaunera.

<sup>14</sup> Nitohanihane jaunna casajenetiin baaso icharaniha Cana Coaunera berichaache. Aihei. Coatiha niritiin erenaa nainihaacache. <sup>15</sup> Nitohanihane cointate:

“Canu suujua acatena jerichaaunne jaan quena casuujua acatereenni.

Chaen nechu cairichaaajoaain canuhacha coana jerei, cairichaaajoaain coarareenni,”

naain Moisesa rai belu Cana Coaunera. <sup>16</sup> Aihane jaun raa Cana Coaunerane coina chatohanineein nenea jeriha cachane nihanatiin coatiha cha que nelatihei, cairichaaajoaain niicha coaraaicha raa Cana Coaunerane jaun. <sup>17</sup> Nitohanihane jaunte, Egipto curuaanaa rai: “Canune curuaanaaneein ii teeunlu, ii que canuhacha ichana nainei ichacaaunne, canuneein nihanune coitucuuruha satiin chauratane sacutaain nenacaauru cachaaurune coina,” naalu Cana Coaunerane jaan, laenanohineein ne rai Quiricha Inoaensi cuhane. <sup>18</sup> Nitohaneente cairichaaajoaain niicha coarana jerei cairichaaajoaain coarae Cana Coaunera. Jerichanejein techu cairichaaajoaain niicha coarana jerihe coaraene cairichaaajoaain.

<sup>19</sup> Nete chunocoha nainere: “Nitohanihane cha corenihana jana cha ujuaihoneein cacha tere Cana Coaunera, niicha jerei ichaane jana, niha rai nii caohateein neine coaalanaala,” naain bajaane. <sup>20</sup> Chaneeina nereei ii, Cana Coauneraacha ichai que ereeine coina. Coaraunachuhinti atane codar-joe jaera rai: “Chanuna catohaneein canu coaunaain neei,” naain jaera caje bajanaa naineriha. <sup>21</sup> Nii atane caje darohe

janaa inaerate, aca ichana jerihane rijijieein ichana naine. Nii jeelai atane cajete naine jataain rai nelateineein neeni, chaen raujiaain rai nelateneeni, naaonjoaain ichana naine.

<sup>22</sup> Nechu cacha casetecana nainihane coitucuuruhane coinate, niicha ichana nainei coarateein, niicha casetecanohineein nitaje rai nenacaauru abaantaain cohanajae Cana Coaunera. <sup>23</sup> Nii aina cuainte cairichaaajoaain cana coaraane jaun, jataain rai necaohacha coitucuhin niha-cachene coina, inae nii ajiniha cana rai rucuhesihalune jaun, cana netonai rai necaohacha sirichaneein nihacache.

<sup>24</sup> Nitohanihane jaunte tabaauru Jorioocuru caje, tabaauru Jorioniheichuru caje, naaonjoaain neinichaachene cotijiaain raain ne Cana Coaunera. <sup>25</sup> Nii quete,

“Canu cachanelanaala nenacaaaurune,  
inae canu cachaneein teein ranajareeunni.

Canuhacha belainohinelanaala nenacaaaurune,  
inae canuhacha belainein teein  
belaicheeunni.

<sup>26</sup> Jerichanejeein techu, taolu

‘Coatiha inara,  
canu cacha niheeiche,’  
naa Cana Coaunerane jaaun nenacaauru raite,  
‘Ichaonaa Cana Coaunera calaohineein neure,’  
naaurureein,”  
naain laenaclu rai Quiricha cuhane *profeta* Osiasi.

<sup>27</sup> Isaihasi netonai techu Isaraelitacuru que:

“Cucuana cuhane nenaacarene catuneji jeeoneeite niqui nefaaurureein Isaraelitacuru. Nete acaauru cautecuruhacha, coroatajajeein ichoteratenojoinnein neeurureein,

<sup>28</sup> inae nii aitoahalune rijijieein,  
satiin chauratane sacutaain  
naitoonjoa icharihani

Cana Coaunerane jaun,”  
naain belu Isaihasi.

<sup>29</sup> Nii ajiniha techu:

“Nirijieein  
cana foerateracuru coarajeein  
nihalu Cana Coaunerane  
colanete,  
aihalu

Comora aina Sodoma cocoaichacurune rijijieein  
nerichaache,”  
naain aitelu Isaihasi.

*Jorioocuru aina ena nena Cana Coaunera Ere*

<sup>30</sup> Tonarihacache jana nii que. Cana Coaunerate esenetaauruha Jorioniheichurune coreniha ichoteratenaajain nelu, nitohaneein nichoteeuruhane coacuelanaala neeuruhane jana. <sup>31</sup> Nete laen Isaraelitacuru, Moisesa rai rauhi tonoraain nichotena coacuruhane saijieein nainesihurene, nii aitoa rauhine jitariin tonorasihurenihane jaun. <sup>32</sup> Chanuna nichotena nainecurene. Esenetaauruhane coreniha nichotena nainecuruhane esenetaelanaala, niicha ichai coreniha nichotena coaacuruhane jaun. Nii jaunte nii lacurocuruhane coina tenojoi ajeri que lacurocure. <sup>33</sup> “Leeinjiin ajerine teeun Sioon. Nii ajeri quete lacuroha cuurureein cachaauru. Nii jaunte nii ajeri que jaaequin nena jaoleneein nenereein,” naain Jesoso que aitiin laenanohineein ne Cana Coaunera Quiricha cuhane.

## 10

<sup>1</sup> Canejeraauru, nichotena nainecuruha Isaraelitacurune coinane, acauru que jataain coacuhin Cana Coaunera banajacoon. <sup>2</sup> Jataainte niqui jeriha Cana Coaunerane rijijieein nena jecure. Nete esinae rauhijiriin coitucuhin aihurenihane jaun nainecurene. <sup>3</sup> Cacha ichoterateneein niha Cana Coaunerane coitucuhin esenetaaurenihane jaunte, niicha letoai esenetana coacuelanaala, rai suujua letonohacha sacuire raajenihane nichotena coacuhin. <sup>4</sup> Nii rauhi aitoonjoante nelatelu turuhalu Jesocurisitone que tiaajeein. Caj coauneente laen nechu Jesocurisito queecha jaequuin esenetaauruhane coreniha niicha ichai ujuaihoneein neeuruhane caje couluunojoneein neure satiin esenetaerauru.

<sup>5</sup> Nicha bei rauhi tonoraain nihane coreniha nichotena coacuhin nei raite: “Leinjiiniji cautijaelanaala caa rauhi tonoraain ichoai cachate, coreniha nichotereein,” naain laenaelu Moisesa. <sup>6</sup> Nete laen nii esenetaauruhane coreniha couluunojoneein nihane coina aitiin, “Cha inicheein dedeeu, caje Jesocurisito fauhane coina,” coa naain coaacache. <sup>7</sup> Niheichu, “Cha onacaauru rene faureein ucuun Jesocurisito inaane coina,” coa naain coaacache. <sup>8</sup> “Nii erenaate inae ii rohan neein ii suujua, ii ujuaae, naaonjoaainunri cuhane ne,” naain ne laenanohineein. Caa erenaate esenetaain nenacaauru rai beratenojoneein nena ne. Nii quene caa inara relaacaanu. <sup>9</sup> Aihane jaun, cana Curuaana niha Jesocurisitone coitucuhin que ereerejeein, ii suujua aina cuaritaain o caje ichtihalu Cana Coaunerane esenetaainete nichoteriquiin. <sup>10</sup> Nitohaneente, cana suujua aina cuaritaain esenetaain nihacache, couluunojoneein

canaacha ichai ujuaihonnein nenea caje nichoteein niha-cachene coina. Jana cana ujuaaete Jesocurisito coitucuhin inae nichoterichaacheeinne jaan beraneein ne.

<sup>11</sup> Cana Coanera Quiricha cuhanete: “Esinæ rauhijiriin icharihanine esenetaain acaacha cohajeein nenea, coatiha inacojoein airinaain,” naain ne laenanohineein.

<sup>12</sup> Coatiha nejelau cachaneein neeuruhi Jorioocuru aina Jorioniheichuru, leinjiin Curuaanaa- satiin acaauru Curuaanaa neein- caje acaauruhacha bajai teraneein nihane jaun.

<sup>13</sup> Nii coinate: “Cana Curuaanaa coitucuhin que ereerejeein ichaonacaaaurute nichoteeurureein,” naain aitelu.

<sup>14</sup> Chasiina que ereereena nainecurure, coitucuhin esenetaauruhane coalanaala. Niheichu coitucuhin esenetana nainecuruhi, que acaauru rai ereein nei aonacurenihane jaun. Niheichu aonana nainecuruhi neniha acaauru rai beratenojoi berane jaun.

<sup>15</sup> Chasiina nere acaauru rai bera, niha acaauru corootajanein acaauru letoaeranune coalanaala. “Jataainte caohate cana rene turuuruha Ena nenea ichaonaa tera Jesocurisito que erenaa turuaaurerane,” naain niha Cana Coanera Quiricha cuhanene rijjijeein.

<sup>16</sup> Nete satiinelanaa tabaaauruhacha, ichoteratenojoinein neerurichaaine coina beratenojoin esenetaaure. Nii quete: “Curuanaa, cha ii beratenojoi canuhacha beebejei esenetae,” naelu Isaihasi.

<sup>17</sup> Nii jaunte, nii canaacha aonai caje unaa-neein ne nii canaacha esenetai. Jana nii canaacha aonaite, Jesocurisito que aitiin beratenojoi ne.

<sup>18</sup> Nena canu aitoon, acaauru rai beratenojoi aonacurenihane jaunna esenetaaurenihane. Aihei jerihane, aonacuruhane saijieeinte esenetaaurene. Nii que te aitiin:

“Chauratane sacutaainte amuhemujueein que ereerecure. Nii jaunte itolereneein

chauratane sacutaain nenacaauru rene turuhe nii erenaa,”

naain laenanohineein nelu Cana Coanera Quiricha cuhane.

<sup>19</sup> Nii que jaiti nainacurenihane jaunna esenetaaurenihane Israelitacuru. Aihei jerihane, nainacuruhanete ne. Jauriaanejeein acaauru rai:

“Canu cachanelanaala nenacaauru que necoelaichene coinane, acaauru aina canuhacha ichaneni ichaain, cha coitucunaa jerelanaala nenacaauru aina nejerateichene coina ichareeunni,”

naain beratihane acaauru rai Cana Coanerane jaun belu Moisesa. <sup>20</sup> Nii baihate:

“Chabana canu aina nenea coacuelanaala nenacaaurute,  
canu aina neeurureein.

Chaen nechu

canu coitucunaa coacuelanaala nenacaauru quene

necoitucueratereeunni”

naain,

<sup>21</sup> “Itolere banane

erenaa tonoraelanaala

nechu aansaineein nenacaauru cachaauru

cotijjaain cohajeeun,”

naa Isaraelitacuru nichaanune que Cana Coaunerane belu  
Isaihasi.

## 11

### *Janijiin ranojoin nihalu Isaraelitacurune*

<sup>1</sup> Nii quene canu aitoon. Rai cachaneein nenacaauru que jaolecohane jaunna cha aito ha Cana Coaunera. Coatiha aihei. Canuhetonaine Isaraelita neeun, Abaraaun ichoala Beenjamiin lauri caje nefoeratenaa nichaaunne jaun. <sup>2</sup> Inoaenlu caje coauneente rai cachaneein neeuruha Isaraelitacurune coina ranajaain nelu Cana Coaunera. Nii jaun coatiha ena acaauru que jaolecohin nihei. Tana rai Quiricha inoansi cuhane Isaraelitacuru que: <sup>3</sup> “Cana Coaunera, ichei *profetacuru* sohin jaohinte ichei rorihuru- *altar* ranuusiin itajeeure. Leinjiin canuhachane jaiti ichaaojoeun. Canune maajeeinte inae sohin jaonaa jerecure,” naain Cana Coaunera bajaa Irihasine laenanohineein nihane coitucuhichene. <sup>4</sup> Nete niritohane jana: “Inae acaauru chosi Baal corojelanaala, caainsi oaraancaneein nenacaauru cachaauru jelai tihanu canu cachanu que,” naain tonorae Cana Coaunera. <sup>5</sup> Nii rijijieein techu, ena corootajajeeincha neeure Isaraelitacuru nichaanune cautecuru, cairichaaoojoauruhane jaun acaauru belaiha janijiin ranajaa Cana Coaunerane jaun. <sup>6</sup> Nitohaneein acaauru belaiha acaauru raa Cana Coaunerane jaun, coatiha rai caohacha ichacuruhane coreniha ranajaain nihei Cana Coaunera. Caohacha ichacuruhane coreniha ranojoinecuruhane, coatiha chanerihai cana belaitohane jaan cana rai Cana Coauneraacha tei.

<sup>7</sup> Nii jaunte nirijieein rai suujua letonohacha ichajeein nichotenaa coaacuruhane jaun, nichoteeurenereein Isaraelitacuru. Nete laen janijiin Cana Coaunera ranojoneein nenacaauru nichoteeurenereein. Jana leochaaurute suujua letonohacha ichajeein neeuruhane jaun nichotenaa nainecurene. <sup>8</sup> Cana Coaunera Quiricha cuhane:

“Cana Coaunera

niicha ichai coitucunaa

nainecurenihane coina ichae.

Nii jaunte enanetjoein  
 cha coitucunaa nainelanaala neeure,  
 nechu cha coarana nainecurenihane jaan que  
 acaauru nota teein,  
 cha aonana nainecurenihane jaan que  
 acaauru irichotihane jaun,”  
 naain laenanohineein nihane rijjijeeinte aihure. <sup>9</sup> Rabiri  
 netonai techu:  
 “Ita taojiaain lenone jaain,  
 lenonecuruhane jaan baaso ichaain  
 osa que nesarucuruhane jaaneein neeinete  
 caseteco coaracurumiin.  
<sup>10</sup> Acaauru nota nihanatiin conoeneeinete,  
 cha coarana nainelanaala  
 baaso ichaain neeuruhane,  
 chabana satonohelanaala  
 caseteco coaracurumiin,”  
 naain aitelu.

*Nichoteeuruha Jorionihechurune jaan*

<sup>11</sup> Canune aitoon. Nitohaneein baaso ichaain  
 inae casetecanohineein neeuruhane jaunacha, inae  
 caohachanainejeein jaoleneein neeuruha Jorioocuru.  
 Aihei, coatiha caohacha nainejeein jaoleneein  
 neeuruhi. Nenacaaen tejian erenaa tonoraareniha  
 Jorioocurune aina cuaain, inae ichoteretenjoinee  
 neeureein Jorioniheichuru netonai. Nitohaneein inae  
 ichoteratenjoinee neeuruhane coaracuruhane banate,  
 acaauru que necoelaihurureein Israelita nichaaunne  
 laurichuru. <sup>12</sup> Aihane jaun baaso ichaain caseteco  
 coaracuruha Jorioocurune, Cana Coanera coitucuelanaala  
 nenacaauru Jorioniheichuru rai caohacha ichaa aihuruhane  
 jaan cajete, jataain nii amurijiriin caohacha icharichaain,  
 inae nacoaunneein Jorioocuru raane bana Cana Coanerane  
 coitucuhacache.

<sup>13</sup> Nena laen canu, inara Jorionelanaala neiniquichene  
 rai erenaa jereeun coitucuhichene coina. Nii coinate  
 inara Jorionelanaala neiniquichene rene caletoaain nelu  
 Cana Coanera. Nii jaunna jataain inara aina neein,  
 jataain corajeein canu amihaneeon ichana jereeun, <sup>14</sup> inara  
 que necoelaain, canu foeratera caje nenacaauru tabaauru  
 netonai nichotenaa nainecuruhane coina. <sup>15</sup> Nii rano-  
 joinelanaala neeuruha Jorioocurune corenraniha, inae  
 Cana Coanera que nejeratenaa rijjijeein neeuru caje,  
 ranojoein Cana Coanera aina raotojoein neeuruha Jo-  
 rioniheichurune jaunte, nii amurijiriin ranojoein ne-  
 naa nainecure Jorioocuru. Nii jaunte ohin nitaje rai  
 neeuru caje inae nacoaunneein ichaohin sanaacharanejeein

nenaa que ichaaore. <sup>16</sup> Coaracuche nachuhinti, coliha caje ichoaichaniha ichanohi faan, jelai teein Cana Coaunera que banijiaain nihane jaun, satiin nii coliha netonai que banijiaineein nihane. Nii rijijieein techu leinjiin enuha cojoaisi Cana Coaunera que banijiaain nihane, rai nunecuru netonai que banijiaineein ne.

<sup>17</sup> Charijieein teinti toroonjoan nujian sauriin cuhane limoon uune temuhacane, rai nujian que nujuaain nena rijijieein inacae nii limoon. Nii rijijieein techu, inara Jorioniheichuru nequichene nii limoon uune rijijieein neechene jana, Joriocuru nii inara nujian toroonjoan nujian rijijieein neeure. Nitohaneeinte nii toroonjoan uune sauhin jaohin, inara Jorioniheichuru nequichene nii limoon uune rijijieein nii toroonjoan nujian necuruha nii Joriocurune jaun, acaauru que temuratenojoneein neeiche. <sup>18</sup> Aihane jaun jiaonriha uune sauhin jaonojoneein nena coreenranein neeine jaun, nii uune esineneein neinichaanune amurijiriin nena coahin nihache. Jiaonriha rai nujian esine neein neinichaanune cuhane tein temunojoneein neeichene bai-tiquichene.

<sup>19</sup> Nete, "Aiha niqui. Nete nii jauriaanejeein uune neein nenacaauru sauhi jaohin, canu temuurelu coreenraniha," nariquiin. <sup>20</sup> Nete esenetaenihacaanune jaun, sauhin jaonojoin rijijieein nihacaanune jana, inara esenetaaichene jaun canacaanu coreenraniha ranojoneein neeiche. Aihane jaun jiaonriha niique necohasitaain neeichene. Necohasitanaa coacuelanaala casiin neeichenete caohachae. <sup>21</sup> Nii, rai nune esineneein nihacaanune saijieein jaonojoneein nihacaanulune jaun techu nii amurijiriin inara que suujua acatena nainenereein baaso ichaquichene Cana Coaunera. <sup>22</sup> Aonacuche. Jataainte caohachaneje Cana Coaunera. Nete laen suujua letonohacha ichaa cachane abaantaene. Nitohaneein naitoonjoa esenetaauruhi casetecaa natiinte inara raain nelu. Nete laen inara belaiha inara raain nihalune rijijieein ichaohichene caohachae, inara netonai sauhin jaonojoneein neeichene coataa. <sup>23</sup> Jorionichaanune netonaite, esenetaenihacaanune jianein inae nacoaunein esenetaacaanune, jelaiha nune que tenojoinerichaanuhi, nicha ichana nainei ichaain, jelaiha canacaanu temurichaa in Cana Coaunerane jaun. <sup>24</sup> Coaracuche nachuhinti inara Jorionelanaala neiniquichene, limoon uune rijijieein neeichene saijieein temunojoneein neeiche, nii toroonjoan uune esine neein neinichaanune coreenraniha tenojoineein ne. Nii jaun techu Jorionichaanune inara amurijiriin nacoaunein jelaiha nii rai nujua esine que tein temunojoneein nena nainerichaanuhi.

*Satononiha ichoteratenojineein neeururichaaïn Isaraelitacurune*

<sup>25</sup> Canejeraauru, Cana Coauneracha ichaneni asinojineein nenea coitucuhichenena jereeun, nabana cha coitucuera niha nocoetiin neeichene coataa. Isaraelitacurute baaso ichacuruhane jaun, Cana Coaunera que nejeratenaaneein jaoleneein neeurelu, satiin Isaraelitanelanaala nenacaauru netonai ranojineein neeuruhane que tiaaajoaain. <sup>26</sup> Inae satiin ranojineein neeuruha Isaraelitanelanaala nenacaaurune janate, satiin ichoteratenojiniha cuurureein Isaraelitacuru. Cana Coaunera Quiricha cuhane:

“Sioon jelai cajete ureein

jianacoon cacha mitaeranu.

Baaso ichajeein niha Jacobone cajete,

nii baaso rocoreein caje.

<sup>27</sup> Nitohaneeinne

acaauru aina caitoonjoan

canuhacha ichaneni ichareeuni,

inae acaauru osa caje jianacoon tenajaanune bana,”

naain nii coina ne laenanohineein.

<sup>28</sup> Nete beratenojoi niha ichoteratenojineein neeururichaaïn cachaurune aina cuaain, Cana Coaunera que nejeratenaaneein neeure Jorioocuru, inara ichoaichaniha coitucunaa nainequichene teranu que. Nete enanetojeein cairichaaajoaain acaauru coarae Cana Coaunera, acaauru foerateracuru janijiin raalune jaun. <sup>29</sup> Coatihä cana rai niicha teeni ruluhin nihei Cana Coaunera. Niheichu janijiin niicha raauri que jaoleconaa nainihei. <sup>30</sup> Jauriaalute inara netonai Cana Coaunera ere esenetaain tonoraelanaala neeichelu. Nete nere tonorana jecurenihä Jorioocurune jaun, inae enene cairichaaajoaain inara coarae Cana Coaunera. <sup>31</sup> Nii jauriaalu nere esenetaain tonoraelanaala neeichelune rijijieeinte, enene nere esenetaain tonoraelanaala neeure Jorioocuru, nechu cairichaaajoaain inara coaraain nihalune rijijieein, ena cairichaaajoaain acaauru netonai coaraa Cana Coaunerane coina. <sup>32</sup> Cana Coaunerate nitohaneein ita rijijieein nere tonoraeniha cachane coina ichae, ita rijijieein jiniiquiin cairichaaajoaain cacha coaraain nihane coina.

<sup>33</sup> Jataainte banejelanaala caohacha icharaneein, itolere ichara neein, cha coitucueraneein ne Cana Coaunera. Coatihä nihei chuni, niicha coacui aina niicha ichaneni coitucuhin beranu. <sup>34</sup> Nii jaun, “Chä Cana Coaunera suujua coitucue. Chä sujuatenaa nainere. <sup>35</sup> Chä rai chä teein nelu rai cainaain nihane coina,” <sup>36</sup> Itolerete Cana Coaunera caje unaa neein ne, niicha coaunanojineein nihane jaun. Nii jaunte satiin itolere rainein neeure.



Itolere bana coroaenohineein neeine Cana Coaunera. Nitohanemiin.

## 12

### *Cana Coaunera que banijiaineein nenea ichaonaa*

<sup>1</sup> Canejeraauru inara raine aitoon. Jataain inara belaitoha Cana Coaunerane jaun, inara raajenhane rai inara ichao teeuche jelai teein que banijiaineein, rautaa Cana Coaunerane rijijieein. Niite laen jataain Cana Coauneraacha jereineein, rai caohacha neein ichariquicheein. <sup>2</sup> Jiaonriha suujua cuhane coacuhin ichaauruha Cana Coaunera coitucuhichurune rijijieein, inae nenacaaen coacuhin acaauru rijijieein ichaohichene. Nitohaneein ichaonaa coacuelanaala, inara suujua coreein ichaaochete, inara ichao coreein ichaohin, Cana Coaunera jerenohineein, “Naaonjoainte caohachae. Naaonjoaite rautae Cana Coaunera. Caate esinae rauhijiriin caohachane,” naain coacuhin, caohacha nejesina coitucuhin ichajeein ichaohiche.

<sup>3</sup> Jataain cana belaitoha Cana Coaunerane jaun, canu cocoinaain caletoaain beratihane jaunna satiin inara rai aitoon, nabana leeochoauru amurijiriin nenea coacuhin niha chunine coataa. Aihane jaun jiaonriha esenetaachene coreniha inara rai Cana Coauneraacha tei rerohin, cha coacuhin ichana jereein neeichene. <sup>4</sup> Charijieein teeinti cana ichao rai nelatihane coina araai lauriin nihacoae cana jaberoco que cana nerurujuana jaan. <sup>5</sup> Nii rijijieein techu arajii Jesocurisito esenetaeranichaachene, ita ichao que ichaohin Jesocurisito aina cuaain leinjiin que jaberocoana rijijieein ita jaberoco que jaberocohin nihacache.

<sup>6</sup> Nitohaneainte le cachanichaachene rai aca jerihane rijijieein tenaa jerihane jaancuru rai, lauri lauri canaacha ichaneni ichana nainena jaanu teein ne Cana Coaunera. Aihane jaun, rai nere beraneein cana letoaa Cana Coaunerane esenetaacachene rijijieein coitucuhin ichacaachenete ne. <sup>7</sup> Leeochoauru coroatajanera neein nihachene coina, cana teein niha Cana Coaunerane, jerecuruhane rijijieein acaauru coroatajanichaachenete ne. Jana chunocoha, cacha relaeraneein nihane coina aca tiha Cana Coaunerane, leeochoa ichana coacuelanaala acaacha ichamiin. <sup>8</sup> Jerichanejeein chu, chunocoha cacha suujua anihoeraneein nihane coina tenojoinihane cacha suujua anihoeraneein neeine leeochoa ichana coacuelanaala. Chunocoha cha teein niha leeochoauru raine, chunaelanaala teeine. Jana chunocoha cacha letoeraneein nihane, coujuriu rai namihaneeneein nihane coitucuhin ichamiin.

Cairicheihuru rai cha teeichene, tonajelanaala rachoojoein teeuche.

*Naaonjoaainte caohachae ichaoha Jesocurisito ranojoneein nenaane*

<sup>9</sup> Ita que asilanaala jiniiquiin ita suujua rijijieein ita belain neein, itolere baaso ichana coacuelanaala caohacha nejesinaacha ichacuche. <sup>10</sup> Jesocurisito aina cuaain ita nejeraneein neeichene coitucuhin, jiniiquiin ita belain ita suujua rijijieein coacuhin, itaque inara suujua acateein ichaaoche.

<sup>11</sup> Nelararajiaain coiintelanaala corajeein inara suujua aina cuaritaain Cana Coaunera jerenohin ichacuche. <sup>12</sup> Rachoojoein neeuche nii inaraacha cohajei coreniha. Chaen laraajiin neein necairichanaa abaantaain itolere bana Cana Coaunera bajaebajajeein ichaaoche.

<sup>13</sup> Cha lateein neuruha Cana Coaunera cachaneein nenacaaaurune, inara raajenihane cha latera rijijieein acauru corootajanecuche. Inara rene turuhin niha cachane, raotojoein cotijiaain raache.

<sup>14</sup> Inara rohecaeraauru rai caohacha ichacuche. Jiaonriha, “Coaraain nainamiin,” naain acauru que ereeichene.

<sup>15</sup> Rachoojoenacaauru aina rachoojoein, inaderaain chanaaacaauru aina inaderaain chanaauche.

<sup>16</sup> Ita rijijieein coacuhin ichaaoche. Jiaonriha chuni amurijiriin nena coacuhin neeichene. Cairichaaerinojoneein ichaonacaauru rijijieein ichaaoche. Jiaonriha leeochoauru amurijiriin cha coitucueraneein nena coaauquichene.

<sup>17</sup> Jiaonriha chuni inara rai baaso ichaain nihane, inara netonai rai baaso ichana coacuhi nihache. Nitohanena coacuelanaala satiin notaracae, caohacha nejesina ichajeein ichaaoche. <sup>18</sup> Atiin leeochoauru aina jiniiquiin raotojoein acauru cotainaa coacuelanaala ichaaoche.

<sup>19</sup> Canejeraauru, jiaonriha inara cairichaera cairichanaa coacuhin neeichene, Cana Coaunera, baaso ichaeraauru ichanohin coitucuhin casetecarichaine jaun. Nii coinatate rai Quiricha inoausi cuhane:

“Canune baaso icharaauru coitucuhin casetecaain, caohacha icharaauru coretereunni,”

naain aite Cana Coaunera. <sup>20</sup> Aihane jaun iicha cotaairii mijitihane coroaateu. Jana cocoirihane acau que cocoaerateu. Aihute nocoejeein aonamiin. <sup>21</sup> Jiaonriha baaso nejesina coacuhin jeriha inara suujuane rijitojoein neeichene. Nitohanein baaso ichaelanaala caohacha nejesina ichajeein baaso amuritoche.

## 13

<sup>1</sup> Satiin cocoinanohineein niha cocoinacaine jaun, satiin rai nere tonoraain aca jerihane rijijieein neeuche. Nihei

chuni cocoainanacai, Cana Coaunera tenojoinelanaala nei. Satiin cocoainanacaihurite Cana Coaunera tenojoineein cocoainanohineein neeure. <sup>2</sup> Nii jaunte chunocoha cocoainanacai ere tonoraelanaala nei, Cana Coaunera jerenohin tonoraenihane jaun aicheein. Chaen techu caseteco coaracurureein, nii nere tonoraauruhi, <sup>3</sup> caohacha icharaauru casetecaelanaala, baaso icharaauruhacha casetecaraneein niha cocoainanacaine jaun. Aihane jaun ii casetecaa cocoainanacaine coasiinne, baaso ichana coacuelanaala caohachaaain neeute, esinae rauhijiriin caohachaaain neeine coaramiin cocoainanacaihuri, <sup>4</sup> acaauru jeriha Cana Coaunerane rijijieein, ii rai caohacha ichacuruhane coina neuruhane jaun. Nete laen baaso ichaaain neinne, cocoainanacai coasiinne ne, esinae rauhijiriin baaso ichara casetecaane coina teein niha Cana Coaunerane jaun. <sup>5</sup> Nii jaunte jeriha cocoainanacaine rijijieein nere tonoraain ichaohacachene caohachae. Coatiha cana casetecaane coasihacha nihei. Caohachaaain cana suujua coaraain ichaohacachene coinate aihacache. <sup>6</sup> Nitohanihane jaunte cocoainanacaihuri rai coriqui teein neeiche, Cana Coaunera jerenohineein leinjiin rai namihaneechoa ichajeein neuruhane jaun.

<sup>7</sup> Le cachaauru nainein, inara caje acaaruhacha raaeni teeuche. Niha chatohanei inaraacha coretenenine rai coretecuche. Niha chatohanei, cobiereno rai inaraacha coreteneni *impoestone* coretecuche. Niha cache inara suujua acatequichene jaaneeine que inara suujua acatecuche. Niha cache inaraacha belainenine belaihu.

<sup>8</sup> Jiaonrihachu chuni que nerebetein neeichene. Nete laen jiniiquiin ita belaaichene caohachae. Chunocoha namute cache belaaain ichoaite, aitoa Cana Coaunera rai rauhine rijijieein, inae ichaohane jaun aicheein. <sup>9</sup> Cana Coaunera rai rauhi cuhanete, “Jiaonriha ii sinijieranelanaala nena ene aina ichaojeraquiin neeine. Jiaonrihachu sonajaain jaohine. Jiaonrihachu asijiauhine. Jiaonrihachu chamute cache rucuhale, rai nirihuru, rai sinijera, naaonjoaaihunri jereein neeine,” naain ne laenanohiheen. Nete satiin nii naitoonjoan coitucuhin nihacachene coina: “Ii raajenihane ijabereeo belaaaine rijitoejin chamute cache belaihu,” naain ne laenanohineein. <sup>10</sup> Aihane jaun namute cache belaaain ichoai, coatiha nainihe baaso ichaa namute cache raine. Nitohanein jiniiquiin ita belaaain nihacachenete, satiin aitoa nii rauhine rijijieein ichaohacachene jaun airichaacheein.

<sup>11</sup> Satiin sininaa rijijieein ichaohacachene caje nocohin cana ichao coaraain coitucuhin ichaohacachene cojoanonaa que turuhane que nainacaachenete caohachae, inae jauriaanejeein cana rai beratenojoi nihane jana esenetaacach-

ene bana amuritoheriin inae ichuunejeeonriha ichoter-  
 atenojineein nerichaacheinne jaun. <sup>12</sup> Inae satonohe-  
 lalajiha caa nocohenaanau ichaonaa rijjijieein ichaohaca-  
 hene jaan janonaa. Inae turuhelalajiha nii ena nenea  
 janonaa canaacha cohajeine jaun, nocohenaanau nenea ri-  
 jijieein baasohacha ichajeein ichaohacachene jianein cou-  
 jurihu Cana Coaunera cachaneein nenea tocohaneein ni-  
 hacachene coarateein nihacachenete caohachae. Chari-  
 jieein teinti letona jatorain ne sondaro, rai curuaanaa  
 aitoonjoan ichaane coina. Nii rijjijieein techu cana net-  
 onai jatoroain nihacache, Cana Coaunera aitoonjoan icha-  
 caache chuni que asilanaala satiin notaracaaene coina.  
<sup>13</sup> Aihane jaun caohacha nejesina ichacaachene coaracu-  
 ruha cachaaurune coina, nainihaacache joenreein ene  
 jereein, ajetoritii enaacha joenreein cha ichaain, niheichu  
 canamute cacha cotaairiin coaraain, canamute cacha que  
 necoelaain, naaonjoain nenea nainihaacache. <sup>14</sup> Aihane  
 jaun nitohaneein nenea coacuelanaala, coujuriu Cana Curu-  
 aanaa Jesocurisito cachaneein neeichene coarateein laraa-  
 jiin neeuche, joaereen cacha rijjijieein inara suujua letono  
 tonoraelanaala.

## 14

### *Jiaonriha inara nejera ichao que ereeichene.*

<sup>1</sup> Inara rene turuhin niha cana nejera canaacha esene-  
 tai aina ijilanaala nenaane, rai tonaain erenaa coacue-  
 lanaala raotojoein raauche. <sup>2</sup> Coaracuche nachuhinti  
 tabaauru itolere lenone que ita rijjijieein lenoneein neeu-  
 ruhane. Jana tabaauru ijilanaala nenea, iniho quilanaala  
 jasisichuruhacha que lenoneeine. <sup>3</sup> Aihane jaun, itolere  
 lenone que lenoneein nenacaauru, nainiheii nii itolere lenone  
 que lenonena nainelanaala nenacaauru que ereein neeu-  
 ruhane. Jerichanejeein chu nainiheii, nii itolere lenone que  
 lenoneein nenea que erenaa nainiheii nii itolere lenone que  
 lenonelanaala nenea, Cana Coaunera acaentonai raain ni-  
 halune jaun. <sup>4</sup> Aihane jaun chaneina neei ii, leecha rai  
 niicha latei tera que baaso ichaa been que ereein neeine  
 coina. Nii acauru letoaeranein nenea Cana Coaunera-  
 achate baaso ichaain aihurenihane, caohacha ichaa aihu-  
 ruhane coitucureein. Nete itolerenein caohachaain rao-  
 tojoein neeurureein, Cana Curuaanaa raotojoein neeu-  
 ruhane coina icharanein nihane jaun.

<sup>5</sup> Niha coaiten tabaauru, jataain leechaauru janonaa  
 amuritoheriin nelateineein lejanothane coaraauru. Jana  
 tabaaurute satiin janonaa ita rijjijieein nelatihane que aito-  
 cure. Nii jaunte lecachanichaachene, canaacha esenetai

coitucuhin esenetaacachene caohachae. <sup>6</sup> Leeochaauru janonaa bana amuritoheriin le janonaa coaraain, bana Cana Coaunera coroaena jerihane, nii janonaa bana coroaemiin. Jana Cana Coaunera rai caohacha ichaa itolere lenone que lenoneein nena jerihane, itolere lenone que lenoneein Cana Coaunera coroaemiin. Jerichanejeeinchu Cana Coaunera rai caohacha ichaa itolere lenonecuru que lenonena nainihe-ichuru, quilanaala neein Cana Coaunera coroaemiin.

<sup>7</sup> Coatiha cana jerichaachene jaun ichaohin, ohin, naaonjoaain nihaacache. <sup>8</sup> Nii rijjijeein techu ohin, ichaohin, naaonjoaain nihacachene nihanatiin Cana Coaunera rainein nihacache. <sup>9</sup> Nii cointate ohin, o caje ichanaain, naaonjoaelu Jesocurisito, ichaonacaauru, onacaauru, naaonjoaainunri Curuaanaanein nihane coina.

<sup>10</sup> Chanuna jana chaen nitohaniane saijjееin, ii ne-jera ichao que ereein rai necoeje chanuhin neei, Cana Coaunera acatiha satiin tururichaacheein aca canaacha ichai coitucuhin rucuherrichaaaine saijjееin. <sup>11</sup> Nitohanerichaaaine quete:

“Canu ichao coreniha esinae rauhijiriin airichaainne quene aitoreeunni.

Satiin cachaaurute canu acatiha neseonriaain canu nichaa-nune coitucuhin Cana Coaunera coroaacurureein,”  
naa Cana Curuaanaane ne laenanohineein Cana Coaunera Quiricha Inoaensi cuhane ne. <sup>12</sup> Nitohaneente le cachanichaachene, cana raajenihane canaacha ichai berichaacheein Cana Coaunera rai.

*Jiaonriha inara nejera ichao lacuroaaichene.*

<sup>13</sup> Aihane jaun inae nainihaacache cana nejeranein nenacaauru que baasoneein ereein, chatohanei ichaain, naaonjoaain nena nainihaacache. Chatohanei ichana coacuelanaala neeichenete caohachae, nabana esenetaa cana nejerane lacuroaaichene esenetaane jianihane coataa. <sup>14</sup> Canune esinae rauhijiriin Jesocurisito esenetaeranein aitoon. Nihei chuni lenone, calanineeин quichaenihane coina coaunanojoi. Nete lenone tabaauru, leochaauru cachaauru rai lenonenein nene. <sup>15</sup> Niheichu nainiheei quinaa inaelanaala nena ii nejera notaracae rai baaso ichara tocohaneein quiine. Ii lenoneecha coreniha nitajeein niha ii nejera, coreniha netonai ohin nihalu Jesocurisitone saijjееine coataa. Nitohanein neeine coatiha chamute cacha belaaaine coaratiha airiheeini. <sup>16</sup> Aihane jaun itolere lenone que lenonena nainein neeichene jaan aina cuaain nainiheiche baasoneein inara que ereein neeuruha cachaaurune jaanu ichaain neeichene. <sup>17</sup> Jeriha Cana Coauneraane rijjijeein rai Cojoanona que ichaonaa jerichaachene,

coatiba joenreein lenone que lenoneein nihacane latihei. Nete laen esinae rauhijiriin baaso ichaelanaala rai Suujue aina cuaain rachoojoein ichaohin, raotojoein nihacachene caohachae. <sup>18</sup> Nitohaneein ichaohin Jesocurisitohacha jerei ichaa cachanete laen rautatiin coarae Cana Coaunera. Cachaauru nihanatiinte esinae rauhijiriin caohacha ichaane coaracurureein.

<sup>19</sup> Aihane jaun, atiin ita aina raotojoein ichaohin nihacachene jaanuhacha ichacaachenete caohachae. Nii banate laen esinae rauhijiriin, jiniiquin ita coroatajanein, jeriha Cana Coaunera Suujuene rijijieein nerichaachein.

<sup>20</sup> Nainihej lenoneecha coreniha Cana Coaunera ichanohin itajeein nihacachene. Esinae rauhijiriinte niqui, satiin lenonecuru lenone caohachaneein neeure. Nete caohachaene que lenonelanaala nenacaauru notaracaae

que lenoneein acaauru suujua lacuroaera tocohaneein nihacachene. <sup>21</sup> Nii jaunte caohachaene, iniho leeochoauru quinojoinelanaala nena quiin, bino cohin, naaonjoaain nihacachene. Niheichu leeochoauru suujua lacuroaera tocohaneein nainihej joenreein chachanaa nainihaacache.

<sup>22</sup> Aihane jaun ii joareen lenone que lenoneeine, Cana Coaunera notaracaaecha que lenoneeu. Rachoojoein neeine suujua cuhane nocoatelanaala joenreen lenone que lenoneein nena. <sup>23</sup> Nete laen inae raotojoein quinaa naihenihane coituhane saijieein que lenoneein nei, aca nii ujuaihoneein ne, niicha quiinelanaala nenaanihane coitucuhane saijieein quihane jaun. Nii jaunte inae canaacha ichana nainihej ichaaa raotojoein coitucuhane saijieeine, osa que nesaruha aihaca.

## 15

*Ii rainuhacha que caohacha ichana coacuelaanaala chamute cacha rai caohacha ichaau.*

<sup>1</sup> Inae cana, jeriha Jesocurisitone rijijieein laraajiin neinichaachene, nii ena nunuhetein sacuhajeraauruhacha ichai que tonaain erena nainihaacache. Atiin acaauruhacha ichai rautaenihacachene nihanatiin abaantaacachenete ne. <sup>2</sup> Satiin canate, canamute cachaauru rai caohachanu que cha ichaain nihacachene caohachae, caa canaacha esenetai aina iijieein sacuhajeein ichaauruhane coina. <sup>3</sup> Coaracuchenachuhinti Jesocurisito netonai, aca jerihane rijijieein nena nainenihane jaun: “Ii necoeje chanuureraauru corenranihane canu caseteco coaraaun,” naain que aitiin laenanohinihane nainaalu, rai suujua letono rijijieein nena coacuelanaalane. <sup>4</sup> Satiin Quiricha Inoaensi cuhane laenanohineein nenaate, cana

suujuateraanu que laenanohineein nelu, itolere bana jianelanaala, cairichaaajoaain cana coaraane aina cuaain canaacha cohajei ranaa nainichaachene coina. <sup>5</sup> Nii Cana Coaunera itolere bana cairichaaajoaain cana coara, inara coroatajanemiin. Cana relaalu Jesocurisitone rijijieein <sup>6</sup> jiniiquiin ita belaaain rachoojoein Cana Coaunera coroaieein ichaoche, jeriha Cana Coaunera Cana Curuaanaa Jesocurisito Inacaneein nenaane rijijieein neeichene coina.

*Jorioniheichuru rai benojoiniha Jesocurisitone que erenaa*

<sup>7</sup> Aihane jaun Cana Coaunera rai caohachanu que inara raain nihalu Jesocurisitone rijijieein, inara netonai jiniiquiin raotojoein ita raain neeuche. <sup>8</sup> Esinaena aitoreeunni inara rai. Inae cana foeratera inoaensihuru rai, nitohaneein ichaane coina aitosihalu Cana Coaunerane nainaane coinane, Jorioocuru nichaanune rai nelatihane coina turuhin nelu Jesocurisito, caje esinae rauhijiriin nohanelanaala ti-hane coina, naitoonjoan ichaa Cana Coaunerane coaracuruha cachaaaurune coina. <sup>9</sup> Chaen techu Jorioniheichuru netonai, aca Cana Coauneraneein nihane jaun, cairichaaajoaain acaauru netonai coaraane coitucuhin, Acaneein nihane coroaecururichaaaine coitucueratihane coinane maaieein turuhin nelu. Nii ajinihate nitohanerichaaaine que:

“Nitohanei ichaaaine corenihane lauri lauri nenacaauru cachaaauru aina neein-ineein neeine coroaieein nenatereeeunni,”

naain laenanohineein ne Quiricha Inoaensi cuhane. <sup>10</sup> Quiricha Inoaensi cuhane techu coaiteen:

“Cana Coaunera cachaneein nenacaauru aina jiniiquiin rachojeeuche

lauri lauri nenacaauru cachaaauru,”

naain ne laenanohineein. <sup>11</sup> Rai Quiricha Inoaensi cuhane techu coaiteen:

“Lauri lauri neiniquichene

Cana Coaunera cachaneein nenacaauru aina jiniiquiin

Cana Coaunera coroaecuche,”

naain ne laenanohineein. <sup>12</sup> Isaihasi netonai techu:

“Isaihasi caje nefoeratenaa-

Isaraelitacuru curuaanaa neein nena-

Rabiri cajete

ocooreein leinjiin Curuaanaa,

Isaraelitelanaala nenacaaurune maajieein

curuaanaa neein nihane

acaacha que jaaequiin neeuruhane coina,”

naain laenaclu.

<sup>13</sup> Canaacha cohajei teraneein nena Cana Coaunera, Aca acaneein nihane esenetaeraniquichene rai, raotojoein rachoojoein jiniiquiin neeichene jaanu tein, inara aina

niicha ichana nainei ichaa rai Suujuene coina ichamiinte, leinjiin acaacha cohajeein neeiche.

<sup>14</sup> Canejeraauru, saain inara leeochoauru belaaïn ichaohin, itolere coitucuhin, jiniinquin ita suujuatenaa coitucuhin ichaohichene coitucuhanu. <sup>15-16</sup> Nena laen caa quiricha inara rai canuhacha laenai cuhane inara que asilanaala inara rai aitoon, nabana baitequichene chatohanei ichaquichene coataa. Nitohaneein Jorioniheichuru rai caohacha ichaa Jesocurisitone beebejihanune coinata, canu rai caohacha ichaane coina canu raain nelu Cana Coaunera. Nii jaanne Cana Coaunera beratenojoi ichoteratenojineein neeururichaaïnne beebejeeun. Nii canuhacha beebejei esenetaauruha Jorioniheichurune, Cana Coaunera rai iniho mocohin teeuruha saseredotecuru Jorioneei nenacaaurune rijijieein, Cana Coaunera rai, jeriha rai Suujuene rijijieein couluunojineein Jorionihechuru tihanune coina.

<sup>17</sup> Coujuriu Jesocurisito letononeein nena tocohaneein, Cana Coauneracha jerenohi ichaain nihanune jaanne raotjoeun. <sup>18</sup> Nii jaanne Jorioniheichuru relaaïn nihanune jeriha Cana Coaunerane rijijieein neuru coina, canu relaaïn nihalu Jesocurisitone jaan caje cuaain, leeocheaneein cuaain Jorioniheichuru relanaa coacueneen. Niine ichaau acaauru rai ereerejeein, acaauru aina neein canu ichao que acaauru notajaain, <sup>19</sup> cojoelanaacojoai ichana nainichaaunne jaan aina cuaain, Cana Coaunera Suujue aina cuaain, naaonjoaain. Nitohaneeine cana ichoterateraneein niha Jesocurisitone beebejihanune nainaaun jataain caohatiin, Jerosaleun caje nunuheteen itolere sacutaain Iliria batane que tiaaoljaain. <sup>20</sup> Nitohaneeine chabana turuureniha leeochoaurune jaanru cuhecujeein chabana aonaeraeniha Jesocurisito que erenaane jaanru Jesocurisito beebejeeun, nabana leeochoauru amihaneena jaanru turuhin, acaauru amihaneerohecaanune coataa. <sup>21</sup> Nitohanei ichana coacuelanaalane,

“Chabana que erena

aonaelanaala nenacaaurute,

inae aca Acanihane coaracurureein.

Chabana aonaelaanaala nenacaaurute,

aonaain coitucuha cuurureein,”

naain laenanohineein niha Cana Coaunera Quiricha cuhana rijijieein ichaau.

*Romau cunaa coaauca Faborone*

<sup>22</sup> Jaiti nii ichajihanune jaanne, araai saain inara coaraa unaa coaaucaanne nihanatiin nainesineen. <sup>23</sup> Nene laen inae ena canu amihaneero nainaaun, nii canuhacha beebejei atane sacutaainchurune jaun, inae inara coaraa unaa jereeun araai jaanacai baiha. <sup>24</sup> Nii



jaunne Españau cuhanune ucuaetoha, cuujihataain inara rene bedaenereuni, bajaanachuhinti aineeun. Nene laen atiin, inae nainaan inara rene bedainichaaune baiha, jelai caje amuhanune coina canu coroatajaniquichene jereeun. <sup>25</sup> Nene jaiti ena Jerosaleeun cureeunni, ecu nenacaauru coroatajaniha leeochoaauru cana nejeraauru taojiai tihanu acaauru raine coina. <sup>26</sup> Masedoniau nenacaauru, Acaihau nenacaauru, naaonjoainurite suujua caje coauneen, Jerosaleeun cairicheinejeein nenacaauru coroatajaniha letoaauruhane coina, niicha letoaenihunru taojiaaure. Nitohaneente rai suujua caje coauneen coacuhin, jataain caohacha ichacure. <sup>27</sup> Charijieein teeinti Jorionecurenihane saijieein, acaauru que Jesocurisito coitucuerateurelu, Jorioocuru Jesocurisito esenetaeraneen nenacaauru, nii rijijieinte Jorioniheichuru netonai, Jesocurisito esenetaeraneen nenacaauru Jorioocuru coroatajanecure, acaauruhacha sirii taojiaain letoaain. <sup>28</sup> Nii jaunne inae nii leeochoaauru coroatajaniha acaauruhacha taojiai amaain tihanune baihane laen, Españau cureeunni. Nii ucuaetohane laen cuujihataain inara rene bedaenereunni. <sup>29</sup> Inara rene bedaenichaaune, cana coroatajanerichaaain jelai amuritoheriin Jesocurisitone coitucuhanu.

<sup>30</sup> Inara raine aitoreeunicha canejeraauru. Atiin Jesocurisito aina cana belaiha cana rai Cana Coaunera Suujue tenojoi coreniha, caohachaaain cuha canu amihaneone coina, canu rai atiin Cana Coaunera bajaachete, <sup>31</sup> canu que chachana nainecureneeine Jodea nenacaauru Cana Coaunera coitucuhichuru. Chaen Jerosaleen turuhanune raotojoeen canu ranaa nainecuruha ecu nenacaauru cana nejeraaurune coina. <sup>32</sup> Jeriha Cana Coauneranena inara rene turuhin bedaenereunni, inara coaraain rachoojoeen ecu inara aina neein nebetacaanune coina. <sup>33</sup> Raotojoeen nihacachene teraneen nena Cana Coaunera, inara coroatajanemiim. Nitohanemiin.

## 16

### *Arajii cachaauru coaauca Faboro.*

<sup>1</sup> Jesocurisito rai iclesia neein nenacaauruhacha latei que acaauru coroatajaneraneen Cencrea nenaalu- cana nejera- neein ene neein nena- Febe quene inara rai aitoreeunni, <sup>2</sup> coujurihu Jesocurisito esenetaeraneen nena tocohaneen, inara rene turuhane raotojoeen Jesocurisito coreniha raain, satiin niicha latei que coroatajanequichene coina. Acate leeochoaauru coroatajaneen canune maajeein coroatajanelu.

<sup>3</sup> Canu rai Jesocurisito tenojoi amihanenaa que canu coroatajanera neein nenacaaurulu- Aquila, Firisila, naaonjoainuri coaucaanne beeuche acaauru rai.

<sup>4</sup> Acaaurute canu coreniha nichao itajerateeuruhane rai neeurelu, canu sohin canu jaonaa jerecuruhane bana. Nii jaun coatiha canuhacha acaauru coauhaaun, satiin Jesocurisito rai iclesianeein nenacaauru- Jorioniheichurute acaauru coreniha Cana Coanera bajanajaaocure.

<sup>5</sup> Jerichanetojoeinchu Aquila, Firisila, naaonjoaainunri loreri asaee netaojianacaauru canejeraauru coaucaane beeuche acaauru rai. Jataain canuhacha belaa- Efeneto coaucaane beeuche. Acate jauriaanejeein Asia batane que Jesocurisito esenetaera neein nelu.

<sup>6</sup> Taolu carajaain inara jana neein, inara coroatajaneranein nena Mariha netonai coaucaane beeuche.

<sup>7</sup> Chaen canu araichuru canu aina jiniiquiin caresero cuhane nenacaaurulu- Andronico, Joniasi, naaonjoainuri rai acaauru coaucaane beeuche. Acaaurute afosotooru que caohacha cachanecuruhane coarateein, canu ajiniha Jesocurisito esenetaeranein neeurelu.

<sup>8</sup> Jesocurisito coreniha jataain canuhacha belaineein nena- Ampliato rai coaucaane beeuche.

<sup>9</sup> Chaen canu rai Jesocurisito tenojoi amihanenaa que canu coroatajaneranein nena- Orobano, canuhacha belaa- Estaquis, naaonjoainunri coaucaanne beeuche acaauru rai.

<sup>10</sup> Jesocurisito esenetaeranein nihane jaun, mainajeein coujunojoneein nenaalu- Apeles netonai cocuhin, Aristobolo aina rai naraichuru coaucaane beeuche acaauru rai.

<sup>11</sup> Chaen canu araai Erodion, nii baiha Narsiso aina nejeraauru Jesocurisito esenetaeranein nenacaauru, naaonjoainuri coaucaane beeuche acaauru rai.

<sup>12</sup> Jerichanejeeinchu Jesocurisito icharatenohi icharanein nenacaauru- Tirifena, chaen Tirifosa, naaonjoainuri rai acaauru coaucaane beeuche.

Chaen cana nejera, Jesocurisito coreniha- cana baineein nena- Persida- nii mainajeein Jesocurisito tenojoi amihanenaa icharanein nenaalu rai netonai coaucaane beeuche.

<sup>13</sup> Rofo rai netonai coaucaane beeuche. Acate leochaauru amuritoheriin Jesocurisito esenetaeranein nihane coarate.

Chaen rai nebate canu neba rijijieein cacoelaichanein nelu.

<sup>14</sup> Chaen Asiincrito, Fleconte, Eremesi, Patrobas, Eremasi naaonjoainuri, chaen acaauru aina nenacaauru canejeraauru netonai rai acaauru coaucaane beeuche.

<sup>15</sup> Chaen Filologo, Jolia, Nereo aina rai bai Olimpias, naaonjoanunri rai acaauru coaaucaane beein, canaacha esenetai coreniha canejeraauru rai netonai acaauru coaaucaane beeuche.

<sup>16</sup> Jiniiquiin raotojoein ita rai ereein neeuche, ita nejeraneein nena rijijieein. Satiin Jesocurisito esenetaain rai cachaneein nenacaauru netonainte inara coaacuruhane berateeure inara rai.

<sup>17</sup> Inara canejera neeichene raine aitoreeunni, atiin nii jelai leeochoauru lerueraneein- inara amihaneoo lacuroaeraneein nenacaauru coaraain, acaauru que nainaan ichaohichene coina. Nitohanei icharate relanojoneein neeichelune jaan ichaquichene caohateraneein aicheein. Aihane jaun jiaonriha acaauru rohan neeichene.

<sup>18</sup> Jesocurisitohacha jerei ichana coacuelanaalate nechu acaauru jerecuruhane rijijieein- raihunhacha que chachaaain neeure. Chaentechu enaacha cache coritana inatiin aihuruhane jaun, acaauru coitucuelanaala nena cache coritacure enaacha.

<sup>19</sup> Satiinte Jesocurisitohacha jerei tonoraain ichaohichene coitucure. Nii jaunne jataain rachoojoeun inara coreniha. Aihane jaun baaso ichana coacuelanaala, itolere coitucueraneein neeichene coarateein caohacha nejesina ichacuche.

<sup>20</sup> Aihate inara tijia asaae jaoleneein niha nii baaso icharatera moconajaerane coina ichamiin raotojoein nihacachene teraneein nena Cana Coaunera. Inara coroatajanemiin Cana Curuaanaa Jesocurisito.

<sup>21</sup> Canu amihaneoo que cacorataaneraneein nena- Timoteo netonaite inara coacue. Chaen canu araaichuru- Locio, Jason, Sosipater, naaonjoaihunri.

<sup>22</sup> Canu caa Faboroacha laenaeratei quiricha laenara-Tersio nichaaunena canuhetonai cana Curuaanaa coreniha inara coacuen.

<sup>23</sup> Chaen caa nihanune jaan- loreri erora Caiho netonaite inara coacue. Acate rai loreri tee, satiin iclesianeein nenacaauru- turunacaauru nasaae netaojiaauruhane coina. Chaen caa nihacaunune jaan nese cocoaichacuru rai coriqui beraichaneein nena- Erasto netonaite inara coacue. Chaen cana nejera Coarto netonaite inara coacue.

<sup>24</sup> Cana Curuaanaa Jesocurisito, satiin inara coroatajanemiin. Nitohaneine.

*Raotojoein rachoojoein Cana Coaunera coroaecuche.*

<sup>25</sup> Cana ichoterateraneein niha Jesocurisitone que inara relanaanune rijijieein, leeinjiin Acaacha jerihane rijijieein neeichene coina icharaneein nena Cana Coaunera coroaecuche. Nii inara relaanulune jaante, chuni que coitucueratelanaala sirihane caje, cana que coitucuerate

Cana Coaunera. Acate asinojoneein sirilu, jaiti cana rai chauratane coaunaenihane ajiniha caje coauneein Cana Coaunera. <sup>26</sup> Nete laen, inae enene cana que coitucuerate nere bera inoaensihuru- *profetacuru* que, aca jerihane rijijieein been laenaeratihalu Cana Coaunera chabana satonoelanaala nenaane rijijieein. Nii niicha ichaneni asinojoneein nenaate, satiin lauri lauri nenacauru cachaauru que coitucuerate Cana Coaunera, esenetaain tonoraain neeuruhane coina.

<sup>27</sup> Leinjiin itolere coitucuhin nenea Cana Coaunera necaohacha coitucuhin coaracurumiin chabana satonoelanaala rai Calaohi Jesocurisito aina cuaain satiin cachaauru. Nitohanemiin.

## Coriintoo nenacaauru rai Faborohacha letoai leinjiin

*Chatohaneein neeiche Coriintoo neiniquichene.*

<sup>1</sup> Canune Faboro neeun. Cana Coaunera jerenohi neeinne, Jesocurisito cocoinanohi afosoto neein neeun. Cana nejera Sosetenesi aina jiniiquiin neeinna <sup>2</sup> caa quiricha laenacaanu. Satiin Coriinto neseu Cana Coaunera que banijiaineein rai iclesianein nenacaauru cana nejeraauru raina, caa lae-naain letoacaanu.

Satiin inarate Cana Curuaanaa Jesocurisito aina cuaain araai laurii caje ranojoneein neeichene saijieein, Cana Coaunera que banijiaineein le laurii caje nenea rijijieein nee-iche, itolere sacutaain Jesocurisito coroaeejein nenacaauru aina jiniiquiin.

<sup>3</sup> Cana Coaunera, Cana Curuaanaa Jesocurisito, naaon-joainuri inara corootajanemiin raotojoein neeichene coina.

*Jesocurisito aina cuaainte rausiaenjoinichaache.*

<sup>4</sup> Jesocurisito aina cuaain inara rausieca Cana Coaunerane corenihane, itolere bana coroaeeun. <sup>5</sup> Nii rai Calaohi Jesocurisito ere tonoraain esenetaaichene aina cuaainte, jataain inara corootajane Cana Coaunera, niicha jerenohin coitucuhin que ita rai raotojoein ereichene coina.

<sup>6</sup> Nitohanihane ainate, esinae rauhijiriin erenaa niha Curisito quene coitucuhin esenetaain rijijieein neeiche.

<sup>7</sup> Nitohanihane jaun, inara rai lanarinaain caohacha ichaquichene coina inara rai Cana Coaunera tenojoin, ocooca uha Cana Curuaanaa Jesocurisitone coaraqichene que tiajoaain. <sup>8</sup> Inara berairichaaain Cana Coaunera satono que tiaain, inara suujua letono ichaelanaala neeichene coina, nabana turuha Cana Curuaanaa Jesocurisitone bana niha inara que tonaain ereine coataa. <sup>9</sup> Itolere banate, satiin naitoonjoa ichae Cana Coaunera. Acate inara cotijiae, jiniiquiin rai Calaohi Jesocurisito aina ichaohichene coina.

*Ita caje nelerucuruha Jesocurisito ranojoinunrune*

<sup>10</sup> Canejeraauru, Cana Curuaanaa Jesocurisito corenihane inara rai aitoon, atiin ita suujua rijitojoein nii leechanein inara suujua cuaelanaala jiniiquiin raotojoein ichaohichene coina. Rachoojoein ichaaoche ita rijijieein coacuhin, ita rijitojoein abaantaain. <sup>11</sup> Nejesinajeein ita cotaairiin neeichene coitucuhanu Clohe laurichuru cajene jaunna, caa inara rai aitoon. <sup>12</sup> Chaen techu, inara aina nenacaauru

tabaaaauru, “Canune Faboro lauri caje neeun,” jana leochaaaurute, “Canune Aforo lauri caje neeun” jana leochaaaurute, “Canune laen Fedoro lauri caje neun” jana leochaaaurute, “Canune laen Curisito lauri caje neeun,” naaure. <sup>13</sup> Chasiinna araai lauriin neleruhin niha Curisitone coalanaala niriitiin ereriquiche. Coatihachu canu Faboro nichaaunne inara coreniha coroso que ohanulune coalanaala. Niheichu, Faboro nichaaunne coreniha baotisanojohi niheeiche. <sup>14</sup> Cana Coaunera coroaajihanu, Curisifo, Caiho, naajoainunri baotisaanune baiha leechoaauru cachaauru baotisaen nihanulune jaun. <sup>15</sup> Nitohanihane jaun nii chuni, Faboro nichaaunne laurinihane coreniha baotisanojohiniha nocoetiin erenaa nainihe. <sup>16</sup> Chaen nechu Esetefana lauri baotisaanlu. Coatihai nii baiha chuni baotisaanune coitucuhaaun. <sup>17</sup> Coatihai cacha baotisaanune coina caletoaailu Curisito. Raujiaaincha jianacoon nenea nainecururichain cachaaurune bihanune coinate caletoaelu. Coatihai amurijiriin cha coitucueraneein nihanune coina caletoaailu. Nitohanihane saijieein cha coitucueraneein nenea rijijieein nere bihanune, cha que nelaterihe cana ichoteraneein nihane coina coroso que ohalu Curisitone.

*Curisitote, niicha ichana naine aina niicha coitucuhi ichaa Cana Coaunerane jaan ne.*

<sup>18</sup> Nii coroso que ohalu Jesocurisitone que erenaate aonacure nii cha que nelatihei rijijieein nii nitajeeuruhane coina nenacaauru coitucuhichuru. Nete laen cana rai jianacoon cacha mitaeraneein ne nii erenaa, jeelai Cana Coaunera ichanohineein. <sup>19</sup> Rai Quiricha Inoaensi cuhane: “Itolere coitucuureraauru coitucunojoi itajeeinne, nainaan ichaaoruha nainanacaaaurune jaan itajereunni,” naain bihalu Cana Coaunera.

<sup>20</sup> Inae cha que nelateein nedaauruhi itolere coitucuureraauru aina cacha relaaaureraauru. Niheichu nelateein nedaauruhi, caa cana rai chauratane que nenacaauru itolere coitucuureraauru niha natiin. Satiin itolere coitucutoha nocoenacaaaurute, leinjiin aaso rijijieein ratiri Cana Coaunera. <sup>21</sup> Cana Coaunerate niicha coitucui ichae, nabana nii niicha coitucui aina cuuain niicha tei ichaonaa coitucuhin nichotena nainecuruha nii coitucuhichurune coataa. Nitohanihane jaunte, rai nere letoae, satiin esenetaain jeriha cachane jianacoon ichaonaa nainihane coina. Nete, nii nere esenetaaichuru, joaenreein nelatihei rijijieein aonacuruhane niha natiin, esinae rauhijiriin jianacoon cacha mitaeraneein ne.

<sup>22</sup> Nitohanihane jaunte, cojoelanaacojoai coana jerecure Joriocuru nichaaunne. Jana Curiecocuru, cha coitucuuruhane jaanu ariiriichure. <sup>23</sup> Nena canacaanu,

jianacoon cacha mitaeranu que Cana Coaunera letono coroso que onaalu beebjihacaanu. Niite Joriocuru rai leiijiin nererojocanaaneein acaauru tee. Jana Jorione lanaala nenacaaurute, nechu joaenreein nelatihei rijijieein aonacure. <sup>24</sup> Nete Cana Coaunera cotihanoichuru, Jorioneein, Curieconein, naaonjoaain nihacachene niha natiin, nii letono Mesihasi Curisitote jeelai Cana Coaunera ichanohin ichaain, niicha coitucui coitucuhin nihane coitucuhacache. <sup>25</sup> Cana Coaunera beratenojoin, joaereein nelatihei rijijieein coaraa cachane niha natiinte, satiin cachaacha coitucui amurijiriin nelate. Chaen techu Cana Coaunera icharatenohi, nelatelanaala coaraa cachane niha natiin, jataain cachaacha ichai amurijiriin, laraajiin mijiaineein nereein itolere bana. <sup>26</sup> Canejeraauru, coroatajajeeincha inara tabaauru cha coitucuera rijijieein neeichene saiijieein, jitariin inara cotijiaain niha Cana Coaunerane que nainaaain ichaaoche. Nii ichoae tacaain techu coroatajajeeincha inara tabaauru nelateinneein nenacaauru cachaauru lauri caje neein, cocoainanacainein, naaonjoainein neeichene saiijieein jitariin inara rae Cana Coaunera. Nii que nainaaain ichaaoche. <sup>27</sup> Nitohaneein itolere que nainaa nocoetonacaauru necoeje chanunaa jerenacaaunte, jaolecooruha nii nainanacaaurune jaancuru cachaauru janijiin cotijiae Cana Coaunera. Chaen techu nii leeochoauru amurijiriin nelatenacaauru raelanaala, nii nelatelanaala acaauruhacha coaracuri cachaauru raain ne Cana Coaunera, acaauru necoeje chanunaa jerenacaaun. <sup>28</sup> Nitohaneeinte jerenohinelanaala, coiintenojoneein, nelatelanaala, naaonjoaain cachaauruhacha coarai cotijiaain ranajaain ne Cana Coaunera, nechu nii acaauruhacha itolere amurijiriin nelatiha nocoenacaauru que jaoleconaa jerenacaaun. <sup>29</sup> Nitohaneein Cana Coaunera acatiha nihacachene jaun, nainihaacache leeochoauru amurijiriin nihacachene coaratihacachene. <sup>30</sup> Cana Coaunerate raajenhane inara raain ne, rai Calaohi Jesocurisito aina neeichene coina. Chaen techu nii rai Calaohi Curisito coreniha chabana canaacha coitucuhi coitucuhin, coreniha osa caje mituhin, cha juaihoneein nena caje ichoteratenojoneein, jelai teein que banijiaain raotojoein nena coina ichae Cana Coaunera. <sup>31</sup> Nitohanihane quete: “Caohachai cana raajenhane canaacha ichai coreniha necohasitaacachene. Cana Curanaacha ichanojoiincha coroaecaachenete laen caohachae,” nae Cana Coaunera Quiricha Inoaensi cuhane.

*Coroso que atinanojoin Curisito beratenojoin*

<sup>1</sup> Aonacuche canejeraauru. Inara rai Cana Coauneraacha ichaneni coitucueraelanaala nena que iriha uhanune bana coatiha inaraacha coitucunaa nainihe que irinaaunlu. <sup>2</sup> Nii inara aina nihanune bana, coatiha leecha coacuhin que inara rai irihaaunlu, esinae rauhijiriin coroso que neein onaalu Jesocurisitohachane coacuhin que inara relaaunlu. <sup>3</sup> Chaen nech uhanune turuhanune nunuheneein, joaenreein cacha chaque nelatihei rijijieein turuunlu. <sup>4</sup> Niheichu Cana Coaunera jerenohin que inara relaanune bana coatiha canu esenetaaichene jerenacaun nii aitocuruha nii itolere coitucuerane rijitiin ereein inara relahaanlu. Nena rai Suujue aina itolere ichana nainiha Cana Coaunerane jaan aina cuaain inara que jereratichaaune jaun nii aina esenetaachelu. <sup>5</sup> Leinjiin Cana Coauneraacha ichanenu esenetaain que jaaecohichene coinane, nitohaneein inara relana-jacoon, nabana suujua caje rocohin cachaauruhacha coitucunojoi que jaaecohichene coataa.

*Rai suujue aina cuaainte necoitucuerate Cana Coaunera*

<sup>6</sup> Nena laen inae acaauru suujua cuhane niicha esenetai aina iinacaauru rai jelai amuritoheriin canacaanu que Cana Coaunera coitucueratenojoi que irihacaanu. Coatihaa chauratane que nenacaauru cachaauruhacha coitucui que nihei. Niheichu acaauru rai cocoainanacaaihuri nitajerai nenacaauru coitucunojoinnein nena que aitohacaanu. <sup>7</sup> Acate caa cana rai chauratane coaunaane ajiniha, enene cana necaohachanu que niicha ichanenine que inae coausilu Cana Coaunera. Nii quene caa inara rai irihacaanu. <sup>8</sup> Nii coitucueraelanaala nena niicha ichanenu coausihalu Cana Coaunerane coitucuerane jaunte, coroso que teein nii cana rai caohacha icharaannu que letono atinaaurelu. Coitucuerane jananihane, coatihaa coroso que teein atinaaururiheiluu caa chauratane que nenacaauru cocoinanacaaihuri. <sup>9</sup> Nete Quiricha Inoaensi cuhane:

“Cana Coauneraate

belaichaaauru rai,

chabana coaanojoinelanaala nena

aonanojoinelanaala nena,

naaonjoainuri ichaain

acaauru que banihatein rucujue.

Niheichu chuni,

‘Naaonjoanrichaain’ naain que coaaura,”

naain beratihalune nainaane coina ichae Cana Coaunera.

<sup>10</sup> Nii niicha ichaneni, niicha coacuilute cana que coitucuerate, rai Suujue aina cuaain Cana Coaunera. Nii Cana



Coaunera Suujuete, satiin niicha ichaneni coitucue, satiin suujua cuhane niicha coacuine maajeiin.

<sup>11</sup> Nihei chuni ita suujua coitucuna nainera. Leinjiin nii suujua cuhane nenea, rai suujuete naine cacha suujua coitucuhane. Nii rijijieein techu nene chuni Cana Coaunera Suujua coitucuera. Acaihaniji rai Suujue rai suujuaacha cuane nenaachate rai suujua coitucue. <sup>12</sup> Coatiha canacaanu, caa Cana Coaunera coitucuelanaala nenacaauru cachaauru rijijiein Moconajaera suuje rahaacaanu. Acaihaniji Cana Coaunera Suujuene raacaanu, aina cuaain jataain cana belaitohane jaun, cana rai niicha tei coitucunojoin aon-aain coitucuhin nihacachene coina. <sup>13</sup> Canacaanu relaa Cana Coaunera Suujuene jaan quene aitocaaanu. Coat-ihha canacaanu suujua cuhane canacaanuhacha coacuhi que aitohaacaanu. Nitohaneeinna Cana Coaunera Suujue beratenojoi bihacaanu, Cana Coaunera Suujue coitucuhin nenacaauru rai.

<sup>14</sup> Nitohanihane jaunte, Cana Coaunera Suujue raenihane coina ichaonaa, nii Cana Coaunera Suujue jerenohi coitucuhin tonorana nainene, nii chaque nelatihei rijijieein aon-aane jaun. Niheichu aonaane niha natiin coitucunaa nainihei, Cana Coaunera Suujue sirinihane jaun. <sup>15</sup> Nete laen Cana Coaunera Suujue siricha itolere coitucuhin coulurujuenaa nainereein. Nerinaain que tonaain que ereein aca coulurujuenaa nainera. <sup>16</sup> Nitohanihane coinete, “Nihei chuni suujua cuhane Cana Coauneraacha coacui coitucuera. Niheichu chuni suujuatenaa nainera,” nae rai Quiricha Inoaensi cuhane. Nete laen cana, coaauca Jesocurisitone rijijieein coaaucaache.

### 3

*Canacaanune Cana Coaunera letononeein ita amihaneeon coroatajaneraneein nihacaanu.*

<sup>1</sup> Canejeraauru, nii jauriaanejeein inara relaa uhanune bana, coatiha Cana Coaunera Suujue letono rijijieein inae ijiin ichaonacaauru cachaauru relaanune rijijieein inara relanaa nainihaaunlu. Nii jaunna Cana Coaunera coitucuhichuru cachaauru rijijieein ichaohichene jaun, Cana Coaunera Suujue letono rijijieein inara relanaa naineneeunlu. <sup>2</sup> Nitohaneichene jaunte, caaintaelanaala inara relaanulune jana, tonoraelanaala abaantana naineneeichelu. Niheichu enanetoojeein nihanatiin tonorana nainiheeiche. <sup>3</sup> Aihuruha Cana Coaunera coitucuhichurune rijijieein enanetoojeein inara suujua coaraquichene jaunte, nii ita que necoelaain, ita que nererojoecaain, naajoaain neeiche, aihuruha satiin

Cana Coaunera coitucuelanaala nenacaauru cachaaaurune rijijieein. <sup>4</sup> “Canune Faboroacha ere tonoraaun,” jana leeochoaauru “Canune Aforoacha ere tonoraaun,” naain ereeichene jaunte, jaiti Cana Coaunera coitucuelanaala nenacaauru cachaaauru rijijieein ichaohichene jaun aitocoiche.

<sup>5</sup> Coatiha canu Faboro nichaaunne chanihaaun. Niheichu cha nihei Aforo netonai. Canacaanune raujiaain Cana Coaunera letononeein, inara aina niicha ichaneni coitucuerateraneein canacaanu letoaa Cana Coaunerane rijijieein, niicha icharatenohin icharaneein nihacaanu. <sup>6</sup> Canune inara que Jesocurisito coitucuerateraneein neeun. Jana Aforote caohachaaain coitucuhichene coina que inara relaeraneein ne. Nete laen Cana Coaunera, nii aina cuaain chabana nitajenaachara ichaonaa teraneein ne inara rai. <sup>7</sup> Nitohanihane jaun, nii inara que coitucueratera nichaaunne, nii inara relaera aina chaneein nihaacaanu. Cana Coaunerate laen nii inara relaacaanune jaan aina ijiin ichaohichene coina icharaneein ne.

<sup>8</sup> Nitoanihane jaun, canu inara que nii Cana Coauneraacha ichai cotucueratera nichaaunne, nii que inara relaera aina jiniiquiin ita rijijiaanu. Nete laen nii inara que niicha ichaneni coitucueratihacaanune cainareein Cana Coaunera.

<sup>9</sup> Canacaanune Cana Coaunera letononeein canacaanu rai niicha tei amihanenaa que ita coroatajaneraneein nihacaanu. Inarate leinjiin ocoana aina leinjiin loreri rijijieein neeiche Cana Coaunera rai. <sup>10</sup> Jana canune, inara que amihanenaa nunuheteraneein neeun Cana Coaunera letononeein. Jana leeochoaaurute, nii quiicha banesijiatei bucutejeeure. Nete, le cachanichaachene caohachaaain ichacaachene coaraain ichacaachene caohachae. <sup>11</sup> Nihei chuni nainiheii nii banesijia quiicha tenojoin coreein leeochoa tenaa nainera. Nii banesijia canuhacha teite Jesocurisito ne. <sup>12</sup> Nii rai banesijia quiicha temunojoin ichoaete nainere, coata coreti, ajeri coreti, enuha, elele, jiarana nujua, naajoain caje nainecurure loreri ichacuruhane. <sup>13</sup> Nete, inae le cachanichaachene ichao cojuhin coaraa Cana Coaunerane cojoanonaa que turuhane bana, le catcha cachaaauru amihaneon inanacaa cureein. Nii banate, usi tabaineein ureein nii cana ichanaa cojuhin coaraane coina. <sup>14</sup> Chariji ichanaa teeinti mocohelanaala nii usi abaantae, nii icharate core raa cureein. <sup>15</sup> Jana mocoha nii niicha ichainete, nitajiha cureein rai namihaneeo. Jana nii que amihaneite, nii usi caje nichotereein cha colane.

<sup>16</sup> Tana Cana Coaunera loreri neeichene jaun, inara suujue cuhane niha Cana Coaunera Suujuene coitucuhichene.

<sup>17</sup> Nii Cana Coaunera loreri neeichene jaunte, osa que inara saruhin baasoneein inara teranihanee, Cana Coaunera loreri

aasaeca aicheein. Niite aca itajihä cureein Cana Coaunera, acaihaniji rai loreri neeichene saijieein inara ichao asaacane coreniha. Inarate nii rai loreri neeiche.

<sup>18</sup> Coa inara raaje necoritaache Cana Coaunera coitucuhichuru rijijieein itolere coitucuha nocoetiin. Nitoaneein neeichene, nii baiteein enacoauneein Cana Coaunera coitucuhin neeuchete, esinae rauhijiriin cha coitucueraneein neeiche. Nii banate laen esinae rauhijiriin cha coitucueraneein neriquicheein. <sup>19</sup> Nii quete, “Nii itolere coitucutoha nocoeeuruhane jaan aina raajenhane necoritaauruha que jaoleconacaaurune cointate ichae Cana Coaunera,” naain ne laenanohineein Cana Coaunera Quiricha Inoaensi cuhane. <sup>20</sup> Chaen techu coaiteen, “Nii itolere coitucutoha no-coenacaauru coaunojoite, nii cha que nelatenihane coitucue Cana Coaunera,” naain ne laenanohineein Cana Coaunera Quiricha Inoaensi cuhane. <sup>21</sup> Nitohanihane jaun chunocoha cacha, joenreein namute cacha rijijieein ichaohane nainihe, raotojoein niha nocoetiin necohasitaane. Satiin itolere inaraacha lateite, inara rai teein ne Cana Coaunera. Aihana jaun, Cana Coauneraachate coroaena nainequiche, inara rai itolere teein nihane coreniha. <sup>22</sup> Canu, Aforo, cana rai chauratane, cana rai ichaonaa, caa ena nena, cabaiha neenihun, niichurute Cana Coaunera tenojoineein neeure inara rai. <sup>23</sup> Jana inarate Curisito rainequiche. Jana Curisitote Cana Coaunera raine.

## 4

### *Afosotooru amihaneeo.*

<sup>1</sup> Cana Coaunera ichanohi coitucuheraelanaala nena que Curisito letononeein rai cacha relaeraneein nihacaanune coitucuhichenete caohachae. <sup>2</sup> Chelai icharaanu que letononeein nihacanete, nii cana letoaera suujua rijijiein nere tonoraain ichacaane caohachae, nere tonoraain nihacane coitucunaa nainiha nii cana letoaerane coina. <sup>3</sup> Nena laen baasoneein ichacaanune coitucueralanaala canu que ereein neeiche cocoinanacaaihuri ainane nihanatiin, cha que tonajeneeun. Niheichu canu raajenhane nihanatiin baasoneein, caohachaaain, naajoaain ichacaanune coitucunaa nainihaaun. <sup>4</sup> Nena, nii casuujua cuhane baaso ichaenihanune coaucaanune, canu baaso ichacaanune coitucunaa naineneeun. Cana Coaunerate laen, baaso ichaaain, caohacha ichaaain, naaonjoannune coitucuha cureein. <sup>5</sup> Aihana jaun, “Acate baaso ichae,” naain leeochoaauru que erena nainiheeiche acaauru ichao coitucueralanaala. Jauriaaneein turuha cana Curuaanaane cohacuche. Acate laen nainereein, jitariin nii suujua cuhane acaauruhacha coacuhi,

acaauruhacha ichai, naaonjoainuri coitucuhane. Nii bante caohachaaain icharaauru lecachaauru coroaereein Cana Coanera.

<sup>6</sup> Canejeraauru, inara caohachanu quene caa inara rai Aforo, canu, naaonjoain nichaanune ichanohin que cuaain inara rai beeun, caje coauneein canacaanu ichanohi que coacuhin, rijijieein ichaquichene caina. Nabana Quiricha cuhane aitohane edaa cuaain ichaquichene, nabana leeochoauru amurijiriin cha coitucueraneein nenea coacuhin, acaauru que jaolecohichene coataa. <sup>7</sup> Chariji inara rai leeochoauru amurijiriin neeichene jaannu teein ne. Chariji inaraacha sirii, Cana Coanera tenojoinelanaala siriquiche. Tana Cana Coanera, inara rai itolere tihane coitucuhichene. Nii saijieeinte inara raajenhane cha eruhera rijitiin inara necohasitaacha que neeiche.

<sup>8</sup> Nitohaneeichene jaunte, itolere inaraacha jerei siriin, itolere cacha curuaanaa *rey* niha nocoetiin, canacaanu latiha nocoeteneeiche. Bajiaanachuhinti esinae rauhijiriin *rey* esineneein neneeiche, inara caje canacaanuhacha latei bajaain, inaraacha sirii sirichaneein nihacaanu canacaanu netonaine caina. <sup>9</sup> Canacaanu afosotooru nichaanune raite, jataain leeochoauru amurijiriin necairichanaa coaraain ohacaanune caina ichara tocoaneein canacaanu te Cana Coanera. Chaen nech, satiin anjeraauru, cachaauru, naaonjoainuri notaracae nihacaanu, nii cairichei coaraain.

<sup>10</sup> Curisito esenetaain niicha jerenohin tonoracaanune corenihane, aaso cha coitucuhi rijijieein nihacaanu. Jana inarate, itolere Curisitoacha jerenohin coitucutoha nocoetiin neeiche. Chaen techu, joaereein nelatihei rijijieein nihacaanune jana, inara itolere amurijiriin laraajia nocoetiin neeiche. Nitohaneeichene jaunte, inara leeochoauru aina jiniiquiin, canacaanu que jaolecohiche. Jana leeochoaurute, inara que suujua acatecure.

<sup>11</sup> Enanetojoeein mijitena, cocoiinina, cajione, naaonjoain que necairichaacaanune jianihacaanu. Nii canacaanu que jaolecooruhane ichoae tacaain techu, canacaanu que nererojoecaaure. Niheichu nii canacaanu nenaja niha natiin.

<sup>12</sup> Chaen nech, cotaecaanu canacaanu bijiicha que amihanejeein. Canacaanu cotaicha raine, caohachaaain nihane caina irihacaanu. Chaen nech, canacaanu rerohecaauruhane niha natiin abaantaacaanu.

<sup>13</sup> Canacaanu rai baasoneei iriha cachanena, raotojoeein tonoraacaanu. Nitohaneeinte caa cana rai chauratane que jaoleneein nenea utoone rijijieein canacaanu coaraain, enanetojoeein canacaanu que jaolecoore.

<sup>14</sup> Coatiha inara necoeje chanuha aitiin laenahaan. Inara suujuatihane ichaan. Inara belaihanu canu calaohi

rijijieein neeichene jaun. <sup>15</sup> Inara Jesocurisito ranojoneein neeichene relaeraneein neeuruha lechoonca oaraancaneein niha natiin, coatiha acaauru inara inacanihei. Canune laen inara que, nii enene inaraacha esenetai Jesocurisito coitucuerateein, nii osa caje nichotiha cachane jaan ichaonaa, naaonjoain beraneein inara inacaneein neeun. <sup>16</sup> Nitohanihana jaunne inara rai aitoon, canu ichao rijijieein ichaohichene coina.

<sup>17</sup> Nii ichaohanune rijijieein ichaohichene coinane, nii Cana Curuaanaa coreniha cacalabi-casuujua rijijieein nena Timoteeo letoaaun. Acate Jesocurisito esenetaeraneein nihanune ichao rijijieein, Jesocurisito ranojoihunru rene turuhanune jaaunru inara relaunune coaquichene coina inara rai bereein.

<sup>18</sup> Inara tabaaurute inae itolere coitucuha nocoetiin raotjoein neeure, inae inara rene nacoauneein tururichaaunine esenetaaurenihane jaun. <sup>19</sup> Nena Cana Curuaanaa jerihane enanocoojoa inara rene bedaeniha ureeunni. Nii banane, nii itolere coitucutoha nocoenacaauru coaareeunni, nii nelatecuruhane coaracaanne coina.

<sup>20</sup> Coatiha erenaacha nihei Cana Coaunera Cojoanona. Acate canacaanu cocoinae, itolere ichana naineein, itolere rucuhena nainichaanune jaannu teein. <sup>21</sup> Aihana jaun cha jeriquiche. Rauhijiriin inara casetecaa uhanunena jeriquiche. Ainihane jataain inara belaa inara coaraa uhanunena jeriquiche.

## 5

### *Baasoneein ichoai sitaauche inara caje.*

<sup>1</sup> Leinjiin nii inara jana nena, rai inaca comasai-nebaene siriha rai comasaineeinne coitucuhanu. Nitohaneein ichaonaa, jataain coasinacai ne. Nii Cana Coaunera coitucuelanaala nenacaauru niha natiin, nitohaneein ichaonaa nainecuruhi. <sup>2</sup> Nii saijieeinte caohacha ichaa nocoetiin rachoojoeiche, bana nii baaso ichaquichene que coacuhin inaderaelanaala. Aihana jaun inara jana nitohaneein ichaoa cachane sitaauche.

<sup>3</sup> Canu jaberoconein inara aina nenihanune niha natinne, canu sujua cuhane inara coaareeunni. Nii jaunna caa inara rai canu jaberoconein netiin aitocaaanne rijitjoeein aitoon, canu Jesocurisito cocoinanohineein nii caitoonjoa tochaneein baaso ichara casetecaaichene coina.

<sup>4</sup> Ita taojiaaichenena canu suujua cuhane inara coreniha Cana Coaunera bajareeunni, caohachaa inaraacha ichaneni ichaquichene coina. Chaen techu Cana Curuaanaa Jesuso netonai ecu nicha ichana nainei letoareein, ecu inara aina nihane coina. <sup>5</sup> Nii jana laen, nii baasoneein ichaonaa

cache teeuche Moconajaera rai, nitajiha rai jaberocone niha natiin, inae turuha Cana Curuaanaa Jesusone bana rai suujue nii caje nichotihane coina.

<sup>6</sup> Nitohaneein neeichene jaun, nainiheeiche caohacha ichaa nocoetiin ereeichene. Inarate, “Coaerai curu cuhane jorerera tihacanete enaacha coerae,” naa erenaane coitucuhiche. Charijieein teeinti nii jorerera lomohe nii coaerai, nii rijijieein techu inara ichao aasaeraneein ne nii inara jana nena baaso ichara cache. <sup>7</sup> Aihana jaun charijieein teeinti jorerera jaohin, jorerera colane faan jaaure Fasocaa beseta bana quihuruhane coina. Nii rijijieein nii inara jana nena cache baso jaoche, nabana rai nichao baaso aina inara ichao asaecane coataa. Curisitote, carenero sooruhane rijijieein Fasocaa bana cana coreniha sohin jaaorelu, jianacoon niha-cachene coina. <sup>8</sup> Charijieein teeinti baaso ichara cojunacanein niha jorerera jaun, Fasocaa beseta bana nii jorerera colane ichanohi faan quihacache. Nii rijijieein techu nii jorerera colane ichanohin faan rijijieein, aihalu Jesocurisi-tone rijijieein, cana jana baaso sirilanaala ichaohacachene caohachae.

<sup>9</sup> Nii leecha quiricha, inara rene canu letoanojoin cuhanena beeun inara rai, nabana namute quicha aina, leecha ene aina, canaanaihunru aina, naaonjoaainunri aina niicha jerei ichana jereein nenacaauru raain neeichene coataa. Nii rijijieein chu enecuru nihanatiin namute ene aina, leecha quicha aina, canaanainunru aina, naaonjoaainunri aina niicha jerei ichaai ichaonacaauru ranaa nainiheeiche. <sup>10</sup> Coatiha nii Cana Coaunera coitucuelanaala nenacaauru, namute quicha aina, leecha ene aina, canaanaihunru aina, naaonjoaainunri aina niicha jerei ichana jereein nenacaauru caje amuhichene coina aitoaaun, Chunijiun cuhichene niha natiin lanaenerichaa baaso icharaaurune jaun. <sup>11</sup> Raujiaaine inara rai aitoon nabana nii Cana Coaunera coitucuhin neeuruhane saijieein, nii nejelau sinijeranelanaala nena aina ichaonacaauru, barionein ichaonacaauru, nii ichanohinein nena coauneraacha esenetaeraauru, casajenetiin, ajetoritiin, asijiauharitiin, naaonjoaain nenacaauru aina, “canejera,” naain acaauru rai ereein neeichene coataane aitoon. Jiaonriha Cana Coaunera coitucuha nocoetocuruhane saijieein nitohanein ichaonacaauru aina nelaurihaain lenonequichene.

<sup>12-13</sup> Coatiha nii joaenreein Cana Coaunera coitucuelanaala nenacaauru, baaso ichacuruhane niha natiin acaauru rai ereein rucuhena nainihaaun canu. Cana Coaunera telaen, nii baaso ichacuruhane coitucuhin, acaauru que niicha ichaneni coitucureein. Nete laen inara nainequiche, nii cana ri-

jijieein Cana Coaunera coitucuhin nenacaauru baaso ichacuruhane rucuhequichene caohachae. Aihana jaun, nii inara jana baasoneein ichaonaa cacha sitaauche.

## 6

*Jiaonriha nejesinajeein inara rai niha chatohanai rucuhenacaine Cana Coaunera coitucuelanaala nenea cocoinanacai rene cuhichene.*

<sup>1</sup> Chunocoha inara rijijieein Cana Coaunera coitucuera, inara rai baaso ichaane jana colurujuenaa jeriquichene, nainiheii nii Cana Coaunera coitucuelanaala nenacaauru cocoinanacaihuri jaesiocuru rene coulurujueeichene. Raujiaainchate nainere Cana Coaunera coitucuurera bichauheneeuru rai beeichene, caohachae acaauru coitucuhin rucuhecuruhane coina. <sup>2</sup> Tana Cana Coaunera coitucuelanaala nenacaauru, baaso ichaain, caohacha ichaain, naaonjoaauruhane coitucuhin, rucuherrichacheein Cana Coaunera coitucueraneeine coitucuhichene. Nitohaneein Cana Coaunera coitucuhichuru ichanohin coitucuhin rucuherraneein nerichacheeinne saijieeinte, nii aansijiin laojoiiri caaintaelanaala nenea rucuhena naineneeiche. <sup>3</sup> Tana Cana Coaunera letonocuru, anjeraaurune maajeein baaso ichaain, caohacha ichaain, naaonjoaauruhane coitucuhin rucuhena nainerichacheeine coitucuhichene. <sup>4</sup> Aihana jaun chanuna jana chaen jaiti cau nenea ichaonaa que ichaohichene jana inara aina baaso ichaa inara rijijieein Cana Coaunera coitucuherrane, nii Cana Coaunera coitucuurera rai chanelanaala nenacaauru joesiocuru rai coulurujueein naaonjoaainche. <sup>5</sup> Nocojequichene jaan nuquene caa aitoon inara rai. Tana inara Cana Coaunera coreniha ita nejera nejesinaneeinne, ita rai baaso ichaain neeichene nihanatiin niha leinjiin inara jana rucuhena nainerane coitucuhichene. <sup>6</sup> Chaen techu nii ita nejera nejesinajeein ita cotaichene, nirijieein jianena coacuelanaala cocoinanacaaihuri-Cana Coaunera coitucuelanaala nenea rene amaain naaonjoaainche. <sup>7</sup> Nitohaneeinte, nejesinajeein ita rai aasaeriin baaso ichaquichene coreniha ita coulurujueein jataain banejelanaala baaso ichaquiche. Chanuna baaso ichaain ita coulurujueichene ajiniha, baaso icharanihane abaantaeneeiche. Chanuna coaraain inara basijiaauruhane abaantana naineneeiche. <sup>8</sup> Nete nii abaantana coacuelanaala, Cana Coaunera coitucuherrane nejesinaneein ita basijiauhin naaonjoaainche.

<sup>9-10</sup> Tana nitohaneein necha aansaneein nenacaauru, Cana Coaunera Cojoanonaa que nenea nainecurener-ichaainne coitucuhichene. Nitohanihana jaun jiaonriha

inara coritaaauruha Cana Coaunera coitucuhichurune esenetaaichene. Coatiha Cana Coaunera Cojoanonaa que neeururinaain namute quicha aina, leeocho ene aina, canaanainunru aina, naaonjoainunri aina niicha jerei ichana jereein nenacaauru, nii rijijieenchu enecuru nihanatiin namute ene aina, leeocho quicha aina, canaanainunru aina, naaonjoainunri aina niicha jerei ichaai ichaonacaauru, namute cacha ichanohineein nenea coauneraniha niicha beeuri belaichaauru, sinijeraocuruhane niha natiin leeocho ene aina ichaojeraquiin nenacaauru, namute quicha aina ichaonacaauru, asijiautooru, coriquiicha que coacuhin ichaonacaauru, ajetoriaacuru, namute cacha cairichaa casajenetiin ichaonacaauru, nii nechu namute cacha cairichanaa jerenacaaun baasoneein suujuateeureraauru, naaonjoainurine coitucuhichene. <sup>11</sup> Nii rijijieeinte nerejetocure inara tabaauru netonai. Nete inae enene nii caje couluunojoneein jianacoon neeiche, Cana Coaunera cachaneein. Chaen techu, inae nii ujuaihoneein neeichene caje, inae Cana Curuaanaa Jesocurisito, Cana Coaunera Suujue, naaonjoainuri coreniha jianacoon neeiche.

*Suujua letono ichana nainihehi cacha.*

<sup>12</sup> Chaen techu, “Nainichaaun joenreein quiicha jerei ichacaaunne,” naain ereeiche. Esinae rauhijiriinte niqui aitocoiche, nete caohachaene satiin itolere joaereeincha ichana jerichaane. Aihana jaun nainihehi cana jaberoco amuritoeratihaca nii canaacha ichai que ne. <sup>13</sup> Esinae rauhijiriinte niqui, “Itolere lenonete coaunanojoi ne, que lenoneein ichaohanune coina. Nii rijijieein techu jatoroaain ne, canu suri jitariin canuhacha quii raane coina,” naain ereeiche. Nete inae ecu tihane bana, lenone, cana jaberoco, naaonjoain satonotereein Cana Coaunera.

Nii rijijieein techu cana sinijera ainaacha ichaohacachene coina cana coaunaain nelu Cana Coaunera. Coatiha joenreein cana sinijeranelanaala nenacaauru aina canaacha jerei ichaai ichaonaa coina nihein.

Nii jaun nainihaacache joenreein naosateein nihacachene. <sup>14</sup> Nitohanihane jaunte, Aca jerihane rijijieein tonoraain nenea, Cana Curuaanaa ichatiha O cajene rijijieein cana ichatiha cureein Cana Coaunera. <sup>15</sup> Tana nii nitohanihana jaun, Curisito jaberoco niha inara jaberocone coitucuhichene. Aihana jaun nainihehi, Curisito jaberoco niha inara jaberocone jaun, leinjiin coriqui jeriha quicha aricha ene jaberoco rijijieein inara jaberoco teeichene. Nitohaneein jerihane inara jaberoco tenaa nainiheehiche. <sup>16</sup> Tana leinjiin ene cojoaeloroe aina, niicha jerei ichaa cachane, inae



ita jaberoco que jaberocoha cachane coitucuhichene. Cana Coaunera Quiricha cuhane techu, “Ene aina ita raain niha cachanete, jiniquiin ita jaberoco que jaberocoanaa rijijeein ichaaorureein” naain ne laenanohineein. <sup>17</sup> Nitohanihane jaunte Cana Coaunera coitucuhane, Cana Coaunera suujue aina suujue te catcha. <sup>18</sup> Nitoanihane jaun leeocho ene jereein coaraain, aina inaraacha jerei ichana coaauquichene jelai caje amuuche tonoraelanaala, nii rai sinijeranelanaala nena ene aina naosatelanaala. Leeocha osa que neosatiha cachane niha natiin, coatiha laen rai jaberoco aasaehai. Nii comasainelanaala nena ene aina niicha jerei ichaain niha cachanete laen, raajenihane rai jaberoco aasajeein naosatiha ai. <sup>19</sup> Tana inara jaberoco, Cana Coaunera tenojoin rai suujue nenaja nihane jaun, inara suujue cuhane ichaoha Cana Coaunera Suujuene coitucuhichene. Aihana jaun coatiha inara, inara raajenihane inara jaberoco eroraniheeiche. <sup>20</sup> Cana Coaunera jataain coreein inara coreteein nihalune jaunte, acaihaniji raachaneein neeiche. Aihana jaun naitoonjoan tonoraain niicha jerei ichaain neeichenete caohachae.

## 7

### *Nisinijerateein niha cachane que suujuatera*

<sup>1</sup> Enane laen nii quiricha inaraacha letoai cuhane, canu caje inaraacha bajai bereeunni inara rai. Caohachariha niqui ene raelanaala niha quichane. <sup>2</sup> Nete enaacha joareein ene aina niicha jerei ichana jeriha quichane jaun, le catcha catchaauru comasaihocane caohachae. Nitohanihane jaunte, enecuru netonai niha natiin caohachae nelanajaain neeuruhane.

<sup>3</sup> Chaen techu jiniquiin nii rai lana aina, ita ere tonoraain raotojoein jiniquiin ita coiintelanaala neeuruhane caohachae. <sup>4</sup> Coatiha nii ene inae lanaaocane raaje jaberoco eroranihei. Rai lanate rai jaberoco erora ne. Niheichu nii quicha niha natiin comasaihocane raaje jaberoco erora nihei. Rai comasaite rai jaberoco erora ne. <sup>5</sup> Aihana jaun nainihei inara sinijera aina ita coiinteein neeichene. Cana Coaunera bajanaa jeriquichenete laen jiniquiin cosinacaaichene coina nainequiche inara sinijera rai beein, ita suujua rijitoein coacuhin ichaquichene caohachae. Nii baihate naineriquiche coaiten jiniquiin raotojoein inaraacha jerei ichaquichene caohachae, nabana inara amuritoa moconajaerane osa que nesarucuichene coataa.

<sup>6</sup> Coatiha inara letoahaun necoansajaaichene coina. Niheichu nii coatiha, “Coa necoansajaaiche” nahaan. <sup>7</sup> Raujiaainchane niqui canu rijijeein neeichene jereun.

Nete Cana Coaunera tenojoineein nejelaunihacoaain ichaohacache, tabaauru leechaneein, naaonjoaain.

<sup>8</sup> Ene colane nenacaauru, autanaauru, naaonjoainuri raine aitoon, nirijieein sinijeraaona coacuelanaala neeuruha canu rijijieeinne coina. <sup>9</sup> Jana nichao berainaa nainecurenihane necoansaijiauruhine. Nii amuritoeriinte caohachae sinijeraaocuruhane, nabana inacojoeein necairichaauruhane coataa.

<sup>10</sup> Inae sinijera aina nenacaauru raine laen aitoon, casuujua letononeein que airijiin, caa caitoonjoante Cana Curuaanaa aitoojoanne. Jiaonriha inae leesajeein nisinijerateein niha enene, nii rai lana jaonaa coacuhin nihane. <sup>11</sup> Jana nii rai lana jaohin niha nii enene, jiaonriha nacoauneein leecha quicha ranaa coaucane. Chaen techu naine nacoauneein nii quicha niicha joai rai ereein, ajetein cainaa nii enene caohachae. Nii rijijieein techu rai comasai jaonaa nainene quicha netonai.

<sup>12</sup> Caa caitoonjoa caje cuaainna laen casuujua caje rocohin inara rai aitoreeunni. Coatihla laen Cana Curuaanaa aitoonjoan nihei. Chunocaa cana nejeraauru inae sinijeraaquiin neein Cana Curuaanaa esenetaera nihane jana nii ene Cana Curuaanaa esenetaelanaala nena niha nii enene, ainaacha ichaonaa jeriha nii enene, nainiheii nii ene jaoha nii cana nejeraane. <sup>13</sup> Jana ene, inae leeinjiin quicha aina nisinijerateein neein Cana Curuaanaa esenetaera neniha nii rai lanane, ainaacha ichaonaa jeriha nii lanane, nainiheii nii rai lana jaoha nii enene. <sup>14</sup> Nitohanihane jaunte nii quicha, Cana Curuaanaa esenetaelanaala nena nii Cana Curuaanaa esenetaera ene que sinijeraquiin nihane jaun, Cana Coaunera que banijiaain ne. Jerichanejeein techu Cana Curuaanaa esenetaera ene, Cana Curuaanaa esenetaelanaala nena quicha que lanaaocane, inae acaentonai Cana Coaunera que banijiaain ne, nii Cana Curaanaa esenetaera que sinijeraaocane jaun. Nitohaneein nenihaane, coatihla Cana Coaunera que banijiaain neein neeururihei inara bereecuru. Nete Cana Coaunera que banijiaain nena bereeneein neeuruhane jaun, jerichanejeein inara rijijieein Cana Coaunera cachaauru aina jiniiquin neeurureein. <sup>15</sup> Aihana jaun nii ene, quicha, naaonjoainuri Cana Curuaanaa esenetaelanaala nenacaauru, nii rai sinijera Cana Curuaanaa esenetaera jaonaa jerihane jaohine. Nitohanihanete nii ene cana nejera, nii quicha netonai cana nejeraanihane, nii ujuaihoneeuruhane caje jianacoon neeurureein. Cana Coaunera inara raain nelu, raotojoeein caohacha ichaonaa que ichaohin neechene coina. <sup>16</sup> Tana ii lana nihane jaun,

ii coreniha ichoteratenojoneein jianacoon nenea nainerihanine coitucuhine. Jana ii, lananeeine tana ii coreniha ichoteratenojoneein jianacoon nenea nainerihani ii comasaine coitucuhine.

<sup>17</sup> Atiin nainequichene rijijieein, inara rai cha chaquichene jaanu tein nihalu Cana Curuaanane rijijieein neein, nii inara cotijiaain nihalu Cana Coaunerane jana ichao-hichelune rijijieein ichaaoche. Caa inara rai aitocooaunne jaan quene, satiin Cana Coaunera ranojoneein nenacaauru rai aitoon. <sup>18</sup> Aihana jaun chuni jaberoco macohi cari molonojoin nihane jana cotijiaain niha Cana Coaunerane, jiaonriha molonojoin niha rai jaberoco macohi carine suujihane. Jana chunocoha jaberoco macohi moloeratelanaala nihane jana cotijiaa Cana Coaunerane, jiaonriha rai jaberoco cari moloeratihane. <sup>19</sup> Coatiha chaque nelatihei, molonojoneein, molonojoinelanaala, naaonjoaan cacha jaberoco carine. Cana Coaunera aitoonjoan tonoraain ichaohacanete nii amurijiriin nelate.

<sup>20</sup> Nitohanihane jaun satiin Cana Coaunera cotihanohichurute naine, nii cotijiaain nihalu Cana Coaunerane jana ichaohalune rijijieein jerichanejeein ichaohane caohachae. <sup>21</sup> Aihana jaun inara amute cacha letononeein core colane rai amihanejeein esclavo neeichene jana inara cotijiaa Cana Coaunerane, coa nii que tonajeein nihache. Nete laen inae ena nii esclavo neeine caje nichotena naineine, raotojoeein jianacoo nichoteeu. <sup>22</sup> Nii rijijieeinte Cana Curuaanaa jerenohin esenetaane coina cotihanohichuru osaaonacaauru, inae enene rai nosa caje jianacoon, Cana Curuaanaa letononeein neeure. Jerichanejeein techu nii letononelanaala nenacaauru cotihanohichuru, enene Curisito letononeein rai niicha jerei icharaneein rai esclavoneein neeure.

<sup>23</sup> Cana Coaunerate jataain coreein inara coreteein nelu. Aihana jaun nainiheeiche inara amute cacha letononeein nenea coaauquichene. <sup>24</sup> Aihana jaun canejeraauru, atiin jerichanejeein nii cotihanohineein neeichene bana ichao-hichelune rijijieein, inara ichao corenaa coacuelanaala Cana Curuaanaacha jerei rijijieein ichaaoche.

<sup>25</sup> Nii necoansajiaeniha cachane que, carai beniha Cana Curuaanaane jaunna coitucuheneen rauhijiriin. Nete aca canu coroatajanihane aina cuaain, inara rai rauhijiriin beeun. <sup>26</sup> Caraita nii nihane rijijieein, comasaihocane comasaiquelanaala, lanaocane, lanaquelanaala, naaonjoain neeuruha enecuru aina jiniiquiin quichaaaurune caohachae, caa ena caaintati ichaonaa que ichahocachene jaun.

<sup>27</sup> Aihana jaun comasaihoquichene jiaonriha jaohichene. Niheichu inara comasai colane neeichene jiaonrihachu ariichene. <sup>28</sup> Nete necoansajiaain neeichene naosatiha aineriquicheein. Niheichu leinjiin ranuna niha natiin nelana jaane naosatiha aihei. Nete laen necoansajiaain neeichene necairichaa curiquicheein, nitohaneeichenena niqui jereeneun.

<sup>29</sup> Canejeraauru, caa quene inara rai erenaa jereun. Inae ichuunnejeeonriha cana rai janonaa. Aihana jaun nii sinijeraaonacaauru, rai sinijera colane nenea rijijieein neeuruhine. <sup>30</sup> Jana nii onaa coinaderaa nenacaauru, beseta que nenea rijijieein rachoojoeuruhine. Jana nii beseta que nenacaauru onaa coinaderaaera rijijieein inaderaauruhine. Itolere ru-cuhele sirichaaauru, cha sirihei rijijieein neeuruhine. <sup>31</sup> Jana caa cana rai chauratane que netiin raotojoein necoriquijiaain itolere niicha latei siriin ichaonacaauru, cha sirihei rijijieein ichaauruhine, caa janonaa canaacha coarajei saa curichainne jaun.

<sup>32</sup> LEECHA que coacuhin neeichene cajene niqui inara rocohene rijitoeun. Aiha sinijera colane nenea, Cana Coauneraacha jerei que coacuhin nihane jaun. <sup>33</sup> Nete laen inae comasaiquuin nenea, Cana Coaunera que coaucane jianein, rai comasai rai caohachanuhacha que coacuhin ne. <sup>34</sup> Nitohaneeinte ita caje neleruhin neure. Jerichanejeein techu enecuru lana colane nenacaauru, chaen chabana lanaque lanaala nenacaauru, naaonjoainuri Cana Coauneraacha jerei que coacuhin neure, acaauru jaberoconein, acaauru suujuenein, naaonjoaain que banijiaain neeuruhane jaun. Jana lanaaonacaaurute, acaauru lana rai caohachanuhacha que coaacuruhane jaun Cana Coauneraacha jerei que coaacurene.

<sup>35</sup> Coatihana inara rai caohatiha aitohaaun. Nenacaeneeinjian inara caohachanu quene aitoon, caohachain ichaohin Cana Curuaanaacha jerei ichajeein ichaonaa nainequichene coina.

<sup>36</sup> Chunocoha nii niicha jerei ene ranaa coaauca inae ichauhena nihane jaunne, rai caohachaa nii coaucane tocohaneeinne, nii niicha coacuhi rijijieein nii ene raaine. Coatihana naosatenaa nihei ene raain niha cachane. <sup>37</sup> Jana chunocoha nii cha que tonajelanaala jelai jinacoon netiin niicha jerei ichaane coina, rai suujua cuhane sinijeraquenhane coina coaucane, niite rai caohachanu que aicheein. <sup>38</sup> Jerichanejeein techu caohacha ichareein, nii niicha jerei raain nihane. Jana nirijieein sinijeraquelanaala nihanete, jelai amuritoheriin caohacha ichareein.

<sup>39</sup> Inae lanaaocanete nii rai lanaacha sacunaa naine nii ene, oha nii rai lanane que tiaaajoaain. Jana inae oha nii rai lananete nainere chunocoha raain niha rai lananu quene caohachae, aihachu Cana Curuaana coitucuera quicha aina. <sup>40</sup> Nii amuritoheriinte niqui nenea naine raotojoein, nacoauneein lanaquelanaala nihane. Caritoha canu suujua. Chaen nechu Cana Coaunera suujue siriin caa aitoon.

## 8

### *Ichanohineein nenea choosi ecaanto rai tenojoin lenone*

<sup>1</sup> Enane laen ichanohineein nenea choosi ecaanto rai tenojoin lenone que erereeunni inara rai. “Satiinte itolere coitucuhacache,” naain irihacache. Nete nii canaacha coitucui aina, inae leeochoaauru amurijiriin itolere coitucueraneein nenea jerichaachene chaque nelatene. Jana laen Cana Coaunera Suujue jerihane rijijieein jiniiquuin nihacachenete caohachae. <sup>2</sup> Aihane jaun chunocoha cha coitucueraneein nenea coaucane, coatiha jitariin nii niicha coitucunaa jerei coitucurinaain. <sup>3</sup> Nete laen Cana Coaunera belaaain niicha jerei ichaa cachane, nii belaiha coitucue Cana Coaunera.

<sup>4</sup> Ichanohineein nenea choosi ecaanto rai tenojoin lenone quiha cachane niha natiin, cha ichana naineniha nii ichanohineein nenea choosi ecaantone coitucuhacache raotojoein. Nete laen ne, rauhijiriin leinjiin Cana Coaunera.

<sup>5</sup> Neeuruha dedeeu, chauratane que, naaonjoain nii acaauru choosichuru. Tabaaaurute ichanohichurune. Arajiinte neeure nii acaauruhacha esenetai choosichuru. <sup>6</sup> Nete laen cana rai ne leinjiin cana inaca Cana Coaunera-itolere Coaunera neein nenea. Chaen techu coreniha rai cachaneein nihacache. Nii rijijieein techu, ne leinjiin Cana Curuaanaa Jesocurisito. Corenihate ne itolereuru. Cana netonaite coreniha nihacache. <sup>7</sup> Nete satiin Jesocurisito esenetaeraauru nii coitucuhin neurenihane jaun, tabaauru jaiti enanetojoein nii choosi ecaanto ichanohineein nenea rai tenojoin que lenonecure, chaelai que nelatiha bein. Jaiti nii acaauruhacha esenetai aina caohachaaain ijiniha acaauru suujuane jaunte, jaiti aasaeriin nii choosi ecaanto esenetaauruha acaauru netonaina jaun, “Baasojecha ichacure,” naaure. <sup>8</sup> Nete Cana Coaunera jerihana jaun, joareein lenonichaane niha natiin, chaachaene nii canaacha quii. Niheichu nii canaacha quii coreniha jeelai amuritoheriin caohachaaain nenea nainihaacache. Niheichu quilanaala nihacachene nihanatiin, jeelai amurijiriin baasoneein nerihacacheein. <sup>9</sup> Nete inae inara ijiin neeichene jaun, leeochoaauru jaiti ijilanaala nenacaauru saruhin, osa que acaauru nalutiaaichene

jianequichene caohachae. <sup>10</sup> Ii raotojoein coitucuhi natiin, nii ichanohin choosi rai tenojoin lenone quiiche nelauriaainne jana, inara coaraain niha leeocho cana nejera ijilanaala nenaane, acaentonai nelauriaain nii ichanohin choosi belaiha tenojoin lenone quinaa nainere. jaiti caohachaaain coitucuenihane jaun rai cocoaeraa nitohanei icharane saijieein. <sup>11</sup> Nitohaneeinte jaiti caohachaaain coitucuelanaala nena cana nejera itajerateein neeiche, jaiti rai cocoaeraa nii chosi rai tenojoin iniho que lenonihanene saijieein, inae ii raotojoein coitucuhi natiin, notaracaae nii iniho que lenoneeine jaun, acaentonai coreniha ohin nihalu Curisitone saijieein. <sup>12</sup> Nitohaneein cana nejeraauru caohachaaain coitucuelanaala nenacaauru, niicha esenetai esenetaauruhane jana, acaauru rai bacohin neeinchene jaunte, inae Curisito que nejeratenaaneein, inara raaje osa que nesarucuiche. <sup>13</sup> Aihana jaun lenone que cana nejera saruhin nihanu canune, caraite caohachare chabana iniho quilanaala nihanune, nabana osa que leeocho saruhin nihanune coataa.

## 9

### *Esinae rauhijiriin afosotoneein nihacane*

<sup>1</sup> Canune laen cha ujuaihonelanaala jianacoon neeun. Chaen techu ne canu rai rauhi afosoto nichaaunne jaun. Nii ichoae tacaainechu, Cana Curuaanaa Jesoso coaraaun. Inarate, canu amihaneoo caje ecoona neeiche, Cana Curuaanaa icharatenohineein. <sup>2</sup> Tabaauru jerihane afosotonichaaunne esenetaain coana jerecuruhi. Inarate laen afosotonichaaunne coitucuhiche. Nii Cana Curuaanaa esenetaaichene jaan caje coauneente, canu esinae rauhijiriin acanichaaunne coitucuhiche inara. <sup>3</sup> Caate, nii canu que erenacaauru tonoraanune jaan ne. <sup>4</sup> Niha carai rauhi joenreein lenone, conacai, naaonjoainuri tera nihane, raain naaonjoannune coina. <sup>5</sup> Chaen nechu naineeun leinjiin ene Jesocurisito esenetaera que comasaihocaaunne, aihuruha leeochoauru afosotooru, Cana Curuaanaa nejeraauru, chaen Fedoro, naaonjoainurine rijijieein. <sup>6</sup> Canu, Berenabeen, naaonjoinichaanune rai netonai te ne rauhi, canacaanuhacha latei teeruha Cana Coaunera coitucurerane coina. <sup>7</sup> Nihei chuni raajenihane aiha soondarone rijijieein namihaneoo coreteein nei. Niheichu chuni temule temuhane inae nihane bana quilanaala nei. Niheichu chunei, carenero beraihane rai nitaari niicha rocoi coelanaala nei. <sup>8</sup> Jiaonriha cacha suujue caje nena niha caa erenaa beeichene. Moisesa aitoonjoan netonaite jerichane-tojoein be. <sup>9</sup> Jerichanejeein techu rauhi rai quiricha cuhane,

“Jiaonriha rojoene jaera *buey* ujuae conaaquichene,” naain ne laenanohineein. Niheichu coatiha *buey* que coaucane jaun aitohi Cana Coaunera. <sup>10</sup> Cana quete aite canaacha que coaucane jaun. Cana corenihate laenanohineein nelu nii rauhi siricha quiricha. Aihana jaunte nii rai nucuhe rojoera aina, nii atane retuurera netonai ita rijijieein inae taojiana que turuhane jana, acaauru netonai leruhin raauruhane coina ichacure. <sup>11</sup> Canacaanune mainajeriin inara coreniha amihanihacaanu, Cana Coaunera coitucunaa nainequichene coina. Aihana jaun coatiha baasonerihei coreniha canacaanu coroatajanequiche canacaanuhacha latei quene. <sup>12</sup> Coaracuche nachuhinti leeochoaauru acaauru coroatajaneein neeichene jerecuruhane, cha caaunna canacaanu coroatajanequichene jerenerichaanu canacaanu netonai.

Nene jaiti chabana jerenihacaanu. Raujiaainchane abaan-tajeiin nihacaanu, nabana Curisito que erenaa rerohecaacaanune coataa. <sup>13</sup> Inarate raotojoeiin coitucuhiche, satiin Teenforo asaae amihanenacaauru, nii Teenforo asaae nena que ichaaoruhane. Nitohaneeinte, nii iniho mocooruhane jaan coaraneein nenacaauru, nii iniho Cana Coaunera rai niicha teuri caute que lenoneein ichaaore. <sup>14</sup> Nii rijijieein techu aitelu Cana Curuaanaa, nii niicha jerenohi que cache relaera, nii namihaneechoa que ichaoane coina. <sup>15</sup> Nene chabana nitohanai ichana jereneun. Niheichu coatiha carai cha teeichene coina caa aitiin laenahaan. Jataaine raotojoeiin neeun, cha teneeiche canu raine jana inara relaanune jaun. Nii colane raotiin nena naininaan. <sup>16</sup> Coatiha carai coretera coina cache relahaan nii jianacoon cache mitaera que. Jataain carai caohacha nihana jaunna, chatohaneein niha natiin, cache relareeunni. Cairichaaajoarichaan cache relaenihanune. <sup>17</sup> Nii nitohanihane jaunte, canu raajenihane cache relaanune, inae carai cainanojoneein ne. Jana coiintihanune saijieein ichacaunnena jerichanejeein caletooa Cana Coaunerane jaan ichareeunni. <sup>18</sup> Aihana jaunne, nii carai cainaane jaan aina, jataain raotojoeiin core bajaelanaala cache relaanune. Nii canu rai rauhi tonoraelanaala, core bajaelanaa cache relaanune jaaunna, caa aitoon. <sup>19</sup> Coatiha niqui nii chuni rai cha icharaneein ninaan, nena satiin rai niicha jerei icharaneein neeun, nainichaaunne jeoneein Curisito rai cachaauru tenaa nainichaaunne coina. <sup>20</sup> Nii jaunna Joriocuru aina nihanune acaauru rijijieein neeun, esenetaauruhane reeintiaain. Esenetaauruhane coinane, nii Moisesa aitoonjoa rijijieein ichaonacaauru cachaauru rijijieein canuhetonai neeun, nii Moisesa aitoonjoan rijijieein nena nainenihanune saijieein. <sup>21</sup> Jerichanejeein nechu Moisesa

aitoonjoan tonoraelanaala nenacaauru que coitucueratenaajerenacaaun, acaauru jana turuhanune acaauru rijijieein neeun. Cana Coaunera aitoonjoan rijijieeina ichaaon, inae Curisito aitoonjoan tonoraain rijijieein ichaonune jaun. Nii saijieeina nii acaauru rijijieein neeun. <sup>22</sup> Nii jaiti ijii lanaala nenacaauru rene turuhanunena, acaauru ichao rijijieein ichaaon, coitucunaa nainecuruha acaauru netonoaine coina. Satiin rijijieeinchane neeun, tabaauru ichoteratichaaunne jianacoon nena nainecuruhane coina. <sup>23</sup> Satiin caa caitoonjoaaurune ichaaun jianacoon cana mitaera coreniha, ecu nena nainichaaunne coina.

<sup>24</sup> Inarate coitucuhiche, jiniquiin soronacaauru satiin sorooruhane niha natiin, leinjiincha rai core raane coitucuhiche. Aihana jaun inara netonai sorohichenete ne, nii aihuruhane rijijieein rai core raachene coina. <sup>25</sup> Nocoatijianacaaurute inae leeocho aina nocoatijianaa jerecuruhane, chatohaneein acaauru jaberoco tenaa nainera que necohalajiin neruujueeure. Aiha leeinjiin ajaena jujuhin enaacha ohina inaeraneein nena caje nena comai que coretenajaera coina. Jana canate necairichaaecaache coreniha chabana ohina charanejeein nena raacachene coina. <sup>26</sup> Aihana jaun coatiha canu joareein coitucuhelanaala sorohooaun. Niheichu coatiha joareein sonacaaunne faoracahaaun. <sup>27</sup> Nitohanihana jaunna caraajenhane cajabereeo cairichaaun, casuujua tonorana nainichaaunne coina. Nabana leeochoaauru relaeraneein nihanune saijieein, cha colane baasoneein nedaanune coataa.

## 10

*Cana Coaunera nelanaala nena choosi ecaanto belaihuruhane coataate, suujuatenajae Faboro.*

<sup>1</sup> Canejeraauru, jiaonriha acaauru conaca dede sacarine jana, satiin jana cuhin, Cucuana Lanajai jera jaaoruhalu, cana foerateracurune baitequichene. <sup>2</sup> Nitohaneein nii Moisesa aina nii dede sacari que amaeraain cucuana jera jaaoreraaurute ita rijijieein ichaaorelu. <sup>3</sup> Jerichanejeein techu, satiin jiniiquiin Cana Coaunera tenojoi lenone que lenoneein <sup>4</sup> cuuruhane corihanune que Cana Coaunera tenojoin ajeri caje nalunaa acau que netonai cocohin cuuruhane jaun, jerichanetojoein Cana Coaunera tenojoin acau que cocohin neeurelu. Nii ajeri, acaauru corihaneraanu que Cana Coaunera tenojointe Curisito nelu. <sup>5</sup> Nete nitohaneein acaauru corootajaniha Cana Coaunerane saijieein niicha rautaai ichacuruhane jaun, cache areroo neleruhin amurijiriin ohacoaurelu.



<sup>6</sup> Nitohaneeinte nabana cana netonai rai baaso ichana coauna coataa, nii que nainaan ichaonaa jaan nuque nitohaneein ichaelu Cana Coaunera. <sup>7</sup> Nitohanihana jaun, jiaonriha Cana Coaunera aina iriha niha Moisesane tonohanau nii acaauruahacha ichai choosi ecaanto coroaecuruhalune rijijieein inara netonai ecaanto coroaequichene. “Satiin nelauriaain lenoneein cocooruhane baihate, satiin nimichuhuin rachoojoeure,” naalu Cana Coaunera Quiricha Inoaensi cuhanene rijijieeinte aihure. <sup>8</sup> Aihana jaun niheichu nainihaacache aihuruhalune tocohaneein nejelau ene dadaain nihacachene. Nitohaneeuruhane corenihate coroaatchoonca nichata oaraancaain oorelu lejiichoo cuhane. <sup>9</sup> Jiaonrihachu inara casetecaa Curisitone coujuha chatonain baasoneein que ereein neeichene. Tabaauru nitohaneein baasoneein erenacaaurute acano calanojoneein ohacoaurelu. <sup>10</sup> Nii rijijieeinchu inara netonai baasoneein Cana Coaunera que erenaa nainiheeiche, tabaauru Cana Coaunera que baasoneein ereeuruhane jaun cacha atinaera aanjera letoaa Cana Coaunerane jaun, atinanaacane rijijieein inara atinaeratihane coataa. <sup>11</sup> Nitohaneein jetaote cana foerateracuru casetecaeratelu Cana Coaunera, nii caje nainaan ichaonaa coina. Chaen techu cana satiin enene ichaohacachene rai nii beeraanu que Cana Coaunera Quiricha Inoaensi cuhane laenanohineein ne. <sup>12</sup> Nitohanihana jaun chunocoha baaso ichana coacuelanaala, jeriha Cana Coaunerane rijijieein satono que tiaain nenaajerihane, caohachaain necohalajiin neeine. <sup>13</sup> Nete inara jaiti chabana cacha nejesinaneein abaantanacainelanaala, inara coujuera coaraeneeiche. Aihana jaun Cana Coauneraacha que jaecoochete inara beraaine, nabana inara cairichaaain inara nainatijihane, jataain abaantanacaelanaala nenaajerichanojoneequichene coataa. Nii banate inae niha baasoneein inara teranune jana, caje inara ichoteratereein, abaatana nainequichene coina, Cana Coaunera. <sup>14</sup> Aihana jaun canejeraauru, jiaorihana Cana Coaunera nelanaala nenaajerichane ecaanto coroaeraauru aina cuhin coroaequichene. <sup>15</sup> Inarate caa inara rai caitoonjoan coitucuhiche. Nii jaunte baasoneein aitenihanune caohachaain aitocaaunne coitucunaa nainequiche. <sup>16</sup> Nitohanihana jaunte Cana Coaunera coroaeein satiin cana ichao coreniha orichaaaine rai neein rai coichana niha beein Cana Curuanaacha coi, rai coco bino cohacachene, nii rai coichana aina cuain coichana que coichanaquiin nenaajerijieein nihacache. Nii rijijieein techu nii jaberoco niha bein niicha taturii faan quihacachene, inae rai jaberoco aina cuain aina ita jaberoco que jaberocanaa rijijieein nihacache. <sup>17</sup> Charijieein teinti

arajiin nihacachene nihanatiin, satiin nii leinjiin faan qui-hacache, nii rijijieein techu leinjiin jaberoco que jaberoc-naa rijijieein nihacache. <sup>18</sup> Coaracuche nachuhinti cana foerateracuru inoensihuru Isaraelitacuru, Cana Coaunera rai niicha mocoori iniho quihuruhane, acauru raajeni-hane tera rijijieein saain que lenonecuruhane. <sup>19</sup> Coatiha chaque nelatiha Cana Coaunera coitucuhichuru chosine jaun aitoaaun, niheichu rai niicha mocoori iniho leecha iniho amurijiriin nihane jaun aitoaaun. Acate joaenreein leecha iniho rijijieein ne. <sup>20</sup> Cana Coaunera coitucuelanaala nenacaauru, acauru chosi rai lenonecuru mocooruhanete, moconajaera rai ichacure. Nitohanihane jaun coatiha nii moconajaera aina enohichene jerihaaun. <sup>21</sup> Aihana jaun naini-heeiche nii Cana Curuanaa que banijjaain nena, rai coco bino cohichene baiha, nii moconajaera coroaeca acauru chosi rai niicha ichacuri iniho quiha nenacaauru aina nena nainiheeiche. Niheichu nii Cana Curuaanaacha tei bino cohichene baiha nainiheeiche, moconajaera coroaeca coconacaauru aina cocoin naaonjoaaichene. <sup>22</sup> Chasiina Cana Curuaanaa baijaeraanu tocohanein, jianein leecha sacurichaache cana casetecaane abaantanaa nainerichaachene coalanaala.

*Leeochaaururuhacha coacuhi que suujua acatein niha Jecurisito ranojine*

<sup>23</sup> “Chunite nainere joaerein niicha jerei ichaane” naaiche niqui. Esinae rauhijiriinte aitocohiche. Nete caohachaene itolere bana joaereecha ichacaane. Chunite niqui esinae naine niicha jerei ichaane. Nete tabaauru joaereecha ichana jerichaane, coatiha cana corootajanihei nii canaacha ichai Cana Coaunera jerenohin ichacaane coina. <sup>24</sup> Nitohanihana jaun caohachai cana rai caohachanuhacha ichacaane, satiin rai caohachanu ichacaanete caohachae. <sup>25</sup> Inara rai teraa joaenreein iniho ne, inae coitucuhichene jaun bajaelanaala que lenonecuche, <sup>26</sup> satiin caa cana rai chauratane aina que nenacaauru, Cana Curuanaa rai nihana jaun. <sup>27</sup> Chunocoha esenetaeranelanaala nena inara cotihaca lenonequichene coinane jana, cunaa jeriquichene inae coitucuhichene jaun, bajaelanaala inara rai niicha teuri que lenonecuche. <sup>28</sup> Nii lenonequichene coina, inara cotihacuruhane jana, chunocoha inara rai, “Caa inihote leinjiin canacaanu choosi rai moconojoine” naain bihane jiaonriha quiichene. Chaen inae raotojoein coitucuhichene jaun, nabana nii inara rai bera cairichaachene coataa. <sup>29-30</sup> Tabaaurute, “Chanuna nainichaaun joaerein lenonichaaunne saijieein caohatere nejelau cache, itolere bana ‘Nariha Cana Coaunera’ naanu lenonichaaunne

naineeinne saijieein, chasiinna canu que ereeurure,” naaurureein. <sup>31</sup> Nitohanihane jaan caje coauneeeinte, lenoneein, acau cohin, cha ichaain, naaonjoaachene Cana Coaunera rai caohachanu que ichaquichene caohachae. <sup>32</sup> Jiaonriha baaso ichaain leeochoaauru relaain neeichene, niheichu nii Joriocuru rai niha natiin, niheichu Jorioniheichuru rai niha natiin, niheichu Cana Coaunera cachaneein nenacaauru rai niha natiin ichana nainiheeiche. <sup>33</sup> Canune laen satiincha rai caohachanu ichana jereeun, canu raaicha caohachanu coacuhelanaala, acauru netonai nichotenaa nainecuruhane coina.

## 11

<sup>1</sup> Caa canuhacha ichai rijijieein cha ichaain neeuche. Charjijieein teeinti, cha ichaain nihalu Curisitone rijijieein cha ichaain neeun, nii rijijieein.

### *Inara aina netaojianacaauru enecuru rai*

<sup>2</sup> Jataaine inara corojeeun, itolere bana canu coacuhin inara relaanune jaan tonoraain neeichene coreniha. <sup>3</sup> Nena laen Curisito satiin quicha nichaachene couturi nihane jana, rai comasai couturi niha satiin quichane rijijieein, Curisito couturi niha Cana Coaunerane coitucuhichene jereeun. <sup>4</sup> Nitohanihana jaunte, leinjiin quicha, couturi conajaain Cana Coaunera bajaain, Cana Coaunera ere been naaonjoanne niha natiin rai couturiji conaaca, rai couturi niha Curisitone saijieeinna jaun, nii letoaa rai couturi Curisitone tonoraenihana jaun aicheein. <sup>5</sup> Jana enete laen naine couturiji conajaain, Cana Coaunera bajaain, Cana Coaunera ere been naaonjoanne caohachae. Jana couturiji conajaelanaala aihanete, rai couturineein nena rai lana tonoraenihane jaun aicheein, loraecaain jaonjoiniha rai couturiji jaun aihane rijijieein. <sup>6</sup> Nitohanihane jaun leinjiin ene, rai couturiji conajaenihanete caohachare rai couturiji loraecaain joeratihane. Jana nii couturiji joeratiha loraecaainne coejiha nii enene, rai couturiji conaamiin. <sup>7</sup> Jana quicha laen nainihe rai couturiji conaacane, Cana Coaunera rijijieein neein, rai cacha neein nihane coarati-hane coina. Enete laen lana que suujua acatihane coaratiha rai couturi conaacane caohachae. <sup>8</sup> Ene caje nena neniha quicha jaberocone jana, quicha jaberoco caje nena niha ene jaberocona jaunte nitoha ne. <sup>9</sup> Coatiha ene ichao coreniha necoaunaain niheilulu quicha. Jana enete laen, quicha ichao coreniha necoaunaain nelu. <sup>10</sup> Nitohanihana jaunte anjeraauru naaonjoainuri coreniha, nii cojunacaniha rai couturiji conaaca enene caohachae. <sup>11</sup> Jana Cana Curaanaa Jesocurisito coitucuhin esenetaera nichaachene raite

laen, ene colane ichaonaa nainenere quicha, jana ene netonai quicha colane ichaonaa nainihe. <sup>12</sup> Nitohanihane jaunte, esinae rauhijiriin quicha caje necoaunaain nenea niha enene rijijieein, quicha netonai ene caje nejanoaain ne, nitohaneein jeriha Cana Coaunerane jaun. <sup>13</sup> Caohachaana inara rai couturiji conajaelanaala Cana Coaunera bajaa enene. <sup>14</sup> Nitohaneein niha cana necoaunane jaan caje coauneente, necoejena ne leinjiin quicha rai couturiji fojiaane. <sup>15</sup> Nete laen enecuru, nelatecuruhane coujunaca nihane jaun, rai coturiji fojiaauruhane caohachae, nii coina tenojoi niha acaauru couturine jaun. <sup>16</sup> Chunocoha caa aito-coaunne jaan que tonaain erenaa jerihane, Cana Coaunera ranojoihunru aina jiniiquiin leeocho ichaonaa coitucuenihacachene coitucuhin aitomiin.

*Baasoneein Cana Curuaanaa que banijiaain lenone que lenonecuruhane*

<sup>17</sup> Caa, que jauhecaain canuhacha laenai cuhane laen, inara coroaena naininaaun, netaojiaaiche inara caohachanu quene niha natiin, baaso ichaquichene coreniha. <sup>18</sup> Jauriaanejeeinte canu rai beurelu, Cana Coaunera coroaequichene coina netaojiaaichene, ita caje neleruhin netaojiaaichene que aitiin. Nii jaunna acaauru aitoonjoa tabaauru esenetaaun esinae aitocuruhane jaun. <sup>19</sup> Nii ita caje nelerujuacoaain netaojiaaichenete ichaquiche, le nelerucuru coaraauru esinaen rauhijiriin Cana Coaunera sacueraneein neeichene coarateeichene coina. <sup>20</sup> Nii nelerujuacoaain netaojiaaichene jaun, Cana Curuaanaa que banijiaain nenea lenone que lenonequichene niha natiin, coatiha jeriha Cana Curuaanaane rijijieein ichaeneeichene jaun, que banijiaain nenea lenone que lenoneriheeicheein. <sup>21</sup> Nii lenonequichene rai neeichene jana, tabaauru inae lenonihane jana, tabaauru mijitenaana neeure, jana nitonohana leeochoaauru ajeein naaonjoaane jaunte, baaso ichaquiche. <sup>22</sup> Chanuna leeochoaauru sinaa jereneeichene, inara loreri asaaecha lenonelanaala, Cana Coaunera cachaauru que jaolecohin, cha colane nenacaauru necoeje chanuhin naaonjoaainche. Chasiina nitohaneeinchene inara coroaena nainereun. Inara coroaena naininaaun nitohaneein neeichene jaun.

*Cana Curuaanaa que banijiaain nenea lenone.*

*(Mt 26.26-29; Mr 14.22-25; Lc 22.14-20)*

<sup>23</sup> Canune laen Cana Curuaanaa caje, caa inara relaanune jaan raain neeunlu. Nii coulurujuenjoin nihane cojoanotiin cuhanete faan mucuhin teberiaain, “Nariha Cana Coaunera” naane baiha, <sup>24</sup> cataaun tacaain nii faan tatuhin,

“Caa faante inara coreniha quiicha tei canu jaberoco ne. Caa ena ichacaaunne rijijieein ichacuche canu coacuhin,” naelu Cana Curuaanaa Jesoso. <sup>25</sup> Jerichanejeein techu inae nainaanin nii faan que lenonihane baiha, bino mucuhin teberihain, “Caa binote ena nenea Cana Coauneraacha tei rai rauhi coujunaca cacoichana ne. Aihana jaun caa ena ichacaaunne rijijieein ichacuche canu coacuhin,” naelu Cana Curuaanaa. <sup>26</sup> Nitohanihane jaun nacoaauneein turuha Cana Curuaanaane que tiaaajoaain ohalune beeichene raite ne, nii lenone que lenonequichene naineein, chaen nii acau niicha cohi coohichene naineein.

*Cana Curuaanaa lenone que lenoniha cachane.*

<sup>27</sup> Nitohanihane jaunte chunocoha nii bino, nii lenone, naaonjoain que lenonihane, jeriha Cana Curuaanaane tochannelanaala ichaane, Cana Curuaanaa jaberoco rai coichana naaonjoain sarue osa que nii ichara. <sup>28</sup> Aihana jaunte nii lenone que lenoneein, nii bino cohin, naaonjoanne ajiniha, jaurianejeein rai suujua coaraa cachane caohachae. <sup>29</sup> Jaurihanejeein suujua coarii amuneein, “Naaonjoaane jaunte caa Cana Curuaanaa jaberocone. Naaonjoaane jaunte caa Cana Curuaanaa coichanaane,” naain coitucuhera amuneein que bino cohin, lenonihanete, raaje rai jaberoco casetecaa aicheein. <sup>30</sup> Nitohanihane jaunte inara tabaauru cunaitein, aterojoeriin, tabaauru oore. <sup>31</sup> Caohachaaain cana suujua coaraain nihacachene jana nihane, coatiha cana casetecarihei Cana Curuaanaa. <sup>32</sup> Cana casetecaane niha natiinte, raujiaain nacoauneein baaso ichaelanaala, jeelai amuritoheriin caohacha ichana que nerelana coina cana casetecae. Coatiha nii coitucuuruhi casetacaane tohaneein nitajenaa coina cana casetecaa Cana Curuaanaa. <sup>33</sup> Nitohanihane jaan caje coaauneein, ita taojiaaiche Cana Curuaanaa lenone que lenonequichene coinane, ita jiniichaaain lenonecuche. <sup>34</sup> Jana chunocoha mijitena caun leeochoaauru ajiniha lenonena jerihane, nenajaun lenone-miin, nitohaneein baasoneein ichacuruhane coreniha inara casetecaa Cana Curuaanaa ne coataa. Nitohaneein neeichenete caohachaera canejeraauru. Inae inara coraa uhanune banane, inara rai leeochoa rucuhenacai rucuhereeeni.

## 12

*Niicha nainei ichaa cachane jaanu tiha Cana Coaunera Suujuene.*

<sup>1</sup> Canejeraauru, niicha nainei ichaa cachane jaanu tiha Cana Coaunera Suujuene coitucuhichenena jereun. <sup>2</sup> Inarate jaiti Cana Curuaanaa coitucuhin esenetaeneeichene bana, nii chosi ecaanto ichanohineein nenea rene inara

amaauruhane, aiha maosane rijijieein curejetocohichene coitucuhiche raotojoeein. <sup>3</sup> Nitohanihane jaunte inae enene chuni, “Nechu aansainein ichaonaa Jesoso,” naain erenaa nainene, inae enene Cana Coaunera Suujue letononeein irihane. Nii coitucuhin ichaohichenena jereeun. Chaen nihei chuni, “Jesosote Curuaanaa ne,” naain erenaa nainihe cache, Cana Coaunera suujue letononeein erenihane. <sup>4</sup> Araai lauriin cha ichana nainihane jaannute ranaa naine cache, Cana Coaunera tenojoineein. Nete laen nii tera, jeelai Cana Coaunera Suujueneein leinjiincha ne. <sup>5</sup> Niha araai lauriin rai nelateein nihacane jaanu, cana que jeelai Curuaanaa icharatenojoeinein. <sup>6</sup> Jerichanejeein techu araai lauriin ne nelateein cha ichana nainiha cachane jaannu. Nete araai lauriin nihane nihanatii nii jeelai Cana Coaunera caje satiin unaanein ne. <sup>7</sup> Cana Coaunerate aina nihacachene coitucuhacachene jaa te rai cachanein neinichaachene rai, nii aina raotojoein nihacachene coina. <sup>8</sup> Rai Suujue aina cuaainte, le cachaauru tabaauru rai coitucuhin erenaa nainecuruhane jaannu te Cana Coaunera. Jerichanejeein techu jataain itolereneein cha coitucuhin neeuruha cachaaurune jaanu tein ne, nii jeelai Cana Coaunera. <sup>9</sup> Tabaaaurute esenetaauruhane jaannu rae, jeelai Cana Coaunera Suujue tenojoineein. Tabaaaurute, nelateein cunaiteenaa rautaane jaannu rae. <sup>10</sup> Tabaaaurute cojoelanaacojai ichaain nelatihane jaannu rae. Jana tabaaaurute, Cana Coaunera caje unaa erenaa bihane coina, nelatihane jaannu rae. Tabaauru te, Moconajaera suujue ichanohin aina Cana Coaunera suujue ichanohin coitucuhane jaanu rae. Tabaauru raite, leocha erenaa cuhane erenaa nainecuruhane jaannu te. Chaen techu, tabaauru rai nii leocha erenaa cuhane ereeruhane jaan aonaain benaa nainiha leochane jaannu te. <sup>11</sup> Satiin niichurute te, tenaa jerihane jaanru rai, nii jeelai Cana Coaunera Suujue; janijiin niicha rai cachaauru rai.

*Araaichaache niqui nete leinjiin que jaberocoonaa rijijieein nihacache.*

<sup>12</sup> Cacha nichaachene jaberocote, araai lauriin neleruhane niha natiin, jeelai cana jaberoconeein netiin ai. Nii rijijieeinte satiin nihacache araai laurii caje nihacachene nihanatiin Jesocurisito cachanein neinichaachene. <sup>13</sup> Nii rijijieein techu satiin cana, Joriocuru, Jorioniheichuru, letononeein nenacaauru, letononelanaala nenacaauru, naaonjoainuri aina jiniiquiin coujunacatenohineein nihacache, leinjiin jaberoco que jaberocohin nena rijijieein nihacache, Cana Coaunera Suujue ichanaanein. Nii

rijijieein techu nii jeelai Cana Coaunera suujue caje ocoona que satiin cocohin nihacache. <sup>14</sup> Coatiha le turijieeincha nihei cana jaberoco, arai lauriinte ne cana jaberoco nelerucuru. <sup>15</sup> Nii nitohanihana jaun cana tija, “Cacha biji nenihanune jaun coatiha cacha jaberoco nihaaun,” naane, coatiha cacha jaberoco neein nihane jianerihei. <sup>16</sup> Cana uricho netonain, “Chanuna nota neneun,” naain irihane, coatiha cana jaberoco que nihane jianerihei. <sup>17</sup> Satiin cana jaberoco cana nota nejesina nihane, coatiha cha aonaain ichaonaa nainerihaacache. Satiin cana jaberoco cana uricho nihane, chaelai juuno aohanna nainerihaacache. <sup>18</sup> Nete lauri lauri cana jaberocooru coaunaain rai caohachaain inanacaane jaan jeeloncuru teein coaunaelu Cana Coaunera. <sup>19</sup> Le turijieeincha ijiabereeonu niha cana jaberoco, rai neleru colanene coatiha nerihe cana jaberoco esine. <sup>20</sup> Nitohanihane jaunte arai turiin neleruha cana jaberocone niha natiin, rauhijiriin leinji cana jaberoco. <sup>21</sup> Nii nitohanihane jaan caje coauneein, cana nota nainihe cana biji que, “Latinaaun,” nanaa nainihe. Niheichu cana couturi niha natiin cana tija que, “Latinaaun,” nanaa nainihe. <sup>22</sup> Nete nii nelatihei rijijieein canaacha coarai cana jaberoco-jataain nelateineein ne. <sup>23</sup> Nii cana jaberoco leeochoauru fautaain canaacha colalajiite cajionetein sirichaache. Jana nii cana jaberoco, coanojoinelanaala nenaate, jeelai amuritoheriin cajionetein sirichaache coara coataa, <sup>24</sup> nii cacha notaracaae nena sirichaachene amurijiriin. Cana Coaunera, nitohanein cana jaberoco coaunae, nii coaraelanaala canaacha sirii amurijiriin nii cacha notaracaae nena belain, caohatiin beraain sirichaachene caina. <sup>25</sup> Nabana jeelai jaberoco neein nihane saijieein, rai jaberoco nelerucuru leeocheein coaraelanaala, rai nelatena nainihane caina. <sup>26</sup> Nii nitoanihane jaunte, chatohanein necunaitaa le turijieein cana jaberocone niha natiin, saain cana jaberoco necairichae leinjiin coreniha. Nitohanihane jaunte, cha lateein niha cana jaberoco nelerune jana, rai teraa nii niicha lateine, satiin cana jaberoco rachoojoe. <sup>27</sup> Nii rijijieein techu inara, Curisito jaberoco nelerunein neeichene jaun, le cachanequichene nainein inaraacha ichaneni siriin neeiche. <sup>28</sup> Nii cointate jere, satiin rai cachaauru iclesianein nenacaauru jana niha afotooru, Cana Coaunera suujue aina cuaain ichaonaa coitucuhin beeurera *profetacuru*, cacha relaaureraauru, cojoaelanaacojoai icharaauru cachaauru, cunaitenacaauru rautaeraauru, leeochoauru coroatajaneraauru, cachaauru coaranein nenacaauru, nejelau erena cuhane

erenacaauru, naaonjoainuri neeuruhane jerelu Cana Coaunera. <sup>29</sup> Nete saain rai cachaauru afosotonena nainecurene. Niheichu saain *profetane* naanainecuruhi. Niheichu satiin cacha relaeraneein nenea nainecuruhi. Niheichu saain cojoaelanaacojoai ichana nainecuruhi. <sup>30</sup> Jerichanejeeinchu saain cunaitena rautaauruhane coina nelatena nainecuruhi. Niheichu saain leeocho erenaa cuhane erenaa nainecuruhi, jerichanejeeinchu nihei saain nii leeocho erenaa cuhane erenacaauru aohana nainecuruhi. <sup>31</sup> Nii jaunte inara jataain caohachaain nelatei jerena nainequiche.

## 13

### *Cana coichana aina cutaain belaina inaacane*

<sup>1</sup> Leeocha cacha ere cuhane ereein, anjeraauru ere cuhane niha natiin irihanune saijieein, cacoichana aina cutaain belaina inaelanaala aihanunena, leinjiin coata tonijiaain nenea fautaain chaque nelaterinaaun. <sup>2</sup> Jerichanejeein techu Cana Coaunera que ereerejeein, niicha ichanenu coitucuhin, leinjiin atane ucuunno rurujuanaa nainichaaune coina esenetaanune niha natiin, esinae rauhijiriin cacoichana aina cutaain belaina inaenihanune, coatiha chaque nelaterihe canuhacha ichai. <sup>3</sup> Cairicheihuru rai jitariin quiicha sirii tein, cajabereone maajeein tihanu acaauru corenihane nihanatiin, esinaen rauhijiriin cacoichana aina cutaain belaina inaenihanune coatiha nii cha que nelaterinaaun.

<sup>4</sup> Esinae rauhijiriin cana coichana aina cutaain belaina inaacanete abaantana coitucuhin, caohachaain leeochoauru aina neein, chaque necoelailanaala, cana rainuhachaque coacuelanaala, leeochoauru amurijiriin nenea coacuelanaala, <sup>5</sup> erenaa baaso que erelanaala, niheichu itolere bana cana rai caohachanuhacha que coacuelanaala, obajelanaala, baaso icharaauru que cana suujua acatein, <sup>6</sup> baaso ichacuruha leeochoaurune coroajelanaala, caohacha icharaacha coroajeein nihacane te caohachae. <sup>7</sup> Cana coichana aina cutaain belaina inaacanete, satiincha necairichanaa abaantaain, cana coroatajanihane cojoaain, itolereeneein esenetaain, itolere abaantaain, naaonjoaain nihacane caohachae.

<sup>8</sup> Nii cana coichana aina cutaain belaina inaacane chabana sarihaain. Inae ecu tihane bana, coatiha nerihain caa Cana Coaunera ere bera *profetacuru*. Niheichu coatiha leeocho erenaa cuhane erenacaauru niha natiin nerihain. <sup>9</sup> Aihana jaun caa canaacha coitucui aina cana rai *profetacuruhacha* bei, coatiha jitariin canaacha coitucuheni coitucueratihei. <sup>10</sup> Nete inae turuha nii cana relaera esine chaaeroon baaso sirilanaala nenaane, sareein nii aasaeriin canaacha coitucui.



<sup>11</sup> Jaiti canaanainichaaunne banane, canaanainichaaunne ere que ereein, canaanainichaaunne suujua que coacuhin, naaonjoan rejetoonu. Nene inae enene ichauhenaneein nii canaanaineein canuhacha coacuhi jianeeun. <sup>12</sup> Enate aasaeriin inanacaa cana suujuane jana coaracaache. Charijieein teeinti, acuhanau inanacae cana cojunaca nii rijijieein. Nete inae ecu tihane bana, caohachaaain coaraain coitucurichaacheein. Aihane jaun caohachaaain jaiti ena coitucuaaun. Nene inae ecu tihane bana charijieein teeinti cacoitucue Cana Coanera nii rijijieein canuhetonai coitucureeunni.

<sup>13</sup> Nichata lauriinte ne itolere bana canaacha coacuheeni. Jauriaanejeein Cana Coanera esenetaain ichaohacane, nii baiha cana ichao rucujueein niha Cana Coaneranane cohajeen nihaacane, satononejeein esenetaain jereein ichaohacane, naaonjoaain nihaacachene te caohachae. Nete nii nichata laurii caje ne jataain nii coroatajai amurijiriin jataain itolere que nelateineein nena. Acate cana coichana aina cutaain belaiha inaacane jaan ne.

## 14

*Leeocha erenaa canaacha aonaai cuhane irihacane.*

<sup>1</sup> Aihane jaun atiin inara coichana aina cutaain belaina ineraneei neeuche, chaen inara rai Suujue tiha Cana Coaneranane corajeein jerecuchete, inara que niicha beratei, que erenaa beeichene jaannu que nelatei teeine inara rai. <sup>2</sup> Nii aonaelanaala nejelau erenaa cuhane ereite, Cana Coanera rai iriha aite. Coatiha cacha rai aitohi. Nii jaunte aohana nainecurene cachaauru. Nii naitoonjoante Cana Coanera Suujue caje unaanhane jaun chuni coitucue. <sup>3</sup> Nete laen Cana Coanera aitoonjoa bera, satiin que coitucuerate, leeochoauru quene maajeein. Chaen techu acauru suujua aninoaaain acauru suujuate jeriha Cana Coanera Suujuane rijijieein neeuruhane coina. <sup>4</sup> Nii nejelau erenaa coitucueraelanaala nena cuhane ereite, jelai aachanejeein Cana Coanera Suujue coitucuhin aina ijiin ne. Nete laen nii Cana Coanera aitoonjoan berate, Cana Curuaanaa ranojoneein nenacaauru que coitucuerate aina ijiin, Aca jerihane rijijieein caohachaaain neeuruhane coina.

<sup>5</sup> Nitohanihane jaunne niqui, Cana Coanera Suujueecha tei erenaa cuhane satiin ereeichene jereun. Nena nii amurijiriin, Cana Coanera aitoonjoan beeichene jereun. Acate jataain caohachane, nii leeocho erenaa cuhane irihacane amurijiriin. Niite amuora latelanaala aonaain, jelai amuritoeriin coitucunaa nainecure Cana Curuaanaa ranojoneein nenacaauru. <sup>6</sup> Nitohanihana jaun canejeraauru, coatiha

nelaterihei inara coaraa uhanune bana, inara rai leeocho erenaa cuhane irihanune. Caohacharihei inara rai cana ere cuhane Cana Coaunera aitoonjoa que erelanaala, leeocho erenaa cuhane irihanune. Ainihane ichaonaa rauhi que inara rai erelanaala, leeocho erenaa que irihanune caohacharihei. Niheichu caohacharihei leeocho erenaa cuhane, inara rai irihanu, Cana Coaunera beratenojoi erenaa que ne. Niheichu caoacharihei, inara relaelanaala, leeocho erenaa cuhane inara rai irihanune.

<sup>7</sup> Satiin auno aina, ita rijitjoeein toniha quitarane, coatiha nejelauneein aohanrarihei rai toni. <sup>8</sup> Nii rijijieeinchu, coatiha neruujueeururihei ita soha nenacaauru, nii ita sooruhane bihane toni rijitjoeein, toroonfeta toteniha toterane. <sup>9</sup> Nii rijiiquiche inara netonai, aonacuruhane coina ereeichene saijieein, leeocho erenaa cuhane ereeichene. Chasiina inara ere aohanre, nejelau erenaa cuhane ereeichene, nii ereeichene jaancuru. Nechu joaereeinchate ereereeriquiche inacojoeein. <sup>10</sup> Esinae rauhijiriinte niqúi ne, araai lauriin caa cana rai chauratane que erenaa. Niite le laurichuru nejelaunihacoaain ne rai toni. <sup>11</sup> Nii nitohanihane jaun, canu rai, nere cuhane iriha nejelau cachane coatiha canu rai chaque nelaterihei nii erenaa. Nii rijijieeinchu nii nejelau cacha rai canu ere cuhane irihanune jana aonaenihane, chaque rai nelatihei canu ere netonai. <sup>12</sup> Inae inara netonai Cana Coaunera Suujue caje nena sirina jeriquichene jaun, nii Cana Curuaanaa ranojoneein rai iclesianein nenacaauru que jeelai amuritoheriin coitucuerateranein nena raauche.

<sup>13</sup> Aihana jaun, nejelau erenaa cuhane erei, Cana Coaunera caje bajaainete, rai amucane jaannu teeine. <sup>14</sup> Canu nejelau erenaa cuhane Cana Coaunera bajaanunete, canu suujue ainaacha Cana Coaunera bajaanunete. Nete laen, canu suujua coitucunaa nainene. <sup>15</sup> Aihane jaun Cana Coaunera bajaanune, canu suujua, canu suujue, naaonjoain aina jiniiquiin bajaanunete caohachae. Nenatichaaunne niha natiin canu suujue aina jiniiquiin canu suujua cuhane coitucuhin aitocooaunnete caohachae. <sup>16</sup> Aihana jaun, inara suujue ainaacha Cana Coaunera corojeein que ereereequichene jana, nii inara aitoonjoan coitucuelanaala nena, inara aonaane niha natiin, nii inara aitoonjoan coitucuenihane, coatiha inara aina turuhin nii aitocohichene jaan aohanna nainerihei. <sup>17</sup> Nii inara aitojoante niqúi jataain nelateinere, nete, leeochoaauru corootajanena nainene, jeriha Cana Coaunera Suujuane rijijieein coitucuuruhane coina aonacurenihana jaun. <sup>18</sup> Nariha Cana Coaunera, leeocho erenaa cuhane irihanu inara amurijiriinne coreniha. <sup>19</sup> Nena,

Cana Coaunera coitucuurera rai irihanune, saquijiei erena acaauruhacha aonai cuhane erena jereeun, aonaain acaauru netonai nerelaauruhane coina, inacojoein leecha erena cuhane lechooca oaraancaneein erena que acaauru rai irihanune niha natiin aonacurenihane ajiniha.

<sup>20</sup> Canejeraauru, jiaonriha suujua coaauca canaanaine rijijieein inara suujua coaauquichene. Itolere baaso rai, canaanai rijiiquichenete laen caohachae. Nete laen, inara caohachanu que coaauquiche ichauhenaneeichene suujua que cuaainne caohachae. <sup>21</sup> Ichaonaa rai rauhi rai, quiricha cuhanete, “Leeocha erena cuhane ne, caa cachaauru rai erereenni. Chaen nechu, nejelau caje unacaauru cachaauru que canu ere beratereenni. Nitohaneein acaauru rai beratihanune niha natiin, coatiha canu ere tonoraaururinaain’ naa Cana Curuanaa,” naain ne laenanohinnein. <sup>22</sup> Aihana jaun, leecha erena cuhane irihacanete, Cana Coaunera coitucuhichuru que, Cana Coaunera coituhacachene cojunacaniha aitocoaache. Coatiha laen Cana Coaunera coitucuurera rai cojunacaniha aihaacache. Nete laen, Cana Coaunera aitoonjoan bihaca, Cana Coaunera coitucuurera raine, Cana Coaunera coitucuurera rai Cana Coaunera coitucuhacachene cojunacaniha aitocoaache. Coatiha, Cana Coaunera coitucuhichuru rai nihei. <sup>23</sup> Satiin Cana Coaunera rai iclesianein neiniquichene netaojiaain netiin, leecha erena cuhane ita rai ereerequichene jana, inara rene enohin aonaa nechu joaenreein nena cacha aina Cana Coaunera coitucuelanaala nena cachanete nainere, “Caa cachaaurute joaenreein ereerejeeure jaeloroherihuruhane jaun,” naain erere. <sup>24</sup> Nete laen inara ere cuhane Cana Coaunera caje unaa erena que ereerequichene jana, enoha uha inara rene nechu joaereein cacha, leecha cacha Cana Coaunera coitucuhi, naajoaurine, le cachanecuruhane laen nainere, nii aitocoichene jaan aonaain raajenihane osaaocane coitucunaa naine, jitaain nii aitocoichene aonaane jaaun. <sup>25</sup> Nii banate, satiin rai suujua cuhane niicha coacuhi coitucuhin, neseonraain Cana Coaunera corojeein, inara aina niha Cana Coaunerane coitucureein.

*Cha ichaquichene caohachaaain ichacuche, joaenreein ichaelanaala.*

<sup>26</sup> Canejeraauru, aihane jaun caa inara rai caitono tochaneein netaojiaaichene, tabaauru salmo que nenatemiin. Jana tabaaurute nainere cachaauru relaane. Tabaauru que Cana Coauneraacha coitucueratei que ereereemiin. Jana tabaauru leecha erena cuhane ereerejeein, leecha erena aonacuruhi rai beeine, nii niicha beebejei aonaain

coitucuhin aina iichuruhane coina. <sup>27</sup> Chaen leeocho erena cuhane erena jeriquichene, coroatajaain nichatajaain netiin ita rerohererojoein aitocuche le cachanequichene. Jana chunucohate nainere, nii aitocoichene jaan biha leeocho erena aonacuruhi raine. <sup>28</sup> Jana neniha cacha, nii erena aonaain benaa coitucuelanaala, nii Cana Coanera rai iclesianeein nenacaauru janane, jiaonriha nii leeocho erena cuhane ereeichene. Nii leeocho erena cuhane erena jeriquichene, le cachaauru ereeine jelai netiin Cana Coanera aina. <sup>29</sup> Jerichanejeein techu, Cana Coanera aitoonjoan erena que erenaajeriquichene, nainequiche coroatajaain, nichatajaain, naaonjoaain netiin ereeichene caohachae. Nii jana leeochoaauru, nii inara aitoonjoan que coaacuruhine. <sup>30</sup> Jana, Cana Coanera rai ereeichene jana, nii ecu lauhequuin aonajera rai irihane coina aitoha Cana Coaneranane, jauriaanejeein irihane jianiha nii ichoaichaniha erenaane cohamiin. <sup>31</sup> Nii banate satiin le cachaauru irihane jaan que turuhane naineein, Cana Coanera aitoonjoan bihane, satiin nerelaain suujua aninoain jeriha cuurureein acaauru netonai. <sup>32</sup> Cana Coanera aitoonjoan que ereite, nainere nii rai aitoha Cana Coaneranane rijijieein sacuhane. <sup>33</sup> Cana Coanerate, jianacoon raotojoein nihacachene Coaneraneein ne; coatiha joareein coanera nihei, Cana Coanera.

Satiin Cana Coanera cachaneein nenacaauru ichanaa rijijieein sacunaa jaun, <sup>34</sup> enecurute nainere netaojiaauruha Cana Coanera cachaaurune jana, inauheneeicha erelanaala neeunruhane. Coatiha laen jereraai ereeuruha enecurune. Aitoha Cana Coanera rai rauhine rijijieein rai lanaacha ere tonoraain jerecuruha acaauru lanaaurune rijijieein neeuruhine enecuru. <sup>35</sup> Aihana jaun, cha bajanaa jerecuruha enecurune, rai lana caje bajaauruhine rai loreri asaae neein. Caohachai leinjiin ene iriha netaojiaanaa que netiinne.

<sup>36</sup> Coatiha inara janaacha nunuhetein benojoinnein nihein Cana Coanera ere. Niheichu, coatiha inaraacha nii Cana Coaneraacha beratei sirichaneein niheeiche. Nii que, itolere bana nainaan ichaaoche. <sup>37</sup> Chunocoha, Cana Coanera aitoonjoan bera *profetane*in nena coacuhin, Cana Coanera Suujue aitoonjoa rijijieein nihanete, caa inara rai quicha laenai, Cana Coanera letononeein ichaacanne coitucureein. <sup>38</sup> Jana coitucueniha nete, Cana Coanera coitucuheniha jaun coitucuenereein. Niheichu Cana Coanera niha natiin acaentonain coitucuriaain. <sup>39</sup> Canejeraauru, nitohanihana jaun, jataain corajeein Cana Coanera aitoonjoan beeuhe. Jiaonrihachu leeocho erena coitucueraelanaala nena cuhane ereeuruhane caohateich-

ene. <sup>40</sup> Nete cha ichaquichene rauhijiriin joenreein ichaelanaala leinjiana leinjianaain ichaquichene caohachae.

## 15

### *Oo caje ichanaa Curisitone.*

<sup>1</sup> Canejeraauru, enane laen inara relaanulune jaan, cana ichoteraneein nena erenaa coaaquichene jereeun. Nii inara rai canuhacha bei erenaate esenetaaichene jaun, nii aitohane rijijieein baaso ichana coacuelanaala neeiche.

<sup>2</sup> Chaen techu, nii inara rai beratenojoin erenaa coreniha raotojoein jianacoon ichoteratenojoein neeiche. Aiha nii naitoonjoan rijijieein, baaso ichana coacuelanaala neeichene. Jana aineeichene, inacojoeinte inara relaanune bana esenetaareichelu.

<sup>3</sup> Jaurihanejeeine, inara que nerelaanulune coitucuerateenlu. Chaen nechu, cana osa coreniha ohalu Curisitone que inara relaanlu; <sup>4</sup> Ajeri jachu cuhane conaatecuruhane janate, “Nichata janone cuhane ichanae,” naain laenanohiniha Cana Coaunera Quiricha inoensi cuhanene rijijieein. <sup>5</sup> Chaen techu, Fedoro rai ococoe. Nii baihate, lechooncai coroatajai afosotooru rai ococoe. <sup>6</sup> Nii baihate laen ococoe saogui fashai amurijirii cana nejeraauru rai. Tabaaaurute jaiti enanetojoein ichaaore, inae ohacoaauruha leochaaurune saijieein. <sup>7</sup> Nii baihate ococoe Saantiaao rai. Nii caje cuaainte leochaauru afosotooru rai ococoe. <sup>8</sup> Satononihate inae dedeeu cuhane baiha carajaaajoaain catiaain canu rai netonai ococoe, jauriaanejeein niicha ranojoein nihanune que airijiin, esinae aca cana Curuaanaa nihane coitucuhanune caina. <sup>9</sup> Nitohanihana jaunna jataen leochaauru afosotooru fauhecaain nelateun. Cana Curuaanaa cachaauru rerohecaain sorejetocooaanne jaun chanihaaun canu afosotoneein canu curuaateeuruhane caina. <sup>10</sup> Nena atiin jataain canu belaiha Cana Coaunerane coreniha canuneein neun. Nete nii canu belaiha Cana Coaunerane inacojoein aine. Nii jaunna mainajeriin amihaneun, jataain leochaauru amurijiriin caraajenhane aihanune que airijiin; jataain cana belaihana jaun, cacorataaniha Cana Coaunerane aina. <sup>11</sup> Coatiha canu ichacaauneecha que caohacharihei, niheichu leochaauru ichaane niha natiin caohacharihei. Nete laen caa caitoonjoan Cana Coaunera aitoonjoan ne. Acate nii esenetaaichelu inara.

### *Oo caje ichanacure onacaauru.*

<sup>12</sup> Canacaanune oo caje ichanaa Curisitone que inara relaacaanu. Chanuna jana chaen inara tabaauru oo caje ichanana nainiha cachane esenetaelanaala ereeure. <sup>13</sup> Oo caje ichanana naineniha cachane jana nihane, coatiha oo

caje ichanarihei Curisito. <sup>14</sup> Niheichu coatiha nelaterihe i naitoonjoan inara relaacaanune jaan, oo caje ichanaeniha Curisitone. Niheichu chaque nelaterihe nii inaraacha esenetai. <sup>15</sup> Nitohanihane chujianra nechu casajeneein Cana Coaunera que ererichaanuna, Curisito ichatihane que irihacaanune jana, esinae rauhijiriin oo caje ichanaeniha onacaaurune jana aitocooaanune. <sup>16</sup> Esinae rauhijiriin oo caje ichanaeniha onacaaurune coatiha oo caje ichanarihei Curisito netonai. <sup>17</sup> Jana oo caje ichanaeniha Curisitone, coatiha nii chaque nelaterihe nii inaaraacha esenetai. Jerichanejeeinte inara osaacha aina ichaoriquiche. <sup>18</sup> Nii oo caje ichanaeniha Curisitone chujianra, nitajeeurure nii esenetaain onacaauruna. <sup>19</sup> Curisitoaacha cohajihacache caa ichaonaa que netiinne jana, oo caje ichanaeniha chujianra, Cana Coaunera coitucuhichuru amurijiriin cairichaaajoaain nerichaache.

<sup>20</sup> Nete esinae rauhijiriin oo caje ichanae Curisito. Acate jaurihanejeein ichoaichaniha oo caje ichanaelu. <sup>21</sup> Charijieein teeinti caa cana rai chauratane que leinjiin cacha coreniha turuhelu onaa. Nii rijijieein techu leinjiin cacha coreniha turuhelu, onaa caje ichanaa cachane jaanu. <sup>22</sup> Nii rijijieein techu Adaan coreniha saain ohe cacha, nii rijijieein techu Curisito coreniha satiin rai nereein ichaonaa. <sup>23</sup> Nete laen le cachanichaachene dadaane rijijieein nerichaacheein. Curisitote nunuhe neein nereein. Nii baihate rijijieein neeurureein rai cachaauru, inae nacoauneein turuhane bana. <sup>24</sup> Nii baihate laen nii curuanaanein nenacaauru, cocoinanacainein nenacaauru, nii nelaaetiin niha nocoenacaauru, naaonjoainuri amuritiin itajeein, rai cojoanonaa tiha Cana Curuanaa Cana Coaunera raine janate, inae Cana Coaunera Cojoanonaa que turee in. <sup>25</sup> Curisitote nii rucuhacane rai ne, satiin que nejeratenacaauru, rai tija asae neseonriaauruhane reeintiaain. <sup>26</sup> Satononiha niicha itajeenite nii cana que nejeratanaanein nena onaa ne. <sup>27</sup> Cana Coaunerate satiin itolere Curuaanaa nihane coina nitohane in telu niqui. Nete laen itolere Curuaanaa nihane coina aitoha Cana Coaunera natiin, Cana Coaunera Curuaanaanena nainene, Cana Coaunera itolere Curuaanaane in cocoinaain tihane jaun. <sup>28</sup> Inae satiin Curuaanaa niha Curisitone coina ichaa Cana Coaunerane baihate, inae satiin itolere bijiu nihane jana, nii rai Calao hi Curisito, Cana Coaunera rai jitaain nii itolere tiha curee in. Nii banate Cana Coaunera itolere Curuaanaane in neree in.

<sup>29</sup> Aihana jaun nii onacaauru coreniha camujuaain baotisanoinunru niriimiin. Oo caje ichanana naineniha

onacaaurune, nainihei acaauru coreniha camujuaain baotisanoinichaane.

<sup>30</sup> Chanuna jana chaen, neniha ichanaa oo caje onaane jaanne saijieein, necairichaaecaache itolere bana. <sup>31</sup> Canejeraauru, esinaae rauhijiriine inetono janonaa bana ohanune rai neeun. Nii rijijieeinechu raotojoeein neeun, Cana Curuaanaa Jesocurisito esenetaeraneein neeichene coreniha. <sup>32</sup> Chaen nechu Efesoo nii necha aansai taibinae neein nenanacaauru amuritoonlu mainajeein necairichanaa coaraain. Chaque jana canu rai jelaiha caaujue nii necairichaanune. Chanuna jana neniha onaa caje ichanaa cachane jaanne, inacojoeein necairichareeun. Aihana jaun chujianra, “Lenoneein, acau cohin ichaoacache, eresi onaa ajiniha,” naauruha tabaaurune rijijieein ichaorichaachena. <sup>33</sup> Jiaonriha inara coritaaauruhane esenetaaichene. Chunocohate inara rai, “Chanuna baaso ichaquiche. Nechu joaenreein casajete nii ichaquiche. Nii jianein caa aihacaanune rijijieein ichaaoche,” naain inara suujua auhacaaurureein. <sup>34</sup> Aihana jaun nacoauneein caohachaaain inara suujua coaraain neeuche, naosatenaa coacuhelanaala. Inara tabaaurute jaiti Cana Coaunera coitucuurene. Necoejeeichene jaan nuquene caa inara rai aitoon.

### *Chatohaneeinna oo caje ichanacurure onacaauru*

<sup>35</sup> Tabaaurute jerihane, “Chatohaneeinna oo caje ichanacurure onacaauru. Nitohanihane chatohanai quena jana jaberocore,” naaure. <sup>36</sup> Jataain aasohachate nainere niritiin coaucane. Chaelai ucuhe temuhacanete ohe, nii rai nu-cuhe ichaohin omarona nainihane coina. <sup>37</sup> Aihana jaun coatihana canaacha temuhi nii ajaena neein omarohi. Nechu jataain aansijiin nenaajete omarohe, tirico caje, leocha ucuhe caje, naaonjoaain. <sup>38</sup> Jana Cana Coaunerate Aca jerihane rijijieein tein le laurichuru rai acaauru jaberoco te. <sup>39</sup> Coatihana saain jaberocohin neinichaachene, ita rijijieein jaberocohaacache. Cana cachanichaachenete jelai tein ne cana jaberoco. Jana lenonecurute jelai tein rai jaberoco que jaberocoore. Tajaacurute jelai tein jaberoco que jaberocoore. Ateuru netonainte jelai tein jaberoco que jaberocohin neeure. <sup>40</sup> Nii rijijieein techu ne dedeeu itolere jaberocoori. Jerichanejeein techu jaberocohacoaain ne itolere caa cana rai chauratane que. Nete laen nii dedeeu nenaajehane jaberoco necaohacha que necaohachaaain neeure. Jana caa chauratane que nenacaaurute, chauratane que neuru jaberoco caohacha que necaohachaaain neeure. <sup>41</sup> Enoto cono

niha natiinte nejelauneein conohe, atene, arasijie, naaon-joaihunri cono aina ita rijijielanaala. Jerichanejeein techu arasijieeuru niha natiin nejelaunihacoaain conohe, ita rijijieein conohelanaala.

<sup>42</sup> Nii rijiiicha oo caje ichanaa onacaaurune jaan. Rai jaberoco conautenohinte setuhe, jana rai suujue ichanana coatiha chabana setuhi. <sup>43</sup> Jaberoco canaacha conautei nii cha que nelatihei. Jana rai suujue ichananate laen, nelateein necaohacha que necaohachaain ne. Nii jaberoco conautenohin, nii cha que nelatihei. Jana, rai suujue ichananate laen nelateein ne. <sup>44</sup> Nii jaberoco conatenohinte jaberocohin bucuhin ne. Jana nii rai suujue ichananate suujue nejesinaneen ne. Nete aiha jaberocohin cachane rijijieein ne, rai suujue netonai.

<sup>45</sup> Cana Coaunera Quiricha inoaensi cuhanete, “Jaurihanejeein cache nunuheneein nena Adaante cachaneein ichaoin nelu. Jana nii baiha cache satononeein nena Adaante, suujue nejesinaneein ichaonaa teraneein ne,” naain ne laenanohineein. <sup>46</sup> Nitohanihane jaun coatiha suujue nejesinaneen nena ichoaichaniha niheilu. Jaberocohin nenaate, ichoaichaniha nelu. Nii baihate laen ne nii suujue nejesinaneen nena. <sup>47</sup> Nii jauriaanejeein cache nenaate atane caje coaunanojoneein nelu. Jana, nii baiha nena cachate laen dede caje nenaane. <sup>48</sup> Caa chauratane que nenacaauru jaberocote, nii atane caje nenaalu cache jaberoco rijijie. Jana nii dedeeu nenacaauru jaberocoorute, nii dede caje nena jaberoco rijijie.

<sup>49</sup> Nii cache atane caje coaunanohineein nena tocuhaneen nihacachene rijijieein techu, nii dede caje nena cache tocuhaneen nerichaacheein.

<sup>50</sup> Canejeraauru, inara raine benaa jereun, jaberocohin bucuhin nena cache, Cana Coaunera Cojoanonaa que nena nainihe. Aihana jaun nii setunaa inaera, niha nii setuhelanaala nenaane jaun nena nainihe. <sup>51</sup> Nena laen coitucueraelanaala nena coitucuhichene jereun. Coatih saain orihacacheein. Nete laen, corenejoin niha cureein cana jaberoco. <sup>52</sup> Inae tonihane satonotiha jaihane janate, cana nota mitaain cana nota toretana rijijieein, inae turureein Cana Coaunera Cojoanonaa. Inae Cana Coaunera Cojoanonaa que turuhane janate, ichanaa cuurureein onacaauru, inae chabana ooruhane coina que airijiin. Nii jana canate laen, corenejoin niha curichaacheein. <sup>53</sup> Nii cana jaberoco setu rai nenaate, necoriha cureein setunaa inai que. Jerichanejeein techu nii cana jaberoco onaa inaera nihane caje, onaa inaelanaala nena que corerareein. <sup>54</sup> Inae nii cana jaberoco



setunaa inaera, setunaa inaii que coreraain, nii cana jabe-roco onaa inaera netonai onaa inaii que necorihane janate, inae Cana Coaunera quiricha cuhane, “Onaate corenojoinne, chabana onaa inaiin que. <sup>55</sup> Chu neeinte onaa. Itolere amuritiin nena jerei. Onaa, chu ne cachaauru cairichaeriine jaan,” naain laenanoineein nihane que turoreein. <sup>56</sup> Nii cacha cairichaa onaane jaante osa ne. Jana nii inoanlu rauhi, acaauru aitoonjoante nii osa lararajiaera ne. <sup>57</sup> Nariha Cana Coaunera. Cana Coaunerate, nii onaanaja itajerate Cana Curuaanaa Jesocurisito aina cuaain.

<sup>58</sup> Canejeraauru, aihana jaun nii baaso coacuelanaala, rao-tojoein itolere bana neeuche. Itolere bana, jelai amurito-heriin Cana Curuaanaacha jerei ichajeein neeuche. Inarate, Cana Curuaanaa aina jiniiquii canaacha ichai inacojoein nenihane coitucuhiche.

## 16

### *Coriqui taojiaauche cana nejeraauru rai.*

<sup>1</sup> Canaacha esenetai esenetaeraneein nenacaauru- cana nejeraauru rai coriqui taojiaaichene, Galasia bataneun nenacaauru, Cana Coaunera coitucuurerauru relaanulune rijijeein ichacuche. <sup>2</sup> Tomiho bana nainein, inara amiha-neeoo coreniha inaraacha eruujuei neleru rucuhacuche jelai tein, nabana turuhanune janaacha taojiana coaaquichene coataa. <sup>3</sup> Aihune inae turuhanune bana, inaraacha letoaenenuuru cachaauru letoae, acaauru rai quiricha lae-naain tein, nii coriqui inaraacha taojiai aina amaain teeru-ruha cana nejeraauru raine coina. <sup>4</sup> Canuhetonai cunaa jerichaaunnena, acaauru aina jiniiquiin curichaanuhin.

### *Coriintoote cunaa jere Faboro.*

<sup>5</sup> Inae inara rene rene turuha uhanunena, Masedonia batane jelon cuhin, caje coauneein laen Coriinto turoreeunni. <sup>6</sup> Jerihanena, carajaaajoaain inara aina nereeunni. Nainichaaunena inara aina nereeunni, situha elohenane reentiaain. Nii banate, canu coroatajanena naineriquicheein, jelai caje chunijiun cunaa jerichaaunne. <sup>7</sup> Coatiha canu situneeicha inara coana jerihaaun. Nii jaunna inara aina carajaeriin nena jereun, jeriha Cana Curuaanaa ne. <sup>8</sup> Nena laen Efesoo nereeunni, Feentecosetesi janonaa bana que tiaaajoaain. <sup>9</sup> Aiha jataain ecu Cana Curuaanaa rai amihanihanune, caohachaaain mituha canu amihaneonne rai nihane jaun. Arajiin caque nejeratenaaneein neeuruhane saijieeinna aicheeunni.

<sup>10</sup> Inae inara rene rene turuha Timoteeone caohachaaain raachete raotojoein inara aina neeine. Acaentonainte jerichanejeein canu rijijieein Cana Curuaanaa amihaneon

ichana coitucue. <sup>11</sup> Aihana jaun jiaonriha chuni nere tonoraenihane. Raujiaaincha namu que coroatajanecuchete nii chaque situhelanaala raotojoein canu coaraa uhine. Cauna leeochoaaauru canejeraauru aina cohajihacaanu.

<sup>12</sup> Canejera Aforo netonai raine maajeeinne niqiu aitoon, leeochoauru cana nejeraauru aina uhin inara coaraa uhane coina. Nete unaa jerene. Caa baiha nainihane banate ureein.

*Satononihate necoe Faboro.*

<sup>13</sup> Caohachaaain nainaaain necohalajiin, itolere que laraajiin baaso ichana coacuelanaala neeuche. <sup>14</sup> Chaelai ichaquiche leeochoauru raine, jataain belaaain corajeein ichacuche.

<sup>15</sup> Canejeraauru, inarate rai naraaichuru aina curuae-quiin jauriaanejeein Cana Coaunera esenetaalu Esetefana, Acaiha batane quene coitucuhiche raotojoein. Chaen techu acaauru nii cana nejeraauru coroatajaneraneein neeure, canaacha esenetai coitucuuruhane coina. <sup>16</sup> Nitohanihana jaunna nii Cana Coaunera coitucuurera aina, satiin acaauru coroatajaneraaurune maajeein, que inara suujua acatequichene jereeun.

<sup>17</sup> Jataainne rachoojoeun inara aina nenihanune jana, canu rene turuuruha Esetefana aina Forotonato, Acaico, naaonjoainurine jaun. <sup>18</sup> Acaauru ainate raotojoein nedae casuujua, jerichanejeein inara rijijieein aihuruhane jaun. Acaauru rijijieein caohachaaain nenacaauru cachaaauru coitucuhin neeuche. <sup>19</sup> Asia batane que nenacaauru Cana Curuaanaa Jesocurisito ranojoinunrute inara coaacure. Aquila, Firisila, chaen rai loreri asae netaojianacaauru naajoainunrite inara coaacure, Cana Curuaanaa Curisito coreniha. <sup>20</sup> Satiin cana nejeraaurute inara coaacure. Raotojoein ita rene turuhichene ita raain neeuche. <sup>21</sup> Canune Faborooneein inara rai canu raajenihane cacoi que caa laenaan inara coacuhin. <sup>22</sup> Chunocoha Cana Curuaanaa belainihane, baaso jana nijiaoine. Inae cataainjian Cana Curuaanaa. <sup>23</sup> Cana Curuaanaa Jesocurisito, inara rai caohachaaain neeinchene jaanu teeine. <sup>24</sup> Satiin inarane jataain belaihun cana Curuaanaa Jesocurisito coreniha.

## Coriintoo nenacaauru rai Faborohacha letoai coroataja

*Coriinto cocoaichacuru rai “Raotojoein neeuche,” naa Faboro.*

<sup>1</sup> Canuna Faboroneeun. Cana Coaunera jerihane jaunne, rai Calaohi Jesocurisito letono afosotoneeun. Cana nejera Timoteeo aina jiniiquiina, Acaiha batane que nenea Coriintoo Jesocurisito ranojoneein iclesianein neiniquichene rai, chaen nii Acaiha batane sacutaain Cana Coaunera cacha-neein satiin neiniquichene raine maajeeine caa quiricha lae-nacaanu.

<sup>2</sup> Cana Curuaanaa Jesocurisito, Cana Inaca Cana Coaunera, naaonjoaihunri raotojoein jianacoon rachoojoein neiche-ene jaanu teuruhine inara rai.

*Necairichaane biha Faboro.*

<sup>3</sup> Cana Curuaanaa Jesocurisito Inacanein nenea Cana Coaunera coroaecaachenete ne. Acate satiin Cana Inacanein nihane jaun, cairichaaajoaain cana coaraain cana necairichanaja caje cana suujua nunaeranein ne.

<sup>4</sup> Acate satiin itolere necairichaacachene jaanru caje, cairichaaajoaain cana coaraain, cana suujua nunaeranein ne. Nitohaneeinte cana netonai nii cairichaaajoaain cana coaraain cana suujua nunaane rijijieein, necairichaauruha leeochoaurune coaraain, cairichaaajoaain acauru coaraain acauru suujua nunaain nenea coina ichae Cana Coaunera. <sup>5</sup> Nii mainajeein necairichaalu Jesocurisitone te, canacaanu que nerotohane jaunne nii aihalune rijijieein necairichanaa abaantaacaanu. Nii rijijieein techu nii Jesocurisito aina cuaain cairichaaajoaain leeochoauru coaraain nihacaanu. <sup>6</sup> Nitohaneeine necairichaacaanu, inara netonai ichoteratenojoneein inara suujua nunaeraanu siriin nenea nainiquichene coina. Nii rijijieein techu, Cana Coaunera canacaanu suujua nunaane, inara netonai suujua nunanohinein neriquicheein, aina cuaain itolere necairichanaa abaantaain neeichene coina. <sup>7</sup> Nitohanein neriquicheeine esenetaacaanu. Charijieein teeinti necairichaacaanune rijijieein inara netonai necairichanaa abaataain neeiche. Nii rijijieein techu cairichaaajoaain cana coaraain cana suujua nunaain cana rai Cana Coauneraacha tei sirichanein neeiche.

<sup>8</sup> Canejeraauru, Asia batane que necairichaa-caanulune coaucuche. Ecune jataain mijiaaieein cairichanojoneein cojunoinichaanulu. Nii jaunne inae

abaantasinihacaanune jaun, “Inae jecha orichaanuhi,” naacaanu, <sup>9</sup> ohacaanune coina ichara tocohaneein cairichanojoinichaanune jaun. Nete Cana Coaunera onaa ichateein ichoteranihane que jaaequiin nihacaanune coina necairichaacaanulu, Cana Coaunera colane nenea rijijieein canacaanu jaberocohacha nejesina que itolere bana jaecohacaanune coataa. <sup>10</sup> Nii Cana Coaunerate, necairichaa in ohacaanune rai nihacaanune caje canacaanu ichoteratelu. Nii rijijieein techu satiin cana ichoteratereein, ohin nitajenaa rai nenea caje. Acatechu ohacachene bana nitaje rai niha cana suujuene caje, cana suujue ichoterateraneein nereein. <sup>11</sup> Nitohaneeinte cana ichoteratejeein sacureein, canacaanu aina bajaebajaequichene. Arajii cachaauru canacaanu coreniha Cana Coaunera bajaanete, arajiin netonai Cana Coaunera coroaecurureein, canacaanu rai caohacha ichaane coreniha.

### *Coriintoo cuenihane biha Faborone*

<sup>12</sup> Jataaine raotojoihacaanu inara coritana coacuelanaala, niheichu chatohaneein caa chauratane que baaso ichaelanaala, niheichu inara aina nihacaanulune bana inara rai baaso ichaenihacaanulune jaun. Coatiha canacaanu raajenihane cha coitucuera nihacaanune jaun aihahacaanu. Cana Coaunerate jataain canacaanu belaitohane jaun, nitohaneei ichaohacaanune jerihana jaunna aihacaanu. <sup>13</sup> Caa inara rai canacaanuhacha laenanajaqui quirichaaauru cuhane, coatiha leechaneein inaraacha coitucunaa nainihe i laenahacaanu. Bajiaanachuinti jitaain aonaain caohatiin coitucueeneiche. <sup>14</sup> Nii reretaain aonaain coitucuhichene rijijieeinte, canacaanu coreniha raotojoein neriquicheein, inae nacoauneein turuha Cana Curuaanaa Jesocurisitone bana. Nii rijijieeinechu canacaanu netonai raotojoerichaanuhi inara coreniha inae turuhane bana.

<sup>15</sup> Niritiin esenetaainna niqui, jauriaanejeein inara coaraa unaa jereeunlu, atiin coroatasain inara rene bedaenichaaunne coina. <sup>16</sup> Jauriaanejeeine niqui, Masedoniau cuujihataain inara rene bedaenena jereeun, coaiten caje caaujihataain nacoaauneein bedainichaaunne baiha jelai caje coauneein Jodea cuhanune que, nainequichene canu coroatajanequichene coina. <sup>17</sup> Niheichu canuhacha ichaneni coaucaunne, coatiha inara coritaa inae leesajeein “Airichaaunni,” naanune, canu suujua cuhane “Airihaaunni,” naain coacuhin irihaaun. <sup>18</sup> Cana Coaunerate, inara rai cha que erenaa jerichaanune “Airichaanuhi,” naacaanune canacaanu suujua cuhane “Airihaaanuhi,” naenihacaanune coaraje. <sup>19</sup> Nii rijijieein

techu, canu, Timoteo, Siribano, naaonjoainichaanune, inara rai canacaanuhacha beebejei Cana Coaunera Calaohi Jesocurisito esinae rauhijiriin acaneein ne. Nii Jesocurisitote esinae rauhijiriin ichaane coina, “Icharichaaunni,” naa Cana Coaunera, suujua cuhane “Icharihaaunni,” naelanaalane jaane. <sup>20</sup> Nii aina cuaainte, satiin niicha ichaneni niicha coacuilu ichae Cana Coaunera. Nii jaunte, Cana Coaunera coroajeein bajaacachene, “Nitohaneein ichamiin Cana Coaunera, Jesocurisito aina cuaain” naacache. <sup>21</sup> Chaen techu Aca cana janijiin cana taojiaain Jesocurisito aina cana teein, “Caaurute canu cachaauru ne” naelu Cana Coaunera. <sup>22</sup> Nitohaneein cana janijiin cana raainte, rai cacha cojunacatihane jaanque cana cojunacatein, cana rai rai Suujue telu Cana Coaunera, esinae rauhijiriin cana rai niicha teenu ichoaicha teranu que.

<sup>23</sup> Nena jaiti nii coaaucaaulune rijijieein Coriinto inara rene turuha uhenihanune, inara rai caohacha ichaa aihun. Cana Coaunerate inara rai caohacha ichaa aihanune coitucue. <sup>24</sup> Coatihachu inae caohatiin coitucuhin esenetaaichene jaun inara rai, “Naaonjoain ichaquichenete caohachae” naain erenaa nainihacaanu. Raujiaainchana inara coroatajanena jerichaanu, raotojoein rachoojoein esenetaaichene rijijieein neeichene coina.

## 2

<sup>1</sup> Nitohanihane jaunne nabana inara inaderaacaaunne coataa, nacoauneein inara coaraa unaa jerichaaunne baiha aineeun. <sup>2</sup> Inara inaderaacaaunne, neneriha raotojoein canu rachoojiaeraanune jaun. <sup>3</sup> Nii jaunne inara rene turuelanaala, raujiaaincha inara rai quiricha cuhane aitiin laenaaunlu, canu inaderaaquichene coina inara rene turunaa jerenihanune jaun, inae turuhanune bana inaderanaa coacuelanaala, nenacaeneeinjia jiniiquiin rachoojihacachene coina. <sup>4</sup> Nena laen nii quiricha laenacaaunlune bana, jataain inara coacuhin que nererojoeain chanaaunlu. Coatihaa nii que coacuhin inaderaaichene coina nii beein laenahaaunlu, jataain inara belaichaaunne coitucuhichene coinane niritiin beein inara rai laenaaunlu.

*“Nii canu que nejeratenaa que inara suujua acatecuche” naa Faborone.*

<sup>5</sup> Nitohaneein inara rai baaso ichara cacha, canu raaiha inaderanaa tiha aiheilulu, inara rai netonaite inaderanaa tiha ailu. Amuritiin rerohin aitona jerenihanune jaunne caa caritoojoein aitoon. <sup>6-7</sup> Inae nii cacha aina nejeraatein mainajeriin casetecaaichene jianeein, que inara suujua acatein, belaaain coroatajanecuche, nabana joenreein

suujua cuuaain inaderaane niicha ichanenu coitucuenihane coataa. <sup>8</sup> Nii jaunne inara rai aitoon, jauriaanejeein belaiquichelune rijijieein belaaichene coina. <sup>9</sup> Esinae rauhiiriin, canu ere tonoraain rijijieein ichaquichene coaracaaunne coinane, nechu inara cojuha inara rai quiricha cuhane aitiin laenaanlu. <sup>10</sup> Nitohanihane jaunne, inara suujua acatequichene jaanque canuhetonai casuujua acatereunni. Aiha niha chatohanai que casuujua actichaaunne jaanunena, Jesocurisito notaracaae que casuujua acatereunni inara coreniha. <sup>11</sup> Nitohaneein ichaohacachene, coatiha canaque niicha jerei ichana nainerinaain moconajaera, inae raotojoeein rai nerurujua coitucuhacachene jaun.

*Toroasihu turuhin raotocojoaeniha rai suujuane biha Faborone.*

<sup>12</sup> Jesocurisito beratenojoi beebejihanu cachaauru raine coina, Toroasihu turuhanune janate, Cana Curuaanaa jerenohi ichacaaunne coina jatoroain neeunlu. <sup>13</sup> Nena ecu cana nejera Tito eruhenihanune jaun, raotenelu casuujua. Nii jaunna ecu nenacaauru rai necoeein jelai caje amuhin Masedoniau cuunlu.

*Jesocurisito ainate namuritoroatena coacuelanaala niha-cache.*

<sup>14</sup> Nariha Cana Coaunera itolere bana namuritoroatena coacuelanaala, cana aina cuuain Jesocurisitohacha ichai naitoonjoa beratihane jaun, itolere sacutaain bihacachene coreniha. Nii canaque naitoonjoa niicha berateite, aiha jujuhine rijijieein itolere lomoritiin riaaneein aonanojohi ne. <sup>15</sup> Canacaanuna Cana Coaunera rai Jesocurisitohacha mocoli jujui rijijieein, inae nichotenaaneein nenacaauru rene, nitaje rai nenacaauru rene, naaonjoainuri rene letono neein nihacaanu. <sup>16</sup> Nitajerai nenacaauru raite, leinjiin jujui cacha atinaeraanuneein toni nii canacaanuhacha beebejei. Nete laen nichote rai nenacaauru rai, leinjiin jujui ichaonaateraneein toni nii canacaanuhacha beebejei. Nihei chuni cacha nitohanei ichana naineraneein nei. <sup>17</sup> Chabana aihuruha leeochoaurune tochaneein, Cana Coauneraacha beratenojoi beebejihacaanune coreniha, canacaanu coretera jerenihacaanu. Nenacaennejian nitohaneein nena coacuhelanaala, esinae rauhijiriin nohanelanaala Cana Coaunera notaracaae, coujurihu rai letononeein netiin inara relaacaanu, rai calaohi Jesocurisito cachaneein nihacaanune jaun.

### 3

*Ena nena Rauhi Cana Coauneraacha tei*

<sup>1</sup> Niritiin inara rai irihacaanunete, jernihane nechu caohachaaain canacaanu raauruha itolere cachaaurune

coina necoasitaa aitoha, canacaanu beeiche. Niritiin coaauquichene coataa, coatiha aihuruha nii leechoaaurune rijijieein, cajihaneein amuhemujueein: “Canacaanune naaonjoaineeinne nihacaanu,” naain cachaauru rai ereein nihaacaanu. Niheichu inara rai nihanatiin chabana, “‘Naonjoaineeinte neeure,’ naain canacaanu beein cachaauru rai quiricha laenacuchete aina canacaanu raauruhine,” naain chabana inara rai irihacaanu. <sup>2</sup> Inaraachane latichaanu, inara aina cuaain inanacaa canacaanu suujuau tenojoin que inara relacaanune coarateeiche cachaauru quene coina. Nii ainate canacaanu ichanaa coaraain canacaanu coitucuurureein cachaauru. <sup>3</sup> Nitohaneente, quiricha laenanohineein nenea rijijieein, Jesocurisito ichanohineein, cachaauru rai canacaanu aina cuaain teratenojoinneen neeichene coaracure cachaauru. Coatiha nii aiha quiricha laenanohine rijijieein niheeiche. Inarate Cana Coaunera Suujue ichanohineein nitohaneein neeiche. Niheichu atane jeeu que tein laenanohi rijijieein quirichaneen niheeiche. Inarate cachaauru suujuau canacaanu aina cuaain Cana Coaunera teratenojoinneen nenea que suujuequii neeiche.

<sup>4</sup> Nii jaaunne, Jesocurisito aina cuaain, nii aitocoaanune rijijieein ichaa Cana Coaunerane esenetaacaanu. <sup>5</sup> Coatiha canacaanu raajenihane nitohanei ichana nainerihacaanu. Cana Coaunerate, nitohanei ichana inaeraneein canacaanu tein ne. <sup>6</sup> Nii jaunte Aca canacaanu relae, nii enachasine rauhi naitoonjoan beraneein nihacaanune coina. Nii rauhi coatiha laenanohineein nenea nihei. Acate jeriha Cana Coaunera suujuene rijijieein nenea ne. Nii laenanohineein nenea rauhite, tonoraeniha cachane ohin nitajihane coina aitelu. Nete laen nii ena nenea rauhi jeriha Cana Coaunera Suujuene rijijieein chabana nitajeniha cachane coina ichaonaa tera ne.

<sup>7</sup> Nii rauhi atane jeu que tein laenanohineein nenaate, uhaa Moisesane jana, rai nomeri coaana nainecurenelu Israaelitacuru, jataain jiquihacoha nii niicha uhai caun rai nomerine jaun. Nii rai cono jiquihaquite, jacaain satonohelu. Nete, nii rauhi cana atinarateraneein nihane saijieein, jataain necaohachaaain cojoelanaacojoaain ococohin nelu. <sup>8</sup> Nii jaun techu jataain nii amuritoheriin necaohachaaain cojoelanaacojoae nii ena turunaa Cana Coaunera rai rauhicana suujue cuhane niicha tei rai Suujue. <sup>9</sup> Nitohaneein, itolere canaacha ichai ujuaihoneein nihacachene coina tenojoinihane saijieein, cojoelanaacojoaain nihalu, nii cha ujuaihoneein nenea coina tenojoinneen jaunte, nii amuritoheriin cojoelanaacojoaain nereein ena nenea rauhi Cana Coaunera

tenojoi, cha ujuaihonelanaala nenea coina canacaanuhacha beebejei. <sup>10</sup> Nitohanihane jaun, coatiha inae chaque nela-  
teen nihei nii jauriaanejeein nenea rauhi, caa ena nenea  
rauhi jataain caohachaaain cojoelanaacojoaain amurijiriin ni-  
hane jaun. <sup>11</sup> Nitohaneein, nitajerai nihane saijieein, jataain  
cojoelanaacojoaalu nii jauriaanejeein nenaane jauntechu,  
nii amurijiriin jataain cojoaelanaacojoaain nereein nii cha-  
bana satonoelanaala neenihu.

<sup>12</sup> Nitohaneein nii que jaequinne, satiin acatiha  
queecha ereerejihacaanu cachaauru rai. <sup>13</sup> Coatihaihalu  
Moisesane rijijieein, canacaanu meri conajaain aihacaanu  
canacaanu. Moisesate, nabana jacajeein cuha nii nomeri  
jiquihaquine coaracuruha Isaraelitacurune coataa, rai  
nomeri conajaain ererejetelu acaauru rai. <sup>14</sup> Nete nii  
naitoonjoan aonaain coitucusichurenelu Isaraelitacuru.  
Enanetojoeinte nii inoaenlu nenea cana aina Cana  
Coauneraacha ichanenu naitoonjoan ereretaauruhane  
nihanatiin aonasihurene, jaiti acaauru suujua aina,  
acaauru nota caje itajenojoineniha nii conaarane jaun.  
Jesocurisitohachate naine, nii conaara itajeein niha cacha  
caje ne. <sup>15</sup> Nitohanihane jaunte, enanetojoein nii Moisesa  
rai rauhi ereretaauruhane nihanatiin, acaauru suujua  
aninoaane jaun coitucusichurene cachaauru. <sup>16</sup> Nete laen  
naosatihajeein ichaohane jianein, Jesocurisito esenetaain  
ichaoha cachane, nii cha coitucuhane coataa, rai suujua  
conaara itaje rai Jesocurisito. <sup>17</sup> Cana Coaunera Suujueneein  
niha Cana Curuaanaa Jesocurisitone jaunte, itolereneein  
niha nii rai Suujuene jaaunru, raotojoein ichaohin, cha  
ujuaihonelanaala neeurureein cachaauru. <sup>18</sup> Inae cana,  
Jesocurisito ranojoneein nihacachene jaunte, inae cana  
caje nii cana suujua aina cana nota conaara itajihane jaun,  
aiha esefejo conone rijijieein conohe, cana aina jataain  
caohacha ichaa Jesocurisitone jaan cono. Nii jaunte Cana  
ichao corihajeein sacuha itolere bana Jesocurisito rai Suujue  
aina cuaainne jaun, rijijieein inae ichaohacache.

#### 4

<sup>1</sup> Cairichaaajoaain cana coaraane jaun, canacaanu rai  
nii amihanenaa tiha Cana Coaunerane jaun, nii canacaanu  
rai niicha tei amihanenaa bihacaanune coiinteein jianena  
nainenihacaanu. <sup>2</sup> Nii jaaune coejenacai ichana coacue-  
lanaala, niheichu asinojoneein cha ichaelanaala, itolere  
que jaolequinn satiin notaracaae niicha icharatei ichacaun.  
Coatihachu chaen canacaanu esenetaa cachane jerenacaun,  
nohanein nii Cana Coaunera beratenojoi udaa cuaain cacha  
relahacaanu. Nitohaneeinne cacha coritana coacuelanaala,



esinaen rauhijiriin nii canacaanu coitucuhichene rijijieein, Cana Coaunera notaracaae aitocaaanu. <sup>3</sup> Aihane jaun chunocoha, nii osa caje cana ichoteraanu canacaanuhacha beebejei aonaane saijieein coitucuenihanete, inae nitaje rai nihane jaun aicheein. <sup>4</sup> Inae esenetaaurenihane jaunte, maosa rijijieein acaauru te moconajaera, nabana jataain necaohachaa Jesocurisito Cana Coaunera rijijieein nenea tenojoin ichaonaane coaraain coitucunaa nainecuruhane coataa. <sup>5</sup> Coatiha canacaanu ichaoque inara relahacaanu. Acaihanijin Cana Curuanaa Jesocurisito ichao quene inara relaacaanu. Jataain canacaanu belaitoha Jesocurisitone jaan aina cuaainne inara rai caohachanu ichaeraneein nihacaanu. <sup>6</sup> Charijieein teeinti nocohena jana conoha conone coina aitoha Cana Coaunerae jaun neconaelu cono. Nii rijijieein techu nii jeelai Cana Coaunera canacaanu suujua cuhane rai cono teein ne, aina cuaain Jesocurisito merique conoha rai conone coitucuhacaanune coina.

*Canaacha esenetai aina cuaainte ichaohacache.*

<sup>7</sup> Nete laen nii Cana Coaunera tenojoi jataain nelatei raain, chaque nelatelanaala aiha atane codarojoene rijijieein nenea cana jaberoco cuhane sirichaache. Nitohaneente chaneei nenihacachene saijieein cana aina cuaain rai nelate coarate Cana Coaunera. <sup>8</sup> Nitohanihane jaunne necairichanaa coaracaanune nihanatiin, canacaanuhacha ichanenu chacaanu, chaque casilanaala. Coatiha chabana amuritonjoineein nihaacaanu. <sup>9</sup> Canacaanu ariiriichuruha canacaanu sohin jaaoruhane coina niqui, nete canacaanu nainatejene Cana Coaunera. Canacaanu comaauruha niqui, nete canacaanu itajenaa nainesihurene. <sup>10</sup> Itolereneein cuhacaanune jaaunru nihanatiinte, aihalu Jesocurisitone rijijieein cairichanojoneein ohacaanune rai nihacaanu, ichaohalune rijijieein canacaanu aina cuaain rai nichao coaracuruha cachaaurune coina. <sup>11</sup> Jataaina necairichaacaanu, Jesocurisito coreniha canacaanu atinaauruhane rai neeuruhane jaun. Nitohaneeinne Jesocurisitohacha tei ichaonaa que ichaohacaanune coaratihacaanu. <sup>12</sup> Nitohaneeinne ohacaanune rai nihacaanu. Nete laen inara, inae raotojoeein ichaonaaque ichaohiche, canacaanu que inara rai niicha teratei ichaonaa coreniha.

<sup>13</sup> Niique te, “Esenetaanune jaunne ereeun,” naain aitoha Cana Coaunera Quiricha cuhanene rijijieeinne, canacaanu netonai jerichanejeein esenetaacaanune jaun, que ereereecaanu. <sup>14</sup> Nitohaneeine nihacaanu, ohane caje Jesoso ichatihalune rijijieein, onaa caje canacaanu ichaterichaain Cana Coaunerae esenetaacaanune jaun. Nitohaneente onaa caje cana ichateein cana rareein nacatiha rai calaohi

aina jiniiquiin nena coina. <sup>15</sup> Nitohaneeinte, jataain caohacha ichae inara rai Cana Coaunera. Nitohaneein araai laurii que inara coroatajaniha Cana Coaunerane coaracuruhanete, araai laurii cachaauru netonai Cana Coaunera necaohacha coroaecurureein. <sup>16</sup> Nii jaunna chabana bihacaanune jianena coacuelanaala, niheichu namuritoroatena coacuelanaala nihacaanu. Cau caa ichaonaa que ichaohinte inae binaanihakache. Nete, cana suujua cuhane, itolere janonaa bana nenamanacainaacache. <sup>17</sup> Cau caa chauratane que ichaohin necairichanaate sorotiin sareein. Nete, nii necairichanaa coreniha, jataain nii amuritoheriin, chabana sanaacharanejeein nena ichaonaa rarichaacheein. <sup>18</sup> Aihana jaun nainihe i tolere cana notaracae nenaacha que coaaucaachene. Nii chabana, coaraelanaala nenaacha que coaaucaachenete caohachae. Nii satiin canaacha coaracurite, satiin nitajerai ne. Nete laen nii chabana canaacha coaraai chabana nitajenereein.

## 5

<sup>1</sup> Cana jaberocote cana amunajau leinjiin loanari sorotiin nelatenenu rijijieein ne. Nete laen chatohaneein itajeno-joiniha nii cana jaberecone niha natiin, dedeeu cana jaberoco ena nena rucuheca Cana Coaunerane coitucuhacache. <sup>2</sup> Nii jaunte ichanohineein nena, chabana nitajenaachara jaberoco cuhane inae ichaoha cunaa jere canacaanu suujue. <sup>3</sup> Nii jaberoco te laen canacaanu suujue que necurujuareein, machoequiin nenaane rijijieein nihane caje. <sup>4</sup> Jaiti nii loanari rijijieein nena cana jaberoco que jaberocohin ichaohacaanune jaunne, cha latein, nererojoecaaeriin, naaonjoaain ichaohacaanu. Coatiha itolere bana, nii canacaanu jaberoco que ichaohacaanune colatiha aihahacaanu. Inae nii canacaanu que banihatein Cana Coaunera ichanohi jaberoco que ichaohacaanunete, nii canacaanu jaberoco jauriaanejeein loanari rijijieein nena, nii ena nena canacaanu jaberoco jana nitajereein. <sup>5</sup> Cana Coaunerate nitohaneein nihacaanune coina canacaanu relaain nii ichoae tacaain canacaanu rai, rai Suujue te, nii cana rai naitoonjoan sirichaneein nerichaanuhine cojunacanu que. <sup>6</sup> Nii jaune satiin nii canacaanu rai naitoonjoa terichaine coitucuhin esenetaacaanu. Jaiti canacaanu jaberoconeein ichaohin nihacaanune jaunne, Cana Curuaanaa rohan nenihacaanu. <sup>7-8</sup> Ena niqiu coarahaacaanu rohan jaiti nenihacaanune jaun. Nete nitohaneein nerichaanuhine coitucuhacaanu, jataain esenetaacaanune coreniha. Inae niqiu caa canacaanu jaberoco ratiriin Cana Curuaanaa rene turunaa jerichaanu. <sup>9</sup> Nii jaunne cana Curuaanaa jerihane rijijieein itolere bana

ichaorichaanuhin, ohin, ichaohin, naaonjoaacaanune nihanatiin. <sup>10</sup> Inae itolere baaso ichara, caohacha ichara, naaonjoain ichao coitucuhane coina niha Cana Coaunerane bana nacatiha tururichaacheein, baaso ichaain, caohacha ichaain, naaonjoaacachene coitucuhin, lecachanichaachene ichanohi coitucuhin rai niicha tenaa jerei tihane coina.

*Aina raotojoein nihacachenete jere Cana Coaunera.*

<sup>11</sup> Nii jaunne inae coitucuhacaanune jaun, jeriha Cana Coaunerane rijijieein ichaaoruha cachaaaurune coina acaauru que jereratiha acaauru rai ereereecaanu. Cana Coaunerate canacaanu coitucuhin, canacaanu suujuane maajeein coitucue. Bajiaanachuhinti esinae rauhijiriin rai letononeein Aca jerihane rijijieein ichaohacaanune coitucueneeiche inara netonai. <sup>12</sup> Coatiha canacaanu raajenihane necohasitaa caa aitohacaanu. Nenacaaenejian raotojoein coitucuhin nainain, nitohaneein suujua cuhane coaralanaala nohaneein inara relaa nocoetonacaauru tonorana nainequichene coina caa inara rai aitocooaanu, nenacaaen inara coritaaauruhane esenetaaichene coataa. <sup>13</sup> Jeriha Cana Coaunerane rijijieein itolere ichaain nihacaanune jaunte, leinjiin jaelorohe nerurujua cha que nelatihei rijijieein coaracure leeochoauru cachaauru. Jana inara, esinae rauhijiriin caohatiin coacuhin aihacaanune coaraquichenete, inara caohachanu que aihacaanune coitucuriquicheein. <sup>14</sup> Jataain cana belaitohane jaunte, cana ichao rucuhaneein beraichaneein ne Curisito, aca satiin ichao coreniha ohalune coitucuhacachene caje coaaneein nunuheteein. Nii ohane aina cuaainte satiin cana netonai ohacachelu rai ichaonaa que ichaohacachene coina. <sup>15</sup> Nitohaneainte satiin cachanichaachene coreniha ohelu Jesocurisito. Inae satiin cana coreniha ohalune coitucuhin, esenetaain nihacachene jaun jeriha cana suujuane rijijieein ichaonaa coacuelanaala, Aca jerihane rijijieein ichaohacachene coina. <sup>16</sup> Canacaanu netonaine niqui, nii namute cache que coaacuruha Cana Coaunera coitucuhichurune rijijieein Jesocurisito netonai que coaurejetocooaanulu. Nena laen inae enene nitohaneein coacuenihacaanu. <sup>17</sup> Aihane jaun inae Jesocurisito aina jiniiquiin esenetaain ichaoha cachanete, inae nii jauriaanejeein nena rai nichao jianeein nii ena nena ichaonaa enachasine que ichoae cache.

<sup>18</sup> Nitohaneainte Jesocurisito aina cuaain ichae Cana Coaunera, que nejeratenaa rijijieein nena caje aina jiniiquiin ita belaa in raotojoein nihacachene coina. Nii jaunte canacaanu letoae inara que coitucueratihacaanune, inara netonai aina jiniiquiin raotojoein neeichene coina.

19 Cana Coaunerate nitohaneein Jesocurisito aina cuaain satiin cachanichaachene osa que suujua acatihane, aina raotojoein jiniiquiin nenea coina ichaain, nii niicha ichai beranu que canacaanu telu. 20 Nii jaunte acaneei nenea rijijieein canacaanu tein inara rai bihacaanune coina berate Cana Coaunera. Niine raajenhane aitoa Cana Coaunerane rijitoein, caa inara rai bihacaanu. Nitohaneein Jesocurisito letononihacaanune jaunne, inara rai aitocaaanu, atiin caa inara rai Cana Coaunera beratenojoi tonoraain esenetaain neechene, inara osa que suujua acatena nainihane coina. 21 Coatiha aansijieenniji osa que nesaruhin niheiluu Jesocurisito niqui. Nete, satiin cana osa coreniha caseteco coaraelu, aina cuaain cana osa que suujua acatein jianacoon cana tihane coina nainatejiha Cana Coaunerane jaun.

## 6

1 Nitohaneein niicha ichai que Cana Coaunera coroatajan-eranein nihacaanune jaunne, inara rai aitocaaanu. Nabana jataain inara belaitohane jaun inara rai Cana Coauneraacha beratenojoi que jaoleconaa coacuelanaala que nerausiaequichene coina. 2 Nitohanihane coinata rai Quiricha inoaensi cuhane:

“Canu bajaee bajaeequine aonajihanu.

Chaen nechuu  
nichotenaajereein,  
canu ariirijieeine jana,  
ii ichoterateeun,”  
naain been laenaeratelu, nii coina Cana Coaunera.

Enate, inae nii aitohalune rijijieein ichoteratenojoin nequichene caohachae, inae rai cojoanonaa nihane jaun.

3 Coatiha chatohaneein baaso ichaain chuni notajaain nihaacaanu. Nabana canacaanuhacha ichai baaso rijijieein cha ichaain neeuruhane, inara rai canacaanuhacha beebejei esenetaelanaala que jaolecohichene coataa.

4 Nitohaneein nenea coacuelanaalane, Cana Coaunera letononein nihacaanune coaratihacaanu, itolere necairichanaa, latijiojiriin, caaintati ichaonaa que ichaohin, 5 taba que canacaanu bisihure, caresero cuhane canacaanu enoaain, taba que canacaanu que nererojoecaure, jataain mainajeriin amihanenaa, sinerena, mijitena, naaonjoainurine abaantacaanu chabana nererojoecaelanaala. 6 Jerichanejeein nechuu esinae rauhijiriin nii chatohaneein baaso ichaelanaala ichaohacaanune coaratihacaanu, esinae rauhijiriin canacaanu aina niha Cana Coaunera Suujuene coaracuruha

cachaaaurune coina, chunique asilanaala satiin cachaauru belaaïn ichaoïn. <sup>7</sup> Nitohaneeina nihacaanu, esinae rauhijiriin canacaanuhacha beebejei esenetaain, canacaanu aina cuaain niicha ichanenu ichaa Cana Coaunerane coaracuruha cachaaaurune coina. Nitohanihacaanune jaunne, baasoneein canacaanu tenaajerera nihane, chatohaneein baasoneein tenaa coacuhelanaala, rauhijiriin nohanelanaala rai irihacaanu. Nitohaneeine canacaanu rai baaso icharanihane, baaso ichaelanaala ichaonaa esine que ichaohin nihacaanune que cuaain acaauru rai ereein necocaaeratihacaanu.

<sup>8</sup> Nete taba que canacaanu que suujua acateein, taba que canacaanu cotaain, taba que canacaanu que raotojoein ereein, taba que cacha baasoniha canacaanu been, naajoaain canacaanu que ereeure cachaauru. Nitohaneeinte nohanelanaala cachaauru rai irihacaanu natiin, nohaneein cachaauru coritaa canacaanu beure. <sup>9</sup> Chaen techu canacaanu coitucuuruhane saijieein, canacaanu coitucuhi rijijieein canacaanu coaracure. Canacaanu sohinte niq̄i canacaanu jaonaa jerecure, nena jaiti ichaaojihacaanu. Canacaanu casetecaauruha niq̄i, nete canacaanu atinaaurene. <sup>10</sup> Jataain inaderanaanajaanu tocohaneeinte niq̄i canacaanu ichacure, nena atiin raotojoein rachoojoein nihacaanu. Leinjiin cha coitucuhi cairichei rijiiichaanu niq̄i, nene arajii cachaauru rausiaecaanu canacaanuhacha coitucui que, raotojoein neeuruhane coina.

<sup>11</sup> Canejeraauru satiin Coriintoo neiniquichene. Esinae rauhijiriinne canacaanu suujua aina cutaain, inara coreniha canacaanuhacha coacuhi que inara rai caa suujuelanaala aitocoaanu. <sup>12</sup> Coatiha aansijieenniji inara que asiin irihacaanu. Nete laen inara niha chatohaneine nihanatiin canacaanu que asiiche. <sup>13</sup> Nii jaunne atiin inara rai aitoon, nere tonoraane coina bereecuru rai iriha cachane rijijieein. Esinae rauhijiriin caa inara rai aitiin nihanune rijijieein, canu que cha suujuelanaala been neeichene coina.

*Cana Coaunera rai Teenforo rijijieeinte nihacache.*

<sup>14</sup> Jiaonriha chatohanai ichaain neeuruha Cana Coaunera coitucuhichurune, acaauruhacha ichai ichaain neeichene. Baaso ichajeein ichaonacaauruhacha ichai ichana nainihei caohacha nejesina ichajeein ichaonaa cacha. Nii rijijieein techu jiichoo amuritonaa nainene nocohena. <sup>15</sup> Charijieein teeinti moconajaera belaina nainene Jesocurisito, nii rijijieein techu nainene moconajaera cacha aina chatohanai ichaain nena nainene Cana Coaunera cachaneein nena. <sup>16</sup> Nitohaneein nena nainihaacache cana, inae Cana Coaunera rai Teenforo rijijieein niha cana jaberocone jaun. Nitohaneein nihacachene coinatē:

“Inara aina neeine inara aina jiniiquiin amuhemuheree-  
unni. Canuna inara Coauneraneeun. Inarate jana canu  
cachanequiche,” naain raajenhane aitelu Cana Coaunera.  
17 Nitohaniane coina techu:

“Acaauru aina neeichene caje amuhin jelai neeuche. Jiaon-  
rihachu acaauru chosichuru rai lenone acaauruhacha tei  
dadaain neeichene. 18 Caa inara rai aitocooaunne tonoraain  
neeichenena inara rareeunni, inara Inacaneein nihanune  
jana, inara canu calaohineein, canu cacununeein, naaon-  
joaainein neeichene coina,” naain aitelu itolere icharaneein  
nena Cana Coaunera.

## 7

1 Niritiinte aite cana rai Cana Coaunera. Aihana jaun  
cana casetecarihanine que casiin, cana ichao aasajeein, cana  
suujuene maajeein itajenaa nainera que necohalajiin niha-  
cachenete ne. Nii jaun baaso ichaelanaala raujiaaincha cana  
rai Cana Coaunera aitoonjoan rijijieein ichaoha cachenete  
caohachaera canejeraauru.

*Canā Coaunera coitucuuruhane coarateeuruha Coriinto  
cocoaichacurune.*

2 Caohachaaain inara suujua coaraain canacaanu  
aonacuche. Coatiha chuni rai baaso ichaain, chuni  
cairichaaain, chuni coritaain, naaonjoahaacaanulu. 3 Coatiha  
inara que iriha aitohaaun. Inara rai aitocooaunlune  
rijijieeinne, casuujua aina cutaain inara belaaain inara  
aina jiniiquiin neein ohanune coina jatoroaain neeun, nii  
te raotojoein coitucuhiche inara. 4 Esinae rauhijiriina  
inaraneein neeichene coitucuhin, nii chuni que asilanaala  
inara rai aitoon, raotojoein canu coitucuhin neeichene jaun.  
Itolere necairichanaa coaraain nihacaanune saijieeine, inara  
coacuhin jataain raotojoein corajeein rachoojoein neeun.

5 Masedoniau turuhacaanune caje coauneein aansijieein-  
niji nebetacaaorihacaanu. Itolereenein turuhacaanune  
jaunru naineeine necairichanaa coaracaanu. Chaen  
nechu necairichaecuruha leeochoaurune coaracaanune  
jaun, canacaanu suujua cuhane casihacaanu. 6 Nete Cana  
Coaunera, cha ichana coasiha cachane nihanatiin, enaacha  
que ichana corajerateraneein nihane jaun, canacaanu que  
corajerate turuha Titone aina cuaain. 7 Coatiha turuhane  
jaauncha nihei, raotojoein neeichene coaraane jaun,  
acaantonai suujua aninoaain corajihane jaunne, canacaanu  
netonai canacaanu suujua aninoaain corajihacaanu. Acate  
jataain canacaanu coana jeriquichene que aitiin, canu  
coreniha inaderaain canu que coauquichene beebeje  
canacaanu rai. Nii jaune jataain jeelai amuritoheriin  
rachoojoein neeun. 8 Inara rai quiricha laenacaaunlune

jaun, coaraain inaderaaichelune que inae enene netojoehaaun. Jariaalune niqui, nii inara rai quiricha laenacaaunne jaun, inaderaaichelu carajaelanaalane coitucuhin netojoeetoonlu. <sup>9</sup> Nena laen inae enene nii inara rai quiricha laenacaaunlune corojeeun. Coatiha inaderaaichelune coroaehaaun. Nii inaderaaichelune aina cuaain inae nacoauneein jeriha Cana Coaunerane rijijieein ichaohichene jaune corojeeun. Inarate jeriha Cana Coaunerane rijijieein nii inaderanaa abaantaain neeichelu. Aihane jaun coatiha inara rai baaso ichaa nii quiricha laenahaacaanulu. <sup>10</sup> Nitohaneein jeriha Cana Coaunerane rijijieein, inaderanaa abaantaain cana ichao coreein nihacane, nii coreniha nichoterichaacheeine jaun, nihei chaque netojoeena jaanu. Nete laen Cana Coaunera coitucuhichuru nechuh baasohacha que coacuhin, itolere bana inaderaaauruha, niha leiijiin itolere necairichanaa caje cana rocoerane que coacuelanaalane jaun inae nitaje rai neeure. <sup>11</sup> Nete laen inara, jeriha Cana Coaunerane rijijieein inaderaain, cha abaantaain neeichene jaun, inara rai bihanune rijijieein ichaain canu cocoaerateeichelu. Chaen techu nii choae tacaain obajeein, casiin, naaonjoaachelu. Nete atiin, nii baiha canu coana jereein, nii inara jana baaso ichara casetecaaichene coina inae jatoroaain neeichelune jaun, esinae rauhijiriin inara nii ujuaihoneein neneeichene coarateeichelu. <sup>12</sup> Nii inara rai quiricha laenacaaunlune bana, coatiha nii baaso ichara cacha que coacuhin, niheichu nii baaso ichaane jaan cacha que coacuhin, naaonjoaain laenahaanulu. Cana Coaunera notaracaae canacaanu coacuhin aitocooaanune rijijieein ichaquichene coarateeichene coinane inara rai laenacaanulu. <sup>13</sup> Niite jataain canacaanu suujua nunaain, canacaanu suujua aninoaelu.

Nete nii amuritoheriin canacaanu rachoojiae Tito, inae raotojoein neeichene coaraain suujua aninoain nacoauneein niicha ichaneni corajerateeiche quene jaun. <sup>14</sup> Nii Tito raine, chatohaneein inara rai baaso ichaenihanune jaun, jataain inara aina raotojoein nihanune que aitoonlu. Nii nohanelanaala inara rai aitocooaanulune rijijieein nechuh, inara coreniha raotojoein nihacaanu que aitocooaanulu nohanelanaala Tito rai. <sup>15</sup> Chaen techu nere tonoraain que inara suujua acateein raachelune coaucane naineein, inara ainaacha itolere bana nena jere nii Tito. <sup>16</sup> Jataaine rachoojoeun, inae inaraacha ichaneni coitucuhin nena nainequichene esenetaanune jaun.

*Arajiin niicha teenihuru taojiaauruha Masedonia nenacaaaurune.*

<sup>1</sup> Canejeraauru enane laen, Masedoniau nenacaauru Jesocurisito ranojoneein nenacaauru belaitohane coaratiha, acaauru que Cana Coaunerane berichaanuhin inara rai.

<sup>2</sup> Jataain maainajeriin cojunojoneein neeuruhane jaun, necairichaauruhane saijieeinte, inae chaque tonajelanaala raotojoein enene neeure. Nii jaunte cairicheinejeeunruhane saijieein, coriquihonaneein nena rijijieein jataain arajiin, Cana Coaunera rai nii niicha teenihuru taojiaaure.

<sup>3</sup> Canuna jataain arajiin nii tenaa nainecuruhane amuritoheriin, chunaelanaala nii Cana Coaunera rai niicha teenihuru teeuruhane coaraaun.

<sup>4</sup> Chaen techu canacaanu rai aitocure nii niicha taojiaauri amaain, Cana Coaunera cachaneein nenacaauru rai tihacaanune coina.

<sup>5</sup> Nitohaneente taojiaaururichaaaine coaucaanne amuritojoaain teure.

Jauriaanejeein Cana Coaunera rai benatecuruhane baihate, jeriha Cana Coaunerane rijijieein canacaanu rai teure.

<sup>6</sup> Nii jaunne Tito rai aitocoaanu leeochoauru rai caohacha ichaa, inaraacha taojiaa raa uha inara caje, jauriaa aihalune rijijieeine coina.

<sup>7</sup> Inara leeochoauru amurijiriin esenetaain neein, cha que tonajelanaala leeochoauru rai erenaa inaain, itolere coitucuhin inara relaacaanune jaan rijijieein jereein neeichene coina jatoroaain, naaonjoaain neeichene jaun, nii rijijieein leeochoauru amuritoheriin, leeochoauru latijiojiriin nenacaauru coroatajanequichene coina ichaquichene ne.

<sup>8</sup> Coatiha inara letoaa inara rai binaaun. Caohatiin ichacuruha leeochoaurune coitucuhin aina cuaain leeochoauru belaaichene coarateein inara netonai tenaa nainequichene coina ne aitoon.

<sup>9</sup> Inarate jataain itolere que nelateein itolere ichana naineraneein nihane saijieein, jataain inara belaitohane jaun, aina cuaain rausiaenoiineein raotojoein neeichene coina, inara coreniha cha que nelatihei rijijieein cairichei coaraain nihalu Jesocurisitone coitucuhiche.

<sup>10</sup> Inara rai caohachanu quene, nii que inara rai aitoon. Inae inara, leeocho jaanaa bana inae nitohanei ichana nunuheteichelune jaun, satono que tiaain ichana corajeeuche.

<sup>11</sup> Aihane jaun nii jauriaanejeein tenaa nunuheteichene bana corajeein teeichulune coarateeeichelune rijijieein, enene tenaa nainequichene jeonijihanaain tihajeein leeochoauru coroatajaniha inaraacha teenu taojiaaichene nainacuche.

<sup>12</sup> Chunocoha Cana Coaunera rai cha tenaa jereein tenaa nainihane jeonejeein tihanete, raotojoein nii niicha tei rareein Cana Coaunera. Coatiha cha sirinihane saijieein, cha tiha cachane jerihe Cana Coaunera.

<sup>13</sup> Coatiha cha sirineeichene nihanatiin, leeochoauru rai acai-



haniji tein necairichaaichene coina erenaa nihein. Rau-  
jiaain ita rijijieein ita coroatajaneein niha cachane coinate  
erenaane. <sup>14</sup> Enate inara, acaauruhacha sirihei siriquich-  
ene jaun, acaauru rai tenaa nainequiche. Acaauru netonai  
cabaiha inaraacha sirihei sirichuruhane, inara rai netonai  
tenaa nainecuruhane coina. Nitohanihanete ita rijijieein  
inaraacha latei siriin neriquicheein, ita amuritoheriin sirina  
coacuelanaala. <sup>15</sup> Cana Coaunera Quiricha cuhane: “Nihei  
cautihei amuritoheriin raera rai. Niheichu lanaai fautaeriin  
raera rai,” naain laenanohinihane rijijieein.

*Rai corihaneraauru aina Tito letoaaauruhane.*

<sup>16</sup> Nariha Cana Coaunera inara que coaaucaauune  
rijitjoeein inara que coaauca Titone coina, casuujua  
rijitjoeein rai suujua tihane coreniha. <sup>17</sup> Nii jaunte  
acaantonai inara que coaaucaane jaun, rai aitocooauune  
tonoraain inae suujua caje coauneein inara coaraa  
uhe. <sup>18</sup> Nii Tito jiniichaaine inara rene leinjiin  
cana nejera letoaaun. Acate raotjoeein coitucuure  
leochaauru Jesocurisito ranojoihuru, acaauru rai  
ichoteratenojieein nerichaacheeine beebjia raotjoeeine  
jaun. <sup>19</sup> Nii jaunte nii ichoae tacaain aca janiichure  
Jesocurisito rai iclesianein nenacaauru, canacaanu  
aina amuhemujueein, cairicheinejeein nenacaauru rai  
Cana Coaunera que canacaanu suujua acateein nere  
tonoraain leochaauru coroatajanena jerichaanune  
coaratihacaanune coina, taojiaain letoanojoin raeranu  
que canacaanu coroatajaneraanu que. <sup>20</sup> Nitohaneeine  
ichana jerichaanu, nabana tonaain canacaanu que ereein  
neeuruha cachaauru, nii leochaauru coroatajaniha tenojoi  
canacaanuhacha taojiai quene coataa. <sup>21</sup> Nii jaunna Cana  
Coaunera notaracaae, cachaauru notaracaae, naaonjoaain  
itolereenein caohachaaain ichana jerichaanu.

<sup>22</sup> Acaauru jiniichaai nechu leochaauru cana nejeraauru  
caje unaa leinjiin cana nejera letoaaun. Acate satiin  
canacaanuhacha ichai que canacaanu coroatajaneein,  
acaantonai ichaane coina jatoroaain nihane coarate.  
Nii jaunte teriquicheein inara netonaine esenetaane  
jaun, jataain ena jeelai amuritoheriin ichana jere.  
<sup>23</sup> Chunocohacuru inara caje: “Chariji cachana caa  
inara aina uhin turue” naain Tito bajaauruhane: “Caate  
Faboro corihaneranein, cana coroatajanihane que  
coroatajaneranein nenaane,” naain acaauru rai beeeche.  
Jerichanetjoeeinchu, nii coroatajaain aina unacaauru  
cana nejeraauru bajaeranihane: “Caaurute leochaauru  
Jesocurisito rai iclesianein nenacaauru letononein

unacaauru ne. Chaen techu Jesocurisito ere tonoraain, naitoonjoan icharaneei nenacaaurune,” naain acaauru rai beeuche. <sup>24</sup> Chaen jataain acaauru belaaichene coarateeuchete: “Esinaenachuhisi catohaneein ichaauruhane jaun, acaauru coreniha raotojoein neeuruhate,” naain inara coreniha raotojoein nihacaanune esenetaauruhine leeochoaauru Jesocurisito rai iclesianein nenacaauru.

## 9

### *Leeochaauru cana nejeraauru rai inaraacha teenu.*

<sup>1</sup> Inae raotojoein inara rai bihanune latelanaala, tenaa nainequichene coitucuhanune jaunna canaacha esenetai coreniha cana nejeranein nenacaauru rai, taojiaain inaraacha letoaaenu que aitiin inara rai laenaeneen. <sup>2</sup> Nii jaunna itolere bana raotojoein Masedoniau nenacaauru rai, inara Acaiha bataneu nena Coriintoo neiniquichene, inae taolu ajaanaa situsina bana caje coaanein inae nitohanein leeochoaauru cana nejeraauru coroatajanequichelu jatoroain neenne beebejeeun acaauru rai. Nii ainate caohacha ichaa leeochoaauru coroatajaniha ichaquichene coaraain, neleruhin amurijiriin acaauru netonai ichana corajeein, inae jatoroain neeure, acaauru netonai ichacuruhane coina. <sup>3</sup> Nii coaranu quene caa cana nejeraauru letoaaun inara rai beranu que, letona jatoroain neeichene coina. <sup>4</sup> Nabana inae uhanune bana, canu aina uuruha Masedoniau nenacaauru tabaaurunijine, acaauru aina uhin jaiti ichaeneeichene jana inara rene turuhacaanune coataa. Nitohanein ichaquichene esenetaain leeochoaauru rai beebejihanune saijiein, jaiti ichaeneeichene jana turuhacaanunete laen jataain canacaanu rai necoejena tih airiquicheein. Chaen techu, inara raajenihane inara rai nocoejena tih airiquicheein. <sup>5</sup> Nitohanihane coataanejian, jauriaanejeein ichoaichaniha uhin inara coaraa uruha nii cana nejeraaurune jerichaaunne jaun, acaauru rai aitoon inara coaraa uuruhane coina. Jaiti nii aitocoichelune tocohanein taojiaaichene nainaeneeichene, inara coroatajanecuruha taojiana quene coina. Nitohanein inae jatoroain taojiaain neeiche jana, inara rene turuhacaanunete laen, esinae rauhijiriin chunaelanaala tenaa jereein teeichene coaratiha leeochoaauru amuritoheriin teriquicheein.

<sup>6</sup> “Chunocoha coroatajajeein temule jaerate, coroatajajeein taicheein. Jana arajiin temuerate arajiin taicheein,” naain

niha erenaane que coaacuche. <sup>7</sup> Aihana jaun le cachaaurute naine suujua cuhane coacuhin tenaa jerihane jeonijihanaain tihane caohachae. Nainihe chunocoha tenaa jerenihane, tihane coina conujiha chunine. <sup>8</sup> Itolere quete inara coroatajanereein Cana Coaunera, itolere bana latequichene rijijieein inaraacha latei siriin neeiche cauteeinne, nii caute que leeochoaauru coroatajaniha acaauru rai tein, naaonjoaain caohacha ichajeein ichaohichene coina. <sup>9</sup> Cana Coaunera Quiricha cuhane:

“Cairicheinejeein ichaonacaauru cachaauru raite,

chunaelanaala  
acaauruhacha latei te.

Acate

chabana satonoelanaala

itolere bana

caohacha nejesina ichareein,”

naain laenanohineein ne. <sup>10</sup> Cana Coaunera temule jaera coina rai nucuhe teraneein lenonene maajeein teranihane jaun, nii rijijieein Aca inara rai arajiin nucuhe tereein arajiin temuhin arajiin taojiaain neeichene, latejiojiriin nenacaauru coroatajaniha teeichene coina. <sup>11</sup> Nii ainate itolere siriin, cha latelanaala raotojoein neein, jelai amuritoheriin leeochoaauru rai tenaa naineriquicheein.

Nii canacaanu aina, inaraacha letoaaenu inaraacha taojiai corenihate, Cana Coaunera coroaecurureein leeochoaauru cana nejeraauru. <sup>12</sup> Coatiha acaauru rai lanaane jauncha, nii acaauru rai inaraacha taojiai amarihacaanuhin, nechu Cana Coaunera coroaecuruha inara corenihane coinane amarichaanuhi. <sup>13</sup> Jesocurisito aina cuaain, enachasine ichaonaa que ichaohichene coaratihate nii inaraacha sirii taojiaain letoaaiche. Nii te coaraain Cana Coaunera coroaecurureein. <sup>14</sup> Nii ichoae tacaain techu, jataain inara belaaain, inara rai Cana Coaunera bajaaurureein, inara belaitoha Cana Coaunerane coaratiha ichaquichene coreniha.

<sup>15</sup> Narihara Cana Coaunera, nitohanei ichana nainichaachene jaanu tihane coreniha. Nihei que tonaain erenaanjaanu.

## 10

*Afosotoroneein cocainanohinihane coaratenaa jeriha Faborone.*

<sup>1</sup> Canuna Faboroneein inara belaiha Jesocurisitone rijijieein inara belaaichaaunne jaun inara rai aitoreeuni. “Inara caje coriaae nihanunejene, enaacha inara rai tonaain ereeun,” naauruhane coitucuhanune jaun. <sup>2</sup> Nii jaunna inara rai aitoon, nii joaereein cacha rijijieein, cha ichaa canacaanu beracuru aina, nii rucujueein neeichene jana,

inara rene turunaa jerichaaunne jaun. Inae niritocuruhane rucuhecaaun acaauru ainane coina jatoroaain urichaaunni. <sup>3</sup> Esinae rauhijiriina niqiu cachanichaanu, nena niha chatohanei rucuhenacaine, aihuruha Cana Coaunera coitucuelanaala nenacaaurune rijjijieein rucujuenihacaanu. <sup>4</sup> Coatiha niha chatohanaine caa chauratane que nena que que biji achunequuin neein rucuhehaacaanu. Nii canacaanu biji achunete Cana Coauneraacha ichana nainei caje unaaneein, itolere que laraajiin nena jerenacaauru amuritiin itajenaa naineraneein nena ne. <sup>5</sup> Nitohaneeine canacaanu que ereein, Cana Coaunera coitucuruha cachaaurune coina beebejihacaanune caohateraauru itajerichaanuhin. Itolere cachaauruhacha coacune Jesocurisito rai teein nihacaanu, leinjiin Acaacha tonoraain neeuruha cachaaurune coina. <sup>6</sup> Nii jaunne esinae rauhijiriin, canacaanuhacha beebejei esenetaain tonaraain neeichene, nii tonoranajerelanaala nenacaauru casetecarichaanuhin.

<sup>7</sup> Inarate itolere bana inaraacha coarai cacha esenetaquiche, itolereneein coitucualanaala. Aihana jaun chunocoha Jesocurisitohacha jerei icharate, canacaanu netonai Jesocurisitohacha jerei ichacaanne coaraain coitucureein. <sup>8</sup> Caa cocoainanohi nichaaunne rerohin canu ere tonoraachene coina inara counujichaaunne que coatiha coejinaaun. Cana Coaunera, canacaanu cocoainaan nihalu inara que Acanihane coitucueratihacaanune, nere tonoraain neeichene coinana jaun. Coatiha inara itajihacaanune coina, canacaanu cocoainaan niheilulu Cana Coaunera. <sup>9</sup> Niheichu caa quiricha cuhane cuaain inara casataa aito-haaun. <sup>10</sup> Inara aina nenacaauru tabaaaurute: “Nechu quiricha cuhaneecha cuaainjene mijiaaeneein inara rai aitoon. Nete laen inae inara aina nihanune, inara rai tonaain mijiaaeneein erenereeni. Coatihaje cacha rai irihanune tonijiaain cacha rai erenaa nainichaaunne coalanaala,” naaure. <sup>11</sup> Nena laen mijiaaeneein erenaa nainenihacaanune saijieein, coriaae caje quiricha cuhane cuaain mijiaaeneein aitocoaanune rijjijieein, inae inara rene turuhacaanune bana icharichaanuhine coitucuha nii aistine jerichaanu.

<sup>12</sup> Coatiha nii raajenihane necohasitaain nenacaauru rijjijieein nena jerihacaanu. Nete laen acaauru cha coitucuurenihane jaun, leeochoauru amurijiriin niha nocoetiin raajenihane necohasitaare. <sup>13</sup> Canacaanu laen coatiha canacaanuhacha ichana nainei rerohin necohasitanaa nainihaacaanu. Nii rijjijieein chu Cana Coaunera cachaauru relaacaanune jaunru cojunacateraneein nihane jaun, nii canacaanu rai cojunacatihane jaan rerohin turunaa nainihacaanu. Nii

jaunte Aca canacaanu turuaelu Coriintoo neiniquichene rene tiaaajoaain. <sup>14</sup> Aihana jaun coatiha nii canacaanu rai cojunaca rerohin turuhaacaanu. Chabana inara rene turuenihacaanune saijieein, ena turuhacaanune jana nihanena laen, canacaanu rai cojunaca rerohitiin tururichaanu. Canacaanune jaiti inara rene turueniha chunine jana, ichoaichaniha inara rene turuhin, Ichaonaa Enachasine teraniha Jesocurisitone beebjihacaanulu inara rai. <sup>15</sup> Coatihā chabana turuenihacaanune jaan turuhin, chuni amihaneoo ruluhin neroraneein nihaacaanu. Nitohaneein canacaanu turunajanihei cunaa coacuelanaalane, inara ainaacha neein Cana Coaunera icharatenojoin amihanenaa ichajerichaanuhi. Aiha leinjiin Acaacha esenetaain ichaohin, ichacaaunne jerequichenene airichaanuhin. <sup>16</sup> Chaen nechū, nii neeichene jaan jelai caje coriaae cuhin, osa caje nichotenaa nainecururichaaaine beebjenaā jerichaanu leeochoaauru rai. Nene laen, inae cachaauru relaauruha leeochoaurune jaauun turunaa jerenihacaanu. Nabana leeochoaauru amihaneoo ruluhin necohasitanāa tocohanihacaanune coataa.

<sup>17</sup> Chunocoha raajenihane necoasitanaajerihane, Cana Coaunera coasitaainne. <sup>18</sup> Cana Coaunera coitucueraneei rai cachaneein nenaā cachate, Cana Coauneraacha ichanohicha coasitaain ichoae, chabana raajenihane necohasitanāa coacuelanaala.

## 11

*Afosotoneein niha nocoetonacaauru que ereereeca Faborone.*

<sup>1</sup> Bajiaanachuhinti cha coitucuhi jaelorohe rijitjoeein inara rai ereereecaaunne rautaaain aonaeneeiche. Atiin aonacuchene inara rai aitete coitucuhiche. <sup>2</sup> Jataain leeochoaauru esenetaain acaauruhacha ere tonoraain, Jesocurisito esenetaaichene jianequichene jaun rautaeniha Cana Coaunerane jaan quene inara rai aitoon. Canune rai lanaacha ere tonoraain neeuruha enecurune rijijieein, leinjiin Jesocurisitohacha ere tonoraain neeichene coina, rai inara teein inara que coitucuerateenlu. Nii jaunna leinjiin Acaacha ere tonoraain queecha coaauquiche leeocheanein inara suujua cuaelanaalane coina aitoon. <sup>3</sup> Nena laen Eba coritaalu acanone rijijieein inara coritaeranihane esenetaaichene coasihun. Nabana Jesocurisitohacha que coacuhin neeichene janeein, leeocho que coaauquichene coataa. <sup>4</sup> Inarate inara relaacaanune jaan nihei que, nechū nejelauneein cuaain Jesocurisito nihei que inara rai ereeuruhane rautatiin neeichene jaun, Cana Coaunera Suujue inae inaraacha esenetailunihei esenetaain, osa caje

ichotenojoineriquicheeine jaan, inaraacha esenetailunihei esenetaaiche. <sup>5</sup> Coatiha nii inaraacha esenetacuri, afosotonichaanune amurijiriin niha nocoetonacaauru fautaain nena jerinaaun. <sup>6</sup> Cacha rai irihanune que nelatinaaun niqiu, nena laen esinae rauhijiriin coitucuun banejelanaala. Niite raotojoein coitucuhiche inara, satiin canacaanu ichanaa coaraneein neeichene jaun.

<sup>7</sup> Inara rai baaso ichaana, inara caje core bajaelanaala inara fautaeriineein nena rijijieein neein inara relaaunlu ichoteratenojoneein nerichaacheeine que, canu amurijiriin neeichene jerenacaun. <sup>8</sup> Nitohaneeine inara caje chaelai bajanaa coacuelanaala, leochaauru Jesocurisito ranojoneein nenacaauru coriqui ruluera tocohaneein raaunlu, inara coroatajanena nainichaaune coina, canu rai teuruhane rijitoein raanune jaun. <sup>9</sup> Coatihachu inara aina nihanune bana, inara caje cha latein cha bajaain nerejetohaaunlu. Masedoniau caje uhin turunacaauru cana nejeraauruhachate canu rai canuhacha latei terejetocurelu. Aihana jaun coatiha inara caje cha bajarejetohaaunlu. Nirijieeine itolere bana nereeunni. <sup>10</sup> Nitohaneeine satiin Acaiha batane sacutaain turuhanune jaanru nainein neeunlu, esinae rauhijiriin Jesocurisito coitucuhin rijijieein naitoonjoan tonoraain nihanune jaun. Nerinaain canu caje nii ruluera. <sup>11</sup> Coatiha inara cotaiha aitohaaun. Jataain inara belaichaaune jaunne aitoon. Cana Coaunerate jataain inara belaichaaunne coitucue. <sup>12</sup> Nena laen inara aina inae canuhacha ichailu ichajeein sacureeunni, nabana nii canacaanu rijijieein raotojoein nena coaauca nocoenacaauru rausiaecaaunne coataa. <sup>13</sup> Acaaurute nechu casejenein, Jesocurisito letono afosotoniha nocoetocure. Nete esinae acaneein aitocurene. <sup>14-15</sup> Coatiha enaacha nihei nitohanei. Moconajaera netonai, Cana Coaunera cononiha nocoetiin tocohaneein nedaane jaunte, rai letonocuru netonai rijijieein neuruhane jaun, cacha caohacha rijijieein inanacaure. Nete, caohacha ichacurenihane jaun, ecu tihane bana casetecaain itajenojoihiha cuurureein moconajaera aina jiniiquiin.

*Jesocurisito letono afosoto nihane jaun necairichaa Faborone.*

<sup>16</sup> Nacoauneeine coitucuhichene coina inara rai aitoreeunni. Jiaonriha cha coitucuenihanune jaun leinjiin jaelorohe rijijieein iriha canu biha chunine. Atiin canu aonacuchene inara rai aasaeriin necoasitaete aonaquiche. <sup>17</sup> Coatiha jeriha Cana Curuanaane jaun nii necoasitarihaauni. Nechu cha coitucuhi rijijieein ereerecaane jaune aitoreeunni. <sup>18</sup> Coaracuchenachuinti, Suujua caje rocohin niicha ichai

coasitaauruha nii leeochoaurune, nii rijjijeeinechu canuhet-onai necohasitareeunni. <sup>19</sup> Inarate niqiu itolere coitucuhiche. Nete cha coitucuelanaala nenacaauru cachaauru inara relaauruhane, acaauru aonaain acaauru rautatiin neeiche. <sup>20</sup> Nitohaneeichene jaun te inara basijiauhin, inara coritaain, inara que jaolequiin, inara meri faoracaain, naaonjoauruhane niha natiin acaauru abaantaain neeiche. <sup>21</sup> Jataaine coejeeun, nelatihei rijjijeein nii aihuruhane tocohaneein nenaanainenihacaanune jaun. Nene laen, necoasitanaa coaacuruha nii leeochoaurune canuhet-onai necohasitareeunni. Cha coitucuhi rijjijeeine ena caa ereerejeeun. <sup>22</sup> “Canacaanune Ebereeo nichaanu” naauruhane, canuhetonaine Ebereeo neeun. Jana, “Canacaanune Isaraelita nichaanu” naauruhane, canuhetonaine Isaraelita neeun. Jana, “Canacaanune Abaraaun nefoeratenichaanu” naauruhane, canuhetonaine Abaraaun nefoerateneeun. <sup>23</sup> Jana, “Canacaanune Jesocurisito letononeein nihacaanu,” naauruhane, canune jataain acaauru amuritoheriin acaneein neeun. Cha coitucuhi rijjijeein aito-coaunne nihanatiine, esinae rauhijiriin aitoon. Canune acaauru amurijiriin amihaneein araaaisaain caresero cuhane enoanojoneein, acaauru amurijiriin mainajeriin bisinojoneein, araai saain onaa caje nichoteein, naajoaain neeun. <sup>24</sup> Saoqui sai cuhanete, nichatachoonca isocoon tacanei bisicha que canu casetecaaure Jorioocuru. <sup>25</sup> Nii rijjijeein techu nichata sai cuhane enuha que canu faojoaain, lesajei que ajeri que canu bodoosihure. Nichata saicuhanetechu naluha cuhanune jaan botena jaun ohanune rai neeunlu. Nii jaunna lesajei que cucuana cataaun, lejiichoo lejanotineein neeunlu. <sup>26</sup> Araai saain nucuhe cuhane amuhanune jaaurune necairichanaa coaraaun. Tabaauru que canu basijiaauruha asijiautoorune que, chatohaneein canu teeruha canu araaichuru Jorioocurune que, nejelau cachaauru nihanatiin chatohaneein canu teeruhane que, naaonjoaain-unri que casihun. Jerichanejeeinechu, neseeru nihanune jaauru, bero cuhane, cucuhana cuhane, naaonjoainunru nihanune jaauru, necairichanaa coaraain neeun. Nii rijjijeeinechu, necairichanaa coaraain neeun, nii Jesocurisito coreniha cana nejera niha nocoetonacaauru cataaun nihanune. <sup>27</sup> Chaenechu mainajeriin amihaneein necairichanaa coaraaun. Tabaauru que sinilanaala, tabaauru que mijitena aina cocoirena abaantaain, naaonjoaain. Araai saain tabaauru que lenoninaaun. Jelaronaa caaunne taba que necairichaaun neniha canu cajionene jaun.

<sup>28</sup> Nitohaneein itolere que necairichaanune saijjeeine, jeelai amuritoheriin satiin Jesocurisito ranojoneein ne-

nacaauru iclesiacuru que coacuun. <sup>29</sup> Nii jaunna chunocoha cunaitihane inaderaaun coreniha. Jana chunocoha suuju-ateuruha baasoneein suujua coaraane coinanete, jataain canu baijiae. <sup>30</sup> Canu necoasitaanunena nelatenihanune nainejeein canuhacha ichai que necoasitareeuni. <sup>31</sup> Cana Curuaanaa Jesocurisito Inaca Cana Coaunera itolereneein coroaenoiineein nenaate, esinae rauhijiriin nohanelanaala aitocooaunne coitucue.

<sup>32</sup> Damasoco nihanulune banate, *rey* Aretasi rai cober-endoroneein nena rai coardiaauru letoaelu, nii nese rai rijia bacuujuuuru naineein neein canu cojoaain canu mucu-uruhane coina niqui. <sup>33</sup> Nete nii coitucuuriin, omari seeonjoa cuhane canu teein, nii nese rai rijia bujuau, acuujuu laojoiri ucuun nena cuhane cuaain canu faauruhane jaun acaauru caje nichoteeunlu.

## 12

*Notajaain que necoitucueratiha Jesocurisitone beebejiha Faborone.*

<sup>1</sup> Nihei chaelai que rai cainera, raajenihane necohasitaain niha cachane. Nena laen canu, canu notajaain canu que niicha ichai coitucueratiha Cana Curuaanaane bereeunni inara rai. Aihana jaun coatiha canu raajenihane necohasitaa aitorihaauni. <sup>2</sup> Inae lechoonca jena jaanacaa Jesocurisito esenetaeranichaaunne dede nichata burihu amanojoinichaaunlune. Nechaainti canu jaberoconein amanojoini nihanulune canu suujueneein amanojoini nichaaunlu. Coatiha coitucuhaaun, Cana Coauneraachate coitucuujue. <sup>3-4</sup> Nena laen esinae rauhijiriin dedeeu amanojoini, ecu chabana aohanraai erenaa aonaaunlu. Nechaainti canu jaberoconein netiin aonaenihanulune, canu suujueneein netiin aonacaaunlu, Cana Coauneraachate coitucuujue. Nihei chuni cacha que chabana aohanratenojoini nihei nii canuhacha aonai erenaa. <sup>5</sup> Chunocoha nitohanein nihanena naineen coasitaanune. Nene laen caraa-jenihane niritiin necohasitaanaa naineneen. <sup>6</sup> Coatiha esinae niqui, necohasitaanune nohaniha aitorihaaun, esinae rauhijiriine casajenelanaala aitoreeun. Nena aitona jere-neeun, nabana ainihanune saijieein nechuu canu esenetaera coina aitoha canu beeuruha cachaaurune coataa. <sup>7</sup> Nitohanein canu notajaain niha Cana Coaunerae aina cuaain nabana canunein nihanune rerohin necohasitaanune coataate, leinjiin moconajaera tenojoi cunai tocohaneein, ojoa que foconojoi rijitocojoaain canu jaberoco cunaitaerate Cana Coaunera. <sup>8</sup> Nii jaunne niqui, canu jaberoco caje nii cunaitaera jaohane coina nichata saain Cana



Coaunera rai aitoon. <sup>9</sup> Nete, “Nelatelanaala nenacaauru aina cuaain canuhacha ichana nainei coaratihanune coina ichacaaune jaunte aaicha. Jataain, ii belaitohanune jereeine jaunte nii aaicha,” naain canu tonorae Cana Coaunera. Nii jaunne, canu rai niritoha Cana Coaunerane jaun, jataain rachoojoein neeun, chaque nelatenihanune saijieein canu aina cuaain niicha ichana nainei ichaa Jesocurisitone coina. <sup>10</sup> Nii jaunna nelatenihanune que ereein, latijiojoiirin, arinojoneein, Jesocurisito coreniha necairichaaain, naaonjoaain nihanune saijieein jataain rachoojoein ichaaon. Nitohaneine, itolere que nelatihei rijijieein nihanune saijieein, jataain itolere que laraajiin neeun.

*Coriintoo Jesocurisito ranojoneein necaauru iclesiacuru que jataain coaauca Faborone.*

<sup>11</sup> Inara canu rai lerateechene jaune, cha coitucuhi jaelorohe rijijieein inara rai ereerejeeun. Inara, canu coreniha erenaa nainequichene saijieein, acaauru fautaain nelatenihanu que, inara rai ereeuruha nii Jesocurisito letono afosoto niha nocoetonacaaurune jana, acaauru rijijitoein acaauru esenetaain acaauru ere tonoraquichene jaunna aitoon. Coatiha nii canu amurijiiriin nena jeriha nocoein ereeuruhane que tonajihaaun. <sup>12</sup> Nena laen canu Jesocurisito letono esine nichaaune jaun, inara abantaain itolere cojelanaacojoai ichaaain inara notajaain neeunlu. Nii cajete esinae rauhijiriin canu afosoto esine nichaaunne coitucuhiche. <sup>13</sup> Inara rai cotainacai que irihanune, canu que inara suujua acatecuche. Jerihane leeochoaauru Jesocurisito ranojoneein nenacaauru iclesiacuru caje, canuhacha latei bajarejetocooaunlune rijijieein, inara caje canuhacha latei bajaenihanune jaaunne jerihane, inara rai baaso ichaaunlu.

<sup>14</sup> Inae jatoroaain nihanu, nacoauneein inara coaraa uhanune coina. Quete nichata sareein inara rene turuhanune. Nenechu inara caje canuhacha latei bajaanune coina ainereunni. Coatiha inaraacha sirii latichaaune jaun coina airinaauni. Inara caohachanu que inara coroatajanichaaune coinane inara rene turuha ureunni. Rai bereecuru caje cha lateein nelanaalate, rai bereecuru rai acaauruhacha latei tein ne acaauru inaca. Nii rijijieeinechu canuhetonai inara inaca rijijieein nihanune jaun, inara rai nelatichaaune coina neeun. <sup>15</sup> Nii jaunne, acaihaniji canuhacha ichana nainei ichareunni inara caohachanu que. Canu jaberoco nihanatine inara coreniha tereunni. Nete, nitohaneein inara caohachanu ichaaain, jataain inara belaaain inara coroatajanena jereein nihanune saijieein, canu que nererojoecaain, canu coointeein, naaonjoaain neeiche.

<sup>16</sup> Coatiha niqui inara rai chatohanei ichaain nihaaunlu. Nete inara tabaauru: “Acaauru coritaainjena baasoneein osa que acaauru ichao saruerateen,” naaure. <sup>17</sup> Niheichu coatiha nii cachaauru canuhacha letoaauri que, inara coritaeratihaaunlu. <sup>18</sup> Canu jerichaaune jaunna, nii coroatajai cana nejeraauru aina Tito letoaauru, inara coaraa uhane caina. Chaen techu inara raotojoein Tito aina ita rijijiein ita suujua que suujuaain, inara coroatajanichaanulune coitucuhiche. Nii jaun chasiina inara coritare Tito.

<sup>19</sup> Jerihanete: “Canacaanu que inara suujua acatequichene coinajecha inara rai aitocaaanu,” naaiche. Nete aine. Nitohanei coacuelanaalane Cana Coaunera notaracaae, cojoerihu Jesocurisito letononeein nihacaunune jaun, coitucuhichene caina aitocaaanu. Satiin caa inara rai canacaanu aitoonjoate, jelai amuritoheriin Cana Coaunera coituhin ichao-hichene coinanera canejeraauru. <sup>20</sup> Inara coaraa uhanune bana, baasoneein neeichene jana inara eruhanune rautaenihanune, inara netonai rautaeneeichene coataane aitoon. Nii jauna ita suujua rijijiein coacuelanaala, ita que necoelaain, ita cotaairiin, inara rainuhacha que coacuhin, leeochoauru cairichaa nohanein, ita que ereein, necohasitaain, ita caje neleruhin, naaonjoaain neeichene jana, inara rene turuhunune que necoatoon. <sup>21</sup> Chaen nechu nacoauneein inara rene turuha uhanune jana, inae Jesocurisito esenetaeraneein neeichene saijiein, chabana nitohanei osa que nesaruna naineniha cachane saijiein, inara amute quicha aina osa que nesaruhuin neeichene Cana Coaunera notaracaae inara que necoejuein chanareeunni.

## 13

### *Acaauru suujuatein necoiha Faborone.*

<sup>1</sup> Nii inara coaraa urichaaunine quete, inae nichata sareein inara rene tururichaaunine. Aihane jaun nii caitono tocohaneein niha chatohanei rucuhenacaine, nihanete ne coroatajaain nichatajaain, naaonjoaain baaso ichaane coarain beranu. <sup>2</sup> Nii jauriaa osa que nesarunacaauru rai, satiin inara rai, naaonjoaain raine caa coriaae caje coauneein aitoreeunni. Nii inara coaraa uhanune coroata sacuhane, caraajenihane inara rai aitocaaunlune rijijiein, inae nacoauneein inara coaraa uhanune bana, niha chatohanei ichara inara janane inae laen nii baaso ichara que canu suujua acaterinaauni, <sup>3</sup> Jesocurisito letononeein aihanune esenetaeneeichene jaun. Coatiha chaque nelatenihane jaun, inara aina niicha ichanenu ichaai Jesocurisito. Acate inara que itolere que laraajihane coaratenaa naine. <sup>4</sup> Esinae techuhisi cairichei ichara rijijiein coroso que tein atinaaurelu niqui. Nete

niicha ichana nainei ichaain ichatihalu Cana Coaunerana jaun enanetojoein ichoae. Nii rijijieein nechu, canacaanu netonai nelatihei rijijieein nihacaanune saijieein, niicha ichana nainei ichaa Cana Coaunerane aina, aina jiniiquiin ichaohin laraajjin nerichaanuhin inara coroatajanichaaunne coina.

<sup>5</sup> Aihana jaun inara raajenhane inara suujua cuhane Jesocurisito esenetaeraneein neeichene jaun, esinae rauhijiriin baaso ichaeneeichene coaracuche. Tana inara aina niha Jesocurisitone coitucuhichene. Nii jaun coujunojoinequichene rijitjoeein inae baaso ichaquichene coitucuriquichene. <sup>6</sup> Nena laen canacaanu jerichanejeein nii leochaneein coacuelanaala nihacaanune coaraain coitucuhichene jerichaanu. <sup>7</sup> Nii jaunna Cana Coaunera bajaacaanu inara coreniha. Nabana nenacaen baaso chaain neeichene coataa. Coatiha canacaanu baaso ichacaanuna jaun nihei. Nechu inara caohachanu ichaquichene jerichaanuna jaunna canacaanu baaso ichara rijijieein aitocaaanu. <sup>8</sup> Nitohaneeine nihacaanu, canacaanuhacha esenetai que jaoleconaa nainenihacaanune jaun. Acaihaniji nii canacaanuhacha esenetai rai caohachanuhachane ichana jerichaanu. <sup>9</sup> Nii jaunna nelatihei rijijieein nihacaanune que rachoojoein nihacaanu. Nii aina nelararajiaain Aca jerihane rijijieein, baaso ichaelanaala neeichene coinana, inara rai Cana Coaunera bajaebajajeein nerichaanuhi. <sup>10</sup> Nitohanihana jaunna inara coaraa uhane ajiniha caa inara rai been laenaan. Nabana Jesocurisito cocoinanohineein nihanune coarateein, jataain mijjainein inara rai aitocaaunne coataa. Coatiha inara itajihanune coina, cocoinanohineein nihaaunlu, raujiaain esinae coujuriu Cana Coaunera cachanein neein, itolere bana jelai amuritoeriin coitucuhajeein ichaoichene coina, inara coroatajanichaaunne coinane cocoinanohineein.

<sup>11</sup> Inae satononejeeine jianichaaunne coina caa aitoreeunicha canejeraauru. Jataaina jiniiquiin raotojoein ichaohin, inara ichao rucujueein baaso ichana coacuelanaala ichao-hichene jereun. Esinae rauhijiriin corajeein, raotojoein ita suujua rijijieein coacuhin ichaaoche. Raotojoein ichaohachachene coina cana belaitora Cana Coaunerate inara coroatajanereein. <sup>12</sup> Coujuriu Cana Coaunera cachanein, jelai amuritoheriin ita belain ita rai ereein neeuche. <sup>13</sup> Satiin Jesocurisito coreniha cana nejeraneein nenacaaurute inara coaacure. <sup>14</sup> Cana Curuaanaa Jesocurisito, inara rausi-aemiin cana belaicha Cana Coaunera aina. Cana Coaunera Suujue itolere bana inara aina neeine raotojoein neeichene coina.

## **Galasia batane nenacaauru rai Faborohacha letoai**

*“Inara coaaucaun,” naa Faboro.*

<sup>1</sup> Canuna Faboroneeun. Coatiha, cachaauru canu co-cainaain canu letoaain nihei. Jesocurisito aina rai Inaca Cana Coaunera- nii ohane caje ichateralute canu cocoaain caletoaain nelu. <sup>2</sup> Cau canu aina nenacaauru- canejera-auru aina jiniiquiin neeinna, satiin Galasia batane que Jesocurisito ranojooinein neiniquichene rai caa quiricha lae-naaun. <sup>3</sup> Cana Inaca Cana Coaunera, rai Calaohi Jesocurisito, naaonjoainuri aina jiniiquiin raotojooinein neeichene jaanu teuruhine inara rai. <sup>4</sup> Nii Jesocurisitote cana osa coreniha ohelu, cau chauratane que itolere curuaanaanein niha monajaerane jaun aina jiniiquiin caseteco coaracaachene rai nena caje, aina cuaain cana ichoteratihane coina, nitohanein jeriha Cana Coaunerane jaun. <sup>5</sup> Nii coreniha Cana Coaunera coroaecuruhine itolere bana. Nitohanemiin.

*“Coatiha nihei nii baiha cana ichoterateraanu,” naa Faboro*

<sup>6</sup> Jataaine inara cojoelatoon, inara belaiha rai Calaohi Jesocurisitone coreniha inara raain nihalu Cana Coaunerane saijieein, nii niicha tei erenaa que jaolequiin leecha cana ichoteranihei erenaa sacuhichene jaun. <sup>7</sup> Nete nene leecha cana ichoteraanu erenaa. Inara laurijiracuru tabaaurute, inara rohecaain, nii inara ichoteranein niha Jesocurisitone que erenaa corenaa jerecure. <sup>8</sup> Nete laen, inae nii inara relaacaanune jaan corenaa coacuhin leechanein nena erenaa que inara relaera nihane casetecareein Cana Coaunera. Canu leecha erenaa que inara relaane nihanatiinte canu casetecareein Cana Coaunera. Leinjiin anjera dede caje fauhin, leecha erenaa que inara relaane nihanatiinte casetecareein Cana Coaunera. <sup>9</sup> Jerichanetoojooine nacoaunein caa aitoreeunni. Chunocoha inae nii jauriaanejooine nena erenaa inara relaacaanune jaan corein leechanein inara relaerate casetecareein Cana Coaunera. <sup>10</sup> Coatiha baaso ichaenihanune caohacha ichacaanne coaracuruha cachaaurune jerenacaun aitohaaun. Cana Coaunera baaso ichaenihanune caohacha ichacaanne coitucureein. Jana jerecuruha cachaaurune rijijieein jerichaaune coatiha esinae rauhijiriin Jesocurisito letononein nerihaaun.

*Jesocurisito letono Afosoto niha nunuhetihane biha Faboro.*

<sup>11</sup> Aonacuche canejeraaurune caa que inara rai aitete coitucuhiche. Coatiha cacha suujua caje unaa nihei nii osa caje

cana ichoterateraanu erenaa- caa inara rai canuhacha bee-bejei. <sup>12</sup> Niheichu, leinjiin cache nii que canu relaain niheilu. Leinjiin Jesocurisitohachate canu que nii coitucuerateein nelu.

<sup>13</sup> Nii coitucuhichene rijijieeine, canuhetonai jaiti Jorionichaanune ichao que ichaohanune bana Cana Coaunera rai Jesocurisito ranojoneein nenacaauru- iclesiacuru laurichuru que nejerateein, acaauru rerohecaain acaauru itajenaa jereeunlu. <sup>14</sup> Nii Jorionichaanune ichao que jaiti ichaohanune banane, jataain leeochoaauru canu araaichuru, canu rijiu nenacaauru amurijiriin canacaanu foerateracuru ichao rijijieein ichaohin, nii canacaanu ichao corera caohateein beraain nerejetoonlu. <sup>15</sup> Nete, inae catohaneein rai letononeein nihanune coina- jaiti nejanoaenihanune jana canu janijiin canu raain nelu Cana Coaunera, jataain canu belaitohane jaun. <sup>16</sup> Nii jaunte, inae nitohaneein jerihalune jaan que inae tihane jaun, canu que rai Calaohi coitucuerate, coreniha osa caje nichoteeururichaaain cacheaaurune beebejihanu Jorioniheichuru raine coina. Coatihaa nii chuni aina ereein aihaaunlu. <sup>17</sup> Coatihachu, Jerosaleeun nii canu ajiniha Jesocurisito letono afosoto neein nenacaauru coaraain acaauru rai irihanune coina cuhaaunlu. Nitohana coacuelanaalane jauriaanejeein Arabia batane cuhin- nii baiha Damasocoo cauha uunlu.

<sup>18</sup> Nii baiha nichata jaanacaain catiaainne Jerosaleeun cuunlu, ecu Fedoro coaraain coitucuhanune coina. Ecuna aina neeunlu lechoonca saogui janohin. <sup>19</sup> Nena laen, leeochoaauru afosotooru coaraeneeunlu, acaihaniji cana Curuaanaa Jesocurisito ocoala Saantiaaochane coaraaunlu. Ecu, niheilu nii baiha chuni. <sup>20</sup> Cana Coaunera notaracaene esinae rauhijiriin nohanelanaala aitiin caa laenaan inara rai.

<sup>21</sup> Nii baihane Siria, Silisia, naaonjoaiunru batanecuru cuunlu. <sup>22</sup> Nete, jaiti raajenihane canu coitucuurenlu Jodea nenacaauru- Jesocurisito ranojoneein nenacaauru iclesiacuru. <sup>23-24</sup> Raujiaainchate: “Taolu jauriaa cana que nejerateein cana rerohecaain cana itajenaa jerera jetaote, inae enene amuhemujueein caa canacha esenetai erenaa que cacheaauru relae,” naain canu benaa coitucuhin, canu coreniha Cana Coaunera coroaecurelu.

## 2

*Afosoto niha Faborone esenetaauruha leeochoaauru afosotoorune*

<sup>1</sup> Lechoonca jena jaanacaain nii baiha catiaainne, nacoaauneein Jerosaleeun cuhacaanulu Berenabeen aina. Chaen nechu canu jiniichaaain Tito netonai amaaunlu.

<sup>2</sup> Nitohaneein cuhanune jeriha Cana Coaunerane jaunne ucuaae cuunlu. Inae turuhinne, ecu nenacaauru Jesocurisito ranojoihunru coaraneein nenacaauru aina nejesinajeein ita taojiaain, “Naaonjoaainne Jorioniheichuru rai ichoteratenojoinichaachene que erenaa beebejeeun,” naai beeun acaauru rai, nabana joareein cachaauru relaa canu beein baasoneein caetena coaacuruhane coataa. <sup>3</sup> Nete, ecu niha canu aina Tito- Curiecocuru caje nenaanihane saijieein, jaberoco macohi cari saeratihane coina aitocurene saain nii ecu canu aonajeeureraauru. <sup>4</sup> Nii janate, nechu joaenreein acaneein nelanaala Jesocurisito coreniha cana nejeraauru niha nocoetonacaauru- canacaanu que nasiin turuure nechu esinae rauhijiriin- Moisesa rai Cana Coauneraacha tei rauhi tonoraelanaala Jesocurisito aitoonjoaacha tonoraacaanune coaracuruhane coina. <sup>5</sup> Nena nii aansijiiniji acaauru ere tonorana jerenihacaanu, nabana inae inara relaacaanune saijieein nii inara relaacaanune jaan jianein acaauru esenetaichene jerenihacaanune jaun.

<sup>6</sup> Nii iclesianeein nenacaauru curuaanaa neein coitucuno- joineein nenacaauru, coatiha nii canuhacha beebejei baiha cuaain cha beeuruhi. Nete leeochoauru curuaanaa neeu- ruhane niha natiin, canu curuaanaa neeurene, namute cacha rai chanein niha cachane niha natiin leeocheenein coaraeniha Cana Coaunerane jaun. <sup>7</sup> Nitohanein canu relanaa coacuelanaalate, Cana Coaunera, Jorioocuru rene cuhin acaauru relaa Fedorone coina letoaalune rijijieein, Aca, Jorioniheichuru rene cuhin, acaauru netonai osa caje ichoteratenojoinneein neeururichaaine beebejihanune coina canu letoaane que inae nainacure. <sup>8</sup> Nitohaneinte, nii jeelai Cana Coaunera, afosoto neein Fedoro cocoinaain Jorioocuru rene letoaera- afosoto neein canu netonai cocoinaain canu letoaelu Jorioniheichuru rene.

<sup>9</sup> Nii jaunte, nitohanein inae Cana Coaunera, nii canu rai amihanenaa tihane esenetaauruhane jaun, acaauru amihaneeo que acaauru coroatajanera neein Berenabeen aina canacaanu raauruhane coaratihana, satiin notaracae canacaanu belaa raotojoein canacaanu raaure, nii ecu nenacaauru rai jataain leeochoauru amurijiriin nelateineein acaauru coaraneein nenacaauru, Saantiaao, Fedoro, Joaan, naaonjoainuri. Nitohanein canacaanu raainte, Jorioocuru aina neein acaauru relaauruhane tonohanau canacaanu netonai Jorioniheichuru rene cuhin acaauru relaacaanune jere- cure. <sup>10</sup> Raujiaainchate laen inae jauriaalu caje coauneein coaaucaunlune rijijieein, cairicheihuru coacuhin acaauru coroatajanichaanu chaelai quene coina canacaanu rai aitocurelu.

*Antioquihau Fedoro suujuatiha Faboro ne*

<sup>11</sup> Nena laen, Antioquihau nihanune jana canu rene turuha uha Fedorone bana, rai nacatiha neein aitoonlu raujiaain baaso neein ichaane jaun, <sup>12</sup> jauriaanejeein Jorioniheichuru aina lenoneein naaonjoaane saijieein inae ecu turuuruha Saantiaao laurichuru- Jorioneein nenacaurune jana inae nii Jorioniheichuru caje nelerue Fedoro, nii ena turunaa jaberoco cari macohi molorera coasihane jaun. <sup>13</sup> Nii jaunte nitohaneein baasoneein ichaa Fedorone rijijieein ichacure leochaauru Jesocurisito esenetaeraauru Jorioocuru, Berenabeen netonaine maajeein. <sup>14</sup> Nii jaunne, nitohaneein esinae rauhijiriin naaonjoaain osa caje ichoteratenojieein nerichaacheeine que cana relaalu Jesocurisitone rijijieein ichacurenihane coaracaanne jaun, satiin ecu Jesocurisito esenetaeraneein nenacauru acatiha nii Fedoro teteriin: “Chanuna jataain baaso ichaai Jorioniheichuru rerohecaain, Jorioneein nihacachene ichao rijijieein ichaauruhane coina. Ii Jorioneein, inae acaauru ichao rijijieein jauriaa ichaohilune saijieein,” naain rai aitoonlu.

*Esenetaauruhane corenihachate Jorioniheichuru aina jini-  
iquii osa caje nichoteeurureein Jorioocuru*

<sup>15</sup> Canate cana foerateracuru caje coauneein Jorioneein nihacache. Coatiha leochaauru cachaaauru, nechu Cana Coaunera coitucuelanaala neein osa que nesarujueein nenacauru rijijieein nihaacache. <sup>16</sup> Nete laen, nii Moisesa rai Cana Coaunera tenojoi ichaonaa rai rauhi tonoraa cachane niha natiin, itolere niicha ichai ujuaihonihaane caje nichotena nainenihane coitucuhacache raotojoein. Jesocurisito esenetaa cachanete laen, itolere niicha ichai ujuaihoneein nihane caje ichoteratenojieein nereein. Nitohaneein nii Moisesa rai Cana Coaunera tenojoi- rauhi esenetaain tonoraain niha cachane nihanatiin, itolere niicha ichai ujuaihoneein nihane caje nichotena nainenihane cachane jaunejian, canacaanu netonai Jesocurisito esenetaacaanu.

<sup>17</sup> Nitohaneein itolere canaacha ichai ujuaihoneein nena caje cana ichoteratiha Jesocurisitone jaanna, osa que nesaruhin nihacache. Aihei, coatiha Jesocurisito esenetaacachene osa que nesaruha aihaacache. <sup>18</sup> Inae nii Moisesa rai Cana Coaunera tenojoi rauhi jianichaaunne saijieein, nacoauneein rijijieein nena jerichaaunena laen osa que nesaruha aicheeun. <sup>19</sup> Esinae rauhijiriin, Cana Coaunera tenojoi ichaonaa que ichaohanune coinane Moisesa rai jauriaa niicha teilu rauhi tonoraain ichaohanune jianeunlu. <sup>20</sup> Nitohaneainte coroso que ohin, itolere baaso ichajeein

ichaohanune jaan itajeein canu ichao coreein, canu suujueniha rai Suujue te Jesocurisito. Aihana jaun, jataain canu belaitohane jaun, canu coreniha ohalu Cana Coaunera Calaohi Jesocurisitone esenetaanune jaunne, acaacha que jaeequiin ichaaon. <sup>21</sup> Coatiha canu belaihane jaun, canu rai Cana Coauneraacha tei ichaonaa que jaoleconaa nainihaaun. Nitohaneein itolere canaacha ichai ujuaihoneein nenea caje cana ichoteraneein niha nii Moisesa tenojoi rauhine chujianra, inacojoein cana coreniha orelu Jesocurisitona.

### 3

*Moisesa rai rauhi aina canaacha esenetai.*

<sup>1</sup> Galasia cocoaichacuru- aansocuru. Cha inara suujua auhacaain inara ichao core, cha coitucuhi rijijieein ichao-hichene coina. Nii coataane niqui, esinae rauhijiriin cana coreniha Coroso que ohalu Jesocurisitone coitucueratein, inara que coarateein inara relaacaanulu. <sup>2</sup> Raujiaain canu tonoraaichene coinane, inara caje bajareeunni: Moisesa rai rauhi tonoraaichene jaunna, inara rai Suujue tein nihalu Cana Coaunera. Tana, nii inara relaacaanune esenetaaichene jaun inara rai Suujue tihalu Cana Coaunerane coitucuhichene. <sup>3</sup> Jataainachura cha coitucuhi rijijieein neeiche, inae acaihaniji que Cana Coaunera Suujue raaichelune saijieein, jerecuruha cachaaaurune rijijieein ichaohin nichotena coaauquichene coinane. <sup>4</sup> Jataainachura inacojoein, nii caohacha- inaraacha esenetai jianeriquiche caohacha naineeinte. Aihei jerihane. Coatiha inacojoein nihei. <sup>5</sup> Nii inara rai Suujue tein cojoelanaacojoai ichaa Cana Coaunerane, coatiha nii Moisesa rai rauhi tonoraaichene jaun ichaai. Inae nii inara relaacaanune jaan aonaain esenetaaichene jaunte ichae Cana Coaunera.

<sup>6</sup> Coaracuchenachuhinti, rai aitoha Cana Coaunerane esenetaain queecha jaecoha Abaraaunne jaun, nii esenetaane corenihacha niicha ichai ujuaiho nelanaala tein raa Cana Coaunerane. <sup>7</sup> Aihane jaun, satiin Cana Coaunera esenetaain que jaeequiin nenacaauru, Abaraaun nefoerate esine neein neeururichaaine coitucuhin neeuche. <sup>8</sup> Inoaelu jaiti turueniha Jesocurisitone ajiniha caje coauneein, nitohaneein Jorioniheichuru netonai, itolere niicha ichai ujuaihoneein neeuruhane caje niicha ichai ujuaiho nelanaala tenajarichaaine jaunte: “Satiin caa chauratane sacutaain nenacaauru cachaaaurune ii aina cuaain rausiaereeunicha,” naain Abaraaun rai been, nii caohati erenaa raotono laenaeratelu Moisesa que rai Quiricha Inoaensi cuhane Cana Coaunera. <sup>9</sup> Aihana jaunte, nii esenetaalu Abaraaun ne rijijieein esenetaerate rausiaereein Cana Coaunera.



<sup>10</sup> Nitohanihana jaunte, nii Moisesa rai rauhi tonoraain ichaoha cachane nihanatiin caseteco coaraa cureein, “Caseteco coaraate cureein, jitaain caa rauhi laenanohi tonoraelanaala nenea,” naain been laenaratihalu Moisesa que Cana Coaunera jaun. <sup>11</sup> Nitohanihane jaunte, rauhijiriin nii Moisesa rai rauhi tonoraain ichaoha cachane coreniha coatih caohacha ichaeraneein tein rarinaain Cana Coaunera. “Jesocurisito esenetaain queecha jaequuin nenaate caohacha ichaeraneein tein rareein Cana Coaunera,” naain laenanohineein nihane rijijieein. <sup>12</sup> Nete laen, nii Moisesa rai rauhi, raujiaain esenetaa cachane coreniha ichoteratihane coina aitelanaala: “Esinae rauhijiriin aitoaha nii rauhine rijijieein, leinjiin niji cautijiaelanaala tonoraerate ichaoreein,” naain laenanohineein ne. <sup>13</sup> Nitohaneente, cana cairichaeranu que niha nii rauhine jana, caje cana ichoteratihane coina leinjiin osaaona rijijieein cana osa coreniha ohelu Jesocurisito. Nii quete: “Niicha ichai ujuaihonnein nenaasain enuha que ucuun tein atinanohi cache,” naain Cana Coaunera Quiricha cuhane laenanohineein ne. <sup>14</sup> Nitohaneente ichaelu Cana Coaunera, satiin cachaauru rausiaecane coina, Abaraaun rai aitohalune rijijieein, Jesocurisito aina cuaain Jorioniheichuru netonai rausiajeein, nii esenetaain queecha jaecohacachene, nii naitoonjoan rai Suujue tiha cana raine coina.

*Moisesa rai rauhi aina, cana rai tihane coina Cana Coaunera aitoonjoan.*

<sup>15</sup> Aonacuchene inara rai, joenreein cache rijijieein inara rai aitete coitucuhichera canejeraauru. Leinjiin cache, chaelai ichaane coina aitiin laenaain, ecu tein curuaa laenaa ne. Nihei nii niicha laenai jochin, niheichu nii niicha laenai jaonaa nainihe chuni. <sup>16</sup> Nii rijijieente, Abaraaun aina rai nefoerate, naaonjoain rai, esinae rauhijiriin niicha teenu tihane coina aitelu Cana Coaunera. Coatih: “Nefoerateeuru,” naain laenanohinihei Cana Coaunera Quiricha cuhane. Nitohanein arajii que aitelanaalate leinjiincha que: “Ti nefoerate,” naain laenanohineein ne. Jesocurisito quete nii aite. <sup>17</sup> Naaonjaain quene inara rai caa aitoon; Cana Coaunerate, Abaraaun aina cuaain cana rai niicha teeni tihane coina esinae rauhijiriin nohanelanaala aitelu. Inae jauriaaneejin Abaraaun rai besihalune baiha jena fasha jaanacanein catiaainte nenea ne nii Moisesa rai rauhi. Nii jaunte, nii ichoaichaniha Abaraaun rai aitosihalune jaan itajenaa nainene Cana Coaunera. <sup>18</sup> Nii Moisesa rai rauhi aina cuaain nii Abaraaun rai niicha benatei tiha Cana Coaunerane, coatih chaque nelateriheii nii cana rai niicha benatei. Nete

niha Moisesane ajiniha Abaraaun aina cuaain cana rai ni-  
 icha teenu tiha core colanene coinata aitelu Cana Coaunera.  
<sup>19</sup> Aihana jaun chaque nelate nii Moisesa rai rauhi. Acate, tu-  
 ruha nii nefoeratenaa- nii Abaraaun rai naitoonjoane reeinti-  
 aain, esinae rauhijiriin tonoraain ichaoreniha cachaaaurune  
 coaratihane coina tenojoinnein nelu. Rai letono aanjera  
 quete nii rauhi teratelu Cana Coaunera. Jana Moisesate  
 cachaauru rai beraneen nelu. <sup>20</sup> Nete laen, bera colane raa-  
 jenihane nii niicha teenu que aitelu- leinjiin acaacha neein  
 nena Cana Coaunera.

*Naaonjoaain coinata nelu nii rauhi.*

<sup>21</sup> Cana Coauneraacha ichanenu aina ita rijijieein niha nii  
 Moisesa rai rauhina jaunna nii niritiin niha. Aihei, coatiha  
 ita rijijihai. Nii rauhi, cana rai ichaonaa teranihanechujianra,  
 satiin nii rauhi tonoraain nena, itolere canaacha ichai ujuai-  
 honeein nena caje nichoteein nerichaachena. <sup>22</sup> Nete, Cana  
 Coaunera Quiricha aina cuaain, satiin nii Moisesa rai rauhi  
 tonoraain nenihacachene coreniha osaaonaneen nihacach-  
 ene coitucuhacache. Nitohaneen coitucuhin, Jesocurisito  
 esenetaacachenete, inae nii Cana Coauneraacha teenu ranaa  
 nainerichaacheein.

<sup>23</sup> Nii jaunte, jaiti turueniha nii canaacha esenetai  
 jaeconaanajane jana, caseteco coaracaachene coina  
 mucuhineein cana sirilu nii Moisesa rai rauhi, turuha  
 nii canaacha esenetaine reentiaaajoaain. <sup>24</sup> Nii Moisesa  
 rai rauhite, canaanaihuru amaa beraichane rijijieein,  
 Jesocurisito rai cana amaeraneen nelu, nii Jesocurisito  
 esenetaacachene, itolere canaacha ichai ujuaihoneein  
 nena caje ichoteratenohineein nihacachene coina. <sup>25</sup> Nii  
 jaunte laen ena, inae turuha nii jaecohacachene jaan  
 canaacha esenetaine jaun, cana beraichaneen niha nii  
 rauhine caje mituhacache. <sup>26</sup> Nitohaneen inae Jesocurisito  
 esenetaaichene jaunte, satiin inara, Cana Coaunera  
 calaohi rijijieein neeiche. <sup>27</sup> Inae nii esenetaaichene aina  
 cuaainte baotisaain coujunacatenohineein Jesocurisito aina  
 neeichene, niicha tei ichaonaa que ichaohiche. <sup>28</sup> Aihana  
 jaun, Jorioneen, Curieconein, letononein, nirijieein  
 letononelanaala, quichaauru, enecuru, naaonjoaaineen  
 neeichene nihanatiin, inae nihei nii que cha. Inae  
 Jesocurisito aina jiniiquiin neeichene jaunte, lelaurijiei  
 caje ranojoinnein nena rijijieein neeiche. <sup>29</sup> Nii jaunte,  
 Jesocurisito esenetaeraneen neeichene jaun, Abaraaun  
 nefoerateneen, nii rai tihane coina Cana Coaunera  
 aitoonjoalu raeraneen neeiche.

## 4

1-2 Naaonjoaane jaunne caa inara rai aitoon. Jaiti canaanainiha nii itolere rai inaca rucuhele eroraneein neeninete, jerichanejeein letono rijijieein ne, esinae rauhijiriin satiin nii rucuhele erora nihane saiijieein, jaiti canaanai nihane jaun. Nitohaneeeinte leecha cacha que beraichaaain ne jinaa tiha inacane jaan que tihane reeintiaain. <sup>3</sup> Nii rijijieein techu, jaiti turueniha Jesocurisitone bana, nechu cana itajeranuneein caa chauratane que nena que beraichaaain nihacachelu. <sup>4</sup> Nete, inae nitohanihane coina jinaa tihalune jaan que inae turuhane jaun, rai Calaohi letoaelu Cana Coaunera, cachaneein leinjiin ene caje nejanoaane coina. Acaachate cana amute cachaneein nii Moisesa tenojoi rauhi tonoraera rijijieein ichoaelu. <sup>5</sup> Nii corenihate cana cairichaeraneein niha nii rauhine caje cana rocohin nelu, rai calaohineein cana teein cana raa Cana Coaunerane coina. <sup>6</sup> Nii jaunte, inae esinae rauhijiriin rai calaohi nihacachene coaratiha rai Calaohi Suujue te cana suujueniha Cana Coaunera. Nii rai Suujuete cana suujueniha neein: "Ofa," naain Cana Coaunera bajae. <sup>7</sup> Aihane jaun inae ii, nii rauhi tonoraeraneein niheeli. Iite, inae Cana Coaunera calaohineein neei. Nitohaneein rai calaohineeine jaunte, Aca jerihane rijijieein, ii que banijiaineein nena raeraneein neriquiin.

*Jesocurisito esenetaeraauru que suujuaa Faborone*

<sup>8</sup> Jaiti, Cana Coaunera coitucuelanaala neeichene banate, cha nelanaala nena- cana coaunera niha nocoetonacaauru letononeein nerejetocoichelu. <sup>9</sup> Nete laen, inae enene Cana Coaunera coitucuhichene jaun, inara coitucue Cana Coaunera. Aihana jaun, chanuna coaiten nacoaauneein nii chaque nelatiheichuru- cairicheineein nenacaauru tonoraain letononeein nena jeriquiche. <sup>10</sup> Nitohaneein neeichene jaunte, nii enanetojoein jauriaa aichejetocoichelune rijijieein, atenecuru, cojoinacaauru, ajaanaacuru, naaonjoaai-hunri cojoinaca que turuhane inara rai chosichuru coroa-jeein bitoaache. <sup>11</sup> Nii jaunne jataain casihun, cacoichana aina cutaain inara relaanulune saiijieein nitohaneein neeichene jaun.

<sup>12</sup> Canejerauru, canu Jorionichaaunne jaunne niqii nii taolu inoaelu nena rauhi tonoraain ichaorejetoonlu. Nena inae enene nii jauriaa nii rauhi tonoraelanaala ichaorejetocoichene rijijieein inae enene ichaaon. Aihana jaun nacoauneein nii rauhi colane inoaelu ichaohichelune rijijieein ichaaache.

Nii jauriaanejeein inara relaanulune bana coatiha canu que jaoleconaa coaauheechelu. <sup>13</sup> Nenacaaentejia cunaitichaaunne saijieein jauriaanejeein inara rai ichoteratenojooineein neriquicheeine beebejihanune bana, jataain rachoojoeein canu corojeein canu raaichelu canu coiintena coacuelanaala. <sup>14</sup> Nii cunaitichaaunlune banate, esinae rauhijiriin, nii canu cunai coreniha canu que jaolequelanaala, niheichu canu coiintelanaala, naaonjoaain leinjiin Cana Coaunera letono- anjera aina Jesocurisito raera rijijieein canu raaichelu. <sup>15</sup> Chanuna jana chaen, inae enene nii aaichelune rijijieein rachoojoeein nenea naineneeiche. Esinaete chuhisi niqui, nii cunaitichaaunne jana rachoojoeena caaun roconacainiha inara notane jana nihane, inara nota rocohin teriquichelu canu rai. <sup>16</sup> Nitohanihane saijieein rauhijiriin nohanelanaala inara rai aitocoaune jaaunna inara que nejeratenaa nichaaun.

<sup>17</sup> Nii cachaaurute niqui jataain inara aina nenea jerecure. Nete, caohachaain inara tenaa jerenacaaun aihurene. Nechu canacaanu que jaolequiin, acaauruhacha tonoraain neeichene cointate aihure. <sup>18</sup> Esinaetechuhisi niqui caohachae, leeochoaauru cachaauru rai caohacha ichacaane coina coaaucaane. Aiha esinaen rauhijiriin acaauru rai nelatenenu nihane. Nete itolere bana coacuelanaala, inara aina nihanuneecha que coaacuruhane nelatene. <sup>19</sup> Cacalabi rijijieein neiniquichene corenihane, jataain coacuhin cunaiteeun. Charijieein teeinti, canaanai janoanaa jerihane cunae rai neba, nii rijijieeine inara coreniha cunaiteeun. Niri-jieeine, itolere bana cunaiteeriin nereeuni, esinae rauhijiriin jeriha Jesocurisitone rijijieein neeichene reeintiaaajoaain. <sup>20</sup> Bajiaana chuhinti ena inara aina neneeun, canu raajenhane inara rai leeochaneein raotojoeein aitocoaunne coina. Nena inara caje coriaae nihanune jaun inara aina cha chana coitucueeneun.

### *Acara aina Sara*

<sup>21</sup> Inara, Moisesa tenojoi- rauhi tonoraain nenea jeraauru, canu rai aitocoichenena jereeun. Tana esinae rauhijiriin, aitohalu nii Moisesa rai rauhine aohanraneein neeichene. <sup>22</sup> Aonacuche: “Coroatajaainte canaanai sirilu Abaraaun. Leinjiin rai calaohite sirilu rai coseenra neein nenea Acara aina. Jana, nii leeocho rai calaohi coroatajate sirilu rai comasai esine neein nenea Sara aina,” naain aitohane coitucuhichene. <sup>23</sup> Nii jaunte, nii rai coseenra aina Abaraauncha sirii- rai calaohi cachanichaachene ichao rijijieein nihane coina nejanoaelu. Nete laen, nii rai comasai esine- Sara aina niicha sirii- rai calaohi, rai aitosihalu Cana Coaunerane jaan nainaane coina nelu. <sup>24</sup> Naaonjoaane

jaunte nii nitohane, nii coroatajai Abaraaun comasaichurute, coroatajaain cana aina niicha ichanenenu ichaa Cana Coaunerane coujunacaneein neeure. Nii Acarte Sinaai bichataneu, Moisesa rai ajeri caje nenea- tabara que teein laenanhineein nenea- rauhi tihalu Cana Coaunerane coujunaca ne. Nii rauhi tonorana nainelanaala neenihurute nii coina nejanoaain neeure. <sup>25</sup> Nitohaneeinte, nii Arabia nenea- Sinaai bichataneu Moisesa ranojoi rauhi tonoraeraneein, Jerosaleen cocoaichaneein nenacaauru foeratera ne Acara. <sup>26</sup> Nete laen cana, nii Jerosaleen cana que baniha- teein coaunanojoi cocoaichaneein nihacachene coina, nii comasai esine Sara aina Abaraauncha sirii nefoerateneein nejanoaain nihacachelune jaun, rai calaohi esineneein niha- cache. <sup>27</sup> Nii quete:

“Rachoojoein neeu canaanai sirina inaelanaala nenea ene, cojioriin rachoojoeu chabana canaanai sirineeine saijieein.

Jaoleneein neeinne nihanatiin, lanaaona amurijiriin arajiin canaanai siririquiine jaun,” naain laenanohi ne.

<sup>28</sup> Canejeraauru, ichaane coina aitohalu Cana Coaunera, Abaraaun raine rijijieeinte nenaanelu Isaca. Nii rijijieeinte inara netonai nenaaneei neeiche. <sup>29</sup> Nii bana cachanichaachene ichao rijijieein Acara aina Abaraauncha sirii rai calaohite nii Cana Coaunera Suujue ichanohineein nejanoanaa Isaca ichao rerohecaelu. Nii rijijieein techu enanetojoein inara netonai rerohecaaure nii Cana Coaunera Suujue ichanohinelanaala nenacaauru cachaauru. <sup>30</sup> Nete nii que: “Nii rai calaohi aina, nii ii coseenra sitaaute amuhine. Coatihai nainihe, nii ii comasai esine aina iicha sirii- ii calaohi aina, nii ii rucuhele eroraneein nihane,” naain laenanohineein ne Cana Coaunera Quiricha cuhane. <sup>31</sup> Aihana jaun, coatihai nii coseenraneein nenea nefoerateneein nihaacache. Nii comasai esineneein nenea nefoerateneeinte nihacachera canejeraauru.

## 5

*Inae Moisesa tenojoi rauhi caje jianacoon nihacache.*

<sup>1</sup> Jesocurisitote, Moisesa tenojoi rauhi coreniha caseteco coaracaachene rai nenea caje cana rocohin nihane jaun, inae raotojoein jianacoon nihacache. Aihana jaun, nainiheiche nacoauneein nii Moisesa tenojoi rauhi tonoraain nenacaauru aina acaauruhacha ichai ichaain nihache.

<sup>2</sup> Canu Faboro nichaaunne aonacuchena, inara rai aitete aonaquiche. Aitocuruha Jorioocurune rijijieein nii Moisesa rai ruhini tonoraain inara jaberoco macohi cari saerateichene, coatihai inara rai cha que nelateein nerinaain jianacoon neeichene coina Jesocurisito esenetaaichene jaan. <sup>3</sup> Coaiten

nacoauneeine aitoon. Chunocoha Jesocurisito cachaneein nena Moisesa tenojoi rauhi caje ichoteratenojineein ni-halune saijieein nacoauneein nii rauhi tonoraane coina rai jaberoco cari saerateein nenaate leinjiiniji cautijiaelanaala nii Moisesa rai rauhi tonoraanete ne. <sup>4</sup> Inara, inae jauriaa jeriha Jesocurisitone rijijieein ichaohichene coina esenetaaichene saijieeinte, ena Moisesa rai rauhicha tonoraain nena jeriquiche, Jesocurisito aina inara belaiha Cana Coaunerane jaan que jaolequiin. <sup>5</sup> Nete laen cana, rai Suujue cana rai ni-icha tei aina cuaain esenetaacachene jaun, itolere canaacha ichai ujuaihonneein nena caje nichoterichaacheeinne que jaequiin cohajihacache. <sup>6</sup> Aihana jaun, Jesocurisito aina jiniiquiin nihacachene, inae nelatihei cana jaberoco macohi cari saeratihacachene. Esenetaain queecha jaequiin nihacachenete laen nelate, nii esenetaain nihacachene aina cuaain ita belaaichacachene coina icharihanine jaun.

<sup>7</sup> Inarate niqui inae esenetaain queecha jaequiin neeichelu. Chariji cache inara coritaane jaun, nii inaraacha esenetai tonoraain neeichene jianequiche. <sup>8</sup> Tana Cana Coaunera jerihane jaun inara cotijiaain nihalune coitucuhichene. <sup>9</sup> Nete, “Aansijiin coerati que rai coliha jasiitihacanete, jitaain nii rai coliha ichonai coeralae,” naain nihane coitucuhiche. Nii rijijieeinte leinjiin cache inara ichao auhacaain aasaeraneein ne. <sup>10</sup> Nena canu, leochaneein inara suujua cuaaichene coataa, inara coroatajanerichaaain cana Curuaanaa Jesocurisitone esenetaaun. Nete laen, nii joenreein inara suujua auhacaera cache casetecareein Cana Coaunera. Coatiha chunocoha aihane nihanatiin que Suujua acatena nainerinaain.

<sup>11</sup> Canejeraauru, jauriaa aihanulune rijijieein enanetojoein rai jaberoco macohi saerateeuruha satiin Jesocurisito esenetaeraaurune coina acaauru conujichaaunne, coatiha canu cairichaaaururihei Jorioocuru. Nitohaneein jerecuruhane rijijieein nii Jesocurisito beratenojoi beebijihanune acaauru baijiaenerichaaunne jaun. <sup>12</sup> Nete, raajenihane jitariin rai jaberoco molohin jaaoruha nii inara suujua rerohecaeraaurune caohachae.

<sup>13</sup> Canejeraauru, inarate cha ujuaihonelanaala jianacoon raotojoein neeichene coina, cotijiaain ranojineein neeichelu. Nete, inae cha ujuaihonelanaala neeichene jaun, naineneeiche inara suujua letono rijijieein cha ichaain neeichene. Nenacaantejia caohachae nii amuritoheriin, ita belaaichacachene, cha lateein niha leochane coroatajaneein, naajoaain neeichene. <sup>14</sup> Satiin nii rauhi aitoonjoan cajete leinjiincha neeje. Acate: “Chamute cache belaaichacachae, ii raajenihane ii jaberoco belaaichacachae,” nae. <sup>15</sup> Aihane jaun, nii que

necohalajiin neeuche. Jana necohalajilanaala nejesinajeein ita aina obaaejeriin, ita cotaairiin, naaonjoaain neeichenete inara raajenenihane nitajeriquicheein.

*Joarenreein cache ichao aina, Cana Coaunera Suujue tenojoi ichaonaa*

<sup>16</sup> Nii jaaua inara rai aitoon, jeriquichene rijijieein baasohacha que coacuhin ichoaelanaala, jeriha Cana Coaunera Suujuene rijijieein coacuhin ichaohichene coina. <sup>17</sup> Nii cana suujua cuhane baaso canaacha coacuite, cana aina Cana Coaunera Suujue ichanenu caohateraneein ne. Nii rijijieein techu nii cana suujua, Cana Coaunera Suujue que nejeratenaaneein ne. Nii corenihate inaraacha ichana jerei ichana naineneeiche. <sup>18</sup> Nete esinae rauhijiriin, inaraacha ichanenu ichaquichene coina inara rai beraneein niha Cana Coaunera Suujuene, inae nii Moisesa tenojoi rauhi rijijieein cha ichaquichene jianeriquicheein.

<sup>19</sup> Caaintiaai, “Acaauru acaaurute, jeriha suujuane rijijieein baaso ichajeein ichaore,” naain coitucuhacane. Nitohaneein ichaonacaurute, sinijeranelaanaala nenaane que ichaojeraquuin, rai chosi rai niicha teuri iniho que lenoneein, naaonjoaaurne. <sup>20</sup> Chaen techu, acaauru chosichuru corojeein, benaneneein, ita coiinteein, ita coana jerelanaala, ita que necoelajaauharitiin, enaacha obajeein, ita amurijiriin nena coacuhin, ita caje neleruhin, acaauruhacha coaucuruhane rijijieein neeuruha leeochoaurune jereein, <sup>21</sup> ajetoritiin, achotoritiin, naajoaain neeuruhane cajete enaacha nitohaneein ichaonacauru cacheauru coitucuhaca. Nacoauneeinne inararai aitoreeunni, que nainaan ichaohichene coina. Nitohaneein ichaonacauru, coatiha Cana Coaunera Cojoanonaa que ichaonaa nainecuruhi.

<sup>22-23</sup> Nete laen Cana Coaunera Suujue tenojoi ichaonaa, ita belaaain, rachoojoein, raotojoei ichaonaa que ichaohin, cha abaantaain, cana rai chaelai que cainaane latelanaala cache rai cha teein, nii cana ichao corenaa coacuelanaala, leeochoauru amurijiriin nena coacuelanaala, cana suujua letono tonoraelanaala nihacachene coina, naaonjoaain nihacachene jaanu teraneein ne. Coatih nihei nii chuni rauhi nitohaneein ichaohacachene caohatera. <sup>24</sup> Nitohanihane jaunte, Jesocurisito ranojoiineein nenacauru, inae coroso que teein itajera rijijieein, itolere rai nichao rijijieein ichaohin neosateein necairichanaa, rai suujua baaso, naaonjoaihunri itajeein inae ichoae. <sup>25</sup> Nii jaun, inae ena Cana Coaunera Suujue aina ichaohacachene jaun, coanete jeriha Cana Coaunera Suujuene rijijieein ichaohacache.

<sup>26</sup> Aihane jaun, necohasitaain, ita amuritonaa coacuhin, itaque necoelaain, naaonjoaain nenea nainihaacache.

## 6

### *Le cachanequichene ita coroatajanecuche.*

<sup>1</sup> Canejeraauru, osa que nesaruha chunocohane coaraqichene, inae inara Cana Coaunera Suujue que suujuecohichene jaun, rai aitocuchete raajenihane baaso ichaane coitucuhin rai suujua coaraain ichaohine. Nete inara netonai, nitohaneein coujunojoneein neeichene coataa que necohalajiin jataain belaaain rai aitocoichene caohachae. <sup>2</sup> Nejesinajeein itolere que ita coroatajaneein neeichenete, esinae rauhijiriin jeriha Jesocurisitone rijijieein ichaoriquicheein. <sup>3</sup> Jana chunocoha, chanelanaala nihane saijieein leeochoauru amurijiriin nenea coaucanete raajenihane necoritareein. <sup>4</sup> Nii jaunte caohachae, le cachaauru baaso ichaelanaala caohacha ichaane coitucuhin, raotojoeein rachoojoein nihane caohachae. Nete laen, leeochoauru baaso ichacuruhane coaraain, acaauru que necohasitaain rachoojoein nihane caohachaene. <sup>5</sup> Aihana jaun, le cachaaurute naine itolere niicha ichai coitucuhin rai suujua coaraain ichaane caohachae.

<sup>6</sup> Ena Nenea Cana Coaunera Ere que relanojoneein nihane, nii relaera coroatajanemiin itolere niicha sirii que.

<sup>7</sup> Jjaonriha inara raajenihane necoritaachene. Chateeinti baaso ichae, niite baaso raeraneein nereein. Jana caohacha ichaerate caohacha raeraneein nereein. <sup>8</sup> Nitohanihana jaunte, chunocoha rai suujua letono baasohacha ichajeein ichaonaa itajereein nii baaso- rai suujua cuhane coacuhin niicha ichai. Nete laen, chunocoha jeriha Cana Coaunera Suujuene rijijieein itolere caohacha nejesina ichajeein ichaohane, nii caohacha- rai suujua cuhane coacuhin caohacha niicha ichaite chabana sanaacharanejeein nenea ichaonaa que tereein. <sup>9</sup> Aihana jaun, caohacha ichacaachene coiinteein jianena nainihaacache, inae cojoanonaa que turuhane bana cana rai cainanohinerichaain nii canaacha ichaine jaun. <sup>10</sup> Nii jaunte, satiin rai, nainichaachene jaan que leeochoauru belaaain coroatajaneein nihacachenete caohachae. Chaen jeelai amuritoheriin nii canaacha esenetai coreniha cana nejeraneein nenacaauru coroatajaneein nihacachenete caohachae.

### *Acaauru suujuateein acaauru rai necoiha Faborone*

<sup>11</sup> Enane laen, canu raajenihane canu biji que caa quiricha laenaan. Nii jaunte, tabanae caa canuhacha laenai. <sup>12</sup> Nii



inara jaberoco macohi cari molohichene coina inara rerohe-caeraaurute, nechü rai lauri aina caohachaaïn nena jer-enacaaun aitocure. Nabana Jesocurisito esenetaeraneein neeuruhane coitucuhin acaauru sooruhane coataa acaauru coasiha. <sup>13</sup> Nete, acaauru jaberoco macohi cari moloerateein neeuruhane nihanatiin, satiin aitoha nii Moisesa tenojoi rauhine rijijieein tonorana nainecurene. Chaen techu, inara netonai inara jabereco macohi moloerateeichene, inae coujunaca siriha inara jaberocone que necohasitaauruhane coina nii inara rerohecaaaure. <sup>14</sup> Nena laen canu, joareein coreniha necohasitanaa naineneeun. Canu coreniha coroso que ohalu Jesocurisitone corenihachane naineeun acaacha coasitaanune. Nitohanein, canu coreniha coroso que ohalu Jesocurisitone jaun, coitucuelanaala ichaonacaauru cachaauru ichao rijijieein ichaonaa nainihaaun. Nihe-ichu Cana Coanera coitucuhichuru nihanatiin, canu arinaa nainecuruhi acaauru rijijieein ichaohanune coina. <sup>15</sup> Coatiha chaque nelatihei, cana jaberoco macohi cari moloerateein, moloeratelanaala, naaonjoain ichaohacane. Jesocurisito esenetaacachene jaunte, ena coaunanojoi nihacache. Niite jataain nelate.

<sup>16</sup> Satiin caitoonjoan tonorain ichaonacaauru cairichaa-joain coaramii Cana Coanera, raotojoein neeuruhane coina, satiin Cana Coanera cacha esineeuru aina jiniiquiin.

<sup>17</sup> Ena caje coaunein, inae nenacaaen canu cairichaer-ateichene jerinaaun. Inae esinae rauhijiriin Jesocurisito letononein nihanune coujunacanein cajabereeo que, canu bisihuruhane jaan cure sirichaaune jaun.

<sup>18</sup> Canejeraauru, cana Curuaanaa Jesocurisito jataain jelai amuritoheriin corojeein neeichene jaanu teeine inara rai. Nitohanemiin.

## **Efeso nenacaauru rai Faborohacha letoai**

*“Chatohaneeiche,” naa Faborone*

<sup>1</sup> Canune, Cana Coanera jerenohineein rai Calaohi Jesocurisito cococainanohineein rai afosoto Faboro neeun. Efeso satiin, Cana Coanera cachaneein rai Calaohi Jesocurisito esenetaeraauru raine caa quiricha laenaan.

<sup>2</sup> Cana Coanera aina rai Calaohi Jesocurisito inara rai raotojoein neeichene jaanu teuruhinete raotojoein neeiche.

*Naaonjoaante Jesocurisito aina cuaain rai cachaauru rausiaje.*

<sup>3</sup> Cana Curuaanaa Jesocurisito Inaca Cana Coanera coroaecaachenete ne. Acate dedeeu cana suujue que itolere caohacha ichaain cana rausiaje, rai Calaohi Jesocurisito cachaneein nihacachene jaun.

<sup>4</sup> Jaiti cana rai chauratane coaunaane ajinihate, cana janijiin cana raain nelu Cana Coanera, rai Calaohi Jesocurisito aina cuaain cha ujuaihonelanaala notaracaae que banijiainee rai cachaneein nenea coina.

<sup>5</sup> Jataain cana belaihane jaunte, rai Calaohi Jesocurisito aina cuaain rai calaohineein nenea coina ichae Cana Coanera, nitohaneein coausihalune rijijieein.

<sup>6</sup> Nitohaneein raotojoein nenea coina cana belaiha cana rausiaeca jataain niicha belai- rai Calaohi Jesocurisito aina cuaaine corenihate, itolere bana Cana Coanera coroaecaache.

<sup>7</sup> Jataain cana belaitohane jaunte, rai Calaohi coichana aina cuaain cana osa caje cana rochin, cana que suujua acatelu Cana Coanera.

<sup>8</sup> Nii cana rai itolere coitucuhin, itolere que nainaan, naaonjoaain ichaohacachene jaannu tihane cajete jataain cana belaitohane coitucuhacache.

<sup>9</sup> Chaen techu nitohaneein cana belaitohane jaun, cana que nii asinojoneein nenea niicha ichaneni niicha coacui coitucuerate.

<sup>10</sup> Inae cuu tihane banate, nii aitiin coaualune rijijieein nii naitoonjoan nainaan, satiin nere tonoraauruha chauratane que nenacaauru, dedeeu nenacaauru, naaonjoainurine coina satiin curuaanaaneein rai Calaohi terein Cana Coanera.

<sup>11</sup> Acate cana janijiin cana raain nelu, rai Calaohi Jesocurisito aina cuaain rai calaohi rijijieein cana que banihateein niicha rucujuei tiha nii coausihalune rijijieein, niicha jerei ichaane coina.

<sup>12</sup> Nitohaneeinte jauriaanejeein cana raain nelu Cana Coanera, rai Calaohi Jesocurisito esenetaain queecha jaaequiin ichaohacachene, cana ichao coaraain, niicha ichai coroaecuruha cachaaurune coina.

13 Nii rijijieein techu, esinae rauhijiriin inara osa caje nichoteriquicheeine beeuruhane aonaain, Jesocurisito esenetaain jerihane rijijieein ichaohichene jaun, rai Suujue aina cuaain rai cachanequichene cojunacate Cana Coaunera, nitohaneein ichaane coina aitohalune rijijieein. 14 Rai Suujuee nii cana que banihateein niicha rucujuei tihane jaan rarichaacheeinne cojunacaneein ne. Nitohaneeinte ichareein Cana Coaunera, satiin nosa caje ichoteratenojoniha rai cachaneein neenihurune coaraain, itolere ichana nainihane coitucuhin coroaecuruha cachaaurune coina.

*Coitucuurera rai, cha coitucuuruhane jaanu tiha Cana Coaunerane coina bajaa Faborone.*

15 Nitohanihane jaunne, Cana Curuaanaa Jesocurisito esenetaain, satiin Cana Coaunera cachaneein nenacaauru aina ita belaaain neeichene coitucuhanune jaun, 16 inara coreniha bajaanune nainein inara coacuhin, Cana Coaunera coroaenajacoon. 17 Cana Curuaanaa Jesocurisito Inaca necaohachaaain nena Cana Coaunera cajene bajaaun, inara rai inara suujue cuhane chacoitucuhin neeichene jaanu tihane, nii caje inara aina niicha ichana jerei coitucuhin, jelai amuritoheriin Acanihane coitucuhin neeichene coina. 18 Chaen nech, "Naaonjoain cohajihacachene cointate cana raain nera," naain coitucuhichene coina inara suujua que coitucueratiha Cana Coaunerane coina caje bajaaun. Jataainte itolere caohacha amurijiriin necaohachae satiin rai cachaneein nenacaauru que banihateein niicha rucujuei. 19 Nii rijijieeinechu chabana satonoelanaala nena niicha ichana nainei ichaaain, esenetaeraneein nena coina ichaane coitucuhichene coina caje bajaaun. 20 Nii jeelai jataain laraajiin mijiainetiin nena niicha ichana naineite coaratelu, o caje rai Calaohi Jesocurisito ichateein que jauriineein tein, 21 itolere cocainanacaaihuri, curuaanaacuru, naaonjoainuri amurijiriin cocainanacainein niha ena janonaa que, chaen nii baiha neeni janonaa que, naaonjoain quene coina. 22 Nitohaneein itolere curuaanaaneein Jesoso cocoaainante, satiin niicha ranojoihunru, rai cachaneein nenacaauru iclesia curuaanaaneein telu, acaauru suujua raujiaeraneein nihane coina. 23 Nii jaunte, satiin niicha ranojoihunru- rai jaberoico iclesianein neeuruhane jaun, itolere que Jesocurisito corihaneraneein neeure. Nii Jesocurisito corenihate ne satiin itolere. Nihei colane nena nainihe i itolere cautene rijihuru.

## 2

*Jataain cana belaiha Cana Coaunerane corenihate cana osa*

### *caje nichoterichaacheein*

<sup>1-2</sup> Jauriaalute, ichaaoruha cana rai chauratane sacutaain nenacaauru cachaaurune rijijieein, baaso ichaechajeein osaque nesarujueein ichaohichene jaun, nitajenaaneein nerejetocoichelu, Cana Coaunera coitucunaa jeriheichuru suujua saruera moconajaera inara suujua saruhane rijijieeincha ichaohichene jaun. <sup>3</sup> Nitohaneeinte jauriaa joareein cana suujua letono rijijieein, baaso ichaechajeein jerichaachene rijijieein ichaorejetocoaachelu satiin. Nii jerichaachene rijijieein, cana suujua letononeein baaso ichaechajeein, osa que nesarujueein ichaohacachelune jaunte niqui, cana casete-caane rai nelu Cana Coaunera. <sup>4</sup> Nete jataain cairichaa-joaain cana coaraain cana belaihane jaun, nii osa que nesaruhin inae nitajenaa neein nihacachene jana, <sup>5</sup> rai Calaohi Jesocurisito aina cuaain, cana osa caje cana coulucohin nelu Cana Coaunera, chabana nitajenaa charanejeein nena ichaonaa que ichaohin nena nainichaachene coina. Jataain caohachanijihane jaunte, inara osa caje nichoteeichene jaanu terate inara rai. <sup>6</sup> Nii jeelai Acate, inae ohacachene bana, nitaje rai niha cana suujuene jana, o caje rai Calaohi Jesocurisito ichatihane jiniichaain cana suujue ichateein raain, rohan cana suujue lauriaelu dedeeu. <sup>7</sup> Nitohaneeinte ichaelu, caa baiha rai Cojoanonaa neeni que neein jataain cana belaiha rai Calaohi Jesocurisito aina cuaritaainne coitucunojoneein nihane coina. <sup>8</sup> Inara belaiha Cana Coaunerane jaunte nii esenetaaichene jaan aina cuaain nii nichoteeichene jaan raain neeiche. Nii jaun coatiha inara raajenihane inaraacha eruineein nihei. Acate inara rai Cana Coaunera tenojoneein ne. <sup>9</sup> Coatiha inara raajenihane inaraacha ichai que nii inara osa caje nichotiheeiche. Niicha ichoteratenohineeinte nii inara osa caje nichoteeiche. Nii jaun nainiheeiche inara raajenihane, nii inara osa caje nichotenaa rijitiin, nii que ereein necohasitaachene. <sup>10</sup> Acate rai Calaohi Jesocurisito aina cuaain cana coaunaain nelu, coujuriu rai cachaneein, aca- Cana Coaunera nihane corojeein, ita belain, chaelai lateein neeuruha leeochoaurune, acaauru corootajaneein, naaonjoaain nii inoaenlu coausihalune rijijieein nihacachene coina.

*Jesocurisito corenihate, leeocheenein nii chuni coaraelanaala ita aina raotojoeein nihacache*

<sup>11</sup> Inara Jorioneneeichene jaunte, “Jaberoco cari moloelanaala nenacaauru,” naain inara curuaateeuere Jorioocuru. Jana acaauru Jorionecuruhanete, rai jaberoco cari molooruhane jaun: “Canate laen, Jaberoco cari moloorera neein curuaacaache,” naain raaje

necurujuatecure. <sup>12</sup> Esinaente chuhisi jauriaalu, inara Jorioneneeichene jaun, Jesocurisito cachaneein nenea nainelanaala, niheichu Isaraelitacuru rene turuhin, ita rai ereein, naaonjoana nainerejeteneeichelu, nii que coacuhin neeuche. Chaen techu, nii niicha ichanenu naitoonjoan tenaa nainenelu inara rai Cana Coaunera, inara que jaolecohane jaun. Nii jaunte colane nenea rijijieein, inara coroatajanerihanine cohana coacuelanaala nitajenaaneein neeichelu. <sup>13</sup> Nete satiin coreniha ohalu rai Calaohi Jesocurisitone jaun, nii rai coichana aina cuaain coreniha atiin Jorioneneeichene saijieein inara raain ne, inara netonai esenetaaichene jaun. <sup>14</sup> Nii Jesocurisitote, canacaanu Jorionichaanune, inara Jorioneneeichene aina ita que nejeratenaaneein ita coarajenaa caje, ita jaberoco que jaberoconaa rijijieein raotojoeein ita belaaain, ita coroatajaneein, naaonjoaain nenea coina, nii ita que nejeratenaaneein nihacachene jaan itajeein, lelaurijiei caje nenea rijijieein rai cachaneein cana te. <sup>15</sup> Nitohaneeinte nii tonoraain niha cachane coina nenea rauhi cache relaalune jaan itajelu nii Jesocurisito. Nitohaneein itajeeinte, le laurijiei caje nenea rijijieein cana raain ne, jiniiquiin raotojoeein neein le laurijieein rai cachaneein nenea coina. <sup>16</sup> Canacaanu Jorionichaanune, inara Jorioneneeichene aina lenoneein, inara loreri asaae turunaa nainelanaala, naaonjoacaanune janate, coroso que ohin nii itajeein, jiniiquii raotojoeein Cana Coaunera cachaneein nenea coina, ita jaberoco que jaberoconaaneein cana te Jesocurisito.

<sup>17</sup> Nitohaneeinte Cana Coaunera cachaneein nenea naineeneeichene caje, coreniha inae canacaanu aina jiniiquiin rai cachaneein nihacachene coina, cana rai nii enachasine ichaonaa que ichaorichaacheeine bera Erenaa Raotono turuaelu Jesocurisito. <sup>18</sup> Jataain caohachate ichae cana rai Cana Coaunera, rai Calaohi Jesocurisito aina cuaainte coreniha Jorioniheichuru, Jorioocuru, leeochoaauru cachaauru, naaonjoaihunru aina leinjiin rai Suujueecha coreniha rai inaca Cana Coaunera rene turunaa nainichaache satiin. <sup>19</sup> Aihane jaun inae enene nejelau natane edaa ichaonaa cache rijijieein niheeiche. Inae inara netonaite, aihuruha Jorioocurune rijijieein ne inara rai rauhi. Jerichanejeein rai cachaneein neuruha Jorioocurune rijijieeinte, inara netonai, rai cachaneein neeiche. <sup>20</sup> Inarate loreri ichacuruha icharaaurune rijijieein, loreri ichanohi rijijieein neeiche. Nii jaunte, nii loreri nunuheneein nenea ajeri rijijieein neuruha Jesocurisito cocoinanohichuru afosotooru aina *profetacurune* jana, inara acaauru ichoae tenojoineein neeiche. Jana Jesocurisitote, nii loreri ichoae satononiha

nunaera aina janori bucuneein ne. <sup>21</sup> Charijjeeinteeinti loreri jaane, jauriaanejeein anesijia temuhin jitaain bucutejeein loreri besautiae ichara. Nii rijijieein techu Jesocurisito ranojoinichaachene, inae satiin jiniiquuin rai cachaneein ni-hacachene jaun Cana Coaunera loreri rijijieein nihacache. <sup>22</sup> Nii rijijieein techu Jesocurisito ranojoneein rai loreri Teenforo rijijieein neechene jaun, inara suujue jana ichoae Cana Coaunera Suujue.

### 3

*Jorioniheichuru rai Cana Coaunera ere beebejihane coina letononiha Faborone*

<sup>1</sup> Nitohaneeine canu Faboro nichaaunne, Jesocurisito coreniha caresero cuhane neeun, inara Jorioneneechene rai caohachanuque. <sup>2</sup> Inae coitucuhichene rijijieeinte, jataain inara belaihane jaun, nii inara rai caohacha icharichaaaine beebejeranu que canu teein nelu Cana Coaunera. <sup>3</sup> Acate canu que nii asinojoneein coitucueraelanaala nenea niicha ichanenu coarateein coitucuerate, nii inara rai been laenacaaunne rijijieein. <sup>4</sup> Inae ereretaain coaraquichenete, esinae rauhijiriin Jesocurisito aina cuaain Cana Coauneraacha ichaneni asinojoneein nenea coitucuhanune coitucuriquicheein. <sup>5</sup> Coatihani niqui nii chuni que nii coitucuerateein niheilu jauriaa. Nete inae enene rai afosotooru, rai *profetacuru*, naaonjoainuri que coarateein coitucuerate rai Suujue aina cuaain Cana Coaunera. <sup>6</sup> Niicha ichaneni asinojoneein coitucueraelanaala nenea niicha coitucuerateite, nii osa caje cana ichoteraanuneein nenea esenetaauruha Jorioniheichuru netonaine jaun, inae acaauru netonai Jorioocuru rai niicha teeni raauruhane rai neeure. Inae acaauru netonai, rai jaberoconeein neeuruhane jaunte, rai Calaohi Jesocurisito aina cuaain niicha teeni eroraneein neeurureein.

<sup>7</sup> Jataain baaso ichaechajeein ichaorejetocaaunne saijieeinte, itolere ichana nainihane jaan ichaain, quichao coreein, niicha ichanenu beebejihanune coina canu telu Cana Coaunera. <sup>8</sup> Nitohaneein leeochoaauru, rai cachaneein nenacaauru amurijiriin baasoneein chaque nelatenihanune saijieeinte, canu janijiin canu cocoainaan Jorioniheichuru rai janiinacajelanaala caohacha icharihani Jesocurisitone que, caohati erenaa beebejihanune coina canu raain nelu. <sup>9</sup> Chaen techu niicha ichaneni itolere bana coitucueraelanaala asinojoneein nenea coarateein, inara que coitucueratihanune coina caletoe nii itolere Coauneraneein nenea Cana Coaunera. <sup>10</sup> Nitohaneeinte ichaelu, ena caje coauneein janijiin niicha ranojoihunru aina cuaain, itolere

niicha coitucui ichana nainihane coaracuruha dedeeu mi-jjainetiin nenacaaurune coina. <sup>11</sup> Cana necoaauna ajiniha caje coauneein, chabana satonoelanaala inae nitohaneein icharihanine coina coausihalune jaunte, nii coaualune rijjieein rai Calaohi Cana Curuaanaa Jesocurisito aina cuaain ichae. <sup>12</sup> Nii jaunte rai calaohi Jesocurisito aina cuaain inae rene turunaa nainerichaacheein, tonajelanaala acanihanee esenetaacachene jaanu teranihanee coitucuhin. <sup>13</sup> Nii jaun nainiheeiche, inara coreniha caa caresero cuhane nihanune que nererojoecaain, inara relaunee jaan rijjieein neeichene jianein neeichene, nenacaanejia inara rai caohacha ichaane ainun, que nelararajiaain neeichene coina.

*Naaonjoainte cana belaita Cana Curuaanaa Jesocurisito.*

<sup>14-15</sup> Nii corenihane, satiin rai cachaneein dedeeu, caa cana rai chauratane que, naaonjoaain laurilauri neinichaachene Inacaneein nenea Cana Coanera bajanajacoon neeseonriaain. <sup>16</sup> Jerichanejeeinnechu inara rai, Suujue aina cuaain chachana naineein laraajiin neeichene coina, acaihaniji rai jataain caohachaneein nenea tiha inara suujuaune coina Cana Coanera bajaau. <sup>17</sup> Chaen inara suujuaun ichaonaa nainiha esenetaaichene coreniha Jesocurisito Suujuene coina, nitohaneein nii jataain inara belaiha Jesocurisitone esenetaain, jerihane rijjieein neein sacuhichenete, <sup>18</sup> satiin esenetaeraauru aina jiniiquin, naaonjoaain itolere cautenu rijihuru ichaa cana belaiha Cana Coaneranee coitucuriquicheein. <sup>19</sup> Nitohaneeinne jataain coitucunaa nainichaachene amuritoheriin cana belaiha Cana Coaneranee coitucuhichene coina Cana Coanera bajaau, Aca Acaneein nihane coitucuhin, Acaacha cohajeein queecha jaequuin neein leecha coacuelanaala Cana Coanera ainaacha neeichene coina.

<sup>20</sup> Aihane jaun, Acaneein nihane coitucuhin Aca coroaecaachenete ne, jataain coaaucaachene amurijiriin cana aina cuaain itolere niicha ichana nainee ichana nainihane jaun. <sup>21</sup> Jerichanejeein chu coroaecuruhine, rai Calaohi Jesocurisito aina cuaain niicha ranojoihunru cachaauru, cana janonaa besaute que turuhanereein tiaain. Nitohanemiin.

## 4

*Cana Coanera Suujue aina cuaain ita jaberoco que jaberocona rijjieein neeuche.*

<sup>1</sup> Nii jaunne Jesocurisito coreniha cau caresero cuhane netiin atiin inara rai aitoon, esinae rauhijiriin caohachaain inara suujua coaraain Cana Coanera ranojoneein neeichene jaun nitohaneein ichaaoche. <sup>2</sup> Leechaauru amurijiriin nenea coacuelanaala, leechaauru belaiin, chatohanai ichaa

chunocoha inara leeochoaurune niha natiin que inara suujua acateein abaantaain, jiniiquiin ita belaaain neeuche. <sup>3</sup> Atiin rai Suujue aina cuaain inara coroatajanihane aina, itolere bana jiniiquiin ita suujua rijijieein coacuhin jataain raotojoeein neeuche. <sup>4</sup> Leinjiin Jesocurisito jaberocohachate iclesianein ne. Jerichanejeein techu leinjiincha ne Cana Coaunera Suujue. <sup>5</sup> Leinjiin Jesocurisitohachate Cana Curuaana ne. Leinjiinchate ne cana osa caje cana ichoteraanu canaacha esenetai. Jerichanejeein techu leinjiincha ne cana coulucohin cana cojunacatecuruhane jaan baotisimo. <sup>6</sup> Nii rijijieein techu leinjincha ne Cana Coaunera, satiin Inacanein, satiin ichoae neein, satiin suujue cuhane neein aina cuaain itolere icharanein.

<sup>7</sup> Nete laen tenaa jerihane jaancuru rai le cachanichaachene nainetiin aina cuaain cana que niicha icharatei ichaain nihacachene jaanu te. <sup>8</sup> Nii quete:

“Dedeeu cuhinte jiniichaain caseteconein nenacaauru amaain, cachaauru que niicha icharatei ichacuruhane jaanu te,” naain belu rai Quiricha Inoaensi cuhane.

<sup>9</sup> Nii Dedeeu cuhalune que aithane jaante, jauriaanejeein cana rai chauratane que turuhin nihalune baiha, jelaiha cuhalu dedeeune que aite. <sup>10</sup> Nii jeelai dede caje unaate, jelaiha dedeeu cuelu, Aca acanein itolerenein dedeeu netonai Acanein nihane coaratihane coina. <sup>11</sup> Acatechu, tabaauru sacuureraauru cocoainae afosotonein curuaatenajaain. Jana tabaaurute cocoainae *profetanein*, jana tabaauru nosa caje jianacoo neeururichaain cachaaurune beranein, jana tabaauru esenetaain rai cachanein, nenacaauru beraicha fastoronein cocoainanajaen, jana tabaaurute acaauru relaeranuune que cocoainae. <sup>12</sup> Nitohaneinte acaauru relae ita belaaain ita coroatajanein neeuruhane nefaa rai jaberoco iclesiane coina, <sup>13</sup> jerihane rijijieein, jiniiquiin ita suujua rijijieein coacuhin niicha ichanenu ichaane coitucuhin nihacachene coina. Nitohanein nihacachenete laen, esinae rauhijiriin itolerenein jiniiquiin canaacha esenetai aina ijiin, aiha Jesocurisitone rijijieein nerichaachein. <sup>14</sup> Inae laen aihuruha canaanainurune rijijieein, joaereein cana suujua letonoacha ichajeein, joenreein cana relaera esenetaelanaala neein nechu jataain baaso que cana coritana jeriha cachaauru baasonein ichaonacaaurune nihanatiin esenetaiaacachein. <sup>15</sup> Nenacaeneintejian caohachae, esinae rauhijiriin ita suujua rijitoejin, ita rai ereerejeein, jeriha Jesocurisitone rijijieein iijieein ichaohachachene caohachae, aca cana suujua temura rijijieein nihane jaun. <sup>16</sup> Nii jaunte rai jaberoconein nena rijijieein



neein ita suujua rijijieein coacuhin raotojoein nihacache. Nitohaneein neeinte, cana rai niicha tei aina cuaain jiniiquiin canaacha ichana nainei ichacaachene aina raotojoein ijiin nihacache.

*Jesocurisito ainate, enachasine ichaonaa que ichaohacache.*

<sup>17</sup> Atiin Jesocurisito corenihane, caa que inara rai erenaa jereeun. Jiaonriha inae nenacaaen aihuruha, Cana Coaunera coitucuuruhine rijijieein ichaohichene. Acaaurute joaereein suujua letonohacha ichajeein, niicha ichai coitucuelanaa chachaaain neeure. <sup>18</sup> Nii jaun coatiha niicha tei ichaonaa que ichaauruhi baasohacha coaauca acaauru suujuane jaun, nii niicha tei ichaonaa que jaolecooruhane jaun. <sup>19</sup> Nitohaneein nauhacaa acaauru suujuane jaunte, inae ichaonaa baaso que ichaohin, rai nichao colalajilanaala itolere baaso ichajeein ichaaore. <sup>20-21</sup> Nete laen inara nabana nitohaneein ichaohichene coataa, Jesocurisito coitucuhin neeiche, esinaen rauhijiriin naitoonjoan aonaain tonoraain neeuche. <sup>22</sup> Aihane jaun nii jauriaanejeein inara ichao, nechuh inara coritaa inara suujuane sacuha baaso ichajeein ichaohichene jaan jianein ichaauche. <sup>23-24</sup> Inarate inae nainequiche inaraacha coacui coreein, inara suujue coreein, naaonjoain ichaohin, nii ena jerihane rijijieein ichaohichene coina Cana Coaunera tenojoin ichaonaa que ichaohin, inae esinae rauhijiriin ichaonaa esine que ichaohichene coaraatein neeichene caohachae.

<sup>25</sup> Aihana jaun inae ita jaberoco que jaberocooa rijijieein nihacachene jaun, le cachanequichene inae nainiheiche inara amute cacha coritaaichene. Chaelai que erenaa jeriquichene, esinaen rauhijiriin nohanelanaala aitocuche. <sup>26-27</sup> Jiaonrihachu ita que nejerateein ita sonaa coacuhin neeichene. Itaque nejerateichene nii rijieoritiin baitecuche. Coa inara suujua cuhane enoha moconajaerane jaanu tera tochaneein sonafaajeein obaaecache. <sup>28</sup> Asijiautoneein ichaorejeti, asijiauhane jianein amihaneeinete, chaelai sirijieecane, chalateraauru rai chaelai tenaa nainemii. <sup>29</sup> Jiaonriha erenaa baaso que ereeiche leeochoauru raine. Erenaa caohacha nejesina que ita rai ereeuchete, caohati erenaa que aitocoichene aonaain, jeelai amuritoheriin esenetaain tonoraain neeuruhine aohanraauru cachaauru. <sup>30</sup> Inae ecu tihane bana, inara osa caje nichoteeichene coina jelai tein rai cachanequichene jaan cojunacanein inara cojunacatiha Cana Coaunerane jaan rai Suujue nocoeje chanuera tochaneein nena nainiheiche.

<sup>31</sup> Jiaonriha obajeein, ita cotaairiin, ita que nererojoe-caeriin, leeochoauru que ereein, naaonjoain neeichene.

<sup>32</sup> Charijieinteeinti Jesocurisito coreniha, inara osa que suujua acateein ne Cana Coaunera, nii rijijieein ita que inara suujua acateein, jiniiquiin ita belaaain ichaaoche.

## 5

*Chatohaneein nainere ichaoha Cana Coaunera cachaaurune.*

<sup>1</sup> Jataain inara belaaain rai calaohineein teein inara raa Cana Coaunerane jaun, inara netonai belaaain naitoonjoan tonoraain ichaaoche. <sup>2</sup> Charijieein teeinti rai coichana aina cutaain jataain cana belaihane jaun chaelai jujui mocohin que Cana Coaunera belaihuruha saseredotecurune rijijieein cana coreniha rai jaberoco telu Jesocurisito, nii rijijieein inara coichana aina cutaain jiniiquiin ita belaaain ichaaoche.

<sup>3</sup> Inae inara, rai cachaneein neeichene jaun, inae nainiheeiche leecha ene coacuhin, niheichu que ninichaajeein, erenaa baaso que ereeein, inaraacha lateeicha que coacuhin, barijiitiin, naajoain ichaonaa nainiheeiche. <sup>4</sup> Jiaonriha erenaa baaso que ereein neeichene. Coatiha cha que nelatejeehai niritiin iriha cachane. Nenacaantejian, niritiin erenaa coacuelanaala, Cana Coaunera corojeein ichaohichene caohachae. <sup>5</sup> Inae coitucuhiche, sinijeranelanaala nena ene aina ichaohin, erenaa baaso que ereein, niicha lateeicha que coacuhin, barijiitiin ichoae, nii Cana Coaunera aina Jesocurisito Cojoanona que ichaonaa nainihe. <sup>6</sup> Jiaonriha rai suujua caje rocohin joenreein inara rai chaque iriha cachane tonoraain neeichene. Nitohaneein joenreein rai suujua caje rocohin erenacaaurute, raujiaerilanaala casetecareein Cana Coaunera, rai aitoonjoan tonoraalanaala que jaolequiin aitocuruhane coreniha. <sup>7</sup> Aihana jaun acaauru rijitiin ereein, acaauru rijijieein ichaonaa nainiheeiche inae inara. <sup>8</sup> Inae nocohena tabai jana nena rijijieein ichaorejetocoichelune caje, ena Jesocurisito esentaain naitoonjoan tonoraachene jaunte, inae nii nocohena caje jianacoon ena ichaohiche. Aihane jaun cojoeriu jianacoon ichaohichene coarateein, <sup>9</sup> chaelai lateein neeuruha leechaaurune acaauru corootajanein, esinae rauhijiriin baaso ichaelanaala, niheichu nohanelanaala, naaonjoaain ichaaoche. <sup>10</sup> Atiin Cana Coaunera jerenohicha ichajeein ichaaoche. <sup>11</sup> Jiaonriha nii nocohenaanau nena rijijieein, chachaeraauru cachaauru rijijieein ichaohichene. Acaauru rijijieein ichaonaa coacuelanaala, nii nocohena caje acaauru mitaauchete, acaauru netonai jianacoon mituhin, niicha ichai coaraain coitucuhin ichaauruhine. <sup>12-13</sup> Jataainte cojenacaain benacatojoelanaala nihanatiin, asinojoneein

chachaaain neeure. Nete inae nii nocohena caje mitanajaaichene jianacoon neeuruhane, jitariin niicha ichai coitucuhin coaraain neeurureein, inae jianacoon nocohena caje mituhin neeuruhane. <sup>14</sup> Nitohanei que tejian:

“Sininaa rijjijeein neeichene caje inara nota jirichaauche.

Ohin nitajeeichene rai neeichene caje

Jesocurisito aina ichaaochete, inara que itolere coarateeinete, coaraain coitucuhichera,”

naain ne erenaa. <sup>15</sup> Aihana jaun chatohanei ichaquichene que necohalajiin neeuche. Jiaonriha chacoitucuhi cacha rijjijeein ichaohichene, itolere coitucuhin, itolere que nainaaain ichaaochete. <sup>16</sup> Atiin necohalajiin neeuche, jataain baasoneein ichaonacaauru cachaauru cataaun ichaohichene jaun. <sup>17</sup> Jiaonriha chacoitucuelanaala nenacaauru cachaauru rijjijeein, joareein chachaaain nena coacuhin neeichene. Atiin jeriha Cana Coaunerane rijjijeein inaraacha ichai ichaain ichaaochete. <sup>18</sup> Jiaonrihachu ajeeichene, nabana ajenaacha que coacuhin baasohacha ichajeein ichaohichene, inara ichao aasajeein neeichene coataa. Nenacaaen tejian, ajena coacuelanaala Cana Coaunera Suujue jerenohi nejesinaacha que coacuhin, jerihane rijjijeein ichaohichene caohachae. <sup>19</sup> Nejesinajeein ita rai salmo beebejeein, nenatenanaja que nenatein, inara suujua aina cutaain Cana Curuaanaa corojeein rachoojoeuche. <sup>20</sup> Itolere bana Cana Curuaanaa Jesocurisito aina cuaain, Itolere Inacanein nena Cana Coaunera coroaecuche itolere niicha tei coreniha.

*Raotojoein sinijiera aina ichaauruhine Jesocurisito ranojoihunru.*

<sup>21</sup> Jesocurisito que inara suujua acatequichene coarateein, jiniiquiin ita suujua rijjijeein ita belaaain ichaaochete. <sup>22</sup> Enecuru nihanatiin jeriha Cana Coaunerane rijjijeein jerecuruha acaauru lanaaurune rijjijeein neeuruhine. <sup>23-24</sup> Charijjeein teeinti niicha ranojoihunru iclesia neein nenacaauru coturineein niha Jesocurisitone jaun, rai jaberoconeein itolereenein jerihane rijjijeein neeure niicha ranojoihunru, nii rijjijeein rai sinijiera coturineein neeuruhane jaun, rai lana jerihane rijjijeein nere tonoraain ichaauruhine enecuru. Nii jeelai Jesocurisito techu, nii rai jaberoconeein nenacaauru iclesia ichoterateranein ne. <sup>25</sup> Charijjeein teeinti rai coichana aina cutaain, jataain niicha ranojoihunru belaihane jaun, acaauru coreniha rai jaberoco telu, sohin jaauruhane caina Jesocurisito, nii rijjijeein rai coichana aina cutaain sinijiera

jereein belaihuruhine acaauru lanaauru. <sup>26</sup> Nitohaneente niicha ranojoihunru coulucoelu rai naitoonjoan aina cuaain, acau que camujuaain, <sup>27</sup> esinae rauhijiriin niicha ranojoi iclesia neein, jelai tein rainein que banijiaain necaohachaain osa colane neeuruhane coina. <sup>28</sup> Charijieein teinti ii rai caohachanu ichaain neei, nii rijijieein ii comasai rai netonai caohacha ichaain neeu. Rai comasai belaaain ichoai cachate, raaje rai caohachanu ichaa aicheein. <sup>29-30</sup> Nihei chuni raajenhane rai jaberoco que nejeratein nei. Nitohanein nenea coacuelanaalate, raotojoein lenonein, rai jaberoco colalajiin ichoae. Nii rijijieein techu, rai jaberoco rijijieein neuruha niicha ranojoihunrine jaun, acaauru colalajiin ichaolanajaen Jesocurisito. Canate nii jaberoconeein nihacache. <sup>31</sup> Nii quete:

“Nii jaunte rai inaca aina rai neba naaonjoain ratiriin, rai sinijiera raain nereein cacha, ita jaberoco que jaberocanaa rijijieein neeuruhane coina,” nae Cana Coaunera Quiricha cuhane. <sup>32</sup> Niite asinojoin rijijieein nihane jaun, coitucunaa nainene chuni. Nene laen canu, aiha niicha ranojoinunru iclesia aina Jesocurisitone que aitoon. <sup>33</sup> Aihane jaun le cachaauru rai jabereco belaihanne rijitoein rai sinijiera belaaain neeuruhine. Enecuru netonai rai lana que suujua acatein, niicha jerei rijijieein neeuruhine.

## 6

*Inaca ere tonoraain ichaauruhine acaauru calaohichuru.*

<sup>1</sup> Ranunacuru, enamanaacuru, naaonjoaineeichene, Cana Coaunerane belaaichene rijijieein inara inacaauru belaaain acaauru ere tonoraain neeuche. <sup>2</sup> Jauriaa nejeein tonoraain ichaoha cachane, rai tihane coina Cana Coaunera aitoonjoate: “Ii inaca, ii neba, naaonjoainuri belaihu Cana Coaunera belaaaine rijijieeine, <sup>3</sup> raotojoei ichaonaa que ner-  
ausiaaejeein ichaohi,” naain ne Cana Coaunera Quiricha cuhane.

<sup>4</sup> Aihana jaun, inara acaauru inacanein, inara belaaain inara relaa Jesocurisitone rijijieein, inara bereecuru baiji-  
aelanaala belaaain, chatohanei ichaane coataa suujuatein relaauche.

<sup>5</sup> Nii rijijieein chu caa cana rai chauratane que acaauru fa-  
toroneein nenacaauru ere tonoraain, que suujua acatein, amurijiriin nenea coacuelanaala, que asinojoneein cha  
coacuelanaala, naaonjoain neein letoaane jaan ichamiin rai cacha, Jesocurisito rai ichaane rijijieein. <sup>6</sup> Cojuriu Cana Coaunera cachanein neeichene jaun, jerihane rijijieein inara fatoroon icharatenohin ichaain neeuche. Jiaonriha  
nechu inara aina caohachaain nihane coina, notaracaaecha

caohachaaain chachaain neeichene. <sup>7</sup> Inara letoaane jaan ichaquichene, jiaonriha rai ichaquichene que coacuhin ichacache, Cana Curuaanaa Jesocurisito rai ichaquichene que coacuhin, corajeein ichacuche. <sup>8</sup> Fatoroon cachaneein neein, fatoroon cachanelanaala, naojoaain netiin, caohacha ichaa cachane, rai cainarihani cana Curuanaa, niicha ichai rijijeeine coitucuhin neeuche.

<sup>9</sup> Jana inara acaauru fatoroon nequichene, nii leeochangeenein chuni coaraeniha Cana Coaunerane coitucuhin, nii inara que suujua acatein jeriquichene rijijeein neeruha inara cachaaurune rijijeein, inara netonai acaauru que inara suujua acatein nii chatohaneein acaauru tenaa coacuhelanaala, naaonjoaain acaauru belaaain neeuche, inae acaauru aina jiniiquiin Cana Coaunera cachaneein neeichene coitucuhin.

*Jesocurisito aina cuaain laraajihururichaain niicha ranojohunrine.*

<sup>10</sup> Jesocurisito aina jiniiquiin neein, nii itolere que laraajiin neeichene jaanu niicha teenu aina cuaain, itolere que laraajiin neeuche canejeraauru. <sup>11</sup> Nabana inara coritaa moconajaerane esenetaain neeichene coataa, que acatena nainequichene coina, inara biji achune, inara rai Cana Coaunera tenojoi que acatein tonoraelanaala neeuche. <sup>12</sup> Coatiha cana tocohaneein cachaneein bucuhin nena, cana que nejerateein cana saruhin nihein. Acaaurute moconajaera letononeein dede caje uhin, nechu joaenreein baasoneein cacha saruhin, Cana Coaunera coitucuelanaala nenacaauru que niicha ichana nainai ichaane coina letononeein nena neeure. <sup>13</sup> Aihana jaun inara rai nitohanein acatein neeichene jaanu que, inara rai Cana Coauneraacha tei aina jatoroaain neeuchete, chatohaneein inara tenaa coaauca moconajaerane niha natiin, abaataain amuritiin neeiche. Inaen leesajeein jatoroaain neein amuritohichene, nii namuritoratena coacuelanaala neeuche.

<sup>14</sup> Nitohaneein namuritoratelanaala, niheichu nohanenaa coacuelanaala, naaonjoaain neein esinaen rauhijiriin ichaochichene que necouhatein neeuche. <sup>15</sup> Itolere bana jatoroaain neeuchete, Ena Nena ichaonaanaja que jiniiquiin raotojoein neriquicheeinne coina beratenojoi beebejeeiche amuhemujeein. <sup>16</sup> Nii itolere caje inara ichoteratena nainera inaaraacha esenetai, moconajaera rai usi cofatojoi bujatein caje inara ichoteratemiin. <sup>17</sup> Jana inara rai Suujue tenojoi rai Nere, inara biji achune neeine. Jana nii jianacoon cha ujuaihonelanaala neeichene coina inara mitaera, inara asihoneein inara coturi bujuatera niha neeine, chatohaneein inara amuritonaa nainiha moconajaerane coataa. <sup>18</sup> Itolere

bana Cana Coaunera bajaebajajeein, rai Suujue jerenohin rijijieein neeuche. Itolere que nainaan jatoroain inara suujua corelanaala neein, satiin rai cachaneein nenacaauru coreniha Cana Coaunera bajaauche. <sup>19</sup>Bajaaichene naineein, atiin canu coacuhin canu rai netonai bajaauchete, canu rai laraajiin ereein nihanune jaanu teeine ne, aina laraajiin ereein Aca cana osa caje cana ichoteranihane beebeje coitucuelanaala nenacaauru raite coitucuurumii. <sup>20</sup>Acate corenra niha canu teein rai naitoonjoan beebejihanune coina caletoaain ne. Nii corenihate caa caresero cuhane canu enoaauruhane jaun, ena caresero cuhane neeun. Chaque casilanaala, Acanihane beebejihanune coina canu rai atiin bajaauche.

*Necoia Faborone.*

<sup>21</sup>Canu rai Cana Coaunera tenojoin amihanenaa que ca-suujua rijijieein cacorataanera cana nejera Tiquicote, inara rai canuhacha ichai beein, canu ichaone maajeein bereein. <sup>22</sup>“Naaonjoaainne nihacaanu,” naain inara rai beein, inara suujua aninoaane coinane nii inara rene letoaaun. <sup>23-24</sup>Cana Inaca Cana Coaunera, rai calaohi Jesocurisito aina esenetaain jiniiquiin ita belaaain raotojoein ichaaoruha canejeraaurune jaannu teeine. Jerichanejeein chu itolereneein, satiin belaaain naitoonjoan rijijieein jianelanaala nenacaauru canejeraauru rai, raotojoein neeuruhane jaanu teeine.

## **Filipoo nenacaauru rai Faborohacha letoai**

*Caresero cuhane neein Filipoo nenacaauru Cana Coaunera coitucuurerera rai laenaa Faborone*

<sup>1</sup> Canuna Faboro neeun. Timoteeo ainane Cana Coaunera Calaohi Jesocurisito cachaneein nihacaanu. Satiin nii Filipoo neiniquichene Cana Coaunera Calaohi Jesocurisito esenetaeraauru raina caa laenain letoacaanu. Saain nii inara beraihurera ichauhenaauru, chaen nechuu nii inara coroatajaneraauru- diaconooru, naaonjoainuri rai reein tiaaina caa letoaacaanu.

<sup>2</sup> Raotojoein neeichene coina, inara belaa'in inara coroatajaneine Cana Inaca Cana Coaunera, Cana Curuaanaa Jesocurisito, naaonjoain.

*Cana Coaunera Ere esenetaeraauru rai Cana Coaunera bajaa Faborone*

<sup>3</sup> Inara coaaucaau'ne naineeine, "Nariha" naaun Cana Coaunera rai inara coreniha. <sup>4</sup> Cana Coaunera bajaaunena, rachoojoein bajaaun inara rai, inara coroatajanihane coina, <sup>5</sup> nunuhe caje coaune'in, Cana Coaunera Calaohi Jesocurisito Ere que cacha relaacache jiniiquiin ena netojoeina jaun. <sup>6</sup> Rauhijiriina coitucun, inara suujua rucujeein coriha Cana Coaunerana jaunte, jerichanejeein rucuhejeein sacureein, enacoaune'in turuha rai Calaohi Jesocurisito nere'in tiaan. <sup>7</sup> Cacoichana aina cutaain satiin inara belaihanuna jaunte ne carai rauhi, nitohane'in inara que coaucaau'ne coina. Caresero cuhane nihanune janate, cacoelaain cacorataane Cana Coaunera. Chaen techu nii choae tacaain, cocoinanacaaihuri acatiha te'in cacorataane, esinae rauhijiriin jianacoo cana mitaera ne'in niha Cana Coaunera Calaohi Jesocurisitone que irihanune coina. Nii cacoratanihane rijijie'in inara coroatajanerichaain Cana Coaunerane coitucuhanu.

<sup>8</sup> Esinae Cana Coaunerate coaraje, inara belaa'in inara jeriha Cana Coaunera Calaohi Jesocurisitone rijijie'ina jataain inara belaihun.

<sup>9</sup> Jeelai amuritoheriin Cana Coaunera Ere coitucuhin, Cana Coaunera Calaohi Jesocurisito jere'in, <sup>10</sup> nii que inara suujua coarain, inara suujua coitucuhichene coinana Cana Coaunera bajaaun inara rai. Nitohane'in neeichenete nenere'in inara que cha, coaiten turuha Jesocurisitone bana. <sup>11</sup> Nitohanihanete inara coroatajanere'in Cana Coaunera Calaohi Jesocurisito, raotojoe'in jiniiquiin ita

coroatajaneein leeochoauru aina ita belaaain neeichene coina. Nitohaneein neeichenete, caohatiin inara coroatajaniha Cana Coaunerane aina cuaaain rai caohacha ichaquichene coaraain, nii coreniha Cana Coaunera corooaeca cuurureein cachaauru.

*“Chanu nihei ohanune, jerichanetoheca carai,” naa Faborone*

<sup>12</sup> Aonacuchena inara rai erete aonaquiche. Caresero cuhanete niqui caenoaain, cacairichaaure niqui. Nenacaen tejian carausiaaeca catohaneein caetecure, nenacaen jeelai amuritoheriin Cana Coaunera Calaoihi Jesocurisito Ere beebejihanu cau nenacaauru raine coina. <sup>13</sup> Nii jaunte Jesocurisito ere tonoracaaunne coreniha, caa caseteco neein nihanune coitucuure saain Roma curuaanaa rai soondarooru, saain cau nenacaauru, naaonjoainunru. <sup>14</sup> Nitohaneein caseteco neein nihanune coitucuuruhane jaunte, nii que nelararajiaain laraajiin nihei chaque casiirilanaala Cana Coaunera Ere beebejeeure cana nejeraauru Cana Coaunera coitucuurera cachaauru.

<sup>15-16</sup> Tabaaaurute caichoae ininaa coacuhin Jesocurisito ere beebejeeure. Leeochoaurute laen esinae rauhijiriin, suujua coaraain Jesocurisito ere beebejeeure cacoelaain caco-rataana jereana caun, laraajiin Jesocurisito ere beebejihanune coreniha cau casetecoo neein nihanune coitucuuruhana jaun. <sup>17</sup> Nii caichoae ininaa coaauraurute, suujua coaraelanaala Jesocurisito ere beebejeeure, cacairichanaa jereana caaun niqui. <sup>18</sup> Chanu nihei caohatoha nitohanai caraina jaun. Joaenreein cache Jesocurisito Ere beebejihana nenacaen rachoojoein nereeunni.

<sup>19</sup> Nitohanihana jaunna carai Cana Coaunera bajaebajaequichene coreniha cacorataanerihani Jesocurisito suujuene coreniha, raotojoein jianacoo miturichaaunine coitucun.

<sup>20</sup> Nii jaunna chunei que necoejelanaala nihanune jereeun. Jerichanejeein cuaajeein nenacaen nauruta naurutaain Jesocurisito rijijieein nihanunena jereeun. Chanu nihei ohanune jerichanetoheca carai. <sup>21</sup> Ichaaojihanunena jataain Jesocurisito ere tonoraera neein niha cureeunni. Jana ohanunena jian nenacaen raotojoein aina nereeunni. <sup>22</sup> Jana ainihanena carijieein atiin ichaaojoein sacuhanunena, cana Curuaanaa Jesocurisito tenojohin amihanenaa ichana nainereunni. Chariji teeinti carai caohachare. <sup>23</sup> Tabaquena ohanune luhecaaun, Cana Coaunera Calaoihi Jesocurisito aina niha cuhanune coina. Niite laen jataain carai caohachare. <sup>24</sup> Nete laen inara caohachanu que caohachae carijieein ichaaojoein sacuhanune. <sup>25</sup> Aihana jaunna jaiti ichaojoreeunni, inara



coroatajanichaaunne Jesocurisito ere esenetaain, tonoraain raotojoein rachoojoein jeelai amuritoheriin neeichene coina. <sup>26</sup> Nitohanihana jaunna coaiten enacoauneein inara aina nereeunni. Nii banate raotojoein Cana Coanera Calaohi Jesocurisito coroejeriquicheein, caohatiin cana belaihana jaun.

<sup>27</sup> Atiin coujurihu Jesocurisito coitucuera neein nenea tocohaneein, inara suujua coaraain inara ichao que ichaaoche. Inara coaraana uhene rijitoeun niqui, nechaainti nainerichaaunni. Jana inara coaraa uhenihanune nihanatiin, jiniquiin laraajiin Jesocurisito ere tonoraain neeuche atiin. Nii inara aina nejeratenacaauru coasijirilanaala raotojoein neeuche atiin.

<sup>28</sup> Nitohaneein neeichenete chaque casineeichene coaracuruha inara aina nejeratenacaaurune, raajenihane Moconajaera rene taca cuurichaine coitucuha cuurureein. Nitohaneein coitucuhinte esinae rauhijiriin Cana Coanera coreniha jianacoo neeichene coitucuha cuurureein, que acaauru notaarichaaain Cana Coanera jaun.

<sup>29</sup> Coatihau raujiaain esenetaaichene coinaacha jianacoo inara mitai Jesocurisito. Coreniha necairichanaane maa-jeen abaantaain neeichene coinate jianacoo inara mitae.

<sup>30</sup> Ita rijitoeinte necairichanaa abaantaain laraajihacache. Inarate necairichanaa abaantaanulu laraajiine coaraquichelu. Nii rijijieine chu nii inara rai beeuruhane tocohaneein laraajiin enanetojoein necairichanaa abaantaain neeun.

## 2

*Suujua coaraa Jesocurisitone rijijieein inara suujua coaraain neeuche.*

<sup>1</sup> Inaderaaichene nihanatiin inara belaaain, inara coroatajanein, inara suujua laraajiaain, naaonjoaan Jesocurisito suujuena jaun, <sup>2</sup> ita belain raotojoein jiniquiin neeuche, coujurihu Jesocurisito ere tonoraera neein nenea tocohaneein. Aihuna inara coaracaunne, raotojoein rachoojoein ne.

<sup>3</sup> Coa leeochoaauru choae ininaa coacuhin, leeochoaauru que necohasitanaa coacuhin nihache. “Acaaurute jian cana amuritoherihure,” naaiche neechate caohachae.

<sup>4</sup> Coa inara caohacha nuhacha que coacuhin inaraacha ichai ichaaain nihache. Leeochoaauru rai netonai caohachanu quene maa-jeen nelateneni coacuhin ichaaain neeuche.

<sup>5</sup> Charijieein teeinti suujua coarae Cana Coanera Calaohi Jesocurisito. Nii rijijieein inara suujua coaraain neeuche. <sup>6-7</sup> Jerichanejeein Cana Coanera rijijieein niha natiinte,

Cana Coaunera letono neein cacha neein nejanoaa natiinte, “Naaonjoaina Cana Coaunera rijijieein neeun,” naain erenelu. <sup>8</sup>Nitohaneeinte nejanoaain ichauhena neein letoaa Cana Coaunerana jaun, nere tonoraain leeocho ataibinae necojenaachara rijijieein coroso que ohe, Cana Coaunera rijijieein nihanatiin.

<sup>9</sup>Nii jaunte satiin leeocho cocoinanacaihuri choae jauhecotojoeriin Jesocurisito cocoinae Cana Coaunera, <sup>10</sup>jataain cocoinanacai neein nihane coitucuhin, nere tonoraauruha saain dedeeu nenacaauru, caa chauratane que nenacaauru, saain cana asae nenacaauru, naaonjoaihunri nihanatiin nere tonoraauruhane coina. <sup>11</sup>Jataain acaauru curuaanaanu que Jesocurisito tiha Cana Inaca Cana Coaunerane coitucuhin, “Iite Cana Curuaanaa neei, nitohanein jeriha Cana Coaunerana jaun,” naain ereeuruha saain caa chauratane que nenacaaurune coinatate satiin leeocho cocoinanacaihuri choae jauhecotojoeriin Jesocurisito cocoinae Cana Coaunera.

*Chauratane que nenacaauru rai cono rijijieein neeuruha Cana Coaunera esenetaaurerane*

<sup>12</sup>Aihana jaun, caa ena inara caje coriaae inara caje nihanune jaun, inara aina nihanune bana quere tonoraraae-tohichene amuritoheriin quere tonoraauche. Inara suujua coaraain, raotojoein Jesocurisito ere tonoraain neeuche atiin, inara casetecaa Cana Coaunerane coataa. <sup>13</sup>Inara coroata-janerichaaain Cana Coaunera, inara suujua coaraain nere tonoraain niicha jerei ichaquichene coina.

<sup>14-15</sup>Chatohanai amihanenaa que inara letoaera nihane, nii inara letoaera que chaque ere lanaala raotojoein ichacuche, nabana baaso chaquichene inara necoejechanuha chuneine coataa. Nechu aansai ataibinae cachaauru quete laurijiraquiin neeiche. Aihana jaun coa nohanein, cacha coritaain, asijiauhin, naosatein, naaonjoaain nihache, Cana Coaunera Calahineein neeichene jaun.

Aihute neneeine inara que tonaain baasoneein chaque erei. Cana Coaunera Ere tonoraachene corenihate jianacoo osa que lanaala neeichene coitucuha cuurureein nii inara curuhacaain nenacaauru, Cana Coaunera coitucuruhi cachaauru.

<sup>16</sup>Nitohaneeinte coitucuha cuurureein, ichaonaa tera Cana Coaunera ere que ereeiche acaauru raine.

Nitohanein neeichenena raotojoein nereeunni, coaiten enacooaunein cau turuha Jesocurisitone, inacojoein laraajiin inara relaenihanune coitucurichaaunine jaun.

<sup>17</sup>Chanu nihei coaraain casohin cajaanoruha Cana Coaunera Ere bihanu inara raine coreniha ne. Nenacaaenna

jian raotojoein nereeunni ohanune nihanatiin, atiin Cana Coaunera Calaohi Jesocurisito ere tonoraa curiquicheeina jaun.

<sup>18</sup> Nitohaneein raotojoein nihanune jaun, carijitoein caniha raotojoein neeuche inara netonai.

*Timoteo letoanaa jeriha Faboro ne*

<sup>19</sup> Jeriha Jesocurisito nena, enanecoojoa Timoteo letoaaene rijitoeun, inara coaraa uhane coina, inara coaraain chunocoha que carai beratihane raotojoein nihanune coina.

<sup>20</sup> Coatihanihei nii Timoteo rijijiein coaaucaanne rijijiein inara caohachanu que coacuhin nei. <sup>21</sup> Cana Coaunera Calaohi Jesocurisitohacha jerei ichana amuritoheriin acaauruhacha ichana jereeicha que coaacuruha saain nii leeochoauruna jaun. <sup>22</sup> Nii coitucuhichene tochaneeinte caohatiin cacorataane Cana Coaunera Ere beenaa que nii Timoteo, Fojiara coroatajaniha rai calaohine rijijieinte cacorataane.

<sup>23</sup> Cha teeinti ichacurureein caniha cocoinanacaihuri. Inae nii coitucuhanunena letoaaene rijitoeun, inara coaraa uhane coina niqui. <sup>24</sup> Jeriha Cana Curuaanaanena, canu netonai inara coaraa ureeunni enanecoojoa.

<sup>25</sup> Caraita caohachare nii cacorataaneraannu que inaraacha letoailu cana nejera Efaforoto letoaanu ichoaichanihane. Acate laraajiin cacorataane camijianeeo que. <sup>26</sup> Cunaitihane coitucuhichena jaunte, nii que suujua rohecaeriin nihana jaun jataain inara coana jere. <sup>27</sup> Esinaete chuhisi rauhijiriin banejelanaala ninauhene neein cunaitelu niqui. Nete cairichaaajoaain coaraana jaun rautae Cana Coaunera. Coatihaleinjiin acaacha cairichaaajoaain coaraai Cana Coaunera, canu netonai nihanatiin techu cairichaaajoaain coaraana jaun rautae Cana Coaunera, ohane ena amuritoheriin jataain inaderaain nihanune coataa.

<sup>28</sup> Nii jaunna letoanaa jereeun, luhecotariin turuhin inara coaraa uhane coina. Inara netonai coaiten coaraain raotojoein rachoojoein neeichene coina. Nitoanihanena canuhetonai raotojoein niha cureeunni. <sup>29</sup> Inara coaraa uhane, corojeein belaaain raauche, coujurihu Cana Curuaanaa Jesocurisito coreniha ita nejera neein nena tochaneein. Jerichanejein chu rijijiein nenacaauru belaihuhe. <sup>30</sup> Basijiin lanajeje Jesocurisito jerenohin ichaane coreniha oha ne. Inara raajenihane canu coroatajanenanaine neeichene janate, lunaa nitohanai ichana saijiein acaacha canu coroatajanelu.

## 3

*Ena nena Cana Coaunera Ere rauhi que acaauru relaa Faboro ne*

<sup>1</sup> Cana Curuaanaa Jesocurisito coitucuera neein neeichene jaun raotojoein rachoojoein neeuchera chasocuru. Jauriaana inara rai laenasihunlu niqui. Nena jerichanejeein coaiten enacooauneein caa laenaain letoareeunni, raotojoein coitucuhin neeichene coina.

<sup>2-3</sup> Coaracuche, “Esinæ rauhijiriin Cana Coaunera Ere tonorana jeriquichene, inara jaberoco cari sauhichenete neere,” naain inara coritaa nii nechua aansai, jaberoco cari saaurerane coataa. Nitoaneente niqui cojunacaacooa nitoanaine coina cacha relaelu Moisesa inoaenlu niqui. Nete inae cau chauratane que turuha Jesocurisitone jaun, inae nene nitohanai, inae Jesocurisito Suujue que cana suujua cojunacatiha Cana Coaunerana jaun.

<sup>4</sup> Canuhetonaina Israeli nefoerate esine neein- Moisesa aitoonjoan tonoraera neein neeunlu jauriaa itolere amuritoheriin. <sup>5</sup> Inae fosa janoniha nejanoaanune janate, cajabereon cari jiununuhin moloorelu, Israeli esine nichaaun- Israeli niha canu inacane jaun. Canuna Beenjamiin lauri caje nefoeratenaa neeun. Ebereeo ere quete ereeure cafojiaraauru, jerichanejeeina chu acaauru rijijieein Ebereeo ere que ereeun. Canuna fariseeo neein Moisesa aitoonjoan rijijieein ichaera neein neeunlu. <sup>6</sup> Casuujua coarihei amuneeinne Cana Coaunera Calaohi Jesocurisito ere tonoraaurera cairichaeriin nerejetoonlu. Jatainna rauhijiriin Moisesa aitoonjoan rijijieein icharaaetoonlu.

Nii jaunte caque chaque erenaa nainenelu chunei.

<sup>7</sup> Nitohaneente carai nelateenneein nelu carai nii Moisesa aitoonjoan niqui. Nena inae canu ichao coriha Jesocurisitona jaun, inae enene jianeun, inae nelateniha caraine jaun.

<sup>8</sup> Nitohaneente inae Cana Coaunera Calaohi Jesocurisito coitucuhane jaun, carai inae nelatene, nii jauriaa carai nelatei. Cana Coaunera Calaohi Jesocurisito ere tonoraanuna jaunna jitariin nii itajeeun. Coatiha canu rai chaque nelatejeehai nii jitariin canuhacha itajei, inae que jaolecohane jaun. Cana Curuaanaa Jesocurisito coitucuhin <sup>9</sup> aina nihanune coreniha inae chaque nelatihei nii jauriaanejeein nena. Coatiha nii Moisesaacha aitoonjoan tonoraanune coreniha jianacoo caeterihei Cana Coaunera. Jesocurisito esenetaanune corenihate, jianacoo caete Cana Coaunera.

<sup>10-11</sup> Aihana jaunna Cana Coaunera Calaohi Jesocurisito suujua que suujuaquiin nihanune jereeun. Acaihanejein nitohaneein nihanunena coacuun. Charijiein teinti

necairichanaa abaantaain ohane caje ichanaain nelu Cana Coaunera Calaohi Jesocurisito. Nii rijijieeina canuhetonai nenea jereean.

*Itolere jianeinna satono que turuhane reentiaain laraajiin nereeunni.*

<sup>12</sup> Coatiha, “Inae esinae rauhijiriin aca jerihane rijijieein nihanu,” naain irihanune jaun aitohaaun. Nena laen Aca jerihane rijijieein sacureeunni, caa baiha rijijieein nihanune coina.

<sup>13</sup> Coatiha, “Rijijieeinna inae neeun,” naanune caun aitohaaun. Itolere canuhacha icharaaetilu jianeinna jelai choae jauhecotojoeriin laraajiin nereeunni satono que tiaain, <sup>14</sup> Jesocurisito aina cuain cana rai niicha teeni tihane coina cana raain nihalu Cana Coaunerane jaan raanune coina.

<sup>15</sup> Caitono tocohaneein coaaucaachenete ne, esinae rauhijiriin cana suujua coitucuhin, Jesocurisito esenetaeraneein ijiin niha cana suujuane coina. Jana ainihanete, inara que nii coaratereein Cana Coaunera, inara netonai nii coaraain coitucuichene coina. <sup>16</sup> Nete laen inae nii coitucuujiacachene rijijieein tonoraain ichaohacachene caohachae.

<sup>17</sup> Chasocuru charijieein teeinti cha ichaain neeun, nii rijijieein inara netonai cha ichaain neeuche. Chaen nii aihacaanune rijijieein nenacaauruhacha ichai rijijieein cha ichaain neeuche inara netonai.

<sup>18</sup> Inae araai saain aitocooaun. Niite jataen canu inaderajae. Atiinne coaiten aitoreeunni. “Cana Coaunera coitucuhanu,” naainte niqiu ere cacha tabaauru, nete satiin coreniha coroso que ohin nihalu Jesocurisitone saijieein aina nejeratanaa tocohaneein ichaaore, joenreein necairichanaa abaantanaa nainecurenihane jaun.

<sup>19</sup> Nitohaneein ichaonacaaurute nitajiha cuurureein, necoejena charaneein ataibinae rijijieein ichaauruhana jaun. Cana Coaunera coacuelanaala, acaihanejein caa chauratane que nenacaauru itolereeicha que coacuruhane jaun. <sup>20</sup> Nitohaneein nihaacache laen cana. Dede curuaanaa neein niha cana Curuaanaa Jesocurisitona jaunte, dede cocoaicha neein nihaacache. Aihana jaunte enacoauneein dede caje fauha uha nii jianacoo cana mitaera Jesocurisitone cohajihacache. <sup>21</sup> Acate cana jaberoco coriha cureein culocohin rai jaberoco tocohaneein necaohacha que necaohachaaain. Itolere amuritona nainihane jaan aina cuainte nitohaneein ichareein.

## 4

*Raotojoein inetono janonaa bana rachoojoein neeuche*

1 Nitohaneein rauhijiriin Cana Curuaanaa ere tonoraauchera cacoelaichaauru chasocuru. Jatainna inara coaana jeretoon. Inara ainana raotojoein rachoojoein neeun, quesenetaaichene coreniha Cana Curuaanaa coitucuhichene jaun. 2 Aonacuchena inara rai aitete, acaauru rai aitocoiche. Ita aina obaejerihuruhane jianeeincha, jiniiquiin ita belaijieeincha neeuruhine, nii Ebodia, Siintique, enecuru, naaonjoaihunri coujurihu Cana Coaunera coreniha cana nejera neein nenea tocohanein.

3 Nii Filipoo nihanune bana saain Culemente, leeochoaauru, naaonjoain aina cajiniichaain ichaonaa tera erenaa que amihaneeuruhallune jaun. Acaauru curuaate inae laenanohinein ne ichaonaa tera- Cana Coaunera Quiricha cuhane.

4 Raotojoein inetono janonaa bana rachoojoein neeuche, Cana Curuaanaa Jesocurisito aina neeichene jaun. Aonacuchena coaiten inara rai aite. Raotojoein rachoojoein neeuche.

5 Aihute esinae rauhijiriin inara amute cacha belaina in- aera cachaneein neeichene coaraain inara coitucuurumiin saain cachaauru itolere bana. Inae cataainjia turuha Cana Curuaanaane.

6 Jiaonriha aansijiin laaojiri coreniha nererojoecaaiche ne. Niha inara que chatohanaine Cana Coaunera corojeein bajaain, rai beeuchete coitucuhine. 7 Nitohaneein ichaquich- enete, inara suujua rachoojiaa cureein Cana Coaunera, rao- tojoein neeichene coina.

Nitohaneeinte itolere cachaauruhacha coitucunojoi amurijiriin raotojoein ichaonaanaja tereein inara rai Cana Coaunera. Nii Cana Coaunera tenojoin cana suujua rachoojiaerate inara suujue suujuatereein Jesocurisito aina jiniiquiin neeichene coina.

### *Coa cajihaneein inara suujua coaracache*

8 Satononejeeinne ena cuhane ichei caa que erereeunni. Coa cajihaneein inara suujua coaracache. Acaihanejein rauhi cuhane cuaain cana suujuatera erenaa que inara su- ujua ereein nii que coaucuche. “Leeochoaauru belain, caohatiin leeochoaauru coaraain, caohatiin camijianeonne maajeein ichaain, naaonjoain nihanunete caohachae,” naain inara suujua tocharaain inara suujua coaracuche.

9 Nii inara relaanulune jana aonaain esenetaaichelune to- cohanein neeuche. Charijieein teeinti cuu nihanune bana quichao que ichaorejetoon, nii rijijieein inara netonai cao- hachaain inara ichao que ichaoche. Nitohaneein neeich- enete, inara aina niha cureein cana suujua rucuhera Cana Coaunera, raotojoein neeichene coina.

*Cairicheineein nihanune nihanatiina jerichanejeein raotojoeein nereeunni.*

10-11 Tabiicha carajaain cacaoauquichene jaunna, Cana Curuaanaa coroejeeun. Naaonjoaainte, “Cocoaucurenera,” coatiha naa casuujuane caaun caitono nihei, neniha chuni letoaichene jaannune jaun, cacaoaichene jaannu coriqui letoaeneichene coitucuhanune jaun. Coatiha inara caje chaelai bajaa caitono nihei. Cairicheineein nihanune nihanatiina jerichanejeein raotojoeein nereeunni. Inae nitohanein nerelaain nihanune jaun. <sup>12</sup> Aihanune banana necairichanaa coaraain neeun. Ai banana, chaque latijiojiri lanaala neeun. Nii jaunna itolere necairichanaa, mijitena, naaonjoaain ichaonaa que ichaonaa coitucuhin neeun. Inae nitohanei coriaanune jaunna, neniha chaelai caraine nihanatiin chaque tonajelanaala neeun. <sup>13</sup> Jatoroaaina neeun, chatohanein caetera nihane abaantaain nihanune coina. Nitohaneinna joaenreein abaantana naineen, casuujua lararajiaa cacorataaniha Cana Coanera Calaohi Jesocurisitona jaun. <sup>14</sup> Chaen caohachate ichaquiche, necairichaae-caaunne jana canu rai coriqui letoaain.

<sup>15</sup> Coaaquiche chachu inara netonai natiin, taolu inara ratiriin Masedoniau cuhanune bana techu, inara Filipoo Jesocurisito ranojoneein neiniquichene coaiten carai coriqui letoaaichelu. Acaihanejein inaraachete Jesocurisito que cacha relaanune nunuhetihanune caje coaaneein cacorataanera neein neeiche, Cana Coanera Calaohi Jesocurisito que inara relaanune cainaera rijijieein. <sup>16</sup> Atiin Tesalonecau nihanune jana techu, coroata sai cuhane coaiten le cachaauru cachaauru caje coriqui taojiajeein carai letoaaichelu.

<sup>17</sup> Coatih cacorataaneichene coina caitono nihei. Nitohanein cacorataaneichene corenihate jeelai choae jauhecotojoeriin nii cainaa cureein Cana Coanera dedeeu.

<sup>18</sup> Ena cuhanena raaun latichaaunne amuritoheriin Efaforoto aina inaraacha letoai que jojohin. Nitohanein inara suujua caje coaaneein ichaquiche Cana Coanera notaracaana jaunte, nii coaraain rachoojoe Cana Coanera, nitohanein ichaera cacha rautaana jaun. <sup>19</sup> Nii jaunte chaelai lateein neeichene inara rai ecotiha cureein Cana Coanera, Jesocurisito ere tonoraera neeichene jaun. Acaachate Cana Coaneraneein nihana jaun nitohanai ichana naine.

<sup>20</sup> Aihana jaun coanete Cana Inaca Cana Coanera coroejeein nihacache inoaenlunetiin. Nii rijijieein neeine atiin.

*“Inara coaauca jera Faboro,” naain beeuche.*

<sup>21</sup> Satiin nii cuu nenacaauru Jesocurisito coitucuurera rai, “Inara coaauca jera Faboro,” naain beeuche. Cau caniha Cana Coaunera Calaohi coitucuurerate chu inara coaacure. <sup>22</sup> Romanocuru curuaanaa loreri asaae nenacaauru netonai techu inara coaacure, saain cau nenacaauru Cana Coaunera coitucuurera netonai techu inara coaacure.

<sup>23</sup> Inara suujua lararajiaain, inara coroatajaneene Cana Curuaanaa Jesocurisito.

Inae jianichaaun.



## Colosau nenacaauru rai Faborohacha letoai leinjiin

*Chatohaneein neeiche Colosau neiniquichene.*

<sup>1</sup> Canuna Cana Coaunera jerenohineein, rai Calaohi Jesocurisito letono- afosotoro Faboroneeun. <sup>2</sup> Jesocurisito coreniha cana nejera Timoteeo aina jiniiquiine caa quiricha laenacaanu, satiin Cana Coaunera cachaneein, canacaanu suujua rijijieein Colosau Jesocurisito coreniha canacaanu nejeraneein neiniquichene rai. Cana Inaca Cana Coaunera jeelai amuritoheriin inara coroatajaneeine jiniiquiin raotojoein neeichene coina.

*Jesocurisito esenetaeraaru rai Cana Coaunera baja  
Faborone*

<sup>3</sup> Inara rai Cana Coaunera bajaacaanune naineeine, itolere bana: “Narihara Cana Coaunera,” naain Cana Curuaanaa Jesocurisito Inaca Cana Coaunera coroaecaanu, <sup>4</sup> aiha Jesocurisito esenetaain neein, satiin Cana Coaunera cachaneein nenacaauru aina jiniiquiin ita belaaain neeichene coitucuhacaanune jaun. <sup>5</sup> Inae dedeeu inara que banijiaain rucuhenojoneein nena rariquicheeine cohajein neeichene jaunte, leeochoaauru aina ita belaaain neeiche. Cana osa caje cana ichoteraneein nena erenaa caohacha aonaquichene caje coauneinte, nii inaraacha cohajei sirichaneein neeiche. <sup>6</sup> Nii erenaa inara rai beratenojote, itolere chauratane sacutaain coitucuhin, inae rijijieein ichaaoore cachaauru. Charijieein teeinti esinae rauhijiriin cana belaitoha Cana Coaunerane beeuruhane aonaaain, esinae rauhijiriin erenaa nihane esenetaaichelune rijijieein. <sup>7</sup> Nii quete jeriha Jesocurisitone rijijieein inara relaaain nelu, nii jataain canuhacha belaineein nena Efaforasi. Acate canacaanu amihaneon que canacaanu coroatajaneraneein, inara rai jeriha Jesocurisitone rijijieein cha ichaeraneein nena ne. <sup>8</sup> Aca techu canacaanu rai, inara suujuatiha Cana Coaunera Suujuene rijijieein leeochoaauru belaaain ichaohichene benaa belu.

<sup>9</sup> Nii jaunna coituhacaanune caje coauneein jianelanaala inara rai Cana Coaunera bajaacaanu, inara que jeelai amuritoheriin niicha jerei coitucuerateein, itolere inaraacha ichai coitucuhin, rai Suujue jerenohin coitucuhin, naaonjoainchene coina. <sup>10</sup> Nii ainata Cana Curuanaacha jerei rijijieein itolere caohacha nejesina ichaain neriquicheein, jeelai amuritoheriin Cana Coaunera coitucuhin coujuriu Cana Coaunera

cachaneein nenea tocohaneein. <sup>11</sup> Nii coinana itolere amurijiriin niicha ichana nainei aina cuaain, inara laraarajiaa Cana Coaunerane, laraajiin nererojoecaelanaala neeichene coina bajaacaanu. <sup>12</sup> Nii ainate rachoojoein, nii satiin notaracaae rai cachaneein nenacaauru rai niicha teenu- rai Cojoanonaa raain neeichene coina, inara rai teranuneein nenea Cana Inaca Cana Coaunera coroaeguiche.

<sup>13</sup> Cana Coaunerate, cana curuaanaaneein niha moconajaerane jana, caje cana ruluhin Cana Curuaanaa niha rai Calaohi Jesocurisitone coina rai Cojoanonaa que cana telu. <sup>14</sup> Nii rai Calaohi corenihate cana osa caje cana ichoteratein, cana que suujua acatelu Cana Coaunera.

*Ohalu Jesocurisitone corenihate Cana Coaunera aina raotojoein ichaohacache.*

<sup>15</sup> Chabana Cana Coaunera coarahaacache niqui. Nete rijijieein nenea- rai Calaohi Jesocurisito coaracaache. Acate, jauriaanejeein rai Calaohineein nelu, itolere coaunaane ajiniha caje coauneein. <sup>16</sup> Aina cuaain techu itolere dedeeu neenihuru, chauratane que neenihuru, chabana coanojoinelanaala neenihuru, chabana inanacaelanaala itolere ichana naineraneein itolere que mijiaaaineein neenihuru, naaonjoainuri coaunaeratelu Cana Coaunera. Satiin niichurute raineein nihane coina, aina cuaain coaunanojoeinein nelu. <sup>17</sup> Nitohaneente itolere ajiniha nenaanelu Jesocurisito. Chaen techu coreniha, Aca jerihane rijijieein neeure satiin niicha coaunaauri. <sup>18</sup> Chaen techu satiin niicha ranojoneein nenacaauru, rai iclesia neein neeure. Nii iclesiate Jesocurisito jaberoco ne. Jana nii jaberoco coturite jeelai Jesocurisitohacha ne. Aca techu itolere ajiniha nihilune rijijieein, aca satiin ajiniha o caje ichanaelu. Nitohaneente nelu, itolere que satiin ichoaichateraneein nihane coina. <sup>19-20</sup> Jesocurisito aina itolere bana nenea jerihane jaunte, aina cuaain satiin itolere cana rai chauratane, dede, cana janonaa, naaonjoainuri que neein, que nejeratenaaneein neeuruhane caje, aina raotojoein neeuruhane coina ichaelu Cana Coaunera. Niite ichaelu, coroso que rai coichana jaohin ohalu Jesocurisitone aina cuaain.

<sup>21</sup> Jauriaalute niqui Cana Coaunera cacha nelanaala aina inara suujua cuhane que nejeratenaaneein neeichelu, nechu baasohacha ichajeein ichaohichene jaun. <sup>22</sup> Nete laen inae enene, aina raotojoein rai cachaneein que banijiaaineein neeichene coina, inara que suujua acatelu Cana Coaunera. Nii coinante joaenreen cacha rijijieein, atinanohinelu rai Calaohi Jesocurisito. Nitohaneente inara

coulucoelu, nacatiha cha ujuaihonelanaala, osa colane nee-ichene coina. <sup>23</sup> Nete nitohaneein nena jeriquichene, inara rai benojoiniha ichoteratenojoiniin neriquicheeine jaanune jana, aonaain esenetaichelune rijijieein, leinjiin acaacha cohajeein, leecha ichana coacuelanaala neeichene caohachae. Nii jeelai inara rai beratenojointe, satiin chauratane sacutaain benojoiniin ne. Chaen canu Faboro nichaaunnena nii que cachaauru relaaurera coroatajaneraneein neun.

*Jesocurisito cachaneein iclesiacuru coroatajaneraneein niha Faborone.*

<sup>24</sup> Ena inara coreniha necairichanaa coaracaane jaunna rachoojeeun. Nii Jesocurisito jaberoco-niicharanojoiniin nenacaauru- iclesiacuru coroatajanena quete Jesocurisito coreenraniha necairichanaa coarae cajabereeo. <sup>25</sup> Nitohaneainte Jesocurisito cachaneein iclesiacuru coroatajaneraneein nihanune coina, canu telu Cana Coanera, inara caohachanu que, inara rai niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina.

<sup>27</sup> Nii jataain caohachaneein niha Jesocurisitonete, satiin Jorionelanaala nenacaauru que coitucuerate Cana Coanera. Nii asinojoiniin nena niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina.

<sup>27</sup> Nii jataain caohachaneein niha Jesocurisitonete, satiin Jorionelanaala nenacaauru que coitucuerate Cana Coanera. Nii asinojoiniin nena niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina.

<sup>28</sup> Nii jaunna Jesocurisito que cachaauru relaacaanune, itolere niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina. <sup>26</sup> Nii niicharatenojoi beebjihanu, aca jerihane rijijieeine coina.

<sup>29</sup> Nitohanei amihanenaa ichacaanne coina canu lararajiaain, itolere ichana nainichaaunne jaanu tiha Jesocurisitone ainana caa niicharatenojoi beebjihanu, aca jerihane rijijieeine coina.

## 2

<sup>1</sup> Laodiseau nenacaauru, chae inara, chaen chabana canu coaraelanaala nenacaauru- canu benaa caje cacoitucuereraauru, naaonjoainuri neeichene corenihane, jataain mainajeriin necairichaaun. <sup>2</sup> Nitohaneinne caohachaaain rai suujua lararajiaain, jeelai amuritoheriin jiniiquiin corajeein, itolere bana ita belaaain neein, nii chuni que Cana Coaneraacha coitucueratelanaala nena- Jesocurisito coitucuhin neeichene coina jataain laraajihun. <sup>3</sup> Esinae rauhijiriin Jesocurisito coitucuhin neeichenete, rai caohacha aina itolere coitucuhin neriquicheein. <sup>4</sup> Nabana chuni inara coritaa

raotojoein inara rai ereein, osa que inara saruhane jana, esenetaaichene coataane caa inara rai beeun. <sup>5</sup> Inara aina canu jaberoconeein nenihanune niha natiine, itolere bana canu suujua cuhane inara coacuun. Nii jaunna jiniiquiin rauhijiriin inaraacha ichai ichaain neein, Jesocurisito esenetaaichene jaun, aca jerihane rijijieein ichaohichene coitucuhanune jaun jataain rachoojoeun.

*Ena nena ichaonaa teraneeinte ne Jesocurisito.*

<sup>6</sup> Nitohaniane jaun jeriha Jesocurisitone rijijieein ichaohichene coina esenetaaichelune jaun, itolere bana aca jerihane rijijieein ichaaoche. <sup>7</sup> Aihana jaun, leinjiin acaacha jerihane rijijieein inara suujua aina cutaain ichaohin nii acaneein nena rijijieein ichaohichene coina inara relaauruhalune jaan esenetaaichelune rijijieein, itolere bana Cana Coanera coroaecuche. <sup>8</sup> Itolere que necohalajiin neeuche, nabana nechu joaereen nichao que inara coritaain nena jereranihane, esenetaain neeichene coataa. Nii cacha coritaeraneein nenacaauru, coatiha Jesocurisitohacha jerei icharaneein neuruhi. Acaaurute nechu Cana Coanera coitucuelanaala nenacaauru cachaauru ichao que cacha relain, moconajaera icharatenohin icharaneein neeure.

<sup>9</sup> Jerichanejeeinte rai Inaca Cana Coaneraacha ichai ichana naineraneein ne nii rai Calaohi Jesocurisito. <sup>10</sup> Nii jaunte Jesocurisito aina neeichene jaun, rai Inaca Cana Coanera aina netonai neeiche. Nii Jesocurisitote, itolere que laraajiin satiin Cana Coaneraacha cocoainanojoein nenacaauru Curuaanaaneein ne. <sup>11</sup> Chaen techu inae Jesocurisito aina neeichene jaun, inae cojunacatenohineein neeiche. Coatiha rai jaberoco que coujunacatenohineein neeuruhalu Jorioocurune rijijieein nihei. Niite inae necoriha inara suujuane jaun, inoaenlu osa que nesarujueein ichaohichene jianein neeichene jaan coujunacanein rauhijiriin Jesocurisito caje unaa neein ne. <sup>12</sup> Nii atinaain conautenojoein nihalune caje ichanaalu Jesocurisitone rijijieeinte, inara atinaain inara itajihane rai niha osane caje, Curisito aina cuaain nichoteeichene coujunacaniha acauhanau tein baotisanojoein neeichelu. Nitohaneente neeiche, niicha ichana nanei ichaain oo caje ichateralu Cana Coanera esenetaain neeichene jaun. <sup>13</sup> Inara Jorionelanaala neiniquichenete jauriaa inara jaberoco que coujunacatenohinelanaala neeichelu, jauriaanejeein nena Moisesa tenojoi rauhi tonoraelanaala nitajenaaneein neeichelune jaun. Nete laen inae ena, Jesocurisito aina jiniiquiin ichaohichene coina, inara rai ichaonaa tein ne Cana Coanera, nii Jesocurisito cana osa

caje cana ichoterateraneein nihane jaun. <sup>14</sup> Nii jauriaanejeein nenea Moisesa rai rauhi tonoraenihacachene jaunte niqui, caseteco coaracaachene rai nihacachelu. Nete coroso que ohalu Jesocurisitone aina cuaain, nii itajeein nelu Cana Coaunera. <sup>15</sup> Nitohaneeinte Jesocurisito aina cuaain, moconajaera aina rai letononeein nenacaauru amuritoheratelu Cana Coaunera, satiin coarajeurera notaracae tenajaain.

*Itolere dedeeu nenaacha que coacuhin neeuche.*

<sup>16</sup> Aihana jaun, inara ichao que ichahin, inara lenone que lenoneein, inara coco que cocohin, naaonjoaain neeichene, nihei chuni nii que ereein nenea nainei. Jiaonrihachu nebetacanaa cojoanonaa bitoaain neein, atene ujuarichuru bitoaain, naaonjoaauruhane rijijieein ichaohichene coina inara counujeeunruhane tonoraachene. <sup>17</sup> Nete satiin necorereein inae ecu tihane bana. Jana Jesocurisito tenojoi ichaonaa chabana necorerinaain, niheichu chabana satorinaain. <sup>18</sup> Jiaonrihachu baaso ichaa inara beein, acaauru rijijieein neeichene coina, inara rai aitiin neeu-ruha nii Cana Coaunera letono aanjeraauru letononiha no-coetiin, acaauru notaaca Cana Coaunerane beein, nechu jeriha acaauru suujuane rijijieein ichahin necohasitaacha que nenacaaurune tonoraain neeichene. <sup>19</sup> Jesocurisito cachaneein rai suujua cuhane sirichurenihane jaunte, jeriha Cana Coaunerane rijijieein, jiniiquiin neein ita belaaichahene coina cana teein niha Jesocurisitone saijieein ita caje neleruha cachane jerecure.

<sup>20</sup> Jesocurisito esenetaain neeichene jaunte, inae nii jauriaanejeein inara relaauruhane jaan jianeein neeichelu. Aihana jaun, inae nainiheiche ichaauruha Jesocurisito coitucuelanaala nenacaaurune rijijieein ichaohichene. <sup>21-22</sup> Nii jaiti Jesocurisito coitucuelanaala ichaohichene bana: "Jiaonriha dadaain, niheichu quiichene. Niheichu inara biji cuhane teberiana nainiheiche," naain dadaain quiichene caohateein inara relaauruhane jaante, nechu cachaaauru suujua caje unaaneein nihane jaun inae nitaje. <sup>23</sup> Esinaete chuhisi niqui rauhijiriin Cana Coaunera coitucuera rijijieein neein aitocure. Nete cana jaberoco cairichaeraneein ne. Nii acaauru aitoonjoan osaacha que coacuhin nenea caje cana suujua corenaa nainenihane jaunte, nii chaque nelatene.

### 3

<sup>1</sup> Nitohaneein inae ohin nitajenaa rijijieein neeichene caje Jesocurisito esenetaain neeichene jaun, rai Inaca Cana Coaunera aina jiniiquiin, rai raotono nichajai que niha Jesocurisitone jaan-dedeucha que coacuhin ichaaoche. <sup>2</sup> Nii

jaun, inae nainiheeiche Cana Coaunera coitucuelanaala nenacaauru rijijieein coacuhin neeichene. Dedeu nenacaauruhacha que coacuhin neeuche. Jiaonriha caa chauratane que nenacaauruhacha que coaauquichene. <sup>3</sup> Nitohanihana jaun, inae jauriaalu nenea inara ichao que ichaoheeiche, ena nenea inara ichaote, Jesocurisito aina Cana Coaunera aina asinojoneein ne. <sup>4</sup> Nitohaneein Jesocurisito, inara ichao sirichaneein nihane jaunte, inae ecu tihane bana nacoauneein turuhane bana, aina jiniichaain inara ocotiha ureein, aina jiniiquiin necaohacha que ichaohichene coina.

*Jauriaanejeein nenea ichaonaa aina ena nenea ichaonaa.*

<sup>5</sup> Aihane jaun, coaucuruha Cana Coaunera coitucuelanaala nenacaaurune rijijieein coacuhin ichaohichene jianecuche. Jiaonriha joaenreein ene aina ichaohin, quicha nejesina neein ichaohin, ene nejesinaneein ichaohin, naaonjoaain Cana Coauneraacha rautaainelanaala nenea ichaain, chaelai siriquichene chunaain, naaonjoaaincha que coacuhin ichaohichene. Nitohanei ichaonaate jataain cana ichao aasaara ne. <sup>6</sup> Nere tonoraelanaala nitohaneein ichaonacaaurute, jataain mainajeein casetecaeratereein Cana Coaunera. <sup>7</sup> Nii rijijieeinte inara netonai ichaorejetocoiche, jaiti necoreniha inara ichaone bana. <sup>8</sup> Nete inae necoriha inara ichaone jaun, ita cotaairiin, ene aina ichaohichene coinaacha baasoneein coacuhin, inara amute cacha baijiaain, rautanacaai que ereein, naaonjoaain ichaohichene jianequiche. <sup>9</sup> Inae nitohaneein necoriha inara ichaone jaun, jiaonriha jaiti necoreniha inara ichaone bana, inaraacha ichai ichaain, ita coritaain, naaonjoaain ichaohichelune rijijieein ichaonaa nainiheeiche. <sup>10</sup> Nitohaneeinte, ena nenea ichaonaa que ichaohin, ena nenea cachaneein nenea rijijieein, jeriha Cana Coaunerane rijijieein ichaohichene, itolereneein niicha jerei coitucuriquicheein. <sup>11</sup> Aihana jaun, coatiha chaque nelatihei, Curieconein, Jorioneein, Jorionelanaala, leecha cachaneein, cha coitucuelanaala cairicheineein, letononeein, letononelanaala, naaonjoaain nihacane. Jesocurisito cachaneein nihacanete, jataain itolere amurijiriin nelate.

<sup>12</sup> Jataain inara belaitohane jaunte, rai cachaneein neeichene coina, inara janijiin inara raain nelu Cana Coaunera. Aihana jaun, coujurihu inara ichao coreein nenea tochaneein esinae rauhijiriin cairichaaajoaain ita coaraain, ita coroatajaneein, leechaauru amurijiriin nenea coacuelanaala, ita que nererojoecaelanaala, naaonjoaain ichaaoche. <sup>13</sup> Jiniiquiin ita que nererojoecaelanaala

neein, tonaain itaque ereein neeuruha chunocohacurune, que inara suujua acateein, naaonjoaain neeuche, inara que suujua acateein nihalu Cana Coaunerane rijijieein. <sup>14</sup> Itolere baaso caje inara suujua coreein, ita belaaain jiniiquiin neeuche. <sup>15</sup> Nitohaneein neeichenete, inara suujua raujiareein Jesocurisito, raotojoein neeichene coina. Nii cointate inara raain nelu Cana Coaunera, jiniiquiin rai jaberoco rijijieein neeichene coina.

<sup>16</sup> Itolere bana inara rai Jesocurisitohacha beratei coaacuche inara suujua cuhane. Inara suujua que coitucueratiha Cana Coaunerane rijijieein, jiniiquiin ita relaaain, ita suujua aninoaaain, chatohanai ichaaain niha chunine coataa ita suujuateein, naaonjoaain neeuche. Inara suujua aina cutaaain Cana Coaunera corojeein, salmo que nenateein, itolere nenatena Cana Coaunera coroaenanaja que nenatecuche. <sup>17</sup> Itolere inaraacha ichai ichaquichene, jeriha Jesocurisitone rijijieein aina cuaain ichacuche. Jerichanejeeinchu chaelai que ereein neeiche cacha raine, aca jerihane rijitoein ereein neeuche. Chaen chu, nii rai Calaohi Jesocurisito aina cuaain, rai Inaca Cana Coaunera coroaecuche.

*Curisito ranojoneein nenacaauru ichao.*

<sup>18</sup> Inara ene neeichene, inara lanaauru ere tonoraain jerecuruhane rijijieein neeuche, acaachate inaraacha ichanenein ne, coujuriu Jesocurisito esenetaeranein nena tocohanein neeichene coina. <sup>19</sup> Jana inara lananein inara comasaihuru belaaain neeuche, jiaonriha inara comasaihuru cotaairiin coaraquichene.

<sup>20</sup> Canaanaihuru nihanatiin, rai fojiaraauru ere tonoraain neeuruhine. Nitohaneein neite rautaaain coarae Cana Curuaanaa Jesocurisito. <sup>21</sup> Jiaonrihachu, inara acaauru inacanein, inara bereecuru baijiaain neeichene, nabana caoacha coroaecuruhane jianecuruhane coataa.

<sup>22</sup> Fatoroon letononein nenacaauru, cau chauratane que acaauru fatoroonein nenacaauru ere tonoraain neeuruhine. Jiaonriha coarajeeuruhane notaracaaecha acaauru belaihuruhane jerenacauncha acaauru ere tonoraain neeuruhane. Coaracurenihane jana nihanatiin, suujua aina cutaaain, jerecuruha acaauru fatorooncurune rijijieein neeuruhine, nitohaneein jeriha Cana Curuaanaa Jesocurisitone jaun. <sup>23</sup> Itolere inaraacha ichai ichaaain neeichene, esinae rauhijiriin corajeein ichacuche, inara amute cacha rai ichaquichene que coacuelanaala, Jesocurisito rai ichara rijitoein. <sup>24</sup> Inarate inae ecu tihane bana, inara rai aca cana Curuaanaa nihane rai niicha jerei ichara neein neeichene jaun, rainein nena que inara

coreterihani Cana Curuaanaa Jesocurisitone coitucuhiche raotojoein. <sup>25</sup> Nii choae tacaain coatiha nejelauneein chuni coaraain nihei Cana Coaunera.

#### 4

<sup>1</sup> Inara, fatoroon neeichene, inara letonocuru aina caohachaain inara suujua coaraain, rauhijiriin acaauru aina neeuche. Inara netonai leinjiin dedeeu nena Curuaanaa letononeein neeinchene jaun, rai inaraacha ichai beeichene rai neeichene que nainaan ichaaoche.

<sup>2</sup> Itolere bana Cana Coaunera corojeein bajaee baja- jeein itolere que nainaan ichaaoche. <sup>3</sup> Canacaanu rai netonai Cana Coaunera bajaachete canacaanu rai acuujuu joracaaine ne itolereneein cuhin Jesocurisito que Erenaa coitucueraelanaala nena- niicha beratei beebjihacaanu. Nii coitucueraelanaala nena Erenaa canuhacha beebjei corenihane, caa caresero cuhane neeun. <sup>4</sup> Cacoreniha Cana Coaunera bajaachene raotojoein aohana nainecuruhane coina, rauhijiriin nii Erenaa beebje cachauru rai.

<sup>5</sup> Chaen techu Cana Coaunera coitucuhichuru que caohacha nejesina ichajeein itolere bana ichaohichene coarateein, caohachaain coacuhin nii canaacha esenetai que acaauru rai raotojoein beebjeeche caeneenejelanaala.

<sup>6</sup> Nitohaneein ereeichene raotojoein ereeuchete itolere bana rautatiin aonacurumiin aohanraauru. Chaen tonaain ereeuruhane nihanatiin, raotojoein baaso coacuelanaala acaauru tonoraain neeuche.

#### *Necoia Faborone*

<sup>7</sup> Canu suujua rijijieein, Jesocurisito icharatenohi amihanenaa que cacorataanera- jataain canuhacha belaa- Jesocurisito coreniha cana nejera Tiquicote, inara rai canu benaa bereein. <sup>8</sup> Nii coinane inara rene aca letoaaun, inara rai: “Naaonjoaaine nihacaanu,” naain inara suujua lararajaaane coina. <sup>9</sup> Ainate uhe inara laurijiraneein nenaalu- jataain canuhacha belaa- Jesocurisito coreniha cana nejera Onesimo. Acaaurute inara rai caelai benaa beeurureein. <sup>10</sup> Canu aina caresero cuhane nena- Arisitarocote, inara coacue. Chaen Berenabeen calaohiriji- Maroco netonaite inara coacue. Inae inara rai bihanulune rijijieein, inara rene bedainiha nii Marocone raotojoein raauche. <sup>11</sup> Chaen techu Josto neein acaauruhacha curuaatei- Jesoso netonai inara coacue. Acaauruhachate canu araaichuru- Jorioocuru caje, Cana Coaunera icharatenohi amihanenaa que cacorataaneraneein, jataain canu suujua nunaeraneein neeure. <sup>12</sup> Inara laurijiraneein nenaalu Jesocurisito cachanein nena- Efaforasite inara coacue. Acate itolere bana inara rai Cana Coaunera bajaee bajaenaja que, leocha



ichana coacuelanaala itolereneein Cana Coauneraacha jerei ichaquichene coina. <sup>13</sup> Canune nitohaneein, Laodiseau nenacaauru, Erapolisu nenacaauru, chaen inara, naaonjoaineeichene que, jataain coaunajaaoca nii Efaforasine coarajenajacoon. <sup>14</sup> Canuhacha belaaimeein nenaadocotero Locasi netonaite inara coacue, chaen Demasi netonai.

<sup>15</sup> Laodiseau nenacaauru Jesocurisito coreniha cana nejeraneein nenacaauru rai acaauru coaaucaanne beeuche. Chaen Ninfasi aina rai loreri asaae netaojianacaauru coaaucaanne beeuche. <sup>16</sup> Inae nainain caa inara rai canuhacha laenai quiricha reretaain coaraqichene nainaquichene, Jesocurisito ranojineein Laodiseau nenacaauru rai letoaauchete, acaauru netonai reretaain coaracurumiin. Acaauru netonai, acaauru rai quiicha letoai quiricha, letoauruha inara rene ne, reretaain coaracuche inara netonai. <sup>17</sup> Chaen Arquipo rai: “ ‘Atiin ichei Cana Curuaanaacha icharatei amihanenaa ichaauje, nii icharatihalune rijjijeeincha.’ naainte ichei nere letoae Faboro,” naain beeuche.

<sup>18</sup> Inae satonotichaaunne raine Canu Faboronichaaune caraajenhane, caa quiricha cuhane inara coaaucaanne laenaun. Atiin Caresero cuhane nihanune que coaacuche. Jeelai amuritoheriin inara coroatajanemiin Cana Coaunera.

## Tesalonecau nenacaauru rai Faborohacha letoai leinjiin

*Tesalonecau nenacaauru rai laenaauruha Faboroorune*

<sup>1</sup> Canuna Faboro neeun. Inara raina Siribano, Timoteo, naaonjoain nichaanunena laenaain letoarichaanuhin. Saain nii Tesalonecau nenacaauru Cana Coaunera rai ita taojiaera neeichene raina caa laenaain letoacaanu. Saain nii Cana Inaca Cana Coaunera, Cana Curuaanaa Jesocurisito, naaonjoain coitucuhin neeichene raina caa letoacaanu. Inara belain, inara coroatajaneene Cana Inaca Cana Coaunera, Cana Curuaanaa Jesocurisito naaonjoainte raotojoein neeiche.

<sup>2</sup> Cana Coaunera bajaacaanune naineeina, “Nariha,” naain coroejeein, inara rai bajaacaanu inara coroatajanejeein sacuha Cana Coaunerane coina.

<sup>3</sup> Nitohaneena inara coaucuhin nihacaanu, Cana Inaca Cana Coaunera bajaacaanune naineeinna rauhijiriin inara coroatajanerichaaain Cana Coaunera Calaohi Jesocurisitone esenetaain, caohachaaain laraajiin necairichanaa abaantaain amihaneen leochaauru belaaain neeichene jaun. <sup>4</sup> Coichana aina cutaainte inara belai Cana Coaunera. Aihana jaunna, janiijiin Cana Coaunera ranojoein neeichene coitucuhacaanu.

<sup>5</sup> Coatiha joaenreen erenaa rijijieein nihei caa cacha relaacaanune jaan Cana Coaunera Ere. Mijiaainetiinte cacha suujua que tacaе, nitohaneen tiha Cana Coaunera Suujuene jaun. Nitohanihana jaunna esinae rauhijiriin Cana Coaunera Ere neein nihane coitucuhacaanulu.

Inarate canacaanu ichao coitucuhiche, inara aina nihaacaanune bana inara nota que canacaanu coaraquicheluna jaun. Nenacaen inara caohachanu que tejian canacaanu coaraquichelu inara nota que, jerichanejeein caohachaaain ichaohichene coina.

<sup>6</sup> Nii jaunte jerichanejeein canacaanu ichao rijijieein, Cana Curuaanaa Jesocurisito naaonjoain rijijieein inara netonai inara ichao que ichaohiche. Nitohaneen caohacha ichaaain ichaohichene corenihate inara rohecaain, inara cairichaerihure niqui, nete inara coroatajaneen naaonjoaan Cana Coaunera Suujuene jaun, raotojoein rachoojoein Cana Coaunera Ere aonaain tonoraache atiin.

<sup>7</sup> Nitohaneen atiin laraajiin necairichanaa abaantaain raotojoein neeichene jaunte, inara coitucuuruhana jaun, jerichanejeein inara rijijieein ichaonaa caohacha que ichaonaa coaacure saain Masedonia, Acaiha, naaonjoaihunri nenacaauru Cana Coaunera coitucuurera.

<sup>8</sup> Nitohaneeinte Masedonia batane, Acaiha batane, itolere sacutaain Cana Curuaanaa Ere coitucuerateechene jaun, esinae rauhijiriin Cana Coaunera esenetaain rauhijiriin nere tonoraain neeichene coitucuure itolere neein. Nitohaneein itolere neein raotojoein inara coitucuuruhana jaunna, inae cha que erenaa nainenihacaanu canacaanu inae.

<sup>9</sup> Nii jaunte inae acaauru rai cha que irihacaanune late-curene, jauriaa nejeein inara rene turuha uhacaanune jana, canacaanu belaaain, canacaanu raain, canacaanuhacha bee-bejei Cana Coaunera Ere esenetaain tonoraain, nii enuha caje cacha chanohineein nenea inara coaunera niha inaraacha tei jianein raatiriin, esinae rauhijiriin nii ichaohin nenea Cana Coaunera Esine Ere esenetaain tonoraain, nii beebejeeiche leeochoaauru raine coitucuuruha itolere neeina jaun.

<sup>10</sup> Chaen techu enacoauneein dede caje turuha uha nii Cana Coaunera Calaohi, nii oo caje Cana Coaunera ichatenohin Jesusone cohajeichene beebejeeure. Nii Cana Coaunera Calaohi Jesusote cana casetecaeratihane rai niha Cana Coaunerane jana jianacoon cana mitaeranein ne.

## 2

### *Tesalonecau namihaneeo ichaa Faborone*

<sup>1-2</sup> Nii coitucuhichene tocohaneeinte jauriaa nejeein Fil-poo turuhacaanune jana, canacaanu batohin, canacaanu necoejechanuhin, canacaanu que jaolecooruha natiinte, inae enene esinae rauhijiriin aitocooanune coitucuure. Nii coitucuhichene tocoaneeinte canacaanu aina nejerateeuruha nii Tesaloneca cocoaichacurune jana, canacaanu coroatajane Cana Coaunera, acaauru que casilanaala laraajiin inara rai nere bihacaanune coina.

<sup>3</sup> Nitohaneeina joenreein caje rocohin inara relaenihacaanu. Nitohaneein rauhijiriin aitocooaanu natiinte canacaanu ataibinaene been, naaonjoaaunre canacaanu belaiheichuru, chaelai chunei coritana coacuhin joenreein canacaanu ereniriaala que aitona rijitiin.

<sup>4</sup> Canacaanu suujua coarajihana jaunte, canacaanu letoae Cana Coaunera, jianacoon cana mitaain, Cana Rai Ichaonaa Tera Nere bihacaanune coina. Coatiha canacaanu belaaain niha cachane jerena caaun cacha relaain nihaacaanu. Canacaanu belaiha Cana Coaunerane jerena caaunna jerihane tocohaneein cacha relaain nihacaanu.

<sup>5</sup> Nii coitucuhichene tocohaneein, coatiha canacaanu coretequichene coina inara belaihaacaanu. Esinae Cana Coaunerate coaraje.

<sup>6</sup> Canacaanu cocoainaaain canacaanu letoaaain niha Cana Coaunera Calaohi Jesocurisitona jaunte niqiu neere canacaanu rai rauhi. Nena "Naaonjoain canacaanu que

suujua acateein neeine cachara,” naain erenihacaanu inara rai nihanatiin. <sup>7</sup> Nechu jataen joenreein cacha rijijieein turuhin, canacaanu nerotohin inara belaa'in inara jana amuhemuhecaanulu. Charijieein teeinti bereecuru belaa'in fojiae neba. Nii rijijieeina inara belaa'in inara relaacaanu. <sup>8</sup> Coatiha Cana Coaunera Ereeicha que inara relaacaanuneeicha coina turuhin inara aina nihaacaanulu. Inara netonai canacaanu ichao coaraain jerichanejeein canacaanu rijijieein ichaohichene coinana itolere necairichanaa abaantaain turuhin nihacaanulu, canacaanu coichana aina cutaain inara belaa'in nihacaanune jaun.

<sup>9</sup> Jauriaana janotiinnetojoe'in, laraajiin mainajeein amihaneraetoacaanulune coaauquiche chachu natiin. Nitohaneeina canacaanu raajenihane amihane'in, coreniha canacaanuhacha latei coreteein, Cana Coaunera Ere beebjeein ichaorejetocooaunlu, nabana inara cairichaacaanune, chaelai que latejihojoiriin neeichene coataa.

<sup>10</sup> “Baaso chaainjene nihacaanu,” naain iriha cacha natiin, chatohaneein baaso chaain nihaacaanu. Inara, Cana Coaunera, naaonjoain neeichenete rauhijiriin canacaanu suujua coaraain, Cana Coaunera coitucuera neeichene que canacaanu suujua acateein nihacaanune coarajerejetocoichelu. Nii jaunte nene nihei chaelai que ujuaiteein canacaanu coulurujiha chuneine jaannu.

<sup>11</sup> Nii choae tacaainachu calaohi suujua nunaain laraajiaa inacane rijijieein inara suujua nunaain laraajiaain nihaacaanune coitucuhiche. <sup>12</sup> Nitohanihana jaun, coujuriu Cana Coaunera coitucuera neein nenea tocohaneein rauhijiriin ichaooche, nii jauriaa inara rai aitocooaanulune tocohaneein raotojoe'in rachoojoe'in aina neeichene coina inara cotijiaain nihalu Cana Coaunerana jaun.

<sup>13</sup> Coatiha joenreein cacha ere aonajenaa rijijieein Cana Coaunera Ere aonajiheeichelu inara rai bihacaanune jana. Nii jaunna Cana Coaunera bajaacaanune, “Nariha,” naain bajaacaanu. Nii caje coauneeinte esinae rauhijiriin caohachaain inara ichao core'in ichaohichene coarateein neeiche. Nitohanihane cajete esinae rauhijiriin Cana Coaunera Ere nihane que necoarate.

<sup>14</sup> Cana Coaunera Calaohi Jesocurisito ere tonoraachene corenihate inara aina nejerateurelu inara araachuru. Nii rijijieein techu nii Jodeau nenea Cana Coaunera Calaohi Jesocurisito ere tonoraaurera aina nejerateurelu acaauru araachuru Jorioocuru. <sup>15</sup> Nii Jorioocurute acaauru rai Cana Coaunera ere beera inoaensi sohin jaaoruhane rijijieein

Cana Curuaanaa Jesoso sohin jaaorera ne. Nitohaneuuruhana jaunte acaauru aina nihacaanune bana canacaanu sitaurelu. Nihei aansijieeiniji Cana Coanera jerenohin ichana coaacuruhi, nechu satiin cacha aina obaejeriin ichaaoruha neechate laen jerecure. <sup>16</sup> Nii jaunte jianacoon mituhin neeuruha Jorioniheichurune coina, Jorioniheichuru rai Cana Coanera Ere benaa jerichaanune, caohateure. Nitohaneuuruhana jaunte jataen mululuhin osaqiun neeure. Nii jaunte tabiicha acaauru abaantana nainene Cana Coanera. Nii jaunte inae cuu tihane, nii core coaraa cuurureein acaauru notaanaa.

*Coaiteen Tesalonecau turuha cunaa jeriha Faboro ne*

<sup>17</sup> Inara caje amuhacaanune caje coauneena, inara coacuhin nihacaanu. Carajaain ita coarinihacache natiine jericha nejeein inara coacuhin nihacaanune jaun, inara coaraa uhene rijitojoihacaanu.

<sup>18</sup> Inara coaraa unaa jerichaanune naineeinte canacaanu acate Moconajaera. Canuna Faboro neein caraaje nihane inara coaraa unaa jereeun araai saain.

<sup>19</sup> Inae coaiteen cau turuha Cana Coanera Calaohi Jesocurisitone banana, raotojoein rachoojoein nereeunni, cacoreniha coitucuhin rai cacha neeichene jaun. <sup>20</sup> Nii jaunna esinae rauhijiriin raotojoein rachoojoein nihaacaanu.

### 3

<sup>1</sup> Jataenna inara coaraa unaa jeretohacaanu niqui, nena nainenerichaanuhin. Nii jaunna cau Atenau nerichaanuhin.

<sup>2</sup> Acaihanejein cana nejera Timoteeochana letoarichaanuhin inara coaraa uhane coina. Acate Cana Coanera letononeein canacaanu coroatajane, Cana Coanera Ere benaa que. Nii jaunte inara coaraa ureein, inara suujua laraarajaain nihane, nii aina nelaraarajaain, inara suujua nunaain neeichene coina, <sup>3</sup> nabana chatohaneein nejelau suujua cuaain niha chuneine coataa. Inarate raotojoein niriinanai coitucuhiche. Saain nitohaneein necairichanaa coaraain nihacache nete ne. <sup>4</sup> Nii inara aina nihacaanune bana, inara rai aitocaaanulune tochaneente nelu cana suujua reroecaeraauru. Nitohaneente situelu, nii coitucuhichene tochaneein. <sup>5</sup> Nitohaniha jaunna inara coarateeunlu. “Esinaete chuhisi rauhijiriin Cana Coanera Calaohi Jesocurisito ere esenetaain tonoraain neeure,” naain nitohaneein coitucuhane jerena caaunna inara coarateeunlu. “Baaso que sarunajaain niha Moconajaerane, baaso chaain neeuruhane inacojoein inachujiang acaauru rai Cana Coanera Ere benaa

que amihanihacaanulu,” naanune jaunne, inara coaratee-unlu, nitohaneein coitucuhanune coina.

<sup>6</sup> Nii jaunna nitohaneein esinae rauhijiriin Cana Coaunera Ere esentaain, tonoraain ita belaa'in, raotojoe'in neeichene coitucuu'n, inara caje turuhin biha Timoteeo canacaanu raina jaun. Chaen techu canacaanu belaa'in canacaanu coacuhin, canacaanu coana jeretohichene be. Inara coana jeretohacaanune rijitoe'in canacaanu coana jeretohichene be canacaanu rai.

<sup>7</sup> Nii jaunna necairichaacaanu natiin, raotojoe'in nii que nelararajaa'in atiin rachoojoe'in nihacaanu. <sup>8</sup> Nitohaneein rauhijiriin Cana Curuaanaa ere tonoraain neeichene jaunna, cha que tonajelanaala nihacaanu. <sup>9</sup> Nii jaunna inara coreniha, “Nariha jataen,” naacaanu, Cana Coaunera notara-cae. <sup>10</sup> Nii jaunna janotiin netojoe'in Cana Coaunera bajaain nihacaanu, canacaanu coroatajanihane inara rene turuhin inara rai beebejihacaanune, jataain jelai amuritoheriin esenetaain queecha jaaequiin neeichene coina.

<sup>11</sup> Aihana jaunna canacaanu coroatajanaha Cana Inaca Cana Coaunera, Cana Curuaanaa Jesocurisito naaonjoaine jerichaanu inara coaraa uhacaanune coina. <sup>12</sup> Inara coroatajaneine Cana Curuaanaate jelai amuritoheriin esenetaain, tonoraain neein ita belaa'in, cachaauru belaa'in, naaonjoaain neeiche inara belaichaaunne rijitoe'in. <sup>13</sup> Aihute nitohaneein rauhijiriin inara suujua coaraain ichaohichene jana inara eruhine Cana Coaunera Calaohi Jesocurisito, rainein nenacaauru aina turuha uhane bana.

## 4

### *Nitohaneein ichaoha cachane jeriha Cana Coaunerane*

<sup>1</sup> Cana Curuaanaa Jesocurisito coitucuera neeichene jaunna, atiin inara rai aitorichaanuhin, nii jauriaa inara relaacaanune rijijie'in ichaohin neeichene coina. Nenacaenjian jelai choae jauhecotojoeriin neeichene coinana aitocaaunu, nitohaneein jeriha Cana Coaunerana jaun.

<sup>2</sup> Inarate nere coitucuhiche, canacaanu que inara relaeratiha Cana Curuaanaa Jesocurisitona jaun. <sup>3</sup> Acaiha nejein nere tonoraai'che neechate jere Cana Coaunera. Nabana ita raelanaala ene aina ichaojeraquiin niha chuneine coataa.

<sup>4</sup> Acaiha nejein sinijiera ainaacha ita jere'in jiniiquiin suujua coarain niha cacha nete caohachae. <sup>5</sup> Caohachai, Cana Coaunera coitucuuruhi rijijie'in inara suujua coarihei amune'in neeichene. <sup>6</sup> Coa nejesinajee'in ita coritaain ita shaquiin nihache. Nitohaneein neinihanete banejelanaala choae osa nalutiare'in Cana Curuaanaa, nii core coaraain

nihane coina, nii inara rai aitiin inara relaa in biihacaanulune tocohaneein. <sup>7</sup> Coatiha canaacha jerei ichaechajeein ichaonaa coina cana cotijiaain, cana raain niheilulu Cana Coaunera. Rauhijiriin cana suujua coaraain ichaohacachene coinata cana raain nelu Cana Coaunera. <sup>8</sup> Cha teeinti, caa inara relaacaanune jaan batoe. Nihei canacaanu batoha aitorinaain. Nechu nii rai Suujue que cana suujua lararajiaera Cana Coaunera batohate aitoreein.

<sup>9</sup> Jiniiquiin raotojoein ita belaijjeiin saain itolere cacha belaa in neeichene coina, inara relaa Cana Coaunerana jaunna, inae nii que inara relanaa nainenihacaanu. <sup>10</sup> Nitohaniha jaunte, saain Masedonia nenacaauru Cana Coaunera coitucuurera belaa in neeiche. Nii jaunna jelaichoae jauhecotojoeriin inara suujua coaraain inara amute cacha belaa in neeichene jereeun. <sup>11</sup> Inara letoacaanune tocohaneein raotojoein ichaohin, nihei casaje que erenaa coacuelanaala inara amihaneechoa ichacuche. <sup>12</sup> Aihute inara que suujua acatein naaonjoanruhine Cana Coaunera coitucuuruhi.

### *Coaiteen turuha uha Cana Curuaanaane*

<sup>13</sup> “Naaonjoaante neeure Cana Coaunera Calaohi Jesocurisito esenetaain onacaauru,” naain inara netonai coitucuhichenena jerichaanu. Nabana cha coitucuneeichene ohin naaonjoan chuneine, nabana Cana Coaunera coitucuuruhi cachaauru rijijjeiin jataen tabai inaderanaa que inaderaain neeichene coataa.

<sup>14</sup> Charijjeiin teeinti, ohin ichanae Cana Coaunera Calaohi Jesoso, nii rijijjeiin techu aina ichanaa cuurureein esenetaain onacaauru.

<sup>15</sup> Nii jaunna inara rai aitocoaanu, cacha relaa Cana Curuaanaane rijitoojoein. Cha teeinti, coaiteen turuha uha Cana Curuaanaa nereen tiaain ichoae, nii ichoaichaniha onacaauru ajiniha Cana Curuaanaa aina niha curinaain.

<sup>16</sup> Letonocuru- anjeraauru curuaanaa que beratiha Cana Coauneranete inae toniha Cana Coaunera rai jaihane jana, dede caje fauha uha nii Cana Curuaanaane, ichanaa cuurureein esenetaain onacaauru. <sup>17</sup> Nii baihate acaauru aina jiniiquiin nihacachene coina, dede sacari jana Cana Curuaanaa aina ita ruhine curichaacheein jiniiquiin. Nitohanihanete Cana Curuaanaa aina niha curichaacheein cha bana satonoelanaala. <sup>18</sup> Aihana jaun caa erenaa que ita suujua lararajiaain neeuche raotojoein.

## 5

<sup>1</sup> “Naaonjoain banate turuha ureein Cana Curuaanaara,” naain coitucuhi chunei, nii coitucuhichene tocohaneein.

<sup>2</sup> Nii coitucuhichene tocohaneeinte cha coatajeniha chuneine

jana turuha ureein. Charijieein teeinti janotiin turue asi-  
 jiauto. Nii rijijieeinte turuha ureein. <sup>3</sup> Nitohanerichaine  
 banate, “Jataain raotojoeinte ichaohacache. Coatiha ni-  
 hei cana que nejerateein chatohaneein cana ichao itajer-  
 anu,” naain ereein neeurureein Cana Coaunera coitucuuruhi  
 cachaauru. Nii lacuritiinte caseteco coaraa cuurureein luhe-  
 cotariin, acaauru casetecaa Cana Coaunera ne. Nihei chuniji-  
 hun cuhin nichotenaa nainecururinaain. Charijieein teeinti,  
 canaanai siriha enene, inae saa rai batenene, rai cunaane,  
 cuna caje nichotenaa nainene. Nii rijijieein techu luheco-  
 tariin cau turuha Cana Curuaanaane acaauru casetecaane nii  
 cuna aonacurureein. <sup>4</sup> Jana inara laen nesoonenaa coari-  
 heeicheein, cohajeichene jana tururichaaina jaun. <sup>5</sup> Cana  
 Curuaanaa jerenohin coitucuhin tonoraachene jaunte, ji-  
 ichoo conaera- cono cachaneein neeiche. Coatiha Cana  
 Curuaanaa ere tonoraauruhi rijijieein nocohenaana nena  
 cacha neein nihaacache. <sup>6-7</sup> Nii jaun nainiheini ninauhene  
 neein ajenacaauru rijijieein nihacachene. Itolere bana cana  
 suujua coaraain nihacache nete caohachae. <sup>8</sup> Charijieein  
 teeinti, nalarijia que coata teeure soondarooru, acaauru  
 jaberoco acateraanu que, nabana chatohaneein tenajaera  
 nihane, acaauru que temuhin nihane coataa. Nii rijijieein  
 techu inara netonai, cana acateraanu que Cana Curuaanaa  
 esenetaain, tonoraain, ita belaaain, cacha belaaain, naaonjoain  
 nihacachenete cana acatera niha nereein nii canaacha esene-  
 tai. Nitohaniha cachene cana rohan nichuutaain cana cori-  
 tana nainenereein Moconajaera. Charijieein teeinti, coata  
 caje ichanohin asiho lauriae soondaro, nabana chatohaneein  
 couturi tiha aina nejerateine coataa. Nii rijijieein techu,  
 chatohaneein cana suujua tenaa nainenereein Moconajaera,  
 batoelanaala esinae rauhijiriin jianacoo cana mitaa Cana Mi-  
 taerane esenetaacachene. <sup>9</sup> Coatiha caseteco coaraain niha-  
 cachene coina, cana raain nihei Cana Coaunera. Rai Calaohi  
 Jesocurisito coreniha jianacoo mituhin nihacachene coinate  
 cana raain ne Cana Coaunera. <sup>10</sup> Ohacachene nihanatiin  
 aina nihacachene coinate cana coreniha ohe Cana Coaunera  
 Calaohi Jesocurisito. <sup>11</sup> Nii jaun nii aachene rijijieein jini-  
 iquiin ita suujua lararajiaain laraajiin neeuche.

*Satono nejeein Cana Coaunera coitucuurera suujuatiha  
 Faborone*

<sup>12</sup> Aonacuchena inara rai irihacaanu. Nii inara beraihur-  
 era que inara suujua acateein, nere tonoraain neeuche, Cana  
 Coaunera coitucuurera beraichaneein neeuruhana jaun.  
<sup>13</sup> Nii jaun acaauru que inara suujua acateein belainajaain,  
 leeochoauru aina jiniiquiin raotojoein neeuche.

<sup>14</sup> Amihanenaa jeriheichuru cotaicha rijitiin suujuateein  
 letoaauche. Chaen chu nererojoecaain nenacaauru belaaain



suujuateechete, suujua tocharaain suujua nunaain neeu-  
ruhine. Chaen chu nacanacaenaauru coroatajanecuche.  
Raotojoein satiin acaauru suujuateein, acaauru suujua  
lararajiaain neeuche.

<sup>15</sup> Coaracuche, jiaonriha inara rai baaso chara nihane coa  
nacatiha tacaain cainaain nihache. Ita belaaain, saain itol-  
ere cacha, Cana Coaunera coitucuuruhi nihanatiin belaaain  
neeuche.

<sup>16</sup> Raotojoein rachoojoeeriin neeuche inetono janonaa  
bana. <sup>17</sup> Cana Coaunera bajaebajajeein neeuche inetono  
janonaa bana. <sup>18</sup> Chatohaneein inara tera nihane nihanatiin  
coroaecuche, nitohaneein coujuriu Cana Coaunera Calaohi  
Jesocurisito esenetaera neein nena tocohaneein neeichene  
jeriha Cana Coaunerana jaun.

<sup>19</sup> Inara suujuatenaa jeriha Cana Coaunera Suujuene, aon-  
aain tonoracuche.

<sup>20</sup> Cana Coaunera Ere biha Cana Coaunera letonone, ni-  
jiaonriha batohin neeichene. <sup>21</sup> Esinae rauhijiriin suujua  
coaraain inara relaacaanune rijitoein inara relauruhane  
esenetaain tonoraauche. <sup>22</sup> Itolere baaso jianeein neeuche.

<sup>23</sup> Acaiha nejein nere esenetaain tonoraera neein neeich-  
ene coina inara suujua coreeine atiin cana rai raoti ichaonaa  
tera Cana Coaunera. Aihute neculocohin neeine inara jabe-  
roco, inara suujue aina coaiten turuha Cana Curuaanaa  
Jesocurisito nereein tiaain. <sup>24</sup> Nitohaneeinte ichareein nii  
Inara Cotiharalu, nitohaneein nihana jaun.

*Laenaane satononiha acaauru corojeein acaauru coaau-  
cane biha Faborone*

<sup>25</sup> Cana Coaunera bajaauche canacaanu rai atiin.

<sup>26</sup> “Inara coaucuruha jera Faborooru,” naauche satiin  
cana nejeraauru Cana Coaunera coitucuurera rai.

<sup>27</sup> Aihana jaun acaauru rai caa canuhacha laenai erere-  
taauche, Cana Curuaanaa letoaeratenojohin neein nihana  
jaun.

<sup>28</sup> Inara coroatajaneeine Cana Curuaanaa Jesocurisitote  
raotojoein neeiche.

Nitohaneein neeine.

## Tesalonecau nenacaauru rai Faborohacha letoai coroataja

*“Chatohaneein neeiche” naa Faborone*

<sup>1</sup> Canu Faboro nichaaune, Siribano, Timoteeo, naaonjoain nichaanunena caa laenaain letoarichaanuhin. Saain nii Tesalonecau nenacaauru Cana Inaca Cana Coaunera, Cana Curuaanaa Jesocurisito naaonjoaunri coitucuurera raina caa laenaain letoaacaanu. <sup>2</sup> Inara coroatajaneein Cana Inaca Cana Coaunera, Cana Curuaanaa Jesocurisito naaonjoainte raotojoeein neeiche.

*“Nariha” naain coroajeein Cana Coaunera bajaa Faborone*

<sup>3</sup> Esinae rauhijiriin jelai choae jauhecotojoeriin Cana Coaunera esenetaain, ita belaaain neeichene jaun, “Nariha,” naain Cana Coaunera rai inara coroaecaanunete caohachae. <sup>4</sup> Nii jaunna Cana Coaunera rai ita taojiaeraauru rai raotojoeein inara beebjihacaanu, Cana Coaunera Calaohi Jesocurisito coitucuhichene coreniha inara rerohecaain, inara cairichaaauruhane nihanatiin, cha que erelanaala abaantaain itolere necairichanaa abaantaain neeichene jaun. <sup>5</sup> Nitohaneein abaantaain neeichene jaunte esinae rauhijiriin caohatiin inara raain niha Cana Coaunerane coaraa cuurureein inara coaraauru.

<sup>6</sup> Nii inara cairichaaeriin nenacaauru cairichaaain niha Cana Coauneranete caohachae. <sup>7</sup> Inae dede caje turuha uha Cana Curuaanaa Jesocurisito, rai letonocuru mijiaainetoorianjeraauru ainane banate, nebetacanaa tereein cana rai Cana Coaunera. Nebetacaacachene jana, acaauru cana rerohariha necairichaaauruhane coina. <sup>8</sup> Cana Coaunera esenetaauruhi, chaen nii jianacoo cana mitaera Jesocurisito ere esenetaauruhi, casetecaa usi tabai quene cointate turuha ureein Cana Coaunera Calaohi. <sup>9-10</sup> Canacaanuhacha beebjei esenetaaichene jaunte, Cana Curuaanaa coroaecurureein saain esenetaeraauru inae turuhane bana. Nii banate caseteco coaraa cuurureein, cha bana jelai caje mituruhane coina que aina rijijieein. Nii banate coriae Cana Curuaanaa coarihei rijijieein niha cuurureein nii nere esenetaauruhi.

<sup>11</sup> Nii jaunna inara rai Cana Coaunera itolere amurijiriin nena bajaacaanu, inacojoeein inara cotijiaeniha Cana Coaunerana jaun. Chaen nachu caohachaaain coaauquichene rijijieein inara tiha Cana Coaunerane coina Cana Coaunera bajaacaanu. Chaen nachu nii nunuheteichene rijijieein, jericanejeein inara amihaneeo ichaain neeichene coina Cana Coaunera bajaacaanu, esenetaain ichaquichene jaun.

<sup>12</sup> Nitohaneein ichaquichene jaunte, inara coreniha Cana Curuaanaa Jesocurisito coroaecurureein satiin. Nitohaneein Jesocurisito letononeein neeichene jaunte inara coroaeca cuurureein, nitohaneein jeriha Cana Coaunera, Cana Curuaanaa Jesocurisito, naaonjoaine jaun.

## 2

*Inae cuu tee lalajiha Cana Curuaanaa turune janate niha cureein leinjiin cache coritaraanu*

<sup>1-2</sup> “Naaonjoaainte turuha ureein Cana Curuaanaa Jesocurisito,” naain bihacaanulu inara raina jaun, coa inara coritaera nihane esenetaain nihache. Inara rene turuhin, “Canacaanu rai beeni beratiha Cana Coaunerana jaunna coaiteen turuha Cana Curuaanaane bihacaanune coina, cau inara rene turuha uhacaanu,” naa chuneine nijiaonriha esenetaaichene. Chaen chu, “Canacaanuhacha letoai je,” naain inara rai quiricha tera nihane nijiaonriha esenetaain neeichene. <sup>3</sup> Nijiaonriha chatohaneein nihanatiin, tonaain inara coritana jerera nihane esenetaain neeichene. Inae cuu tee lalajiha Cana Curuaanaa turune janate niha cureein leinjiin necha ansai cache coritaera, Cana Coaunera niha nocoetiin. Nii erete tonoraa cuurureein, Cana Coaunera ere tonorana coacuelanaala. Niqui nete nii acaauruhacha ere tonorai itajiha cureein Cana Coaunera. <sup>4</sup> Niite Cana Coaunera aina nejerateein, niicha tonorai tonoraa cachane, aina nejeratereein. Acaihanejein acaacha ere tonoraacachane jereein Cana Coaunera niha nocoetiin nelauriaa cureein Jerosaleen nena Cana Coaunera Loreri asaae.

<sup>5</sup> Coaquiche chachu natiin, inara aina nihanune banana chu caritiin inara rai bihacaanulu. <sup>6</sup> Inarate cojoinacatiha Cana Coaunerane ajiniha turuenerihanine coitucuhiche raotojoein. <sup>7</sup> Inae nunuejiha nii Osa Neba amihaaneeon asinojoneein. Inae jianiha nii acatera neechate cohaje, <sup>8</sup> ecooca nii nechu aansai atebinaene coina. Nii banate turuha uha Cana Curuaanaa Jesocurisitone, neraaicha que jiheitiin itajiha cureein Cana Curuaanaa Jesocurisito. <sup>9</sup> Nii nechu aansai ataibinaen osaaonate turureein nechu aansai atebinaen Moconajaera letono neein, nechu jataen itolere ichaain cache coritaeraanu que, nohanein itolere ichaain cache notaaranu que. <sup>10</sup> Nitohaneeinte itolere que nohanein ichaonaa rauhi aonana jerecuruhi coritaa cureein. <sup>11</sup> Nitohaneeinte casajeje esenetaauruhane coina, inauhene coarajenajareein Cana Coaunera, <sup>12</sup> nitajeeuruha nii nere rauhi jerelanaala casajeeicha tonoraeraaurune coina.

<sup>13</sup> Nii jaunna inetono janonaa bana, “Nariha,” naain Cana Coaunera coroaecaanu inara coreniha. Jataaente inara belai Cana Curuaanaara, canejeraauru, jauriaa nejeein inara que tacaajeein inara raa Cana Coaunerana jaun. Nere rauhi esenetaaichene corenihate, rai Suujue que inara suujua corein inara rae Cana Coaunera. <sup>14</sup> Nii jaunte nii canacaanuhacha beebejei nere aina cuaain inara cotijiae Cana Coaunera aina Cana Curuaanaa Jesocurisito rijijieein aina neeiche caohatiine coina.

<sup>15</sup> Aihana jaun nitohaneein rauhijiriin ichaaoche. Coa nii quiricha cuhane reein tiaain inara suujuatein nihacaanune jaan baitichache. <sup>16-17</sup> Inara suujua lararajiaain, nunaaine Cana Curuaanaa Jesocurisito, Cana Inaca Cana Coaunera nii inoaenlu caje coauneein cana belaicha, nii cha bana satonohane que ainaa rijijieein aina niha curichaacheine tera. Aihute inara suujua coaraain raotojoein ereerejeein caohacha ichaain neeiche, Cana Coaunera coreniha.

### 3

#### *Cana Coaunera bajaachete, canacaanu coroatajaneine*

<sup>1</sup> Inae satono nejeeine caa inara rai aitoreeunicha canejeraauru. Cana Coaunera bajaachete canacaanu coroatajaneinete, itolere sacutaain turuhine caa canacaanuhacha beebejei Cana Curuaanaa ere. Aihute nii aachene rijijieein caohachaaain esenetaain, caohatiin raain tonorauruhine.

<sup>2</sup> Esenetaeniha saain cachana jaun, aihute nii aansaneein nenacaauru canacaanu que janoriteeine Cana Coaunera, nabana chatohaneein canacaanu teuruhane coataa. <sup>3</sup> Cana Curuaanaate inetono janonaa bana inara suujua lararajiaain inara beraicheein, nabana chatohaneein inara tiha joenreein chaelaine coataa. <sup>4</sup> Nitohaneeinte esinae rauhijiriin inara coroatajaniha cureein Cana Curuaanaa caa canacaanu aitoonjoan rijijieein ichaechajeein ichaohichene coina. <sup>5</sup> Inara coroatajaneine Cana Curuaanaate, inara belaaain niha Cana Coaunerane coitucuhin, aiha Curisitone rijijieein chatohanai nihanatiin abaantaain neeiche.

<sup>6</sup> Cana Curuaanaa Jesocurisito cocoainanohineeinna mijaaainetiin inara rai aitiin letoarichaanuhin, chunei cana nejera, Cana Coaunera coitucuera amihanena jerelanaala, caa inara relaacaanune jaan tonorana jerenihane ratiriin caje amuuche. <sup>7-8</sup> Inarate raotojoein coitucuhiche, inara aina nihacaanune bana chelai janonaa bana nirijieein amihanelanaala nirijieein core colane inara caje lenone bajaain nenihacaanune coitucuhiche. Nitohaneeina janotiin inetojoein amihaneein coreniha canacaanu lenone coretein nerejetocaaanulu, nabana canacaanu coreniha chelai

que latejiojoiiriin niha chuneine coataa. <sup>9</sup> Niha canacaanu rai rauhi, inara caje chaelai bajaacaanune natiina amihaneein coreniha canacaanuhacha latei coreteein nerejetoceanulu, jericha nejeein canacaanu rijijieein neeichene coina. <sup>10</sup> Nii inara aina nihacaanune bana inara rai aitocoaanulune rijijieein, “Chunei amihanena jerenihane coa lenoniha,” naacaanulu. <sup>11</sup> Nii inara laurijiracuru tabaauru jetaote, “Nechu jataen nirijieein amihanelanaala nechu jataen amuhemujeure, joenreein acaauruhacha jerei ichaechajeein,” naaina coitucuhacaanu. <sup>12</sup> Aihana jaunne Cana Curuaanaa Jesocurisito cocoainanohi neein nihacaanune jaun aitorichaanuhin, acaauru rai aitocoichene raotojoeeincha amihaneein ichaauruhane coina.

<sup>13</sup> Coa caohacha ichaain neeichene jianichache coiinteein. Jericha nejeeincha sacuuche.

<sup>14</sup> Cha teeinti, erenaa tonoraelanaala caa quiricha cuhane aitiin, aitocoaanune tonoraene; nitohanei nihane, nijiaonriha tonaain ereichenete necoejeeine. <sup>15</sup> Nijiaonriha aina obajeein nejerateeichene. Coujuriu Cana Coaunera coreniha ita nejera neein nenea tocohaneein, raotono que cuaain suujuateein neeuche.

*Satonotihane rai, “Raotojoeein neeuche” naa Faborone*

<sup>16</sup> Inetono janonaa bana inara coroatajaneeine cana rai raoti ichaonaa tera Cana Curuaanaate, raotojoeein neeiche. Satiin inara coarajeeine Cana Curuaanaa.

<sup>17</sup> Canuna Faboro neein caraaje nihane cacoiin que laenaain caa quiricha letoaaun. Catohaneaina laenaain letoaun canu.

<sup>18</sup> Satiin inara coroatajaneeine Cana Curuaanaa Jesocurisito.

Nitohanemiin.

## **Timoteeo rai Faborohacha letoai leinjiin**

*Jauriaa nejeein Timoteeo rai Faboroacha letoai quiricha*

<sup>1</sup> Canuna Jesocurisito letono Faboro neeun. Cana Coaunera corenihate jianacoo nihacache. Aihana jaun, Jesocurisito-hachate cohajihacache coaiten enacoauneein cau turuhane chabana satonoelanaala rai Cojoanonaa que nihacachene coina. Cana Coaunera, Calaohi Jesocurisito, naaonjoainte canu cocoainaan caletoe.

<sup>2</sup> Ii raine caa quiricha laenaunra cacalabi Timoteeo. Careniha Cana Coaunera Calaohi Jesocurisito coitucuhina jaunte, cacalabi neeinha. Raotojoein neeine coina rai raotonoque ii rausiajeein ii coroatajaneeine Cana Inaca Cana Coaunera, Cana Curuaanaa Jesocurisito, naaonjoain.

*Baasoneein cacha relaaurera que necoeraain niha Timoteeone coina suujuatiha Faborone*

<sup>3</sup> Masedonia cuhanulune ajiniha ichei aitocoaulnune tocohaneein nii Efesohacha neeu. Coa baaso que nii quicha relaauri relaeranihane, coa inauhene coarajiha. <sup>4</sup> Coa nereretanaa inoaei baasoque nereretanaaauru aina inara suujua cuaain nihache. Coatiha Cana Coaunera Aitoonjoan ichaain tonoraacachene coina cana letoaera nihei. Rauhijiriin relanajaau Cana Coaunera esenetaain tonoraauruha caohatiin saaine coina.

<sup>5</sup> Baaso coacuelanaala caohatiin inara suujua coaraain, esinaaen rauhijiriin Cana Coaunera esenetaain, ita belaaichene coinana caa caritiin inara rai laenaun. <sup>6</sup> Baaso erena que ita rai ereerejeein, Cana Coaunera Ere esine tonorana jihanein raaje nitajeeuruha tabaaaurune jaunna aitoon. <sup>7</sup> Nitorijihanei cachaaurute, cacha relaeraneein nena jerecureein nechu jataen joaenrein.

*Jeriha Acane rijijieein ichaoha cachane coinante, aitiin Naitoonjoan laeneratelu inoaelu Cana Coaunera*

<sup>8</sup> Acaihanejein Cana Coauneraachate, rauhijiriin caohacha ichae. Baasoneein ichaoha cachane coataate niicha jerei tocohaneein aitiin laenaeratelu inoaelu Cana Coaunera, Moisesa que. Aihana jaun, caohachaain rauhijiriin Cana Coaunera Aitoonjoan tonoraacachenete caohache. <sup>9</sup> Coatiha caohacha cachaauru suujuateraanu que aitiin Naitoonjoan laenaeratiheilu Cana Coaunera. Erenaa tonoraauruhi, itolere cacha amuritoheriin suujua coaraain niha nocoetocuri suujuateraanu quete aitiin Naitoonjoan laenaeratelu Cana

Coaunera. Nechu aansai osaaonaauru, Cana Coaunera Ere tonoraauruhi suujuateraanu quete nitohaneein laenaeratelu Cana Coaunera. Fojiara que suujua acatieichuru, sonajaain jaorera, <sup>10</sup> chaenchu sinijeranelanaala nenea ene aina ichaojeracoori, ene rijijieein namute quicha aina ichaojera-coori, quicha rijijieein namute ene aina ichaojeraqui, cacha basijiauhin necoretenacaauru, casajeeuru, chaenchu “Cana Coaunera te coaraje,” naain nohanenacaauru, naaonjoainuri suujuateraannu quete niicha jerei tocohaneein aitiin Naitoonjoan laenaeratelu Cana Coaunera. Caohati cacha relanaanajaa caohateraneein nenacaauru suujuateraannu quete, niicha jerei tocohaneein aitiin Naitoonjoan laenaeratelu Cana Coaunera.

<sup>11</sup> Caa inara relaanune jaan caletoaera Cana Coaunera Ere rijijieeinte aite caa Cana Coaunera Aitoonjoan Inoaensi.

### *Faboro letoaa Cana Coaunerane*

<sup>12</sup> Jataainna corojeeun, laraajiin cacha relaanune coina caletoa Cana Curuaanaa Jesocurisitona jaun. Caohachaain rauhijiriin icharichaaunnine coitucuhana jaunte caletoa niicha jerenohin ichacaanne coina.

<sup>13</sup> Baasoneinna Jesocurisito que erein nere tonoraaurera cairichaerichaetoonlu. Nii atiinte atiin cacoelaain carae Cana Coaunera. Nii bana esenetaain coitucuenihanuluna jaunna nitohaneein nerejetoonlu. <sup>14</sup> Jataen cacoelaiha Cana Curuaanaana jaunna, nii ucuaetoha caa esenetaain jereein neeun.

<sup>15-16</sup> Esinaente rauhijiriin turuha uhe caa chauratane que Jesocurisito, jianacoon osaonaauru mitaane coina. Jana canuna osaonaauru nujuaneein neeunlu niqui. Nete atiin cacoelai Cana Coaunera, osaonaauru nujua belaiha Cana Coaunerane coitucuuruha satiin cachaaurune coina. “Charijeeeinteeinti Faboro belai Cana Coaunera. Nii rijijieeintechu canu belachein,” naain Cana Coaunera esenetaerate nitajenaa charanejeein nenea ichaonaa raa cureein.

<sup>17</sup> Nii coreniha coanete caohatiin chabana onaa charanejeein nenea Cana Curuaanaa que raotojoein ereerejeein nihacache. Coanete acaihanejeein chabana coarai Cana Coaunera ere tonoraain, caohatiin que ereerejeein nihacache inoaenlu netojoein.

### *Timoteeo suujuatiha Faborone*

<sup>18</sup> Nere beracuru que eletoaeratiha Cana Coaunerane rijijieein, laraajiin, neeunaain nere tonoraain ichaaura cacalabi Timoteeo. <sup>19</sup> Tabaaurute Cana Coaunera sacunaa jerecuruhane nihanatiin, suujua coaraelanaala neein, rauhijiriin ichacurenihane necairichanaa coaracure. <sup>20</sup> Nitohaneeinte

situurelu Imeneeo, Alejaandoro, naaonjoaunri. Nii caaijiena Moconajaera que casetecaeratenajaaunlu, coaiten enacoauneein Cana Coaunera que baasoneein ereeuruhane coataa. Nijiaonriha iitonai nitoanein situhine.

## 2

*Bajaebajaecuchete satiin cachaauru coroatajanemiin Cana Coaunera*

<sup>1</sup> Jauriaanejein Cana Coaunera bajaebajaecuchete satiin cachaauru coroatajanemiin. <sup>2</sup> Bajaichenete, satiin curuaanaacuru, cocoainanacaihuri, naaonjoaunri suujuatiha Cana Coaunerane, raotojoein Cana Coaunera ere tonoraain ichaaorureein cachaauru. <sup>3</sup> Nitohaneeinte jeere nii jianacoo cana mitaera Cana Coaunera. <sup>4</sup> Acate satiin jianacoo neein, nere esine coitucuhin neein nihacachene jeere. <sup>5</sup> Jana, Jesocurisitote laen, Cana Coaunera aina caohachaain nihacachene coina, nii rucuheraanu que nenea ne. Cana rijijieein cachaneein nihana jaunte naine. <sup>6</sup> Inae nitohaneein letoaa Cana Coaunerana jaunte, raajenhane cana coreniha coroso que ohe Jesocurisito, coreniha osa caje jianacoo nihacachene coina.

<sup>7</sup> Nii jaunna Jorio niheichuru relaeraannu que Cana Coauneraacha letoanojoneein neun, rauhijiriin Jesocurisito coitucuuruhane coina. Curisito esenetaera nihanuna jaunna, rauhijiriin aitoon noanenaanelanaala.

*Caohachaain suujua coaraain neeuruha quichaauru aina enecurune*

<sup>8</sup> Nii jaunna itolere sacutain, Cana Coaunera bajaauruha satiin cachaaurune jereeun canu. Ita baijiaelanaala, raotiin suujua aina neein, biji michuin Cana Coaunera bajaa satiin nere tonoraeraaurune jereeun.

<sup>9</sup> Coa cajione jataen coreti que necoreeteeuruha enecuru. <sup>10</sup> Coujuriu Jesocurisito esenetaeraneein nenea tocohaneein cacha belaihuruhine enecuru. <sup>11</sup> Cacha relaa relaerane, inauheneeicha aonajeein nerelaauruhine enecuru. <sup>12</sup> Coatihachu chaen quichaauru relaauruha enecurune jerinaaun. Nijiaonria quichaauru amuritiin letoaauruha enecurune, <sup>13</sup> necoaunaa Ebane ajiniha, Adaan coaunaain niha Cana Coaunerana jaun. <sup>14</sup> Cachaauru coaunaa Cana Coaunerane bana, coatiha nii Adaan coritaai Moconajaera. Acaihanejein nii Ebaachate laen coritae. Nii jaunte osa que nesaruelu nii ene. <sup>15</sup> Nii jaunte canaanai sirihane, inae janoaane rai cuna caaun necairichanaa coaareein ene. Nete atiin jianacoon niha cuururein ichoteratenajarichaaain Cana Coaunerane esenetaain nere tonoraaurera enecuru.



### 3

#### *Cana Coaunera cachaauru beraicha neein nenacaauru*

<sup>1</sup> Esinaena rauhijiriin aitoreeunni. Cana Coaunera coitucuurera beraicha neein nena jeriha chuneinete, caohati amihanenaa ichana jererein. <sup>2</sup> Caohachaaain ichaohanete caohachae, neniha cotaichane caina. Leinjiin ene lananeein nihanete caohachare. Chaen suujua coaraneein nihanete caohachae. Chaen nenajaun turuhi nihane, caohachaaain raeraneein neinihanete caohachae. Chaen caohachaaain cacha relaanete nere. <sup>3</sup> Nihein chu chaen ajetoritelanaala, cacha leratelanaala, que tonaain chaque ereinihane abaan-taain, coriqui mucuhanajaacha que coacuelanaala, naaon-joain nihanete caohachae. <sup>4</sup> Chaen, caohachain sinijiera suujuatein, bereecuru suujuatein, saain nii loreri asaa nenacaauru suujuatein nihanete caohachare. Chaen suujua acatein, erenaa tonorain neeuruha bereecurunete caohachare. <sup>5</sup> Inasiinte comasai suujuatenaa inaelanaala, nihe-ichu bereecuru suujuatenaa inaelanaala nihane, chaen Cana Coaunera coitucuurera beraiche-beraichacuru. <sup>6</sup> Chaen chu ena Cana Coaunera aina enonaa nihane, caohacharihei leecha cachaauru amuritoheriin suujua coaraain itolere inaa nocoetohane. Charijieein teeinti ai Moconajaera, nii rijijieein situhane casetecaa Cana Coaunerane coataa. <sup>7</sup> Chaen chu Cana Coaunera coitucuuru cachaauru rai nihanatiin, suujua coaraneein nihanete caohachare, nabana batocuruhane coritaa Moconojaerane, nabana baasoneein ichaane coataa. Nitohaniha Cana Coaunera coitucuurera beraichanete caohachae.

#### *Cana Coaunera coitucuurera coroatajanera-diaconooru*

<sup>8</sup> Suujua coaraneein niha Cana Coaunera coitucuurera coroatajaneranete caohachare. Chaen chu casajenetelanaala, ajetoritelanaala, nihein chu chaen coriqui basijauna coacuelanaala, <sup>9</sup> chaen chu chatohaneein teeinti nerejetelu Jesocurisito, caohatiin nii coitucuera nihanete caohachare. Chaen chu nii niicha coitucui suujuelanaala nihanete caohachare. <sup>10</sup> Nitohaneein neeuruhane acaauru coujuhin acaauru coaracuchete, neniha acaauru rai lanaine Cana Coaunera coitucuurera coroatajaneraneein neeuruhine. <sup>11</sup> Jerichanejeein enecuru netonai, caohachaaain suujua coaraain neeuruhanete caohachare. Chaen chu casajenetelanaala, nihein chu erenacaotelanaala neeuruhanete caohachare. Itolereneein rauhijiriin caohachaaain neeuruhanete caohachae. Nitohaneein neeuruha Cana Coaunera coitucuurera coroatajaneraneein nenecaauru-diaconooru enecurunete caohachae. <sup>12</sup> Jana quicha nihane leinjiin ene sinijieranein nihanete caohachare. Chaen chu, sinijiera suujuatein

bereecuru suujuateein, saain nii loreri asae nenacaauru suujuateein nihanete caohachare. Nitohaneein neite caohachae Cana Coaunera coitucuurera corootajanera-diacono neein nihane. <sup>13</sup> Nitohaneein caohatiin acaauru amihaneon ichacuruhanete, acaauru belaiha cuurureein cachaauru. Chaentechu jeelai amuritoheriin laraajiin Jesocurisito que cacha relanaa nainecurureein.

#### *Cana Coaunera ranojoihunru cachaauru*

<sup>14</sup> Enanecoojoana turuhin ichoharaa uhene rijitjoeun niqiu, nechaaanti nainerichaaunni. <sup>15</sup> Nii jaunna inaen ichei caa quiricha letoareeunni, cojoainihanune, coujuriu Cana Coauneraacha ranojoneein nenea nicha tei idesia neeichene jaan tocohaneein caohachaaain neeichene coina. Cana Coaunera Ere Rauhi acateranihate neeure Cana Coaunera ranojoinunru cachaauru. <sup>16</sup> Jataainte caohate esinaae raijiriin nii canaacha esenetai Jesocurisito niqiu, nete coitucurene Cana Coaunera coitucuuruhi cachaauru.

Caa chauratane quete ecocoe Jesocurisito cachaneein.

Nii janate coujuhin coaraa Cana Coaunera Suujuene jana caohate.

Coujuhin coaraane janate, coarajeeure Cana Coaunera letonocuru anjeraauru.

Nii jaunte amuhemujueein laurilaurichuru nenacaauru cachaauru rai beebejeure Cana Coaunera coitucuurera, itolereenein caa chauratane sacutaain coitucuuruha cachaaurune coina.

Chaentechu enacoauneein dedeeu rae Cana Coaunera. Nitohaneeinte saain coitucuhacache.

## 4

#### *Baaso que cachaauru relaaurea*

<sup>1</sup> Rijieeri banate Cana Coaunera ere jianeein ratiriin casaje que acaauru relaain, acaauru coritaa osaaonaaurune esenetaain tonoraa cuurureein tabaauru. <sup>2</sup> Nitohaneeinte necoejenaa charaauru casaje cachaauru ere tonoraa cuurureein, niritiinte be rauhijiriin Cana Coaunera Suujue.

<sup>3</sup> Nitohaneeite ene ranaa jeriha cachane caohatiha cuurureein. Chaentechu nelanajanaa jeriha ene ne caohatiha cuurureein. Chaentechu joenreein lenone que lenoniha cachane caohatiha cuurureein. Raotojoein corojeein Cana Coaunera bajaain que neleenijiaain niha Cana Coaunera Ere coitucuhin esenetaaurera cachaaurune coina, itolere lenone coaunaain niha Cana Coaunera natiinte, que neleenijiaain niha cachane caohatiha cuurureein.

<sup>4</sup> Itolere Cana Coauneraacha coaunanohinte caohachae. Nii jaun nainihe i chaque irihacane. Nitohanihana jaunte, corojeein Cana Coaunera bajaain joaereein raacachene

caohachae. <sup>5</sup> Nitohaneein biha Cana Coaunera Erena jaunte caohachae. Chaenchu lenonichaachene ajiniha bajaacachenete caohachae.

*Jesocurisito letono esine*

<sup>6</sup> Caa caitoonjoan que cana nejeraauru- Cana Coaunera cachaauru relaainete, esinaen rauhijiriin Jesocurisito letono esineneein niha curiquiin. Charijieein teeinti, lenonihane baiha raotojoein nelararajiae cache. Nii rijijieeinte Cana Coaunera ere coitucuhine laraajiin niha curiquiin, nii caohati nerelana najaan coitucuhin tonoraaine. <sup>7</sup> Aihana jaun, casaje tonoraelanaala Cana Coauneraacha jerenohincha ichajeeincha neeu.

<sup>8</sup> Najaicharoola cana jaberocone coinate nelate cojoanonetojoein necoatijiaacane. Nii amuritoheriinte nelate itolere que rauhijiriin Cana Coaunera Ere tonoraacachene. <sup>9</sup> Esinaaena aitoon, aihane jaun esenetaachenete ne. <sup>10</sup> Acaihanejein Cana Coaunera esenetaacachena jaunte cana batohin, cana necoeje chanuuruhane niha natiin, neunaain mainajeein amihanihacache.

Satiin cachate coroatajane Cana Coaunera. Jana esinaen rauhijiriin esenetaauruhanete, nii esenetaaurera coroatajaniha cureein, leeochoauru coroatajanihane amuritoheriin. <sup>11</sup> Caritiin suujuatenajaain relanajaau. <sup>12</sup> Enamanaa neeina jaun, ii batohin, ii necoeje chanuuruhane niha natiin, coa tonoraa. Aihana jaun, atiin caohacha ichaain neeute, ii coaraain ichejijieein caohachaain neeuruhine Cana Coaunera esenetaaurera. Caohatiin ereerejein, caohatiin ii ichao que ichaohin, Cana Coaunera, leeochoauru, naaonjoaainunri belaaain, Cana Coaunera Ere esenetaain, ishujua coaraain, naaonjoaain neeu atiin.

<sup>13</sup> Turuhanune reentiaain, ita taojiaa cachaaurune jana Cana Coaunera Ere coaraain itolere bana ereretaau. Chaenchu Cana Coaunera coreniha cana nejeraauru suujuatein relanajaau. <sup>14</sup> Jiaonriha ichei Cana Coauneraacha tei amihanenaa jianeine. Acaauru letoaa Cana Coaunera Suujuene jaunte, ichouturi ichoae biji teein, ii cocoinaunre Cana Coaunera coitucuurera ichauhenaauru, nii niicha tei amihanenaa nainaaine coina. Aihana jaun, coa jianiha.

<sup>15</sup> Atiin itolere bana ii amihaneon chaaechajeein neeute, taeneein naurutanaurutaain cuujiha ii amihaneonne coaracurumiin satiin cachaauru.

<sup>16</sup> Aonaau. Caohatiin ishujua coaraain necohalajiin neein rauhijiriin cachaauru relaau laraajiin. Nitohaneein

ichaainete, nichoteein jianacoo nerequiin ii ere aohanrauru aina.

## 5

### *Cana Coaunera coitucuurera aina suujua coaraain nihane*

<sup>1</sup> Baasoneein ichaa chunei ichauhenane, coa cotaicha rijitiin suujuatiha. Charijiein teeinti chaca suujuateeine suujuateei. Nii rijijiein raotojoein belaaain suujuateeu. Chaenchu chocoalacuru belaaaine rijitoein enamanaacuru belaihu.

<sup>2</sup> Jericha nejeeinchu choba aina caoachaaain neeine rijijieein enecuru aina caoachaaain neeu. Jericha nejeeinchu ii baihuru aina caoachaaain neeine rijijieein ranunaauru aina netonai caoachaaain neeu.

<sup>3</sup> Niha autananein enene coroatajaneeu, esinaen rauhijiriin cairichainein nihane. <sup>4</sup> Jana, niha calaohi, nichoala, naaonjoainne fojiaraauru nihane coitucuhin, coitucueracuru neein nihane coitucuhin coroatajanecuruhinete, nii acaauru fojiaa acaauru fojjarane acatiha tacaain cainaauruhine, nitohanein jeriha Cana Coaunerana jaun.

<sup>5</sup> Canaanai sirilanaala jataen jelai nihanete, Cana Coaunera bajaebajaecure janotiin netojoein autanaauru esineeuru, acaauru coroatajanena nainiha Cana Coaunerane coitucuruhana jaun. <sup>6</sup> Jana, itolere rucuheluuruhacha coacuhin caohatiin neruujuein raotojoein ichaonaa coaauca autanante, ninauhene nena rijijiein niha cureein.

<sup>7</sup> Caritiinchu acaauru relaau, suujuatera latecuruhane coataa. <sup>8</sup> Chunicoaha chaelai latiha naraaichurune jana coroatajanena jerenihane choae tacaain fojiaraauru coroatajanena jerenihanete, Cana Coaunera coitucuruhi fautaeriin nereein, “Cana Coaunera coitucuhanu,” naane niha natiin, Cana Coaunera Ere tonoraenihane.

<sup>9</sup> Coa joenreein autana curuaa laenaa, autana esine canaacha coroatajaneeni curuaacuru siricha quiricha cuhane. Caohachaaain saota choonca ajaanaca niha autanane curuaa laenau. Chaen leijiin quicha aina neein autana nihane, curuaa laenau. <sup>10</sup> Chaenchu jaiti jiniiquiin ichaohin neeuruhane caje coauneein, caohatiin bereecuru fojiara neein, rene bedaenecuruha niicha coitucuruhi cachaaurune jana caohatiin raera neein, rene bedaenecuruha cana nejeraauru- Cana Coaunera coitucuurerane jana jataen belaaain raera neein, necairichaa chuneine jana coroatajanera neein, naaonjoain neinihanete caohachare.

<sup>11</sup> Jana jaiti ena nichauhenane cataaun tiha autanane, coa curuaa laenaa quiricha cuhane. Nabana “Inae coaiten nelanajariaunni,” naain iriha Jesocurisito raine baiha,

<sup>12</sup> Jesocurisito ere tonorana coiinteein enacoauneein nelanajaane, caseteco coaraane coataa. <sup>13</sup> Chaenchu bajeritiin neein, le lorerichuru asae cuhin cajihanein casaje que ereerejeein itolere cachaacha rautai que enohane coataa.

<sup>14</sup> Nii jaunna, jaiti ranunaniha autanane nelanajaane jereeeun. Nelanajain bereecuru fojiaain, rai namihaneon ichaane jereun, nihei cha que leratein coulurujuenaa naineniha Moconajaerane coina. <sup>15</sup> Tabaauru Cana Coaunera jianein, Moconajaera ere tonoraauruha autanaaurune jaun.

<sup>16</sup> Cana Coaunera coitucuhin esenetaeraauru enecuru, autananiha chuni naraaine coroatajanemii. Nabana jataen mainajeein amihanein coroatajanecuruha Cana Coaunera rai ita taojiaerauru cachaaurune coataa. Nitohanein ichaquichenete, esinaen cairicheinein nenacaauru autanaauru coroatajanena nainecurureein Cana Coaunera rai ita taojiaeraauru cachaauru.

*Cana Coaunera rai ita taojiaeraauru cachaauru ichauhenaauru coroatajanecuche*

<sup>17</sup> Atiin caohatiin Cana Coaunera rai ita taojiaeraauru cachaauru suujuateein beraihurera ichauhenaauru belain coroatajanecuruhine. Chaenchu acaihanejein Cana Coaunera Ere beebejeein cachaauru relaaureraacha coroatajanecuruhine, leeochoauru coroatajanecuruhane amuritoheriin.

<sup>18</sup> “Baca amiharateeiche aroso rojoenaa quene, coa aroso quihane coataa borasa que nujuaen conajain amiharatihache,” aitoha Cana Coaunera ere cuhanaine jaun, amihaniane coreniha quihanete caoachae. Nii rijjiejiein core raauruha nii Cana Coaunera Ere beebejeein cacha relaaurera ichauhenaaurunete caohachae.

<sup>19</sup> Neniha coroatajaain, nichatajaain, naonjoain coaraaurune jana ii rai ichauhena coulurujiha chuneine coa tonoraa. <sup>20</sup> Chaenchu baaso ichaechajeein nosatihajeein sacuha chunei ichauhenane, ita taojiaauruha cachaaurune jana, aonajeeuruha satianne urichoo mijiainetiin rai aitiin suujuateute caje coaraain casihuruhine nii leeochoauru.

<sup>21</sup> Chunei jataain ii suujua acateine jaan niha natiin baaso ichaane, ita taojiaauruha cachaaurune jana acaauru suujuateeu, caa aitocoanne tocoaneein. Cana Coaunera, Cana Curuaanaa Jesocurisito, chaen janijiin nii niicha raauri letonocuru anjeraauru, naonjoaihunri notaracaena caa caritiin eletoaun, atiin nitohanein ichaine coina.

<sup>22</sup> Ena Jesocurisito esenetaera nihane, coa Cana Coaunera rai ita taojiaeraauru bichauhenanein enoha, nabana enoin

baasoneein ichaane, coroatajaneraneein ii nerotohine coata. Atiin ishujua coaraain neeu.

<sup>23</sup> Cunaitejerii ii suriguene rijijiein, coa jeesiaanca ne-  
jeesinaacha coha. Aansijiin bino cohin coaraau.

<sup>24</sup> Inanacaa tabaauru osaque nesaruhane, “Naaonjoaainte  
nera,” nain que iriha chuneine latelanaala. Jana tabaauru  
raite inanacaene, “Naaonjoaainte nera,” nain que erei colane.

<sup>25</sup> Jericha nejeeintechu nii rijijiein inanacae caohacha  
ichaain niha cachane. Jana jauriaanejeein inanacaenihane  
nihanatiinte nirijieein cuaajeein inanacaa cue.

## 6

### *Niha fatoroonne*

<sup>1</sup> Rebeecuruha fatoroon quene, nere tonoraauruhine. Na-  
bana Cana Coaunera que ereein, nii Jesocurisito que cacha  
relaacachene que ereein cana que baasoneein ereeuruhane  
coataa. <sup>2</sup> Chaenchu Jesocurisito coitucuhin esenetaera niha  
fatoroonne jerichanejeein nere tonoraauruhine. Jesocurisito  
coitucuha fatoroonne coreniha acaauru nejera rijijiein ni-  
hane coreniha, coa baasonein nere tonoraauruha. Nii choae  
jauhecotojoeriin coroatajanecurumiin nere tonoraain, Je-  
socurisito esenetaera fatoroon nihane.

### *Itolere coitucuha nocoetocuri*

<sup>3</sup> Caritiin relanajaeniha chuneine, Cana Curuaana Je-  
socurisito ere rauhi tonoraelanaala neeuruhane coataa,  
rauhijiriin cana relaa cana relaaurerane jaan tonoraelanaala  
nenaate, <sup>4</sup> itolere coitucuera niha nocoetoreein. Niite ita co-  
tainaa jererein joaenrein casaje coreniha nejesinajeein. Ni-  
toaneeinte ita inasinee rijitohelijitoojeein, ita cotaain, ita que  
ereein, ita esenetaelanaala, <sup>5</sup> ita que nejesinnajeein nejera-  
teein ita cotaairiin neeururein. Nitohaneeinte neeururein  
esinaen erenaa rauhi baiteein naasaenacaauru. Nitorijia  
neinchurute necoriquijiaain, nerujueleitein nena coacuhin  
Cana Coaunera Ere tonorana jererein inacojoojin. Nitohanai  
nihane, caje neloona.

<sup>6</sup> Jataaente nelate, caa chauratane que nena rucuhete que  
cana sujuatelanaala, raotojoein Cana Coaunera esenetaain  
tonoraacachene.

<sup>7</sup> Charijiein teenti nejanoaacachene cha colane nejanoaa-  
cache. Nii rijijieintechu ohacachene, cha amaelanaala  
curichaachein dedeeu. <sup>8</sup> Aihana jaun neejiha cana lenone,  
cana cajione naajeine, niicha aina raotojoojin nihacachenete  
caohachae.

<sup>9</sup> Jana coriqui, rucuhete, naaonjoain taojiana jereraa-  
rute raaje necairichaurure. Inacojoojin necoriquihana que  
sujuateinte, raajenihane necoritaain necairichaururein

nitohaneein nenea jereraauru. <sup>10</sup> Caohachaai jataen coriqui-icha jeriha cachane, cacha aasaeraneein niha coriquina jaun. Nii corenihate Cana Coaunera esenetaain tonorana jianein, raajenhane necairichaaure cacha tabaauru.

*Jesocurisito esenetaain neunaain ichaaau*

<sup>11</sup> Jiaonriha nitohanei ichaain neei Cana Coaunera coitu-cuera neeina jaunne. Cana Coaunera Ere tonoraain, Cana Coaunera Ere esenetaain, Cana Coaunera belaaain, cachaauru belaaain, joaenreein abaantain, ishujua coaraain, naaon-joaain nii ichaonaa caohachaacha sacuu.

<sup>12</sup> Arajiin aonajeeurera urichoo, “Inaen Cana Coaunera Calaohi Jesocurisito esenetaain nere tonorarichaunni,” naailune jaun, laraajiin neeunaain, caohachaain nii sanaachara nejeein nenea ichaonaa caohati que nemucuhin atiin ichaaau. Nii ichaaine coina ichotijiaa Cana Coaunerana jaan ichaaau.

<sup>13</sup> Itolere cachaauru rai ichaonaa tera Cana Coaunera notaracaae, chaen nii cocoainanacai Ponsio Filato rai caohati erenaa que erei Jesocurisito notaracaena, ichei caa aitiin eletoaun. <sup>14</sup> Caa ichei aitocoanne rijijiein rauhi-jiriin ichaaau. Nabana coaiten caa chauratane que turuha Jesocurisitone bana que necocauhataaaine coataa. <sup>15</sup> Inae cuu tihane banate, Jesocurisito ecotiha cureein acaihanejein Cana Coaunera- canaacha belaaai satiin curuaanaacuru curuaanaa. <sup>16</sup> Acate chariji bana onaachara nejeein ne. Chabana cacha turunaja nihein cono tabai jana ne nii Cana Coaunera inanacaelanaala nenea. Acate acaneein nereein itolere amuritoheriin laraajiin itolere bana coroaenohineein.

Nitohaneein neeine.

*Coriqui nebaauru suujuatihane*

<sup>17</sup> Coriqui neba niha chuneine, coa “Chabana, cha lateriaunni,” naain leeochoaauru que necohasitaain niha. Enaaichate nitajihane, nitajeeoricheein coriqui. “Cana coroatajanerihani Cana Coaunerana jaun cha lateriaunni,” naauruhine. Acate canaacha latei teraneein ne, raotojoein cha latelanaala nihacachene coina. <sup>18</sup> Aihana jaun cairichaihuru coroatajanejeein neein, raotojoein neein chaelai latecuruha leeochoaurune, acaauru rai tihajein neeuruhine coriquihonaauru. <sup>19</sup> Nitohaneein neeuruhanete, nii acatiha tacaain belainaanca Cana Coaunerane, nii niicha tei ichaonaa chabana nitajenaachara nejeein nenea raa cuurureein, necairichanacaauru coroatajanecuruhane jaun.

*Satonotihane rai Timoteeo suujuatiha Faborone*

<sup>20-21</sup> Caa ichei caitoonjoa erenaa rauhi tonoraau inoalenlu netojoein. Coa caa chauratane que ecocohin nenea erenaa

tonoraa. Coa, coitucuhera rijitiin turuhin casaje que inara relaeranihane coa tonoraa. Nitohanai tonorauruhane, Cana Coaunera bero rauhi edaa cuuruha tabaaaurune jaun.

Ichoelaain ii beraaine Cana Coaunerara Timoteeo.  
Inaen saa.



## **Timoteeo rai Faborohacha letoai coroataja**

*Coaiten enacoauneein Timoteeo rai quiricha laenaa Faborone*

<sup>1</sup> Jeriha Cana Coaunerana jaunte caletoe, Jesocurisito que cachauru relaanune, esenetaauruhane ichaonaa esine raauruhane coina. <sup>2</sup> Ii raine enacoauneein laenaunra quicha belaa cacalabi Timoteeo. Raotojoein neeine coina, rai raotonoque ii rausiajeein ii coroatajaneeuine Cana Inaca Cana Coaunera, Cana Curuaanaa Jesocurisito, naonjoain.

*“Nariha,” naain ichoreniha Cana Coaunera coroajeeun*

<sup>3</sup> Jerichanejeein aichejetocuruha caferateracurune rijijieina Cana Coaunera belaa, nere tonoraain casuujua coaraain neeun. Itolere banana janotiin netojoein Cana Coaunera bajaebajaecaaunne jana casuujuanaha neeoritohine, “Nariha,” naain ichoreniha Cana Coaunera coroajeeun.

<sup>4</sup> Itolere banana inonta baca raainaaine coaujeeun. Nii jaunna ichoaranaa jereun, jataen raotojoein raachoojoein nihanune coina. <sup>5</sup> Ishuujua coarain Cana Coaunera esenetaaine quena, casuujua ereerejeun coaucaaanne. Jerichanejeein techu Cana Coaunera esenetaaurelu edaa Loira, choba Eonise, naonjoaaihunri. Nii jaunna, “Daae, rai neba, naonjoaaihunri rijijieeinte esinae rauhijiriin Cana Coaunera tonorae Timoteeo,” naain casuujua ereerejeun.

*Atiin coejelanaala, “Canacaanu Curuaanaa Jesocurisito ere tonoraera nichaaun” naain joaenrein cacha rai beeu.*

<sup>6</sup> Nii jaunna ichei aitoon, atiin enacoauneein que nemucuhin, nii Cana Coaunera tenojoin amihanenaa ichaaine coina. Nii ichouturi choae cacooi meecaanune jana Cana Coauneraacha tei amihanenaa ichaa. <sup>7</sup> Coa casiha. Coat-ihia casiinaa najaannu que rai esenetaera suujua corihei Cana Coaunera. Laraajiin, neunaain, Cana Coaunera, leochaauru, naonjoain belaa nererojoecaelanaala neein, suujua coaraain nihane coinete esenetaera suujua core Cana Coaunera.

<sup>8</sup> Atiin coejelanaala, “Canacaanu Curuaanaa Jesocurisito ere tonoraera nichaaun,” naain joaenreein cacha rai beeu. Coa caresero cuhane caseteco neein nihanune que necoejiha, Jesocurisito que cacha relaanune coreniha caseteco neein nihanune jaun. Aihana jaun, iitonai Jesocurisito que cacha relaaine coreniha, iitonai rohecaauruhane, atiin laraajiin

neeunaain neeu. Ii coroatajanerichaaain Cana Coaunerana jaunte, abaantaain neunanaa naineriquiin.

<sup>9</sup> Caohachaaain nihacachene que ainaa tocohaneeinte, cana cotijiaain cana rae Cana Coaunera, acaihanejein nere tonoraera neein nihacachene coina. Niritiin jauriaanejeiin aitiin cacha coaunaane jaunte, Jesocurisito cacha nichaachene coreniha cana belaaain cana rae Cana Coaunera. <sup>10</sup> Nitohanihana jaunte jianacoon cana teranu que Jesocurisito letoae Cana Coaunera, coaraain coitucuhacachene coina. Cana coreniha ohin ichanaa Jesocurisitona jaunte, ohacachene necairichanaa coaraelanaala, neculucohin onaacharanejein nerichaachein coaiten turuha Jesocurisitone.

<sup>11</sup> Nii jaunte canu cocoaain caenoain caletoe Cana Coaunera, rai nere beebejein Jorioniheichuru relaanune coina. <sup>12</sup> Nii jaunna chaque casilanaala nere beebejein cachaauru relaanune coreniha, caa catohanein caseteco neein neeun niqui, nena coejelanaala caa neeun, cana coroatajanera coitucuhanune jaun. Acate laen naine caco-rataanein cacoeraia ne, coaiten enacoaunein turuhane reentiaain.

<sup>13</sup> Nii jauriaa ichelaanulune rijijieein ichaechajein neeu. Jesocurisito cacha nichaachene jaun, coanete Jesoso esenetaain, Cana Coaunera, leeochoauru, naaonjoain belaaain nihacache. <sup>14</sup> Cana suujua cuhane ichaoha Cana Coaunera Suujuena jaun uhaain, atiin que neeunaain nii ichei Cana Coauneraacha tenojoin erenaa rauhi tonoraain ichaa.

### *Cacoelaain cacorataaniha Onesiforo ne*

<sup>15</sup> Nii coitucuhine tocohaneeinte caque jaolecoore saain Asia cocoaichacuru. Fijelo, Eremojene, naaonjoaaihunri nihanatiinte saain caque jaolecoore.

<sup>16</sup> Onesiforo sinijera, bereecuru, naaonjoain belaaain coroatajaneine Cana Coaunera atiin carai, araai saain cacoelaain cacorataanihane coreniha. Acate caseteco neein nihanu natiin, cacoreniha necoejelanaala cacorataane. <sup>17</sup> Cau Romau turuhinte, mainajein amuhemujueein caariin, tabiicha cauruhin atiin cacorataane. <sup>18</sup> Nii choae tacaain techu, nii Efesoo nihaca jiniiquiine bana, jataain cana coroatajanelu nii Onesiforo. Nii coreniha atiin belaaine Cana Curuaanaa Jesocurisito, inae coaiten cau chauratane que turuhane bana.

## 2

*Coujuriu Jesocurisito ere tonoraera neein nena tocohaneei necairichanaa abaantaain neeu*

<sup>1</sup> Laraajiin atiin neeunaau, ichorataaniha Jesocurisitona jaunra cacalabi.

<sup>2</sup> Cha teeinti letoaera nihane erena tonorain ichae, nii coaraain relaaute leochaauru relaera neein neeine. Inae araai saain cachaauru relaanune jana, aonajerejetohilune jaun, nii rijijieein acaauru relaa.

<sup>3</sup> Charijiein teeinti letoaa acaauru curuaanaane, atiin necairichanaa abaantain ichacure caohati soondarooru laraajiuruhane. Nii rijijieein coujurihu Jesocurisito ere tonoraera neein nena tocohaneein necairichanaa abaantaain neeu. <sup>4</sup> Joaenreein cacha rijijieein ichaonaa nainihe soondaro. Curuaanaa ere tonoraain nihanete ne. Nii rijijieein chu cana Curuaanaa neein niha Jesocurisitona jaun, abaantaain nere tonoraacachenete ne, rai letono neein nihacachene jaun.

<sup>5</sup> Charijieein teeinti necoatijiaacane, cacha amuritona nainenihaca necoatijianaa beraicha ere tonoraain necoatijiae nihacane. Nii rijijieein techu nii Moconajaera amuritona nainenihaca Cana Coaunera Ere tonoraenihacane.

<sup>6</sup> Charijiein teeinti temule jaacane jana inae nihane, tonajelanaala caje raain que lenoneein nihacache. Nii rijijieein techu Cana Coaunera tenojoin amihanena ichacaachene, tonajelanaala raotojoein nerichaacheein, itolere que cana belairichaaain Cana Coaunerana jaun.

<sup>7</sup> Caa caitoonjoan que ishujua ereerejeein coaacute, coitucueeneine ichorataanemiin Cana Coaunera, aonaain coitucuhine coina.

### *Jesocurisito que coaaucu*

<sup>8</sup> Cana Curuaanaa inoaaainsi Rabiri feratenojoneein niha Jesocurisitone que ishujua ereerejeeu. Acate ohane caje ichanae. <sup>9</sup> Nii beebejeein relanajaanune corenihate, leocha ataebinae chara tocohaneein *cadena* que canu cositeein, catohaneein cacasetecaure niqui, nete caa quere cacha relaanune jaan cositena nainecurene laen.

<sup>10</sup> Nii jaunna itolere necairichanaa abaantaain atiin Cana Coaunera janiinohinchuru relaaun, Jesocurisito coreniha jianacoo neein, nitajena charanejeein neeuruha Cana Coaunera janiinohinchuru cachaaurune coina.

<sup>11</sup> Esinaena rauhijiriin aitoreeunni.

Cana Coaunera esenetaain ohacachenete aina ichaorichaachein.

<sup>12</sup> Necairichanaa abaantaacachenete, aina rai Cojoanona que nerichaachein.

Que jaolecohacachenete, acaetonai cana que jaolecoreein.

<sup>13</sup> Cana aitoonjoan ichaenihacachenete, aca laen naitoonjoan ichaa cureein.

Nitohaneein laen niha acana jaun.

*Caohachaain suujua coaraain niha Timoteeone*

14 Caohachaenihā nitohanaina jaunna ichei aitoreeunni, suujuatenajaain neeine coina, nabana nitohaneein neeu-ruhane coataa. “Coa erenaa laaojiriicha coreniha ita cotaaine rijitocoache,” naain Cana Coaunera Ere beeurera sujuateeu, atiin Cana Coaunera notaracae. Nelatihei erenaa laaojiriicha coreniha ita cotaicha rijitiin iriha cachane, nabana que nererojoeccain neeuruha aohanraaurune coataa.

15 Atiin naineine jaun uhajein Cana Coaunera Ere que relanajaaun rauhijiriin, charijieein teeinti ai leeinjiin catcha, laraajiin amihanihane letoaera que necasaene nii rijijieein Cana Coaunera acatiha caohatiin ichei amihanenaa niicha tei ichaa. “Caohatoha chamijianeonra,” naain ichei iriha Cana Coaunerane coina. Jana rauhijiriin relanajaeneeinete ii necoeje chanureein Cana Coaunera.

16 Aihana jaun, coa Cana coaunera coitucuruhi rijitiin erenaa baaso que irihache, nabana nirijiein cuaajein Moconajaeraacha ere tonoraachene coataa.

17 Charijieein teeinti, nijiriha cachane, inae suujua lomoha nii cunaine ohe. Nii rijijieein techu, nii erenaa baaso que ereerejein tonoraachene, inara suujua lomoha nii erenaa baasone nitajiha curiquicheein. Nii corenihate nitajeeure Imeneo, Fileto, naaonjoaihunri, <sup>18</sup> “Chabana oo caje enacoauneein nejabereccain nichaaurain nerinaain catcha,” naauruhana jaun. Niritiin ereeuruhana jaunte, nererojoeccaaure acauru aohanraauru tabaauru.

19 Nii jaun, “Cana Coaunera esinaen esenetaeraauru suujua coitucue. ‘Cana Coaunera coitucuera nichaun,’ naain iriha chunei cachane, baasoneein ichaohane jianemiin,” naa Cana Coaunera Erena jaunte, esinaen Cana Coaunera cachanein nihacachene coitucuhacache, inae nii jianein niha-cachena jaun.

20-21 Charijieein teeinti coriquihona loreri asaane itolere coata coreti caje ichanohin ojoaichu, baichaje, atane caje ichanohin ojoaichu, baichaje, darohe, enuha caje ichanohin jecoro, coshara, erauru, naaonjoain; tabaauru nelatein joenreein lenone curunu que; jana tabaauru nechū jataain joenreein calani joanaana jaannu que nelatei. Nii rijijieein techu, osa jianein Cana Curuaanaa Jesocurisito ere tonoraachene, nelatiha curichaachein Jesocurisito cachanein joenrein amihanenaa caohati ichacaachene.

22 Aonaau. Enamanaa neeine rai caohacha tocohanein nena baaso caje naururuu. Suujua coaraauru catchaauru aina jiniiquiin Cana Curuaanaa bajaebajajeein neeu. Cana Coaunera tenojoin ichaonaa rauhi sacuhin, esenetaain Cana

Coaunera, chamute cacha naaonjoain belaaïn raotojoeïn neeu.

<sup>23</sup> Casaje que ita rai ereerecuruha leochaurune coa iriha, nabana ita baijiaain ita cotaachene coataa. <sup>24</sup> Nainiheï Cana Curuaanaa Jesocurisito ere que cacha relaeraneïn nenaamute cacha aina nejerateïn nihane. Itolere cacha aina jerichanejoeïn ita belaaïn nihanete caohachae. Chaenchu raotojoeïn caohatiïn rai suujua coaraain, cotailanaala relaaïn <sup>25</sup> raotono que cuaain cacha suujuateïn nihanete caohachae. Caitono tocohaneeïn nihanete jerecureniha tabaaurune nihanatiïn, acauru suujuateïn acauru suujua corenaa nainereïn Cana Coaunera. <sup>26</sup> Inae nitohaneïn acauru suujua coriha Cana Coauneranete, erena rauhi coitucuruhanete caohachananejoeïn nichotiha cuurureïn Moconajaera caje.

### 3

*Naaonjoaante curureïn cana janonaa satono rai coaiteen cajiha turuhelalajiha Jesocurisitone bana.*

<sup>1</sup> Aonaaute coitucuhi. Cana janonaa satonohelalaje raite, Cana Coaunera coitucuurera cairichaeriïn rerohecaa curureïn Cana Coaunera coitucuruhi. <sup>2</sup> Nitohaneurite nelaetoha nocoetiïn, jataain coriqui mucunaa coacuhin leochaauru que necohasitaain, ita cotaain, niheichu fojiaraauru ere tonoraelanaala, nechu jataain aansai ataibinaen rijijieïn Cana Coaunera Ere tonoraelanaala niha curureïn. <sup>3</sup> Chaentechu necairichanacaauru coroatajanena coacuelanaala, casajenetiïn, baaso ichana jerecuruhane suujua coaraelanaala ichaain, naaonjoaan cuurureïn. Chaentechu nechu aansai ataibinaen rijijieïn itolere ichaonaa caohacha aina nejerateïn, naaonjoaan cuurureïn. <sup>4</sup> Chaentechu itolere coitucuha nocoetiïn niicha jerei ichaain niha cuurureïn, Cana Coaunera arinaa coacuelanaala. <sup>5</sup> Baasoneïn ichaohinte Cana Coaunera coitucuha nocoetoha cuurureïn.

Coa nitohanai cacha raa. <sup>6</sup> Nabana raaichene jana, nechu aaso ene cojoaelorohe coritaain nihane coataa. Nitohaneurite, suujua coaraelanaala niicha ichana jerei ichaain neeurureïn. <sup>7</sup> Itolere banate niqui nerelaaurureïn, nete chabana ichaonaa rauhi coitucurenereïn.

<sup>8</sup> Charijieïn teeinti Moisesa ere tonoraarene nii coroatajai benanecuru- Janesi, Jambresi, naaonjoaauri. Nii rijijieïn techu Cana Coaunera Ere Rauhi tonoraarenereïn nitorijianeï cachaauru. Naasaheca acauru suujua cuhanena jaunte, Cana Coauneraacha tei ichaonaa rauhi aasaena jerecureïn. <sup>9</sup> Jataain chatohanai ichacururiaain, nechu

aasoneeojaaunruhane coitucuurichaaain saain cachaaunune jaun. Charijieein teeinti aihure nii Moisesa ere tonoraauruhi. Nii rijijieeinte situha cuurureein nitohaneeuri.

*Timoteeo suujuatiha necairichanaa que Faborone*

<sup>10</sup> Ichelaanune tocohaneente chuhisi caohachaaain neei. Chaen techu cachaauru relaanune jaan coitucuhin, quichao coitucuhin, camijianeon coitucuhin, esenetaain quiiha belai coitucuhi. Chaen techu neunaa casuujuane coitucuhi.

<sup>11</sup> Chaen techu caniha nejerateeuruhane jana abaantaanune coitucuhi. Antioquiha, Iconia, Listra neein curuajaihuri ne-seuru nihanune janate, caniha nejerateein carerojoecaauruhane jana, jianacoo camitaa Cana Coaunera coitucuhi.

<sup>12</sup> Esinae rauhijiriina caa aitoon. Jesocurisito ere tonorana jereraaurute rohecaa cuurureein niqii, nete

<sup>13</sup> raajenihane necairichaa cuurureein nechuu aansai casajeeuru. Nechu jataain nii rijijieeinte ita coritajeein jeelai amuritoheriin necairichaa cuurureein nechuu jataain casajene jaun

<sup>14</sup> Ii laen rauhijiriin nii que nerelaaina jaun iicha esenetai sacuu. Iite nii ichelaera coitucuhi. <sup>15</sup> Canaanai neeine caje coaaneente, Cana Coaunera Quiricha coitucuhi. Nii Cana Coaunera Quiricha que nerelaain esenetaaichenete, jianacoo inara tereein Jesocurisito.

<sup>16</sup> Satiinte Cana Coaunera tenojoinee in Cana Coaunera Quiricha. Acate cacha relaan, cacha suujuateein, cacha suujua raujiain, naaonjoainu que nelate, ichaonaa rauhi coitucuhin caohachaaain ichaoha cachane coina. <sup>17</sup> Itolere Cana Coaunera jerenohin amihanenaa ichaain niha Cana Coaunera coitucuurerane coina.

## 4

*“Atiin aohana jerecureniha cachaaunune nihanatiin beeu,”  
naa Faborone*

<sup>1</sup> Cana Coaunera aina nii turuha uhenenu, nii cauchauratane que nenacaauru ichaonacaauru, saain onacaauru, naaonjoaaihunri rucuharanu notaracaena caa mijjaainetiin eletaaun Cana Coaunera Ere beebjeeine coina. <sup>2</sup> Atiin aohana jerecureniha cachaaunune nihanatiin rauhijiriin beeu esenetaauruhine. Baaso ichacuruhane raotojoein raujiain cuuain suujuatenajaaun, <sup>3</sup> inae ecutihane bana erenaa rauhi aohana jerecurenerichaaaine jaun. Nitohaneente, baasoneein coacuhin arajiin acauru relaeranu ariha cuururein, acaauruhacha jerei tocohanein baaso que relanajaeraanu que. <sup>4</sup> Nitohaneente erenaa rauhi aohana jerelanaala que janoriin amuururein. Amuhin joaenreein casajeeicha esenetaain tonoraain

raaje necairichaaaurureein. <sup>5</sup> Ii laen ishujua coaraain necairichanaa abaantaain Cana Coaunera Ere beebejeeu, jianacoo osa caje mituhin neuruha esenetaaurerane coina. Nitohaneein caohatiin chamijianeon ichaa.

*Inae Cana Coaunera tenojoin amihanenaa jitaanu*

<sup>6</sup> Inae ichuunejeeonriha ohanune que tihane.

<sup>7</sup> Inae Cana Coaunera tenojoin amihanenaa jitaanu jianelanaala rauhijiriin ichaain. <sup>8</sup> Inae nerichaaain canu amihaneoo core, caque banihateein Cana Coauneraacha rucujuei, acaachana inae caa cohajeeun. Inae turuha nii Cana Curuaanaa Joesio, caohacha nejesina ichara neein nenaanete, Aca nii canu amihaneoo coretereein. Coatiha canuhacha rai coreterinaain. Satiin nii turu jereein cohajeraauru rai netonaite coretereein.

*Saatono*

<sup>9</sup> Cacoharaa uu atiin chajaaajoaain. <sup>10</sup> Caquete jaoleque Demasi, caa chauratane que nenacaauru itolere rucuhele cautenu rijihuru jerihana jaun. Nii jaunte naain Tesalonecau cue. Jana Cresentete Galasia bataneu cue. Jana Titote Dalmasia bataneu cue. <sup>11</sup> Acaihanejein Locasichate caniha ne cau. Maroco ariin cotijiaain ijiniichaain uhaau. Acate laen camijianeoo que cacorataanena naine.

<sup>12</sup> Tiquicono laen letoaaun Efesoo.

<sup>13</sup> Toroasihu nihanune banana Carpo loreri asaae quela ratirihunlu, uhaau carai uhine. Chaenchu nii canu quirichaauru nii quiicha laenajacoaine maajeein uha.

<sup>14</sup> Nii coata que amihanenaa Alejaandorote, jataain baasoneein caete niqui, nete inae cacocaeratereein Cana Curuaanaa. <sup>15</sup> Coaraau. Necoeraain neeu, Cana Coaunera Erecanaacha beebejei que nejeratihana jaun.

<sup>16</sup> Camucuhin, cacaje bajaauruha cocoinanacaaihurine janate, cajaohin caratiriin amuure satiin. Nii coreniha jiaonriha chatohaneein tenajaa Cana Coaunerane.

<sup>17</sup> Nii janate, canu coroatajaneein casuujua laraajie Cana Curuaanaa. Nii jaunna, itolere caa chauratane que nenacaauru Jorio niheichuru rai Cana Coaunera Ere beebejeeun, jianacoo neuruha esenetaaurerane coina. Nitohaneinte necha aansai ataibinaen leon ujuaae caje jichoro-coaain jianacoon caete Cana Curuaanaa. <sup>18</sup> Itolere baaso cajete canu mitaain canu beraicheein, aina dedeeu nihanune coina. Coanete Cana Curuaanaa corojeein belaihacache inoaelu netiin. Nitohaneein neine.

*Cana Coaunera esenetaeraauru rai necoiha Faborone*

<sup>19</sup> "Inara coaaujiha jera Faboro" naain beeu, Firisila, Aquila, Onesiforo araachuru, naonjoaihunri rai.

<sup>20</sup> Coriintoote neda Erasto. Jana Torofimona ratirihun Miletoo, cunaitihana jaun. Naineeine elohena ajiniha uu.  
<sup>21</sup> Eobolo, Poreente, Lino, Cularia, naaonjoaihunrite ii coaucure. Chaenchu saain cana nejeraauru Cana Coanera coitucuurerate ii coacue.

<sup>22</sup> Ii aina neeine cana Curuaanaa Jesocurisito. Satiin inara belain inara coroatajaneine atiin Cana Coanera.  
Nitohanein neeine.



## **Tito rai Faborohacha letoai**

*“Inara coaaucaun” naa Faborone*

<sup>1</sup> Canu Faboro nichaaunnena, nii coitucuhiche raotojeeinne rijijieein, Cana Coaunera jerenohineein rai Calaoihi Jesocurisito letono afosotoneeun. Acate caletoe, satiin chauratane sacuritaain janijiin nii ranojoihunru rai amuhemujueein beebjihanune, <sup>2</sup> rauhijiriin coreniha cana osa caje nichoteein jianacoon neein, chabana satonoelanaala nena ichaonaa teranihane cohajhacachene coina. Chabana cana coritaa Cana Coaunera. Acate nitohaneein cana rai ichaonaa tihane coina aitelu, cana rai chauratane coaau-naane ajiniha. <sup>3</sup> Inae nii jihanteein aitohalune jaa que turuhane jaaunte, inae nii aca jianacoon cana osa caje cana mitaeranihane coitucuerateein beebjihanune coina caletoaclu Cana Coaunera.

<sup>4</sup> Nii jaunna caa ichei quiricha laenaain letoaaunra Tito. Iite esinaen rauhijiriin canu calaohineei, cacoreniha nii canaacha esenetai Jesocurisito esenetaine jaun. Cana Inaca Cana Coaunera, Cana Ichotera Jesocurisito, naaonjoaain raotojoein neeine jaanu teeuruhine ii raite aina raotojoein jianacoo neeine coina.

*Curetau Cana Coaunera coitucuurera relaa Titone*

<sup>5</sup> Nii Curetau cobenau ii ratirihanune ajiniha taone, jaiti rucuhera coina lananacaauru rucujueein, iclesiacuru nainein Cana Coaunera coitucuureraauru- canaacha relaauri coaranu que acaauru bichauhenaauru cocoaainaine coina ichei aitoonlu. <sup>6</sup> Nii le iclesiacuru bichauhenaauru bichauhena cocoaianohichuru, cojuriu nitohanei coaranein nena tocohanein suujua coaraain ichaohine, nabana que tonaain iriha chunine coataa. Chaen techu leinjiin eneecha que sinijeraaocane caohachae. Jana rai calaohichuru netonai Jesocurisito esenetaeranein, caohachaaain suujua coaraain erenaa tonoraain neeuruhine, nabana baasonein erenaa tonoraelanaala ichaauruhane, acaauru que ereein niha chunine coataa. <sup>7</sup> Nii Cana Coaunera ranojoinuri iclesia coaranein- acaauru bichauhenanein nenaate, jeriha Cana Coaunerane rijijieein caohachaaain suujua coaraain, que Cana Coauneraacha icharatei ichaain rauhijiriin ichaohane caohachae. Nainihe erenaa tonoraelanaala, namute cacha coiintetiin, ajetoritiiin, ita cotainaa rautatiin, asijiautoneein, naaonjoaain ichaohane. <sup>8</sup> Nitohanein baasonein ichoaelanaala,

turuhin niha cachane belaa'in, cotijaa'in, loreri asae raain, naaonjoaa'in ichaohine. Chaen techu caohacha ichaera cachanee'in, caohatiin suujua coaraain, Cana Coaunera que banijiaa'inee'in neein, chabana jeriha suujuane rijijieein ichoaelanaala, naaonjoaa'in nihane caohachae. <sup>9</sup> Nii esinaen rauhijiriin aitiin relaeraalune jaacha tonoraain, acaacha esenetaain que leeochoaauru relaaine, acaauru netonai leeochoaauru suujua lara'ajiaain nerelaacachene jaan coitucuerateeuruhane coina. Chaen nii caohateein erenacaauru relaain acaauru suujua baaso aninoaainete, acaauru netonai esenetaauruhine.

### *Relanajaa'urera baaso*

<sup>10</sup> Arajiichurute, nii acaauru relaacane jaan tonorana jerelanaala, "Jorioniheichuru jaberoco macohi cari saerate-laanaala nena, nainihe'i Cana Coaunera esenetaeraneein ranojoneein nihane," naain nechu jataain cha coitucuureni-hane jaun cachaauru coritaare. <sup>11</sup> Niritiin erenacaauru erete, caohachare niritocuruhane coataa caohatihacane. Nii casaje aina cuaainte laurijiracuru aina arajii cachaauru suujua auhacaain, cachaauru coritaain, arajii coriqui ranaa coaacure.

<sup>12</sup> Coaraaunachuhinti nii Cureta cobenau nena *profeta*, nii jeelai acaauru araacha: "Satiin Cureta cocoaichacurute casajenetiin, necha ansai ataebinae rijijieein neein, baje'itiin, achotoritiin, naaonjoaaunre," naain acaauru ichao bihalune. <sup>13</sup> Esinae rauhijiriinte acaauru ichao coaraane jaun aitelu. Aihana jaun, caohachaa'in laraajiin acaauru relaau, coujurihu Jesocurisito esenetaeraneein nena tocoanee'in neeuruhane coina, <sup>14</sup> nabana, nii suujua caje rocohin relanajaaunruha Joriocurune jaancha esenetaauruhane coataa. Niheichu nainecuruhi Jesocurisito esenetaeraneein neeuruhane sainejee'in que jaolequiin, nii naitoonjoan tonoraelanaala nenacaauru ere tonoraauruhane.

<sup>15</sup> Caohachaa'in suujua coaraain niha cachanete, itolere'nee'in nichanaane maajee'in caohachaa'in coanojoi ne. Jana canaacha esenetai esenetaelanaala nenaate baaso nejesina que coacuhin itolere bana baasoneein ne, nichanaane maajee'in, nechu jataain baasoneein coacuhin cha ichacuruhane jaun. <sup>16</sup> Cana Coaunera coitucutohate niqui nocoetocure, nete acaauru ichanaacha caje coitucunojonecure baasoneeuruhane. Namute cacha cotairiin, namute cacha que erenajaa'uharitiin, erenaa tonoraelanaala neein, nii charijibana caohacha ichaain neeuruhi.

## 2

*Nohanelanaala relanajaacachene jaan*

<sup>1</sup> Caohachaaain nii ichelaanune jaan tonoraain, esinae rauhijiriin que acaauru relainete caohachae. <sup>2</sup> Nii acaauru bichauhenaurute, esinae rauhijiriin tonaain ereeuruha chaachacuruhane coinane, nii naitoonjoa ichaaain ichaaoruhane caohachae. Esinae rauhijiriin nii niicha esenetai rijijieein neein, satiin belaaain, laraajiin, naaonjoaain ichaohine, itolere necairichanaa abaataain nena nainihane coina. <sup>3</sup> Jerichanejeein techu, coujuriu inara bene bichauhenauru jeriha Cana Coaunerane rijijieein ichaohin, ajetoriaanelanaala, erenacaaotelanaala, naaonjoaain que coacuelanaala, caohachaaacha que coacuhin neeuruhane caohachae.

Coujurihu ranunaauru bichauhenaneein nena tocohaneein, ranunaauru notajaain, <sup>4</sup> rai sinijeraauru aina rai bereecuru belaaain neeuruha ranunaaurune coina acaauru relaain, <sup>5</sup> caohachaaain itolere que nainaaain suujua coaraain, loreri asae nenacaaaurune maajeein beraain, osa que nesaruhin, barijitiin, naaonjoaain neeuruhane coataa acaauru suujuateein nihanete caohachae. Chaen acaauru sinijeraauru aina ita suujua rijijieein coacuhin neeuruhine, nabana tonaain Cana Coaunera coitucueraneein neeuruhane sainejeein acaauru que iriha cachane coataa.

<sup>6-7</sup> Jerichanejeeinchu caohacha nejesina ichaaain nii enamanaacuru notajaain acaauru que corajerateeu. Acaauru relaine caohachaaain ii suujua coaraain, coujuriu ichauhenaneein nena tocohaneein, <sup>8</sup> raotojoeein acaauru rai ereein canaacha esenetai que aitiin acaauru relaau, nabana tonaain baasoneein cana que erena nainiha chunine coataa. Nitothanein ichaainete cana que nocoejeeurureein nii acaauru relaacane jaan caohatera rijitiin erenacaauru.

<sup>9</sup> Chaen rai fatoroon ere tonoraain, letoanajaa acaauru fatoroone jaan ichaaain, tonaain baasoneein tonorana coacuelanaala neeuruha rai letononeein nenacaaaurune coina suujuateein relanajaa. <sup>10</sup> Jiaonrihachu asijiauhin neeuruhane. Baaso coacuelanaala caohatiin suujua coaraain neeuruhine. Nii banate, acaauru ichao caje jataain caohatoha Cana Coaunera cana ichoterateraneein nena que acaauru relaacachene jaan coaracurureein satiin cachaauru.

<sup>11</sup> Cana Coaunerate cana belaitohane coaratih, satiin caa chauratane que rai cachaneein neinichaachene ichoteraanu letoaelu. <sup>12</sup> Acate cana relae, Cana Coaunera coitucuhichuru rijijieein baaso ichaaechajeein nihacachene jianein, caohacha que coacuhin, coujuriu Cana Coaunera cachaneein nena tocohaneein rauhijiriin Cana Coaunera corojeein caa

chauratane que ichaohacachene coina. <sup>13</sup> Nitohaneeinte nii cana rai tihane coina naitoonjoan nainaane cohajeein raotojoei ichaonaa que ichaohin, turuha urichaaain nii Cana Coauneraneein cana ichoteraneein necaohachaain nena Jেসোচরিতনে cohajeein nihacache. <sup>14</sup> Acatechu itolere baaso canaacha ichai cana osa caje cana ichoteratihane coina rai jaberoco teein nelu, oha cana corenihane, nii baaso caje cana coulucohin rai cachaneein caohacha ichanaacha que coacuhin nena coina ichaelu.

<sup>15</sup> Nii ichei aitocooaunne rijijieein, coointeeturuhane nihanatiin, acauru que corajerateein acauru relaau, coujuriu cocoainanohineein nena tocohanein, nabana nii relana-jaaine jaan tonoraelanaala ii que jaolecoha chunine coataa.

### 3

*Esinae rauhijiriin caohachaain suujua coaraain neuruha Cana Coaunera coitucuerane*

<sup>1</sup> Nabana baitecuruhane coataa, acauru rai nacoaauneein aitoote, coujuriu Cana Coaunera coitucueraneein nena tocohanein, rai curuaanaa, cocoainanacaihuri, naaonjoainuri ere tonoraain itolere bana jatoroaain neeuruhine caohacha nejesina ichacuruhane coina. <sup>2</sup> Jiaonriha tonaain baasoneein chuni coacuhin ereein neeuruhane. Niheichu ita sonaa coacuelanaala caohacha cachaneein ichaohin, jini-iqiiin ita belaaain, caohachaain neeuruhane coarateein neeurumiin.

<sup>3</sup> Jauriaalute cana netonai tonaain irihacachene joenreein ererejetocoaache, Cana Coaunera ere tonoraelanaala nechu jataain nitajenaaneein neein, cana suujua letono rijijieeincha itolere baaso ichaonaa ichaaechajeein nerejetocoaachelu. Nitohaneeinte baaso ichaaechajeein ichaonaa jana, cana que nererojoecaeriin nerejetecuruha leochaaurune rijijieein ita que nererojoecaeriin nerejetocoaachelu. <sup>4</sup> Nete satiin caa chauratane que cachaneein ichoainichaachene belaitohane coaratiha, satiin cachanichaachene ichoteratelu cana osa caje Cana Coaunera. <sup>5</sup> Coatiha rai caohacha ichacaachene jaun nii cana ichoteratiheilu. Cairichaojoaain cana coaraane jaunte, nii cana osa caje cana coulucohin cana ichoteratelu. Rai Suujue aina cuaain cana coulucohinte, nacoaaunein nejanoaain nena rijijieein nena coina cana rai nacoaaunein ena nena ichaonaa telu Cana Coaunera. <sup>6</sup> Jataain cana belaitohane jaunte, rai Calaohi cana Ichoteraneein nena Jesocurisito aina cuaain, cana rausiaaeca jelai amuritoeriin rai Suujue telu cana rai Cana Coaunera, <sup>7</sup> itolere ujuaihoneein nena caje caohachaain

neein nii chariji bana sanaachara nejeein nenea- canaacha cohajei ichaonaa que nenea coina.

<sup>8</sup> Esinaetechuhisi nitohaneein cana osa caje cana coulu-cohin cana raain ne Cana Coaunera. Nii jaayna ichei aitoon, nii Cana Coaunera esenetaeraauru itolere bana caohachaacha que coacuhin neeuruhane, nii leecha relana-jaera ere tonoraelanaala neeuruhane coina acaauru rai aito-hine coina. Nitohaneein ichaohacachenete, jataain cana rai nelateineein nereein. <sup>9</sup> Nete laen nii cana rai aitocuruhalu cana coitucueracurune esenetaain, Moisesa aitoonjoan que ita rerohecaain naaonjoaain nenea naineneei. Niite nechu jataain nohanenaaneein nii chaque nelatene cana rai.

<sup>10</sup> Niha nitohanei que cachaauru relaain lerunaa jererane, coroata saain, nichata saain, naaonjoaain cotijiaain rai aito-hine jana chere tonorana jerenihane, jelai caje sitaaute amuhine. <sup>11</sup> Nitohaneein nenacaauru cachaaurute itolere osa que nerotocuruhane jaun aihure. Nitohaneeinte acaauruhacha ichai caje osa que nesarucuruhane coaanjoi ne.

### *Nicopolisihu canu cohacu*

<sup>12</sup> Inae ichene Artemasi letoaenihanune, Tiquico letoaanune, atiin Nicopolisi cuhin canu cohanihute ecu ita coaracaa. Ecune jelaronaa bitoaaunune coina ucuae ureeunni. <sup>13</sup> Chaen nii ecu nenea *abogado* Senasi aina Apolo coroata-janeeun acaauruhacha latei teein, nabana nii cuuruhane-jaun turuuruhane reetiaain lanaa acaauru rai acaauruhacha lateine coataa. <sup>14</sup> Canaacha relaineein nenacaauru, itolere que caohacha ichaain, cha lateein niha chunucohane coaracuruhane coroatajanena que nerelaaurumiin, nelateineein niha acaauru ichaone coina.

### *Raotojoein neeuruhane coina aitiin necoiha Faborone*

<sup>15</sup> Satiin caniha cau nenacaaurute ii coaacure. Nii ecu nenacaauru canaacha esenetai Jesocurisito coreniha canaacha belaihuri- cana nejeraauru coaucaaune beeu acaauru rai. Satiin raotojoein neeichene jaanu teein, inara coroatajane-miin Cana Coaunerate raotojoein neeiche.

## **Filemoon rai Faborohacha letoai**

*Acaauru coaucane biha Faborone*

<sup>1</sup> Canune Faboroneein Jesocurisito coreniha caresero cuhane neein cana nejera Timoteeo aina, ii canacaanu amihaneeo que canacaanu coroatajaneraneein neeine rai, caa quiricha laenaain letoaacaanura Filemoon. <sup>2</sup> Chaen Jesocurisito ranojoneein iclesianein nenacaauru- ii loreri asaae ii aina netaojianacaauru, chaen canacaanu amihaneeo que canacaanu coroatajaneranein nenacaauru- cana nejera ene neein nena- Apia aina Arquipo, naonjoainuri rai netonaine caa laenaain letoaacaanu. <sup>3</sup> Cana Inaca Cana Coaunera, rai Calaohi Jesocurisito, naonjoainuri jeelai amuritoeriin inara coroatajanecurumiinte raotojoein neeiche.

*Coichana aina cutaain belaina inaain esenetaain niha Filemoonne*

<sup>4</sup> Cana Coaunera bajaanune naineine, itolere bana ii coacuhin Cana Coaunera corojeeun, <sup>5</sup> Cana Curuaanaa Jesocurisito belaaain jataain esenetaaine rijijieein satiin Cana Coaunera cachanein nenacaauru belaaaine beeuruhane jaun. <sup>6</sup> Nii jaunne ii canacaanu rijijieein acaacha esenetaain neeine jaun, jataain canacaanu rai caohacha icharanein, canacaanu coroatajaneranein niha Jesocurisitone coitucuhin neeine coina, Cana Coaunera bajaaun ii rai. <sup>7</sup> Jataaina jeelai amuritoheriin corajeein rachoojoeun casuujua cuhane. Jataainte caohacha ichaai canejera, Jesocurisito esenetaeranein nenacaauru belaaain, acaauru suujua nunaaine jaun.

*Atiin canu coreniha ii letoo Onesimo raau.*

<sup>8</sup> Canu Jesocurisito rai afosoto nichaaunne jaunte niqui ne canu rai rauhi, iicha chanenu ichaaine coina ii letoaanune coina. <sup>9</sup> Nena raujiaain nii canaacha belaaaneein canaacha esenetai coreniha ichei aitoreeunni. Canuna Faboroneein-inae biinaaneein- Jesocurisito coreniha caresero cuhane netiin ichei aitoon, <sup>10</sup> cau cajinichaaain caresero cuhane neein, Jesocurisito coreniha cacalabi rijijieein nena Onesimo belaaaine coina.

<sup>11</sup> Jauriaalute niqui ichei chaque nelatelanaala, ii letononeein nelu Onesimo. Nete laen inae ena jiniiquiin cana rai jataain nelateinnein ne. <sup>12</sup> Inae nacoauneein jelaiha ii rene cauhane coina letoaanu. Atiin canu coaraaine rijijieein nii coaraain neeu. <sup>13</sup> Cana Coaunera ere beebjihanune

coreniha, cau caresero cuhane nihanune jaunne, iineein nenea rijijieein canuhacha latei icharaneein nihane coina, cau canu aina nihane jereun niqui. <sup>14</sup> Nena jereneeine coataa aihane jereneun. Nabana canu ii caje bajaanune jauncha jereeine coataa, ii suujua caje coauneein jereeine jerichaaunne jaun. <sup>15</sup> Jerihane ena chabana satonoelanaala ii aina nihane cointate, ii caje amuhin nelu- nii ii letono Onesimo. Nete inae naineneei ii letono siriine rijijieein siriine. <sup>16</sup> Raujiaain ii letono siriine amuritoheriin, ii nejeraneei tein belaaain coaraau. Jataaina belaaain coaraaun canu. Nete nii amuritoheriin joaenreein cacha rijijieein coaraelanaala, Cana Curuaanaa Jesocurisito coreniha, ii nejeraneei tein coaraaine caohachae.

<sup>17</sup> Aihane jaun canaacha esenetai coreniha ii nejeraneein canu coaraain neeine, nii canu coaraain neeine rijijieein acaantonai coaraain raau. <sup>18</sup> Ichei chatohaneein baaso ichaain, ichei rebequiin, naaonjoaain nihalune canu cobaraau coreniha. <sup>19</sup> Canuna Faboroneein ichei aitiin caraajenhane caa laenaan. Nii ichei aitocooaunne rijijieeina, canu ichei coretereuni. Nainichaaun niqui canu que ijiabereeo coreniha rebeequine coaaucaunne. <sup>20</sup> Aihara canejera. Cojuriu Jesocurisito cachaneein nenea tochaneein caa ichei bajaanune rijijieein atiin ichaain, Jesocurisito coreniha canejeraneeine jaun canu suujua nunaau. <sup>21</sup> Canuhacha bajai amuritoheriin ichariquiin quere tonoraaine esenetaanune jaunne caa ichei aitiin laenaan. <sup>22</sup> Nii choae tacaainechu turuhanune jaanu rucuhequine jereun, caresero cuhane nihanune jaun, cacoreniha bajaabajaeequichene tonoraain, inara coaraa uhanune jererichaaain Cana Coaunerane cohajihanune jaun.

*Ii coaacuruha raotojoein neeu.*

<sup>23</sup> Jesocurisito coreniha caresero cuhane canu aina nenea Efaforasite ii coacue. <sup>24</sup> Chaen Maroco, Arisitaroco, Demasi, Locasi, naaonjoainuri canu coroatajaneraneein nenacaaurute ii coaacure.

<sup>25</sup> Cana Curuaanaa Jesocurisito jeelai amuritoheriin inara coroatajanemiin.

## **Ebereeocuru rai letoi**

*Rai Calaohi aina cuaainte cachaauru rai erelu Cana Coaunera.*

<sup>1</sup> Inoaclu jetaote nere bera inoaasihuru- *profetacuru* aina cuaain araaisaain cana inoaensihuru rai ere Cana Coaunera, ecoetacaeneein mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain. <sup>2</sup> Nete laen inae enene Calaohi que nere berate Cana Coaunera, Cana Coaunera nihane coitucuhacache itolereeneinne coina. Nii rai Calaohi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaanaain niichuru Curuaanaa neein telu Cana Coaunera.

<sup>3</sup> Nihei chunei cacha niqiu Cana Coaunera coaraai. Nete caje uhin canaacaanu rene ecooca rai Calaohine jaun, canaacaanu rohan turuaain coaracaanune jaun, "Naaonjoaan Cana Coaunera," naain coitucuhacaanu, jeelai Cana Coaunera tocohaneein necaohachaaain nichao que ichaohana jaun. Acate Cana Coaunera Calaohineein itolere sirichaneein coaraneein ne. Acate Cana Coaunera Calaohineein caa chauratane que ohelu, jianacoon osa caje cana mitaeranu que. Nitohaneeinte inae osa caje cana mitaeranu que ohane baiha, rai Inaca Cana Coaunera raotono nichajai que roritrone ichoae nelauriaa cuclu.

*Anjeraauru amurijiriinte cocoinanojineein ne Cana Coaunera Calaohi.*

<sup>4</sup> Jataain rai letonocuru anjeraauru cocoinaane amurijiriinte, rai Calaohi cocoinaelu Cana Coaunera, acaauru amurijiriin nihane coina. <sup>5</sup> Nitohanihane jaun, nihei chuni letono anjera rai:

"Iite cacalabineein  
canuhacha jereineein  
canuhacha teineein  
nenaaneeicha,"

naain irihei Cana Coaunera. Niheichu chuni letono anjera que:

"Leinjiin acaacha  
canu calaohineein nihane janana,  
Canu, leinjiin  
inaca neein nereeunicha,"

naain irihei Cana Coaunera. <sup>6</sup> Caa chauratane que nacaauru cachaauru que, leinjiin acaacha rai calaohineein nihane coitucueratihane coinatc laen:



“Quere tonoraain  
canu coroaeequichene rijijieein,  
jerichanejeein nere tonoraain  
coroaecuche satiin,”

nae, rai letonocuru anjeraauru rai, Cana Coaunera. <sup>7</sup> Nii rai  
letonocuru anjeraauru quete laen:

“Canu letonocuru- anjeraaurute laen aiha cujuanane riji-  
jieein, usi rijijieein  
naaonjoaain canuhacha jerei icharaneein neeurureein,” nae  
Cana Coaunera.

<sup>8</sup> Jana rai Calaohi quete laen:

“Chabana sarinaain  
itolere Curuaanaa neein-  
itolere Coaunera neein neeine.  
Chaen techu

chabana satonoenereein  
caohacha ichaain neeine.

<sup>9</sup> Nii rijijieein techu  
caohacha nejesina ichara  
curuaanaa neein neeina jaun,  
esinae rauhijiriin

baaso ichaain nenacaauru aina nejerateein,  
caohacha icharaauru belairiquiin.

Nii coinane  
Canu, Itolere Coaunera neein  
ii Coauneranichaaunne  
ii teein neeun,  
ii, jataain

leechaauru amuritoheriin  
raotojoeein rachoojoeein  
neeine coina,”  
nae Cana Coaunera.

<sup>10</sup> Chaen techu:

“Ii canuhacha tei  
Curuaanaa neeinete,  
jauriaanejeein

nunuhe caje coauneein niha  
cana rai chauratanene coina  
aitiin dede coaunaailu.

<sup>11</sup> Satiin iicha coaunanojoite sareein.  
Jana iite laen chabana nitajenereeiini.

<sup>12</sup> Inae ecu tihane banate,  
siriteein saa cajionene jaohin,  
enachasine que coreein jianaa rijijieein,  
janonaa coreriquiin.

Nete laen,  
ii chabana satonoelanaala  
ichaoriquiin,”  
naelu rai Calaohi rai Cana Coaunera.

<sup>13</sup> Nii jaun coatiha chuni, rai letono anjera rai:

“Chajaaute

caraaotono nichajai que nelaauriaena,

ii tijia asaae

iniha nejeratenacaauru

amuritiin tee te coaraaicha,”

naailu Cana Coaunera. Chabana nii Calaohi que aitothane rijijieein letono anjeraauru que irihe.

<sup>14</sup> Nechu raujiaain ichoteratenojoneein nerichaacheeinne rai, cha beraneeichate suujueneein Cana Coaunera tenojoneein neure rai anjeraauru.

## 2

*Cana ichoterateraneein nena que jaoleconaa nainihacache.*

<sup>1</sup> Nitohanihana jaun, nere beracuru que Cana Coauneraacha beratei aonaain tonoraain-esenetaain nihacachenete caohachae. Jana nii cana rai niicha beratenojoin aonaain caohatiin coitucunaa saijieein tonoraenihacachenete, aihuruha coitucuelanaala nenacaaaurune rijijieein nitajerichaacheein. <sup>2</sup> Coaracuche nachuhinti, nii rai letonocuru- anjeraauru que niicha teratei niha nii rai jauriaanejeein nena- rauhine saijieein tonoraelanaala naosatenacaauru cachaauru-esinae rauhijiriin baaso ichacuruhane coreniha caseteco coaracuruhalune.

<sup>3</sup> Nitohanihane jaun, caseteco caje nichotena nainerihacacheein, nii jauriaanejeein nena amuritoheriin, cana ichoteraneein nena esenetaenihacachene. Esenetaain nihacachene coinate, jauriaanejeein raaje nihane cana rai been nelu Cana Curuaanaa Jesocurisito. Nii baihate cana rai beeurelu aina amuhemujeein nota que coaraauru. <sup>4</sup> Nii ichoae tacaain techu, cana que coitucuerate Cana Coaunera itolere cojoelanaacojoaiuru ichaain. Chaaen techu Aca jerihane rijijieein, le cache nichaachene rai niicha tei- Suujue aina cuaain cana que coitucuerate.

*Cana nejera rijijieein niha Jesocurisitone*

<sup>5</sup> Coatihai rai letonocuru anjeraauru, nii cabaiha neenihu rai Cojoanona caa ereereecaachene jaan coaraneein neeuruhane coina aitohi Cana Coaunera. <sup>6</sup> Nitohanenihane quete: “Chaneein ne cache.

Chatohanaineeina nenaane cache.

Chanuna acaacha coacuhin,

jataaen queecha coaauqui.

<sup>7</sup> Jauriaanejeeinte niqui

ii letonocuru- anjeraauru

cocoainaaine fautaain cocoainailu.  
 Nete nii baiha laen,  
 jataain leeochoaauru amurijiriin cocoainaain,  
 que itolere Curuaanaa nihane comai lauriaain,  
<sup>8</sup>satiin nere tonoraain  
 neeuruhane coina ichaain,  
 tijia asaae que nejeratenacaauru  
 teilu,”

naain ne laenanohineein Cana Coaunera Quiricha cuhane.  
 Nitohaneein satiin nere tonoraain nihacachane coina, co-  
 coainaain rai tijia asaae que nejeratenacaauru tihane coina,  
 aitohane saijieein jaiti nitohaneein ichaa Cana Coaunerane  
 coarahaacache. <sup>9</sup>Nete laen, inae anjeraauru fautaain nelati-  
 hei rijjijieein turuhin nihalu carajaaajoaain Jesocurisitone  
 coaracaache. Nitohaneein turuhinte, rai chaneein neni-  
 hacachene saijieein, jataain cana belaitohane jaun, cana  
 coreniha ohane coina ichaelu Cana Coaunera. Nii cana  
 coreniha cairichanojoneein ohalune corenihate, itolere cu-  
 ruaanaacuru Curuaanaa neein nihane cojunacaneein necao-  
 hachaa Cana Coaunerane que comaitenojoneein ne.

<sup>10</sup>Satiin itolere Cana Coaunera rainein ne, niicha  
 coaunanojoneein niha itolere jaun. Nii jaunte niicha  
 coaunanojoneein rai calaohi neein nihacachene jaun,  
 rai Cojoanona caa baiha neeni que nihacachene jere  
 Cana Coaunera. Nii jaunte cana coreniha necairichaa  
 Jesocurisitone aina cuaain, nii aansijiiniji osa colane telu,  
 satiin niicha coaunanojoinunru ichoteraneein nihane  
 coina. <sup>11</sup>Nitohanihane jaunte, ita Inaca que Inacaain  
 nihacache, nii cana osa caje cana ichoteratera aina  
 jiniiquiin. Nii jaunte, rai nejera neein inae nihacachene jaun  
 coejelanaala: “Canejeraauru,” nae cana rai Cana Coaunera  
 Calaohi. <sup>12</sup>Niritorichaaine quete:

“Canejeraauru raine  
 lineein neeine beebejeein,  
 netaojiaain  
 li coroaeraauru cataaun  
 nenatereeunni,”

naalune, laenanahineein nelu Cana Coaunera Quiricha  
 cuhane.

<sup>13</sup>Chaen techu:  
 “Leinjiin Acaachane  
 niicha ichai ichaane coina  
 cohajereeunni,”  
 naain.  
 “Cauna neeun,  
 canu rai Cana Coaunera  
 tenojoihunru- cacalabihuru  
 ainara,”

naain ne laenanohineein.

<sup>14</sup> Charijieein teeinti, ita araainein niha cachane, ita iniho que inihoquiin, ita coichana que coichanaain, naaonjoaen cacha, nii rijijieeinte cacha iniho que inihoquiin cacha coichana que coichanaain naaonjoaelu Jesocurisito, caa chauratane que ohin, nii cacha itajeraneein nenea moconajaera amuritohane coina. <sup>15</sup> Nitohaneein moconajaera amuritiinte, ohin nitajeeururichaaaine que satiin casiiriin ichaonacaauru- cachaauru ichoteratelu. <sup>16</sup> Aihane jaun, coatiha anjeraauru coroatajanihane coina turuhin niheil, Abaraaun nefoerateneein nenacaauru coroatajanihane coinante turuhin nelu. <sup>17</sup> Nitohanihane coinante, jerichanejeein cana nejeraneein, nihacachene rijijieein tenojoineein nelu, Cana Coaunera notaracaae coujurihu cana rai saseredotecuru curuaanaacuru Curuaanaaneein, cairichaaajoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane coina. <sup>18</sup> Nitohaneein raajenihane necairichanaa coaraain, cojunojoineein nihalune jaunte, rijijieein necairichanaa coaraain, cojunojoineein niha cachane coaraane, coroatajanein naaonjoaen.

### 3

#### *Moisesa amurijiriin cocoinanohi niha Jesosone*

<sup>1</sup> Canejeraauru, aihane jaun Cana Coaunera ranojoineein, inae rai cachaneein neeichene jaun, niicha icharatenohi icharaanu que niicha tei- Jesocurisitohacha que coaucuche. Nariha jataain coreniha chabana satonoelanaala esenetaacachene jaun. <sup>2</sup> Jerihane rijijieein nere tonoraain niha Jesocurisitone jaunte, niicha icharatei icharaanu que cocoinaain nelu Cana Coaunera. Nii rijijieein techu, Cana Coaunera cachaneein nenacaauru aina, niicha icharatenohi icharaneein nelu Moisesa. <sup>3</sup> Charijieein teeinti, niicha jai loreri amurijiriin jataain nelateineein ne loreri ichara, nii rijijieeinte, jataain Moisesa amurijiriin nelateineein nelu Jesocurisito. <sup>4</sup> Itolere lorerite, niha icharane jaun neein naaonjoaen. Nete laen Cana Coaunera coaunaane jaun, neein naaonjoaen itolere. <sup>5</sup> Nii rijijieein techu, rai cachaneein nenacaauru rai Cana Coauneraacha icharatei icharaneein nihane jaun, raujiaain nota que coaraain, que niicha beratei beraneein nelu Moisesa. <sup>6</sup> Nete laen rai Calaoihi Jesocurisito, cana rai cachaneein- rai loreri rijijieein niha-cachene amurijiriin, cocoinaain cana inana neein telu. Nii jaunte, rai loreri rijijieein nerichaacheein, esinae rauhijiriin

jerihane rijjIEEEIN neein, chabana cohajihacachene coiin-  
teein jianelanaala canaacha cohajei cohajihacachene.

*Acaauru que Cana Coauneraacha banihatihu turuurener-  
ichaaIN rai cachaauru tabaaurune*

<sup>7</sup> Nitohanihane jaun, rai Quiricha Inoaensi cuhane:

“Enene cojoanonaa  
cuhane inara rai niicha jerei  
biha Cana Coaunerane,

<sup>8</sup> jiaonriha  
inara suujua aohana jerelanaala,  
aihuruhalu nere tonoraelanaala,  
nechu acaauru casetecaa  
Cana Coaunerane cojuhin coaraa  
cacha areroo ichtane janane  
rijjIEEEIN nihache.

<sup>9</sup> Ecute  
jenachoonca jaanacaneein  
mainajeriin acaauru notajaain,  
acaauru coroatajanichaaunne saijIEEEIN,  
acaauru casetacaanune coujuha  
quere tonoraarenelu- inara foerateracuru.

<sup>10</sup> Nii jaunna,  
nii inara foerateracuru aina obajeein:  
‘Nechu itolere bana  
joenreein rai suujua cuaauruhane jaunte,  
acaauru que  
canuhacha coitucueratenaa  
jerei coitucunaa jerecurene.’

naain:  
<sup>11</sup> Aihane jaun,  
coatih acaauru que banihateein  
canuhacha rucujueihu  
turuururinaain,”  
naain biha Cana Coaunera Suujuene jaun ne laenanohineein.

<sup>12</sup> Aihane jaun canejeraauru, le cacha nequichene- inara  
netonai nabana cana rai Cana Coaunera beratei esene-  
tain neeichene jianequichene coataa, que nainain neco-  
halajiin ichaaoche. <sup>13</sup> Nitohaneein nenea coacuelanaala,  
janeein lecacha nequichene jiniiquiin ita suujua larara-  
jaaain neeuche: “Enene cojoanonaa,” naain aitoha Cana  
Coaunera Quiricha cuhanena jaan que turusihane ajiniha.  
Nabana inara tabaauru saruhin niha osane, rijitojoeein  
chatohanai ichaquichene, inara netonai canaacha esene-  
tai esenetaelanaala naitoonjoan tonoraeneeichene coataa.  
<sup>14</sup> Nitohanihane jaun, esinae rauhijiriin Jesocurisito aina  
nenea jerichaachene, nii esenetaacachene bana canaacha  
cohajei que turuhane reeintiaain esenetaacachenete ne.

<sup>15</sup> Nii coinate:

“Enene cojoanonaa cuhane  
inara rai niicha jerei biha  
Cana Coaunerane,  
jiaonriha  
inara suujua aohana jerelanaala,  
aihuruhalu  
nere tonoraelanaala  
nenacaaurulune rijijieein nihache.”  
nae Nere Inoaesi.

<sup>16</sup> “Charijihuru Cana Coaunera ere aonacuruhane saijieein nii baiha nere tonorana jerecurenelu,” naaichena. Acaaurute, satiin Egipto batane caje Moisesaacha rocoorinelu. <sup>17</sup> Nii jeelaihuru que techu, nitohaneein nere tonoracurenihane jaun, acaauru que nejerateein acaauru coroatajanihane jianiha jenachoonca jaanacaneein Cana Coaunerane jaun, ichataneu cache areroo satiin ohacoaurelu. <sup>18</sup> Chaen techu nii jelaiahuru, rai nitohaneein nere tonoracurenihane jaun, esinae rauhijiriin acaauru que banihateein niicha rucujihu enoorenerichaaaine que aitelu Cana Coaunera. <sup>19</sup> Nii jaunte, esenetaacurenihane coreniha nii acaauru que banihateein niicha rucujihu turuurenerichaaaine coitucuhacache raotojoein.

## 4

<sup>1</sup> Aihane jaun, jaiti cana rai niicha teeni, rai nebetacanaa cojoanonaa tihane rai niha Cana Coaunerane jaun, ecu turunaa nainichaachene coina, jataain necohalajiin ichaohacachenete caohachae. Nabana inara tabaauru, ecu turunaa nainecurenihane coataa.

<sup>2</sup> Nitohaneein cana netonai ecu turunaa nainichaachene coinate, nii Moisesa que beratihalu acaauru raine rijijieein, cana rai netonai beratelu.

Nete laen inacojoein acaauru rai beratelu, aonacuruhane saijieein, aihuruha nii niicha beratei esenetaain tonoraeraaurune rijijieein, acaauru netonai esenetaaurenihane jaun.

<sup>3</sup> Nete laen cana, esenetaera neein nihacachene jaun, nii Cana Coaunera aitoonjoan- nebetacana jaun enorichacheein. Nitohaneein nere tonoraaururichaaaine jaun, aitorichaaaine quete:

“Nii jaunna obajeein,  
esinae rauhijiriin  
nebetacaanune jaun  
turuurenerichaaaine que aitoon”

naain belu Cana Coaunera. Nete cana rai chauratane coaunaane nainaalune caje coauneein nelu, nii nebetacanajaa cojoanonaa naitoonjoa.

<sup>4</sup> Nii jaunte rai Quiricha Inoaensi cuhane:

“Caainsi janone cuhane jetaote,  
itolere coaunaane nainaan- bana  
nebetacaelu Cana Coaunera,”  
naain laenanohineein ne.

<sup>5</sup> Nii baihate coaiten rai Quiricha cuhane, nii Israeli-  
tacuru que:

“Coatiha canu nebetacana jaaun turuurinaain,”  
naalu Cana Coaunerane, ne laenanohineein.

<sup>6</sup> Nete, nere tonoraain ichoteratenojineein  
neeururichaaaine aonacuruha ichoaichaniha natiin,  
esenetacurenihane jaun, nii nebetacana jaan Cana  
Coaunera aitoonjoaun turuureniha Israelitacurune coina  
aitohalune saijieein, jaiti neeure satononiha nii naitoonjoan  
esenetaeraauru, acaauru coreenraniha nii nebetacana jaaun  
turuhenuunru.

<sup>7</sup> Nii jaunte, nii nacoauneein le janonaa que cojoinacate  
Cana Coaunera:

“Enene cojoanonaa,”

naain. Nii Quiricha Inoaensi caje coitucuhichene rijijieeinte,  
que beratihha Cana Coaunerane jaun:

“Enene cojoanonaa cuhane

niicha jerei beratihha

Cana Coaunerane,

jiaonriha tonoraeneeichene,”

naain belu Rabiri.

<sup>8</sup> Nii aina cunacaaurulu- Israelitacuru turuaalu Josoene  
jaan jelai que, aitohalu Cana Coaunerane jana nihane, coat-  
iha leeocho janonaa berihei Cana Coaunera, rai nebeta-  
cana jaaun nihacachene que aitiin. <sup>9</sup> Nitohanihane jaunte,  
satiin Cana Coaunera cachaneein nenacaauru rai, ne je-  
lai teein acaauru que banijiaain nebetacaauruna jaanu.  
<sup>10</sup> Charijieein teinti itolere coaunaane nainaan nebeta-  
caelu Cana Coaunera, nii rijijieein techu, rai namihaneeo  
caje nebetacaa aicheein, nii Cana Coaunera nebetacanajau  
turuhin nei. <sup>11</sup> Aihane jaun, nii nere tonoraelanaala ne-  
nacaauru rijijieein nena coataa, atiin caaintati ichacaach-  
ene coina cana letoaane nihanatiin nere tonoraacachenete  
ne, nii rai nebetacanajau turunaa nainichaachene coina.

<sup>12</sup> Nii cana rai Cana Coaunera beratenojoi Erenaate, cana  
ichao coreein, cana rai leeocho ichaonaa teraneein, naao-  
joineein nena ne. Acate aiha soondarooru rai sabere-  
jane ajinaain nenaane amurijiriin nihane jaun, cana suujua  
cuhane enohin cana suujuene maajein coitucue. Nii jaunte  
cana suujua cuhane canaacha coacui, canaacha ichana  
jerei, naaonjoainuri baasoneein, caohachaneein, naaon-  
joane coitucue raotojoein. <sup>13</sup> Nitohanihane jaun, nihei  
chuni Cana Coaunera coaunanojineein nena, que nasiha

nainera. Acate inae ecu tihane bana rai canaacha beenei coitucue.

### *Saseredotecuru curuaanaa Curuaanaa Jesoso*

<sup>14</sup> Cana Coanera Calaohi Jesusote, acaihaniji cana rai saseredotecuru curuaanaacuru Curuaanaa neein dedeeu cuelu. Aihane jaun, leinjiin acaacha esenetaain cohajihacachene rijijieein, itolere bana jianena coacuelanaala bee-bejeein, acaacha cohajihacachenete caohachae. <sup>15</sup> Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieein coujunojoinieein nerejetohalune jaun. Nete laen, nii saijieein chabana osa que nesaruenelu. <sup>16</sup> Aihane jaun, chaque tonajelanaala, atiin cana belaicha Cana Coanera rori- *trono* rohan netichaachenete ne; cairichaaajoaain cana coaraain, latichaachene nainein cana rai caohacha ichaain cana coroatajanena nainihane coina.

## 5

<sup>1</sup> Satiin saseredotecuru curuaanaacuru curuaanaate, cachaauru jana janijiin, Cana Coaneraacha teineein ne, aca cachaauru osa coreniha, Cana Coanera rai itolere teein, inihocuru mocoeranu *sacrificios* que nihane coina. <sup>2</sup> Nii jaunte acaentonai joaenreein cacha rijijieein nihane jaun, cairichaaajoaain- cha coitucuelanaala nenacaauru, nitajerai nenacaauru, naaonjoainuri coarae. <sup>3</sup> Nitohaneein joaenreein cacha rijijieein nihane jaunte, rai nosa, cachaauru osa, naaonjoain coreniha, Cana Coanera rai itolere lenonecuru *sacrificios* sohin moco. <sup>4</sup> Nihei chuni raajenihane jerihane rijijieein, saseredote neein cocoainanohineein nei. Aaroon janijiin raain cocoainaalune rijijieein, raain cocoainaa Cana Coaunerane banaachate laen saseredote neein nenea naine cacha. <sup>5</sup> Nii rijijieeinchu coatiha raajenihane saseredote neein nihane coina, cocoainanohineein niheilu Jesoso, Cana Coaunerate cocoainaan nelu. Acate rai: “Iite canu calaohineein, enene canuhacha teineein neei,” naelu. <sup>6</sup> Chaen techu, rai Quiricha Inoaensi cuhane: “Iite chabana satonoelanaala saseredote neein neriquin, aihalu Melquisedee ne rijijieeincha,” naain ne laenanohineein.

<sup>7</sup> Jaiti cana rai chauratane que ichaohane bana, atinaaururichaaaine caje ichoteratiha Cana Coaunerane coina, jataain chanaain, caje bajaa Jesocurisitone janate, jataain



nere tonoraeranihane jaun, coroatajanelu nii cairichaaururichaaaine abaantana nainihane coina rai Inaca Cana Coaunera. <sup>8</sup> Nitohaneeinte Cana Coaunera Calaohinihane saijieein, necairichanaa coaraain nelu Jesocurisito, jeriha rai Inaca Cana Coaunerane rijijieein nenea jerenacaaun. <sup>9</sup> Nitohaneein jataain Inaca ere tonoraeraneein nihane jaunte, Aca, satiin nere tonoraain neinichaachene ichoterateraneein ne. <sup>10</sup> Nii jaunte Melquisedee rijijieein nenea saseredote neein cocoinaelu Cana Coaunera.

*Jataainte elunae esenetaain nihancane jianichaane.*

<sup>11</sup> Niha jataain arajiin inara rai irihanune jaanu niqui. Nete jataain caaintate inara rai bihanune, cha aonaquichene nihanatiin coitucusineeichene jaun. <sup>12</sup> Inae niqui carajaa, inara cacha relaeraneein neeichene jaanu rijijieein Jesocurisito coitucuhin neeichene. Nete enanetojoein caaintajelanaala cana relaa Cana Coaunerane jaan que nihanatiin nacoauneein inara relaera jerequiche. Nii jaunte aiha leinjiin canaanai ujuarine rijijieein neeichene jaun, iniho quinaa nainenihane jaun, itariicha cohajiha canaanai ujuarine rijijieein jataain caaintaelanaala nenea que inara relaera jerequiche. <sup>13</sup> Nii itari coha canaanai ujuarine rijijieein, caaintajelanaala relaera jereraaurute, leinjiin canaanai rijijieein neein niicha ichai coitucuelanaala ichoae. <sup>14</sup> Nete laen nii iniho que cuaain inara relaanune jaan Cana Coaunera Ere neein nenea ne. Acate, inae acaauruhacha coacui coitucuhin, “Naaonjoainte baaso ne,” jana, “Naaonjoainte caohacha ne,” naain coitucuhin nenacaauru rai benojoi ne.

## 6

<sup>1</sup> Aihane jaun, inae caohatiin jauriaanejeein Jesocurisito que nerelacaachelune jaun, inae leechaneein coacuelanaala, ainaacha iicha cana suujuane reentiaain sacuhacachenete ne.

Inae nainihe nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nenea nainihaacache. <sup>2-3</sup> Raujiaain Cana Coaunera esenetaain, cachaauru baotisaain, biji que Jesocurisito esenetaerauru dadaain acauru rai Cana Coaunera bajaain, o caje ichanaain neeururichaaain onacaurune, nerichaaain chabana satonoe-lanaala casetecone, naaonjoainuri coitucuhacache caohatiine jaun, jianein nenea coacuelanaala que leechaauru relaacachenete ne. Jeriha Cana Coauneranete nitohaneein icharichacheein.

<sup>4</sup> Nitohanihane jaun, inae le sajeein itolere coaraain coitucuhin, Cana Coaunera Suujue siriin, <sup>5</sup> jataain caoha-toha cana rai Cana Coaunera beratenojoin coitucuhin, itolere que jataain nelateineein nerichaain caa baiha neeni janonaa quene coitucuhin, <sup>6</sup> naaonjoaain neeichene saijieein jianequichene, inae nacoaauneein jeriha Cana Coaunerane rijijieein ichaonaa naineriheicheein, coroso que Jesocurisito teein, nocoeje chanuuruhane tocohaneein rai nocoeje chanuha airiquicheeine jaun. <sup>7</sup> Nete laen atane caohacha que temule jaera rai, atane setejiaa elone caohatiin omarohin inacaain nihane rijijieein, jeriha Cana Coaunerane rijijieein neeichene, inara rai caohacha ichaain inara coroatajanereein Cana Coaunera. <sup>8</sup> Jana nii temule jaera rai ojoa aina omane neeojoaain niha nii temulene rijijieein neeichenete, laen inara cojiotaain inara mocoeratereein Cana Coaunera.

*Canaacha cohajeite leinjiin acaacha cohajihacachene icharaneein ne.*

<sup>9</sup> Nete, inara rai caritiin aitocooaunne rijijieein, inara inae jeriha Cana Coaunerane rijijieein ichaohin iiquichene coina, nichoterichaacheeine esenetaaichene caje cuaain leechaneeein coacuelanaala neeichera canejeraauru. <sup>10</sup> Nii jaunte, chabana baaso ichaenihane jaun, nii enanetojoein ichaquichene rijijieein, leochaauru cana nejeraaurucanaacha esenetai esenetaeraauru belaiquichene coarateein, coroatajanequichelune baitenereein Cana Coaunera. <sup>11</sup> Nete laen, jataain ainaacha iiquichene reentiaain, acaacha cohajein, esinae rauhijiriin corajein ichaquichene coarateein, inaraacha ichai ichaquichene caohachae. <sup>12</sup> Coatihha chaque nelatihei chachaain neeichene coiinteein ichaquichene. Charijieein teinti itolere bana janelanaala esenetaain neeuruhane jaun acaauru rai tihane coina Cana Coaunera aitoonjoa raeraneein neeure esenetaeraauru, nii rijijieein neeuche inara netonai.

<sup>13</sup> Abaraaun rai niicha teeni tihane coina aitohalune bante, leinjiin Acaacha itolere amurijiriin nihane jaun, inae neniha amurijiriin neine jaun, aca Cana Coaunera neein coarajein icharichaaaine coina: <sup>14</sup> “Canune ii coroatajanein, arajiin janiinacajelanaala nefaauruha iicha foerateurine coina ichareeunicha,” naain Abaraaun rai biha Cana Coaunerane jaun, <sup>15</sup> luhecaelanaala carajaain cojoaain, nii rai tihane coina Cana Coaunera aitoonjoa raelu Abaraaun. <sup>16</sup> Nete laen cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracae

icharihanine coina,” aitohane, inae nene nenacaaen roerohe-caera. <sup>17</sup> Nii rijijieein techu, nii niicha teeni raeraneein neenihuri rai, aansijiinniji nii aitohane corelanaala, esinae rauhijiriin icharichaaaine coitucuuruhane coina, aca Cana Coauneraneein coarajeein icharihanine que aitelu Cana Coaunera. <sup>18</sup> Cana coritaelanaala niicha teeni naitoonjoan, aca- Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajein nihacachene jaun. <sup>19</sup> Nii cana rai niicha teeni- canaacha cohajeite, nitajihane coataa cana suujue nunaeraneein ne. Charijieein teeinti, cujuana nichajai que auriteein bote nunae rai nunaera- ancla, nalaa fichafichaanaane coataa nii rijijieein. Nii canaacha cohajeite chabana turunaa nainenihacache Teenforo cuhanai bujuaneein nena ne jaun- cana turuhaeranu que nenaaneein ne. <sup>20</sup> Nitohaneein ecu cana turuaeranu quete cana rai chabana satonoelanaala nena saseredoteneein nelu Jesoso, aihalu Melquisedee ne rijijieein.

## 7

### *Saseredote inoaensi- Melquisedee rijijieeinte nelu Jesoso.*

<sup>1</sup> Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoaauru curuaanaacuru reychuru cachaauru amuritiin sohin jitariin acaauruhacha sirii ruluha acaauru cajene baiha caaujiha Abaraaunne jana, que tacaain cuhin, coroatajaniha Cana Coaunerane aina leeochoaauru amuritohane que aitiin cojiotaain corojelu. <sup>2</sup> Nitohaneein coroaecane jaun jetaote, nii leeochoaauru amuritiin sohin acaauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao techu: “Saleen” naane: “Raotojoein nena” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que. <sup>3</sup> Nihei coitucueraai rai inaca, rai neba, foerateracuru, naaonjoainuri. Niheichu coitucueraai nejanoa, ohin, naaonjoaane. Nii jaunte, acaihaniji chabana satonoelanaala nena Cana Coaunera rai saseredoteneein ne, aihalu Cana Coaunera Calaohine rijijieein.

<sup>4</sup> Coaracuche nachuhinti jataain nelateineein niha nii Melquisedee ne jaun, nii leeochoaauru curuaanaacuru cachaauru sohin, niicha rului lechooncanu tihalu rai, cana foeratera inoaensi Abaraaunne. <sup>5</sup> Moisesa tenojoi rauhite niqui, Lebi nefoerateneein nenacaauruhacha- saseredote

neen leinjiin acaauruhacha, satiin cachaaauruhacha sirii lechooncanu raauruhane coina aitelu, satiin cachaauru, acaauru araaineen- acaauru rijijieein Abaraaun nefoerate neeuruha acaauru netonoaine saijieein. <sup>6</sup> Nii Melquisedee coatiha laen niqiu, Lebi inamoco nihei. Nete nii saijieein, nii Cana Coaunera aitoonjoa raeraneen niha Abaraaun natiin, caje nii niicha rului lechooncanu bajaain Abaraaun cojiotaain corojaje. <sup>7</sup> Nii coitucuhacachene rijijieeinte, nii cojiotaain niicha corojajei cache amurijiriin nelateineen ne, nii cojiotaera. <sup>8</sup> Satiin caa chauratane que cachaauru caje acaauruhacha sirii lechooncan raaurerate ooruhane rai neen aihure. Nete laen nii Cana Coaunera Quiricha cuhane, Melquisedee que naitoonjoa enanetojoein jaiti ichaonaa que aitona rijitoein aite. <sup>9</sup> Nii rai niicha rului tiha Abaraaunne cajete, nii Lebi inamoconeen nenacaauru- saseredotecuru, enene cachaauru caje acaauruhacha sirii lechooncanu bajaain raeraneen neenihuru netonai, Melquisedee rai niicha sirii teuruhalune coitucuhacache. <sup>10</sup> Nii que taca cuha Melquisedeene jana, rai jaberoco cuhane jaiti najanoaelanaala neeuruha niicha foerateenihurune jana, rai niicha rului tihalu Abaraaunne jaunte, jaiti nejanoaelanaala netiin acaauru netonai acaauruhacha sirii lechooncanu teen neurelu.

<sup>11</sup> Nii coitucuhichene rijijieeinte, Aaron foeratenojieen nena- Lebi inamocooru- saseredote neen nenacaauru aina cuaain, Isaraelitacuru rai rauhi tein nelu Cana Coaunera niqiu. Nete nii rauhi tonoraeraauru, esinae rauhijiriin jeriha Cana Coaunerane rijijieein neurenelu. Nii jaunte nacoaauneen saseredote letoaelu Cana Coaunera. Nete laen, nii niicha letoai Aaron nefoerate caje nenaanelanaala nihalu Melquisedeene rijijieein nenaane. <sup>12</sup> Nii jaunte, nitohaneen necoriha saseredotene jaun, Cana Coaunera rai rauhi netonai necore. <sup>13</sup> Nii ena nena cana rai saseredote- cana Curuaanaate, leecha Isaraelitacuru lauri caje nena nihane que aitiin laenanohineen ne Cana Coaunera Quiricha cuhane. <sup>14</sup> Nii jaunte, nii coitucuhacachene rijijieein, Jodaa lauri caje nenaaneen nelu cana Curuaanaa. Jana Moisesa coatiha nii Jodaa lauri caje nerichaaain saseredotene coina coacuhin iriheilu, neeururichaaain saseredotecurune bihane bana.

<sup>15</sup> Nii jaunte, jataain caohati saseredote Melquisedee rijijieein niha, nii ena nena cana Curuaanaa- saseredotene coitucuhacache. <sup>16</sup> Aihane jaun, coatiha aihuruha leechaaurune rijijieein, "Acate rai laurineen ne," naain rauhi cuhane laenanohineen nihei. Acate chabana nitajenaachara

ichaonaa caje unaaneein ne. <sup>17</sup> Nii jaunte, nii rai:

“Iite Melquisedee rijijieein

chabana satonoelanaala

saseredote neein neriquincha,”

naa Cana Coaunerane, ne laenanohineein Quiricha Inoaensi cuhane.

<sup>18-19</sup> Nitohaneeinte nii jauriaanejeein nenea rauhi, Moisesa rai rauhi, naaonjoain aina chaque nelatenihane jaun, jeriha Cana Coaunerane rijijieein cachaauru ichao rucuhena nainenihane jaun, itajeein nacoauneein jataain amurijiriin nelateineein nenea te Cana Coaunera. Acate laen Cana Coaunera rene cana turuaeraneein ne.

<sup>20</sup> Chaen techu, aca Cana Coaunera neein coarajeein chabana satonoelanaala nihane coina, cocoinarihanine esenetaacachene coina raajenihane aitelu. Jana leeochoaauru saseredotecuru, coatiha chabana satonoelanaala neeuruhane coina, aca Cana Coaunera neein coarajeein cocoinaane coina aitohi Cana Coaunera. <sup>21</sup> Nete laen cana Curuaanaa, chabana satonoelanaala nihane coina, aca raajenihane coarajeein cocoinaane que:

“Canune

Cana Coaunera neein

caraajenihane coarajeein

icharihanuhine coina aitoon.

Nii jaun

nii caitoonjoan corerihaaunni.

Iite chabana satonoelanaala

saseredote neein neriquin,”

naain ne laenanohineein rai Quiricha Inoaensi cuhane.

<sup>22</sup> Nitohaneeinte nii jauriaanejeein nenea amuritoheriin nenea, cana rai Cana Coauneraacha teeni terateraneein ne-naane Jesoso. <sup>23</sup> Leeochoaauru jauriaanejeein saseredote neein nenacaaurute, cana rijijieein cachaneein neeuruhane jaun, arajiin neeurelu, ohin nii baiha ichanana nainecurenihane jaun. <sup>24</sup> Nete laen Jesoso ohin nitajenaa nainenihane jaun, leinjiin acaacha chabana satonoelanaala cana rai saseredoteneein ne.

<sup>25</sup> Nii jaunte, aina cuaain Cana Coaunera coacuhin ichaonacaauru ichoteratereein chabana satonoelanaala nihane rijijieein, acaauru netonai chabana satonoelanaala Cana Coaunera aina neeuruhane coina. Nitohanihane jaunte, chabana ohenihane jaun, itolere bana satiin esenetaeraauru coreniha bajaee bajaareein Cana Coaunera caje.

<sup>26</sup> Nitohaneeinte esinae rauhijiriin canaacha latei saseredotecuru curuaanaacuru Curuaanaa neein letono neein ne Jesoso. Acate Saantoneein baaso colane-niheichu osaquelanaala- osaaonacaauru caje, jelai dedeeu

tenojoineein ne. <sup>27</sup> Coatiha leeochoaauru saseredotecuru rijijieein, jauriaanejeein rai nosa coreniha, nii baiha cachaauru osa coreniha, naaonjoaain iniho mocohin Cana Coaunera rai tihane coina nenea nihei. Nitohanelanaalate, le sajeein chabana coaiten ohenihane coina, raajenihane cana coreniha rai jaberoco telu sohin atinaauruhane coina. <sup>28</sup> Jana nii Moisesa rai rauhi que cocoainanohineein nenacaauru saseredotecurute- nechu joaereein cachaneein osaaonaneein neurelu. Nete laen, nii Moisesa rai rauhi que cocoainanohichuru baiha, ena nenea saseredote cocoainaane coina, aca Cana Coaunera neein coarajein icharihanine que aitohalune jaan, rai Calaohineein osaqelanaala- chabana satonoelanaala saseredote neein nihane coina cocoainaelu Cana Coaunera.

## 8

*Ena nenea- cana rai, Cana Coauneraacha teeni terateraneein niha Jesoso ne.*

<sup>1</sup> Nii cana rai saseredote curuaanaacuru Curuaanaa- caa inara rai ereerecaauune jaante- jataain itolere amurijiriin nelateineein Cana Coaunera rijijieein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan. <sup>2</sup> Acate cana rai esinae rauhijiriin saseredote esine neein Cana Coaunera ichanohineein nenea- *santuario* cuhane neein, Cana Coaunera rene catcha turuaeraneein ne. Coatiha aihuruha leeochoaauru saseredotecurune rijijieein, raajenihane catcha ichanohineein nenea- *santuario* cuhane nihei. <sup>3</sup> Satiin saseredotecuru Cana Coaunera rai chaaelai teraneein, inihocuru mocohin teranihanane coina cocoainanohi nihane jaunte, Jesocurisito netonai nii rijijieein cana osa coreniha raajenihane netelu atinaauruhane coina. <sup>4</sup> Coatiha caa chauratane caje nenea nihane, saseredote nenea nainerihe. Inae caa chauratane que arajiin neeuruha saseredotecuru, Moisesa rai rauhi cuhane aitothane rijijieein niqui, Cana Coaunera rai nii Teenforo asaae lenonecuru sohin mocooruhane coina. <sup>5</sup> Nii saseredotecurute, nechu dedeeu ichacuruhane cojunacaneein nitohane icharaneein neurelu. Canate esinae rauhijiriin, nechu dedeeu nenacaauru rijijiei icharaneein ichacuruhane coitucuhacache, *santuario* ichaa Moisesane coina rai: “Aonaaun. Nii ichei ichatane ucuunno coaratihanulune rijijieein ichaaura,” naalu rai Cana Coaunerane caje. <sup>6</sup> Nete cana rai saseredote laen, jataain nii leeochoaauru amurijiriin, jataain cana rai caohacha ichaain, cana rai tihane coina aitohalu Cana Coaunerane rijijieein, Cana Coaunera rene cana turuaeraneein ne.

<sup>7</sup> Bana caohachaain cachaauru ichao rucuhena nainiha, nii jauriaanejeein nena Cana Coauneraacha teine, coatiha neriheilu Jesocurisito caa ena niicha tei ichaane coina.

<sup>8</sup> Nete nii jauriaanejeein niicha tei rijijieein neureniha cachaaurune jaun:

“Inae cojoanonaa que turuhane banane, Israeli, Jodaa, naaonjoainuri aina, enachasine canuhacha ichaneni ichareeunnicha.

<sup>9</sup> Nii ena acaauru aina canuhacha ichanenu, coatiha Egipto batane caje acaauru foerateracuru rocohanulune coina, canuhacha ichailu rijijirinaai.

Nene, nii acaauru aina canuhacha ichanenu tonoraelanaala ichaaoruhane jaun, acaauru que jaolecoonlu.

<sup>10</sup> Nii caa baiha Israeli aina canuhacha ichanenu, acaauru suujua cuhane laenanohineein niha Canu rai rauhine, suujua caje coauneein coitucuuruhane coina canuhacha ichanenu ne, Canu, acaauru Coauneraneein nihanune coitucuhin, canu cachaneein neuruhane coina.

<sup>11</sup> Nii bana, inae le cachaauru, leeochoaauru, acaauru laurichuru, acaauru araaichuru, naaonjoainuri, inae Canu que ita relaaoruhane latelanaalate, Canu, acaauru Coaunera nichaaunne coitucuurureein satiin ichauhenaauru, canaanaihunru, naaonjoainuri.

<sup>12</sup> Nii banane baaso ichacuruhane que casuujua acateein, acaauru osa que canu suujua acatereeeni,”

naelu Cana Coaunera.

<sup>13</sup> Nii cana rai nacoauneein enachasine niicha ichanenu biha Cana Coauneranete, inae chaque nelatelanaala nitaje rai niha nii jaurihaanejeein niicha ichanenune coitucueratiha aite.

## 9

*Santuario chauratane que nenaalu aina dedeeu nena santuario.*

<sup>1</sup> Nii jauriaanejeein Cana Coauneraacha teite, caa chauratane que rene nichuuntaauruhane jaanu que *santuario* neein telu Cana Coaunera. <sup>2</sup> Nitohaneente, nii jauriaanejeein *santuario* neleru asaae jetao nelu leinjiin usi nujua, leinjiin mesa Cana Coaunera que banijiaain nena faan siriin, naaonjoaain. <sup>3</sup> Jana, que jauriin nena bujua cuhane jetaote, jelai teein Cana Coaunera turunajaneein curuaaelu. <sup>4</sup> Nii cuhane jetaote, nelu oro caje ichanohineein nena rori, jujui- incienso mocooruhane jaanu que, chaen camela itolereenein oro que carihanojoneein nena. Nii camela cuhane jetaote nelu, oro caje ichanohineein nena-leinjiin baichaje, cuhane manaa neein curuajaain nena quinacai- manaa siriin. Chaen jetao techu, nii camela cuhane nelu Aaron bastoon omaronalu, Cana Coaunera rai rauhi-ajeri caje nena tabara que teein laenanohineein nena, naaonjoainuri. <sup>5</sup> Nii camela ichoae jetaote nelu- coroatajai cacha rijiinanai itaroojianaain. Acauru jetaote, ecu niha Cana Coaunerane beraneein jetao, nii nitaro que nii camela fuera asaaraneein ne. Nete ena nelatene jitariin nii coitucuerateein niique irihacane. <sup>6</sup> Inae nitohaneein satiin ichanohineein nihane jana jetaote, itolere bana nii nunuheneein nena- Cana Coaunera rene nichuuntaauruna jaan turuure saseredotecuru, ecu Cana Coaunera rene nichuuntaain ereereecuruhane coina. <sup>7</sup> Nejetaote nii que jauriin nena- jelai teein Cana Coaunera turunaja neein nenaau jetao, saseredote curuaanaacuruhacha ecu turue le sajeein le jaanacaauru nainein. Ecu enohane nainein jetaote, lenonecuru coichana amaare, jauriaanejeein rai nosa coreniha teein, nii baiha coitucuelanaala neosateeru-ruha cachaaurune coreniha tihane coina. <sup>8</sup> Niite cana que coitucuerate Cana Coaunera Suujue, nii nunuheneein nena- Cana Coaunera rene nichuuntanaanaja neein nihane jaun, jaiti nenihai nii jelai teein Cana Coaunera turunajaaun cana turuaerane jaan, ecu turunaa nainenihacachene que. <sup>9</sup> Satiin niite, nechau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coaunera belaihuruhane



jaan, coatiha nitohanei ichaain coroaeraauru cachaauru suujua couluoona nainiheilu. <sup>10</sup> Acate raujiaain lenonecuru, conacaihuru, naaonjoainuri couluoraneein, cachaauru netonai chatoanai ichacuruhane, rai jaberoco caje niicha ichai jaaoruhane coarateeuruhane jaanu que nelatelu, cana suujue coriha Cana Coaunerane que turuhane reentiaajeein.

<sup>11</sup> Nete laen inae turuhelu Jesocurisito. Acate enene inae cana rai saseredotecuru curuaanaa Curuaanaa esineneein-chabana satonohelanaala nereein. Nii saseredote neein niicha ichai ichaane jaan- *santuariote*, esinae rauhijiriin nesineneein nena ne. Coatiha raajenihane cache chanohineein nena nihei, niheichu cau chauratane que nihei. <sup>12</sup> Nitohaneeinte *santuario* cuhane enohelu Jesocurisito, coatiha aihuruha caa chauratane que nenacaauru saseredotecurune rijijieein, Cana Coaunera rai, cabara curuanaa, toro narejeen, naaonjoainuri coichana tihane coina nihei. Acate raajenihane rai coichana tihane coina, le sajeein enohelu chabana coaitenihane coina. Nitohaneeinte cana rai ichaonaa chabana satonoelanaala nena teraneein nihane jaanu raelu. <sup>13</sup> Esinaete niqui, nii toro narejeen coichana, cabara curuaanaa coichana, baca narejeen moco bajane, naaonjoaainunri que, chaelai Cana Coaunera que banijiaelanaala nena cabuuruhane couluorejetelu, Cana Coaunera que banijiaaaineein nihane coina. Nete laen cache suujue couluoona nainenelu nii ichanacuru. <sup>14</sup> Nete laen jataain nii amuritoheriin nelateineein ne Jesocurisito coichana, aca Cana Coaunera Suujue, chabana nitajenaacharanejeein nena aina cuaain, raajenihane Cana Coaunera rai cana coreniha ohane coina netihalune jaun. Nitohaneeinte cana suujua letononeein, canaacha ichai coreniha, cana nitaje rai nena caje, cana suujua coreein nelu nii rai coichana-osa colane nena- Cana Coaunera jerei ichaain nihacachene coina.

<sup>15</sup> Nii cointate ohelu Jesocurisito, ena nena Cana Coauneraacha ichaneni aina cuaain, ichoaichaniha neein onacaaurulu, ena neinichaachene, naaonjoainichaachene Cana Coaunera aina cana tihane, nii inoaenlu jauriaanejeein niicha ichai, raujiaain cachaauru osa bujuateraneein nihane caje, acaauru osa que suujua acatena nainiha Cana Coaunerane, satiin niicha ranojineein nenacaauru netonai nii naitoonjoa niicha teeni chabana satonohelanaala nena ichaonaa raeraneein neeuruhane coina. <sup>16</sup> Oha cachane baiha, rai rucuhele niicha cocoirichai raauruhane cointate, jauriaanejeein oha nii cachane coitucuuruhane rai ne. <sup>17</sup> Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihe cache. Inae ohane baihate laen naine nii rucuhele raa

nii banihatihane jaan ne. <sup>18</sup> Nitohanihane jaunte, nii jauriaanejeein nenea Cana Coaunera ichai tonoracuruhane coina, carenero sohin rai coichana chororejetucurelu. <sup>19</sup> Jerichanejeein jetao techu, aina nenacaauru cachaauru rai jetao, nii Cana Coaunera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro narejeencuru, cabara curuaanaa, naaonjoainuri coichana acau que jasiitenohineein nenea que setejiaain jetao, Cana Coaunera tenojoi rauhi laenanohineein nenea ichoae riajaain cachaauru ichoae netonai riajae Moisesa. <sup>20</sup> Nitohaneein acaauru ichoae riajaain jetaote: “Caate nelaterichaain nii cana rai tonoraacachene coina Cana Coaunera tenojoine coitucuhichene coina, coitucuerateraneein nenea Cana Coaunera icharatenohi ichananera,” nae jetao Moisesa. <sup>21</sup> Chaen jetao techu, loanari *santuario* aina, nasaae enohane saseredote rai nelatenei corujueleeuru, naaonjoainuri ichoae riajae Moisesa. <sup>22</sup> Nitohaneente, satiin itolere coichana que rujuaain, jelai tein culuonojoineein nihane coina aitelu nii rauhi. Nii jaun, neniha coichana joaera cana corenihane, nerihei cana osa que suujua acatiha Cana Coaunerane jaanu. <sup>23</sup> Nitohaneente carenerocuru sohin rai coichana que, nii dedeeu nenacaauru cojunaca neein nenea couluoocurelu. Nete laen, jataain nii amuritoheriin couluoora latelu nii dedeeu esineneein nenea.

*Cana osa caje cana rocoeranu quete ohelu Jesocurisito.*

<sup>24</sup> Coatiha nii Cana Coaunera nenaja esine cojunacatiha cachaauruhacha ichai asaae enohilu Jesocurisito. Acate rauhijiriin Cana Coaunera nenaja dedeeu cuhin, Cana Coaunera rai, enene cana coreniha iriha ne. <sup>25</sup> Coatiha aihuruha saseredotecuru curuaanaacuru, le jaanaca nainein nejelau coichana teeuruhane coina araai saain nii *santuario* enohine rijijieein, araai saain ohilu Jesocurisito. <sup>26</sup> Nitohanihane chujianra, necoaaunaa cana rai chauratanene caje coauneein, ore araai saain Jesocurisitona. Nete aca satononiha ecocohin- le sajeeincha raajenhane neteein ohelu- chabana satonoelanaala cana osa caje cana rocoeranu que. <sup>27</sup> Charijieein teeinti le sajeein ooruhane caseteco coaracure cachaauru, <sup>28</sup> nii rijijieeinte le sajeein atinaain, arajii cachanichaane, osa aina nenea caje cana rocoeranu que tenojoineein nelu Jesocurisito. Inae nacoauneein tururichaain niqui. Nete osaaonacaacuru ichoteratihane coina ainereein, esenetaain acaacha cohajein nenacaauru ichoteratihane cointate aicheein.

## 10

<sup>1</sup> Nii Moisesa rai rauhi, nechu raujiaain nii turuha uhene-nilu rijjijeein nihalu nesinenelanaalane jaunte, acaauru osa caje- nii le jaanaca naineein- araai saain jeelai lenonecuru mocohin Cana Coaunera rai teurera couluoona nainenelu. <sup>2</sup> Bana nii acaauru osa caje acaauru couluooca nii Moisesa rai rauhine jana nihanete, inae osa caje couluoonohineein neeuruhane coitucuhin, inihocuru mocohin teuruha Cana Coaunera raine jianecurure. <sup>3-4</sup> Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naineein, nii inihocuru mocohi teure Cana Coaunera rai.

<sup>5</sup> Nitohanihane jaunte, inae chauratane que uhane rai:

“Ti rai lenonecuru teein,  
que ii belaihuruhane  
jereneeine jaunte,  
ii rai canu jaberoco tihanune coina  
caletoaaicha.

<sup>6</sup> Niheichu  
acaauru osa caje  
couluoonaaguine coina,  
ii rai iniho mocohin teein,  
chaaelai que  
ii belaihuruhane coina jeriheei.

<sup>7</sup> Aihane jaun, nocoaaun,  
nii Quiricha cuhane  
laenanohineein nihane rijjijeein,  
iicha jerei icharaneein  
nihanune coinara  
Cana Coaunera,”

naelu Jesocurisito Cana Coaunera rai. <sup>8</sup> Niritiin nii acaauru osa caje couluoonajaane coina, rai lenonecuru sohin teein, chaaelai que belaihuruhane coina aitiin, rai lenonecuru mo-cooruhane coina aitiin, naaonjoaan, rai naitoonjoan rauhi rijjijeeine saijjjein, rautaeniha Cana Coaunerane que rai aitohane baihate: <sup>9</sup> “Nocoa inae cuhanu iicha jerei icha-caaunne coina” naain aite Cana Coaunera rai. Nitohaneinte nii lenonecuruhacha sohin teeuruhane coina nenea rauhi itajeein, raajenihane rai jaberoco tee, ena nenea cana rai Cana Coauneraacha teenein nihane coina. <sup>10</sup> Nitohanein jeriha Cana Coaunerane rijjijeein, le sajeein chabana coait-enihane coina, cana coreniha ohane coina, raajenihane rai jaberoco tihalu Jesocurisitone corenihate, cana osa caje cana couluocoelu Cana Coaunera.

<sup>11</sup> Chabana osa caje cacha couluoona naineniha lenonecuru sohin teeuruhane saijjjeinte, satiin saseredote

Jorioneein nenacaauru, araai saain itolere bana lenonecuru sohin teeurelu. <sup>12</sup> Nete laen Jesocurisito, le sajeein, chabana coaiten ichaenhane coina, osa coreniha rai jaberoco tihane baiha, Cana Coaunera rohan nelauriaelu. <sup>13</sup> Ecute ena neein, que nejeratenacaauru amuritoeratiha Cana Coaunerane cojoe, <sup>14</sup> rai jaberoco tein coreniha Cana Coaunera cachaneein neeuruha cachaaurune coina couluocane jaun. 15-17 Jana Cana Coaunera Suujuete:

“Inae chabananiiji

acaauru rai canuhacha ichanenite;

acaauru suujua cuhane laenanohineein niha

Canu rai rauhine,

suujua caje coauneein coitucuuruhane jaan nereein.

Nii jaun inae nenacaeneein

acaauru osa aina baaso ichacuruhane coaaurihaaunni,”

naain aitohalu Cana Coaunerane coitucuerate cana que.

<sup>18</sup> Aihane jaun, inae nitohaneein cana osa que suujua acatiha Cana Coaunerane jaun, inae nainihe i nenacaen osa coreniha iniho mocohin tenaa nainihe i cache.

*Cana Coaunera rohan nichuuntaacachenete ne.*

<sup>19</sup> Nitohanihane jaunte rai coichana jaohin ohalu Jesocurisitone coreniha, aina cuaain, inae enene nainichaache, chaque casilanaala tonajelanaala Cana Coaunera nenaja esine *santuario* turuhacachenera canejeraauru. <sup>20</sup> Nitohaneeinte Cana Coaunera rene turunaa nainenihacachene jaan bujuateraneein nena itajeein, nii ena nena ichaonaa que turunaa nainichaachene jaanu ajiinchateraneein, rai jaberoco telu Jesocurisito.

<sup>21</sup> Nii jaunte Jesocurisito cana rai saseredote esine neein nihane jaun, aca Cana Coaunera nenaja acatiha cana turuaeraneein ne. <sup>22</sup> Aihane jaun cana suujua cuhane asinojoneein cha coacuelanaala, niheichu leocha coacuelanaala, canaacha cohajeeicha que coacuhin, esinae rauhijiriin cana suujua cuhane coitucuhachene saijieein, chachaaain nihacachene jianein, Jesocurisito aina cuaain couluonojoneein Cana Coaunera rohan turuhacachenete ne. <sup>23</sup> Nii jaun coujurihu Jesocurisito esenetaeraneein nihacachene jaun, itolere bana esenetaacachene rijijieein nihacachenete ne. Inae ecu tihane bana, cana rai niicha teenu naitoonjoalu terichaaain Cana Coaunerane jaun.

<sup>24</sup> Nitohanihane jaun ita rijijieein caohachaaain neein, itolere bana ita belaaain nihacachene coina, ita coroatajanein nihacachenete caohachae. <sup>25</sup> Aihane jaun nainihe i aihuruha leochaaurune rijijieein, ita aina netaojiaain ereerecachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoananaa

que turuelalajihane que nainaan, jiniiquiin itaque corajeratein, ita rai coitucueratihacachene caohachae.

<sup>26</sup> Jana inae raotojoein Jesocurisito coitucuhin nihacachene saijiein, naosatenaa coacuhin nihacachene inae nerinaain nacoaunein cana osa coreniha ohenu.

<sup>27</sup> Nechu usi tabai jana necairichanaa coaraain nitajeururichaaain Cana Coanera coitucunaa jerelanaala que nejeratenaa rijijiein nenacaurune que banijiaain nenaachate cohajerichaachein. <sup>28</sup> Chunocoha, Moisesa rai rauhi tonoraelanaala nihane jana, neeuruha nichatajaain coaraain beureranete, cairichaojoaain coaraelanaala, sohin jaaorurejetucurelu.

<sup>29</sup> Tana, nii amurijiriin casetecanohiniha cuururichaaain, chaque nelatihei rijijiein Cana Coanera Calaohi tein, cana coreniha ohin rai coichana jaohin naonjoaan, cana belaiha Cana Coanera Suujuene saijiein, que jaolequiin nenacaurune coitucuhichene. Nii rai coichana cana coreniha ohin niicha joailute niqui, acauru rai niicha teeni terichaaain Cana Coaunerane coitucueratein, jelai tein Cana Coanera cachanein neeuruhane coina, acauru couluoranein nenaane. <sup>30</sup> Chaen techu: "Canuna cachaauru rai caohacha icharanein coretereunni," naain "Cana Coaunera rai cachaauru rucuherein," naelu Cana Curuaanaa. <sup>31</sup> Nii jaunte, jataain coasihacaine Cana Coanera nere tonoraain nenihacane.

<sup>32</sup> Nete inara, jauriaanejein Jesocurisito esenetaaichene nunuhenein, itolere que laraajiin necairichanaa abaantaachelune coaauquichene caohachae. <sup>33</sup> Inara tabaaurute, satiin notaracaae tein nocoeje chanuhin bisihururejetelu. Nii jana inara tabaaurute, inara aina jiniiquiin necairichaururejetelu inara coinaderaa.

<sup>34</sup> Jerichanejein techu, cairichaojoaain caresero cuhane nenacauru coaraain acauru coinaderarejetocoichelu. Chaen techu inara rucuhelu ruluuruha inara cajene nihanatiin, raotojoein rachoojoein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha inaraacha raenine coitucuhichene jaun.

<sup>35</sup> Aihane jaun, jiaonriha nitohanein rariquicheeine esenetaain ichaohichene jianiquichene. Acate inara rai jeelai amuritoheriin cainarein. <sup>36</sup> Nii jaunte, jataain jeelai amuritoheriin necairichanaa abaantaain nena nanequichene jaanu que, itolere que laraajiin neechene jaanu latequiche. Cana Coanera jerei ichajeein ichaohichene, tihane coina naitoonjoa raeranein neechene coina. <sup>37</sup> Nitohanihane coinata:

"Inae ena caeneenejelanaalate turoreein nii turuha uheni. Coatih inae carajarihaain.

<sup>38</sup> Canu cachaneein, canuhacha esenetaain ichaonacaaurute, chabana nitajeeurenereein. Nena laen canu cachaneein nihane jianein, jauriaa ichaohalune rijjijeein ichoai que nejeratereeeni,”

naalu Cana Coaunerane, ne laenanohineein rai Quiricha inoansi cuhane. <sup>39</sup> Jana cana, coatiha nii rai cachaneein neuruhane jianein, jauriaa ichaoruhane rijjijeein ichaonacaauru caseteco coaracuruhane rai nenacaauru nihaacache. Canate esenetaain ichaoruhane jaun, ichoteratenojineein neeururichaaaine rai nenacaauru rijjijeein nihaacache.

## 11

### *Cana Coaunera esenetaain niha cachane*

<sup>1</sup> Esinae rauhijiriin Cana Coaunera esenetaacanete, chabana canaacha coaraai terichain cana raine cohajeein ichaohaca. <sup>2</sup> Cana foerateracurute raujiaain esenetaauruhane jaun, cacha caohacha rijjijeein acaauru coarae Cana Coaunera.

<sup>3</sup> Cana Coaunera esenetaacachene jaunte, nereecha que chauratane coaunalune coitucuhacache. Nii jaunte, chabana cachaacha coaraai caje coaunanojineein nene, caa enene canaacha coarai.

<sup>4</sup> Cana Coaunera esenetaane jaun techu, nii rai nihana Caain amurijiriin, jataain caohacha nejesina mocohin que Cana Coaunera belaiha Abeline jaun, caohacha icharanein raain nii rai niicha tei raelu Cana Coaunera. Nii jaunte, inae ohalune saijjееin enanetojoein Abeli coaaucaache, Cana Coaunera esenetaeranein nihane coitucueratiha cana quene jaun.

<sup>5</sup> Cana Coaunera esenetaane jaun techu, nabana ohane coataa jaberoco neein Enoco raa Cana Coaunerane jaun, inae nii baiha coarihurenelu. Cana Coaunera Quiricha inoansi cuhanete, jaiti raeniha Cana Coaunerane ajiniha, jeriha Cana Coaunerane rijjijeein ichaohalu Enocone que aite. <sup>6</sup> Nete esenetaenihane Cana Coauneraacha jerei ichajeein ichaonaa nainene chuni cacha. Cana Coaunera aina nena jerichaanete, niha Cana Coaunerane esenetaain, aina nena jerenacaun, niicha jerei ichajeein ichaonacaauru cainaeranein niha Cana Coaunerane esenetae esenetaera.

<sup>7</sup> Cana Coaunera esenetaane jaun techu, inae chabana acaauruhacha coaraai icharichaaaine been suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane caina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain

nenacaauru ichoteratenojineein neeruhane rijjijeein ichoteratenojineein nelu Nohe.

<sup>8</sup> Nii rijjijeein techu, Abaraaun netonai Cana Coaunera esenetaane jaun, cotihacane tonoraain rai natane ratiriin, nii cunaja jelai coitucuelanaala cuhin, esenetaeraneein nihane cainaeraneein, rai Cana Coaunera teenu atane que ichaoha cuelu. <sup>9</sup> Nitohaneein Cana Coaunera esenetaane jaunte, nii rai Cana Coaunera teenu atane que leeocho atane caje unaaneein ichoaelu Abaraaun. Ecu jetaote, neloheritelanaala raujiaain loanariicha asaae ichoaelu, aihuruhalu nii rai, Cana Coauneraacha tei raeraneein neeninunru Isaca, Jacobo, naaonjoainurine rijjijeein. <sup>10</sup> Cana Coauneracha ichai- chabana nitajenaachara nese que ichaonaa jerihane jaunte, leeocho neseu cuhin ichoaelanaala loanariicha asaae ichoaelu Abaraaun.

<sup>11</sup> Cana Coaunera esenetaane jaun techu, inae camotojoe nihane jaun canaanai sirina naineniha Sarane jana, inae Abaraaun netonai biinaa nihane saijjееin, rai naitoonjoan icharihani nohanelanaalane esenetaane jaun, lararajiaa Cana Coaunerane aina nelararajiaain canaanai sirilu Abaraaun. <sup>12</sup> Nitohaneainte, inae jataain biinaa nihane saijjееin, janiinacajelanaala cucuana cuhane nena carene catu aina arasijie jeoneein, cachaauru foerateraneein nelu Abaraaun.

<sup>13</sup> Satiin nii cachaaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijjijeein coitucuuruhane jaun, nechu leeocho atane caje unaaneein, caa cana rai chauratane que ichaauruhane coitucurelu.

<sup>14</sup> Nitohaneein ichaauruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana satonoelanaala acaauru ichaonajaanu atane raarenihalune coitucuhacache. <sup>15</sup> Bana nii jee-lai nataneecha que coaacuuruhane jana nihanete, jelaiha caaururelu. <sup>16</sup> Nete nii acaauru rai Cana Coaunera teenu atane raauruhane coina, jelaiha caunaa nainecurenelu. Nii atane acaauruhacha raenute dedeeu nenaane. Nii jaunte, nitohaneein acaauru que leinjiin nese banihateein rucuhacane jaun, acaauru Coauneraneein nihane coejene Cana Coaunera.

<sup>17</sup> Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitoha Cana Coaunerane jana, Isaca sohin mocoha nejerelu Abaraaun. <sup>18</sup> Nitohaneainte: "Ii calaohi Isaca cajete nefoerateeurureein iicha foerateeuricha" naa rai Cana Coaunera natiin, acaihaniji rai calaohiniha Isaca ne saijjееin rai sohin

mocoha Abaraaun ne jere Cana Coaunera. <sup>19</sup> Ohane caje, cacha ichatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoauneein nii rai calaohi raelu. Nitohaneeinte jataain chaque nelateineein nelu nii Abaraaun.

<sup>20</sup> Cana Coaunera esenetaane jaun techu, rai calaohichuru-Jacobo, Esao, naaonjoainuri coroatajanerichaaain Cana Coaunerane coitucuhin cojiotaclu Isaca.

<sup>21</sup> Cana Coaunera esenetaane jaun techu, inae ohane rai netiin, rai calaohi Jose calaohichuru- le cachaauru cojiotaain coroatajanerichaaain Cana Coaunerane que aitiin, rai nunera que netemeriaain, Cana Coaunera coroajelu Jacobo.

<sup>22</sup> Cana Coaunera esenetaane jaun techu, inae ohane rai netiin, Egipto caje mituururichaaain rai naraaichuru Isaraelitacurune que aitiin, rai jaberoco amaauruha acaauru jini-ichaaaine coina aitclu Jose.

<sup>23</sup> Cana Coaunera esenetaauruhane jaun techu, canaanai-huru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojoneein aina sirichurelu, jataain caohachajei canaanai nihane jaun, rai fojiaraauru.

<sup>24-25</sup> Cana Coaunera esenetaane jaun techu, *Rey* Faraaon cacunu, calaohi rijijieein nenea jerenihane jaun, inae ichauchenaneein rai naraaichuru- Cana Coaunera cacha neein nenacaauru aina jiniinquiin cairichanojoneein nelu Moisesa. Jaiti caa chauratane que osaonacaauru aina ichaohane bana. <sup>26</sup> Nitohaneeinte, jataain Cana Coaunera esenetaane jaun, rai cainarichaaain Cana Coaunerane coitucuha nota que coara rijijieeine jaun, Egiptoo raotojoei ichaonaa que ichaonaa nainihalune que jaolequuin, jataain nii amuritoheriin nelateineein cacha ichoteratera- Mesihasi rijijieein cocoinanohineein necairichanaa jerihane jaun, naraaichuru rene cuclu Moisesa.

<sup>27</sup> Cana Coaunera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaunerane jana ainaan rijijieein, Aca jerihane rijijieein nelu Moisesa. <sup>28</sup> Nitohaneein esenetaane jaun techu, besetaneein neeni- Fasocoa janonaa nunuhe bitoaain, satiin Isaraelitacuru nenaja bacuujuaaauru rujuaerate ichana que Moisesa. Nabana Isaraelitaneeuruhane calaohichuru ajichacuru atinaa Cana Coaunera letono anjerane coataa.

<sup>29</sup> Cana Coaunera esenetaauruhane jaun techu, atane jacro que ainaa rijijieein, cucuana jera jaorelu Isaraeli-



tacuru. Jana Egipto cocoaichacuru acaauru caaijie cuhalaain satiin naluhin oorelu.

<sup>30</sup> Cana Coaunera esenetaauruha Israelitacurune jaun techu, caainsi janoneein cojoanoonetojoein cuhin, caainsi sanein Jericoo nese tinonocuruhane jana, neranuha tinonoritiin nena nii ajeri caje ichanohineein nena nii nese tinoritiin ucuuneti rijiane jana, satiin cocoaichacuru sohin jaaorelu. <sup>31</sup> Cana Coaunera esenetaane jaun techu, nii Jericoo nenacaauru cachaauru sohin jaaoruhane ucuatoha, nii ecu nena ene cojoaelorohe sohin jaaorenelu. Nitohaneein esenetaane jaun, acaauru letonocuru coroatajai cunacaauru raa raotojoein rai loreri asaaene jaun.

<sup>32</sup> Jaitite lanacure Gedeeon, Baraca, Saansoon, Jefete, Rabiiri, Samoeri, chaen *profetacuru*, naaonjoaainunri que inara rai irihanune, nena inae jianeun. <sup>33</sup> Satiin niichuru jetaote, Cana Coaunera esenetaauruhane jaun, lauri lauri nenacaauru atanecuru ruluhin jetao, jeriha Cana Coaunerane rijijieein ichaain jetao, acaauru rai niicha teeni Cana Coaunera aitoonjoan atane raauorelu. Tabaauru leon ucuha cuhane jaonojonecuruhane nihanatiin quinaa nainenelu leon, leoncuru ujuae fuhane coina, rai anjera letoaa Cana Coaunerane jaun. <sup>34</sup> Jana tabaauru jetaote, Cana Coaunera esenetaauruhane jaun, usi tabai jana jaonojonecuruhane nihanatiin, tonajelanaala usi caje nichoteeurelu. Chaen tabaauru jetaote, sabere caje nichoteein sonaana que casihuruhane saijieein, nii baiha nelararajiaain sonaana que acaauru que nejeratenacaauru amuritoorelu. <sup>35</sup> Tabaauru enecuru rai jetao techu, acaauru araaichuru onacaauru ichatecurelu.

Jana tabaaurute cairichanojoneein neeuruhane caje nichotenaa coacuelanaala oorelu, ooruhane nihanatiin Cana Coaunera aina raotojoei ichaonaa que ichaaururichaaaine esenetaauruhane jaun. <sup>36</sup> Jana tabaaurute acaauru nocoeje chanuhin bisinojoneein, *cadena* que ichoanojoneein caresero cuhane tenojoneein, naaonjoaaurelu. <sup>37</sup> Jana tabaaurute, ajeri que bodoosiin, sera que cataaun terunojoneein, sabere que sonojoneein, naaonjoaain oorelu. Chaen techu, cajihaneein amuhemujueein cairicheinejeein, carenero, cabra, naaonjoainuri ujui que cajionecoojoein, cairichanojoneein nererojoecaaeriin, naaonjoaain neeurelu. <sup>38</sup> Nii cachaaurute chauratane que, nelatihei rijijieein, cunaja coitucuelanaala cajihaneein, cacha areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nena cuhaneuru cuhin amuhemujueein nerejetocurelu.

<sup>39</sup> Nete nitohaneein esenetaain neeuruhane coreniha cacha caohacha rijijieein coaranaaca Cana Coaunera natiin, chuni rai naitoonjoan niicha teeni tenelu, <sup>40</sup> cana coacuhin cana rai jataain caohachaneein niicha tei esenetaeraneein neinichaachene aina cuaain, acaauru netonai cana aina jiniiquiin esinae rauhijiriin caohacha icharaneein ranojoneein neeuruhane coina.

## 12

*Jesoso coarajeein nenea rijijieein, itolere bana queecha coaacuche.*

<sup>1</sup> Nitohaneein inae cana que Cana Coaunera esenetaauruhane coarateein coitucuherateeuruhalu nii cachaaurune jaun, jeriha Cana Coaunerane rijijieein ichaonaa jerichaachene nihanatiin itolere bana osaacha ichana coacuhin nihaachene coina cana acateraneein nenea jianein, canaacha esenetai jerenohi ichajeein laraajiin ichaohacachenete caohachae. <sup>2</sup> Aihane jaun, nii esenetaacachene jaan tera neein aca cana suujua rucuherranein niha Jesosone jaun, queecha coaacuachene ne. Inae nii baiha raotojoein rachoojoein Cana Coaunera rori- *trono* raotono nichajai que nelauriaain nerichaaanne coitucuhane jaunte, rai nocoeje chanuhin coroso que teen atinaauruhane jana, coejenelu.

<sup>3</sup> Nitohanihane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaacuche. Aihane jaun, chatohanei coaraain neeichene nihanatiin, jiaonriha coiinteein esenetaaichene jianequichene. <sup>4</sup> Niheichu nii osa que nesarucuhichene coataa necairichanaa coraquichene jaun coreniha oriheecheein. <sup>5</sup> Nete inae inara, rai calaohi suujuatiha casetecaane rijijieein, inara suujuatiha inara casetecaa Cana Coaunerane jaan baitequiche. Rai Quiricha cuhanete:

“Jiaonriha

ii suujuatiha, ii casetecaa

Cana Curuaanaa que jaolecoina cacalabi.

Niheichu

baaso ichaaine coreniha

ii casetecaane,

nainiheei

esenetaaine jianeine.

<sup>6</sup> Niicha belaaite suujuate

Cana Curuaanaa.

Jerichanejeein techu,

rai calaohi rijijieein

niicha rai casetecaain ne,”

naain ne Cana Coaunera Quiricha cuhane.

<sup>7</sup> Nitohanihane jaun, inara casetecaane abaantaain neeichenete, rai calaohi belaihanee rijijieein inara belaicheein Cana Coaunera. Nihei chuni canaanai-inacaacha suujuateinelanaala nei. <sup>8</sup> Jana rai calaohi rijijieein nenacaauru casetecaa suujuatihane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein. <sup>9</sup> Chaen techu, caa chauratane que nenacaauru-cana fojiaraauru- cana casetecaain cana suujuateeuruhane, tonoraain nerejetocoaachelu, tonaain erenaa coacuelanaala. Nitohanihane jaun, cha caaunna nii amuritoheriin dedeeu nenea Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nenea ichaonaa raacachene coina. <sup>10</sup> Cana fojiaraaurute, jaiti caa chauratane que ichaohacachene jana, nechu raujiaain acaauru jerecuruhane rijijieein nihacachene coina, cana suujuateurelu. Nete Cana Coaunera laen, Nesineneein caohacha icharaneein nihane jaun cana rai caohacha icha cana suujuatiha cana casetecae. <sup>11</sup> Coatiha niqui raotohi caseteco coaracaane, rijieeoritiin cunaain tacaane jaun. Nete nitohaneein cana teein cana relaera tonoraain ichaohacane, rauhijiriin raotojoei ichaonaa que ichaohaca.

*Jataainte elunae cana rai Cana Coauneraacha beratei que jaolecohacane*

<sup>12-13</sup> Aihane jaun, nacoauneein nelararajiaain caohachaain ichaaoche. Nacoauneein caohachaain rauhijiriin inara suujua coaraain ichaohin, jerichanejeein nacanacaena coacuelanaala neeichene coina.

<sup>14</sup> Satiin cachaauru aina raotojoein ichaaoche, cojoerihu jeriha Cana Coaunerane rijijieein ichaohichene coina. Jeriha Cana Coaunerane rijijieein ichoaeniha cachane, nihei chuni Cana Curuaanaa coarana nainerinaain. <sup>15</sup> Atiin jiniin-quin, jeriha Cana Coaunerane rijijieein, ita coroatajaneein neeuche. Nabana chuni nitohaneein nihane jianihane, cacha atinaa ajaena corainei rijijieein leeochoaauru ichao aasae-cane coataa. <sup>16</sup> Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohaneein ichaane jaunte, nechu lenoneecha coreniha, aca nihana saijieein, raineein nenea telu rai nocoala rai Esao. <sup>17</sup> Nii jaunte, nii coitucuhichene rijijieein, rai caohachanu tiha rai inacane coina bajaane saijieein tenelu rai inaca. Mainajeein chanaain bajaane saijieeinte, tenelu inae nitohanihane jaun.

<sup>18</sup> Nete laen inara, aihuruhalu Israelitacurune rijijieein, chatohanai dadaain coanacai, usineein iihanei, nocohena

tabai, cujuana tabai aina nocoehena, naaonjoain nenea rohan nii nichuuntaeneeiche. <sup>19</sup> Niheichu toniha jaihane aonaheeiche. Niheichu toniha Cana Coaunerane aonaheeiche. <sup>20</sup> Nii aohanraauru jetaote laen, nii naitoonjoan tonorana nainesihurenihane jaun, abaantasilanaala acaauru rai iriha Cana Coaunerane jianeratecurelu. “Chunocoha, caa nihanune jaan-ichatane ucuunno rohan nichuuntaain, ecu turuhin, jelai shaquuin, naaonjoainte ajeri jabero, rejoon, naaonjoain que sohin jaonjoinereein, lenone neein aihane nihanatiin” naain iriha Cana Coaunerane jaun. <sup>21</sup> Nitohaneein jataain coasinacaa, nii acaauruhacha coaraine jaun jetaote: “Jataaine rijijijianeun canu nesoone caaunra” nae jetao Moisesa. <sup>22</sup> Nete laen inara nii amuritoheriin, Cana Coaunera nenaja esine Sioon bichatane ucuunno, dedeeu nenea Jerosaleeun nichuuntaaiche. Chaen techu oaraanca neein netaojiaain Cana Coaunera coroaecuruha coina, netaojiaain neeuruha anjeraaurune jana coaraquiche. <sup>23</sup> Chaen techu, ichoaichaniha Cana Coaunera calaohi neein dedeeu cocoirichanojoneein nenacaauru rohan turuhin coaraquiche. Nitohaneeinte satiin caohachaain ichaonacaauru cachaauru, aca jerihane rijijieein teein niicharanojoihunru rai Joesioneein nenea- Cana Coaunera rene turuhiche. <sup>24</sup> Chaen techu nii ena nenea Cana Coauneraacha teratei teraneein nenea Jesocurisito- rai coichana que cana couluorane maajein coaraquiche. Nii rai coichanate jau-riaanejeein cana cairichaeranu que nihalu Abeli coichana jana, jataain nii amuritoeriin cana rai nelateineein ne.

<sup>25</sup> Nitohanihane jaun, cana rai ereein niha Cana Coaunerane que jaolecohin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuatenajaane coina Cana Coauneraacha cotihacurilu, caje nichotenaa nainecururiha. Aihane jaun, nii amuritoheriin nichotenaa nainerihacacheein dedeeu netiin cana suujuatihane que jaolequiin nihacachene. <sup>26</sup> Nii iriha Cana Coaunerane bana jetaote, nii rai nereecha caun nerurujuaelu canarai chauratane. Nete ena laen: “Nacouneeina chauratane rurujuareeunni le sajein. Coatiha Chaurataneecha nerurujuarinaain, cana rai dede netonaite nerurujuareein,” nae Cana Coaunera. <sup>27</sup> Niritiin: “Nacouneein le sajein” naain aitohanete, satiin niicha coaunanojoneein nerurujuanaa naineein nenacaauru itajihane jana, nerurujuanaa nainelanaala nenaacha nedaane coina aitoha Cana Coaunerane coitucuerate cana que. <sup>28</sup> Nii cana rai Cana Coauneraacha tei- rai Cojoanonaate chabana nitajenaa nainene. Nii coreniha “Narihara Cana Coaunera,” naain

jiniiquiin rai cachaneein neeuruhane coarateein aca jerihane rijijieein coroaeraauru aina coaroaecaachenete ne, <sup>29</sup> itolere baaso itajera- usi rijijieein niha Cana Coaunerane jaun.

## 13

*Naaonjoaain, rai suujua rijijieein nihacachenete jere Cana Coaunera.*

<sup>1</sup> Jiaonriha ita nejeraneein nenea rijijieein, jiniiquiin ita belaaain neeichene jianein neeichene. <sup>2</sup> Niheichu inara rene turunacaauru belaaain raaichene jianein nenea nainihee-iche. Nitohaneein nenacaaurute, acanihane coitucuelanaala Cana Coaunera letonocuru anjeraaurune maajeein raaurelu rai loreri asaae.

<sup>3</sup> Aitiin caresero cuhane nenacaauru netonai coaucuche, acaauru aina jiniiquiin caresero cuhane nenea rijijijieein. Chaenchu cairichaaerinojoneein nenacaauru netonai coaucuche, inara netonai acaauru rijijieein cairichanojoneein nenea nainequichene jaun.

<sup>4</sup> Nitohanihane jaun, inara quichaauru, enecuru, naaonjoaneeichene nisirihateein neeichene, itaque inara suujua acatein, leecha inara sinijerane lanaala nenea coacuelanaala, inara sinijiera ainaacha ichaaoche; satiin baaso ichaain rai sinijerane lanaala nenea aina ichoai casetecarichaain Cana Coaunerane jaun.

<sup>5</sup> Jiaonrihachu coriquiicha que coacuhin neeichene. Inara rucuhele inaraacha sirii ainaacha raotojoein ichaaoche: “Chabana nihei inara jianein inara que jaolecohanune” naalu Cana Coaunerane jaun. <sup>6</sup> Niritohalu cana rai Cana Coaunerane jaun chaque tonajelanaala nainichaache:

“Cana Coaunerate canu coroatajaneraneein ne.

Nii jaun chaque casinaaun.

Chatonai ichana nainihe i canu que camute cacha,” naain erena nainichaache.

<sup>7</sup> Inara suujuatee in Cana Coaunera ere que inara relaaaureralu coacuhin, acaauru ichao que coacuhin, esenetaain ichaaoruhalune rijijieein ichaaoche.

<sup>8</sup> Jesocurisitote jeelainein nereein, chabana satonoe-lanaala. <sup>9</sup> Aihane jaun jiaonriha nejelau cuaa inara relanaajerera nihane, rijitoejin esenetaain neeichene. Nii amuritoeriinte jataain nelate, jeriha Cana Coaunerane rijijieein cana suujua ilaain ichaohacachene. Coatiha chaque nelatihei, nii niicha quiinelanaala nenea iniho quiniha cachane nihanatiin. Coatiha chabana cana rai chaque nelatejeehai nii.

<sup>10</sup> Canate coroso que ohalu Cana Coaunera Calaohi Curisitone coreniha jianacoon osa caje nihacache. Nii *santuario* teein saseredotecuru ichanaa coatiha inae chaque nelateein nedaai. <sup>11</sup> Jana jauriaanejeein nenaalute, saseredotecuru curuanaacha lenonecuru sohin, *santuario* cuhane rai coichana terejetelu osa anihoeraanu que. Nete laen, nii lenone jaberocooru, acaauru loanari caje naain amaain jelai teein mocorejetocurelu. <sup>12</sup> Nii rijijieein techu Jesoso netonai, naain nese caje amaain jelai teein atinanohinelu; rai coichana que satiin rai cachaneein neinichaachene culuocane coina. <sup>13</sup> Aihane jaun, aina jiniiquiin nese caje amanojoneein cana netonai necarichanaa abaantacachenete ne, aihalune rijijieein. <sup>14</sup> Coatiha caa chauratane que nihei cana rai leeinjiin nese chabana nitajenaacharanejeein nei. Nii jaun, chabana nitajenaacharanejeein nena ariirijiacachenete ne. <sup>15</sup> Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana Coaunera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne. <sup>16</sup> Jiaonriha caohacha ichana baiteein, leeochoauru rai inaraacha sirii teein naaonjoaain neeichene jianequichene. Nitohaneein ichoaite rautaain coarae Cana Coaunera.

<sup>17</sup> Inara relaaurera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coaunera rai jitaain inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaai ichaelanaala. Jana aineeichene, coatiha inara rai chaque nelateriaain inaraacha ichai.

<sup>18</sup> Atiin canacaanu coreniha Cana Coaunera bajaauche. Jataain raotojoiha canacaanu suujanena jerichaanu; itolere que caohachaain ichana jerichaanune jaun. <sup>19</sup> Jataain inara aina nacoauneein nena jerichaaunne jaunna, inara aina nihanune coina Cana Coaunera bajaachene coina, inararai aitoon.

### *Raotojoein jiniiquiin neeuche.*

<sup>20</sup> Rai coichana aina cuaain chabana satonoelanaala nena ichaonaa tera- rai cachaneein nihacachene beraichaneein nena- nii o caje Jesoso ichatera Cana Coaunera, <sup>21</sup> inara ichao rucuerateeine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoelanaala, Curisitoneein niha Curisitone coitucuurumiin satiin cachaauru. Bajiaanachuhinti aihurene.

<sup>22</sup> Atiin raotojoein caa inara suujua nunaeraanu que inara rai canuhacha laenai raauchera canejeraauru. <sup>23</sup> Cana nejera Timoteeote, inae caresero caje mitue. Enanocoojoa turuhanena, inae inara coaraa uhanune, canu jiniichaa in uhareeunni.

<sup>24</sup> Satiin inara bichauhenaauru aina, satiin Cana Coaunera cachaneein nenacaauru rai, acaauru coaaucaanne beeuche. Italiau nenacaauru netonoaite inara coaacure.

<sup>25</sup> Jataain jeelai amuritoeriin inara coroatajanemiin Cana Coaunerate, satiin raotojoein neeiche.

## Saantiaaocha letoi

*Jesocurisito esenetaeraauru rai Saantiaao letono quiricha*

<sup>1</sup> Canuna Saantiaao neeun Cana Coaunera ere tonoraera neein, calaohi Jesocurisito naajoain ere tonoraeraneeeinne neeun. Nii Cana Coaunera Calaohi Jesocurisito ere esenetaain nenacaauru, caa cana rai chauratane sacutaain riaa-neein nenacaauru raina, caa quiricha letohaun.

<sup>2</sup> Aonacuche satiiin Cana Coaunera Calaohi coreniha canejeraauru. Chatohaneein nihanatiin inara tera nihane chaque tonajelanaala raotojoein rachoojoein neeuche. <sup>3-4</sup> Cana Coaunera esenetaaichene coreniha itolereque coujunojoinequichene coitucuhin, nelararajiaain itolere necairichanaa abaantaain neeuche. Nitohanihane banate itolere necairichanaa nihanatiin abaantana naineriquicheein aina iiquichene. Nii banate esinaae rauhijiriin Cana Coaunera jerenohi ichana naineriquicheein. Aihute coujurihu Jesocurisito ere tonoraera neein nena tocuhaneein neeiche rauhijiriin.

<sup>5</sup> Inaraacha chanenu coitucuheneeichene, Cana Coaunera caje bajaauchoete inara coroatajanemiin. Acate inara rai coitucuhichene jaanu tereein, Cana Coaunerate canaacha latei tera ne chaque tonajelanaala. <sup>6</sup> Cana Coaunera baja-jaaichene, esinae rauhijiriin esenetaain necoatoelanaala bajaauchoe. Necoatiin Cana Coaunera bajaerate, esinaae rauhijiriin Jesocurisito ere tonorana nainene, cajianeein suujua letono sacuhane. <sup>7</sup> Nitohaneein neeichene, inara coroatajanena nainerihe Cana Coaunera esenetaeneeichene, <sup>8</sup> leinjiincha que suujua cuaain nena naine niha nitohaneein nenacaauru cachaaurune jaun.

<sup>9</sup> Cairichaneein neeichene jana, inara raa Cana Coaunera jaun, raotojoein rachoojoein neeuche. <sup>10-11</sup> Cana Coaunera coitucuhin esenetaera coriquihona neein nihane, coriqui que nanejiaane niha natiin raotojoein rachoojoein neeine, Cana Coauneraacha tenojoin amuritoheriin jataaen nelatena naineniha coriquine coitucuhin. Cana rai Cana Coauneraacha tei ichaonaa laen, chaelai janonaa bana nitajenaa nainihe. Nii coitucuhin raotojoein rachoojoein neeine.

*Chabana nitajenaachara ichaonaa terichain Cana Coauneraane*



<sup>12</sup> Nerausiaaequiche esinaae necairichanaa abaantaain Cana Coaunera coitucuhin, esenetaain, jereein, nere tonoraain neeichenete, chabana nitajenaa charanejeein nena ichaonaa caohacha esine tereein inara rai Cana Coaunera, belaaain nere tonoraeraauru rai nitohaneein tihane coina aitiin nihalune jaun.

<sup>13</sup> Chunei chatohanei baaso ichana coacuhin nihane, coaa “Cana Coaunerate jere caa baaso coaucaaanne coina,” naain iriha. Coatiha joareein cacha rijijijeein chabaaso coacuhin nihei Cana Coaunera. <sup>14</sup> Nii cana raajenhane canaacha coacuite, ecocoe cana suujua caje baasoneein. Aihana jaun baasoneein sacuichechene coataa, caohachaaain coaracuche. <sup>15</sup> Baasoacha coacuhin nenaate, nechujataaen caohacha nainejeein nitajiha cureein. Coatiha Cana Coaunera jerihane jaun, nii baaso neein ichaoheeiche. Niheichu nii nitajiha chuneine jerihe Cana Coaunera.

<sup>16</sup> Coaa inara raajenhane nohanihache canejeraauru. <sup>17</sup> Coatiha Cana Coaunera caje uhi chabaaso. Coatiha chaaelai janonaa bana suujua lonaai Cana Coaunera. Leinjiin acaachate aca neein ne. Itolere neeincha caohacha nejesinaachate uhe Cana Coaunera caje. Acate itolere rai cono neein ne. Aca techu enoto, atene, arasijie, naajoainunri coaunaelu dedeeu. Chabana coreenrai Cana Coaunera. <sup>18</sup> Nii jaunte nere berate cana rai, aonaain, coitucuhin, esenetaain tonoraacachene coina. Nii jaunte, nere esenetaain tonoraacachene jaun, ichaonaa esine tee cana rai, raotjoein Cana Coaunera nihane coroejeein niicha jerei ichaacachene coina.

<sup>19</sup> Nii coreniha canejeraauru, caohachaaain rauhijiriin esinaae Cana Coaunera ere aonaain, Cana Coaunera ere tonoraache, chaaen chu erenacaatelanaala, chaaen chu joareein coreniha obaje lanaala, naaonjoaain. <sup>20</sup> Joareein coreniha obajei cacha, nihei Cana Coauneraacha jerenohi ichaai. <sup>21</sup> Aihana jaun itolere baaso nejesina inaraacha sacui jianecuche. Nii Cana Coaunera ere, inara suujua cuhane inaraacha rucujuei Cana Coaunera ere tonoraache, caohachaaain inara suujua coaraain. Acate osa caje jianacoo inara suujue mitareein.

<sup>22</sup> Cana Coaunera ere coitucuhin neeichene jaun, tonoraain Cana Coaunera jerenochiha sacuuche. Aineeichene nelatihei raujiaain aonaquichene. Niite nechujataaen inara raajenhane necoritariquicheein. <sup>23</sup> Cha teinti Cana Coaunera ere beebejiha beebejerane aonaa natiin tonoraene. <sup>24</sup> Niite enaacha Cana Coaunera ere baitereein. <sup>25</sup> Cha teinti aitoha Cana Coaunera erene baitelanaala rauhijiriin tonoraain ne, niite raotjoein nereein. Cana Coaunera ere tonoraacachenete nainichaache caohachaaain ichaohacachene. Ni-

icha jerenohicha ichacaachenete caohachae. Nii jaun Cana Coaunera ere tonoraain naitoonjoan ichajeemin sacuhacachenete caohachae, cana aina niha caohachaaain Cana Coaunerane raotojoeemin ichaohacachene coina.

<sup>26</sup>“Aitoha Cana Coaunerane rijijieeina caohachaaain rauhi-jiriin neeun,” naa natiin joenreein baaso neein leeochoa cache que irihanete raajenhane necoritae. <sup>27</sup> Cha lateein neeuruha ujuatejееurune coroatajaneemin, cha lateein niha autanaaurune coroatajaneemin nihacanete, esinaae rauhi-jiriin aitoha Cana Coaunerane rijijieein nerichaacheein. Nainihe Cana Coaunera Calaohi Jesocurisito coitucuruhi rijijieein nihacachene.

## 2

### *Nejelauneein leeocho cache coaana naineniha cachane*

<sup>1</sup> Nitohaniane jaun Cana Coaunera Calaohi Jesocurisito esenetaera neein neeichene jaun, jiaonriha nejelauneein chunei coaraain neeichene. <sup>2</sup> Ita taojiaain Cana Coaunera bajaachene jaan coloheri-Teenforo asaae ita taojiaachene jana, enoha leinjiin coriquihona, oro que anichoquiin, cajione caohacha que necoreteeine jana, cajione siri ruhecaain enoha cairichaiineemin nenaane, <sup>3</sup> nii oro que anichoquiin cajione caohacha ruhacaera belaaain, rori caohacha choaae lauriaain, nii cairichai cache rai, “Nihu chujuhecoo. Ainihane nihu atanichoaae nelaurihau,” naaichenete, <sup>4</sup> baaso ichariquicheein, caohachaaain cairichai belaaain coaraeneeichene. Nii coriquihona belaaichene rijijieein, cairichaihuru belailanaala, “Nelatihei cairichaihuru belaihcane,” naaichene jaun. Satiin coriquihona, cairichai, naajoainunri belaihcaneete caohachae. Nihei cana belaihu-ruha caohachaaaine jerena caaun nihei. Nitohanai ichaquichenete baaso ichariquicheein.

<sup>5</sup> Caohachaaain aonacuchena inara rai caa que aite te coitucuhiche. Nere esenetaain tonoraa cairichaineemin nena cache netejian, nenacaaen belaaain coroatajane Cana Coaunera, jeelai amuritoheriin esenetaain tonoraaain nihane coina. Cairichaineemin caa cana rai chauratane que nihane niha natiinte, belaaain coroatajane Cana Coaunera, aitohane tochaneein chaelai janonaa bana satonoelanaala aina nihane coina. <sup>6</sup> Nete inara, cairichaihuru necoejehanuhin neeiche. Coatiha cairichaihuru, inara necoejehanuhi, inara cairichairiin neeuruhi chaelai janonaa bana. Coriquihonaaurutejian, inara necoejehanuhiriin, inara cairichaaeriin neeure. Cuna jereneeichene niha natiin, inara tararaain inara amaain cocoaina nacaihuru rai inara teure, caseteconeemin neeichene coina. <sup>7</sup> Chaaen techu

inara que baasoneein ereein neeure, Cana Coaunera Calaohi Jesocurisito sacuhin neeichene coreniha. Caohachaaain inara belaihuruhane coaraelanaalate inaraacha acaauru belaaiche, cairichaihuru belaaichene amurijiriin. Coaa nitohaneein nihache.

<sup>8</sup> Quiricha cuhane aitoa Cana Coaunerane tocohaneein, charijieein teeinti nii raotojoeein ichaonaa jereein neeiche. Nii rijijieein raotojoeein ichaonaa nainecuruha acaauru netonaine coina, nii leecha cachaauru coroatajanecuchete, acaauru netonai raotojoeein ichaonaa nainecurumiin. Nitohaneein neeichenete esinaae rauhijiriin Cana Coaunera aitoojoan ichariquicheein. <sup>9</sup> Inara araaichuruhacha caohachaaain coaraain belaaain, coroatajaneein, nii nejelaauru coroatajanena jereneeichenete osa que nesarureeicheein, Cana Coaunera notaracaae aitoa Cana Coaunerane tonoraelanaala, nitohaneein rauhijiriin ichaeneeichene.

<sup>10</sup> Cana Coaunera aitoonjoan tonoracaaache neniha natiin, jitariin caohacha nainejeein Cana Coaunera aitoonjoan tonoraenihacachenete, cana nii ujuaihoneein nerichaacheein.

<sup>11</sup> Nabana nitohaneein neeichene coataa: “Jiaonriha chu chaaen nejelau ene, inara sinijerane lanaala nena aina naosateein neeichene. Chaaen techu jiaonriha sinijera nelanaala nena quicha aina naosateein niha enene,” nae Cana Coaunera. Chaen techu, “Jiaonriha sonajaain jaohine,” nae Cana Coaunera. Aihane jaun rai sinijeranelanaala nena aina ichoaenihane nihanatiin sonajaain jaohanete, Cana Coaunera rai rauhi tonoraenihane jaun aicheein.

<sup>12</sup> Aihana jaun coa nejelauneein chunei coaraain nihache. Cairichainein nihacachene sajainejeein, cana belaaain cana raa Cana Coaunerana jaun jerichanejeein belaaain cacha coaraain nihacachenete caohachae. <sup>13</sup> Inae ecu tihane banate caseteco coaraa cuurureein nechuh ansainein nenacaauru, necairichanacaauru que “cairichaaajoaa” naelanaala nenacaauru. Necairichanacaauru coroatajanena jeriheichurute, “cairichaaajoaa” naelanaala casetecaeratiha cureein Cana Coaunera. Jana, necairicha nacaauru que, “cairichaaajoaa” naain coroatajaneraaurute, caseteco caje nichotiha cuurureein. Niite belaaain raa cureein Cana Coaunera.

*Cana Coaunera coitucuhin esnetaane coaratihā cachane*

<sup>14</sup> Cana Coaunera coreniha canejeraauru, chaque nelatihei raujiaain Cana Coaunera coitucuhin esenetaeranichaaun naain iriha cachane. Coatiha nii coreniha osa caje jianacoon nerianaain jeriha Cana Coaunerane rijijieein cha lateein niha namute cachane belaaain coaraain coroatajaneein

netiin naitonone nihane jaun. <sup>15</sup> Lenone, cajione, naajoain que, anejiin niha, Jesocurisito coreniha cana nejera, cana bai naajoain ine jana, <sup>16</sup> “Cairichaojoaa nohane, bajiaa nachuhinti chunijihu lenone, cajione, naajoain eruu-jue ne,” naaca cha telanaalane, nihei cairichai coroatajanihaaca. Niicha laatei tein coroatajanichaa nete caohachae. <sup>17</sup> “Cana Coaunera coitucuhanu,” naaichene jaun esinaae Cana Coaunera coitucueraneein neeichene, leeochoauru notaaquiche nete caohachae. Jana leeochoauru notajaelanaala, raujiaain esenetaaichene chaque nelateein nedari-heeicheein.

<sup>18</sup> Inasina caohacha ichaain cacha notajaenihane, “Esinaete chuhisi Cana Coaunera coitucuhin esenetaera ne,” naain coitucuurure cachauru. Jana esinaae rauhijiriin Cana Coaunera coitucuhin esenetaera nihanete, quiricha cuhane aitoaha Cana Coaunerane rijijieein ichaa cachane laen esenetana nainichaache. <sup>19</sup> “Cana Coaunera coitucuhanu canu,” naa chuneine, caohacharia niqui Cana Coaunera esenetaane niqui, nete nechu aansai ataibinaaecuru coitucuchuhichuru niha natiin, niha Cana Coaunerane esenetaain que casihure nere tonoraaurenihane coreniha, acaauru casetecarihani Cana Coaunerane coitucuuruhane jaun. <sup>20</sup> Niicha jerei ichaelanaala, raujiaain esenetaa cachane rarihaain Cana Coaunera. Tana nii coitucuhin neeiche ne.

<sup>21-23</sup> Coaraauna chuhinti nii coitucuhichene tocohaneein, nihei leinjiinejeein canaanai sirilanaala biinaa niha Abaraaunne jana jetaote, “Inae nerichaaain ichai leinjiin canaanaicha,” naa Cana Coaunerane jana, esenetaa Abaraaunne jaun, laenaeratelu quiricha inoasi cuhane Cana Coaunera. Nitohaneein Cana Coaunera esenetaa Abaraaunne jaunte, caohachaaain rae Cana Coaunera. Nii baihate Abaraaun coujuhin coarae Cana Coaunera, nechu jataaen coujuha, “Carai nii acaihanejein leinjiin nena ichalabi Isaca uhaain, sohin mocoo carai,” naa Abaraaun rai Cana Coaunerane jana, nere tonoraain calaohi sohin jaohane coina, inae anojoan mucuha Abaraaunne jana: “Ichalabi sohin jaohine coataa, caa carenero soora. Coa canaanai sohin jaohara. Esinaete chuhisi quesenetaain quere tonorana jereeina jaunte, caohacha ichaaicha,” nae Abaraaun rai Cana Coaunera. Nitohaniha Abaraaunne jaunte Cana Coaunera belaichaneein Abaraaun curuaateure satiin cana inoasihuru.

<sup>24</sup> Jerichanejeein techu coitucuhin, nere tonoraain, caohacha ichaain nenacaauru rae Cana Coaunera. Coatiha raujiaain esenetaaneecha coreniha nihei.

<sup>25</sup> Charijieein teeinti ai leinjiin ene- Raba neein curu-ajaain nena, jaurihanejeein jaelorohe neein nihane jia-

neein, esinae Cana Coaunera coitucuhin esenetaane jaun, coroatajaniha Cana Coaunerane que tonajelanaala, nihei chaque casilanaala Jericoo turuuruha coroatajai Israeli co-coaichacurune jana, coitucuuriin arinajaauruha sohin jaon-ajaauruhane coina Raba araaichurune jana, acaauru coasilanaala nii coroatajai Israeli cocoaichacuru asi loreri asaae tein Raba, sohin jaonajaauruha Jerico cocoaichacuru Cana Coaunera coitucuuruhine coataa ichoteratenajae.

Nitohaneein caohacha icharate belaaïn rae Cana Coaunera. <sup>26</sup> Esinaae rauhijiriin Cana Coaunera esenetaerate, nere tonoraain naitoonjoan ichaaïn ne. Jana “Cana Coaunera coitucuhanu,” naain iriha natiin Cana Coaunera jerenohi ichaelanaala nenaate Cana Coaunera coitucue. Nitohaneein niha cachane coatihä ichaonaa chabana sanaacharanejeïn nenaä ranaa nainerinaain.

### 3

#### *Caaintaeniha baaso que iriha cachene*

<sup>1</sup> Cana Coaunera ere benaa que cacha relaera neein nenaä jeriquichene caohachaaïn aonacuche. Nelatihei joareein cacha, caohachaaïn suujua coarae lanaala Cana Coaunera ere benaa que arajiin enonaa jerihane. Niite nere aohan-raauru ichoaae jauecotojoeriin caseteco coaraa cureein, nii cacha rai beebjihane rijijieein Cana Coaunera ere tonoraenihane.

<sup>2</sup> Inaaajoan saneein chaainti Cana Coaunera rai baaso que nesarucuaache satiin. Chaen techu inaaajoan saneein chaainti baaso que irihacache, jerenihacache neniha natiin. Nihei caaintiaai baaso que irihacachene. Chateeinti tonaain baaso que erene. Niite itolere neein caohachaaïn ichaonaa naine.

<sup>3</sup> Aonacuche. Tasinojoan cabario natiinte nujuae cuhane coata laajoiri tein, que raujiaeraujiajeïn jerichaane jaan jeroon rauhijiriin amaaca. <sup>4</sup> Jerichanejeïn techu timoon laajoiri que, jerihanajaan jeroon raujiaeraujiajeïn rauhijiriin bote seejoan niha natiin amae timoon inaera. <sup>5-6</sup> Charijieein teeinti ocoana mocohaca fosocoro busi laajoiri quene, nii fosocoro busi laajoiri caje necoaunaain tabaaïn neleereein, jitariin ocoana mocohe nii usi. Nii rijijieein techu chatohaneein, cacha cunaitaaïn cacha itajenaa nainere baasoneein cana ujuae caje mitunaa cana ere, chatonaain, cacha inauhene cunaain cacha janoriteein nihacane. Moconajaerate nii que cana saruhin ne, nitohaneein usi tabai que cacha sarueranihanee jaun.

<sup>7</sup> Caaintatohane sainejeente, itolere nunaana nenacaauru, itolere tajaacuru, itolere atanichoaae teerei cana lenone,

itolere ataibinae, janolari, acano, itolere acauhana nenacaauru, taji, itolere cautenu rijihuru irilaaure irilaeraauru. <sup>8</sup> Nete chunei, rai nere baaso jianeein nenea nainene. Charijieein teeinti cacha calaa acanone nii acano catu caje cuhin, nii cacha coichana lomoha nii acano catu corane, ohe nii acanoacha calai. Nii rijicha cana suujua baaso caje coauneein, cana ujuae caje mitunaa cana ere, leeochoauru cana laurijiracuru, naajoainunri jitariin aasaecane jaun.

<sup>9</sup> Nii jeelai cana suujua baaso, cana ujuae caje mitunaa Cana Inaca Cana Coanera coroaecaachene jaan quete rijijieein niicha counanojoneein nihane baiteein, “Cha quete nelatere caa cacha,” naain irihacache obajeein cacha aina nererojoecaacachene, “Coaraain nainaaaine caa aansai,” naain irihacache, coaraain cuu necairichaane coina, chatohaneein necairichaa cachane coaracaachene. <sup>10</sup> Nii jeelai cana ujuae caje mitunaa quete, Cana Coanera coroaecaachene jaan que techu cachaauru cotaihacache. Caohachaai nitohaneein nihacachene, canejeaauru.

<sup>11</sup> Charijieein teeinti le curuhacha caje mitunaa nainene acau ichonai, acau elonai, naajoain. Nii rijijieein techu cana suujua cuhane nefaa baasone, erenaa caohacha que erenaa nainenihacache.

<sup>12</sup> Charijieei teeinti leeochoa enuha inaaque inaana nainene *iquera*, nihechu acau cotebei nihana natiin ichonaineein nerotona nainihei. Nirijieein techu caohacha que erenaa nainene cacha, baasoneein niha rai suujuane.

*Cana Coanera coitucuhane coaratiha cachane*

<sup>13</sup> Esinaae rauhijiriin Cana Coanera jerenohi coitucuhin neeichene, inara suujua coaraain, leeochoa cachaauru rai caohacha ichaain, itolereneein caohachaain raotojoeein neeuchete, esinaae rauhijiriin Cana Coanera jerenohi ichana coitucuhichene coaracurumiin cachaauru. <sup>14</sup> Jana inara leeochoauru que necoelaain, inara suujua cuhane obajeein, inaraacha jerei ichaquichene, “Cana Coanera coitucuera nihanu,” naain coa raotiin nenea coaucache. Niite laen nohanenaa ne, Cana Coanera esenetaenihana jaun. <sup>15</sup> Nitohaneein neeichenete Cana Coanera coitucuruhi cachaauru rijiiriquicheein.

Acaaurute nitohaneein coaucure, nitohaneein acaauru suujua tiha Moconajaerane jaun. Nihei leeochoauru cachaauru aina, ita belaiha cachane jerihe Moconajaera. Moconajaerate ita belai lanaala, itaque nejeratiha cachane jere. <sup>16</sup> Nenainetiin rai caohachanuhacha que coacuhin nenacaauru cachaaurute, ita que nererojoecaain, ita que necoelaain naajoaauruhane jaun, nainecurene ita belaiin leeochoauru cachaauru aina caohachaain nenea nainecurene. <sup>17</sup> Nii

Cana Coaunera coitucuhin nenacaaurute, nejelauneein caohachaaain ichaaore. Cana Coaunera ere tonoraaauruhana jaunte, caohachaaain ichaaore, rai caohachanuhacha que coaacuruhane jianeein, leeochoaauru belaaain, ita belaaain, ita que nererojoecaelanaala, inae nohanelanaala, leeochoaauru coroatajanein, cha latiha leeochoaaurune teein, suujua coaraain, naajojoaain neeuruhana jaun.  
<sup>18</sup> Nitohanein neeichenete, Cana Coaunera jerenohi ichaaechajeein, nauruta naurutaain cuujeein, jelai choaae jauhecotojoeriin caohachaaain ichaohichene, ita aina, leeochoaauru, naajojoainunri ainane coaraanete, raotojoein nereein inara aina Cana Coaunera. Acate inara suujua cuhane raoti ichaonaa esine tereein, rachoojoein neeichene coina. Nitohanein raoti ichaonaa esine que ichaohichene, coaracuruha leeochoaauru nete, acaauru netonai nii inara rai raotojoein ichaohichene jaan ichaonaa esine teera Cana Coaunera, ere tonorana jerecureein.

## 4

*Caa chauratane que nena baasohacha jereein sacuha cachane*

<sup>1</sup> Nitohanein Cana Coaunera jerenohicha, ichana coacuhincha ichae lanaala, inaraacha jereeicha coaaquichene jaunte, ita que nejerateein, ita que nererojoecaain neeiche, leeochoaauru aina ita belaaain neeichene jeriha Cana Coaunerane niha natiin. <sup>2</sup> Cha teeinti chaaelai sirihane jana, inara rai nenihane que necohelaain, nii niicha sirii rucuhele coreniha que nererojoecaain cotaain, coaraain inae nii niicha sirii basijiauhichene jana tonaa nii nerorane, inae coreniha sonaa coacuhin que nererojoecaain, tabaque sohin jaohin, naajojoaainche, cha lateein neeichene Cana Coaunera caje bajaelanaala. <sup>3</sup> Tabaque bajaachene niha natiin inara rai terihaain Cana Coaunera, niicha jerei ichana coacue lanaala leinjiin inara raihuancha que bajaachene.

<sup>4</sup> Cana Coaunera coitucuruhi cachaaauru. Tana caa chauratane que nenaacha jereein sacuera cacha, Cana Coaunera que nejeratenaa neein nihane coitucuhichene. Aihane jaun chunocoha caa chauratane que nenacaauru jereein Cana Coaunera aitoonjoan que jaolequiin nenaate Cana Coaunera que nejeratiha aicheein. <sup>5</sup> Nii que ninaquichene jaanu quete quiricha inoasesi cuhane, laenaera que laenaerateein aitoaha Cana Coaunerane rijjijeein, esinaae rauhijiriin aitothane rijjijeein inetono janonaa bana inara suujua letonohacha ichana jerequiche. <sup>6</sup> Nete jataain cana belaihane jaun, itolere janonaa bana cana coroatajane Cana Coaunera,

rai Quiricha Inoaensi cuhane aithane tocohaneeinte que ninichaaajenaa tocohaneein rai baaso icharaauru que negerate Cana Coaunera. Jana esinae rauhijiriin esenetaain nere tonoraeraaurute belaaain coroatajane Cana Coaunera. <sup>7</sup> Nitohanihana jaun nelararajiaauche, Cana Coaunera ere tonorana que. Atiin nii Moconajaera sitaauchete inara caje amuhine. <sup>8</sup> Aihana jaun, Cana Coaunera rai caohacha rene nichuuntaain Cana Coaunera jerenohicha ichajeein ichaaоче. Aihute inara rohan neeine Cana Coaunera. Enate ichaonaa baaso que ichaohiche. Nii jaun Cana Coaunera bajaauche. Aihute inara suujua rucujueein, baasoneein neeichene caje jianacoo inara mitaain, inara coroatajanemiin Cana Coaunera. Aihute nii baaso ichaquichene jianeein itolere bana Cana Coaunera jerenohicha ichaquiche. Aihana jaun cajihaneein inara suujua coaraqichene jianecuche. Coaa cajihaneein inara suujua coaracache. <sup>9-10</sup> Cana Coaunera jerenohi ichaquichene jianeein neeichene coejeein, inara jaberoco coinaderaain, baaso ichaain neeichene coitucuhin, rauhijiriin suujuelanaala been Cana Coaunera bajaauche. Bajaaichenete inara coroatajanereein jeelai choaae jauheco-tojoeriin Cana Coaunera.

*Cunaain nejera coacuhin niha cachane*

<sup>11-12</sup> Canejeraauru jiaonriha cunaain ita coacuhin, ita janoriteein neeichene. Chunei Cana Coaunera coreniha rai nejera inauhene nejerateein nenaate Cana Coaunera rai baaso ichareein. Inasiina Cana Coaunera colaihaje tacaain nejelaauru ichao coaraain, “Acate naajoaain ichoae,” naain coulurujuera rijitiin ereriquiche. Leinjiiin Cana Coaunerate laen, chatohaneein baaso ichaain, caohacha ichaain, naaonjoaain ichaonacaauru coaraain, nii que, “Acaauru acaaurute, naajoaain jataaen baaso ichaechajeein ichaaoe,” Jana, “Acaauru acaaurute laen caohachaain suujua coaraain caohachaain ichaaoe,” naain cache ichao coitucuhin que erenaa naine. Aitoha quiricha cuhane Cana Coaunerane tonorae lanaala, leechaauru ichao coaraain coulurujuera rijitiin ereeichenete, chatohaneein inara itajeein, chatohaneein inara tenaa nainereein Cana Coaunera. Aca techu chaen naine, jianacoo baasoneein neeichene caje inara mitaane.

*“Naaojanrichaain eresi,” naain coitucueniha cachane*

<sup>13</sup> Tabaaaurute, “Naaojain neseuna cureeunni, cuu amihanenaa que necoreteein coriqui taojiaa,” naaure. Caohachaai nitohaneein coauquichene. <sup>14</sup> Niheichu, “Naaojanrichaain eresi,” naain coitucuheiche. Inoaclu netojoein inoo tejian ichaoriquicheine coitucuhiche. Tana janoneecha mituhin nii baiha nitajiha suruaa neojoaine rijicha inara



ichaone coitucuhichene. <sup>15</sup> Raujiaaincha caohachaa in coaau-  
 cuche. “Cana Coaunera jerihanena ichaaojoihanune caa  
 ichaain, leeocho ichaain, naaojoanreeunni,” naaucho. <sup>16</sup> Nii  
 inatiinte chaelai nihane coasitaain ereeiche. Caohachaa  
 niritiin irihacane. <sup>17</sup> Cana Coaunera jerenohi coitucuhacache  
 natiin, nii canaacha coitucuhi caohachaa in ichaenihacache  
 nete osa tabai que nesarurihacachein.

## 5

*Caseteco coaracuurrichaa in cairichaihuru cairichaaur-  
 era coriquihonaaurune*

<sup>1</sup> Aonacuche satiin coriquihona neein nenacaauru, nii  
 que caohachaa in casiin neeichene coina. Tabai inaderanaa  
 caaunte chanaa curiquicheein, ecu tihane bana necairichaa  
 curiquicheeina jaun. Satiin nii inara coriqui aina caohacha  
 nainejeein nitajeeichene coina, tururichaa in Cana Coaunera-  
 ana jaun. <sup>2</sup> Inara coriquihona neeichenete arajiin coriqui  
 jaohiche, leinjiin inaraacha latei corenihacha. Nihei chaque  
 nelaterinaa in nii inaraacha sirii rucuhele. Nii inaraacha  
 rucujuei rucuhele nacodohaqui, nii inara coriqui, inara ca-  
 jione, inara lenone nacodohaqui, nechu inacojoein nelateri-  
 nain, cororoneein setuhin naaojoanrichaa ine jaun, chaen  
 quirichaa in cojoanone jaun. <sup>3</sup> Coriqui niha natiinte, cao-  
 hatiin rucuhequichene niha natiin nitajiha cureein.

Inae saa cana janonaane banate satiin baaso icharaauru  
 itajeratereein usi tabai que Cana Coaunera. Nii banate, nii  
 nacododojoanei acaauruhacha rucujuei rucuhele, chabana  
 latein neeuruha cairichaineen nenacaaurune, acauru  
 coroatajanein, naaojoaunrenihane coaraane jaun, nii  
 coreniha coriquihonaneen nenacaauru casetecareein Cana  
 Coaunera. <sup>4</sup> Nitohaneen cairichaihuru cairichaauruha  
 acauru amihaneeo corete lanaalanete rautaene jataain  
 Cana Coaunera. Cana Coaunerate jana, nii cairichaihuru  
 cachaauru cairichaaeriin neeuruha coriquihona neein  
 nenacaaurune coaraje. Nihei chaen aohana jerecuruhi  
 rai namihaneeon coreniha aitucuruha cachaaurune. Cana  
 Coaunerate laen aitocuruha cairichaihurune aonaje.

<sup>5</sup> Satonoote raotojoein caa chauratane que ichaohiche,  
 itolere inaraacha latei que nerujueleetein, nete inae nii  
 coreniha inara que, nii core coaratiha cureein Cana  
 Coaunera inae cuutihane bana. <sup>6</sup> Joaereein lera colane  
 cairichai cha coitucuruhi cachaauru sohin jaohin  
 naaojoaaiche, inara rijijieein neeurinaauruhane jaan que  
 airijiin. Nii corenihate inara casetecaain, jataain inoaelu  
 netojoein inara cairichareein Cana Coaunera.

*Cana Coaunera bajajeein raotojoein cohacuruhine Cana Coaunera coitucuurera*

<sup>7</sup> Nitohaneein cuu tihane bana nii core coaraterichaain Cana Coaunerane jaun coa nererojoecaache. Nii inara cairichaaurera aina abaantaain, turuha Cana Coaunerane reeintiaain cohacuche. Charijijieein teeinti, nocoanajaauruhane, temule jaauruhane, omarohin nihane cohajeeure, inacaain, tainacaa que turuhane taihuruhane coina. <sup>8</sup> Nii rijijieein turuha Cana Coaunerane reeintiaain cohacuche. Jiaonriha Cana Coaunera ere tonorana jianiquichene. Atiin cohacuche, inae carajarinaain turuha caa cana rai chau-ratane que Cana Curuaanaa Jesocurisitone. Nii coreniha atiin inara suujua laraajiaain, Cana Coaunera ere tonoraain sacuuche. <sup>9</sup> Canejeraauru jiaonriha ita que inara suujua rohecaain ita que nejerateein neeichene. Nitohaneein neeichenete inara casetecaeratereein nii rucueraaunu que nena, nii turuha uhenenu Cana Coaunera.

<sup>10</sup> Chatohaneein necairichaaichene niha natiin, charijieein teeinti aichejetecurelu *profetacuru*, nii rijijieein neeuche. Inoaelu aitiin acauru letohaa Cana Coaunerana jaan que, cachaauru rai ereerejeein beebejeeure, jataain necairichaauruhane niha natiin. Nii necairichanaa abaantaain, nihei Cana Coaunera ere beebejeeuruhane jianelanaala, nii aihuruhalune rijijieein nihacachenete caohachae. <sup>11</sup> Acaaurute jataain caohatiin neeurelu Cana Coaunera aina. Coaraauna chuhinti, nii inara netonai coitucuhichene tocohaneein jetao, tabai inaderanaa que situhin nihalu Joobe ne. Nii baiha caohacha icharichaaain rai Cana Coaunerane esenetaana jaunte, nitohaneein jeelai amuritoheriin coroatajaniha Cana Coaunerana jaun, enacoauneein calaojoiin, cacunuquuin, baca siriin, caohatiin raoti ichaonaa que ichaohin nelu Joobe. Aiha Jobene rijijieein necairichanaa abaantaain, inara coroatajanerihani Cana Coaunerane coitucuhin esenetaain neeuche.

<sup>12</sup> Caohachaaain aonacuchena inara rai aite. Baasoneein ichaonaa corihaaichena jaunte joaenreein, "Cana Coauneraate coaraje. Acate esinae aitocooaunne coitucue," naain esinae rijitiin nohaneeiche. Coa niritiin nohanihache inara casetecaa Cana Coaunerane coataa. "Icharichaaunni," naain chaelai que ereeichene ichacuche. Jana, "Coatiha icharichaaunni," naaichene coa ichacache. Jiaonrihachu chaen, "Cana Coauneraate coaraje," naain nohanenaa coaauquichene, nabana inara casetecaa Cana Coaunerane coataa.

<sup>13</sup> Chatohaneein necairichajeein niha chuneine, Cana Coaunera bajaaine. Jana chunei inae raotojoein nihane, rachoojoein Cana Coaunera coroejeein nenatemiin.

14 Chatohaneein cunaitiha chuneine, Cana Coaunera coitucuurera ichauhenaauru cotihacuchete, erene que rujuaain rai Cana Coaunera bajaauruhinete, nii cunaitenaa rautaaine Cana Coaunera. 15 Esinae rauhijiriin, nii cunaitenaa rautarichaaain Cana Coaunerane esenetaain bajaauruha nete, nerautareein nii cunaitenaa. Aihute, chaen chatohaneein osa que nesaruhin nihane niha natiin, atiin que suujua acatena nainemiin Cana Coaunera. 16 Nitohanihane jaun, chatohaneein baaso ichaaain osa que nesaruhin neeichene suujue lanaala ita rai beein, ita rai Cana Coaunera bajaauche jiniiquiin. Nii banate, chatohaneein baaso ichaaain osa que nesaruhin naajoaain neeichene niha natiin, atiin inara que suujua acatena nainereein Cana Coaunera. Caohachaaain nere tonoraera caohachanejein cacha bajaa nete tonorae Cana Coaunera.

17 Coaraauna chuhinti Cana Coaunera ere bera inoaesii Irihasi. Cana rijijieein cacha neein niha natiin jetaote, uheniha elone coina Cana Coaunera bajaane jana, nichata jaanaca cataaun tiaajoaain uhene elo aansijieeinijin. 18 Nii baiha coaiten Cana Coaunera bajaa Irihasine jana jetaote, elo letoae Cana Coaunera, atane setejaane enacooauneein omarona nainiha temulene coina.

19-20 Aonacuche, saatono neeina inara rai aitoreeunni. Chunei baaso ichaaechejeein ichaoha Cana Coaunera baiteein inete, ohane bana cuhanete nereein necairichana jaun, cuu nitajihane coina. Nihei nitohaneein chunei casetecana jeriheii Cana Coaunera niqui. Esinae Cana Coaunera esenetaera neein nena tocohaneein, nii Cana Coaunera esenetaauruhi rai ereein relaacachenete jere Cana Coaunera, Cana Curuaanaa Jesocurisito naajoaain, acauru netonai Cana Coaunera esenetaain nere tonoraaauruhane nii baaso neein neeuruhane caje roconajaain ranajaa Cana Coaunerane coina. Chaen techu tabaauru Cana Coaunera coitucuurera, inae nere baiteein baaso ichacure. Nabana caseteco coaraa nii Cana Coaunera baiterane coataa, caohachaaain aina ereein coroatajanecuchete nacoauneein Cana Coaunera ere esenetaain tonoramiin. Nitohaneein osa que nesaruha namute cachane jana, Cana Coaunera rai caohacha que namute cacha suujua raujiaain nenaate, osa que namuritohane niha natiin que suujua acatereein Cana Coaunera.

## Fedoroacha letoi leinjiin

### *Inara coaaucaun.*

<sup>1-2</sup> Canuna Jesocurisito letono afosoto Fedoro neeun. Inae jauriaalu caje coauneen coausihalu cana Inaca Cana Coaunerane rijjijeein nii niicha ranojoinequichene, Ponto, Galasia, Capadosia, Asia, Bitinia, naaonjoainuri batane que cuhin inara atane udaa riaaneen neinequichene raine caa quiricha laenaain letoaaun. Nitohaneen rai cachaneen naitoonjoan tonoraain neeichene coinete, jelai tein rai Suujue que inara suujue tein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoein neeichene coina.

### *Itolere bana canaacha cohajei ichaonaa*

<sup>3</sup> Cairichaojoaain cana coaraain, cana coreniha ohane baiha caje ichanaa Jesocurisitone aina cuaain, nacoauneen ena nejanoaain nena rijjijeein nena jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunerate itolere bana canaacha cohajei ichaonaaanaja tereen cana rai. <sup>4</sup> Chaen techu aca inara que banihatteen dedeeu Cana Coauneraacha rucujuei- nii ichaonaa caohacha inaraacha cohajei tereen. Nii inara rai niicha teeni nii chatohaneen nitajenaa nainerinaain. <sup>5</sup> Nitohaneen esinae rauhijiriin inara ichoteraterichaaain Cana Coaunerane esentaain neeichene jaunte, niicha ichana nainei ichaain inara beraicheen, jianacoon neen nii inara ichoteraterichaaaine jaan que turuhichene, inara que banihatteen niicha rucujuei coitucueratiha inae ecu tihane bana inara quene coina.

<sup>6</sup> Nitohaneen neriquicheeine jaunte, raotojoein rachoojoein neeiche ena, itolere que coujunojoneen cairichanojoneen neeichene nihanatiin. <sup>7</sup> Charijjijeein teeinti usihanau oro tein mocoore caje mituha baasone coina, nii rijjijeeinte inara netonai coujunojoneen neriquicheen. Inae nitohaneen coujunojoneen coanojonequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajiin neeichenete, nii jataain coreti- nitaje rai nena oro amurijiriin nelateineen neriquicheen. Nitohaneen coujunojoneen neeichene abaantaain laraajiin neeichenete, coroaenojoneen neriquicheen inae turuha cana Curuaanaa Jesocurisitone bana.

<sup>8</sup>Coatiha niqui charijibana Jesocurisito coaraain niheeiche inara. Nete coara rijitoojoein jataain belaa'in coroojoein rachoojoein neeiche. Chaen techu, "Naaonjoaan," naain inara ere nejesinaacha que benaa nainiheeiche, jataain necaohachanaa nihane jaun. <sup>9</sup>Nitohane'in inae ichoteratenoojoe'in niha inara suujuene jaunte, raotojoe'in rachoojoe'in neeiche. Nitohane'in neeichene coinate Jesocurisito esenetaain neeiche.

<sup>10</sup>Nitohanihane coinate inoaenlu caje coaune'in jianacoon cana ichoteraanu que cuaain caohachaain coitucuuruhane coina que nerelaain, cairichaa'ooaain cana coaraain ichoteratenoojoi nichaachene jaanu terichaa'in cana rai Cana Coaunerane beebejerejetecurelu *profetacuru*. <sup>11</sup>Nitohane'einte inae jauriaalu caje coaune'in *profetacuru* que coitucueratelu Jesocurisito Suujue, ateinaauruhane baiha nacoaaune'in ichanaain rai caohacha icharaanu que tiha Cana Coaunerane coitucueratelu. Nii jaunte niqui: "Charijicha nii aiche'in. Chatohanai banacha aiche'in," naain niqui coitucunaa jerecure, acaauru que coitucueratiha Cana Coaunera Suujuene jaun. <sup>12</sup>Nete acaauru raine'in nenerihani nii Cana Coauneraacha beratenoojoi- inara rai caohachane'in neeninu coitucueratelu acaauru que Cana Coaunera. Nii jaunte nii ichoteratenoojoe'in neeichene jaan, inae inara que coitucuerateure nii Ena Nena Cana Coaunera Ere beracuru dede caje letonone'in nena Cana Coaunera Suujue aina cuaain. Niite niqui jataain caohatiin coaraain coitucunaa jerecurelu Cana Coaunera letono anjeraauru netonai.

*Esinae rauhijiriin aca jerihane rijijie'in ichaonaa coinate cana cotijiaain ne Cana Coaunera.*

<sup>13</sup>Nitohanihane jaun jatoraain niicha que coacuhin coujurihu inara suujua coaraain, nacoaune'in turuha uha Jesocurisitone jana inara rai Cana Coauneraacha tenaa jereiicha que jaequuin neeuche. <sup>14</sup>Coujuriu Cana Coaunera calaohine'in nena tocohane'in naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijie'in ichaohichelune rijijie'in ichaohichene. <sup>15</sup>Nitohane'in ichoaelanaala, Cana Coauneraacha que banijiaa'ine'in saantone'in ichaaoche, nii inara cotihara acaihanejei Cana Coauneraacha Saantone'in nihane jaun. <sup>16</sup>Nitohanihane jaunte rai Quiricha inoaensi cuhane: "Acaihanejei inara Coaunera'ne'in Saantone'in nihanune jaun, canu que banijia'ine'in saantone'in leinjiin canuhacha cachane'in ichaaoche," nae Cana Coaunera.

17 “Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuherraneein nihane coitucuhin esenetaain ichaohichene coarateein ichaaoche, jaiti cau chauratane que ichaonaa que neein.

18 Inara foerateracuru ichao rijijieein nii chaque nelatelanaala nitaje rai nenea ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nenea oro, coriqui, naaonjoain que coretenohineniha nii inara ichaone raotojoeein coitucuhiche.

19 Nitohaneeinte caohatiin chaeloon baasoneerilanaala nenea carenero narejeen sohin acaauru osa coreniha coichana terejetocuruhalu cana inoaensihurune rijijieein, nii chaeloon osaojoejelanaala nenea Jesocurisito sohin, coichana jataain necaohachaain nenea que coretenojoineein ne nii inara ichao.

20 Inae nitohaneein cana coreniha orichaaine cointate jaiti necoanaeniha cana rai chauratanene ajiniha caje coauneein nesilu Cana Curuaanaa Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu.

21 Jesocurisito aina cuaainte, nii oo caje ichateein rai caohacha icharaanu teraneein nenea Cana Coaunera coitucuhin esenetaain neeiche. Nitohaneein inara coroatajaneraneein niha Cana Coaunerane jaunte, leinjiin acaacha cohajeein que jaaequiin neeiche.

22 Inae nitohaneein Cana Coaunera beratenojoi esenetaain tonoraain neeichene jaunte, inae couluunojoeineein ne inara suujue, jataain inara suujua aina cutaain jiniiquiin Jesocurisito ranojoeineein nenacaauru canejeraauru aina ita belaaain neeichene coina. Nitohaneein le cacha nequichene atiin ita acatiha tacaain, inara suujua aina cutaain ita belaaain neeuche, nii baaso coacuelanaala.

23 Enate nacoauneein nejanoaain nenea rijijieein neeiche. Coatiha cacha onaa inaeraneein nenea jaberoco caje nii nejanoaheeiche. Cana Coaunera Ere chabana nitajenaa charaneejin satonoelanaala nenea aina cuaainte nii nacoauneein nejanoaaiche.

24 Nitohanihane cointate: “Satiin cachate nejanoaain fojoein ichauchenaneein inae biinaanihane ohe.

25 Nete laen Cana Coaunera ere nii charijibana satonoe-lanaala nereein,” naain laenanohineein ne Cana Coaunera Quiricha cuhane. Nii inara rai beratenojoeineein nenea Er-ena esenetaaichene jaunte, inae ichoteratenojoeineein neeiche.

## 2

1 Inae nitohaneein ichoteratenojoeineein neeichene coina,

inara rai beratenojoin Erenaa esenetaaichene jaun, jauri-aalu baasoneein ichaohin inara amute cacha cairichaa nohaneein, necoelajauharitiin, inara amute cacha cotaairiichene nihanatiin belaicha rijitjoeein rai ereein neeichene coara-teein neeichene jianein neeuche. <sup>2</sup> Aiha ena nejanoanaa canaanai ujuari, itaariicha que coacuhine rijijieein, Cana Coauneraacha jerei que coacuhin, aca jerihane rijijieein ichaohin, inara suujua ilaauhete ichoteratenojoneein neeiche. <sup>3</sup> Nitohaneeinte neriquicheein, esinae rauhijiriin caohacha teraneein niha Cana Coaunerane coitucuhin esenetaain neeichene.

*Ajeri neloheriteeuruhane jaan rijiicha Curisitone que cuaain acaauru relaa Fedorone.*

<sup>4</sup> Nii Cana Coaunera rai ajeri ichaohin nena Jesocurisito, nii chaque nelatihei rijijieein jaolecohin neuruhalu Isaraelitaacurune jaancha que coacuhin raaicha nelateein neeuche. Nitohanein nelatihei rijijieein coaracuruhane sainejeeinte, ajeri ichaohin jataain itolere que nelatineein janijiin Cana Coauneraacha tenojoneein nena ne. <sup>5</sup> Nirijieein techu esinae rauhijiriin aca jerihane rijijieein ichaohichene- ajeri ichaohin nena caje Cana Coaunera lorerineein ichanohin Teenforo rijijieein rai saseredote esine neein Cana Coauneraacha jerei ichajeein saantoneein neriquicheein. Nete inoaenlu aichejetocuruha saseredotecurune rijijieein, carenerocuru sohin coichana teraneein nenereicheein. Inarate Jesocurisito aina cuaain Cana Coauneraacha jereineein, rai cachaauru suujuateraneein neriquicheein. <sup>6</sup> Nitohanerichaaaine quete: “Sioon neseeune, ajeri jataain nelateinnein nena quiicha janijii teun.

Aihana jaun esinae rauhijiriin caohachaniha nii ajeri quiicha teine coitucuhin esenetaain nena que chabana jaolecorinaauni,” naain laenanohineein ne Cana Coaunera Quiricha cuhane.

<sup>7</sup> Cana, esenetaera nichaachene rai nii Cana Coauneraacha tei ajerite jataain nelatineein ne. Nete Cana Coaunera Quiricha cuhane laen nii esenetaelanaala nenacaauru que: “Jaolecooruha loreri icharaaurune jaan ajerite, loreri nunuheneein temuraneein nerotoha cureein.

<sup>8</sup> Acate leinjiin ajeri jaberoconein lacurocuruhane jaaneein nereein,” naain laenanohi nihane rijijieeinte, inae lacurocure, nitohaneeuruhane coina inae ichanohineein neuruhane jaun.

<sup>9</sup> Nete inara le lauriineeichene, Cana Curuaanaa rai saseredotenein niicha janijineein, Cana Coauneraacha jereineein

rai cachaneein neeiche. Nitohaneeinte inara raain nelu Cana Coaunera, jataain rai caohachaneein nena niicha be-ratei beeiche leeochoaauru raine coina. Acate nocohenaanau nena rijijieein neeichene jana, inara cotijiaain nelu, rai caohachaneein nena Cojoanonaa que neeichene coina. <sup>10</sup> Jauriaalu niqui cairichaojoaain inara coaraain niheilul Cana Coaunera, rai cachaneein neneeichene jaun. Nete inae enene rai cachaneein neeichene jaun, inae cairichaojoaain inara coarae Cana Coaunera.

*Cana Coauneraacha icharatei ichajeein ichaaoche*

<sup>11</sup> Canejeraauru, atiin inara suujua coaraain, inae nejelau cachanequichene ichao que ichaaoche, nabana nitajiha inara suujuene coataa. <sup>12</sup> Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coarateein neeuche. Nitohaneein ichaohichenete, baaso ichara niha inara beeuruhane nihanatiin caohacha ichaquichene coaraain Cana Coaunera coroaecurureein, inae le cachaniquichene caje inaraacha ichanohi rucuhecane cojoanonaa que turuhane bana.

<sup>13</sup> Inae Cana Coaunera cachaneein neeichene jaun, satiin inara amute cachaauru- cocoinanacainein nenacaauru ere tonoraain neeuche. Chaen leeochoaauru cocoinanacaihuru amuritoheriin cocoinanacainein nena enferadoro ere tonoraain neeuche. <sup>14</sup> Nii rijijieeinchu nii rai letonocuru- baaso icharaauru casetecaain caohacha ichaeraauru coroaeranein nenacaauru ere tonoraain neeuche. <sup>15</sup> Nitohaneein neeichenete jere Cana Coaunera, nabana tonaain ereeuruha inara que caohacha ichaera cacha nocoeje chanuheriin ichaonacaauru aina cha coitucuhichuru cachaaurune coataa.

<sup>16</sup> Inaraacha jerei ichana nainequiche niqui. Nete laen nii inaraacha ichai aina cuaain naineneeiche leeochoaauru rai baaso ichaquichene. Aihana jaun coujuriu Cana Coaunera cachaneein caohacha ichaain neeuche. <sup>17</sup> Satiin que inara suujua acateein jiniiquiin ita belaaain- jeriha Cana Coauneraane rijijieein neein- enferadoro que inara suujua acateein neeuche.

*Cana relaeranu que necairichaaain nihalu Curisitone*

<sup>18</sup> Nitohanihane jaun rai fatoroon ere tonoraain aca jerihane rijijieein neeine letononeein nena. Jiaonriha caohachaaain belaaain aca jerihane rijijieein siriha fatoroone jauhancha nere tonoraain nihane. Nechu aansainein cotaitiin niha fatoroone nihanatiin nere tonoraain neeine. <sup>19</sup> Jeriha Cana Coauneraane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiin, jianelanaala



abaantaacachenete jataain caohate. <sup>20</sup> Jana esinae rauhijiriin baaso ichaquichene coreniha inara casetecaain neeuruhane abaantaain neeichene, coatiha caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaachene Cana Coaunera notaracaae caohacha ichaa airiquicheein. <sup>21</sup> Nitohaneein neeichene coinete, inara cotijiaain nelu Cana Coaunera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche. <sup>22</sup> Coatiha niqui aansijieeiniji osa que nesaruhin nihei chuni coritaain niheil Curisito. <sup>23</sup> Niheichu nocoejehanuuruhane nihanatiin coatiha acauru nocoejehanuhin nerejetohilu. Niheichu cairichaaauruhane nihanatiin tonaain ereein nerejetohilu. Cana Coaunera esinae rauhijiriin baaso icharaauru coitucuhin nii rucuhacane coinaachate aitoraaetelu. <sup>24</sup> Nii Curisitote jaberoco aina cuaain cana osa amaain coroso que ohin aina jiniiquiin cana osa atinaelu, aina cuaain ichaonaa esine que ichaohin osa colane nena coina. Nitohaneeinte cana osaacha que nesarujeein nihacachene caje cana mitaeranu que coroso que ohelu Curisito. <sup>25</sup> Jaurihaalute niqui aiha beraicha colane nena carenerone rijijieein nitajenaa neein nerejetocoaachelu. Nete laen inae ena carenerocuru beraicha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichaohiche.

### 3

#### *Naaonjoaai ichaauruhine sinijeraaonacaauru.*

<sup>1</sup> Aihana jaun inara lanaauru ere tonoraain neeuche enecuru. Aihute inara ichao cajecha coaraain, acauru rai erenaa latelanaala, nii Cana Coaunera beratenojoin erenaa coitucuhin esenetaain neeuruhine esenetana jerelanaala nenacaauru inara lanaauru, <sup>2</sup> esinae rauhijiriin caohachaain neein, nii baaso ichaelanaala inara suujua acateein ichaohichene coaracuruhane. <sup>3</sup> Esinae rauhijiriin caohachaain nena jeriquichene, nii nitajenaa inaurera rucuhale oro caje ichanohichuru, cajione caohachaauru, naaonjoainuri que coacuelanaala, <sup>4</sup> inara suujua aina cutaain esinae rauhijiriin Jesocurisito suujue que coacuhin neeuchete raotojoein neeiche. Caohachaain Cana Coaunera notaracaae nihacanete jataain nelate. <sup>5</sup> Nii rijijieein techu nerejetocure cana inoensihuru benecuru- jeriha Cana Coaunerane rijijieein ichaonacaauru. Nitohaneein jeriha Cana Coaunerane esenetaauruhane jaunte, jeriha acauru lanaaurune riji-

jieein acaauru ere tonoraain neeurelu nii acaauru benecuru.  
<sup>6</sup> Nitohanihane jaun techu: “Canu curuaanaa,” narejete lana Abaraaun rai Sara, nere tonoraain aca jerihane rijijieein nihane jaun. Nii aihalu Sarane rijijieein casilanaala coeje-lanaala neeichenete, rauhijiriin coujuriu nii Abaraaun aina Sara nefoerateneein nenea rijijieein neriquicheein.

<sup>7</sup> Jana inara acaauru lananequichene, jeriha inara sinijeraaurune rijijieein jiniiquin ita suujua rijijieein neeuche. Coa ene neeuruhane amihaneon amurijiriin, inara sinijeraauruhacha ichanenu teein nihache. Inara rijijieein acaauru caohachane quete, nitohaneein acaauru rai ichaonaa teein nelu Cana Coaunera. Aineeichenete Cana Coaunera bajaain neeichene, inara ere tonoraenereein Cana Coaunera.

*Satiin Cana Coaunera ranojineein nenacaauruhacha ichanenu*

<sup>8</sup> Aihana jaun ita suujua rijijieein neein ita janojera rijijieein ita belaaain, leeochoauru coroatajaneein, nii leeochoauru amurijiriin nenea coacuelanaala neeuche.

<sup>9</sup> Jiaonriha tonaain baasoneein inara que ereein neinihane, nii tonaain que baasoneein ereeichene. Niheichu inara nocoeje chanuheranihane, coa inara netonai nocoeje chanuhache. Nitohanenaa coacuelanaala acaauru rai caohacha ichacuche. Nitohaneein inara rai caohacha ichaane coina inara raain nihalu Cana Coaunerane rijijieein.

<sup>10</sup> Nii coinate:

“Chunocoha nichao colalajiin  
 raoti ichaonaa que ichaonaa jerihane,  
 namute cacha que baasoneein erelanaala,  
 nii casajenelanaala,

<sup>11</sup> baasoneein ichaonacaauru aina nelanaala,  
 caohachaacha ichaain  
 raotojoeein ichaohane jaanuhacha ariin  
 acaacha sacuhine.

<sup>12</sup> Cana Coaunerate

caohachaain suujua coaraain ichaonacaauru beraichaneein  
 nihane jaun,

bajaauruhane aonaain ne.

Nete laen baaso ichajeein ichaonacaauru que  
 jaoleconaa rijijieein ne,”

naa Cana Coaunera Quiricha inoaensi cuhane.

<sup>13</sup> Nitohaneein itolere bana caohacha nejesinaacha que coacuhin neeichene, nerihei inara rai baaso ichara.

<sup>14</sup> Nete laen caohacha ichaquichene coreniha necairichanaa coaraquichene nihanatiin rachoojoeein nerausiajejeein neriquicheein. Jiaonriha nii chuni que casiin nesooneein neeichene.

<sup>15</sup> Nesoonenaa coacuelanaala raujiaaincha inara suujua cuhane Cana Curuaanaa Jesocurisito

coacuhin bajaebajaecuche. Chaen letona jatoroain neeuche chunocoha inara caje, “Chatohanihana nii jaecoichene jaan,” naain bajaa inara cajene, raotojoein belaaïn beeuchete coitucuhin neeine. <sup>16</sup> Nete acaauru amurijiriin nena coacuelanaala, acaauru que inara suujua acatein acaauru rai beeichene caohachae. Nitohanein coujuriu Jesocurisito esenetaeranein caohacha nejesina ichaain neeuchete nocoejecurumiin inara que baasonein erenacaauru.

<sup>17</sup> Baaso ichacaachene coreniha necairichanaa coaracaachene amuritoeriinteja nenacaanein caohachae caohacha ichacaachene coreniha necairichanaa coaracaachene, nitohaneï jeriha Cana Coaunerane jaun. <sup>18</sup> Nii rijiein techu Jesocurisito netonai lesajeeincha cana osa coreniha cairichanojoein ohin nelu. Coatihä niqui nii chatohanai baaso ichaain osa que nesaruhin niheilu aca, nete erenaa tonoraëlanaala baasonein ichaonacaauru coreniha necairichaan nelu, rai Inaca Cana Coaunera rene cana amaane coina. Joaenreein cacha rijijieinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoein ichaohin ne. <sup>19-20</sup> Nitohaneinte suujue nejesinanein cuhin, acau tabai itajenojoein moconajaera casetecanohinein nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunerane sainejeïn, esenetaaurenihane jaun nitajeurelu. Acaauru tabaauru esenetaeraauruhachate, itolereinein fosanejeïn acau tabai caje nichoteurelu. <sup>21-22</sup> Nii acaute cana osa jianeïn ichaohacachene coina baotisanojoinichaane jaa cojunacaneïn nenaanelu. Nii aina cuaainte, inae ichoteratenojoeïn nihacache cana netonai. Coatihä raujiaain culuonojoiniha cana jaberocone coina baotisanojoi nihaacache. Acate raujiaain cana jaberoco coulucuhin, oo caje ichanaai dedeeu cuhin Cana Coaunera raotono nichajai que neïn, itolere anjeraauru amurijiriin, cocoinanacaihuru amurijiriin nihane coina nena Jesocurisito aina cuaain, aina nena coina cana suujue coulooca Cana Coaunerane jaan neïn ne.

## 4

*Canä Coaunera tenojoi inaraacha ichana nainei que leeochoauru coroatajanecuche.*

<sup>1</sup> Aihane jaun cana coreniha jaberoco cairichaan nihalu Curisitone rijijieïn, inara netonai necairichanaa coaraquichene coina jatoraaïn neeuche. <sup>2</sup> Suujua letono rijijieïn ichaohane jianeïn Cana Coaunera jerenohicha ichaane coreniha necairichanaa coaraain neite osa caje

nichotereein. <sup>3</sup> Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneechene jaunte, jataain baasoneein ichaohin, inara suujua coaraelanaala necha ansaineein nerejetocoichelu, jianelanaala cocohin, tonijiaain ichaain ajenacaauru aina niha natiin neein, nii ichanohichuru ecaantooruniha natiin coroajeein, naaonjoaain nerejetocoichelu. <sup>4</sup> Nete laen inae enene, chabana jianelanaala baaso ichaain nenacaauru aina ichaorejetocoichene jianequichene jaun, inae inara coaracureniha acaauru aina nejaun inara cojoelatiin inae baasoneein inara que ereeure. <sup>5</sup> Nete inae ecu tihane bana onacaauru, ichaohin nenacaauru, naaonjoainuriicha ichai coitucuhin nii rucuheraanu que nena cojoanona que tihane bana, raajenhane niicha ichai biha cuurureein. <sup>6</sup> Nii onacaauru raite Cana Coaunera ere berejetecurelu, ohin neeuruhane nihanatiin aitoha Cana Coaunerane rijijieein suujue nejesinaneein ichaohin neeuruhane coina. Jerichanejeein techu niqui, aitocuruha cachaaaurune rijijieein caohacharelu jaiti jaberoconein neeuruhane bana rucuhenhinihalu niine.

<sup>7</sup> Inae satonoha itolerene que tururichaje. Aihane jaun inara que Cana Coaunera icharatenohin ichajeein Cana Coaunera bajaee bajajeein ichaaoche. <sup>8</sup> Itolereneein inara suujua aina cutaain jiniiquiin ita belaaichaaiche. Jataain ita belaaichaaicha cachanete arajii rai nosa que suujua acatereein Cana Coaunera. <sup>9</sup> Inara rene turuhin niha chunine tonaain leeochoaauru que erena coacuelanaala inara loreri asaae raauche. <sup>10</sup> Coujuriu lauri lauri inara que Cana Coauneraacha icharatenohi icharaneein nena tocuhanein, ichana nanequichene rijijieein inara rai Cana Coauneraacha tenojoi aina cuaain leeochoaauru coroatajanecuche. <sup>11</sup> Chunocoha tonaain erena jerihane jaa que irihane, jeriha Cana Coaunerane rijijieein ereein neeine. Chunocoha coroatajanera latihane, ii rai Cana Coauneraacha tei que laraajiin coroatajaneeu. Itolere iicha ichai ichaaine, itolere bana caohachaain ichaaute ii coroatajaniha Cana Coaunera aina Jesocurisitone coaraain coroaecuruhine cachaaauru. Acate rai necaohacha que necaohachaain itolere ichana naineranein ne-chariji bana satonoelanaala. Nitohane-miin.

*Coujuriu Jesocurisito ranojoneein nena tocuhanein necairichanaa abaantaache.*

<sup>12</sup> Canejeraauru, jiaonriha mainajeein coujunojoneein neriquicheeine que jatoroaelanaala neeichene. <sup>13</sup> Raujiaaincha aihalu Curisitone rijijieein necairichanaa

coaraain neeichene nihanatiin rachoojoein neeuche- inae turuha necaohachane bana rachoojoein neriquicheeine jaun. <sup>14</sup> Curisito cachaneein neeichene coreniha inara batohin nei nihanete, nerausiaaequiche jataain caohachaaain nena Cana Coanera Suujue inara aina nihane jaun. <sup>15</sup> Nitohanihane jaun necoejemiin, sonajaain jaohin, asijiaotoneein, leeochoaauru rai cotainacai ichaain, naaonjoain ichaane coreniha cairichanojoein nena. <sup>16</sup> Jana Jesocurisito cachaneein neeichene coreniha inara casetecaain neinihane, jiaonriha nocoejequichene. Raujiaaincha coreniha Cana Coanera bajaain corojeein neeuche.

<sup>17</sup> Inae cana rai cachanichaachene ichanohi rucuheca Cana Coaneranane cojoanonaa que turuha. Nitohaneein rai cachanichaachene que nunuhetein, nitohaneein icharichaaanne jaun, chatohaneeururichaaain Cana Coanera ere tonoraelanaala nenacaauru. <sup>18</sup> Coaracuche nachuhinti rai cacha nichaachene saijieein, necairichanaa coaraain nichoterichaacheeine. Nii jaun chatohaneeururichaaain chaainti, nechua aansaneein osaaonacaauru. <sup>19</sup> Nitohanihane jaun, Cana Coaneraacha jerei ichaquichene coreniha necairichanaa coaraain neeichene nihanatiin, itolere bana caohacha ichajeein ichaohin, naitoonjoa rijijieein cha ichaeranein nena Cana Coanera bijiu inara suujue teeuche.

## 5

### *Jesocurisito ranojoein nenacaauru suujuatera*

<sup>1</sup> Enane laen nii inara aina ita taojieraauru bichauhenaauru suujuatena jereeun. Canuhetonaine acaauru rijijieein ichauhenaneein cana coreniha necairichaalu Jesocurisitone beraneein neeun. Nii rijijieeinechu canuhetonai acaauru aina jiniiquiin Cana Coanera Cojoanonaa que nereeunni, inae ecu tihane bana. <sup>2</sup> Nii inara que Cana Coaneraacha beraichatenojoi, rai cachaneein nenacaauru beraihuhe. Nii coinete inara que beraichatenajae Cana Coanera. Caohachaaain inara suujua coaraain jeriha Cana Coaneranane rijijieein acaauru beraihuhe. Jiaonriha inara letoaera latein core coinaacha ichaquichene. Raujiaain jeriha Cana Coaneranane rijijieein corajeein ichacuche. <sup>3</sup> Acaauru curuaanaaneein nena coacuelanaala, raujiaain caohacha nejesina ichaain neeichene coarateeuche acaauru quete, acaauru netonai inara caje nerelaaurumii. <sup>4</sup> Nitohaneein neeichenete, inae turuha cana beraicha esinenei nenaane bana, inara que rai necaohacha que necaohachaaain nena- comai

lauriareein inara couturi que. Nii comai chariji bana setuhin naasaerinaain.

<sup>5</sup> Jana inara enamanaacuru, jerecuruha inara bichauhenaaurune rijijieein neeuche. Satiin ita suujua rijitjoeein ita amurijiriin nenea coacuelanaala nii:

“Cana Coaunerate,

itolere amurijiriin nenea jereraauru

lacuroaeraneein,

cairichanojoneein nenacaauru cairichaaajoaain coaraain

coroatajaneraneein ne,”

naain niha erenaane que ninae. <sup>6</sup> Aihane jaun Cana Coaunera bijihu neein, nii chaque nelatihei rijijieein neeuche. Acate inae ecu tihane bana jataain nelateineein neeichene coina ichareein. <sup>7</sup> Coa itolereecha que

coacuhin nererojoeaeriin nihache, itolereecha que inara berairichaaain Cana Coaunerane jaun.

<sup>8</sup> Aihana jaun caohachaaain jataain itolere que ninaain neeuche. Charijieein teinti jatoraain quihane rai netiin nesari ariirijie janolari, nii rijijieeinte jatoraain inara ariirijie moconajaera inara itajihane coina. <sup>9</sup> Charijieeinijin chatohanai que inara sarunaa jereranihane, jiaonriha rijitjoeeichene. Raujiaaincha nii inaraacha esenetai aina cuaain laraajiin, satiin chauratane sacuritaain nenacaauru cana nejeraauru netonai, nii jelai necairichanaa abaantaain neeuruhane coitucuhin abaantaain neeuche. <sup>10</sup> Nete inae carajaaajoaain necairichanaa abaantaain neeichene baiha, inara coroatajaniha Cana Coaunerane aina rauhijiriin baaso ichana coacuelanaala laraajiin acaacha esenetaain neriquicheein. Nii jeelai Cana Coaunerate, jataain cana belaitohane jaun, rai calaohi Jesocurisito aina cuaain cana cotijiaain cana raain nelu, rai Cojoanonaa que aina nenea coina. <sup>11</sup> Nitohaneein itolere ichana naineraneein neeine chaabana satonoelanaala. Nitohanemiin.

### *Satono tihane rai nocoiha Fedorone.*

<sup>12</sup> Casuujua rijijieein nenea cana nejera Siribano quene caa quiricha laenaerateeun inara rai-chaque tonaelanaala inara suujuatiha. Chaen jataain esinae rauhijiriin inara belaiha Cana Coaunerane jaun, coujunacaniha rausiaenojoneein neeichene jaanu tihane coitucuhichene coina. Aihane jaun jataain inara belaiha Cana Coaunerane jaun, aca jerihane rijijieein ichaaoche itolere bana.

<sup>13</sup> Janijiin inara raain nihalune rijijieein, Babiloniau janiijiin Cana Coaunera ranojoneein nenacaaurute inara coacue. Cacalabi rijijieein nenea- Maroco netonaite inara coacue.

<sup>14</sup> Ita rene turuhin neeichene, raotojoein jiniiquiin ita belain ita raain neeuche. Satiin Jesocurisito cachaneein neiniquichene raotojoein neeuche.

## Fedoroacha letoi coroataja

### *Acaauru coaucane biha Fedoro*

<sup>1</sup> Canuna Jesocurisito letononeein- rai afosotolo Simoon Fedoroneein. Cana Coanera, chaen nii cana ichoteraneein nena Jesocurisito, naonjoainuri chabana nohanelanaala cana rai caohacha jataain nelatei teraneein neeuruhane esenetaeranequiche canacaanu rijijieeine raine caa quiricha laenaun. <sup>2</sup> Nii Cana Coanera aina Cana Curuaanaa Jesocurisito coitucuhichene jaan aina cuaain, itolere inaraacha latei que inara rausiaemiin Cana Coanera, jeelai amuritoheriin raotojoein neeichene coina.

### *Jesocurisito ranojoi ichao*

<sup>3</sup> Cana Coanerate itolere niicha ichana nanei ichaain, cana ichao rai canaacha latei tein, leinjiin cana suujua coaraain nihacachene jaanu tein ne. Nitohaneeinte nii niicha ichana nanei ichaain, cana cotiharaneein nena coitucuerate cana que Cana Coanera. <sup>4</sup> Satiin nii cana rai niicha tei aina cuaainte, cana rai tihane coina naitoonjoa jataain itolere amurijiriin itolere que nelateein nena te Cana Coanera. Nii aina cuaain niicha tei ichaonaa que ichaohin, nii itolere bana baaso coacuhin nitajera niha cachane jaan jianeein ichaohichene coina. <sup>5</sup> Aihana jaun, jereniha inara suujuane nihanatiin, atiin jeelai amuritoheriin jeriha Cana Coanerane rijijieein esenetaain cha coitucuhereein neeichene coarateein, <sup>6</sup> inaraacha coitucui aina cuaain caohatiin coacuhin, baasoneein coaauquiche inara suujua cuhanene tonoraelanaala, nererojoecaelanaala neein, <sup>7</sup> inara belaiha Cana Coanerane rijijieein jiniiquiin ita belaaichene.

<sup>8</sup> Nitohanai ichaain ichaohichene, coatiha inacojoein nelatelanaala nerinaain inara ichao. Niheichu inacojoein Cana Curuaanaa Jesocurisito coitucuriheeicheein. <sup>9</sup> Nete laen, nitohanai ichaelanaala nena, leinjiin maosa rijijieein cha coaraelanaala nihane jaun, jauriaalu rai nosa caje couluonohinihane baiteein nihane jaun aicheein. <sup>10</sup> Canejeraauru, nitohanihane jaun, inae inara janijiin inara raain nihalu Cana Coanerane jaun, esenetaaichene ilaauche inara suujua cuhane. Nitohaneein neeichene coatiha chabana esenetaaichene jianeriheeicheein. <sup>11</sup> Chaen techu nitohaneein neeichene, cana Curuaanaa Jesocurisito Cojoanona chabana satonoelanaala nena bacuuju nejoracaane jana ranojoein neriquicheein.



<sup>12</sup> Nii jaunne, inae caohachaa inara relaauruhane jaan coitucuhin jeriha Cana Coaunerane rijijieein ichaohichene nihanatiin, itolere bana inara rai coaureeunni nabana baitequichene coataa. <sup>13</sup> Jaiti ichaaojihanune jaunte ne carai rauhi inara suujuateein nihanune coina. <sup>14</sup> Cana Curuaanaa Jesocurisitote, inae enanocoojoa orichaaunine coitucuerate canu que. <sup>15</sup> Nena atiin nainichaaunne jaanun tiaajeein inara coroatajanereunni, inae ohanune baiha satiin canuhacha ichai coacuhin neeichene coina.

*Itolere amurijiriin niicha ichana nainei ichaa Jesocurisitone*

<sup>16</sup> Nii niicha ichana nainei ichaa in, turuhalu Cana Curuaanaa Jesocurisitone que inara relaacaanune jaan, coatiha raujiaain nereretanaa neein nena nihei. Niheichu coatiha canacaanu suujua caje rocohin cojoeluinain nohaniha aitohacaanu. Canacaanu nota que itolere ichaa Cana Curuaanaa Jesocurisitone jana coaracaanune jaan quena aitocaaanu. <sup>17</sup> Coarajihacaanune jana techu, rai necaohacha tein jataain erenaa raotono que ereein rai Calaohi nihane cocoaainaa: “Caate jataain canuhacha belaaoneein, janijiin canuhacha tei cacalabine,” naain rai nii Calaohi cooainaelu Cana Coaunera. <sup>18</sup> Nitohaneene que banijiaain nena ichtane ucuunno neein, Cana Curuaanaa aina jiniiquiin neein, dedeeu neein rai iriha Cana Coaunerane jana aonacaanlu.

<sup>19</sup> Niite, esinae rauhijiriin berejetocuruha *profetacurune* coitucuhin esenetaain neeichene jaanu neein nena ne. Aihana jaun, caa canacaanuhacha beebejeite, leinjiin nocohanaanau jeraaen conohajeein conoha conone rijijieein inara conoera neein, janonaa rai mituhin conoha soaene rijijieein, inara suujua cuhane conaeraneein nereein, turuha rai cojoanonaane que tiaain. <sup>20</sup> Aihana jaun, esinae rauhijiriin berejetocuruha *profetacurune* esenetaaichenete ne. Nii jaun, satiin Cana Coaunera Quiricha cuhane laenanohineein nena, coatiha suujua caje rocohin aitocuruha *profetacurune* jaan nihei. <sup>21</sup> Aihana jaun, satiin *profetacuru* coatiha rai suujua caje rocohin aitoroetocuruhi, Cana Coaunera Suujue acaauru que coitucueratihane jaunte, acaauru que coitucueratihane rijijieein berejetocurelu.

## 2

*Nechu joaenreen nohaneein cacha relaauruhane.*

<sup>1</sup> Isaraelitaauru jana nihalu nohaneein cacha relaaurera *profetacurune* rijijieeinte, inara jana netonai neeurureein cacha coritaain cacha relaaureraauru. Acaaurute jerichanejeein inara relaa nocoetiin, inara que asinojoneein

nechu nohanein inara relaaureein suujua baaso caje rocohin. Nitohaneinte inara ichoteranein niha Jesocurisitone saijiein, acaacha esenetaaichene caohateranein neeurureein. Nitohaneeuruhane jaunte itajenojohi necurureein. <sup>2</sup> Arajiichurute nechu nichao aasaaeraanu que acaauru ichao baaso rijijiein ichaaoreein. Nii coaraante chabana satonohelanaala nena ichaonaanaja coero cuhane cana amaeranein niha Jesocurisitone saijiein que baasonein ereeururein cachaauru. <sup>3</sup> Nitohaneeuruhane jaunte, coriquiicha que coaucuruhane jaun inara cairichaaureein, inara coritaain inara relaaurehane coreniha. Nete inae inoanlu caje coaunein casetecanohinein neeuruhane coina, inae ichanohinein nihane jaun caseteco coaracuruhane rai neure. Nerihain nii caje acaauru ichotera.

<sup>4</sup> Cana Coaunera, osa que nesaruhin neuruha rai letonocuru aanjeraaurune jana, acaauru que suujua acatelanaala, usi tabai aina nocohena tabai jana *cadena* que ichohanohinein jaonajaelu, satiin coulurujuenoi niha cachaaurune cojoanona que turuhane reentiaain cuu neeuruhane coina. <sup>5</sup> Nii rijijiein techu satiin coitucuelanaala nenacaauru cachaauru que suujua acatenelu Cana Coaunera, inoanlu acau tabai que chauratane jooratihane bana. Acaihaniji Nohechate esinae rauhijiriin aca jerihane rijijiein ichaohin nihane coaratihane jaun ichoteratein, chaen aina caainsinein nenacaauru cachaauru ichoteratelu. <sup>6</sup> Jerichanejeein techu, Sodoma, Gomora, naajoaihunri neseuru cocoaichacuru mocoeratelu ajanenein nitajeeuruhane que tiaaajoaain Cana Coaunera. Nitohaneinte ichaelu Cana Coaunera, nii baiha neenihuru baaso ichajeein ichaonacaauru cachaauru notaaca niqui, nii caje nainaan baaso ichaelanaala ichaaorehane coina. <sup>7</sup> Nete laen Loto ichoteratelu, aca caohachaaain ichaohin, nii baaso ichacuruha necha aansinein ichaonacaauru cachaaurune rautaain coaraenhane jaun. <sup>8</sup> Nitohanein jetaote, cojoanonetoein baaso ichaain neeuruhane coaraain, baasoneinchuru ita rai ereeuruhane aonaane jaun, que suujua rohecaeriin niha Lotone jana ichoteratelu Cana Coaunera.

<sup>9</sup> Nitohaneinte esenetaain rai cachanein nenacaauru ichoterate cairichanojonein neeuruhane caje Cana Coaunera. Nii rijijiein techu, caseteconein neenihuru casetecae, rai cojoanona que turuhanereein tiaain caseteco neeuruhane coina. <sup>10</sup> Nitohaneinte letoaa suujuane rijijiein baasohacha ichajeein, Cana Curuaanaa Jesocurisito batojoeriin nenacaauru casetecarein Cana Coaunera. Chaen techu erena tonoraelanaala enaacha joanreein cha chaain, chaque casilanaala acaauru amurijiriin nenacaauru

necoeje chanuhin naajoaaunre. <sup>11</sup> Nete laen anjeraauru acaauru amuritoheriin cocoainanohineein neeuruha natiin, acaauru amurijiriin Cana Coauneraacha cocoainanohineein nenacauru nocoeje chanunaa nainecurene.

<sup>12</sup> Nii suujua letono rijjijieein baaso ichajeein ichaonacauru cachaurute, nechu aiha leinjiin ataebinaene rijjijieein cha coitucuelanaala ichaauruhane jaun, cha coacuelanaala joareein niicha ichai ichacure. Chaen techu sohin jaonojoneein itajenojoneein neeuruhane caina inae ichanohineein neure. Chaen techu niicha coitucuhi que nihanatiin enaacha baasoneein ereeure. Nete ooruha ataebinaecurune rijjijieein ohin, <sup>13</sup> acaauru netonai leeochoauru cairichaa in neeuruhane coreniha cairichei coaracurureein. Raotojoein niha nocoetiin niqui rachoojoenaa nitaje rai nena que rachoojoeure. Chaen techu jataain coejenacai aina osa que inara saruha inara aina rachoojoeure nechu inara coritaa beseta ichaain neeichene.

<sup>14</sup> Chaen techu ene coaracuruhane itolere bana jereein coaracure. Nii jaunte chabana osa que nesarucuruhane coejeen jianena nainecurene. Chaen techu enaacha osa que leeochoauru saruhin, itolere niicha latei jereein, queecha coacuhin nechu aansaineein ichaao. <sup>15</sup> Nitohaneein neeuruhane jaunte, inae nitajenaanein neure; Cana Coaunera bero rijjijieein rene cana turuaeranein niha Jesocurisitone saijieein, sacuelanaala jianein neeuruhane jaun. Nii jaunte aihalu Beor calaohi *profeta* Balaamne rijjijieein neure. Aca jetaote coriqui jeriha baaso ichana jerihane jana jetao, <sup>16</sup> rai suujua coarihei amuneein baaso icha cuhane coataa jetao, cache rijitiin rai ereein, baaso ichaane caohate nii amaera cabario rijjijieein nena asno.

<sup>17</sup> Nitohaneei cache relaeeranein nenacaurute, caohacha que cache relaelanaala, nechu cache ichao asaeranein nena que cache relaaure. Nii jaunte chabana satonoelanaala nena nocohenaanau caseteconein neeurureein. <sup>18</sup> Itolere quete niqui ereeure. Nete jataain joenreein aitocure. Nitohaneinte, acaauru ichao rijjijieein ichaauruhane jianein, ena Cana Coaunera coitucunaa nunuhetejeeureraauru- cachauru saruure osa que. <sup>19</sup> Itolerenein niicha ichana jerei icha cachane jereinte niqui ereeure. Nete acaauru itajeranu letononein netiin aitocure, satiin cache, rai suujua saruhera tonoraain nena rai letononein nihane jaun. <sup>20</sup> Nitohanihane jaunte inae Cana Coaunera coitucuhin, cana ichoteranein nena Jesocurisitone maajeein coitucuhin nihane jaun, inae Cana Coaunera coitucuelanaala nenacauru ichao rijjijieein ichaohane caje nichotein nihane saijieein,

nacoauneein nii jauriaalu aihalune rijjijeein ichaohin niha cachane, jauriaa aihalune amuritoheriin baasoneein ichoae. <sup>21</sup> Nitohanihane coataate niqui nirijjееin, cana ichoteraneein niha Jesocurisitone coitucuelanaala neuruhane caohachae. Nabana acauru rai tenojoinееin niha nii cana rai beratenojoi Cana Coanera caje nenaane saijjееin que jaolecooruhane coataa. <sup>22</sup> Nete inae nitohaneeururichaaaine que: “Narohane baihate jeelai naro qui remaae. Caohatiin culeenoinihane saijjееinte inae nacoauneein natico cuhane cue coosi,” naa acauru que erenaane rijjijееin neeure.

### 3

#### *Nacoauneei tururichaaain Jesocurisitone*

<sup>1</sup> Caa quete, inae coroata sae quiricha laenaain letoaanu jataain canuhacha belaainein neiniquichene rainera canejeraauru. Nii coroatajai canuhacha laenai quiricha cuhanena inara suujuateun, caohachaaain inara suujua coaraain, baaso coacuelanaala rauhijiriin coacuhin neeichene jerichaaunne jaun. <sup>2</sup> Inoaenlu inara rai berejetocuruha Cana Coanera tenojoinееin nenacaauru *profetacurune* coacuhin, inara relaerateein nihalu rai afosotooro que cana ichoteraneein nena Jesocurisitone coacuhin neeuche.

<sup>3-4</sup> Inae caa baihate nechu inara necoeje chanuha: “Aanca Jesocurisito. Nacoauneein turuhane cointate niqui aitelu. Inae ohacoaauruha cana foerateracuru niqui, nete jerichanejeein sacue necoaanaa cana rai chauratanene caje coauneein nihane rijjijееin,” naain ereeururichain nechu jeriha acauru suujuane rijjijееin baaso ichajeein ichaonacaauru cachaaurune que nainain ichaaoche. <sup>5</sup> Nitohaniha acauru ichaone jaunte, jaiti necoaunaeniha satiin itolerene ajiniha, inae nesiha dedene jana, acau nejesinaneein niha caa chauratanene jana, nitohanein jeriha Cana Coanerana jaun, acau caje coananohineein nihalu caa cana rai chauratanene coitucuhin esenetana jerecurene. <sup>6</sup> Nii rijjijееin techu, elo tabai aina cuaain itajenojoinееin nelu caa cana rai chauratane. <sup>7</sup> Nete laen, caa ena nena dede, chauratane, naaonjoainuri, inae nitohanein jeriha Cana Coanerana jaun, usi tabai que nitajeeuruhane coina rucuhenhineein neeure. Nii usi tabai, baaso icharaauru itajeranuneein nenaate, acauru mocoreein cana janonaa satono bana.

<sup>8</sup> Canejeraauru, jiaonriha Cana Coanera rai le jüichoo, le oaraanca jaanacanei carajanihane jana, le oaraanca jaanacanei le jüichoonejihane baitichache. <sup>9</sup> Coatiha niqui

aitocuruha esenetaaichuru tabaaaurune rijijieein, cana rai naitoonjoan tihane baitihane jaun, caeneenejihei Cana Coaunera. Chuni nitajihane jerenihane jaunte, saain nichoteein niha cachane jerihane jaun, jaiti inara cojoae Cana Coaunera.

<sup>10</sup> Nete inae ecu tihane bana, coitucueraelanaala turuha asijiautone rijijieein, coitucueraelanaala turoreein cana Curuaanaa Jesocurisito. Nii janate tonijiaain coasinacaain neranuha cureein caa canaacha coarajei dede. Itolere, que nenacaauru netonaite itajereein usi. Jana chauratanete satiin que nenacaauru aina jiniiquiin coaraain benojoinereein Cana Coaunera rai.

<sup>11</sup> Nitohaneein nitajerichaain itolerene jaun, leecha que coacuelanaala, jeriha Cana Coaunerane rijijieein ichaaoche.

<sup>12</sup> Aihana jaun, chajaain jeriha Cana Coaunerane rijijieein neeuchete carajaelanaala turuhine. Inae turuhane banate, usi tabai que itajenojoiniha cureein caa dede canaacha coarajei. Itolereite nii usi jana neein mocoreein. <sup>13</sup> Nete nitohanihane nihanatiin, cana laen ena nenea dede, ena nenea chauratane, naaonjoaihunri cana rai tihane coina Cana Coaunera aitoonjoa cohajerichaacheein. Ecu coatiha inae nerinaain baaso, caohacha nejesinaachate nereein.

<sup>14</sup> Canejeraauru, aihana jaun, nii que turuhane cohajein, caohachaaain ichaaochete osa colane raotojoein cha ujuaihonelanaala neeichene jana, inara eruhine Cana Coaunera.

<sup>15</sup> Aihana jaun, satiin nichotenaa coina, cana cohaca jaiti turueniha cana Curuaanaane coitucuhin que nainaain neeuche. Nii quete inara rai niicha laenai quiricha cuhane been laenaeraete cana nejera Faboro, que coitucueratiha Cana Coaunerane caje coitucuhin.

<sup>16</sup> Le quirichaauru niicha laenai nainetiinte, nii que aitiin been laenaeraete cana nejera Faboro. Nete tabaauru coitucunacaene caaintatiin aitohane jaun. Nii jaunte, leechaauru Quiricha laenanohineein nenea ichacuruhane rijijieein, acaauru jerecuruhane rijijieein rotohi que cacha relaaure, tabaauru caohachaaain suujua coaraelanaala nenacaauru cachaauru. Nii corenihate, caseteco coaracurureein inae ecu tihane bana.

<sup>17</sup> Canejeraauru, nitohanihane jaun, inae nii ajiniha caje coaaneein nii coitucuhin neeichene jaun, inara coritaauruha nechua aansai cachaaurune esenetaaichene coataa que nainaain ichaaoche. Nabana inara coritaauruhane esenetaain inara suujua coreein acaauru rijijieein neeichene coataa. <sup>18</sup> Nete jeelai amuritoheriin cana ichoteraneein nenea Cana Curuaanaa Jesocurisito coitucuhin, jiniiquiin aca jerihane rijijieein ita belaaain neeichene caohachae. Aca

acaneein nihane coitucuhin coroaecuruhine chabana sato-  
noelanaala. Nitohaneein neeine.

## Joaancha letoai leinjiin

### *Ichaonaa esine tera erenaa*

<sup>1</sup> Necoaunaa cana janonaane ajiniha inoaelu caje coauneein nesina, canacaanuhacha aonai, canacaanuhacha coarajei, naaonjoainne caa been inara rai laenaain letoacaanu, canacaanu nota que coaraain, biji mucuhin, naaonjoaacaanune jaun. Acate, ichaonaa chabana nitajenaa charanejeein nenea esine tera Erenaa ne.

<sup>2</sup> Canacaanu rene ecocohin iriha nii ichaonaa esine chabana sanaacharanejeein nenea terane jaunna, inara rai nii que ereerecaanu. Acate, Inaca Cana Coaunera aina nelu. Nii jianeein ratiriin turuhinte, canacaanu aina neein, jianacoon teteriin satiin rai beebeje, amuhemujueein itolere sacutaain.

<sup>3</sup> Nitohaneeinte itolere ichaain satiin cachaauru notajae. Niine canacaanu raajenihane coaraain beebejihacaanu, inara netonai canacaanu aina jiniiquiin esenetaain neeichene coina. Charijjeein teeinti canacaanu, Cana Inaca Cana Coaunera, rai Calaohi Jesocurisito, naaonjoain aina jiniiquiin nihacaanu, nii rijijjeein inara netonai canacaanu aina jiniiquiin raotojoein neeichene coina. <sup>4</sup> Nii jaunna, jitariin been inara rai laenaain caa letoacaanu, inara netonai coitucuhin neeichene, raotojoein rachoojoein jiniiquiin nihacachene coina.

### *Cacha cononeein niha Cana Coaunerane*

<sup>5</sup> Caa erenaa- canacaanu relaa Jesocurisitone jaan- inara rai canacaanuhacha beebejeite, cacha cononeein niha Cana Coaunerane jaun, nota beroteniha cachaacha ichaine jaan ne. Nihei charijjeein niha natiin jetao, que nasina nainihei chaaelai, Aca itolereneein baaso ichaain nihacachene nii coarajeein nihane jaun. <sup>6</sup> “Ainate jiniiquiin nihacache,” naain irihacachene saijjeein, asiin canaacha jerei ichaacaache suujueeinete, cana raajenihane nohaneein necoritarichaacheein. <sup>7</sup> Nete laen satiin acatiha cana ichao teteriin aiha Cana Coaunerane rijijjeein asinojoinelanaala chachaain jiniiquiin ita suujua rijijjeein nihacachene, cana osa culeereein rai coichana que rai Calaohi Jesocurisito.

<sup>8</sup> “Chatohanai baaso ichahaun. Coatiha chaque osaojoeehaaun,” naain irihacachenete, cana raajenihane necoritarichaacheein. Cuute casajenetiin nedarichaacheein.

<sup>9</sup> Jana laen chatohanein baaso ichaain nihacachene, suujuelanaala been, Cana Coaunera nitohanei rucuhenein

nihane que jaaecohacachenete, cana osa coreniha caseteco coaracaachene rai nihacachene caje, cana que suujua acatein, itolere baaso ichacaachene berotiha cureein cana caje Cana Coaunera. <sup>10</sup> “Chaaelai janonaa bana, chatohaneein naosatein nihaaun,” naain irihacachenete, Cana Coaunera ere tonoraene richaacheein. Cuute casaje tocohanein Cana Coaunera ratiririchaachein.

## 2

### *Cana Coaunera acatiha cana rai cha rucuheranu Jesocurisito*

<sup>1</sup> Cana Coaunera coreniha cacalabi rijijieein nenacaauru, nabana Cana Coaunera ere lacohin, chatohaneein nosatein neeichene coataane catohaneein laenaain letoaaun. Chunocoha chatohaneein baaso ichaain osa que nesaruhin nihane, niha cana rai Cana Coaunera acatiha nii rucuheranu Jesocurisito- esinae rauhijiriin caohacha esine coitucuhin rucuheraneein nena. <sup>2</sup> Osaotohacachene caje cana que suujua acatiha Cana Coaunerane coinete raajenihane netelu Jesocurisito, coroso que tein atinaauruhane coina. Coatiha leinjiin cana corenihacha aiheilulu. Satiin caa chauratane sacutaain que nenacaauru caje osa berotihane coinete nitohaneein nelu.

<sup>3</sup> Esinae rauhijiriin naitoonjoan tonoraacachenete, esinae rauhijiriin Cana Coaunera coitucuera nihacachene coitucunaa nainerichaachein. <sup>4</sup> Jana tabaauru: “Cana Coaunera coitucuhanu,” naa natiin naitoonjoan tonoraenihanete, nechulu jataain casajenetohane jaun aitoreein. <sup>5</sup> Esinae rauhijiriin, nere tonoraerate esinae rauhijiriin Cana Coaunera belaichaneein nihane coitucunaa nainereein. Nii ainate esinae rauhijiriin jiniiquiin, aina nihacachene coitucunaa nainichaache. <sup>6</sup> Chunocoha “Jeriha Cana Coaunerane rijijieeine ichaaon,” naain erei, nii ichaohalu Jesocurisitone rijijieein ichaohine.

### *Ena nena Cana Coaunera aitoonjoan*

<sup>7</sup> Chasocuru, caa inara rai canuhacha laenai canuhacha letoai- Cana Coaunera aitoonjoan, coatiha ena ecoonaneein nihei. Acate inoaelu caje coauneein, inara rai berateno-joineein nenaane. Nii Cana Coaunera aitoonjoante, inae inoaelu caje coauneein inae inaraacha aonai ne. <sup>8</sup> Nete laen, caa ena inara rai quiicha laenai quiicha letoaite, ena Cana Coaunera aitoonjoan- ena nena ne. Esinae rauhijiriin Curisito aina jiniiquiin nena neein, inae nocohena caje mituhajeein, jihanacoo jiichoo mituhichene jaunte, inara raajenihane nii coaraain coitucunaa naineriquicheein.



9 “Cana Coaunera cono conohanau neeinne, jianacoon teteriin chachaaïn neeun,” naa natiin nejelau namute cacha belainiha chunocohanete, jaiti moconajaera aina nocoenaana nihane jaun aicheein. 10 Chunocoha nejelau namute cacha belaaïn neite, jianacoon ichaohane coaratiha aicheein. Nitohaneein ichaohane nerinaain chuni osa que sarunaa nainera. 11 Jana, namute cachaauru aina nejerateein belaiheite, nocohenaana joaenreein moconajaera aina jaiti amuhemujue aïha maosane rijijieein, nii nocohena rai suujua aninoaane jaun.

12 Nii jaunna, cacalabihuru rijijieein neiniquichene rai caritiin rauhijiriin inara rai beein laenaain letoaaun, inoaelu beratihalune tocohaneein nere nainaane coina, Acaneein nihane aina cuaain inara caje inara osa beroteratiha Cana Coaunerane coitucuhichene coina. 13 Saain ichauhenaauru, inara rai netonaina caa laenaain letoaaun, inoaelu caje coauneein nii nesina coitucuhin neeichene jaun. Saain enamanacaauru raine maajeeinna, caa caritiin laenaain letoaaun moconajaera amuritiin ichoae iniichene jaun.

14 Cana Inaca Cana Coaunera coitucuhin neeichene jaunna, caa caritiin inara rai laenaain letoaaunra cacalabihuru. Saain inara ichauchenaneeichene raine maajeeinna laenaain letohacaanu, nii inoaelu caje coauneein nii nesina coitucueraneein neeichene jaun. Saain enamanacaauru raine maajeeina letoaaun, chaae inara coichana aina cutaaïn Cana Coaunera Ere esenetaain, caohachaaïn laraajiin moconajaera choae iniichene jaun.

15 Coa nechü jataain cacha sarueraanu que caa chauratane curuaanaa moconajaera tenojoin nichaae inara suujua letoaaache. Chunocoha nii moconajaera tenojoin itolere nichaae suujua letoaerate, nechü Cana Coaunera que jaolequiin belainihane jaun aicheein, 16 Cana Coaunera caje nena neniha nii chauratane que tenojoine jaun. Nii chauratane que tenojoite, nechü jataain osa que cacha sarueraanu que nena ne. Acate cana nota rai caohati tocohanihane nichaae suujua letoaera, niicha sirii aina cuaain leeochoauru amurijiriin nena coacuhin, naaonjoaain niha cachane jaan tera ne. 17 Nete inae cuu tihane bana, chauratane aina jiniiquiin nitajiha cureein, nii satiin cacha sarueranu tera moconajaera. Nete laen chaaelai janonaa bana nitajenaa charanejeein niha cuurureein Cana Coaunera jerenohi ichajeein ichaonacaauru.

*Esinae rauhijiriin nohanelanaala niha leinjiin ereine, nii caje mitunaa nainenihä casajene.*

18 Aonacuche cacalabihuru. Inae besaute nichaae cuujiha cana janonaa. Nii jaunte, inae uhe lalaje nii Curisito aina

nejerateein nena cache cairichaera moconajaera. Nitohaneeinte, inae caa arajiin ocojoacoaaure Jesocurisito que nejerateein nenacaauru. Nii cajete inae besaute nichaae cuujiha cana janonaane coitucuhacache. <sup>19</sup> Cana ainate neeururejete niqiu, nete mituhin amuurelu cana caje. Coatiha acaauru, cana suujua rijijieein coacuhin neeuruhilu. Baana cana suujua rijijieein coacuhin aihuruhalunete enanetojoein cana aina neeurure. Nitohaneeinte neurelu, acaauru caje esinae rauhijiriin cana suujua rijitojoein neureniha cana aina nenacaaurune coitucunaa coina.

<sup>20</sup> Nitohaneeinte inara rai Cana Coaunera Suujue tein nelu Curisito, aina cuaain inara itolere coitucuhin neeichene coina. <sup>21</sup> Esinae nohanelanaala erenaa niha Curisito que erenaane coitucuneeichene jauna caritiin inara rai laenaan, coatiha coitucuneeichene jaun nihei. Nitohanihane jaun inarate coitucuhiche, casajenelanaala nena caje mitunaa naineniha casajene. <sup>22</sup> Aihana jaun, chateeinti casajenetiin ichoae, niite: “Canaacha cohajei Mesihasi nihei Jesocurisito,” naain Jesocurisito esenetaelanaala que erereein. Acatechu, nii rai Inaca Cana Coaunera aina rai Calaohi Jesocurisito batohin acaauru que nejeratenaaneein ne. <sup>23</sup> Chunocoha cache, Jesocurisito coitucunaa jerenihanete, acaentonai ranaa jerenereein rai inaca Cana Coaunera. Nete laen chunocoha, nii rai Calaohi Jesocurisito coitucuhin leeochoauru que coitucuerateraneein nihane, acaentonai coitucuhin rareein rai Inaca Cana Coaunera.

<sup>24</sup> Nii inoaelu caje coauneein, inara rai beratenojoin inaraacha aonai rucujueein sirichuche, inara suujua cuhaneecha. Chaen jiaohine Cana Coaunera Calaohi caje naluhichene. Aihate Cana Coaunera caje netonai naluheneeiche. <sup>25</sup> Nii cana rai tihane coina aitoha Jesocurisitone jaante chabana nitajenaacharanejeein nena ichaonaa esine ne.

<sup>26</sup> Nabana inara coritacuruha nii inara coritana jereraaurune coataane, caa inara rai aitiin laenaan. <sup>27</sup> Nete laen inara, inara relaain inara suujuateranu lateneeiche, Jesocurisitohacha teratenojoin, Cana Coaunera Suujue siriin neeichene jaun. Nii inara rai niicha teratei Cana Coaunera suujute, caohachaaain rauhijiriin inara relaa cureein, inara suujuateein. Inara rai cha bihane, coatiha nohanenaa nerinaain. Esinaete erenaa nereein. Aihana jaun, Curisito esenetaaichene jianena coacuelanaala aina jiniiquiin neein inara relaa rai Suujuene rijijieein ichaaoche.

<sup>28</sup> Aihana jaun cacalabihuru, enene caje coauneein, jiaohine Jesocurisito esenetaaichene jianein neeichene. Aihate chaque casiin necoatelanaala jiniiquiin queecha jaequiin, niheichu Jesocurisito que coejelanaala nihacache ena-

coaauneein turu bana. <sup>29</sup> Inarate raotojoein esinae rauhi-jiriin caohacha ichaeranein ichaoha Jesocurisitone coitucuhin neeiche. Nii rijijieein techu, baaso ichaelanaala esinae rauhijiriin caohacha nejesina ichara cache, Cana Coaunera calaohinein inae nihane coitucuhin neeiche.

### 3

#### *Cana Coaunera calaohinein nenacaauru*

<sup>1</sup> Aonacuche. Jataain mainajeein cana belaaain niha Cana Inaca Cana Coaunerane que nainaaain coitucuhin neeuche. Nii jaunte nainecure, Cana Coaunera calaohi ineein cana curuaateeuruha cachaaaurune, esinae rauhijiriin acanein nihacachene jaun. Nii jaunte cana coitucuhin, cana belaaain cana coaana nainecurene caa chauratane que nenacaauru cachaaauru Cana Coaunera coitucuurenihane jaun.

<sup>2</sup> Canejeraauru, inae esinae Cana Coaunera calaohi neeinte nihacache. Nete nii baiha: “Naaajoain ineeinte niha curichaachein,” naain rauhijiriin coitucuenihacache. Leinjiin, coaiteen enacoauneein cau turuha Jesocurisitone bana, rijijieein niha curichaacheinnete laen coitucuhacache, aito-hane rijijieein, jerichanejeein coaraa curichaacheinna jaun.

<sup>3</sup> Satiin acaacha esenetaain queecha jaaequiin nenaate, raa-jenihane itolere baaso caje necoulucuhin neeurureein, baaso colane ichaoha Jesocurisitone rijijieein ichaaoruhane coina.

<sup>4</sup> Nete laen, satiin osa que nesaruhin nenacaauru baaso ichaaain neure, baaso icharaneein niha satiin osane jaun.

<sup>5</sup> Inara netonaite cana caje osa beroteranu que caa chauratane que turuhalu Jesocurisitone raotojoein coitucuhin neeiche. Coatiha Aca charijieeinijiji chaque osaaojoejeein niheiluu.

<sup>6</sup> Nitohanihane jaun, Cana Coauneraacha jerei ichajeein jianelanaala nenaate, osa que nesaruna nainenereein. Nete osa que nesaruhin nenacaauru, coaracuruhane niha natiin chabana coitucuurenereein, nii jaun coatiha rai cache necururinaain.

<sup>7</sup> Coa inara coritaain neeuruha nejelau cachaaaurune esenetaain nihachera cacalabihuru. Chateeinti baaso que jaolequiin caohacha nejesina ichae, niite caohacha ichara ne, aiha nii caohacha nejesina icharane rijijieein.

<sup>8</sup> Chateeinti osa que nesarujueein ichoae, nii te moconajaera rainein nihane jaun aicheein, inoaelu caje coauneein osa neba niha moconajaerane jaun. Nii jaunte caa chauratane que turuha uhelu Cana Coaunera Calaochi, nii moconajaera ichanaa itajeein beroteranu que.

<sup>9</sup> Cana Coaunera coitucuin, Cana Coaunera calaohinein nena, inae osa que nesarujueein ichaonaa nainihe, inae rai Cana Coaunera tenojoi ichaonaa que ichaohane jaun. Chaen inae Cana Coaunera calaohi nihane jaunte, inae osa

que nesarujeein ichaonaa nainene. <sup>10</sup> Coitucunojoneeinte neeure Cana Coaunera calaohichuru. Nii rijijieein techu coitucunojoneein neeure moconajaera calaohichuru, caohacha ichaelanaala, namute cacha belailanaala, naaonjoaain nenacaauru, Cana Coaunera cachaneein neurenihane jaun.

*Leeochaauru aina jiniiquiin ita belaaain nihacane*

<sup>11</sup> Caate nitohaneein nihacachene coina: “Jiniiquiin ita belaaain, leeocha cachaaauru niha natiin belaaain, naaonjoaain ichaaoche,” naain inoaelu caje coauneein beratenojoneein nena ne. <sup>12</sup> Aihana jaun, nainihaacache moconajaera cacha neein nihilune jaun nocoala sohin jaohalu Caainne tocohaneein ichaohacachene. Chanuna nocoala sohin joae Caain. Caohachaaain suujua coaraa nii rai nocoalane jaunte sohin joae, baasoneein ichaoha nii Caainne jaun.

<sup>13</sup> Inara belaihireniha Cana Coaunera coitucuuru hine coaa nii que nererojoecaache. Coatiha enaacha inaraacha coarai inerinaainta canejeraauru. <sup>14</sup> Ohin nitajenaa rai nena janate nii caje cana ichoterate, chabana nitajenaa charanejeein nena ichaonaa que ichaohacachene coina. Nii jaunte cana amute cachaaauru belaaain naaonjoaacache, inae raotojoeein coitucunaa jaun. Chateeinti namute cacha belaine, niite ohin nitaje rai nihane jaun aicheein. <sup>15</sup> Satiin namute cacha que jaolequiin nenacaaurute leinjiin nechu aansai sonajaineein ne. Inarate raotojoeein coitucuhin neeiche, nitohaneein nechu aansai sonajaain nena, coatiha chabana ichaonaa nitajenaa charanejeein nena ranaa nainihe. <sup>16</sup> Coichana aina cutaain cana belaiha Jesocurisitona jaunte, Cana osa corenia coroso que neteein ohalune coitucuhacache. Nitohanihana jaunte, raotojoeein jianacoon ichaoha cana amute cachane coina coreniha itolere necairichanaa abaantaain acaauru coroatajaneein nihacachene caohachae. <sup>17</sup> Raotojoeein ichaohane jaanu que coriqui siriin niha chunine jana, jataain cairichei inejeein coroatajanera lateein niha leinjiin namute cachane jana tenihanete, aina cutaain Cana Coaunera belainihane jaun aicheein. <sup>18</sup> Cacalabihuru, nainihe cana ereecha que cana amute cacha belaiha no-coetiin ereein nihacachene. Esinae rauhijiriin cana amute cacha belaichaachene, niicha latei teein belaichaachenete ne.

*Chaque necoatoelanaala tonajelanaala Cana Coaunera acatiha nihacachene*

<sup>19</sup> Nitohaneein nenaate, esinae rauhijiriin ichaonaa chabana nitajenaa charanejeein nena tera aina esinae nihacachene coitucuha curichaachein, Cana Coaunera acatiha nena bana. <sup>20</sup> Chatohanei ichaain nihacachene coreniha

cana coulurujiha cana suujuane sainejeeinte, canaacha ichai coitucueraneein ne jianacoon cana tera- Cana Coaunera, Aca itolere coitucueraneein nihane jaun. <sup>21</sup> Canejeraauru, jana cana suujua cuhane chatohaneein baaso ichacaachene coaracaachene jana, chatohanei ichaeniha cachenete, Cana Coauneraacha que jaaequiin nacatiha nerichaacheein. <sup>22</sup> Acate satiin canaacha bajai tereein, cana rai naitoonjoan tonoraain, Aca jerihane rijijieein chachaai nihacachene jaun. <sup>23</sup> Nitohaneein tonoraain nihacachene coina cana rai naitoonjoante, rai Calaohi Jesocurisito esenetaain, le catcha nichaachene jiniiquiin ita belaaain ichaohacachene coina ne. <sup>24</sup> Satiin naitoonjoan tonoraain nenacaaurute, nii naitoonjoan jianena coacuelanaala, aina jiniiquiin neeuruhane jaun, acaentonai acaauru aina ichoae. Nitohaneeinte cana aina ichaohane coitucuhacache, cana que coitucueratiha nii cana rai niicha tei rai Suujuene caje.

## 4

*Cana Coaunera Suujue aina nejeratiha moconajaera suujuene*

<sup>1</sup> Aonacuche canejeraneein cacoelaichaaauruna caa que erete aonaquiche. Coa Cana Coaunera letono niha nocohetiin inara rai satiin erenacaauru esenetaain nihache. Nitohaneein inara coritana jerera nihane, esinae rauhijiriin Cana Coaunera Suujue sirichuruhane coitucuhichene coina coujunajaain coaranaacuche, jataain lanaeniha arajiin caa chauratane que casajeeurune jaun, tabaauru cana Coaunera letononiha nocoetiin ereuruhane jaun. <sup>2</sup> Nitohaneein coujunajaain coaranaaquichenete, esinae rauhijiriin Cana Coaunera Suujue siricha coitucuriquicheein. Satiin, cachaneein turuhin nejanoaalu Jesocurisitone coitucuhin nenacaaurute, esinae rauhijiriin Cana Coaunera Suujue siricheein. <sup>3</sup> Jana nitohaneein niha Jesusone coitucunaa jerelanaala nenacaauru, coatiha Cana Coaunera Suujue siririnaain. Leinjiin Curisito aina nejeratena moconajaera suujuete siricheein. Inarate coitucuhin neeiche, inara uricho que bera aonaain naaonjoaain neeichene jaun. Nii moconajaera suujuete inae caa chauratane que turuhin ne. Acate Curisito que nejeratena nera cacalabihuru.

<sup>4</sup> Jana inarate Cana Coaunera Suujue siriin neeichene jaun, nii casajeeuru ichoae inii neeiche. Nii inara suujua cuhane inaraacha siriite, jataain mijiaainetiin ne, caa chauratane que nenacaauru rai tenojoin ichoae jauhecotojoeriin.

<sup>5</sup> Acaaurute jelai tein caa chauratane que nenacaauru neein neeure. Nii jaunte raujiaain caa chauratane que nenacaauru itolereeicha que ereerecure. Nii jaunte acaauru ere aonaain

esenetaain tonoraaure acaauru rijjijeein caa chauratane que nenacaauru cachaauru. <sup>6</sup>Jana canate Cana Coaunera caje ne-naa nichaache. Nii jaunte Cana Coaunera coitucuurera, cana ere aonaain tonorae. Jana Cana Coaunera coitucuuruhite cana aohana jerene. Niicha cajete nainacaache, “Acate Cana Coaunera Suujue siri. Jana acate casaje moconajaera suujue siri,” naain coitucunaa nainichaache.

*Jataain cacha belaiha Cana Coaunerane*

<sup>7</sup> Canejeraauru, coanete cana laurijiracuru, chaen nejelau cachaauru, naaonjoainuri belaaain nihacache, Cana Coaunera caje coauneen unaaniha ita belaichaachene coinane jaun. Satiin nitohaneein namute cachaauru belaiachte Cana Coaunera calaohineein ne. Niite esinae rauhijiriin Cana Coaunera coitucureein. <sup>8</sup>Chateeinti namute cacha belaine, niite Cana Coaunera coitucue. Cana Coaunera coitucuera, aiha Cana Coaunerane rijjijeein jataain cacha belaihanee jaun. <sup>9</sup> Cana quete jataain cana belaitohane coarate Cana Coaunera, caa chauratane que acaihanejeein rai Calaohi letoain, nitajenaa charanejeein nihacachene coina. <sup>10</sup> Belaaain cana arihacachene que ainaa tocohaneein cana belaiha Cana Coaunerana jaunte Calaohi letoaelu, cana osa coreniha raajenhane onaa que netihane coina, nabana cana osa coreniha necairichanaa coataa, atiin cana ichoterate cana osa coreniha necairichanaa caje.

<sup>11</sup> Aonacuche canejeraauru. Nitohaneein jataain cana belaaain niha Cana Coaunerane jaun, coanete cana netonai cana laurijiracuru, nejelaauru, naaonjoain belain nihacache. <sup>12</sup> Coatihha Cana Coaunera coaraain nihei chunei cacha niqui, nete, ita belaaain, cana laurijiracuru, nejelau cachauru, naaonjoain belaichaachene cana aina nereein Cana Coaunera. Nii cajete cana belaitoha Cana Coaunerane rijjijeein ichaohacachene coaracurureein cachaauru. <sup>13</sup> Nitohaneente aina nihacachene jana, acaantonai cana aina nihane coujunacanu que cana rai Suujue te Cana Coaunera. <sup>14</sup> Canacaanune, caa chauratane que osa caje cachaauru ichoteratihane coina, nii rai Calaohi letoaa Cana Inaca Cana Coaunerane coaraneen caa beebjihacaanu. <sup>15</sup> Satiin cacha, Cana Coaunera Calaohineein niha Jesusone coitucuhin berate Cana Coaunera aina ne. Jana Cana Coaunera netonaite, aina nereein.

<sup>16</sup> Nitohanihane jaunna Cana belaiha Cana Coaunerane coitucuhin esenetaacaanu. Cana Coaunera cana belaihaneein nihane jaun, rijjijeein namute cacha belaiachte, Cana Coaunera aina ne. Jana Cana Coaunerane aina netonai ne. <sup>17</sup> Nitohaneene esinae rauhijiriin jianacoo teteriin cacha belaaain nihacaanune jaun, chaelai que casilanaala, chaque

tonajelanaala nerichaanuhin, inae cacha coulurujuihane coina coaitee turuha Cana Coaunera Calaohi Jesocurisito bana. <sup>18</sup> Esinae rauhijiriin cana amute cacha belaaïn ichaohacachene, nihei chaque casiin ichaonaana jaanu. Ita belaaïn ichaohacanete, jaoleneein ne nii cana casataera cana casetecaeraanu. Jana chaque casiin nihacachenete, cana amute cacha belaaïn ichaohenihacachene jaun airichaacheein.

<sup>19</sup> Canacaanune Cana Coaunera belaaïn nihacaanu, aca jauriaanejein ichoaichaniha canacaanu belaaïn nihalune jaun. <sup>20</sup> Chunocoha: “Canune Cana Coaunera belaihun,” naain iriha natiin, namute cacha belainihane, acate leinjiin casaje neba ne. Coaracuche nachuhinti, notaracaae neeuruha nii namute cachaaurune saijieein acauru belairiha. Nii jaun techu, nii amuritoheriin Cana Coaunera belaina nainene, chabana coaraain esenetaenihane jaun. <sup>21</sup> Jesocurisitote cana rai: “Chateeinti Cana Coaunera belaaïn ne, nii namute cachaauru belaaïn neeine,” naain cana letoaain cana ratirilu.

## 5

*Canaacha esenetai aina cuaainte moconajaera amiritohacache.*

<sup>1</sup> Satiin Cana Coaunera letono Mesihasi niha Jesusone esenetaaurerate Cana Coaunera calaohineein neeurureein. Nii cana inaca Cana Coaunera belaichate, satiin rai calaohineein nenacaauru belaicheein. <sup>2</sup> Cana Coaunera belaichaache esinae rauhijiriinete, cana letoaane jaan icharichaachein. Nii banate Cana Coaunera calaohineein nenacaauru netonai belaichaachene coitucurichaachein. <sup>3</sup> Cana Coaunera belaihanete, nii cana letoaane jaan tonoraain rijjieein chaachacaane ne. Niheichu coatiha caaintai ichaonaa nihein nii naitoonjoan. <sup>4</sup> Satiin Cana Coaunera calaohineein nenacaaurute, chauratane que nenacaauru itolere baaso choae ini. Satiin nii canaacha esenetaite cana suujua lararajiain cana corotajane, chauratane que nenacaauru cana que negeratenacaauru amuritoeraneein nihacachene coina. <sup>5</sup> Cana Coaunera Calaoheinein niha Jesusone que jaaequiin nenaate, caa chauratane que nenacaauru moconajaera letonocuru amuritoreein.

*Caa nichata laurii erenaate, “Naaonjoaaineinte ne Jesocurisito,” naain berane.*

<sup>6</sup> Cau chauratane que niha Jesocurisitone janate, acau que baotisanajoineein neein, coroso que ohin rai coichana jaohalune que, naaonjoain que cojunacatenohineein nedaelu. Cana Coaunera suujuete esinaaen nitohanihane coitucuerate cana que. Nii Cana Coaunera Suujuete chabana nohanelanaala cana rai beraneein ne. <sup>7</sup> Nichatajaainte neeure

rai Suujue que, nii Aca nihane coitucuhin beracuru. <sup>8</sup> Nii coitucuhin nenacaaurute, Cana Coaunera Suujue, acau, ichana, naonjoainuri ne. Acaaurute ita suujua rijijieein beraneein neeure. <sup>9</sup> Cachaauru, cana rai nii acaauruhacha coarai beebejeeuruane esenetana nainichaache niqui. Nete jataain nii amuritoeriin nelate, “Naaajoaan” naain biha Cana Coaunerane, nii rai Calaohi que aitohane jaun. <sup>10</sup> Cana Coaunera Calaohi esenetaerate, esinae rauhijiriin aitoha Cana Coaunerane rucujueein siricheein suujua cuhane. Chateinti Cana Coaunera esenetaene, niite casaje tocohaneein Cana Coaunera tereein, Calaohi que aitoha Cana Coaunerane esenetaenihane jaun. <sup>11</sup> Nii erenaa cajete cana rai chabana nitajenaa charanejeein nenea ichaonaa tiha Cana Coaunerane coitucuhacache. Jana rai Calaohi Jesocurisitote nii ichaonaa chabana satonoelanaala nenea teraneein nenea ne. <sup>12</sup> Chateinti Cana Coaunera Calaohi esenetaain ne, nii netonaite chabana ichaonaa nitajenaa charanejeein nenea rareein. Jana Cana Coaunera Calaohi esenetaaite raenereein.

*Niicha letoai satonotihane rai acaauru suujuatiha Joanne.*

<sup>13</sup> Cana Coaunera Calaohi esenetaera niquichene raina caa caritiin laenareeunni, ichaonaa chabana nitajenaa charanejeein nenea raeraneein neeiche inara netonaine coitucuhichene coina.

<sup>14</sup> Cana Coauneraaacha quete jaaequiin nihacache, jeriha rai Suujuene rijijieein caje cha bajaain nihacachene cana rai nii canaacha bajai teraneein nihane coitucuhacachene jaun. <sup>15</sup> Nii caje cha bajaacachene aonaa Cana Coaunerane coitucuhin nihacachene rijijieein techu, cana rai nii canaacha bajai terichaaaine coitucuhin nihacache.

<sup>16</sup> Osa que nesarujuiha chunei cana nejerane coara chuneine, rai Cana Coaunera bajaaine. Aihate jianacoon osa caje teine Cana Coaunera, jataain nitajena jaanu osa tabai nenihane. Jana nitajena jaanu que, jataain osa tabai que nesaruhin nei nihane, coa rai Cana Coaunera bajaache. <sup>17</sup> Satiin itolere osate baaso neein ne. Nete ne cacha itajeranune lanaala nenea osa.

<sup>18</sup> Saain canate, inacaneein tein Cana Coaunera coitucuera, inae osa que nesaruna nainenihane coitucuhacache. Inae Cana Coaunera Calaohi que beraichaaain nihane jaun inae dadanaa nainihe moconajaera. <sup>19</sup> Canate Cana Coaunera caje nenea nichaachene coitucuhacache. Jana caa chauratane sacutaaain nenacaauru Cana Coaunera coitucuuruhite satiin moconajaera bijiu neeure. <sup>20</sup> Chaen techu rai Inaca Cana Coaunera coitucuhin nenea coina turuhin cha coitucuhin nihacachene jaanu tein cana que rai Inaca Cana Coaunera esine neein nenea coitucuerateein



nihalu rai Calaohi Jesocurisitone coitucuhin nihacache. Nii jaunte, nii esine neein nenea rai Calaohi Jesocurisito aina ichaohacache. Acate Cana Coaunera esine neein, ichaonaa chabana nitajenaa charanejeein nenea teraneein ne. <sup>21</sup> Cacalabihuru caohachaain necoeraain neeuche, nabana inara coritana coaucuruha nechu aansaineein nenacaauru, Cana Coaunera letononiha nocoetonacaauru casajeeurune coataa.

## **Joaancha letoai coroataja**

### *Ichaonaa rauhi aina ita belaaïn nihacane*

<sup>1</sup> Canuna, Cana Coauneraacha janijiineein rai ita taoji-aain coroaeraneein neiniquichene bichauhenaneein, inara rai caa quiricha laenaain letoaaun. Jataaine casuujua aina cutaain inara belaihun. Coatiha canuhacha nii inara belai-haaun. Satiin nii canaacha esenetai ichaonaa nitajenaachara tera esenetaeraaurute inara belaihure. <sup>2</sup> Ichaonaa chabana nitajenaa charanejeein nena tera coitucuichene corenihane inara belaaïn neeun. Nii ichaonaa niicha tei cana suujua cuhane nenaate cuu niha cureein, nirijieein inoaelu netiin nitajenaa charanejeein. <sup>3</sup> Atiin cairichaaajoaain inara coaraain inara belaaïn inara coroatajanemiin Cana Coaunera, rai Calaohi Jesocurisito aina.

<sup>4</sup> Jataaina rachoojoeun, jeriha Cana Coaunerane rijijieein caohachaain ichaaoruha inara caje nenacaaaurune jana erunajaanune jaun. <sup>5</sup> Aonacuche quiicha belaihuri canejeraaurune caa que inara rai aite, inara laurijiracuru, nejelauru cachaauru, naaonjoain belaaïn ichaaoche. Coatiha niqui ena ecoona cana letoaa Cana Coaunerane jaan nihei, jeelai inoaelu caje coauneein cana letoaa Cana Coaunerane jaan quene, aitiin caa inara rai laenaan. <sup>6</sup> Nii cana letoaa Cana Coaunerane jaante, belaaïn neein ichaohacachene jaan ne. Nii nunuhe caje coauneein aitoha Cana Coaunerane aonaquichene rijijieein ita belaaïn ichaaoche.

### *Cachaauru coritaa amuhemuhenacaauru*

<sup>7</sup> Caa chauratane sacutaainte amuhemujeeure nechu jataain casajeeuru cacha coritaa. Acaaurute itolere que nelatei cachaneein cau nejanoaain turuhalu Jesocurisitone esenetaain coitucunaa jerecurene. Nitohaneein ichaonacaaaurute, Jesocurisito que nejeratenaaneein ichaoruhane jaun, aihure. <sup>8</sup> Coaracuche, nabana inara coritaain neeuruhane nii esenetaain neeichene, joenreein nitajiha inara relaacaanune jaanne coataa. Aihute coreniha inara rai nii cainaain neeine Cana Coaunera. <sup>9</sup> Chateeinti, cacha relaalu Jesocurisitona jaan edaa cuaain cacha relae. Niite Cana Coaunera coitucuenihane jaun aicheein. Chateeinti, jerichanetoejin rauhijiriin aitoha Jesocurisitone rijitoejin cacha relae. Niite Cana Inaca Cana Coaunera coitucuhin, nii Calaohi netonai coitucuhana jaun aicheein.

<sup>10</sup> Jana, caa caitono tocohanelanaala rauhijiriin cacha relaelanaala, nejelauneein cuaain cacha relaeraneei, inara rene turuhane, coa inara loreri asaae raache. Coachu tonaain rai irihache. <sup>11</sup> Chateeinti, rai ereein loreri asaae raain ne. Niite nii baaso turuaane ujuaihoneein nereein.

*Satononejeeinne caa inara rai aitoreeunni.*

<sup>12</sup> Banejelanaalate ne inara rai irihanune jaanu niqui. Nena quiricha cuhane cuaain aitona jereneun. Nii jaunna inara rene turuha unaa jeretoon caraajenihane. Inae turuha uhanune banana inara rai beebejereunni, inara netonai nii coitucuhin neeichene, jiniiquin raotojoein rachoojoein nena coina.

<sup>13</sup> Cana Coaunera rai ita taojiaain Cana Coaunera bajaaurera aina nenacaauru- janijiin Cana Coaunera ranojoinunru inara nejeraaurute saain inara coaacure.

## **Joaancha letoi nichataja**

### *Caiho coroaeca Joanne*

<sup>1</sup> Canu inara bichauhenaneeinne, caa quiricha laenaain letoareunni jataain esinae rauhijiriin quiicha belaa Caiho rai.

<sup>2</sup> Cana Coaunera coreniha quiicha belaa Caiho, icheina Cana Coaunera bajaaun ichorataanihane, nii ena caohatiin jeriha rai Suujuene rijijieein neeine tocohaneein raotojoeein raurohin neeine coina. <sup>3</sup> Jerichanejeein caohachaain rauhijiriin ii suujua corelanaala Cana Coaunera aitoonjoan tonoraain neeine beeuruha cana nejeraauru tabaauru turuhinne jaunna, nii coitucuhin jataain rachoojoeun. <sup>4</sup> “Esinaete chuhisi aitoa Cana Coaunerane tonoraajeein neure Cana Coaunera coreniha cacalabihuru,” naaina jataain rachoojoeun.

<sup>5</sup> Casuujua aina cutaain quiicha belaa, jataain caohatiinte erenaa tonoraain nii cana letoaa Cana Coaunerane jaan ichaain neei. Lechoaauru cana nejeraauru coroatajaneein, nii coriajai caje uhin turunacaauru cana nejeraaurune maa-jeein coroatajaneeine jaunte, jataain jelai amuritoheriin caohacha ichaai. <sup>6</sup> Nii jaunte, turuhin satiin aonajeeuruha Cana Coaunera ranojoneein nenacaaurune jana, jataain acaauru belaa caohatiin ichaain neeine beebejeeure. Atiin chaaelai latecuruha namuna jaan raine quene acaauruhacha latei teeu, jeriha Cana Coaunerane rijijieein. <sup>7</sup> Acaaurute Jesocurisito que erenaa beebejena que amihanenaa ichaa nii uure. Coatiha acaauru coroatajanena jerecuruha Cana Coaunera coitucuhichurune jana jerecuruhi. <sup>8</sup> Nii jaunte, cana itolere que acaauru coroatajanichaachene caohachae, aina raotojoein abaantaain Cana Coaunera ere beebejeeuruhane coina.

### *Baasoneein ichaa Diotrefesine jana, caohacha ichaane coaratiha Demetirione*

<sup>9</sup> Cana Coaunera rai ita taojiaain Cana Coaunera bajaaunera raina leinjiin quiricha laenaain letoaaunlu. Nete coocainanohineein nihacaanune ere tonorana jerene Diotrefesi, acaacha cacha letoaane rautatohane jaun. <sup>10</sup> Chaente jataain casajenetiin, nechu jataain joenreein canacaanu ere rocohin canacaanu irijiae. Nii jaunna rautaenihaacaanu. Chaen jetaote, Cana Coaunera coroaecuruhane coina ita taojiaauruhane jana turuuruha cana nejeraaurune,

enooruhane caohateein sitanajae. Chaen jetaote, niha cotijaaain ranajaerane caohate. Niina jataain rautaenihanune jaun, inae turuha uhanune bana cotijaaain rai aitoreeunni.

<sup>11</sup> Aonaaun canejera. Jiaonriha ii netonai, nitohaneein baaso jeroon ii suujua cuaain neeine. Caohachaacha que ii suujua coaraain neeun. Caohacha ichaera cachate, Cana Coaunera aina nereein. Jana baaso ichaera cache, Cana Coaunera aina nerinaain. <sup>12</sup> Satiin cachaaurute caohachaain suujua coara cachaniha Demetirione beeure, esinae rauhi-jiriin caohachanejeein nihane jaun. Canacaanu neton-ainechu caohachanijihane bihaaanu. Iite chabana no-hanelanaala irihacaanune coitucuhi.

*Niicha laenai quiricha satono tiha Joanne*

<sup>13</sup> Jataainte ne banejelanaala ichei irihanune jaanu. Nena quiricha cuhane cuaain ichei aitona jereneeun. <sup>14</sup> Nii jaunne ena ichoharaa unaa jereeun, caraajenihane ichei aitocaaunne coina.

<sup>15</sup> Chaque tonajelanaala raotojoein neeun. Satiin cana belaichaurute ii coaacure. Atiin, "Inara coaacuruhajera," naain nii cuu nenacaauru cana belaichauru rai beeu.

## Jodasiicha letoi

### *Inara coaaucaun*

<sup>1</sup> Jesocurisito cachaneein Saantiaao nejera Jodasi niha-nunena caa quiricha laenaun, Cana Inaca Cana Coanera niicha jereineein niicha cotihacuri- Jesocurisito berainojoi-neein nenacaauru rai. <sup>2</sup> Cairichaaajoaain inara coaraain inara coroatajanemiin Cana Coanera, leechaauru aina jiniiquiin ita belaaain raotojoein neeinchene coina.

### *Nechu jataain nohanenaa que inara relaaureraauru (1Fd 2.1-7)*

<sup>3</sup> Jataaina niqiu inara aina jiniiquiin cana ichoterater-aneein nena que cuaain laenana jereunlu niqiu inara rai, canejeraneein neeinchene jaun. Nete laen jataain ena caohachae inara rai laenacaanne, Cana Coanera cachaneein neeichene jianelanaala, canaacha esenetai esenetaain neeinchene coina. <sup>4</sup> Inae Cana Coanera Quiricha cuhane besihalune rijijieein, inara aina neeuruha nechu jataain nohanein cacha relaaureraauru, caseteco coaracuruhane rai nenacaaurune coitucuhanune jaun. Acaaurute jataain necha aansai cachaauru ne. Necha jataain cana belaiha cana rai Cana Coanera tenojoineein nena aasaaeraneein nenacaauru ne. Chaen techu cana eroraneein nena- Cana Curuaanaa Jesocurisito coitucuha nocoetelanaalane maajeein aihure.

<sup>5</sup> Inae niqiu coitucuhiche inara, nena nacoaauneein inara rai benaa jereun, Egipto caje coitucuurera Israaeli co-coaichacuru rocokane baihate, esenetaaurui cachaauru itajelu Cana Coanera. <sup>6</sup> Coaracuche nachuhinti coujurihu Cana Coanera letononeein nena tocokanein neurenihalu anjeraaurune jaun, charijibana satonoelanaala nena noco-hena tabai jana neeuruha, satiin rucuhaca Cana Coanera que tihanereen tiaaine. <sup>7</sup> Nirijieein techu ailu Sodoma, Gomora, naaonjoainuri cocoaichacuru aina curuaequiin, rohan nenacaauru neseeuu cocoaichacurune maajeein, nejelau ene aina ichaohin, ajenaacha que namuritiin, namute quicha aina ichaojeraquiin naaonjoaaunrelu, nitohaniha cana ichaone que airijiin. Nii jaunte charijibana satonoelanaala nena usihanaun caseteco coaracure. Niite satiin cana suujua coaraain, que nainaaain ichaohacachene coina ailu.

<sup>8</sup> Nitohanein inae coitucuuruha sainejeeinte, nii inara rene turunacaauru cachaauru, nechu joaereen raaje osa

que jaberoco aasajeein, sini anuu caje cha coitucuha nocoetiin cachaauru relaan, Cana Curuaanaa Jesocurisito nocoetje chanuhin, acaauru amurijiriin cocoainanacaineein nenacaauru quene maajeein mainajeein ereeure. <sup>9</sup> Coaraanachuhinti nenacaeneein Moisesa jaberoco amanaa jeriha moconajaerane jana, nii tonaain batohin, que baasoneein ereein nocoetje chanunaa coacuelanaala, raujiaain acateein: “Ti suujua raujiaaine Cana Coaunerara,” naain nihalu moconajaera rai anjeraauru curuaanaanein nenea Miqueline. <sup>10</sup> Nete niritiin erenaa nainiha cacha natiin, niicha coitucuhi que nihanatiin ereein neeure cachaauru. Nechu jataain leinjiin ataebinae rijijieein neein, nitajia acaauru jaberocone coina, jaberoco teeure.

<sup>11</sup> Jataainte cairichaaajoaaure, aihalu Cainne rijijieein ichaaoruhane jaun. Aihalu Balaam aina Corene rijijieein coriquiicha que coaacuruhane jaunte, Cana Coaunera sacuuruhane jianecuruha erenaa tonoraelanaalane jaun nitajeraai neeunre. <sup>12</sup> Ita belaaihuruhane jaa beseta bitoaaiche jiniiquiine jaaurute, nechu jataain inara rai nocojenaatiha, inara aina lenoneein acau cohin rachoojoein naaonjoaunre nocojelanaala, nii chuni sinaa coacuelanaala. Cacha beraicha niha nocoetiin churute aihure. Nete nii chuni berailanaala, nechu jataain jaberocohacha beraihure. Acaaurute nii conacainelanaala nenea acau rijiiichure. Aiha temule inaacane cojoanona bana, inacaelanaalane rijijieeinte neeure. Chaen cojoaisi aina curuataain enuha rochin jaohacane rijijieeinte neeure. <sup>13</sup> Enaachate baaso ichaacucuana cuhane fichafichanaane rijijieein, chunijihun nihanatiin baaso ichacure cojelanaala. Chaentechu sona nalu rijijieein mituhin janoajeein cujueein, jaiti cunajaun turuelanaala, nocoenaanaun nitajia arasijiene rijijieein nitajija cuurureein nocoenaanaun acaauru netonai.

<sup>14-15</sup> Chaen techu nitohaneeururichaaain nii cachaaurune que aitoroatiha Cana Coaunerane jaun, Adaan que jauriichuru baiha, acaauru caaunsini ineein nenea- Enoco netonai jetao: “Satiin nere tonoraeraauru cachaauru janijiin raain, jataain necha aansaineein ichaonacaauru, naansaine aina cuhaain nocojenaatiha charaneein, osaacuruhane jaun naansaine caaun que baasoneein erenacaauru casetecaain itajenajaane coina, araai oaraancanei rai nere tonoraeraauru anjeraauru uhaain uha Cana Coaunera Calaohi Jesocurisitone janane coaraaun,” naain belu beratiha Cana Coaunerane jaun. <sup>16</sup> Chaen techu acaauru cha coitucueraniha nocoetiin, satiin que nererojoeaain, satiin que maihajein ereein, niicha jereeicha que coaacure. Nechu jataain cacha que niicha jerei ichacuruhane coinaachate,

cache rai raotojoein ereeure.

*Cana Coaunera coitucuurera rerohecaeraauru*

<sup>17-18</sup> Canejeraauru, inara rai: “Cana janonaa satonoelalaje raite nereein, nechu jataain baasoneein suujua letonohacha ichajeein ichaonacaauru cacheauru,” naain inara rai beeuruhalu Cana Curuaanaa Jesocurisito rai afosotoorune coaacuche. <sup>19</sup> Acaaurute ita caje neleruhin niha cachane jereein, nechu jataain suujua letono rijijieein ichaohin ichacuruhane jaun, Cana Coaunera Suujua sirichurenihane jaun aihure.

<sup>20</sup> Nete inara, coujurihu Cana Coaunera esenetaeraneein, rai cachaneein Cana Coaunera Suujue que suujuequuin, Cana Coaunera bajaebajajeein neeiche inarane caohachaera cacoelaichaneein nenacaauru canejeraauru.

<sup>21</sup> Cairichaaajoaain inara raain, inara belaaain nihalune rijijieein ichaohin, chariji bana satonoelanaala nenea tiha Cana rai Cana Coaunera Calaohi Jesocurisitone cohajeein neeunche.

<sup>22</sup> Atiin cairichaaajoaain nii esenetana jeriheeichuru coaraain neeuche. <sup>23</sup> Nabana nitajeeuruha usi tabai jana nii esenetaichurune coataa, cairichaaajoaain acaauru coaraain, tabaauru ichoteratecuche usi tabai caje, acaauru que nocohalajiin, jataain baasoneein ichaohin nichao aasajeein neeuruhane jaun.

*Raotojoein rachoojoein neeuche*

<sup>24-25</sup> Acaihanijin cana ichoterateraneein nenea Cana Coauneraachate, inara beraicheein chatohaneein baaso ichaain neeinchene coataa. Nii chaeloon baasoneerilanaala, aca Cana Coaunera nihane acatiha rachoojoein turuhin neeinchene caina. Jauriaa caje coauneein nii chariji bana satonoelanaala, aca itolere que laraajiin cocoinanacainein niha Cana Coaunerane coitucuerateein neeine Cana Curuaanaa Jesocurisito. Nitohanemiin.



## Jesocurisitohacha Coaratei Afocarifisi

*“Naaonjoanrichaain,” naain coaratiha Jesocurisitone*

<sup>1</sup> Caate, inae nichuuntaa nitohanerichaaainene jaun rai cachaneein nenacaauru que coaratiha rai Calaohi Jesocurisito aina cuaain Cana Coaunerane jaa ne. Nii jaunte rai nere beraneein nena Joaan nichaaunne rene, rai nere bera anjera letoae Jesocurisito, canu que niicha coaratei coaratiha nii anjerane coina. <sup>2</sup> Nii jaunna, canu que coaratiha Jesocurisito aina cuaain Cana Coaunerane rijijieein, esinae rauhijiriin nii coaraneein coaracaunne rijijieein laenaun.

<sup>3</sup> Nerausiaecururichaaain caa Cana Coaunera beratenojoin reretaera aina aonaain caa laenanohineein nihane rijijieein tonoraain nenacaauru, inae ichuunejeeoriha nitohanerichaaainene jaun.

*Caaunsi laurineein Jesocurisito ranojoneein nenacaauru iclesiacuru rai laenaa Joanne*

<sup>4</sup> Asia batane que caainsii laurineein Jesocurisito ranojoneein nenacaauru iclesiacuru raine canu Joanneein caa laenaun. Raotojoein neeichene jaanu teein neeuruhine- nii nunuhe caje coauneein neein- ena acaneein neein turuha uhenei neein nena Cana Coaunera, rai nelaurianajaantrono acatiha caainsiineein suujueneein nenacaauru aina, <sup>5</sup> chaen esinae rauhijiriin, aca jerihane rijijieein neein nere beraneein nena Jesocurisitone maajeein. Acate jauriaanejeein ohane caje ichanaelu. Nii jaunte, satiin chauratane sacuritaain nenacaauru curuaanaacuru curuaanaaneein ne Jesocurisito. Nii Curisitote jataain cana belaitohane jaun, rai coichana aina cuaain osa caje cana rocoelu. <sup>6</sup> Nitohanein cana teinte, jelai tein rai cachaneein aihuruhalu saseredotecurune rijijieein- rai Inaca Cana Coaunera rai caohacha icharaneein- niicha jerenohin ichacaachene coina cana tein nelu. Aihana jaun Cana Coaunera necaohacha aina, itolere niicha ichana nainei itolere bana Jesocurisito rainein neeine. Nitohanemiin.

<sup>7</sup> Inae nacoaauneein dede sacari jana uhin fauha uha Curisitone janate,

satiin coanojoinereein.

Nii sohin jaaoreraluniha natiinte coaraa cuurureein.

Nii jana caa chauratane que laurihu laurihu ichaonacaauru  
 cachaaurute,  
 chanaa cuurureein coreniha.  
 Aiha nitohanerichaaain.

<sup>8</sup> “Canune nunuhe caje coauneein itolere coauneraneein satono que tiaain acaneein neeun,” naa Cana Curuaanaa Cana Coaunera- itolere curuaanaaneein turu rai nena.

*Jataain caohacha que necaohachaain necoaratih* *Jesocurisitone*

<sup>9</sup> Canune satiin inara nejera Joanneeun. Jesocurisito corenihate, canu nejeraneein neeiche. Nii rijijieein techu, jiniiquiin coujunojoneein necairichanaa abaantaacache, laraajiin cana coroatajaniha Cana Coaunerane jaun. Nitohanihane jaunne, Cana Coauneraacha jerei Jesocurisitohacha coitucueratei beebjihanune coreniha caseteconein Patmo cobeneu neeun. <sup>10</sup> Ecute tomiho cojoanona bana, caniha neeoritoha Cana Coaunera Suujuene jana, canu janori nichaae toniin: <sup>11</sup> “Leinjiin quiricha cuhane iicha coarai laenaain, caainsii laurineein Asia batane que nenacaauru- Efeso, Esmirna, Pergamoo, Tiatira, Sardisi, Filadelfia, Laodisea, naonjoainun Jesocurisito cachaneein nenacaauru rene letoaau,” naain mijiaaanein toniha carai jaiha rijijieein nenaatoroonfeta rijitiin erenaane jana aonaun. <sup>12</sup> Nii carai erena coaracaanne coina nauriterichaaunne janate, tirichotiin jiquihaquuin ne ecu caainsineein cono nujuaoro caje ichanohin. <sup>13</sup> Nii caainsineein cono nujuaoro caje ichanohin cataaunne cacha tocohaneein- tijia que uujoai cajionequuin, somajain cajione que cajionequuin- nalarijia que uujoaain oro caje ichanohin sintoroon que ichoraane coaraaun. <sup>14</sup> Nii jana rai couturi ujuite dede sacari tocohaneein somajae. Jana, rai notate tirichotiin usi lanaro tocohane. <sup>15</sup> Nii jana rai tijiaaurute, orono cuhane tucuhacaain ichanohin bronze tocohaneein jiquihaque. Nii jana rai nerete, jataain mijiaaanein caraturi toni rijitiin tonihane jana, <sup>16</sup> rai raotono nichajai que caainsineein arasijie siri biji cuhane. Nii jana rai nujuae cajete mitue jerane jataain ajinaain sabere. Nii jana rai merite, jataain conotiin conoha enotone tocohaneein jiquihaque.

<sup>17-18</sup> Nii jaaunne coariin tijia asae moon onaa rijijieein. Nete biji raotono nichajai que canu mucuhin: “Jiaonriha casine. Canune ichahin itolere coaunaain satono que tiaain Coauneraneeun. Canune niqui oonlu, nene ichanaaun. Inae charijibana orinaaunni. Canune cana asaa nitajenacaauru rai chabi sirihun. <sup>19</sup> Caa ena nena iicha coarai laenaain, caa

baiha neeninu iicha coarai laenaau. <sup>20</sup> Caa canu biji raotono nichajai que caainsiinei arasijie, chaen caainsiinei cono nujuaneein nena oro, naaonjoainuri iicha coaraite, charijibana coitucueraelanaala asinojoneein nena ne. Nii caainsiinei arasijiete Cana Coaunera ranojoneein nenacaauru-iclesiacuru beraihurera anjeraauru ne. Jana nii caainsiinei cono nujua oro caje ichanohinte, caainsii laurineein Cana Coaunera ranojoneein nenacaauru-iclesiacuru ne.”

## 2

*Caaunsi laurinei iclesiacuru rai beratenojoin. Caate nii caainsii beratenojoi caje Efesoo Cana Coaunera ranojoneein nenacaauru iclesia beraicha- anjera rai beratenojoin*

<sup>1</sup> “Caritiin Efesoo Cana Coaunera ranojoinuri- iclesia beraichaneein nena- anjera rai laenaau.

‘Aonacuche, caritiinte inara rai laenarate nii biji raotono nichajai que caainsiinei arasijie siichaain- cainsiinei oro caje ichanohi usi nujua cataaun amunaa: <sup>2</sup> Canuna, itolere iicha ichai coitucuhin, caaintatohane niha natiin jianelanaala neeine coitucuun. Chaen nechu, nii necha ansaneein ichaonacaauru abaantasineeine coitucuun. Chaen techu, afosotooru niha nocoetonacaauru niha natiin coujuhin coaraaine jana aca necurene. Nitohaneeinte casajenetooruhane coitucuhi. <sup>3</sup> Itolere banate coiinteein jianelanaala jataain canu coreniha necairichanaa abaantaai.

<sup>4</sup> Nete jauriaanejeein aailune tocohanein corajeein quiicha jerei icharanein neneei. <sup>5</sup> Aihane jaun, jauriaa aichejetohilune que coacuhin, nii nunuhenein corajeein icharejetohilune rijijieein nacoaunein corajeein quiicha jerei icharanein neeun, jeriha Cana Coaunerane rijijieein. Ainihanena, nii nihane jaa jelai caje, nii cono nujuaneein nena ruluureuni ii caje, nacoaunein Cana Coauneraacha jerei icharanein ichoaeneeine. <sup>6</sup> Nete caohacha ichaai, nii Nicolasa sacuureraauru ichanohichuru rautain coaraeneeine jaun. Canuhetonaichu acaauru ichanohichuru rautain coarahaau.

<sup>7</sup> Aohana jereraauru, caa ereretaain Cana Coaunera ranojoinuru- iclesiacuru rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuerate, nii chariji bana sanaachara ichaonaa tera enuha inaa Cana Coaunera nenajaun nena que lenonereein,’ naain laenaau Efeso beraicha- anjera rai,”

nae nii canu notaara.

*Esmirnau Cana Coaunera ranojoineein nenacaauru iclesia beraicha- anjera rai beratenojoi*

<sup>8</sup> “Caritiin Esmirnau Cana Coaunera ranojoinuri- iclesia beraichaneein nenea- anjera rai laenaau:

‘Aonacuche, caritiinte inara rai laenaerate nii nunuhe caje coauneein satono que tiaain acaneein nenea- ohalune caje ichanaain nenea: <sup>9</sup> Canune jataain necairichanaa abaantaain, cairichainejeein neeichene coaraaun. Nete chaque lanaeneriquicheein dedeeu. Chaen nechu jataain baasoneein ichei ereeuruha Joriooniha nocoetonacaaurune coitucuun. Acaaurute esinae rauhijiriin moconajaera letono laurineein neeure. <sup>10</sup> Jiaonriha necairichanaa coariquiine que casiin neeine. Moconajaerate caresero cuhane inara tabaauru enoaeratereein, nii aina cuaain satiin inara coujunojoineein coanojoinequichene coina. Jataainte necairichariquicheein lechoonca janohin. Nete ohichene que tiaajoaain nirijieein jianelanaala abaantaain sacuhichene, canu nii cainaraanuque chariji bana nitajenaacharanejeein nenea ichaonaa tereeunni inara rai.

<sup>11</sup> Aohana jereraauru caa Cana Coaunera ranojoinunru- iclesiacuru rai Cana Coaunera Suujue beratenojoin aonacurumiin. Laraajiin itolere necairichanaa amuritiin nenacaauru- coatiha ooru baiha nacoaauneein ohin nitajerinaain acaauru suujue,’ naain laenaau Esmirnau Cana Coaunera ranojoinuri iclesia beraichaneein nenea anjera rai,”

nae nii canu nae nii canu notaara.

*Pergamoo Cana Coaunera ranojoineein nenacaauru iclesia beraicha- anjera rai beratenojoi*

<sup>12</sup> “Caritiin Pergamoo Cana Coaunera ranojoineein nenacaauru iclesia beraicha- anjera rai laenaau:

‘Caate aitiin laenaerate nii nujuaae cuhane jerane jataain ajinaain sabere siricha: <sup>13</sup> Raotojoeine moconajaera rori rohan ichaohichene coitucuun. Nete atiin caitoonjoa esenetaain canuhacha icharatee ichaquichene jianelanaala neeiche. Niheichu nii canu ere bera Antipas sohin jaaoruhalu, nii moconajaera neseu natiin, canu esenetaain neeichene jianein niheeiche.

<sup>14</sup> Nete neeje ichei baaso, iniha nenacaauru que ichei aitocoaaunne jaanu coitucuhine coina. Nii iniha nenacaauru tabaaurute, Israeli inoaensihuru relaain nihalu

Balaamne jaacha tonoraain jianena jerecurene. Nii Balaamte baaso que Balac suujuatihane jaun, ecaantooru que banijiaain nena lenone que Isaraelitaauru coroaatein, itolere osa que sarueratenajaaine maajeein naaonjoaenlu. <sup>15</sup> Chaen techu, tabaauru iniha nenacaauru acaauru relaain nihalu Nicolasa sacuurerane jaan jianena jerecurene.

<sup>16</sup> Aihana jaun, chajaain ena esinae Cana Coaunera esenetaeranein jeriha Cana Coaunerane rijijieein quiicha jerei icharanein neeuche. Ainihanena ena inara rene uhin, nii canu ujuae cuhane jerane ajinaai nena- sabere que acaauru soreeunni.

<sup>17</sup> Aohana jereraauru Cana Coaunera raonjoinuru iclesia rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacurera raine chariji bana coaraelanaala asinojoneein nena manaa que acaauru coroaatereunni. Chaen nech, nii chariji bana coitucueraelanaala nena- cacha curuaa siriin laenanohinein leinjiin ajeri somajain nena tereuni acaauru rai. Nete laen nii ajeri raera, nii curuaa erora coitucureein, naain laenaau Pergamoo Cana Coaunera ranojoinuri iclesia beraichanein nena anjera rai,”

nae nii canu notaara.

*Tiatirau Cana Coaunera ranojoinuri beraicha- anjera rai beratenojoin*

<sup>18</sup> “Jerichanejeeichu, Tiatirau janijiin Cana Coaunera ranojonein nenacaauru iclesia beraicha- anjera rai laenaau:

‘Caritiinte aitiin laenaerate nii usi lanaro tocokanei notaain- coata lanajai jicharoanohi tocokanei tijiaain nena- Cana Coaunera Calaohi: <sup>19</sup> Canune jitariin iicha ichai coitucuun, jataain cachaauru belaaain, iicha esenetai esenetaain, itolere necairichanaa abaantaain itolere ichaaine coitucuhane. Chaen nech, jataain jauriaalu amuritoheriin ena caohachaaain ichaaine coitucuun.

<sup>20</sup> Nete neejen ichei aitocoaaunne jaanu, Canu cachanein nenacaauru coritaa, nech Cana Coaunera coitucueraniha nocoetiin, ecaantooru que banijiaain nena lenone que acaauru coroaatein, chabana nitohanai osa que nesaruna naineniha cachane saijieein itolere osa que acaauru rerohecaa nii ene Jesabeline abaantaaine jaun. <sup>21</sup> Canune niqui Cana Coaunera coitucueranein nihane cojoaun. Nete ainaa jerelanaala, niheichu osa tabai que nesaruhane jianena jerene.

22-23 Nii jauna, nii ene cunaitaain bereecurune maa-jeein ateinareeunni. Chaen nechu, nii ene aina ichao-jeraquiin neeuruhane jianelanaala nenacaauru ateinaain, jataain necairichanaa tabai que cairichanajareeunni. Nitohaneein ichacaaunne banate, suujua cuhane cachaa-ruhacha coacuhi coitucuhanune que nainaa cuurureein satiin Cana Coaunera ranojoneein nenacaauru iclesi-acuru. Jana inara raine, le cache cachanequichene rai, inaraacha ichanohin rijijieein inara rai tereeunni. <sup>24</sup> Nete laen inara Tiatirau neinequichene, nii relanajaain neeu-ruhalune jaan moconajaera suujua asinojoneein nena coitucuhin tonoraain neneeichene, nihei nii que tonaain inara rai irihanune jaanu. <sup>25</sup> Aihana jaun, turuhanune reentiaain jerichanejeein sacuuche jianelanaala.

<sup>26</sup> Itolere necairichanaa abaantaain satono reentiaain canuhacha jerei ichajeein sacuureraaurune cocoinaree-unni, lauri lauri nenacaauru cachaauru curuaanaanein neeuruhane coina. <sup>27-28</sup> Charijieein teeinti canu cooainaan nelu Ofa Cana Coaunera, nii rijijieeine inara cocoinareeunni, lauri lauri nenacaauru cachaauru curuaanaanein neeichene coina. Nii banate coata caje nena otiha que erenaa tonoraelanaala lauri lauri nenacaauru tuteneriquicheein, darohe tutenecuruhane rijijieein. Chaen nechu nii choae tacaain janonaarai mitunaa arasijie tereeuni acaauru rai.

<sup>29</sup> Aohana jereraauru, caa Cana Coaunera ranojoin-uri iclesi-acuru rai, Cana Coaunera Suujue beratenojoin aonacurumiin,' ”

naain laenarate nii canu notaara.

### 3

*Sardisihu Cana Coaunera ranojoneein nenacaauru iclesia beraicha- anjera rai beratenojoi*

<sup>1</sup> “Caritiin Sardisihu Cana Coaunera ranojoinunru beraicha anjera rai laenaau, naain laenaerate nii caainsiinei Cana Coaunera suujue aina caainsiinei arasijie siricha:

‘Canune jitariin iicha ichai coitucuun. Ichaohate niqui ii beure. Nete inae ohi. <sup>2</sup> Aihana jaun, itolere que caohachaaain nainaan nii cautenacaauru lararajiaau. Inae ohin nitajeeuruhane raite neure. Chaen nechu esinae rauhijiriin Cana Coaunera notaracae, caohachaaain iicha ichai ichaain neneeine coitucuun. <sup>3</sup> Nii jeriha Cana Coaunerane rijijieein, caohachaaain ichaohin neeine coina nerelaailune coacuhin- nacoaauneein caohachaaain

ichaao. Canu jerichaaune rijijieein, itolere que nainaan caohachaaain ichaeneeine ne, coitucueniha cachane jana turuhin basijiauha asijiautone rijijieein cha coatejeneeine jana turuhin ii casetecareeunni.

<sup>4</sup> Nete nii Sardisihu neure coroatajajeein chabana cajione calanoajelanaala nenacauru. Acaaurute cajione somajai jiaain cajiniichaaain amuhemuhecurureein, nitohanein neeuruhane coina nelatecuruhane jaun. <sup>5</sup> Itolere necairichanaa abaantaain, canu jerichaaunne rijijieein nenacaurute, nitohanein cajione somajai que necoreeteurureein. Nii choae tacaainchu, canu quiricha caje acauru curuaa elonarinaaunni. Chaen nechu, canu Inaca, rai anjeraauru, naaonjoainuri acatiha tein acauru coitucureeuni.

<sup>6</sup> Aohana jereraauru, Cana Coaunera ranojoinuri iclesia rai Cana Coaunera Suujue beratenojoin aonacurumiin,' ”

naain laenarate nii canu notaara.

*Filadelfiau Cana Coaunera ranojineein nenacauru iclesia beraicha- anjera rai beratenojoi*

<sup>7</sup> “Caritiin Filadelfiau Cana Coaunera ranojineein nenacauru iclesia- beraicha rai laenaun:

‘Caate aitiin laenaerate nii Rabiri rai chabi siricha- Cana Coaunera esineneein nena. Acate acujua joracaane, nii chuni funaa nainene. Jana acujua fuhane, nihei chuni joaracaera. <sup>8</sup> Canune jitariin iicha ichai coitucuun. Aonaaun, ii raine joaracanojineein canu acujua siricheeunni, nerinaain chuni funaa nainera. Jataain laraajiin neeineque airijiinte, quere tonoraain quiicha jerei icharanein neei. <sup>9</sup> Canune ichareeunni nii nechu moconajaera rai cacha raeranein nenacauru- nii Joriooneeuruhane que airijiin Joriooniha nocoetonacauru- casajeeuru itiha asae neseonriaauruhane coina. Nii banate, jataain ii belaitohanune coitucuha cuurureein. <sup>10</sup> Esinaete rauhijiriin, itolere bana caitoonjoan tonoraain canu jerichaaunne rijijieein neei. Nii jaanne, inae cojunojinecuruhane coina, satiin colurejenojinecururichaaain caa chauratane que nenacaurune bana, ii beraicheeunni chatohanein teraaine coataa.

<sup>11</sup> Enane nacoaaunein tureeunni. Aihane jaun, caa ena neeine rijijieein jerichanejeein sacuu, nabana chuni ii que banijiaain nena ruluhiin raane coataa. <sup>12</sup> Itolere necairichanaa abaantaain sacuureraaurune, Cana Coaunera loreri banesijianein tihanune, nii chariji bana satonoelanaala caje mituelanaala ecu neeurureein. Chaen nechu, acauru jaberoco que tein Cana Coaunera

curuaa laenaain, dede caje ena nenea Cana Coaunera nenajan Jerosaleen curuaane maajeein laenareeunni, acaauru jaberoco que teein. Chaen nechu acaauru jaberoco que teein ena nenea canu curuaa laenareeunni.

<sup>13</sup> Aohana jereraauru, Cana Coaunera ranojoinuri iclesia beraicha- anjera rai Cana Coaunera Suujue beratenojoin aonacurumiin, ”

naain laenarate nii canu notaara.

*Laodiseau Cana Coaunera ranojineein nenacauru iclesia beraicha- anjera rai beratenojoi*

<sup>14</sup> “Caritiin Laodiseau Cana Coaunera ranojineein nenacauru beraicha- anjera rai laenaan.

‘Caate aitiin laenarate nii Cana Coauneraacha ichai coaraneein, nohanelanaala beraneein itolere Cana Coauneraacha coaunai Coaunera Esine neein Nenea: <sup>15</sup> Canune jitariin iicha ichai coitucuun. Bajianachuhinti canu jerichaaunne rijijieein, corajeein quicha jerei ichaeneei. Jana ainihane corajeein moconajaeraacha jerei ichaeneei. <sup>16</sup> Nete quicha jerei corajeein ichaelanaala, niheichu moconajaeraacha jerei corajeein ichaeneeine jaun, nii chaneein neneei. Nitohaneein ajajaineein niheichu, jelajerilanaala, naajoaain neeine jaun, chaneein neneeine jaunne ii naraareeunni canu ujuaae caje. <sup>17</sup> Iite niqui Inae jataain raotojoein nihanu cha latejelanaala, inae caohacha ichacaaune jaun, naain ereei. Nete jataain cairichaaajoai, cairichanojineein aiha leinjiin cairichai cha colane nenea rijijieein neinmaosa rijijieein neeine jaun. <sup>18</sup> Nii jaunne ichei aitoon, canu caje mocohin tucuaanohin oro coreteeine caina. Nii banate esinae rauhijiriin canu jerichaaunne rijijieein neein, aiha leinjiin cairichanejeein cha colane nenea rijijieein neeine caje, cha caohacha ichaain, caohachaain chaachaain neeine coaraain neriquiin.

<sup>19</sup> Canune satiin canuhacha belai canu cachaauru baaso ichaain neeuruhane coaracaaunne, acaauru cotaain acaauru suujuateein cairichanajaaun. Aihane jaun, nii baaso ichajeein neeine jianelanaala baasoneein jerichanejeein sacuhinene ii cairichareeunni. Aihane jaun, chajaain ena caje coauneein nunuhetein jeriha Cana Coaunerane rijijieein ichaao.

<sup>20</sup> Aonaan, canune itolere bana acuujuua beraicha rijijieein acuujuaniha neein inara cotijiaaun. Chateeinti bajaee bajaecaaunne aonaain canu raain ne rai suujua cuhane, nii ainane jiniiquiin lenonerichaanuhin.



<sup>21</sup> Chateeinti itolere necairichanaa abaantaain jerichanejeein jianelanaala sacue, nii raine canu rohan nelauriaane jaanu rori tereeeunni. Charijieein teeinti, itolere necairichanaa abaantaanune jaun, canu Inaca Ofa nelaurianajan rori ichoae jiniichaain nelauriaaun, nii rijijieein.

<sup>22</sup> Aohana jereraauru Cana Coaunera ranojoinuri iclesia beraicha- anjera rai Cana Coaunera Suujue beratenojoin aonacurumiin, ”

naainte laenarate, nii Cana Coauneraacha ichai coara-  
neein nohanelanaala beraneein- itolere Cana Coauneraacha  
coaunai coaunera esine neein nena.

## 4

### *Dedeeu Cana Coaunera coroaecuruhane*

<sup>1</sup> Niritoha caraine baiha dede coaracaaun jabatoroaainne janate, joaracaeratihaneein ne cana dede bacuujuua. Nii janane, jauriaanejeein leinjiin jaiha rijijieein nena- toroon- feta rijitiin tonihane jana aonacaaunne janate:

“Chajaau cajiha iniha uune, caa baiha nitohaneein airichaaaine coarate ii quete coaraaicha,” naain carai toni eheena.

<sup>2</sup> Nii rijieeoritiin, caniha neeoritoha Cana Coaunera Suu- juene janane, dedeeu jataain caohatiin nelauriananaja rori- *trono* coaracaaunne janate, ecu nii nelauriananaja rori- *trono* ichoae lajuuae leinjiin. <sup>3</sup> Nii nelauriananaja rori ichoae nenaate, ajeri jataain caohati colohin nena- jaspe tocoha- nenihane cornalino tocohaneein jataain caohatiin colohe rai jaberoco. Nii nelauriananaja rori tinonoritiinte, tinohanre leinjiin iino, jataain conotiin beraurosihojoaain colonaa es- meralda tocohaneein. <sup>4</sup> Chaen nechuu nii nelauriananaja rori- *trono* tinonoritiin niha jataain caohatiin coroata choonca jenaain rori caohachaurune jana coaracaaune janate, ecu nichoae neeure coroata choonca jenaain ichauhenaauru, somajaain cajione que cajionecohin, oro caje ichanohin co- mai siriin. <sup>5</sup> Nii rori- *trono* cajete, jataain mijiaaainein mitue jiacano, erena, arara, naaonjoainuri. Nii janate, nii rori acatiha lanalanaque caainsinein siricho. Nii caainsine lanalanaqui sirichote, nii caainsine Cana Coaunera suujue- neein ai. <sup>6</sup> Chaen techu, nii rori- *trono* acatiha cucuana baca tocohaneein, jataain ajiarojoeritiin asaaun tiaain jiqui- haquiin inanacae. Nii nelauriananaja rorihuru cataaun nena rori tinonoritiinte ne, jenaain cacha tocorijianein, janori, nacatichai, naaonjoain jelon notaacoain. <sup>7</sup> Nii leinjiinte aain tabai- leon tocohane. Leechate jana, baca

curuaanaa toro tocohane. Jana nii acaauru nichatajate leinjiin cacha tocohane. Jana acaauru nejenate, uujuirii tabai-aquila tocohane. <sup>8</sup> Nii jenai jelai rai nichao que ichaohi nenacaaurute, nenainetiin saotaneein itarohin, jianacoon, asaun, naaonjoaain acaauru jaberoco nainecojoaain nota sirichure. Janotiin, jiichoo, naaonjoaainte:

“Cana Curuaanaa Cana Coaunera esine,  
itolere que laraajiin  
itolere ichana naineraneein nena,  
iite iineein neeilu,  
enanetjoein acaneein neei-  
iineein turuha uriqiin,”

naaure jiichoo, janotiin, naaonjoaain jianelanaala.

<sup>9-10</sup> Nii cacha tocohanein nenacaaurute, acaneein necaohachaain niha- nii rori caohacha ichoae- nii chariji bana ohelanaala nenaane coroaecure. Nii nainihate coroaata choonca jenai ichauhenaauru, nii ecu nenacaauru nacatiha neseonriaain coroaajeein, nii rori acatiha acaauru rai comai siheitiin:

<sup>11</sup> “Iite esinae rauhijiriin,  
canacaanu Curuaanaaneein canacaanu Coauneraneein-  
ii necaohacha que iineein neei, laraajiin.  
Iite itolere coaunaain neeilune jaun,  
ii jereeine rijijieein necoaunaain nihacoaelu,”

naaure coroaecuruhane naineenin.

## 5

### *Quiricha laenanohineein nena aina carenero narejeen*

<sup>1</sup> Nii janate nii rori caohacha choaae lauheconaa coara-caaunne jana biji raotono nichajai que leinjiin Quiricha sichaain lauheque. Nii quirichate retutonohineein, jeranu laenanohineein ne, caainsinei fuera que caohatiin funojineein. <sup>2</sup> Nii jana coaracaunne janate ecu ne leinjiin anjera jataain itolere ichana nainihane que nelateein. Nii anjerate jataain tonijiaain: “Chana jataain nelate que nelateein, caa quiricha fuera beuhin joracanaa naaine,” naain bajae.

<sup>3</sup> Nete dedeeu, chauratane tinonocoritiin, chauratane asaae, naojoaain niha natiin nene chunei nii quiricha joaracaain coaana nainera. <sup>4</sup> Nitohanein neniha chunei nii coina nelateein nii quiricha joracaain coaraain ereretanaa nainera cachana jaauune jataain chanaaun. <sup>5</sup> Nii janate: “Coa jataain chanaa. Niha leinjiin nii coina nena- nainera. Acate Joda

lauri caje nenea Leon- cana curuanaa inoaensi Rabiri ne-foerate ne. Niite nitohanei ichana nainihane coina itolere amuritiin nihane jaun, nii cainsineein nenea rai fuera soaain joaracareein,” nae canu rai leinjiin acaauru bichauhena.

<sup>6</sup> Nii janate, nii nelauriananaja rori caohacha- *trono* aina nii jenaain rai nichao que ichaohin nenacaauru, nii coroata choonca jenai ichauhenaauru, naaonjoaainunri cataaun niha Carenero Narejeen ne jana coaraaun. Nii Carenero Narejeen coaracaanne janate ecu chujuheque, cairichaain atinanojoinihalune saijieein, Cana Coaunera Calaohi Jesusoneein. Nii Carenero Narejeente, caainsiniha rai jichone jana caainsine rai nota. Niichurute Cana Coaunera suujueneein satiin chauratane que letononeein neeure. <sup>7</sup> Nii Carenero Narejeente cutiin, nii rori caohacha choaae raotono nichajai que quiricha siichaain lauheconaa caje quiricha raaori. <sup>8</sup> Nitohaneein nii quiricha raaoriha nii Carenero Narejeenne rijieeoritiinte, neseonri-aure nii Carenero Narejeen acatiha, nii jenaain ichaohin nenacaauru aina, nii coroata choonca jenaain nenacaauru ichauhenaauru. Satiin acaaurute, nenainetiin quitara rijijieein nenea- arapa sirichure. Chaen techu, nenainetiin oro caje nenea acau cooruhane jaan- curu nainecojoaain enuha sacari juuaain nenea sirichure- nii coroata choonca jenai ichauhenaauru. Nii enuha sacari juujuite Cana Coaunera bajaauruha Cana Coaunera cachaneein nenacaaurune jaan neein ne. <sup>9</sup> Nitohaneein neeinte ena nenea nenatena que nenateein:

“Iite nii quiricha fuera soaain joracanaa naineei.

Ii sohin jaaoruhane janate,

ii coichana que acaauru coreteei,

acaauru ranaa nainiha Cana Coaunerane coina.

Nitohaneeinte,

satiin caa chauratane tinonocoritiin lauri lauri neein ne-  
nacaauru cachaauru,

lauri lauri nere que ereein,

naaonjoaainunri caje raain,

cachaauru coreteei

acaauru ranaa nainiha Cana Coaunerane coina.

Nitohaneein ichaaina jaunte,

quiricha fuera soaain joracanaa naineei.

<sup>10</sup> Nitohaneeinte acaauru cocoainai,

saseredote neein, curuaanaa neein,

naaonjoaineein neeuruhane coina.

Nii jaunte, satiin chauratane sacutaain curuaanaa neein  
neeure,”

naain nenatecure nii coroata choonca jenai ichauhenaauru.

<sup>11</sup> Nii baiha coaracaaunne janate, ecu ereerecure arajiin nii rori- *trono* caohacha rohan nenacaauru anjer-  
aauru. Nii baiha nii jenai ichaohin nenacaauru, nii coroata-  
choonca jenai ichauhenaauru naaonjoainuri. Nii janate ecu  
neeure jataain arajiin oaraanca milloonneein amurijiriin.

<sup>12</sup> Acaaurute jataain tonijiaain:

“Jataainte nelate

nii sohin jaonojoneein nenaalu Carenero Narejeen.

Nii jaunte,

itolere ichana nainihane jaanu,

itolere nerausiajeein nihane jaanu,

itolere coitucuhin nihanu jaanu,

itolere que laraajiin nihanu jaanu,

coasitanojoinihane jaanu,

necaohacha que necaohachaane jaanu,

coroaenojoneein nihane jaanu,

naaonjoaain raeraneein ne,”

naaure nii araai oaraanca milloonneein nenacaauru anjer-  
aauru.

<sup>13</sup> Nii rijieeoritiinne, ereerecuruha satiin Cana Coaunera-  
aacha coaunanohine jana aonaaun. Satiin dede que teein  
niicha coaunai, atane que teein niicha coaunai, nii baiha  
satiin cana temurau cucuana cuhane nenacaauru, atane  
cuhane nenacaauru, naaonjoaainunri Cana Coauneraacha  
coaunai ere aonaaun.

“Nii rori choae lauheconaa,

chaen nii Carenero Narejeen, naaonjoaaihunrite,

coroaenojoneein aca neein

necaohacha que necaohachaain nelate que

nelateein neeuruhane jaanu teeure,”

naain ereerecure.

<sup>14</sup> Nii janate, “Nitohaneein neeine,” naaure nii jenai ichao-  
hin nenacaauru.

Nii jana, nii coroata choonca jenai ichauhenaaurute, nii  
Carenero Narejeen acatiha neseeonriaain coroaecure.

## 6

### *Caainsine fuera*

<sup>1</sup> Jaurihanejeein, leinjiin fuera joracaa nii Carenero Nare-  
jeenne jana coarajihanune janate, nii jenaain ichaohin ne-  
nacaauru caje leinjiin ere arara rijitojoaaintiin tonijiaain  
toniin: “Chajaau cajiha,” naane jana, <sup>2</sup> coaracaaunne janate

ecu leinjiin cabario somajain choaae laujuae leinjiin cacha tenuna sijjaain. Nitohaneein comai teuruha nii cacha raine baihate, amue nii que nejeratenacaauru amuritiin, itolere bana acaauru amuritoeraneein nihane coina.

<sup>3</sup> Nii janate, nii fuera que jaurii joracaa nii Carenero Narejeenne jana, nii ichaohin nenacaauru coroataja: “Chajaau,” naane jana aonaain coaracaauune jana, <sup>4</sup> ecu mitue leecha cabario lanajaain. Nii janate nii cabario choaae nelaurianaa rai nelatei teure, ita sohin ita jaaoruha caa chauratane sacutaain nenacaauru ne coina. Nitohaneeinte leinjiin Sabere seeonjoa teure nii cabario choaae nelaurianaa cacha rai.

<sup>5</sup> Nii baiha, nii fuera nichataja joracaa Carenero Narejeenne jana coarajihanune janate, nii ichaohin nenacaauru caje acaauru nichataja:

“Chajaau” naane jana coaracaauune janate, ecu mitue cabario jichojoaain. Nii janate, nii cabario jichojoai choaae lauheconaa leinjiin balaansa siichae. <sup>6</sup> Nii janate, nii jenai ichaohin nenacaauru caje ecu toniin:

“Le quilojoei aroso rijijieein nenea tiricote corereein le janohin amihanenaa neein. Nii jana, nichata quilojoei aroso rijijieein nenea sebadate corereein le janohin amihanenaa neein. Coa laen erene, bino, naaonjoaain aasaeca,” naain toni erenaa nii jenaain ichaohin nenacaauru cataaun toniin.

<sup>7</sup> Nii fuera nejena joracaa nii Carenero Narejeenne janate: “Chajaau,” nae nii jenai ichaohin nenacaauru caje leinjiin. Nii jana coaracaauune janate, <sup>8</sup> ecu ne cabario somaajiojoaain. Nii cabario choaae nelauriaain cunaa curuaate Onaane. Nii ichohachaniha unaa caaijie unaate onaa curuaanaa moconajaerane. Nii Onaa curuaanaa- moconajaera raite, chauratane neleru nejena que niicha ichana nainai ichaane jaanu teure, ita sohin ita jaaoruha arajiin cachaaurune coina, tabai mijitena caaun ooruha cachaaurune coina, cunai caaun ooruha cachaaurune coina, cachaauru sooruha atane que nenacaauru aain tocohaneein nenacaauru coitucuhichurune coina.

<sup>9</sup> Inae nii fuera nesaogui joracaa Carenero Narejeenne jana coaracaauune janate, Cana Coaunera belaihuruhane jaan rori- *altar* asaee neeure Cana Coaunera beratenojoin beeuruhane coreniha atinanohichuru. <sup>10</sup> Nitohaneein ecu neeinte jataain tonijiaain: “Itolere curuaanaacuru amuritoheriin Curuaanaa- osa colane nenea saanto- cha ichaaine coina aito- hine icharaneein nenea, chatohanai bana caa chauratane que nenacaauru ichao colurujueein, canacaanu atinaeraauru cairichareei,” naaure nii ecu nenacaauru onacaauru.

<sup>11</sup> Niritocuruhane janate, acaauru rai cajione somajain tein: “Jauriaa nebetacaorihuche coa carajaaeriin. Jaiti

lanajeeca, inara sohin jaaoruha ne rijjijeein, leeochoaauru inara nejeraauru Jesocurisito beratenojoin beeuurera sohin jaaoruhane nainaaoruhane reeintiaain cohacorihuche,” nae acaauru rai.

<sup>12</sup> Nii fuera nesaotane joracaa Carenero Narejeenne jana coaracaaunne janate, uhe jataain mijiaaaineein carora tabai. Nii janate, jataain jicholeneein conoene enoto. Nii janate, atene netonai conoelanaala ichana tocohaneein ne. <sup>13</sup> Nii janate, jataain mijiaaainetiin uhin liaaca cujuanane jana naluha *iquera* inaa nujuarine amuneein nalue dede caje chauratane choaae arasijie. <sup>14</sup> Nii janate, retutunohiniha faferone tocohaneein nereetuhitiin nitajiheite dede. Nii janate, nerurujuaacoaain nelonae satiin situha cataaun nenacaauru obenecuru aina ichatane ucuunooru. <sup>15</sup> Nii jaunte, chauratane que satiin curuaanaa neein nenacaauru atane jachuuru cuhane, ichatane cataaun nenacaauru ajeri cuhaneuru nasichure, tabaaihuri aina jiniiquiin, chaen soondarooru curuaanaacuru, coriquihonacaauru, jataain itolere que laraajiin nenacaauru. Cairichanojineein nenacaauru, chaen cha ujuaihonelanaala nenacaauru, naaonjoainuri nasichure atane jachu, ajeri jachu, naaonjoaainunri cuhane. <sup>16</sup> Nitohaneente: “Canacaanu choaae nefaruhin canacaanu asihu, canacaanu coaraa taa rori caohacha-*trono* choaae lajuuaine coataa, jataain necairichanaa cuhane canacaanu casetecaa Carenero Narejeenne coataa. <sup>17</sup> Inae catohaneein caseteco coaraain necairichanaa cojoanonaa que turuhane jaun, nerinaain chunei abaantanaa nainera,” naaure.

## 7

### *Israeli laurichuru cojunacatenohineein nenacaauru*

<sup>1</sup> Nii baiha coaracaaunne janate, enoto mitu jelson, enoto soo jelson, enoto soo coarajeein cana raotono jelson, enoto soo coarajeein cana ajaabiji jelson, naaonjoainuri jelson chujurijiatocure jenaain anjeraauru. Ecu neeinte situha nii jenai laurii jelson caje uhin cujuanane coataa acatecure. Nabana situhi chauratane, cucuana, nuna, naaonjoainuri ichoae situhin jiatuhane coataa. <sup>2</sup> Chaen techu coaracaaune jana, enoto mitu asajai caje uhe leinjiin anjera. Acate Cana Coaunera ichaohin nenea cojunaca *seecho* siri. Nii anjerate tonijiaain eheque, nii jenaain nenacaauru anjeraauru, chauratane, cucuana cuhanai, naaonjoainuri aasaaena nainecuruhane jaanu raaurera rai. Nitohaneein tonijiaain ehequinte:

<sup>3</sup> “Jiaonriha jaiti Cana Coaunera cachaneein nenacaauru nauri que Cana Coaunera cojunaca siricha *seecho* tenihacachene jana, chauratane, cucuana, nunacuru, naajoainunri aasaecache,” naain, eeheequa nii leinjiin nii jenaai naraai aanjeraauru rai.

<sup>4</sup> Nii jana, aonacaaunne janate, le faasha jena choonca oaraancaain satiin Isaraelitaauru lauri caje nauri que Cana Coaunera cojunaca *seecho* sirichaaauru curuaacuru janiichure. <sup>5</sup> Nitohaneeinte,

Jodaa lauri caje lechoonca coroata oaraancaain nauri que Cana Coaunera cojunaca *seecho* que cojunacatenoine.

Jana Robeen lauri caje lechoonca coroata oaraancaain.

Jana Gada lauri caje lechoonca coroata oaraancaain.

<sup>6</sup> Jana Asere lauri caje lechoonca coroata oaraancaain.

Jana Nefatalii lauri caje lechoonca coroata oaraancaain.

Jana Manasee lauri caje lechoonca coroata oaraancaain.

<sup>7</sup> Jana Simeon lauri caje lechoonca coroata oaraancaain.

Jana Lebi lauri caje lechoonca coroata oaraancaain.

Jana Isacara lauri caje lechoonca coroata oaraancaain.

<sup>8</sup> Jana Saboloon lauri caje lechoonca coroata oaraancaain.

Jana Jose lauri caje lechoonca coroata oaraancaain.

Jana Beenjamiin lauri caje lechoonca coroata oaraancaain naaonjoaain Cana Coaunera cojunaca siricha *seecho* que acaauru auri que cojunacatenoineturuhane janiichuruhane jana aonaun.

### *Arajiin cachaauru somajai que cajionecooruhane*

<sup>9</sup> Nii baiha coaracaaunne janate, ecu araai lauriinchuru satiin chauratane sacutaain nenacaauru, araai lauriin nere que ereein nenacaauru, jelai natane que ichaohin nenacaauru, naaonjoainuri cachaauru ecu arajiin neeure. Acaaurute rori caohacha- *trono* aina Carenero Narejeen acatiha ecu arajiin chujuhacoore janiinacaje lanaala. Nitohaneeinte cajione somanerei que cajionecohinte, elele tocorijiane siijiariin cuure. <sup>10</sup> Nitohaneein cuhinte, tonijiaain ehequuin:

“Cana Coaunera- rai rori caohacha- *trono* ichoae nena aina nii rai Carenero Narejeente, arajiin itolere, que nejeratenacaauru amuritoeraneein ne,”

naaure tonijiaain nii ecu satiin caa chauratane sacutaain nenacaauru araai laurii cachaauru. <sup>11</sup> Nii janate nii rori caohacha aina nii coroata choonca jenai ichauhenaauru, nii jenai ichaohin nenacaauru, naaonjoainuri tionoritiin chujuhacoore satiin anjeraauru. Nitohaneeinte nii rori caohacha

acatiha neseeonriaain, atane que nauri turuanacanejeein nenorocooain Cana Coaunera corooaacure nii anjeraauru.

<sup>12</sup> “Nitohaneein neeuruhine.

Jataain caohatoha Cana Coaunerane coitucuuruhine itolere bana.

Necaohacha que necaohachaa Cana Coaunerane coitucuuruhine itolere bana.

Jataain itolere coitucueraneein niha Cana Coaunerane coitucuuruhine itolere bana.

‘Narihara,’ naauruhine acaauru rausiaaeca Cana Coaunerane coreniha itolere bana.

Jataain nelatiha Cana Coaunerane coitucuuruhine itolere bana.

Acaneein nihane coitucuhin, itolere icharaneein laraajiin nihane coitucuuruhine.

Nitohaneein neeuruhine chabana satonoelanaala. Nitohaneein neeine,”

naain, Cana Coaunera cocoasitaare satiin nii ecu nenacaauru anjeraauru.

<sup>13</sup> Nii janate, nii coroata choonca jenaain ichauhenaauru caje leinjiin canu rai:

“Chaaauruna caa somajai cajione que cajionecohacoaain cau ne. Chaaelai cajena uure,” naain canu caje bajaane janane: <sup>14</sup> “Iite acaauru coitucuhicha curuaanaa,” naain tonoraan.

Nii jaunte canu rai: “Caa cachaaaurute necairichanaa tabai abaantaaauruhana jaaun, Carenero Narejeen coichana aina cuaain somarianohiniha acaauru cajionene jaaun nesomariaain nedae acaauru cajione.

<sup>15</sup> Nii jaunte,

nii Cana Coaunera rai rori caohacha- *trono* acatiha neeure, jiiichoo, janotiin, naaonjoaain Cana Coauneraacha jerei ichacuruha rai Teenforo asaaene coina.

Nii rori caohacha choaae lauheconaate acaauru beraicheein acaauru rohan neein.

<sup>16</sup> Mijitena, cocoirena, enoto ajaano, ajaaronaa, naaonjoaain niha natiin acaauru reroecarinaai,

<sup>17</sup> acaauru beraiha nii rori caohacha cataaun nena Carenero Narejeen ne jaaun.

Nii Carenero Narejeente acaauru beraicheein, carenero beraihuruha beraihurerane rijijieein.

Acate, esinaaeca caohacha- ichaonaa tera que acaauru cocoreein,

raotojoein ichaaoruhane coina.

Inae acaauru coroatajaniha Cana Coaunerane jaun necairichanaa coaraain chanaaururinaai chabana,”



nae nii coroata choonca jenaain ichauhenaauru caje leinjiin.

## 8

*Nii fuera caainsine aina jujuai mocooruhane jaan curu oro caje nena*

<sup>1</sup> Nii fuera caainsine joracaa Carenero Narejeenne janate, carajaaajoaain curuatoraain curuaaecoore dedeeu nenacaauru.

<sup>2</sup> Nii catiariine ecu caainsinei anjeraauru coaraaun Cana Coaunera acatiha chujurujua chujurujuaauruhane jana. Nii janate nii caainsiine anjeraauru nainetiin nii toroonfeta teeure. <sup>3</sup> Nii janate uhe leeochoa anjera, jujuai mocooruhane jaan curu oro caje nena uhaain. Nitohaneein uhinte, nichaaurae nii Cana Coaunera belaihuruhane jaan rori *altar* acatiha. Nii janate tabaain nii enuha sacari jujui teeure, nii rori caohacha oro caje ichanohi *altar* acatiha, ichoae teein mocohane coina. Nitohaneainte mocohane nainiha Cana Coaunera bajaure nii ecu satiin Cana Coaunera cachaneein nenacaauru. <sup>4</sup> Nitohaneein nii enuha sacari jujuai mocoha nii anjerane janate, rai biji caje Cana Coaunera acatiha ecuun cue rai cousuraca. Mocohane nainiha Cana Coaunera bajaure nii ecu satiin Cana Coaunera cachaneein nenacaauru.

<sup>5</sup> Nii baiha, nii enuha sacari jujuai mocohane jaan curu raoriin, Cana Coaunera belaihuruhane jaan rori caje, usi biine taotaoriin nii curu cuhane teein, usi biine joae nii anjera atane choaae. Nii janate, toni arara, erena, jiacano, carora, naaonjoaainunri jataain mijiaaaineein.

*Toroonfeta toteeuruha anjeraaurune*

<sup>6</sup> Nii janate, inae neruujeeure nii caainsine anjeraauru acaauru rai toroonfeta toteeuruhane coina.

<sup>7</sup> Inae rai toroonfeta totiha nii leinjiin anjerane janate, chauratane ichoae nalue jelajinaa jaberoco aina usi ichana que jasiin. Nii jaunte chauratane neleru nichataja mocohane jaun, satiin chauratane neleru nichataja que nenacaauru nunacuru, chaen omanecuru, naaonjoaainunri mocoe.

<sup>8</sup> Nii jana rai toroonfeta totiha nii anjera coroatajane janate, dede caje nalue jataain tabai usi jaberoco cucuana cuhanene jana, nii cucuana neleru nichataja neleruhin ichana tocohaneein nedae rai baca. <sup>9</sup> Nii naluha usi jaberocone jaunte, itolere nii cucuana cuhane nenacaauru nichata saain neleruhin oore. Nii cucuana cuhane nenacaauru boteeuru netonaite nichata saain neleruhin mocohin nita-jeure.

<sup>10</sup> Nii janate, rai toroonfeta totiha anjera nichatajane jana, siricho tocohaneein mocohin dede caje nalue arasijie seeonjoa, satiin nucuhecuro nichata neleru aina atane jachu caje mitunacaauru esinaaeca ichoaae. <sup>11</sup> Nii arasijie curuaate Elonaine. Nii jaunte nichata saain neleruhin elonaa nucuhecuro baca aina atane jachu caje mitunaa esinaaecane jaun, ohacooaure arajiin cachaauru.

<sup>12</sup> Nii janate rai toroonfeta totiha nii anjera nejenane jana, nichata saain nelerujuacoaain nocohejaaitiin naasajeein cooene enoto, atene, arasijie, naaonjoaainunri. Nii jaaunte, jiiichoo aina nocohena nichata neleru que carajaain conoene nii enoto, atene, arasijie, naaonjoain.

<sup>13</sup> Nii jana coaracaanne janate, dede catai jeloon jiaauluhin situha cuha leinjiin uujirii tocohaneeine jana aonacaanne janate: "Jataainte cairichaaajoaaurureein caa chauratane que ichaonacaauru cachaauru, inae toroonfeta toteeuruha nii leecha nichatajai anjeraaurune," nae leinjiin uujirii tocohanei tonijiaain.

## 9

<sup>1</sup> Nii janate, toroonfeta totiha anjera nesaoquine jana dede caje naluha uha arasijie chauratane choaaene jana coaraaun. Nii arasijie raite, cana asajai cochabi teeure. <sup>2</sup> Nii cana asaae nena atane jachu bacuuju joaracaane janate, jelai caje mitue suruaa orono caje aihane tocohaneein. Nii suruaate nocohenaneein enoto tein, cujuanane maajeein nocohena neein te. <sup>3</sup> Nii janate, nii suruaa caje mituhin chauratane sacuritaain riaaniha sisiincho semanaane jana, aiha canaanne rijijieein cacha cunaitaane jaanu teeure rai. <sup>4</sup> Nitohaneeinte letoanajaain, omane, ajaena, enuha, naaonjoaainunri aasaecuruhane caohateein, nii nauri que Cana Coanera cojunaca siricha *seecho* que cojunacatenohine lanaala nenacaauru cunaitaauruhane coina aitocure nii sisiincho semanaa rai. <sup>5</sup> Nete cachaauru atinaauruhane coina letononeeurene. Raujiaaincha cacha atinaelanaala cusihane, canaun cusi rijitocojoaain cunaaain saoqui ateein cacha cunaitaauruhane coina aitiin letononeeure. <sup>6</sup> Nii cojoanona banate niqui onaa jerecurureein cachaauru, nete oorenereein jaiti ooruhane jaan que turuenihane jaun. <sup>7</sup> Nii sisiinchoorute, sonaana que neuruhane coina relanojoneein nenacaauru cabario tocorijianein, oro caje nena-comai tocohanei que asihocoin cacha meri tocorijiane acaauru meri. <sup>8</sup> Nii sisiinchooru couturi ujuite caratohanae ene couturi ujui tocohaneein. Rai catute aain tabai tocohaneein nena- leon catu tocorijiane. <sup>9</sup> Acaauru jaberocote, coata que bujuuain ne. Jana acaauru itarote jataain mijiaaaineein

toni jiaauluuruha ne. Sonaana que neein caro tararaa cabarione jana tonihane rijitocojoaain toni. <sup>10</sup> Jana rai cusite rai nuseei que ne, canaun cusi tocohaneein. Nii rai cusi que cacha cunaitaraneainte neeurelu saogui ateein. <sup>11</sup> Nii sisiinchooru curuaanaate cana asaae atane jachu cuhane nenea anjerane. Jana rai curuaate Ebereeo ere cuhane Abadoonne. Jana Curieco ere cuhanete, Apolihoonne.

<sup>12</sup> Nitohaneainte situe nii necairichanaa nunuhe. Nete jaiti lanae coroatajai.

<sup>13</sup> Inae rai toroonfeta totiha nii anjera nesaotanene janate, Cana Coaunera acatiha oro caje nenea rori-*altar* que jenaain nenea jicho caje toni eheeona. <sup>14</sup> Nitohaneein toniinte:

“Nii jenaai anjeraauru ichoharaain nenacaauru jihaneeu. Acaaurute nucue tabai Eofarate auhaniha ichohanohineein neure,” nae nii eheeona.

<sup>15</sup> Nitohaneainte, nii jenai anjeraauru jianecure, cachaauru nichata neleru sohin jaaoruhane coina. Nitohanei ichacuruhane coina jatoroaain neeuruhane bajaanaa, rai batene, cojoanonaa, naaonjoain que inae tihane jaun. <sup>16</sup> Nii jana aonanaacaunne janate, ecu neure coroata fasha millonneein cabario choaae cunacaauru soondarooru.

<sup>17</sup> Nii cabario choaae nelaurianacaauru coaracaunne janate, usi lanaro tocohaneein nenea que bujuatenohinijiacoe acaauru nalarijiaauru. Nichata lauriinte coloe nii acaauru nalarijia que nenea coata, beraurusiojoaain, lanajiojoaain, asofere tocohaneein, naaonjoaain. Jana nii cabariocuru couturite janolari couturi tocorijianihane jana acaauru ujuae caje mitue suraa, usi, asofere, naaonjoain.

<sup>18</sup> Nii cabariocuru ujuaae caje cacha cairichaeranu que mitunaa suraa, usi, asofere, naaonjoaain caaute nichata saain neleruhin ohacoaare cachaauru. <sup>19</sup> Nitohaneainte rai nujuuae cuhane, rai nuseei que, naaonjoaain nii nitohanei ichaane jaanu rai nelate sirichure nii cabariocuru. Nii rai nuseeite acano tocohane. Chaen rai coturi quete cacha cunaitaare. Arajii cachaaurute ohe nii necairichanaa caaun.

<sup>20</sup> Nete acaauru cautecuru nii necairichanaa caje nichotenacaauru, enanetoejein baaso ichacuruhane jianecurene. Nii jaunte, Moconajaeracuru bajaebajaecuruhane jianecurenihane jaun jerichanejeein oro caje nenea ecaantooru, coata-bronce caje nenea ecaanto, coata plata caje nenea ecaanto, ajeri caje nenea ecaanto, chaen enuha caje nenea ecaanto, naaonjoaain bajaebajaecure, ichaohin, nerurujuaain, amuhin, ereein, notaain, naaonjoaauruhane que airijiin. <sup>21</sup> Niheichu sonajaain jaohin, benane neein, nitohanai osa que nesaruhin nenea naineniha cacha natiin namute quicha aina ichaohin niha natiin, baaso

osa que nesaruhin, asijiauhin, naaonjoaain ichaaoruhane jianecuruhi.

## 10

### *Quiricha laenanohi siichaa anjerane*

<sup>1</sup> Nii jana coaracaanne janate, dede sacari catauun, cou-turi ichoaae iino baijiaain, dede caje fauha uhe- jataain nelate que nelatei leecha anjera. Enoto tocokanein jiqui-hacoha rai merine janate, usi lanaro tocokane rai fero. <sup>2</sup> Nitokaneinte biji cuhane retutunohineein joaracanojoi quiricha sichaain, cucuana ichoaae rai tijia raotono nichajai teein, rai jera najaa biji nichajai te chauratane ichoae. <sup>3</sup> Nii anjerate, nesari corajiha mijiaaenein aitoha aainne rijitiin tonijiaain ere. Nii jana, caainsinei araracurute tonihure. <sup>4</sup> Nii toniha caainsinei ararane baiha, quiricha cuhane laenana jerichaaunne janate:

“Ti suujua cuhane aitiin toniha nii caainsinei ararane jaan rucuecu chunei rai belanaala. Coa quiricha cuhane laenaa,” naain dedeeu toni.

<sup>5</sup> Nii ereuruha caainsinei araracurune catiaaeriinte, nii cucuana choaae raotono nichajai tijia chujuhecaain, chauratane que jera chujuhequera, raotono nichajai biji sijitae.

<sup>6-7</sup> “Inae nenacaaen nerinaain cojoanona. Inae toroon-feta totiha nii anjera necaainsinene janate, inae asinojoi-neein Cana Coauneraacha sirii que turuhane jaan aicheein, nii aitiin berejetocuruhalu nere bera inoensihurune rijijieein,” nae, itolere bana ichaohin, dede, chauratane, cucuana, chaen itolereuru coneranein nenacaauru, naaon-joaainunri coauneranein nena Cana Coaunera notaracaae neein aitohane coarateein nii anjera.

<sup>8</sup> Coaiteen nii dedeeu toniin quicha aonai erenaate:

“Chajaain cuhin, nii cucuana aina chauratane choaae chujuhequi anjera caje nii quiricha laojoiri joracanojoienein- niicha siichai raaorinihu,” nae canu rai.

<sup>9</sup> Niritoha canu raine jaun, cuhin nii quiricha bajaanune janate:

“Nocoa. Quihu. Chujuaae cuhanete irichaje rijitocojoaain ichohantoreein. Nete laen ii suri cuhane elonainein nerotoreein,” nae carai nii anjera. <sup>10</sup> Nii jana nii anjera biji caje nii quiricha raaoriin quihanune janate, canu ujuaae cuhane irichaje rijitocojoaain ichohante. Nete inae quihanune baiha, canu suri cuhane elonainein nerotoe. <sup>11</sup> Nii janate:

“Coaiteen, araai laurii cachaauru, lauri lauri jelai teein atane siriin que ichaonacaauru, nere que ereein nenacaauru, itolere curuaanaacuru, naaonjoaainunri que aitiin Cana

Coauneraacha beratei beebejiha cuhinete ne,” naaure canu rai.

## 11

*Niicha icharatei coaranuuru letoaa coroatajaain Cana Coaunerane*

<sup>1</sup> Nii baihate, carai jiarana tocohaneein leinjiin bara teein: “Chajaain nimichuhin cuhin Jerosaleeun nenea Cana Coaunera bajaauruhane jaan coloheri, Cana Coaunera belai-huruhane jaan rori, naaonjoaainunri cojunacateeu. Chaen ecu janiichu, inaaajoaaincha Cana Coaunera coroaeca neeurureein. <sup>2</sup> Coa Cana Coaunera bajaauruhane jaan coleri rohan nenea airiniha cojunacatiha. Niite teure Jorioni-heichuru rai. Acaaurute Cana Coaunera nese cocoaichacuru amiharateeurureein, jataain cairichanajaain, jena choonca coroata ateineein. <sup>3</sup> Canune coroatajai canu ere beeurera letoaareeunni, uhin le oaraanca coroata fasha saota choonca janoneein canu ere beeuruhane coina,” naain canu letoaare.

<sup>4</sup> Nii coroatajai Cana Coaunera ere beracurute coroatajai olibo nujuan aina coroatajai usi temura neein neure, cana rai chauratane coauneraneein nenea Cana Coaunera acatiha. <sup>5</sup> Chunocoha chatohaneein acaauru tenaa jerera nihanete, acaauru ujuaae caje usi mitaaurureein jitariin acaauru que nejeratenacaauru mocohane nitajeeuruhane coina. Nitohaneeinte oorureein nii acaauru rohecaeraaauru. <sup>6</sup> Nii coroatajaihurite nelate que nelateein, cana dede funaa nainecurureein Cana Coaunera ere beebejeeuruhane jana uha elo ne coataa. Chaen techu, ichana neein acau corenaa naainecurureein. Nii rijijieein techu, araai laurii necairichanaa turuanaa nainecurureein caa cana rai chauratane que, acaauru jerecuruhane tocohaneein.

<sup>7</sup> Inae acaauru que Cana Coauneraacha beratenojoi be-naa naaanaauruhane janate, mitureein cana asajai caje leinjiin neecha aansai ataebinae tabai, acaauru sohin acaauru jaohane coina. <sup>8</sup> Nitohaneein acaauru sohin acaauru jaohane janate, Cana Coaunera Calaohi cairichaaauruha coroso quene jaan nese coero cuhane nereein acaauru jaberoco. Jerosaleen nihane saijieein Sodoma, Egipto, naaonjoainein acaauruhacha curuaateihu. <sup>9</sup> Nichata janohin cataan uu-jue banate acaauru jaberoco coaraa cuurureein araai laurii nenacaauru, coriaae caje unacaauru, lauriu lauriu nichao que ichaohin nere que ereein nenacaauru cachaaauru, naaonjoainuri. Nete, acaauru jaberoco conautecuruhane caohatereein. <sup>10</sup> Nii nainihate jataain rachoojoeeurureein caa chauratane que nenacaauru cachaaauru, ooruha nii coroatajai Cana Coaunera ere beebejeeurerana jaun. Nitohaneeinte

rachoojoein beseta ichaain ita belaiha cuurureein itolere nijihanai que, jataain acaauru cairichaeranuneein aihuruha nii coroatajai Cana Coaunera ere beebejeeurera rautaaureni-hane jana, inae atinanohineeuruhane jaun.

<sup>11</sup> Nete coaiten nichata janohin cataan uujue bana acaauru ichatiha Cana Coaunerana jaaun ichanaain nimichucuruhane coaraain jataain casihure satiin nii acaauru coaraauru cachaauru. <sup>12</sup> Nii catiaaeriinte, dedeeu mijiaaaineein toniha erena jana, “Chajaauchete ini,” naain toniha nii erenaane aonacure nii coroatajai Cana Coaunera ere beebejeeurera. Niritoha nii erenaane aonaainte nii acaauru que nejeratenacaauru notaracaae dede sacari aina cuhin dedeeu iniha cuure. <sup>13</sup> Nii rijieeoritiinte uha carora tabaine jaun comoe nii nese neleru lechooncaniu nenacaauru lorerichurune jana, oorureein caainsi oaraancani cachaauru. Nii jana acaauru caute- ecu nedanacaauru cachaaurute nesoone caaun Cana Coaunera coroaecurureein.

<sup>14</sup> Nitohaneente situe nii necairichanaa tabai coroataja. Nete nii baiha coaiten ureein necairichanaa nichatajanu.

*Toroonfeta totiha anjera necaainsinene*

<sup>15</sup> Nii baiha, toroonfeta totiha nii anjeraauru caainsinene janate, mijiaaaineein dede que toniin:

“Caa chauratanete  
Cana Coaunera aina rai Calaohi Jesocurisito raineein nihane  
jaun,  
acaauruhacha satonoreein tiaain caa chauruatane Curua-  
naaneein neroranereein,”

naaure. <sup>16</sup> Nii jana, nii coroata choonca jenaain rai rori ichoae Cana Coaunera acatiha neein laurujuualaurujua-nacaauru ichauhenaaurute neseonraain atane que tiaain nenorocaaain:

<sup>17</sup> “Ii, nunuhe caje coauneein satono que tiaan  
itolere Coauneraneein-  
itolere ichana naineraneein neeine  
coroaecaanura Cana Coaunera.  
Iite ichaohin itolere janonaa bana neein  
itolere que laraajiin chabana satonoelanaala  
Curuanaaneein neeine  
nunuhetei inae.

<sup>18</sup> Ii ainate niqiu obaaecure  
caa chauruatane que nenacaauru ii coitucuhichuru.  
Nete inae turue acaauru cairichaaine jaan cojoanonaa.  
Inae turuha onacaauru rucuequine jaan cojoanonaa.

Ii letonocuru- ii ere beebejeein amuhemuhenaacaauru *profetacurute*  
 coroatajaniha curiquiin;  
 acaauru ii cachaneein ii jereeine rijijieein neeuruhane jaun.  
 Inae ii sacuurera coroatajaniha curiquiin,  
 itolere canaanaihuru, ichauhenaauru, naaonjoaain.  
 Nitohaneeite  
 itolere caa chauratane que nenacaauru itajeraneein nenea  
 itajeriquiin,”

naain Cana Coaunera coasitaare.

<sup>19</sup> Nii janate, neyoracae dedeeu Cana Coaunera coroaecuruhane jaan coloheri Teenforone jana ecu inanacaain ne Cana Coaunera rai rauhi curu camela. Nii janate dede caje ococoe jiacanocuru, tonijjainunri, araracuru, caroracuru, jelajinaa jaberocooru, naaonjoainuri.

## 12

### *Leinjiin ene aina leinjiin ataebinae dragon*

<sup>1</sup> Nii janate dede que ecooca leinjiin cana dede cojunacane jana, inanacae leinjiin ene- enoto que conaanojoneein que cajoneconaa rijijieein- rai tijia asaae atene siriin, leinjiin comai lechoonca coroatajai arasijie siricha lauhecain.

<sup>2</sup> Nii enete canaanai cosuriu nihane jaun janoanaa jereein cuna caaun necairichajeein auhauhaque. <sup>3</sup> Nii catiaaeriinte coaiteen ecooca cana dede cojunacane jana inanacae leinjiin ataebinae- *dragon* lanajai tasinojoain- caainsinei couturiin lechoonca jichohin. Satiin nii caainsinei couturi nainetiinte ne rai comai.

<sup>4</sup> Niite rai nuseei que dede nichata neleru caje arasijieuru joae chauratane ichoae. Nii ataebinae- *dragonte* ococoe nii ene rene, nii beree nejanoaneni quiha nejanoha rijieeoritiinne coina.

<sup>5</sup> Nii janate, inae quicha cojoaajiineein nejanoae nii ene beree. Aca satiin chauratane que lauri lauri nenacaauru curaanaa nihane coina- coata caje nenea otiha que biji achunequuin. Nete inae nejanoa rijieeoritiin nii beree raain amaare Cana Coaunera aina rai rori acatiha.

<sup>6</sup> Nii jaaunte, neniha cachane jaan cuhin soroe que baniha- teein Cana Coauneraacha rucujueihu cuhin nii ene, ecu teein beraichateein coroaaterate le ooraanca coroata fasha saota choonca janohin Cana Coaunera.

<sup>7</sup> Nii baihate, nii dedeeu ita soore nii tabai ataebinae- *dragon* aina, Miqueli aina rai anjeraauru. <sup>8</sup> Nitohaneein ita soorua nii tabai ataebinae ainane janate, acaauru amuritonaa nainesihurene nii ataebinae rai anjeraauru. Nii jaaunte, inae dede que nenea nainecurene nii tabai ataebinae aina rai anjeraauru. <sup>9</sup> Nitohaneeinte, nii ataebinae-

*dragon* tabai jaaore dede caje. Nii ataebinae- *dragonte* inoaelu caje coauneen nenea acano tabai inoensi- Moconajaera ne. Acate satiin chauratane tinonoriitiin cacha coritaeraneen ne. Acate, nii rai anjeraauru aina jiniiquiin chauratane que jaonojoinecure.

<sup>10</sup> Nii janane dedeeu mijiaaaneen toniin:

“Inae ichoteratenojoi niha cachane jaan cojoanonaa que turuha. Niicha ichana nainei ichaain itolere curuanaa neen niha Cana Coanera aina cocoinanacai niha Mesihazine jaan cojoanonaa quete inae turue. Inae Cana Coanera sacuurera coulurujuera Moconajaera jaaoruha. Acate acaauru couluruje, jiichoo, janotiin, itolere cojoanonaa bana, naaonjoaain Cana Coanera acatiha neen. <sup>11</sup> Cana Coanera coreniha cana nejeraneen nenacaaurute cana osa coreniha atinanojoineen nenea Cana Coanera Calaohi coichana aina, niicha beratei acaauruacha beebejeei, naaonjoainuri aina cuaain inae amuritoore. Nitohaneente Cana Coanera ere beebeejeeuruhane coreniha coasilanaala ooruhane coina jatoroaain neen aihure. <sup>12</sup> Rachoojoeuche dedeeu neiniquichene. Jana, chauratane que nenacaauru, cana temurau- cucuana cuhane nenacaauru, naaonjoaainunrite jataain cairichaojoaure, inae ichuunnijia necairichanaa coaraane cojoanonaa que turuhane que nainaane jaun, acaauru rene fauha cuha jataain obajeein Moconajaerane jaun,” naane jana aonajeeun.

<sup>13</sup> Chauratane choaee jaonojoinihane que nainacoriin, nii ene canaanai janoera coineteen soha cue nii nechu aansai ataebinae. <sup>14</sup> Nii janate, nii ene itaro jaaure tasionjoaain uujiiri tabai itaro tocohaneein, coriaae cuhin nii acano inoensi caje soroha neniha cachane jaaun cuhine coina. Ecu teente, nii ene coroaateure nichata jaanacai cataaun reein tiaain. <sup>15</sup> Nii acano inoensite nujuae caje acau mitaain nucuhe jae, raotojoein nii ene sohin jaohane coina. <sup>16</sup> Nete, nii ene corootajane chauratane, nujuaae caje acau jaohin nucuhe jaa nii ataebinae tabai- *dragonne* jana lichurujuaaitiin jacolohitiin. <sup>17-18</sup> Nii jaaunte, jataain nii ene cotaain coraje nii ataebinae- *dragon*. Nii jaaunte cuhin, nii enecha foerateeuri aina rai bereecuru, satiin Cana Coanera ere tonoraain Jesso cachaneen neeuruhane beeuruhane que casilanaala nenacaauru, naaonjoainuri soha cue nii ataebinae tabai.

## 13

### *Corootajai ataebinae tabai*

<sup>1</sup> Nii janane caainsine couturiin, le choonca jichohin, naaonjoaain cucuana caje mituhin iniha uha leinjiin ataebinae



tabaine jana coaraaun. Le jichooru naineen niha comaine janate, Cana Coaunera baijiaraanu rijitiin couturichuru naineen laenanohineen ne erenaa. <sup>2</sup> Nii ataebinae tabai canuhacha coaraite, leinjiin aain tocohaneen acomari tija tocohane rai tija. Nii jana rai nujuaaente, aain tocohaneen nenea leeon ujuaae tocohane. Nii leecha ataebinae-*dragonte*, nii aain tocohaneen nenea rai, jataain nelateen nihane jaane maajeein rai tein cocoainaan, nelaurianaja rorine maajeein rai te. <sup>3</sup> Nii aain tocohaneen nenea ataebinae couturi leinjiinte, ohane coina ichanohin tocohaneen jataain temuhin cunaitanohi ne. Nete nii rijijieein coichanojoneei nerautaa nii necoasajane coaracuruhane jaun, jataain cojoelatiin coaraain, nii janolari tocohaneen nenea ataebinae tabai esenetaain sacuure, satiin chauratane sacuritaain nenacaauru cachaauru. <sup>4</sup> Nii jaunte, nii aain tocohaneen nenea cocoainaa nii leecha ataebinae-*dragonne* jaun, acaneein neeuruhane coroaecure, “Cha caa leinjiin ataebinae tabai- aain tocohaneen nenea amuritona naine. Nihei chuni amuritona nainera,” naain acaneein niha nii aain tocohaneen nenea ataebinae tabaine coroaecure, nii leecha aina curuaecaain.

<sup>5</sup> Chaen techu, Cana Coaunera baijiaraanu rijitiin, itolere que nelaetoha nocoetiin iriha nii janolari tocohaneen nenea ataebinae tabaine jereein, jena choonca coroata ateein cocoaina nacaineen nihane coina cocoainae nii leecha ataebinae-*dragon*. <sup>6</sup> Nitohaneente, Cana Coaunera baijiaraanu rijitiin que nejerateen, rai nenaja *santuario* quene maajeein ereein, dedeeu nenacaauru quene maajeein nejerate. <sup>7</sup> Chaen techu nii ichoae tacaain, coaiten nii leecha ataebinae cocoainae nii *dragon*. Cana Coaunera cachaneen nenacaauru que nejerateen, acaauru amuritothane reentiaain sonaana que nihane jereein, lauri lauri nichao que ichaohin, lauri lauri nere que ereein, lauri lauri natane que ichaohin, naaonjoainuri curuaanaaneen nihane coina cocoainae. <sup>8</sup> Nii janolari tocohaneen nenea ataebinae coroaeraaurute, satiin caa chauratane que ichoteratenojoina lanaala nacaauru cachaauru neeure. Coat- iha laenanohinihei acaauru curuaa nii necoaaunaalu chauratanene caje coauneen nichoteeneuri curuaacuru siriin nenea quiricha cuhane. Nii quirichate cana coreniha sohin jaonjoain Carenero Narejeen rai nichoteeneuri curuaa cooiricha ne.

<sup>9</sup> Chunocoha aonana naineraauru aonacurumiin:

<sup>10</sup> Caresero cuhane neeuruhane coina nenacaaurute, caresero cuhane amanojoneecurureein.

Jana sabere que sohin jaonojoineturuhane coina neeninurute sabere que sohin joeracurureein.

Caute coarareein esinae rauhijiriin itolere que laraajiin, niicha esenetai esenetaauruha Cana Coaunera cachaneein nenacaaurune.

<sup>11</sup> Nii baihane, atane caje iniha cuha leinjiin ataebinae tabaine jana coaraaun. Nii jana rai jichote carenero narejeen jicho tocohaneein coroatajae. Nete nii leinjiin ataebinae-*dragon* tabai rijitiin ere. <sup>12</sup> Acate nii jauriaanejeein nenaataebinae tabai rijijieein jataain cocoinanohineein ne, nii jauriaanejeein nenaacatiha neein. Nii jaunte, nii jauriaanejeein nenaataebinae tabai-temuhin cunaitanohin couturii- coroaecuruha satiin caa chauratane que nenacaauru cachaaaurune coinane maajeein ichae. <sup>13</sup> Chaen techu, satiin cachaauru notaracae itolere cojoelanaacojoai ichaain, dede caje atane choaae usine maajeein nalutiae. <sup>14</sup> Nii jauriaanejeein nenaataebinae tabai notaracae cojoelanaacojoai ichaane aina cuaainte, caa chauratane que nenacaauru cachaauru coritaain- acaauru que nii sabere que temuhin cunaitanohin niha natiin ichaohin nenaataebinae tocohaneein ecaanto jaerate. <sup>15</sup> Nii ataebinae tocohaneein niicha ichacuri ecaanto rai ichaonaa teeinte erelate nii ataebinae tabai coroataja. Nii jaunte, satiin coroajelanaala nenacaauru cachaauru sohin joerate nii ecaanto acaauruhacha ichai. <sup>16</sup> Nii choae tacaain techu, satiin canaanaihuru, ichauhenaauru, coriquihonacaauru, cairichaihuru, letononeein nenacaauru, letononelanaala nenacaauru, naaonjoainuri, biji raotono nichajai que, acaauru auri que, naaonjoaaine maajeein rai cachaneein neeuruhane coujunacaneein acaauru coujunacaterate. <sup>17</sup> Nitohanihane jana coaracaanne janate, chuni nii ataebinae curuaa aina rai coujunaca sirilanaala nena, nii chaelai coreteein, chaelai que necoreteein, naaonjoaana nainecurene.

<sup>18</sup> Caute laen coarareein itolere coitucuerera. Coitucuerate, nii ataebinae coujunaca janijiin coitucureein. Nii ataebinae coujunacate, cache coujunaca rijijieein ne. Acate, saota fasha saota choonca saotaneineein ne.

## 14

*Nenatecuruha le fasha jena choonca jena oaraancai cachaaaurune*

<sup>1</sup> Nii baiha, Sioon bichatane ucuuno ichoae chujuhecoha Cana Coaunera rai Carenero Narejeene jana coaracaanne janate, ecu rai nauri que Carenero Narejeen- atinanohineein nenaalu curuaa aina rai Inaca curuaa siriin ecu aina neure le fasha jena choonca jena oaraancaain cachaauru.

<sup>2</sup> Nii janane, caraturi caje naluha acaune rijitiin, toniha ararane rijitiin, naaonjoaain jataain mijiaaaineein toniha dedeeune jana aonaun. Aonacaaunne janate, arajii quitara rijijieein nena arafa toteuruha arajiin cachaaurune rijitiin netonijiae. <sup>3</sup> Nitohaneein netonijiaainte ena nena nenatena que nenatecure, nii rori caohacha ichoae nena, chaen nii cacha tocorijianein jenaain nenacaauru, chaen nii ichauhenaauru, naaonjoainuri acatiha neein. Nihei nii chuni, nii nenatena que nenatena nainera. Acaihaniji caa atane caje le fasha jena chonca jena oaraancaain ichoteratenojoneein nenacaauruhachate, nenatena naine nii nenatena que. <sup>4</sup> Acaaurute, chabana suujua corelanaala niheichu nii chuni acaauru suujua corera tonoraelanaala neincunaa jerihane jaau cuha nii Carenero Narejeene jiniichaa in amuhemujeein neeurure. Niichurute, sati in cachaneein neinichaachene caje ichoaichaniha ichoteratenojoneein nii Carenero Narejeen aina Cana Coaunera belaiha tenojoneein neeure. <sup>5</sup> Acaaurute, nii chariji bana casaje ujuaihonelanaala- niheichu baasoneein ereein, naaonjoaain neeurene.

*Nichatajai Cana Coaunera letono anjera benojoin*

<sup>6</sup> Nii janane dede catai jeloon jiaauluhin situha uha leinjiin anjera, nii chariji bana satonoelanaala nena beratenojoin erena biha uha, lauri lauri natane siriin nenacaauru, lauri lauri nichao que ichaonacaauru, lauri lauri nere que ereein nenacaauru, lauri lauri nenaja que nenacaauru, naaonjoainuri raine jana coaraaun. <sup>7</sup> Nitohaneein jiaauluhin situhinte: “Baaso ichara casetecaera niha Cana Coaunerane coitucuhin Cana Coaunera coroaecuche. Inae caohacha ichaeneeichene, baaso ichaquichene coitucuhane jaa cojoanonaa que inae turuha. Cana rai dede, chauratane, cucuana, atane suujua caje nalunaa acau, naaonjoainuri coauneraneein nena Cana Coaunera coroaecuche,” nae tonijiaain ehequiin.

<sup>8</sup> Nii baihate coaiten caaijie uhe rai coroataja- leecha anjera. Nitohaneein uhinte: “Inae nitajeeuruha Babilonia cocoaichacuru, nechu joareein jataain baasoneein ichaoha cachane coina ichao ajaelaera que sati in chauratane lauri laurii ichaonacaauru cachaauru ichao ajaelae ajaelajeein nerejetilu,” nae nii anjera coroataja.

<sup>9</sup> Nii baihate coaiten caaijie uhe rai nichataja leecha anjera. Acate: “Chunocoha nii ataebinae tabai corojeein nii tocohanein nena ecaantone maajeein corojeein, rai nauri, biji, naaonjoain que cojunaca sirichate, <sup>10</sup> obajeein nitohanai icharaauru caseteco coaracuruhane coina acaauru

que banihateein Cana Coauneraacha rucujei bino que co-  
cokin, asojoere tocohaneein moconaa usi tabai jana mo-  
coorureein, Cana Coaunera rai anjeraauru, rai Carenero  
Narejeen, naaonjoainuri acatiha netiin. <sup>11</sup> Nii chariji bana  
satonolanaalate itolere janonaa bana mocoha cuurureein,  
janotiin, jiichoo, naaonjoaain nii ataebinae corojeein, nii  
tochaneein nenea ecaantone maajeein corojeein, rai cu-  
ruaa cojunacane maajeein sirichauru,” nae ehequiin nii  
anjeraauru nichataja.

<sup>12</sup> Enate laen itolere que laraajiin neeuruha Cana  
Coaunera cachaneein nenacaauru, nere tonoraain itolere  
bana janelanaala jeriha Jesusone rijijieein ichaauruhane  
necoharareein.

<sup>13</sup> Nii jana aonacaanne janate:

“Aonaain laenau: Nerausiaecate cuurureein ena caje  
coauneein nunuhetein Cana Coaunera esenetaain  
ooruhane que tiaaajoaain nere tonoraain ichaonacaauru,”  
naain toniha dedeeune jana:

“Aihachuhisicha. Acaaurute nebetacaaurureein namiha-  
neen caje. Canune acaauru que acaauru amihaneen  
coaratereunni,” naain tonorae Cana Coaunera Suujue.

*Caa chauratane que nenacaauru taojiaera*

<sup>14</sup> Nii jana coaracaanne janate, dede sacari jana lau-  
juae leinjiin cacha tochaneein nenea- coturi que oro caje  
ichanohin comai siriin- sabere ajihanti que biji achunequiin.

<sup>15</sup> Nii janate Teenforo asajai caje mitatiin: “Chajaain nii  
taojiaaine jaanu que iicha amai que- nii iicha raaeninuru  
taojiaain ranajaau, inae cataa caa iicha raaeninuru- caa  
chauratane que nenea- inae rai cojoanonaa que turuhane  
jaun,” naain eheque nii leeocho anjera, dede sacari jana  
laujuai rai. <sup>16</sup> Nii jaunte, nii niicha amai sabere que niicha  
raaeninuru taojiaain, caa chauratane caje ranajae nii dede  
sacari jana laujuai.

<sup>17</sup> Nii baihate coaiten dedeeu nenea Teenforo caje  
mitue leeocho anjera- acaentonai sabere ajinai que biji  
achunequiin. <sup>18</sup> Nii janate Cana Coaunera belaihuruhane jaa  
rori caje mitatiin: “Chajaain nii ii sabere que nii chauratane  
que nenea oba inaa saau. Inae cataa nii oba inaacuru,” naain  
ehequiin nii sabere que biji achunequiin nenea cotijiae, nii  
leeocho anjera- usi curuaanaa.

<sup>19</sup> Nii jaunte, sabere que nii chauratane que nenea oba  
taain, raain, rucuhacane jaa cuhane te, ecu teein oba baca  
rocohane caina. Nii oba tainaate inae caseteco tabai letoaa  
Cana Coaunerane beraneein ainaa ne. <sup>20</sup> Nitohaneein nii  
rucuhacuruhane jaan cuhane rucujeein, nese udaa nii oba  
baca rocooruhane janate, ichananeein mituhin nichata fasha

oaraanca metoroneein jelaai jojoe cabario ujuaae ucuunejeein ucuacaain.

## 15

*Caaunsine anjeraauru- caainsii laurinei itolere necairichanaa satono uhaaurera*

<sup>1</sup> Nii jana dede coaracaanne janate que ococoe jataain cojoelanaacojoai- coara coina ecotenojoin tasionjoaain. Nii janate, ecu neure caainsiineein anjeraauru, itolere necairichanaa que cacha cairichaeranu uhaain. Nii quete, jataain nobaaeneein niicha coacui satonote Cana Coaunera.

<sup>2</sup> Nii jana cucuana baca coaracaanne janate, usi que jasisii tocohaneein ajarotiin ne. Nii cucuana baca tocohaneein ajarotiin nenea auhanihate, acaauru rai Cana Coauneraacha tei quitara rijijieein nenea arafa siijiarin neeure arajiin cachaauru, nii ataebinae tabai, chaen nii tocohaneein nenea ecaanto, chaen nii coujunaca aina curuaa, naaonjoainuri amuritooreraauru cachaauru. <sup>3</sup> Acaaurute, Cana Coaunera ere bera inoansi Moisesa nenate que nenatecure. Chaen Cana Coaunera rai Carenero Narejeen naaonjoainuri nenate que nenateinte:

“Jataainte, cojoelanaacojoaain janiinacajelanaala itolere que laraajiin, esinae rauhijiriin aitohine rijijieein caohacha ichaacha Cana Coaunera.

Iite, satiin lauri lauri rai natane que ichaonacaauru cachaauru curuaanaa *Reyneein* neeicha.

<sup>4</sup> Nihei nii chuni ii que suujua acatelanaala naineijeita *Curuaanaa*.

Neiheichu nii chuni ii corojelanaala nainejei.

Nii jaunte, leinjiin iicha saantoneein neeine jaun, satiin lauri lauri rai natane que ichaonacaauru cachaauru ii coroaecurureein, itolere baaso, caohacha, naaonjoain ichaain coarateeine jaaura,”

naain nenatecure.

<sup>5</sup> Nii baiha nojoraca dedene jana coaracaanne janate, ecu niha acaauru aina niicha ichaneni ichaane coina Cana Coauneraacha icharatei Teenforone jana, ecu ne Cana Coauneraacha turunajaanu jeelai *santuario*. <sup>6</sup> Nii Cana Coaunera turunajaanu jeelai cajete mituure caainsiineein anjeraauru, itolere caainsii laurini que cacha cairichaeranu amaain cunacaauru. Cajione somaratiin jiquihaqui que cajionecohin, jaleri cataaun ojoaain oro caje ichanohin siintoroon que siintorooncohin.

<sup>7</sup> Nii cacha tocorijianein ichaohin jenaain nenacaauru caje leinjiinte, nii caainsiinein nenacaauru anjeraauru

rai, oro caje ichanohin cocoorunajaan curu nainocojoaain casetecocuru que banijjaain nenea- nii chariji bana satonoe-lanaala nenea Cana Coaunera caje unaa te le anjeraauru nainetiin. <sup>8</sup> Nitohaneeinte, itolere que laraajiin necaohacha que necaohachaane coaratihā Cana Coaunerane jaan- suruaa caaun nocojoe nii Cana Coaunera turunajaan- *santu- ario*. Nii jaunte, nii chuni ecu turunaa nainene, nii caainsii laurinei que cacha cairichaeranu jitariin berotecuruha nii amaureraauru caainsiini anjeraaurune reen tiaain.

## 16

### *Casetecocuruhacha coheni curu muruaae*

<sup>1</sup> Nii janane nii Cana Coaunera turunaja *santuario* tonii: “Chajaain nii casetecocuru que banihateein Cana Coaunera- aacha tei caainsii curuneein nenea- muruaae cuhane nenea chorocuche chauratane ichoae,” naa tonijjaain nii caainsiini anjeraauru rai erenaane jana aonaun. <sup>2</sup> Nii janate, nii curu muruaae cuhane nenea necairichanaa tera choroḥa leinjiin anjera chauratane ichoae jana, ataebinae cojunaca siriin nii tocohaneein nenea ecaantone maajeein coroaḥeein nenacaauru cachaauru jaberoco que cunaain mitue abero jataain tasionjoaain.

<sup>3</sup> Nii janate, cucuana cuhane leecha curu muruaae cuhane nenea necairichanaa tera choroḥa nii anjera coroaḥajane jana, ichana nejesinaneein nerotoe cucuana baca esinaeaca, sonajaain jaoha cachane aihane tocohaneeine jaun satiin oore nii cucuana cuhane ichaohin nenacaauru.

<sup>4</sup> Nitohaneeinte, nucuhe cuhane, atane jachu caje acau nalunajaaunru cuhane, naaonjoaain nii necairichanaa tera choroḥa nii curu muruaae caje anjeraauru nichatajane jana, ichana nejesinaneein nerotocure nii nucuhe bacaauru esinaeacaauru. <sup>5</sup> Nii catiariin aonacaanne janate:

“Iite, esinae rauhijiriin nitohaneein caohacha aina baaso icharaauru coaraain casetecaraneein neei.

Iite Cana Coauneraneein acaihanejei Saantoneein inoaenlu caje coauneein neei.

Chaen techu, nii chariji bana satonoelanaala neriquiin.

<sup>6</sup> Acaaurute ii cachaauru sohin jaohin ii ere beebekeraneein nenea *profetacurune* maajeein sohin jaaorelu.

Nii jaunte, nii niicha sohin niicha jaaorilu coichana que cocooruhane coina

acaauru cairichaa ichaai, baasoneein ichaauruhalune jaun. Nitohaneein terate latecure,”

nae nii nucuhe bacaauru esinaeaca asaecane coina que banijjaain nenea Cana Coaunera rai anjera.

<sup>7</sup> Nii janate, Cana Coaunera rai jujuai mocooruhane jaan rori rohan toniin: “Aichuhisi laesinaera, itolere ichana nain-eraneein neeine jaunra Cana Coaunera, esinae rauhijiriin nii baaso ichaelanaala nenacaauru casetecaelanaala, baaso icharaneein nenacaauru casetecaeraneein neeine jaunra,” naane jana aonaun.

<sup>8</sup> Nii janate, nii niicha amai muruaae conera chohitoha enoto ichoae nii anjeraauru nejenane jana, nii aina cuaain niicha ichana naine ichaain cachaauru mocoe najaano que nii enoto cono. <sup>9</sup> Nii jaunte, jataain banejelanaala mocoore. Nete nitohaneein mainajeein mocooruha natiin, Cana Coaunera coroaena coacuelanaala baijiaraanu rijitiinchuru jataain baasoneein que ereeure, nii itolere cunaihuru amurijiriin niicha ichana nainei icharaneein niha Cana Coaunerane saijieein.

<sup>10</sup> Nii jana, nii niicha amai muruaae conera chohitoha nii ataebinae nelaurianajan rori ichoae nii anjeraauru nesaouine janate, jataain caohacha nocohenaneein nedae rai cojoanona. Nii jaunte, nii mocooruhane curiha cuna caun lele calaauere cachaauru. <sup>11</sup> Nete nitohaneeuruha natiin, nii baaso ichacuruhane janelanaala, nii acaauru abero aina acaauru moco curihuruha natiin, Cana Coaunera que nejeratein baijiaraanu rijitiin ereeure.

<sup>12</sup> Nii jana, nucuhe Eofarate cuhane nii niicha amai muruaae conera chohitoha anjera nesaotane janate, jera jaonaa nainecuruha enoto mitu nichajai caje unacaauru *reychurune* coina jacoroe nii nucuhe baca.

<sup>13</sup> Nii janane, nii ataebinae tabai-*dragon* ujuae caje, chaen nii necha aansai ataebinae tabai caje, chaen nii *profeta* niha nocoeti, naaonjoainuri ujuae caje mituha dari tocorijianein nichatajaain nechu coitucuchuhi suujuene jana coaraaun. <sup>14</sup> Acaaurute nii nichatajai coitucuchuhi suujuenein itolere cojoelanaacojoai ichaain, satiin chauratane sacuritaain rai cachaneein nenacaauru *reychuru* taojiaain sonaana que niha uurureein, inae itolere ichana nainera Cana Coaunera Cojoanona que turuhane bana.

<sup>15</sup> “Aonacuche, nii nainajeneeichene janane aiha leinjiin asijiautone rijijieein inara rene luhecotariin neeoritoreeuni. Jataainte nerausiaeca cureein caohachaaain nainaaain letona jatoraaain cajione ruhecaain canu cohara, nabana machoharohane, nii machoharohane que coejeein cacha cataaun nihane coataa,” nae Cana Coaunera.

<sup>16</sup> Nitohaneainte, nii nere cuhane Armajedoonneein Ebereecuruhacha curuaatei ita taojiaaure- nii satiin chauratane sacuritaain nenacaauru *reychuru*.

<sup>17</sup> Nii janate, joaereein nii curu muruae cuhane nenea cabuhitoha nii anjera caainsiinene jana: “Inae jatoroaa,” naain tonijiaain toni erenaa dedeeu nenea Cana Coaunera turunaja *santuario*- nii nelaurianaja rorihu toniin.

<sup>18</sup> Nii janate, jataain mijiaaineein niha jiacanone jana, jataain mijiaaineein toni erenaa arara aina. Nii janate jataain mijiaaineein luhecotariin uha carorane jana, jataain mijiaaineein nerurujuae atane, niha caa chauratane que cachaaaurune jaan caje coauneein niha leeochoa caroracurune amurijiriin jataain mijiaaineein uhane jaun. <sup>19</sup> Nii janate, mijiaaineein uha carorane jana nichata turiin nefaruhe Babilonia nese tabai. Nii jana nefaaruusiha satiin chauratane sacuritaain nenacaauru neseeurune janate, nii Babilonia nese tabai coacue Cana Coaunera, nii nobaaeneein casetecocuru cocoaane coina niicha rucujuei bino elonai que acaauru cocoaane coina. <sup>20</sup> Nii jana satiin obenecuru, ichatane ucuunooru, naaonjoainurite nefaruusiin nitajihane jana, <sup>21</sup> dede caje cachaaauru ichoae naluhacoae ajeri jaberoco rijijieein nenea- jelajinaa jaberoco jeenachoonca quiro amurijiriin anajiin. Nii jaunte, acaauru ichoae nichoroha dede caje uhin nii ajeri jaberoco rijijieein nenea- jelajinaa jaberocone jaun, jataain necairichanaa tabai caseteco nihane jaun, Cana Coaunera que nejerateein baijiaraanu rijitiin ereeure cachaaauru.

## 17

*Jataain ene cojoaeloroheri esineneein nenea casetecaauruhane*

<sup>1</sup> Nii caainsii laurinei cacha cairichaeranu curu muruae amaurera caainsiini anjeraauru caje leinjiinte: “Chajaaune, naaonjoaain casetecanohinerichaain taa cucuana baca ichoae lauhequi ene cojoaelorohene coarate ii que. <sup>2</sup> Caa chauratane curuanaa *reychurute*, taa ene cojoaeloroheri aina ichaojeraquuin neeure. Chabana nitohanai ichaain ichaonaa naineniha cachane saiijieein, rai nichao baaso aina cuaain satiin chauratane que nenacaauru ichao aasajein osa que sarunajaelu,” nae canu rai nii anjera.

<sup>3</sup> Nii baihate, Cana Coaunera Suujue coaratenojoin coara-caaunne jana, cacha areroo canu amae nii anjera. Nii janate, ecu niha leinjiin ataebinae tasionjoaain lanajaainne jana, nichoae laujuae leinjiin ene. Nii ataebinae tabaite, Cana Coaunera baijiaraanu rijitiin jaberoco sacuritaain laenanohineein rai curuaa siriin, caainsiine couturiin lechooncae rai jicho. <sup>4</sup> Nii jana nii ene cajionete, lanajaain



jichohajiojoai que jasisiin, oro caje ichanohin que corujuelequin, jataain coretiin nenea ajeri jaberoco que urerianohinein, jiquihaquuin nenea perla, naaonjoainuri que urerianohine rai cajione. Oro caje ichanohin acau cooruhane jaa curu muruaae que biji achunecohin, nainecojoaain rautaaain coanacaaajoaelanaala nenea siri, nechuhataain leinjiin calani dadanacaaajoaelanaala nenea amae nechuhataain joaenreein cachaauru que ichaojeraquuin neosateein nihane jaun.

<sup>5</sup> Nitohaneente: “Babilonia nese tabai, ene cojoaeloroherihuru nebanein satiin chauratane sacutaaain itolere cachaauruhacha rautaaai icharanein nenea,” naain laenanohinein curuaa siri nauri que, chabana coaraa nitohanaine que airijiin.

<sup>6</sup> Nii baihane nainaan, Cana Coanera cachanein rai nere beebejeranein neuruhane coreniha, chaen Jesocurisito beebejeeuruhane coreniha ateanohinein nenacaurulu, naaonjoainuri coichana caaun ajiha nii ene cojoaeloroherine que. Nii jaunne coarihanune rijijiein jataain cojoelatoon.

<sup>7</sup> Nii jaunte canu rai: “Chanuna jataain cojoelatohi. Tane ichei caa ene ichao coitucueraelanaala nenea aina nii caainsiinei couturiin lechoonca jichohin- nii amaera ataebinae tabai, naaonjoainuri beete coitucui. <sup>8</sup> Inoaenlute niqui ichoaelu nii iicha coarai necha aansai ataebinae tabai, nete inae nitaje. Nii jaunte, caohacha nitajeeriin nitajesihane ajiniha, nii chariji bana satonoelanaala nenea atane jachu caje inichein. Nii necoaaunaa cana rai chauratanene jaa caje coaanein Cana Coanera coitucuurera curuaacuru siricha quiricha cuhane laenanohinein curuaa sirilanaala caa chauratane que nenacauru cachaaurute, nii necha aansai ataebinae tabai cojoelatiin coaraa cuururein, inoaenlu ichahaluhataain natiin inae nitajihane jaun. Nete inae na-coaanein ichaorein.

<sup>9</sup> Cautelaen esinae rauhijiriin coararein niicha coitucui coitucuhin biha coitucuerane. Nii caainsiinei couturite, caainsiinei ichatane ucuuno nii lauhaca ene cojoaeloroherine jaan beranein aiha ne. Chaen nii caainsiinei couturichurute nii caainsiinei *reychuru* beranein ainaa ne.

<sup>10</sup> Nii saokuu *reychurute* inae chaque nelatein nedaurere. Leinjiinchate jaiti itolere curuaanaanein ne. Nii jana leechate jaiti turuene. Nii acaauru caaijie nedanaa turuhenein inae turuhane bana coatihataain carajaain nerinaain.

<sup>11</sup> Nii inoaenlu ichaonaa necha aansai ataebinaete, acaauru curuaanaa *reynein* acaauru fosaneinein nelu. Nete inae nitaje. Nii choae tacaain techu, nii caainsiinein nenacauru

caje nenea nelu. Nitohaneeinte, jataain caohachanainejeen raajenhane itajeranu ichajeen sacue.

<sup>12</sup> Nii lechooncaain jicho iicha coaraite, lechooncai reychuru neein jaiti curuaanaaneein cocoinanohi nelanaala nenacaauru ne. Nete inae carajaelanaala, nii necha aansai ataebinae jiniichaaain aihuruha reychurune rijijieein cocoinanohi neeurureein. <sup>13</sup> Nii lechooncai reychurute, ita suujua rijitoejeen niicha ichana nainei ichaa nii necha aansai ataebinae tabaine coina cocoinaa cuurureein. <sup>14</sup> Nitohaneeinte, nii Carenero Narejeen aina ita soha cuurureein. Nete acaauru amuritoha cureein nii Carenero Narejeen. Nii suujua rijijieein janijiin Cana Coaunera ranjoinurilu rai cachaneein nenacaauru aina, satiin curuaanaacuru curuaanaa neein, satiin reychuru rai Reyneein niha nii Carenero Narejeenne jaun,” nae carai nii anjera.

<sup>15</sup> Chaen techu canu rai: “Nii lauhaca nii ene cojoaeloroherine jaan- iicha coarai acaute, nenaanaja, cachauru, nere que ereein nenacaauru, natane que ichahin nenacaauru, naaonjoainuri beraneein ainaa ne. <sup>16</sup> Jana nii necha aansai ataebinae tabai jicho lechooncaain iicha coaracurite, nii ene cojoaeloroheri que nejerateein, machorochoaain que jaolechihin, rai jaberoco quiin usihanau mocoourichaaine jaan beraneein ainaa ne. <sup>17</sup> Cana Coaunerate, acaauru suujua jichochoe, aca jerihane rijijieein niicha jerei ichaaain, jiniiquiin ita suujua rijitoejeen, nii reyneein cocoinanohineein neeuruhane jaan teuruha nii necha aansai ataebinae raine coina. Nitohaneein jeriha Cana Coaunerane que tihane jaan que tiaajeein. <sup>18</sup> Nii ene iicha coaraite, itolere amurijiriin nenea Babilonia nese que satiin chauratane sacuritaain nenacaauru reychuru amuritoeraneein nenea beraneein ainaa ne,” nae carai nii anjera.

## 18

### *Nitajija Babilonia nesene*

<sup>1</sup> Nii baihane niicha ichana nainei ichaane coina cocoinanohineein, rai necaohacha que necaohachaaain dede caje fauhin chauratane jiliitoha rai cono necaohacha que leecha anjerane jana coaraaun. <sup>2</sup> Nii janate tonijiaain:

“Inae nitajija itolere amurijiriin nenea Babilonia nese tabai. Inae moconajaera nenajaneeinte, itolere lauri lauri coitucuchuhi que suujuequiin, chaen rautaain coanacaaajoae lanaala nenea itolere ataebinae coitucuchuhi, tajaecuru coitucuhichuru, naaonjoainuri ucuhaneein inae nerotoe.

<sup>3</sup> Nitohanihane jaunte,  
 chabana nitohanai ichaain ichaonaa naineniha cachane sai-  
 jieein,  
 rai nichao baaso aina cuaain,  
 satiin chauratane que nenacaauru cachaauru ichao  
 aasajeein osa que sarunajaelu.

Chaen techu,  
 que ichao jeraquiin nerejetocure satiin chauratane que ne-  
 nacaauru curuaanaacuru.

Chaen techu,  
 satiin caa chauratane que necoretenacaauru coriquihocure,  
 nechujataain joaereein baaso ichacuruhane jaanuhacha que  
 necoreteein,”

nae carai nii anjera.

<sup>4</sup> Nii janate, nacoaauneein dedeeu tonii.

“Chajaain nii nese caje amuuche inara canu cachanequich-  
 ene.

Nabana nii osaaonacaauru aina neeichene  
 acaauru osa leruhiche acaauru ainane,  
 necairichaaiche nii necairichaaauruhane jaan quene coataa.

<sup>5</sup> Dede quete

turuhelalajeein lajuuae jataain acaauru osa tabai.

Nii jana Cana Coaunerate,

nii baaso chacuruhane coitucuhin chabana baitenereein.

<sup>6</sup> Leeochaauru cairichaane amurijiriin,

coroata saain jeelai amuritoheriin nii niicha coheni jataain  
 coaerai jasiiteein que cairichaa.

<sup>7</sup> Jataain necairichanaa tabai que cairichaa,

leeochaauru cairichaane amuritoheriin.

Nechu jataain joaereein nocohasitaa nocoetohane jaunte,  
 rai suujua cuhane:

‘Caune aiha curuaanaane rijjijeein raotojoein neeun.

Coatiha aiha autanane rijjijeein necairichanaa  
 coarinaauni,’

naain nocohasitae.

<sup>8</sup> Nii jaunte,

le jiichonijin cuhane nichoae nalureein itolere  
 necairichanaa, onaa, mijitena, nererojoecana,  
 naaonjoainuri.

Chaen techu

usihanau moconojoiniha cureein.

Jataain itolere que laraajiin niicha ichana nainei ichaain

cha rucuharaniha nii casetecaeraneein nenea Cana Coauner-  
 ane jaun,”

naa erenaane jana aonaan.

<sup>9</sup> Inae moco caaun suruaa tabai niha nii nesene coaracurhanete, jataain inaderaain chanaa cuurureein caa chauratane que nenacaauru curuaanaacuru, nechu joenreein nichao aasajeein nii nese aina ichaojeraconacaauru, nii baaso ichacuruhane que netojoejeein. <sup>10</sup> Nii jaunte, inae caseteconihane coaracuruhane coasiha rohan nichuuntanaa nainelanaala caje coriae netiin:

“Jataainte cairichaojoaai itolere que laraajiin niha nocoetohi natiin Babilonia nese tabai, coatejeneeine jana luhecotariin ii rene turuha casetecone jaun,”

naaurureein coarajeein.

<sup>11</sup> Satiin chauratane sacuritaain ecu necoretenacaauru techu, nii nese coinaderaain chanaa cuurureein. Inae nenerihani nii corotajajelanaala acaauruhacha sirii rucuhale coreterane jaun. <sup>12</sup> Nii itolere, oro, plata neein curuajaain nena coata coreti, ajeri jataain caohatiin coreti, jataain cajione caohacha, cajione lanaajionjoai, cajione lanajai, itolere araai laurii enuha jujuhi caje nena, ebucu caje ichanohichuru rucuhaleeuru, enuha jataain coretiin nena, coata lanajai boronce, leecha lauri coata, ajeri jaberoco jataain nojoein nena, <sup>13</sup> arajiin jujuaain nena canera, sacari jujuaain nena, miraa chaen leechaauru jujuaain nenacaauru, *perfume*, bino, erene, arina caohacha, tirico, atane choae terei anajiin icharaauru, carenero, cabario, cabario que tararaeraain nenacaauru, chaen cachaauru letononeein nenacaauru, naaonjoainuri que necoreteeuruha, nii Babilonia cocoaichacuru raine jaun, jataain coinaderaaure. <sup>14</sup> Nii janate jataain inaderaain:

“Inae nihei iicha rautati rucuhale coreti satiin iicha sirii. Inae chabana nihei jerichanejeein sirii neeine,”

naaurureein nii neseu necoretenacaauru.

<sup>15</sup> Nii neseu necoretenacaaurute jataain coriquihotiin neeure. Inae caseteco coaraane janate, caje coriae neein coinaderaain chanaain coarajeeurureein jataain coasina caaun. Chaen techu jataain coisiin:

<sup>16</sup> “Jataainte cairichaojoaai, itolere nese amurijiriin tabaain nena.

Cajione caohacha que necoreteein, lanajaain jichohajiojoai que necoreteein oro,

chaen jataain coretiin nena ajeri jaberoco, perla, naaonjoainuri que urerihanohin cajione que necoreetiha leinjiin enene tocohaneei niqii.

17 Nete luhecotariin coacueneeine jana, inae nitaje nii itolere iicha sirichuri,”

naaurureein.

Satiin bote cuhane curuaanaanein nenacaauru curuaanaacuru cafitaancuru- cucuana cuhane amuhemuhenaacauru, chaen marinerooru, satiin cucuana cuhane nichao que ichaohin raotojeein amuhemuhenaacauru, naaonjoainurite coriae netiin coarajeeure. 18 Inae moco caaun suruaa niha, nii nesene coaraante: “Coatiha catohaneein jataain leeochoaauru amurijiriin jataain caohatiin nenea nese caa catohaneein nedaai,” naaure tonijiaain.

19 Chaen techu, coinaderaain chanaain, couturi ichoae atane bujuinaa chorohin:

“Jataante cairichaojoae taa nese itolere amurijiriin nenea, naain chanaaurureein, satiin nii cucuana cuhane bote sirii amunacaauru, nii nese aina cuaain coriquihonanein nedanacaauru.

20 Nii nese cairichaa Cana Coaunerane coroaecuche dedeeu Cana Coaunera cachanein janijiin niicha cotihanohineein nenacaauru, chaen afosotooru, *profetacuru*, naaonjoainuri. Acaauru caseteaane ucuaetohate, inara rai caohacha ichae Cana Coaunera,”

21 Nii jaunte, nii itolere que nelateein, niicha ichana nainera neein nenea anjera, nii leinjiin ajeri jaberoco seeonjoancha tutuuruhane jaa tocohanein nenea baihataain cucuana cuhane siheitiin:

“Catohaneente, itolere amurijiriin nelaetiin niha nocoetohinatiin, inae chaque nelatelanaala neei Babilonia nese. Inae chaelon nihei nacoaaunein jerichanejeein neeine jana ichoharaauruhane.

22 Inae chelai janonaa bana nihei nacoaaunein ii que aohanraa, nenatein quitara rijijieein nenea toteein, aunone maa-jeein toteein, coreneta tocohanein nenea toroonfeta, naaonjoainuri toteeuruhane.

Inae nerinaain ii que amihaneeni.

Niheichu aohanrarinaain tonijiaaniha natiin ichaain cha tutuera.

23 Chaenchu

chelai janonaa bana nihei, ii que niha conone jana,

ii que aohanraa tonijiai ichaain nisirihateeuruhane jaa besetane.

Coatiha

inae chaque nelateein neeuruhi ichei rucuhele que necoreteein nenacaauru,

satiin chauratane que nenacaauru amurijiriin itolere que nelaetoha nocoetiin neeuruhalu natiin.

Chaen techu,

benaneniha nocoetohine que,

satiin lauri lauri nenacaauru cachaauru coritaain nerejetohti,”

nae nii anjera.

<sup>24</sup> Nii nese quete erunojoi ne niicha sohin niicha jaaorilu *profetacuru* coichana, chaen nii janijiin Cana Coauneraacha ranojoinurilu rai cachaauru, chaen satiin caa chauratane que sohin niicha jaaorilu coichana, naaonjoainuri.

## 19

<sup>1</sup> Nii baiha jataain arajiin dedeeu tonijiaain ereeuruha cachaaaurune jana aonacaanne janate:

“Cana ichoteraneein nenea cana Curuaanaa coroaecuche.

Nii itolere ichana naineein,

rai necaohacha que necaohachain,

naaonjoaain nihane jaunte

cana ichoteraneein Cana Coauneraneein ne.

<sup>2</sup> Acate

esinae rauhijiriin baaso icharaauru coaraain

casetecaeraneein ne.

Nitohanihane jaunte,

rai jaberoco aina cuaain

satiin chauratane sacuritaain nenacaauru cachaauru

saruhin niha osa quene jaun,

nii ene cojoaeloroheri rijijieein nenea casetecae.

Cana Coaunerate

rai cachaneein nenacaauru ateinaain nihalune

core coarate que,”

naaure.

<sup>3</sup> Nii baihate nacoauneein:

“Cana ichoteraneein nenea cana Curuaanaa coroaecuche.

Nii chariji bana jianelanaalate

ecuun iniha cureein nii ene cojoaeloroheri rijijieein nenea-

Babilonia nese moco cousuruca,”

naaure dedeeu tonii.

<sup>4</sup> Nii janate, curuaanaa nihane jaan rori- *trono* ichoae lauhaca Cana Coaunerane jana, nacatiha neseonriaain:

“Cana ichoteraneein nenea cana Curuaanaa coroaecuche. Nitohanemiin,” naain Cana Coaunera coroaecure, nii coroata choonca jenaain nenacaauru ichauhenaauru, chaen nii jenaain cache tocorijaneein ichaohin nenacaauru naaonjoainuri. <sup>5</sup> Nii janate, nii curuaanaa nihane jaan rori- caje toniin:

“Satiin inara canaanainuru, ichauhenaauru, naaonjoainee-  
ichene  
Cana Coaunera coroaecuche,  
nelateein acaneein nihane que casiichene coarateein  
neinequichene,”

naain toniha erenaane jana aohanrae.

*Rai cachaneein nenacaauru aina beseta ichaa Carenero Narejeene jaan cojoanona que turuhane*

<sup>6</sup> Chaen nechú tonijiaain toniha arara aina caraturine riji-  
tiinchuru iriha arajii cachane jana aonaun. Nii janate:

“Cana ichoteraneein nenea Cana Curuaanaa coroaecuche.  
Inae itolere Curuaanaa neein nihane nunuhetiha cana Curu-  
aanaa,

itolere que nelateein,

itolere ichana naineraneein nenea Cana Coaunera.

<sup>7</sup> Aihane jaun

coanete rachoojihacache.

Esinae rauhijiriin

rai necaohacha que necaohachaain niha Cana Coaunerane  
coroaecaache,

inae nisirihatiha Carenero

Narejeenne jaan cojoanona que turuhane jaun.

Inae letona jatoraain neruujihai rai comasainu.

<sup>8</sup> Nitohanein jereraane jaunte,

somajai cajione caohacha jiquihaqui que necoreete nii  
Carenero Narejeen comasainu.

Nii cajione caohacha somajaain jiquihaquiin nenaate,

esinae rauhijiriin jeriha Cana Coaunerane rijijieein

niicha ranojoneein nenacaauru ne,”

naain tonijiaain toni erena. Satiin rai cachaneein ne-  
nacaauru raa Cana Coaunera Calaohi Jesocurisitone que.

<sup>9</sup> Nii janate canu rai: “Caa laenaun: ‘Raotojoein turuu-  
ruhine nii Carenero Narejeen beseta que cotihanohichuru.’  
naa caraine baihate: ‘Caa erenaate, inae rauhijiriin Cana  
Coaunera beratenojoin erenaane,’ ” nae carai nii anjera.

<sup>10</sup> Nii jana coroaecaane coina, nii anjera tijia asaae  
neseoriaanune janate: “Caa nitohanai ichana coaauca.  
Canuhetonaine Cana Coaunera cache neein neeun,

jerichanejeein nii aaine rijijieein. Aihuruha nii ii nejeraauru, acaauru rai aitoha Jesocurisitone rijijieein, naitoonjoan tonoraain nenacaaaurune rijijieein. Aihane jaun, Cana Coauneraacha coroaacuu,” nae canu rai nii anjera.

Nii Jesocurisito que erena techu, *profetacuru* que beratenojoein nelu.

### *Cabario somajain ichoae cunaa*

<sup>11</sup> Nii janate dede que ecooca somajaain cabarione jana, nichoae lajuuae- nii suujua rijijieein nesineneein curuajai. Acate esinae rauhijiriin baaso icharaauru cachaauru ichao rucujueein, que nejeratenacaauru amuritiin nelu. <sup>12</sup> Rai notate jiquihaquuin usi lanaro tocokane. Nii janate, arajiin rai coturi que comai amaane jana, que laenanohineein ne rai curuaa. Leinjiin acaachate nii curuaa coitucuuje. <sup>13</sup> Nii jana rai cajionete, ichana que lomonojoin tocokane. Jana rai curuaate: “Cana Coaunera Ere,” nae. <sup>14</sup> Nii janate caaijie uure dedeeu anjeraauru- cajione caohacha somajai que necoreetein- cabario somanerei ichoae uhin. <sup>15</sup> Nii janate rai nujuaae caje mitue sabere ajihantiin, satiin lauri lauri nenacaaaururu amuritoheraneein nihane cojunacaneein. Acate coata caje nena otiha que biji achunequuin, acaauru Curuaanaa niha cureein. Acate, cana tijia que oba shaoquuin, rai baca rocohacane rijijieein, baaso icharaauru coaraain casetecaain, rai nobaeneein casetecocuru que banihatein niicha rucujei- bino que acaauru cocoa cureein nii itolere que nelatein- itolere ichana naineraneein nena Cana Coaunera. <sup>16</sup> Chaen techu rai cajione, rai nanaae, naaonjoain que:

### *Reychuru rey- curuaanaacuru Curuaanaa*

naain laenanohineein ne Acaneei nihane coitucueratera rai curuaa.

<sup>17</sup> Chaen nechu enoto conohanau chujuhecoha leinjiin anjerane jana coaracaanne janate, satiin tajaee iniho que lenoneein ecuun jiaauluhin amunacaauru rai tonijiaain: “Chajaauchete netaojiaete tabai lenone que inara coroaatemiin Cana Coaunera. <sup>18</sup> Aihate Curuaanaacuru *reychuru*, soondarooru curuaanaacuru, laraajiin nenacaauru cachaauru, cabariocuru, nichoae cunacaauru, itolere inihocuru, letononelanaala nenacaauru, letononeein nenacaauru, nelatelanaala nenacaauru, nelatein nenacaauru, naaonjoainuri iniho que lenonequiche,” naain ehequuin nii iniho que lenonenacaauru tajaecuru cotihacane aonaun.



<sup>19</sup> Nii baihane, nii necha aansai ataebinae tabai aina, satiin caa chauratane que nenacaauru curuaanaacuru aina sonaana que neeninuru acaauru soondarooru coaraaun. Acaaurute, nii cabario ichoae lauheconaa aina rai anjeraauru sooruhane coina netaojiaaure. <sup>20</sup> Nii janate, nii necha aansai ataebinae tabai mucuhin casetecaure, nii rai *profeta* nacatiha neein itolere cojoelanaacojoai ichara aina curuaecaain. Nii itolere cojoaelanaacojoai ichaane aina cuaainte, nii necha aansai ataebinae tocohaneein niicha ichacuri cojunaca terateein rai ecaanto coroaeraauru cachaauru coritae nii rai *profeta* niha nocoeti. Nii jaunte, nii *profeta* niha nocoeti aina curuaecaain, nii necha aansai ataebinae tabai jaaore ichaaojihane jana, usi conemuri asojoereneein moconaa cuhane. <sup>21</sup> Nii jana leeochoaurute, sohin jaonojoinecure, nii cabario somajai choae laujuaain cunaa ujuaae caje mitunaa sabere ajainai que. Nii janate, nii onacaauru inihohi quihure nainain obejeein nii inihohi que lenonenacaauru tajaacuru.

## 20

*Le oaraanca jaanacaneei ichohanojoi niha moconajaerane*

<sup>1</sup> Nii janane, *cadena* que biji achunequiin atane jachu chariji bana satonoelanaala nenea cochabi uhaain fauha uha leinjiin anjera dede cajene jana coaraaun. <sup>2</sup> Nii anjerate fauhin, nii ataebinae tabai acano inoensi- moconajaera ichojoae, le oaraanca jaanacai que tihane reein tiaaajoaain. <sup>3</sup> Nitohaneein ichojoaainte, nii chariji bana satonoelanaala nenea atane jachu tabai cuhane fuhin, nii fuera que nii cochabi te, le oaraanca jaanacaneei que tihane reein tiaaajoaain, nabana caa chauratane que nenacaauru cachaauru coritaane coataa. Inae le oaraanca jaanacaneei que turuhane banate jianenohiniha cureein carajaelanaala.

<sup>4</sup> Nii jana, nii curuaanaacuru rori- *trono* coaracaanne janate, nichoae launereure nii baaso icharaauru coaraain rucuheranu que cocoinanohineein nenacaauru. Chaen nechu, Cana Coaunera aitonjoan beebejeein, jataain esinae rauhijiriin beratenojoinihane rijijieein Jesocurisito aitonjoan tonoraauruhane coreniha, coturi molonojineein onacaauru suujue netonai ecu neeure. Acaaurute, rai biji, nauri, naaonjoain que nii necha aansai ataebinae coujunaca teeuruhane jerelanaala, chaen nii necha aansai ataebinae tabai aina nii tocohaneein nenea ecaantooru corojelanaala nenacaauru nelu. Acaaurute nii ooruhane baiha nacoaauneein ichanaain le oaraanca jaanacaneein Cana Coaunera Calaohi Jesocurisito jiniichaain curuaanaanein neeuruhane jana coaraaun. <sup>5</sup> Niichurute

ichoaichaniha oo caje ichananacaauru ne. Leeochaauru laen ooruhane baiha ichanacuruhi, le oaraanca jaanaca reein tiaaain. <sup>6</sup>Jataainte nerausiaaejeein niha cuurureein nii ichoaichaniha oo caje ichananacaauru, inae Cana Coanera cachaneein aina jiniiquiin neeuruhane jaun. Oha cachane baiha itajeraneein nenea coatiha acaauru aina chaachasihei. Acaaurute Cana Coanera aina rai Calaohi Jesocurisito rai saseredoteneein le oaraanca jaanacane reein tiaain aina curuaanaa neein neeurureein.

*Moconajaera amuritooruhane*

<sup>7</sup>Inae le oaraanca jaanacanei baihate, caseteconihane caje mitanojoi niha cureein atane jachu tabai caje nii moconajaera. <sup>8</sup>Nitohaneein mituhinte satiin caa chauratane que lauri lauri natane que ichaonacaauru cachaaauru rene cuhin, enoto mitu nichajai jeloon, enoto so nichajai jeloon, enoto mitu nichajai coarajeein cana ajaabiji nichajai jeloon, enoto so coarajeein cana ajaabiji nichajai jeloon, naaonjoainuri nii Gog aina Magog neein niicha curuaateuri coritareein. Nitohaneeinte cucuana cuhane nenea carene catuniji jeeoneein acaauru cachaaauru taojiareein sonaana que nihane coina. <sup>9</sup>Nitohaneeite satiin chauratane sacuritaain cuhecujeein, jataain nii Cana Coaneraacha belai nese tinonohin, nii Cana Coanera cachaneein nenacaauru curuacaain tinonocure. Nete inae dede caje naluha usine jaun, jitariin acaauru mocohin acaauru itaje. <sup>10</sup>Nii jana, nii acaauru coritaera moconajaerate, usi conemuri asofere neein mocohin nenea cuhane jaonojoneei ne, nii *profetaniha* nocoeti aina curuaecaain, nii necha aansai ataebinae tabai jaaoruhane jaan cuhane. Ecute janotiin, jiichoo, naaonjoaain caseteconein mocoha cuurureein nii chariji bana satonoelanaala.

*Rori somajai acatiha tein caohacha ichacurenihane, baaso ichacuruhane coitucuuruhane*

<sup>11</sup>Nii jana curuanaacuru rori-*trono* somajai coaracaanne janate nichoae lauhaca leinjiine jana notaracae jataain caohacha nitajeeriin nii chunijihun coarinojoinelanaala nitaje chauratane aina dede. <sup>12</sup>Nii janane itolere que nelateein nenacaauru, chaque nelatelanaala nenacaauru, naaonjoainuri onacaauru coaraaun, nii curuaanaacuru rori-*trono* acatiha chujunereeuruhane jana. Nii janate, ecu joaracaeraain nihacoaa quirichaaaurune jana, nii chabana satonoelanaala nenea ichaonaa que ichaohenihuru curuaa siricha leocha quiricha netonai ecu joaracaeraain ne. Nii onacaaurute colurujuenojoneein neeuruhane caje rucuhenojoneein neeure-acaauruhacha ichai rijijieein, nii quiricha cuhane laenanohineein nihane rijijieein. <sup>13</sup>Nii

jana satiin nii cucuana cuhane jaonojoneein onacaaurute caje mitaain tenojonecure. Jerichanejeein techu nii ohin aina nenacaauru te, nii onaa curuaanaa neein nena. Nii janate satiin acaauruhacha ichai rijijieein rucuhenojoneein neeure le cacha cachaauru. <sup>14</sup> Nii baihate, usi conemuri cuhane jaonojoneein ne nii onacaauru curuanaa neein nena, nii nitajera i nenacaauru aina jiniiquin. Nii usi conemurineein nenaate, oha cachane baiha cacha itajeraneein nena ne. <sup>15</sup> Ecute jaonojoneein neeure, chabana nitajenaachara nejeein nena ichaonaa que ichaohenihuru curuaa siricha quiricha cuhane laenanohineein curuaa sirilanaala nenacaauru.

## 21

### *Ena nena chauratane aina ena nena dede*

<sup>1</sup> Nii baihane ena nena chauratane, ena nena dede, naaonjoaain coaraaun, inae nitajiha nii jauriaanejeein nena dede, chauratane, cucuana, naaonjoainurine saiijieein.

<sup>2</sup> Nii janate, dedeeu Cana Coaunera acatiha nihane caje fauha uhe Cana Curuaanaa nese neein nena- enachasine Jerosaleen. Charijieein teeinti, nelanajanaa jerihane caohatiin necoreeteen ne leinjiin ene, nii rijijieeinte jataain caohatiin rai necaohacha que necaohachaain niha nii ena nena Jerosaleenne jana coaraaun. <sup>3</sup> Nii janate, nii Cana Coauneraacha nelaurianajaan rori caohacha tonii: "Inae ena caje coauneete, cachaauru aina ichaoreein Cana Coaunera. Nii janate, acaauru aina ichaohane jana, rai cachaneein niha cuurureein. Chaen techu nii jeelai Cana Coaunera, acaauru Coauneraneein acaauru aina nereein. <sup>4</sup> Nii bana inae nerinaain chananaa, nerinaain onaa, inaderanaa, cunaeriin niha cachane jaan, naaonjoaainunri. Nitohaneein inoaenlu nena ichaonaate inae nitaje," naa erena dedeeu toniine janane aonaun.

<sup>5</sup> Nii janate:

"Canune nacoauneein enachasine neein itolere coaunaain neeun. Caa erena ichei aitorichaaunine jaan laenaun. Acate esinae rauhijiriin nohanelanaala ichei aitorichaaunine rijijieein airichaainne coina erena ne," nae canu rai, nii rori caohacha ichoae laujui.

<sup>6</sup> Nii baihate:

"Inae nitohaneein ichanohiniha. Canune itolere nunuheteraneein satono teranein neeun. Chateeinti cocoirihane jesinaeca arihane rijijieein Canu ariin ne, niine core colane cocoareeuni, nii chariji bana satonoelanaala ichaonaa tera jesinaeca que. <sup>7</sup> Chateeinti itolere necairichanaa abaataain satono que tiaain ne, nii raite cainanohiniha cureein. Chaen techu rai Coaunera

nichaaunne jana, aca canu calaohineein nereein. <sup>8</sup> Nena laen nii Canu sacunaa jeriheichuru, nii Canu esenetana jeriheichuru, namute cacha cotaairiin nenacaauru, sonajaain jaaoreraauru, rai sinijeranelanaala nenea ene aina ichao jeraquiin nenacaauru, namute quicha aina ichao jeraquiin nenacaauru, benaneein nenacaauru, nii ichanohichuru ecaanto coroaeraauru, satiin casajeeuru, naaonjoainurite, nii ohane baiha cacha itajeraneein nenea usi conemuri asofereneein moconaa cuhane jaonojoiniha cuurureein.” nae canu rai.

*Ena nenea Jerosaleen nese*

<sup>9</sup> Nii janate, nii caausineein anjeraauru nii caainsii muruaaneein satononejeein cacha cairichaeranu que biji achunequiin nenacaauru caje nenea leinjiin anjera:

“Chajaaute caa coarae. Caate Carenero Narejeen comasainu que nenacaaurune,” nae carai, nii satiin Jesocurisito ranojoneein nenacaauru coarateein.

<sup>10</sup> Nii janate, nii canu que Cana Coaunera Suujue coaratenojoin ichatane ucuuno seeonjoan que canu amaain, dede caje Cana Coaunera acatiha fauha unaa Cana Coaunera nese Jerosaleen coarate canu que, nii leinjiin anjera. <sup>11</sup> Nii janate, conoha Cana Coaunera necaohachane tocohaneein, jataain caohatiin cono te nii nese. Jataain coretiin nenea ajeri jaberoco tocohaneein jiquihaquiin, ajeri jataain nojoein nenea jasje tocohaneein asaun tiaain inanacatiin. <sup>12</sup> Nii nese tinonocoritiinte ne, jataain ecuuneein rijia lechoonca coroata bacuujaain. Nii janate, nii acuujuua nainetiin neeure leinjihanaain anjeraauru. Nii nese bacuujuua nainetiinte ne, laenanohineein lechoonca coroata lauriin nenacaauru Israelitacuru nefoerate curuaacuru. <sup>13</sup> Nichatajai acujuate ne, enoto mitu nichajai que. Jana nichatajai acujuate ne, enoto soo nichajai que. Jana nichatajai acujuate, enoto soo coarajeein cana raotono nichajai que ne. Jana leecha nichatajai acujuate, enoto soo nichajai coarajeein cana ajaabiji nichajai que ne. <sup>14</sup> Nii ajeri laenanohineein niha lechoonca coroatajai Carenero Narejeen rai afosotooru curuaacurune jaan ajeri quete temurae nii nese coriha rijia.

<sup>15</sup> Nii canu aina erenaa anjerate, oro caje ichanohin cojunacatihane jaannu amae, que nii nese coujunacateein acuujaauru, rijia, naaonjoainuri cojunacatihane jaanu que. <sup>16</sup> Nii janate, rai caare aina ita jaraaone rai jaratono. Nii cojunacatihane jaanu que niicha amai que, nii nese cojunacatiha nii anjerane janate, coroata oaraanca coroata fasha quilometorone rai caare, jaratono, nucuuno, naaonjoainuri.

17 Nii baiha nii rijia ucuuno cojunacatiha, joaenreein cha cojunacatiha cachaaaurune rijijiei metoro quene janate, saota choonca saouqui metoroe.

18 Ajeri jataain nojoeein nenea jaspe caje ichanohiniha rijiane janate, bidirio jicharoaain ichanohin tocohaneein, oro nejesina caje ichanohi ne nii nese. 19 Nii janate, jataain coreein nenea araai laurii ajeri caohacha que urerianohineein ne, nii rijia temuracuru ajerichuru. Nii jauriaanejeein nunuhe neein nenea rijia temurate, ajeri nojoeein nenea jaspe caje ichanohi ne. Jana nii coroata temurate, ajeri caohacha safiro neein niicha curuaateuri caje ichanohi ne. Jana nii nichatajate, jataain jiquihaquiin nenea agata caje ichanohi ne. Jana nejenate, esmeralda caje ichanohi ne. 20 Nii jana nesaoquite, ajeri onesi caje ichanohi ne. Nesaotanete, lanaajiojoaain nenea cornalino caje ichanohi ne. Jana caainsiinite, jataain jiquihaquiin nenea crisolito caje ichanohi ne. Jana fosanite, berilo caje ichanohi ne. Jana isconite, topasio caje ichanohi ne. Lechooncanite, beraurosiojoaain asaauntiaain inanacaain nenea curisoprassa caje ichanohi ne. Jana nii lechoonca leinjiinte, jataain coretiin nenea ajeri jasinto caje ichanohi ne. Jana nii lechoonca coroatajate, jichosijiojoaain nenea amatista caje ichanohi ne. 21 Nii lechoonca coroatajai acuujuate ichanohi ne, lechoonca coroatajaain jataain ajeri caohachaneein nenea perla caje. Le bacuujuaauru acuujuate ichanohi ne, leinjihanaai ajeri perla caje. Jana nii nese cataaun cunaa nese coerote, bidirio tocohaneein jiquihaquiin asaun tiaain inanacaain oro nejesina caje ichanohi ne.

22 Nii jana coatiha nii leinjiinijin Teenforo coarinaaun nii neseu, cana Curuaanaa itolere que nelateein itolere ichana naineraneein nenea Cana Coanera, rai Calaohi-Carenero Narejeen aina ecu nenea Teenforo neeuruhane jaun. 23 Nii jaun coatiha enoto, atene, naaonjoainuri lateein nihei nii nese conaeranu que, inae rai necaohacha que conaa Cana Coaunerane jana, rai cono neein niha Carenero Narejeene jaun. 24 Satiin lauri lauri ichaonacaauru cachaaaurute, nii nese que conaeraain nii nese que amuhemuhecureein. Nii jana satiin caa chauratane que nenacaauru curuaanaacuru *reychurute*, itolere acaauruhacha latei teeurureein acaauru rai. 25 Niheichu nii chariji bana nefurinaain acuujuu. Niheichu ecu nerinaain nocohena. 26 Satiin lauri lauri ichaonacaauru cachaaaurute, raotojoeein neeuruhane jaanu, acaauru necaohacha que necaohachain neeuruhane jaanu, naaonjoinunru amaaureein nii neseu. 27 Nete laen, nii chariji bana enoorenereein nii Cana Coanera rai

caohachanelanaala baasoneein nenacaauru. Niheichu, nii namute cacha cotaairiin casajenetiin nenacaauru enonaa nainecururinaain. Leinjiin nii Carenero Narejeen nii chabana satonoelanaala nenea ichaonaa que ichaoenihuru curuaa siricha quiricha cuhane laenanohineein curuaa sirichauruhachate, enonaa nainereein nii neseu.

## 22

<sup>1</sup> Nii baihate, leinjiin nucuhe ajiarojoeritiin nenea ichaonaa tera nucuhe coarate canu que nii anjera. Nii janate, Carenero Narejeen nelaurianaja aina, Cana Coaunera nelaurianaja rori *trono* jeelai caje mitue nii acau- ajiarojoeritiin asaun tiaain inanacanaa. <sup>2</sup> Nii nese cataaun cunaa bero cuhane, chaen nii nucuhe auhaniha, naaonjoaainte ita jeraniha omarohin le ateeuru naineein inacae nii ichaonaa tera enuha. Nitohaneente le jaanaca cuhane lechoonca coroata saain inacae nii enuha. Jana nii enuha ichaonaa tera alote nelate que necoichacuruha lauri lauri ichaonacaauru cachaaurune coina. <sup>3</sup> Nerinaain ecu nechu aansaineein ichoai. Cana Coaunera aina Carenero Narejeente, nii neseu nereein jelai Curuaanaa neein cocoainanacaineein. Nii jana rai cachaaurute coroaeca cuurureein. <sup>4</sup> Cana Coaunera ainate ita acatiha neein ita coaraain rai nauri que Cana Coaunera curuaa sirichurureein. <sup>5</sup> Ecu nerinaain nocohena. Cono laatecururinaain nii rai cachaauru. Enoto niha natiin laatecururinaain. Cana Coaunerate, acauru cono neein nereein. Nii rai cachanein nenacaaurute curuaanaa niha cuurureein chabana satonoelanaala.

### *Ichuunijiha turuha Jesocurisitone*

<sup>6</sup> Nii baihate:

“Caa erenaate esinae rauhijiriin, nii nohane lanaala ichei aitorichaaunine rijijieein airichaaaine coina erenaa ne. Nii Cana Coaunera, nere beebejeeuruha *profetacurune* coina berateralute rai anjera letoae, inae ichuunejeeonriha nitohanerichaaainene jaun, rai cachanein nenacaauru que coaratihane coina,” nae canu rai nii anjera.

<sup>7</sup> Nii janate aonacaanne jana: “Carajae lanaalane inae turuha ureunni. Nerausiaaecate cuurureein caa quiricha cuhane laenanohineein nenea Cana Coaunera beratenojoin tonoraain nenacaauru,” nae Cana Coaunera Calaohi Jesoso.

<sup>8</sup> Canune Joaan neein coaraain aonaun. Nii coaraain aonacaanne baihane, nii canu que coaratera anjera tija asaee neseeonriaaun, coroaecaane coina.

<sup>9</sup> Nete canu rai:

“Coa nitohanai ichaa. Canu netonaine aaine rijijieein, Cana Coaunera cachanein neeun. Satiin ii nejeraauru, caa

quiricha reretaain coaraain tonoraeraauru, Cana Coaunera ere que erenacaauru- *profetacuru*, naaonjoainuri rijijieein neeun canu netonai. Cana Coauneraacha coroaacuu,” nae nii anjera canu rai.

<sup>10</sup> Nii baihate coaiten aite carai:

“Coaa leeochoauru rai belanaala caa quiricha cuhane laenanohineein nenea- Cana Coaunera ere rucuheca ii suujuaacha cuhane. Leeochoauru rai beeu. Inae jataain ichuunijaha nitohanai cojoanonaa que turuhane. <sup>11</sup> Chunocoha cacha Cana Coaunera ere aohana jerenihane, nihei tonaain erenaa najaanu. Nirijieeincha baaso ichajeein sacuhane coina reroecanaa nainihaacache. Esinae rauhijiriin caohachaaain suujua coaraain Cana Coaunera sacunaa jeriha cachane, jelai teein Cana Coaunera cachaneein nihane jeriha Cana Coaunerane rijijieein sacuhane raite ne,” nae nii anjera canu rai.

<sup>12</sup> Niritiinte: “Aiha. Carajaelanaalane turuha ureeunni. Chaen nechu, acaauruhacha ichai nainejeein cainacaaune jaanu uhaain ureeunni, le cacha cachaauru rai tihanune coina. <sup>13</sup> Canune jauriaanejeein itolere nunuheteraneein satonoteraneein nenea neeun” nae Cana Curuaanaa Jesoso.

<sup>14</sup> Nerausiaaecate cuurureein canu esenetaauruhane coreniha rai nosa caje canu ichoteratenojieein nenacaauru, nii ichaonaa tera enuha inaa lein, Cana Coauneraacha rucujuei nanaanajaun enonaa nainecuruhane jaun. <sup>15</sup> Nete laen enoelanaala jianacoon nedaaurureein, nii Cana Coaunera coitucuelanaala nenacaauru, baasoneein ichaonacaauru cacha baasooru, benaneneein nenacaauru, sinijerane lanaala nenea ene aina ichaojeraconacaauru, enecuru nihanatiin rai lananelanaala nenea quicha aina ichaojeraquiin nenacaauru, sonajaain jaaorera, ichanohin ecaanto corojeein nenacaauru, satiin nechu jataain coritaraacha ichajeein, acaacha ichajeein nenacaauru, naaonjoainuri. Nii janate:

<sup>16</sup> “Canune Jesusoneein caa canu rai anjera letoaaun, satiin caa aitohane rijitoejin, janijiin canuhacha raauri canu cachaauru rai biha cuhane coina. Canune Rabiri caje neferatanaaneein neeun. Canune janonaa rai mitunaa arasijie rijijieein neeun,” nae.

<sup>17</sup> Cana Coaunera Suujue, Carenero Narejeen comasai, naaonjoainurite: “Chajaau,” naauruhane jana: “Chajaaujian,” naaurureein aohanraauru. Chunocoha cocoireein acau conaa jereein uhite, nii core colane ichaonaa tera acau coreein.

<sup>18</sup> Satiin caa quiricha cuhane laenanohineein nenea caitoonjoante aitocaaunne rijijieein situreein. Chunocoha cau caa quiricha cuhane nihane amurijiriin joojin nenaate,

caa quiricha cuhane laenanohineein niha caainsii laurini cacha cairichaeranu jaan que cairichaa cureein Cana Coaunera. <sup>19</sup> Jana chunocoha caa canuhacha beratei quiricha cuhane laenanohineein nenea coreein, que cacha relaelanaala, naaonjoain nenea cajete, nii ichaonaa tera, que banihateein niicha rucujei enuha inaa rulureein. Chaen caa quiricha cuhane laenanohineein nenea Cana Coaunera nese neein nenaane maajeein caje rulureein.

<sup>20</sup> Caritiin aitiinte: “Aiha, carajaelanaalane inae turuha ureeunni,” nae Cana Curuaanaa Jesoso.

Nitohanemiinjian. Chajaain sorotiin uu Cana Curuaanaa Jesoso.

<sup>21</sup> Cana Curuaanaa Jesoso itolere inaraacha latei teein inara rausiaaemiinte raotojoein neeiche.